


Goãmұ Yare Wereripұ



Desano: Goãmұ Yare Wereripұ New Testament

Goãmu Yare Wereripu
Desano: Goãmu Yare Wereripu New Testament

copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source files dated 29 Jan 2022
17771afc-c309-57fd-9ff3-2d5a0cd59ff1

Contents

SAN MATEO	1
SAN MARCOS	72
SAN LUCAS	115
SAN JUAN	186
HECHOS	238
ROMANOS	300
1 CORINTIOS	330
2 CORINTIOS	360
GALATAS	379
EFESIOS	390
FILIPENSES	400
COLOSENSES	407
1 TESALONICENSES	414
2 TESALONICENSES	420
1 TIMOTEO	423
2 TIMOTEO	431
TITO	437
FILEMÓN	441
HEBREOS	443
SANTIAGO	466
1 PEDRO	474
2 PEDRO	482
1 JUAN	487
2 JUAN	494
3 JUAN	495
JUDAS	496
APOCALIPSIS	499

San Mateo

Jesucristo Goãmu magu ïgu acawererã iribojegue majarã erã waïre were gojamuhtañumi Mateo

¹ Jesucristo ñecu sumarã iribojegue majarã árĩñuma. Eropigu ïgu ñecu muru iribojegue majagu Davi waicugu árĩmuriñumi. ïgu árĩboro core erã ñecu Abrahã waicugu árĩmuriñumi.

² Abrahã Isaa pagu árĩñumi. Isaa Jacobo pagu árĩñumi. Jacobo Judã sã pagu árĩñumi. ³ Judã porã Fares Zara sã árĩñuma. Erã pago Tamar waicugo árĩñumo. Fares Esrom pagu árĩñumi. Esrom Aram pagu árĩñumi.

⁴ Aram Aminadab pagu árĩñumi. Aminadab Naasón pagu árĩñumi. Naasón Salmón pagu árĩñumi. ⁵ Salmón Booz pagu árĩñumi. ïgu pago Rahab árĩñumo. Booz Obed pagu árĩñumi. ïgu pago Rut árĩñumo. Obed Isaí pagu árĩñumi. ⁶ Isaí Davi pagu árĩñumi. Davipu Israe majarã tauro opu árĩñumi. ïgu Uria waicugu muru marapore ïgu marapocura puhru Salomo waicugure porãcñumo igo.

⁷ Salomo Roboam pagu árĩñumi. Roboam Abías pagu árĩñumi. Abías Asa pagu árĩñumi. ⁸ Asa Josafat pagu árĩñumi. Josafat Joram pagu árĩñumi. Joram Uzías pagu árĩñumi. ⁹ Uzías Jotam pagu árĩñumi. Jotam Acaz pagu árĩñumi. Acaz Ezequia pagu árĩñumi. ¹⁰ Ezequia Manase pagu árĩñumi. Manase Amón pagu árĩñumi. Amón Josia pagu árĩñumi. ¹¹ Josia Jeconia sã pagu árĩñumi. Erã árĩrisubure Israe yeba majarãre Babilonia majarãpu ñeagãñuma erã ya yebague peresu iimorã.

¹² Eropi Babilonia yeba erã ejara puhru, Jeconia marapo Salatiere porãcñumo. Salatie Zorobabe pagu árĩñumi. ¹³ Zorobabe Abiud pagu árĩñumi. Abiud Eliaquim pagu árĩñumi. Eliaquim Azor pagu árĩñumi.

¹⁴ Azor Zadoc pagu árĩñumi. Zadoc Aquim pagu árĩñumi. Aquim Eliud pagu árĩñumi. ¹⁵ Eliud Eleazar pagu árĩñumi. Eleazar Matán pagu árĩñumi. Matán Jacobo pagu árĩñumi. ¹⁶ Jacobo José pagu árĩñumi. José María marapu árĩmuriñumi. Mariapu Jesu pago árĩmo. Jesupu masare taubu árĩgu Cristo erã arĩ piyudigu árĩmi.

¹⁷ Eropirã Abrahãre mari queonugacũ, ne Daviguere mari queotucũ, oã árĩpehrerã árĩrã catorce cururi gohra árĩñuma. Eropirã mari dipaturi Davire queocũ, ne Babiloniague Israe majarãre erã aigãboro core queotucũ catorce cururi gohra dipaturi árĩñuma. Eropiituhaja Babiloniague erã ejara puhru mari queonugacũ ne Cristo ïgu masa dehyoacũgue mari queotucũ catorce cururi gohra árĩñuma daja.

Jesucristo ïgu masa dehyoarare wereñumi Mateo

Lc 2.1-7

¹⁸ Eropigu Jesucristo òpa masa dehyoapu. ïgu pago Mariapu José mera mojoto diribo arĩpo. Eropigo igo ïgu mera marapucubori core Espĩritu Santo ïgu turari mera majigu bocapo. Eropigo igo basi majigu opawahgũriñere masipo igo. ¹⁹ Eropigu José igore mojoto diribodigu irire masigu, diaye árĩrire ïgu ïgu árĩgu igore cóabu iiripu. Iгоре guhyasiuro iidiabigu, masa erã masibiricũ ta igore cóabu iiripu. ²⁰ Irire ïgu pepirisubu Goãmu anyupu quẽroque Josere dehyoagu, òpa arĩpu.

—José, Davi mura pārami, María mera guhyasīriro mariro mojoto dirique. Igo Espiritu Santo ĩgu turari mera ne nijipo arī wahgārigo āhrimo. Eropigu guhyasīriro mariro igore mojoto dirique. ²¹ Igo porācugocumo. ĩgu igo magu ta ĩgu ya maca majarāre erā űeri iira dipuwajare taubu arīgucumi. ĩgu eropa taubu arīcā Jesu waīyeguca maħu ĩgugāre, arīpu anyu Josére.

²² I arīpehreri eropa wayoro iribojegue majagu Goāmu ya weremuħtadigu ĩgu arī gojadiro dopa ta. Irire ĩgure Goāmu gojadoreñumi. Őpa arī gojamuriñumi Goāmu yare:

²³ Nómeo ĩmu mera arībigo, majigugāre bocago porācugocumo igo magugāre. Eropigu Emanuel waicugucumi ĩgugā, arī gojañumi Goāmu yare gojayudigugue.

Emanuel arīdiaro “Goāmu mari mera ta āhrimi,” arīdiaro iiaa.

²⁴ Goāmu yagu anyu Josére eropa arī werera puħru Josėpu wahgā anyu ĩgu dorediro dopa ta María mera mojoto diripu. ²⁵ Igo magugāre igo porācuboro core Josėpu igo mera arīnibiripu. Igotu porācupo pare. Eropigu ĩgupu igo magugāre Jesu waīyepu.

2

Abe muririro majarā ðaro masirā Jesure ĩarā ejañuma

¹ Judea yeba arīri maca Belén waicuri maca Jesu masa dehyoapu. Irisubu Herode Judea yeba majarā erā tauro opu arīpu. ĩgu eropa masa dehyoara puħru necāre buherā necāre ðaro masirā abe muririrupu majarā ahri, Jerusalėgue erañorā. ² Eropa erarā, masare ero majarāre serėpiñorā:

—¿Judio masa erā tauro opu arību dohpaguere nohogue masa dehyoyuri ĩgu? Abe ĩgu muririro majarāgue arīrā, ne necāmu dehyoacū ĩabu. Eropa ĩgu dehyoacū ĩha “Opu masa dehyoagu iicumi,” arī masiabugua. Eropa ĩgu ne dehyoacū ĩarā gua yujuro mera ĩgure umupeorā arirā ĩabu ðgue, arī wereñorā necāre buheri masa masare.

³ Erā eroparīcū pee erā opure Herodere irire wererā wañorā. Eropigu gajigu opu masa dehyoarare erā werecū peegu Herodepu guñaricupu. Eropirā arīpehrerā Jerusalén majarā sā ĩgu iro dopa ta guñaricunorā erā sā. ⁴ Eropigu Herodepu arīpehrerā pahia oparāre, judio masare buherā sāre sihupehocāpu. ĩgu sihubeora puħru erā gamenerepehrecū ĩha, erāre serėpipu ĩgu:

—¿Nohogue masa dehyoagucuri Goāmu beyedigu Cristopu mua pepicū? arī serėpipu ĩgu erāre. ⁵ Őpa arī wereñorā erā ĩgure:

—Belén, Judea yebague arīri macague Cristo masa dehyoagucumi. Őpa arī gojamuriñumi Goāmu yare weremuħtadigu:

⁶ Belén waicuri macague yujugu opu dehyoagucumi. ĩgu Goāmu yarāre Israe majarāre dorebu arīgucumi. Eropiro Belén Judea yeba arīri macari watope bu arīri maca arīquerero gaji macari tauro arīroca, arī gojamuriñumi Goāmu yare gojayudigugue, arī wereñorā erā Herodere.

⁷ Erā eropa arīra puħru Herode masa erā peebirogue abe muririrupu arinirāre sihubeopu. ĩgu pohrogue erā ejara puħru, erāre ĩgu serėpira puħru, erā necāmure erā ĩaranure wereñorā erā ĩgure. ⁸ Erā eropa werera puħru Herodepu erāre Belėgue obeogu ðpa arīpu erāre:

—Īgugāre ōaro amaque. Īgugāre mua bocajara puhru yu säre wererā arique mua. Īgugāre umupeogu wabu iiaa yu sã, arĩ were obeeripu erāre Herodepu.

⁹ Īgu eropa arĩra puhru, erã waha wañorã. Erã eropa wacũ abe muririropu erã iadiru necãmupũ erã core wamuhtaniguicãyoro. Eropiro majigugã Īgu arĩro weca dujanugaja wayoro iriru necãmũ. ¹⁰ Eropirã necãmũ dujanugajacũ iarã, burigã mucubiriñorã erã. ¹¹ Majigugã Īgu arĩri wihigue eja, ñaja wañorã erã. Eropa ñajajarã majigugāre Īgu pago mera arĩgure iañorã erã. Eropirã erã mereja, ĩgure umupeoñorã. Umupeotuhaja, erã ya comorire aibeo, pãgũñorã erã ĩgugāre aigãrirare omorã. Eropirã orore, buirire, povesuri säre aĩwiu, ĩgugāre waja mariro oñorã. ¹² Irire otuhara puhru carĩa wañorã erã. Erã eropa caricũ quēroque Goãmu werepu erāre: “Herode pohro dujabiricãque,” arĩ werepu Goãmu erāre quēroguere. Īgu eropa arĩ werera puhru, erãpu wahgãñorã. Erã eropa wahgāra puhru gaji mague erã ya yebague dujarã dujaa wañorã.

José sã Jesugāre aĩ duhrigã wañuma Egiptogue

¹³ Erã eropa wara puhru Goãmu yagu anyu quēroque Josere dehyoagu, ōpa arĩ werepu:

—Wahgãque. Herodepu majigugāre wejēbu amagucumi dohpaguere. Eropigu majigu säre ĩgu pago säre Egiptogue duru aĩ duhrigãque. Eroguere yu dipaturi mare werecũgue dujarique, arĩ werepu anyu Josere.

¹⁴ Īgu eroparicũ peegu, Josépu ñami ta wahgã, majigu säre ĩgu pago säre Egiptogue aĩ duhrigã wapu. ¹⁵ Egiptogue eja, Herode ĩgu ojocaripõ ta eroguerẽ arĩñorã erã. Eropa wayoro iribojegue majagu Goãmu ya weremuhtadigu ĩgu arĩ gojadiro dopa ta. Irire ĩgure Goãmu gojadoreñumi. Ōpa arĩ gojamuriñumi Goãmu yare gojayudigugue: “Egiptogue arĩgure yu magure sihubeobu,” arĩ gojamuriñumi Goãmu yare weremuhtadigugue.

Herode majirãre wejēdoreñumi

¹⁶ Eropigu necã buherã erã duhri dujaacũ peegu Herodepu guatariacãpu. Eropigu Belén majarãre, iri maca pohro majarã säre erã porãre uma porãgãre wejēpehocãdorepu ĩgu. Ne dehyoarãre wejēnugadore pe bojori oparãre wejētudorepu ĩgu. Nere necãre buheri masa necãmure erã ñaranure wereñorã Herodere. Erã eroparicũ peegu ĩgu Jesu masa dehyoarĩnure masigu, “I nacu bojori ta ĩgu opacumi,” arĩgu majirãre pe bojori oparãre wejētudorepu. ¹⁷ Īgu eropiicũ iribojegue majagu Jeremia Goãmu yare weremuhtadigu ĩgu arĩ gojadiro dopa ta eropa wayoro. Ōpa wereyu gojañumi ĩgu:

¹⁸ “Ramã waicũroque busuro carabu. Burigã bujawereri mera orerã carama. Raquel acawererã Israe masa marasã nome erã porãre burigã orerãcoma. Erã porã sircũ iarã ne bujawere duhosome,” arĩ gojañumi iribojeguere Herode majirãre wejēdoreboro core.

¹⁹ Eropi Herode ĩgu sirira puhru Egiptogue arĩdigure Josere Goãmu yagu anyu quēroque dehyoapu daja. Eropa dehyoagu ōpa arĩpu Josere:

²⁰ —Majigugāre wejēdinirã mura sirĩa wahãma. Eropigu ĩgu majigure, ĩgu pago säre Israe yebague aĩ dujaaque muhu, arĩ werepu anyu Josere.

²¹ Īgu eropa arĩra puhru wahgã, majigugāre ĩgu pago mera ta Israe yebague aĩ dujaa wapu. ²² Arquelao Herode magu ĩgu pagure gohrotodigu

Īgu árícũ pee, Josépu Judea yeba árġgu güipũ. Eropigu dipaturi ta Goãmu quëroque ĩgure werenemopũ. Īgure Judeague dipaturi dujadorebiripũ. Īgu eropa werera puhru erã Galilea yebague waha wañorã. ²³ Iri yebaguere Nazare waĩcũri macague eja árĩñorã erã. Eropa iñorã erã Goãmu yare weremuhtanirã erã gojadiro dopa ta. Ōpa arĩ weryumuriñuma: “‘Cristo Goãmu beyedigu Nazare majagu ta àhrimi,’ arĩrãcoma masa,” arĩ gojamuriñuma iribojegue majarã.

3

Ñu waĩyegu masare wereñumi
Mr 1.1-8; Lc 3.1-9, 15-17; Jn 1.19-28

¹ Eropi irisubure Ñu Goãmu yarãre waĩyeri masũ árĩpu. Judea yeba masa marirogue ĩgu Goãmu yare werenugapũ. ² Ōpa arĩ werepu masare ĩgu pohro ejarãre.

—Mua ñero iirare bujawere duhucãque. Ūmaro majagu Goãmu mua opũ ĩgu árĩboro merogã duhyaa, arĩ werepu ĩgu Ñu.

³ Iribojegue majagu Isaia Goãmu yare weremuhtadigu Ñu eropa waburire ōpa arĩ gojajuñumi:

Masa marirogue werenigui gaguinigu ōpa arĩ buhegucumi ĩgu: “Mari Opũ ĩgu ariburi mare amuro dopa ta ĩgu ariboro core ðarã árĩyuque mua ĩgure peemorã,” arĩ wereniguigucumi, arĩ gojañumi Isaia.

⁴ Ihi Ñu camello ya gasirire suhri sañaqu, waibugũ ya gasirodare tuãdiudigu árĩpu. Eropigu poreroare bamuripũ. Eroparícũ nugũ majarã momere bapũ. ⁵ Jerusalén maca majarã, árĩpehrero Judea yeba árĩrã, dia Jordán waĩcuriya pohro árĩrã sã ĩgure peerã wañorã. ⁶ Erã eropa pee, erã ñero iirare bujawere, Goãmure irire weretarimuriñorã erã. Erã eropa werecũ peegu dia Jordán waĩcuriyague Ñu erãre waĩyepũ.

⁷ Eropigu bajarã fariseo masa, saduceo masa sã ĩgure waĩyedorerã ejaçũ ĩagu Ñu werepu erãre:

—Mua ñero iiricurã àhraa mua. “Goãmure gua ñeri dipuwaja moabiricãporo,” arĩrã, çmua yure waĩyedorerã ahriri? ⁸ ĩgu mua ñero iira dipuwajare moabiricũ ōpa iique mua. Diaye ta mua ñeri iirare bujawererã árĩrã, ðarire gohrotorã árĩrã, ðarire iique mua. ⁹ Ōpa arĩ pepibiricãque: “Abrahã mari ñecu muru árĩmuripũ. Eropirã Goãmu mera ōhaa,” arĩ pepibiricãque mua. Muare arĩgu tiiaa. Abrahã pãramerã mua árĩri duhpihuri árĩbeaa. Goãmu gamegu i utãyeri mera gajirãre iimasimi Abrahã acawererãre. Eropirã Abrahã pãramerã mua árĩri bu gohra ta àhraa. ¹⁰ Ōpa àhraa: Mari masa yucũ iro dopa àhraa. Goãmupũ come opagu iro dopa àhrimi. Eropigu ñeri ðucacurĩ yucure pa cohã, iri nuguri sãre tabetagucumi. Tabetatuhaja, peamegue cóãgucumi ĩgu iri yucure, iri nuguri sãre. Eropa ta iigucumi mua sãre ĩgure gamebirãre. ¹¹ Yu puhru yũ tauro turagu arigucumi. Ōtariagu àhrimi. ĩgu iro dopa ðagu árĩbeaa yupũ. Eropigu ĩgure pepigu “Yu tamera bu gohra árĩgu àhraa,” arĩ pepia yuhũ. Mua ñero iirare bujawerera puhru, yupũ deco mera waĩyea. Yu puhru arigupũ yuhũ tauro iigucumi. Espiritu Santore ogucumi masa mera árĩniguibure. Eropigu peamegue ĩgu ñerire soewearo dopa ta ĩgupũ mua ñero iirire coegucumi. ¹² Yu puhru arigu trigo gasirire cóãgu iro dopa àhrimi. Gasirire cóãgu ĩgu sihburu mera árĩpehreri trigo yeri

gasirire suha weami. Īgu eropa suha weara puhru trigo gohra yeripure ĩgu diburi wihigue dibugucumi. Īgu suha weara gasiripure ĩgu soegucumi. Ōpa ii beyegucumi yu puhru arigupu. Ōarire gohrotonirāpуре ĩgu mera árĭniguicū ĩgucumi. Erā ñerire bujawerebirāpуре peamegue yaribiri peamegue cóāgucumi, arĭ werepu Ñu.

Ñu Jesure waĭyeñumi
Mr 1.9-11; Lc 3.21-22

¹³ Puhru Jesu Galileague árĭdigu wapu. Jordán waĭcariyague ejaпу Ñure “Yure waĭyeque,” arĭgu. ¹⁴ Negohraguere Ñu ĩgure waĭyediabiriripu.

—Cue, mapu yu tauro turagupure yure mu waĭyecū ōaboaya. Mure waĭyebu árĭbeaa yuhu, arĭ yuhripu Ñu Jesure.

¹⁵ Jesupu yuhripu ĩgure:

—Yure waĭyeque. Mari ōpa iirā Goāmu ĩgu dorediro dopa ta iirā iiaa, arĭpu Jesu. Īgu eroparĭcū peegu,

—Áu, arĭ yuhripu Ñu. ¹⁶ Eropa arĭtuhaja Jesure waĭyepu. Waĭyetuhajacū Jesu diague niguidigu majanugajapu. Īgu majanugajacū ta, umusi ĩgure pārima wayoro. Eropigu Goāmu yagu Espiritu Santo buja iro dopa bejagu ĩgu weca ĩgu دچارicū ĩapu ĩgu basi. ¹⁷ Eropro umarogue wereniguiro cariyoro:

—Ihĭ yu magu yu mahigu āhrimi. Īgu mera burigā mucubiria, arĭro cariyoro umaroguere.

4

Watĭ ñerire iidoreriñumi Jesure
Mr 1.12-13; Lc 4.1-13

¹ Eropi Espiritu Santopu Jesure masa marirogue wadorepu erogue watĭ ĩgure ñerire iidoreboro dopa.

² Erogue ejaгу, cuarenta nari gohra baro mariro árĭpu Jesu. Eropro puhraguere ĩgure oa pūriyoro pare. ³ Īgu oaboacū ĩagu watĭpu ĩgu pohrogue ejaгу ōpa arĭpu:

—Muhu Goāmu magu árĭgu ōpa ĩhmuque. Iyerire utāyerire bari poyacū iique, arĭripu ĩgu Jesure.

⁴ Īgu eroparĭcū peegu Jesu gamebiripu. Eropigu Jesu ōpa arĭ yuhripu:

—Goāmu yare erā gojarapū ōpa āhraa: “Masare bari mera dihta ojocaribiro gahmea. Árĭpehreri Goāmu ĩgu ya wereniguiro mera árĭro gahmea,” arĭmi Goāmu, arĭ yuhripu Jesu watĭre.

⁵ Īgu eropa arĭ yuhriра puhru watĭpu Jerusalén waĭcari macague Jesure aĭgāpu. Erogue eja, Goāmu ya wihi wecague Jesure aĭ murijapu ĩgu. ⁶ Aĭ murijatuha, ĩgure ōpa arĭripu:

—¿Diaye ta Goāmu magu gohra ta āhriri muhu? Goāmu yare erā gojarapū ōpa āhraa:

“Goāmu ĩgu yarā anyuare mure ĩhadibudoregucumi. Eropirā erāpu mure ĩhadiburācoma muge utāye weca mehbejari arĭrā,” arāa ĩgu gojarapū.

Erā mure eropa ĩhadibumorā árĭcū muhu Goāmu magu ta árĭgu ōgue buhrima dija ĩhmuque yare. Mure erā itamucū ĩhmuñata yare, arĭripu watĭpu.

⁷ Īgu eroparĭcū peegu gamebiripu Jesu. Ōpa arĭ yuhripu ĩgure:

—Goãmũ yare erã gojarapũ òpa arãa: “Goãmũ mua Opũ Ìgu arĩrare ‘¿Diaye ta àhriri?’ arĩ masidiarã Goãmũre ii Ìhudoremaabiricãque,” arãa Goãmũ yare erã gojarapũ, arĩpũ Jesu.

⁸ Ìgu eropa arĩ yũhrira pũhrũ umadigugue utãgugue Jesure aĩ mũriapũ daja. Iriũ wecague muri bejaja, arĩpehreri macarire i umũ majare Ìhmupũ Jesure. Erã opari sãre Ìhmupũ. ⁹ Eropa Ìhmugũ Jesure òpa arĩpũ: —Yũre mereja, “Mũhũ yũ opũ àhraa,” arĩ umupeoque mũhũ yũre. Mũhũ yũre eropa iicũ mũre arĩpehreri i macarire mũre ogũra, arĩ wereripũ watĩ.

¹⁰ Ìgu eroparĩcũ Jesu òpa arĩ yũhripũ daja:

—Satana, waque mũhũ. Òpa arãa Goãmũ yare erã gojarapũ: “Mũ Opũ Goãmũ dihtare umupeoque. Ìgu ya doreri dihtare iique,” arãa Goãmũ yare erã gojarapũ, arĩpũ Jesu watĩre.

¹¹ Ìgu eroparĩcũ peegu watĩ waha wapũ. Ìgu wara pũhrũ anyuapũ eja, Jesure itamuñorã. Ìgũre barire oñorã.

Galilea yeba Jesu buhenũgañumi
Mr 1.14-15; Lc 4.14-15

¹² Eropi Ñure peresu erã iicũ peegu, waha wapũ Jesu. Galilea yebague eja. ¹³ Ero arĩri macague Nazaregue waha, tarigã, Capernaum waĩcuri macague eja. Galilea waĩcuri ditaru pohro arĩbũ Capernaum. Iri maca Zabolón yeba pohro, Neftalí yeba pohro arĩbũ Capernaum. Erogue eja arĩpũ Jesu. ¹⁴ Eropa ta iipũ Jesu iribojegue majagu Goãmũ yare weremuhtadigu Isaia Ìgu arĩ gojadiro dopa ta. Òpa arĩ gojayañumi:

¹⁵ Zabolón yeba pohro, Neftalí yeba pohro, ditaru waro, Jordán waĩcuriya gajipũ masegue Galilea yeba àhraa. Iri yeba judio masa arĩbirã ya yeba àhraa. ¹⁶ Ero majarã Goãmũ yare òaro masibeama. Eropa masibiriquererã ta òagũre Ìarãgue masirãcoma. Erãpũ Goãmũre ne masibeama. Eropirã peamegue wamorã ta arĩrima. Eropigu yujugũ erãre Goãmũ yare masicũ iigucumi, arĩ gojañumi Isaia Jesu eraboro coregue.

¹⁷ Erogue arĩgu Goãmũ yare werenũgapũ Jesu:

—Mũa ñeri iĩrare bujawereque. Eropa iĩrã òaripũre gohrotoque. Umaro majagu Goãmũ arĩpehrerã tauro Ìgu opũ arĩburo merogã duhyaa, arĩ werenũgapũ Ìgu.

Wapicurã wai wejẽrãre Ìgu mera majarã arĩmorãre sihuñumi Jesu
Mr 1.16-20; Lc 5.1-11

¹⁸ Eropi Galilea waĩcuri ditaru tũrogue eja. Simore, Ìgu pagũ magũ Andre mera bocajapũ Jesu. Simo ta Pedro erã arĩ piyugũ arĩpũ. Erã wai wejẽri masa arĩñorã. Erã ya wejẽri yucure mehyurã iĩñorã iri ditaru wũari ditarugue. ¹⁹ Erãre boca òpa arĩpũ Jesu:

—Yũ mera majarã arĩmorã arique mũa. Yũ mera mũa aricũ waire ñeha gameneorã mũa arĩro dopa ta, Goãmũ yarã arĩmorãre masare sihu gameneomorã arĩcũ iigũra mũare. Yũ mera mũa aricũ eropa iimorãre amugũra mũare. Eropirã yũ mera arique, arĩpũ Ìgu erãre.

²⁰ Eropa Ìgu arĩcũ peerã ta erã ya wejẽdi yucure apicãa, Jesu mera waha wañorã.

²¹ Eropirã erã Jesu mera tarigã, Santiagore Ìgu pagũ magũ Ñu sãre bocañorã daja. Erã Zebedeo porã arĩñorã. Erã yaru dohodirugue erã pagũ mera erã sã erã ya wejẽdi yucure amurã iĩñorã. Erã perãre Ìgu

sihubeopu. ²² Īgu eropa sihubeocũ pee, erãpu erã pagure, dohodiru sãre api Jesu mera waha wañorã.

Bajarã masare buheñumi Jesu

Lc 6.17-19

²³ Eropi árĩpehroogue Galilea yebare Jesu buhe curipu. Judio masa gua buheri wirigue òari buherire, umaro majagu ĩgu opu árĩricurire buhepu. Eropigu dorecurãre òarã iigu árĩpehroogue dorecurire cóãpu ĩgu.

²⁴ Īgu eropa iicũ peerã Siria yeba majarã árĩpehroogue iri yeba árĩrã ĩgure masinũgañorã. Eropa masirã, gajiropa árĩri dore oparãre, watẽa ñajasunirãre, pũriri dorecurãre, sĩriri mura dorecurãre, ðupu turabirã sãre aĩ ejañorã Jesu pohroogue. Eropigu árĩpehroogue erãre òarã wacũ iipu Jesu.

²⁵ Īgu eropa iicũ ĩarã, Galilea yeba majarã Decapoli yeba majarã, Jerusalén majarã, Judea yeba majarã, Jordán waĩcuriya gajipu masepu majarã, bajarã masa ĩgu mera wañorã.

5

Utãgugue muria, ero buheñumi Jesu masare

¹ Masa bajarã ĩgu pohro erã ejacũ ĩagu Jesu utãgugue mურიapu. Muriya, ero doajapu. Ero ĩgu doacũ ĩgu buherã ĩgu pohroogue ejañorã. ² Erã ejacũ ĩagu òpa arĩ buhenũgapu:

Õpa árĩrã àhrima mucubirã, arĩ buheñumi Jesu

Lc 6.20-23

³ —Erã ñerire bujawererã, Goãmure gamerã mucubirã àhrima. Umaro majagu erã opu árĩroguere warãcoma erã. Umaro maja erã ya àhraa. Eropirã burigã mucubirãcoma.

⁴ “Orerã sã mucubirã àhrima. Erãre mucubiricũ iimi mari Pagu. Eropirã mucubirã árĩrãcoma.

⁵ “Gajirãre tarinũgadiabirã eropa árĩca arĩbirã mucubirã àhrima. Goãmũ “Ogura,” ĩgu arĩrare oparãcoma. Eropirã erã sã mucubirã árĩrãcoma.

⁶ “Goãmũ ĩgu dorero dopa iidiarã, òarire iidiarã mucubirã àhrima. Goãmũ ĩgu itamucũ erã òarire ii ojogorocurãcoma. Eropirã mucubirã árĩrãcoma.

⁷ “Gajirãre mojomoro ĩarã mucubirã àhrima. Erã eropa mojomoro ĩacũ Goãmũ erã sãre mojomoro ĩagucumi. Eropirã mucubirãcoma.

⁸ “Erã ñerire cóãnirã, mucubirã àhrima erã. Goãmure ĩarãcoma erã. Eropirã mucubirãcoma.

⁹ “Gajirãre gamequeacũ bosarã mucubirã àhrima. Erãre “Yu porã àhrima,” arĩgucumi Goãmũ. Eropirã mucubirãcoma.

¹⁰ “Goãmũ dorerire erã iira waja gajirã mera ñero tarinirãpu umaro majagu erã opu árĩroguere ĩgu yare oparãcoma erã. Eropirã mucubirãcoma.

¹¹ “Yahare mua iira waja gajirã muare erã turiquerecũ ta mucubirã àhraa mua. Muare erã ñero iicũ mucubirã àhraa mua. Yaharã mua árĩri waja muare árĩpehroogue ñeri quere goroweoquecũ ta mucubirã àhraa mua. ¹² Goãmũ yare weremuhtanirãre mua core árĩnirãre erãguere ta ñero iimuhtañuma. Mua sãre erãre iidiro dopa iicũ mucubirãque. Óaro

sīporācāque. Eropigu ūmarogue mua ejacū wuaro ōaro iigucumi muare Goāmū. Eropirā mucubirique mua, arī werepū Jesu.

*Moa iro dopa, boyoro iro dopa āhrima Jesu yarā, arī buheñumi
Mr 9.50; Lc 14.34-35*

¹³ Eropi Jesu buhenemopū:

—Moa waiḅuḅu dihire iri ñero wabiricū iiro dopa ta muapu yaharāpū árīpehrerā gajirāre ñerire erā iidiabiricū iiaa. Moa ñeri wacū dipaturi ōari iimasiya mara. Iri moa ne ōabeaa. Iri eropa wacū iri moare cóacāro gahmea. Irire cóāra pūhru weca ejama. Ne duhpihuri árībeaa iri erā cóāra. Iri duhpihuri árīburo dopa ta árībiricāque mua. Goāmū yapure iiniguicāque, arī werepū Jesu.

¹⁴ Eropi ĩḡu buhenemopū:

—Boyoro marire ĩhamasicū iiro dopa ta muapure yaharāpūre i yeba majarāre Goāmū yare wererā erāre masicū iiro gahmea. Ūtāḡu weca árīri macare duhmasiya mara. ¹⁵ Eropi sihāgodirure masa sihāgorā gajino docague dibubeama. Irure sihāgogū ūmarogue duhpeomi iri wihi majarā árīpehrerā erā ĩaboro dopa. ¹⁶ Eropirā mua sā mua Goāmūre mua umupeorire dibubiricāque. Ōaro wereque. Eropirā ōarire iique. Mua eropa ĩicū ĩarā masa erā mari Paḡu ūmaro majagure umupeorācoma. “Īḡu turagu, ōaḡu āhrimi,” arīrācoma, arī werepū Jesu.

Goāmū ĩḡu dorerire ĩḡu gojarare wereñumi Jesu

¹⁷ Eropa arītuhaja, erāre werenemopū:

—Īre mua masicū gahmea yūhū. Goāmū ĩḡu dorerire Moisere ĩḡu apirare, ĩḡu yare weremuñtanirā erā gojara sāre cóāḡu arīḡu ĩibiribu. Iri dorerire muare ōaro were amuḡu arīḡu ĩibu. Goāmū yare erā werediro dopa ta ĩḡu aribu. ¹⁸ Diaye ta muare arīḡu iiaa. I yeba ūmaro árīropē ta ĩḡu doreri sā árīroca. Goāmū ĩḡu dorerare iipehogucumi. ¹⁹ Eropirā iri dorerire yujurāyeri tarinūgarā, gajirāre eropa ta iidorerā bu árīrā árīrācoma. Ūmaro majagū opū ĩḡu árīroque bu árīrā iro dopa árīrācoma. Yujuñe doreriñe árīquerēcū ta erā tarinūgarā bu árīrā iro dopa árīrācoma erā. Gajirāpū ĩḡu dorerire ōaro ĩirā, gajirāre erā iiro dopa iidorerā ūmaro majagū ĩḡu opū árīroque oparā iro dopa árīrācoma erā. ²⁰ Muare arīḡu tiiaa yūhū. Masare buherā, fariseo masa sā Goāmū gamerire queoro ĩibeama. Erā tauro Goāmū gamerire iique mua. Mua eropa ĩibirā, ĩḡu opū árīroguere ne ejasome mua, arī werepū Jesu.

*Papūrire wereniguirire wereñumi Jesu
Lc 12.57-59*

²¹ Eropa arītuhaja erāre werenemopū:

—Īribojegue majarā ōpa arī wererare ta peenirā árīribu mua: “Masare wejēbiricāque. Masare wejēdiḡu erā dipuwaja moabu āhrimi,” erā arīrare peenirā árīribu mua. ²² I erā werera tauñariro muapure werenemogura. Īḡu acawereḡu mera papūridiḡupū masure wejēdiḡu iro dopa ta āhrimi. Eropigu erā dipuwaja moabu āhrimi ĩḡu sā. Īḡu acawereḡu gameturīḡu dipuwaja moadorerā pohro erā aigābu ta āhrimi ĩḡu sā. “Ñeḡu pee masibiḡu āhraa muhū,” ĩḡu acawereḡure arīḡure peameḡu wama ḡuhyataria ĩḡare.

²³ “Maa acaweregu mware ɨgu ɨhaturicũ ɨgu mera amumahtaque Goãmure serẽboro core. Eropirã Goãmũ wihigue maa Goãmure umupeorã waboro core, waibugere maa oboro core opa iique. ²⁴ Goãmure maa oburire duhcãnique dohpa. Maa acaweregu pohrogue waha, “Dipaturi ɨhaturibiricãrã. Irire iripẽta duhurã,” irire arique igure. Maa eropa amura puhru Goãmure umupeorã waque daja ɨgu ya wihigue.

²⁵ “Gajigu mware weresãdiagu, dipuwaja moadoreri wihigue mware ɨgu aĩgãdiacũ, ɨgu mera guaro mariro arique. Dipuwaja moadoregu pohrogue ɨgu aĩ ejaboro core ɨgu mera õaro ahmu wereniguique. Maa eropa iicũ ɨagu mware weresãbiribocumi. Maa eropa iibiricũ eroguerere mware aĩ ejacũ ɨguru dipuwaja moadoregure weresãgucumi. ɨgu eropa weresãcũ, beyeguru peresu iirãguere mware ogucumi. Eropirã erã mware peresu iirãcoma. ²⁶ Erogue ariniquirãca maa. Ne erã wajayedorerare maa wajayephecũgu wirirãca maa, arĩ werepu Jesu.

Gajigu marapo mera ñero iirire wereñumi Jesu

²⁷ Õpa arĩ werenemopu Jesu:

—Iribojegue majarã opa erã arĩ wererare peenirã arĩribu maa. “Gajigu marapo mera ñero iibiricãque,” erã arĩrare peenirã arĩribu maa. ²⁸ I erã werera tauñariro mware ipure werenemogura: Nomeore ñeabiriqueregu ta yujugu igo mera arĩdiagu igore ñero waribejagu ñero guña pepigu ñero iituhami igo mera.

²⁹ “Eropirã maa cuiru diayepu arĩdiru mera ñero iirã irirure maa gorawea cõabodiro dopa ta iri ñerire duhcãque. Irire duhubirã peamegue warãca. Maa cuirure cõacũ iri cuiru dihta dederea. Maa ñerire duhubirãpe peamegue waha ñetariaro tarirãca. Eropirã iri ñerire duhcãque. ³⁰ Eropirã maa mojoto diayepu maja mojoto mera ñero iirã iri mojotore tabeta cõabodiro dopa ta iri ñerire duhcãque. Irire duhubirã peamegue warãca. Maa mojotore maa cõacũ iri mojoto dihta dederea. Maa ñerire duhubirãpe peamegue waha ñetariaro tarirãca. Eropirã iri ñerire duhcãque, arĩ werepu Jesu.

Erã marasã nomere cõairire wereñumi Jesu

Mt 19.9; Mr 10.11-12; Lc 16.18

³¹ Õpa arĩ werenemopu Jesu:

—Iribojegue i sãre arĩñuma: “ɨgu marapore cõadiagu ɨgu cõaburire wereripu mera igore cõamasimi,” arĩñuma iribojeguere. ³² I erã werera tauñariro mwarure ire weregura: Yujugu ɨgu marapo amu mera ñero iibiriquerecũ ta igore cõabocumi. ɨgu eropa cõadigo gajigu mera marapucugo ñero iigo iicumogajigu mera arĩgo. Eropigu igo marapu igore cõadigu igore gajigu mera ñero iicũ iimi. Eropigu ɨgu cõadigo mera marapocugu igo mera ñero iigu iimi ɨgu sã, arĩ werepu Jesu.

Waĩpeo arĩrare wereñumi Jesu

³³ Õpa arĩ werenemopu Jesu:

—Iribojegue majarãre erã opa arĩ wererare peenirã arĩribu maa: “Maa arĩdiro dopa ta eropa iique. ‘Goãmũ mera diaye ta eropa iigura,’ maa arĩdiro dopa ta iique,” erã arĩ wererare peenirã arĩribu maa. ³⁴ I erã werera tauñariro mware weregura. “Umaro mera diaye ta arĩgu iiaa,” arĩ umaro mera arĩ waĩpeo aribiricãque. Umaropu mari Opu ɨgu arĩro ahraa. Bu arĩro arĩbeaa. Ero eropa arĩro arĩcũ iarã eropa arĩmaabiricãque. ³⁵ I

yeba mera ne waïpeo arîbircâque. I yeba sã Goãmu ya yeba ta âhraa. Ero eropa árîro árîcũ iarã eropa arîmaabircâque. Jerusalén mera ne waïpeobircâque. Turagu mari Opu ya maca âhraa Jerusalén. Bu árîro árîbeaa. Eropirã eropa arîmaabircâque. ³⁶ “Yu dipuru mera diaye arîgu iiaa,” arî waïpeobircâque. Mua poari borecũ iimasibea maa. Iri ñiri wacũ sãre iimasibea maa. Eropa iimasibirã árîrã “Yu dipuru mera diaye arîgu iiaa,” arî waïpeobircâque. ³⁷ “Iirãra,” arîrã waïpeoro mariro diaye ta irire arîniguicâque. “Iisome,” arîrã sã waïpeoro mariro arîniguicâque. Maa waïpeo arîrã watî ñegu îgu dorero dopa ta iirã iica, arî werepu Jesu.

Erã basi gamediarire wereñumi Jesu

Lc 6.29-30

³⁸ Ōpa arî werenemopu daja Jesu:

—Iribojegue ōpa erã arî wererare peenirã árîribu mua. “Mure gajigu mu cuirure îgu patiadiro dopa ta mu sã îgure patia gameque. Mu gucurirure îgu panuadiro dopa ta mu sã îgure îgu gucurirure panua gameque,” erã arî wererare peenirã árîribu mua. ³⁹ Erã werera tauñariro weregura daja muare. Muare ñero iidigure eropa îacâque. Yujupu mu wayuporãre pacũ, “Gajipu sãre padiagu paque,” arîque îgure. ⁴⁰ Gajigu mure dipuwaja moagure îgu weresãcũ, îgu dipuwaja moagupu muhu camisa mera mure weresãdigure wajayedorebocumi. Îgu eropa wajayedorecũ îgure oque. Iriñere otuhaja mu weca majañe suhriro sãre onemoque îgure. ⁴¹ Yujugu surara gajinore yuju kilómetro mure aîgãbasadorecũ, gaji kilómetro aîgãnemobasaque daja îgure. ⁴² Mure serẽdigure îgu serẽropẽ ta oque îgure. Eropigu gajigu mure wayudorecũ wayuque îgure îgu wayudorerare, arî werepu Jesu.

Muare îhaturirãre mahique, arî wereñumi Jesu

Lc 6.27-28, 32-36

⁴³ Ōpa arî werenemopu daja Jesu:

—Masa ōpa arîmurîma: “Maa mera majarãre mahique. Eropirã muare îhaturirãpũre îhaturi gameque daja,” erã arîrãre peenirã árîribu mua. ⁴⁴ Erã werera tauñariro weregura muare daja: Muare îhaturirãre mahi umupeoque. Muare ñero iirãre ōaro árîdoreque. Muare îhaturirãre ōaro iique. Eropirã muare ñero wereniguirãre muare ñero iirã sãre “Erã sã ōaro árîporo,” arîrã Goãmure serẽbasaque. ⁴⁵ Maa eropa iirã mari Pagu umaro majagu Goãmu porã âhraa mua. Goãmupu yujuropa ta iimi masare. Ñerãre, ōarã sãre abere asicũ iimi îgu. Eropigu Goãmu îgu dorerire iirã sãre, iibirã sãre deco merecũ iimi îgu. Masare yujuropa îgu iiro dopa ta mua sã masare iique. ⁴⁶ Muare umupeorã dihtare mua umupeocũ ne duhpburi árîbeaa iri. Ñerã masa wajasea corerã sã eropa ta iima. Eropirã árîpehrerãre umupeoque. ⁴⁷ Maa acawererã dihtare mua ōaro bocatîricũ ne duhpburi árîbeaa iri. Goãmure masibirã sã eropa ta iima. Eropirã árîpehrerãre ōaro bocatîrique. ⁴⁸ Ñeri marirã árîque mua. Mari Pagu umaro majagu îgu ñeri marigu îgu árîdiro dopa ta mua sã ñeri marirã árîque, arî werepu Jesu.

6

Ōari iirire wereñumi Jesu

¹ Dipaturi îgu werenemopu:

—Goãmu ya árĩburire ðarire iirã árĩrã, “Goãmu yare ipehorã àhraa gaa,” arĩ werebircãque gajirãre. Maa eropa arĩ wererã mua ðaro iira ne duhpiburi árĩbeaa. Eropigu Goãmu umaro majagu ðarire mua iira wajare muare osome.

² “Eropirã mojomorocurãre itamurã, irire masare ii ìhmubircãque. Masa erã ìabiropi itamuque erãre. Gajirã iro dopa iibircãque. Erã masa bajarã watope mojomorocurãre itamura. Mague niguirã watope mari buheri wirigüe arĩrã watope sãre ii ìhmuma. Erã eropa iiquererã erã mari purupure ñero iicorerã àhrima. Eropa masa watope ðarire ii ìhmurã erã, “Òarã àhrima erã,” masare arĩdorerã iima. Erã eropa iirã masa umupeori mera wajatatuhama. Eropigu Goãmupũ ne wajayesome erãre.

³ Eropirã mojomorocurãre itamurã, irire yayarogã iique. Maa wapi mera arĩquererã ta ìgu ìabiropi irire iique. ⁴ Masa erã ìabirogüe mojomorocurãre itamuque. Masa ìabirogüe mua itamuquerecũ Goãmupũ ìhami. Eropigu mari Pagupũ muare wajayegucumi, arĩ werepũ Jesu.

Goãmure serẽñĩnere buheñumi Jesu

Lc 11.2-4

⁵ Dipaturi ìgu werenemopũ:

—Goãmure serẽrã, mari purupũ ñero iicorerã iiro dopa iibircãque mua. Erã mari buheri wirigüe nigui, mague sãre nigui, Goãmure serẽ ìhmuma erã masare. Eropa serẽ ìhmurã diaye masa erãre umupeori mera erã mucubirituhama. Eropigu Goãmu erãpũre umupeosome. ⁶ Mupũ Goãmure serẽmorã mua ya taribugüe biha ñajaque. Biha ñaja mari Pagu ìasũya marigüe serẽque. Maa eropa iicũ masa erã ìabiropi arĩquerecũ ta mari Pagupũ muare ìagucumi. Eropa peegu muare ðaro ìigucumi ìgu.

⁷ “Eropirã Goãmure serẽrã, pepiro mariro mua serẽrare ta dipaturi serẽ maji dujabircãque. Eropa ta iima Goãmure masibirã. “Bajasuburi yuju disiro ta gaa serẽcũ guare peegucumi,” arĩ pepima erã. ⁸ Erã iiro dopa iibircãque. Maa serẽboro core mari Pagu mua gamerire masituhami.

⁹ Eropirã ðpa arĩ serẽro gahmea Goãmure.

Gua Pagu umaro majagu mu ðagu arĩrĩre arĩpehrerã umupeoporo.

¹⁰ Dohpaguere arĩpehrerã weca opu arĩque. Umuroguere mu dorero dopa ta erã iiro dopa ta i yeba majarã sã eropa ìiporo.

¹¹ Eropigu umuri nucũ gaa baburire oniguicãque guare. ¹² Gajirã guare erã ñero iirare gaa cãdijiro dopa ta mu sã gaa ñero iirare cãdijique. ¹³ Eropigu gaa ñero iiborare cãhmotaque. Eropigu guare ñerire iibircãcũ iique. Mũhu gaa Opu turagu eropa arĩniguigũca. Arĩpehrerã mure eropa umupeoniguicãrãcoma, arĩ serẽque Goãmure, arĩ werepũ Jesu.

¹⁴ “Gajirãre muare erã ñero iirare mua cãdijicũ ìagu, mari Pagu umaro majagu mua ñero iira sãre cãdijigucumi. ¹⁵ Gajirã muare erã ñero iirare mua cãdijibircũ mari Pagu mua ñero iira sãre cãdijisome, arĩ werepũ Jesu.

Goãmure umupeomorã ba duhurire buheñumi Jesu

¹⁶ Eropigu ìgu erãre werenemopũ:

—Goãmure umupeomorã ba duhurã bujawererã iro dopa ii ìhmubircãque. Eropa iima mari purupũ ñero iicorerã. Erã erã diaporire bujawererã iro dopa àhrima. Erã eropãrĩcũ erã ba duhucũ ìha masima masa. Diaye ta muare arĩgu iiaa. Masa erãre umupeocũ gahmema erã. Eropirã erãre umupeocũ ìarã mucubirituhama. Eropigu Goãmupũ erãre

ōaro iisome. Eropirā erā iiro dopa ii ĩhmubiricāque mua. ¹⁷ Mua sã ba duhurā mua árĩniguiro dopa ta árĩque. Mua ya dipure uyu mera sũcã ôaro wuapocãque. Mua diapori sãre coecãque. ¹⁸ Mua eropa iicũ mua ba duhucũ ĩha masisome masapu. Goãmu dihta ĩha masigucumi. Mua seyaro mua árĩcũ ĩgupu mua mera aħrimi. Eropa ĩagu ĩgu muare ôaro iigucumi, arĩ werepu Jesu.

Ɣmaro majare guñadoreñumi Jesu

Lc 12.33-34

¹⁹ Jesu werenemopu daja:

—I yeba majare aĩ gameneobiricãque. Ő maja boa waboca. Iri boabiricũ yajari masu aĩbocumi irire. ĩgu yajabiricũ mega tuabocoma. Eropiro i yeba maja dederema guhya aħraa. Eropirā i yeba majare burigã gamebiricãque. ²⁰ Ɣmaro majapure turaro gameque mua. Ɣmaro majare mega tuamasibeama. Eroque mua opaburi ne boabeaa. Eroguere yajari masu ne aĩmasibeami. ²¹ Eroque mua opaburi iri árĩcũ, umaro majare Goãmu yare burigã guñarãca mua, arĩ werepu Jesu.

Masa erã pepiro dopa ta iima, arĩ wereñumi Jesu

Lc 11.34-36

²² Eropi buhegu ôpa arĩ werenemopu erãre:

—Mua cuiri mua dupure sihãgodiru iro dopa ta aħraa, arĩ werediãcũ ôpa aħraa. Mua pepiro dopa ta iiaa. Mua ôaro mera pepirã árĩrã ôarire iiaa. ²³ Mua ñerire pepirã árĩrã ñeri dihtare i mua. Ɣmaro majare mega tuamiaa. Eropirā mua ñeri dihtare mua pepiniguicãcũ iri ñeripu ñetariari aħraa, arĩ werepu Jesu.

Niyerure gamerã, Goãmupure gamebeama, arĩ wereñumi Jesu

Lc 16.13

²⁴ Eropigu ĩgu erãre werenemopu:

—Yujugu Goãmupure guñagu niyerupure guñabeami. Niyerupure burigã guñagu Goãmupure guñabeami. Eropigu niyeru dihtare gamegu árĩgu Goãmure mucubiricũ iibeami. Goãmu sãre niyeru sãre peñere gametarimaja masiya mara muare, arĩ werepu Jesu.

Goãmu ĩgu porãre ĩhadibumi, arĩ wereñumi Jesu

Lc 12.22-31

²⁵ Eropigu erãre werenemopu:

—Eropigu muare ire arĩgu iiaa. Mua árĩricurire mua barire, ĩhririre, suhri sãre wuaro guñaricubiricãque. Muare deyoro moagu bari dihtare bamorãre, suhri sañamorã dihtare Goãmu iibiripu muare. Mua iri dihtare guñacũ gamebeami. ²⁶ Mirimagu porãre Goãmu ĩgu ĩhadiburire masique mua. Erã poeri moorã aħrima. Eropiro erã bari dihburi wiri erãre mara. Mari Pagupu erãre erã baburire ohomi. Mirimagu porã tauro muapure mahimi Goãmu. Eropigu mua sãre ĩhadibugucumi ĩgu. ²⁷ Wuaro mua pepiri mera iri muare pagarã wacũ iibeaa. Eropiro mua wuaro pepiri duhpiburi árĩbeaa.

²⁸ “¿Eropirã duhpirã mua suhri sañaburire wuaro guña bujawere pepicãri? Nuğu maja gori iri gorire pepique. Iri gori ne iiro mariro ôari goricua. Iri gori ôari suhri iro dopa ôari gori dehyoaa. ²⁹ Salomo opu muru ôari suhri opagu ĩgu árĩquerecũ ta iri goripu ĩgu ya suhri tauro ôari gori aħraa. ³⁰ Iri gorire ôari gori iimi Goãmupu. Iri gori bajamenurigã árĩra puhru ñaidija pehrea wahaa. Mero aħri, gajinu peamegue soe

cóacâma. Iri eropa mata pehrequerecũ ta iri gori iri ðari gori áricũ iimi Goãmu. Eropigu Goãmu iri gorire İgu ðari gori İgu iidiro tauro mua sãre ðaro iigucumi. Suhrire ogucumi. Goãmure daberogã umupeoa mua. ³¹ Eropirã mua baburire, mua ihriburire, mua suhri sañaburire wuaro guñabiricãque. ³² Goãmure masibirãpu irire eropa amanigucãma. Mari Pagu umaro majagu árïpehreri mua gamerire masimi. İgu eropa masicũ mua ya árïburire wuaro guñabiricãque. ³³ Goãmu mua Opu İgu árïborore gamemuhtaque mua. Mua eropa iira puhru Goãmupu mua gameri duhyacũ ogucumi. ³⁴ Eropirã ñamigãre mua dohpa warocuri arĩ wuaro bujawere ne pepibiricãque. Dohpagãre mua ñero tariboro árïtuhaa. Eropirã dohpagã maja dihtare pepique. Gajinu majare wuaro bujawere pepinembiricãque. Goãmupu muare itamugucumi, arĩ werepu Jesu.

7

Gajirãre “Ñerã àhrima,” arïbiricãque, arĩ wereñumi Jesu *Lc 6.37-38, 41-42*

¹ Eropigu İgu erãre werenemopu:

—Gajirãre “Ñerã àhrima,” arĩ erã iirare werewuabiricãque mua. Mua eropa arĩ werewuabiricũ Goãmu mua sãre “Ñerã àhrima,” arĩsome.

² Gajirãre “Ôaro iibeama,” mua arĩ pepidiro dopa ta Goãmupu mua sãre eropa ta arĩ İagucumi. Mua gajirãre beyero dopa Goãmupu mua sãre eropa ta beyegucumi. ³ Mari werenigui queori mera buhecũ ðpa iirã àhraa mua. Mua acaweregu İgu cuirugue miri pogañegã mehñajacũ iri pogañegãre ðaro İhaa mua. Mua ya cuiripure wuarimiji árïquerecũ ta irimijire ne pepibea mua. Eropirã gajigure miri pogañegãre mua İaro dopa ta mua acaweregu İgu ñero iiripure ðaro İhaa mua. Mua basi turaro ñerire iiquererã ta irire eropa pepicãa mua. ¿Dohpa árïronore eropa àhriri mua? ⁴ Ôpa arĩ wereniguia mua acawererãre: “Acaweregu, ñerire iigu iica muhũ. Eropigu irire duhucãque,” arĩ wereniguia mua. Eropa İgure ñerire iidorebiriquererã mua sã ñerire duhubea. ¿Duhpirã irire ñerire iinirã árïquererã ta irire pee masibeari mua? ⁵ Eropa iirã masa erã purupure ñero İicorerã àhraa mua. Mua ñero iiripure duhumuhtaque. Mua eropa iira puhru mua acawererãre “Mua ñero iirire duhucãque,” arĩ weremasia mua.

⁶ Diayea iro dopa árïrãre ñetariarãre Goãmu ya ðatariarire erã umupeobirire werebiricãque erãre. “Erãgue ñero wereya ñero arĩri,” arĩrã werebiricãque erãre, arĩ werepu Jesu.

Mari Pagure mari serẽre wereñumi Jesu *Lc 11.9-13; 6.31*

⁷ Eropigu İgu erãre werenemopu:

—Goãmure mari Pagure serẽque mua. Mua eropa sererã mua aĩrãca. Mua serẽre bocarãca. Goãmure eropa serẽnigucãque mua. Mua eropa iicũ İgu muare ogucumi. ⁸ Árïpehrerã Goãmure sererã aĩrãcoma. Eropirã erã sererãre bocarãcoma. Eropigu árïpehrerã Goãmure eropa serẽnigucãre İgu erãre ogucumi.

⁹ “¿Mua porã barire muare serẽcũ utãyepure obocuri mua erãre? Obiriboya. ¹⁰ ¿Mua porã waire muare serẽcũ añapure obocuri mua erãre? Obiriboya mua. ¹¹ Mua ñerã árïquererã ta mua porãre ðarire omasia

mua. Eropigu mari Pagu mua tauro ðarire ohomi muare igu poräre igure mua serërire.

¹² “Gajirä muare ðaro iicü gahmea mua. Eräre mua ðaro iicü gamero dopa ta ðaro iique erä säre. Erä ðaro iibiriquerecü ta tuapü eräre ðaro iique. Eropa ta iidorea Moise dorerigue, Goämu yare weremuhtanirä erä gojarague sä, arı werepü Jesu.

Miri disiporogã queorire wereñumi Jesu

Lc 13.24

¹³ Eropigu igu queorire werenemopü eräre ðpa arıgu:

—Goämu pohrogue wadiarä igu yare iiro gahmea muare. Eropirä igu yare eropa iimaabiricäro gahmea. Miri disiporogägue mua wadiacü diasa ähraa. Eropiro diasa ähraa Goämu pohrogue mua wadiacü. Peamegue masa erä wacü diasabea. Wuari disiporogue mari ñajacü diasabea. Iri disiporogue ta masa erä ñajaboro dopa ta peamegue masa erä wacü diasabea. Eropirä masa bajarä erogue warä iima. ¹⁴ Goämu pohrogue wadiacü diasa ähraa. Bajamerägä masa erogue waräcoma. Erogue warä umari nücu Goämu mera árñinquiräcoma, arı werepü Jesu.

Yucugu ðucare masirä dipagu säre masiro dopa ta masa erä iirire iarä erä árñicürire masia mari, arı wereñumi Jesu

Lc 6.43-44

¹⁵ Eropigu igu werenemopü eräre:

—ðaro pee masique. “Goämu yare weremuhtarä ähraa,” arı guyaräre peebiricäque mua. Erä ðarire iirä iro dopa aririma mua pohrogue. Erä pepirigue ñerä ährima erä. ¹⁶ Erä ñero iicü iarä ñerä erä árñicü masiräca mua. Erä ðaro iicü iarä, ðarä erä árñicü masiräca mua. Äña poragu dipatörire ðucacubea. Poracudigu sä higuera dipure ðucacubea. ¹⁷ Öadigu yucugu ðarire ðucacua. Ñedigu ñerire ðucacua. ¹⁸ Yucugu öadigu ñerire ne ðucacumasibirica. Eropiro ñedigu sä ðarire ðucacumasibirica. ¹⁹ Öarire ðucacubiriri yucure pa cóacä, peamegue soecäma. Eropa ta iigacumi Goämu igu gamerire iibiräre. ²⁰ Eropirä “Goämu yare weremuhtarä ähraa,” arıerä erä guyacü ðpa masiräca. Erä iiricürire iaque. Erä ðarire iirä árñicü iha “Goämu ya wereniguirä ta ährima,” arı iha masiräca. Erä ñerire iirä árñicü iha “Goämu ya wereniguirä árbeama. Eropirä guyarä ährima,” arı iha masiräca, arı werepü Jesu.

“Muare ne masibea,” arıgüca yuhü bajarä masare, arı wereñumi Jesu

Lc 13.25-27

²¹ Eropigu igu eräre werenemopü:

—Bajarä yure “Yu tıgu,” arıerä árñiquererä ta umaro majagu Goämu igu árñiroguere wasome erä. Yu Pagu umaro majagu igu gamerire iirä dihta igu opu árñirogue waräcoma. ²² Pehrerinu árñicü bajarä masa ðpa arıeräcoma yure: “Gua tıgu, mü yare gua buheabu. Mü waı mera püririre, watëare cóäbu. Eropirä mü turari mera baja deyoro moarire iıabu gua,” yure arıeräcoma. ²³ Erä eropa arıquerecü ðpa arı yuhriguca eräre: “Muare ne masibea. Ñerire iirä ähraa mua. Yu pohro aribiricäque,” arıgüca yuhü eräre. Eropirä Goämu gamerire iique yu pohro aridiarä, arı werepü Jesu.

Pe wihi iira queorire wereñumi Jesu

Lc 6.47-49; Mr 1.22

²⁴ Eropigu queori mera werepu Jesu eräre buhegu:

—Eropi árīpehrerā i yu wereniguirire peenirā yu dorerire iirā, ōaro pee masigu wihi iidigu iro dopa āhrima erā. Īgu ūhcāri goberire seha, wihire nugunāgaru. ²⁵ Īgu wihire Īgu tuhajara puhru deco burigā ahri, dia miritaria wayoro. Miruñe burigā weāyoro. Eropa waquerecū ta iri wihi ūhcāro Īgu nugura wihi árīro ne mihrua dijabiriyoro. ²⁶ Eropirā árīpehrerā yu wereniguirire peenirā árīquererā ta yu dorerire iibirāpu pee masibigu Īgu wihi iigu iro dopa āhrima. Īgupu Īgu wihire dia turo maja imiporo weca nugu, ōaro iibiripu. ²⁷ Īgu wihire tuhajara puhru, deco burigā ahri, dia miritaria waha, miruñe burigā weāyoro. Eropa weāro iri wihire weā mehicāyoro, arī werepu Jesu.

²⁸⁻²⁹ Īgu eropa arī buhecū peerā, peemaria wañorā masa. “Īgu marire opu Īgu buhero dopa ta buhemi Īgu. Marire buherā iro dopa buhebeamī,” arī peñorā erā.

8

Jesu camī boagure ḍagu wacū iññumi

Mr 1.40-45; Lc 5.12-16

¹ Jesu űtāgugue buhe doadigu dijaa wapu. Īgu dijacū ĩarā masa bajarā ĩgure nurusiañorā. ² Ero ĩgu wadiro yujugu camī boagu mague ĩgure nurusiaja eja, mereja, ĩgure serēpu.

—Gua tīgu, muhu yure ḍagu iidiagu iique, arīpu.

³ Īgu eroparīcū peegu ĩgu mojoto mera Jesu ĩgure mohmeripu.

—Áu, mure ḍagu wacū iiaa, arīpu Jesu ĩgure.

Īgu eroparīcū ta iri camī boara yarima wayoro. ⁴ Eropa iituhaja Jesu ĩgure arīpu daja:

—Yuhū mure ḍpa iirare ne gajirāre werebircāque. Mu ya dūpūre ḍarare pahire ĩhmuḡu waque, “Ōaro āhrimi,” arīdoreḡu. Tuhajanugu Moise dorerire Goāmū ĩgu apidiro dopa ta iique. Eropigu Goāmū ya wihigue mirimagure asū wahḡa apique mu dore tarirare masa árīpehrerā erā masimaja ḍaro, arīpu Jesu.

Surara opu ĩgu pohro majagu dorecūcū Jesu ḍagu iññumi ĩgure

Lc 7.1-10

⁵ Ero puhru Jesu Capernaum waīcūri macague ĩgu ejacū surara opu ĩgu pohro eja, ĩgure turaro ḍpa arī serēpu:

⁶ —Gua tīgu, yu pohro majagu ne buhari mera dorecūḡu wamasibirinijagu, ĩgure burigā pūricū pepigu yaha wihigue oyacumī ĩgu, arīpu ĩgu Jesure.

⁷ Īgu eroparīcū pee:

—Áu, arī, ĩgure ĩgu dorecurire taugu wagura, arīpu Jesu.

Īgu eroparīcū ḍpa arīpu surara opu:

⁸⁻⁹ —Opu, ḍaroca. Aribita. Ñegu āhraa yuhū. Yaha wihire mure ñajaridorebuno árībeaa yuhū. Yuju diaye ta mu turari mera dorebeoḡu. Mu eropa iicū yu pohro majagu ḍagu wagucumī. Yure yu weca árīrā gajirā oparā dorema. Yu sā surarapūre dorea. Yujugure “Waque,” yu arīcū ĩgu wahamī. Gajigure “Arique,” yu arīcū āhrimī. Yu pohro majagure

“Ire iique,” yu arĩcũ irire iimi. Eropigu mu ĩgure mu dorero dopa ta ĩgu dorecũgu tarigũcumi, arĩpu ĩgu.

¹⁰ Jesu ĩgu eroparĩcũ pee uca wa bajarã masa ĩgu mera nũrusiarãre õpa arĩpu:

—Diaye ta muare arĩgu iiaa. Ihĩ surara opu Israe masu arĩbiriqueregu Goãmure burigã umupeomi. ĩgu pohro majagure yu õagu wacũ iiburire masituhami. Ne Israe masare ihĩ iro dopa umupeorãre ãnibeeaa. ¹¹ Muare arĩgu iiaa. Bajarã ihĩ iro dopa arĩrã arĩpehrero majarã umaro majagu ĩgu opu arĩrogue eja, erogue arĩrã mera barãcoma. Mua ñecu sumarã mura Abrahã, Isaa, Jacobo mera barãcoma erã. ¹² Masa gajirãpu “Opu ĩgu arĩrogue wamorã ãhraa gaa,” erã arĩquerecũ ta ñerogue naitũarogue cõagãgũcumi erãre. Erogue ĩgu cõãnirã burigã ore, bujawereri mera erã gũcũrire cũridihurãcoma, arĩ werepu Jesu.

¹³ Irire eropa arĩtuhaja surara opure arĩpu:

—Dujaague mu ya wihigue. Mu pohro majagu tarigũcumi. “Diaye ta tarigũcumi,” arĩ mu pepidiro dopa ta tarigũcumi, arĩpu Jesu.

Ĩgu eroparĩcũ ta ĩgu pohro majagu pu õha wapu.

Pedro muñecore dorecũgore tauñumi Jesu

Mr 1.29-31; Lc 4.38-39

¹⁴ Pũhru Jesu Pedro ya wihigue eja, Pedro muñeco dorecũcũ ĩapu ĩgu. Nimacũri arĩcũ oyapo igo. ¹⁵ Igo eropa dorecũcũ ãnijagu igo mojtore mohmepĩpu. ĩgu eropa mohmepicũ ta nimacũri taria wayoro. Taricũ pepigo igo pu wahgã, erãre barire ejopo.

Jesu bajarã dorecũrãre tauñumi

Mr 1.32-34; Lc 4.40-41

¹⁶ Eropi ñamicague bajarã watẽa ñajasũnirãre masa aĩ ejañorã Jesu pohrogue. Erã eropa aĩ ejacũ ĩagu mata ĩgu watẽare cõãcũ masa õha wañorã. Eropigu arĩpehrerãre dorecũrãre erã aĩ ejanirãre taupehocãpu Jesu. ¹⁷ Eropa ta iipu ĩgu iribojegue majagu Goãmu yare weremuhtadigu Isaia ĩgu arĩdiro dopa ta. Õpa arĩ gojañumi: “Mari dorecũrire taucãmi ĩgu. Marire pũrĩre cohãmi ĩgu,” arĩ gojañumi Isaia Jesu ariboro coregu.

Yujurãyeri Jesu mera majarã arĩdiariñuma

Lc 9.57-62

¹⁸ Jesu masa bajarã ĩgu pohro arĩcũ ĩagu,

—Wuuriya gajipu masegue ina taribujarã, arĩpu ĩgu buherãre. ¹⁹ Erã taribujaboro core judio masare buhegu Jesu pohrogue eja, õpa arĩpu:

—Buhegu, mu mera wadiaa noho mu waro, arĩpu.

²⁰ Jesu õpa arĩ yuhripu:

—Yu mera arĩcũ diasã ãhraa. Nũgu majarã diaye erã carĩburi toteri opama. Mirimagu porã sã erã ya suhri opama. Yũpũre Goãmu ĩgu obeodigũpũre ne yaha wihi mara. Eropirã yu mera arĩrã ñero tarirãca mua, arĩ yuhripu Jesu.

²¹ Eropi gajigu Jesu buhegu õpa arĩpu:

—Gua opu, yu pagu ĩgu sĩricũ yaatuhajagu mu mera wagura, arĩpu ĩgu Jesure.

²² Jesu yuhripu:

—Yũre gamebirã sĩrinirã iro dopa ta ãhrima. Erãpu sĩrinirãre yaaporo. Eropigu mũpu yu mera majagu arĩbu arique dohparagã, arĩpu ĩgu.

*Jesu miruñere yusudoreñumi**Mr 4.35-41; Lc 8.22-25*

²³ Eropa arituhaja dohodirugue ñajapu. Eropirã ïgu buherã sã ïgu mera waha ñajañorã. ²⁴ Ero erã taribujarisubu iriyague miruñe buriã ariyoro. Eropiro pãguri dohodirure miucãriyoro. Eropa miruñe weãquerecũ ta Jesupu carĩgu iipu. ²⁵ Eropa wacũ ïarã erã ïgure wahgũñorã. Wahgũ òpa arĩñorã:

—Opũ, mirimorã iica mari. Miruñere tauque, arĩñorã.

²⁶ Erã eroparicũ Jesu yuhripũ:

—¿Duhpirã güimaacãri mua? Yure merogã umupeorã ähraa mua, arĩpu Jesu erãre.

Eropa arĩgu ta wahgãñugaja miruñere pãguri sãre “Yusũque,” arĩpu. ïgu eroparicũ miruñe, pãguri sã yusudijapehrea wayoro. ²⁷ ïgu eropa iicũ ïha uca, òpa arĩ wereniãgũñorã erã basi.

—¿Ñehmũno masu ähriri ihĩ? I miruñe, pãguri sã yuhrisũgu ährimi, arĩñorã erã.

*Watẽa ñajasũnirãre tauñumi Jesu**Mr 5.1-20; Lc 8.26-39*

²⁸ Erãre eropa wara puhru taribujaja, Gerasa majarã ya yebague eja pu. Eroque erã eja cũ perã uma Jesure bocatĩñorã. Masa goberi watopegue arĩnirã arĩñorã. Erã watẽa ñajasũnirã arĩrã gorowererã guhyarã arĩñorã. Eropirã erogue masa ne wabiriñorã. ²⁹ ïgure bocatĩri òpa arĩ gaguinũñorã:

—¿Mũhu Goãmũ magũ duhpibu ahriri mũhu gua pohroguere? ¿Guare Goãmũ dorero ejabiriquerecũ ta dipuwaja moagu ahriri mũhu? arĩ gaguinũñorã erã watẽa mera.

³⁰ Ero pohro bajarã yesea ahma barã iĩñorã. ³¹ Erãre ïanijarã, watẽapu òpa arĩ buriã serẽñorã Jesure:

—Guare oã umare cóãgu soã yesea pohrogue wadoreque guare. Erã mera guare arĩdoreque, arĩ serẽñorã erã Jesure.

³² —Áũ, waque, arĩpu Jesu.

ïgu eroparicũ watẽa perã masa mera arĩnirã waha, yesea pohrogue ejañorã. Erãre ñajacũ ta yesea gorowere, dipaturugue oma buha, wuariyague yuriñaja yuhria, miri siripehrea wañorã.

³³ Erã eropa wacũ ïarã yeseare ïhadiburãpu güi, omagã wañorã. Macague eja yesea erã mirirare weresiripehocãñorã erã. Watẽa erã ñajasũnirãre Jesu ïgu cóãra sãre werepehocãñorã erã. ³⁴ Erã eropa weresirira puhru iri maca majarã arĩpehrerã Jesure ïarã ejañorã. Eropirã ïgure ïara puhru turaro mera wiriadoreñorã ïgure erã ya yebare.

9*Dũpu buhadigure òagu wacũ iĩñumi Jesu**Mr 2.1-12; Lc 5.17-26*

¹ Erã eropa wadorera puhru Jesu dohodirugue ñaja, wuariyague taribujaa, ïgu ya macague eja pu. ² Eroque gajirã dũpu buhadigure pũgu mera coã aĩ wahgã erañorã Jesu pohro. “Jesu ïre ïgu dorecurire taricũ iĩgũcumi,” arĩ pepiñorã erã. Erã eropa arĩ pepicũ masigu Jesu dorecũgure òpa arĩpu:

—Mucubirique mũhu. Mũ ñero iirare cóãtuhabu yũhu, arĩpu ïgu.

³ Īḡu eroparīcū peerā yujurāyeri masare buherā ōpa arī pepiriñorā erā basi: “Ihī eropa arī ġu werenīguiri mera Goāmure ñero arīḡu iimi,” arī pepiñorā erā buherā. ⁴ Erā eropa arī pepicū masiḡu, ōpa arīḡu Jesupu:

—¿Duhpirā eropa arī ñero pepiri mua? ⁵ “Mu ñero iirare cóābu,” yu arīcū “Ḡuyagu āhrimi,” arāa mua masibiriquererā ta. Īḡure “Wahgānugajaque. Curique,” yu arīcū yu arīra diaye áriri arīcū mata mua iha masirāca. ⁶ Yuhū masu Goāmū ġu obeodigu i yeba majarā erā ñero iirire cóāmasia yuhū. Mua ire masiborore ōpa ta ġu wahgānugacū iigura, arīḡu Jesu.

Eropa arītuhaja dupu buhadigure ōpa arīḡu:

—Wahgānugajaque. Mu pūḡure aī, mu ya wihigue dujaaque, arīḡu ġure.

⁷ Īḡu eroparīcū ta peegu dupu buhadigu wahgānugaja, ġu ya wihigue dujaa wapu. ⁸ Masa ġu eropa wacū ġarā ḡuiñorā. Eropirā Jesure Goāmū ġu turarire opacū ġarā Goāmure umupeo, ōaro werenīguñorā.

Jesu Mateore sihuñumi
Mr 2.13-17; Lc 5.27-32

⁹ Erā eropa iira pūhrū Jesu erogue árīdigu wiria, yure Mateore bocatīrimi. Oparā ya árīburire masare wajasea coreḡu árīribu. Eropigu irisubure yu mohmeri taribugue doabu. Ero yu doacū ġagu, ōpa arīmi yure:

—Yu mera majagu árību arique, arīmi yure Jesu.

Īḡu eroparīcū pee, wahgānugaja ġu mera wabu.

¹⁰ Pūhrū yaha wihigue Jesu sā barā erama. Bajarā wajasea corerā “ñero iirā” erā arīrā gua mera ta bama. ¹¹ Erā mera gua bacū ġarā, fariseo masa Jesu buherāre ōpa arīma:

—¿Duhpigu muare buhegu wajasea corerā ñero iirā mera bahari? arīma erā guare ġu buherāre.

¹²⁻¹³ Erā eroparīcū peegu Jesupu ōpa queori mera yuhrimi:

—Dorecubirā duhturure amabeama. Dorecūrā dihta duhturure ah-mama. Dorecūrā duhturu amaro dopa ta “Ñerā āhraa,” arīrā yure amarācoma. Eropigu “Ñerā āhraa,” arīrā dihtare erā ñero iirare bujaweredore ōaripure gohotocū iigu arību yuhū. Erā basi “Ōarā āhraa gua,” arī pepirāre itamugu arībirību. Goāmū ġu arīrare erā arī gojarare masique mua. “Waimurāre wejē soemujurā yure eropa umupeocū ne gamebeaa. Gajirāre mua mojomoro ġacūpure gahmea,” arīmi Goāmū, arī gojañumi. I eropa arīrīre masique mua. Irīre ōaro buhenemorā waque, arīmi Jesu fariseo masare.

Ba duhurire serēpiñuma Ñu buherā Jesure
Mr 2.18-22; Lc 5.33-39

¹⁴ Pūhrū Ñu waīyegu ġu buherā gua pohro eja Jesure serēpima:

—Gua Ñu buherāpu bajasuburi Goāmū ya árīburire iirā ba duhua. Fariseo masa sā eropa ta ba duhuma. ¿Duhpirā mu buherāpu ba duhubeari? arīma erā Jesure.

¹⁵ Jesu erāre ōpa arī yuhrimi:

—Ōpa āhraa iri: Mojoto diridigu ġu bosenu iicū ġu mera majarā bujawererā ba duhurā árībeama. Īḡu mera arīrā mucubiri barā iima. Eropa ta yu buherā sā yu mera arīrā ba duhumasibeama. Yujunū yure

Goãmu aĩcãgucumi. Eropã ãgu yũre aĩra puhũrũ yũ buherã mera árisome yũhũ. Irisubugue ta yũ buherã ba duhurãcoma, arĩ yũhrimi Jesu.

¹⁶ Erã iribojegue maja buheri mama buheri mera erã peñe buhemore-diacũ ãagu õpa arĩ werenemomi Jesu erãre:

—Ne mama gasiro suhri gasiro mera murañe suhrirore seretu masiya mara. Eropã seretura puhũrũ mama gasiro mari coecũ mura suhriro arĩro yehguea wa daja, tara gameneo, wuatariaro yehgueacũ iiaa. Eropã ta mura buheri mama buheri mera wapi moa buhebiricãro gahmea.

¹⁷ Eropirã ne igui deco imisĩri decore waibũgu gasiro ajuro mura ajuro mera diyebiricãro gahmea. Eropiicũ igui deco imisĩri pahmura puhũrũ mura ajurore yeguedija wahaa. Iri ajuro yehguecũ igui deco sã, ajuro sã cohmoa wahaa. Eropirã igui deco waibũgu gasiro mama ajuro mera diyero gahmea. Eropiicũ igui deco pahmuro õaro iri ajuro sãraa. Eropã ta mama buheri mura buheri mera buhebiricãro gahmea, arĩ weremi Jesu erãre.

*Jairo magore õago ii, behreri opaniguigo sãre õago wacũ iĩñumi Jesu
Mr 5.21-43; Lc 8.40-56*

¹⁸ ãgu eropa arĩ wererisubũ gua judio masa buheri wihi opu Jesu pohrogue erami. Eraa, mereja, õpa arĩmi:

—Yũ mago negãgue sĩria wahãmo. Iгоре mũ mojotore duhpeogu arique. Mũ eropa iicũ masagocumo, arĩmi ãgu Jesure.

¹⁹ ãgu eroparĩcũ peegu Jesu wahgãnũgaja, ãgu mera wami. Gua ãgu buherã sã ãgu mera wabũ. ²⁰ Gua erogue waniguicũ ero nomeo Jesu puhũrũ eja, ãgu suhriro ojogorore mohmepiñamo. Doce bojori gohra umuri nãcu behreniguigo arĩpo. ²¹ Õpa arĩ pepipo igo eropa iigo: “ãgu suhriro dihtare mohmepiñago õago dujagoca yũhũ,” arĩ pepipo igo. Eropigo igo mohmepicũ mata igo di wirira purumujuyoro. ²² Igo eropa iicũ masigu Jesu majinũgaja, igo erãre:

—Mucubirique mũhũ. Mũhũ yũre umupeori mera õago dujaa, arĩmi ãgu.

ãgu eroparĩcũ ta õha wamo igo.

²³ Eropã iituhaja Jesu gua mera opu ya wihigue ejami sĩridigo pohro. Nãjajaũ bajarã masa i wihigue arĩrã turaro busucũ ãami. Gajirã ñehamere orerãre gaguinũguirãre ãami. Gajirã igogãre yaaboro core tarisu iro dopa arĩrĩre purirãre ãami. ²⁴ Erã eropa iicũ ãagu masare õpa arĩmi:

—Wiriaque mua. Sĩribeamo igo. Carĩgo iimo, arĩmi erãre.

ãgu eroparĩcũ peerã, “Eroparĩcãgu iimi ihĩ,” arĩrã masa ãayema ãgure. ²⁵ ãgũpũ erãre disiporogue wiupehocãmi. Tuhajanugu sĩridigo pohrogue eja, igo mojotore ñeapũ. ãgu eropa ñeãnacũ ta masa bejaja, wahgãnũgajapo igo. ²⁶ ãgu eropa iirare peerã, ero majarã masa arĩpehrerã masa werewuañorã.

Perã cuiĩrĩ ñhajibirãre ãacũ iĩñumi Jesu

²⁷ Ero arĩnirã gua Jesu mera wacũ, perã cuiĩrĩ ñhajibirã ãgure piyu nũrsiama:

—Opũ Davi pãrami masare taũgu, guare mojomoro ãaque mũhũ, arĩ gaguinũguima erã.

²⁸ Erã eroparĩcũ Jesu gaji wihigue ñajami. Īgu eropa ñajacũ masirã cuiri ĩhajabirã ĩgu pohrogue ñaja wama. Erã eropa ñajacũ ĩagu ĩgupu erãre serẽpimi:

—¿Marire ĩacũ iigucumi ĩgu, arĩ pepiri mua yure? arĩmi ĩgu.

—Opũ, eropa ta arĩ pepia gua, arĩ yũhrima erã.

²⁹ Erã eropa yũhricũ ta erã cuirire ñapeomi. Ñapeogu, õpa arĩmi:

—Yure “Eropa iigucumi,” mua arĩ pepidiro dopa ta eropa ta iigura, arĩmi Jesu.

³⁰ Īgu eroparĩcũ ta erã cuiri õha wabu. Eropi Jesu õpa arĩmi erãre:

—I yũ õpa iirare gajirãre ne werebircãque, arĩrimi Jesu.

³¹ Īgu eropa arĩquerecũ ta waha, i yeba majarãre weresirinirã árĩma ĩgu eropa iirare erã.

Wereniguimasibigure wereniguicũ iĩñumi Jesu

³² Iri wihire erã cuiri õha wanirã wiriarisubu gohra yujugu wereniguimasibigure aigãrima Jesu pohro masa. Watĩ ĩgure ñajasũdigu ĩgure wereniguimasibiricũ iidi árĩmi. ³³ Erã aĩ ejacũ ĩagu watĩre Jesu cóãmi. Īgu eropa watĩre cóãcũ wereniguimasibiridigupu wereniguia wami. Īgu eropa iicũ ĩarã árĩpehrerã ĩhamaria wama.

—Ne i yeba Israe yebaguere õpa iirãre ĩabirimurabu mari, arĩ wereniguima masa erã basi.

³⁴ Fariseo masa gajiropa arĩ wereniguima:

—Watẽa opu ĩgu turari mera watẽare cohãmi ihĩ, arĩ wereniguima erã.

Masare mojomoro ĩañumi Jesu

³⁵ Eropi árĩpehreri macari ero árĩri macarire, paga macari sãre buhe curigu wami Jesu gua mera. Õari buherire erã buheri wirigue buhegu wami ĩgu. Eropigu Goãmu ĩgu opu árĩborore weremi. Árĩpehreri dorecũri sãre ero majarãre taumi ĩgu. ³⁶ Erã masa bajarã ñero tarirã, itamuri moorã, oveja dibuya marirã iro dopa erã árĩcũ ĩapu Jesu erãre. Eropa ĩagu Jesu erãre mojomoro ĩami. ³⁷ Eropigu õpa arĩmi ĩgu guare ĩgu buherãre:

—Ojodũca baja iri bugatuhajacũ baja árĩcũ mohmeri wũaro ãhraa. Mohmeri masapu bajamerãgã ãhrima. Eropa ta õari buherire peemorã bajarã árĩcũ wũaro ãhraa mari mohmerĩ. Iri eropa árĩquerecũ ta mari masare buhemorã bajamerãgã ãhraa. ³⁸ Eropirã õari buherire buhemorãre gajirãre ĩgu obeomorãre serẽque Goãmure mua, arĩmi Jesu guare.

10

Jesu doce gohra beyeñumi ĩgu buhedoregu obeomorãre

Mr 3.13-19; Lc 6.12-16

¹ Pũhũ doce guare ĩgu buherãre Jesu sihubeo, turarire omi guare. Watẽare gua cóãmasiburire, árĩpehreri dorere gua taumasiburire omi guare.

² Õpa waĩcurã árĩbu gua Jesu ĩgu apinirã: Simo árĩmi. Īgure ta Pedro arĩ piyumi Jesu. Simo pagu magu Andre árĩmi. Santiago ĩgu pagu magu Ñu mera árĩmi. Erã pagu Zebedeo waĩcumi. ³ Felipe, Bartolomé, Toma, yũhũ Mateo árĩbu gua. Yũpu oparã ya árĩburire masare wajaseabasa coredigu árĩribũ. Gua mera gajigu Santiago árĩmi. Īgu Alfeo magu árĩmi. Eropigu

Lebéo sã árĩmi. Īgupu Tadeo erã arĩ piyudigu árĩmi ĩgu. ⁴ Simo celote ya curu majagu, Juda Iscariote sã árĩma. Judapu Jesure ĩhaturirãre ĩhmubu árĩmi.

Jesu ĩgu buherãre buhedoregu obeoñumi
Mr 6.7-13; Lc 9.1-6

⁵ Eropi guare ĩgu buherãre docere obeogu, “Ōpa iique,” arĩ wereseremi guare:

—Judio masa árĩbirã pohroguere wabiricãque. Ne Samaria yeba maja macarigue sãre wabiricãque. ⁶ Israe yeba majarã pohroguere waque. Goãmure masibirã àhrima erã. ⁷ “Ūmaro majagu opu árĩboro merogã duhyaa,” arĩ buheque erãre. ⁸ Eropirã cami boarãre, gaji baja gajiropa árĩri dore oparã sãre òarã wacũ iique. Sĩrinirãre masuque. Watẽa ñajasũnirãre cohã wiuque erã watẽare. Muare iri turarĩre ogu iiaa. Eropirã mua sã yu eropa odiro dopa ta masare wajasearo mariro òarã wacũ eropa iicãque.

⁹ “Mua warã ne niyerure aĩbiricãque. ¹⁰ Ne mua ajure, ne peñe camisare, ne peba zapaturĩ sãre aĩgãbiricãque. Mua buheroguere ero majarãpu muare barire oporo.

¹¹ “Iri macariguere ejarã, mua carĩborore masa òaro umupeogu pohroge amaque. Eropirã ĩgu ya wihi ta dujanique. Ne warãgue wiriaque iri wihire. ¹² Eropirã wihigue ñajarã “Àhriri,” arĩque iri wihi majarãre. ¹³ Muare erã gamecũ, “Goãmũ mera òaro árĩque mua,” arĩque erãre. Muare erã gamebiricũ, “Goãmũ mera òaro árĩque,” mua arĩbiricãque erãre. ¹⁴ Eropirã muare erã gamebiricũ, erã mua buherire peediabiricũ ĩarã iri wihire wiria waque. Eropa wiriarã, guburi maja neidre moje siripique erã ĩaro, erã ya dipuwajare ĩhmunorã. Iri maca majarã muare gamebiricũ eropa ta iique erã sãre. ¹⁵ Diaye ta muare arĩgu tĩiaa. I umũ pehrecũguere Sodoma majarã Gomorra majarã mura burigã dipuwajacurãcoma. Erã eropa dipuwajacuro tauro muare gamebirãpu dipuwajacurãcoma. arĩ weremi Jesu guare.

Jesu yarãre gajirã erã ñero iiborore wereñumi Jesu

Eropa arĩtuha òpa arĩnemomi guare ĩgu buherãre:

¹⁶ —Yure peeque mua. Oveja iro dopa árĩrãre muare yeea guarã iro dopa ta ñerã árĩrã watopegue obeogu iiaa. Eropirã muapu òaro pee masirã árĩque. Eropirã gariboro mariro òaro árĩque erã mera. ¹⁷ Ōaro iique mua. Masa muare erã oparãre orãcoma muare dipuwaja moadorerã. Erã buheri wirigue sãre parãcoma muare. ¹⁸ Eropirã mua yaharã mua árĩri dipuwaja macari majarã oparã pohroge erã tauro oparã pohroge sãre aĩgãrãcoma muare dipuwaja moadoremorã. Eropirã muare erogue erã aĩgãcũ judio masa árĩbirã oparã sãre òari buherire wererãca mua. ¹⁹⁻²⁰ Muare oparã pohroge erã aĩgãcũ erãre mua wereniguiburire wuaro pepibiricãque. Muare erã serẽpicũ ta mua erãre yãhriburire masirãca Goãmũ mera. Eropa masirã mua irire mua gamero wereniguisme. Goãmũpu mari Pagu ĩgu Espĩritu Santo mera muare wereniguicũ iigucumi.

²¹ “Irisubure erã tĩrã erã pagu porã Jesu yarã árĩcũ ĩha wejẽdore wiarãcoma oparãre. Erã pagu sumarã erã porã Jesu yarã erã árĩcũ ĩha wejẽdore wiarãcoma oparãre. Erã porãpu erã pagu sumarã erã Jesu yarã erã árĩcũ ĩha wejẽdore wiarãcoma oparãre. ²² Eropirã masa árĩpehrerã

yure mua umupeora dipuwaja ñhaturirãcoma muare. Erã muare erã ñero iiquerecũ ta muare erã ñero iirare yujuro bojerã yure duhubiricũ Goãmu muare taugacumi. Eropigu ñgu pohrogue muare opagacumi. ²³ Yuju maca muare erã ñero iicũ gaji macague duhri wahgãque. Diaye ta muare arĩgu tiiaa. Israe yeba arĩri macarire mua buhepehoboro core, yuhũ masũ Goãmu ñgu beodigu i yebague dujarigura.

²⁴ “Buherã erãre buhegure masi taribeama. Eropigu pohro majagu sã ñgu opu weca árĩbeami. ²⁵ Yujugu buhegure ñgure weredigu iro dopa dujaro gahmemi ñgu. Pohro majagu sãre ñgu opu iro dopa ta dujami. Muapu yu buherã ãhraa. Eropirã yure iidiro dopa ta mua sãre iirãcoma. Eropirã yure “Watĩ Beelzebũ áhrimi,” arĩ weresãrã, mua sãre yaharãre ñero arĩ wereniguirãcoma erã, arĩ weremi Jesu guare.

*¿Nihinore güicũ õhari? arĩ wereñumi Jesu
Lc 12.2-7*

²⁶ Eropa arĩra puhru Jesu õpa arĩnemomi guare:

—Eropirã muare erã ñero iidiarãre güibiricãque. Masa erã yayasãrare puhru gajirã masirãcoma. Erã dibura sãre gajirã masirãcoma. ²⁷ Eropirã muare yayarogã yu wererãre bajarã masa watope wereturiaque muapu. ²⁸ Muare wejẽrã mua dupũ dihtare wejẽmasima. Mua siporãpu sribëaa. Eropirã muare wejẽdiarãre güibiricãque. Goãmupure güique. Ñgu dupũ mua siporãri sãre peamegue dedeomasimi muare. Eropirã ñgũpũre güique.

²⁹ “Perã mirua wajamarima. Erã eropa wajamariquerecũ ta Goãmu õaro mahi ñhadibumi erãgãre. Goãmu dorebiricũ ne sribëami yujugã. ³⁰ Eropigu mua poarire ne yuju poadagã duhyaro mariro masipehomi Goãmu. Eropa ta mua árĩricuri sãre masipehomi Goãmu. Eropa masigu muare ñhadibuniguicãmi. ³¹ Miruare ñgu ñhadiburo tauro muapũre ñhadibumi Goãmu. Eropirã wũaro bujawere guñaricubiricãque mua, arĩ weremi Jesu.

*Jesure mua umupeorire wereque masare, arĩ wereñumi
Lc 12.8-9*

³² Eropigu gua sãre werenemomi:

—Yujugu “Jesucristo yagu áhraa,” masare ñgu arĩ werecũ yu sã ñgure “Yahagu áhrimi,” arĩ weregura yu Pagu umaro majagugure. ³³ Yujugu masare güigu “Jesucristo yagu árĩbeaa,” masare ñgu arĩ werecũ yu sã “Yahagu árĩbeami ñgu,” arĩ weregura yu Pagugure umaro majagugure, arĩ weremi Jesu.

*Jesu yu buhecũ masa erã basi game dũca warirãcoma, arĩ wereñumi
Lc 12.51-53; 14.26-27*

³⁴ Eropa arĩtuhaja õpa werenemomi masare:

—¿Dohpa arĩ pepiri mua yure? ¿Yuhũ masare yu buhegu aricũ yu buheri mera masa ñhaturisome, arĩ pepiri mua? Eropa árĩbeaa. Masa yu buherire peerã pe curu erã basi dũca warirãcoma. Yujurãyeri yu buherire peerãcoma. Gajirãpu irire gamebirã erãre ñhaturirãcoma. Eropirã yujuro mera árĩsome masa. ³⁵ Murã yu buherire erã peera dipuwaja erã porã erãre ñhaturirãcoma. Murã nome erã yu buherire peera dipuwaja erã porã nome erãre ñhaturirãcoma. Erã muñecosã nome yu buherire erã peera dipuwaja erã beposã nome erãre ñhaturirãcoma. ³⁶ Eropirã masa erã acawererãre yu buherire peecũ ñarã erãre ñhaturirã árĩrãcoma.

³⁷ “Yure erã mahibodiro tauro erã pagu sumarãpure mahitarinugarã yaharã árísome erã. Yure erã mahiborono tauro erã porãpure mahitarinugarã yaharã árísome erã. ³⁸ Eropirã crusague yu sîridiro dopa ta yaharã erã árîra waja ñero tarirãcoma erã sã. Eropa ñero taridiabirã yaharã árísome. ³⁹ Masa yure guñaro mariro erã gamero iirã peamegue warãcoma erã. Yaha árîburipure erã guñarã árîpehrerinuri Goãmũ mera òaro árîniguicãrãcoma, arî weremi Jesu.

Mari wajataburire wereñumi Jesu

Mr 9.41

⁴⁰ Eropa arîtuhaja òpa werenemomi gua sãre:

—Muare yaharãre yujugu òaro mera bocatîrigu, yu sãre bocatîrigu iimi ïgu. Eropigu yure òaro bocatîrigu yure obeodigu sãre bocatîrigu iimi. ⁴¹ Eropigu Goãmũ yare weredigu wajatagucumi. ïgure òaro iigucumi Goãmũ. Eropigu ïgu yahare ïgu weregu árîcũ ïagu yujugu ïgure òaro bocatîrigu weredigu iro dopa ta wajatagucumi ïgu sã. Eropi gajigu òaro iidigu wajatagucumi. Eropigu ïgu òaro iigu ïgu árîcũ ïagu yujugu ïgure òaro bocatîrigu òaro iidigu dopa wajatagucumi ïgu sã. ⁴² “Jesu yagugã ta àhrimi,” mua arî ïarã ïgugãre itamudiarã deco yusari mera dihta ïtaquerecũ, diaye ta mua sãre òaro iigucumi Goãmũ, arî weremi Jesu.

11

Ñu waïyegu ïgu buherãre Jesure serêpidoregu obeoñumi

Lc 7.18-35

¹ Guare ïgu buherãre ïgu eropa arî werera puhru ero pohro árîri macarigue buhegu waha wami ïgu.

² Eropigu Ñu peresugue árîgu Jesu ïgu iiricurire peebeopu. Eropa peegu Ñu ïgu buherãre Jesure serêpidoregu obeopu. ³ Eropirã gua pohrogue eja, Jesure serêpima erã Ñu buherã.

—Ñu òpa arî serêpidoreami mure: “ ‘¿Yu puhru gajigu ïgu arigucumi,’ yu eropa arîdigu ta àhriri muhu? ¿O gajigure corerãcuri gua?” arî serêpi doreami Ñu, arîma erã Jesure.

⁴ Erã eroparîcũ peegu Jesu yàhrimi:

—Dohpaguere mua peerare, mua ïarare Ñure wererã waque. ⁵ Òpa arîque: “Jesu mera cui ri ihajabirã ihama. Curimasibirã cuhrîma. Cami boanirã òarã wahama. Peejabirinirã peea wahama. Sîrinirã masa wahama,” arî wereque. Eropirã mojomorocurãre òari buherire yu wererare wereque ïgure. Eropa arî weretuhaja òpa arî wereque Ñure. ⁶ “Yure peegu ‘Diaye ta àhraa,’ arîgu ïgu mucubirigu àhrimi,” arãmi Jesu, arî, Ñure wererã waque, arîmi Jesu.

⁷ Ñu buherã erã wara puhru, Jesu Ñu árîricurire werenugami masa bajarãre.

—Masa marirogue Ñu pohrogue warã ero majare taare miru weãcũ ïarã ejabiribu mua. ⁸ Òari suhricugu sãre ïabiribu mua. Òari suhricurã oparã ya wirigue àhrima. ⁹ Masa marirogue ejarã Goãmũ yare weremuhtadigupure ïarã ejabu mua. Diaye ta Ñu Goãmũ yare weremuhtagu àhrimi. Gajirã Goãmũ yare weremuhtanirã tauro árîgu àhrimi Ñupu. ¹⁰ Iribojegue Goãmũ yare erã gojarapũ òpa arî wereyuyoro Ñure.

Mari Pagu ĩgu magure ōpa arĩpu. “Mu core mure wereyubure obeogu iiaa,” arĩmi Goãmu, arĩ gojañuma Ñure.

¹¹ Muare diaye ta arĩgu iiaa. Masa arĩpeherrerã tauro àhrimi Ñu waĩyegu. Irisubure ĩgu eropa arĩquerecũ ta umaroguere Goãmu ĩgu opu arĩroguere arĩpeherrerã docanugagupu Ñu tauro arĩgucumi.

¹²⁻¹³ “Ñu waĩyegu ĩgu eraboro core Moisere ĩgu apira doreri mera Goãmu marire doremi. Goãmu ya weremuhtanirã mura erã gojara sã eropa ta arĩribu marire dorera. Dohpaguepure Ñu ōari buherire, Goãmu opu ĩgu arĩrire buhemi. ĩgu eropa buhecũ pee masa erã ejatuharo erã turari mera Goãmu erã opu arĩcũ burigã gahmema. ¹⁴ “Elia arĩgucumi,” iribojegue erã arĩdigu ta Ñupu àhrimi. “Iribojegue majarã erã arĩrare diaye ta àhraa,” arĩdiarã Ñu ĩgu erã eropa arĩdigu arĩcũ masirãca mua.

¹⁵ Ōaro peeque mua ire, arĩmi Jesu.

¹⁶ Eropigu ōpa arĩnemomi masare:

—¿Mua dohpague majarã masa ñehmarano iro dopa àhriri mua pepicũ? Mua majirã iiro dopa ōpa àhraa. Doberi duarogue bira doarã, ōpa arĩ dũyasoma erãgã erã basi: ¹⁷ “Mua bayaburire tarisu purirabu gua. ¿Duhpirã mua mucubiri bayarã aribirari? Eropirã gua burigã ñehamere orerabu. ¿Muapu duhpirã gua mera orebirari?” arĩma dũyasorã. Erã majirã arĩ dũyasorã iro dopa ta iirã ōpa iiaa mua dohpague majarã. ¹⁸ Ñu waĩyegu Goãmu ya arĩburire ba duhugu vinore ihribirimi. ĩgu eropa ihribiricũ iarã “Pee masibigu àhrimi,” arĩribu mua ĩgure. ¹⁹ Yupu masu Goãmu ĩgu obeodigu arĩgu yuhu baha, ihria. Yu eropa iicũ iarã ōpa arãa mua yupure. “Iaue. Ihĩ wuaro bagu, merericugu sã àhrimi. Wajasea corerã ñero iirã erã wapicugu àhrimi ĩgu,” arãa mua yure. Mua gamero dopa gua iibiricũ ero wabeaa muare. Mua masibiriquererã ta gua iirare iarã, Goãmu masirire gua opacũ masirãca mua, arĩmi Jesu erãre.

*Iri macari majarãre turiñumi Jesu erã ñerire bujawerebiricũ ĩagu
Lc 10.13-15*

²⁰ Puhru ero maja macari majarãre turipu Jesu. Iri macarire gaji macari sãre Goãmu turari mera tauro deyoro moarire ii ihmudi arĩrimi ĩgu. ĩgu eropa ii ihmuquerecũ ta erã ñero iirire duhubirinirã arĩma erã. Eropigu erãre ōpa arĩpu ĩgu.

²¹ —Corazĩn maca majarã mua ñero tarirãca. Betsaida majarã mua sã ñero tarirãca. Mua ya macaguere yuhu Goãmu turari mera deyoro moarire iirabu. Mua peebirabu. Iribojegue Tiro waĩcũri macare, Sidõn waĩcũri maca sãre yu deyoro moarire yu iicũ iarã ero majarãpu erã ñerire bujawereboañuma. Eropa iirã ōaripure gohrotoboañuma. Bujawererã bujawereri suhrire saña, erã basi peame witũ mera mohsiripeboañuma erã ñero iirare bujawere ihmumorã. Muapu eropa iibeaa. ²² Eropigu muare arĩgu tiiaa. Dipuwaja moarinu arĩcũ, Goãmu Tiro majarã mura, Sidõn majarã mura tauro ñerã mua arĩri waja muare ñero gohra dipuwaja moagucumi ĩgu. ²³ Mua Capernaum majarã, mua ejatuharo Goãmu pohrogue wadiarabu. Mua Goãmu yare iidiabiricũ muare Goãmu peamegue cõagucumi. Mua ya macague Goãmu turari mera deyoro moarire ii ihmurabu. Mua yure peebirabu. Iribojegue Sodoma waĩcũri macare deyoro moarire yu eropa iicũ iri macapu dohpaguere arĩboca. ²⁴ Eropigu muare arĩgu tiiaa. Dipuwaja moarinu arĩcũ Goãmu

Sodoma maca majarã mura tauro, muapure mua ñeri dipuwaja dipuwaja moagacumi, arĩpu Jesu iri macari majarãre.

Yu pohrogue soorã arique, arĩñumi Jesu

Lc 10.21-22

²⁵ Irisubu ñgu Pagu mera wereniguigu òpa arĩmi Jesu.

—Ahũ, muhu umaro majarã tauro opu, i yeba majarã tauro opu àhraa. I mu buherire “Masituhaja gua,” arĩrãre masicũ iibeaa. Mu yare masipehobirãpure masicũ iibabu muhu. Muhu eropa iicũ “Õhaa,” arãa yuhu mure. ²⁶ Eropa ta àhraa, Ahũ. Erã masibirãpure erã masicũ gahmeabu muhu, arĩmi Jesu ñgu Pagure.

²⁷ Eropigu masare gua sãre òpa arĩ werenemomi:

—Yu Pagu arĩpehreri ya iiborore apimi yure. Ñgu dihta yure òaro masimi. Yu sã ñgure masia. Yu beyenirã sã ñgure masima yu ñgure masidorerã árĩrã. Erã nucũ ta yu Pagure masia gua. ²⁸ Goãmũ mera òaro árĩdiarã baja dorerire iiraa mua. Iri doreri nucurire omaro iro dopa ta àhraa. Eropirã gariborea wahaa mua iri dorerire iirã. Eropa gariborerã yure serẽque. Muare soocũ iigura. ²⁹ Yuhu pũriro mera doregu árĩbeaa. Nijiyajaro doregu àhraa. Eropirã yu doreripure iique. Eropa iirã dipuwaja marirã òaro árĩrãca mua. ³⁰ Eropiro yu itamuri mera yahare iicũ diasabeaa. Eropirã yu dorerire iirã nucurire pepiro mariro òaro árĩrãca, arĩmi Jesu.

12

Judio masa erã soorĩnu árĩcũ trigo pororire turĩñuma Jesu buherã

Mr 2.23-28; Lc 6.1-5

¹ Merogã ñgu eropa arĩ buhera puhru Sabado árĩcũ gua Jesu mera trigo otera pohegue ñha tariabu. Eroque tariarã gua ñgu buherã oaboarã, trigo pororire turĩ aĩ babu gua. ² Gua eropa iicũ ñarã, fariseo masa Jesure òpa arĩma:

—Peenique guare. ¿Duhpirã erã mari soorĩnu árĩquerecũ ta mohmeri? Mari dorerire tarinugarã iima erã, arĩma erã.

³⁻⁴ Erã eroparĩcũ peegu Jesu “Yu buherã tarinugarã iibeama,” arĩgu òpa arĩmi erãre:

—Iribojegue Davi ñgu mera majarã mera oaboagu Goãmũ ya wihigue ñaja, iri wihi árĩri panre bañumi ñgu mera majarã mera. Iri pan pahia dihtare badorerã árĩyoro. Goãmũ doreri gajirãre iri panre badorebiriyoro. ¿Davi irire ñgu iirare Goãmũ yare erã gojarapũgue buhebirari mua? Davi iri panre bagũ Goãmũre tarinugagu iibiriñumi. Dohpagãre yu buherã sã trigo yerire turĩ barã Goãmũre tarinugarã iibeama. ⁵ Eropi Goãmũ ya wihi mohmerã pahia ne soobeama mari soorĩnurire. Eropa soobiriquererã Goãmũ dorerire tarinugarã árĩbeama. ¿Iri buhebirari mua Goãmũ Moiserẽ ñgu apirapũre? ⁶ Muare arĩgu tiiaa: Goãmũ wihire umupeorã iri wihi mohmerã erã soobiricũ ñarã “Õhaa,” arãa mua. Erã tauro yũpure umupeoro gahmea. ⁷ Goãmũ yare erã gojarapũ òpa àhraa: “Waimurãre wejẽ soerã yure mua eropa umupeocũ gamebeaa. Gajirãpure mua mojomoro ñacũ gahmea yuhu,” arĩmi Goãmũ, arãa ñgu yare gojarapũre. Ñgu eropa arĩrare mua òaro masirã, yu buherãre erã dipuwaja mariquererecũ ta erãre weresãmasibiriboya mua. ⁸ Yuhu masũ Goãmũ ñgu obeodigu inonũ soorĩnu sãre masa erã iiburire doremasia, arĩmi Jesu fariseo masare.

*Mojoto buhadigu ðaro wañumi**Mr 3.1-6; Lc 6.6-11*

⁹ Īgu eropa arīra puhru waha gua judio masa buheri wihigue ejabu gua Jesu mera. ¹⁰ Ero mojoto buhagu árīmi. Eropirā fariseo masapu Jesure weresāmorā, Īgure serēpima:

—Sabadonū mari soorinūre masare ðarā wacū iidorebeami Goāmū. ¿Eropa ta āhriri mū pepicū? arī serēpima erā.

¹¹ Jesu yahrimi erāre:

—Mua yagu oveja mari soorinū árīquerecū gobegue Īgu yuhriñajadigure Īgure aī wiurāca mua. ¹² Oveja tauro āhrimi masapu Goāmū ĩacū. Eropiro mari soorinū árīcū masure taucū ðapūrica, arī yahrimi Jesu erāre.

¹³ Īgu eropa arīra puhru mojoto buhagure ðpa arīmi:

—Mū mojtore sīsirābeoque, arīmi Īgu.

Īgu eroparīcū mojoto buhagupu sīsirābeomi. Īgu eropa sīsirābeora puhru ta ðari mojoto dujabu. ¹⁴ Erā soorinū Īgu eropiicū ĩarā fariseo masa waha, erā basi ðpa arīñorā:

—¿Dohpa ii mari Jesure wejērācuri? arīñorā erā erā basi.

Isaia Goāmū yare weremuhtadigu iribojegue majagu Jesure wereyuñumi

¹⁵ Jesu erā eropa arīrire masigu waha wami. Īgu eropa wacū bajarā masa Īgure nūrsiama. Eropigu Īgupu árīpehrerā erā mera majarā dorecurāre ðarā wacū iimi. ¹⁶ Eropigu dorecunirāre erāre Īgu taurare gajirāre weredobirimi Īgu. ¹⁷ Eropa dorecurāre ðarā wacū iigu Goāmū yare weremuhtadigu Isaia iribojegue Īgu arī gojadiro dopa ta iigu iimi Jesu. Ōpa arī gojañumi Isaia mūrū:

¹⁸ Ōpa arīmi Goāmū: “Ihī yū pohro majagu āhrimi. Īgu yū beyedigu āhrimi. Īgure mahia. Eropigu Īgu mera mucubiria. Yū Espiriture Īgure ogura. Eropigu yū turari mera árīpehrerā masare diaye ĩirire weregucumi Īgu. ¹⁹ Eropigu Īgu ne game dūyasosome. Eropigu gaguiniguisme. Eropigu masa bajarā watope Īgu buriḡā gaguinigu weresome. ²⁰ Guaro mariro masare mojomorocurāre itamugucumi Īgu. Daberogā ūjuri peamere yaubiro dopa ta masare turabirāre ðaro iigucumi Īgu. Sīporā marirāre ðaro sīporācūcū iigucumi. Eropa ta ĩiniguigucumi Īgu watire Īgu tarinugaboro core. ²¹ Eropirā masa bajarā Īgure umupeorācoma,” arīmi Goāmū Īgu magu ĩiburire, arī gojañumi Isaia.

*Jesu watī turarire opami, arī weresāñuma masa**Mr 3.19-30; Lc 11.14-23; 12.10*

²² Yujunū watī ñajasūdigure masa aīḡārīma gua pohrogue Jesure taudorerā. Īgupu watī ñajasūdigu wereniguimasibirimi. Eropigu cuiiri ĩhajabirimi. Erā Īgure eropa aī eracū ĩha ðaḡu wacū iimi Jesu Īgure. Īgu eropa ĩicū ðaro ĩha, wereniguimi pare. ²³ Īgu eropa wacū ĩarā, masa ĩhamaria wama.

—¿Ihī Davi mūrū pārami masare taubu āhriri? arīma erā erā basi.

²⁴ Erā eroparīquerecū Jesu watēare Īgu cóarare peerā fariseo masapu ðpa arī pepiñorā:

—Beelzebú, watēa opu, Īgu turari mera watēare cohāmi Jesu, arī pepiñorā erā.

²⁵ Erā eropa arī pepicū masigu, Jesu ōpa arī weremi erāre werenigui queori mera:

—Yuju yeba majarā erā basi gamequeārā iri yeba majarā pehrea wabocoma. Yuju maca majarā erā basi gamequeārā iri maca majarā pehrea wabocoma. Yuju wihi majarā sā gamequeārā eropa ta wabocoma.

²⁶ Eropigu Beelzebú watēa opupu yure watēare cóãdoregu ĩgu basi ĩgu yarāre cóãboñumi ĩgu. Eropirā erā sā wapehrea waboñuma. ²⁷ Ōpa arī weresāa mua yure: “Īgu Beelzebú itamuri mera watēare cohāmi,” arī weresāa mua yure. Mua mera majarā sā watēare cohāma. Eropirā erā “Watī ĩgu turari mera erāre cohāa gua,” arībeama. “Goāmū ĩgu turari mera watēare cohāa,” arīma. Eropirā mua yure “Watī turari mera watēare cohāmi,” mua arīra diaye árībircū mua mera majarā wererācoma. ²⁸ Eropigu yupu watēare cóãgu Goāmū ĩgu Espírítu Santo turari mera cohāa. Yu eropa cóácū iarā ōpa arī masirāca mua: “Goāmū ĩgu opu árīri i yebaguere árítuhajaa dohpaguere,” arīrāca mua.

²⁹ “Ōpa ta āhraa watī turagu tarinugari werediacū: Wihi opu turagure diribigu yajagu ĩgu ya wihigue ñajaja yajamasibeami. Īgure ĩgu dirira puhru tamerare yajamasimi ĩgure, arī weremi Jesu.

Eropa arī weremi watīre ĩgu tarinugarare weregū. Watī turagu árīquerecū ta Jesu ĩgure tarinugami watēare cóãgu.

Eropa arítuhaja ōpa arī werenemomi Jesu masare gua säre:

³⁰ —Yujugu yure gamebigu, yure ĩhaturigu āhrimi. Yujugu yure itamubigu, yure teboricucū ĩgu iimi.

³¹ “Eropigu muare diaye arīgu tīaa yuhū. Árīpehreri ñerire masa erā iicū erā werenigucū säre Goāmū cādijimasimi. Eropa cādijiqueregu Espírítu Santore erā ñero arī werenigucū Goāmū iri tamerare ne cādijisome. ³² Yu masure Goāmū ĩgu obeodigure erā ñero arī werenigucū iri ñerire cādijimasimi Goāmū. Espírítu Santopure erā ñero arī werenigucū irire ne cādijisome Goāmū. Dohpaguere pehrerinu puhru säre erā eropa arīrare ne cādijisome ĩgu, arī buhemi Jesu erāre.

Yucu ducare masiro dopa ta masa erā wereniguirire peerā erā árīricurire masia mari, arī wereñumi Jesu

Lc 6.43-45

³³ Eropigu ōpa arī werenemomi erāre werenigui queori mera:

—Ōadigu yucugu ōarire ducacua. Ñedigu yucugu ñerire ducacua. Yucugu ducare masirā “Irigu ducā ta āhraa,” arī masia mari. Mari eropa masiro dopa ta masa erā wereniguirire peerā erā árīricurire masia mari. ³⁴ Añaa iro dopa ñerā āhraa mua. Mua ñerā árīrā, ōarire wereniguimasibea mua. Mari guñarigue mari pepidiro dopa ta mari wereniguia. ³⁵ Ōagu ōarire pepimi. Eropigu ōarire wereniguimi. Ñegu ñerire pepimi. Eropigu ñerire wereniguimi. ³⁶ Muare arīgu iiaa. Ōaro pepi wereniguirā árīque mua. Ōaro wereniguibirinirā dipuwaja moarinū árīcū, mua eropa arīmaacārare Goāmure wererāca. ³⁷ Mua queoro wereniguirare masigu, “Ōarā āhrima,” arī beyegucumi Goāmū. Eropigu mua ñero wereniguirare masigu, “Ñerā āhrima,” arī beyegucumi ĩgu daja, arīmi Jesu erāre.

Masa ñerā Jesure deyoro moarire iidoreñuma
Mr 8.12; Lc 11.29-32

³⁸ Īġu eropa arīra puhru masare buherā, fariseo masa sā Īġure ōpa arīma:

—Buheġu, Goāmū Īġu obeodigū árġu Goāmū turari mera ii ħmuque ġuare, arīrima erā.

³⁹ Jesu yuhrimi:

—Mūa dohpague majarā ħerā, Goāmure gamebirā āhraa. Yūhū diaye arġu árġū mūa masidiarā Goāmū turari mera deyro moarire iidoreraa yare. Mūa eropa dorequerecū Goāmū yare weremuhtadigū Jona iribojegue majagū Goāmū turari mera Īġu iira dihtare ħmumi Goāmū muare. ⁴⁰ Jona uħrenū gohra waimū wuagu paru pohecaguere árġūmū. Īġu iidiro dopa ta yū sā masū Goāmū Īġu obeodigū uħrenū árġuca yeba pohecaguere. ⁴¹ Iribojegue majarāpū Nīnive maca majarā Jona Goāmū yare Īġu wererare peerā, erā ħero iirare bujawereħuma. Ōarire gohrotoħuma. Dohpaguere mūa watopegue Jona tauro árġu āhraa yūhū. Yūhū Goāmū yare muare werequerecū ta mūa ħero iirare bujawerebeaa. Eropirā Nīnive majarā murapū erā ħero iirare bujawerenirāpū dipuwaja moarinū árġū mūa ħerire bujawerebirinirāre “Ĥerā āħrima,” arġ weresārācoma muare. ⁴² Iribojegue majago, sur majago, opo buro igo sā mūa dohpague majarāre weresāġocumo dipuwaja moarinū árġū. Igo Salomo opu Īġu masirire peediago yoarogue aridigo Salomo opure peego ejaħumo. Eropigo ōaro iigo iħħumo dohpague majarā tauro. Muare arġu tīaa. Dohpaguere mūa watopegue Salomo tauro masigū āhraa yūhū. Yūhū mūa mera árġuquerecū mūa yū masirire peediabeaa. Mūa eropa peediabirira waja igo opo buro muare “Ĥerā āħrima,” arġ weresāġocumo, arġi Jesu erāre.

*Watġ dipaturi masuġuere Īġu ħajara queorire wereħumi Jesu
Lc 11.24-26*

⁴³ Eropiġu dipaturi Jesu queori moa weremi masare.

—Yujugū watġ masū mera árġidigū waha, Īġu deco mariri yebague cuhri, Īġu sooborore amariħumi. ⁴⁴ Eropa bocabigū ōpa arġ pepiħumi Īġu. “Masure yū cóadigū mera ta dipaturi árġu wagura,” arġ pepiħumi Īġu. Eropa arġ pepiġu Īġu dujaa waha Īġu cóadigūre ta bocaħumi daja. Īġu bocaboro core masupū ōagu árġiħumi. ⁴⁵ Eropiġu watġ ġajirā siete watēare Īġu tauro ħerāre siħugū waħumi. Īġu eropa siħucū erā árġpeħrerā Īġu mera árġiħuma. Masupū ero core yujugū watġre opagu ħegu árġiħumi. Puhru bajarā watēare opagu ħetariagu árġiħumi. Eropa dohpague majarā Goāmure gamebirā, yū buherire peediabirā ħetariarā ta warācoma, arġi Jesu erāre.

*Jesu acawererā Īġu pohro eraħuma
Mr 3.31-35; Lc 8.19-21*

⁴⁶ Masare Īġu eropa arġ wereniġuirisubū Īġu pago Īġu pagū porā mera disiporo nigū, Īġure weretamudiaħorā. ⁴⁷ Eropiġu yujugū Jesure weremi: —Mū pago mū pagū porā mera disiporo nigūma mure weretamudiarā, arġi.

⁴⁸ Īġu eroparġū peegu ero árġrāre ōpa arġi Jesu erāre buhebu:

—¿Noa āħriri yū pago gohra? ¿Noa ta yū pagū porā gohra āħriri mūa ġacū? arġi.

⁴⁹ Eropa arġu, ġuare Īġu buherāre sġpu, ōpa arġi:

—Oã áhrima yu pago yu pagu porã iro dopa árĩrã. ⁵⁰ Erã yu Pagu umaro majagu ĩgu gamerire iima. Eropã iirã yu pagu magu, yu pagu mago, yu pagu iro dopa ta áhrima, arĩmi Jesu erãre.

13

Jesu oteri masu ya queorire wereñumi

Mr 4.1-9; Lc 8.4-8

¹ Irinã ta Jesu wihigue árĩgu wiriami gua mera. Wiri, wuariyague waha, iriya turo pohro doami. ² ĩgu eropa doacũ ĩarã bajarã masa ĩgu pohroguo gamenerema. Eropã cũhñacũ ĩagu dohodirugue ñajaa, irirugue doami ĩgu. Masapũ imiporoguo niguima. ³ Eropigu baja queori mera weremi ĩgu erãre. Őpa arĩmi:

—Oteri masu otegu wañumi. ⁴ ĩgu eropa otecũ gajiyeri ma turo yuri merejayoro. Ero mehmerejarayerire mirimagũ porã ahri bacãñuma. ⁵ Eropi gajiyeri utã watope yuri merejayoro. Ero utã watope nicu mariñariro árĩro mata puhririyoro. ⁶ Eropã puhriara árĩquerero, abe ĩgu burigã asicũ, nuguri marinijaro ñaiñaja sĩa wayoro. ⁷ Gajiyeri pora watope yuri merejayoro. Porapũ puhri iri tiataria wa, oterayeripure wejẽcãyoro. ⁸ Gajiyeri õari yebapũ yurimerejayoro. Őaro puhri ðacacũyoro. Gajisari cien yeri, gajisari sesenta yeri, gajisari treinta yeri ðacacũyoro. ⁹ Irire õaro peeque mua, arĩmi Jesu.

Jesu werenigui queori mera ĩgu buherire wereñumi

Mr 4.10-12; Lc 8.9-10

¹⁰ ĩgu eropa arĩra puhru gua ĩgu buherã ĩgu pohro eja, serẽpibu ĩgure: —¿Ne, duhpigu masare queori mera were buheri muhũ? arĩ serẽpibu gua.

¹¹ Jesu yuħrimi:

—Umaro majagu masa tauro opu ĩgu árĩrere iribojegue majarã erã masibirirare muare masicũ iimi Goãmu. Gajirãpure eropiibeami ĩgu. ¹² Eropigu masirãre masinemocũ iigucumi ĩgu. Eropirã erãpu õaro masirãcoma. Masibirãpure merogã erã masiquerecũ erãpure masibiricũ iigucumi ĩgu. ¹³ Eropigu queori mera buhea. Yu eropiicũ õpa wahaa. Dohpague majarã ĩaquererã pee masisome. Eropirã peequererã masibeama. Irire peebirinirã iro dopa áhrima erã. ¹⁴ Eropã árĩrã Isaia iribojegue majagu ĩgu arĩ gojadiro dopa ta iima erã. Őpa arĩ gojañumi:

Őpa arĩmi Goãmu: “Goãmu yare peerãca mua. Eropã peequererã ne masisome mua. ¹⁵ Mua dipuru buri áhraa. Eropirã mua gamiro goberire bihaa peeri arĩrã. Mua cuirire cuumitã ĩhari arĩrã. Eropã ĩbirã õaro ĩarã masiboaya mua. Eropirã peerã masiboaya mua. Mua guñariguo õaro masiboaya. Eropirã yare Goãmure gameboaya mua. Mua eropa yare gamecũ mua ñerire cãdiji, muare tauboaya,” arĩmi Goãmu, arĩ gojañumi Isaia, arĩmi Jesu.

¹⁶ Muapũ peerã masia. Eropirã mucubirã áhraa mua. ¹⁷ Muare ta arĩgu iiaa. Dohpague mua ĩarire mua peerire iribojegue majarã Goãmũ yarã burigã ĩadiariñorã. Goãmũ yare weremuħtanirã sã irire burigã ĩadiariñorã. Ne ĩabiriñorã. Dohpague mua peeri sãre burigã peediariñorã erã. Ne peebiriñorã. Erã eropa masidiaquerecũ ta Goãmũ erãre masidorebiripũ irisubuguere, arĩ weremi Jesu guare ĩgu buherãre.

Jesu oteri masu queorire were amuñumi ñgu buheräre

Mr 4.13-20; Lc 8.11-15

¹⁸ Puhru Jesu guare werenemomi:

—Peeque mua. Oteri masu queorare muare were amugura. Yure peerä ñaro masique. ¹⁹ Oteriyeri ñari buheri iro dopa ähraa. Eropiro ma turo mehmerejarayeri ñari buheri iro dopa ta ähraa. Eropirä masa ñari buherire peequererä ta ne masibeama. Eropigu masa ñari buherire erä peecü ñagu ñegupu watí ahri, iri buherire ñari buherire masidorebeami masare. Mirimagu porä iriyerire erä dote añ badiro dopa ta iimi. ²⁰ Eropi utä watope yuri merejarayeri ñari buheri iro dopa ta ähraa. Eropirä masa ñari buherire pee, mucubiriri mera mata irire pee aïma. ²¹ Eropa pee aïquererä utä watope áriri yucu nuguri mariri yucu iro dopa ta oä masa sä turabeama. Eropa turabirä yaha ñari buherire erä peera dipuwaja gajirä eräre ñero iicü yahare duhucäma. Gajirä eräre erä ñero iicü irire yujuro bojebiri, yahare duhucäma. ²² Eropi pora watope yuri merejarayeri ñari buheri iro dopa ta ähraa. Eropirä masa ñari buherire peequererä i yeba majare wuaro pepiri mera niyerure gametarima. Erä eropa iicü iripu ñari buherire cähmotaa. Iri cähmotacü masa Goämü gamerire iibeama. ²³ Eropi ñari yeba yuri merejarayeri ñari buheri iro dopa ähraa. Eropirä masa ñari buherire peerä irire ñaro masima. Eropa masirä árirä, Goämü gamerire iima erä. Yujuräyeri wuaro ñarire iima cien yeri ducacuro dopa ta. Gajirä erä docañariro ñarire Goämü yare iima sesenta yeri ducacuro dopa ta. Gajirä merogä ñarire iima treinta yeri ducacuro dopa ta, arí weremi Jesu guare.

Trigo watopegue taa tiara queorire wereñumi

²⁴ Eropi dipaturi gají queorire gaa säre weremi Jesu.

—Ümaro majagu ñgu opu áriri werediacü öpa ähraa: Pohe opu ñgu ya pohegue ñariyerire ñgu otediro dopa ta ähraa ümaro majagu ñgu opu áriri. ²⁵ Pohe opu trigo otera puhru árípehrerä ñgu mera majarä sä erä carírisubu ñgure ñaturigü aríñumi. Eropa arígu trigo yeri erä oterayeri watope ñeri taare oteñumi. Otetuhaja waha wañumi. ²⁶ Puhru trigo sari puhri iiriyoro. Eropiro iri ducacuboro core árícü iri ñeri taa sä puhri iri pohere tiha wacü iiyoro. ²⁷ Eropirä pohe opure mohme corerä ñgu pohrogue eja serépiñuma: “Opu, ¿ñariyeri dihtare mü ya pohere otequerécü duhpiro ñeri taa sä tiari iri pohere?” aríñuma erä. ²⁸ “Yure ñaturigü ährañumi iri taare otegu,” aríñumi pohe opu. “¿Taare gua curacü gahmeri muhu?” aríñuma ñgure mohme corerä. ²⁹ “Taare curabiricäque, taare curanijarä trigopure curari,” aríñumi. ³⁰ “Trigo iri ñeri taa mera puhricañiporo. Iri ñarírisubu ducä airäre öpa arirä: ‘Iri ñeri taare cura gameneopimuhätaque irire soemora. Puhru trigore turíque. Turípeho, irire yu diburi wihigüe apique,’ arirä eräre,” aríñumi pohe opu, arími Jesu queori mera weregu.

Mostazayegä queorire wereñumi Jesu

Mr 4.30-32; Lc 13.18-19

³¹ Eropi gají queori guare öpa arí buhemi daja.

—Ümaro majagu ñgu opu áriri werediacü mostazayegä iro dopa ähraa. Iriyegä miriyegä gohra ähraa. Iriyegä yujugu oteri masu ñgu pohegue oteami. ³² Iriyegäre ñgu pohegue otera puhru ñaro puhria. Eropiro yucügu wuatariadigü waha. Eropa wacü mirimagu porä bajarä irigu dupurigüe suhri suama. Eropa ta ümaro majagure marí Opure masirä bajamerägä

erã árfmũhtaquerecũ ta puhruquere erã bajarã warãcoma, arĩ weremi Jesu

Pan bugari queorire wereñumi Jesu
Lc 13.20-21

³³ Eropi gaji queori mera guare õpa arĩ buhemi daja:

—Ūmaro majagu ĩgu opu árfiri pan bugacũ iiburi iro dopa áhrra. Yujugo nomeo panre iigo pan bugacũ iiburi pohgare merogã moremo trigo pohga mera. Igo eropa iicũ pan bugacũ iiburi pohga merogã árfiquerero ta trigo pohgare õaro seyapehrea wahaa. Eropã ta ũmaro majagure mari Opure bajarã masa árfipehrero majarã masirãcoma, arĩmi Jesu.

Queori mera Jesu ĩgu buherãre wereñumi
Mr 4.33-34

³⁴ I árfipehreri buherire queori mera weremi Jesu. Queori mariro werebirimi ĩgu masare. ³⁵ Eropã ta iimi ĩgu Goãmu yare weremũhtadigu ĩgu arĩ gojadiro dopa ta. Ōpa arĩ gojañumi iribojegue:

Queori mera weregura. Goãmure i yebare ĩgu ĩhacũnugura puhru, ne masare ĩgu werebirirare weregura, arĩ gojajuñumi Jesu iiborore.

Jesu trigo watopegue ñeri taa tiara queorire were amupehoñumi

³⁶ Eropi masare goeriseregu, wihigue ñajaa wami Jesu. Eropirã gua ĩgu buherã ĩgu pohrogue eja, serẽpibũ gua:

—Trigo watopegue ñeri taa tiara queorire werepehoque guare, arĩbu gua ĩgure.

³⁷ Jesu yũhrimi guare:

—Pohe opu õariyerire otediro iro dopa ta áhrra yũhũ. Yũhũ masu Goãmu ĩgu obeodigu áhrra. ³⁸ Pohepu i yeba iro dopa ta áhrra. Ōariyeri puhriro ũmaro majagu ĩgu opu árfirogue árfimorã iro dopa ta áhrima. Ñeri taapu watĩ yarã iro dopa ta áhrima. ³⁹ Pohe opure ĩhaturigu ñeri taare otedigu watĩ iro dopa ta áhrimi. Iri ñairisubũ pehrerinũ iro dopa áhrra. Eropirã trigore aĩrã anyua iro dopa ta áhrima. ⁴⁰ Iri ñeri taare erã curarare soe peamegue cóãdiro dopa ta pehrerinũ árficũ watĩ yarãre peamegue cóãrãcoma. ⁴¹ Yũhũ masu Goãmu ĩgu obeodigu yaharã anyuare obeogura. Yũ obeocã anyuapũ ñeri iidorenirãre, ñerire iinirãre yũ dorerogue gameneorãcoma. ⁴² Gameneotuhaja peamegue cóãrãcoma erãre. Erogue erã burigã ore, bujawereri mera gũcũri cũridihurãcoma. ⁴³ Eropirã Goãmu yarã erã Pagũ erã Opu ĩgu árfirogue árfirãcoma. Ero árfirã, õaro mucubiriri mera árfirãcoma erã. Ire õaro peeque mũa, arĩ weremi Jesu.

Niyeru wũaro diburare ĩgu bocara queorire wereñumi

⁴⁴ Eropi gaji queori mera weremi daja:

—Ūmaro majagu ĩgu opu árfiri niyeru wũaro diburare bocadiro iro dopa áhrra. Eropigu yujugu masu curigu wagũ iri niyerure guñaña mariro bocañumi yuju yebague. Eropã bocagu burigã mucubiriñumi ĩgu. Bocatuhaja waha iri yebague dipaturi dujara irire õaro dibunemoñumi. Eropigu ĩgu bocarare aĩbu iri yebare asũdiañumi. Eropigu ĩgu yare duapeho, iri yebare asũñumi. Ūmaro majagu opu ĩgu árfiri ĩgu bocadiro dopa ta áhrra. ĩgu bocarare ĩgu burigã gamediro dopa ta ũmaro majagu masa weca opure õaro erã masira puhru masa burigã gahmema ĩgure, arĩ weremi Jesu.

Waja pagariyere asūra queorire wereñumi

⁴⁵ Eropi gaji queori mera weremi daja:

—Umáro majagu ĩgu opu árĩri waja pagariye perla waĩcuriyere asũdigu iro dopa áhrraa. ⁴⁶ Iriyere amagu òataririyere bocañumi. Bocagu iriyere gametarigu árĩpehreri ĩgu yare duapehogu wañumi. Eropa duatuhaja iriyere waja pagariyere asũñumi. Iriyerire burigã ĩgu gamediro dopa ta umáro majagu masa weca opũre òaro erã masira puhru masa burigã gahmema ĩgure, arĩmi Jesu.

Wejẽdigu mehyura queorire wereñumi Jesu

⁴⁷ Eropi gaji queori mera Jesu weremi daja gua sãre:

—Umáro majagu ĩgu opu árĩri wejẽdigu erã mehyudigu iro dopa ta áhrraa. Irigu wejẽdigu mera bajarã waire gajiropa árĩrãre ñeama. ⁴⁸ Irigu ujuturia wacu wai wejẽrapũ irigure wejẽdigure imiporogue tara majaa òarã waire beyema. Óarãre erã purigüe beye sãma. Ñerã waire cóacãma. ⁴⁹ Pehrerinu árĩcũ òpa ta árĩroca. Anyuapu masare beyerãcoma. Ñerãre beye aĩ wiurãcoma òarã watope árĩrãre. ⁵⁰ Aĩ wiu, erãre peamegue cóarãcoma. Erogue erã ore, burigã bujawereri mera gũcũri cũridihurãcoma ñerãpu, arĩ weremi Jesu.

Mũra buherire, mama buheri sãre wereñumi Jesu

⁵¹ ĩgu eropa arĩ werera puhru guare serẽpimi ĩgu:

—¿I árĩpehrerire peeri mua? arĩ serẽpimi ĩgu.

—Peeã gua, arĩ yuhribũ.

⁵² Gua eroparĩcũ ĩgu weremi guare:

—Judio masare buherã watope yujugu umáro majagu ĩgu opu árĩrĩre buhenugagu iri mama buherire buhegu iribojegue maja sãre masigu weremi. ĩgu wihi opu iro dopa áhrimi. ĩgu ĩgu ya wihi diburare òarire aĩ wiugu, mamare, mũra sãre aĩ wiumi ĩgu, arĩmi Jesu guare.

Jesu Nazaregue ĩgu ya macague wañumi

Mr 6.1-6; Lc 4.16-30

⁵³ Iri queori bajare ĩgu buhera puhru ĩgu mera gua waha wabu. ⁵⁴ Waha, ĩgu masara macague ejabu. Erogue eja, gua buheri wihigüe buhemi ĩgu. ĩgu eropa buhecũ peerã, pee uca wama erã.

—¿Nohogue masiyuri ihĩ i buherire? ¿Dohpa ii ĩgu i deyoro moarire iimasiri? arĩ wereniguima erã erã basi. ⁵⁵ Ihĩ taboa mohmeri masũ magu ta áhrimi ĩgu. Eropi ĩgu pago María áhrimo. Eropi Santiago, José, Simo, Juda ĩgu pagu porã áhrima. ⁵⁶ Dohpaguere ĩgu pagu porã nome i maca áhrima. Eropigu ĩgu mari iro dopa ta árĩgu áhrimi. ¿Eropa árĩqueregu ta nohogue peeyuri i buherire? arĩ wereniguima erã erã basi.

⁵⁷ Eropirã erã ĩgure umupeobirima. Erã eropa umupeobiricũ ĩagu òpa arĩmi Jesu erãre:

—Árĩpehrerogue Goãmu yare weremũtagure gajirã umupeoma. ĩgu ya maca majarã ĩgu ya wihi árĩrã dihta ĩgure umupeobeama. Eropirã yare umupeobeaa mua ohõ yuhũ masadigu árĩcũ, arĩmi ĩgu erãre.

⁵⁸ Eropigu erã ĩgure umupeobiricũ, iri macare baja deyoro moarire iibirimi Jesu.

14

*Ñu waiyegu sīrirare werera
Mr 6.14-29; Lc 9.7-9*

¹ Irisubure Herode Galilea majagu opu Jesu iġu iirare peebeopu. ² Eropa peegu opa arīripu:

—Ñu waiyeri masu sīridiġu dipaturi masa dehyoagu iicumi. Eropa masadiġu árġu iġu turarire opami iġu deyoro moarire iigu, arīripu Herode iġu pohro majaräre. Jesure “Ñu muru ta ährimi,” arī pepiripu iġu Ñure iġu wejedorera puhru.

³⁻⁵ Eropiġu Ñure iġu wejedorero core Herode iġu pagu magu Felipe marapore ehma iġo mera marapocuġu. Iġu eropa iicü iagu Ñu waiyegu Herodepure opa arī wereniġuipu:

—Mu pagu magu marapore marapocuġu Goämu dorerire tarinugagu iiaa muhu, arīripu Ñu iġure. Iġu eropa arīra waja Herode iġure wejēdiaripu. “Ñu Goämu yare weremuhtagu ährimi,” arī pepima judio masa,” arīġu eräpure ġuipu Herode. “Ñure yu wejēcü erä guabocoma,” arīġu eräre ġuipu. Eropa ġuigu Ñure wejēdiabiriripu. Eropa wejēbiriġureġu ta iġure ñeha diridore, peresu iipu. Iġure eropa iicü gamepo iġu marapo Herodia. ⁶ Eropi Herode iġu masa dehyoaranu árġü bosenu iipu iġu. Iġu eropa bosenu iicü iġu marapo mago bosenu eranirä erä ihuro baya ihmupo iġo. Iġo eropa baya ihmucü Herode mucubiripu. Eropa mucubirigu igore arīpu:

⁷ —Goämu mera diaye ta arīġu iiaa. Yure mu serēropē ta ogura yahu mure, arīpu pare Herodepu iġu marapo magore. ⁸ Iġu eroparġü iġu marapo iġo magore iġo serēburire werepo igore. Iġo eropa werecü iġo magopu opa arī serēpo Herodere.

—Ñu waiyegu dipurure tabetadoreque. Eropiġu soropa mera iġu dipurure yure oque, arīpo iġo.

⁹ Iġo eroparġü peegu Herode burigä bujawerepu. Masa erä peero “Mu serēro mure ogura,” arītuhapu iġu. Eropiġu iġu iġu eropa arīrارة guhyasirigu “Mure osome,” arīmasibiripu igore. Eropiġu iġo iġure dorero dopa ta Herodepu iġu pohro majaräre Ñure wejedoreru. ¹⁰ Eropiġu Ñu dipurure tabetadorecäpu pare peresugue árġure. ¹¹ Tabetatuhaja, soropa mera iġu dipurure aġgariñorä erä. Iġu marapo magore iġu dipurure erä ocü, igopu iġo pagoguere ai taupu.

¹² Erä eropa iira puhru Ñu iġu buhenirä iġu dupu murarore aġgä wañorä. Eropa yaatuhajarä, erä iirare Jesure wererä arima.

*Cinco mil masare bari oñumi Jesu
Mr 6.30-44; Lc 9.10-17; Jn 6.1-14*

¹³ Ñu sīrirare peegu Jesu gua mera dohodirugue ñaja, masa marirogue sihu wami. Jesu erogue wacü peerä, masa erä ya macarire wiri, marigüe waha iġu core ejatuhañorä. ¹⁴ Eropiġu Jesu iġu wadiru dohodiru tuhajara puhru iġu bajarä masa árġü iha, mojomoro iam eräre. Eropa mojomoro iagu erä mera bajarä dorecuräre öarä wacü iimi. ¹⁵ Namicague gua iġu buherä opa arību:

—Namicague ähraa. Ohö masa marirogue ähraa. Ögä áriri macarigüe masare wadoreque. Erä baburire asürä waporu, arīribu gua iġure.

¹⁶ Jesu yuhrimi guare:

—Wabiricāporo erā. M̄ua basi ta barire oque erāre, arīmi guare.

¹⁷ —Cinco pan dipurure, perā ta wai sāre iripēta opaa gua, arī yuhribu gua.

¹⁸ —Irire yure aīgārique m̄ua, arīmi guare.

¹⁹ Gua irire ora puhru, taa weca masare ĩgu doadoremi pare. Erā eropa doarisubu cinco pan dipurure aī, perā wai sāre aī, umarogue ĩhamuju, ĩgu Pagure “Ōhaa,” arīmi. Ōpa arītuhaja iri pan dipurure nuha, guare ĩgu buherāre omi. ĩgu eropa ocū guapu iri barire masare guerebu. ²⁰ Eropirā árīpehrerā ōaro baha yapia wama. Erā ba duharare doce puiri gohra aī gameneo, ujutu doobu gua. ²¹ Ero irire banirā uma dihtare queocū cinco mil uma árīma. Nome, majirā sã árīma.

Jesu deco weca curiñumi

Mr 6.45-52; Jn 6.16-21

²² Puhru guare ĩgu buherāre Jesu dohodirugue ñajadore wuariyague taribuja yuudoremi masare ĩgu goerisererisubu. ²³ Goeriseretuhaja, ĩgu basi utāgugue m̄uria, ĩgu Pagu Goām̄u mera serēgu wap̄u ĩgu seyaro. ²⁴ Irisubure wuariya deco gohra gua taribujacū miruñe burigā ahri, pāguri pagari wahgā, dohodirure deco paa ñajabu. ²⁵ Eropa wacū boyom̄iririboro core cāreña wahgārisubu Jesu deco weca cuhraipi wahgārimi gua pohrogue arigu. ²⁶ Gua pohrogue ĩgu aricū ĩarā güibu gua. Eropa güirā gaguiniguiribu.

—S̄iridi m̄uru watī āhrimi, arī gaguiniguibu gua.

²⁷ Gua eropa güicū Jesu ōpa arīmi:

—Ne yure ĩha ucabiricāque. Yuh̄u ta āhraa. Güibita, arīmi guare.

²⁸ ĩgu eroparicū peegu Pedro arīmi ĩgure:

—Yu t̄igu, diaye ta m̄uhu ta ár̄igu, deco weca curi wahgādoreque yure m̄u pohrogue, arīmi ĩgu.

²⁹ —Arique, arī yuhrimi ĩgupu.

ĩgu eroparicū Pedrop̄u dohodirugue ár̄idigu wiria, deco weca Jesu pohrogue niguiğarimi. ³⁰ Miruñe iri burigā aricū ĩagu güimi. Eropa güigu diha dija warimi.

—Yure tauque, arī gaguiniguimi ĩgu Jesure.

³¹ ĩgu eroparicū ta Jesu ĩgu mojtore ñeha,

—Merogā umupeoa m̄uhu yure. ¿Duhpiḡu yure guñaturabeari m̄uhu? arīmi ĩgu Pedrore.

³² Eropa arīra puhru dohodirugue ñajama erā. Erā eropa ñajara puhru, miruñe taria wabu. ³³ Eropirā gua ĩgu buherā dohodirugue ár̄irā Jesure umupeobu.

—Diaye ta m̄uhu Goām̄u magu ta āhraa, arību gua ĩgure.

Genesare majarā dorecurāre tauñumi Jesu

Mr 6.53-56

³⁴ Eropi taribujaja, Genesare waicuri yebague ejabu. ³⁵ Ero majarā Jesure ĩha masima. Eropa masirā erā pohro ár̄irāre dorecurāre aīgāredorema. Eropirā erā dorecurāre ĩgu pohrogue aī erama.

³⁶ —M̄u suhriro taro dihtare guare mohmepiñadoreque, arī serēma erā Jesure. Eropirā ár̄īpehrerā dorecurā ĩgu suhrirore mohmepiñanirā dihta ōarā wama.

15

*Masa ñerã wacũ iirire wereñumi Jesu**Mr 7.1-23*

1 Eropi Jerusalén majarã, fariseo masa, masare buherã mera Jesu pohrogue erarã, serëpima ñgure:

2 —¿Duhpirã mari ñecu sumarã mura erã dorediro dopa iibeari ma buherãpu? Erã mari dorero dopa ta erã baboro core mojo coe ihmubeama, arĩma erã Jesure.

3 Jesu yuhriyu serëpimi erãpüre:

—¿Muapu duhpirã Goãmu doreripüre iibeari? ¿Duhpirã mua ya doreri dihtare iiri muapu? 4 Ōpa arĩmi Goãmu: “Mua pagu sumarãre umupeoque,” arĩmi. Eropigu “Ñgu pagu sumarãre ñero werenigui corefigure erã dipuwaja moarã wejëbu árigucumi,” arĩmi Goãmu. 5 Ñgu eropa arĩquerecũ ta muapu ōpa arĩdorea masare erã pagu sumarãre. “ ‘Muare itamumasibea. Muare yu oborare Goãmu ya árĩburire opehocãbu,’ arĩque mua pagu sumarãre,” arĩ buheraa mua. 6 Mua eropa buherã erã pagu sumarãre erã umupeobiricũ iiaa mua. Mua eropa iirã Goãmu buherire tarinugarã iiaa mua mua ya doreri dihtare iirã. 7 Masa erã ñabiripüre ñero iicorerã áhrraa mua. Goãmu ya weremuhtadigugue Isaia muare diaye ta were gojamuriñumi iribojeguer:

8 Oã masa yure ōaro wereniguiquererã yure ōaro umupeobeama. Erã ya sĩporãripu gajipugue áhrraa. 9 Goãmu ya dorerire arĩbodirore erã ya werenigui dihtare buhema erã. Eropirã yure umupeo erã sĩbuipeori duhpiburi árĩbeaa, arĩ gojañumi Isaia, arĩmi Jesu fariseo masare, masare buherã sãre yujuropa ta.

10 Eropa arĩtuhaja ñgu pohrogue masare sihubeo, ōpa arĩmi:

11 —Peegue mua. Mua disirorire ñajaripu mua baripu masare ñerã masa wacũ iibea. Mua wereniguiripu mua ya disiro wiriripu muare ñerã árĩcũ iiaa, arĩmi Jesu.

12 Ñgu eropa arĩ buhera puhru gua ñgu buherãpu ñgure werebu:

—Mu eroparicũ peerã fariseo masa guama, arĩ werebu gua ñgure.

13 Iirire pee ōpa arĩ yuhrimi guare:

—Erã otera iro dopa áhrraa. Yu Pagu umaro majagu árĩpehreri oterare ñgu otebirirare nuguri mera ta cura cóãgucumi. 14 Erãre eropa ñacãque. Erã Goãmu yare masibirã masa cuiri ñhajabirã iro dopa áhrraa. Cui ri ñhajabirã seyaro erã basi game tuagã erã perãque ta mehtua yuhridjarãcoma gobegue. Eropa erã Goãmu yare masibiriquererã ta gajirãre masibirãre buhedarima. Eropirã erã erã buherã sã peamegue warãcoma, arĩmi Jesu.

15 Ñgu eroparicũ peegu Pedro arĩmi:

—Ñe queoriñere erã disiro wiriri queorire werenemoque guare daja, arĩmi ñgu Jesure.

16 Jesu yuhrimi:

—¿Ne, peenibeari mua? 17 Masa erã barire bacũ erã ya disiro ñajaa. Eropiro erã parugue ñajaja, puhru erã dupupu ñerire cohãa. Ibu gohra áhrraa. Mari bari marire ñerã wacũ iibea. ¿Ire masibeari mua? 18 Masa ya disiro wiriri, erã wereniguiripu erã pepiri áhrraa. Erã ya pepiripu ñeri árĩro masare ñerã árĩcũ iiaa. 19 Erã pepirigüe ōpa ñeri nugaa: Ñeri pepiri, masare wejëri, gajigu marapo mera ñero iiri, ñero iirã nome mera ñero iiri, yajari, guari, masare ñero quere iiri, masa erã pepirigüe nugaa. 20 Iri

ñeripu masare ñerã áricũ iiaa. Masa erã dorerire murague erã iimuridiro dopa ta mojoto coebiriquererã ta erã bacũ iri masare ñerã masa áricũ iibeaa, arimi Jesu.

Judio maso áribigo Jesure umupeoñumo

Mr 7.24-30

²¹ Eropa arĩ buhetuhaja guare sihu waha wami daja. Tiro waicuri maca pohrogue Sidón waicuri maca pohrogue ejabu gua. ²² Gua erogue ejacũ Canaa yeba majago ero áriigo Jesu pohrogue eja, turaro mera wereniguimo:

—Opu Davi pãrami, masare taugu yure mojomoro ñaque mũhu. Yu mago watĩ ñajasũdigo ñetariaro tarimo igo, arimo.

²³ Igo eropa arĩquerecũ ta Jesu igore yuhribirimi. Īgu eropa iicũ ñarã gua ĩgu buherãpu ĩgure òpa arĩribu:

—Wadoreque igore. Ñe gariboro busucumo, arĩribu gua.

²⁴ Gua eroparicũ peegu ĩgu yuhrimi igore:

—Israe majarã oveja dederenirã iro dopa árirã dihtare itamudoregu obeomi yu Pagu yure, arimi ĩgu.

²⁵ Īgu eroparicũ ta Jesu guburi pohro merejamo igo.

—Mũhu eropa arĩqueregu itamuque yure, arimo igo.

²⁶ Jesu yuhrimi igore:

—Wihi opu porã ya barire diayeare ocũ òabeaa. Eropa arĩgu, Israe masa yare gaji yeba majarãre yu ocũ òabeaa, arĩ weremi Jesu igore.

²⁷ —Eropa ta áhrea, Opu. Eropa arĩquerecũ barisubu dijarire diayea sã bacohrema. Gaji yeba majago yu arĩquerecũ ta yu sãre itamuque mũhu, arĩ yuhrimo igo.

²⁸ Igo eroparicũ ĩgu yuhrimi:

—Mũhu nomeo, yure bariigã umupeoa. Mũ gamero dopa ta eropa waroca, arimi Jesu igore.

Īgu eroparicũ ta igo mago mata òago wapo.

Bajarã dorecurãre òarã wacũ iĩnumi Jesu

²⁹ Eropa arĩtuhaja guare sihu waha, Galilea waicuriya turo pohrogue sihu ejami daja. Puhru utãgugue muria, erogue doajami. ³⁰ Ero ĩgu doacũ masa bajarã erama. Eropirã bajarã dorecurãre aĩ erama. Curimasibirãre, cuiiri ihajabirãre, yujupu ñero guburucurãre, apayuriri árirãre, wereniguimasibirãre, bajarã gajirã dorecurãre ĩgu pohrogue aĩ erama masa. Eropa aĩ erarã Jesu guburi pohrogã apima erã. Erã eropa duhupira puhru òarã wacũ iimi Jesu erãre. ³¹ Īgu eropa iicũ ñarã masa ñhamaria wama. Wereniguimasibirinirã erã wereniguicũ ñarã, apayuriri árinirã erã òarã wacũ ñarã, curimasibirinirã erã curicũ ñarã, cuiiri ihajabirinirã erã ñacũ ñarã, ñhamaria wama erã. Eropirã òpa arima:

—Mari Israe majarã mari Opu Goãmu turagu òagu áhrimi, arĩ umupeoma erã Goãmure.

Cuatro mil gohrare masa bajarãre barire oñumi Jesu

Mr 8.1-10

³² Īgu eropa iira puhru Jesu guare ĩgu buherãre sihubeo arimi:

—Oã masa yu mera uhrenu gohra arĩtuhajama. Erãre bari pehrea waca. Eropigu erãre mojomoro ñhaa. Erã babiriquererã erã ya wirigue dujacũ gamebirica. Mague warã erã oaboarã turabiribocoma. Eropigu erãre bari ejotudiaca, arimi ĩgu.

³³ Īġu eroparicū gua ġu buherā ġure serēpibu:

—¿Duhpii mari oġuere masa mariroguere barire bocabocuri erā bajarā masare ejoburire? arību gua ġure.

³⁴ —¿Dinacu dipuru pan dipurare opari mua? arīmi guare.

—Siete pan dipuru, bajamerāgā waire opaa, arī yuhribu gua.

³⁵ Gua eroparicū peegu ġu masare taa weca doadoremī. ³⁶ Tuhajanugu siete pan dipurare, waigā sāre aī, ġu Pagure “Ōhaa,” arī serētuhaja, pan dipurare nuha, guare ġu buherāre omī. Eropirā gua ġu buherā iri barire masare guerebu. ³⁷ Eropirā masa irire baha, yapia wama. Erā ba duharare siete puiri gohra aī gameneo uġutu dobobu gua. ³⁸ Ero banirāre uma dihtare queocū cuatro mil gohra arīma. Nome, majirāgā sā arīma. ³⁹ Erā eropa batuhajacū Jesu masare goerisere, dohodirugue ñaja, Magdala waicuri yebague guare sihu ejami.

16

Fariseo masa, saduceo masa sã Goãmu turari mera deyoro moarire Jesu iicū iadiariñuma

Mr 8.11-13; Lc 12.54-56

¹ Eropi fariseo masa, saduceo masa mera Jesu pohroge erama. “Īġu Goãmu ġu obeodigu arībeami,” arī iadiariñuma. Eropirā ġure Goãmu turari mera deyoro moarire ġu ii ħmucū gamerima. Īġu ii ħmumasibiricū “Goãmu obeodigu arībeami,” arīdiarima. ² Erā ġure deyoro moarire eropa iidorecū Jesu yuhrimi erāre:

—Ñami wacū necā oaro boyocū ĩarā “Ōari ñami arīroca,” arāa mua.

³ Eropirā boyoropure ñipicū ĩarā, “Deco ariroca,” arāa mua. Umarore ħhamemujurā, “Ōpa waroca,” arī masia mua. Eropa oaro masiquererā ta dohpague Goãmu turari mera muare yu ii ħmuquerecū ta ne irire oaro masibea mua. ⁴ Dohpague majarā ñetariarā Goãmure gamebirā Goãmu turari mera ii ħmurire iadiarima. Deyoro moarire ii ħmusome yuh. Goãmu yare weremuhtadigu Jona muru ġure wadirore masituhaa mua. Iri dihtare ħmuġura muare, arī yuhrimi Jesu.

Eropa arī weretuhaja guare sihu waha wami daja.

Fariseo masa saduceo masa erā ñeri buherire wereñumi Jesu

Mr 8.14-21

⁵ Wuari ditarugue gua taribujarā panre cādijicānirā arīribu. ⁶ Eropigu Jesu guare weremi:

—Fariseo masa saduceo masa erā pan buġacū iiburire oaro masique mua. Guhya āhraa, arī weremi guare:

⁷ Īġu eroparicū pee wisirā gua basi irire wereniguibu.

—Mari panre mari aīġaribiricū ĩagu eropa arīcumi ġu, arī pepiribu gua.

⁸ Gua eropa arīrare masigu, guare serēpimi:

—¿Duhpirā panre mua cādijirare guñari mua? Merogā gohra yure umupeoa mua. ⁹ ¿Masinibeari mua? ¿Cinco mil umare cinco pan dipurare yu nuha orare guñabeari mua? ¿Erā baha yapira puhru doce puiri gohra mua uġutu doborare guñabeari mua? ¹⁰ ¿Eropirā daja siete pan dipurare nuha, cuatro mil umare yu ora sāre guñabeari mua? ¿Erā baha yapira puhru dinacu puiri gohra mua uġutu doborare guñabeari mua? ¹¹ ¿Eropirā pan buġacū iiburire yu werecū duhpirā oaro peebeari

mua? Eropa arĩgu pan gohrare arĩgu iibeaa. Fariseo masa, saduceo masa erā pan bugacū iiburire ōaro iique, arĩgu pan gohrare arĩgu iibeaa, arĩ weremi ĩgu guare.

¹² ĩgu eropa arĩ werecū gua masibu. “Pan bugacū iiburire,” arĩgu pan gohrare arĩgu iibirimi. Eropa arĩgu fariseo masa, saduceo masa erā buherire arĩgu iidi arĩrimi guare. “Erā ya buherire peebiricāque,” arĩgu iimi.

Jesu diaye ta Cristo ĩgu arĩrire wereñumi Pedro

Mr 8.27-30; Lc 9.18-21

¹³ Eropi Jesu mera warā Cesarea Filipo waĩcari maca pohro arĩri macague ejabu gua. Eropigu iri macague gua ejara puhru Jesu guare ĩgu buherāre serēpiñami:

—¿Nihino arĩcari yuħu masa erā pepicū? arĩ serēpimi ĩgu.

¹⁴ —“Ñu waĩyegu āhrimi,” arĩma mure gajirā. Gajirā “Elia āhrimi,” arĩma. Gajirāpu “Jeremia arĩbocumi o gajigu Goāmu yare weremuhtanirā mera majagu arĩbocumi,” arĩma, arĩ yuhribu gua ĩgure.

¹⁵ —¿Muapū pepicū nihino arĩcari yuħu? arĩ serēpimi ĩgu guare daja.

¹⁶ Simo Pedropū yuhrimi:

—Muħu Cristo Goāmu obeodigu āhraa. Goāmu ojocarigu magu āhraa muħu, arĩ yuhrimi Simo Pedro.

¹⁷ —Simo, Jona magu, muħu mucubirigu āhraa. Ōpa arĩ mu yare yuhhira masa erā werera arĩbeaa. Yu Pagu umaro majagupu irire mure masicū iiami. ¹⁸ Mure arĩgu tiiaa. Muħu Pedro waĩcugu āhraa. (Pedro arĩgu utāye arĩgu iipu.) Iye utāye weca wuari wihire yu iibodiro dopa ta yaharāpūre yuju curu wuari curu arĩcū iiguca yuħu. Eropigu watī ĩgu yarā mera yaharāre tarinugasome. Eropirā yaharā ne peamegue wasome.

¹⁹ Ūmaro majagu mari Opu ĩgu arĩro maja sawire mure ogura. Eropigu i yebaguere mu iidorebicū yu sā umarogue arĩgu iidoresome. I yebaguere mu iidorecū umarogue yu sā iidoregura, arĩmi Jesu.

²⁰ ĩgu eropa arĩra puhru guare ĩgu buherāre weremi:

—Yure “Cristo āhrimi ĩgu,” ne arĩ weresiribiricāque gajirāre, arĩmi guare.

Jesu ĩgu sriburiñere, ĩgu masa muriaburiñe säre wereñumi

Mr 8.31-9.1; Lc 9.22-27

²¹ Irisubure ta Jesu guare ĩgu buherāre ōaro werepehonugami:

—Jersalēngue yure waro gahmea dohpaguere. Erogue majarā, murā, pahia oparā, mari masare buherā sā yure ñero iirācoma. Eropirā yure wejērācoma. Eropa ta ñero tariro gahmea yure. Eropigu uhrenu puhru ta masa muriaguca, arĩ weremi guare ĩgu.

²² ĩgu eroparicū peegu Pedropū gajipu ñarigā Jesure aīgā, ĩgure ōpa arĩmi:

—Opu, eropa arĩbiricāque. Mu arĩro dopa wabiricāporo. Mure erā wejēbiricāporo, arĩrimi ĩgu Jesure.

²³ ĩgu eroparicū peegu Jesu majinugaja, ĩgure ōpa arĩmi:

—Satana iro dopa wereniguigu iiaa muħu. Eropa arĩbiricāque. Mu pepiri masa ya pepiri āhraa. Goāmu ya pepiri arĩbeaa. Eropigu yu iiborore cāhmotadiaa muħu, arĩmi Jesu Pedrore.

²⁴ ĩgu eropa arĩra puhru guare weremi:

—Yujugu yu mera majagu arĩdiagu, ĩgu gamero iidarire duhucāgacumi. Eropigu ĩgu yu mera majagu arĩri dipuwaja ñero

tarigucumi. Eropa ñero tariqueregu ta yahare iiniguicãgu árigucumi. ²⁵ Yujugu masu igu ya árĩburi dihtare pepigu igu dederea wagucumi. Eropigu yujugu masu yaha árĩburi dihtare iigu árĩpehrerinari ya mera umarogue ðaro árigucumi igu. ²⁶ Yujugu masu i yeba majare árĩpehrerire opaqueregu peamegue wagu ðarire wajasome. Eropigu i yebague opaburi dihtare guñagu, igu sirigu waburire guñabigu igu siporã mera peamegue dederegucumi. ²⁷ Yuhu masu Goãmu obeodigu yaharã anyua mera i yebague dujariguca. Yu Pagu igu gosesiriri mera dujarigu árĩpehrerã masare erã ñeri iira dipuwaja dipuwaja moagura. Erã ðaripure erã iicũ ðaro iigura erãre. ²⁸ Diaye arigu tiiaa. Yujurãyeri mua ðguere árĩrã mua siriboro core yure yu opu arigu áricũgue iarãca, arĩ weremi Jesu.

17

Jesu igu dupure gohrotoñumi

Mr 9.2-13; Lc 9.28-36

¹ Eropi seis nuri puhru Jesu Pedrore, Santiagore, igu pagu magu Ñu sãre umadigu utãgugue erã dihtare sihumariapu. ² Umarogue erã marijara puhru erã ñhabeoro igu dupure gohrotopu. Igu diapo abe umu majagu iro dopa gohra gosesiriyoro. Eropiro igu suhri gosesiriri suhri ðaro boreriñe wayoro. ³ Mata iribojegue majarã Moise muru Elia muru sã dehyoañorã. Eropirã Jesu, Moise, Elia mera igu weretamucũ ñañorã erã urerã igu buherã. ⁴ Eropigu Pedro Jesure arĩpu:

—Opu, mari ohõ áricũ ðadiaa. Mu gamecũ uhre wihigã iirã. Mu ya wihigã, Moise ya wihigã, Elia ya wihigã iirã mari, arĩpu.

⁵ Igu eropa arĩ wereniguirisubu, imica curu ðaro gosesiriri curu erãre cãhmotacãyoro. Eropa wacũ imica curu pohecague Goãmu igu wereniguiiri busuyoro:

—Ihĩ yu magu yu mahigu áhrimi. Igu mera mucubiria. Iguere peeque, arĩri busuyoro.

⁶ Eropa arĩro caricũ peerã igu buherã uca mehmereja wañorã. ⁷ Erã eropa wara puhru Jesu erã pohrogue eja, erãre buacare ñahpu:

—Wahgãñagajaque mua. Güibiricãque, arĩpu igu erãre.

⁸ Igu eroparicũ erã ñhabeo, Jesu dihtare ñañorã. Gajirãre ñabiriñorã.

⁹ Eropirã utãgugue erã dijaricũ Jesu erãre turaro mera arĩpu:

—Dohparagã yure eropa warare gajirãre ne werebiricãque. Yuhu masu Goãmu igu obeodigu yuhu sirĩ masa mariara puhru irire gajirãre wereque mua, arĩpu Jesu.

¹⁰ Igu buherãpu igure serẽpiñorã:

—“Cristo Goãmu beyedigu igu ariboro core Eliare arimũhtaro gahmea,” arĩma masare buherã. ¿Dohpa arĩronore eropa arĩri erã? arĩ serẽpiñorã erã igure:

¹¹ Jesu yuhripu:

—Diaye ta áhrraa. Eliare arimũhtadoremi Goãmu árĩpehrerire amumũhtabure. ¹² Opa arigu mũare arigu iiaa. Elia eratuhami. Igu eropa eraquerecũ ta erã igure ne ñha masibirima. Eropirã erã gamero dopa ñero iinirã árĩma igure. Eropa ta iirãcoma yu masure Goãmu igu obeodigure. Erã eropa iicũ ñero tariguca yuhu, arĩpu Jesu.

¹³ Īḡu eropa arī werecū erā peeñorā. “Elia,” arīḡu, Ñu waīyegure wereḡu iipū. Irire masiñorā pare erā.

Jesu ñama sīriri murare dorecugure tauñumi

Mr 9.14-29; Lc 9.37-43

¹⁴ Eropirā utāḡugue murijanirā erā urerā Jesu mera dijararā gua pohrogue erama bajarā masa árīroque. Erā eracū ĩaḡu yujugu umu Jesu pohrogue eja, merejami.

¹⁵ —Opū, yu magure mojomoro ĩaque. Īḡu ñama sīriri murare dorecugu āhrimi. Eropigu ĩḡu ñetariaro tarimi. Bajasuburi peamegue mehmerejamurimi ĩḡu. Yujuyerisuburi diaguere yuri ñajamurimi. ¹⁶ Eropigu mu buherā pohrogue aī erarabu. Erā ĩḡure oḡagu wacū iimasibirama, arīmi ĩḡu Jesure.

¹⁷ Jesu arīmi ero árīrāre:

—Dohpague majarā mua ñerā āhraa. ¿Yure ne umupeobirigohracāri? Yoari boje muare buherabu yuhu. ¿Dipē yoari boje yure mua garibori? Īḡure aīḡārique yure, arīmi Jesu.

¹⁸ Īḡu majigure erā aī eratuḡajacū ĩha Jesu watīre tuhri cóami. Eropigu mata oḡagu wami ĩḡu magu.

¹⁹ Puhru gua ĩḡu buherā gua seyaro árīrā Jesure serēpibu:

—¿Duhpirā guapu ĩḡu magure watīre cóamasibirayuri? arī serēpibu gua.

²⁰ Jesu yuhrimi:

—Yure daberogā umupeoa mua. Diaye ta muare wereḡu iiaa. Goāmure “Diaye ta iḡu āhrimi,” mua arī umupeorā miriyegā mostazaye pegā mua umupeoquererā irigu utāḡure “Sohōgue waque,” mua arīcū, waha waroca. Goāmure eropa umupeorā arīpehrerire iimasia mua. ²¹ Ino watīre mua cóādiarā Goāmure burigā serēro gahmea muare. Eropirā ba duhuro gahmea Goāmure serēmorā, arīmi Jesu guare.

Dipaturi Jesu ĩḡu sīriburiñere ĩḡu masa muriaburiñe sāre wereñumi

Mr 9.30-32; Lc 9.43-45

²² Eropi Galilea yebague gua curicū, Jesu guare weremi:

—Yuhu masu Goāmū ĩḡu obeodigu āhraa. Masa yure ñeha, gajirāguere yure wiarācoma. ²³ Eropa yure erā wiara puhru wejērācoma erā. Eropa erā wejēdigu uhrenu puhru masagūca, arīmi ĩḡu guare.

Īḡu eropa arī werecū pee burigā bujawerebu gua.

Goāmū wihi maja wajayeburire serēpiñuma gajirā

²⁴ Eropirā Capernaum macague gua eja, Goāmū wihi maja wajayeburire wajasea corerā Pedro pohrogue eja, ĩḡure serēpiñama:

—¿Muare buheḡu Goāmū wihi maja arīburire wajayeri ĩḡu? arī serēpima erā.

²⁵ —Wajayemi ĩḡu, arī yuhrimi Pedro.

Īḡu eropa arīra puhru wihigue ĩḡu ñajacū ta Jesu Pedre serēpimūhtami:

—Simo, ¿dohpa arī pepiri mūhu? ¿I yeba majarā oparā ñehmarāpure waja aīri mu pepicū? ¿Erā mera majarāre wajaseari? ¿O gaji yeba majarāpure wajaseari? arī serēpimi ĩḡu Pedre.

²⁶ —Gaji yeba majarāpure wajaseama, arī yuhrimi Pedro.

Īḡu eroparīcū Jesu weremi:

—Eropigu opu ĩgu ya yeba majaräre wajaseabirimuririmi. ²⁷ Eropa arĩquerecũ ta wajasea coreräre guacũ iidiabea mari. Eropirã wajayerãca. Ditarugue waque. Erogu eja wejericãrore mehyuque. Eropigu waimũ bamũhtadigure tara suaque. Eropigu ĩgu waimũ disirogue niyeruser e boca jaguca muhu. Irise queoro wajacuroca. Yure, mua sãre Goãmu wihi maja arĩburire erã wajaseacũ ðaro queoro sihajaroca irise. Irisere boca jagu mari wajamoriñere wajayepehogu waque, arĩmi Jesu Pedrore.

18

Jesu ĩgu buheräre erã weca opu arĩbure wereñumi

Mr 9.33-37; Lc 9.46-48

¹ Irisubure gua Jesu buherã ĩgu pohrogu eja serẽpibu ĩgure:

—¿Umaro majagu ĩgu opu arĩroguere gua mera majagu nihino wabocuri arĩpehrerã weca opu? arĩ serẽpibu gua.

² Gua eroparicũ Jesu majigugãre sihubeo, ĩgugãre gua watope duhudobomi. Duhudobotuhaja guare arĩmi.

³ —Diaye muare were purumujugura. Oã majirãgã Goãmure erã opu gohra pepima. Eropirã mua sã erã iro dopa ta pepirã, ðarire gohrotorã umaro majagu opu arĩroguere warãca. Erã iro dopa pepibirã opu ĩgu arĩroguere wasome mua. ⁴ Eropigu umaro majagu ĩgu opu arĩroguere eropa pepicãgu, ihĩ majigugã dopa pepigu ta gajirã tauro opu wahami.

⁵ Eropirã yahare iimorã ðpa arĩgugãre gamerã, yu sãre gahmea mua, arĩ weremi Jesu guare.

Ñerire iicũ guhya ãhraa arĩ wereñumi Jesu

Mr 9.42-48; Lc 17.1-2

⁶ Eropigu ðpa werenemomi:

—Īgã dopa arĩgu yure ne umupeogure weregura muare. Yujugu ĩgã iro dopa arĩgure ñerire iidoredigu ĩgu ñetariaro tarigucumi. Gajigure masa ĩgu wanugure wuariye utãye mera dirisiu, wuariyague ĩgure coãcũ ñero wabocumi ĩgu. Eropigu ĩgã dopa arĩgure ñerire iidoredigupu wuariyague erã coãdigu tauro ñero tarigucumi. ĩgu turaro dipuwaja moasũgucumi.

⁷ Masare ñerire iicũ iiri ãhraa. Irise iirã i yeba majarã ñero tarima. Gajirã ñerire iidorema gajirã masare. Erã ñerire iidorenirãpu erã tauro ñetariaro tarirãcoma.

⁸ “Mu mojoto mera ñero iigu iri mojtore mu tabe coãbodirop dopa ta iri ñerire duhuque. Irise duhubigu peamegue waguca. Eroguere ne peame yaribea. Mu mojtore mu coãcũ iri dũca dihta cohmoboya. Eropigu mupũ epasi arĩqueregu ta puhru Goãmu mera arĩguca. Mu pe mojoto mera arĩgure peamegue ĩgu coãcũ ñetariaro tariguca. Eropigu iri ñeri iiripare duhuque. Mu guburu mera ñero iigu iri guburu sãre mu tabe coãbodirop dopa ta iri ñerire duhuque. Irise duhubigu peamegue waguca. Eroguere ne peame yaribea. Mu guburure mu coãcũ irisi dihta cohmoboya. Eropigu epasi arĩqueregu ta puhru Goãmu mera arĩguca. Mũhu pe guburu mera arĩgure mare peamegue coãcũ mu ñetariaro tariguca. Eropigu iri ñeri iiripare duhuque. ⁹ Mu cuiru mera ñero iigu irirure mu gorawea coãbodirop dopa ta iri ñerire duhuque. Irise duhubigu peamegue waguca. Eroguere ne peame yaribea. Mu cuirure coãcũ iriru dihta cohmoboya. Yujupu cuiru mariquerecũ ta puhru Goãmu

mera áriḡuca. Mure pe cuiru mera áriḡure peamegue mure cóãcũ, mũ ñetariaro tariguca. Eropiḡu iri ñeri iiripare duhucãque, arĩmi Jesu.

Oveja dederediḡu queorire wereñumi Jesu

Lc 15.3-7

¹⁰ Eropiḡu gua sãre werenemomi:

—Ne, oã majirãḡãre doobiricãque. Mũare arĩḡu tiiaa. Erãḡãre ñhadiburã anyua umarogue yu Pagu pohrogue eropa arĩniḡuima. ¹¹ Yũhu masu Goãmũ iḡu obeodiḡu i yebague dederebonirãre tauḡu arĩḡu iibũ yũhu, arĩ weremi Jesu.

¹² Eropa arĩtuha õpa arĩ queorire ahmu wereniḡuimi.

—Ovejare ñhadibuḡu cien ovejare opagu yujuḡu oveja dederea wacũ ñagu õpa iḡucumi erãre ñhadibuḡupu. Gajirã ovejare noventa y nueve ovejare erã bari campogue duhudobo, dederediḡure amagu waguçumi.

¹³ Diaye ta arĩḡu iiaa mũare. Ñḡure bocagu burigã mucubirigucumi iḡu. Gajirã noventa y nueve duhyarã mera mucubiridiḡu áriḡuereḡu erã tauro ñḡu bocadiḡupure mucubirigucumi. ¹⁴ Eropa ta mari Pagu umaro majagu oãḡã iro dopa arĩrã sãre erã dederecũ gamebeamĩ, arĩmi Jesu.

Mũ acawereḡu mure ñero iicũ õpa iique, arĩñumi Jesu

Lc 17.3

¹⁵ Eropa arĩtuhaja õpa werenemomi Jesu:

—Mũ acawereḡu mure ñero iicũ iḡu mera weretamuḡu waque. Mũa seyaro irire weretamuque. Mũ eropa iicũ iḡu mure peebocumi. Ñḡu peecũ “Mure dipaturi ne õpa iisome yũhu,” iḡu arĩcũ mũ acawereḡure dipaturi wapicũ iḡuca mũhu. ¹⁶ Mure iḡu peediabiricũ tamerare yujuḡu mera wadiagu, o perã mera wadiagu, erãre wapicũḡã dipaturi ñḡure wereniḡuigu waque daja “Erã sã peeporo,” arĩḡu. ¹⁷ Eropiḡu mũ mera majarã sãre iḡu peediabiricũ áriḡpehrerã Jesu yarã mera gamenere ñḡure weresãque. Eropirã Jesu yarã gamenererã sãre iḡu peediabiricũ ñarã Goãmure masibigu ñegu arĩro dopa iique ñḡure.

¹⁸ “Diaye ta mũare arĩḡu iiaa. I yeba mũa yaharã yaha dorerire oparãca. Eropirã mũa i yebare iidorebirirare yu sã umarogue arĩḡu iidoresome. I yeba mũa iidorerare yu sã umarogue iidoreḡuca.

¹⁹ “Dipaturi mũare ire weregura daja: Mũa perã Goãmure sererã, yujuro mera pepirã arĩcũ, yu Pagu umaro majagu irire mũare ogucumi. ²⁰ Perã o urerã yaharã yahare iimorã erã gamenerecũ yu sã erã mera aḡraa, arĩ weremi Jesu.

²¹ Pũhrũ Pedro Jesu pohrogue eja serẽpimi:

—Opũ, çyu acawereḡu mũa yagu iḡu dinucsuburi yure ñero iicũ ñagu irire cãdijitugucuri yũhu? ¿O siete suburi iḡu iicũ cãdijitugucuri yũhu? arĩ serẽpimi Pedro.

²² Jesu yahrimĩ:

—Sietesuburi dihta mure iḡu ñero iirare mũa cãdijicũ ero wabeaa. Bajasuburi iḡu mure ñero iicũ sãre cãdijique, arĩmi ñḡure.

Pohro majagu gajigu iḡu wajamorare iḡu cãdijidiabirira queorire wereñumi Jesu

²³ Eropiḡu Jesu õpa werenemomi guare:

—Um̃aro majagu opũ arĩri werediãcũ õpa aḡraa. Yujuḡu opũ iḡu pohro majarãre erã ñḡure wajamorare wajayepheho dorediarĩñumi. ²⁴ Erã wajamorare iḡu queonugacũ, ñḡure mohme corerãpu wũaro wajamogure

Īgu pohroge aīgāriņuma. Wajamogupū wuaro wajamoņumi opure. ²⁵ Eropīgu Īgu wajayemasibiricū ĩagu Īgu opu ĩgure, ĩgu marapore, ĩgu porā sāre pohro majarā acu, erāre gajirāre duadiariņumi ĩgu wajamorire wajaseagu. ²⁶ Īgu eropa duadiacū wuaro wajamogupū mereja, ĩgu opure turaro serēņumi: “Opu, guare gajirāre duabiricāque. Mojomoro ĩagu corenīque. Mure wajayepohogūca,” arīņumi ĩgu ĩgu opure. ²⁷ Īgu eroparīcū peegu ĩgure mojomoro ĩagu, ĩgu wajamorare eropa ta cādijipehocāņumi.

²⁸ “Īgu eropa iira pūhrū wajamodigupū waha, gajīgu pohro majagure bocaļaņumi. Īgupū merogā wajamoņumi ĩgure wajamodigupūre. Eropa bocaļagu yojaro mera ņeaņumi ĩgure. “Yure mū wajamorare wajaye purumujuque duru,” arīņumi ĩgu ĩgu mera majagure. ²⁹ Īgu eroparīcū gajīgu pohro majagupū mereja ĩgure burīgā serēriņumi: “Yure mojomoro ĩaque. Merogā corenīque. Mure wajayepohogura,” arīriņumi gajīgu pohro majagu ĩgure. ³⁰ Īgu eropa arī serēquerecū ta ĩgu yuhribiriņumi. Eropīgu ĩgu gajīgu pohro majagupūre peresu iidoreņumi ne ĩgu wajayepohocūge. ³¹ Wuaro wajamodigu ĩgure merogā wajamogupūre ĩgu eropa iicū ĩha papūri, gajirā pohro majarāpū erā opure weresārā waņuma. ³² Erā eropa arī weresācū peegu erā opu erāre weresādigure sihubeo ōpa arīņumi: “Muħu ņetariagu āhraa. Muħu yure burīgā serēcū mū wajamorare cādijipehocārabugu yuħu mure. ³³ Mure yu eropa iiquerecū ta mupū merogā wajamogupūre cādijibirayoro muħu. Mū wajamorare yu cādijidiro dopa ta ĩgu sāre mū cādijicū ōtariaboya. ĶDuhpīgu ĩgure mojomoro ĩabirari ĩgure eropa iigu muħu?” arīņumi ĩgu opu ĩgure. ³⁴ Eropa arīgu burīgā guagu, peresu iīņumi ĩgu pohro majagure ne ĩgu wajayepohocūge, arī weremi Jesu.

³⁵ Eropīgu ōpa arī i queorire weretumi:

—Eropa ta iigucumi yu Pagū umaro majagu muare. Mūa árīpehrerā mūa acawererā muare ņero iirare ōaro mūa cādijipehobicū ĩgu muare dipuwaja moagucumi, arīmi Jesu.

19

*Erā marasā nomere erā cóācū ōabeaa, arī wereņumi Jesu
Mr 10.1-12; Lc 16.18*

¹ Irīre ĩgu eropa arī werera pūhrū ĩgu Galilea árīdigū Judea yebague guare sihu wami. Dia Jordán waicuriya gajīpū masegue ejabū. ² Erogue gua wacū bajarā masa guare nurusīagāma. Erā mera majarāre dorecurāre ōarā wacū iimi ĩgu.

³ Eropī yujurāyeri fariseo masa gua pohro erama. Jesure weresādiarā, ņero ĩgu werenīguicū peediarā, ĩgure ōpa serēpīma:

—ĶMari marapore mari gamero cóācū ōhari? ĶMari dorerīpū eropa ta iidoreri mū pepīcū? arī serēpīma erā.

⁴ Jesu yuhrimi.

—ĶGoāmū yare erā gojarapūgue ne ire buhebirīnīari mūa? Ōpa arī gojara āhraa: “Negohraguere i yebare ĩhacūnugudīgū umū, nomeo sāre ĩpū,” arī gojaņumi Moise. ⁵ Ōpa āhraa ĩgu arī gojanemora: “Eropīgu umū ĩgu pagū sumarāre cohā wīria, ĩgu marapo mera árīgucumi. Eropīrā erā perā árīquererā ta yuju dūpū iro dopa ta árīrācoma,” arī gojaņumi.

⁶ Eropīrā erā perā iro dopa árībeama. Yuju dūpū iro dopa ta árīrā iima.

Goāmũ doreri mera mojoto dirima. Eropirā duhubiricāro gahmea erāre, arīmi Jesu erāre.

⁷ Īgu eroparicũ fariseo masa serēpima daja:

—Mũhũ eropa werequerecũ ta õpa arī gojañumi Moisepũ: “Mũ marapore cóadiagu paperapũgue irire gojaque. Eropa gojagu iripũre mũ marapore mũ ora puhũrũ igore cóamasia mũhũ,” arī gojañumi Moise. ¿Mũ arĩro dopa ariquerecũ ta duhpiġũ Moisepũ eropa arī gojayuri? arī yũhrima erā ĩġure.

⁸ Jesu yũhri gamemi erāre:

—Goāmũ dorerire mũa ñecu sumarā erā iidiabiricũ ĩagu “Eropa ta wacuraporo,” arĩġũ, “Mũa marapore cóamasia,” arī gojañumi Moise. Īġũ eropa arī gojara árĩquerecũ ta negohraguere mũa marasā nomere cóacũ gamebiripũ. ⁹ Muare arĩġũ tiiaa: Masũ ĩġũ marapo igo ġajĩġũ mera ñero ĩbiriquerecũ ta igore cóagũ, ġajĩġo mera marapocũġũ, ĩġũ ġajĩġo mera ñero ĩĩġũ iimi. Eropĩġũ ihĩ cóadĩġo mera marapocũġũ sã igo mera ñero ĩĩġũ iimi, arĩmi Jesu.

¹⁰ Īġũ eroparicũ peerā, ġua ĩġũ buherãpũ õpa arĩbũ:

—Eropa mũmũ ĩġũ marapo mera erā game cóãbiricũ, maripũre ne marapo marirã árĩcũ õaboca ġuare, arĩbũ ġua.

¹¹ Jesu yũhrimi ġuare:

—Mũa arĩro dopa ta árĩpehrerã árĩmasibeama. Goāmũ marapocũdorebirinirã dihta eropa árĩmasima. ¹² Ũma marapocũmasibirã yujurãyeri àhrima. Yujurãyeri ũma ero ta poyari masa mata nomere gamebirã masa dehyoama. Ģajirã masa erã àpĩritõ diuri erã weanirãpũ marapocũmasibeama. Ģajirã ũma umaro majagũ erã Opũ yare itamudiarã marapocũbeama. Eropirã oã marapocũdiabirã eropa ta pepicãrã, eropa ta erã arĩ ojogorocũcũ õhaa, arĩmi Jesu ġuare.

Majirãġã ya árĩburire Goãmũre serēbasañumi Jesu

Mr 10.13-16; Lc 18.15-17

¹³ Eropi masa majirãġãre Jesure mohmepiñadoremorã Jesu pohrogue aĩ erama. Eropa aĩ erarã, erã Jesure ĩġũ mojotore erãġãre mohmepidorediama. Eropirã erãġãre erã õaro árĩburire Goãmũre serēbasadorediama Jesure. Erã eropa ĩicũ ĩarã ġua ĩġũ buherã erāre turiribũ. ¹⁴ Ģua eropa turicũ ĩagu, ġuare Jesu õpa arĩmi:

—Majirãġã yũ pohrogue ariporo. “Waque,” arĩbiricãque erãġãre. Erãġã Goãmũre erã opu pepima. Eropirã ĩġũ umaro majagũ ĩġũ opu árĩroguere oãġã iro dopa pepirã àhrima eroguerẽ, arĩmi Jesu.

¹⁵ Eropa arĩtuhaja erã majirãġãre mohmepituhaja waha wami.

Doberi opagũ Jesu mera weretamuñumi

Mr 10.17-31; Lc 18.18-30

¹⁶ Īġũ eropa ĩira puhũrũ yujugũ masũ mamũ Jesu pohrogue eraa, serēpimi ĩġure:

—Ne mũhũ õagũ buheġũ àhraa. ¿Yũ árĩpehrerĩnũri Goãmũ mera árĩdiagu, õarire iidiagu dinopũre ĩibocuri yũhũ? arĩmi ĩġũ.

¹⁷ —¿Dohpa arĩronore yũre õagũ arĩ piyuri mũhũ? Goãmũ dihta õagũ àhrimi. Árĩpehrerĩnũri Goãmũ mera árĩdiagu ĩġũ dorerire ĩĩque, arĩmi Jesu.

¹⁸ —¿Di doreripũre arĩġũ ĩiri? arĩ serēpinemomi ĩġũ.

Jesu yũhrimi:

—Masare wejēbiricāque. Gajigu marapo mera árībita. Yajabita. Gūyabita. ¹⁹ Mū pagu sumarāre umupeoque. Mū basi mahiro dopa ta mū pohro árīgu sāre mahique. I dorerire iiro gahmea, arīmi Jesu.

²⁰ —I dorerire ne tarinugabirimurabu yuhū. ¿Ñeheno dūhyari ya iinemoburi ya árīpehrerinūri Goāmū mera árīdiagu? arīmi īgu Jesure.

²¹ Īgu eroparīcū peegu Jesu werenemomi:

—Mūhū Goāmū mera ōaro árīdiagu mū yare árīpehrerire duagu waque. Eropa duagu árīpehreri niyerure mū wajatarare mojomorocūrāre oque. Mū eropa iicū wuaro mū ya ūmaroguere Goāmū pohroguere árīyuroca. Mū eropa iira pūhru yū mera majagu árību arique, arī weremi Jesu.

²² Īgu wuaro opagu árīpu. Eropigu Jesu īgure eroparīcū peegu īgu oparire mojomorocūrāre odiabigu, turaro bujawere suabiri waha wami.

²³ Īgu eropa wacū Jesu guare īgu buherāre werenemomi:

—Diaye ta muare arīgu iiaa. Doberi oparā Goāmure īgu opu árīroguere erā wadiacū diasa āhrraa. ²⁴ Muare werenemogura: Camellopu awiru gobegāgue īgu ñajatariwereadiacū masiya mara īgure. Eropa ta doberi opagu Goāmū opu īgu árīroguere wacū diasataria, arīmi īgu.

²⁵ Īgu eroparīcū gua īhamaria wa gua basi ōpa arību:

—Yaho. Īgu arīro dopa ta diaye árīcū, ne yujugu masure Goāmū tabiribocumi īgu pohro waborore, arību gua gua basi.

²⁶ Gua eroparīcū Jesu guare īhabeo, ōpa weremi:

—Masa erā bocatūro erā ōaro iira mera Goāmū pohroguere wama-sibeama. Goāmūpu masare peamegue wabonirāre taumasimi. Īgu árīpehrerire ōaro iimasipehocāmi, arīmi īgu guare.

²⁷ Īgu eroparīcū Pedro īgure arīmi:

—Peenique. Guapu gua ya árīpehrerire apipehocābu mū mera warā. ¿Gua ōpa iirā dohpa árīrere wajatarācuri gua? arīmi īgu.

²⁸ —Muare diaye arīgu tiiaa: Pehrerinū pūhru árīpehreri mama gohrotoroca. Irisubuguere yuhū masu Goāmū īgu obeodigu yū opu doaro gosesiriro doaguca yuhū. Yuhū ero doacū mua sã doce gohra árīnirā oparā árīri mera doarāca. Eropirā Israe masare doce cururi majarāre beyerāca ōarā sãre ñerā sãre. ²⁹ Eropirā mua árīpehrerā ōari buherire yaha árīburire iimorā, mua wirire, mua pagu porāre, mua pagu sumarāre, mua porāre, mua poerire apicānirā wuaro wajatarāca. Eropirā árīpehrerinūri Goāmū mera ōaro árīrāca. ³⁰ Dohpaguere bajarā oparā árīnirā mura irisubuguere bu árīrā dujarācoma. Eropirā dohpaguere bajarā bu árīnirā mura irisubure oparā gohrotorācoma daja, arī weremi Jesu guare īgu buherāre.

20

Īgui pohe mohmerā queorire wereñumi Jesu

¹ Eropi dipaturi Jesu queorire weremi daja ōpa arīgu:

—Ūmaro majagu opu īgu árīri werediacū pohe opu iro dopa āhrraa. Īgu pohe opu boyo pāri merejacū īgu pohere mohmemorāre sihugu wañumi. ² “Yujuse niyerusere yujunū mohmeri wajare wajayegura yujunure,” arīñumi. “Áu,” arīñuma mohmemorā. Erā eroparīcū pohegue mohmedoregu obeoñumi īgu erāre. ³ Eropigu ūmūgue nueve árīcū

doberi duarogue wañumi daja. Erogue ejagu, gajirã mohmebirãre ãañumi. ⁴ Eropã ãagu erãre arĩñumi: “Mũa sã yaha pohere mohmerã waque. Ōaro wajayegura,” arĩñumi ãgu. ⁵ Eropirã erã pohegue mohmerã wañuma. Eropi pohe opu goeri boje áricũ, ñamicague tres áricũ sãre gajirãre mohmedoreñumi daja. ⁶ Eropi ñamicague cinco áricũgue doberi duarogue ãgu wañumi daja. Erogue eja gajirã mohmeri moorãre ãañumi. Erãre arĩñumi: “¿Ne gajino iibiriquerã yujunũre ãaniguineacãri mũa?” arĩ serẽpiñumi erãre. ⁷ “Ne guare mohmeri mara,” arĩ yuhriñuma erã. “Mũa sã yaha pohere mohmerã waque,” arĩñumi erãre. Eropirã ãgu arĩdiro dopa ta ãgu ya pohere mohmerã wañuma.

⁸ “Eropi ñamicague mohme duhurisubugue áricũ pohe opu ãgu mohmerãre coregure ōpa arĩñumi: “Mohmerãre sihuque. Erã eracũ erãre wajayegue. Erã puhrugue mohmedorenirãre wajayemuhtaque. Erãre wajayetuha, gajirã sãre wajayetuha, yũ mohmedoremuhtanirãre wajaye ojogorocũque,” arĩñumi ãgu. ⁹ Eropigu cinco áricũ mohmenuganirãre yujuse niyeruse wajayeñumi. ¹⁰ ãgu eropa wajayecũ ãarã, “Guare tauñariro wajayegucumi,” arĩ pepiriñuma ãgu doremuhtanirãpũ. Erã sãre yujuropa ta wajayecãñumi. ¹¹ Eropirã erãre niyerure ãgu wajayetuhajacũ erã opu mera papũri ãgure arĩñuma: ¹² “Ōã gua puhrugue mũ mohmedorenirãpũ yuju hora ta mohmeama. Guapũ yujunũ ōaro mohmeneacarabũ. Nero abe asiami guare. Gua eropa yoari boje mohmequerecũ ta gua puhrugue mohmenuganirã sãre yujuropa wajayecãbũ mũhũ,” arĩ guañuma erã ãgu mera. ¹³ Erã eroparicũ peegu yujugũ erã mera majagure pohe opu yuhriñumi: “Ne acaweregũ, yujuse niyeruse wajayegura, arĩrabũ mũare. Yũ eroparicũ yuhriabũ mũa. Eropigu yũ arĩdiro dopa ta mũare wajayeabũ yuhũ. Queoro wajayeabũ mũare. Ne yajabirabũ mũare. ¹⁴ Eropigu yũ wajayerare aĩ wihigue dujaaque. Ìre puhũ yũ mohmedoredigũ sãre mũare yũ wajayediropẽ ta wajayegura. ¹⁵ Yaha niyerũ ãhraa ã. Eropigu yũ gamero dopa ta ã mera wajayegura. ¿Gajirãre tauñariro yũ wajayecũ ãhaturiri mũhũ?” arĩñumi ãgu pohe opu, arĩ weremi iri queorire Jesu.

¹⁶ Eropã arĩgu werenemomi ãgu:

—I queori arĩro dopa ta yaharã árimuhtanirãre erã puhũ yaharã árinirã sãre yujuro mera ogucumi Goãmũ ãgu ya ōarire. Eropirã árimuhtanirãpũ “Guare onemogucumi,” arĩmasibeama, arĩ weremi Jesu.

Dipaturi Jesu ãgu siriburiñere ãgu masa mũriaburiñere wereñumi
Mr 10.32-34; Lc 18.31-34

¹⁷ Eropi Jerusalengue warã yujuro mera ta waniguirã, guare ãgu buherãre sihubeutuha, gajirãgue guare gua seyarore aĩgãmi Jesu. Gua seyaro gua áricũ weremi.

¹⁸ —Peeque yũre. Dohpaguere Jerusalengue warã iiaa mari. Erogue yũ masure Goãmũ ãgu obeodigure ñeha, gajirãre orãcoma. Pahia oparãre, masare buherã sãre yũre orãcoma. Eropirã yũre wejẽdorerãcoma erã. ¹⁹ Eropã wejẽdorerã judio masa áribirãre yũre orãcoma. Erã eropa ora puhũ erãpũ yũre wereya, tãrarãcoma. Tuhaja, crusague pabiarãcoma yũre. Eropigu yũ sirira puhũre uhrenũ waboro gohra masa mũriagũca, arĩ weremi Jesu.

Santiago, Ñũ mera erã pago erãre serẽbasapo Jesure
Mr 10.35-45

²⁰ Eropigo Zebedeo marapo Santiago, Ñu igo porã mera Jesu pohrogue eja, merejapo ïgure serêbo arigo.

²¹ —¿Dohpa yu iicũ gahmeri muhu? arĩpu Jesu igore.

—Muhu opu ñajagu yu porã sãre dorerã acuque. Eropa acugu mu pepuri erãre doboque, arĩ serêpo igo igo porã mera.

²² Jesu òpa arĩpu:

—Mua ñero tariborore masibiriquererã ta eropa serêa mua. ¿Dohpaguere yu ñero tariboro dopa ta mua sã ñero tarirã yujuro bojebocuri mua? arĩpu Jesu igo porãre.

—Yujuro bojerãca, arĩ yuhriñorã Santiago Ñu mera.

²³ —Diaye ta àhraa. Yu ñero taridiro dopa ta ñero tarirãca mua sã. Eropa mua tarimorã áriquerecũ ta yu mera doremorãre muare yuhu beyemasibea. Yu Pagupu amutuhami irire. Eropirã ïgu beyenirã dihta yu diayepure, yu copupure doarãcoma, arĩpu Jesu erãre.

²⁴ Eropirã gua gajirã diez ïgu buherãpu erã oparã áriburire Jesure serêcũ Santiago, Ñu sã mera guabu gua. ²⁵ Gua eropa guacũ ïagu Jesu áripehrerã ïgu buherãre sihu gameneo, òpa arĩ weremi guare:

—Goãmure masibirã oparãpu masare dorerã, pũriro mera dorema.

²⁶ Muapu eropa iisome mua basi. Mua mera majagu opu áriidiagu, áripehrerã ïgu mera majarãre itamugu áriporo. ²⁷ Eropigu áripehrerãre doregu áriidiagu pohro majagu iiro dopa ta áriporo. ²⁸ Eropa áriũ ta àhraa yu sã. Masare dorebiragu arigu iibiribu. Yuhu masu Goãmũ ïgu obedigu áriqueregu ta i yebaguere masare itamugu arigu iibu. Eropigu bajarã masa erã ñero iira dipuwajare sãribasagu arigu iibu. Eropigu masa peamegue wabonirãre taugu arigu iibu, arĩmi Jesu guare.

Perã cuiri ihajabirãre ïacũ iũumi Jesu

Mr 10.46-52; Lc 18.35-43

²⁹ Eropi Jericógue áriñirã gua wacũ bajarã masa Jesure nurusiamas.

³⁰ Eropi Jesu ïgu tarigãcũ perã cuiri ihajabirã ma turo doanirã peema. Eropa peerã òpa arĩ gaguiniguinemoma:

—Opu Davi mũru pãrami, masare taubu, guare mojomoro ïaque, arĩ gaguinima.

³¹ Erã eropa gaguiniguicũ masapu erãre turima.

—Ejarimaricãque, arĩma masa erãre. Erã eropa arĩquerecũ ta erã gaguiniguidiro tauro gaguiniguinemoma daja.

—Opu Davi mũru pãrami, guare mojomoro ïaque, arĩ gaguiniguima daja.

³² Erã eroparicũ peegu Jesu nũgaja erãre sihubeo serêpimi,

—¿Dohpa yu muare iicũ gahmeri? arĩ serêpimi.

³³ —Opu, guare ïacũ iique, arĩ yuhrima erã.

³⁴ Erã eroparicũ Jesu erãre mojomoro ïami. Eropa mojomoro ïagu erã cuirire mohmepimi. ïgu eropa mohmepicũ ta erã òaro ïha wama. Eropa ïanirã ïgure nurusia wahgãma.

21

Jerusaléngue ejaũumi Jesu

Mr 11.1-11; Lc 19.28-40; Jn 12.12-19

¹ Eropi Jerusaléngue gua ejaboro core Betfagé waicuri macague ejamuhtanibu gua Jesu mera. Betfagé utãgu Olivo waicudigu gubuye

árĩbu. Eroque ejaɣu, guare peräre ĩɣu buherã mera majarãre Jesu ĩɣu core obeomuhtami. ² Ōpa doremi eräre:

—Si macague waque. Eroque ejarã, mata burrore ĩɣu magugã mera erã dirinugudigure bocajarãca. Eräre boca, ĩɣure diriradarire pãa aĩgãribasaque yare. ³ Mũa eropa iicũ ĩaɣu, burro opa “¿Duhpimorã burrore pãri mũa?” ĩɣu aricũ peerã ōpa arĩ yũhrique: “Mari ĩɣu burrore gamebeoniami dohpa. Eropigũ dohparagã wiagucumi ĩɣu,” arĩ yũhrique ĩɣure, arĩdore obeomi Jesu perã ĩɣu buherãre.

⁴ Eropã iimi Goãmu yare weremuhtadigũ ĩɣu arĩ gojadiro dopa ta. Ōpa arĩ gojañumi iribojegue:

⁵ Jerusalén majarãre ōpa arĩ wereque: “Īaque mũa. Mũa Opa mũa pohroque ahrimi. ĩɣu ta masare ōaro iigu ahrimi. Burro magugã weca arigucumi,” arĩ wereque Jerusalén majarãre, arĩ gojañumi iribojegure.

⁶ Jesu ĩɣu obeonirã perã iri macague eja, ĩɣu iidoreldiro dopa ta iĩnorã erã. ⁷ Burrãgore igo magugã sãre aĩgãrima. Aĩgãrituhaja gua weca maja suhrire tuwea aĩ, erã weca peobũ gua. Gua eropa iira pũhrũ Jesu ĩɣugã weca mũribejami wabu. ⁸ Mũribejatuha, ĩɣugã weca Jerusaléngue wami. ĩɣu eropa aricũ ĩarã masa bajarã ĩɣu wari maha deco erã ya weca maja suhrire tuwea aĩ, sēopi muhtama Jesure umupeorã. Gajirãpu pũricuri dũpũrire mare apimuhtama “Īɣu wari maha ōari maha arĩporo,” arĩrã.

⁹ Eropirã ĩɣu core warã, ĩɣu pũhrũ nũrusiarã mera ōpa arĩ gaguĩnguima: —Davi mũru pãramire marire itamubure umupeorã. Ihĩ Goãmu ĩɣu obeodigũ ōaro ariporo. Ūmaro majãgure “Turãgu ahrimi,” arĩ umupeorã, arĩ gaguĩnguima masa.

¹⁰ Eropirã Jerusaléngue erã eropa ejaçũ ero majarãpu ĩhamaria wama. —Cue, ¿nihino ahriri ihĩ? arĩ game serēpima erã basi.

¹¹ Gajirã masa yũhrima:

—Ihĩ Goãmu yare weremuhtagũ Nazare majãgu Jesu waĩcũgu ahrimi, arĩ werema erã masare.

Goãmu wihigue ejañumi Jesu

Mr 11.15-19; Lc 19.45-48; Jn 2.13-22

¹² Pũhrũ Goãmu wihigue ejami Jesu gua mera. Iri wihigue eja ñaja wami. Ñajaja masa duadoarãre asũrã sãre bocajagu erãre cohã wiucãmi iri wihigue. Eropigũ niyerure game gohroto doarã ya mesarire yomemuju, aĩ majipi beomũrimi. Bujare duarã erã doari pērori sãre eropa ta iimi.

¹³ Eropã iigu ōpa arĩmi:

—Goãmu yare erã gojarapũ ōpa aħraa: Goãmu arĩmi: “Yaha wihi Goãmu mera wereniguiri wihi waĩcũroca,” arĩmi Goãmu, aħraa ĩɣu gojarapũ. Mũarũ i wihire Goãmu wihire duadoarã game yajarã iiaa, arĩmi ĩɣu erãre.

¹⁴ ĩɣu eropa iira pũhrũ cuiiri ĩhajabirã, curimasibirã sã Goãmu wihiguere ĩɣu pohroque erama. Erã eropa eracũ erãre ōarã dujacũ iimi ĩɣu.

¹⁵ Eropã ōarire ĩɣu iicũ ĩarã, pahia oparã, masare buherã sã guama ĩɣu mera. Eropirã majirãgã sã Jesure, “Davi mũru pãrami, masare itamubu, turãgu aħraa mũhũ,” erã arĩ umupeocũ peerã guanemoma dipaturi erã.

¹⁶ Eropã guarã ōpa arĩma Jesure:

—¿Erã eroparĩcũ peebeari mũhũ? Eropã arĩbiricãporo, arĩ dorema erã Jesure.

—Erã eroparicũ peea. ¿Goãmũ yare erã gojarapũre ire ne buhebiriri mua?

Majirãgãre Goãmũre ðaro umupeocũ iibu mũhu, ãhraa Goãmũ yare erã gojarapũ, arĩmi Jesu erãre.

17 Eropa arĩtuha erãre cóãgã, Betania waĩcuri macague eja, iri ñamire ero arĩmi.

Jesu yucũgũre higuerağũre sĩridoreñumi

Mr 11.12-14, 20-26

18 Gaĩnũ boyorogue Jerusalengue gũa dujaacũ, oaboami Jesu. 19 Eropa oaboagu, ma turo niguidigu higuerağũre ñhanijagu, irigu ðucare omagu warimi. Ðuca maribu irigũpũ. Pũri dihta arĩbu. Ðuca maricũ ñagu Jesu ðpa arĩmi:

—Irigu yucũgu ne dipaturi ðucacosome, arĩmi ĩgu.

Īgu eroparicũ irigũpũ mata ñaidija wabu. 20 Irigu eropa wacũ ĩarã, gũa ĩgu buherã ĩhamaria wabu.

—¿Duhpiro mata irigu ñaidija wahãri? arĩ serẽpibu Jesure.

21 Jesu yũhrimi:

—Īre guñaque mua. Goãmũre ðaro guñatura umupeoque. “Diaye ta eropa ta ĩgũcumi ĩgu,” arĩrã, “Goãmũ iisome,” arĩbirã, yũhu irigure ĩidiro dopa ta iimasirãca mua sã. Eropirã irigure yũ sĩridoreidiro dopa ta tauro ðiasarire doremãsirãca mua Goãmũre guñatura umupeorã. Irigu utãgu sãre “Dua aĩ, wuariyague cóãðigu arĩporo,” Goãmũre mua arĩcũ irigu utãgu dija waroca. 22 Goãmũ irigu ðiague ðijacũ ĩgũcumi. Goãmũre mua umupeocũ,” Yũ serẽro dopa ta eropa waroca,” mua arĩ guñacũ, mua serẽdiro dopa ta Goãmũ ĩgũcumi, arĩmi Jesu.

Jesure doredigũre serẽpiñuma pahia oparã, masare buherã, murã mera

Mr 11.27-33; Lc 20.1-8

23 Eropi Goãmũ wihigue ðujaja buhemi ĩgu. Īgu eropa buhecũ pahia oparã, masare buherã, murã mera ĩgu pohrogue eraa serẽpima:

—¿Noa doreri mera ire eropa ĩgu ĩiri mũhu? ¿Noa mũre Goãmũ wihigue arĩnirãre cóãðoreari? arĩ serẽpima erã.

24 Erã eroparicũ Jesu yũhrimi:

—Muare yũhu sã serẽpigura. Òaro mua yure yũhricũ yũ sã muare yũhri gamegura. 25 ¿Ñu masare ĩgu waĩyecũ noano ĩgure waĩyedoremãriyuri mua pepicũ? ¿Goãmũ doreyuri? ¿O masapũ doremãriyuri mua pepicũ? arĩ serẽpimi Jesu erãre.

Īgu eroparicũ erãpũ erã basi game wereniguima:

—¿Dohpa arĩ yũhrirãcuri mari? “Goãmũ Ñure doreñumi,” mari arĩcũ, “¿Goãmũ Ñure ĩgu dorequerecũ ta duhpirã ĩgu wererare peebirari mua?” arĩbocumi Jesu marire. 26 Oã masapũ “Diaye ta Ñu Goãmũ yare weremũtadigu arĩmi,” arĩ pepima erã. Erã eropa pepirã “Ñu ĩgu waĩyecũ Goãmũ ĩgure dorebiriñumi,” mari arĩcũ peerã masapũ guarãcoma mari mera, arĩma erã erã basi. 27 Erã eropa arĩ werenigui amura pũhrũ Jesure yũhrima erã.

—Ñure waĩyedoredigũre gũa masibea, arĩma erã.

Erã eroparicũ peegu ðpa arĩmi Jesu:

—Irisubu tamerare yũ sã mua serẽpirare werebea mũare. Yũ ĩirire doregũre werebea mũare, arĩmi ĩgu erãre.

Yujuğũ porã ĩira queorire wereñumi Jesu

28 Īḡu eropa arīra pūhru Jesu queori moa werenemomi erāre:

—¿Dohpa arī pepirācuri yu ōpa arī werecū? arīmi Jesu erāre. Perā pagu arīñumi. Tīgupare ōpa arīñumi erā pagu: “Mahgu, pohegue mohmegu waque,” arīñumi. 29 “Wabeaa,” arī yūhrirīñumi ĩḡu magu negohrare. Eropa arīquereḡu ta pūhrūguere pohegue wadiariñe arīyoro daja ĩḡure. Eropiḡu wañumi ĩḡu. 30 Eropiḡu erā pagu ĩḡu magu duhyagu pohroḡe eja, ĩḡu tīgure ĩḡu arīdiro dopa ta pohegue wadorerīñumi. “Aa,” arīñumi duhyagupū. Eropa arīquereḡu ta wabirīñumi ĩḡu. 31 ¿Nihinopu ĩḡu pagu ĩḡu dorediro dopa ta iiyuri? arī serēpimi Jesu.

—Īḡu tīgupū iññumi, arī yūhrima erā.

Erā eroparīcū Jesu weremi:

—Muare diaye arīḡu tiiaa. “Ñetariarā āhrima,” mua arīñirāpu Goāmū opu ĩḡu arīroguere mua wabodiro arīquerecū ta erāpu warācoma. 32 Ņu waīyeri masu buheḡu arīḡu muare “Ōaro iirā arīque,” arī wererimi. Eropa ĩḡu werequerecū ta ĩḡure peebiribu mua. Eropirā ĩḡu dorerire yūhribiribu. Erā ñerā arīñirāpu wajasea corerāpu, nome ñero iiricunirāpu ĩḡure peenirā arīma. Erā eropa pee gohrotorare ĩabu mua. Mua eropa ĩaquererā ta muapu ne gohrotodiabirabu. Eropirā peebirabu mua, arīmi Jesu pahia oparāre, murā sāre.

Ñerā mohme corerā queorire wereñumi Jesu
Mr 12.1-12; Lc 20.9-19

33 Eropi Jesu dipaturi ĩḡu pepiri mera ōpa arī queorire moa erāre buhenemomi:

—Gajisubu muare werenigui queoriñere yu werecū peeque daja, arīmi. Yeba opu arīñumi. ĩḡu ya pohere iguidarire oteñumi. Otetuha, sārirore nugu, ĩḡuire erā cuhra bujuburi gobere seañumi. Pohe decogue amari wihigā sāre iññumi ĩhadibumaja ōaro. Eropiḡu gajirāre ĩḡu ya pohe deco mera apiñumi erā mohme corera waja. Eropiḡu iri pohere erāre mohme coredoretuhaja gaji yebague waha wañumi ĩḡu. 34 Igui ñirisubu arīcū opu ĩḡu pohro majarāre ĩḡu ya pohe mohme corerā pohroḡe obeoñumi. Pohe maja ĩḡu oteri ducare ĩḡu ya sero maja ducare afdoreḡu obeoriñumi. 35 Eropirā pohere mohme corerāpu ĩḡu pohro majarāre ñero iññuma. Yujugure turaro paa, gajigure wejē, gajigure utā mera deañuma. 36 Pūhru pohe opu dipaturi ĩḡu pohro majarāre ĩḡu obeomuhtanirā tauñariro arīri curu majarāre obeoriñumi daja. Eropirā pohere mohme corerā muraro ta iññuma erā sāre daja.

37 “Eropiḡu ĩḡu obeotudigu ĩḡu magu arīñumi. “Yu magupare umu-peorācoma,” arīḡu ĩḡure obeoriñumi. 38 ĩḡu eropa arī pepiquerecū ta pohere mohme corerā ĩḡu magu ĩḡu aricū ĩarā, ōpa arīñuma: “Pohe opu magu ahrimi ĩḡu. ĩḡure wejē cōacārā mari. Eropiro i pohe mari ya pohe dujaroca,” arīñiñuma erā basi. 39 Eropa arīrā ĩḡure ñeha pohe turoḡe aīgā, wejēcāñuma erā ĩḡure, arīmi Jesu erāre. Eropa arītuhaja Jesu erāre serēpimi:

40 —¿Pohe opu arīḡu dohpa iigūcuri ĩḡu ya pohere mohme corerāre? arī serēpimi Jesu pahia oparāre, murā sāre.

41 —Īḡu gajirāre pohere mohme coremorāre gohrotogucumi. Arīmuhtanirāre ñetarianirāre wejēgucumi. ĩḡure ducare queoro wiamorāpūre mohmedoregucumi, arī yūhrima erā.

42 Erā eroparīcū Jesu werenemomi erāre:

—¿Goãmu yare erã gojarapũ ire yure ïgu arĩ gojarare buhebiriri mua? Ihĩ Cristo utãye iro dopa ta àhrimi. Masa Cristore gamebirãcoma. Erã gamebiriqerecũ Goãmu ïgure beye opu acumi. Goãmupũ irire iimi. ïgu eropa iicũ ïarã “Ôataria,” arĩ pepia mari, arĩ gojañuma iribojuere.

¿Irire ne buhebiriri mua? ⁴³ Eropigu mũare arĩgu tiiaa yũhũ. Goãmu ïgu dorerire iirã ïgu ðari orire opaboya mua. Mua iibircũ ïha gajirãpũre ogucumi Goãmu. Gajirã masapũ ïgu dorero dopa ta iirãcoma. ⁴⁴ Yũre gamebirãpũ yũ dipuwaja moamorã ñero tarirãcoma, arĩmi Jesu pahia oparãre, murã sãre.

⁴⁵ Iri pohe opu queorire ïgu arĩcũ peerã, “ïgu iri queori mera ‘Ñerã mohme corerã iro dopa àhrima,’ marĩre arĩgu weresãgu iicumĩ ïgu,” arĩ pepiñorã erã. ⁴⁶ Eropa arĩ pepirã, ïgure ñeadiariñorã oparãpũ. Masapũ Jesure umupeo “Goãmu yare weremuhtadigu àhrimi ïgu,” arĩmuriñorã erã. Erã eropa arĩrã arĩcũ pahia oparã sã masare giurã, Jesure ñeabiriñorã.

22

Wũari bosenu queorire wereñumi Jesu

¹ Eropi dipaturi gaji queori mera erãre buhenugami Jesu:

² —Ûmaro majagu ïgu opu arĩri werediacũ i queori iro dopa àhraa. Yuju yeba majagu tauro opu arĩñumi. Eropigu ïgu magu ya arĩburi bosenu iññumi. ïgu mojoto diriri bosenu arĩyoro. ³ Eropigu opu ïgu pohro majarãre bosenu ïarã arimorãre sihudore obeoriñumi. Erãpũ aridiabiriñuma. ⁴ Eropigu gajirãre sihudoregu obeoriñumi daja ïgu pohro majarãre. “Yu sihubeorãre ðpa arĩ wereque. ‘Mari baburire iituhama. Wecũare, wecũagã ðaro diicũrãre wejẽ amutuhajama. Eropiro arĩpehreri bosenu majare iituhajama. Eropirã bosenu majare barã arique,’ arĩ wereque erãre,” arĩ obeoriñumi ïgu opu ïgu pohro majarãre. ⁵ Erã eropa werera pũhrũ ïgu sihubeonirã eropa pepicãñuma. Bosenũre ïarã wabiriñuma. Yujugu ïgu pohegue waha, wañumi. Gajigu ïgu mohmerire ïagu wañumi. ⁶ Gajirãpũ ïgu pohro majarãre erãre wererã eraniãre ñeha, erãre ñero iññuma. Eropii wejẽcãñuma. ⁷ Erã eropa iicũ peegu, opũpũ guañumi. Gua, erã eropa wejẽra dipuwaja dipuwaja moadoregu ïgu surarare obeoñumi. Eropirã surara erãre wejẽpehocã, erã ya macare soecãñuma. ⁸ Erã eropa iira pũhrũ, opu ïgu pohro majarãre ðpa arĩñumi: “Bosenu majare amutuharama. Yu sihumuhtanirã yũ bosenũre ïabonirã aribeama. Ñerã àhrima erã. ⁹ Eropirã macare wari marigue mua bocajarãre bosenũre ïamorãre sihuque,” arĩñumi ïgu ïgu pohro majarãre. ¹⁰ ïgu eroparĩcũ ïgu pohro majarã marigue waha, arĩpehrerã erã bocajarãre, ñerãre, ðarãre wereñuma. Erã eropa sihurã pũhrũ ejañuma erã bajarã. Òaro bosenu erã iiri taribure masa ujtũritaria wañuma.

¹¹ “Ero erã doacũ opũpũ yujugure mojoto diririnũ majañe suhriro sañabigũre ïañumi. ¹² “Ne, acaweregu, ¿duhpigu mojoto diririnũ majañe suhrirore sañabiriqeregu ñajarari mũhũ?” arĩ serẽpiñumi opu. ïgu eropa serẽpicũ masũpũ werebiriñumi. ¹³ ïgu eropa werebircũ ïagu ïgu pohro majarãre ðpa arĩñumi opũpũ: “Ïre ñeha ïgu mojotorire dirique. ïgu guburi sãre dirique. Dirituha aĩ wiria, disiporogue naitãroque ïgure

coáque. Erogue ĩgu turaro ore, bujawereri mera gucuri cūridihugucumi," arĩnumi opu, arĩ weremi Jesu.

¹⁴ ĩgu eropa arĩra puhru opa arĩtumi ĩgu:

—I queori wadiro dopa ta Goamu bajarā masa ĩgu sihubeonirā arĩquererā ta bajamerāgā ĩgu mera dujarācoma, arĩ weretumi Jesu.

Oparā ya wajare wajayeburire gajirā serēpiñuma Jesure

Mr 12.13-17; Lc 20.20-26

¹⁵ ĩgu eropa arĩra puhru fariseo masa waha, ĩgure weresāburire erā basi weretamuñorā erā. Erā ĩgure baja serēpiri mera erāre ĩgu gajiropa yuhricū weresāmorā iiriñorā. ¹⁶ Eropirā erā mera majarāre, Herode ya curu majarā säre, Jesure serēpidorerā obeñorā. Erāpu gua pohrogue eraa, Jesure serēpima:

—Buhegu, diaye wereniguigu guyari marigu mu arĩcū masia gua. Eropigu opu arĩcū säre bu arĩgu ĩgu arĩcū säre muhu yujuropa ĩhaa. Eropigu Goamu yare diaye mu wrecū säre gua masia. Masa suacū säre erā suabiricū säre queoro werea. ¹⁷ Eropigu guare wereque. ¿Roma majarā arĩpehrerā tauro opu arĩgure gobierno majare marire wajayero gahmeri mu pepicū? ¿Mari doreripu ire wajayedoreri? arĩ serēpima Jesure.

¹⁸ Jesupu erā ĩgure ñero weresādiarire masigu opa arĩ yuhrimi:

—Guyaricurā āhraa mua. ¿Duhpirā yu ñero wereniguicū peediari mua?

¹⁹ Dohparagā niyerusere oparā yare wajayeburisere aĩrique. Irisere ĩarā, arĩmi ĩgu.

ĩgu eroparĩcū peerā niyerusere aĩgārīma erā. ²⁰ Erā irisere aĩ eracū ĩagu ĩgu serēpimi erāre:

—¿Nihino gohra masu waicugu tuhyari irisere? ¿Noa waĩ tuhyari? arĩ serēpimi ĩgu.

²¹ —César waicugu masa tauro opu masu ĩgu waĩ sã tuhyami iriseguere, arĩ yuhrima erā.

Erā eroparĩcū peegu Jesu weremi:

—Irisubu tamera masa tauro opu yare ĩgure oque. Goamu yare Goamupure oque, arĩmi Jesu.

²² ĩgu eroparĩcū peerā, pee uca wa, waha wama.

Saduceo masa Goamu ĩgu sīrinirāre masurire serēpiñuma Jesure

Mr 12.18-27; Lc 20.27-40

²³ Eropi irinu ta yujurāyeri saduceo masa Jesure ĩarā erarā gua pohrogue erama. Saduceo masa "Goamu sīrinirāre masusome," arĩ pepirā arĩma. Eropirā opa arĩma erā ĩgure:

²⁴ —Buhegu, opa arĩ gojañumi Moise: "Yujugu ĩgu tĩgu marapocugu porā mariqueregu ta ĩgu sīricū ĩgu pagu magure ĩgu tĩgu marapo arĩdigore marapocuro gahmea. Eropigu ĩgu tĩgu muru ĩgu porācubodiro dopa ta porācuro gahmea ĩgu pagu magure. Eropirā igo porā ĩgu tĩgu muru porā iro dopa ta arĩrācoma," arĩ gojañumi Moise, arĩma erā saduceo masa.

²⁵ Ire eropa arĩ weretuha i queorire werenemoma erā Jesure:

—Yujugu porā siete gohra arĩñorā. Erā tĩgupu marapocu, porā marigu ta sīria wapu. Eropigu gajigu ĩgu pagu magu sã ĩgu tĩgu marapo arĩdigore marapocupu. ²⁶ ĩgu eropa marapocura puhru ĩgu sã ĩgu tĩgu muru iro dopa ta porā mariqueregu ta sīria wapu. Eropigu ĩgu pagu magu ĩgu tĩgu muru iro dopa ta porā mariqueregu ta sīria wapu. Eropa dihta wañorā

yujugu porā gohra. Ne porā mariquererā ta sīripehrea wañorā erā. ²⁷ Erā marapo sã erā pũhrũ sīria wapo pare, arī ōpa serēpima Jesure: ²⁸ ¿Ne, Goãmu áripehrerāre ĩgu sīrinirāre masucũ nihino marapo árigocuri igo? Erā siete áripehrerā igure marapocunirā áriñorā. ¿Eropigo nihino marapo gohra árigocuri igo? arī serēpima erā.

²⁹ Jesu yũhrimi erāre:

—Goãmu yare erā gojarapũ wereniguirire ne masibea mũa. Eropirā Goãmu ĩgu turari sãre ne masibea mũa. Eropiro mũa pepiripũ ne diaye áribeaa. ³⁰ Sīrinirā erā masa mũriara pũhrũ erā anyua iro dopa āhrima. Erā ũma nome mera marapocũbeama eroguerẽ. ³¹ Sīrinirā mũa erā masa mũriaboropũre weregura. ¿Goãmu iribojegue ĩgu arĩrare ne buhebiriri mũa? Ōpa arĩñumi ĩgu: ³² “Yũhu Abrahã, Isaa, Jacobo erā opu āhraa,” arī wereñumi Goãmu iribojegue. Erā sīrira pũhrũgue “Erā opu ta āhraa,” arī wereñumi Goãmu. Eropirā erā sīrinirā mũa ĩgu masunirā áriřã erā ojocarirā āhrima, arĩmi Jesu.

³³ ĩgu eropa arī buhecũ peerã bajarã masa pee ũca wama.

Ōtariariñere doreriñere wereñumi Jesu

Mr 12.28-34

³⁴ Eropi saduceo masa Jesure erā yũhrimasibiricũ peerã, fariseo masapu gũa pohrogue gamenerema daja. ³⁵ Eropigu erā mera majagu, masare buhegupu Jesu ĩgu ñero aricũ peediagu gũa serēpirimi ĩgure.

³⁶ —Buhegu, ¿Goãmu ya doreri ōtariario doreripũ diñe doreripũ āhriri? arī serēpimi ĩgu.

³⁷ Jesu ĩgure yũhrimi:

—“Bũrigã mũa sīporã mera, mũa turari mera, mũa ōaro guñari mera Goãmure mũa Opure mahique,” arĩmi Goãmu. ³⁸ Iñe doreriñe ōtariariñe āhraa. ³⁹ Iñe doreriñe pũhrũ gajiñe doreriñe sã ōataria: “Mũ basi mahiro dopa ta mũ pohro áriřã sãre mahique,” arĩmi Goãmu. ⁴⁰ Iñe peñe doreriñere iirã áripehreri gaji dorerire iipehorã iiaa mari. Goãmu yare weremũtanirã iribojegue erā gojara sãre iirã iiaa mari eropa iirã, arī weremi Jesu.

¿Noano acaweregu āhriri Cristo? arī serēpi iañumi Jesu

Mr 12.35-37; Lc 20.41-44

⁴¹ Eropi fariseo masa ero gamenererã erā áricũ Jesu erãre serēpimi:

⁴² —“Cristo mari Pagu ĩgu obeodigu āhrimi,” arãa mũa. ¿Nihino āhriri ĩgu ñecu iribojegue majagu, mũa pepicũ? arĩmi ĩgu.

—Cristo Davi mũru pãrami áriřucumi, arī yũhrima erā.

⁴³ Jesu weremi:

—¿Davipũ Cristo ñecu áriřueregu ta duhpigu opũcuturiayuri Cristore? ¿Duhpigũ eropa opũcadoreyuri Espĩritu Santo ĩgure? Ōpa arĩñumi Davi mũru:

⁴⁴ Goãmu yũ opũre ōpa arĩmi: “Ohõ yũ diayepũ dorebu doaque. Eropigu mũre ĩhaturirãre mũre tarinũgabasagura yũhu mũ pohro majarã dopa árimorãre,” arĩmi Goãmu yũ opũre, arī gojañumi Davi mũru.

⁴⁵ Eropa arī gojagu ta Davi mũru opũcũñumi Cristore. Cristo Davi mũru opu āhrimi. ¿Eropigu Davi mũru Cristo ñecu áriřueregu duhpigu opũcũyuri Cristore? arī weremi Jesu.

⁴⁶ Īgu eropa arī werecū erā ĭgure ne yuhrimasibirima. Eropirā iripēta serēpi duhucāma erā ĭgure. Eropirā ĭgure güirā dipaturi serēpi ĭabirima ĭgure pare.

23

*Masare buherā, fariseo masa sā ñero ñero iirire wereñumi Jesu
Mr 12.38-40; Lc 11.37-54; 20.45-47*

¹ Eropi masa bajarāre gua säre Jesu weremi daja.

² —Masare buherā, fariseo masa sā Goāmu doreri Moiserere ĭgu apirare wererā āhrima erā. ³ Erā eropa wererā árĭcū muare erā dorerare ĭpehoque mua. Eropa ĭiquererā ta erāre ĭhacūbiricāque mua. Erā buhero dopa ta ĭibeama erā. ⁴ Masare baja dorema erā bocatĭubiririre. Eropa dorequererā ta erā dorero dopa ta masa erā ĭimasibiriquerēcū ĭarā erāre ĭtamubeama.

⁵ Masa erā ĭacū dihta ōaro ĭi ĭhmuma erā. Goāmu yare erā gojarapūri erā duhsāri comogāre pagañari comogāre erā diaporire dirituma masare erāre ĭadorerā. Erā duca säre dirituma ĭri comogāre. Eropirā erā suhri säre gajirā ya tauro yoari árĭriñe ahmu sañama, “Gua Goāmure umupeotaria,” arī ĭadorerā. ⁶ Eropirā bosenari árĭcū oparā erā doarigue doadiama. Eropirā mari buheri wirigue säre ōari doari dihtare doadiama erā. ⁷ Eropirā doberi duarogue gajirā ōaro umupeori mera erāre bocatĭri serēcū gahmema erā. Erāre “Buhegu,” arī piyucū gahmema.

⁸ “Muapure “Buhegu,” arī gajirā piyucū ĭibiricāque. Mua árĭpehrerā yuju curu majarā āhraa. Eropigu muare buhegu yuhū yujugu ta āhraa.

⁹ Eropirā ĭ yeba majarāre “Mari pagu,” arĭrā erāre umupeorā ĭica. Ne eropa arī ĭibiricāque. Ūmaro majagu dihta mari Pagu āhrimi. Īgu dihtare umupeoro gahmea marire. ¹⁰ Eropirā masare “Opū,” arĭbiricāque. Mua opu yuhū Cristo yujugu ta āhraa. ¹¹ Pohro majagu iro dopa muare ĭtamugu ĭgu ta árĭgucumi opu árĭbu. ¹² Yujugu opu árĭdiagu docanugaja árĭcorecāro gahmea. Eropigu docanugagu “Bu árĭgu āhraa yuhū,” arī pepigu ĭgu ta árĭgucumi opu árĭbu, arī weremi Jesu.

Judio masare buherā, fariseo masa mera erā guyarire wereñumi Jesu

¹³ Īgu eropa arĭra puhru erāre werenemomi:

—Mua masare buherā, fariseo masa sā ñero tarirāca. Guyaricurā āhraa mua. Gajiropa mua arī buhecū peerāpu Goāmu ĭgu opu árĭroguere wasome. Mua sā eroguere wasome. Eropa arī buherā eroguere wadiarāre cāhmotaa mua.

¹⁴ “Mua masare buherā, fariseo masa sā ñero tarirāca. Guyaricurā āhraa mua. Wapewyarā nome erā wajamocū ĭha erā ya wirire emacāa mua erā nomere. Eropa erāre mojomoro ĭabiriquererā masa erā ĭhuro yoari boje Goāmure serē ĭhmuraa mua masare. Mua eropa ĭira dipuwaja gajirā tauro dipuwaja moagucumi muare.

¹⁵ “Mua masare buherā, fariseo masa sā ñero tarirāca. Guyaricurā āhraa mua. Wuariyague taribuja, yoaro maja macarigue wahaa mua mua dorerire ĭibure omarā. Mua dorerire ĭibure boca, ĭgure buhea. Mua eropa ĭicū ĭgupu mua tauro ñero ĭinugagucumi. Eropirā ĭgure peamegue wabu árĭcū ĭiaa mua.

¹⁶ “Mua ñero tarirāca. Cuirĭ ĭhajabirā erā ĭhajabiro dopa ta masibirā āhraa mua. Eropa árĭquererā ta gajirāre buheraa mua. Ōpa arī buheraa mua: “ ‘Goāmu wihĭ mera ĭigura,’ arī waĭpeogu ĭgu arĭdiro dopa ta

iibiricũ ðaroça," arĩ buheraa mua. " 'Goãmũ ya wihi maja oro mera iigura,' arĩ waĩpeodigupũre iġu arĩdiro dopa ta ii ojogorocũro gahmea," arĩ iri sãre buheraa mua. ¹⁷ Cuiiri ĩhajabirã erã ĩhamasibiro dopa ta masibirã ãhraa mua. Pee masibirã ãhraa. ¿Dinopũre umupearo gahmeri? Orose umupearo gahmea. Goãmupũ iri orore iġu ya wihi arĩcũ ðari iimi irire. Eropirã iġu ya wihipũre umupearo gahmea muare. Eropiro mua buheripũ queoro wabeaa. ¹⁸ I sãre buheraa mua: " 'Goãmũ wihi maja mesa mera iigura,' arĩ waĩpeodigũ iġu arĩdiro dopa ta iġu iibiricũ ðacãroça," arĩ buheraa mua. " 'Iri mesa weca mari aĩgã apira ta mera iigura,' arĩ waĩpeodigupũre iġu arĩdiro dopa ta ii ojogorocũro gahmea," arĩ buheraa mua queoro buhebirã. ¹⁹ Cuiiri ĩhajabirã erã ĩhamasibiro dopa ta masibirã ãhraa mua. ¿Dipũ iri gohra ãhriri mua pepicũ? Goãmũre masũ iġu ora mũra iri gohra arĩbiriñaria. Iri mesa weca Goãmũre iġu ocũ, ðari wahaa iri mesa weca arĩri. Eropiro iri mesa bu arĩri mesa arĩbeaa. Goãmũre erã ora weca tauro ðari mesa ãhraa. ²⁰ Eropigũ "Goãmũ wihi maja mesa mera iigura," yujugũ arĩ waĩpeogũ, iri mesa weca apira mera iġu eropa arĩġũ iicumi. Eropiro mua buheripũ queoro wabeaa. ²¹ Goãmũ iġu ya wihi majagũ ãhrimi. Eropigũ "Goãmũ wihi mera eropa iigura," arĩ waĩpeogũ ðiaye ta Goãmũ waĩ mera eropa arĩġũ iicumi. ²² Goãmũ umaro majagũ ãhrimi. Eropigũ "Umoro mera iigura," yujugũ arĩ waĩpeogũ, Goãmũ mera ta eropa arĩġũ iicumi. Eropiro mua buheripũ queoro wabeaa.

²³ "Mua masare buherã, fariseo masa sã ñero tarirãca. Ģuyaricũrã ãhraa mua. Bari suricũ iirisarire menta, anis, comina waĩcurisarire aĩ deara pũhru diez quẽri iiaa. Eropa iira pũhru yujuquẽ ta aĩgã apia Goãmũ wihigũe Goãmũ dorerire iimorã. Mua eropa iri dorerire iiquererã ta tauro ðaro iirire guñabeaa mua. Diaye iirire, mojomoro ĩarire, Goãmũre umupearo ne guñabeaa mua. Dũcare mua arĩrare merogã Goãmũ wihire apicũ ðhaa. Eropa iirã ðpa iinemoque: Diaye iirire, mojomoro ĩarire, Goãmũre umupearo iique. ²⁴ Cuiiri ĩhajabirã erã ĩabiro dopa ta diaye majare masibirã ãhraa mua. Őpa iiaa mua. Mua dorerire iidorerã arĩpehrerire ðaro iidiaa yujuñegã duhyaro mariro. Mua eropa iiquererã ñeripũre duhubea.

²⁵ "Mua masare buherã, fariseo masa sã ñero tarirãca. Ģuyaricũrã ãhraa mua. Mua dorero dopa ta mua soroparire, mua ĩhriri parire mua coewea mua ðarire ii ĩhmurã. Eropa coequererã ta mua siporãripũre coebeaa. Eropirã mua arĩricurire mua pepiripũre ne ðarire gohrotobeaa. Ģajirã yare yajadiarã, mua basi dihta pagarire aĩdiarã arĩrã, eropa dihta pepia mua. ²⁶ Cuiiri ĩhajabirã erã ĩhajabiro dopa ta masibirã ãhraa mua fariseo masa. Mua pepirire gohrotomuhtaque mua. Eropirã ðaripũre iique. Mua eropa iirã masa erã ĩhuro sãre ðarã gohra arĩrãca pare mua.

²⁷ "Mua masare buherã, fariseo masa sã ñero tarirãca. Ģuyaricũrã ãhraa mua. Masa comorore boreri mera erã sũhuma. Eropirã masa iri comorore erã ĩacũ ðari comoro dehyoa. Iri comoro eropa ðaro deyoquerecũ ta, poheca majague iġu boara gõariguere ĩaya mara. ²⁸ Eropa ta mua sã masa erã ĩhabeoro ðarã dehyoa mua. Eropa ðarã deyorã mua arĩquerecũ ta mua pepiriguere ñeri ģuyaricũrã arĩtariacãa boanirã iro dopa, arĩ weremi Jesu.

Judio masare buherã, fariseo masa sãre iġu dipuwaja moaborore wereñumi Jesu

Eropa arĩtuhaja òpa arĩnemomi daja:

²⁹ —Mua masare buherã, fariseo masa sã ñero tarirãca. Guyaricurã àhraa mua. Goãmu yare weremuhtanirã iribojegue majarã erã masa goberire òaro amuraa mua. Eropirã iribojegue majarãre òaro iinirã murare erã wéanugunirã murare òaro amuraa mua. ³⁰ Eropa iirã òpa arĩ wereniguiraa mua: “Iribojegue mari ñecu sumarã murague erã iidiro dopa guapu iibiriboya. Irisubugue arĩnirãre Goãmu yare weremuhtanirãre guapu wejëbiriboya,” arĩ wereniguiraa mua. ³¹ Eropa arĩrã arĩrã, mua ñecu sumarã mura Goãmu yare weremuhtanirã murare erã wejëbirã erã arĩcũ wererã iica. Erã wejëbirã pãramerã mua arĩri sãre mua basi weresãrã iica mua. ³² Mua ñecu sumarã mura iidiro dopa ta ii ojogorocũque.

³³ “Añaa iro dopa ñerã àhraa mua. Añaa porã iro dopa àhraa mua. Goãmu mua ñeri dipuwajare ïgu peamegue ïgu cóãboro core duhrimasibeeaa mua. ³⁴ Eropigu Goãmu yare weremuhtarãre, gajirã masirãre, gajirã muare buhemorãre mua pohro obeogura. Yũ eropa obeocũ muapu yujurãyeri erãre wejërãca. Gajirãre crusague pabiarãca. Gajirãre mua buheri wirigüe tãrarãca. Erãre macari nucũ nurusiarãca. ³⁵ Mua eropa iirã arĩpehrerã ñeri marirãre mua wejëra dipuwaja dipuwajacurãca. Abel murure Caĩn ïgu wejëra dipuwajare dipuwajacurãca muapu. Arĩpehrerã ïgu puhru arĩnirãre òarãre erã wejëra dipuwaja sãre dipuwajacurãca mua sã. Eropirã Goãmu wihi pohro waimurãre mua soeburi mesa pohro Zacariare mua acawererã mura wejënorã. ïguapu Berequias magu arĩpu. Eropirã ïgu sãre erã wejëra dipuwaja dipuwajacurãca mua. ³⁶ Diaye muare weregũ ta iiaa. Erã arĩpehrerãre erã wejëra dipuwaja dohpague majarã dipuwajacurãcoma, arĩ weremi Jesu.

Jerusalén majarãre burigã bujawereñumi Jesu

Lc 13.34-35

³⁷ Eropa arĩtuhaja òpa werenemomi Jerusalén majarãre bujawere ïagu: —Mua Jerusalén majarã, mua acawererã mura Goãmu yare weremuhtanirãre wejëmurinirã arĩma. Eropirã Goãmu obeonirãre, utã mera deamurinirã arĩma. Cãreña buro igo igo porãre igo quëdupuri mera igo coã oyaro dopa ta bajasuburi opadiarabu muare. Muapu irire ne yure gamebirabu. ³⁸ Dohpaguere mua arĩri maca cóãra maca arĩroca. ³⁹ Diaye muare arĩgu tiaa. Puhrugüe dujarigüca daja yuhu. Eropa yũ dujaricũ ïarã mua yure “Goãmu turari mera arigu òaro ariporo,” arĩrãca. Yure mua irire arĩboro core, dipaturi yure ïasome mua, arĩmi Jesu.

24

Goãmu wihi cóãra wihi arĩroca arĩñumi Jesu

Mr 13.1-2; Lc 21.5-6

¹ Eropi Goãmu wihire Jesu ïgu wiriara puhru gua ïgu buherã iri wihi maja wirire ïarã,

—Òatariari wiri àhraa. Ìaque mu sã, arĩbu gua ïgure.

² Jesu yuhrimi:

—I wihi majare dohpaguere ïaraa mua. Muare weregũ tiaa. I wihi arĩpehreri mua ïara i utã sã cohmopehrea waroca. Ne yujuye utãye dujasome, arĩmi ïgu guare.

I umu pehreburiñere wereñumi Jesu

Mr 13.3-23; Lc 21.7-24; 17.22-24

³ Puhru Olivo waicudigu utägugue eja, erogue doami Jesu. Ero igu doacũ gua igu buherã gua seyaro igu pohrogue eja serëpibu.

—Wereque guare. ¿Dohpãricũ eropa warocuri mu arĩdiro dopa waro? ¿Pehrerinũ coregã mu dujariboro coregã dohpa wanugacũ ïarãcuri gua? arĩ serëpibu gua.

⁴ Jesu yãhrimi:

—Õaro iiyuque mua. Eropirã gajirã muare erã guyarire peebiricãque.

⁵ Bajarã masa “Cristo ãhraa yuhũ,” arĩ guyarã árirãcoma. Erã eropa guyacũ peerã bajarã masa Goãmu yare duhurãcoma. ⁶ Mua pohrogã gajirã masa erã gamewejëcũ peerãca mua. Eropirã yoarogue majarã erã sã erã gamewejëcũ peebeorãca. Eropa peequererã ta ne wuaro irire pepibiricãque. Eropa ta wamuhtaroca. Eropa wacũ pehberinũ duhyaniroca dohpa. ⁷ Irisubure yuju yeba majarã gaji yeba majarã merã gamewejërãcoma. Eropirã yujugu opu yarã gajigu opu yarã mera gamewejërãcoma. Eropirã masa bajarã oa mera sirirãcoma. Gajirã dorecu ñero tarirãcoma. Eropiro bajasuburi i yeba ñohmeroca. ⁸ Eropa ñero tariquererã i yeba majarãre tauro erã ñero tariboro duhyaa dohpa. Ñero tarinirãcoma dohpa.

⁹ “Irisubure gajirã muare ñeha ñero iidorerã orãcoma muare gajirã oparãre. Erã eropa ocũ muare wejërãcoma. Yaharã mua arĩri dipuwaja arĩpeherrerã muare ihaturirãcoma. ¹⁰ Irisubure bajarã yaharã arĩnirã yare cóarãcoma. Eropirã erã mera majarãre Jesu yarãre erã ihaturirãcoma. Eropirã erã mera majarã erã arĩquerecũ ta ihaturirãcoma. Eropirã erã mera majarã erã arĩquerecũ ta erãre ñero iimorãre erãre orãcoma. ¹¹ Irisubure bajarã “Goãmu yare weremuhtarã ãhraa,” arĩ guyarã árirãcoma. Eropirã bajarã masa erã guyarire peerã árirãcoma. ¹² Irisubure ñetariaro iirãcoma masa. Eropirã erã mera majarãre mahinemosome. ¹³ Eropirã muare erã ñero iiquerecũ ta muare erã ñero iirare yujuro bojerã yare duhubiricũ Goãmu muare taugucumi. Eropigu igu pohrogue muare opagucumi. ¹⁴ Eropiro i õari buheri arĩpeherrerogue i yebaguere erã wereburi buheri arĩroca. Goãmu igu opu arĩrire arĩpeherrerãre wererãcoma arĩpeherrerã iri buherire erã masiboro dopa. Eropa werera puhru pehberinũ nuagaroca.

¹⁵ “Ñetariagu Goãmu yare goroweogu aribure weremuriñumi iribojegue Daniel muru Goãmu yare weremuhtadigu. Irisubure igu ñetariagu Goãmu wihigue igu niguicũ ïarãca mua. (Irire buhegu peeporo.) ¹⁶ Ero igu niguicũ ïarã, Judea yeba arĩrãpũ utã yucũgue oma duhriporo. ¹⁷ Irisubure masa ñero tarirãcoma. Eropirã yojaro mera duhriurã waporo. Irisubure erã wiri weca maja puurigue arĩrã wihi pohecague erã yare aĩrã ñajabiricãporo. ¹⁸ Eropirã irisubure gajirã erã poerigue arĩrã erã ya suhriire wihigue arĩri suhriire aĩrã pihabiricãporo. ¹⁹ Irisubure nijiposã nome, erã porãre mihrirãre oparã nome sã mojomorocurã nome dujarãcoma. ²⁰ Eropirã Goãmure õpa arĩ serëque: “Puhiró arĩcũ gua judio masa soorinũ arĩcũ sãre gua oma duhriburinũ arĩbiricãporo,” arĩ serëque mua Goãmure. ²¹ Irinurire masa ñero tarirãcoma. I yebare igu ihacũnugura puhru masa ñero tarimuriñuma. Iri eropa arĩquerecũ ta arĩpeherrerã pũriri erã ñero taridiro tauro ñetariaro tarirãcoma masa

pehreburiṇu coregāre. Eropā ñero erā tarira puhru, dipaturi eropa ñero tarisome i yeba pare. ²² Eropigu Goāmu irinurire bajamenurigā áricū iigucumi. Īgu eropa iibiricū ne yujugu masu taribiribocumi. Eropigu ĩgu beyenirā erā tariborore bajamenurigā ñero tariburinurire apigucumi Goāmu.

²³ Irisubure gajirāre pee masi ĩaque: “Īaque. Ohō āhrimi Cristo,” erā aricū erāre peebiricāque. “Ero āhrimi Cristo,” erā aricū sāre peebiricāque. ²⁴ “Cristo āhraa,” arī guyarā, “Goāmu yare weremuhtarā āhraa,” arī guyarā árirācoma irisubure. Eropirā Goāmu ĩgu beyenirāre guyarā, erā deyo ro moarire ii ĩhmurācoma. Goāmu yare erāre cóacū iidiarā iirācoma erā guyari masa. ²⁵ I áripehrerire weryumuhtaa muare iri eropa waboro core. Eropirā óaro pee masiyuque mua. ²⁶ Gajirā masa muare ópa aricū, “Masa marirogue āhrimi Cristo,” erā aricū eroguerē ĩarā wabiricāque. Eropirā erā “Ohō iri wihigue āhrimi ĩgu,” erā aricū sāre erāre peebiricāque. ²⁷ Yuhu masu Goāmu ĩgu obeodigu guñaña mariro dujarigura. Bupu ĩgu miacū umarore, abe murirogue, abe ñajarogue yojaro mera ĩgu miabeoro dopa ta eropa ta dujarigura yuhu. ²⁸ Masa erā ñeri erā iiniguirogue erogue Goāmu erāre erā ñeri dipuwaja dipuwaja moagucumi erāre, arī weremi Jesu.

*Cristo i yebague ĩgu dujariborore wereñumi ĩgu
Mr 13.24-37; Lc 21.25-33; 17.26-30, 34-36*

²⁹ Eropigu guare werenemomi:

—Masa ñero erā tariranuri puhru abe umu majagu, ñami majagu sā boyo duhurācoma. Erā eropa wacū necā dipu yuri dijariroca. Eropiro umaro maja sā yeba sā burigā ñohmeroca. ³⁰ Irisubu ta yuhu masu Goāmu ĩgu obeodigu yu dehyoacū masa ĩarācoma. Eropirā áripehreri cururi majarā orerācoma. Eropirā yu turari mera, yu gosesiriri mera, umaro maja imica curu weca i yebaguere yu dujaricū ĩarācoma masa. ³¹ Corneta busuroca. Eropigu yaharā anyuare áripehrero i yebaguere obeogura. Eropirā áripehreroguerē yaharāre yu beyenirāre erā ai gamenorācoma.

³² “Higueragu irigu waricurire masia mua. Irigu yucagu pūcucū ĩarā, “Bojori merogā duhyaa,” arī masia mua. ³³ Eropa ta irigu waro dopa ta masique mua. I áripehreri yu arīra eropa wacū ĩarā, “Cristo dujariboro merogā duhyaa,” arī masique mua. ³⁴ Diaye arigu tiiaa muare. Irisubu majarā erā siriboro core áripehreri yu arīdiro dopa ta eropa waroca. Umaro i yeba sā pehrea waroca. ³⁵ Yu wereniguiripu ne pehresome. Áripehreri yu arīdiro dopa ta eropa waha ojogorocuroca.

³⁶ “Irinure yu dujariburinure, iri hora sāre masibeaa yuhu. Anyua sā irire masibeama. Masa sā ne masibeama. Yu Pagu dihta irire masimi.

³⁷ “Noé ĩgu árirasubu majarā erā áridiro dopa ta i yeba majarā yu dujariboro coregā eropa ta árirācoma. ³⁸ Yeba miriboro core masa baha, ihri, iinuma. Eropirā mojoto diriñuma. Noé sā erā wuadiru dohodirugue erā ñajaboro core mwaro ta iimuririñuma masa. ³⁹ Mata turaro deco ahri, guñaña mariro yeba miria wayoro. Masa sā miripehrea wañuma. Guñaña mariro ero miridiro dopa ta, yuhu masu Goāmu ĩgu obeodigu i yebaguere guñaña mariro dujariguca. ⁴⁰ Irisubure yure umupeorāre beye gameneodoreguca. Eropigu poheguere perā mohmerā áricū yujugure airācoma yu mera áribure. Eropigu gajigu ero dujagucumi. ⁴¹ Irisubure

nome perã nome erã yujuro erã ojordacare erã biurã árĩcũ yujugore aĩrãcoma. Eropigo gajigo ero ta dujagocumo.

⁴² “Ōaro guñamasi coreque. Yuhu mua opu ya dujariburinure ne masibea mua. ⁴³ Ire guñaque. Yajari masu ĩgu wihigue ĩgu ñajaa ĩgu yajaborore wihĩ opu masigu, iri ñamire ĩgu carĩbiriboñumi yajari masure coregu. Eropigu yajari masure ĩgu ya wihire ñajaridorebiriboñumi. ⁴⁴ Wihĩ opu ĩgu ya wihire corero dopa ta mua sã yu ariburire core árĩque. Yuhu masu Goãmu ĩgu obeodigu i yebare dujarigu guñaña mariro ariguca. Eropirã yahare eropa iinigurã yure coreque, arĩmi Jesu.

Yujugu mohme coregu ĩgu opure ðaro umupeorire, gajigu ĩgu ðaro umupeobiriri sãre wereñumi Jesu

Lc 12.41-48

⁴⁵ Eropi Jesu ðpa arĩ queorire moami buhenemobu:

—Mohme coregu ĩgu opure umupeogu pee masigu ðpa ta ãhrimi. Opu curigu wagu, mohme coregure ĩgu wihire apimi. ĩgu apigupu doregu arigucumi. Eropigu barisubu árĩcũ mohme coregu gajirã mohmeri masare barire gueremi. ⁴⁶ Eropigu opu ĩgu ya wihĩ dujarami. ĩgu dujaracũ ĩagu mohme coregu ĩgu opu ĩgu dorediro dopa ta ipehogu árĩgu, mucubirigu árĩgucumi. ⁴⁷ Diaye muare arĩgu tiaa. ĩgu eropa iicũ ĩagu ĩgu opu árĩpehreri ĩgu yare ĩhadibugu apigucumi ĩgure. ⁴⁸⁻⁴⁹ Ñegu mohme coregupu ðpa ta ãhrimi. “Yu opu yoja deyobeami,” arĩgu, gajirã mohme corerãre paa, wuaro baha, ihri, mererã mera meregucumi. ⁵⁰ ĩgu eropa iirisubu ĩgu opu guñaña mariro dujaragucumi. ĩgu dujararinure ne masibeami mohme coregu. ⁵¹ Eropa dujaragu ñegu ĩgu iirare pee ĩgure turaro dipuwaja moagucumi. Eropigu guyaricurã erã warogue ĩgure cóagucumi. Eroguere ĩgu turaro ore, bujawwereri mera ĩgu gacuri cĩridihugucumi, arĩmi Jesu.

25

Diez nome iira queori mera buheñumi Jesu

¹ Eropi Jesu dipaturi ðpa arĩ queorire weremi buhenemogu daja:

—Umaro majagu ĩgu opu arĩri diez nome erã wadiro dopa ãhrra: Diez nome arĩñuma. Yuju ñami erã, erã sihãgori dipuru mera mojoto diridigure bocatĩrirã wañuma. ² Erã mera majarã nome cinco nome pee masibirã nome arĩñuma. Gajirã nomepu cinco nome pee masirã nome arĩñuma. ³ Pee masibirã nomepu erã sihãgori dipurure yu dicuri dipurure aĩquererã erã gohrotoburire aĩabirĩñuma. ⁴ Pee masirã nomepu erã sihãgori dipurure dicuri dipurure aĩ gajĩ yu dipuru sãre erã gohrotoburire aĩañuma. ⁵ Eropirã mojoto diridigu ĩgu yoja deyobiricũ erã nome wuja pũricũ carĩa wañuma. ⁶ Eropiro ñami deco gaguinigu carĩñumi: “Peeque, mojoto diridigu arigu carimi. ĩgure bocatĩrirã arique,” arĩ gaguinigu carĩñumi. ⁷ ĩgu eroparĩcũ peerã erã nome wahgã, erã sihãgori dipurure amuñuma. ⁸ Eropirã pee masibirã nomepu, gajirã nomere pee masirã nomere ðpa arĩñuma: “Gua sihãgori dipuru yariro iiaa. Eropirã merogã mua ya yure oque guare,” arĩ sererĩñuma erã nome. ⁹ Erã eropa arĩ serẽquerecũ ta pee masirã nomepu ðpa yuhriñuma: “Gua ya yu muare ocũ árĩpehrerãre sihajabiriboca. Eropirã yu duarã pohro mua basi asũrã waque,” arĩ yuhriñuma pee masirã nomepu. ¹⁰ Eropirã

pee masibirā nome asūrā wañuma. Erā eropa wara pūhrū mojoto diridigu erañumi. Īgu eracū ĩha, erā amutuhanirā nome pee masirā nome ĩgure bocatīriñuma. Īgu mojoto diriri bosenuġue ĩgu mera ĩarā wañuma. Eropirā erā bosenu erā iri wihigue ñajara pūhrū, disiporore biacāñumi. ¹¹ Pūhrūġue pee masibirā nomepū erariñuma. “Opū, guare pāgūque,” arīriñuma erā nome. ¹² “Diaye mūare arīgū tiiaa. Mūare masibea yūhū,” arīñumi ĩgu erā nomere.

¹³ Yū dujariburinūre iri hora sāre ne masibea mūa. Eropirā pee masirā nome erā yare ōaro amutuha erā corediro dopa ta ōarā, ñeri marirā āhri coreque mūa sā, arī weremi Jesu.

Niyeruseri oroseri queorire wereñumi Jesu

¹⁴ Eropā arī weretuha ōpā arī queorire moa buhenemomi daja gūa sāre: —Irisubu yū dujariburinū ĩgu wihi opū iidiro dopa árīroca. Wihi opū árīñumi. Īgu gajipūġue curigū wagu, ĩgure mohme corerāre sihubeoñumi. Eropigū erāre ĩgu yare coredoreñumi. ¹⁵ Eropā coredoregū erā dibu masiopē erāre niyeruserire wajapagariserire oñumi. Yujugare cinco mil seri orosere oñumi. Gajigūre pe mil seri oñumi. Gajigūre yuju mil seri oñumi. Erāre otuha waha wañumi. ¹⁶ Eropigū cinco mil seri ĩgu odigū mata iriseri mera gajinore asūñumi. Īgu asūra mera duagu gajī cinco mil seri wajatanemoñumi ĩgu. Eropigū diez mil seri mera duajañumi. ¹⁷ Eropigū pe mil seri ĩgu odigū mata ĩgu ora pūhrū ta iriseri mera gajinore asūñumi. Īgu asūra mera duagu gajī pe mil seri wajatanemoñumi. Eropigū wapicuri mil seri opañumi. ¹⁸ Yuju mil seri ĩgu odigupū gobe seha, iri gobegue dibuñumi iriserire dibugū.

¹⁹ “Pūhrū yoara pūhrū erā opū goerañumi. Eropā eragu ĩgu niyeruseri mera erā wajatanemorare queobu ĩgure mohme corerāre sihubeoñumi. ²⁰ Eropigū cinco mil seri ĩgu odigū ĩgu opū pohrogue eja, diez mil seri wiañumi ĩgure. “Cinco mil seri yare ohabū mūhū. Īañatagu. Iriseri mera gajī cinco mil serire wajatanemoabu,” arīñumi ĩgure. ²¹ “Ōaro iiaya mūhū. Mūhū ōagu yū dorediro dopa ta iidigū āhraa. Eropigū dohpaguere wūaro mū mohmeborore apigūra. Eropigū yū mera mucubirique,” arīñumi ĩgu opū ĩgure. ²² Eropigū pe mil serire aīdigū sā ĩgu opū pohrogue eja, wereñumi ĩgure: “Pe mil seri yare ohabū mūhū. Īañatagu. Iriseri mera gajiseri pe mil seri wajatanemoabu,” arīñumi ĩgu. ²³ “Ōaro iiaya mūhū. Mūhū ōagu yū dorediro dopa ta iigu āhraa. Merogāre ōaro iiaya mūhū. Eropigū dohpaguere wūaro mū mohmeborore apigūra. Eropigū yū mera mucubirique mūhū,” arīñumi ĩgu opū.

²⁴ “Eropigū yuju mil serire aīdigupū, ĩgu opū pohrogue eja, wereñumi ĩgure: “Opū, mūhū turaro mohmedoregū āhraa. Eropigū gajirāre mohmedorequeregū oteri moogu árīqueregū ta mū dihta iri dūcare aīa. ²⁵ Mūhū eropa árīgū árīcū mūre gūiabu. Eropā gūigū gobe seha, iri gobegue mū niyeruserire dibucābu. Īañatagu. Ohō āhraa mū ya niyeruseri,” arīñumi ĩgu ĩgure. ²⁶ “Mūhū ñegu butagu āhraa. Yūre, ‘Mūhū gajirāre mohmedorequeregū mū dihta iri dūcare aīa,’ arāa mūhū yūre. ²⁷ ¿Mūhū yūre eropa árīqueregū ta, duhpigu yū óraserire niyeru diburi wihigue dihbubirari mūhū? Mū erogue dibugū iriseri mera wūaro wajatanemoboaya. Irire mūhū iicū dujaragu wajatanemoboaya yūhū,” arīñumi opū ĩgure. ²⁸ Eropā arīgū gajirā ĩgure mohme corerāre doreñumi ĩgu: “Niyeruserire emaque ĩgure. Diez mil seri opagupūre

oq̄ue. ²⁹ Árípehrerã baja oparãre onemogura. Moorãp̄ure merogã erã opaquerecũ ta erãre emapehocãgura. ³⁰ Ihĩ mohme coregũ duhpibu áríbeami. Naitiarogue ñerogue cõacãque ígure. Erogue ígu turaro ore, bujawereri mera ígu gucuri cūridihugucumi,” arĩñumi opu, arĩ weremi Jesu.

Dipuwaja moaborore wereñumi Jesu

³¹ Eropi Jesu werenemomi:

—Yuhũ masu Goãmu ígu obeodigu árípehrerã anyua mera doregu dujarigũca. Eropa dujarigu opu doarogue yũ gosesiriri mera doagũca. ³² Eropa yũ doacũ, yaharã anyua i yeba majarãre árípehrerãre yũ pohro gameneorãcoma. Erãre gameneora puhru pe curu dũca wagura erãre. Oveja ihadibugũ ígu iiro dopa ígu cabrare ígu dũca waro dopa ta masare dũca wa dobogura. ³³ Eropa dũca wagu oveja dopa árírãre ðarãre yũ diayepũ dobogura. Eropigu cabra dopa árírãre, ñerãre yũ copupu dobogura. ³⁴ Yũ eropa iira puhru yuhũ árípehrerã tauro opu yũ diayepũ doarãre ðpa arĩ weregura: “Yũ Pagu muare ðaro iigucumi. I yebare ihacũnugudigugue ta mua ya áríburire ígu opu árírore amuyutuhami Goãmu. Eropirã dohpaguere ígu amuyudiroguere árírã arique. ³⁵ Yũ oaboacũ íarã mua yure barire obu. Yũ ñemesibucũ mua yure tiabũ. Mua pohro yũ curicũ yure íha masibiriquererã yure ðaro bocatĩribũ mua. ³⁶ Suhri marigu yũ áricũ íarã muapu yure suhrire sãbu. Dorecucũ mua yure íarã aribũ. Peresu yũ áricũ sãre yure íarã aribũ,” arĩgura ðarãre. ³⁷ Yũ eroparicũ peerã ðarãpũ yure serẽpirãcoma: “Opu, ¿dohpãricũ mu oaboacũ mure barire ori gũa? ¿Dohpãricũ mu ñemesibucũ mure tiari gũa? ³⁸ ¿Dohpãricũ mure íha masibiriquererã ðaro bocatĩriri gũa? ¿Dohpãricũ mu suhri marigu mu áricũ mure suhri sãri gũa? ³⁹ ¿Dohpãricũ mu dorecucũ o peresugue mu áricũ sãre mure íarã ejari gũa?” arĩrãcoma yure. ⁴⁰ Erã eropa arĩ serẽpicũ peegu yuhũ ðpa erãre yuhrigũca: “Diaye muare arĩgu tiiaa. Oã yaharã mera majagu bu arĩgu arĩquerecũ ta, mua ígure eropa ta ðaro iibu. Eropa arĩgure eropa iirã, yure iiro dopa iirã tiiaa mua,” arĩ weregura erãre.

⁴¹ “Õarãre yũ eropa arĩ werera puhru, copupu árírãre ñerãre yũ árípehrerã tauro opu ðpa arĩgura: “Goãmu ígu dipuwaja moamorã ahraa mua. Yũ mera dujabiricãque. Peamegue waque mua. Iri peame ne yaribea. Watĩ, ígu yarã anyua sã erã áríborore iri peamere iimi Goãmu. ⁴² Yũ oaboacũ mua yure barire obiribu. Yũ ñemesibucũ mua yure tiabiribu. ⁴³ Mua pohro yũ curicũ yure masibirã bocatĩbiribu. Eropa íacãbu. Suhri marigu yũ arĩquerecũ ta, yure suhri sãbiribu mua. Dorecugu yũ áricũ, peresu yũ áricũ sãre eropa íacãbu mua yure,” arĩ weregura erãre ñerãre. ⁴⁴ Yũ eroparicũ peerã erã yure serẽpirãcoma: “Opu, ¿mu oaboacũ, mu ñemesibucũ, gũa masibigu mu áricũ, suhri marigu mu áricũ, dorecugu mu áricũ, peresugue mu áricũ, dohpãricũ guapu mure itamubiriri?” arĩ serẽpirãcoma yure. ⁴⁵ Erã eropa arĩ serẽpicũ yuhũ erãre ðpa arĩ weregura: “Diaye muare arĩgu tiiaa. Oã yaharã mera majagure bu arĩgure mua ne itamubiribu. Eropa arĩgure mua itamubirã, yure ta itamubea mua,” arĩ weregura erãre. ⁴⁶ Eropigu erãre eropa dipuwaja moanigucãgucumi Goãmu. Erã eropa dipuwajacuri ne pehresome. Eropirã ðarãpũ umuri nucũ ðaro arĩrãcoma, arĩ weremi Jesu.

26

Pahia oparā, mūrā mera Jesure wejēdiañuma
Mr 14.1-2; Lc 22.1-2; Jn 11.45-53

¹ Iri árīpeherire ĩgu buhera pũhru Jesu guare ĩgu buherāre weremi:
² —Penu pũhru Pascua árĩroca. Irire mua masia. Irisubure yũhu
 masure Goãmu ĩgu obeodigure ñearācoma. Ñeha yũre crusague
 wejērācoma, arĩmi ĩgu guare.

³ Irisubu ta pahia oparā, mūrā sã gamenereñorā. Caifa pahia opu ya
 wihi gamenereñorā erā. ⁴ Ero gamenere, erā gayari mera Jesure ñeha erā
 wejēburire game weretamurā iñorā.

⁵ —Bosenu árĩcũ ĩgure ñeabiricārā. Masa gua ĩgure ñeacũ ĩarā gua
 gamenerenijarā gamequeābocoma, arĩrā iñorā erā erā basi.

Nomeo poresuri mera Jesure pipeopo
Mr 14.3-9; Jn 12.1-8

⁶ Irisubure Simo cami boadigu ya wihi arĩmi Jesu. Gua sã árĩbu. ĩgu
 árĩri maca Betania waĩcũri maca árĩbu. ⁷ Iri wihi ĩgu baro watope yujugo
 nomeo poresuri aĩgãri, Jesu dipuru weca pipeomo. Iri poresuri alabastro
 waĩcũdiru dicuri deco, igo pipeori deco wajapagari deco árĩbu. ⁸ Igo eropa
 pipeocũ ĩarā gua Jesu buherā guarā õpa arĩnũgabũ:

—¿Duhpigo igo irire eropa iisirimaacãri? ⁹ Iri poresurire duaboañumo.
 Eropa duago wũaro niyerure wajataboañumo. Eropa wajatago, mojo-
 morocũrãre iri niyerure oboañumo, arĩbu gua ĩgu buherā.

¹⁰ Gua eroparĩcũ ĩagu, Jesu guare weremi:

—¿Duhpirā eropa arĩri mua igore? Yũre õaro iigo iimo.

¹¹ Mojomorocũrãpũ mua mera eropa árĩniguirācoma. Eropirā mua
 erãpũre omasia. Yũpũ i yebare mua mera eropa árĩniguisome. ¹² Yũre
 erā yaaboro core yũ dũpũre amuyugo, poresuri mera sũhumo yũre.
¹³ Eropigu diaye ta muare arĩgu iiaa. Árĩpehrero i yebaguere õari
 buherire erā wererogue igo õpa iirare wererācoma. Erā eropa werecũ
 peerā masa bajarā igore guñarācoma, arĩ weremi Jesu guare.

*Juda Iscariote Jesure ñaturirãre ĩgu ñhmuburire erā mera wereta-
 muñumi*

Mr 14.10-11; Lc 22.3-6

¹⁴ Irisubure yujugũ gua mera majagu Juda Iscariote pahia oparā
 pohrogue ejaũ. ¹⁵ Eja, erãre serẽpipũ.

—¿Jesure muare yũ ñhmucũ dipẽ wajayerãcũri yũre mua? arĩ serẽpipũ
 erãre.

ĩgu eroparĩcũ, erā ĩgure treinta seri plataserire oñorā. ¹⁶ Erā eropa ocũ
 Judapũ Jesure ĩgu ñhmuburinũre coreñipũ.

Jesu ĩgu buherā mera ĩgu baturinũ árĩyoro
Mr 14.12-25; Lc 22.7-23; Jn 13.21-30; 1Co 11.23-26

¹⁷ Eropi bũgabiriri panre erā baburinũ bosenu árĩnũgarinũ árĩbu.
 Eropirā gua Jesu buherā ĩgu pohrogue waha serẽpibu ĩgure:

—¿Nohonogue bosenu mari baburire amudoregu obeori mũhu guare?
 arĩbu ĩgure.

¹⁸ Gua eroparĩcũ ĩgu guare weremi:

—Jerusalẽngue waque. Ero mua bocagure õpa arĩ wereque: “Marire
 buhegu mũre õpa arĩ weredoreami: ‘Yũ ñero tariboro merogã duhyanijaa.

Pascua árĩcũ yuħu, yu buherã mera mu ya wihi gua barãca, ' arĩ weredore obeomi guare," õpa arĩ wereque iri wihi opure, arĩ obeomi Jesu guare.

19 Eropirã guare ĩgu dorediro dopa ta iirã, Pascua árĩcũ gua baburire amubu gua.

20 Eropi iri ñamire gua mera doce ĩgu buherã mera bagu árĩmi Jesu.

21 Gua barisubu ĩgu guare weremi:

—Diaye ta muare arĩgu iiaa. Yujugu mari mera majagu ta yure ĩhaturirãre ĩhmugucumi yure, arĩ weremi ĩgu guare.

22 ĩgu eroparĩcũ peerã guapu burigã bajawererã, ĩgure serẽpinugaba gua yujurãyeri.

—Opũ, ¿yu aħriri mure ĩhmubu? arĩ serẽpibũ.

23 Gua eropa arĩ serẽpicũ ĩgu yuħrimi:

—Yu baripare yu mera yoso bagu ta aħrimi yure ĩhaturirãre ĩhmubu.

24 Iribojegue erã yure arĩ gojadiro dopa ta yuħu masu Goãmu ĩgu obeodigu sĩriguca. Yure ĩhaturirãre ĩhmudigupu ñetariaro tarigucumi. Eropiro ĩgupure ĩgu masa dehyoabiricũ õaboaya. Ñero taribiriboñumi, arĩmi Jesu.

25 ĩgu eroparĩcũ ĩgure ĩhaturirãre ĩhmubu Juda ĩgure serẽpimi:

—Buhegu, ¿mure ĩhmubu aħriri yuħu? arĩ serẽpimi ĩgu.

—Ë u. Muħu ta aħraa, arĩmi.

26 Eropa arĩ weretuhaja gua barisubu Jesu panre aĩ, Goãmure "Õhaa," arĩmi. Eropa arĩtuha irire nuha guare ĩgu buherãre gueremi.

—Ire aĩ, baque. I yu dupu aħraa, arĩmi ĩgu.

27 Eropa arĩtuha ĩgu ihriripare aĩ, Goãmure "Õhaa," arĩ, guare omi.

—Mua árĩpehrerã ire ihrique. 28 I yu di aħraa. Bajarã ñero erã iirare cõabu sĩriguca. Eropigu yu di cõãguca. Eropa sĩrigu Goãmu yu Pagu "Masare õaro iigura," ĩgu arĩdiro ii ojogorcuguca. 29 Muare arĩgu tiiaa. Yu Pagu ĩgu opu árĩroque mua mera ĩgui deco mama decore ihriguca. Mari erogue ihriboro core i ĩgui decore dipaturi ihrinemosome yuħu, arĩmi Jesu guare.

*Pedro "Jesure masibea," ĩgu arĩ guyaburiñere wereñumi Jesu
Mr 14.26-31; Lc 22.31-34; Jn 13.36-38*

30 Eropirã yujuñe Goãmure bayariñere bayatuhajarã wiriabu. Utãgu Olivo waĩcudigugue wabu gua. 31 Erogue gua ejacũ Jesupu guare weremi:

—Dohpagã ñami mua árĩpehrerã yure cõãgãrãca. Mua yure cõãborore õpa ta arĩ gojañuma Goãmu yare erã gojarapũ: "Ovejare ĩhadibugure erã wejẽcũ iiguca. Yu eropa iicũ oveja ĩgu yarã ĩgure cohãgã wasiria warãcoma," arĩ gojañuma. 32 Eropigu Goãmu yure ĩgu masura puhru mua core Galileague wamũhtaguca, arĩmi ĩgu.

33 ĩgu eroparĩcũ peegu Pedro õpa arĩrimi:

—Yu mera majarã árĩpehrerã erã mure cõãgãquerecũ ta yupu mure ne cõãsome, arĩmi ĩgu.

34 Jesu yuħrimi:

—Diaye arĩgu tiiaa mure. Dohpagã ñami cãreña ĩgu werebore core uħresubu "Yuħu Jesure masibea," arĩguca muħu, arĩmi ĩgu Pedroe.

35 ĩgu eropa arĩquerecũ ta Pedro õpa arĩ yuħrimi:

—Mu mera yure erã wejẽquerecũ ta, "Jesure masibea," ne arĩsome yuħu, arĩ yuħririmi Pedro.

Eropirã gua sã gajirã ĩgu buherã Pedro ĩgu arĩro dopa ta arĩribu gua Jesure.

Getsemanígue Goãmure serēñumi Jesu

Mr 14.32-42; Lc 22.39-46

³⁶ Eropi Getsemani waĩcari gorogue Jesu gua ĩgu buherã mera waha, erogue eja, guare arĩmi:

—Ohõ doayuque. Mũa ohõ doaropẽ sohõgue Goãmũ mera wereniguigu wagu iiaa, arĩmi ĩgu guare.

³⁷ Eropã arĩtuha Pedrove, perã Zebedeo porãre, erã Ƴrerãre sihugãmi. Eropigu ĩgu turaro bujawere, ñero sĩporãcũpũ. ³⁸ Eropã bujaweregu ĩgu mera majarãre ĩgu sihugãnirãre arĩpũ:

—Burigã ñero sĩporãcũa yũhũ. Yũre turaro pũriro dopa ta pepigu iiaa. Sohõñari wanigu iiaa. Ohõ dujanique mũa. Eropirã yũ mera ta tũyũque mũa sã, arĩpũ ĩgu erãre.

³⁹ Eropã arĩtuha ero core merogã wanemo, yeba mereja, Goãmure arĩpũ: —Ahũ, yũ ñero tariburire iidiabigu iibiricãque. Yũ eropã arĩquerecũ ta yũ gamero dopa iibita. Mũpũ masia. Mũ gamero dopa iique, arĩpũ ĩgu Goãmure.

⁴⁰ Eropã arĩtuha, Ƴrerã ĩgu buherã pohrogue eranijagu erã carĩ oyarãre ĩapũ. Erãre ĩagu Pedrove õpa arĩpũ:

—¿Yuju hora gohra yũ mera ta tũyũtamubirari? ⁴¹ Õaro iique mũa. Mũa pepiri mera õarire iidiaraa mũa. Mũa seyaro irire iidiaquererã ta irire bocatũbeaa. Eropirã Goãmure serēniguique ñero mũa iibiriboro dopa, arĩ werepũ Jesu.

⁴² Eropã arĩtuha dipaturi waha, Goãmure serēpũ daja:

—Ahũ, yũ ñero tariburire iidiagu iique yũre. Mũ gamero dopa ta iique, arĩpũ ĩgu.

⁴³ ĩgu buherã pohrogue Ƴrerã pohrogue dipaturi erapũ daja. Eropã eragu carĩ oyarãre ĩapũ daja. Wũja pũritaricãyoro erãre. ⁴⁴ Eropigu dipaturi erãre apicã dipaturi waha, Goãmũ mera wereniguipũ daja. ĩgu ero core ĩgu arĩdĩro dopa ta arĩpũ. ⁴⁵ Eropã arĩtuha ĩgu buherã pohrogue eraa, erãre arĩpũ:

—¿Mũa carĩrã soorã iiri dohpa? arĩpũ ĩgu. Eropã arĩtuha masa erã aricũ ĩagu õpa arĩpũ:

—Iripẽta ãhraa. Dohparagã yũ masure Goãmũ ĩgu obeodigure ñerãre orãcoma yũre. ⁴⁶ Wahgãque. Ina warã. ĩaque. Yũre ĩhaturirãre obu ohõ ahrimi, arĩpũ ĩgu.

Jesure ĩhaturirã ĩgure peresu iĩnuma

Mr 14.43-50; Lc 22.47-53; Jn 18.2-11

⁴⁷ ĩgu eropã arĩ wereniguirisubu gua mera majagu mũrupũ Judapũ eramĩ. Eropirã masa bajarã ñoserimijiri yucũ dũcari opanirã ĩgu mera yujuro mera erama. Erã pahia oparã, erã mũrã sã erã obeonirã arĩma.

⁴⁸ Negohrare Jesure ĩhaturirãre wiabu õpa arĩ wereseretuhapũ Juda: “Yũhũ wayuporãre mimigu ĩgu ta arĩgũcumĩ mũa ñeabu. ĩgure yũ mimira pũhũ ñeaque,” arĩpũ Juda erãre. ⁴⁹ Eropigu eragu Jesu pohrogue mata wapurumujumi.

—Buhegũ, ¿ãhriri mũhũ? arĩ ĩgure wayuporã mimimi.

⁵⁰ ĩgu eropã mimicũ Jesu õpa arĩmi:

—Yũ merã majagu, ¿duhpigu õguere ahriri mũhũ? arĩmi ĩgure.

Eropirã erã Jesure ñeama.

⁵¹ Erã eropã iicũ ĩagu Jesu mera majagu ĩgu matamijire tuãwea aĩ, pahĩ opũ pohro majagure ĩgu gamirore tabe corodijucãmi. ⁵² ĩgu eropã iicũ ĩagu Jesu ĩgure weremi.

—Mu matamijire dibuque. Gajiräre ñosenirä árîrã, erã ñose gamecũ sîrirãcoma. ⁵³ Yu Pagure yu itamudorecũ ïgupu bajarã anyuare doce cururire yu pohro obeobocumi. ¿Irire masibeari mua? ⁵⁴ Eropa itamubodiro árîqueregu ta ïgure yure itamudoresome yuhu. Yu eropa dorebiricũ Goãmu yare erã gojarapũ arîdiro dopa ta eropa waroca, arîmi ïgu.

⁵⁵ Eropa arîtuha masare weremi ïgu:

—¿Mua ñoserimijiri mera, yucu ñucari mera arirã yajari masare iro dopa mua yure ñearã arirã iiri? Ûmuri nucu Goãmu wihigue yuhu muare buhe doacã, mua yure ne ñeabiribu. ⁵⁶ Dohpaguere mua yure eropa iirã i árîpehreri Goãmu yare weremuhtanirã erã arî gojadiro dopa ta iiaa mua, arîmi Jesu eräre.

Ïgure eropa ñeacũ ïarã gua ïgu buherã árîpehrerã ïgure cohã omagã wabu gua.

Judio masa oparã Jesure serëpiñuma

Mt 14.53-65; Lc 22.54-55, 63-71; Jn 18.12-14, 19-24

⁵⁷ Eropi ïgure ñeanirã pahi tauro opu Caifa waicugu ya wihigue aï ejañorã ïgure. Iri wihi ta masare buherã, murã sã gamenereñorã. ⁵⁸ Pedropu yoarogue eräre ïhanurusiapu. Eropa ïhanurusiaqu Caifa ya wihire cãhmotara sãrirore eja, iri sãriro pohecague ñajaa wapu. Ñajaja, iri wihire corerã surara mera doapu. “Jesure duhpiicũ ïagura,” arîgu doapu Pedro.

⁵⁹ Eropirã pahia oparã, gajirã oparã mera gamenererã Jesure wejẽdoreñiarã, guyarã mera erã ïgure ñero dipuwaja moaborore guñamaariñorã. ⁶⁰ Erã eropa weresãburire guñabocabiriñorã. Eropa guñabocabiriquererã ta masa bajarã ïgure eropa weresãmorã amañorã. Eropirã perã ïgure weresãmorã erañorã. Õpa arîñorã:

⁶¹ —Ihî õpa arîmi: “Goãmu wihire cóamasia. Eropa cóãgu uhrenu puhru iri wihire dipaturi ïgura,” ïgu aricũ peebu gua, arî weresãmaacãñorã Jesure.

⁶² Erã eropa arîra puhru pahia tauro opu wahgãnugaja, Jesure serëpipu:

—¿Oã mure weresãquerecũ ta eräre yuhri gamebeari muhu? ¿Mure erã weresãrire dohpa arî yuhri gahmeri muhu? arîpu opu.

⁶³ Ïgu eroparicũ peequeregu ta Jesu eropa pepicãpu. Ïgu eropa yuhribiricũ ïagu pahia tauro opu ïgure dipaturi serëpipu daja:

—Goãmu jocarinigucãgu mera diaye arîque muhu. Muhu eropa arîbiricũ mure ïgu dipuwaja moagacumi. Wereque guare. ¿Cristo Goãmu magu ta àhriri muhu? arî serëpipu daja.

⁶⁴ Ïgu eroparicũgue ta Jesu yuhripu:

—Ïgu ta àhraa. Muare diaye weregu tiiaa. Puhru yuhu masu Goãmu ïgu obeodigu Goãmu yu Pagu turagu pohro ïgu diayeru doacũ ïarãca mua. Eropirã umaro maja imica weca yu dujaricũ sãre ïarãca, arî yuhripu Jesu.

⁶⁵ Ïgu eroparicũ peegu pahia opu, ïgu basi ïgu sañarañe suhrirore yeguecãpu gajiräre “Guatariacãmi,” arîdoregu.

—Ïre weresãre gajiräre gamebeaa pare. Ïgu basi Goãmure ïgu ñero werenigucũ peea mari. Eropirã ïgu ñero iira dipuwajare masituhaa mari.

⁶⁶ ¿Eropirã dohpa iirãcuri mari dohpaguere ïre? arî serëpipu ïgu gajirã oparãre.

—Ïgu ñeri dipuwaja wejẽcãro gahmea, arî yuhriñorã erã.

67 Erã eropa arĩra puhru ĩgu diapore disico ehosũ, ĩgure pañorã erã.

68 Gajirã ĩgu cuirire diricãhmota õpa arĩ wereyañorã ĩgure:

—¿Noa mure pari? Cristo Goãmu beyedigu arĩgu ĩabiriqueregu ta wereque guare, arĩ pañorã erã.

—*Īgure masibea, arĩ guyañumi Pedro Jesure*

Mr 14.66-72; Lc 22.56-62; Jn 18.15-18, 25-27

69 Eropi iri wihi pohro arĩri pũũ õari pũũ Pedropũ doapu. ĩgu eropa doacũ ĩago pahia opũ pohro majago ĩgu pohrogue erago õpa arĩpo:

—Mu sã Jesu Galilea majagu mera ãhrabũ, arĩpo igo.

70 Igo eroparĩcũ peegu Pedro õpa arĩpũ:

—¿Dohpa arĩmaacãgo iiri muhu? Mu arĩgure ne masibea yuhũ, arĩpũ Pedro arĩpehrerã erã peero.

71 Igo eropa arĩra puhru iri pũũ maja sãriro disiporo pohrogue wapũ Pedro. Ero ĩgu arĩcũ gajigo pohro majago ĩgure ĩago, ero arĩrãre õpa arĩpo igo sã:

—Jesu Nazare majagu mera ãhrami ihĩ, arĩpo igo Pedrove daja.

72 Igo eroparĩcũ peegu Pedro yuhripũ:

—Goãmu mera diaye arĩgu iia. ĩgu mu arĩgure ne masibea yuhũ, arĩ yuhripũ Pedro.

73 Eropi merogã puhru ta ero niguinirã Pedro pohrogue waha, ĩgure õpa arĩñorã.

—Diaye ta ãhraa. Jesu mera majarã mera majagu ta ãhraa mu sã. Erã iro dopa ta werenĩguia muhu, arĩñorã erã Pedrove.

74 Erã eroparĩcũ Pedro yuhripũ:

—Diaye ta Goãmu mera arĩgu iia muare. Yu diaye arĩbiricũ Goãmu yure dipuwaja moaporo. ĩgu mua arĩgure ne masibea yuhũ, arĩ yuhripũ ĩgu erãre.

Īgu eroparĩcũ ta cãreña werepũ. 75 ĩgu werecũ peegu Jesu ĩgure arĩrare guñapũ. “Cãreña ĩgu wereboro core ‘Jesure masibea,’ arĩgũca muhu. Ũhresubu eropa arĩgũca muhu,” Jesu ĩgure arĩrare guñapũ Pedro. Eropa guñagu iri sãrirore wiria turaro orepũ.

27

Pilato pohrogue Jesure aĩgãñuma

Mr 15.1; Lc 23.1-2; Jn 18.28-32

1 Eropirã boyodi merero ta pahia oparã, murã sã Jesure erã wejẽdoreborore game weretamuñorã. 2 Erã eropa weretamura puhru ĩgure dihri, Pilato waicũgu opũ pohrogue aĩgã, ĩgure oñorã Pilatore. Pilatopũ iri yeba majarã opũ arĩmi.

Juda Iscariote sĩria wañumi

3 Eropigu Jesure erã wejẽdorecũ ĩagu Judapu Jesure ĩgu ĩhmurare guña turaro bujawerepũ. Eropa bujaweregu treinta seri niyeruserire ĩgu ñearaserire wiagu wagũ, pahia pohrogue, murã pohrogue eja, õpa arĩpũ:

4 —Jesu muare yũ ĩhmudigu ñeri marigu ĩgu arĩquerecũ ta erã wejẽdoreama ĩgure. Eropigu muare ĩgure ĩhmuũgũ ñero ĩgu iia yuhũ. Eropigu ĩ niyeruserire muare wiagu iia, arĩpũ Juda erãre.

Īgu eropa arĩ werera puhru erã yuhriñorã:

—Eropa ta iicuraporo. Mu eropa arĩri guare duhpiburi arĩbeaa. Mu dihta eropa arĩ pepia irire, arĩ yuhriñorã erã ĩgure.

⁵ Erã eropa arĩ yuhrira puhru erã árĩri wihi Goãmu wihigue Juda ĩgu niyuserire mehsiripicãpu. Mehsirituha waha wapũ. Waha, yuradare dirisiu, ĩgu basi ĩgu wãũgu tuhbiu, buhrimadija, siria wapũ pare.

⁶ Eropirã pahia oparã niyuserire aĩrã õpa arĩñorã:

—I niyure Goãmu wihi maja comorogue niyeru diburi comorogue mari apimasibea. I niyeru mera ta masare wejẽdorema. Eropiro mari doreri marire eropa árĩri niyure dibudorebea Goãmu wihigue, arĩñorã erã basi.

⁷ Erã eropa arĩra puhru, “Õpa iirã,” erã arĩ weretamura puhru mátasorori mohmegũ ya yebare asũrã wañorã. Iriseri mera asũñorã. Gajĩpu majarã iri macague eranirã sĩricũ erãre yaaburi yebare asũñorã.

⁸ Eropirã iri yebare “Di cóari yeba,” arĩ waĩyema masa. Dohpague sãre eropa ta waĩcua. ⁹ I árĩpehreri eropa wayoro iribojegue majagũ Jeremia ĩgu “Eropa waroca,” ĩgu arĩdiro dopa ta. ĩgu Goãmu ya weremuhtadigũ arĩñumi. Õpa arĩ gojañumi ĩgu: “ ‘Treinta niyuserire plataserire iripẽta wajayerãra gua ĩgure ñeaborore,’ arĩrãcoma Israe masa. ¹⁰ Eropirã iriseri mera mátasorori mohmegũ ya yebare asũrãcoma erã. Õpa ta yure iidoremi Goãmu,” arĩ gojañumi Jeremia iribojegue.

Pilato Jesure serẽpiñumi

Mr 15.2-5; Lc 23.3-5; Jn 18.33-38

¹¹ Eropi Pilatore erã Jesure ora puhru ĩgũpu ĩgure serẽpipũ:

—¿Diaye ta judio masa erã opu ta áhriri muñu? arĩ serẽpipũ Jesure.

—Mu arĩro dopa ta ĩgu ta áhrraa, arĩ yuhripu Jesu.

¹² Eropa arĩ yuhriqueregu ta, pahia oparã, murã sã erã weresãcũ yuhribiripũ. ¹³ ĩgu eropa yuhribiricũ ĩagu Pilato serẽpipũ:

—¿I árĩpehreri erã weresãrire peebeari muñu? arĩ serẽpipũ ĩgu Jesure.

¹⁴ ĩgu eropa arĩ serẽpiquerecũ ta Jesu ne yuju disiro yuhribiripũ. ĩgu eropa yuhribiricũ ĩagu Pilato uca wapũ.

Jesure wejẽdoreñuma

Mr 15.6-20; Lc 23.13-25; Jn 18.38-19.16

¹⁵ Bojori nucũ Pascua árĩcũ peresu árĩdigure yujugure masa “ĩgure wiuque,” erã arĩgure Pilato eropa wiubasamuripũ. ¹⁶ Irisubure Barrabã waĩcũgũ peresugue arĩpu. ĩgure masiñorã masa. ¹⁷ Eropigu erã gamanerecũ Pilato serẽpipũ erãre:

—¿Nihipure muare wiubasacuri yũu? ¿O Barrabãre o Jesure “Cristo” erã arĩgure wiubasacuri yũu? arĩ serẽpipũ Pilato Jesure wiudianijagu.

¹⁸ Jesure masa erã mahicũ ĩarã judio masa oparã ĩgure ihaturirã iĩñorã. Eropa ihaturirã ĩgure oñorã Pilatore. Irire erã ihaturirare masigu Pilato Jesure wiudiaripũ.

¹⁹ Eropi Pilato masare ĩgu beyeri pẽro ĩgu doacũ ĩgu marapo ĩgure quere obeopo: “Dohpagã ñamire Jesure quẽgo burigã ñero pepiabu ĩgure ñero iiburire. Eropigu ĩgure ñeri marigure ne gajiropa iibiricãque muñu,” arĩ werebeopo ĩgu marapo Pilatore.

²⁰ Pilato Jesure eropa wiudiaquerecũ ta pahia oparã, murã sã masare õpa arĩdoreñorã: “Barrabãpũre wiudoreque. Jesupũre wejẽdoreque,” arĩdoreñorã masare. ²¹ Eropigu Pilato masare serẽpipũ daja:

—¿Oã perãre nihipure muare wiubasacuri yũu? arĩ serẽpipũ.

—Barrabãpũre wiubasaque guare, arĩ yuhrĩñorã.

22 —¿Ihĩ Jesu, “Cristo” erã arĩgũpure dohpa iigucuri yũhu? arĩ serẽpipũ ĩgu.

—Crusague pabia wejẽque ĩgure, arĩ yũhriñorã masa áripehrerã.

23 —¿Ñehenore ñerire iiari ihĩ mua eroparicũ? arĩpu ĩgu.

Ĩgu eroparicũ peerã erã turaro mera gaguiniguinemoñorã:

—Crusague pabia wejẽque ĩgure, arĩ gaguiniguñorã daja masa ĩgure.

24 Erã eropa arĩ gaguiniguicũ peegu, ĩgure erã peediabiricũ ĩagu, “Masa gua gamequeábocoma,” arĩgu, yũhrigu ta õpa ĩpu Pilato. Decore aĩgãridoretuhaja masa erã ĩhuro ĩgu mojo coepũ. Eropã mojo coegu õpa arĩpu:

—Ĩre wejẽra dipuwaja, yaha dipuwaja árisome. Mua ya dipuwaja áriroca, arĩgu mojo coepũ.

25 ĩgu eroparicũ peerã áripehrerã masa õpa arĩñorã:

—Ĩre gua wejẽdorera dipuwaja gua porã sã gua ya dipuwaja ta áriporo, arĩñorã masa.

26 Erã eroparicũ peegu Pilato Barrabáre peresugue áridigũre wiudorepu masa erã gamegũre. Eropã iituha Jesupũre yuradari mera tãradore, ĩgure crusague pabia wejẽdoregu wiapu surarare.

27 ĩgu eropa wiacũ Pilato ya wihigue ĩgu surara aĩ ejañorã Jesure. Eropirã erã surara áripehrerãre Jesu pohroge gameneoñorã. 28 Eropirã ĩgu suhrire tuwea aĩ, opu ya suhriro dopa bejariñere Jesure sãñorã.

29 Eropã sãtuha, pora berore iituha, ĩgu dipuru weca duhpeoñorã. Eropã duhpeotuha, yucũgure diayepũ mohsuañorã. Mohsuatuha, õpa arĩ wereyañorã erã ĩgure ĩgu pohro merejarã:

—Umupeorã arique. Judio masa opu õaro áriporo, arĩ wereyañorã ĩgure.

30 Eropirã ĩgure disico ehosũñorã. Erã mohsuadigũre ĩgure tuãwea aĩ, ĩgu dipurure pañorã irĩgu mera. 31 ĩgure eropa wereyara puhru erã sãra suhrirore tuwea aĩ ĩgu ya suhriropũre sãñorã daja. Eropirã crusague pabia wejẽmorã ĩgure aĩ wiria wañorã.

Erã Jesure crusague pabia wejẽñuma

Mr 15.21-32; Lc 23.26-43; Jn 19.17-27

32 ĩgure aĩgã, Simo waĩcũgure Cirene majagũre bocatĩri, ĩgure Jesu ĩgu coãra crusare coãtamudorema.

33 Coãgã Gólgota waĩcũroge ejama. Gólgota arĩro, mari ya mera “Dipu pero” arĩro iiaa. 34 Eropirã vinore suĩri deco mera erã morera decore Jesure orima erã. Iri decore ihriña, ihribirimi ĩgu.

35 Eropirã ĩgu suhrire tuwea aĩra puhru ĩgure crusague pabiana erã. Eropã pabiatuha ĩgu suhri murare, “¿Noa yañe árirocuri iñe?” arĩ masimorã erã basi game deamehtu birama. Eropã iirã Goãmũ yare weremuhtadigu ĩgu arĩdĩro dopa ta iirã iima erã. Opa arĩ gojañumi ĩgu: “Yaha suhrire erã basi aĩmorã, ‘¿Noa yañe árirocuri iñe?’ arĩ masimorã erã basi game deamehtu birama erã,” arĩ gojañumi iribojegũre.

36 Deabiratuha ĩgure ĩhadooacurima erã. 37 ĩgu dipuru weca crusague õpa arĩ gojarapũre pabia tuma erã ĩgure weresãra wererapũre. “Ihĩ judio masa tauro opu áhrimi,” erã arĩ gojarapũre pabia tuma.

38 Eropirã perã yajari murare Jesu pohro gajĩ cruserigũre pabia tuma erã sãre. Yujugu ĩgu diayepũ, gajĩgũre ĩgu copũ pabia tuma erã. 39 Crusari pohro tarigãrã Jesure ĩha, erã dipure yurerã, ñero arĩ wereniguima ĩgure:

40 —“Goāmu wihire cohā, uhrenu puhru iri wihire amugura daja,” arī wereniguidigu árīribu muhu. Goāmu magu árīgu mu basi dijaque. Eropigu mu basi itamuque. Eropigu tari wereguca muhu, arīma masa.

41 Eropa ta pahia oparā, masare buherā sã eropa arī wereyama.

42 —Īgu gajirāre taudigu árīqueregu ta ĩgu basi taumasibeami. “Israe masa opu āhraa,” arīrimi ĩgu. Eropirā ĩgu basi ĩgu dijaricū ĩarā ĩgure umupeorāca. 43 Īguru Goāmure umupeorimi. Eropigu “Goāmu magu āhraa,” arīrimi ĩgu. ĩgu eropa arīgu árīcū Goāmuru ĩgure itamuporo, arī wereyama erā.

44 Yajari mura ĩgu pohro erā pabianirā eropa ta ĩgure wereya ñero wereniguima erā sã.

Jesu sīria wañumi

Mr 15.33-41; Lc 23.44-49; Jn 19.28-30

45 Eropi goeri boje árīcū uhre hora gohra árīpehrerogue naitīa wabu.

46 Eropigu irisubu naitīa wari subure Jesu turaro gaguinimi:

—Elí, Elí, ¿lema sabactani? arīmi ĩgu. Eropa arīgu ōpa arīgu iimi mari ya mera: “Yu Goāmu, yu Goāmu, ¿duhpigu yure cohāri muhu?” arīgu iimi.

47 ĩgu eroparīcū peenirā yujurāyeri ero niguinirā ōpa arīrima:

—Goāmu ya weremāhtadigure Eliare sihugu iicumí, arīrima erā.

48 Eropigu yujugu erā mera majagu mimi aĩri yusu mera vino suĩrire yosotuha, aĩ omagā, yucugu ojogorore diritu, Jesure simujumi. 49 ĩgu eropa iicū ĩarā gajirā simujugure ōpa arīma:

—Corenique. Elia ĩgure ĩgu itamucū ĩanirā dohpa mari, arīma erā.

50 Erā eropa arīra puhru dipaturi Jesu turaro gaguinigui sīria wami.

51 ĩgu sīricū ta Goāmu wihi majañe suhriro ero erā cāhmotara suhriro deco mera yehguea wayoro. Eropiro yeba sã ñohmebu. Eropa ñohmecū utā sã pagayeri sã wahria wabu. 52 Eropirā masa goberi pāricū, bajarā Goāmu yarā árīnirā iribojegue sīrinirā mura masa wiriañorā. 53 Masa wiriarā iri goberire cóācā ōari macague Jerusaléngue wañorā erā. Erogue erā wacū masa bajarā erāre ĩañorā.

54 Eropirā yeba ñohmecū ĩarā, sīrinirā mura erā masa wiriacū ĩarā, surara opu ĩgu surara mera uca wama. Erā Jesure crusague árīgure corerā arīma. Uca wa, ōpa arīma:

—Diaye ta āhraa. Ihĩ Goāmu magu ta āhrañumi, arīma erā.

55 Eropirā Galileague Jesu mera arinirā ĩgure itamunirā nome arīma. Yoarogue crusague tuyagure ĩhabeo niguibu gua erā mera. 56 Erā nome mera María Magdalena arīmo. Gajigo María waicugo sã arīmo. Igotu Santiago, José sã pago arīmo. Gajigo Zebedeo marapo arīmo.

Jesu dũpũre masa gobegue apĩñumi José

Mr 15.42-47; Lc 23.50-56; Jn 19.38-42

57 Eropi ñamicague José Arimatea majagu doberi opagu ero arīmi. ĩgu Jesu buhegu arīmi. 58 Eropigu Pilato pohroge eja, Jesu dũpũre serēpu. ĩgu eropa serēcū peegu Jesu mura dũpũre odorepu Pilato. 59 ĩgu eropa dorera puhru Josépu Jesu mura dũpũre aĩ, diju, ōari suhriro guhrari mariri suhriro mera ĩgu dũpũre omapu. 60 Omatuha, José ĩgu ya masa gobegue apipu ĩgu dũpũre. Iri gobe erā utāyegue erā seara gobe mama gobe arīyoro. Iri gobegue apituha, wũariye utāyere taragāpu iriye mera

bihabu. Bihatuha, waha wapu. ⁶¹ Eropirā María Magdalena, gajigo María mera iri gobeguere ihadoa coreñorā.

Jesure erā apira gobere surara coreñuma

⁶² Eropi gajinu, Pascua árĩburire erā amuranu puhru Sabado áricũ pahia oparā, fariseo masa sã Pilato pohro gamenereñorā. ⁶³ Gameneretuha opa arĩñorā erā Pilatore:

—Opu, irire guñaá gua. Īgu guyaricagu Jesu ojocariniġu opa arĩpu ĩgu: “Uhrenu puhru masa m̄riagaca yahu,” arĩpu ĩgu. ⁶⁴ Īgu eropa arĩdiġu áricũ ĩgu buherāpu ĩgu d̄p̄ure yajabocoma. Eropa yajarā masare opa arĩbocoma: “Jesu masa m̄riami,” arĩbocoma erā. Īgu Jesupu masare guyagu iimi. Īgu buherā sã “Īgu masa m̄riami,” arĩrā guyarā irācoma. Eropirā Jesu ĩgu guyadiro tauro erā guyaripu ñetariaroca. Eropa yajari arĩġu uhrenu gohra mu surarare corecoreque erā ĩgu m̄r̄ure apidiroque, arĩñorā erā Pilatore.

⁶⁵ Pilato yuhripu:

—Áu. Yaharā surara coreporo. Eropirā m̄a bocatĩuropē iri gobere oaro coreque, arĩpu ĩgu erāre.

⁶⁶ Īgu eroparĩcũ erā waha, iri gobere bihariye merague ta pihatuñorā masa erā ñajacũ ĩha masimorā. Eropirā surarare iri gobere corecoreñorā.

28

Jesu masa m̄riañumi

Mr 16.1-8; Lc 24.1-12; Jn 20.1-10

¹ Eropi judio masa soorinupu Sabadonupu irinu taricũ, Domingo áricũ ñamiñarigā áricũ María Magdalena gajigo María mera Jesu masa gobere ĩarā wañorā. ² Eropiro mata yeba turaro ñohme purumujuyoro. Eropa ñohmecũ mari Opu ĩgu anyu umarogue aridigũ dijari, masa gobere bihariyere ut̄yere tarabeo iriye weca doapu. ³ Īgu anyu bupu miaro dopa oaro gosesirigu, ĩgu suhri yaji poari iro dopa oaro boreri suhricagu áripu. ⁴ Īgu eropa dehyoacũ, surara iri gobere corerā, ucataria wa, naragā, weca gohrare s̄irinirā iro dopa wañorā. ⁵ Eropigu anyupu erā nomere opa arĩpu:

—Yure güibircāque. Crusague erā pabiadigure Jesure m̄a amacũ masia yahu. ⁶ Īgu dohpaguere ōre marimi. Īgu arĩdiro dopa ta ĩgu masa m̄ria wami. Erā ĩgu d̄p̄ure erā apidiro ĩarā arique. ⁷ Tuhaja ĩgu buherā pohroque um̄diaro waha, opa arĩ wererā waque: “Īhĩ Jesu s̄iridigũ masa m̄riami. Eropigu m̄a core Galileague ĩgu wam̄htagacumi. Eroque ĩgure ĩarāca m̄a,” arĩ wererā waque m̄a. I yu arĩrare guñaque m̄a, arĩpu anyu erā nomere.

⁸ Īgu eropa arĩra puhru erā nome masa gobegue arĩnirā nome vojaro mera wiria, erā ĩarare güiquererā ta, mucubiriri mera Jesu buherāre wererā warā, omañorā. ⁹ Eropa warā nomere Jesu bocatĩripu:

—¿Noho wahari m̄a? arĩ serēpipu ĩgu. Īgure ĩha erāpu ĩgu pohroque eja, ĩgu guburire ñeha ĩgure umupeñorā.

¹⁰ —Güibircāque m̄a. Yu pagu porāre “Galileague waque,” arĩ wererisa. Eroque yure ĩarācoma, arĩpu Jesu erāre.

Masa gobere corerā surara erā ĩarare wereñuma

11 Erã nome wererã warisubu surara watope yujurãyeri masa gobere corenirã surara Jerusaléngue pahia oparãre wererã wañorã. Jesu ïgu masa gobegue ïgu muriarare werepehocãñorã. 12 Erã eropa arĩ werecũ pahia oparã, murã mera gamenereñorã. Gamenere weretamuñorã. Eropirã surarare guyadorerã niyerure wajayeñorã.

13 —Ōpa arĩque mua masare: “Ñami gua carĩra puhru, ïgu buherãpu masa gobegue eraa, ïgu dupure aicãñirã ãhrama,” arĩ wereque masare.

14 Mua eropa arĩ werecũ Pilatoru mua carĩtariarare peecãbocumi. ïgu eropa peecũ, ïgure wererãra gua. “Erãre dipuwaja moabircãque,” arĩ wererãra gua ïgure, arĩñorã erã surarare.

15 Erã eropa arĩra puhru surarapu niyerure ñeha, erãre erã guyadorediro dopa ta masare wererã wañorã erã. “Jesu buherã aicãñirã ãhrama ïgu muru dupure,” arĩñorã erã. Eropirã eropa Jesu ïgu dupu aĩrare wereniguima judio masa. Dohpague sãre eropa ta arĩ werema erã.

Jesu ïgu buherãre ïgu yare ïgu iidorera apiñumi

Mr 16.14-18; Lc 24.36-49; Jn 20.19-23

16 Eropi gua Jesu buherã once buherã Galileague waha utãgugue Jesu ïgu wadoredigugue wabu gua. 17 Erogue eja Jesure ïarã umupeobu gua ïgure. Eropa umupeoquererã ta gua yujurãyeri “Ihĩ Goãmu magu arĩbiribocumi,” arĩ pepiribu dohpa. 18 ïgupu õpa arĩmi guare:

—I yebaguere, umaro sãre Goãmu arĩpehrerã tauro turarire omi yare.

19 ïgu eropa ocũ muare õpa iidorea: Arĩpehrero majarãre yahare buherã waque erã yaharã erã waboro dopa. Eropirã mari Pagu waĩ mera, yu waĩ mera, Espĩritu Santo waĩ mera erãre waĩyeque. 20 Eropirã muare yu dorerare erã ipehoburire buheque erãre mua. Eropirã ire yu arĩrare guñaque: Arĩpehrerinuri nucu mua mera arĩguca ne i umu pehrecũgue, arĩ weremi guare Jesu.

San Marcos

Ñu waĩyegu buhenugañumi

Mt 3.1-12; Lc 3.1-9, 15-17; Jn 1.19-28

¹ Goãmu magu Jesucristo ïgu iirare, ðari buherire wereri ðpa árinugayoro.

² Goãmu yare weremhtadigu Isaia ïgu iribojegue gojadiro dopa ta i wereri áhraa. Òpa arí gojañumi ïgu:

Goãmu ïgu magure ðpa arípu: “Mu core mure wereyubure obeogu iiaa.

³ Eropigu ïgu masa marirogue árigucumi. ïgure peerãre weregu busuro mera arí wereniguigucumi: ‘Mari Opu ïgu ariburi mare amuro dopa ïgu ariboro core ðarã áriyuque ïgure peemorã,’ arí wereniguigucumi,” arípu Goãmu, arí gojañumi Isaia, Ñu waĩyegu ïgu masa dehyoaboro coregue.

⁴ Eropigu Ñu waĩyegu masa marirogue masare buhemurípu. Òpa arípu: —Mua ñero iirire bujawereque. Dohpaguere ðaripure gohrotoque. Eropirã waĩyenirã árique. Mua eropa gohrotocũ ïagu mua ñero iirare Goãmu cádiigucumi, arí buhemurípu ïgu. ⁵ Eropirã áripehrero Judea yeba majarã, Jerusalén majarã mera ïgu pohrogue peerã ejañorã. Eropigu Ñu erãre waĩyepu Jordán waicuriyague. Erã ñero iirare weretarituhacũ ïha ïgu erãre waĩyemurípu.

⁶ Eropigu Ñu camello ya gasiro suhriroro suhricapu. Waibugu ya gasirore ta tuãdiuridacugu áripu. Poreroa, mome sã ïgu bari áriyoro.

⁷ Eropigu ðpa arí buhemurípu:

—Yu puhreure yu tauro turagu arigucumi. Òtariagu áhrimi ïgu. ïgu iro dopa ðagu áribeaa yupu. Eropigu ïgure pepigu, “Yu tamera bu árigu áhraa yuhu,” arí pepia yuhu. ⁸ Masare waĩyegu deco mera waĩyeya yupu. ïgupu yu tauro iigucumi. Mũare Goãmu yarã iigucumi ïgu. Espiritu Santore masa mera áriniguicũ iigucumi, arí buhepu Ñu.

Ñu Jesure waĩyẽnumi

Mt 3.13-17; Lc 3.21-22

⁹ Eropi irisubure Jesu Nazaregue, Galilea yeba áriiri maca áriidigu, dia Jordán waicuriyague ejaru. ïgu eropa ejaacũ Ñu waĩyepu ïgure. ¹⁰ ïgu waĩyetuhajacũ Jesu diague niguidigu, majanugaja umarogue íhamujupu. Umusi pãrimaa wayoro. Ero pãrimaacũ ta Espiritu Santo buja iro dopa bejagu ïgu weca dijibejajapu. ¹¹ Eropiro umarogue wereniguiri busayoro.

—Mũhu yu magu yu mahigu áhraa. Mu mera burigã mucubiria, aríro cariyoro umarogue.

Satana ñerire iidoreriñumi Jesure

Mt 4.1-11; Lc 4.1-13

¹² Irisubure Espiritu Santo Jesure masa marirogue wadorepu. ¹³ Erogue ejaqu cuarenta nuri gohra áripu. Erogue ïgu áricũ, Satanapu Jesu ïgu ñero iirire ïadiagu ñerire iidorerípu ïgure. Eropigu Jesu waimarã nugu majarã watope áripu. Eropirã anyuapu ïgure itamu ïgure bari oñorã.

*Jesu Galilea yebague buheñumi**Mt 4.12-17; Lc 4.14-15*

14 Eropi Ñure erã peresugue erã biha dohora pũhru, Jesupu Galileague ðari buherire Goãmu ïgu opu arĩrĩre weregu wapu. 15 Õpa arĩ werepu:

—Dohpaguere ðpa aħraa: Goãmu ïgu opu arĩboro merogã duhyaa. Mũa ñeri iĩre bujawereque. Eropirã ðarire gohrotoque. Õari buherire peeque mũa, arĩ buhemurĩpu Jesu.

*Jesu wapicurã wai wejẽrãre ïgu mera majarã arĩmorãre sihuñumi**Mt 4.18-22; Lc 5.1-11*

16 Eropigu Galilea waĩcuriya turogue ejagu, Simore ïgu pagu magu mera bocajapu. Erã wai wejẽdi masa arĩñorã. Erã wejẽdi yucure mehyurã iĩñorã erã iri ditaru wuari ditarugue.

17 Erãre arĩpu Jesu:

—Yu mera majarã arĩmorã arique mũa. Yu mera mũa aricũ mũa waire mũa ñeha gameneorã mũa iiro dopa ta, Goãmu yarã arĩmorãre sihu gameneomorãre iirã arĩcũ iigura mũare. Yu mera mũa aricũ eropa iimorãre apigura mũare. Eropirã yu mera arique, arĩpu Jesu.

18 ïgu eroparĩcũ peerã, erã wejẽdi yucure apicã ïgu mera waha wañorã.

19 Eropirã erã merogã tarigã Santiagore ïgu pagu magu Ñu sãre bocañañorã daja. Erãpu Zebedeo porã arĩñorã. Erã ya dohodirugue erã wejẽdi yucure amurã iĩñorã. 20 Erã perãre ïgu sihubeorpu. ïgu sihubecũ pee erãpu erã pagure ïgure itamurã mera dohodirugue apicã Jesu mera waha wañorã.

*Watĩ ñajasũdigu Jesure bocatĩriñumi**Lc 4.31-37*

21 Eropi erã Capernaum waĩcuri macague ejañorã. Eropigu Sabado arĩcũ judio masa erã buheri wihigue buhegu ñajapu. 22 Eropigu ðaro masipehogu buhegu, judio masare erã buherã iro dopa arĩbirĩpu ïgu. ïgu eropa buhecũ iri maca majarã pee uca wañorã. 23 Irisubure iri wihire yujugu watĩ ñajasũdigu arĩpu. Eropigu ðpa arĩ gaguiniguipu Jesure:

24 —Mũhu Jesu Nazare majagu garibobiricãque guare watẽare. ¿Duh-pĩbu ðpa iiri guare? ¿Mũhu guare dederecũ iibu iiri? Goãmu magu mũ ðagu arĩcũ gua masia, arĩ gaguiniguipu ïgu Jesure.

25 ïgu eroparĩcũ peegu Jesu turĩpu watĩre:

—Ejarimaricãque. ïgure cohã wiria waque, arĩpu Jesu.

26 Eropigu watĩ masure yeba mehmereja tũrucũ iipu. ïgu gaguiniguicũ ta wirĩpu ïgure. 27 Eropirã arĩpehrerã iri wihi doanirã ïgu eropa wacũ iħa ucataria waha ðpa arĩñorã:

—Yaho. ¿Ñehe buheri aħriri ii? ¿Mama buheri ta aħriri? ïgu opu iro dopa ta doremi watẽare. ïgu dorecũ watẽapu tarinũgabeama ïgure, arĩ werenĩguĩñorã iri wihi doarã erã basi.

28 Eropirã bajamenurĩgã pũhrũgã ta, arĩpehrerã Galilea yeba majarã irire ïgu eropa iirare masipehrea wañorã.

*Jesu Simo Pedro mũñecore ðago iĩñumi**Mt 8.14-15; Lc 4.38-39*

29 Eropi Jesu sã judio masa erã buheri wihigue arĩnirã wiria wañorã. Erã eropa wiriara pũhru Jesu, Santiago, Ñu mera, Simo ïgu pagu magu Andre sã ya wihigue ñajapu. 30 Irisubure Simo mũñeco nimacuri dorecũgo

camague igo oyacũ wereñorã Jesure. ³¹ Erã eropa werecũ peegu, ĩgu igo pohrogue eja, igo mojtore ñeha, igore tara wahgũ doborũ. ĩgu tara wahgũ dohocũ ta igore nimacuri taria wayoro. Taricũ pepigo igopũ wahgã erãre bari ejoyo.

Jesu bajarã dorecurãre òarã iĩnumi
Mt 8.16-17; Lc 4.40-41

³² Ñamicague abe ñajara puhrugue masa árĩpehrerã dorecurãre, gajirã watẽa ñajasũnirãre, pũriri dorecurãre Jesu pohrogue aĩ ejañorã. ³³ Eropirã árĩpehrerã iri maca majarã gamenereñorã Jesu árĩri wihi disiporore. ³⁴ Eropigu Jesu bajarã dorecurãre, baja dore oparãre òarã wacũ iipũ. Masa bajarãre watẽare wiupũ. Eropigu watẽa Jesu Goãmu magu ĩgu árĩrire erã masicũ ĩagu Jesupũ erãre irire weredorebiripũ.

Galilea yebague Jesu buheñumi
Lc 4.42-44

³⁵ Eropigu ñamiñariqã árĩcũ boyoboro core, ĩgu wahgãra puhru masa marirogue ĩgu Pagu Goãmure serẽgu wapũ. ³⁶ ĩgu eropa wacũ ĩarã Simo sã ĩgure amarã ejañorã. ³⁷ Eropirã ĩgure bocatĩri òpa arĩñorã:

—Masa árĩpehrerã mure ahmama, arĩñorã erã ĩgure.

³⁸ Erã eroparĩcũ peegu òpa arĩpũ Jesupũ.

—I macare buhegu ahrabu yũhũ. Eropirã gaji macari sãre ògã maja macari sãre buherã warã mari. Yũhũ iri macari sãre buhegura, arĩpũ Jesu.

³⁹ Eropigu árĩpehrero Galilea yebare buhecuripũ. Eropigu macari nucũ erã ya buheri wirigue ñajaja buhepũ. Pũriri dorecurã sãre pũriri cõãpũ. Watẽare masare ñajanirãre cohã wiupũ.

Jesu camĩ boagure òagu iĩnumi
Mt 8.1-4; Lc 5.12-16

⁴⁰ Eropi gajigu camĩ boagu Jesu pohrogue eja, mereja serẽpũ:

—Mũhũ yure òagu wacũ iidiagu, yure òagu wacũ iimasia, arĩpũ camĩ boagupũ Jesure.

⁴¹ ĩgu eroparĩcũ peegu Jesu ĩgure mojomoro ĩapũ. Eropigu Jesu ĩgu mojoto mera mohmepipũ. Mohmepigu ta òpa arĩpũ:

—Irire iidiaca. Òagu árĩque mũhũ, arĩpũ Jesu.

⁴² ĩgu eroparĩcũ ta ĩgu camĩ boara yaria wayoro. Òagu wapũ ĩgu. ⁴³ ĩgu eropa wacũ ĩagu Jesu ĩgure turaro mera werepũ:

⁴⁴ —Yũhũ mure òpa iirare gajirãre ne werebircãque. Eropa werebiriqeregu ta mũ dupure òaro warare pahire ĩhmugũ waque, “Òagu aħrimi,” arĩdoregu. Goãmũ doreri Moiserẽ ĩgu apidiro dopa ta iique. Eropigu mirimagugãre oque pahire mũ òagu warare masare mũ ĩhmuburire, arĩpũ Jesu ĩgure. Òpa arĩtuhaja waque, arĩpũ ĩgure.

⁴⁵ ĩgu eropa masare weredorebiriqerẽcũ ta ĩgupũ waha árĩpehreri macari majarãre Jesu ĩgure òagu wacũ iirare werepũ. ĩgu eropa werera puhru Jesu masa bajarã erã árĩroguere wamasibiripũ. Eropigu ĩgu masa bajamerãgã árĩrogue arĩpũ. Erogue ĩgu árĩcũ baja macari majarã ĩgu pohrogue ejañorã.

2

Jesu dupu buhadigure òagu wacũ iĩnumi
Mt 9.1-8; Lc 5.17-26

1 Bajamenuri puhru Jesu Capernaumgue dujaa wapũ. Wihigue ĩgu áricũ masa masiñorã. 2 Eropirã masa ero bajarã gamenere iri wihire ujuturia waha disporogue wirinũgajañorã. Eropigu Jesu erãre òari buherire wereru. 3 Eropirã gajirã sã Jesu pohro ejariñorã. Erã wapicurã uma dupu buhadigure aĩ ejañorã. 4 Eropa ejarã masa bajarã áricũ ĩarã Jesu pohrogue aĩ ñajamasibiriñorã. Eropirã erã dupu buhadigure aĩ muju wihi weca aĩ weasiri ñajaa Jesu ĩgu niguiro weca pihri dijuñorã. “Jesu ihĩ ĩgu dorecurire taricũ iigucumi,” arĩ pepiñorã erã. 5 Erã eroparĩ pepicũ masigu Jesupu dorecugure òpa arĩ wereru:

—Mahgu, mu ñero iirare cóatuhabu, arĩpu Jesu dupu buhadigure.

6 ĩgu eroparicũ peerã erogue doarã judio masare buherãpu erã basi òpa arĩ pepiñorã: 7 “Ihĩ eropa arĩ wereniguibiricãporo. Goãmure ñero wereniguigu iimi ihĩ. ĩgu masu mari iro dopa árigu áhrimi ĩgu sã. Eropigu ĩgu mari ñero iirare cóãmasibeami. Goãmu dihta masa erã ñero iirire cóãmasimi,” arĩ pepiñorã erã. 8 Erã eropa arĩ pepicũ ĩagu, Jesu erã pepirire masigu òpa arĩpu erãre:

—¿Duhpirã mua eropa arĩ pepiri? 9 “Mu ñero iirare cóatuhabu,” yu aricũ pee “Guyaricũgu áhrimi,” arãa mua yure masibiriquererã ta. Ihĩ dupu buhadigure “Wahgãñugajaque,” yu aricũ ĩgu wahgãñugajacũ ĩarã yu arĩra diaye áricũ masirãca mua. 10 Yuhũ masu Goãmu ĩgu obeodigu árigu i yebaguere masa erã ñero iirire cóãmasia yuhũ. Mua irire masiboro dopa ĩgure wahgãñugajacũ iigura, arĩpu Jesu judio masare buherãre.

Eropa arĩtuhaja dupu buhadigure òpa arĩpu:

11 —Mure arĩgu iiaa: Wahgãñugajaque. Curique. Mu pũgure aĩ waque mu ya wihigue, arĩpu ĩgure Jesu.

12 ĩgu eroparicũ peegu dupu buhadigupu wahgãñugaja, ĩgu pũgure aĩ arĩpehrerã masa erã ihuro wiria waha wapũ. ĩgu eropiicũ ĩarã erã arĩpehrerã ĩhamaria wañorã.

—Goãmu òagu turagu áhrimi. Ne òpa iirire ĩabirimurabu mari, arĩñorã erã basi.

Jesu Levire ĩgu mera majagu áribure sihuñumi
Mt 9.9-13; Lc 5.27-32

13 Eropi dipaturi Jesu ditaru turogue wapũ. Eropigu masa bajarã ĩgu pohrogue eja gamenerecũ ĩagu ĩgu erãre buhepu. 14 Eropa iituha, erogue áridigu wagu, Levire Alfeo magure ĩgu mohmeri taribugue bocajapu. Gajirã mera oparã ya áriburire wajasea corerã mera arĩpu Leví. ĩgure bocajagu òpa arĩpu:

—Yu mera majagu áribu arique muhu, arĩpu Jesu Levire.

ĩgu eroparicũ peegu Levĩpu wahgãñugaja Jesu mera waha wapũ.

15 Puhru ĩgu ĩgu buherã mera Leví ya wihire mesague ba doacũ bajarã wajasea corerã “Ñero iirã áhrima,” masa erã arĩrã erã mera ba doañorã. 16 Erogue erã doara puhru, gajirã judio masare buherã, fariseo masa sã Jesu ñero iirã mera ĩgu bacũ ĩañorã. Eropa ĩarã òpa arĩñorã:

—¿Duhpigu ñero iirã wajasea corerã mera bahari Jesu? arĩ serẽpiñorã judio masare buherã Jesu buherãre.

17 Erā eroparīcū peegu ōpa arī yuhripū Jesupū:

—Dorecurā dihta duhturure ahmama. Dorecurā duhturure amaro dopa ta “Ñegu āhraa yuhū,” arīrā yure amarācoma. Eropigū “Ñegu āhraa,” arīrā dihtare erā ñero iirare bujaweredore ōaripure gohrotocū iigu aribu yuhū. Erā basi “Ōarā āhraa gua,” arī pepirāpūre itamugu aribiribu, arīpū Jesu erāre.

Ba duhurire serēpiñuma gajirā Jesure

Mt 9.14-17; Lc 5.33-39

18 Irisubure Ñu buherā, fariseo masa sā Goāmure umupeomorā ba duhumūñorā. Eropirā masa Jesu pohro eraa iigure serēpiñorā.

—Erā Ñu buherā, fariseo masa buherā sā Goāmū ya árīburire iirā, ba duhumurama. ¿Duhpirā mū buherāpū ba duhubeari? arīñorā erā Jesure.

19 Erā eroparīcū pee Jesu erāre ōpa arī yuhripū:

—Ōpa āhraa iri: Mojoto diridigu iḡu bosenure iicū iḡu mera majarā bujawererā ba duhurā iibeama. Iḡu mera árīrā mucubiri barā iima. Eropa ta yū buherā sā yū mera árīrā ba duhumasibeama. 20 Yujunū Goāmū yare aicāḡucumi. Eropa iḡu aigāra puhru yū buherā mera árísome yuhū. Eropirā irisubugue tamerare yū buherā ba duhurācoma, arīpū Jesu.

21 Erā iribojegue maja buheri mera mama buheri mera erā buhe morediacū iḡu ōpa arī werenemopū Jesu werenigui queori mera:

—Ne mama gasiro suhri gasiro mera murañe suhrirore seretu masiya mara. Eropiicū mama gasiro mari coera puhru murañere suhrirore taragameneo, wuatarario yehgucū iiaa. Eropa ta mama buherire mura buheri mera wapi moa buhebircāro gahmea. 22 Eropirā ne igui decore imisiri decore wāibugū gasiro ajurore mura ajurore písābircāro gahmea. Eropiro igui deco pahmutarirogue mura ajurore yehgue dija wahaa. Iri ajuro yehgucū igui deco sā cohmo, ajuro sā cohmoa wahaa. Eropirā igui decore mama ajuro mera písāro gahmea. Eropiicū igui deco sā cohmo beaa. Ajuro sā cohmo beaa. Eropa ta mama buheri, mura buheri mera more buhebircāro gahmea, arī buhepū Jesu erāre.

Sabado árīcū Jesu buherā trigo pororire turñuma

Mt 12.1-8; Lc 6.1-5

23 Gajinu Sabado árīcū Jesu sā trigo pohegue iha taria wañorā. Erogue tariatā iḡu buherāpū trigo pororire turī tari wahgāñorā. 24 Erā eropīcū iārā ōpa arīñorā fariseo masa Jesure:

—Peenique ḡuare. ¿Duhpirā mū buherā Sabadonū mari soorinū árīquerecū Goāmū iḡu mohmedorebiririnare mohmeri erā? Mari dorerire tarinugarā iima, arīñorā erā Jesure.

25-26 Erā eroparīcū peegu yū buherā tarinugarā iibeama arīḡu ōpa arīpū erāre:

—Iribojegue Davi iḡu mera majarā mera oaboagu Goāmū wihigue ñaja iri wihi árīri panre Goāmū ya panre bañumi. Eropigū iḡu mera majarā sāre badoreḡu iri panre oñumi. Iri panre pahia dihtare badorerā árīyoro. Goāmū doreri gajirāre iri panre badorebiriyoro. Irisubure Abiata waicḡu pahia opu árīñumi. ¿Davi sā irire erā iirare Goāmū yare erā gojarare buhebirari mūa? Davi iri panre baḡu Goāmūre tarinugarā iibiriñumi. Dohpagāre yū buherā sā i trigo yerire turī barā Goāmūre tarinugarā iibeama, arīpū Jesu.

27 Eropa arītuhaja ōpa arīnemopū:

—Goãmu masare iituhajagu soorinure doreñumi “Masa sooporo,” arĩgu. Eropa iigu masa inure iiburire weregu aħrimi. Masapu inure erã iiburire wererã arĩbeama. ²⁸ Eropigu yuhu masu Goãmu iigu obeodigu inonu soorinu sãre masa erã iiburire doremasia, arĩpu Jesu erãre.

3

Mojoto buhadigu ðaro wañumi

Mt 12.9-14; Lc 6.6-11

¹ Gaji Sabado arĩcũ Jesu judio masa erã buheri wihigue eja ñajapu daja. Eropigu mojoto buhadigu sã ero arĩpu. Eropirã iri wihi arĩrã Jesure iħanuruñorã iğure weresãmorã. ² Sabado arĩcũ Jesu mojoto buhadigure iğu ðagu iicũ ĩarã, “Mari soorinure Jesu mohmegu ĩimi,” arĩ weresãdiañorã Jesure. ³ Eropigu ðpa arĩpu Jesu mojoto buhadigure:

—Wahgãnugajaque. Arique ðgue, arĩpu.

Ðpa arĩtuha iri wihi arĩrãre werepu:

⁴ —¿Sabado arĩcũ ðarire iicũ ðabeari? ¿Ñerire iicũpure ðhari mua pepicũ? Sabado arĩcũ masure masucũ ðapũrica. Masure wejẽcũpure ðabeaa, arĩ werepu Jesu erãre.

Iğu eropa arĩquerecũ ta yuhribiriñorã. ⁵ Erã eropa yuhribiricũ iagu Jesu erãre ĩhamehtu erã mera guapu. Erã iğure peediabiricũ iagu Jesu erã mera bujawerepu. Eropigu mojoto buhadigure arĩpu:

—Mu mojotore sĩsirãbeoque, arĩpu iğure.

Iğu eroparicũ peegu iğu mojotore sĩsirãbeopu iğu. Iğu eropiicũ ta ðari mojoto wayoro. ⁶ Iğu ya mojoto ðari mojoto wacũ ĩarã fariseo masa wiria wañorã. Wiria Herode curu majarã mera gamenere, “¿Dohpa ii ĩhĩ Jesure wejẽracuri?” arĩ weretamuñorã erã erã basi.

Masa bajarã ditaru turogue arĩñuma

⁷⁻⁸ Eropi Jesu iğu buherã mera ditaru turogue wapu. Erã erogue wacũ ĩarã Galĩlea majarã masa bajarã erã puhru nurusiañorã. Eropirã Judea yeba majarã, Jerusalén majarã, Idumea yeba majarã, Jordán waĩcuriya gajipu masegue majarã, Tiro majarã, Sidón majarã iğure ĩarã wañorã iğu ĩiare peenjarã. ⁹ Eropirã bajarã arĩñorã Jesu pohrore. Tuucãhmota ñagajacãñorã. Eropigu Jesu iğu buherãre gasirure amuyudorepu iğu doaborore. ¹⁰ Bajarã dorecurãre iğu ðarã wacũ iicũ ĩarã gajirã dorecurã sã iğure pẽhrediañorã. ¹¹ Eropirã watẽa ñajasũnirã Jesure ĩarã iğu pohro mereja arĩñorã:

—Muhu Goãmu magu aħraa, arĩ gaguiniguiñorã erã iğure.

¹² Eropigu erãre Goãmu magu iğu arĩrĩre turaro mera gajirãre were-dorebiripu Jesu.

Jesu iğu buherãre doce gohra beyeñumi

Mt 10.1-4; Lc 6.12-16

¹³ Eropigu Jesu utãgugue maria iğu gamerãre sihupu. Iğu eropa sihubeocũ peerã iğu pohroque ejañorã. ¹⁴ Eropigu doce umare iğu mera majarãre, iğu obeomorãre beyepu. Gaji macarigue iğu yare buherã wamorãre beyedobopu Jesu. ¹⁵ Eropigu watẽare erã cõaburire apipu erãre. ¹⁶⁻¹⁹ Oã arĩñorã doce gohra uma iğu beyenirã. Simo, Santiago Zebedeo magu, iğu pagu magu Ñu, Andre, Felipe, Bartolomé, Mateo, Toma, Santiago Alfeo magu, Tadeo, Simo celote ya curu majagu, Juda Iscariote, oã ñucure Jesu beyedobopu. Jesu Simore Pedro waĩyepu.

Santiagore, Ñu mera Boanerges waĩyepu. Boanerges mari ya mera “bupu masa” waĩcuma. Juda Iscariote Jesure ihaturiräre ihmubu árĩpu. Eräre beyedobotuha Jesu dijaha wihigue ñaja wapu.

—Jesu watĩ turari opami, arĩ weresãñuma masa

Mt 12.22-32; Lc 11.14-23; 12.10

²⁰ Eropi ero dipaturi masa bajarã gamenereñorã daja erã pohro. Eropirã ĩgu ĩgu buherã sã ne bamasibiriñorã. ²¹ Eropirã Jesu acawererã ĩgu iirare peebeñorã. “Jesu goroweregu wagu iimi,” masa arĩcũ peeñorã. Eropirã ĩgu pohrogue eja ĩgure aĩgãridiariñorã.

²² Gajirãpu òpa arĩñorã:

—Beelzebú ĩgure eropa iicũ iicumi. ĩgu watẽare cóãgu Beelzebú watẽa opu turari mera eräre cohãmi, arĩñorã Jerusalengue arinirã judio masare buherãpu.

²³ Erã eroparĩcũ peegu Jesupu eräre sihubeo werenigui queoriñe mera werepu eräre.

—Watĩ ya turari mera watẽare cóãgu iibea. Watẽa erã basi cóãmasibeama. ²⁴ Eropirã yuju yeba majarã erã basi gamequeãrã iri yeba majarã pehrea wacoma. ²⁵ Eropirã yuju wihi majarã erã basi erã gamequeãrã iri wihi majarã pehrea wacoma. ²⁶ Eropigu ĩgu Satana watẽa opu watẽare yure cóãdoregu, ĩgu basi ta gamequeãgu iibocumi. Eropigu ĩgu pehrea wabocumi.

²⁷ Òpa ta ãhraa watĩ turagure tarinugari werediacyũ: Wihi opu turagure diribigu, yajari masu ĩgu ya wihire ñajaja yajamasibeami. ĩgure ĩgu dirira puhru tamerare ñajaja yajamasimi ĩgure, arĩ werepu Jesu. Eropã arĩ werepu watĩre ĩgu tarinugarare weregu. Watĩ turagu árĩquerecũ ta Jesu ĩgure tarinugami watẽare cohã wiugu.

²⁸ Eropigu arĩnemopu Jesu:

—Diaye arĩgu iiaa mũare. Árĩpehreri masa erã ñeri iicũ sãre, erã werenigucũ sãre Goãmu cãdijimasimi. ²⁹ Eropã cãdijiqueregu ta Espĩritu Santore erã ñero werenigucũ iri tamerare ne cãdijisome. Erã eropa arĩra waja eropa dipuwajacunigucãrã árĩrãcoma, arĩpu Jesu eräre.

³⁰ Jesu Espĩritu Santo turari mera mohmequerecũ erãpu “Watĩ turari mera mohmemi,” arĩñorã. Erã eropa arĩra waja Jesu eropa arĩ werepu eräre.

Jesu acawererã ĩgure sihurã erañuma

Mt 12.46-50; Lc 8.19-21

³¹ Eropirã Jesu pagu porã ĩgu pago mera erañorã. Eropã erarã disiporogue niguirã gajirãre sihudoreñorã ĩgure. ³² Eropirã masa ĩgu pohrogue doarã wereñorã ĩgure.

—Mũ pago mũ pagu porã mera disiporogue sihuma mũre erã, arĩñorã.

³³ Erã eroparĩcũ peegu òpa arĩpu Jesu eräre buhebu:

—¿Noa ãhriri yu pago yu pagu porã sã mua ĩacũ? arĩpu.

³⁴ Eropã arĩgu ĩgu pohro doarãre ĩagu òpa arĩpu:

—Oã ãhrima yu pago, yu pagu porã dopa árĩrã. ³⁵ Goãmu gamerire iima oã. Eropã ta iirã yu pagu magu, yu pagu mago, yu pago iro dopa ãhrima, arĩ buhepu Jesu eräre.

4

*Jesu oteri masu queoriñere buheñumi**Mt 13.1-9; Lc 8.4-8*

¹ Eropi dipaturi ta daja Jesu ditaru turogue buhenugapu. Eropa erogueru buhenugagu masa bajarā ĩgu pohrogue gamenerecū ĩagu Jesu dohodirugue ñaja buhe payapu. Eropirā masapu yebague ditaru turogue niguiñorā ĩgare peemorā. ² Eropigu Jesu baja werenigui queorire erāre buhepu.

³ —I queoriñere peeque mua, arĩpu erāre.

—Oteri masu otegu wañumi. ⁴ ĩgu eropa otecū gajiyeri ma turo yurimerejayoro. Ero mehmerejarayerire mirimagu porā ahri bacāñuma. ⁵ Eropi gajiyeri utāyeri watope yurimerejayoro. Ero utāyeri watope nicu mariñariro arĩquerecū ta, mata puhriyoro. ⁶ Eropa puhriira arĩqueroero, abe ĩgu burigā asicū, nuguri marinijaro ñaiñaja siria wayoro. ⁷ Gajiyeri poracurogue yurimerejayoro. Porapu puhri tiataria waha oterayeripure wejēcāyoro. Eropiro iri dūca mariyoro. ⁸ Gajiyeri ōari yebapu yurimerejayoro. Ōaro puhri dūcacuyoro, gajisari treinta yeri, gajisari sesenta yeri, gajisari cien yeri dūcacuyoro, arĩ buhepu Jesu.

⁹ —Irire ōaro peeque mua, arĩnemopu Jesu.

*Jesu ĩgu werenigui queorare ĩgu buherāre wereñumi**Mt 13.10-17; Lc 8.9-10*

¹⁰ Eropirā puhru erā seyaro arĩrā, doce buherā gajirā Jesu mera arĩrā iri queorañere masidiarā Jesure serēpiñorā. ¹¹ Erā eropa serēpira puhru Jesu ōpa arĩ werepu:

—Goāmū masa tauro opu ĩgu arĩrire, iribojegu majarā erā masibirirare muare yu buherāre masicū iimi Goāmū. Gajirāpure eropiibeami ĩgu. Eropigu erāre werenigui queori mera buhea. ¹² Eropirā erā ĩaquererā, pee masibeama. Eropirā peequererā ta masisome. Erā masirā ōaripure gohrotoboñuma. Erā eropa gohrotocū ĩagu erā ñero iirare cóāboñumi Goāmū. Eropa arĩquerecū ta erāpu ne peediabeama, arĩpu Jesu.

*Jesu oteri masu queoriñere were amuñumi**Mt 13.18-23; Lc 8.11-15*

¹³ ĩgu eroparira puhru, ōpa arĩnemopu erāre:

—¿Iñe queoriñere peenibeari mua? ¿Mua iñe queoriñere peebirā doha gajĩ queorire peerācuri mua? arĩpu Jesu erāre.

Eropa arĩtuhaja ōpa arĩ werepu erāre.

¹⁴ —Oteri masu ĩgu oteriyeri ōari buheri iro dopa āhrra. ¹⁵ Eropiro ma turo mehmerejarayeri, ōari buheri iro dopa ta āhrra. Eropigu masa erā ōari buherire erā peecū ĩagu Satanapu iri ōari buherire masidorebeami erāre. Mirimagu porā iriyerire erā dote aĩdiro dopa ta iimi. ¹⁶ Eropi utā watope mehmerejarayeri ōari buheri iro dopa ta āhrra. Eropirā masa ōari buherire pee, mucubiriri mera mata irire pee aĩma. ¹⁷ Eropa pee aĩquererā ta, utā watope arĩrisari, nuguri maririsari iro dopa ta oā masa turabeama. Eropa turabirā yaha ōari buherire erā peera waja gajirā erāre ñero iicū ĩarā yahapure duhucāma. Gajirā erāre ñero iicū irire bocatiubirā yahare duhucāma. ¹⁸ Eropi pora watope yurimerejarayeri ōari buheri iro dopa ta āhrra. ¹⁹ Eropirā masa ōari buherire peequererā, i yeba majare wuaro guñaricurā niyerure mahima. Gajino säre baja gamenemoma. Erā eropiicū iripu ōari buheripure

cāhmotaa. Iri eropa cāhmotacũ masa Goãmu gamerire iibeama. ²⁰ Eropi òari yeba mehmerejarayeri òari buheri iro dopa ta āhraa. Eropirā masa òari buherire peerā irire masima. Eropa masirā árĩrā Goãmu ĩgu gamero dopa ta iima erā. Yujurāyeri merogā òarire iima treinta yeri ducacuro dopa ta. Gajirā wecañari òarire iima sesenta yeri iri ducacuro dopa ta. Gajirā wuaro òarire iima cien yeri ducacuro dopa ta, arĩ werepũ Jesu erāre.

Jesu sihāgodiru queoriñere buheñumi

Lc 8.16-18

²¹ Eropa arĩtuha òpa arĩnemopũ:

—Ne, sihāgodirure masa sihāgorā mātatorobu docague buhapibeama. Irirure sehro doca apibeama. Irirure sihāgorā umarogue duhpõema òaro boyoweadorerā. ²² Árĩpehrerā masa erā masibirirare puhru masirācoma. Sihāgodiru boyocũ mari ĩhamasiro dopa ta, iribojegue erā masibirirare masirācoma masa. ²³ Irire òaro peeque mũa, arĩpũ.

²⁴ Eropigu erāre arĩnemopũ daja:

—Merogā masidiarā merogā masirāca. Wuaro masidiarā wuaro masirāca. Eropirā peerā òaro peenũrũque. ²⁵ Òaro peenũrũgu òaro masigucumi. Peenũrubigu “Merogā peea,” ĩgu arĩquerecũ ta, iripũ dederea waroca ĩgure, arĩpũ Jesu erāre.

Jesu coye puhri queoriñere buheñumi

²⁶ Jesu erāre werenigui queori mera buhepũ daja:

—Goãmu ĩgu opu árĩri werediacy ojorducare otera iro dopa āhraa. Yujugu coyere ojorducayeri otemi. ²⁷ Otetuhaja muraro ta carĩ wahgā ĩagu wamũririmi. Irisubu ĩgu oterayeri puhri wiriaca. “¿Dohpa puhri?” arĩ ĩha masibeami irire otedigu ĩgu basi. ²⁸ Iri otera iri yeba mera iri gamero ducacua. Epapũgā deyomuhta, puhru dipa poro puhri wiria wahaa. ²⁹ Dũca bugatuhajacũ ĩagu iri pororire pehami. “Pearisubuno ta āhraa,” arĩmi. ĩgu otera iri bugarare ĩgu masibiridiro dopa ta masa Goãmu yarā erā dohpa wacũ sãre masibeama masa, arĩ buhepũ Jesu.

Mostazayegā queoriñere wereñumi Jesu

Mt 13.31-32; Lc 13.18-19

³⁰ Eropa arĩtuha buhenemopũ:

—¿Goãmu ĩgu opu árĩri werediacy ñeheno iro dopa āhriri mũa pepicũ? Iri werenigui queoriñe mera irire weregura. ³¹ Mostazayegā iro dopa āhraa Goãmu ĩgu opu árĩri. Iriyegā ĩgu otecũ miriyegā gohra āhraa. ³² Eropa arĩquerero iriyegā òaro puhri wiria. Eropiro yucũgu wuadigu wahaa. Eropirā irigu dupuri paga dupuri bugacũ ĩarā mirimagũ porā iri dupurigue suhri suama. Mostazayegā wuatariadigu bugaro dopa ta umaro majagũ mari Opũre masinũgarā bajamerāgā erā arĩquerecũ ta, puhruque erā bajarā warācoma, arĩpũ Jesu.

Queori mera ĩgu buherire wereñumi Jesu

Mt 13.34-35

³³ Eropigu iri werenigui queori iro dopa baja queorire erā masiropẽ òari buherire buhepũ erāre. ³⁴ Queoriñe mariro werebiripũ erāre. Puhru erā seyaro árĩrãre òaro were amupehocãpũ Jesu ĩgu buherãre.

Jesu miruñere yusudoreñumi

Mt 8.23-27; Lc 8.22-25

³⁵ Eropi irinu ñamica Jesu ĩgu buheräre õpa arĩpu:

—Ina sipu masegue, arĩpu eräre.

³⁶ ĩgu eroparĩcũ peerã, yebague niguiräre goeriseretuhajarã dohodirugue ñajaa, Jesure aĩ taribuja wañorã. Eropirã gajirã gajĩ gasi mera erã puhru taribujañorã. ³⁷ Erã taribujacũ iriyague miruñe burigã weãyoro. Eropiro miruñe ariro pãgũri dohodirure miucãriyoro. Deco turaro ñajayoro. Merogã duhyayoro erã miriboro. ³⁸ Eropa warisubu Jesu dohodiru auturogue suhri pore wecague carĩgu iipũ. Eropirã erã ĩgure wahgũñorã.

—Buhegu, ĩmuhu ĩabeari? Mirirari iiaa mari, arĩñorã erã Jesure.

³⁹ Erã eroparĩcũ peegu Jesu wahgã miruñere, pãgũri sãre,

—Yusuque, arĩpu.

Ĩgu eroparĩcũ ta miruñe pãgũri sã yusudija pehrea wayoro. Ōaro dujayoro. ⁴⁰ Eropigu Jesu arĩpu ĩgu buheräre:

—¿Duhpirã guimaacãri mua? ¿Mua yure umupeobeari? arĩpu Jesu eräre.

⁴¹ Eropa wacũ ĩarã erã ĩhamaria wañorã.

—¿Ñehmũno masũ ãhriri ihĩ miruñe, pãgũri sã yuhrisũgu? arĩñorã erã basi.

5

Watẽa ñajasũdigure õagũ wacũ iĩñumi Jesu

Mt 8.28-34; Lc 8.26-39

¹⁻² Eropi erã sipu masegue Gerasa majarã ya yebague taribujajañorã.

Eropigu Jesupu dohodirugue sañadigu majanugajapu. ĩgu majanugajara puhru, watẽa ñajasũdigu masa goberi utã goberi watopegue árdigu wiriri ĩgu pohrogue aripu. ³ ĩgu watẽa mera goroweregu masa goberi watope árdigu árimaripu. Gajirãpu ĩgure ñeha comeda wuarida mera dirimasibirimariñorã. ⁴ ĩgu burigã gorowerecũ ĩha bajasuburi masa ĩgure guburi diriri berori mera comedari mera dirimuririñorã. Eropigu ĩgupu comedarire nuha tuãtasiricãmaripu. Eropirã ĩgu turagu áriro mera masapu ĩgure ñeha dirirã bocatĩubiriñorã. ⁵ Eropigu ñami árdicũ, mũũ sãre masa goberi watopegue, utã yucugue sãre, eropa gaguiniguĩ curicãmaripu ĩgu. Eropigu utã mera ĩgu basi dotemuripu. ⁶ Eropigu yorogue Jesure ĩhabeo ĩgu pohrogue omagãripu. Eraa merejapu Jesu core umupeobu.

⁷⁻⁸ —Watẽa, duhuque ĩgure, arĩpu Jesu.

Ĩgu õpa arĩcũ peegu, watẽa ñajasũdigu õpa arĩ gaguiniguipu:

—¿Jesu Goãmu turagu maga, ñehenore iibu iiri muhu yure? Goãmu ĩgu ĩaro serẽa yuhu mũre. Yure ñero iibiricãque, arĩ gaguiniguipu watẽa ñajasũdigu Jesure.

⁹ —¿Dohpa waĩcuri muhu? arĩpu Jesu ĩgure.

—Gua bajarã ãhraa. Eropirã “Bajarã watẽa” waĩcua, arĩpu Jesure.

¹⁰ Eropigu Jesure turaro serẽpu:

—I yeba árirãre gua watẽare gajipugue wadorebircãque, arĩñorã watẽa masu mera árnirã.

¹¹ Irisubure bajarã yesea áriñorã erã pohrore. Utãgu gubuye ahma barã iĩñorã. ¹² Ero erã baniguicũ ĩarã õpa arĩ serẽñorã watẽa:

—Soã yesea pohrogue wadoreque guare. Erã mera árdoreque guare, arĩ serẽñorã watẽa masure ñajanirã.

¹³ Erā eroparicū peegu yesea pohrogue wadorepu Jesu erāre. Īgu eropa dorecū watēa masure duhu yesea dos mil gohra árīrāpūre ñajañorā. Erā pohrogue erā ejara puhru yeseapu gorowere árīpehrerā dipaturugue oma buha, ditarugue yuriñajaa sīripehrea wañorā.

¹⁴ Yesea erā eropa wacū iarā, erāre ihadibunirāpu güi omagā wañorā. Macague eja, iri maca majarāre campo majarā sāre erā iarare were-siripehocañorā. Erā eropa werēcū peerā masapu bajarā Jesu ĩgu iirare iarā ariñorā. ¹⁵ Eropirā Jesu pohrogue erarā, watēa ñajasūdigure, suhri saña, pee masigu ĩgu ero ñaro doacū iarā iha ũca wañorā erā. ¹⁶ Eropirā watēa ñajasūdigure, yesea sāre erā eropa warare ñanirā gajirāre werepehocañorā. ¹⁷ Erā eropa werepehocū peerā ero majarā jesure turaro mera wadoreñorā.

¹⁸ Eropigu Jesu ĩgu dohodirugue ĩgu ñajacū ĩagu “Mū mera wadiaca,” arī burigā serēripu watēa ñajasūdigupu Jesure. ¹⁹ ĩgu eropa arīquerecū Jesu ĩgure werepu:

—Yū mera aribita. Mū ya wihigue waha, mū pohro árīrāre yūhu mū opu mure ñaro iirare weregu waque. Mure yū mojomoro iarare wereque erāre, arīpu Jesu ĩgure.

²⁰ ĩgu eroparicū pee watēa ñajasūdigupu Decapoli waicuri macague Jesu ĩgure ñaro iirare werenugapu. ĩgu eropa arī werēcū peerā, masa árīpehrerā pee ũca wañorā.

Jairo magore ñago ii, ne behrego sāre ñago iñumi Jesu

Mt 9.18-26; Lc 8.40-56

²¹ Eropi dipaturi ta Jesu gajipu masegue ĩgu taribujacū masa bajarā ĩgu pohrogue wuuriya turogue gamenereñorā. ²² Eropigu judio masa erā buheri wihire ihadibugu Jairo waicugu erapu. Jesure iha, ĩgu guburi pohro mereja opa arī serēpu:

²³ —Yū mago sīrigo iiamo. Eropigu igore mū mojoto mera duhpeogu, igore dore taugu arique. Mūhu eropiicū igo masagocumo, arīpu ĩgu Jesure.

²⁴ ĩgu eroparicū pee Jesu ĩgu mera wapu. ĩgu wacū masa bajarā nurasiagañorā ĩgure. ²⁵ Eropigo nomeo doce bojori gohra eropa ũmuri nucu behreniguigo ero árīpo. Ero core bajarā duhurtua igore ñero taricū iñorā igore ocoyerā. ²⁶ Eropigo duhurtuare igo niyeru árīpehrerire wajayepituhapo igo ocoyedorego. Erā eropa ocoyequerecū igo muraro ta árīniguicāpo. Eropigo igo ero core igo árīdiro tauru ñero wapo. ²⁷ Igo eropa ñero taririsubu Jesu ĩgu masare ñarā iirire peerā gajirā wereñorā igore. Eropigo igo Jesu puhru ta masa bajarā watope aripo. Ahri Jesu suhrirore mohmepiñapo. ²⁸ “Yūhu ĩgu suhriro dihtare mohmepiñago ñago dujagoca,” arī pepigo igo. ²⁹ Eropi igo mohmepicū mata igo di wirira purumjudija wayoro. Igo dupure ñari dupu wacū pepigo. ³⁰ Eropigu Jesu ĩgu turari mera dorere ĩgu taurare masigu, masa watope maji ĩapu.

—¿Noa yaha suhrirore mohmepiari? arīpu.

³¹ ĩgu eroparicū peerā ĩgu buherāpu opa arīñorā.

—Cūhña āhraa. Eropirā masa bajarā mure pēhregāma. “¿Noa yare mohmepiñari?” arīgu, ¿dohpa arīgu iiri mūhu? arī serēpiñorā ĩgure.

³² Eropigu Jesu ĩgure mohmepidigore amapu. ³³ ĩgu amaro watope igopu igo dupu ñaro wacū pepigo güi, naragā merejapo ĩgu pohro. ³⁴ Eropigo igo diaye ta werepehpo ĩgure. Igo eropa arī werera puhru Jesu werepu igore:

—Mahgo, mahu yare umupeori mera ðago dujaa dohpaguere. Mucubiriri mera waque. Dore mariro árrique, arĩpu Jesu igore.

³⁵ Erã òpa arĩ wereniguiro watope ta Jairo ya wihi majarã erañorã, —Mu mago sĩa wahámo. Eropigu buhegure sihubita pare, arĩñorã.

³⁶ Erã eropa arĩquerecũ ta Jesu Jairore òpa arĩ werepu: —Bajawere pepibita. Yare guñaque. Umupeoque iri dihtare, arĩpu ìgure.

³⁷ Eropa arĩtuha, Santiago, ìgu pagu magu Ñu, Pedro, erã dihtare “Yu mera arique,” arĩpu Jesu. ³⁸ Eropigu Jairo ya wihigue ejaꝑu. Iri wihiguere masa bajarã burigã ñehamere orerã iñorã. Erã eropa orecũ ìha erãre arĩpu Jesu:

³⁹ —¿Ñero arĩ ñehamere orebircãque mua. Igo majigo sĩribeamo. Carĩgo iimo, arĩpu Jesu erãre.

⁴⁰ Ìgu eroparicũ peerã erã “Eroparicãgu iimi ihĩ,” arĩrã ìgure ìayeñorã. Ìgupu erãre disiporogue wiupehocãpu. Majigo pagu sumarã mera, Jesu ìgu mera majarã igo pohrogue sihuñajajapu. ⁴¹ Eropigu Jesu igo mojotore ñeha arĩpu igore:

—Talita cumi, arĩpu ìgu. Talita cumi mari ya mera “Majigo wahgãque,” arĩdiaro iiaa.

⁴² Ìgu eroparicũ ta igo majigo sĩridigo mero wahgãnugaja curipo. Doce bojori opago árĩpo igo. Igore ìgu eropa iicũ ìarã ucataria wañorã.

⁴³ Eropigu Jesu irire ìgu iirare weresiridorebiripu. Eropiituha igore bari ejodorepu.

6

Jesu ya maca majarã Nazare majarã Jesure umupeobiriñuma Mt 13.53-58; Lc 4.16-30

¹ Eropigu ero arĩdigu waha wa, ìgu buherã mera ìgu ya yebague ejaꝑu.

² Eropigu Jesu Sabado árĩcũ judio masa erã buheri wihigue buhenugapu. Ìgu eropa buhecũ masa bajarã ìgure ìha masirã ìgure pee uca wañorã. Òpa arĩñorã:

—¿Dohpa ii masiyuri ihĩ i buherire? ¿Dohpa ii ìgu deyoro moarire ii masiri? ³ Ihĩ taboa mohmeri masu María magu àhrimi. Santiago, José, Juda, Simo, erã tĩgu àhrimi. Eropirã ìgu pagu porã nome i maca àhrima. Eropigu ìgu mari iro dopa árĩgu àhrimi, arĩñorã erã Jesure peenijarã. Eropirã Jesure umupeobiriñorã. ⁴ Erã umupeobiricũ ìagu òpa arĩpu Jesu:

—Árĩpehrerogue Goãmu yare weremũtadigure gajirã umupeoma. Erã eropa umupeoquerecũ ta ìgu ya maca majarã, ìgu acawererã, ìgu ya wihi arĩrã dihta umupeobeama ìgure. Eropirã yare umupeobeaa mua ohõ yuhu masadigu árĩcũ ìarã, arĩpu Jesu erãre.

⁵ Eropigu iri maca árĩgu Jesu Goãmu turari mera baja deyoro moarire iimasibiripu. Dorecurã bajamerãgã dihtare ìgu mohmepi taupu erã dorere. ⁶ Eropigu ero majarã Jesure erã umupeobiricũ ìagu, “¿Dohpa arĩrono mera yare gamebeari erã?” arĩgu uca wapu ìgu. Eropigu Jesu ero pohro árĩri macarigue buhegu waha wapu.

Jesu ìgu buherãre buhedore obeoñumi Mt 10.5-15; Lc 9.1-6

⁷ Eropi Jesu doce ìgu buherãre sihubeo perãyeri dihta obeopu erãre macariguere buhedoregu. Eropigu ìgu dorerire òpu erãre watẽare

masa ñajaniräre erä cóãburire. ⁸ Eräre obeogu gajinore aĩadorebiripu. Doberire, barire, niyerure aĩgãadorebiripu eräre. Erä tuari yuca dihtare aĩgãadorepu eräre. ⁹ Eropigu gaji zapaturire aĩdorebiripu eräre. Yujuñe ta suhrirore sañadorepu. Peñe sañadorebiripu eräre. ¹⁰ Eropigu õpa arĩ werepu eräre:

—Árĩpehleri macarigue erä muare carĩro ocã, iri wihi ta carĩque. Ne warãgue wiriaque iri wihire. ¹¹ Eropirã gaji macari majarã muare erä gamebircã, erä mua buherire peediabircã ñha iri macare tari wahgã waque. Eropa warã, mua guburi maja nicure moje siripique mua erä ya dipuwajare masicũ iimorã eräre, arĩpu Jesu eräre.

¹² Eropirã erä doce buherã waha masare buherã, erä ñero iirare bujaweredoreñorã. Õaripure iidoreñorã eräre. ¹³ Eropirã bajarã watẽare masare ñajaniräre cóãñorã. Dorecuräre uyũ mera sũrã õarã wacũ iĩñorã.

Ñu waĩyegure gajirã wejẽnuma
Mt 14.1-12; Lc 9.7-9

¹⁴ Eropirã Jesu ñgu õaro iirare masa bajarã masiñorã. Eropigu opu Herode sã irire peebeopu. Eropa peebeogu õpa arĩ guñapu ñgu Jesure:

—Ñu waĩyemuridigu sĩridigu mura dipaturi masa dehyoagu iicumi daja ihĩ Jesu. Eropa masadigu árĩgu ñgu turarire opami ñgu deyro moarire iigu, arĩ pepiripu Herode. Jesure “Ñu mura ta áhrimi,” arĩ pepiripu ñgu Ñure wejẽdorera puhru.

¹⁵ Gajirã õpa arĩ pepiriñorã:

—Elia áhrimi, arĩ pepiriñorã. Gajirãpu:

—Goãmu yare weremuhtadigu iribojegue majarã dopa áhrimi ñgu, arĩ pepiñorã Jesure.

¹⁶ Erã eropa arĩ pepiquerẽ, Herodepu Jesu ñgu iirare peeçu õpa arĩ pepipu:

—Jesu Ñu mura ta árĩcumi. Ñu dipurure yu tabedigu masa dehyoagu iicumi daja, arĩ pepipu.

¹⁷⁻¹⁸ Ero core Herode ñgu pagu magu marapo Herodia waĩcugore ehma igo mera marapocupu. Ñgu eropa iicũ Ñu Herodepore õpa arĩ wereniguiupu:

—Mu pagu magu marapore marapocugu Goãmu dorerire tarinugagu iiaa maha, arĩpu Ñu Herodere.

Ñgu eropa arĩra dipuwaja Herode Ñure ñeadore peresugue acumuripu. Ñgure eropa iicũ gamepo ñgu marapo Herodia. ¹⁹ Eropigo Herodiapu Ñure ñhaturinijago ñgure wejẽdorediaripo. Eropiidiaquerego ta wejẽdoremasibiripo Herode opu gamebircã. ²⁰ Herodepu “Ñu õarire iigu õagu áhrimi,” arĩ pepi Ñure güipu. Eropigu Herode Ñu wereniguirire ñgu peeçu guñaturabiripu. Eropa guñaturabiriqueregu ta mucubiriri mera ñgure peeçu wejẽdorebiripu ñgu Ñure. ²¹ Irisubu ta Herodia igo ñgure wejẽdorera ejayoro. Irisubure Herode ñgu masa dehyoaranũ árĩcũ ñgu gobierno majarãre, ñgu surara oparãre, Galilea majarã oparã sãre sihu bosenu iipu ñgu. ²² Eropigo ñgu marapo mago bosenu ñago erago erã ñhuro baya ñhmupo. Igo baya ñhmucũ ñarã Herode ñgu sihunirã mucubiriñorã. Erã eropa mucubircã ñgu õpa arĩpu Herode igo:

—Mu gamerire serēque yure. Eropigu mu serērire mure ogura.
 23 Goāmū mera diaye arāa mure. Mu serēropē yahare deco mera ogura mure, arīpu īgu igore.

24 Īgu eropa arīcū peego igo pago pohrogue waha serēpiyo:

—¿Nehenore serēgocuri yuhū? arī serēpiyo igo pagore.

—Ñu waīyegu dipurure serēque, arīpo pagorū.

25 Igo eroparīcū peego umūdiaro mera opū Herode pohrogue eja arīpo:
 —Dohparagā Ñu waīyegu dipurure tabetadoreque. Eropigu soropa mera īgu dipurure oque yure, arīpo igo.

26 Igo eroparīcū opū Herode burigā bujawerepu. Īgu masa erā peero, “Mu serērire mure ogura,” arītuhapu īgu. Eropigu īgu īgu eropa arīrare guhyasīrigu “Mure osome,” arīmasibirīpu igore. Īgu sihunirā ihuro “Iibea,” arīmasibirīpu. 27 Eropigu mata surarare peresu árīrāre coregure Ñu dipurure tabeta aīgāridorepu. 28 Īgu eropa dorecū peegu surarapu waha, īgu dipurure tabeta, soropa mera aīgāripū. Aīgā nómeore īgu marapo magore ópū. Eropigo igo iripare ñeha igo pagore o taupo daja.

29 Eropirā Ñu buherā irire peenijarā erogue waha, īgu dūpūre aī masa gobegue aīgā apiñorā.

Jesu cinco mil masare barire oñumi

Mt 14.13-21; Lc 9.10-17; Jn 6.1-14

30 Eropi Jesu īgu buhedore obeonirā īgu pohrogue dujajañorā daja. Erā iirare erā buherare wereñorā erā ĩgure. 31 Irisubure masa bajarā eropa majiniguirā erāre ne baro iibiriñorā. Eropigu opa arīpu Jesu īgu buherāre:

—Masa marirogue mari seyaro soonirā warā, arīpu erāre.

32 Eropirā erā seyaro gasiru mera masa marirogue wariñorā. 33 Erā eropa wacū ĩarā masa bajarā erāre masiñorā. Eropa masirā baja macari majarā mague waha, Jesu īgu ejaborogue omajatuhāñorā. 34 Erā eropa ejacū Jesu tuhajapa, gasirugue sañadīgu majanugajagu īgu bajarā masare ĩapu. Oveja ĩhadibugu moorā iro dopa arīñorā erā Jesu īgu ĩacū. Eropigu erāre mojomoro ĩagu baja buhepu erāre. 35 Ñamicague doce īgu buherā Jesu pohrogue eja opa arīñorā ĩgure:

—Ohō maca marirogue āhraa. Ñamicague āhraa. 36 Ōgā árīri macarīgue masare wadoreque. Erā baburire asūrā waporō, arīñorā erā Jesure.

37 —Mua basi ta barire oque erāre, arīpu Jesu erāre.

Īgu eroparīcū peerā opa arī yuhriñorā:

—¿Wuaro niyerupūri mera gua dohpa ii asūbocuri panre masa bajarā erā baburire? arīñorā erā Jesure.

38 —¿Di nucū pan āhriri ōguere? ĩarā waque, arīpu īgu erāre.

Īgu eroparīcū erāpu barire boca opa arīñorā:

—Cinco dipuru āhraa pan. Wai perā āhrima, arīñorā.

39 Erā eroparīcū peegu Jesu masare dipa cururi ero taa árīro weca doadorepu masare. 40 Īgu eroparīcū peerā erā dipa cururi doañorā. Yuju curure cien gohra arīñorā. Gaji curure cincuenta gohra arīñorā. 41 Erā doapehrecū ĩha Jesu cinco dipuru pan dipurure aī, erā perā waire aī, umarogue ĩhamemuju Goāmure “Ōhaa,” arīpu. Eropa arī serētuhā iri pan dipurure nuha īgu buherāre ópū masare gueredoregu. Eropigu

wai peräre gueredorepu árïpehreräre. ⁴² Eropirä árïpehrerä baha yapia wañorä. ⁴³ Erä ba duarare doce puiri gohra sea gameneo ujutu doboñorä erä wai säre eropa ta. ⁴⁴ Eropirä panre banirä uma dihtare queocü cinco mil gohra árñorä.

Jesu deco weca curiñumi

Mt 14.22-27; Jn 6.16-21

⁴⁵ Irisubu ta Jesu ïgu buheräre dohodirugue ñajajadore, gajipu masegue Betsaida yebague ïgu core taribuja yudorepu. Eropigu erä taribuja wara puhru Jesupu masare goeriserepu. ⁴⁶ Goeriseretuhaja utägugue muria ïgu seyaro Goãmure serëgu waha wapü. ⁴⁷ Puhru ñamicague árcü dohodirupu ïgu buherä wadiru ditaru deco árïyoro. Erä ero payacü Jesu yujugu ta erä taribujaridirogue árïpu. ⁴⁸ Miruñe dururo weä dujuyoro eräre. Eropigu erä ñero tari wejacü ñhabeopu Jesu eräre. Eropigu boyo muririboro core cäreña wahgärisubu erä pohro wagu deco weca cuhraphi wahgä wapü. Eräre ïgu tarigäripü. ⁴⁹ ïgu tarigäquerecü ta, ïgu deco weca aricü ñarä ñha uca wañorä. “Sïridigu maru watï áhrimi,” arï pepi gaguinigiñorä. ⁵⁰ Erä árïpehrerä ïgure ñarä ñha burigä uca wañorä. Erä eropa ñha ucacü ñagu Jesu werepu eräre:

—Ne yure ñha ucabiricäque. Yuhu ta áhraa. Güibita, arïpu eräre.

⁵¹ Eropa arïtuha ïgu erä mera dohodirugue ñaja wapü. ïgu ñajara puhrugä ta miruñe taria wayoro. Eropa wacü eräpu ucataria wañorä.

⁵² ïgu pan dipurure baja iirare guñabiriñorä erä. ïgure ñaro masi-biriñorä.

Jesu Genesare majaräre dorecuräre ñarä wacü iñumi

Mt 14.34-36

⁵³ Eropi erä taribujaja, Genesare yebague eja, turogägue payañorä.

⁵⁴ Eropirä erä dohodirugue árñirä erä majacü ta masapu Jesure ñha masiñorä. ⁵⁵ Eropa ñha masirä árïpehrerogue erä ya yebague omaja, dorecuräre erä püyucu mera aigäriñorä. “Jesu erogue áhrimi,” masa erä aricü pee eroguer e a ejañorä. ⁵⁶ Eropirä árïpehrero ïgu waroguer paga macariguere, muta macarigäguere, campogue, erä wari mariguere erä masa dorecuräre a apiñorä Jesure coremorä. Eropirä Jesu erä pohro ïgu ejaçü mohmepiñadiarä turaro serëñorä ïgure.

—Ma suhriro ojogoro dihtare mohmepiñadoreque guare, arï serëñorä erä.

Eropirä ïgu suhrirore mohmepinirä nucü ñarä wañorä.

7

Masa ñerä wacü iirire wereñumi Jesu

Mt 15.1-20

¹ Eropi Jerusaléngue arinirä judio masare buherä, fariseo masa mera Jesu pohrogue gamenereñorä. ²⁻⁴ Fariseo masa árïpehrerä, gajirä gua acawererä judio masa mera erä ñecu sumará dorediro dopa ta erä mojotorire coero mariro babirimariñorä. Eropirä doberi duarä pohrogue wanirä dujajarä erä dorerire iimorä, erä mojotorire coero mariro babirimariñorä erä. Eropirä baja gaji erä dorerire erä ñecu sumará iidorerire iimariñorä erä. Tasa parire yujuropa coe, mátasororire coe, comesororire coe, erä liguario dopa ta iimariñorä erä judio masa “Goãmü eropa gahmemi,” arñrä. Eropirä Jesu pohrogue gamenerä Jesu

buhērã erã ñecu sumarã dorediro dopa ta erã mojo coebiricũ ãañoṛã fariseo masa. ⁵ Eropa ãatuhajarã Jesure serẽpiñoṛã:

—Mũ buherã mari ñecu sumarã mura erã dorediro dopa ta erã baboro core erã mojo coebeama. ¿Duhpirã mari dorerire iibeari erã? arĩñoṛã erã Jesure.

⁶ Erã eroparicũ peegu werepu Jesu erãre:

—Masa erã ãabiropare ñero iicorerã áhraa mua. Goãmũ yare weremuhtadigu Isايا muare iribojegue diaye ta weremuriñumi. Opa arĩ gojañumi Goãmũ ya wereniguirire:

Oã masa yare ñero wereniguiquererã ne yare umupeobeama. Erã ya siporãripũ gajipugue áhraa. Yare ne mahibeama. ⁷ Goãmũ ya doreri wereniguibodirore erã ya werenigui dihtare buhema erã.

Eropirã yare umupeo erã sibuipeori duhpiburi árĩbeaa yare, arĩmi Goãmũ, arĩ gojañumi Isايا iribojegue.

⁸ Iri diaye ta áhraa. Goãmũ dorerire iibeaa mua. Mũ ñecu sumarã mura árĩricuri dihtare iiaa, arĩpu Jesu erãre.

⁹ Eropigu erãre wereniginemopũ daja:

—Mũ ñecu sumarã mura árĩricurire iiduhubirã ta Goãmũ yapure cohãa mua. ¹⁰ Iribojegue opa arĩñumi Moise Goãmũ dorerire: “Mũ pagu sumarãre umupeoque. Yujugu ãgu pagu sumarãre ñero werenigui coredigu ãgu wejẽbu árĩgucumi,” arĩñumi Moise. ¹¹ Moise eropa arĩquerecũ ta, muapu masare opa arĩ weredorea erã pagu sumarãre.

“ ‘Muare itamumasibea. Muare yu oborare Goãmũ ya árĩburire opehocãbu,’ arĩque mua pagu sumarãre,” arĩ weredorea mua. ¹² Eropa arĩ weredorerã erã pagu sumarãre erã umupeobiricũ iiaa mua erãre.

¹³ Eropirã Goãmũ ãgu dorerire tarinugarã iiaa mua mua ñecu sumarã ya doreri dihtare iirã. Gajirãre mua buheri dihtare peedorea mua. Baja eropa árĩrre iiaa mua, arĩpu Jesu erãre.

¹⁴ Eropa arĩtuha masare sihubeo opa arĩpu daja:

—Mũ árĩpehrerã peeque yare. Yu arĩrre ñero masique mua. ¹⁵ Mũ disiro ñajaripu mua bari pu ñerã wacũ iibeaa. Mũ disiro wiriripu, mũa wereniguiripu muare ñerã árĩcũ iiaa. ¹⁶ Yare ñero peeque, arĩpu Jesu.

¹⁷ Eropa arĩtuha Jesu masa pohro árĩdigu waha wihigue ñajaa wapũ. ãgu eropa ñajacũ ãarã ãgu buherãpu ãgu wererare serẽpiñoṛã. Erã eropa serẽpicũ peegu opa arĩpu Jesu:

¹⁸ —¿Ne peenibeari mua sã? Mũ bari disiro ñajaripu muare ñerã masa wacũ iibeaa. ¿Irire masibeari? ¹⁹ Iri mua pepirigue ñajabeaa. Mũ parugue ñajaja taria waha, arĩpu Jesu.

Eropa arĩgu “Árĩpehreri bari ñero bari áhraa,” arĩgu iipu. ²⁰ Opa arĩnemopũ:

—Mũ wereniguiripu, mũa disiro wiriripu mũa pepiri áhraa. Mũ pepiripu muare ñerã masa árĩcũ iiaa. ²¹ Mũ pepirigue opa ñeri iinugaa: Ñero pepiri, nomere gameri, yajari, masare wejẽri, ²² gajigu marapo mera ñero iiri, gajirã yare turaro uaribejari, ñetariari iiri, gayari, ñeri uaribejari, gajirã gajinore opacũ ãhaturiri, ñero quere wereri, gajirãre tarinugadiari, pee masibiriri iinugaa. ²³ Árĩpehreri i ñeri mũa pepirigue arĩnugari muare ñerire iicũ ñerã árĩcũ iiaa, arĩpu Jesu.

*Judio maso árĩbigo Jesure umupeoñumo
Mt 15.21-28*

²⁴ Eropigu Tiro waĩcũri maca pohrogue, Sidón waĩcũri maca pohrogue wapu. Erogue ejagu ero árĩri wihigue ñajaa wapu. Eropigu gajiräre ĩgu árĩri wihire ne weredorebiripu. ĩgu eropa duhridiaqueregu ta duhrimasibiripu. ²⁵ ĩgu ejacũ pee mata yujugo nomeo ĩgu pohro ejapo. Igo mago watĩ ñajasũdigo árĩpo. Gajirã Jesu iira querere peedigo árĩpo. Igo Jesu pohro eja ĩgu guburi pohro merejapo. ²⁶ Igo judio maso árĩbigo Grecia majago árĩpo. Siro Fenicia árĩyoro igo masa dehyoara maca. Jesu pohro mereja ĩgure turaro serẽpo:

—Watĩre wiubasaque ya magore, arĩ serẽpo igo Jesure.

²⁷ Igo eroparicũ peegu õpa arĩpu Jesu igore:

—Negohrare wihi opu porã bamuhtaporo. Erã porã ya barire diayeare ocũ ero wabeaa. Israe masa yare gaji yeba majaräre ya omuhtacũ ero wabeaa, arĩpu Jesu igore.

²⁸ —Eropa ta ähraa opu. Eropa árĩquerecũ ta barisubu árĩcũ erã diayea sã yuhridijarire bacohrema. Gaji yeba majago ya árĩquerecũ, ya sãre itamuque muhu, arĩpo igo ĩgure.

²⁹ —Muhu eropa õaro arĩ yuhricũ mu magore watĩre wiubasatuhabu. ĩago waque, arĩpu Jesu igore.

³⁰ ĩgu eroparicũ peego waha, igo ya wihigue eja, igo magore camague oyagore watĩ moogoguere eja ĩapo.

Peebigure, wereniguimasibigure õagu wacũ iĩnumi Jesu

³¹ Irisubure Jesu sã Tiro waĩcũri maca pohrogue árĩdigu waha, Sidón waĩcũri macare eja tarigã, Decapoli waĩcũri macare eja tarigã, Galilea waĩcũri ditarugue ejañorã pare. ³² Eropirã peejabigure, wereniguibigure aĩgãriñorã gajirã Jesu pohrore.

—Mu mojoto mera mohmepiñaque ĩgure, arĩ serẽñorã erã ĩgure.

³³ Erã eroparicũ peegu Jesupu peejabigure aĩgã, masa marirogue aĩ ejapu. Erã seyaro árĩñorã. Eropigu Jesu ĩgu mujusĩri mera ĩgu gamirire pupu. Eropigu ĩgu disico mera ĩgu nerore mohmepiñapu. ³⁴ Eropiituhaja umaro ihamuju si aĩ õpa arĩpu:

—Efata, arĩpu Jesu. Efata mari ya mera “Pãgũque,” arĩro iiaa. Eropa arĩgu ĩgure peedoregu iipu. Eropigu werenigudoregu iipu.

³⁵ ĩgu eroparicũ ta ĩgu peejabigu peepu. ĩgu nero nircũ pepigu õaro wereniguinagapu. ³⁶ Eropigu Jesu irire ñaniräre gajiräre weredorebiripu. Eropa weredorebiriquerecũ, erãpu gajiräre burigã werepehocãñorã.

³⁷ Eropirã masa pee uca waha õpa arĩñorã:

—Árĩpehreri õaro iimi. Peejabirã sãre õaro peecũ iimi. Wereniguibirã sãre õaro wereniguicũ iimi Jesu, arĩñorã masa.

8

Cuatro mil masare bari õnumi Jesu

Mt 15.32-39

¹ Irisubure daja dipaturi masa bajarã erã gamenerera puhru, bari moorã erã árĩcũ ĩagu Jesu ĩgu buheräre sihubeopu:

² —Oã masa uhrenu gohra ya mera árĩtuhajama. Erãre bari pehrea waca. Eropigu erãre mojomoro ihaa yuhu. ³ Gajirã erã mera majarã yorogue arinirã ährima. Erã babiriquerã erã ya wirigue dujaacũ gamebirica. Mague warã erã oaboarã turabiribocoma. Eropigu erãre barire odiaca, arĩpu Jesu ĩgu buheräre.

4 Īḡu eroparīcū Īḡu buherā ĩḡure arīñorā:

—¿Duhpii mari õguere masa mariroguere barire bocabocuri erāre ejomorā? arīñorā Jesu ĩḡu buherāpū.

5 —¿Di nūcu dipuru pan dipuru opari mua? arī serēpipū Jesu erāre:

—Siete pan dipuru āhraa, arīñorā.

6 Eropiḡu ĩḡu masare taa árīro weca doadorepū. Tuhajanugu siete pan dipurure aĩ, Goāmure “Ōhaa,” arī serēpū. Eropa arī serētuhaja pan dipurure nuha ĩḡu buherāre õpū gueredoreḡu. ⁷ Eropirā waigā sāre bajamerāḡā opañorā erā. Eropiḡu waigāre aĩ Goāmure “Ōhaa,” arī serē, ĩḡu buherāre masare gueredorepū. ⁸ Masa irire barā yapia wañorā. Erā ba dūharare siete puiri gohra aĩ gameneo uḡutu doboñorā. Erā masa cuatro mil gohra árīñorā. ⁹⁻¹⁰ Eropiituha Jesu masare goeriserēpū wagu. Erāre goeriseretuhaja Dalmanuta waicuri maca pohroque waha wapū.

Fariseo masa deyorõ moariñere ĩadiariñuma

Mt 16.1-4; Lc 12.54-56

¹¹ Ero pūhrū fariseo masa Jesu mera dūyatorā erañorā. Erā Jesure Goāmū turari mera deyorõ moariñere iidoreriñorā. Īḡu ii ĩhmumasibiricū ĩadiariñorā. Īḡu iimasibiricū “Goāmū ĩḡu obeodigū árībeami,” arīdiariñorā. ¹² Erā õpa dorecū peḡḡu Jesu turaro bujawere siñaja õpa arīpū:

—¿Mua dohpague majarā duhpirā Goāmū ĩḡu turari mera deyorõ moarire ĩadiari? Diaye arāa muare. Dohpague majarā muare ne deyorõ moarire ii ĩhmusome yuhū, arīpū Jesu erāre.

¹³ Ōpa arītuha waha dohodirugue ñaja gajipū masegue waha wapū ĩḡu buherā mera.

Fariseo masa, Herode ya curu majarā sã erã ñeri buherire wereñumi Jesu

Mt 16.5-12

¹⁴ Eropa warā panre cãdijiñorā. Dohodiruguerẽ yujuru ta panrure opañorā erā. ¹⁵ Eropiḡu Jesu ḡuhyaro mera werepū ĩḡu buherāre:

—Ōaro iique. Fariseo masa, Herode ya curu majarā sã erã pan buḡacū ĩiburire õaro iique. ḡuhya āhraa iri, arī werepū erāre.

¹⁶ Īḡu fariseo masa sã erã buherire eroparīcū pee, ĩḡu buherāpū peewisirā irire erã basi wereniḡuñorā.

—Mari panre mari aĩḡaribiricū ĩḡu eropa arīcumĩ ĩḡu, arīñorā erã basi.

¹⁷ Erã eropa arīrare masiḡu õpa arīpū Jesu erāre:

—¿Duhpirā mua pan cãdijirare ḡuñari mua? ¿Mua masibeari? ¿Peenibeari mua dohpa? ¿Peediabeari mua? ¹⁸ ¿Cuiricurā árīquererā ĩabeari mua? ¿Gamiricūquererā ta peebeari mua? ¿Mua yū ĩirare ḡuñabeari? ¹⁹ ¿Yū cinco mil umare cinco dipuru panre yū nuha orare ḡuñabeari mua? ¿Erã yapi weorare di nūcu puĩri pan dipure mua uḡutura puĩre aĩari mua? arī serēpipū Jesu erāre.

—Doce puĩri, arīñorā erã ĩḡure.

²⁰ —¿Eropi yuhū siete pan dipurure cuatro mil masare yū ora pūhrū di nūcu puĩri uḡutura puĩri aĩari mua? arīpū Jesu erāre daja.

—Siete puĩri, arī yuhriñorā erã.

²¹ —¿Eropa irire ĩaquererā ta masibeari mua dohpa? arīpū Jesu erāre.

Jesu cuiři deyõbigare ĩacū ĩñumi

22 Eropi erã Betsaida waĩcũri macague erã ejacũ ĩarã, masapũ cuiri deyobigure aĩgãriñorã.

—Īgũre mohmepique, arĩ turaro serẽñorã erã Jesure.

23 Eropigu Jesu cuiri deyobigure mojoto ñeha iri maha turogue ĩgũre taragãpũ. Aĩ eja ĩgu cuirire purimetupũ disico mera. Eropigu ĩgu mojoto mera ĩgũre mohmepipũ.

—¿Mũhũ ĩacũ dehyori? arĩ serẽpipũ Jesu ĩgũre.

24 Īgu eroparĩcũ ĩgũpũ ĩagu òpa arĩpũ:

—Masare ĩhaa. Erãre ĩaquerecũ erã curicũ yucũ iro dopa dehyoma, arĩpũ ĩgu cuiri deyobigupũ.

25 Īgu eroparĩcũ peegu Jesupũ ĩgu mojotori mera ĩgu cuirire mohmepipũ daja. Īgu eropa mohmepira pũhrũ cuiri deyobigu ĩgu turaro ĩacũ òaro deyoyoro pare. Eropigu arĩpehrerire òaro ĩapũ ĩgu. 26 Eropigu Jesu ĩgũre ĩgu ya wihigue omedijugũ òpa arĩpũ:

—Macague tamerare wabiricãque. Eropigu maca majarãre i yũ iirare gajirãre weresiribiricãque, arĩpũ Jesu ĩgũre.

Jesu ĩgu diaye ta Cristo arĩrĩre wereñumi Pedro

Mt 16.13-20; Lc 9.18-21

27 Eropi Jesu ĩgu buherã mera Cesarea Filipino waĩcũri maca pohro arĩri macarigue wanemoñorã. Erogue wagũ Jesu serẽpiñapũ ĩgu buherãre:

—¿Nihino arĩcũri yũhũ masa erã yũre pepicũ? arĩ serẽpiñapũ ĩgu.

28 Īgu eropa arĩ serẽpiñacũ peerã ĩgu buherã yũhriñorã:

—“Ñũ waĩyegũ ãhrimi,” arĩma mũre. Gajirã “Elia ãhrimi,” arĩma. Gajirãpũ “Goãmũ yare weremuhtanirã mera majagũ ãhrimi,” arĩma, arĩ yũhriñorã ĩgu buherã ĩgũre.

29 Erã eropa arĩra pũhrũ Jesu serẽpinemopũ erãre:

—¿Muapũ mua pepicũ nihino arĩcũri yũhũ? arĩ serẽpipũ.

Pedropũ yũhripũ ĩgũre:

—Mũhũ Cristo Goãmũ ĩgu obeodigu ãhraa, arĩ yũhripũ Pedro.

30 Īgu eroparĩcũ peegu Jesu òpa arĩpũ:

—Yũre “Cristo ãhrimi ĩgu,” ne arĩ weresiribiricãque gajirãre, arĩpũ erãre.

Jesu ĩgu sriburiñere ĩgu masa mariaburiñe sãre weremuhtañumi

Mt 16.21-28; Lc 9.22-27

31 Eropigu ĩgu erãre buhenugapũ òpa arĩ weregu:

—Yũhũ masũ Goãmũ ĩgu obeodigu ãhraa. Eropigu burigã ñero tariguca. Yũre eropa ta waro gahmea. Mũrã, pahia oparã, marire buherã sã yũre gamebirã yũre wejẽracoma. Erã yũre eropa wejẽquerecũ, uñrenũ pũhrũ masa mariaguca, arĩpũ Jesu erãre.

32 Eropa arĩgu erã òaro peeboro dopa òaro weregu iipũ erãre. Īgu eroparĩcũ peegu Pedropũ gajipũ ñarigã Jesure aĩgã ĩgũre arĩpũ. “Eropa arĩbiricãque,” turaro mera arĩ werepũ. 33 Īgu eropa arĩdorebiricũ peegu Jesupũ ĩgu buherãre majinugaja, turipũ Pedrorẽ.

—Satana iro dopa wereniguũgũ iiaa mũhũ. Eropa arĩbiricãque. Mũ pepiri masa ya ãhraa. Goãmũ ya arĩbeaa, arĩpũ ĩgu Pedrorẽ.

34 Eropa arĩtuha masare ĩgu buherã mera sihubeo òpa arĩpũ:

—Yũjugũ yũ mera majagũ arĩdiagu ĩgu gamero iidiarire duhcãgũcumĩ. Eropigu ĩgu yũ mera majagũ ĩgu arĩri dipuwaja ñero tarigũcumĩ. Ñero tariqueregu yahare iiniguicãgũcumĩ. 35 Yũjugũ masũ ĩgu ya arĩburi

dihtare pepigu ĩgu dederea wagucumi. Eropigu gajigu yaha árĩburi dihtare iigu, òari buheri sàre iigu, árĩpehrerinuri yu mera umarogue òaro árĩgucumi. ³⁶ Yujugu masu i yeba majare árĩpehrerire opaqueregu, peamegue wagu òarire wajasome. ³⁷ Eropigu i yebague opaburi dihtare guñagu, ĩgu sĩrigu waburire guñabigu ĩgu sĩporã mera peamegue dederegucumi. ³⁸ Dohpagure ñerã Goãmure gamebirã erã ejatuharo iiri árĩro iiaa. Eropirã yujurãyeri yure, yu buheri sàre masiquererã “Masibea,” arĩbocoma guhyasĩrirã. Erã eroparĩcũ ĩagu yu sã erãre guhyasĩrigu “Erãre masibea,” arĩguca. Yuhu masu Goãmũ ĩgu obeodigu òarã anyua mera yu Pagu gosesiriri mera dujariguca. Yu dujarigu yu waire aridia guhyasĩrisãnrãre guhyasĩrisãguca yu sã, arĩ werepũ Jesu.

9

¹ Eropa arĩtuhaja òpa arĩnemopũ Jesu:

—Diaye arĩgu tiiaa mũare. Yujurãyeri mua òguere árĩrã, mua sĩriboro core Goãmũ ĩgu opu árĩroguere yu ñajacũ ĩarãca, arĩpũ Jesu.

Jesu ĩgu dũpũre gohrotoñumi
Mt 17.1-13; Lc 9.28-36

² Eropi seis nrĩ puhru Jesu Pedrose, Santiagore, ĩgu pagu magure Ñure utãgũgue umadigũgue erã dihtare sihu muriapu. Umarogue erã muriara puhru erã ĩhabeoro ĩgu dũpũre gohrotopũ. ³ Eropiro ĩgu suhri gosesiriri suhri òaro boreriñe wayoro. I yeba majarã nome suhri coerã nome ne eropa borerire iimasibeama. ⁴ Mata iribojegue majarã Moise mũru Elia mũru sã dehyoãñorã. Eropirã Jesu, Elia, Moise mera weretamucũ ĩañoñorã erã ñrerã ĩgu buherã. ⁵⁻⁶ Eropirã erã burigã gũñoñorã. Eropa gũigu dohpa arĩmasibirĩnĩjagu òpa arĩpũ Pedro:

—Opu, mari ohõ árĩcũ òadiaa. Uñre wihigã iirã. Mũ ya wihigã, Moise ya wihigã, Elia ya wihigã iirã, arĩpũ ĩgu Jesure.

⁷ Eropiro erã weca erãre imica curu cãhmotayoro. Iri eropa cãhmotacũ ta imica curu pohecague Goãmũ ĩgu werenĩguiri busuyoro:

—Ihĩ yu magu yu mahigu àhrimi. Peeque ĩgure, arĩri busuro cariyoro.

⁸ Eroparĩcũ peerã Pedro sã maji ĩarã Moisere, Eliare ĩabiriñoñorã pare. Jesu dihtare ĩañoñorã. ⁹ Eropi utãgũgue erã dijaricũ Jesu erãre werepũ:

—Dohparagã yure eropa warare gajirãre ne werebiricãque. Yuhu masu Goãmũ ĩgu obeodigu yu sĩri masa muriara puhru irire gajirãre wereque mua, arĩ werepũ Jesu.

¹⁰ Eropirã erã ĩgu dorediro dopa werebiriñoñorã gajirãre. Eropirã erã, erã basi òpa arĩ serẽpi werenĩguñoñorã:

—“Yuhu sĩridi masa muriara puhru,” ĩgu arĩgu ¿duhpigu eropa arĩri ĩgu? arĩ werenĩguñoñorã erã.

¹¹ Eropirã Jesure òpa arĩ serẽpiñoñorã:

—Cristo Goãmũ beyedigu ĩgu ariboro core “Eliare arimũhtaro gahmea,” arĩma masare buherã. ¿Dohpa arĩronore eropa arĩri erã? arĩ serẽpiñoñorã Jesure ĩgu buherã.

¹²⁻¹³ Jesu yũhripũ:

—Diaye ta àhraa. Eliare arimũhtadoremĩ Goãmũ árĩpehrerire amumũhtabure. ĩgu eropa iiborore arĩ gojayura àhraa Goãmũ yare gojarapũgue. Yu sãre arĩ gojayuñuma. Yuhu masu Goãmũ ĩgu obeodigu bajasuburi ñero tariguca. Gajirã yure gamebirã yure ñero iirãcoma. ¿Iri sãre masiri mũa? Eropigu òpa arĩgura mũare: Elia eratuhami. ĩgu eracũ

erã ĩgure erã gamero dopa ñero iima. Iribojegue erã arĩ gojayudiro dopa iima ĩgure, arĩpũ Jesu.

Jesu majigure ðagu iĩnumi
Mt 17.14-21; Lc 9.37-43

¹⁴ Eropi dijari ĩgu buherã dujanirã pohrogue eja, bajarã masare ĩapũ. ĩgu buherãpũ judio masare buherã mera game duyasorã iĩnorã. ¹⁵ Masa Jesure ĩarã arĩpehrerã ĩhamaria wañorã. Eropirã ĩgu pohrogue omagã ĩgu pohrogue eja, “¿Ahrari?” arĩñorã ĩgure. ¹⁶ “Ahrabũ,” arĩtuhaja erãre serẽpipũ:

—¿Ñehenore game wereniguirã iiri mũa eropa duyasorã? arĩ serẽpipũ ĩgu.

¹⁷ ĩgu serẽpicũ peegu masa watope niguidigu werepũ ĩgure:

—Buhegu, yũ magure watĩ ñajasũdigure mure aĩgãrirabũ. Watĩpũ ĩgure wereniguidorebeami. ¹⁸ Yũ magure ĩgu ñajacũ yebague mehmereja wahami. ĩgu disirore sumutua, ĩgu gũcurire cũridihu buha wamurami ĩgu. Eropigu mũ buherãre watĩre yũ magure ñajadigure cóadorerabũ. Erã cóãmasibirama, arĩ werepũ ĩgure.

¹⁹ ĩgu eroparĩcũ peegu õpa arĩpũ Jesu masare:

—¿Ne yũre umupeobirigohracãri mũa? Yoari boje mũare buherabũ yũhũ. ¿Dipa boje yũhũ mũare yujuro bojebocuri? ĩgure aĩgãrique, arĩpũ Jesu.

²⁰ ĩgu eroparĩcũ peerã watĩ ñajasũdigure Jesu pohro aĩgãriñorã. Erã Jesu pohro aĩ ejacũ ta watĩpũ ĩgu majigure mehmerejacũ iipũ. ĩgu eropĩcũ ĩgu yebague mehmereja wapũ. Tũru, naragã, buhacũ ĩpũ. Eropiũ ĩgu disiro sumutua wapũ. Jesu ĩgu pagure serẽpipũ:

²¹ —¿Dipa boje eropa ahrari ĩgu? arĩ serẽpipũ Jesu majigu pagure.

—Majigugãgue ta ĩgu eropa arĩnũgami, arĩ yũhripũ ĩgu pagupũ.

²² Eropigu watĩpũ ĩgure peamegue, diague sãre cóãmũririmi ĩgure wejẽdiagu. Eropigu mũhũ itamumasigu mojomoro ĩha itamuque gũare, arĩpũ majigu pagupũ Jesure.

²³ ĩgu eroparĩcũ peegu õpa arĩpũ Jesu ĩgure:

—Mũhũ yũre umupeocũ ĩagu Goãmũ arĩpehrerire iipehocãmasimi mũ ya arĩburire iigu, arĩpũ Jesu ĩgure.

²⁴ ĩgu eroparĩcũ majigu pagu õpa arĩ gaguiniguipũ:

—Mũre umupeoa yũhũ. Yũ umupeobiricũ ĩagu itamuque yũre yũhũ mũre umupeoboro dopa, arĩpũ ĩgu.

²⁵ Eropiicũ masa bajarã erã pohro omagãriñorã. Erã gamenerecũ ĩagu Jesu watĩre õpa arĩ turipũ:

—Mũhũ wereniguimasibiricũ iidigu, gamiri bihadigu ĩre duhuque. Eropigu dipaturi ĩgure garibobiricãque, arĩpũ Jesu.

²⁶ ĩgu eroparĩcũ peegu majigure ñajadigu watĩ gaguiniguĩ, majigure yebague mehmereja, tũru naragãcũ ii duhupũ ĩgure. ĩgu eropĩcũ majigupũ sĩrigu dopa wapũ.

²⁷ —ĩgu sĩria wami, arĩñorã masa bajarã.

Erã eropa arĩquerecũ ta Jesupũ ĩgu mojtore ñeha ĩgure tara wahgũ nugupũ. ĩgu tara wahgũ nugucũ wahgãnũgajapũ ĩgupũ.

²⁸ Pũhrũ Jesu wihigue ñajajacũ ĩarã ĩgu buherã erã seyaro serẽpiñorã Jesure:

—¿Duhpirā guapu majigure watī opagure cōāmasibirayuri mu pepicū? arī serēpiñorā erā.

²⁹ —İno watīre cōādiarā burigā Goāmure serēro gahmea. Eropirā Goāmure serēmora ba duhuro gahmea muare, arī yuhripu Jesu erāre.

Dipaturi ta Jesu İgu sīriburiñere İgu masa mariaburiñe sāre wereñumi Mt 17.22-23; Lc 9.43-45

³⁰ Eropi erogue árñirā waha Galilea yebague eja, tarigañorā. Irisubu Jesu İgu buherāre buhegu iipu. Eropigu erā warore gajirā masicū gamebiripu Jesu. ³¹ Erogue ejaḡu İgu buherāre buhepu. Őpa arī buhepu: —Yuhū masu Goāmu İgu obeodigu āhraa. Masa yure ñeha gajirāguere yure wiarācoma. Erā wiara puhru yure wejērācoma erā. Eropa erā wejēra puhru uhrenu puhru masa mariaguca, arīpu Jesu.

³² İgu ōpa arīcū ōaro peebiriñorā. Eropirā güirā İgure irire serēpibiriñorā.

Jesu İgu buherāre erā yagu opu árībure wereñumi Mt 18.1-5; Lc 9.46-48

³³ Eropi erā Capernaumgue ejara puhru wihigue erā árīcū Jesupu serēpipu erāre:

—¿Maguere arirā dohpa arī duyaso wereniguirā iiarī muu? arī serēpipu erāre.

³⁴ İgu eroparīcū erā yuhribiriñorā. Mague arirā ōpa arī duyaso wereniguiñorā erā basi:

—¿Nihi āhriri mari árīpehrerā wecague? arī duyaso wereniguiñorā erā. Eropirā erā eropa arīrare Jesure werediabiriñorā. ³⁵ Erā eropa yuhribiricū İagu Jesu doaja İgu buherāre sihubeo ōpa arīpu:

—Árīpehrerā wecague opu árīdiagu árīpehrerā ojogoro majagu árīro dopa ta erā pohro majagu árīro gahmea muare, arīpu Jesu erāre.

³⁶ Eropa arīgu majigugāre erā watope duhudobopu. Duhudobotuha İgugāre aī cōa ōpa arī werepu:

³⁷ —Yahare iidiarā, İgugāre bu árīgure gamerā yu sāre gahmea muu. Muu eropiirā yure gamerā, yure obeodigu Goāmu sāre gahmea muu, arīpu Jesu erāre.

Marire İhaturibigu árīgu mari mera majagu āhrimi, arī wereñumi Jesu Mt 10.42; Lc 9.49-50

³⁸ Ero puhru İgu buhegu ũu ōpa arīpu Jesure:

—Buhegu, yujuḡu mu waī mera watēare cohā wiucū gua İhabu. İgu mari mera majagu İgu árībiricū İarā, İgure irire iidorebirimurabu gua, arīpu İgu.

³⁹ İgu eroparīcū peegu Jesu erāre werepu:

—Eropa arībita muu İgure. Yujuḡu yu waī mera deyoro moarire İigu, puhruḡuere yure ñero wereniguimasibeami. ⁴⁰ Marire İhaturibigu árīgu, İgu mari mera majagu āhrimi. ⁴¹ Muare diaye ta arāa. Yaharā muu árīcū İarā gajirā muare itamucū İagu Goāmu erāre ōaro itamugacumi. Yuju coaru mera decore muare erā tīacū merogā árīquerecū, erāre ōaro İigacumi Goāmu erā ōaro iira waja, arīpu Jesu.

Ñerire iicū guhya āhraa, arī buheñumi Jesu Mt 18.6-9; Lc 17.1-2

⁴² Eropigu Jesu majigugāre İgu basi cōa aī erāre werenemopu:

—Īgā yure umupeogugāre weregura muare: Yujugu Īgā iro dopa árġure ñerire iidoredigu, Īgu ñetariaro tarigucumi. Gajigure masa ĩgure wunugure wuariye utāye mera dirisiu, wuariyague ĩgure cóacũ ñero wabocumi ĩgu. Eropigu ĩgā dopa árġure ñerire iidoredigupu wuariyague erā cóadigu tauro ñero tarigucumi. Īgu burigā dipuwaja moasũgucumi. 43-44 Mũ mojoto mera ñero ĩgu, iri mojotore mũ tabe cóabodiro dopa ta iri ñerire duhuque. Irire duhubigu peamegue waguca. Eroguere ne peame yaribea. Eropirā beca sã ũjaquererā ne sġribeama. Mũ mojotore mũ cóacũ iri dũca dihta cohmoboya. Eropigu mũpũ epasi árġueregu ta puhũ Goãmũ mera árġuca. Mũ pe mojoto mera árġure peamegue ĩgu cóacũ ñetariaro tariguca. Eropigu iri ñeri iiripũre duhuque. 45-46 Mũ guburu mera ñero ĩgu mũhũ iri guburu sãre mũ tabe cóabodiro dopa ta iri ñerire duhuque. Irire duhubigu peamegue waguca. Eroguere ne peame yaribea. Eropirā beca ne sġribeama. Mũ guburure mũ cóacũ irisi dihta cohmoboya. Eropigu epasi árġueregu ta puhũ Goãmũ mera árġuca. Mũ pe guburu mera árġure mũre peamegue cóacũ mũ ñetariaro tariguca. Eropigu iri ñeri iiripũre duhuque. 47-48 Mũ cuiru mera ñero ĩgu irirure mũ gorawea cóabodiro dopa ta iri ñerire duhuque. Irire duhubigu peamegue waguca. Eroguere ne peame yaribea. Eropirā beca sã ne sġribeama. Mũ cuirure cóacũ iriru dihta cohmoboya. Yujupu cuiru mariqueregu ta puhũ Goãmũ mera árġuca. Mũre pe cuiru mera árġure peamegue mũre cóacũ mũ ñetariaro tariguca. Eropigu iri ñeri iiripũre duhuque.

49 “I yeba árġrā ñero tarirāca mũa. Peamegue mari ũjucũ marire pũriro dopa ta ñero tarirāca mũa. 50 Moa õaro acaa. Moa acabiricũ usuriri iimasiya mara. Moa acabiro iri moa ne õabeaa. Iri moa acabiricũ dohpagohra iimasiya mara. Eropirā moa õaro acarõ dopa mũa sũarā árġue. Eropirā gajirā mera õaro mera árġue.

10

Erā marasã nomere erā cóacũ õabeaa, arġ wereñumi Jesu

Mt 19.1-12; Lc 16.18

1 Eropigu ĩgu erogue árġidigu waha, Judea yeba pohrogue eja, dia Jordán waĩcuriŷa gajipu masegue ejapu. Erogue ĩgu ejacũ ĩarā masa bajarā ĩgu pohrogue gamenereñorā daja. Erā gamenerecũ ĩagu ero core ĩgu buhediro dopa ta dipaturi buhepũ daja. 2 ĩgu eropa buherisubũ fariseo masa erañorā. Jesure ĩgu ñero werenigucũ peediañorā. Eropa peediař erā Jesure õpa arġ serẽpiñorā:

—¿Mari marapore cóacũ õhari? ¿Moise doreripu eropa ta iidone õabeaa. Iri moa acabiricũ rerĩ mũ pepicũ? arġ serẽpiñorā.

3 —¿Dohpa doreyuri Moise muare? arġ yũhripũ Jesu.

4 —“Mũ marapore cóadiagu paperapũgue irire gojaque. Eropa gojagu iripũre mũ marapore otuhajanijagugue ĩgore cóamasia,” arġ gojañumi Moise, arġ yũhriñorā fariseo masa.

5 Erā eroparicũ peegu õpa arġ werepũ Jesu:

—Mũa ñecu sũmarā Goãmũ dorerire iidibiricũ ĩagu, “Eropa ta wacuraporo,” arġũ, “Mũa marapore cóamasia,” arġ gojañumi Moise. 6 ĩgu eropa arġ gojara árġuerecũ ta, negohraguere Goãmũ mũa marasã nomere cóacũ gamebiriñumi. I yebare ĩhacũnugugũ mũmũ, nomeo sãre iĩñumi.

7 Eropigu mũmũ ĩgu pagũ sũmarãre cohã wiria ĩgu marapo mera árġucumi.

⁸ Eropirā erā perā árīquererā ta, yuju dɔpɔ iro dopa árīrācoma. Eropirā erā perā iro dopa árībeama. Yuju dɔpɔ iro dopa áhřima erā. ⁹ Eropirā Goāmɔ ĩɣɔ doreri mera mojtodirima. Eropirā game cóābiricāro gahmea erāre, arĩpɔ Jesu erāre.

¹⁰ Eropa arĩtuha ĩɣɔ buherā mera wihigue ñajaa wapɔ. Wihigue ñajajarā erā marasā nomere cóārire serēpinemoñorā daja ĩɣɔ buherā.

¹¹ Erā eropa serēpiñacū ĩɣɔ yuhřipɔ:

—Īɣɔ marapore cóādĩɣɔ gajigo mera marapocɔɣɔ, ĩɣɔ igo gajigo mera ñero iigu iimi. ¹² Eropigo nomeo sã igo marapure cóāgo, gajigu mera marapucɔgo, ĩɣɔ gajigu mera ñero iigo áhřimo, arĩpɔ Jesu erāre.

Majirāgā ya árīburire Goāmure serēbasañumi Jesu

Mt 19.13-15; Lc 18.15-17

¹³ Eropi majirāgāre Jesure mohmepidoremorā erāgāre Jesu pohrogue aĩ erañorā. Erā eropiicū ĩɣɔ buherāpɔ erāgāre aĩgārĩrāre bocatĩri turiñorā.

¹⁴ Erā eropa turicū ĩagu Jesu papũrigɔ òpa arĩpɔ erāre:

—Eropa ĩacāque. Majirā yɔ pohrogue ariporo. Waque, arĩbiricāque erāgāre. Erā Goāmure erā opure masima. Eropirā Goāmɔ ĩɣɔ opu árĩroguere oāgā iro dopa pepirā áhřima eroguerē. ¹⁵ Diaye arĩɣɔ ĩaa muare. Oāgā Goāmure gamediro dopa ta mua Goāmure gamebirā ĩɣɔ pohrogue wasome mua. Mua wabiricū mua opu árĩsome ĩɣɔ, arĩpɔ Jesu.

¹⁶ Eropa arĩtuha Jesu majirāgāre aĩ cóāɣɔ erāre mohmepi erā òaro árĩburire Goāmure serēbasagɔ òpa arĩpɔ:

—Oāgā òarā waporo, arĩ serēbasapɔ Goāmure.

Doberi opagɔ Jesu mera weretamuñumi

Mt 19.16-30; Lc 18.18-30

¹⁷ Eropi Jesu ĩɣɔ mague wacū, yujugɔ masɔ omagā wa ĩɣɔ guburi pohro mereja Jesure serēpipɔ.

—Mũhɔ buhegu òagɔ áhřaa. ¿Yũhɔ árĩpehrerĩnari Goāmɔ mera árĩdiagu duhpigacuri? arĩpɔ ĩɣɔ Jesure.

¹⁸ ĩɣɔ eroparĩcū Jesu ĩɣure yuhřipɔ:

—¿Dohpa arĩronore yare “Òagɔ” arĩ piyuri mũhɔ? Goāmɔ yujugɔ ta òagɔ áhřimi. ¹⁹ ĩɣɔ Goāmɔ dorerire masia mũhɔ. “Masare wejēbiricāque. Gajigu marapo mera árĩbiricāque. Yajabita, gɔyabita, gajirā yare guya aĩbita, mũ pagu sumarāre umupeoque,” ire doremi Goāmɔ. I dorerire iro gahmea mũre, arĩ werepɔ Jesu ĩɣure.

²⁰ —Buhegu, irire árĩpehrerire majigugāgue ta tarĩnugabirĩmũribɔ yaa, arĩpɔ ĩɣɔ Jesure.

²¹ Jesu ĩɣure ĩhamehtu mahipɔ. Eropigu òpa arĩpɔ:

—Merogā duhyaa mũre mũ ĩpehoboro. Árĩpehrerire mũ yare duaque. Eropigu árĩpehreri mũ wajatarare mojomorocurāre oque. Mũhɔ eropiicū baja òari mũmarogue Goāmɔ pohroguerē árĩyuroca. Tuhajanugu yɔ mera majagɔ árĩbɔ arĩque, arĩpɔ Jesu ĩɣure.

²² Wũaro opagɔ arĩpɔ ĩɣɔ. Eropigu Jesu ĩɣure eroparĩcū peegu ĩɣɔ oparire mojomorocurāre odiabigu, turaro bujawere, suābiri waha wapɔ.

²³ ĩɣɔ bujawere wacū ĩagu Jesu majinugaja ĩɣɔ buherāre ĩha òpa arĩpɔ: —Doberi oparā Goāmɔ ĩɣɔ opu árĩroguere erā wadiacū diasaa áhřaa, arĩpɔ erāre.

²⁴ ĩɣɔ eroparĩcū peerā erāpɔ pee uca waha pee masibiriñorā. Eropa arĩtuha Jesu dipaturi werepɔ erāre:

—Yu acawererã, árîpehrerã “Yu gamero yu opari mera ta ðaro tariguca,” arî pepirã Goãmu ïgu opu árîroguere erã wacũ diasataria. ²⁵ Camellopu awiru gobegãgue ïgu ñajatariwereadiacũ masiya mara ïgure. Eropa ta doberi opagu ïgu Goãmu mera ðaro árîgu ïgu opu árîroguere ïgu wacũ diasa ãhraa, arî werepu erãre.

²⁶ ïgu eroparicũ peenjarã ïhamaria wanijarã, erã basi ðpa arîñorã:

—Yaho. ïgu arîro dopa ta diaye árîcũ ne yujugu masure taubiribocumi Goãmu ïgu pohro wamorãre, arîñorã erã erã basi.

²⁷ Erã eroparicũ peegu Jesu erãre ïhabeo ðpa arîpu:

—Masa erã bocaturo erã ðaro iiri mera tarimasibeama. Goãmu pohroge wamasibeama. Goãmu dihta masare peamegue wabonirãre taumasimi ïgu pohro wamorãre. ïgu árîpehrerire ðaro iimasipehocãmi, arîpu Jesu erãre.

²⁸ ïgu eroparicũ peegu Pedro ïgure ðpa arîpu:

—Peenique. Guapu árîpehreri gua yare apicãbu mu mera wamorã, arîpu ïgu Jesure.

²⁹ ïgu eroparicũ Jesu ðpa arîpu:

—Diaye arîgu iiaa muare. Árîpehrerã ðari buherire yaha árîburire iimorã mua wirire, mua pagu porãre, mua pagu sumarãre, mua porãre, mua poerire apirã wuaro wajatarãca mua dohpaguere. ³⁰ Eropirã mua wirire, mua pagu porãre, mua pagosã nomere, mua porãre, mua poerire ero core mua opadiro tauro dohpaguere baja oparãca mua ñero tarirã árîquererã. Eropirã gajirã muare ñero iirãcoma. Eropirã puhruague arîpehrerinuri Goãmu mera árîrãca. ³¹ Dohpaguere bajarã oparã árîñirã irisubure bu árîrã dujacãrãcoma. Eropirã dohpaguere bajarã bu árîñirãpu oparã dujarãcoma daja, arî werepu Jesu erãre.

Dipaturi Jesu ïgu sîriburiñere, ïgu masa muriaburiñe sãre wereñumi
Mt 20.17-19; Lc 18.31-34

³² Eropi erã mague majaa, Jerusalengue majarã iinorã. Jesu erã coregã muhtapu. ïgu eropa muhtacũ ïarã ïgu buherã ïha uca wañorã. Eropirã erã puhru nurusiarãpu guiro mera ïgure nurusiañorã. Eropigu Jesu doce ïgu buherã seyarore sihubeo, masa ïgure iiburire werenugapu daja erãre.

³³ —Peeque yure. Dohpaguere Jerusalengue warã iiaa mari. Erogue masa yu masure Goãmu ïgu obeodigure yure ñeha, pahia oparãre, judio masare buherã sãre yure orãcoma. Eropirã yure wejedorerãcoma erã. Eropa wejedorerã judio masa árîbirãre orãcoma yure. ³⁴ Erã eropa ora puhru erã yure wereya, disico ehosũ tãrarãcoma. Tuhaja yure wejẽrãcoma. Eropigu yu sîrira puhru uhrenu puhru masa muriaguca, arî werepu Jesu.

Santiago, Ñu mera Jesure serẽñuma
Mt 20.20-28

³⁵ Eropi Santiago, Ñu mera Jesu pohrogã ejarã erã gamerire serẽñorã ïgure. Erã Zebedeo porã arîñorã. Eropirã ðpa arîñorã:

—Buhegu, gua serẽro dopa ta guare iique muhu, arîñorã erã Jesure.

³⁶ —¿Yuhu duhpicũ gahmeri mua? arîpu Jesu erãre.

³⁷ —Muhu árîpehrerã wecague opu árîgu guare mu waï mera dorerã acuque. Yujugure mu diayepu, gajigure copu doboque guare. Mu mera oparã gua árîboro dopa iique, arî serẽñorã erã Jesure.

³⁸ Erã eroparicũ peegu ðpa arî werepu Jesu:

—Mua ñero tariborore masibiriquererã õpa arĩ serẽa mua yure. ¿Dohpaguere yu ñero tariboro dopa ta mua sã ñero tarirã yujuro bojebocuri mua? ¿Yure erã ñero iiboro dopa mua sãre ñero iicũ yujuro bojemasibocuri mua? arĩ serẽpipu Jesu erãre.

³⁹ —Yujuro bojerãca, arĩ yuhriñorã.

Erã eroparicũ Jesu õpa arĩ werepu:

—Yu ñero tariboro dopa ta mua sã ñero tarirãca. ⁴⁰ Eropa mua tarimorã arĩquerecũ ta, yu mera doremorãre beyemasibea yuhu. Irire yuhu Pagu amutuhami. Eropirã igu beyenirã dihta yu diayeru yu copu doarãcoma, arĩpu Jesu.

⁴¹ Santiago, Ñu sã erã oparã arĩburire Jesure serẽcũ gajirã diez buherã peerã, erã mera guañorã. ⁴² Erã eropa guacũ ñagu, Jesu igu buherãre sihu gameneo õpa arĩpu:

—Goãmure masibirã oparãpu erã masare dorerã, pũriro mera dorema.

⁴³ Mupã ne eropa iisome mua basi. Mua mera majagu opu arĩdiagu, arĩpehrerã igu mera majarãre itamugu arĩporo. ⁴⁴ Eropigu arĩpehrerãre doregu arĩdiagu, erã pohro majagu arĩro dopa ta arĩporo. ⁴⁵ Eropa arĩgu tiiaa yu sã. Masare dorebiragu arigu iibiribu. Yuhu masu Goãmũ igu obeodigu arĩqueregu ta, i yebaguere masare itamugu arigu iibu. Eropigu masa bajarã erã ñero iira dipuwajare siribasagu arigu iibu. Eropigu erã peamegue wabonirãre taugu arigu iibu, arĩpu Jesu erãre.

Bartimeore, cuiiri ihajabigure ñacũ iĩnumi Jesu

Mt 20.29-34; Lc 18.35-43

⁴⁶ Eropi erã Jericógue ejañorã. Eropirã iri macague arĩnirã Jesu igu buherã masa bajarã mera wañorã. Jesu wari maha turogue yujugu masu cuiiri ihajabigu doapu. Igu Bartimeore waicugu Timeo magu arĩpu. Igu ma turogue doagu umuri nucu masare niyerure serẽmuripu. ⁴⁷ Eropigu ero doanijagu masa “Jesu Nazare majagu ahrimi,” erã aricũ peepu. Eropa peenijagu õpa arĩ gaguiniguipu:

—Jesu, opu Davi muru pãrami masare taubu mojomoro ñaque yure, arĩ gaguiniguipu Jesure.

⁴⁸ Igu eropa arĩ gaguiniguicũ peerã masa bajarã Bartimeore “Ejarimaricãque,” arĩ turiñorã. Erã eropa arĩ turiquerecũ, igupu igu ero core igu gaguiniguiddiro tauro gaguiniguipu daja.

—Jesu, opu Davi muru pãrami masare taubu mojomoro ñaque yure, arĩ gaguiniguipu daja.

⁴⁹ Igu eroparicũ peegu Jesupu dujanugaja:

—Sihubeoque igure, arĩpu. Igu eroparicũ peerã erãpu igu cuiiri ihajabigure sihugãñorã.

—Mucubirique. Wahgãnugajaque. Igu mure sihumi, arĩñorã erã igure Bartimeore.

⁵⁰ Erã eroparicũ peegu igu omasiarĩñere tuweapi, buhri tarimagã Jesu pohrogue ejanugajapu. ⁵¹ Eropigu Jesu serẽpipu igure:

—¿Dohpa yuhu mure iicũ gahmeri muhu? arĩ serẽpipu Jesu igure.

—Yu opu, yure cuiiri ñacũ iique, arĩpu igu cuiiri ihajabigupu.

⁵² —Mu yure umupeonijagu õagu wahaa. Eropigu wanisa, arĩpu Jesu igure.

Igu eroparicũ ta cuiiri ihajabigu õaro ñha wapu. Õagu wanijagu Jesu mera mague nurusia wahgã wapu.

11

Jerusaléngue ejañumi Jesu
Mt 21.1-11; Lc 19.28-40; Jn 12.12-19

¹ Eropii erã Jerusaléngue ejaboro coregã, Betfagé maca pohrogã, Betania maca pohrogã ejamuhtañorã. Iri macari utãgu Olivo waicudigu gubuye árïyoro. Eroque ejagu perãre ïgu buherãre Jesu obeogu õpa arïpu:

² —Si macague waque. Eroque ejarã mata burrogãre erã dirinugudigugãre bocajarãca. Gajirã erã peyaya marigu árïcumi. ïgure boca ja ïgure diriradarire pãa yure aïgãribasaque. ³ Mua eropiicũ ïagu burrogã opu “¿Duhpimorã burrogãre pãri?” ïgu aricũ peerã õpa arï yuhrique ïgure: “Mari tïgu burrogãre gamebeoniami dohpa. Eropigu dohparagã wiagucumi ïgure,” arï wereque ïgure, arï weredore obeopu ïgu buherã perãre.

⁴ ïgu dorebeonirã waha, wihi pohro árïri mare burrogãre disiporo erã dirinugudigugãre bocañañorã. Boca ja ïgure erã diriradarire pãñorã.

⁵ Eropirã ïgure erã pãcũ ïarã ero niguinirã serëpiñorã:

—¿Duhpimorã mua diriradarire pãri burrogãre? arï serëpiñorã.

⁶ Erã eroparicũ peerã erãpu Jesu ïgu arïdiro dopa ta wereñorã erãre serëpirãre. Erã eropa arï wercũ peerã erã ero niguinirãpu “Aïgãque,” arïñorã erãre. ⁷ Eropirã erã burrogãre Jesu pohroque aïgã wañorã. Erã aï ejara puhru suhri ïguã weca erã peotuhacũ ïagu Jesupu ïguã wecague maribejapu wabu. ⁸ Eropirã masa bajarã erã peyari suhrire tuwea aï ïgu warï maha deco sëopi muhtañorã Jesure umupearã. Gajirãpu püricuri dũpurire poerigue erã aïgãrira dũpurire apimuhtañorã “Õari maha árïporo,” arïrã.

⁹ Eropirã ïgu core warã, ïgu puhru arirã sã õpa arï gaguiniñorã:

—Ïre umupearã. Ihĩ Goãmu ïgu obeodigu õaro ariporo. ¹⁰ Mari ñecũ Davi mura opu ïgu arïdiro dopa ta õaro ariporo. “Ûmaro majagu turagu àhrimi,” arï umupearã, arï gaguiniguiniñorã erã.

¹¹ Eropigu Jesu Jerusaléngue ejapu. Ejagu Goãmu ya wihigue ñajajagu, iri wihi majare árïpehrire ïapehocãpu. ïatuhaja “Ñamicague àhraa. Ûmuñarigã ta àhraa. Ina warã,” arïpu Jesu. ïgu buherã mera Betaniague waha wañorã.

Jesu higeragu waicudigure sïrdoreñumi
Mt 21.18-19

¹² Eropi gajinu erã Betaniague árïñirã Jerusaléngue dujariñorã daja. Eropa dujaricũ Jesupu oaboa wapu. Eropa oabogau yoarogue niguidigure higeragare õaro püricudigure ïanijagu irigu dũcare amagu waripu. ¹³ Dũca mariyoro. Dũcacuribusu árïbiriya. Püri dihta opayoro. ¹⁴ Eropigu dũca maricũ ïagu õpa arïpu:

—Ïrigu dũcare masa ne dipaturi babiricãporo. Ne dũcacubiricãporo, arïpu Jesu.

ïgu eroparicũ ïgu buherãpu peeñorã.

Jesu Goãmu wihire Goãmu mera wereniguiri wihire iidoreñumi
Mt 21.12-17; Lc 19.45-48; Jn 2.13-22

¹⁵ ïgu eropiira puhru erã Jerusaléngue erañorã. Eragu Jesu Goãmu ya wihigue ñajapu daja. Ñajajagu doberi duarãre, asürãre bocajagu cohã wiucãpu. Eropigu niyerure game gohroto doarã ya mesarire yomemuju

aĩ mehpĩ behomurĩpu. Bujare duarã erã doari p̄rori sãre eropa ta iĩpu.

¹⁶ Eropĩgu Jesu Goãmu wihiguere gajĩnore aĩ ñajadorebirĩpu masare.

¹⁷ Eropĩgu Jesu õpa arĩ buhepu erãre:

—Õpa ãhraa Goãmu yare erã gojarapũgue: “Yaha wihi Goãmu mera werenĩguiri wihi waĩcuroca. Eropĩro arĩpehrero majarãgue yu mera erã werenĩguiri wihi arĩroca,” arĩ gojañuma Goãmu werenĩguirire. Goãmu eropa arĩquerecũ ta, muapu i wihire Goãmu wihire duadoarã bu game yajarã iiaa, arĩpu Jesu erãre.

¹⁸ Īgu eropa arĩ buhecũ arĩpehrerã masapu pee ucapehrea wañorã. Eropirã pahia oparã, judio masare buherã mera ĩgure gũĩ arĩñorã. Eropirã erã ĩgure wejẽburire guñamaañorã. ¹⁹ Erã eropiicũ ñamicague Jesu ĩgu buherã mera iri maca arĩnirã waha wañorã.

Higueragu s̄ria wayoro

Mt 21.20-22

²⁰ Eropirã boyo dijaricũ mague majarirã higueragure ñañorã daja. Irigu nugurĩgue s̄rinuga s̄riadiũgu arĩcũ ñañorã. ²¹ Irĩgure ĩagu Pedropu õpa arĩpu:

—Buhegu, ĩaque. Irigu higueragupu mu s̄ridoredigupu s̄ria waya, arĩpu Pedro.

²² Īgu eroparĩcũ Jesu werepu erãre:

—Goãmure umupeoturaque mua. ²³ Diaye arĩgu tiaa muare. Mua Goãmure õaro umupeori mera irigu utãgure “Dua aĩ wuariyague cóadĩgu arĩporo,” mua Goãmure arĩcũ, mua arĩdiro dopa ta waroca. “Yu serẽro dopa diaye ta eropa iigucumi,” mua arĩ guñacũ, “Goãmũ iisome,” arĩbiricũ, mua serẽdiro dopa ta Goãmũ iigucumi. ²⁴ Eropĩgu irire weregura muare. Goãmũ mera werenĩguirã, ĩgure serẽrã, “Yu serẽro dopa ta eropa waroca yure,” arĩ guñaque. Mua eropiicũ ĩagu Goãmũ mua serẽrere ogucumi. ²⁵ Eropirã Goãmure mua serẽboro core gajirãre erã muare erã ñero iirare cãdijique. Gajirã erã ñero iicũ mua guarare duhuque. Mua eropiicũ ĩagu mari Pagu umaro majagu mua ñero iirare ĩgu sã cãdijigucumi. ²⁶ Muare ñero iirare mua cãdijibiricũ ĩgu sã mua ñero iirare cãdijisome, arĩpu Jesu erãre.

Jesure doredigure ĩgure serẽpiñuma pahia oparã, judio masare buherã, murã mera

Mt 21.23-27; Lc 20.1-8

²⁷ Īgu eropa arĩra puhru erã Jerusalengue wañorã daja. Eropirã Jesu Goãmũ wihigũe ĩgu curicũ ĩarã, pahia oparã, judio masare buherã, murã mera ĩgu pohrogue erarã ĩgure serẽpiñorã:

²⁸ —¿Noa doreri mera irĩnore ĩgu iiri muhu? ¿Noa mare Goãmũ wihi duanirãre cóadoreari? arĩ serẽpiñorã erã Jesure.

²⁹ Erã eroparĩcũ Jesu yuhripũ:

—Muapure serẽpimuhtagura. Õaro mua yuhricũ yu sã muare yuhrigura. ³⁰ ¿Ñu masare ĩgu waĩyecũ noano ĩgure waĩyedoremuriyuri mua pepicũ? ¿O Goãmũ doreyuri? ¿O masapu doremuriyuri mua pepicũ? Yure wẽreque, arĩpu Jesu erãre.

³¹ Īgu eroparĩcũ peerã erãpu erã basi game õpa arĩ werenĩguĩñorã:

—¿Dohpa arĩ yuhrirãcuri mari? “Goãmũ Ñure doredigu arĩñumi,” mari arĩcũ, “¿Goãmũ Ñure ĩgu dorequerecũ ta duhpirã ĩgu wererare peebirari

muapɔ?” arɪbocumi Jesu marire. ³² Oã masapɔ “Diaye ta Ŋu Goãmu yare weremuhtadigu árɪmi,” arɪ pepima erã. Erã eropa pepirã, “Ŋu ɪgu waɪyecũ Goãmupɔ ɪgure doredigu árɪbiriñumi,” mari arɪcũ, masapɔ mari mera guarãcoma, arɪñorã erã basi.

³³ Eropirã erã Jesure òpa arɪ yuhriñorã:

—Ŋure waɪyedoredigure gua masibea, arɪñorã erã Jesure.

Erã eroparɪcũ òpa arɪpɔ Jesu.

—Irisubu tamerare yu sã mua serẽpirare werebea muare. Yu iirire idoredigure werebea muare, arɪpɔ Jesu erãre.

12

Ŋerã mohme corerã iira queorire wereñumi Jesu buhebu
Mt 21.33-46; Lc 20.9-19

¹ Eropi Jesu queori mera buhenugapɔ daja erãre.

—Yeba opɔ árɪñumi. Iri yebare ɪgu ya iguidarire oteñumi. Otetuha sãrirore nugu, ɪguire erã cahra bujuburi gobere seañumi. Pohe decogue umari wihigã sãre iñumi ihadibuma òaro. Eropigu gajirãre ɪgu ya pohe deco mera apiñumi erã mohme corera waja. Eropigu iri pohere erãre mohme coreoretuhaja gaji yebague waha wañumi ɪgu. ² Puhru igui ñirisubu arɪcũ pohe opɔ ɪgu pohro majagure ɪgu ya pohe mohme corerã pohrogue obeoriñumi. Pohe maja ɪgu ya oterɪ ðucare ɪgu ya sero maja ðucare aĩdoregu obeoriñumi ɪgure. ³ Eropirã pohere mohme corerãpɔ ɪgu pohro majagure ñeha pañuma. Eropiituha ɪgu ya igui tõrire obiriqererã dujadoreñuma ɪgure. ⁴ Eropigu pohe opɔ gajigu ɪgu pohro majagure obeoriñumi daja. Eropirã pohere mohme corerãpɔ ɪgure ɪgu dipurure camɪ moa ñero iñuma ɪgu sãre. ⁵ Gajigu ɪgu pohro majagure obeocũ ɪgupure wejẽcãñuma. Gajirã sãre bajarãre eropa dihta iñuma. Gajirãre pa gajirãre wejẽñuma erã.

⁶ Eropigu pohe opɔ magu dihta duhyañumi. ɪgu ta ɪgu magu ɪgu mahigu árɪñumi. Eropigu ɪgu magure obeoñumi pare erã pohrogue, “Yu magupure umupeorãcoma,” arɪgu. ⁷ ɪgu òpa arɪ pepiquerecũ, erã pohere corerãpɔ ɪgu magu arɪcũ ɪha, òpa arɪ wereniguiñuma: “Pohe opɔ magu àhrimi. ɪgure wejẽcãrã mari. Eropiro i pohe mari ya pohe dujaroca,” arɪ wereniguiñuma erã erã basi. ⁸ Eropa arɪrã ɪgure ñeha wejẽ, pohe turogue aĩgã cõacãñuma erã ɪgure, arɪpɔ Jesu erãre.

Eropa arɪtuhaja Jesu erãre serẽpipɔ:

⁹ —Ne, ¿pohe opɔ dujarigu dohpa iigucuri ɪgu ya pohere mohme corerãre? arɪpɔ Jesu. Òpa iigucumi erãre, arɪpɔ. ɪgu erãre wejẽ gajirãpɔre pohere mohmedoregucumi, arɪpɔ Jesu erãre. ¹⁰⁻¹¹ ¿Goãmu yare erã gojarapũgue òpa arɪrɪre irire buhebiriri mua? Òpa arɪ gojañuma: ɪhɪ Cristo utãye iro dopa àhrimi. Masa Cristore gamebirãcoma. Erã gamebiriquerecũ Goãmu ɪgure beye opɔ acumi. Goãmupɔ ire iimi. ɪgu eropa iicũ ɪarã “Òataria,” arɪ pepia mari, arɪ gojañuma iribojegure.

¿Irire ne buhebiriri mua? arɪpɔ Jesu erãre.

¹² ɪgu eroparɪcũ peerã pahia oparã, judio masare buherã, murã mera òpa arɪ pepiñorã: “Jesu i queorire weregu ‘Erã ñerã mohme corerã iro dopa àhrima,’ marire arɪ weresãgu iicumi,” arɪ pepiñorã. Eropa arɪ pepirã

Jesure ñeadiariñorã. Eropa ñeadiaquererã, masapu Jesure gamerã mari mera guari, arĩrã masare güi arĩñorã. Eropa güirã ñgure cohãgã wañorã.

Fariseo masa, Herode ya curu majarã mera gobierno maja wajayerire serẽpiñuma Jesure

Mt 22.15-22; Lc 20.20-26

¹³ Waha, erã mera majarãre yujurãyerire fariseo masare, Herode ya curu majarã sãre Jesure serẽpiñadore oboñorã daja. Erã Jesure baja serẽpiri mera ñgu gajiropa yuhricũ weresãmorã iiriñorã. ¹⁴ Eropirã Jesu pohro eja ñgure serẽpiñorã:

—Buhegu, diaye mu wereniguigu guyari marigu mu arĩcũ masia gaa. Eropigu opu arĩcũ sãre bu arĩgu ñgu arĩcũ sãre muhu yujuropa ñhaa. Eropigu Goãmu yare diaye muhu werea. Masa suacũ sãre erã suabiricũ sãre queoro werea. Eropigu guare wereque: ¿Roma majagu arĩpehrerã tauro opu arĩgure, gobierno majare marire wajayero gahmeri mu pepicũ? ¿Mari doreripu wajayedoreri mu pepicũ? arĩ serẽpiñorã erã Jesure.

¹⁵ Erã eropa arĩ serẽpicũ peegu erã guyarire erã ñero iidiarire masigu õpa arĩ yuhripu erãre:

—¿Duhpirã ya ñero wereniguicũ peediari mua? Dohparagã niyerusere aĩgãrique irisere ñamorã, arĩpu Jesu erãre.

¹⁶ Ñgu eroparicũ peerã yujuse niyerusere aĩgãriñorã. Erã irisere aĩ eracũ ñagu Jesu serẽpipu erãre:

—¿Nihino gohra masu tuhyari isere? ¿Noa waĩ tuhyari isere? arĩ serẽpipu ñgu.

—César waĩcugu masa tauro opu masu ñgu waĩ sã tuhyaa irisegue, arĩ yuhriñorã erã.

¹⁷ Erã eroparicũ Jesu werepu erãre:

—Irisubu tamerare masa tauro opu arĩgu yare ñgure oque. Goãmu yare Goãmupure oque, arĩpu Jesu. Ñgu eroparicũ pee uca wañorã.

Saduceo masa Goãmu ñgu sĩrinirã masurire serẽpiñuma Jesure

Mt 22.23-33; Lc 20.27-40

¹⁸ Eropi yujurãyeri Saduceo masa Jesu pohroguere erañorã. Saduceo masapu “Goãmu sĩrinirãre masusome,” arĩ pepirã arĩñorã. ¹⁹ Eropirã erã õpa arĩñorã Jesure:

—Buhegu, marire õpa arĩ gojadigu arĩmi Moise: “Yujugu ñgu ñgu marapocugu porã mariqueregu ñgu sircũ ñagu, ñgu pagu magure ñgu ñgu marapo arĩdigore marapocuro gahmea. Eropigu ñgu ñgu muru ñgu ñgu ñgu porãcubodiro dopa ta porãcuro gahmea ñgu pagu magure. Eropirã ñgu ñgu muru porã iro dopa arĩrãcoma,” arĩdi arĩmi Moise, arĩñorã.

²⁰ Ire erã arĩtuhaja i queorire werenemoñorã Jesure.

—Yujugu porã siete arĩñorã. Eropii erã ñgupu marapocu, porã marigu ta sĩa wapũ. ²¹ Eropigu gajigu ñgu pagu magu sã ñgu ñgu muru marapo arĩdigore marapocupu. Ñgu eropa marapocura puhru ñgu sã ñgu ñgu muru iro dopa ta porã mariqueregu ta sĩa wapũ. Eropigu ñgu pagu magu ñgu ñgu muru iro dopa porã mariqueregu ta sĩa wapũ. ²² Eropa dihta wañorã yujugu porã. Ne porã mariquererã sĩripehrea wañorã. Erã marapo sã erã puhru sĩa wapũ pare, erã arĩtuhaja Jesure serẽpiñañorã.

²³ ¿Ne, Goãmu arĩpehrerã sĩrinirãre ñgu masucũ nihino marapo gohra arĩgocuri igo? Erã arĩpehrerã igore marapocunirã arĩñorã. ¿Eropigo nihino marapopũ arĩgocuri igo? arĩ serẽpiñorã erã Jesure.

²⁴ Jesu yuhripu eräre:

—Goãmu yare erã gojarapũ wereniguirire ne masibea maa. Eropirã Goãmu iŕu turari sãre ne masibea maa, arĩpu Jesu. Eropiro maa pepiripu diaye árĩbeaa. ²⁵ Sírinerã mura erã masa m̄riara puhru erã anyua iro dopa àhrima. Erã uma nome mera marapocubeama eroguer. ²⁶ Sírinerã erã masa m̄riaboropure muare weregura, arĩpu Jesu. Irire Moise òaro werepehocãnumi. Iri yucugugãgue ùjurisubu árĩgu Goãmu òpa wereñumi Moisere: “Yuhũ Abrahã, Isaa, Jacobo, erã opu àhraa,” arĩ wereñumi Goãmu iribojegu. ²⁷ Erã s̄irira puhrugue “Erã opu ta àhraa,” arĩ wereñumi Goãmu. Eropirã erã s̄irinerã mura iŕu masunirã árĩrã erã ojocarirã àhrima. Eropirã “Sírinerã masasome,” arĩ pepirã diaye pepibea maa, arĩpu Jesu eräre.

Ōtariariñere doreriñere wereñumi Jesu
Mt 22.34-40

²⁸ Eropigu yujugu judio masa erã buherã mera majagu erã pohrogue eraa, erã game wereniguicũ peepu. Jesu iŕu òaro yuhirire peegu serẽpipu ìgure.

—¿Goãmu ya doreri òtariaro doreripu diñe doreripu àhriri m̄u pepicũre? arĩ serẽpipu iŕu Jesure.

²⁹ Jesu ìgure yuhripu:

—Iñe doreriñe òtariariñe òpa àhraa. “Israe masa peeque. Goãmu mari Opu yujugu ta àhrimi. ³⁰ B̄urigã maa s̄iporã mera, maa turari mera, maa òaro guñari mera Goãmure maa Opure mahique,” arĩmi Goãmu. ³¹ Iñe doreriñe puhru gaji doreriñe sã òataria. “M̄u basi mahiro dopa ta m̄u pohro árĩrã sãre mahique,” arĩmi Goãmu. Iri pe doreri ta árĩpehreri gaji doreri tauro àhraa, arĩ werepu Jesu ìgure.

³² Iŕu eroparicũ judio masare buhegu òpa arĩ yuhripu:

—Eropa ta àhraa, buhegu. Diaye ta arãa m̄uhũ. Goãmu yujugu ta àhrimi. Gajigu iŕu iro dopa árĩgu marimi. M̄u arĩri diaye ta àhraa. Goãmure turaro mari s̄iporã mera, mari turari mera, mari pepiri mera, mari òaro guñari mera ìgure mahiro gahmea. Mari pohro árĩrãre mari basi mari mahiro dopa ta, erã sãre mahiro gahmea marire. ³³ Mari Goãmure umupeomorã waimurã wejẽ soemujuicũ òapũrica. I tauro Goãmure masa sãre mari mahicũ òataria, arĩpu iŕu Jesure.

³⁴ Iŕu pee masiri mera yuhricũ iha Jesu ìgure arĩpu:

—Merogã duhyaa mure Goãmu m̄u opure m̄u masiboro, arĩpu Jesu ìgure.

Ìgure eroparicũ gajirã peerã ìgure gũirã serẽpinemediabiriñorã pare.

¿Noano acaweregu àhriri Cristo? serẽpi ìañumi Jesu masare
Mt 22.41-46; Lc 20.41-44

³⁵ Eropigu Goãmu wihigue buhegu òpa arĩpu Jesu:

—“Cristo Davi mura pãrami arigucumi,” arĩ buhema marire buherã. ¿Duhpirã eropa arĩ buheri erã? Erã òaro masiboro duhyania erãre dohpa.

³⁶ Davi iŕu basi Espiritu Santo ìgure dorero dopa ta òpa arĩ wereñumi: Goãmu yu opure òpa arãmi. “Ohõ yu diayepu yu mera dorebu doaque.

Eropigu mure ìhaturirãre mure tarinugabasaguca yuhũ,” arĩmi Goãmu yu opure, arĩ gojañumi Davi mura.

³⁷ Eropa arĩ gojagu Davi mura opucupu Cristore “Yu opu,” arĩgu. Cristo Davi mura opu àhrimi. Eropigu Davi mura Cristo ñecu árĩqueregu opucũnumi Cristore, arĩ werepu Jesu.

Īgu eropa arī buhecū bajarā masa mucubiriri mera peeñorā ĩgure.

Jesu masare buherā erā ñero iirire wereñumi

Mt 23.1-36; Lc 11.37-54; 20.45-47

³⁸ Eropigu ĩgu buhenemogu ōpa arīpu:

—Masare buherā erā ñero iirire ōaro ĩaque. Eropirā erā iiro dopa ĩbircāque. Erā yoari suhri saña erā masa erā ĩhabeoro cuhrima. Doberi duarogue gajirā umupeori mera erāre bocatīri serēcū gahmema erā.

³⁹ Eropirā mari buheri wiriguere ōari doari dihtare doadama. Eropirā bosenuri árīcū sāre oparā erā doari dihtare gahmema erā. ⁴⁰ Eropirā erā wapeweyarā nome erā wajamocū ĩha erā ya wirire emacāma erā nomere. Eropa erāre mojomoro ĩabiriquererā erā masa ĩhurore yoari boje Goāmure serēma, “Gua Goāmure ōaro umupeoa,” arī gūyarā. Erā eropa iira dipuwaja gajirā tauro dipuwaja moagucumi erāre, arīpu Jesu erāre.

Wapeweyo Goāmure igo apirare wereñumi Jesu

Lc 21.1-4

⁴¹ Eropigu Jesu Goāmū wihi maja erā amuburi niyeru gameneori comoro pohro doapu. Ero masa erā niyeru sácū ĩapu. Doberi oparā iri comorogue niyeru pagari sāa tari wahgāmuriñorā. ⁴² Eropigo wapeweyo buro iri comorogue ahri pesegā sāpo. Pese yuju centavo maja āhrraa. ⁴³ Iriserire igo apicū ĩagu Jesu ĩgu buherāre sihubeo arīpu:

—Diaye arīgu iiaa muare. Igo wapeweyo mojomorocugo niyeru sāri comorogue igo yare sāgo gajirā árīpehrerā erā sādīro tauro sāmo igo. ⁴⁴ Gajirā doberi oparā erā wuaro oquerecū ta erā ya wuaro duhyaa. Igotu mojomorocugo árīquerego ta, árīpehreri igo bari asūborare Goāmū ya árīburire opehocāmo, arīpu Jesu.

13

—Goāmū wihi cóāsūroca, arī yuñumi Jesu

Mt 24.1-2; Lc 21.5-6

¹ Eropigu Goāmū wihiguere erā wiriacū ĩagu yujugu erā buherā mera majagu ōpa arīpu:

—Buhegu, ĩaque. I wihi Goāmū wihi maja wiri utā mera erā iira wiri ōari wiri āhrraa, arīpu ĩgu.

² Īgu eroparīcū Jesu werepu erāre:

—I wihi maja wiri dohpaguere ĩaraa mua. I wihi árīpehreri mari ĩara i utā sā cohmorehrea waroca. Ne yujuye utāye dujasome iri wiri maja, arīpu Jesu.

I utū pehrebore wereñumi

Mt 24.3-28; Lc 21.7-24; 17.22-24

³ Eropi Jesu Olivo waicudigu utāgugue Goāmū wihi diaye maja árīdigugue ejaapu. Ero doapu. Ero Pedro, Santiago, Ñu, Andre mera erā seyaro árīrā, erā ĩgure serēpiñorā:

⁴ —Wereque guare. ¿Dohparīcū eropa warocuri mū arīdiro dopa waro? ¿Pehreburinū coregāre dohpa wanugacū ĩarācuri gua? arī serēpiñorā erā Jesure.

⁵ Jesu yahripū:

—Ōaro ii yuque mua. Eropirā gajirā erā guyarire peebiricāque mua. ⁶ Bajarā masa “Cristo āhraa yuħu,” arī guyarā árīrācoma. Erā eropa guyacū peerā masa bajarā Goāmū yare duhurācoma.

⁷ Mua pohrogā gajirā masa erā gamewejēcū peerāca. Eropirā yoarogue majarā erā sā erā gamewejēcū peebeorāca mua. Eropa peequererā ta ne irire wuaro bujawere pepibiricāque. Eropa wamuħtaroca. Eropa wacū pehreburiñ duhyaniroca doħpa. ⁸ Irisubure yuju yeba majarā gaji yeba majarā mera gamewejērācoma. Eropirā yujugu opu yarā gajigu opu yarā mera gamewejērācoma. Eropiro bajasuburi i yeba ñohmeroca. Eropirā bajarā masa oa mera sīrirācoma. Eropa ñero tariquerecū i yeba majarāre tauro erā ñero tariboro duhyaa doħpa. Ñero tarinirācoma doħpa.

⁹ Ōpa wacū ĩarā mua basi ōaro iique. Gajirā muare ñeha ñero iidorerā orācoma gajirā oparāre. Eropirā mua acawererā judio masa erā buheri wirigue sāre muare parācoma. Eropirā macari majarā oparā pohroque, erā tauro oparā pohroque sāre aīgārācoma muare muare dipuwaja moamorā. Eropirā erā muare erā pohroque aīgācū yaha buherire wererāca mua erā sāre. ¹⁰ Eropiro pehlerinū árīboro core árīpeherrerāre ōari buherire weresūroca. ¹¹ Eropirā muare dipuwaja moadorerā erā oparā pohroque erā aīgācū, erā oparāre mua wereniguiburire wuaro pepibiricāque. Muare erā serēpicū mua yahriburire Goāmū mera masirāca. Eropa masirā mua gamero wereniguismo mua. Espiritu Santopū muare wereniguicū iigucumi. ¹² Irisubure erā tīrā erā pagu porāre Jesu yarā erā árīcū ĩha erāre wejēdorerā oparāre wiarācoma. Gajigupū ĩgu tigure wejēdoregū oparāre wiagucumi. Eropi erā pagu sumará erā porā Jesu yarā erā árīcū ĩha erāre wejēdoregū oparāre wiarācoma. Eropirā erā porāpū erā pagu sumará erā Jesu yarā árīcū ĩha wejēdorerā wiarācoma erā oparāre. ¹³ Yure mua umupeora dipuwaja muare masa árīpeherrerā ĩhaturirācoma. Eropa muare erā ñero iiquerecū ta, muare erā ñero iirare yujuro bojerā, yure duhubiricū Goāmū muare taugucumi. Eropigu ĩgu pohroque muare opagucumi.

¹⁴ “Eropirā ñetariagure Goāmū yare goroweogure ĩarāca mua. Goāmū wihigue ĩgu niguicū ĩarāca. Ero ĩgure árībiricāro gahmea. Iribojegue Goāmū yare weremuħtayugu Daniel ĩgure were gojañumi. (Irire buhegu peeporo). Ero ĩgu niguicū ĩarā Judea yebague árīrāpū utā yucugue oma duhrigā waporo. ¹⁵ Irisubure masa ñero tarirācoma. Eropirā vojaro mera waporo. Irisubure erā wiri weca maja puurigue árīrā wihi pohecaguere erā yare aīrā wabiricāporo. ¹⁶ Eropirā irisubure gajirā erā poerigue árīrā erā ya suhrire wihigue árīri suhrire aīrā dujabiricāporo. ¹⁷ Irisubure nijiposā nome, erā porā miħrirāre oparā nome sā mojomorocurā nome dujarācoma. ¹⁸ Eropirā ōpa serēque Goāmūre: “Puhiró árīcū eropa wabiricāporo,” arī serēque ĩgure. ¹⁹ Irinurire masa ñero tarirācoma. I yebare ĩgu ĩhacūnugura puhru masa erā ñero tariri árīmuriyoro. Iri eropa árīquerecū ta árīpehleri pūriri erā ñero taridiro tauro masa ñetariaro tarirācoma pehlerinū coregāre. Eropa ñero erā tarira puhru dipaturu eropa ñero tarismo i yeba pare. ²⁰ Eropigu Goāmū i ñero tarinurire bajamenurigā árīcū iigucumi. ĩgu eropiibiricū ne yujugu masu taribiribocumi. Eropigu ĩgu beyenirā erā tariborore bajamenurigā ñero taririre apigucumi Goāmū.

²¹ Irisubure gajirāre pee masi ĩaque. “Ōho āħrimi Cristo,” erā árīcū

eräre peebiricãque. “Ero àhrimi Cristo,” erã aricũ sãre peebiricãque.
²² “Cristo àhraa,” arĩ guyarã, “Goãmu yare weremuhtarã àhraa,” arĩ
 guyarã áricãrãcoma irisubure. Eropirã Goãmu ìgu beyenirãre guyarã erã
 deyoro moarire ii ìhmurãcoma. Goãmu yare erã cóacũ iidiarã iirãcoma
 erã guyari masa. ²³ Ire árípehrerire wereyumuhtaa muare iri eropa
 waboro core. Eropirã ôaro pee masi yuque mua, arĩpũ Jesu ìgu buherãre.

Jesu i yebaguere ìgu dujariborore wereñumi

Mt 24.29-35, 42-44; Lc 21.25-36

²⁴ Eropa arĩtuhagũ ôpa arĩ werepũ Jesu erãre:

—Irinũri erã ñero tarira puhru, abe umu majagu, ñami majagu sã
 boyo duhurãcoma. ²⁵ Erã eropa wacũ, necã dipuru yuhridijariroca.
 Eropiro umaro maja sã yeba sã burigã ñohmeroca. ²⁶ Irisubu ta yuhũ
 masũ Goãmu ìgu obeodigũ ariguca. Eropiro umarogue yũ turari mera
 yũ gosesiriri mera umaro maja imica weca i yebaguere yuhũ dujaricũ
 iarãcoma masa. ²⁷ Eropigũ yaharã anyuare árípehrero i yebaguere
 obeogura. Eropirã árípehreroguerẽ waha yaharãre yũ beyenirãre
 gameneorãcoma yũ pohroge.

²⁸ “Higueragu irigũ waricãrĩre iarã masia mua. Irigũ yucugũ pũricucũ
 iarã, “Bojori merogã duhyaa,” arĩ masia mua. ²⁹ Eropa ta irigũ waro
 dopa ta masique mua. I árípehreri yũ arĩra iri eropa wacũ iarã, “Cristo
 dujariboro merogã duhyaa,” arĩ masique mua. ³⁰ Diaye ta arĩgu iiaa
 muare. Irisubu majarã erã sãriboro core árípehreri yũ arĩdiro dopa
 waroca. ³¹ Umãro i yeba sã pehrea waroca. Yũ wereniguiripũ ne
 pehresome. Árípehreri yũ arĩdiro dopa ta eropa waha ojogorocuroca.

³² “Irinũre yũ dujariburinũre, iri hora sãre ne masibea yuhũ. Anyua
 sã irire ne masibea. Masa sã ne masibea. Yũ Pagũ dihta yũ
 dujariburinũre masimi.

³³ “Mua sã irinũre masibea. Eropirã ôaro guñatura coreque. Goãmure
 serẽque. ³⁴ Ôpa coreque mua. I queoriñe mera irire muare buhegura.
 Wihi opũpũ yorogue ìgu curiro dopa ta àhraa i. Ìgu ìgu waboro coregã
 ìgu pohro majarãre ìgu wihire coredoremi. Yujurãyerire ìgu mohmerire
 apimi. Yujugure wihi disiporo ìhadibudoregure ôaro coredoremi ìgu
 dujariborore. ³⁵ Eropigũ wahãmi. Ìgu pohro majarãpũ ìgu dujariburinũre
 ne masibea. Ìgu ñamica o ñami deco, cãreña ìgu wererĩsubu o boyoro
 ìgu aribocumi. Erã ôaro ìhacorebircũ ìgu guñaña mariro arigũ erãre
 carĩrãre bocobocumi. Wihi opũre erã ìgu dujariburinũre erã masibiro
 dopa ta mua sã yũ dujariburinũre masibea. Eropirã yure ôaro guña
 coreque. ³⁶ Guñaña mariro yũ eraborore masirã, ôaro guña coreque.
 Yũ dorerire yahare eropa iiniguirã árique. Eropirã yure ôaro coreque.
³⁷ Eropigũ muare yũ arĩro dopa ta árípehrerãre eropa arãa. Ôaro guña
 coreque, arĩpũ Jesu ìgu buherãre.

14

Pahia oparã, Judio masare buherã mera Jesure wejẽdiañuma

Mt 26.1-5; Lc 22.1-2; Jn 11.45-53

¹ Eropi irisubure Pascua bosenu core, bugabiriri pan erã baburinũ core
 penũ duhyayoro. Irisubure pahia oparã judio masare buherã mera, Jesure
 guyari mera erã ñeha erã wejẽburire game wereniguiñorã.

² —Bosenu áricũ ĩgure ñehabiricãrã. Masa gua ĩgure ñeacũ ĩarã gua gamenerenijarã gamequeãbocoma, arĩrã ĩñorã erã erã basi.

Nomeo poresuri mera Jesure pipeoñumo
Mt 26.6-13; Jn 12.1-8

³ Eropi Jesu sã Betaniague Simo cami boadi ya wihigue áriñorã. Iri wihi erã baro watope, yujugo nomeopũ alabastro mera ĩidirure poresuri nardo waicuri dicũdirure airapo. Igo airara wajacuri áriyoro. Eropigo igo irirure pãgũ Jesu dipuru weca pipeopo. ⁴ Igo eropiicũ ĩarã gajirã urugã gua wañorã.

—¿Duhpigo igo eropa iisirimaacãri? ⁵ Iri poresurire duaboañumo. Irire duago yuju bojori mohmeri waja wajataboañumo. Eropigo iri niyerure mojomorocurãre oboañumo igo, arĩñorã erã erã basi. Eropirã igore turiñorã.

⁶ Erã eroparicũ peegu Jesu erãre werepũ:

—¿Duhpirã eropa arĩri igore? Garibobiricãque igore. Igo yure ñaro iimo. ⁷ Mojomorocurã mua mera eropa áriñigucãrãcoma. Eropirã mua gamero erãre omasia. Yũpũ i yebare mua mera eropa áriñigucãsome. ⁸ Igo masiropẽ yure iiamo. Yure erã yaaboro core yũ ñapũre amuyugo poresuri mera sũhumo yure. ⁹ Eropigu diaye muare arĩgu ĩaa. Áripehrero i yebaguere, ñari buherire erã wereroguerẽ igo ñpa ĩirare wererãcoma. Erã eropa arĩ werecũ peerã masa bajarã igo ĩirare guñarãcoma.

Juda Iscariote Jesure ĩhaturirãre ĩgu ĩhmuburire erã mera wereta-muñumi

Mt 26.14-16; Lc 22.3-6

¹⁰ Irisubure Juda Iscariote doce buherã mera majagu pahia oparã pohro waha ñpa arĩpu:

—Yũhu muare weregura Jesu ĩgu árirore mua ĩgure ñeacũ, arĩpu.

¹¹ Eropirã pahia oparã irire peerã mucubiriñorã.

—Mure niyerure orãra, arĩñorã erã judare. Eropigu Juda Jesure ĩhaturirãre ĩgu erãre ĩhmuburire corenipũ.

Jesu ĩgu buherã mera ĩgu baturinũ áriyoro

Mt 26.17-29; Lc 22.7-23; Jn 13.21-30; 1Co 11.23-26

¹² Bũgabiriri panre erã baburinũ bosenu áriñugarinũ áriyoro. Eropiro ovejare Pascua majagu ári bure erã wejẽrinũ áriyoro. Irisubure ĩgu buherãpũ serẽpiñorã Jesure:

—¿Nohonogue Pascua bosenu mari baburire amudoregu obeori mũhu guare? arĩñorã ĩgure.

¹³ Erã eroparicũ Jesupũ perã ĩgu buherã mera majarãre obeopũ.

—Jerusalẽngue waque. Eroge mua ejacũ deco sorobu tuhpeogu muare bocatĩrigũcumi. ĩgu bocatĩricũ ĩgu mera waque. ¹⁴ Eropa warã ĩgu sihu ñajari wihigue ejarã, wihi opũre ñpa arĩque: “¿Nohogue yũhu, yũ buherã mera Pascua maja bariire bagũcũri?” arãmi gũa opũ,” arĩque wihi opũ. ¹⁵ Mua eroparicũ peegu umaro maja taribure mari gameri áripehreri mera erã amura taribure ĩhmugũcumi wihi opũ. Eroge mari baburire ĩique, arĩpu Jesu erãre.

¹⁶ ĩgu eroparicũ erã perã ĩgu buherã iri macague wañorã. Erã erogue erã ejacũ ĩgu arĩdiro dopa ta wayoro. Eropirã erã Pascua áricũ baburire amuñorã.

17 Eropi naidijaririsubu Jesu doce ĩgu buherã mera erã bari taribugue eroguere ejapu. 18 Eropirã erã mesague erã ba doarisubu Jesu erãre werepu:

—Diaye arĩgu iiaa muare. Yujugu mua mera majagu ta yu mera bagu ta yure ĩhaturirãre ĩhmugacumi, arĩ werepu Jesu erãre.

19 ĩgu eropa arĩ werecũ peerã erãpu burigã bujawererã ĩgure serẽpinugañorã erã yujurãyeri.

—¿Yuhu ta arĩbocuri mure ĩhmubu? arĩñorã erã Jesure.

20 —Mua yu doce buherã mera majagu ta aħrimi ĩgu. Yu baripare yu mera yoso bagu aħrimi yure ĩhaturirãre ĩhmubu. 21 Iribojegue erã yure arĩ gojadiro dopa ta yuhu masu Goãmu ĩgu obeodigu sĩriguca. Eropigu yure ĩhaturirãre ĩhmudigupu ñero tarigucumi. ĩgupure ĩgu masa dehyoabiricũ ðapũricãboya. Ñero taribiriboñumi, arĩpu Jesu erãre.

22 Eropigu Jesu erã mera barisubu panre aĩ Goãmure “Õhaa,” arĩ serẽpu. Eropa arĩgu ta irire nuha guerepu erãre ðpa arĩgu:

—Ire aĩ baque. I yu ðapu aħraa, arĩpu Jesu erãre.

23 Eropa arĩtuha ĩgu ihriripare aĩ, Goãmure “Õhaa,” arĩ serẽpu. Erãre ĩgu ocũ arĩpehrerã erã irire ihrĩñorã.

24 —I yu di aħraa. Bajarã masa erã ñero iirare cõabu sĩriguca. Eropigu yu dire cõaguca. Eropa sĩrigu Goãmũ yu Pagu “Masare ðaro ĩgura,” ĩgu arĩdiro ii ojogorocuguca. 25 Diaye arĩgu iiaa muare. Goãmũ ĩgu opu arĩrogue mama igui decore yu ihriboro core, ðre igui decore dipaturi ihrinemosome yuhu, arĩpu Jesu erãre.

Pedro “Jesure masibea,” ĩgu arĩ gũyaburiñere wereñumi Jesu Mt 26.30-35; Lc 22.31-34; Jn 13.36-38

26 Eropirã yujuñe erã Goãmũ bayariñere bayatuha, utãgu Olivo waicudigugue wañorã. 27 Eroque sihu ejagu Jesu erãre werepu:

—Dohpagã ñami mua arĩpehrerã yure cõarãca. Mua yure cõaborore ðpa ta arĩ gojamuhtañuma Goãmũ yare erã gojarapũgue: “Ovejare ĩhadibugure erã wejẽcũ waro dopa ta ĩguca. Yu eropa iicũ oveja ĩgu yarã ĩgure cohãgã warãcoma,” arĩmi Goãmũ, arĩ gojañuma. 28 Eropigu Goãmũ ĩgu yure sĩridigure masura puhru, mua core Galileague wamuhtaguca yuhu, arĩpu Jesu erãre.

29 ĩgu eroparicũ peegu Pedro ðpa arĩripu:

—Yu mera majarã arĩpehrerã erã mure cõãquerecũ yupu mure ne cõãsome, arĩpu Pedro ĩgure.

30 Jesu yuħripu:

—Diaye arĩgu iiaa mure. Dohpagã ñamire cãreña pesubu ĩgu wereboro core, mu uhresubu “Yuhu Jesure masibea,” arĩguca muhu, arĩpu Jesu ĩgure.

31 ĩgu eropa arĩquerecũ Pedro ðpa arĩ turaro busuro yuħripu:

—Mu mera yure erã wejẽquerecũ ta ne mure cõãsome yuhu, arĩ yuħripu ĩgu Jesure.

Pedro ĩgu eroparicũ peerã ĩgu mera majarã ĩgu arĩro dopa ta arĩriñorã erã sã.

Getsemanĩque Jesu Goãmure serẽñumi Mt 26.36-46; Lc 22.39-46

32 Eropii erã Getsemanĩ waicuri gorogue wañorã. Eroque ejagu ðpa arĩpu Jesu:

—Ohõ doayunque. Mũa ohõ doaropẽ sohõgue Goãmure serêniguigu wagu iiaa, arĩpu ãgu buherãre.

³³ Eropa arĩtuha Pedroke, Santiagore, Nũre sihugãpu. Eropigu ñero gũnũgapu Jesu. Eropigu ñero siporãcãpu. ³⁴ Eropa ñero pepigu ãgu mera majarãre ãgu sihugãnĩrãre arĩpu:

—Burigã ñero yu siporãcãca. Yũre turaro pũriro dopa pepica yua. Sohõnari wanigu iiaa. Ohõ dujanique. Eropirã yu mera ta tũyunque mũa sã, arĩpu Jesu erãre.

³⁵⁻³⁶ Eropa arĩtuha ãgu ero core mero wanemo, yebague mereja, Goãmure arĩpu:

—Ahu, mũhu arĩpehrerire iimasia. Eropigu yu ñero tariburire iidiabigu iibiricãque. Yu Eropa arĩquerecũ ta yu gamero dopa iibita. Mu basi masia. Mu gamero dopa iique, arĩ serẽpu ãgu Goãmure.

³⁷ Eropa arĩtuha urerã ãgu buherã pohroge eranijagu erã carĩ oyarãre ãpu. Iha Pedroke arĩpu:

—Simo, ¿carĩgu iiri mũhu? ¿Yuju hora gohra yu mera tũyutamubirari?

³⁸ Ōaro iique mũa. Mũa pepiri mera õarire iidiaraa mũa. Mũa seyaro irire iidiaquererã ta irire bocatiubeaa. Eropirã Goãmure serêniguicãque ñero mũa iibiriboro dopa, arĩpu Jesu Pedroke.

³⁹ Eropa arĩ weretuha dipaturi waha, Goãmure serẽpu daja. ãgu ero core ãgu arĩdiro dopa ta arĩ serẽpu daja. ⁴⁰ Serẽtuha dipaturi erã pohroge dujaripu daja. Eropa dujarigu carĩ oyarãre ãpu daja. Wũja pũritaricãyoro erãre. Eropirã erã Jesu “¿Duhpirã carĩri mũa?” erãre arĩcũ yuhrimasibiriõorã. ⁴¹ Eropigu dipaturi ãgu Goãmure serẽra puhru, erã pohro eraa erãre arĩpu:

—¿Mũa carĩrã soorã iiri dohpa? Iripẽta ahraa. Sihajãraro iiaa. Dohparagã yure masure Goãmu ãgu obeodigure ñerãre erã oburibusu sihajaa. ⁴² Wahgãque. Ina warã. Iãque. Yũre ãhaturirãre ãhmubu ohõ ahrimi, arĩpu Jesu erãre.

Jesure ãhaturirã peresu ñeañuma
Mt 26.47-56; Lc 22.47-53; Jn 18.2-11

⁴³ ãgu Eropa arĩ wereniguisubũ Juda doce buherã mera majagu erapu. Eropirã masa bajarã ñoserimijirire, yucure opanirã ãgu mera yujuro mera eraõorã. Erã pahia oparã, judio masare buherã, mũrã sã erã obeonirã arĩõorã. ⁴⁴ Negohrãre Jesure ãhaturirãre obu, õpa arĩtuha pu:

—Yu ãgu wayuporãre mimigu ãgu ta arĩgucumi mũa ñeabu. ãgure yu mimira puhru ñeaque. Eropirã ãgure õaro ñeaque ãgu duhribiriboro dopa, arĩ wereserepu Judapu erãre.

⁴⁵ Eropigu Jesu pohroge eragu mata wa purumujupu:

—Buhegu, ¿ãhriri mũhu? arĩ ãgure wayuporãre mimipu.

⁴⁶ ãgu eropiicũ ãrã erã Jesure ñeaõorã.

⁴⁷ Erã eropiicũ ãgu ãgu pohroge niguinirã mera majagu ãgu matamijire tuãwea aĩ, pahia opu pohro majagure ãgu gamirore tabe corocãpu.

⁴⁸ Eropigu Jesu õpa arĩpu:

—¿Mũa ñoserimijiri mera, yucu ducari mera arirã, yajari masure iro dopa mũa yure ñearã arirã iari? ⁴⁹ Ūmuri nucũ Goãmu wihigue yũhu mũare buhedoacũ, mũa yure ne ñeabiribu. Dohpaguere mũa yure Eropa ãrã i arĩpehreri Goãmu yare weremuhtanirã erã arĩ gojadiro dopa ta mũa yure iiaa, arĩpu Jesu erãre.

⁵⁰ Eropirã Jesu buherã arĩpehrerã ãgure cohã omagã waõorã.

51 Eropigu yujugu mamu Jesu puhru nurusiaripu. Omasiariñe dihta omadigu aripu. 52 Igu sare erã ñeadiacũ igu ya omasiariñere cóacã suhri marigu oma duhriã wapu.

Judio masa oparã Jesure serẽpiñuma
Mt 26.57-68; Lc 22.54-55, 63-71; Jn 18.12-14, 19-24

53 Eropii pahia opu pohrogue Jesure ai ejañorã. Iri wihiguere arĩpeherrerã pahia oparã, murã, judio masare buherã sã gamenerenorã. 54 Eropigu Pedropu Jesu puhru yoarogue iha nurusiaripu. Eropa nurusiagu igu pahia opu Caifa waicũgu ya wihire cãhmotara sãriro eja, iri sãriro pohecague ñajaa wapu. Eropigu igu iri wihire corerã surara mera peame turo sõhma doapu.

55 Eropirã pahia oparã, gajirã oparã mera gamenererã Jesure wejẽdoremorã, guyari mera erã igure dipuwaja moaborore guñamaariñorã. Erã eropa weresãburire guña bocabiriñorã. 56 Masa bajarã igure erã gamero weresãmaacãquererã erã weresãri diaye arĩbiriyo. Gajigu gajiropa arĩ, gajigu sã gajiropa dihta arĩñorã.

57 Eropirã gajirã erogue eja, Jesure weresãñorã:

58 —Ihĩ õpa arĩmi: “Yuhũ i wihire masa iira wihire, Goãmũ wihire cóãgura. Eropa cóãgu uhrenu puhru iri wihire dipaturi iigura. Iri wihi masa erã iira wihi arĩsome,” Igu aricũ gua peebu, arĩ weresãñorã.

59 Erã eropa arĩ weresãquerecũ ta iri diaye arĩbiriyo. Gajigu gajiropa arĩ gajigu sã gajiropa aripu.

60 Erã eropa arĩra puhru pahia opu erã watope wahgãnũgaja Jesure serẽpipu:

—¿Oã mure weresãquerecũ ta erãre yuhri gamebeari mũhu? ¿Mure erã weresãrire duhpigu erãre yuhri gamebeari mũhu? arĩpu igu Jesure.

61 Igu eroparicũ peequeregu ta Jesu eropa pepicãpu. Igu eropa yuhribiricũ ñagu pahia opu igure dipaturi serẽpipu daja:

—¿Cristo ta ãhriri mũhu? ¿Oãgu Goãmũ magu ta ãhriri mũhu? arĩ serẽpipu daja igu Jesure.

62 Igu eropa aricũgue ta Jesu yuhripu:

—Igu ta ãhraa. Eropirã yuhũ masu Goãmũ igu obeodigu yu Pagu turagu pohro, igu diayepu yu doacũ ñarãca mua. Eropirã umaro maja imica watope yu aricũ sare ñarãca mua, arĩpu Jesu igure.

63 Igu eroparicũ ta pahia opupu igu sañarañe suhrirore igu basi yeguecãpu gajirãre “Guataricãmi,” arĩdoregu.

—Ire weresãrãre gajirãre mari gamebeaa pare. 64 Igu basi Goãmũre igu ñero wereniguicũ peea mari. Eropirã igu ñero iira dipuwajare masituhaa mari. ¿Eropirã dohpa iirãcuri mari ire dohpaguerẽ? arĩpu pahia opu gajirã oparãre.

—Igu ñeri dipuwaja wejẽcãro gahmea, arĩ yuhriñorã erã arĩpeherrerã oparã.

65 Eropirã erã mera majarã Jesure disico ehosũ igu cuirire diricãhmotacã, igure pañorã. Patuha õpa arĩñorã igure:

—¿Noa mure pari? Ìabiriqueregu guare wereque, arĩ wereyañorã erã. Eropirã opu yarã surara Jesure pañorã.

—Iguere masibea, arĩpu Pedro Jesure
Mt 26.69-75; Lc 22.56-62; Jn 18.15-18, 25-29

66 Eropigu Pedro iri wihi maja sãriro pohecague ĩgu áricũ pahia opu pohro majago erapo. 67 Igo Pedro ĩgu sõhmacũ ĩago ĩgu dihtare ĩhaniguipo.

—Nazare majagu mera Jesu mera mu sã áhrabu, arĩpo igo Pedrose.

68 Igo eroparĩcũ peegu Pedropu opa arĩpu:

—¿Dohpa arĩmaacãgo iiri muhu? Mu arĩgure ne masibea yuhu, arĩpu Pedro igore.

Igo eropa arĩra puhru Pedro iri puu maja sãriro disiporo pohrogue wapu. Eropigu ĩgu ero niguicũ cãreña werepu. 69 Ero ĩgu áricũ ĩago dipaturi werepo daja ero arĩrãre.

—Ĩhi Jesu buherã mera majagu áhrimi, arĩpo igo.

70 Igo eroparĩcũ peegu Pedro dipaturi arĩpu daja.

—Īgure masibea yuhu, arĩpu daja.

Eropii merogã puhru ta ero niguirã Pedrose opa arĩñorã daja:

—Diaye ta áhrra. Muhu Galilea majagu áhrra. Eropigu ĩgu mera majagu ta áhrra muhu, arĩñorã erã ĩgure.

71 Erã eroparĩcũ peegu ĩgu erãre yuhripu:

—Diaye ta Goãmu mera arĩgu iiaa muare. Yuhu diaye arĩbiricũ Goãmu yure dipuwaja moaporo. Īgure mua arĩgure ne masibea yuhu, arĩ yuhripu ĩgu erãre.

72 Īgu eroparĩcũ ta cãreña werepu daja. Īgu werecũ peegu Jesu ĩgu arĩrare guñapu. “Cãreña pesubu ĩgu wereboro core muhu yure uhresubu ‘Jesure masibea,’ arĩgucã muhu,” Jesu ĩgu eropa arĩrare guñapu Pedro. Eropa guñagu turaro orepu.

15

Pilato Jesure serẽpiñumi

Mt 27.1-2, 11-14; Lc 23.1-5; Jn 18.28-38

1 Eropirã boyorogue murã, pahia oparã, judio masare buherã, arĩpehrerã gajirã oparã mera gamenere weretamuñorã erã Jesure iiburire masimorã. Erã basi wereniguituha, Jesure dihri aigã Pilato waicugare opure oñorã ĩgure. 2 Erã aĩ ejacũ ĩagu Pilato ĩgure serẽpipu:

—¿Diaye ta judio masa opu áhriri muhu? arĩ serẽpipu ĩgu Jesure.

—Mu arĩro dopa ta ĩgu ta áhrra, arĩ yuhripu ĩgure Jesu.

3 Eropirã pahia oparã baja weresãñorã ĩgure. 4 Erã eropa arĩ weresãcũ peegu dipaturi serẽpipu daja ĩgure.

—Oã mre baja weresãrã iima. ¿Erã eropa arĩ weresãquerecũ yuhribeari muhu? arĩpu ĩgu.

5 Īgu eroparĩcũ Jesu yuhribiripu. Eropigu Pilato ĩhamaria wapu.

Jesure wejẽdoreñuma

Mt 27.15-31; Lc 23.13-25; Jn 18.38-19.16

6 Bojori nucũ Pascua bosenu áricũ peresu arĩdigure yujugure masa “Īgure wiuque,” erã arĩgure Pilato eropa wiubasamuripu. 7 Irisubure Barrabã waicugu peresugue arĩpu. Īgu oparãre cóadiarã mera majagu masare wejẽrã mera majagu arĩpu. 8 Eropirã masa bajarã Pilato pohrogue eja, ĩgure serẽñorã:

—Bojori nucũ mu iidiro dopa ta iique daja guare. Yujugu peresugue arĩgure guare wiubasaque daja, arĩñorã erã.

9 Erã eroparĩcũ Pilato erãre serẽpiñapu:

—¿Maa yagu opure judio masa opure wiucuri? arĩ serẽpipu Pilato erãre Jesure wiudianijagu.

¹⁰ Jesure masa erã mahicũ ĩarã pahia oparã Jesure ĩhaturirã arĩñorã. Eropa ĩhaturirã ĩgure wejẽdorerã oñorã Pilatore. Erã ĩhaturirire masigu Pilato Jesure wiudiaripu. ¹¹ ĩgu eropa wiudiaquerecũ ta pahia oparã Jesu mera masare guacũ ĩiñorã. Őpa arĩdoreñorã erãre: “Barrabãre wiuque. Jesure wejẽdoreque,” Pilatore arĩdoreñorã masare. ¹² Eropigu Pilatore Barrabãre erã wiudorera pũhru Pilato erãre serẽpipu daja:

—¿Ihĩ “judio masa opu” maa arĩgũpũre duhpigũcuri yuħu? arĩ serẽpipu ĩgu.

¹³ —Crusague pabia wejẽque ĩgure, arĩ gaguiniguiñorã masa.

¹⁴ —¿Ñehenore ñerire iari ihĩ maa eropa arĩ gaguiniguiñũ? arĩpu ĩgu.

ĩgu eroparicũ peerã erã gaguiniginemoñorã daja.

—Crusague pabia wejẽque ĩgure, arĩñorã daja.

¹⁵ Erã eropa arĩ gaguiniguiñũ peegu Pilato Barrabãre wiudorepu masare mucubiricũ iidiagu. Eropigu Jesure yuradari mera tãradore, crusague pabia wejẽdoregu wiapu surarare.

¹⁶ Eropi surara ĩgu opu Pilato wihigue pretorio waĩcũri wihigue Jesure aĩ ejañorã. ĩgure aĩ ejatuha erã gajirã surara erã mera majarãre gameneremorã sihubeoñorã. ¹⁷ Eropirã erã opu ya suhriro dopa bajarĩñere Jesure sãñorã. Eropa sãtuha pora berore ii ĩgu dipuru duhpeoñorã. ¹⁸ Eropiituha ōpa arĩ wereyañorã erã ĩgure:

—Umupeorã arique. Judio masa opu ōaro arĩporo, arĩ wereyañorã ĩgure.

¹⁹ Eropirã ĩgu dipurure yucũgu mera padu, ĩgure disico ehosũ, guhyadiaro ĩaro dopa ta mereja ĩgure ii birañorã. ²⁰ Eropi ĩgure wereya biratuha, erã sãra suhrirore tuwea aĩ, ĩgu ya suhriropure ĩgure sãñorã daja. Eropirã ĩgure crusague pabia wejẽmorã aĩ wiria wañorã.

Erã Jesure crusague pabia wejẽñuma

Mt 27.32-44; Lc 23.26-43; Jn 19.17-27

²¹ ĩgure aĩgã, Simo Cirene majagu pohegue arĩdigũ erã pohro ĩgu eracũ ĩarã surarapu ĩgure Jesu ĩgu coãra crusare coãgãbasadoreñorã. Alejandro, Rufo sã pagu arĩpu Simopũ.

²² Waha Gólgota waĩcurogue ejañorã. Gólgota arĩro mari ya mera “dipu pero” arĩro iaa. ²³ Eropirã vinore suĩri deco mera erã morera decore Jesure oriñorã. Iri decore ihribiripu ĩgu. ²⁴ Eropirã ĩgu suhrirore tuwea aĩra pũhru crusague Jesure pabiañorã. Erã pabiatuhaja ĩgu suhri mũrare “¿Noa yañe arĩrocuri iñe?” arĩ game deabirañorã.

²⁵ Jesure erã pabiara pũhru uñre hora duhyayoro goeri boje ejaboro. ²⁶ Eropirã crusague ōpa arĩ gojarapũre pabia duhtuñorã. “Ihĩ judio masa opu aħrimi,” erã arĩ gojaturapu arĩyoro. Iri erã gojaturapu Jesure erã weresãra arĩyoro. ²⁷ Eropirã perã yajari mũrare Jesu pohro gajimijirigue crusarigue erã pabiatuñorã erã sãre. Yujugu ĩgu diayepũ, gajigure ĩgu copũ pabiatuñorã. ²⁸ Erã eropiicũ iribojegue Goãmu yare weremũhtanirã gojadiro dopa ta eropa wayoro. Őpa arĩ gojayuñuma: “‘Dorerire tarinũgarã mera majagu aħrimi,’ arĩ pepima masa ĩgure,” arĩ gojañuma iribojeguere.

²⁹ Eropirã crusari pohro tarigãrã Jesure ĩha, erã dipurure yurerã, ĩgure ñero arĩ wereniguiñorã.

—Muḥu ta “Goãmu wihire cohã, ùhrena pùhru iri wihire amugura daja,” arĩdigu árĩribu muḥu. ³⁰ Mu basi dijaque. Eropigu mu basi tarique. Eropigu tari weregũca muḥu, arĩ wereyañorã erã.

³¹ Erã iro dopa ta pahia oparã sã judio masare buherã sã ìgure eropa wereyañorã. Eropa arĩ wereyarã òpa arĩñorã erã basi:

—Ìgu gajirãre taudigu árĩqueregu ta ìgu basi tarimasibeami. ³² “Israe masa opu àhraa,” arĩrimi ìgu. Eropirã ìgu basi dijaricũ ìarã ìgure umupeorãca, arĩ wereyañorã.

Yajari mura sã ìgu pohro erã pabianirã eropa ta ìgure ñero arĩ wereyañorã.

Jesu s̄iria wañumi

Mt 27.45-56; Lc 23.44-49; Jn 19.28-30

³³ Eropi goeri boje árĩcũ ùhre hora gohra árĩpehrerogue naitĩa wayoro.

³⁴ Eropigu irisubure ero naitĩarisubu Jesu turaro gaguiniguipũ:

—Eloi, Eloi, ¿lama sabactani? arĩpu ìgu. Ire arĩgu mari ya mera òpa arĩgu iipu: “Yũ Goãmu, yũ Goãmu, ¿duhpigu yare cohãri muḥu?” arĩgu iipu ìgu Pature.

³⁵ Ìgu eroparĩcũ peenirã yujurãyeri ero niguinirã òpa arĩñorã:

—Goãmu yare weremuhtadigure Eliare sihugu iicumĩ, arĩñorã erã.

³⁶ Eropigu yujugu erã mera majagu mimi aĩri yũsu mera vino suĩrire yosotuha aĩ omagã, yucũgu ojogoro diritu, Jesure simujuripũ. Eropa iigu òpa arĩpu:

—Corenique. Elia ìgure itamucũ ìanirã dohpa mari, arĩpu ìgu gajirãre.

³⁷ Ìgu eropa arĩra pùhru dipaturi Jesu turaro gaguiniguĩ s̄iria wapũ.

³⁸ Ìgu s̄iricũ ta Goãmu wihi majañe suhriro ero erã cãhmotara suhriro gasiro deco mera yehguea wayoro. ³⁹ Ìgu eropa s̄iricũ ìagu surara opu Jesu pohro niguidigu òpa arĩpu:

—Diaye ta àhraa. Ihĩ Goãmu magu ta àhrañumi, arĩpu ìgu.

⁴⁰ Eropirã yorogue ìhaniguinirã nome sã árĩñorã Jesure ìhaniguirã. Erã nome mera María Magdalena árĩpo. Gajigo María waĩcũgo sã árĩpo. Ìgopũ José ìgu pagu magu Santiago erã pago árĩpo. Gajigo Salomẽ waĩcũgo árĩpo. ⁴¹ Erã nome Jesu yare òaro peerã nome árĩñorã. Erã Galilea yeba ìgu árĩcũ ìgure itamumuriñorã. Erã nome mera bajarã gajirã nome sã árĩñorã. Jerusalengue Jesu mera arinirã nome árĩñorã.

Jesu dũpũre masa gobegue apiñuma

Mt 27.57-61; Lc 23.50-56; Jn 19.38-42

⁴²⁻⁴³ Eropii irinũ ìgu s̄iriranũ Sabado core judio masa soorinũ core majanũ árĩyoro. Eropiro Pascua maja árĩburire erã amurinũ árĩyoro. Irinũ ñamica árĩcũ José Arimatea majagu güiro mariro Pilato pohroque ejarũ. Jesu dũpũre serẽgu ejarũ. José oparã mera majagu oparã erã umupeodigu árĩpu. Eropigu Goãmu ìgu opu árĩburire coregu iipu.

⁴⁴ Eropigu José Jesu dũpũ murarore ìgu Pilatore serẽcũ Pilatopũ peegu, pee uca wapũ. “¿Jesu s̄irituhayuri?” arĩ pepipũ. Eropigu surara opũre sihu òpa arĩpu ìgure:

—¿Jesu s̄iria wayuri? arĩ serẽpipũ ìgure.

⁴⁵ Ìgu eroparĩcũ surara opu yũhripũ:

—S̄iria wami, arĩpu.

Ìgu eroparĩcũ Pilato Josere odorepu Jesu dũpũ murũre. ⁴⁶ Ìgu odorera pùhru José òariñe suhrirore asũpu. Asũtuha, Jesu dũpũre aĩ diju, iri

suhriro mera omapu. Omatuhaja erā utāyegue seara gobegue ĩgu dũpũre apipu. Apituha iri gobe pohro arĩriye utāye wuuriyere taragā tubiha nugucāpu. ⁴⁷ Eropirā María Magdalena, María José pago Jesure ĩgu apidirore ĩañorā.

16

Jesu masa mũriañumi

Mt 28.1-10; Lc 24.1-12; Jn 20.1-10

¹ Eropirā erā soorinu Sabadonu taricũ María Magdalena, María Santiago pago, Salomé mera poresurire asũñorā Jesu dũpũre sũmorā. ² Eropirā Domingo boyorogā Jesure erā yaara gobegue wañorā erā. ³ Warā ōpa arĩñorā:

—¿Iri gobere erā biharayere noa marire pāgũbasarācuri mari ñajaborore? arĩñorā erā erā basi.

⁴ Iri gobegue ejarā iri gobere biharayere utāyere erā pāgũ nugurayere ĩañorā. Wuuriye utāye arĩyoro. ⁵ Eropa ĩarā iri gobeguerē ñajañorā. Eropa ñajajarā mamũre diayerũ doagũre boreri suhricũgũre ĩañorā. ĩarā ĩha uca wañorā. ⁶ Erā ucacũ ōpa arĩpu ĩgu:

—Ucabcĩaque. Crusague erā pabiadigure Jesu Nazare majagũre amaraa mũa. Masa mũriatuhami. Ōre marimi. Erā ĩgu dũpũre apidirore ĩaque. ĩatuhaja ĩgu buherāre Pedro säre ōpa arĩ wererā waque. ⁷ “ĩgu mũa core Galileague wamũhtagũcumi. Erogue ĩgũre ĩarāca mũa. Ero ĩgu arĩdiro dopa ta mũa ĩgũre ĩarāca,” arĩ wererā waque, arĩ wererũ mamũ erāre.

⁸ ĩgu eroparĩcũ erā gũi, naragā, masa gobe pohro arĩnirā omagā wiria wañorā. Eropa gũirā gajirāre werebiriñorā.

Jesu María Magdalenare dehyoañumi

Jn 20.11-18

⁹ Eropii Domingo arĩcũ Jesu ĩgu masa mũriara pũhrũ María Magdalenare dehyoamũhtapu. Igo siete watēa ñajasũdigo arĩpo. Jesu ĩgu sĩriboro core igore watēare cõapũ. Eropigu igopũre dehyoamũhtapu ĩgu ĩgu masa mũriara pũhrũre. ¹⁰ Jesu igore dehyoara pũhrũ igo ĩgu mera majarāre werego wapo. Erā ĩgu sĩrĩrare bujawererā orerā arĩñorā. ¹¹ “Cristo ojocariami. ĩgũre ĩabũ,” igo arĩquerecũ peediabiriñorā.

Jesu ĩgu buherāre dehyoañumi

Lc 24.13-35

¹² Pũhrũ perā Jesu buherā mera majarā campogue wiri marirogue wañorā. Erā eropa waniguicũ Jesu gajiropa bejagu guhyaro dehyoapu erāre. ¹³ ĩgu eropa dehyoara pũhrũ, waha gajirā Jesu yarāre wereñorā. “Gua Jesure ĩabũ,” erā arĩ werecũ erā peediabiriñorā daja.

Jesu ĩgu yare buhedoregu oboeñumi ĩgu buherāre

Mt 28.16-20; Lc 24.36-49; Jn 20.19-23

¹⁴ Pũhrũ once ĩgu buherā mesa pohrogue erā doacũ erāre dehyoapu ĩgu. Eropigu ĩgũre ĩanirā “Jesu masa mũriapu,” arĩ erā werecũ peediabirĩrere erāre turĩpu Jesu. ĩgũre ōaro umupeobiriri dipuwaja erāre turĩpu. ¹⁵ Erāre turĩtuha ōpa arĩpu:

—I yeba arĩpehreroguerē masare arĩpehrerāre ōari buherire buherā waque. ¹⁶ Yũre umupeorāre erā waĩyenirāre erā peamegue wabonirāre

taugucumi Goãmu. Eropirã yare umupeobirã Goãmu ïgu dipuwaja moamorã, peamegue wamorã ářĩrãcoma. ¹⁷ Eropirã yare umupeorã yu turari mera õpa ïrãcoma: Yu turari mera watẽa masare ñajasũnirãre cóãrãcoma. Eropirã mama disirore wereniguirãcoma. ¹⁸ Eropirã añare ñeacũ, ářĩpehreri nimare erã ihricũ pũrisome erãre. Eropirã dorecurã weca erã mojotorire erã mohmepi ñeacũ õarã warãcoma, arĩpu Jesu ïgu buherãre.

Jesu ãmarogue mũria wañumi

Lc 24.50-53

¹⁹ Eropa arĩ weretuha mari Opu Jesu ãmarogue mũria wapũ. Erogue ejaçu Goãmu diayepũ doapũ ïgu mera opu ářĩgu. ²⁰ Eropirã ïgu buherãpu ářĩpehreroguerẽ õari buherire Goãmu masare ïgu tauburire buherã wañorã. Erã eropa buhecũ mari Opu erãre itamupu. Deyoro moarire ïgu turari mera iimasicũ iipu erãre masare ïgu ya buherire peedoregu. "Eropa ta ářĩporo," arãa yũhũ. Iripẽta ãhraa.

San Lucas

1-2 Opũ Teófilo, mũre ipũre gojabeogu iiaa yũhũ. Jesu gua mera árĩnigũ ĩgu iirare gajirã gojanũgamũhtatuhanirã árĩma. Negohraguere Jesure ĩanirã, ĩgu yare buhenirã erã arĩ werediro dopa ta gajirã irire gojanũgamũhtatuhanirã árĩma. ³ Eropigu i árĩpehrerire ðaro masipehodiagu yũ sã erã arĩ wererare buhebũ. Eropigu yũ sã irire ðaro gojadiaa mũa buheburĩ árĩburire. ⁴ Jesu yare buherã mũre weretuhanirã árĩma. "Iri queoro ãhraa," ðaro mũ arĩ masiborore ipũre mũre gojabeogu iiaa.

Ñu waĩyeri masũ ĩgu masa dehyoaburire anyu werepũ Zacariare Ñu pagu árĩbure

⁵ Herode Judea yeba majarã opũ ĩgu árĩcũ, Zacarĩa waĩcũgũpũ pahĩ árĩpũ. Zacarĩa ya curupũ pahia curu Abĩas ya curu árĩyoro. Zacarĩa marapo sã pahĩ Aarõn mũrũ pãrameo árĩturiagogue árĩpo. Igoũ Elisabet waĩcũgo árĩpo. ⁶ Erã perã Goãmu dorerire ipehorã erã árĩcũ ĩagu, "ũmũri nũcũ ðarire iirã ãhrima," arĩ pepidi árĩmi Goãmu erãre. ⁷ Elisabet ne porã marigo árĩpo. Eropigo igo Zacarĩa mera porã mari muñucãpo.

⁸ Pahia Goãmu wihigue Goãmu ya umupeoburire mohrerã umũri nũcũ erã gohrotomũriñorã. "Zacarĩa ya curu majarã dohpagueere iiporo," erã arĩra pũhrũ ĩgu pahia erã iidiro dopa ta Goãmu ya umupeoburire mohmegũ arigu iipu. ⁹ Pahia erã iiguaro dopa ta inciensore soebure beyerã irisubure Zacariare beyeñorã. Eropigu ĩgu Goãmu wihigue ñajaa wapũ soegũ wagu. ¹⁰ Goãmu wihi pohecague ĩgu árĩrisubu, inciensore ĩgu soerisubu árĩpehrerã masapũ disiporogue Goãmu mera serẽniguñorã. ¹¹ Irisubure Goãmu yagu anyu incienso soero diayepũ dehyoanũgajapũ Zacariare. ¹² ĩgu anyu eropa dehyoacũ ĩagu Zacarĩa ĩgure ĩha, uca wa, gũia wapũ. ¹³ Eropa ĩgu gũicũ ĩagu anyu ĩgure werepũ:

—Zacarĩa, gũibita. Goãmu mũ serẽrare peeami. Eropigo mũ marapo Elisabet porãcũgocumo. Mũ magũ masa dehyoagũcumi. ĩgu eropa dehyoacũ Ñu waĩyeque ĩgũgãre. ¹⁴⁻¹⁷ "Ĩgu ðagu ãhrimi. Turagu ãhrimi," arĩ pepigucumi Goãmu mũ magure. ĩgu masa dehyoara pũhrũ vinore, siburire ihrisome. Eropigu ĩgu, ĩgu masa dehyoara pũhrũ ta Espĩritu Santo árĩri mera ðaro turagu árĩgũcumi ĩgu. Eropigu bajarã Israe masare Goãmu mari Opũre ðaro gamecũ iigucumi ĩgu. Goãmu yare buhegu Elia Goãmu yare weremũhtadĩgu mari Opũ arĩborore ĩgu buhediro dopa ta Goãmu ĩgu turari mera mũ magũ sã buhegũcumi. Eropa buhegu erã pagũ sumarã erã porã mera erã ðaro game mahi árĩcũ iigucumi. Eropigu dorerire tarinũgarãre ðaro erã umupeori mera yãhrĩcũ iigucumi. Eropa buhegu mari Opũ arĩboro core ĩgu yarã árĩmorãre amuyugũcumi ĩgu. Eropigu ĩgu masa dehyoara pũhrũ mũhũ mucubirĩgũca. Gajirã sã bajarã mucubirĩrãcoma, arĩpũ anyu Zacariare.

¹⁸ ĩgu eroparĩcũ peegu Zacariapũ serẽpipũ anyure.

—Yũhũ, yũ marapo mera gua mũrã ãhraa. ¿Eropigu mũ arĩra diaye árĩcũ dohpa masigucuri yũhũ? arĩpũ ĩgu.

¹⁹ ĩgu eroparĩcũ anyupũ ĩgure werepũ:

—Yũhũ Gabrie waĩcũgu ãhraa. Goãmu pohro árĩgu ãhraa yũhũ. Goãmu i ðari querere weredoregũ, mũ pohro yare obeoami. Yũ werediro dopa ta

diaye waroca. ²⁰ Yu eropa arĩquerecũ ta yure peediabeaa muhu. Eropigu muhu dohpaguere wereniguibigu dujaguca. Mu magu igu masa dehyoara puhru wereniguiguca daja, arĩpu anyu Zacariare.

²¹ Disiporogue masa Zacariare corerã iĩñorã. “¿Duhpigũ igu Goãmu wihigue arĩgu mata wiriribeari?” arĩ, corerã iĩñorã masa igure. ²² Eropigu igu i wihigue arĩdigu wiria, erã mera wereniguimasibiripũ. “Goãmu igure dehyoacumi,” arĩ pepi, masiñorã erã. Eropigu igu wereniguimasibigu arĩgu igu mojotori mera masare wereniguipũ.

²³ Goãmu wihi igu mohmeri pehrecũ, igu dujaa wapũ igu ya wihigue. ²⁴ Puhru igu marapo Elisabet majigure ne bocagãrigo iipo. Eropigo igo cinco aberi gohra masa pohro wabiripo. ²⁵ Ōpa arĩpo igo: “Dohpaguere yure Goãmu itamumi pare. Yu porã marigo arĩgo guhyasiuro taribu yuhu. Goãmu yu porã maririre cohãmi yure,” arĩ pepipo igo.

Jesu igu masa dehyoaburire werepũ anyu Mariare

²⁶⁻²⁷ Elisabet seis aberi igo nijipo arĩra puhru, Goãmupũ anyure Gabrie waĩcugure nómeo òago pohrogue obeopũ. Igo Nazare waĩcũri maca Galilea arĩri yeba arĩpo. Eropigo igo María waĩcũgo José mera mojoto diribo arĩpo. Josépũ iribojegue majagu murũ Davi murũ pãrami arĩpũ.

²⁸ María pohrogue ejaqu anyu werepũ:

—María, ¿ãhriri muhu? Goãmu mu mera arĩgu ãhrimi. Eropigu mure òaro iigu iimi. Arĩpehrerã nome gajirã nome tauro òaro iimi mure, arĩpũ anyu igore.

²⁹ Igu eroparĩcũ peego, igo turaro guña pepipo. Anyu igu wererare pepigo “¿Dohpa arĩgu yure eropa arĩcũri?” arĩ guñapo igo. ³⁰ Igo eropa arĩ guñacũ ïagu anyu werepũ igore:

—María, mure Goãmu turaro mahimi. Eropigo güibita. ³¹ Peeque. Majigure bocagoca muhu. Eropigu mu magu masa dehyoagucumi. Igure Jesu waĩyegoca. ³²⁻³³ Igu turatariagu arĩgucumi. Eropirã igure “Goãmu umaro majagu magu ãhrimi,” arĩrãcoma masa. Eropigu mu magu ñecu murugue Davi murũ Israe masa erã opu igu arĩdiro dopa ta mu magu sãre apigucumi Goãmu. Eropigu arĩpehrerinuri igu Israe masare doregucumi. Eropiro igu opu arĩripũ ne pehresome, arĩpũ anyu.

³⁴ Igu eroparĩcũ Mariapũ serẽpipõ:

—¿Duhpi umu mera arĩbiriquerego ta porãcũbocuri yuhu? arĩpo igo.

³⁵ Igo eroparĩcũ anyupũ werepũ:

—Espíritu Santo mure porãcũcũ iigucumi. Eropiro Goãmu igu turari imica curu iro dopa ta cãhmotaroca mure. Eropirã “Goãmu magu, ñerire iibigu ãhrimi,” arĩrãcoma masa mu magure. ³⁶⁻³⁷ Goãmu arĩpehrerire iimasimi. Eropigo mu acawerego Elisabet burõ arĩquerego ta majigure bocãmo igo sã. Igo porãcũgucumo umugãre. Masa igore “Porã marigo ãhrimo,” erã arĩdigo burõ dohpaguere seis aberi wahaa igo majigure bocara puhru, arĩpũ anyu Mariare.

³⁸ Igu eroparĩcũ María yuhripõ:

—Yure peeque. Mari Opũ igu pohro majago ãhraa yuhu. Mu arĩdiro dopa ta yure eropa waporõ, arĩpo igo.

Igo eropa arĩra puhru anyu waha wapũ.

María Elisabere ïago wapo

³⁹ Irinurire María utã yucu áriri yebague Judea yeba áriri macague umudiaro waha wapo. ⁴⁰ Erogue ejago Zacaría ya wihi ñaja, “¿Áhriri?” arĩpo igo Elisabere. ⁴¹ Igo eroparĩcũ Elisabet igo peecũ ta, igo magupũ niñi suhrirogue árĩdĩgu ñohmepũ. Elisabet Espĩritu Santo áriri mera ðaro pepigo wapo. ⁴² Eropigo turaro mucubiriri mera wereniguipo.

—Árĩpehrerã nome tauro ðaro iimi Goãmũ mure. Mũ magu sãre ðaro iimi Goãmũ. ⁴³ Cue, yũ Opu pago yũ pohro aricũ ðaro iimi yure Goãmũ. ⁴⁴ Mũhũ yure “¿Áhriri?” aricũ, yũ magupũ niñi suhrirogue árĩgu mucubiriri mera ñohmeacumi yure. ⁴⁵ “Goãmũ ĩgu arĩdiro dopa ta iipehogucumi,” arĩgo mucubirigo áhrra muhũ, arĩpo Elisabet Mariare.

⁴⁶ Igo eroparĩcũ María yuhripo:

Goãmũ ðagu, turagu áhrimi, arãa. Yũhũ ðaro sĩporãcua. ⁴⁷ Goãmũ yure peamegue wabodigore itamugu áhrimi. Eropigu dohpaguere yure ðaro mucubiriri mera árĩcũ iimi. ⁴⁸⁻⁴⁹ Yure bu árĩgore ĩgu ĩgu pohro majagore guñadi áhrami. Goãmũ turatariagu ðari dihtare yure itamumi. Eropirã “Igore Goãmũ ðaro iimi,” árĩpehrerã masa dohpaguere eropa arĩ wereniguirãcoma yure. Goãmũ ñeri marĩgu áhrimi. ⁵⁰ Árĩpehrerĩnuri árĩpehrerã ĩgure umupeorãre ĩgu mojomoro ĩagu áhrimi. ⁵¹ Goãmũ ĩgu turari mera ĩgu áhrimi. “Gajirãre tarinugaa yũhũ,” arĩrãre tarinugadi árĩmi ĩgu. ⁵² Oparãre erã dorero arĩrãre cóadi árĩmi ĩgu. Eropigu bu arĩrãpũre ĩgu oparã iro dopa ta apidi árĩmi. ⁵³ Oaboanirãre ĩgu ðari barire ódi árĩmi. Eropigu baja opanirãpũre gajino moorã wacũ iidi árĩmi ĩgu. ⁵⁴⁻⁵⁵ Mari ñecu sumarã murare “Masare ðaro ĩgura,” ĩgu arĩ werediro dopa ta iipehodi árĩmi Goãmũ. Eropigu ĩgu pohro majarã Israe masare ĩgu itamudi árĩmi. Mari ñecu sumarã murare, Abrahã murare árĩpehrerã ĩgu acawererã ĩgu puhũ arĩrã sãre Goãmũ árĩpehrerĩnuri eropa mojomoro ñaniguĩgu árĩmuridi árĩmi. “Masare ðaro ĩgũca,” erãre ĩgu werepirare cãdijibiridi árĩmi Goãmũ, arĩpo María.

⁵⁶ ðrerã abe gohra Elisabet mera áhri, igo ya macague goe dujaa wapo María.

Ñu masa dehyoapu

⁵⁷ Elisabet igo niñi wahgũra puhũ igo magu masa dehyoapu. ⁵⁸ Eropirã Goãmũ igore ĩgu eropa ðaro ĩicũ igo ya maca majarã igo acawererã sã igo mera mucubiriñorã. ⁵⁹ Ocho nuri ĩgu masa dehyoara puhũ, ĩgu pagu sumarã ĩgũgãre gasiro merogã wiri aidorerã wañorã. Eropa erã ĩrisubu erã mera majarã Zacaría waĩyediariñorã ĩgũgãre ĩgu pagu waĩre. ⁶⁰ Erã eropa waĩyediaquerecũ ta ĩgu pagopũ ðpa arĩpo:

—ĩgu pagu waĩre waĩyebaa. Ñu waĩyerãca ĩgũgãre, arĩpo igo.

⁶¹ —Mũ acawererã ne yujugu Ñu waĩcũgu marimi, arĩñorã erã igore.

⁶² Eropirã erã mojotori mera werenigui Zacariare serẽpiñorã erã.

—¿Mũca dohpa waĩyediari mũ magure? arĩ serẽpiñorã ĩgure.

⁶³ Erã eroparĩcũ ĩgu pagu gojaburimijire serẽbeo, ñeha, gojapu: “Yũ magu Ñu waĩcumi,” arĩ gojapu Zacaría. ĩgu eropa arĩ gojacũ erãpu uca wañorã. ⁶⁴ ĩgu eropa arĩ gojara puhũ ĩgure wereniguicũ ĩpu Goãmũ. Eropigu ĩgu wereniguimasipu daja.

—Goãmũ turagu, ðagu áhrimi, arĩpu ĩgu.

⁶⁵ Īġu eropa arī wereniguicū peerā ero majarā ūca wañorā. Eropirā i árīpehrerire Judea yeba majarāre utā yucu watope árīrāre masa weresiriñorā. ⁶⁶ Árīpehrerā irire peerā guñañorā. “Goāmū turarire Īġugā opami. ¿Eropiġu ñehmuno árīġacuri Īġugā?” arī pepiñorā masa.

Zacaría Goāmure umupeorū

⁶⁷ Eropiġu Īġu paġu Zacaría Espírītu Santo árīri mera ðaro pepiġu árīġu Goāmū yare werepū:

⁶⁸ Mari Israe masa Goāmure umupeorā. Īġu yarā āhraa mari. Eropiġu mari pohrogue arīġu, marire itamugū ðaro taumi. ⁶⁹ Eropiġu Goāmū turāġure marire peamegue wabonirāre ðaro taubure obeomi. Marire ðaro taubu Īġu acawereġu Davi muru āhrimi. Daviġu Goāmū pohro majagū árīmuriñumi. ⁷⁰ Iribojegue Īġu ya weremuhtanirā mera Goāmū Īġu marire taubure obeoburire wereyumuriġu. ⁷¹ Marire ĩhaturirā marire ñero erā iidiacū Īġu “Muare itamugura,” arī apiñumi Goāmū marire. ⁷² Mari ñecu sumará murare, “Muare mojomoro Īġu itamugura. Muare yu wererare guñagura,” arī apiñumi Goāmū mari ñecu sumaráre. Iribojegue Īġu eropa arīdiro dopa ta marire dohpaguere iimi. ⁷³⁻⁷⁵ Eropiġu Abrahāre ðpa arīmuriñumi: “Mu acawererā puhru árīrā erāre ĩhaturirā árīcū cóāġura. Eropiġu mu acawererāre itamugura. Eropirā erā ġüibirā ta yu dorerire iimasima. Eropiġu erā ñerire yu cóācū, erā yu ĩhuro umuri ñecu ðarā árīñiguirācoma,” arī werepimuriñumi iribojegue Goāmū mari acawereġu Abrahāre, arīġu Zacaría.

Eropa arītuha Īġu magugāre ðpa arīġu:

⁷⁶⁻⁷⁷ —Mahġu, mure ðpa arīrācoma masa:

“Goāmū turatariġu yare wereniguġu āhrimi,” arīrācoma mure. Eropiġu muhu mari Opū core wayugūca. Eropa wagū ðpa arī wereġuca. “Goāmū mua ñerire cóāġu, peamegue wabonirāre taugūcumi muare,” arī wereġuca. Eropa arī wereġu mari Opū Īġu arīborore weremuhtayugū iigūca muhu. ⁷⁸ Goāmupū marire turaro mojomoro Īġu marire ðaro iġu árīġu, Īġu marire peamegue wabonirāre taudiami. Marire taugū arīġu Cristo mari pohro arīġucumi. ⁷⁹ Árīpehrerā mari peamegue wabonirāre taudiami Īġu. Eropiġu Goāmure mari masibirā árīcū Īġu marire masicū iidiami Īġu. Eropiġu mari ðaro yujuro mera mari arīborore wereġucumi marire, arīġu Zacaría.

⁸⁰ Eropi Ĺu Zacaría magū ðaro buġapū. Eropiġu Goāmure turaro mahiġu. Eropiġu yoari boje masa marirogue árīmuriġu. Te Israe masare buhenugū sā erogue ta árīmuriġu.

2

Jesu masa dehyoapu

Mt 1.18-25

¹ Iribure árīpehreri yebari majarā tauro opū Augusto árīpehrerāre queodorepū. ² Oā masare erā ne queonugarisubu árīcū Cirenio waicūġu Siria yeba majarā opū arīġu. ³ Eropirā árīpehrerā erā ñecu sumará iribojegue majarā ya macarigū erā waire gojapeorā wañorā. ⁴ José sā Nazareġu Galilea árīri yeba árīri macague árīnirā waha, Judea yebague

Belén waĩcari macague ejañorã. Opu Davi iribojegue majagu ĩgu masa dehyoadiro árĩyoro Belén. José Davi muru pãrami árĩgu Beléngue wapu ĩgu waĩre gojapeogu wagu. ⁵ Eropigu ĩgu María ĩgu mojoto diribo árĩcũ erogue igo mera ĩgu waĩre gojapeodoregu wapu. Igopu majigure bocatuhadigogue árĩpo. ⁶ Eropigo Beléngue ejago igo nihi wahũpo. ⁷ Erogue masa erã carĩri wihi ne sihabiriyoro erãre. Eropirã erã wecua ya wihigue carĩrã wañorã. Eropigo igo ĩgu ne dehyoagugãre porãcutuha ĩgugãre suhriro mera oma, wecua erã bari coro weca ĩgure pihripeopo.

Anyua ovejare ĩhadiburãre dehyoañorã

⁸ Iri ñamire iri maca turogue campogue ovejare ĩhadiburã erã yarã ovejare ĩhadiburã iñorã. ⁹ Eropigu Goãmu ĩgu obeodigu anyu erãre dehyoapu. ĩgu eropa dehyoacũ Goãmu ĩgu gosesiriri erãre boyoweayoro. Eropa wacũ ĩarã, ovejare ĩhadiburã gũia wañorã. ¹⁰ Erã eropa wacũ anyu erãre werepu:

—Ōari quere muare weregu ahraa. Árĩpehrerã masare mucubiricũ iiroca i quere. Eropirã gũibiricãque mua. ¹¹ Dohpagã ñamire opu muru Davi ya macague muare peamegue wabonirãre taubu, Cristo Goãmu ĩgu obeodigu mari Opu masa dehyoatuhami. ¹² Eropigu suhriro mera omadigu wecua bari coro weca erã pihripeodigu mua bocagu ĩgu ta árĩgucumi, arĩ werepu anyu erãre.

¹³ ĩgu eroparĩcũ ta bajarã umaro majarã árĩmuhtadigu anyu mera bayapeoñorã. Ōpa arĩ bayapeoñorã erã:

¹⁴ Goãmure umaro majigure umupeorã. Eropirã Goãmu ĩgu mahirã gũiro mariro gamequeãro mariro ñaro árĩporo, arĩ bayapeoñorã anyua.

¹⁵ Eropa bayatuhaja umarogue erã muriara puhru ovejare ĩhadiburãpu erã basi game wereniguiñorã:

—Ire Goãmu ĩgu marire wererare Beléngue ina ĩarã warã, arĩñorã erã erã basi. ¹⁶ Eropa arĩrã yojaro mera wañorã erã. Mariãre, Josére bocaia, majigugãre wecua erã bari coro weca pihripeodigure iañorã erã. ¹⁷ Ovejare ĩhadiburã ĩgure ĩatuha anyu majigugãre ĩgu wererare wereñorã gajirãre. ¹⁸ Erã eropa arĩ wercũ ta árĩpehrerã erãre pee uca wañorã. ¹⁹ I árĩpehrerire Mariãpu guña pepipo. ²⁰ Eropirã ovejare ĩhadiburãpu anyu ĩgu werediro dopa árĩcũ iañorã. “Goãmu turagu ãhrimi,” arĩ mucubiriñorã. Eropa arĩ mucubiri dujaa wañorã.

Goãmu wihigue Jesu pagu sumarã ĩgure aĩgãñorã

²¹ Yuju semana puhru majigure gasiro merogã wiri aĩrire erã iidoreranu árĩcũ erã ĩgugãre Jesu waĩyeñorã. Jesure ne igo bocaboro core anyupu “Jesu waĩyeque ĩgure,” arĩ werepipu. Eropirã ĩgugãre Jesu waĩyeñorã.

²² Goãmu doreri Moise ĩgu werediro dopa ta iimorã, José, María mera Jerusaléngue wañorã. Erogue María porãcũra puhru ñago igo dupu árĩrore ĩhmurã wañorã. Eropa warã erã Jesure aĩgã wañorã. ĩgugãre Goãmure “ĩgã mu yagu árĩbu ãhrimi,” arĩ ĩhmurã warã iñorã.

²³ Ōpa iñorã Goãmu yare erã gojarapũ dorero dopa ta. “Árĩpehrerã mua porãre ne dehyoarãre Goãmure ĩmuque. ‘ĩgã mu yagu árĩbu ãhrimi,’ arĩ ĩmuque,” arĩ doremuriñumi Goãmu ĩgu yare gojarapũgue.

²⁴ Eropa ĩhmutuha Goãmu ĩgu dorediro dopa ta mirimagugãre erã asũtuhaja Goãmu wihigue apirã wañorã. Ōpa doreñumi Goãmu ĩgu yare gojarapũgue: “Buja borerãre perã oque Goãmure. O erã maricũ buja

borewijiġāräre oque yare umupeomorā,” arī doreñumi Goāmu. Eropirā ġu dorediro dopa iinorā José María mera.

²⁵ Jerusaléngue Simeón waicuga árġu. ġu oagu, Goāmure umupeogu árġu. Goāmu Israe masare itamuburire coregu iipu. Eropiġu Simeón Espiritu Santo ġu mera árġicū oaro pepiġu árġu. ²⁶ Eropiġu “Mu sġriboro core Goāmu ġu obeoure Cristore ġaguca muhu,” arī weremuhtarpu Espiritu Santo ġure Simeore. ²⁷ Eropiġu Espiritu Santo ġure dorecū Goāmu wihigie ñajaa wapu. ġu ñajara puhru Jesu pagu sumarā ġugāre aġ ñajañorā Goāmu ġu gojarapū dorera dopa ta iirā. ²⁸ Simeónpu ġugāre coā aġ, Goāmure umupeo, “Ōhaa,” arī ġu mera wereniġuipū. Ōpa arġu ġu Goāmure:

²⁹⁻³² Opu, dohpague tamerare masare peamegue wabonirāre taubure obeoa muhu. ġu judio masa árġibirāre buhegu mure oaro masicū ġugucumi erāre. Masare taubure Israe masare muhu apiyoro. Mu eropa iirare árġpehrerā masirā, “Israe masare oaro iimi Goāmu,” arġrācoma masa. ġā marire taubu āhrimi. Eropiġu mu yare arġidiro dopa ġāre ġatuhabu. Eropiġu dohpaguere oaro mucubirġu sġriġuca, arġu Simeón.

³³ Simeón ġugāre arġrare peerā ġu pagu sumarāpu pee uca wañorā. ³⁴ Eropiġu Simeón erāre “Ōaro árġique muu,” arġu ġu Jesu pago Mariare werepu:

—Goāmu ġāre beyedi árġimi. ġu eropa beyediġu árġicū judio masa bajarā ġure tarinugarācoma. Eropa iirā erā peamegue warācoma. Eropiġu judio masare bajarāre taubure beyedi árġimi Goāmu ġāre. ġu Goāmu turarire ii ġhmuġu ġu árġquerecū masa bajarā ġure ñero arġ wereniġuirācoma. ³⁵ Erā eropa iicū ġajirā erā ñero ġuñarire masirācoma. Eropiġu muhu turaro bujaweregoca, arġdocaritamupu Simeón Mariare.

³⁶ Ero Goāmu yare wereniġuigo Ana waicuga árġu. Igo Fanuel mago árġu. Aser muru ya curu majago árġu. Buro gohra árġu. Igo ero coregue siete bojori dihta igo marapu mera árġniripo. ³⁷ Eropiġo ochenta y cuatro bojori gohra wapeweyo árġmuripo igo. Eropiġo umure, ñami säre Goāmu ya árġburire iibo, ba duhu, Goāmu mera wereniġuġi, Goāmu wihire ne wiriabiripo. ³⁸ Simeón ġu wereniġuigo watope igo erā pohro erago, mucubirigo Goāmure, “Ōhaa,” arġu. Eropiġo Jerusalén majarāre taubure corerāre igo Jesu dehyoarare werepo erā árġpehrerāre.

José, María mera Jesu mera Nazaregue dujaañorā daja

³⁹ Goāmu ġu dorero dopa ta iituhaja, erā ya macague Nazaregue dujaañorā. Galilea yeba árġyoro iri maca. ⁴⁰ Eropiġu Jesu oaro buġa turagu wapu. Eropiġu ġu oaro pee masiġu árġu. Eropiġu ġure Goāmu oaro iipu.

Jesu tata mahmuu wahġarġu Goāmu wihigie buhepu

⁴¹ Bojori nacu Jesu pagu sumarā Jerusaléngue Pascua bosenure ġarā wamurġinorā. ⁴² Jesu doce bojori ġu opacū erā iidiro dopa ta erā árġpehrerā Jerusaléngue wañorā. ⁴³ Eropirā bosenu pehrecū erā erā ya macague dujaa wañorā daja. Erā eropa dujaaquerecū ta Jesupu Jerusaléngue dujacāpu. ġu pagu sumarā ġu erogue dujarare masi-biriñorā. ⁴⁴ “ġu mari mera majarā mera árġcumi,” arġ pepiriñorā

erā. Eropirā erā yujunu gohra Jesu mariro wañorā mague. Eropirā erā Jesure erā acawererā watope amariñorā. ⁴⁵ Ne bocabiriñorā. Eropirā Jerusaléngue ñgure amarā dujañorā daja.

⁴⁶ Ëhrenu puhru ñgure Goāmũ wihigue bocañañorā. Eropirā Jesure judio masare buherā watope bocañañorā. Ñgu erāre pee serēpi doapu. ⁴⁷ Erā árñpehrerā Jesure peerā ñaro masigugā ñgu árñcũ ñarā, erā ñhamaria wañorā. ⁴⁸ Ñgu pagu sumará sã eroguere Jesure ñarā ñhamaria wañorā. Eropigo ñgu pago ñgure ñpa arñpo:

—Mahgu, ¿duhpigu eropa iiari muhu guare? Mu pagu, yuhũ, “Ñgu dederea wañumi,” arñrā ahmaa gua mure, arñpo igo igo magure.

⁴⁹ Igo eroparñcũ ñgu ñgu pagu sumaráre werepu:

—¿Duhpirā yare ahmari mua? Yu Pagu yare ñgu dorediro dopa ta iigu iiaa. ¿Irire masibeari mua? arñpu ñgu.

⁵⁰ Ñgu eropa arñquerecũ erā peemasibiriñorā.

⁵¹ I árñpehreri ñgu iirare Mariapũ ñaro guñapo. Eropigu Jesu Nazaregue dujaa wapũ. Ñgu pagu sumaráre ñaro yuhrigu árñmuripũ. ⁵² Eropigu Jesu buga, ñaro pee masigu wapũ. Eropirā Goāmũ masa sã “Ñagu ñhrimi,” arñ ñañorā ñgure.

3

Ñu wañyeri masũ masare Goāmũ yare werepu

Mt 3.1-12; Mr 1.1-8; Jn 1.19-28

¹ Irisubure erā tauro opu árñgu Tiberio wañcũgu ñgu opu árñra puhru quince bojori wayoro. Eropigu Poncio Pilato wañcũgu Judea yeba majarā opu árñpu. Eropigu Herode wañcũgu Galilea yeba majarā opu árñpu. Ñgu pagu magu Felipe Iturea yeba majarā, Traconite majarā sã erā opu árñpu. Eropigu Lisania wañcũgu Abilinia yeba majarā opu árñpu. ² Eropirā Ana, Caifa mera pahia opará árññorā. Oã árñpehrerā erā árñrisubure Ñu Zacaría magu masa marirogue árñgure Goāmũpu ñgu ñgu yare weredorepu. ³ Eropigu Jordán wañcũriya turo árñri yeba árñpehrerogue Ñu ñpa arñ weregu wapũ:

—Mua ñeri iirire bujawereque. Dohpaguere ñarire gohrotoque. Eropirā wañyenirā árñque. Mua eropa iicũ ñagu Goāmũ mua ñerire cóãgucumi, arñ weremuripũ ñgu.

⁴ Ñu eropa wereniguigu Isaia iribojegue majagu Goāmũ ya weremũhtadigu ñgu gojadiro dopa ta iigu iipũ. Ñpa arñ gojayuñumi Isaia Ñu iiburire:

Masa marirogue werenigui gaguiniguigu ñpa arñgucumi: “Mari Opu ñgu ariburi mare amuro dopa ñarā árñyuque mua ñgure peemorā. ⁵ Dipa gobericũrore mari diaye maja maha iidiro dopa ta, mua ñero iirire duhuque. ⁶ Mua eropa iicũ Goāmũ muare peamegue wabonirāre ñgu taucũ ñarāca árñpehreri yeba majarā,” arñgucumi ñgu gaguinigu weregupũ, arñ gojamurññumi Isaia iribojeguere Ñu ñgu árñboro coregue.

⁷ Masa bajarā Ñu pohro erarā ñgu erāre wañyecũ gameñorā erā. Eropigu ñgu erāre werepu:

—Mua ñero iiricará ñhraa mua. Goãmure “Gua ñeri dipuwaja moabiricãporo,” arñrā ¿mua yare wañyedorerā ahriiri? ⁸ Ñgu mua ñero

iira dipuwaja moabiricū ōpa iique mua. Diaye mua űero iirire bujawererā árírā, ōarire gohrotorā árírā, ōarire iique mua. “Abrahā mari űecu muru árĩmuriþu. Eropirā mari Goāmu mera ōatuhajaa,” arĩ pepibiricāque. Muare arĩgu tiiaa. Abrahā pāramerā mua árĩri duhpiburi árĩbeaa. Goāmuru gamegu i utāyeri mera gajirāre iimasimi Abrahā acawererāre. Eropiro Abrahā acawererā mua árĩri bu gohra ta āhraa. ⁹ Ōpa āhraa: Mari masa yucu iro dopa ta āhraa. Goāmuru come opagu iro dopa ta āhrimi. Eropigu űeri ducacuri yucure tabe cóā, iri nuguri sāre tabetagucumi. Tabetatuhaja, peamegue cóāgucumi ĩgu iri yucure iri nuguri sāre. Eropa ta iigucumi mua sāre ĩgure gamebirāre, arĩru űu masare.

¹⁰ ĩgu eroparĩcū peerā masaru ĩgure serēþiñorā:

—¿Dohpa iirācuri gua? arĩñorā erā űure.

¹¹ —Peñe suhriro opagu suhriro moogure yujuñe oque. Eropirā mua bari oparā gajirā sāre oque, arĩru űu.

¹² Bajamerāgā oparā yare wajasea corerā sā wañyedorerā erañorā. Eropirā űu pohro erarā ĩgure serēþiñorā:

—Buhegu, ¿guaru dohpa iirācuri? arĩñorā.

¹³ —Mua oparā erā doreropē ta masare niyerure wajaseaque. Guyari mera aĩnemobita, arĩ yuhriþu űu erāre.

¹⁴ Gajirā surara ĩgure serēþiñorā daja.

—¿Guaru dohpa iirācuri? arĩñorā erā ĩgure daja.

—Masare erā niyerure emabiricāque. Eropirā iri niyerure guya emabiricāque. Mua wajatarire ĩarā mucubirique, arĩ yuhriþu űu erāre.

¹⁵ Masa Cristore Goāmu ĩgu obeobure corerā iñorā. Eropirā ōpa arĩ pepinugañorā erā űure. “Ihĩ űupu Cristo árĩbocumi,” arĩ pepiriñorā erā.

¹⁶ Erā eropa arĩ pepicū peegu űu árĩpehrerāre wereþu:

—Yu tauro turagu arigucumi. Ōatariagu āhrimi ĩgu. ĩgu iro dopa árĩbeaa yuru. Eropigu ĩgure pepigu, “Yu tamera bu arĩgu āhraa,” arĩ pepia yuhu. Mua űero iirare bujawerera puhru yuru muare deco mera wañyeabu. ĩguru yu tauro iigucumi. Espĩritu Santore ogucumi masa mera árĩniguibure. Eropigu ĩgu űerire soewearo dopa ta ĩgu ariguru mua űerire coeweagucumi. ¹⁷ Yu puhru arigu trigo gasirire cóāgu iro dopa āhrimi. Gasiri cóāgu ĩgu ya sihburu mera árĩpehreri trigo yeri gasirire suha weami. Eropa suha weara puhru trigo yeri gohrapure ĩgu diburi wihigue apigucumi. ĩgu suha weara gasiripure ĩgu soegucumi. Eropa ii beyegucumi yu puhru arigu. Ōarire gohrotonirāpura ĩgu mera árĩniguicū iigucumi. Erā űero iirare bujawerebirāpura peamegue yaribiriri peamegue cóāgucumi, arĩ wereþu űu.

¹⁸ Bajarāre ĩgu eropa arĩ wereri mera masare ōari buherire wereþu űu. ¹⁹ Eropigu opu Herodeþu ĩgu pagu magu Felipe marapore ĩgu emara waja, wuaro űerire ĩgu iira waja űu ĩgu sāre wereripu. ²⁰ ĩgu eropa arĩ werecū Herodeþu űure peresu iipu dipaturi űerire iigu daja. Eropa iigu ĩgu űerire iira dipuwajacugu árĩnemoru.

*űu Jesure wañyeru
Mt 3.13-17; Mr 1.9-11*

²¹ űure erā peresu iiboro core gajirā masare űupu wañyegu iipu. Erāre wañyegu Jesu sāre wañyeru. Eropigu Jesu diague niguigu Goāmure ĩgu

serērisubu umusi pārimaa waya. ²² Eropa pārimaara puhru Espiritu Santo buja iro dopa bejagu Jesu weca dijaripū. Īgu dijaricū umarogue wereniguiro cariyoro:

—Muhū yū magū yū mahigu āhraa. Mū mera ōaro mucubiria, arīro cariyoro umarogue.

Jesu ñecu sumarā iribojegue majarā árĩñorā

Mr 1.1-17

²³ Jesu ĩgu buhenūgarasubure treinta bojori opapū ĩgu. “Īgu José magu āhrimi,” arĩ pepiriñorā masa. Josépū Elí magu árĩñumi. ²⁴ Elí Matat magu árĩñumi. Matat Leví magu árĩñumi. Leví Melqui magu árĩñumi. Melqui Jana magu árĩñumi. Jana José magu árĩñumi. ²⁵ José Matatías magu árĩñumi. Matatías Amós magu árĩñumi. Amós Nahúm magu árĩñumi. Nahúm Esli magu árĩñumi. Esli Nagai magu árĩñumi. ²⁶ Nagai Maat magu árĩñumi. Maat Matatías magu árĩñumi. Matatías Semei magu árĩñumi. Semei Josec magu árĩñumi. Josec Judá magu árĩñumi. ²⁷ Judá Joanán magu árĩñumi. Joanán Resa magu árĩñumi. Resa Zorobabe magu árĩñumi. Zorobabe Salatie magu árĩñumi. Salatie Neri magu árĩñumi. ²⁸ Neri Melqui magu árĩñumi. Melqui Adi magu árĩñumi. Adi Cosam magu árĩñumi. Cosam Elmadam magu árĩñumi. Elmadam Er magu árĩñumi. ²⁹ Er Josué magu árĩñumi. Josué Eliezer magu árĩñumi. Eliezer Jorim magu árĩñumi. Jorim Matat magu árĩñumi. ³⁰ Matat Leví magu árĩñumi. Leví Simeón magu árĩñumi. Simeón Judá magu árĩñumi. Judá José magu árĩñumi. José Jonam magu árĩñumi. Jonam Eliaquim magu árĩñumi. ³¹ Eliaquim Melea magu árĩñumi. Melea Mena magu árĩñumi. Mena Matata magu árĩñumi. Matata Natán magu árĩñumi. ³² Natán Davi magu árĩñumi. Davi Isai magu árĩñumi. Isai Obed magu árĩñumi. Obed Booz magu árĩñumi. Booz Salmón magu árĩñumi. Salmón Naasón magu árĩñumi. ³³ Naasón Aminadab magu árĩñumi. Aminadab Admin magu árĩñumi. Admin Arni magu árĩñumi. Arni Esrom magu árĩñumi. Esrom Fares magu árĩñumi. Fares Judá magu árĩñumi. ³⁴ Judá Jacobo magu árĩñumi. Jacobo Isaa magu árĩñumi. Isaa Abrahā magu árĩñumi. Abrahā Taré magu árĩñumi. Taré Nacor magu árĩñumi. ³⁵ Nacor Serug magu árĩñumi. Serug Ragau magu árĩñumi. Ragau Peleg magu árĩñumi. Peleg Heber magu árĩñumi. Heber Sala magu árĩñumi. ³⁶ Sala Caina magu árĩñumi. Caina Arfaxad magu árĩñumi. Arfaxad Sem magu árĩñumi. Sem Noé magu árĩñumi. Noé Lame magu árĩñumi. ³⁷ Lame Matusalem magu árĩñumi. Matusalem Enoco magu árĩñumi. Enoco Jared magu árĩñumi. Jared Mahalaleel magu árĩñumi. Mahalaleel Caina magu árĩñumi. ³⁸ Caina Eno magu árĩñumi. Eno Sete magu árĩñumi. Sete Adán magu árĩñumi. Adán Goāmu iidigu árĩñumi.

4

Watĩ ñerire iidoreripu Jesure

Mt 4.1-11; Mr 1.12-13

¹ Jesu Espiritu Santo ĩgu dorero dopa ta iipehogu árĩgu, ĩgu Jordán waicuriyague buharapū. Īgu eropa buharacū Espiritu Santopū ĩgure masa marirogue wadorepū. ² Eroque ejagu cuarenta ñari gohra árĩpū. Eropigu

watīpū Jesure ñerire iicū gameripū. Eropigū ñerire iidoreripū ĩgure. Irinurire ne Jesu babiripū. Eropigū irinuri pehrero gohra ĩgū oaboapū.

³ ĩgū eropa oaboacū ĩagū watī ōpa arīpū Jesure:

—Mũhũ Goãmũ magũ árĩgũ ōpa ĩhmuque. Iyere utãyere bari poyacū iique, arīripū Jesure.

⁴ ĩgū eroparīcū peegu Jesu gamebiripū. Ōpa arī yahripū:

—Goãmũ yare erā gojarapū ōpa āhraa: “Masare bari mera dihta ojocaribiro gahmea. Árĩpehreri Goãmũ ya ĩgū ya wereniguiiri mera sãre árĩro gahmea,” arĩmi Goãmũ, arīpū Jesu watĩre.

⁵ ĩgū eropa arĩra pũhrũ watīpū ĩgure utãgũ wecague aĩ mũriagu merogã pũhrũ ĩgū árĩpehreri macarĩ majare Jesure ĩhmu purumujupũ. ⁶ Eropia ĩhmugũ ōpa Jesure arīpũ:

—Árĩpehreri i macari ĩgū yure ora āhraa. Eropigũ yũ gamegũre omasia. Eropigũ i macarire, i macari majarã doreri sãre, erã opari mera mũre ogura. ⁷ Yũre “Mũhũ yũ opũ āhraa,” arĩ umupeoque. Mũ eroparīcū i macarire árĩpehreri macarire mũre ogura, arĩ wereripũ watī Jesure.

⁸ Jesu ōpa arī yahripũ ĩgure:

—Mũre umupeobeaa. Ōpa āhraa Goãmũ yare erā gojarapũ: “Mũ Opũ Goãmũ dihtare umupeoque. ĩgũ ya doreri dihtare iique,” arĩ gojañuma Goãmũ yare, arīpũ Jesu watĩre.

⁹⁻¹¹ ĩgũ eropa arĩra pũhrũ Jerusaléngue watīpū ĩgure aĩgãpũ. Erogue eja Goãmũ wihi wecague aĩ mũriapũ ĩgure. Aĩ ejatuhaja ĩgure ōpa arīripũ:

—¿Diaye ta Goãmũ magũ gohra ta āhriri mũhũ? Goãmũ yare erā gojarapũ ōpa āhraa:

Goãmũ ĩgũ yarã anyuare mũre ĩhadibudoregũcumi. Eropirã erãpũ mũre ĩhadiburãcoma mũgue utãyere weca mehbejari arĩrã, arĩ gojañuma Goãmũ yare erā gojarapũ.

Erã mũre eropa ĩhadibumorã árĩcũ mũhũ Goãmũ magũ ta árĩgũ ōgue buhrimaa dija ĩhmuque yũre. Mũre erã itamucũ ĩhmuñata yũre, arīripũ watī Jesure.

¹² ĩgũ eroparīcū peegu gamebiripũ Jesu. Ōpa arī yahripũ ĩgure:

—Goãmũ yare erā gojarapũ ōpa āhraa: “Mũ opũ Goãmũ ĩgũ arĩrare, ‘¿Diaye ta āhriri?’ arĩ masidiarã, Goãmũre ii ĩhmudoremaabiricãque,” āhraa Goãmũ yare erā gojarapũ, arīpũ Jesu watĩre.

¹³ Eropigũ watī árĩpehreri ñerire Jesure iidoreripũ. Jesu ĩgũ gamebircũ ĩagũ ĩgure merogã duhupũ.

Galilea yeba Jesu buhenũgapũ

Mr 4.12-17; Mt 1.14-15

¹⁴ Pũhrũ Jesu Galileague dujaa wapũ. Eropigũ ĩgũ Espĩritu Santo turari mera iipũ. ĩgũ eropiicũ ĩarã ero árĩpehrero majarã masa ĩgũ iira quere peeñorã. ¹⁵ Judio masa buheri wiri Jesu sã buhemũripũ. Eropirã árĩpehrerã masa ĩgure ōaro wereniguiñorã.

Nazare majarã Jesure ne umupeobiriñorã

Mt 13.53-58; Mr 6.1-6

¹⁶⁻¹⁷ Pũhrũ Nazaregue Jesu ĩgũ bugadirogue ta ejapũ. Erogue eja, Sabado árĩcũ ĩgũ eropa iiniguiro dopa ta ĩgũ judio masa erã buheri wihihue ñajajapũ. Ero ĩgũ Goãmũ yare erā gojarapũre buhediagu niguipũ. ĩgũ eropa niguiicũ ĩarã ero majarãpũ Goãmũ yare weremuhtadigu Isaia ĩgũ gojarapũre ĩgure oñorã. Iripũre Jesu i wererire bocaga buhepũ:

18 Goãmu Espíritu Santo yu mera árĩgu yare doremi. Īgu mojomorocurãre òari buherire weredoregu obeomi yare. Eropigu ñero sīporacurãre òaro mucubiricũ iidoregu yare obeomi. Eropigu peresugue árĩrã sãre erãre ĩgu tauborore weredoregu obeomi yare. Cuiiri ĩhajabirã erã òaro ĩhajaburire, gajirã erã ñero ĩbibrãre wiubure yare obeomi. 19 “Mari Opũ ĩgu yarãre peamegue wabonirãre ĩgu tauburinũri ãhraa,” yare weredoregu obeomi, arĩ buhepũ Jesu.

20 Eropa buhetuha Jesu iripũre bihacã, wihi majarãre wiatuha, doapũ. Īgu doacũ ĩarã ero árĩpehrerã ĩgure ĩhanũruñorã. 21 Erã eropa iicũ ĩgu erãre werenũgapũ:

—I dohparagã ta yu buhediro dopa Goãmu ĩgu arĩdiro dopa sihajaro ĩiaa, arĩpũ Jesu.

22 Īgu eropa werenigucũ peerã “Ihĩ òagu ãhrimi,” arĩ pepiñorã. Eropirã erã ĩgu òaro wereniguirire peerã uca wañorã. Eropirã òpa arĩñorã erã erã basi:

—Cuenã, ¿José magu árĩbeari ihĩ? arĩñorã erã erã basi.

23 Erã eroparicũ masigu Jesu werepũ erãre:

—Iribojegue majarã erã eropa wereniguidiro dopa ta mua sã yare òpa arĩdiarã ãhraa: “Mũhu duhturu árĩgu mu basi ocoyeque mũhu duhturu árĩrĩre ii ĩhmuoro dopa ta. Mũhu Goãmu ĩgu obeodigu árĩgu mu basi ĩgu turari mera ii ĩhmuque guare. Capernaumguere Goãmu turari mera ii ĩhmuayoro mũhu. Ohõ mu ya macague sãre guare ii ĩhmuque. Diaye ta mu Goãmu ĩgu obeodigu árĩrĩre gua masiboro dopa ii ĩhmuque,” arĩdiaa mua yare. 24 Ire weregura mũare. Goãmu ya weremũhtagure ĩgu ya yeba majarã umupeobeama. Eropirã yare umupeobea mua ohõ yu bugadigu árĩquerecũ. 25 Eropigu diaye arĩgu ĩiaa muare. Iribojegue majarã sãre Goãmu ya weremũtanirãre erã ya yeba majarã erãre umupeobirĩnuma. Eropiro Elia Goãmu yare weremũhtadigu ĩgu árĩrasubure uñre bojori gajĩ bojori deco gohra ne deco aribiriyoro. Eropiro árĩpehrerogue sãre ne bari mariyoro. Irisubure ĩgu ya yeba majarã Israe majarã bajarã wapeweyarã árĩquerecũ ta Goãmu erãre Eliare itamudoregu obeobirĩnumi. 26 Īgu ya yeba majarãre itamudorebiriqueregu gajĩ yeba Sidón yeba árĩri maca Sarepta waicuri maca majagore itamudoregu Eliare obeoñumi Goãmu. 27 Pũhrũ Goãmu ya weremũhtadigu Eliseo ĩgu ĩgu árĩrisubure Israe yebague bajarã cami boarã erã árĩquerecũ ta ne yujugu Israe majagure ĩgu ya yeba majagure òagu ĩbiriñumi Eliseo. Īgu ya yeba majagure òaro ĩbigu ta gajĩ yeba majagu Naamán Siria majagu dihtare òagu ĩñumi ĩgu. Eropigu judio masa erã umupeobirira waja, judio masa árĩbirã dihtare itamuñumi Goãmu, arĩpũ Jesu erãre.

28 Īgu eroparicũ peerã árĩpehrerã iri wihi árĩrã guataria wañorã.

29 Eropirã erã wahgãnũgaja Jesure tara wiria, iri maca tũro árĩri tũhrũgue ĩgure tumedijudiarĩñorã. 30 Erã eropa ĩdiaquerecũ ta Jesu erã watope waha wapũ.

Watĩ ñajasũdigu Jesure bocatĩripũ

Mr 1.21-28

31 Pũhrũ Jesu Galilea yeba árĩri macague Capernaum waicuri macague eja, Sabado árĩcũ masare buhepũ. 32 Īgu opu iro dopa ta ĩgu buhecũ peerã masa uca wañorã. 33 Iri wihi watĩ ñajasũdigu árĩgu turaro gaguĩguipũ:

34 —Muhu Jesu Nazare majagu guare garibobita muhu. ¿Dohpa iibu iiri guare? ¿Muhu guare dederecū iibu iiri? Yuhu masia Goāmū magu mu ōagu ārīrire, arī gaguiniguipū Jesure.

35 Īgu eroparīcū peegu Jesu turipū watīre:

—Ejarimarićaque. Duhuque ĩgure, arīpū Jesu.

Īgu eropa arīra puhru watīpū masure yebague mehmereja tūrucū iipū. Īgu eropa iira puhru wiria wapū. Īgu masupū ōagu dujapū. 36 Ero ārīrā ārīpehrerā ĩgu eropa wacū ĩha uca wañorā. Eropirā erā basi ōpa arī wereniguiñorā:

—¿Ñeheno buheri āhriri i ōpa wacū iiri? Turaro mera opū iro dopa ta ihī watī ñajasūdigure taumi. Eropirā erā watēa ĩgu dorero dopa ta masare duhuma, arī wereniguiñorā erā erā basi.

37 Īgu eropa iicū ĩarā iri yeba ārīpehreroguerē masa Jesu ĩgu eropa ĩirare weresiriñorā.

Jesu Simo Pedro mañecore ōago iipū

Mr 8.14-15; Mr 1.29-31

38 Judio masa buheri wihire wiria, Simo ya wihigue ñajajapū Jesu. Ero Simo mañeco dorecūgo iipo. Turaro nimacurī ārīyoro. Eropirā erā ĩgo dorecūcū wereñorā Jesure. 39 Erā werera puhru ĩgu ĩgo pohro eja, nimacurire taridorepū. Īgu eropa taridorera puhru ĩgore nimacurī tahria wayoro. Mata ōago wapo. ĩgo eropa wago wahgā doaja, ĩgo ta erāre barire ejopo.

Bajarā dorecurāre ōarā iipū Jesu

Mr 8.16-17; Mr 1.32-34

40 Abe ñajara puhru ārīpehrerā masa ĩgu pohro arirā dorecurāre Jesu pohrogue aī ejañorā. Dorecurā baja gajiropa ārīri dorere opañorā. Eropigū Jesu ĩgu mojotori mera erā weca ñapeo, ārīpehrerāre erā dorere ōaro taricū iipū. 41 Watēa ñajasūnirā sāre Jesu watēare wiriadorepū. Erā wiricū ōpa arī gaguiniguñorā:

—Muhu diaye ta Goāmū magū āhraa, arīñorā erā Jesure.

Jesu Goāmū ĩgu obeodigu ĩgu Cristo arīcū watēa ĩgure masiñorā. Eropigū Jesu ĩirare gajirāre werenidorebiripū.

Galilea yeba buhepū Jesu

Mr 1.35-39

42 Boyomuriricū Jesu iri maca arīdigū waha, masa marirogue ejapū. Īgu eropiicū ĩarā masa ĩgure ahma, bocajarā, ōpa arīñorā:

—Gua ya maca dujaque. Wabita, arīriñorā erā Jesure.

43 Erā eropa arīquerecū ta ĩgupū erāre ōpa yuhripū:

—Goāmū ĩgu opū ārīrire ōari buherire gajī macarī sāre buhedīaa yuhu. Goāmū yare obeomi ĩirare werebure, arīpū Jesu erāre.

44 Eropigū Galilea yeba maja wiri, judio masa buheri wirigū ĩgu buhe curipū.

5

Jesu ĩgu buherāre bajarā waire bocacū iipū

Mt 4.18-22; Mr 1.16-20

1 Gajinū Jesu Genesare waīcuri ditaru tarogū ejapū. Ero ĩgu arīcū ĩarā bajarā masa Goāmū yare peediarā ĩgure nurusia ejañorā. Ōaro ujuturi nuğajañorā masa bajarā. 2 Peeru gasiru imiporo payari gasire Jesu ĩapū.

Iri gasi majarā wai wejēnirā majanugaja, erā wejēdi yucure coerā iññorā.

³ Eropigu Jesu Simo yarugue ñajapū. Ñajatuha iriru dohodirure dia turo taramujupidorepū. Eropigu dohodirugue doa, masare buhebeo doapū.

⁴ Buhetuha, Jesu Simore òpa arīpū:

—Deco ñari sīwiuque. Eropirā mūhū, mū wapi mera mūa wejēdi yucure mehyuque wai ñeamorā, arīpū Jesu.

⁵ Īgu eroparicū peegu Simo Jesure yūhripū:

—Opū, wai wejēbutahmuarabū gua dohpagā ñamire. Eropiiquererā ta waire wejēbiraca gua. Eropa wejēbiriquererā ta mū dorero dopa ta mehyu ñarāra, arī yūhripū Simo.

⁶ Eropa arītuha erā mehyuñorā. Erā eropa mehyucū irigu wejēdigure bajarā wai ñajañorā. Bajarā erā ñajacū wejēdigū yehguea wariyoro.

⁷ Eropa wacū ñarā erā gajiru majarā erā mera majarāre sihubeoñorā.

—Mūa sā itamuque guare, arī sihubeoñorā Simo sā.

Erā eropa itamura pūhru peeru gasiru òaro miriparo bocañorā waire.

⁸ Simo Pedro eropa wai bajarā ñajacū ñagu, Jesu pohro mereja, ĩgure werepū:

—Yū opu, mū mera árībogū árībeaa yūhū. Ñegu āhrraa. Eropigu yure duhuque, arīpū Simo Jesure.

⁹ Īgu árīpehrerā ĩgu mera majarā sā wai bajarā ñajacū ñarā, uca wañorā erā sā. ¹⁰ Perā Simo mera majarā Zebedeo porā Santiago ĩgu pagu magu Ñū mera, erā sā ĩha uca wañorā. Eropa ucacū ñagu Jesu Simo Pedroro werepū:

—Güibita. Dohpaguere waire ñeha gameneogu mū árīro dopa ta Goāmū yarā árīmorāre sihu gameneogu árīgūca mūhū, arīpū Jesu Simore.

¹¹ Īgu eropa arīra pūhru erā erā gasire imiporo taramujupicā, erā ya árīpehrerire ero ta apicā, Jesu mera waha wañorā.

Jesu camī boagure òagu wacū ĩpū

Mt 8.1-4; Mr 1.40-45

¹² Jesu gajī maca ĩgu árīcū camī boagu ĩgu pohrogue erapū. Eropigu ĩgu Jesure ñagu mereja turaro serēpū:

—Opū, mūhū yure òagu ĩidiagu yure òagu iimasia mūhū, arī serēpū.

¹³ Īgu eropa arīra pūhru Jesu ĩgure mohmepiñagu òpa arīpū:

—Irīre iidīaa. Dohpaguere òagu árīque mūhū, arīpū.

Īgu eroparicū ta ĩgu camī boara mūra yaria wayoro. ¹⁴ Eropigu Jesu ĩgure dorēpū:

—I yū mūre òpa iirare gajirāre ne werebircāque. Mū ya dūpūre òarare pahire ĩhmuḡu waque, “Òaro āhrimi,” arīdoreḡū. Tuhajanugu Moiserē Goāmū ĩgu apidiro dopa ta ĩique. Eropigu Goāmū wihigē mirimagure asūwahḡā apique mū dore tarirare masa árīpehrerā masimaja òaro, arīpū Jesu camī boadigūre.

¹⁵ “Werebita,” ĩgu arīquerecū ta árīpehrerogū masa ĩgu iirare weresiripehoñorā. Erā eropa quere peerā masa bajarā Jesu pohrogue ejañorā. Dorecārā òarā wadiarā erā sā ĩgu pohrogue ejañorā. ¹⁶ Erā eropa ejaquerecū ta Jesu masa marirogue Goāmū ĩgu Pagure serēḡū waha warū.

Jesu dūpū buhadigūre òagu wacū ĩpū

Mt 9.1-8; Mr 2.1-12

¹⁷ Gajinū Jesu ĩgu buhecū fariseo masa, judio masare buherā sā ero doañorā. Erā árīpehrerā Galilea macari majarā, Judea macari majarā,

Jerusalén majarā árĩñorā. Eropigu Jesu Goāmũ turari mera dorecurāre ōarā iipu. ¹⁸ Irisubu bajamerāgā ũma dupu buhadigure oyariñe mera coā erañorā. Eropirā ĩgure Jesu pohro apidiarā, wihigue aĩ ñajariñorā erā ĩgure. ¹⁹ Eropa ñajadiaquererā masa bajarā árĩcũ erā ĩgure aĩ ñaja masibiriñorā. Eropirā ĩgure wihi wecague aĩ mærija, miri gobe aĩ wea iri gobegue dupu buhadigure oyariñe mera pihri dijuñorā Jesu pohro árĩrā watope. ²⁰ “Jesu ihĩ ĩgu dorecurire taricũ iigucumi,” arĩ pepiñorā erā. Erā eroparĩ pepicũ masigu Jesupu dorecugure ōpa arĩ werepu:

—Mahgu, mu ñero iirare yuhu coātuhabu, arĩpu dupu buhadire Jesu.

²¹ ĩgu eroparĩcũ peerā fariseo masa, judio masare buherā sã erā basi ōpa arĩ pepiriñorā: “Ihĩ eropa arĩ wereniguiiri mera Goāmũre ñero arĩgu iimi. ĩgu masu mari iro dopa árĩgu ĩgu masa erā ñerire coāmasibeami. Goāmũ dihta masa erā ñeri iirire coāmasimi,” arĩ pepiriñorā erā.

²² Jesu erā pepirire masigu ōpa arĩpu:

—¿Duhpirā eropa arĩ pepiri mua? ²³ “Mu ñeri iirire yu coātuha,” yu arĩcũ, “Guyagu aħrimi,” yure arāa mua masibiriquererā ta. “Wahgānugaque. Curique,” yu arĩcũ yu arĩra diaye árĩri arĩcũ mata masirāca mua. ²⁴ Yuhu masu Goāmũ ĩgu obeodigu i yeba majarā erā ñeri iirire coāmasia yuhu. Mua ire masiboro dopa ōpa ta ĩgu wahgānugacũ iigura, arĩpu Jesu.

Eropa arĩtuha dupu buhadigure ōpa arĩpu:

—Mũre arĩgu iiaa. Wahgānugaque. Mu oyarañere aĩgāque. Mu ya wihigue waque, arĩpu ĩgure.

²⁵ ĩgu eroparĩcũ ta mata árĩpehrerā erā ihuro wahgānugaja, ĩgu oyarañere aĩ ĩgu ya wihigue waha wapu. Eropa wagu ĩgu Goāmũre umupeogu mucubiriri mera ōaro wereniguiipu. ²⁶ ĩgu eropiicũ ĩarā masapu árĩpehrerā ĩha ũca wañorā. Goāmũre umupeorā mucubiriri mera ōaro wereniguiñorā:

—Dohpagāre gajiropa árĩrĩre ĩabu gua, arĩñorā erā.

Jesu Levire sihupu

Mt 9.9-13; Mr 2.13-17

²⁷ Eropiituha waha, Levĩ waĩcugure ĩgu mohmeri taribugue ĩgu árĩgure bocajapu Jesu. Levĩpu oparā ya arĩburire masare wajasea coregu arĩpu. Eropa bocajagu ĩgure ōpa arĩpu:

—Yu mera majagu arĩbu arique, arĩpu ĩgu Levire.

²⁸ ĩgu eroparĩcũ Levĩpu árĩpehreri ĩgu mohmerare duhcũ, Jesu mera waha wapu.

²⁹ Pũhrũ Levĩ ya wihi Jesu ya arĩburire bosenu iirā iĩñorā. Ero bajarā wajasea corerā, gajirā Levĩ sã mera ba doañorā. ³⁰ Erā mera Jesu ĩgu doacũ ĩarā bajamerāgā fariseo masa, judio masare buherā mera gua ũrugā Jesu buherāre arĩ ðuyasoñorā:

—¿Duhpirā ñero iirā wajasea corerā mera bahari mua? arĩ turiñorā erā.

³¹ Erā eroparĩcũ peegu Jesu yũhripu erāre.

—Dorecubirā duhturure amabeama. Dorecurā dihta duhturure ah-mama. Dorecurā duhturu amaro dopa ta “Ñerā aħraa,” arĩrā yure amarācoma. ³² Eropigu “Ñerā aħraa,” arĩrā dihtare erā ñero iirare bujaweredore, ōarĩpure gohrotocũ iigu aribu yuhu. Erā basi “Ōarā aħraa gua,” arĩ pepirāre itamugu aribiribu yuhu, arĩpu Jesu.

Ba duhurire Jesure serēpiñorā gajirā

Mt 9.14-17; Mr 2.18-22

³³ Eropirā bajamerā masa Jesure ōpa arī serēpiñorā:

—Ū buherā bajasuburi Goāmū ya árīburire iimorā ba duhuma. Eropi erā bajasuburi Goāmū mera wereniguima. Fariseo buherā sã erā iro dopa ta iima. ¿Duhpirā mū buherāpū Goāmū ya árīburire ba duhubeari erā? arīñorā erā Jesure.

³⁴ Erā eroparicū Jesu erāre ōpa arī yuhripū.

—Ōpa āhraa iri: Mojoto diridigu ĩgu bosenu iicū ĩgu mera majarā bujawererā ba duhunirā árībeama. ĩgu mera árīrā mucubiriri mera barā iima. Eropa ta yū buherā sã yū mera árīrā ba duhumasibeama. ³⁵ Yujunū yure Goāmū aicāgucumi. Eropa ĩgu aīra puhru yū buherā mera árīsome yūhū. Irisubugue ta yū buherā ba duhurācoma, arīpū Jesu.

³⁶ Iribojegue maja buheri mama buheri mera erā buhemoresūdiacū ĩagu ōpa arī werenemopū Jesu erāre.

—Ne mama suhrirore miri gasirogā yehgue aī, murañe suhrirore seretuma masiya mara. Mari eropa seretura puhru mama gasirore mari coecū, mura gasiro árīro tara gameneo yehgueacū iiaa. Eropirā mura buheri mama buheri mera wapimoa buhebiricāro gahmea. ³⁷ Eropirā ne ĩgui decore imisiri decore waibagu gasiro ajurore, mura ajurore diyebiricāro gahmea. Eropa iicū ĩgui deco pahmuro mura ajurore yehgue dija waha. Iri ajuro yehgucū ĩgui deco iri ajuro sã cohmoa waha.

³⁸ Eropirā ĩgui deco mama decore mama ajuro mera diyero gahmea. Eropa ta mama buheri mura buheri mera buhebiricāro gahmea. ³⁹ Vino deco mura decore masa erā ihrira puhru mama decore gamebeama erā. Ōpa arīma masa. “Vino mura deco mama decore ōatarinūgaa,” arīma masa, arīpū Jesu erāre.

6

Sabado árīcū Jesu buherā trigo pororire tarīñorā

Mt 12.1-8; Mr 2.23-28

¹ Gajinū Sabado árīcū Jesu ĩgu buherā sã trigo pohegue ĩha tariañorā. Eroque tariarā, ĩgu buherāpū trigo pororire turī, gasiri cohro bañorā iriyerire. ² Erā eropa iicū ĩarā bajamerāgā fariseo masa erāre serēpiñorā:

—¿Duhpirā maa Sabado mari soorinū árīquerecū ta mohmeri? Mari dorerire tarinūgarā iiaa, arīñorā fariseo masa.

Erā eroparicū peegu Jesupu “Yū buherā iri dorerire tarinūgarā iibeama,” arīgu ōpa arīpū erāre:

³⁻⁴ —Iribojegue Davi ĩgu mera majarā mera oaboagu Goāmū wihigue ñaja, iri wihī árīri panre bapū. Eropa bagu ĩgu mera majarā sãre badoregu iri panre ōpū. Iri pan pahia dihtare badorera árīriyoro. Goāmū doreri iri panre gajirāre badorebiriyoro. ¿Davi irire ĩgu eropa ĩrare Goāmū yare erā gojarapūgue buhebirari mua? Davi i panre bagu Goāmure tarinūgagu iibirīñumi. Dohpagāre yū buherā sã i trigo yerire turī barā Goāmure tarinūgarā iibeama. ⁵ Yūhū masū Goāmū ĩgu obeodigu inonū soorinū sãre masa erā iiburire doremasia, arīpū Jesu.

Mojoto buhadigu ōagu wapu

Mt 12.9-14; Mr 3.1-6

⁶ Gajinū Sabado árīcū Jesu judio masa buheri wihigue ñaja buhepu masare. Ero mojoto diayepū buhadigu árīpū. ⁷ Ero árīrā sã bajamerāgā

masare buherā, fariseo masa sã Jesure ihanuruñorā ĩgure weresãdiarã. Ōpa arĩ pepiñorã: “Sabadonũ árĩcũ ihĩ masure ðagũ iibocumi Jesu. ĩgũ eropiicũ ‘Mari soorinũ Jesu mohmegu iimi,’ arĩ weresãrãra,” ari pepiñorã.

⁸ Jesu erã pepirire masigũ, mojoto buhadigũre ðpa arĩpu:

—Wahgãnuğajaque. Ohõ arĩque, arĩpu ĩgure.

ĩgũ eropa arĩra puhrũ mojoto buhadigũpu wahgãnuğaja, ero nigũpu.

⁹ Eropigũ Jesu erãre serẽpipũ.

—Muare serẽpigũra: ¿Mari soorinũ árĩcũ ðarire iicũ ðabeari? ¿Ñerire iicũpũre ðhari? ¿Soorinũ árĩcũ masure masucũ ðhari? ¿O soorinũ árĩcũre masure wejẽcũpũre ðhari? arĩpu Jesu erãre.

¹⁰ Eropa arĩgũ Jesu erãre ihametupeho, mojoto buhadigũre ðpa arĩpu daja:

—Mũ mojotore sísirãbeoque, arĩpu ĩgũ.

ĩgũ eroparĩcũ ta mojoto buhadigũpu sísirãbeo, ðari mojoto wayoro.

¹¹ ĩgũ eropa iicũ ĩarã erã ĩgũ mera turaro guañorã.

—¿Dohpa iirãcuri mari ĩre? arĩñorã erã basi.

Jesu ĩgũ buherãre doce gohra ĩgũ apimorãre beyepũ

Mt 10.1-4; Mr 3.13-19

¹² Irinũrĩre Jesu utãgũgue Goãmũre serẽgũ muria wapũ. Eroque arĩgũ, ñamire Goãmũ mera werenigũ butahmua wapũ. ¹³ Boyorogue ĩgũ buherãre ĩgũ pohro sihubepũ. Sihubeotuha erã mera majarãre doce gohra ĩgũ apimorãre beyepũ. ¹⁴ Oã arĩñorã Jesu ĩgũ beyenirã: Simore Jesu Pedro piyudigũ, Simo pagũ magũ Ande, Santiago, Ñu, Felipe, Bartolomé, ¹⁵ Mateo, Toma, Santiago arĩñorã. Santiagopũ Alfeo magũ arĩpu. Eropirã Simo celote ya curu majagũ arĩgũ, ¹⁶ Juda Santiago pagũ magũ sã, Juda Iscariote sã arĩñorã ĩgũ beyenirã. Juda Iscariotepũ Jesure ihatũrĩrãre ĩhmũbu arĩpu.

Jesu bajarã masare buhepu

Mr 4.23-25

¹⁷ Eropii Jesu ĩgũ buherã mera utãgũ weca arĩnirã dijariicũ, bajarã gajirã ĩgũ buherã mera ðari puũgue nigũñorã erã. Gajirã masa sã bajarã arĩñorã. Erã arĩpehrero Judea yeba macari majarã, Jerusalén majarã, Tiro waĩcuri maca majarã, Sidón waĩcuri maca majarã, wũariya tũro arĩri macari majarã ĩgũ pohroque eranirã arĩñorã. ¹⁸ Erã Jesu buherire peerã erarã, erã dorecurire taudorerã erarã arĩñorã. Watẽa ñajasũnirã sã ĩgũ pohroque eraa, ðarã wañorã. ¹⁹ Jesu ĩgũ turari mera ðarã wacũ iipu erãre. Eropirã erã arĩpehrerã ĩgũre mohmepiñarã erañorã.

Jesu mucubirĩre, bujawereri sãre buhepu

Mt 5.1-12

²⁰ Puhrũ Jesu ĩgũ buherãre ĩha, werepũ:

—Mũa mojomorocũrãpu Goãmũ ĩgũ opu arĩroguere warãca mũa. Eropirã mũa mucubirĩrãca.

²¹ “Dohpaguere mũa oaboarãpu yapirã arĩrãca. Eropirã mucubirĩrãca. “Mũa dohpaguere bujawere orerãpu mucubirĩmorã aħraa. Eropirã puhrũguere ĩayerãca. Eropirã mucubirĩrãca.

²² “Yũhũ masũ Goãmũ ĩgũ obeodigũ aħraa. Eropirã yaha arĩburire mũa iiri dipuwaja gajirã mũare ihatũricũ mũapũ mucubirĩrãca. Mũare erã cóacũ sãre mucubirĩrãca. Mũare erã ñero werenigũiquerecũ ta,

“Ñerã áhřima,” muare arĩquerecũ ta muapu mucubirirãca. ²³ Muare erã eropa iinirãre umarogue mua ejacũgue Goãmu muare wuaro ðaro iigucumi. Eropirã turaro mucubirirã arĩque. ðaro siporãcurã arĩque. Muare ñaturirã ta erã acawererã mura iribojegue majarã eropa ta ñero imuriñuma Goãmu yare weremuñtarãre.

²⁴ “Eropirã mua dohpaguere baja oparãpu i yebaguere mua ðaro arĩtuhabu. Eropirã ñero tarirã arĩrãca mua.

²⁵ “Dohpaguere yapirãpu mua oaboarãca. Mua eropa arĩrã ñero tarirãca.

“Dohpaguere mua mucubirirã arĩrãpu puhřuguerẽ bujawere oererãca. Eropirã ñero tarirãca.

²⁶ “Goãmu yare weremuñtarã áhřaa,” arĩ guyarãre “Õarã áhřima,” arĩriñuma bajarã iribojegue majarã. Mua mera majarãre eropa ta “Õarã áhřima,” arĩbocoma masa. Eropa arĩnirã arĩrãpu ñero tarirãca mua sã, arĩ buhepu Jesu.

Muare ñaturirã erã arĩquerecũ erã sãre mahique

Mt 5.38-48; 7.12

²⁷ Eropigu õpa arĩ buhenemopu Jesu:

—Yũre peediarãre, muare arĩgu tiiaa. Muare ñaturirã erã arĩquerecũ erã sãre mahique. Muare ñaturirãre ðaro iique. ²⁸ Muare ñero arĩdorerã erã arĩquerecũ ta ðadoreque erãre. Muare ñero iirã erã arĩquerecũ ta, “Erã sã ðaro arĩporo,” arĩ serẽbasaque Goãmure. ²⁹ Yujugu mua wayuporã pacũ, “Gajĩpu sãre padiagu paque,” arĩque iğure. Mua weca majañe suhřirore iğũ emacũ mua camisa sãre ocãque iğure. ³⁰ Muare serẽgure iğũ serẽropẽ ta oque iğure. Mua yare iğũ aicũ iğure dipaturi serẽpibita irire. ³¹ Gajirã muare ðaro iicũ gahmea mua. Erãre mua ðaro iicũ gamero dopa ta ðaro iique erã sãre. Erã ðaro iibiriquerecũ ta muapu erãre ðaro iique.

³² “Muare umupeorã dihtare mua umupeocũ iri ne duhřiburi arĩbeaa. Ñerã sã eropa ta iima. ³³ Eropirã muare ðaro iinirã dihtare mua ðaro iicũ iri sã ne duhřiburi arĩbeaa. Irire ñerã sã iima. ³⁴ Eropiro gajirãre wayurã “Yũre wiaque,” arĩcũ mua wayuri sã ne iri duhřiburi arĩbeaa. Ñerã sã gajirãre wayurã ero puhřu wiaphodorerã ohoma. ³⁵ Eropirã muapu muare ñaturirãre mahi umupeoque. Eropirã erãre ðaro iique. Eropirã mua yare mahibirã ta wayuque erãre. Mua eropa iicũ Goãmu muare ðaro iigucumi. Goãmupu iğure umupeobirã sãre, ñerã sãre ðaro iimi. Eropa ta iique mua sã. Mua eropa iirã wuaro wajatarãca. Eropirã Goãmu turatarigu umaro majagu porã arĩrãca. ³⁶ Mari Pagũ umaro majagu iğũ mojomoro ñadiro dopa ta mua sã masare mojomoro ñaque.

Gajirãre “Ñerã áhřima,” arĩbircãque, arĩpu Jesu

Mt 7.1-5

³⁷ Eropigu erãre werenemopu:

—Gajirãre “Ñerã áhřima,” arĩrã erã iirare werewuabircãque. Mua eropa arĩ werewuabircũ Goãmu mua sãre “Ñerã áhřima,” arĩsome. Gajirã muare erã ñero iirare, erã ñero arĩra sãre cãdijique. Mua eropa cãdijicũ ñagu Goãmu mua sãre mua ñero iirare cãdijigucumi. ³⁸ Gajinore oparã gajirãre oque. Mua eropa ocũ Goãmu muare ogucumi. Eropa ogu

muare ðaro queoro wuaro ogucumi. Ōaro wajayegucumi. Gajirāre mua orañepē ta mua sāre Goāmū ogucumi, arīpū Jesu erāre.

³⁹ Eropā arītuha Jesu buhenemogu ðpa arīpū werenigui queori mera:

—Cuirī ihajabirā erā seyaro erā basi game tuagārā erā perāgue ta mehtuha yuriñaja warācoma gobegue. Eropā ta erā cuirī ihajabirā iro dopa ta Goāmū yare masibirā sā gajirāre buhedarima. Eropirā erā erā buherā sā peamegue warācoma. ⁴⁰ Buherā erāre buhegure masitarinugabeama. Eropirā arīpehrerā buherā erāre ðaro buhepehora puhru erāre buhegu iro dopa ta masirācoma. Eropirā erāre buherā masibirā arībiricāporo, arīpū Jesu.

⁴¹ Eropā arītuha gajī buheri mera buhepū daja:

—Mari werenigui queori mera buhecū ðpa iirā āhraa mua: Mua acaweregu īgu cuirugue miri pogañegā mehñajacū iri pogañegāre ðaro īhaa mua. Mū yaru cuirupure wuarimijiro arīquerecū irimijipure ne pepibea mua. Eropirā miri pogañegāre mua ĩaro dopa ta mua acaweregu īgu ñero iiripure ðaro īhaa mua. Muapū mua ñero iirire turaro iiquererā ta iirire eropa pepicāa. ¿Dohpa arīrono eropa āhriri mua? ⁴² Ōpa arī wereniguia mua acawererāre: “Acaweregu, mū ñerire iigu iica. Eropigu iri ñerire duhcāque,” arī wereniguia mua. Eropā īgu ñerire duhudorequererā muapū iri ñerire iirā duhubea. ¿Duhpirā mua ñerire iiquererā ta iirire eropa pepicāri mua? Masa erā purupure ñero ii corerā āhraa mua eropa iirā. Mua ñero iiripure duhumtaque. Mua eropa iira puhru mua acaweregure “Mū ñero iirire duhcāque,” arī weremasia, arī buhepū Jesu.

Masa erā wereniguirire peerā erā arīricurire masia mari, arī werepū Jesu

Mt 7.17-20; 12.34-35

⁴³ Eropigu buhenemogu ðpa arī werenemopū erāre werenigui queori mera:

—Yucūgu ðadigu ñerire ducacubeaa. Eropiro ñedigu sā ðarire ducacubeaa. ⁴⁴ Yucūgu ducare masirā “Irigu dūca ta āhraa,” arī masia mari. Poracūdigu higuera dipure ducacubeaa. Eropiro aña poragu īgui tōrire ducacubeaa. ⁴⁵ Eropā āhrima masa sā. Ōagu īgu pepiri ðari āhraa. Eropigu īgu ðarire wereniguimi yucūgu ðadigu irigu ðarire ducacuro dopa ta. Ñegure īgu pepirigū ñeri āhraa. Eropigu īgu ñerire wereniguimi yucūgu ñedigu irigu ñerire ducacuro dopa ta. Mari pepirigū iri arīro dopa ta wereniguia mari, arīpū Jesu.

Pe wihi iira queori werepū Jesu

Mt 7.24-27

⁴⁶ Eropigu erāre werenemopū:

—Mua yure “Opū,” arāa. Eropā arīquereerā ta yū dorerire iibea mua. ¿Duhpirā eropa iibeari mua? ⁴⁷ Arīpehrerā yure gamerā yū wereniguirire peema. Eropirā yū dorerire tarinugabeama. Ōpa āhrima yure tarinugabirā: ⁴⁸ Wihi ðaro nugudi iro dopa ta āhrima erā. Īgu ūhcāri goberire seha, wihire nunugami. Iri wihi ðaro īgu ūhcāro nugura wihi arīro dia miricū turaro deco turaquerecū iri wihi ðaro turaniguia. ⁴⁹ Eropirā yū wereniguirire peenirā arīquereerā ta yū dorerire iibirapū wihire ðaro nugubigu iro dopa āhrima. Iri wihire wecagā nugu, ðaro iinugabeami. Īgu eropa iira wihi arīro dia miricū deco turacū iri wihi

mata cohro yuhria wahaa. Eropiro iri wihi cohmopehrea wahaa, arīpu Jesu.

7

*Surara opu pohro majagure ĩgu dorecucũ Jesu ðagu iipũ ĩgure
Mt 8.5-13*

¹ Iri queori masare weretuha Jesu sã Capernaumgue ejañorã. ² Ero arĩgu cien surara opu arĩgu ĩgu pohro majagure turaro mahipu. ĩgu pohro majagu dorecugu arĩgu sĩriro pohrogue arĩpu. ³ Eropigu Jesu ĩgu iirare peegu, judio masa murãre sihu Jesu pohrogue obeopũ opu. ⁴

—Yũ pohro majagure dorecugure ðacũ iigu arique, arĩ weredoregu obeopũ opu murãre.

⁴ Erã Jesu pohrogue ejarã, ðpa arĩ burigã serẽñorã ĩgure:

—Surara opu guare mũ pohro obeoami. “Yũ pohro majagure dore taubasagu ariporo,” arĩ weredoregu obeoami. ĩgu opu ðagu ahrimi. ĩgu eropa arĩcũ itamuque ĩgure. ⁵ Mari ya maca majarãre ĩgu mahimi. Eropigu ĩgu gua buheri wihire gua iira waja wajayemi, arĩñorã murã Jesure wererã.

⁶ Erã eropa arĩ werecũ peegu Jesupu erã mera wapũ. Surara opu ya wihi pohro ĩgu ejabu iicũ gohra opu ĩgu mera majarãre Jesure ðpa arĩ weredoregu obeopũ:

—Opu, ðaroca. Aribita. ðagu arĩbeaa yũhũ. Yaha wihi mure ñajaridorebuno arĩbeaa yũhũ. ⁷ Eropigu mũ pohro wabirabũ. Yuju diaye ta mũ turari mera dorebeoque. Mũ eropiicũ yũ pohro majagu ðagu wagucumi. ⁸ Yũre yũ weca arĩrã gajirã oparã dorema. Eropigu yũ sã surarare dorea. Yujugure “Waque,” yũ arĩcũ ĩgu wahami. Gajigure “Arique,” yũ arĩcũ ĩgu ahrimi. Yũ pohro majagure “Ire iique,” yũ arĩcũ irire ĩgu iimi. Eropigu mũ sã mũ dorero dopa ta ĩgu dorecugu tarigucumi, arĩ weredorepu surara opu.

⁹ Jesu irire peegu, uca wa, bajarã masare ĩgu mera nurusiarãre majinuga wereru:

—Diaye ta muare arĩgu iiaa. Ihĩ surara opu Israe masu arĩbiriqweregu Goãmure burigã umupeomi. ĩgu pohro majagure yũ ðagu wacũ iiburire masituhami. Israe masare ne sihi iro dopa umupeorãre ñanibea, arĩpu Jesu.

¹⁰ ĩgu eropa arĩra puhru surara opu Jesu pohro ĩgu obeonirã erã opu ya wihigue dujaa wañorã. Dujaja dorecudigure ðagu ĩgu arĩcũ ñañorã erã.

Jesu wapeweyo magure masupu

¹¹ Puhru ñari Naín waĩcuri macague Jesu wapũ. ĩgu buherã bajarã masa sã ĩgu mera wañorã. ¹² Iri macare ñajaro pohro ĩgu ejacũ sĩridigure masa aĩ wiririñorã yaarã warã. Sĩridigu pago wapeweyo arĩpo. Yujugu ta arĩgu igo magu sĩa wapũ. Eropirã ero majarã masa bajarã igo mera wañorã.

¹³ Igo eropa wacũ ĩagu Jesu igore mojomoro ĩapu.

—Orebita, arĩpu Jesu igore.

¹⁴ Eropa arĩgu sĩridigu ĩgu masa porere eja mohmepipu. ĩgu eropa mohmepicũ ñarã iri porere coãrãpu nũgajañorã.

—Mahgu, yũhũ mure ðpa arãa. Wahgã doajaque, arĩpu Jesu.

15 Īġu eroparċiċu ta s'iridigu maru wahġa doaja, wereniguipu. Eropigu Jesu ġure ġu pagore wiapu. 16 Eropirā erā árġpehrerā ġuirā warā Goāmure umupeo opa arġñorā:

—Goāmu yare weremuhtagu masitarigu dohpague tamerare mari watope āhrimi, arġñorā erā.

—Goāmu marire ġu yarāre itamugu eratuhami, arġñorā ġajirā.

17 Eropirā árġpehrerā Judea yeba majarāre ero tauro árġri macari majarāre Jesu ġu iirare masa weresiripehoñorā.

Ñu waġyeri masu ġu buherāre Jesure serēpidorepu
Mt 11.2-19

18 Eropi Jesu ġu iirare ġarā Ñure peresu árġġure wereñorā ġu buherā. Eropa erā werecū peegu perāre ġu pohro sihubeo, 19 Jesure serēpidoregu oboepu Ñu. Opa arġ serēpidorepu:

—“Yu puhru ġajigu arġġucumi,” ġÑu ġu arġidigu ta āhriri muhu? ġO ġajġure corerācuri ġua? arġ serēpidorepu Ñu perā ġu buherāre.

20 Eropi erā Jesu pohro eja, serēpiñorā ġure:

—Ñu waġyeri masu mure opa serēpidoregu oboeami ġuare. “Yu puhru ġajigu arġġucumi,” ġÑu arġidigu ta āhriri muhu? ġO ġajġure corerācuri ġua? arġ serēpiñorā erā Jesure.

21 Irisubu ta bajarā dorecurāre, watēa ñajasūnirāre, cuiri ġhajabirāre oarā iipu Jesu. 22 Eropigu Ñu ġu obeonirāre Jesu yuħripu:

—Dohpaguere mua ġarare mua peerare Ñure wererā waque: Opa arġġue: “Jesu mera cuiri ġhajabirā ġhama. Curimasibirā cuħrima. Cami boanirā oarā wahama. Peejabirġnirā peea wahama. Sġrġnirā masa wahama,” arġ wereque. Eropirā moġomorocurāre oari buherire yu wererare wereque ġure. 23 Eropa arġ weretuhaja opa arġ wereque Ñure: “Yure peegu ‘Diaye ta āhraa,’ arġġu ġu mucubirġu āhrimi, arġmi Jesu,” Ñure arġ wererā waque, arġpu Jesu.

24 Ñu buherā erā wara puhru Jesupu Ñu árġricurire werenuġapu bajarā masare:

—Mua masa marirogue Ñu pohrogue warā, ero majare taare miru weacū ġarā eġabirġbu mua. 25 Oari suħricuġu sāre ġabirġbu mua. Oari suħricurā waja ġagaire suħri sañarā oparā ya wirġgue āħrima. 26 Masa marirogue eġarā Goāmu yare weremuħtadipure ġarā eġabu. Diaye ta Ñu Goāmu yare weremuhtagu āħrimi. ġajirā Goāmu yare weremuħtanirā tauro árġġu āħrimi Ñupu. 27 Iriboġue Goāmu yare erā ġoġarapū Ñure opa arġ wereyuyoro:

Mari ġagu ġu ġagure opa arġpu: “Mu core mure wereyubure oboegu iiaa,” arġmi Goāmu, arġ ġoġañuma iriboġuere Ñure.

28 “Diaye arġġu iiaa. Masa árġpehrerā tauro āħrimi Ñu. Isubure ġu eropa árġġurecū ta umarogueru Goāmu ġu opu árġroguere árġpehrerā docanuġagupu Ñu tauro árġġucumi, arġpu Jesu masare.

29 Īġu eroparċiċu peerā masa, wajasea corerā mera Ñu ġu waġyenirā árġrā opa arġ pepiñorā Goāmure: “Goāmu diaye iġu āħrimi,” arġ pepiñorā erā. 30 Fariseo masapu, judio masare buherā sā Ñu ġu waġyenirā árġdiabirġnirā árġñorā. Eropirā Goāmu erāre ġu itamudiarire erā ġamebiriñorā.

31 Eropigu Jesu dipaturi werepu:

—¿Dohpague majarã masa ñehmarano iro dopa àhriri mua pepicũ?
 32 Erã majirã iro dopa àhrima. Erã majirã doberi duarogue bira doarã, òpa arĩ duyasoma erãgã erã basi: “Mua bayaburire tarisu gua purirabu. ¿Duhpirã mua mucubiri bayarã aribirari? Eropirã gua burigã ñehamere orerabu. ¿Muapu duhpirã gua mera orebirari?” arĩma duyasorã. Erã majirã arĩ duyasorã iro dopa ta iirã òpa arãa mua dohpague majarã. 33 Ñu waĩyeri masu Goãmu ya árĩburire ba duhugu, vinore ihribirimi. Īgu eropa ihribiricũ ĩarã “Pee masibigu àhrimi,” arĩrabu mua ĩgure. 34 Yũpu masu Goãmu ĩgu obeodigu árĩgu yuhũ baha ihria. Yũ eropa iicũ ĩarã òpa arãa mua yũpũre: “Īaque. Ihĩ wuaro bagu merericũgu sã àhrimi. Wajasea corerã ñero iirã erã wapicũgu àhrimi ĩgu,” arãa mua yũre. 35 Eropã masibiriquererã ta gua iirare ĩarã, Goãmu masirire gua opacũ masirãca mua, arĩ werepu Jesu erãre.

Fariseo masu Simo waĩcũgu ya wihi árĩpu Jesu

36 Fariseo masu Simo waĩcũgu ĩgu ya wihigue badoregu sihupu Jesure. Īgu eropa sihucũ Jesu ĩgu ya wihigue eja, erã bari mesague dojapu. 37-38 Iri macaguere ñeri iigo árĩpo. Jesu fariseo masu ya wihigue ĩgu árĩcũ igo peepo. Eropã peego alabastro mera iidirure poresuri dicudirure aĩ, Jesu pũrupũ eranũgara pũhũ orepo. Eropã orego, Jesu guburire igo codeco mera webo, igo poari mera niucõapo. Īgu guburi bojocũ ĩha igo ĩgu guburire mihmi, iri poresuri mera pipeopo. 39 Igo eropa iicũ ĩagu fariseo masu Jesure sihudigu ĩgu basi òpa arĩ pepiripu: “Igo ĩgure mohmepĩnago ñerire iigo àhrimo. Ihĩ Jesu Goãmu ya weremũhtagũ árĩgu irire masiboñumi,” arĩ pepiripu. 40 Īgu eropa arĩ pepirire masigu Jesu werepu ĩgure:

—Simo, dohpague tamerare mũre werediaa, arĩpu Jesu.

—Buhegu, ¿yũre dohpa arĩ werediari mũhũ? arĩ yũhripũ Simo.

41 Īgu eroparĩcũ Jesupu òpa arĩ buhebu yũhripũ:

—Opũre perã wajamorã árĩñuma. Yujugu wuaro wajamogu quinientos niyeruseri wajamoñumi. Gajigupu merogã cincuenta niyeruserire wajamoñumi. 42 Eropirã erã wajamorire erã wajayegohrabiricũ ĩagu ĩgu erã wajamorire cãdijicãñumi. ¿Īgu eropiicũ dohpague tamerare nihipũ erã opũre mahitarĩnũgayuri mũ pepicũ? arĩ serẽpipũ Jesu.

43 Simo yũhripũ:

—Õbaa, wuaro wajamodigu merogã wajamodigu tauro ĩgu opũre mahibocumi, arĩpu Simo.

—Diaye yũhria mũhũ yũre, arĩpu Jesu.

44 Eropã arĩtuha ĩgure pipeodigore maji ĩha, Jesu Simore werenemopũ:

—Īgore ĩaque mũhũ. Mũ ya wihire yuhũ ñajarara pũhũ yũ guburi coeburi decore obirabu mũhũ. Igotũ igo ya codeco mera yaha guburire coemo. Pũhũ igo ya poari mera tucoeamo. 45 Mũpu yũre bocatĩri mimibirabu. Igotũ ohõ yũ doaropẽ yũ guburire mihmimo. 46 Mũpu yũ dipurure yũũ mera pipeobirabu. Igotũ yũ guburire poresuri mera pipeoamo. 47 Eropã arĩgu mũre weregu ta iiaa. Igo igo ñero iira baja gohra àhraa. Eropigu igo ñero iirare cãdijibũ. Yũ eropa iicũ igo turaro mahiamo yũre. Erã ñero iirare merogã bujawere guñarãpu merogã yũre cãdijidorema. Eropirã erã ñero iirare merogã cãdijisũnirã merogã mahima yũre, arĩpu Jesu Simore.

48 Eropã arĩtuha ĩgu ĩgore werepu:

—Dohpague tamerare mu ñero iirare cohãbu, arĩpu Jesu.

⁴⁹ Īgu eroparicũ peerã Jesu mera doarã erã basi õpa arĩ wereniguiñorã:
—Ihĩ diaye ta “Ñerire cóãgu iiaa,” arĩmi. ¿Dohpa árĩgũno ãhriri ĩgu ñero iirire cóãgu? arĩñorã erã erã basi.

⁵⁰ Eropĩgu Jesu nomeore õpa arĩ werepũ:

—Yũre mu umupeocũ mũre peamegue wabodigore taua. Gũiro mariro waque, arĩpu Jesu igore.

8

Nome Jesure itamuñorã

¹ Pũhrũ paga macarigue mũta macarigãgue sãre eja, Goãmu ĩgu opũ árĩrire, õari buherire werepũ Jesu. Doce ĩgu buherãpu ĩgu mera árĩñorã.
² Eropirã nome sã watẽa ñajasũnirã nome, dorecũnirã nome, Jesu õarã ĩgu iinirã ĩgu mera árĩñorã. María waĩcũgo Magdalena erã arĩ piyudigo Jesu mera curipo. Igo siete watẽare Jesu ĩgu cóadigo árĩpo. ³ Juana sã Cuza waĩcũgu Herodere itamudigu marapo sã Jesu mera curipo. Susana waĩcũgo sã gajirã nome mera baja erã gajino opari mera ĩgure itamuñorã.

Jesu oteri masũ queorire werepũ

Mt 13.1-9; Mr 4.1-9

⁴ Eropi baja macari majarã Jesu pohrogue gamenereñorã. Erã gamenerera pũhrũ Jesu ĩgu werenigui queori mera erãre werepũ buhebu:

⁵ —Oteri masũ otegu waũumi. ĩgu eropa otecũ gajiyeri ma tũro yuri merejayoro. Eropirã iriyerire masa curadiũnuma. Eropirã mirĩmagũ porã bajarã ahri iriyerire baũuma. ⁶ Eropi gajiyeri utã watope yuri merejayoro. Erote yeba deco mariyoro. Eropiro iriyeri puhri wiriri niguri ñaũia wayoro. ⁷ Gajiyeri pora yucũ watope yuri merejayoro. Pora yucũpũ puhri tiataria wa, oterayeripũre wejẽcãyoro. ⁸ Gajiyeri õari yeba yuri merejayoro. Oaro puhri dũcacũyoro. Eropiro baja dũcacũyoro, arĩpu Jesu.

Eropa arĩtuha õpa arĩnemopũ:

—Ire õaro peeque mũa, arĩpu ĩgu.

Jesu werenigui queori mera ĩgu buherire werepũ

Mt 13.10-17; Mr 4.10-12

⁹ Pũhrũ ĩgu buherã iri werenigui queorire masidiarã, Jesure serẽpiñorã:
—¿I queori mera dohpa arĩ buhegu iiri mũhu? arĩ serẽpiñorã erã. ¹⁰ Erã eroparicũ Jesu yũhrĩpu:

—Goãmu ĩgu opũ árĩrire iribojegue majarã erã masibirirare mũare masicũ iimi Goãma. Gajirãpũre eropa iĩbeami ĩgu. Eropĩgu erãre werenigui queori mera buhea. Yũ eropa iicũ erã yũ buherire peequerẽ masisome, arĩpu Jesu ĩgu buherãre.

Jesu oteri masũ queorire were amũpũ ĩgu buherãre

Mt 13.18-23; Mr 4.13-20

¹¹ Eropa arĩtuha erãre werenemopũ:

—Õpa arĩ werea iri werenigui queorire: Oteriyeri õari buheri iro dopa ãhrraa. ¹² Eropiro ma tũro yuri merejariyeripũ õari buheri iro dopa ãhrraa. Eropiro masa erã õari buherire peecũ ĩagu watĩpu ahri, iri buherire masidorebeami masare. ĩgu eropa iibiricũ erã Goãmũre umupeoboũma. Erã eropa umupeocũ ĩagu Goãmũpũ erãre peamegue wabonirãre tauboũumi. ¹³ Utã weca yuri merejarayeri õari buheri iro

dopa áhraa. Eropirã masa ðari buherire pee, mucubiriri mera irire pee aïma. Eropa pee aïquererã ta utã weca áriri yucu nuguri mariri yucu iro dopa ta oã masa sã turabeama. Eropa turabirã yaha ðari buherire erã peera dipuwaja gajirã erãre ñero iicũ iarã yahapure duhucãma. ¹⁴ Eropi pora yucu weca yurimerejarayeri ðari buheri iro dopa áhraa. Eropirã masa ðari buherire peequererã ta, i yeba majare wuaro pepirã, niyerure gamerã, i yeba majare gahmema erã. Eropirã iripũ ðari buherire cãhmotaa. Iri cãhmotacũ masa Goãmu gameripure iibeama. ¹⁵ Eropi ðari yeba yurimerejarayeri ðari buheri iro dopa áhraa. Eropirã masa ðari buherire ðaro mera pee peenurucãma. Eropirã duhuro mariro Goãmu ïgu gamero dopa ta ðarire iima, arĩpũ Jesu.

Jesu sihãgodiru queorire buhepũ

Mr 4.21-25

¹⁶ Eropa arĩtuha gaji queori mera buhepũ Jesu.

—Ne sihãgodirure masa sihãgora puhru máticasoro doca dibubeama. Eropirã irirure cama doca dibubeama. Umárogue irirure duhpeomi wihigue ñajarã erã ðaro iha ñajama ðaro. ¹⁷ Mari iiraguere Goãmure duhmasiya mara. Puhruguerẽ arĩpehreri masisũroca. Sihãgodiru ñamire boyoro dopa ta iribojegue erã masibirirare masirãcoma masa.

¹⁸ Eropirã mua peerã ðaro peenurũque. ðaro peenurũgu, ðaro masigucumi. Peenurubigu “Merogã peea,” ïgu arĩquererã iripũ dederea waroca ïgure, arĩpũ Jesu.

Jesu acawererã ïgure sihuñorã

Mt 12.46-50; Mr 3.31-35

¹⁹ Puhru Jesu pagu porã erã pago mera ïgu pohrogue warã iiriñorã. Masa bajarã árĩcũ ïgu pohro ejabiriñorã. ²⁰ Eropigũ yujugu Jesure werepũ:

—Mu pago mu pagu porã mera disiporogue niguima. Mure iarã ahrañorã, arĩpũ ïgu Jesure.

²¹ ïgu eroparĩcũ ðpa arĩ werepũ Jesu arĩpehrerãre buhebu:

—Goãmu buherire peerã, irire tarinũgabirã erã ta áhriima yu pago yu pagu porã iro dopa árĩrã, arĩpũ Jesu erãre.

Jesu miruñere yusudorepũ

Mt 8.23-27; Mr 4.35-41

²² Gajinũ Jesu ïgu buherã mera dohodirugue ñaja

—Ina, taribujarã, arĩ, erã arĩpehrerã iriru mera ditarugue taribuja wañorã.

²³ Eropa taribujagu carĩa wapũ ïgu. Erã eropa taribujarisubu turaro miruñe ariyoro. Miruñe aricũ pãgũri wahgã, erãre miucãriyoro. Eropa waro mirimaja guhya arĩyoro erãre. ²⁴ Eropa wacũ iha uca wa, Jesu pohro waha, ïgure wahgũñorã.

—Buhegu, mari mirimorã iiaa, arĩñorã erã. Erã eroparĩcũ Jesupũ wahgã, miruñere “Iripẽta weã duhuque,” arĩpũ. Eropa arĩgu pãgũrire “Yusuaque,” arĩpũ. ïgu eroparĩcũ ta miruñe taria wayoro. Eropiro pãgũri sã yusũ dija wayoro. ²⁵ Eropa wara puhru Jesu erãre ðpa arĩpũ:

—¿Mua yure umupeobeari?

Erãpũ gũi, iha uca, ðpa arĩ wereniguiñorã erã basi:

—Cue, ¿ñehmuno masũ áhriri ihĩ? Miruñe, pãgũri sã ïgu dorecũ tarinũgabeaa ïgure, arĩñorã erã basi.

Watëa ñajasüdigure ðagu iipü Jesu

Mt 8.28-34; Mr 5.1-20

²⁶ Eropirã erã gajipu masegue Gerasa majarã ya yebague taribujajañorã. Iri yeba Galilea yeba diaye arñyoro. ²⁷ Ero Jesu ïgu majajanugarisubu ero majagu watëa ñajasüdigu ïgu pohrogue aripü. ïgu yoari boje goroweregu suhri marigu arïgu, ïgu wihiguere ne arñbirimripü. Eropigu masa goberi utã goberi watope arïpu ïgu. ²⁸⁻²⁹ Eropirã bajasuburi watëa ïgure ñearo mera ïgu burigã gorowerecũ ïha masa ïgure bihadoboriñorã. Eropigu ïgu peresugue arïgu ïgu mojtore guburire comedari mera erã diridigu arïqueregu, ïgu iridarire nuapu. Eropirã watëapu ïgure masa marirogue aigãñorã. Eropigu ïgu Jesure ïhametu turaro gaguinigui, Jesu pohro merejapu. ïgu eropa iicũ ïagu Jesupu watëare dorepu:

—Ihĩ mera arñbiricãque. Waque watëa, arïpu.

ïgu eroparicũ peegu watëa ñajasüdigupu turaro gaguinigui, serëpipu Jesure:

—Jesu, umaro majagu Goãmu magu, ¿ñehenore iibu iiri muhu yure? Yure ñero iibiricãque, arïpu watëa ñajasüdigupu.

³⁰ ïgu eroparicũ Jesupu serëpipu ïgure:

—¿Ñehmuno waicuri muhu? arïpu.

Bajarã watëa ïgu mera arññorã. Eropigu ðpa arïpu erãre opagu.

—Watëa bajarã waicua gua, arïpu watëa ñajasüdigupu.

³¹ —Ëhcãri gobegue guare wadorebita, arĩ, turaro serëñorã watëapu.

³² Irisubure ero utãgu gubuye bajarã yesea barã iññorã. Erã ero bacũ ïarã watëa ðpa arĩ serëñorã Jesure:

—Soã yesea pohrogue wadoreque guare. Erã mera arñdoreque guare, arĩ serëñorã watëa masure ñajanirã.

Erã eropa arĩ serëcũ peegu Jesu erãre yesea pohrogue wadorepu. ³³ ïgu eropa wadorera puhru watëapu masu mera arññirã waha, yesea pohrogue ejañorã. Erã pohrogue erã ejara puhru yeseapu gorowere dipaturague omabuha, ditarugue yuriñaja miri siripehrea wañorã.

³⁴ Yeseare ïhadibunirãpu yesea eropa miricũ ïarã, güi omagã wañorã. Eropa omagãrã macague eja, iri maca majarãre campo majarã sãre erã ïarare weresiripehocãñorã. ³⁵ Erã eropa werera puhru masa ïarã wañorã. Eropirã Jesu pohro eja, watëa ñajasüdigu muru ïgu suhri sañadigu pee masigu ïgu ero ðaro doacũ ïañorã erã. Iri arñpehrerire ïarã erã güi arññorã. ³⁶ Watëa ñajasüdigu muru ïgu ðaro arñcũ ïanirã gajirãre erã ïarare wereñorã. ³⁷ Eropa pee ero majarã Gerasa yeba majarã arñpehrerã burigã Jesure güiñorã. Eropirã ïgure wadoreñorã. Erã eropa wadorecũ Jesu dohodirugue ñajapu wabu. ³⁸ Watëa ñajasüdigu murupu Jesu ïgu waborere ïha turaro ïgure serëripü:

—Mu mera wadiaca, arĩ serëripü.

³⁹ ïgu eroparicũ Jesu ïgure yuhripü:

—Mu ya macague waque. Eropa wagu Goãmu mure ðaro iirare wereque gajirãre, arïpu Jesu.

ïgu eropa arñra puhru ïgu ya macague eja gu Jesu ïgure ðaro iirare arñpehrerãre ïgu ya maca majarãre werepu.

Jairo magore ðago iipü. Eropa arñcũ ne behrego sãre ðago iipü Jesu

Mt 9.18-26; Mr 5.21-43

⁴⁰ Sipa masegue Jesu dipaturi ĩgu taribujacũ ĩarã masa bajarã ĩgure corenirã bocatĩri serẽñorã ĩgure. ⁴¹⁻⁴² Ero buheri wihi opa Jairo waĩcũgu Jesu pohro eja, ĩgu guburi pohro merejapu. ĩgu mago sĩrigo iipo. Igo yujugo ta arĩgo doce bojori opago arĩpo. Eropigu ĩgu ĩgu ya wihigue Jesure sihugãpu. “Áu,” arĩ, ĩgu mera wapũ Jesu sã.

ĩgu eropa wacũ masa bajarã ĩgure nurusiarã cĩriro iĩñorã ĩgure. ⁴³ Eropigo yujugo nomeo doce bojori gohra duhuro mariro eropa behrego ero arĩpo. Ero corere duhturuare igo ya nyeru mera arĩpehrerire wajayeripo igo ocoyedorego. Erã eropa ocoyequerecũ ta muraro ta di waniguicãyoro igore. ⁴⁴ Eropigo igo Jesu puhru ahri, ĩgu suhriro ojogorore igo ñeacũ igore di wiriniguicãra pehrea wayoro. ⁴⁵ Igo eropa ñeañacũ Jesu pepigu serẽpipũ.

—¿Noa ya suhrirore mohmepiari? arĩpu ĩgu.

Arĩpehrerã “Mohmepibea,” arĩñorã. Eropirã Pedro sã õpa arĩ yuhriñorã:

—Buhegu, cũhña ãhraa. Eropirã masa bajarã mure pẽhrecãma. ¿Duhpigu eropa arĩ serẽpiri muhu? arĩñorã erã Jesure.

⁴⁶ Erã eroparicũ Jesu yuhripu:

—Dohparagã ya turari mera yujugore dore yahu cõarare masia. Eropigu yure igo ñeañarare masia, arĩpu ĩgu.

⁴⁷ ĩgu eroparicũ peego igo duhrimasibigo, naragãgo Jesu pohro merejapo. Eropigo arĩpehrerã masa erã peero igo arĩpo Jesure:

—Yuhu ñeañabu mure. “ĩgure ñeañacũ ya dore taria waroca,” arĩgo mure ñeañabu. Yu mure eropa ñeañago mata õago wahabu, arĩpo. ⁴⁸ Igo eropa arĩtuhajacũ Jesu igore werepu:

—Mahgo, yure mu umupeori mera õago dujaa dohpaguere. Mucubiriri mera waque, arĩpu igore.

⁴⁹ ĩgu eropa arĩrisubu Jairo ya wihi arĩgu weregu erapu.

—Mu mago sĩa wahãmo. Eropigu ihĩ buhegure sihubita pare, arĩpu ĩgu.

⁵⁰ ĩgu eroparicũ peegu Jairore õpa arĩ werepu Jesu:

—Bujawerebita. Yure umupeoque. Iri dihtare iique. Mu eropa iicã õago wagocumo, arĩpu Jesu.

⁵¹ Eropa arĩtuha Jairo ya wihigue eja, Pedroro, Ñure, Santiagore, dorecũ pagu sumarãre aĩ ñajapu. Gajirãpũre Jesu ñajadorebiripũ.

⁵² Ero arĩpehrerã masa erã ñehamere oerã iĩñorã. Jesu erãre arĩpu:

—Orebiricãque. Iogã sĩribeamõ. Carĩgo iimo, arĩpu ĩgu.

⁵³ ĩgu eroparicũ erãpu igo sĩridigo arĩcũ masirã “Eroparicãgu iimi ihĩ,” arĩrã Jesure ĩayeñorã. ⁵⁴ Eropigu Jesu igo mojtore ñeha, arĩpu igore:

—Majigo, wahgãque, arĩpu.

⁵⁵ ĩgu eropa arĩcũ igo sĩridigo arĩquerego igo sĩporã goecũ masa wapo. Irisubu ta wahgãnuğajapo igo. Igo eropa wahgãra puhru Jesu igore barire odorepu. ⁵⁶ Igore eropa ĩgu masacũ ĩarã igo pagu sumarã ĩhamaria wañorã. Eropigu Jesu irire gajirãre weredorebiripũ.

9

*Jesu doce ĩgu buherãre buhedoregu obeopu
Mt 10.5-15; Mr 6.7-13*

1 Eropi Jesu doce ĩgu buheräre sihubeo, ĩgu turarire ópu ĩgu eräre. Watëare erä cóāburire, dorecuräre erä óarā iiburire ópu ĩgu turarire eräre. 2 Eropa iituha eräre Goāmũ ĩgu opu árĩrire buhedoregu, dorecuräre óarā iidoregu obeopu eräre. 3 Ópa arĩ dorepu Jesu eräre:

—Mũa warā gajinore aĩbiricāque. Tuadire, ajure, barire, niyerure aĩbiricāque. Yujuñe suhriro ta sañaque. Peñe sañabita. 4 Áripehrerogue mũare erä carĩro ocũ iri wihi ta dujanique. Ne warāgue wiriaque iri wihire. 5 Gaji macari majarā mũare erä gamebiricũ ĩarā iri macare tarigā waque. Eropa warā mũa guburi maja nicure moje siripique mũa eräre erä ya dipuwajare ihmumorā, arĩpu Jesu.

6 ĩgu eropa arĩra pũhrũ ĩgu buherāpu waha, árĩpehreri macarigue masare óari buherire were curiñorā. Eropirā dorecuräre óarā wacũ iĩnorā.

Jesu ĩgu iirare Herode peepu

Mt 14.1-12; Mr 6.14-29

7 Eropi Herode Galilea yeba majarā opu Jesu ĩgu iirare peebeopu. “¿Noa āhriri ĩgu Jesu?” arĩqueregu ne masibiripu. Yujurāyeri ópa arĩñorā Jesure. “Ñu waiyedi mũru dipaturi masa deyogu iicumi. Eropigu Jesu erä arĩgu ĩgu ta āhrimi,” arĩriñorā gajirā. Erä eroparicũ peegu Herode Jesure dohpa arĩ masibiripu. 8 Eropirā gajirā “Ĩgu Elia mũru dohpague dehyoagu iimi,” arĩriñorā. Gajirāpu “Goāmũ ya weremuhtanirā mera majagu árĩcumi daja masa mũrigũ,” arĩriñorā Jesure. 9 Erä eropa arĩ wereniguiquerecũ ta ópa arĩ pepipu Herode: “Ñu dipurure tabetadoregu wejētuhabu ĩgũpure yũhũ. ¿Eropigu masa erä werewuagu nihino árĩbocuri ĩgu?” arĩ pepi ĩgu Jesure ĩadiaripu.

Jesu masa bajaräre barire ópu

Mr 14.13-21; Mr 6.30-44; Jn 6.1-14

10 Eropi Jesu ĩgu obeonirā ĩgu pohrogue dujaja, erä iirare wereñorā Jesure. Erä weretuhacũ Jesu erä dihtare Betsaidague sihu waripu. 11 ĩgu erä dihtare sihuquerecũ erä warare masirā, masa bajarā nurusiagāñorā. Jesu ĩgure erä nurusiacũ ĩagu ĩgu bocatĩri serēpu eräre. Eropigu ĩgu Goāmũ ĩgu opu árĩrire eräre were, dorecuräre óarā iipu.

12 Ñamicague doce ĩgu buherā ĩgu pohrogue eja, Jesure wereñorā:

—Ohõ masa marirogue āhraa. Ő majaro maja wirigue oā masare obeoque. Carĩmorā erä batuburire amadoreque eräre, arĩñorā erä Jesure.

13-14 Erä eroparicũ Jesu yũhripu eräre:

—Mũa basi barire oque eräre, arĩpu.

Ĩgu eroparicũ peerā erä yũhriñorā:

—Cinco pan dipurure, perā ta wai säre iripēta opaa mari. Oā masa bajarā erä baburire asũmasiya mara marire, arĩñorā ĩgu buherā.

Bajarā masa erä árĩcũ eropa arĩñorā ĩgu buherā. Eroguere cinco mil uua árĩñorā. Eropigu Jesu werepu ĩgu buheräre:

—Yujurāyeri cururi cincuenta gohra doadoreque. Gaji curu säre erä nucũ ta doadoreque, arĩpu Jesu ĩgu buheräre.

15 ĩgu eroparicũ ĩgu buherā ĩgu dorero dopa ta iĩnorā. Áripehrerā masare doadoreñorā. 16 Doadoretuha Jesu cinco pan dipurure, perā wai mera aĩ, umarogue ĩhamemuju, Goāmũre “Ōhaa,” arĩpu. ĩgu eropa arĩra pũhrũ pan dipurure nuha, ĩgu buheräre masare gueredoregu ópu.

¹⁷ Eropirā erā árīpehrerā masa baha yapia wañorā. Erā ba duharare doce pui ri gohra aĩ gameneo ujutudoboñorā ĩgu buherā.

Muhu Cristo Goāmu ĩgu obeodigu ta āhraa, arĩpu Pedro
Mt 16.13-19; Mr 8.27-29

¹⁸ Yujunu Jesu yujugu ta Goāmure serēgu iipu. ĩgu wereniguirisubu ĩgu buherā ĩgu pohrogue árĩñorā. Eropigu Jesu serēpipu erāre:

—¿Nihino árĩcuri yuhu, masa erā pepicũ? arĩ serēpipu.

ĩgu eroparĩcũ peerā ĩgu buherā yuhriñorā:

¹⁹ —“Ñu waĩyedigu muru árĩbocumi,” arĩma mure. Gajirā “Elia muru árĩbocumi,” arĩma. Gajirā, “Goāmu ya weremuhtanirā mera majagu iribojegue majagu masa mariadi árĩbocumi,” arĩma, arĩ yuhriñorā ĩgu buherāpu ĩgure.

²⁰ Erā eropa arĩra puhru Jesu erāre serēpipu daja:

—¿Muapu pepicũ nihino árĩcuri yuhu? arĩ serēpipu daja.

—Muhu Cristo Goāmu ĩgu obeodigu ta āhraa, arĩ yuhripu Pedro.

Jesu ĩgu sĩriburiñere werepu
Mt 16.20-28; Mr 8.30-9.1

²¹ Eropi Pedro “Cristo āhraa muhu,” ĩgu arĩrare ne gajirāre Jesu weredorebiripu. ²² Eropa weredorebirituhagu opa arĩpu:

—Yuhu masu Goāmu ĩgu obeodigu burigā ñero tariguca. Eropa ta tariro gahmea yure. Eropirā pahia oparā, murā, judio masare buherā mera yure gamebirā wejērācoma. Erā wejēra puhru uhrenu puhru masa mariaguca, arĩpu Jesu erāre.

²³ Puhru árīpehrerāre opa arĩ werepu Jesu:

—Yujugu yu mera majagu árĩdiagu, ĩgu gamero iidiarire duhcāgucumi. Eropigu yahagu ĩgu árĩri dipuwaja ñero tarigucumi. Ñero tariqueregu ta yahare iiniguigu árĩgucumi. ²⁴ Yujugu masu ĩgu ya árĩburi dihtare pepigu dederea wagucumi. Eropigu yaha árĩburi yu gameri dihtare iigu árīpehrerinuri yu mera umaroguere oaro árĩgucumi.

²⁵ Yujugu masu i yeba majare árīpehrerire opaqueregu peamegue wagu oarire bocasome. ²⁶ Yujurāyeri yu buherire werediarā, “Jesu yagu āhraa,” arĩdiarā guhyasĩrĩrācoma. Erā eropa iicũ ĩagu yu sã erāre eropa iirāre guhyasĩrĩsāguca. Yuhu Goāmu ĩgu obeodigu oarā anyua erā gosesiriri mera, yu Pagu ĩgu gosesiriri mera dujarigu yure guhyasĩrĩnirāre guhyasĩrĩsāguca yu sã. ²⁷ Diaye arĩgu tiaa muare. Dohpague yujurāyeri mua oġue arĩrā mua sĩriboro core Goāmu ĩgu opu árĩcũgue ĩarāca, arĩpu erāre.

Jesu dupure gohrotopu
Mt 17.1-8; Mr 9.2-8

²⁸ Eropi ocho nuri irire ĩgu werera puhru Jesu Pedore, Ñure, Santiagore erā dihtare sihupu. Eropi waha, Goāmu mera wereniguirā wañorā. Utāgure maria wañorā erā. ²⁹ Goāmure ĩgu serērisubu Jesu ĩgu diapo gohrotoa wayoro. Eropiro ĩgu suhri cuimijuri suhri oaro boreri suhri wayoro. ³⁰ Eropa warisubu perā uma ĩgu pohro dehyoañorā. ĩgu mera wereniguirā iñorā. Erā iribojegue majarā Elia muru, Moise muru sã árĩñorā. ³¹ Erā umaro maja gosesiriri mera dehyoañorā. Jesu merogā Jerusaléngue ĩgu sĩriborore erā Jesu mera wereniguirā iñorā. ³² Pedro ĩgu mera majarā sã waja meretaria carĩrā iñorā. Eropa carĩquererā ta

uca wahgã, Jesu gosesiriri îha, perã îgu mera wereniguirã sãre îañorã.

³³ Moise Elia mera erã warisubu Pedro Jesure ôpa arîpu:

—Opu, mari ôre áricũ ôadiaa. Ûhre wihigã gohra iirã. Mu ya wihigã, Moise ya wihigã, Elia ya wihigã iirãca, arîpu Pedro.

Eropa arîqueregu ta îgu arîrare ne masibiripu. ³⁴ Îgu eropa arî wereniguirisubu erãre imica curu cãhmotayoro. Eropa cãhmotacũ îarã erã giia wañorã. ³⁵ Eropiro imica curu pohecague Goãmu îgu wereniguiri busuyoro:

—Îhî yu magu yu beyedigu âhrimi. Ôaro peeque îgure, arîri busuyoro imica pohecague.

³⁶ Eropa arîra puhru Jesu dihtare îañorã erã. Puhru erã îarare gajirãre werebiriñorã. Ne yujugure werebiriñorã dohpa irisubure.

Jesu watî ñajasũdigure ôagu iipu

Mt 17.14-21; Mr 9.14-29

³⁷ Gajinu erã utãgugue erã دچارicũ bajarã masa Jesure bocatîriñorã.

³⁸ Eropigu erã mera majagu Jesure piyupu:

—Buhegu, mure turaro ire serẽdiaa yuhu. Yu magu yujugu ta âhrimi. Eropigu îgure îabasaque muhu. ³⁹ Watî ñajasũ gorowereniguicãmi. Iri watî îgure ñeha, gaguiniguicũ ii, tûru naragãcũ ii, sumutua wacũ iimãraa. Eropigu îhî watî yu magure ñero taricũ ii, ne duhudiabeani îgure. ⁴⁰ Mũ buherãre iri watîre cóãdoregu turaro serẽrabu. Yu eropa serẽquerecũ ta erã irire ne cóãmasibirama, arîpu îgu Jesure.

⁴¹ Îgu eroparicũ Jesupu ôpa arîpu ero arîrãre:

—Dohpague majarã mua ñerã âhraa. ¿Yure ne umupeobirigohracãri? Yoari boje muare buherabu. ¿Dipẽ yoari boje yure garibori mua? arî turipu Jesu.

Eropa arîtuha watî ñajasũdigu pagure ôpa arîpu:

—Mu magure aigãrique, arîpu.

⁴² Îgu eropa arîra puhru îgu magu Jesu pohrogue îgu aririsubu watî îgure yebague mehmereja, tûru naragãcũ iipu. Îgu eropa iicũ Jesu watîre cóãpu. Îgu eropa cóãcũ watî ñajasũdigu ôagu wapu. Eropigu Jesupu îgugãre wiaru îgu pagure. ⁴³ Árîpehrerã masa Goãmu turari mera îgu ôagu wacũ iirire îarã, uca wañorã.

Dipaturi Jesu îgu sîriburiñere werepu

Mt 17.22-23; Mr 9.30-32

Masa Jesu îgu iirare îha uca wacũ Jesupu îgu buherãre ôpa arî werepu:

⁴⁴ —Dohparagã yu wereburire cãdijibiricãque mua. Yuhu masu Goãmu îgu obeodigu âhraa. Masa yure ñeha, gajirãguere yure wiarãcoma, arîpu Jesu.

⁴⁵ Îgu eropa arîquerecũ ta erãpu îgu wererire ôaro peebiriñorã. Îgu wererare erãre masiya mariyoro. Irisubu ta Goãmu erãre irire masidorebirinipu. Eropirã erã güirã irire îgure serẽpibiriñorã.

Jesu buherã erã mera majagure opu acudiarîñorã

Mt 18.1-5; Mr 9.33-37

⁴⁶ Puhru Jesu buherã werenigui dwayorã iñorã:

—¿Mari mera majagu nihinopu opu ñajagucuri? arî dwayorã iñorã erã erã basi.

⁴⁷ Erã eroparicũ Jesupu erã pepirire masigu, majigure îgu pohro aîunugu, îgu buherãre werepu:

48 —Yaha árĩburire iimorã õpa árĩgugãre bu árĩgure gamerã yu sãre gahmea mua. Eropirã yare gamerã, yare obeodigu sãre gahmea mua. Mua mera majagu mua pohro majagu árĩgu ĩgu sã opu ta árĩgucumi, arĩpu Jesu.

*Marire ĩhaturibigu árĩgu mari mera majagu àhrimi, arĩ werepu Jesu
Mr 9.38-40*

49 Puhru Ñu Jesure õpa arĩ werepu:

—Buhegu, mu waĩ mera watĩ ñajasũnirãre taricũ iiami yujugu. ĩgure gaa ĩabũ. ĩgu mari mera majagu ĩgu árĩbircũ ĩarã ĩgure irire iidore-birimurabu gaa, arĩpu Ñu Jesure.

50 ĩgu eroparicũ Jesu Ñure gajirã ĩgu buherã sãre õpa arĩ werepu:

—Eropa arĩbircãque mua ĩgure. Marire ĩhaturibigu árĩgu, ĩgu mari mera majagu àhrimi, arĩpu Jesu.

Jesu Santiagore, Ñu sã erã wererire gamebiripu

51 Irisubure Jesu ĩgu mũsigue ĩgu waboro coregã “Jerusalẽgue wagura,” arĩpu ĩgu. Eropa arĩgu wagu iipu. 52 Eropirã Jesu core ĩgu obeonirã waha, Samaria yeba maja macague eja, ero Jesu ĩgu ejaborore amuyudiariñorã. 53 Jesu Jerusalẽgue wabu iipu. Erogue ĩgu wabu aricũ peerã, iri maca majarã ĩgure gamebiriñorã. 54 Irire peerã Ñu, Santiago mera wereñorã Jesure:

—Opu, mu gamecũ mũmaro maja peame mera mũre gamebirinirãre wejẽdorerãra Elia mũru ĩgu iidiro dopa ta, arĩñorã erã ĩgure.

55 Erã eroparicũ maji ĩha turipu erã perãre:

—Eropa arĩbircãque. Espĩritu Santo yarã àhraa mua. Dohpague mua pepiro dopa ta ĩgupu pepibeami. Yuhu masu Goãmu ĩgu obeodigu i yebagure arigu peamegue wabonirãre taugu aribu. Masare erã dederecũ ĩgu aribiribu, arĩ werepu Jesu.

56 Eropa arĩ weretuha gaji macague Jesu sã carĩrã waha wañorã.

*Gajirã Jesu mera wariñorã
Mt 8.19-22*

57 Maha erã wacũ, yujugu masu Jesure werepu:

—Mu mera yuhu wadiaa noho mu wadiaro, arĩpu ĩgu.

58 ĩgu eropa arĩra puhru Jesu yuhripu:

—Yu mera aricũ diasã àhraa. Nugu majarã diayea erã carĩburi toreri opama. Mirimagu porã sã erã ya suhri opama. Yu masure Goãmu ĩgu obeodigupure sooro mara. Ne yaha wihĩ mara. Eropirã yu mera arĩrã ñero tarirãca mua, arĩ yuhripu Jesu.

59 Puhru gajigure Jesu sihupu:

—Yu mera majagu árĩbu arique, arĩpu.

ĩgu eroparicũ ĩgu yuhripu Jesure:

—Opu, yuhu yu pagu siricũ yaanigu wagura. Puhru mu mera wagura, arĩpu ĩgu.

60 ĩgu eroparicũ Jesu werepu:

—Yure gamebirã sirinirã iro dopa ta àhrima. Erãpu sirinirãre yaaporo. Eropigu mũru Goãmu ĩgu opu arĩrĩre õari buherire buhegu arique, arĩpu Jesu ĩgure.

61 Eropigu gajigu Jesure õpa arĩpu:

—Opu, mu mera wagura. Yu acawereräre goeriserenigu wanigura dohpa, arīpu īgu Jesure.

⁶² Īgu eroparīcū werepu Jesu īgure:

—Mohmebu mohmediabigu īgu duhpibu árībeamī. Īgu iro dopa árīgu ōpa āhrimi: “Goāmū yare iidiaa,” arīqueregu irire ne iibeamī. Īgu Goāmū yagu árībodigu árībeamī, arīpu Jesu.

10

Jesu setenta buheräre buhedoregu obeopu

¹ Puhru Jesu gajirā īgu buheräre setenta buheräre beye, macarigue īgu waboro core obeoyupu. Yujuyeri macarire perā dihta obeopu īgu. ² Eropa obeogu ōpa arī werepu eräre werenigui queorire buhegu:

—Ojodūca baja iri buगतuhajacū baja árīcū baja mohmeri āhraa. Mohmeri masapu bajamerāgā āhrima. Eropa ta ōari buherire peomorā bajarā árīcū wuaro āhraa mari mohmeri. Iri eropārīquerecū ta mari masare buhemorā bajamerāgā āhraa. Eropirā ōari buherire buhemoräre gajiräre īgu obeomoräre Goāmure serēque mua. ³ Waque mua. Mūare yu obeogu oveja iro dopa árīräre mūare yeea guarā iro dopa ta ñerā árīrā watopegue obeogu iiaa. ⁴ Niyeru ajure, paga aju sāre, zapature aībiricāque. Mūa mague curirā gajiräre bocajiräre wereniguībiricāque. Diaye ta taria waque. ⁵ Árīpehreri wirire mua ñajari wirire i wihi majaräre, “¿Áhriri mua?” arīmuhtaque. ⁶ Iri wihi majarā ōaro mera árīrā gamequeāro mariro erā árīcū ōadoreque eräre. Ōaro mera erā árībiricū iri wihi majaräre irire ōadorebita. ⁷ Yuju wihi ñajanugarā erā ōaro árīcū iri wihi ta dujaque. Iri wihi majarā mūare erā ejorire baha ihrituque. Mohmegure īgu wajatarire aīro gahmea. Eropirā mua eräre buhera waja erā bari orire aīque mua sā. Eropirā yuju wihi ta mua ejara wihi ta ñajarā, iri macare gajirā ya wirigue árīcurībiricāque. ⁸ Macaguere mua ejarā ero majarāpu mūare gamerā árīcū erā bari ejori árīcū baque. ⁹ Ero majarā dorecuräre ōarā iique. Eropirā ōpa arīque ero majaräre: “Goāmū mari Opu dohpaguere īgu árīborore wererā iiaa mūare,” arīque eräre. ¹⁰ Gaji macague mua ejacū erāpu mūare gamebiribocoma. Erā gamebiricū iarā iri maca decogue waha, ōpa arīque eräre. ¹¹ “Gua nicu imicare guburi maja imicare wejēsiri cóarā iiaa mua guare gamebiriri dipuwaja ihmurā,” arīque. “Eropirā ire guña arīque,” arīque. “Goāmū mari Opu dohpaguere īgu árīborore mūare wererā arirabu,” arīque eräre. ¹² Mūare diaye yuhu arīgu iiaa. I umu pehrecūguere Sodoma majarā mura burīgā dipuwajacurācoma. Erā eropa árīquerecū ta tauro mūare gamebirāpu dipuwajacurā árīrācoma, arīpu Jesu.

Gaji macari majarā Goāmure tarinugarā árīñorā

Mt 11.20-24

¹³ Puhru Jesu ōpa arīpu macari majaräre:

—Corazin majarā, mua ñero tarirāca. Betsaida maca majarā mua sā ñero tarirāca. Mua ya macaguere Goāmū īgu turari mera deyoro moarire iirabu yuhu. Mua peebirabu. Iribojegue Tiro waīcuri macare, Sidón waīcuri maca sāre īgu turari mera iri deyoro moarire yu ī ihmucū iarā ero majarāpu erā ñero iirire bujawereboañuma. Eropa iirā ōaripure gohrotoboañuma. Mata erā bujawererā erā bujawerereri suhrire saña, erā basi pea witū mera mohsiripeoboañuma erā ñerire bujawererire

ihmumorā. Muapū eropa iibeaa. ¹⁴ Eropigu muare arīgu tiaa. Goāmu īgu dipuwaja moarinu árīcū Tiro majarā mura, Sidón majarā mura tauro muapūre mua űeri dipuwaja dipuwaja moagucumi īgu. ¹⁵ Capernaum majarā, mua ejatuharó mera Goāmu pohroge wadiaribu. Eropirā mua Goāmu yapūre iidiabiricū muare Goāmu peamegue cóāgucumi, arīpu Jesu.

¹⁶ Eropa arītuha īgu buherāre werepū:

—Muare peerā yu sāre peema. Muare gamebirā yu sāre gamebeama. Eropirā yure gamebirā, erā yure obeodigu sāre gamebeama, arīpu Jesu erāre.

Setenta buherā dujarañorā

¹⁷ Pūhru setenta buherā mucubiriri mera dujarañorā:

—Opū, mu waī mera mu turari mera watēare masaguere gua wiridorecū erāpu guare yuhriama, arīñorā erā Jesure.

¹⁸ Erā eroparicū Jesu yuhripū erāre:

—Ūmarogue miariñe dijariro dopa ta watī īgu dijaricū ĩabu. ¹⁹ Peeque. Muare yu turarire ohabu yūhu. Eropirā añare, corebare, watī marire ĩhaturigūre árīpehreri īgu turari sāre mua tarinugaburire muare ohabu yūhu. Eropirā erā muare ñero iimasibeama. ²⁰ Yu eropa oquerecū ta watēa muare erā tarinugabiricū ĩarā iri dihtare mucubiribita. Ipūre mucubirique. Ūmarogue Goāmu yarā erā waire īgu gojaturipūgue mua waire īgu gojatura árīcū masirā, iripūre mucubirique mua, arīpu Jesu erāre.

Jesu mucubiripū

Mt 11.25-27; 13.16-17

²¹ Irisubure Espiritu Santo Jesure burigā mucubiricū iipu. Eropigu Jesu ōpa arīpu īgu Pagure:

—Ahu, muhu ũmaro majarā tauro opu, i yeba majarā tauro opu āhraa. I mu buherire “Masituhaja gua,” arīrāre masicū iibeaa. Mu yare masipehobirāpūre masicū iiabu muhu. Mu eropa iicū ĩagu “Ōataria,” arāa yūhu mure. Eropa ta āhraa, ahū. Erā masibirāpūre erā masicū gahmeabū muhu, arīpu Jesu.

Eropa arītuha gajirāre ōpa arīpu:

²² —Yu Pagū árīpehrerire yu iiburire apimi yure. Yu Pagū dihta yure masimi. Yu dihta ĩgūre masia. Yu beyenirā sā ĩgūre masima yu masidorenirā árīrā. Erā nucu ta yu Pagure masia gua, arīpu Jesu.

²³ ĩgu eropa arīra pūhru erā seyaro erā árīcū Jesu īgu buherāre ōpa arīpu:

—I árīpehrerire ĩarā mucubirirā āhraa mua. ²⁴ Diaye ta āhraa. Bajarā Goāmu ya weremuhtanirā, yebari majarā oparā sā dohpague mua ĩarire ĩadiariñorā erā sā. Eropirā mua peeri sāre peedariñorā. Erā eropa masidiaquerecū ta Goāmu erāre masidobiripū irisubugure, arīpu Jesu.

Ōagu Samaria majagu queorire werepū Jesu

²⁵ Irisubu ta judio masare buhegu Jesu pohro eraa, Jesure ĩgu ñero wereniguicū iidiaripū:

—Buhegu, ũyu árīpehrerinuri Goāmu mera árīdiagū dohpa iigucuri yūhu? arī serēpipū īgu Jesure.

²⁶ ĩgu eroparicū Jesu yuhripū ĩgare:

—¿Dohpa arī irire wereri Goāmū yare erā gojarapūgue? ¿Goāmū ĩgu arī gojarapūguere ĩgu mera ōaro árīdiarire dohpa arīri mū pepicū? arīpū Jesu ĩgure.

²⁷ ĩgu eroparīcū ĩgu yuhripū:

—Ōpa arīñumi Goāmū: “Turaro mū sīporā mera, mū turari mera, mū ōaro guñari mera Goāmure mahique. Eropigu mū basi mahiro dopa ta mū pohro árīrī sāre mañique,” arī apiñumi Goāmū marire, arīpū ĩgu Jesure.

²⁸ ĩgu eroparīcū Jesu yuhripū:

—Diaye ta arābū muñu. Irire iique. Eropigu árīpehrerinuri Goāmū mera árīgūca muñu, arīpū ĩgure.

²⁹ ĩgu masare buhegūpū “Ihī Goāmū ya dorerire iipehogu āhrimi,” masa ĩgure erā arī pepicū gamepū. Eropa gamegū ĩgu Jesure ōpa arī serēpinemopū:

—¿Noa āhriri Goāmū yare mahidoregu? arīpū ĩgu.

³⁰ ĩgu eroparīcū Jesupū ōpa arī yuhripū Samaria majagu ĩgu iirare weregu:

—Yujunū Jerusaléngue árīdigū Jericógue wagu maha ĩgu curicū yajari masa ĩgure ñeañorā. Eropa ñearā ĩgu suhrirore tuwea aī, ĩgure turaro pañorā. Eropa parā sīrimerejacū gohra duhuñorā ĩgure. ³¹ Irisubu ta pahi iri mague arīpū. Eropa arigu erā padigure ĩaqueregū ta maha gajipū masepū ĩgure ĩhatarīgā wapū. ³² Eropi Goāmū wihi mohmegū sā mojomorocūgu pohro eja ĩgure ĩha gajipū masepū tarīgā wapū. ³³ Erā eropiiquerecū Samaria majagupū ero waha yoañarirogue ĩha ĩgure mojomoro ĩapū. ³⁴ Eropigu ĩgu mojomorocūgu pohro eja, igui deco vino uyū mera morera deco mera ĩgu camire pisūpū. Pisūtuhaja suhri gasiro mera diricāhmotapū ĩgu camire. Tuhaja, ĩgure ĩgu yagu burro weca duhpeo, carīri wihigū aī eñapū ĩgure. Ero árīgū ĩgu Samaria majagu ōaro ĩhadibupū ĩgure. ³⁵ Gajinū ĩgu carīri wihi opūre pese niyerusere oho, ōpa arīpū: “Īre ĩhadibuque. Iseri sihajabiricū dipaturi dujarigu wajayepehogura,” arīpū Samaria majagu wihi opūre, arīpū Jesu.

³⁶ Eropa arītuha judio masare buhegure serēpipū Jesu:

—¿Oā urerā ũma mojomorocūgu pohro tarianirā nihinopū árīyuri mojomorocūgure mahigu? arīpū Jesu.

³⁷ ĩgu eroparīcū buhegūpū Jesure yuhripū:

—Mojomorocūgure itamudigu árīñumi ĩgure mahigu, arīpū ĩgu Jesure.

—Mū sā masare eropa ta iigu waque, arīpū Jesu buhegure.

Marta, María sā pohro Jesu curipū

³⁸ Eropi Jesu ĩgu buherā mera wacū, gajī macague erā curicū, Marta waicūgo erāre igo ya wihi ñajaridorepo. ³⁹ ĩgu ñajara puhru igo pagū mago María waicūgo ĩgu guburi pohro doa ĩgu buherire peepo. ⁴⁰ Igo eropa iicū ĩago Marta igo mohmeri baja árīcū ĩago guapo. Eropigo igo Jesure werepo:

—Opū, ¿yahu yujugo ta mohmecū yare yū pagū mago igo itamubiricū ōhari mū ĩacū? Igo yare itamodoreque, arīpo Marta Jesure.

⁴¹ Igo eroparīcū Jesu yuhripū:

—Marta, baja mure mohmeri árīcū wuaro pepia muñu. ⁴² Goāmū ĩgu yare peedoremi. María ōarire iibo irire beyemo. Eropigu yare igo peecū, “Mohmetamugo waque,” arībeaa igore, arīpū Jesu Martare.

11

*Jesu Goãmure serëburire buhepu
Mt 6.9-15; 7.7-11*

¹ Yujunã Jesu ïgu Pagure Goãmure serëgu iipu. ïgu serëtuhacũ yujugu ïgu buherã mera majagu òpa arïpu:

—Opũ, Ñu ïgu buherãre ïgu buhediro dopa ta Goãmure serërire gũ sãre buheque mãhu, arïpu ïgu Jesure.

² ïgu eroparïcũ peegu Jesu erãre werepu:

—Òpa arï Goãmure serëque: “Gũa Pagu, umaro majagu mãhu òagu ãhraa. Dohpaguere árípehrerã weca opu ãhraa. Umaroguere mu dorero erã iiro dopa ta i yeba majarã sã iiporo. ³ Eropigu umuri nucũ gũa baburire oniguicãque guare. ⁴ Gajirã erã guare ñero iirare gũa cãdijiro dopa ta mu sã gũa ñero iirare cãdijique. Eropigu gũa ñeri iiborare cãhmotaque. Gũa ñeri iiborare tauque,” arï serëque Goãmure, arïpu Jesu erãre.

⁵ Pũhruguere ïgu buherãre òpa arï buhepu werenigui queori mera:

—Yujugu ñami deco ïgu acaweregu wihigue waha, ïgure serëpu: “Acaweregu, ureru pan dipure oque yure. ⁶ Gajigu yu acaweregu curigu aridigu dohparagã yaha wihĩ erami. Eropiro ïgure yu oburi mara,” arïpu ïgu ïgu acawereguere. ⁷ ïgu eroparïcũ ïgu acaweregu wihĩ pohecague árígu yuhripũ: “Yure garibobita. Disiporo bihadiro ãhraa. Yũhu, yu porã mera carïgu iiaa. Wahgãro bejabirica yure mure barire obudĩ,” arïpu ïgu acaweregu. ⁸ ¿Dohpa warocuri serëgupure? Diaye arãa muare. ïgu acaweregu áríqueregu ta barire obudigu wahgãbiripu. ïgu eropa wahgãdiabiriquerecũ ta bari serëgupu guhyasiribigu ïgu yoari boje serënguicũ árípehreri ïgu serëro dopa ta pũhrũ wahgã ogucumi. ⁹ Eropigu ire muare weregu iiaa: Goãmure mari Pagure serëque. Eropa serërã mua serërire bocarãca. Goãmure eropa serënguicãque. Mua eropa iicũ ïgu ogucumi. ¹⁰ Árípehrerã Goãmure serërã airãcoma. Eropirã erã serërare bocarãcoma. Eropigu árípehrerã Goãmure eropa serënguiriãre ïgu erãre ogucumi.

¹¹ “¿Mua porã muare erã pan serëcũ utãyepure obocuri mua? Obiriboya. ¿Erã muare erã waire serëcũ añapure obocuri erãre? Obiriboya.

¹² ¿Eropirã mua porã cãreña diuri serëcũ corebapure obocuri mua? Obiriboya. ¹³ Mua ñerã áríquererã ta mua porãre òarire omasia mua.

Eropigu Goãmupu mua tauro òarire ohomi muare. ïgu mari Pagu umaro majagu ïgu Espiritu Santore ogucumi ïgure serërãre, arïpu Jesu ïgu buherãre.

—Jesu watĩ turarire opami, arï weresãñorã masa

Mt 12.22-30; Mr 3.20-27

¹⁴ Irisubure Jesu watire cóagu iipu. Watipu wereniguimasibigu áricũ iipu masure. Eropigu watĩ masure Jesu cóacũ masupu wereniguinugapu. ïgu wereniguicũ peerã masa bajarã ïhamaria wañorã. ¹⁵ Erã eropa ucaquerecũ ta gajirãpu òpa arïñorã:

—Ihĩ Jesu watëare cóagu Beelzebũ waicugu watëa opu ïgu turari mera cohãmi, arïñorã gajirã.

¹⁶ Gajirã “Muũ Goãmũ ïgu obeodigu árígu Goãmũ turari mera deyoro moarire ii ïhmuque guare,” arïriñorã. ¹⁷ Erã eropa dorecũ peegu erã pepirire masigu, erãre òpa arï werenigui queori werepu Jesu:

—Watī ya turari mera watēare cōābeaa yuhū. Yuju maca majarā erā basi gamequeārā, iri maca majarā pehrea wabocomā. Eropirā yuju wihi majarā erā basi gamequeārā, iri wihi majarā pehrea wabocomā. ¹⁸ Eropigu Beelzebū watēa opupū ĩgu turari mera ĩgu watēare yure cōādoregū ĩgu basi ĩgu yarāre cōābocumi. Eropirā erā sā wapehrea waboñuma. Mua yure ōpa arāa. “Īgu Beelzebū turari mera watēare cohāmi,” mua yure arī weresāa. ¹⁹ Mua mera majarā sā watēare cohāma. Eropirā erā “Beelzebū ĩgu turari mera erāre cohāa,” arībeama. “Goāmū ĩgu turari mera watēare cohāa,” arīma. Eropirā mua yure “Watī turari mera watēare cohāmi,” mua arīra diaye árībiricū mua mera majarā wererācoma. ²⁰ Eropigu yupū watēare cōāgu Goāmū ĩgu Espiritu Santo turari mera iiaa. Yu eropa cōácū ĩarā ōpa arī masirāca mua: “Goāmū ĩgu opu árīri i yebaguere árītuhaja dohpaguere,” arīrāca, arīpu Jesu.

²¹ —Watī turagu tarinugari werediacū ōpa āhraa, arīpu Jesu. — Wihi opu turagu ĩgu mojo mera ĩgu wihire ĩhadibucū ĩgu yare gajirā aīmasibeama. ²² Īgu eropa ĩhadibuquerecū ta gajigu turatarigu ĩgure gamequeā, ĩgure tarinuga, ĩgu mojore emacā, ĩgu yare aīcā gajirāre gueremi. “Watī turagu árīquerecū yuhū turatariaagu āhraa,” arīgu ĩpu Jesu i queori mera. ²³ Yujugu yure gamebigū yare ĩhaturigu āhrimi. Yujugu yure itamubigu yure teboricucū iigu iimi, arī buhepu Jesu.

Watī dipaturi masugure ñajara queorire werepu Jesu
Mt 12.43-45

²⁴ Eropigu ĩgu dipaturi werenigui queori mera ōpa arī buhepu:

—Yujugu watī masū mera árīdi waha deco mariri yeba cuhri, ĩgu sooborore amaripu. Eropa bocabigu ōpa arī pepipu: “Masū yū cōādi mera dipaturi árīgu wagura,” arī pepipu ĩgu. ²⁵ Eropa arīgu ĩgu dujaa waha, ĩgu cōādigure ta masure bocapu daja. ĩgure bocaboro core masupu ōagu ñeri marigu árīpu. ²⁶ Eropigu watī gajirā siete watēare ĩgu tauro ñerāre sihugu wapū. ĩgu eropa sihucū erā árīpehrerā watēa masu mera árīñorā. Eropigu masupu ero core yujugu watīre opagu ñetariagu árīripū. Dohpaguepūre bajarā watēare opagu árīgu, ero core ĩgu árīdiro tauro ñegu dujapu, arīpu Jesu.

Jesu mucubirire werepu

²⁷ Irire ĩgu eroparicū masa watope árīgo Jesure arīpo busuro mera:

—Mure porācūdigo, mure mihudigo mucubirigo āhrimo, arīpo Jesure.

²⁸ ĩgo eropa arītuhacū peegu Jesu igore yuhripū:

—Goāmū wereniguirire peerā ĩgu dorerire iirāpu erā árīrācoma mucubirirā, arīpu Jesu igore.

Masa ñerā Jesure Goāmū turari mera deyoro moarire iidoreriñorā
Mt 12.38-42; Mr 8.12

²⁹ Eropi bajarā masa Jesu pohro erā eracū, ĩgu erāre werenemopū:

—Dohpague majarā ñerā āhrima. Yū diaye arīgu árīcū mua māsidiarā Goāmū turari mera deyoro moarire iidorerāa yure. Mua eropa dorequerecū ta Jona iribojegue majagu ĩgu iira dihtare ii ĩhmugucumi Goāmū masare. ³⁰ Jona Goāmū yare weremūhtadigu árīgu ĩgu Ninive majarāre ĩgu masicū iidiro dopa ta yuhū Goāmū ĩgu oboedigu masicū iiaa dohpague majarāre. ³¹ Dipuwaja moarinū árīcū iribojegue majago opo burō sur majago burō igo burō wahgānuga mūare dohpague majarāre

weresāgocumo. Igo Salomo opu igo masirire peediago yoarogue aridigo Salomore peego aripo. Dohpaguere mua watopere Salomo tauro masigu āhrraa. Yuhu mua mera arīquerecū mua yu masirire peediabeaa. Mua eropa peediabirira waja igo opo buro muare “Ñerā āhrima,” arī weresāgocumo. ³² Eropa ta dipuwaja moarinu arīcū Ninive maca majarā mura sã muare dohpague majarāre “Ñerā āhrima,” arī weresārācoma erā. Jona erāre Goāmu yare igo werēcū peerā, erā ñerire bujawere, ñarire gohrotonirā arīñorā erāpu. Dohpaguere mua watopere Jona tauro arīgu āhrraa yuhu. Yuhu Goāmu yare werequerecū mua ñero iirare bujawerebeaa. Eropirā Ninive majarā mura muare ñerire bujawerebirāre weresārācoma, arī werepu Jesu.

Masa erā pepiro dopa iima, arī werepu Jesu
Mt 5.15; 6.22-23

³³ Eropigu buhenemoga opa arīpu erāre:

—Masa sihāgodirure sihāgorā dibubeama. Irirure sihāgorā mátasoro docague dibubeama. Irirure umarogue duhpomi wihigue ñajarirā erā iha ñajama ñaro. ³⁴ “Mari cuiiri mari dupure sihāgodiru iro dopa ta āhrraa,” arī werediacū opa āhrraa. Mua pepiro dopa ta iiaa. Mua ñaro mera pepirā arīrā ñarire iiaa. Mua ñero pepirā arīrāpu ñeri dihtare iiaa. ³⁵ Eropirā ñaro iique. Mua pepirigue ñero arībiricāporo. ³⁶ Tuhaja mua pepirigue ñari arīcū, ñeri ne maricū ñari dihtare pepirāca. Mua pepirigue ñari arīcū mua ñarire iirāca, arī buhepu Jesu.

Fariseo masare, judio masare buherā säre Jesu tuhri werepu
Mt 23.1-36; Mr 12.38-40; Lc 20.45-47

³⁷ Jesu igo buhetuhajacū iagu fariseo masu igure igo ya wihigue badoregu sihupu. Eropigu Jesu igo ya wihigue ñaja, erā baro erā mera doajapu. ³⁸ Igu eropa doajacū fariseo masupu Jesure ihanurugu judio masa moja coeniguiro dopa ta igo moja coebiricū iagu opa arī pepiru: “Cuena. ¿Ihī duhpigu gua iro dopa moja coebeari?” arī pepiru. ³⁹ Igu eropa arī pepicū masigu Jesu igure werepu:

—Mua fariseo masa mua dorero dopa ta mua ihririparire, soropari säre mua coeweaa mua ñarire iirire ii ihmudiarā. Eropa coequererā ta mua siporāripure coebeaa. Eropirā mua arīricuri mua pepiripure ne ñarire gohrotobeaa. Mua pepiriguere gajirā yare yajadiarire ñeri dihta āhrraa. ⁴⁰ Pee masibirā āhrraa mua. Goāmu mua dupure iigu muare pepiri säre iipu. ¿Iirire masibeari mua? ⁴¹ Eropirā mua Goāmu ya arīburire iidiarā mua pepirire ñarire gohrotomuhtaque. Mua eropa iira puhru ñarire iirā arīrāca.

⁴² “Mua fariseo masa ñero tarirāca. Bari ñaro suriburi sarire ai deara puhru diez quēri iiaa. Tuhaja yujuquē ta Goāmu wihigue aigā apia Goāmu dorero dopa ta. Eropa iri dorerire iiquererā ta diaye iirire, Goāmure gamerire mua ne guñabeaa. Ducare mua airare merogā Goāmu wihire apicū ñhaa. Eropa iirā opa iinemoque: Diaye iirire, Goāmure gameri säre iique mua.

⁴³ “Mua fariseo masa ñero tarirāca. Buheri wihigue arīrā ñari doari dihtare gahmea mua. Doberi duarogue masa muare ñaro umupeori mera bocatiri serēcū gahmea mua.

⁴⁴ “Mua judio masare buherā, fariseo masa sã mua guyaricurā āhrraa. Ñero tarirāca mua. Masa gobe dibura gobe iro dopa ta āhrraa mua. Iri

gobe pohro masa tarigārā pohecague boanirā árīcū masibeama. Eropa ta masa mua pohro árīrā mua pepirigue ñeri árīcū masibeama erā, arīpu Jesu erāre.

45 Īgu eroparīcū peegu judio masare buherā mera majagu Jesure werepu:

—Buhegu, irire arīgu, gua säre ñero arīgu iica muhu, arīpu ĩgu Jesure.

46 Īgu eroparīcū Jesu yuhripu:

—Diaye ta āhraa. Mua masare buherā sā ñero tarirāca. Mua gajirāre erā bocafubirire iidorea erāre. Eropa dorequererā muaapu erāre ne merogā itamubeaa iri dorerire erā iiboro dopa.

47 “Eropirā mua ñero tarirāca. Goāmu yare weremuhtanirā mua ya masa goberire ōaro amuraa mua erāre umupeoro dopa ta iirā. Mua eropa iiquerecū ta iribojegue majarā mua acawererāpu erāre wejēñuma.

48 Erāpu Goāmu ya weremuhtanirāre erā wejēdiro dopa ta mua sā iiboya. Eropirā dohpaguere erā masa goberire amuraa mua. Eropa amurā mua acawererā erāre wejērare guñaa mua. Erā eropa wejērare guñarā “Ōaro iñuma,” arīraa mua, arīpu Jesu.

49 “Eropigu Goāmu ĩgu masiri mera ōpa arī wereyuñumi: “Yahare weremuhtamorāre yu buherire buhemuhtamorā säre obeogura erāre. Eropirā erā yu obeorāre gajirāre wejē, gajirāre ñero iirācoma,” arīyuñumi Goāmu, arīpu Jesu. 50-51 I yebare Goāmu ĩhacūnugura puhru Cānpu Abelre wejēñumi. Ero puhru Goāmu yare weremuhtanirāre wejēñuma. Puhru Zacariare mua acawererā mua ta ĩgure wejēñuma. Īgu Goāmu wihi pohro Goāmu ya árīburire waimurā soeburi mesa pohro árīcū mua acawererā ĩgure wejēñuma. Árīpehrerā erāre erā wejēra dipuwaja dohpague majarā dipuwajacurācoma. Eropa ta āhraa. Muare ta arīgu iiaa. Árīpehrerā erāre erā wejēra dipuwajare dohpague majarāre Goāmu dipuwaja moagucumi.

52 “Mua masare buherā, mua ñero tarirāca. Goāmu masirire ĩgu gojarare opaquererā ta gajirāre werebeaa mua. Mua basi Goāmu yare peebeaa. Eropirā gajirā ĩgu yare erā peediaquerecū ta irire mua erāre peedorebeaa, arīpu Jesu erāre.

53-54 Īgu eroparīcū peerā judio masare buherā, fariseo masa sā ĩgu mera guarā ĩgure ñero wereniguiñorā. Eropirā Jesu ĩgu ñero arī yuhricū peediarā, erā serēpinurñorā ĩgure weresādiarā.

12

Erā guyarire Jesu werepu

¹ Eropi Jesu pohro masa bajarā gohra gamenereñorā. Cūhña taricāyoro. Ero Jesu ĩgu buherāre ōpa arī werepu:

—Ōaro guña masique mua. Fariseo masa erā pan buagacū iiburire ĩarā ōaro masique. Erā guyarire weregu iiaa. ² Masa erā yayasārare puhru masirācoma. Erā dibura säre gajirā masirācoma. ³ Eropiro gajirā peebirogue mua wereniguirare ōaro masicū Goāmu weregucumi. Bihara taribugue gajigure erā yayarogā erā arīrare masa bajarā watope masicū iigucumi Goāmu.

Masa erā güibure werepu Jesu
Mt 10.26-31

⁴ Eropigu Jesu werenemopu erāre:

—Diaye arĩgu iiaa muare. Masare wejẽrã wejẽtuha dipaturi erã wejẽdigure ñero iimasibeama. Eropirã muare wejẽdiarãpure güibiricãque. ⁵ Dohpaguere mua güibure mua umupeobure weregura. Goãmupare güi umupeoque. Ĩgu mua sĩrira puhru peamegue cóãmasimi muare. Eropa ta áhraa. Diaye arĩgu tiiaa. Goãmupare güi umupeoque.

⁶ Cinco mirua waja marima. Eropa waja mariquerecũ ta erãgãre Goãmũ ñhadibumi. Ne cãdijibeami erãre. Mirua tauro Goãmũ ñhadibumi muapure. ⁷ Eropigu mua poari sãre ne yuju poadagã duhyaro mariro masipehomi Goãmũ. Eropa ta mua árĩricuri sãre masipehomi. Eropa masigu muare ñhadibuniguicãmi. Miruare ĩgu mahiro tauro muapure mahimi Goãmũ. Eropirã ĩgure umupeorã güibiricãque mua, arĩpu Jesu.

Jesure mua umupeorire wereque masare, arĩpu Jesu

Mt 10.32-33; 12.32; 10.19-20

⁸ Eropi Jesu werenemopũ:

—Muare arĩgu iiaa. Yujugu “Jesu yagu áhraa,” masare ĩgu arĩ werecũ ĩagu yuhu Goãmũ ĩgu obeodigu sã “Ĩgu yahagu áhrimi,” arĩguca Goãmũ yarã anyuare. ⁹ Yujugu masare güigu yure “Jesucristore masibea,” masare arĩ weregure yũ sã “Ĩgure masibea,” arĩ wereguca anyuare.

¹⁰ “Yũ masare Goãmũ ĩgu obeodigure ñero arĩ erã wereniguicũ iri ñerire Goãmũ cãdijimasimi. Eropa cãdijiqueregu ta Espĩritu Santopure erã ñero arĩ wereniguicũ irire ne Goãmũ cãdijisome.

¹¹ “Mari buheri wirigue oparã pohro gajirã muare aĩ ñaja weresãrãcoma. Erã eropa weresãcũ mua arĩ cãhmotaburire ne wũaro pepibiricãque. ¹² Irisubu ta Espĩritu Santo mua wereburire muare weregucumi, arĩpu Jesu.

Doberi opu queorire werepu Jesu

¹³ Eropi masa watope árĩgu Jesure õpa arĩ werepu:

—Buhegu, gua pagu ĩgu sĩrira puhru ĩgu ya árĩra guare dujaa. Eropigu yũ ĩgure irire yũ sãre queoro dũca wadoreque, arĩpu ĩgu Jesure.

¹⁴ ĩgu eroparĩcũ Jesu yuhripũ:

—Ne irinore dũca wabuno árĩbeaa yuhu, arĩpu Jesu ĩgure.

¹⁵ Eropa arĩtuha Jesu árĩpehrerãre werepu:

—Õaro iique mua. Doberire, gajino sãre gametaribiricãque. Baja opaquererã ta iri mera ta mucubirituhajabeaa mari, arĩpu Jesu.

¹⁶ Eropa arĩtuha Jesu erãre i queori mera werepu:

—Doberi opu õari yebare opapu. Eropiro iri yebare ĩgu oteri õaro dũcacuyoro. ¹⁷ Eropigu ĩgu, ĩgu basi õpa arĩ pepiripũ: “Iri dũca yuhu diburi wihire ne sihajasome. ¹⁸ Dohpaguere õpa ĩgura. I wihi dohpague yũ dibumũhtara wihire cóãcã, dohpaguere mũra wihi tauro mama wihipure wũari wihi ĩgara. Iri wihire yaha oteri dũcare, árĩpehrerire dibugura. ¹⁹ Yũ eropa ĩira puhru õpa arĩ pepigura yũ basi: ‘Yũ árĩpehreri opagu áhraa. Õaro soogura. Eropigu baha, ihri, mucubirigura,’ arĩ pepigura yũ basi,” arĩ pepiripũ ĩgu basi. ²⁰ ĩgu eropa arĩ pepiquerecũ Goãmũ ĩgure werepu: “Mũhu ne pee masibigu áhraa. Dohpagã ñami ta mũhu sĩrigũca. Mũ eropa wacũ mũ ya mũ mahira dederea waroca mũre,” arĩpu Goãmũ ĩgure, arĩpu Jesu masare.

²¹ Irire arĩgu masare õpa arĩ werepu Jesu:

—Eropa ta warācoma doberi oparā erā Goāmure guñabirā. Baja doberire, niyerure erā ya árĩburi dihtare diburā, Goāmure guñabirā erā mojomorocurā iro dopa árĩrācoma erā Goāmu ĩgu ĩacũ. Eropĩgu Goāmu erāre ĩhasuabeami, arĩpu Jesu.

Goāmu ĩgu porāre ĩhadibumi, arĩpu Jesu

Mt 6.25-34

²² Eropi Jesu ĩgu buherāre ōpa arĩ werepũ:

—Ire muare arĩgu iiaa: Mũa barire, suhri sāre wũaro guñaricubiricāque. ²³ Goāmu muare deyro moagu bari dihtare bamorāre suhri sañamorā dihtare iibiriñumi muare. Mũa iri dihtare guñacũ gamebeami. ²⁴ Mirimagũ porāre Goāmu ĩgu ĩhadiburire masĩque. Erā poeri moorā āhrima. Eropiro erā bari dihburi wiri erāre mara. Goāmupũ erāre erā baburire ohomi. Mirimagũ porā tauro muapũre mahimi Goāmu. Eropĩgu mũa sāre ĩhadibugũcumi ĩgu. ²⁵ Wũaro mũa pepiri mera iri muare pagarā wacũ iibeaa. Eropiro mari wũaro pepiri duhpihuri árĩbeaa. ²⁶ ¿Eropirā wũaro mũa pepiri duhpihuri árĩbiriquerecũ ta, duhpirā mũa baburire, mũa ihriburire, mũa sañaburire wũaro guña bujawere pepiri mũa?

²⁷ “Nũgu maja gorire pepique. Iri gori ne iiro mariro ōari goricua. Iri gori ōari suhri iro dopa ōari gori dehyoa. Salomo opu mũru ōari suhri opagu ĩgu árĩquerecũ ta iri goripũ ĩgu ya suhri tauro ōari dehyoa. ²⁸ Iri gorire ōari gori gocũ iimi Goāmupũ. ĩgu eropa iiquerecũ ta iri goripũ bajamenĩrigā árĩra pũru ñaidija pehrea wahaa. Merogā āhri gajĩnu peamegue soe cócācama. Iri eropa mata pehquerecũ ta iri gorire iri ōari gori árĩcũ iimi Goāmu. Eropĩgu Goāmu iri gorire ĩgu ōari gori árĩcũ ĩgu ĩdiro dopa ta tauro mũa sāre ōaro iigũcumi. Suhrire ogũcumi. Daberogā Goāmure umupeoa mũa. ²⁹ Eropirā mũa baburire, mũa ihriburire wũaro guñabiricāque. ³⁰ Goāmure masibirāpu i yeba majarāpu irire eropa amanigũcāma. Mari Pagu umaro majagu árĩpehreri mũa gamerire masimi. ĩgu eropa masicũ mũa ya árĩburire wũaro guñabiricāque. ³¹ Goāmu mũa opu ĩgu árĩborore gamemũhtaque mũa. Mũa eropa iira pũru Goāmupũ mũa gameri duhyacũ ogũcumi, arĩpu Jesu.

Ūmarogue mari baja opaa, arĩ masia mũa, arĩpu Jesu

Mt 6.19-21

³² Eropĩgu erāre werenemopũ:

—Yũ mahirā, bajamerāgā árĩquereerā gũibiricāque mũa. Goāmu ĩgu opu árĩrore ĩgu mera mũa árĩcũ gahmemi ĩgu. ³³ Eropirā mũa yare duapehoque. Irire duacā, iri niyerure mojomorocurāre oque. Eropirā umaro maja Goāmu ya árĩburire mohmeque. Eropa iirā umaro maja mũa wajatari ne pehresome. Ūmarogue mũa ya árĩri ne pehrebeaa. Eroguere mũa yare aĩmasibeami yajari masũ. Eropirā mega sã irire tuamasibeami. ³⁴ Ūmarogue mũa ya árĩcũ Goāmu ya dihtare pepirāca mũa, arĩpu Jesu.

Jesu ĩgu dujariborore coreadorepu ĩgu yarāre

³⁵⁻³⁶ Eroparĩtuhaja erāre werenemopũ daja:

—Mũa yare amuyunirā iro dopa árĩrā yahare eropa iiniguirā árĩrā coreque yũ dujariborore. Mohme coreerā erā opu mojoto diriri bosenuge ĩgu wacũ ĩgu dujariborore erā cohrema. Erā eropa corero dopa ta yũ dujariborore coreque mũa sã. Opu ĩgu ya wihigue eraa, disiporore ĩgu dotecũ peerā erā mata pāgũ acuma ĩgũre. ³⁷ Mohme coreerā erā opu eracũ

Īgu gamero dopa ta iiyurā árīrā mucubirirā árīrācoma. Erā eropa iicū ĭagu erā opurū mohme coregu iro dopa gohrotogacumi. Eropigu mohme corerāre doadore, ĭgu erāre barire duhpeogacumi. ³⁸ Īgu erarisubu ņami deco árīcū, o boyorogue árīquerecū mohme corerāpū ĭgu erarisubure ĭgure ōaro corerā árīrā, mucubirirā árīrācoma erā. ³⁹ Ire guñaque mua. Wihi opa yajari masu ĭgu eraborore masigu, ĭgu yajari masare coregu ņajadorebiriboņumi. ⁴⁰ Eropirā mua sã coreque. Yuhu masu Goãmu ĭgu obeodigu guñaña mariro ariguca. Eropirā yahare eropa iiniguirā árīrā yure coreque mua, arīpū Jesu erāre.

Gajigu mohme coregu ĭgu opure ĭgu umupeoru. Gajiguru umpeobiripu, arī werepu Jesu

Mt 24.45-51

⁴¹ Īgu eroparīcū Pedropū serēpipū Jesure:

—Opū, ¿i queorire weregu guare arīgu iiri? ¿O árīpehrerāre eropa arīri? arīpū Pedro.

⁴² Īgu eroparīcū Jesu werenigui queoriñe mera ōpa arī buhepu erāre:

—Mohme coregu ĭgu opure umupeogu pee masigu ōpa ta āhrimi. Opū curīgu wagu, mohme coregure ĭgu wihire apimi. Īgu apiguru doregu árīgucumi. Eropigu barisubu árīcū gajirā mohmeri masare barire gueremi. ⁴³ Eropigu opu ĭgu ya wihigü dujarami. Īgu opu eracū mohme coreguru ĭgu opu ĭgu dorediro dopa ta iipehodigu árīgu, ĭgu mucubirigu árīgucumi. ⁴⁴ Diaye arīgu iiaa muare. Īgu eropa iicū ĭagu ĭgu opu árīpehreri ĭgu yare ĭhadibugu apīgucumi ĭgure daja. ⁴⁵ Ñegu mohme coreguru ōpa ta āhrimi. “Yū opu yoja deyobeami,” arīmi. Eropa arīgu gajirā mohme corerāre űmare, nome sãre pami. Eropigu wuaro baha, ĭhri, meremi. ⁴⁶ Īgu eropa iirisubu guñaña mariro ĭgu opu dujaragucumi. Īgu dujararinure ne masibeami mohme coregu. Eropa dujaragu ñegu ĭgu iirare pee ĭgure ñero dipuwaja moagucumi. Eropigu Goãmure tarinuganirāre ĭgu cōādiroque ĭgure cōāgucumi.

⁴⁷ “Eropigu mohme coregu ĭgu opu gamerire masigu árīqueregu ta irire ĭgu iibiricū, ĭgu ōaro ĭgu mohmēbiricū, ĭgu opuru ĭgure burigā dipuwaja moa pagucumi ĭgure. ⁴⁸ Gajigu mohme coreguru ĭgu opu gamerire masibigu árīcū ĭgu opuru ĭgure daberogā ñari ĭgu eropa árīri dipuwajare pagucumi. Goãmū ĭgu gamerire masicū iimi masare. Eropiro masigure yuhriro gahmea. Eropiro ōaro masigure ōaro yuhriro gahmea, arīpū Jesu.

Jesu masare game dūca waricū iimi

Mt 10.34-36

⁴⁹ Eropa arītuha Jesu erāre werepu daja:

—Peame soewearo dopa ta yuhu i yebare masa erā ñero iirire cōāgu arīgu iibu. Dohpague ta masa árīpehreri ñeri marirā árīcū burigā gahmea yuhu. ⁵⁰ Yuhu ñero tariguca. Yū eropa ñero tariburire coregu, ñero sīporācua yuhu. ⁵¹ ¿Dohpa arī pepiri mua yure? Yuhu i yebaguere buhegu arīcū ya buheri mera “Masa ĭhaturisome pare,” ¿arī pepiri mua? Eropa árībeaa. Muare arīgu iiaa. Masa yū buherire peerā, pe curu erā basi game dūca warirācoma. Yujurāyeri yū buherire peerācoma. Gajirāpū irire gamebirā erāre ĭhaturirācoma. Eropirā yujuro mera arīsoma masa. ⁵² Eropirā yuju wihi majarā sã cinco masa yū buherire peerā, pe curu erā basi game dūca warirācoma. Yuju curu űrerā, gajī curu perā

árĩrãcoma. ⁵³ Īgu pagu ĩgu magure ĩhaturigũcumi ĩgu yaha buherire peecũ. Gajigu magu sã ĩgu pagure ĩhaturigũcumi. Eropigo igo pago igo magore ĩhaturigocumo. Gajigo mago sã igo pagore ĩhaturigocumo. Eropigo igo muñeco igo bepire ĩhaturigocumo. Gajigo bepo sã igo muñecore ĩhaturigocumo. Eropa warãcoma yaha buherire erã peecũ, arĩpu Jesu.

Jesu “Mũa yũ iirire ĩaquererã yũre masibea,” arĩ werepu Jesu masare Mt 16.1-4; Mr 8.11-13

⁵⁴ Eropi Jesu masare bajarãre ðpa arĩ werepu daja:

—Abe ñajarogue imica cururi ĩarã, “Mata deco ariroca,” arãa mũa. Mũa eropa arĩra puhũ deco ahraa. ⁵⁵ Eropirã surgue miruñe aricũ “Asirinu arĩroca,” arãa mũa. Mũa eropa arĩra puhũ irinu asia. ⁵⁶ Mũa guyaricũrã ãhraa. Yebare ĩarã, umarore ĩarã “Õpa waroca,” arĩ masia mũa. Õarinu arĩborore, ñerinu arĩboro sãre masia mũa. ¿Eropa ðaro masiquererã ta, duhpĩrã dohpague yũ Goãmu turari mera yũ muare ĩhmuquerecũ ta ne irire ðaro masibeari mũa? arĩpu Jesu.

Mũare ĩhaturigu mera mũa gamequeãrãre mũa basi amuque, arĩ werepu Jesu

Mt 5.25-26

⁵⁷ Eropa arĩtuhaja ðpa arĩ werenemopũ:

—¿Mũa diaye iiburire masibeari mũa dohpa? ⁵⁸ Gajigu mũre weresãgu wagũ dipuwaja moadoreri wihigue wadorebocumi. Eroge ejaboro core “Dipaturi mũre eropa iisome,” arĩ game amuque. Mũhũ ĩgure amubiricũ mũre ĩgu dipuwaja moadoreri wihigue aĩgãbocumi mũre. Eropigu dipuwaja moadoregupũ mũre surarare ĩgu wiacũ, mũre surara peresu iirãcoma. ⁵⁹ Mũre arĩgu iiaa. Ne erã wajayedorerare mũ wajayephocũgue wiriguca mũhũ, arĩpu Jesu.

13

Mũa ñeri iirare bujawere, ðarire gohrotoque, arĩ buhepu Jesu

¹ Irisubure bajamerãgã masa Jesure ðpa arĩ wereñorã:

—Galilea majarã Goãmure waibũgure wejẽ, erã soe muju umupeorisubu Pilatopũ erãre wejẽpu. Īgu eropa wejẽcũ waibũgu di mera masa di morera wayoro, arĩ wereñorã erã Jesure.

² Erã eropa weretuhajacũ Jesu yũhripũ:

—¿Galilea majarã Pilato ĩgu wejẽnirã murare dohpa arĩ pepiri mũa? ¿Erã eropa sĩrĩrã gajirã Galilea majarã tauro ñerã arĩra dipuwaja sĩriyuri?

³ Arĩbeaa. Mũare arĩgu tiiaa. Mũapu ñerire bujawerebirã, ðaripure gohrotobirã, mũa sã sĩrĩrã peamegue warãca. ⁴ Eropirã soho arĩnirã diez y ocho masa Siloé waĩcuri wihi umari wihi erã weca yuribeja wejẽpehoyoro. ¿Eropa wa sĩrĩrã gajirã Jerusalén majarã tauro ñerã arĩra dipuwaja sĩriyuri mũa pepicũ? ⁵ Arĩbeaa. Mũare arĩgu tiiaa. Mũa ñerire bujawerebirã ðaripure gohrotobirã, mũa sã sĩrĩrãca. Eropirã peamegue warãca, arĩpu Jesu erãre.

Higueragu ðuca maridigu queorire werepu Jesu

⁶ Eropa arĩtuhaja, Jesu i queori mera werepu erãre:

—Pohe opu ĩgu pohegue ĩgu higueragure opapu. Eropigu ĩgu irigu ðucare amagu waripũ. Bocabiripũ. ⁷ Bocabirinijagu ĩgu iri pohe mohmegare werepu. “Peeque yũre. Uhre bojori gohra higueragu ðucare

amaraa. Dũca mara. Irigu dũca maricũ irigure pa cõacãque. Irigu yaha pohe áricũ gajigure otemasibea," arĩpu pohe opu mohmegure. ⁸ Īgu eroparicũ peegu mohme coregu õpa arĩpu: "Opu, irigu yuju bojori gohra niguiniporo. Yũhu irigu gubuyere seatu nujatu iigura. Tuhaja waibũgu gura mera iri gobere yaagura. ⁹ Yu eropa iira puhru irigure gaji bojori dũcacucũ ðaroca. Dũca maricũ muhu padoregaca," arĩpu mohme coregu pohe opure, arĩ werepu Jesu.

Sabadonu Jesu dorecũgore ðago iipu

¹⁰ Irisubure Sabadonu Jesu judio masa buheri wihigue buhegu iipu. ¹¹ Ero pũriri dorecũgo diez y ocho bojori gohra pũriri dorecũgo áripo. Eropigo opatũ niguigo áriõgo, diaye niguimasibiripo. ¹² Igo eropa áricũ iagu Jesu igore iha, piyupu:

—Noméo, mu dorecũri pehrea wahabu, arĩ piyupu Jesu.

¹³ Īgu piyura puhru igore Īgu mohmepicũ mata igo diaye niguigo wapo. Eropa wago "Goãmu turagu, ðagu áhrimi," arĩ Goãmure umupeopo igo. ¹⁴ Jesu igore Sabadonu áricũ Īgu ðago igore iicũ iagu iri buheri wihi opupu Īgu mera guapu. Eropa guagu Īgu masare õpa arĩpu:

—Seis nũri áhrra mari mohmerinũri. Eropirã mua dore ðarã áriðiarã irinũrire taudorerã arique. Sabadonũre mari soorinũre irire iibiricãro gahmea, arĩpu wihi opu.

¹⁵ Īgu eroparicũ Jesu õpa arĩ yũhripũ:

—Mua guyaricũrã áhrra. Mua wecuare, burro sãre oparã Sabadonu áriquerẽcũ erã diriradare pã, erãre aĩ buha ihridorea. ¹⁶ Dohpague igore Abrahã murũ acaweregore watĩ diez y ocho bojori gohra igore dorecũcũ iimi. ¿Sabadonu áricũ igore ðago iidorebeari mua? arĩpu Jesu.

¹⁷ Īgu eroparicũ erãpu guhyasiuro wañorã. Eropirã gajirãpu áripehrreri Jesu iũrare iha mucubiriñorã.

Mostaza coye queorire werepu Jesu

Mt 13.31-32; Mr 4.30-32

¹⁸ Eropigu Jesu werepu daja:

—¿Goãmu masa tauro opu Īgu áriũri werediãcũ ñeheno iro dopa áhrriri mua pepicũ? I werenigui queoriñe mera weregura yahu. ¹⁹ Mostazayegã iro dopa áhrra. Iriyegãre oteri masu yujugu Īgu ya pohegue otemi. Īgu otera puhru ðaro puhria. Eropiro yucũgu wuadigu wahaa. Eropa wacũ mirimagu porã bajarã irigu dũpurigue suhri suama. Eropa ta umaro majagu mari Opure masirã bajamerãgã erã áriũhahtaquererã puhruquere erã bajarã warãcoma, arĩpu Jesu.

Pan bugari queorire werepu Jesu

Mt 13.33

²⁰ Eropigu dipaturi Jesu werenigui queoriñe mera buhepu:

—¿Goãmu masa tauro opu Īgu áriũri werediãcũ ñeheno iro dopa áhrriri mua pepicũ? ²¹ Pan bugacũ iiburi iro dopa áhrra. Yujugo nomeo panre iigo pan bugacũ iiburi pohgare merogã moremo trigo pohga mera. Igo eropa iicũ pan bugacũ iiburi pohga merogã áriquerero trigo pohgare ðaro seyapehrea wahaa. Eropa ta umaro majague mari Opure bajarã masa masirãcoma, arĩpu Jesu.

Miri disiporogã queorire werepu Jesu

Mt 7.13-14, 21-23

²² Eropi Jesu paga macarigue, muta macarigãgue buhegã, Jerusaléngue ejabu iipũ. ²³ Īgu eropa warisubu masũ Jesure òpa arĩ serēpipũ:

—Opũ, ¿bajamerãgã dihtare peamegue wabonirãre Goãmu taugucuri erã ĩgu pohro waboro dopa? arĩpũ ĩgu Jesure.

Īgu eroparĩcũ Jesu werenigui queoriñere buhegu òpa arĩ werepũ:

²⁴ —Yũ muare òpa arãa: Bajarã Goãmu pohrogue wadiaquererã wamasisome. Īgu pohro waburi miri disiporogã ñajaro dopa ahraa. Eropirã mua i disiporogãre turaro ñajadiarã iro dopa ta ĩgu yare iique. ²⁵ Òpa iigucumi Goãmu bajarã masare. Īgu wihi opũ iro dopa ahrimi. Wihi opũ wahgã, disiporore bihagucumi. Īgu eropa iicũ disiporogue mua niguirã disiporo biharisere doterãca. Doterã òpa arĩrãca. “Opũ, disiporore pãgũque guare.” Mua eroparĩcũ wihi opũpũ yuhrigucumi. “Mua aridirore masibea yuhũ. Eropigu muare masibea,” arĩ yuhrigucumi, ²⁶ Īgu eroparĩcũ mua yuhrirãca. “Mu mera gua baha, ihribũ. Gua ya maca buhebũ muhũ,” arĩrãca mua. ²⁷ Mua eroparĩcũ ĩgapũ yuhrigucumi. “Mua aridirore masibea. Árĩpehrerã mua ñeri iinirã yũ pohro aribiricãque,” arĩgucumi wihi opũ. ²⁸ Eropi Abrahãre, Isaare, Jacobore, árĩpehrerã Goãmu ya weremuhtanirãre Goãmu ĩgu opũ arĩrore erã árĩcũ ĩarã, mua disiporogue cóanirã árĩrã burigã orerãca. Eropirã mua turaro bujawererã, mua gucurire cüridihurãca. ²⁹ Irisubure norte majarã, sur majarã, abe muririro majarã, abe ñajaro majarã Goãmu ĩgu opũ árĩroguere eja, mesa pohro doarãcoma. ³⁰ Dohpague árĩrã pohro majarã árĩrã irisubure oparã árĩrãcoma. Eropirã dohpaguere “Oparã ahraa,” arĩrã irisubure pohro majarã árĩrãcoma, arĩpũ Jesu.

Jerusalén majarãre burigã mahipũ Jesu *Mt 23.37-39*

³¹ Irisubure bajamerãgã fariseo masa Jesu pohrogue ejarã, ĩgure wereñorã:

—Herode mure wejēdiami. Eropigu gajipũ waque muhũ, arĩñorã erã ĩgure.

³² Erã eroparĩcũ Jesupũ yuhripũ:

—Herode guyaricugu ahrimi ĩgu. Òpa arĩ wereque ĩgure: “Jesu watẽare cóagu iimi. Eropigu dorecurãre òarã iigu iimi. Irire dohpagãre, ñamigã sãre iigucumi. Eropigu ñamigã core mohmetugucumi,” arĩ wereque Herodere. ³³ Eropigu dohpagãre, ñamigãre, ñamigã core sãre Jerusaléngue curigu wagura. Ero yure Goãmu yare weremuhtagure wejērãcoma masa. Goãmu yare weremuhtagure erã wejēbupũre Jerusaléngue árĩro gahmea. Eropigu yũre i maca ta dujaro gahmea.

³⁴ “Mua Jerusalén majarã, mua acawererã mura Goãmu ya weremuhtanirãre wejēmurinirã árĩma. Eropirã Goãmu obeonirãre utã mera deamurininã árĩma. Cãreña buru igo porãre igo quēdupuri mera igo coã oyaro dopa ta bajasuburi opadiaribũ muare. Muapũ irire yũre ne gamebiribũ. ³⁵ Dohpaguere mua árĩri maca cóara maca árĩroca. Diaye arĩgu tiiaa muare. Puhũ dujarigũca daja yuhũ. Eropa yũ dujaricũ ĩarã mua yũre Goãmu turari mera arigu “Óaro ariporo,” arĩrãca. Yũre mua irire arĩboro core dipaturi yũre ĩasome mua, arĩpũ Jesu.

14

Dorecugure ðagu iipu Jesu

¹ Gajinu erā soorinu Sabadonu áricū fariseo masa oparā mera majagu ya wihigue Jesu bagu wapu. Iri wihi árirā ĩgure ĩhanurusiañorā. ² Eropigu ñigagu bijigu ĩgu pohrogue ejaru. ³ Eropigu Jesu judio masare buherāre, fariseo masa sāre serēpipu:

—¿Mari soorinure dorecugure ðagu iidoreri Goāmu yare erā gojarapū? arīpu Jesu.

⁴ ĩgu eropa arī serēpiquerecū ta erā yuhribiriñorā. Erā yuhribiricū ĩagu Jesu ñigagu bijigure ðagu iipu. Tuhajanugu, “Waque,” arīpu ĩgure.

⁵ Eropa iituhagu erāre serēpipu daja:

—¿Mua yagu burrore o mua yagu wecure gobegue yuhridijadigure mata aĩ wiubeari mua mari soorinu áriquerecū? arīpu Jesu.

⁶ ĩgu eropa arīquerecū ta erā ĩgu serēpirire yuhrimasibiriñorā daja.

Mojoto dirirogue sihubeonirāre werepu Jesu

⁷ Fariseo masu ya wihi áriĩgu iri wihi majagu ĩgu sihubeonirā oparā doarire erā beyemāhtacū ĩapu Jesu. Eropa ĩatuha ire werepu arīpehrerāre:

⁸ —Mojoto diriri bosenu áricū ĩgu muare sihubeocū, ĩgu ya wihigue eja oparā doarire beye doabiricāque. Mua tauro guhyadiarāre sihuboñumi iri wihi opu. ⁹ ĩgu eropa iicū mua oparā doarire doacū “Oā guhyadiarāre mua doarire oque,” muare arībocumi wihi opu. ĩgu eroparīcū mua guhyasiuro dujarāca. Eropirā bu árirā doarire doarā warāca. ¹⁰ Eropirā wihi opu muare sihubeocū, bu árirā doarire doamāhtaque. Mua eropa iicū wihi opu muare oparā doaripure “Doarā arique,” arīĩgucumi ĩgu muare. Mua eropa wacū gajirā ĩgu sihubeonirāpu muare umupeori mera ĩarācoma. ¹¹ Yujugu ĩgu basi “Opu āhraa,” arī pepigu bu áriĩgu arīĩgucumi. Eropigu gajigu “Bu áriĩgu āhraa,” arī pepigu, gajirāre tarinugadiabigu opu arīĩgucumi, arīpu Jesu erāre.

¹² Eropa arītuha Jesu wihi opure werepu:

—Muhu bosenu ĩgu mu pohro árirāre, mu pagu porāre, mu acawererāre, doberi oparāre sihubiricāque. Muhu erāre sihucū mure erā sā sihu gamerācoma daja. Eropa sihu gamerā mure erā wajamorire wajayerācoma. ¹³ Muhu bosenu moagu mojomorocurāre, curimasibirāre, yujupu guburu poyanirāre, cuiiri ĩhajabirāre sihubeoque. ¹⁴ Mu eropa iicū ĩagu Goāmu mure ðaro ĩĩgucumi. Erāpu mure erā sihura wajamorire wajayemasibeama. Eropigu ðarā sīrinirā erā masa mūriarisubu áricū Goāmuru mure wajayegucumi, arīpu Jesu wihi opure.

Wuari bosenu iira queorire werepu Jesu

¹⁵ ĩgu eroparīcū peegu gajigu bari mesa pohro doadigu Jesure werepu: —Goāmu ĩgu opu áriro ĩgu bari mesa pohro doarā turaro mucubirirā arīrācoma, arīpu ĩgu Jesure.

¹⁶ ĩgu eroparīcū Jesu i queorire werepu ĩgure:

—Wuari bosenu ĩgu bajarā masare sihubeoru. ¹⁷ ĩgu sihubeora puhru bosenu áririnu gohra mohme coregure ĩgu sihubeonirāre weredoregu obeoru. “Ma, arīpehrerire bosenu maja arīburire amutuhama. Eropigu muare sihubeomī,” arī weredorepu mohme coregure. ¹⁸ Mohme coregu

Īgu eropa arī werequerecū ta, Īgu sihunirāpu “Wamasibirica,” arīñorā erā. Īgu sihumāhtadigu ōpa arī werepu mohme coregure. “Dohparagā yebare asūabū. Eropigu iri yebare ĩagu wabu iiaa. Eropigu wamasibirica. Umupeoque yure. Yure masiya mara, arīque,” arīpu ĩgu sihumāhtadigupu mohme coregure. ¹⁹ Gajigupu ōpa arīpu: “Wecuare pe mojtocu majarā dohparagā ta asūabū. Eropigu wecuare queo ĩagu wabu iiaa. Eropigu wasome. Yure wamasiya mara,” arīpu ĩgu sā. ²⁰ Gajigupu ōpa arīpu: “Yūhū dohpagā mojtoto dihriabū. Eropigu iri bosenure wamasibirica,” arīpu ĩgu mohme coregure. ²¹ Īgu eroparīcū mohme coregupu dujaa wa, ĩgu opure erā arīrare werepehopu. Īgu eropa arī werecū ĩgu opu turaro gua, ōpa arīpu mohme coregure. “Yojaro mera maca arīri marigue, mojomorocūrā erā arīri marigue waque. Eropigu mojomorocūrāre, curimasibirāre, cuiiri ĩhajibirāre, poyari masare yojaro mera aīgārique erāre,” arīpu opu. ²² Pūhrū mohme coregu werepu ĩgu opu: “Opu, mū dorediro dopa ta masare sihuabū. Yū eropa sihuquerecū ta gajirā sā iri taribure sihajarācoma,” arīpu mohme coregu. ²³ Īgu eroparīcū opu ĩgure dorepu: “Campogue waque. Ero paga marigue, mūta marigāque arīrāre yaha wihigue aridoreque yaha wihi ōaro ũjutarimaja ōaro. ²⁴ Diaye arīgu iiaa mure. Oā yū sihumāhtanirā yū barire ne merogā basome,” arīpu opu, arī werepu Jesu.

Jesu mera wacū diasā āhraa

²⁵ Irisubure bajarā masa Jesu mera wañorā. Eropigu Jesu erāre maji ĩha werepu:

²⁶ —Yujugu yū buhegu árīdiagū gajirā tauro yūpure mahiro gahmea. Īgu pagure, ĩgu pagore, ĩgu marapore, ĩgu porāre, ĩgu pagu porāre ĩgu basire ĩgu mahiro tauro yūpure mahiro gahmea. ²⁷ Yujugu yū buhegu árīdiagū yahare eropa iiniguigu árīgucumi. Eropigu ĩgu yahagu ĩgu árīri dipuwaja ñero tariqueregu ta yure pihrisome. Eropa ñero taridiabigu yū buhegu árīmasisome. ²⁸ Ire masiyuro gahmea muare. Ōpa āhraa iri: Wihi iigu ĩgu ũmari wihi ĩgu iiboro core wihi wjacuburire queomāhtanimi. Eropa iigu ĩgu wihire pehoborore masimi ĩgu. ²⁹ Wjacuburire queobigu iri wihire iipehobiribocumi. Eropirā ĩgure ĩarā wereyabocoma. ³⁰ “Īhī ĩgu wihire iigu bocatīubirañumi,” arī wereyabocoma. ³¹ Opu sā gajigu opu yarā mera erā gamewejēborō core, ĩgu yarā surarare ĩgu gamewejēdoreborō core, ĩgu yarā surarare queogucumi. “¿Yūhū diez mil surara mera gajigu veinte mil surara opagu mera gamewejēgu wagu bocatīubocuri?” arī pepigu queogucumi ĩgu. ³² Eropa queogu “Bocatīusome,” arīgu, gajigu opu ĩgu surara mera gamewejēgu arīgu yoarogue ĩgu aricū ta, “Bocatīusome,” arīgupu “Gamewejēbircārā,” arīdoregu obeobocumi ĩgu pohro majagure. ³³ Eropirā yū buherā árīdiarā mūa iiburire muare masiyuro gahmea. Eropirā mūa gamerire duhudiabirā yū buherā árīmasibea mūa, arī werepu Jesu.

Goāmū yare iiniguuro gahmea, arī werepu Jesu *Mt 5.13; Mr 9.50*

³⁴ Eropigu erāre werenemopu:

—Moa ōaro acari āhraa. Iri moa ñeri wacū dipaturi ōari iimasiya mara.

³⁵ Iri moa mera duhpimaja masiya mara. Iri eropa arīcū iri moare cóaro gahmea. Eropirā mūa Goāmū yare iiniguibirā ne duhpimorā árībeaa. Ire ōaro peeque mūa, arīpu Jesu.

15

Oveja dederedigure bocara queorire werepu Jesu
Mt 18.10-14

¹ Eropa gajinu bajarā wajasea corerā gajirā “Ñerā āhrima,” erā arīrā mera Jesure peerā arīñorā. ² Erā eropa iicū ĩarā fariseo masa judio masare buherā sã Jesure ĩhaturirā ōpa arīñorā erā basi:

—Īhĩ ñerā mera wapicumi. Eropigu erā mera bahami, arī wereniguiñorā erā erā basi.

³ Erā eropa arī wereniguiicū Jesu i queori mera ōpa arī buhepu erāre:

⁴ —¿Cien oveja opu yujugu oveja dederea wacū ĩagu dohpa iigucuri ĩgu? Ōpa iigucumi. ĩgu noventa y nueve ovejare erā bari campogue api, dederedigure amagu wagucumi. Ovejare bocaguge dujarigucumi.

⁵ ĩgure bocagu mucubirigucumi. Eropigu ĩgure ĩgu weca coãpeo ⁶ ĩgu ya wihigue aĩ dujaa wagucumi. Aĩ dujaja, ĩgu pohro arīrāre, ĩgu acawererāre sihu gameneogucumi. “Yu oveja dederedigure bocabu. Eropirā yu mera mucubirique,” arīgucumi ĩgu erāre. ⁷ Oveja dederedigure ĩgu bocadiro dopa ta ōpa arīgu iiaa muare. Yujugu ñerire iigu ĩgu ñerire bujawerecū ōaripare gohrotocū ĩarā Goãmu pohro arīrā buriġā mucubirima. Gajirāpu bajarā masa ōpa arī pepima: “Ñero iibea yupu. Eropiro yu ñeri bujawereburi mara,” arī pepirima. Erā eropa arī pepicū ĩarā umaro majarā Goãmu pohro arīrā mucubiribeama, arīpu Jesu.

Niyeruse dedererare bocara queorire werepu Jesu

⁸ Eropa arītuha gaji queori mera werenemopu:

—¿Diez niyeruseri waja pagariseri opago yujuse dederecū duhpibocuri igo mua pepicū? Ōpa iigocumo igo. Sihāgodirure sihāgo, wihire oha, ōaro amapehogocumo. Irisere bocagogue duhugocumo. ⁹ Irisere bocatuha, igo pohro arīrāre, igo acawererāre sihupehogocumo. “Niyeruse yahase dedererare bocabu. Eropirā yu mera mucubirique,” arīgocumo igo. ¹⁰ Diaye arīgu iiaa muare. Eropa ta yujugu ñerire iigu ĩgu ñerire bujawerecū ōarire gohrotocū Goãmu yarā anyuapu buriġā mucubirirācoma. ĩgu dederebidigu dederebeami pare. Eropirā turaro mucubirirācoma, arīpu Jesu.

Magu dederedigu pagu pohro dujajara queorire werepu Jesu

¹¹ Eropa arītuha Jesu gaji queori mera werepu daja:

—Buġu porā perā arīñorā. ¹² Duhyagupu ōpa arīpu ĩgu pagure: “Ahũ, mu sīrira puhru yare mu oburire yare opurumujuque,” arīpu ĩgu ĩgu pagure. ĩgu eroparicū erā pagu perāgue ta ĩgu porāre guerepu ĩgu oparare. ¹³ Bajamenuriġā puhru duhyagupu ĩgu ya arīpehrerire aĩ, yoarogue gaji yebague waħa wapu. Ero eja ĩgu ya niyerure iisiripehocāpu.

¹⁴ ĩgu iisiripehora puhru iri yebare ne bari marinugayoro. Eropigu oaboapu. ¹⁵ Eropigu iri yeba maja mohmerire amapu. ĩgu mohmerire bocacū ĩgu opu yesea coregu acupu ĩgure. ¹⁶ Eropigu ĩgu yeseare ejo, erā barire badiaripu ĩgu sã. ĩgu eropa badiaquerecū ta ero majarā ĩgure barire obiriñorā. ¹⁷ Eropi ĩgure ero guñari ariyoro pare. “Yu pagure mohme corerāpu pagari barire opacoma. Erā ba duhari sã pagari arīca. Erā ōaro arīrisubu wapu ohō arīgu oaboagu iiaa. ¹⁸ Dohparagā yu pagu pohro dujagara. Yu pagu pohro ejaġu ōpa arīgura ĩgure: ‘Ahũ, Goãmure ñero iiahu. Mu sãre ñero iiaa. ¹⁹ Ñegu āhraa. Eropigu

mū magu diaye dopa ĩabita yure pare. Mure mohme corerā dopa ta ĩaque yure, arĩgura yu pagure,” arĩ pepĩpũ ĩgu. ²⁰ Eropa arĩ pepĩgu wahgānugaja, ĩgu pagu pohrogue dujaa wapu. Erogue ĩgu ejadĩgu ĩgu dujaricũ ĩgu pagupũ ĩgure yoarogue ĩgu arĩcũ ta ĩgu magure ĩha masipũ.

“Īgu eropa eracũ ĩagu ĩgu magure mojomoro ĩapu. Mojomoro ĩagu ĩgure oma bocatĩri pabua, ĩgu wayuporāre mimipũ ĩgu pagu ĩgu magure.

²¹ “Ahu, Goāmure ñero ĩabu. Mū sāre ñero ĩaca. Ñegu āhraa yuhu. Eropĩgu mū magu diaye dopa ĩabita yure pare,” arĩpũ ĩgu ĩgu pagure.

²² Īgu eroparĩcũ peequeregu ta ĩgu pagupũ mohme corerāre sihupũ. “Yojaro, ðariñe suhrĩrore aĩgārique. Eropĩrā yu magure sāque. Sātuha ĩgu mojtore sārĩ berore sā, ĩgu guburire zapature sāque. ²³ Sātuha diicũgu wecure wejẽque. Bosenu ĩirā. ²⁴ Īhĩ yu magu sĩrigu dopa ta waha wamĩ. Eropa waqueregu ta dohpaguere ojocarĩmĩ ĩgu. Dederedĩgu dopa arĩdigure dohpaguere bocabu. Eropĩrā bosenu ĩirā,” arĩpũ ĩgu pagu. Īgu eropa arĩra puhru bosenu ĩinũgañorā erā.

²⁵ “Irisubure ĩgu tĩgupũ pohegue arĩpũ. Pohegue arĩdigu dujarĩgu wihĩ pohro eragu, erā bayarire peepũ ĩgu. ²⁶ Peegu yujugu mohme coregu sihubeo ĩgure serẽpĩpũ ĩgu: “¿Dohpa ĩirā bayarā ĩari?” arĩpũ ĩgu mohme coregu.

²⁷ “Mū pagu magu dujaramĩ. Īgu ðagu dujaracũ mū pagu diicũgure wecure wejẽdoreami,” arĩ yuhĩpũ mohme coregu. ²⁸ Īgu eropa arĩ werecũ ĩgu tĩgupũ burĩgā guagu wihĩgue ñajabĩripũ. Īgu eropa ñajabĩricũ ĩagu ĩgu pagu wirĩri, “Ñajarĩque,” arĩ turaro sihurĩpũ ĩgu magure.

²⁹ “Peeque, ahu. Yuhu yoari boje mure mohme coregu dopa ta ĩamurabu. Eropĩgu mū dorerire ne yujusubu tarĩnũgabĩrĩmũrabu. Yuhu mure mohme corequerecũ ta yũpũre ne obĩrabu mũhu. Ne yujugu waĩbugure obeaa mũhu yure yu mera majarā mera yu bosenu ĩicũ.

³⁰ Eropĩgu ĩhĩ mū magupũ ñerā nome mera mū yare ĩĩsirĩpehodĩgu arĩmĩ. Irĩre ĩĩsirĩpehotuha, ĩgu wihĩgue ĩgu dujaracũ diicũgu wecure wejẽabu mũhu ĩgu babure,” arĩpũ ĩgu tĩgu ĩgu pagure. ³¹ “Mahgu, mũhu yu mera arĩpehrerĩnari āhraa. Eropĩro arĩpehrerĩ yaha mū ya dihta āhraa. ³² Mū pagu magupũ sĩridĩgu dopa ta wahāmi marĩre. Eropĩ ĩgu dohpaguere ojocarĩgu āhrĩmĩ. Īgu dederedĩgu dopa ta wahāmi. Īgu eropa wara puhru dohpaguere ĩgure bocabu. Eropĩro ĩgu dujaracũ marĩ bosenu ĩi mucubĩricũ ðhaa,” arĩpũ ĩgu ĩgu magure, arĩpũ Jesu erāre ĩri queorĩre weregu.

16

Niyeru dibu coregu queorire Jesu werepu

¹ Eropĩ i queorĩre ĩgu buherāre werepu Jesu:

—Doberĩ opu ya niyerure dibu coregu niyerure ĩgu ðaro dibubĩricũ ĩagu gajĩgupũ weresāpu doberĩ opũre. “Īgu mū ya niyerure ĩĩsirĩgu ĩĩmĩ,” arĩ weresāpu ĩgure. ² Īgu eropa weresācũ pee niyeru dibu coregure sihubeopũ. Eropĩgu ĩgu eracũ ĩagu ĩgure opu werepu. “Gajĩgu mū yaha niyerure ĩĩsirĩre wereami yure. Eropĩgu yahare dibugũ dohpaguere arĩsome mũhu. Eropĩgu yahare mū ĩĩrare werepeho gojaque. Mure cõāgu ĩiaa,” arĩpũ ĩgu opu ĩgure. ³ Īgu eropa arĩra puhru ðpa arĩ pepĩpũ dibu coregu ĩgu basi: “Yu opu yure cõābu ĩĩcumĩ. Yuhu turabeaa. Eropĩgu turaro mohmerire bocatĩubeaa. Eropĩgu gajĩrāre

niyeru serēgu guhyasiūtariaro tariguca yuhu. ¿Eropigu dohpa iigucuri yuhu? ⁴ Dohpague tamerare ya iiburire masia yuhu. Ōpa ya iicū ya mohmeri maricū erā ya itamurā árīrācoma. Eropirā erā ya wirigue ñajadorerācoma yure,” arī pepipū ĩgu. ⁵ Eropa arī pepigu ĩgu árīpehlerā ĩgu opure wajamonirāre sihubeopa. Sihubeotuha eramuhtagure ōpa arī serēpipū ĩgu. “¿Yū opure dipē wajamori muhu?” arīpū ĩgu. ⁶ ĩgu eroparīcū wajamogupū yuhripū. “Cien tambore uyure olivo waicūdigū maja uyure wajamoa ĩgure,” arī yuhripū ĩgu. ĩgu eropa arī werēcū dibugupū ōpa arī werepū. “Ohō āhraa mu wajamorire gojaturapū. Doaque. Eropigu mu wajamorire deco mera ai, deco mera gojatuque,” arīpū niyeru dibugu wajamogure. ⁷ Eropa arītuha gajigu wajamogure serēpipū ĩgu. “¿Muca dipē wajamori?” arīpū daja. “Cien aju trigo ajure wajamoca yuhu,” arīpū wajamogu dibugure. “Ohō āhraa mu wajamorire gojaturapū. Mu wajamorire ochenta goja amuque,” arīpū dibugu. ⁸ ĩgu eropa ōaro guyamehrecū ĩagu “Ihī guyamehregu árīcumi,” arī pepipū ĩgu opu niyeru dibugure. Inu majarā Goāmū gamebirā erā yare guya amurare erā niyerure erā diburare Goāmū yarā tauro masicoma erā, arīpū Jesu.

⁹ Eropa arītuha Jesu werenemopū:

—Eropigu muare arīgu tiaa. Mūa oparire, i yeba majare mojomorocurāre mūa ocū, erāpū muare mahirācoma. Mūa eropa iicū mūa opara pehrera puhru amūsigue mūa ejacū erogue muare ōaro mahirācoma.

¹⁰ “Bu árīrā ya mohmerire queoro iirā oparā ya mohmeri sāre queoro iirāca. Bu árīrā ya mohmerire queoro iibirā oparā ya sāre queoro iibirāca. ¹¹ Eropirā i yebague mūa opari mera mūa ōaro iibirā Goāmū muare iidoreri sāre ōaro iisome mūa. ¹² Eropirā gajigu yare mūa ōaro iibasabiricū ĩagu mūa ya árīburire osome muare.

¹³ “Yujugu Goāmūpūre guñagu burigā gohra niyerupūre guñabeami. Niyerupūre burigā guñagu Goāmūpūre guñabeami. Eropigu niyeru dihtare gamegu árīgu Goāmūpūre mucubiricū iibeami. Goāmū sāre niyeru sāre yujuro mera gametarima masiya mara muare. Niyerure gametarigu Goāmūpūre umupeomasibeami, arīpū Jesu.

¹⁴ ĩgu eroparīcū peerā fariseo masapū ĩgure wereyañorā. Erāpū niyerure gametariñorā. Eropirā wereyañorā. ¹⁵ Erā wereyacū peegu Jesu erāre werepū:

—Masa erā ihurore mūa ōaro iiraa. Mūa eropa iicū, “Ōarā diaye ta iirā āhriima,” arīrima masa muare. Goāmūpū mūa pepirire masimi. Masa “Ōatariama,” erā arīrāre Goāmūpū gajiropa arī pepimi, arīpū Jesu.

Goāmū ĩgu dorerire, ĩgu opu árīrere werepū Jesu

¹⁶ Eropa arītuha ōpa werenemopū Jesu:

—Ñu waīyegu ĩgu eraboro core Moiserē ĩgu apira doreri mera Goāmū marire doreami. Goāmū ya weremuhtanirā mura erā gojara sā eropa ta árīribū marire dorera. Dohpaguepūre Ñu ōari buherire, Goāmū opu ĩgu árīrere buhemi. ĩgu eropa buhecū pee masa erā ejatuharo, erā turari mera Goāmū erā opu árīcū gahmema.

¹⁷ “Goāmū Moiserē ĩgu apira dorerire erā ĩgu yare gojara sāre “Iri duhpihuri árībeaa,” ne arīsome. Umūsi, yeba sā pehrequerecū Goāmū ĩgu werediro dopa ta iipehogucumi, arī werepū Jesu.

*Marapore cóãrire werepũ Jesu**Mt 19.1-12; Mr 10.1-12*¹⁸ Eropã arĩtuhaja õpa arĩnemopũ Jesu:

—Masũ Igu marapore cóãgu, gajigo mera marapocũgu Igu igo mera ñero iigu iimi. Tuhaja masũ gajigu Igu cóãdigo mera marapocũgu Igu sã igo mera ñero iigu iimi, arĩpu Jesu.

*Doberi opũ, gajigu Lázaro queorire werepũ Jesu*¹⁹ Eropã i queori werepũ Jesu:

—Yujugu doberi opũ arĩñumi. Suhri wajacũrire sañagu arĩñumi. Eropigu umuri nũcu õari dihtare bagu, baja opañumi Igu. ²⁰ Eropigu irisubure gajigu arĩñumi. Igu mojomorocũgu Lázaro waĩcũgu arĩñumi. Igu Igu dupure baja camicũgu arĩñumi. Eropirã gajirãpu Iguere doberi opũ ya wihĩ disiporo aĩgã apimuriñuma. ²¹ Eropigu mojomorocũgapũ doberi opũ Igu ba duharire gamemuriñumi. “Ba duhari mera yapigũca yũhu,” arĩ pepimuriñumi Igu. Ero oyarĩsubu diayea Igu pohro eja Igu camire neremuriñuma. ²² Eropigu mojomorocũgu sĩria wañumi. Igu sĩria wacũ, Abrahã pohrogue paraĩso waĩcũrogue anyua Iguere aĩ muriañuma. Eropigu doberi opũ sã Igu puhru sĩria wañumi. Igu sĩricũ Iguere yaañuma. ²³ Eropiro doberi opũre peamegue ejagu burigã teboricũñumi. Eropigu peamegue arĩgu umũsigue arĩguere Abrahãre ñhamujuñumi. Lázaro murũ sãre ñañumi. ²⁴ Ñatuha Igu Abrahãre sihubeoñumi. “Ahũ, Abrahã, mojomoro ñaque yure. Peamegue yũhu ñero tarigu iica. Yũ eropa wacũ Lázaro yure oboeque. Eropigu Igu decore Igu mujusĩru mera yoso, yũ nerore deco mera nehoporo. Irĩre yũsuporo Igu,” arĩriñumi doberi opũ murũ. ²⁵ Igu eroparĩquerecũ Abrahãpu Iguere wereñumi: “Mahgu, ojocarigu arĩgu arĩpeherrerire õarire opabu muhu. Lázaropũ umuri nũcu ñero tarimi. Dohpaguere mu ñero taricũ Igapũ õguere mucubiriri mera arĩcãgu iimi. ²⁶ Eropiro mari watope uñcãri waya ãhrraa. Eropirã õre arĩrã erogueere wamasibeama. Tuhaja erogue arĩrã õre aridiaquererã ta õguere arimasibeama,” arĩñumi Abrahã doberi opũ murũ. ²⁷ Igu eroparĩcũ doberi opũ õpa arĩnemoñumi: “Acaweregu, turaro serẽa mure. Lázarore yũ pagu ya wihigũ oboeque. ²⁸ Yũhu yuju mojoto majarã peherrerã pagu porãcua. Lázaro erãre wereporo. Õre erã ñero tarirogũere arĩbiricãporo,” arĩñumi Igu. ²⁹ Igu eroparĩcũ Abrahãpu yuhriñumi: “Goãmu dorerire Moise Igu apirare, Goãmu weremuhtanirã erã gojarare opama mu pagu porã. Eropirã mu pagu porã irire ta peeporo,” arĩñumi Abrahã. ³⁰ Igu eroparĩcũ doberi opũpu yuhriñumi: “Ahũ, Abrahã, irire opaquererã ta õaro peesome. Lázaro sĩridigu masadigu erã pohro Igu ejacũ ñarã erãpu erã ñero iirire bujawere, õarĩpũre gohrotorãcoma. Eropirã õarire iirãcoma yũ pagu porãpu,” arĩñumi doberi opũ murũ. ³¹ Igu eroparĩcũ Abrahãpu wereñumi: “Mu pagu porã Moise Igu apirapũ Igu wererare, Goãmu yare weremuhtanirã erã wererare peebirã ãhrrima. Eropirã Lázaro murũ sĩridigũgu masadigu Igu arĩquerecũ ta erã Goãmu yarẽ peesome,” arĩñumi Abrahã, arĩ werepũ Jesu masare.

¹ Eropi Jesu werepu ĩgu buherãre:

—Muare ñeri iidoreri baja áhraa. Eropirã masa ñerire iima. Iri eropa arĩquerecũ ta masure ñerire iidoregupu ñetariaro tarigucumi. ² Gajigure masa ĩgu wunugure wuariye utãyere dirisiu, wuariyague ĩgure cóacũ ñero wabocumi ĩgu. Eropigu oãgã mera majarãre ñerire iidoredigupu wuariyague erã cóadigu tauro ñero tarigucumi. ĩgure bariã dipuwaja moasũgucumi. ³ Óaro iique mua. Mua acaweregu ñero ĩgu iicũ iarã, “libita,” arĩque ĩgure. Eropirã ĩgu ñero iirire ĩgu bujawerecũ, óarire gohrotocũ mwapũ ĩgu ñeri iirire cãdijique. ⁴ Eropigu mua acaweregu yujunũ ta siete suburi muare ĩgu ñero iibocumi. ĩgu eropa iicũ yujuyerisubure muare, “Yũ ñero iirire bujawerea. Óarire gohrotogu iiaa,” ĩgu arĩcũ iri nucũ suburi ĩgu ñero iirire cãdijique, arĩpu Jesu.

Goãmure umupeorire werepu Jesu

⁵ Eropi Jesu buherã ĩgure ópa arĩñorã:

—Goãmure guare óaro umupeonemocũ iique, arĩñorã Jesure.

⁶ Erã eroparĩcũ Jesu yũhripũ:

—“Goãmure diaye ta iigu áhrimi,” mua arĩ umupeorã miriyegã mostazaye pẽgã mua umupeoquererã irigu sicómoro waicũdigure ópa iimasia: “Irigu yucugũ irigu basi tara duhagãporo. Wuariyague yuriñajaporo,” arĩmasia mua. Mua eroparĩcũ irigu yucugupu mua dorero dopa ta waroca, arĩpu Jesu.

Mohme coregu ĩgu mohmerire werepu Jesu

⁷ Pũhrũ i werenigui queoriñere werepu Jesu:

—Muare mohme coregu poheguere tãra, mohmemi. ĩgu ovejare ihadibumi. ¿ĩgu eropa mohme ĩgu dujaracũ iarã dohpa arĩbocuri mua ĩgure? “Yojaro arĩque. Mũ bari ohõ áhraa,” ¿arĩbocuri mua? ⁸ Eropa arĩbeaa mua. ĩgure ópa arãa mua: “Yũ baburire iique. Eropigu yũ baha ihricũ yãre coreque. Yũ pũhrũ mũ sã baha ihrique,” arãa mua mohme coregure. ⁹ Mohme coregu ĩgu mua mohmedorerire ĩgu iicũ ĩgure “Óhaa,” arĩbeaa mua. ĩgure mua dorero dihtare iigu iicumĩ ĩgu. ¹⁰ Mua sã ĩgu iro dopa ta áhraa. Goãmũ ĩgu dorediro dopa ta iipehorã ópa arĩ pepique mua. “Gua mohme corerã dihta áhraa. Guare ĩgu dorero dihtare iabũ gua,” arĩ pepique mua, arĩpu Jesu ĩgu buherãre.

Diez gohra cami boarãre óarã iipũ Jesu

¹¹ Gajinũ Jerusaléngue Jesu wagũ iipũ. Eropa wagũ Samaria yeba, Galilea yeba deco tarigãpũ. ¹²⁻¹³ Gaji macague wari mague ĩgu curicũ diez cami boarãpũ ĩgure bocatĩriñorã. Eropirã yoañarirogue niguirã ta piyuñorã:

—Jesu, opũ, guare mojomoro ãaque, arĩñorã.

¹⁴ Erã eroparĩcũ erãre iha, werepu Jesu:

—Pahire mua dupũrre óaro warare ihmurã waque, arĩpu erãre.

ĩgu eropa arĩra pũhrũ erã warisubu erã dupũ óarã wañorã. ¹⁵ Eropigu yujugu erã mera majagu ĩgu dupũ óari dupũ wacũ ĩagu, Jesu pohrogue maji dujariripũ. Eropa dujarigu turaro mera Goãmure umupeorũ. “Goãmũ turagu, óagu áhrimi,” arĩ umupeorũ ĩgu. ¹⁶ Eropa arĩgu ĩgu Jesu

guburi pohro mereja “Ōhaa,” arīpu. Īgupu Samaria majagu árīpu. ¹⁷ Īgu eropa iira puhru Jesu ōpa arī werepu:

—Diez āhrama masa ōarā wanirā. ¿Gajirā nueve duhyarāpu nohogue árīcuri erā? ¹⁸ Ihī gaji yeba majagu dihta Goāmure “Ōhaa,” arīgu dujarami. ¿Duhpirā gajirāpu aribirari? arīpu Jesu.

¹⁹ Eropa arītuha Jesu merejadigure arīpu.

—Wahgānugajaque. Waque. Mā Goāmure umupeogu ōagu wahabū mahū, arīpu Jesu Īgure.

Goāmu Īgu opu árīborore werepu Jesu

Mt 24.23-28, 36-41

²⁰ Irisubure bajamerāgā fariseo masa Jesure serēpiñorā:

—¿Dohparīcū Goāmu opu árīnugagucuri? arī serēpiñorā erā.

Erā eroparīcū Jesu yuhripu:

—Goāmu Īgu opu árīnugacū mua ĩhamasibea. ²¹ “Goāmu Īgu opu árīri ohō āhrea,” arīmasibea. “Sohōgue āhrea,” arīmasibea. Goāmu Īgu opu árīri masa erā pepirigue āhrea, arīpu Jesu fariseo masare.

²² Eropa arītuha Jesu Īgu buherāre ōpa arī werepu:

—Puhru yuhū masū Goāmu Īgu obeodigu yū i yebague dujariburire burīgā gamerāca mua. “Īgure yujunū gohra mari ĩacū ōaboaya,” arī quererā ta yure ĩanisome mua. Eropa mua gamequerecū ta irisubure arisome yuhū. ²³ Gajirā muare ōpa arīrācoma. “Īgure ĩaque. Īgu Cristo āhrimi. Sihire ĩaque. Cristo āhrimi,” arīrācoma muare. Erā eropa arīquerecū ta erāre peebirīcāque. ²⁴ Bupu umarore guñaña mariro miaro dopa ta guñaña mariro arigūca yuhū masū Goāmu Īgu obeodigu dujarigu.

²⁵ Ire yū iiboro core yuhū turaro ñero tarigūca. Eropirā yure dohpague majarā gamesome. ²⁶ Noé Īgu árīrasubū majarā erā árīmuridiro dopa ta yuhū masū Goāmu Īgu obeodigu yū dujariboro coregā eropa ta árīrācoma masa. ²⁷ Noé Īgu árīrasubure árīpehrerā masa eropa baha, ihri iñūma. Eropirā mojoto dirimuriñuma. Noé wuadiru dohodirugue Īgu ñajaboro core Goāmu erāre Īgu miupehoboro core iri árīpehrerire masa muraro ta iiniguicāmuriñorā. Eropa árīroca yū dujaricū sāre. ²⁸ Lote Īgu árīrasubū majarā sā erā árīdiro dopa ta yū dujaricū árīrācoma masa. Lote Īgu árīrasubure masa baha, ihri, asū, dua, ote, wirire iñūma. ²⁹ Erā eropa iirisubū Īgu ya macare Sodoma waīcūri maca Lote Īgu waranū umaro maja peame ũju dijari erāre wejēpehocāyoro. ³⁰ Yuhū masū Goāmu Īgu obeodigu yuhū guñaña mariro yū dujaricū eropa ta waroca irisubure.

³¹ “Irisubure yujugu Īgu ya wihi weca maja puague árīgu wihi pohecague Īgu yare aīgu ñajabiricāporo pobero mera duhriboro dopa. Eropigu pohegue árīgu sā irisubure Īgu ya wihigue piharibiricāporo.

³² Lote marapo igo warare guñaque. ³³ Īgu ya árīburi dihtare yujugu guñaqu peamegue wagūcumi Īgu. Yaha árīburipure yujugu guñaqu árīpehrerinuri Goāmu mera ōaro árīgūcumi, arīpu Jesu.

³⁴ “Yuhū muare werea. Irisubure yure umupeorāre beye game-neodoregūca. Eropigu eropa wari ñamire yuju camare perā carīcū yujugure yure umupeogure aīrācoma yū mera árībure. Gajigu yure umupeobigu ero dujagūcumi. ³⁵ Eropa ta nome perā erā ya ojodūcare erā biucū yujugore aīrācoma. Yujugo ero dujagocumo. ³⁶ Eropigu perā poheguere mohmerā árīcū yujugure aīrācoma. Yujugu ero dujagūcumi, arīpu Jesu.

³⁷ “Yuhū muare werea. Irisubure yure umupeorāre beye game-neodoregūca. Eropigu eropa wari ñamire yuju camare perā carīcū yujugure yure umupeogure aīrācoma yū mera árībure. Gajigu yure umupeobigu ero dujagūcumi. ³⁸ Eropa ta nome perā erā ya ojodūcare erā biucū yujugore aīrācoma. Yujugo ero dujagocumo. ³⁹ Eropigu perā poheguere mohmerā árīcū yujugure aīrācoma. Yujugu ero dujagūcumi, arīpu Jesu.

⁴⁰ “Yuhū muare werea. Irisubure yure umupeorāre beye game-neodoregūca. Eropigu eropa wari ñamire yuju camare perā carīcū yujugure yure umupeogure aīrācoma yū mera árībure. Gajigu yure umupeobigu ero dujagūcumi. ⁴¹ Eropa ta nome perā erā ya ojodūcare erā biucū yujugore aīrācoma. Yujugo ero dujagocumo. ⁴² Eropigu perā poheguere mohmerā árīcū yujugure aīrācoma. Yujugu ero dujagūcumi, arīpu Jesu.

⁴³ “Yuhū muare werea. Irisubure yure umupeorāre beye game-neodoregūca. Eropigu eropa wari ñamire yuju camare perā carīcū yujugure yure umupeogure aīrācoma yū mera árībure. Gajigu yure umupeobigu ero dujagūcumi. ⁴⁴ Eropa ta nome perā erā ya ojodūcare erā biucū yujugore aīrācoma. Yujugo ero dujagocumo. ⁴⁵ Eropigu perā poheguere mohmerā árīcū yujugure aīrācoma. Yujugu ero dujagūcumi, arīpu Jesu.

⁴⁶ “Yuhū muare werea. Irisubure yure umupeorāre beye game-neodoregūca. Eropigu eropa wari ñamire yuju camare perā carīcū yujugure yure umupeogure aīrācoma yū mera árībure. Gajigu yure umupeobigu ero dujagūcumi. ⁴⁷ Eropa ta nome perā erā ya ojodūcare erā biucū yujugore aīrācoma. Yujugo ero dujagocumo. ⁴⁸ Eropigu perā poheguere mohmerā árīcū yujugure aīrācoma. Yujugu ero dujagūcumi, arīpu Jesu.

⁴⁹ “Yuhū muare werea. Irisubure yure umupeorāre beye game-neodoregūca. Eropigu eropa wari ñamire yuju camare perā carīcū yujugure yure umupeogure aīrācoma yū mera árībure. Gajigu yure umupeobigu ero dujagūcumi. ⁵⁰ Eropa ta nome perā erā ya ojodūcare erā biucū yujugore aīrācoma. Yujugo ero dujagocumo. ⁵¹ Eropigu perā poheguere mohmerā árīcū yujugure aīrācoma. Yujugu ero dujagūcumi, arīpu Jesu.

⁵² “Yuhū muare werea. Irisubure yure umupeorāre beye game-neodoregūca. Eropigu eropa wari ñamire yuju camare perā carīcū yujugure yure umupeogure aīrācoma yū mera árībure. Gajigu yure umupeobigu ero dujagūcumi. ⁵³ Eropa ta nome perā erā ya ojodūcare erā biucū yujugore aīrācoma. Yujugo ero dujagocumo. ⁵⁴ Eropigu perā poheguere mohmerā árīcū yujugure aīrācoma. Yujugu ero dujagūcumi, arīpu Jesu.

37 Īḡu eroparīcū ĭḡu buherāpū serēpiñorā.

—¿Nohogue eropa warocuri? arī serēpiñorā erā.

Erā eroparīcū Jesu yuhrīpū:

—Masa erā ñeri erā iinigiurogue, erogue Goāmū erāre erā ñeri dipuwaja moagacumi, arīpū Jesu.

18

Wapeweyo igo dipuwaja moadorera queorire werepū Jesu

¹ Eropi Jesu erāre Goāmūre serēburire wereḡu ōpa arīpū:

—Mūa Goāmūre serērā coreque ĭḡu yuhrīborore. Yoari boje corequererā ta bujawerebircāque. Īḡure serērā duhubita, arīpū Jesu.

² Īḡu eropa arīrare buhebu i queori mera werepū erāre:

—Gaji macague masare dipuwaja moadoreḡu árīpū. Īḡu Goāmūre umupeobirīpū. Eropīḡu masa sāre umupeobirīpū. ³ Eropīḡu wapeweyo sā erogue árīpo. Iḡo ĭḡu pohrogue duraro curīḡo ōpa arīpo: “Yūre ĭhaturīḡure dipuwaja moadoreque muḡu. Yūre arī cāhmotaque,” arī serēnīguicāpo iḡo ĭḡure. ⁴ Iḡo eroparīcū ĭḡu bajasuburi “ĭisome yuḡu,” arīrīpū iḡore. Īḡu eropa arīquerecū ta iḡo bajasuburi ĭḡure eropa serēnīguicāḡo garibotariaro iipo. Iḡo garibocū ĭaḡu ōpa arīpū ĭḡu basi. “Yūḡu Goāmūre masa sāre umupeobea. ⁵ Yū eropa umupeobīḡu arīquerecū ta iḡopū yure garibotarīcāmo. Yūre eropa garibogo yure gariboreacū iicumo yure. Iḡo eropa arī weresānīguicū iḡore ĭhaturīḡure dipuwaja moadoreḡura,” arīpū dipuwaja moadoreḡu, arīpū Jesu.

⁶ Eropā arīḡu Jesu erāre werenemopū:

—Eropā arīpū ĭḡu ñeḡu dipuwaja moadoreḡu. Īḡu eropa arīrare guñaque mūa. ⁷ Īḡu tauro Goāmūpū ĭḡu yarāre umuri nuḡu ĭḡure serērāre itamugacumi. ⁸ Mūare arīḡu tiāa. Goāmū erāre mata iḡucumi erā serērare. ¿Īḡu eropa yuhrīḡu ĭḡu árīcū ta yuḡu masu Goāmū ĭḡu obeodīḡu i yebague dujarīḡu, Goāmūre umupeorāre ĭḡure serērāre bocagacuri yuḡu? arīpū Jesu.

Perā Goāmū mera erā werenīguira queorire werepū Jesu

⁹ Eropi gaji queori mera werepū Jesu. “Guapū ōarā āhraa. Gajirāpū ñero iirā āhrīma,” arī pepirāre i queori mera ōpa arī werepū:

¹⁰ —Goāmū ya wihīḡue perā ūma Goāmū mera werenīguirā wañorā. Yujugū fariseo masu árīpū. Gajīḡu wajasea coreḡu árīpū. ¹¹ Eropīḡu fariseo masupū nuḡaja, ōpa arī serē nīḡupū Goāmūre: “Yūḡu guya yajarīcūḡu, díaye iībīḡu, nome mera ñero iḡu árībeaa. Gajirā iro dopa árībeaa. ĭhī wajasea coreḡu iro dopa ñeḡu árībeaa. Eropīḡu mūre Goāmūre ōhaa, arāa. ¹² Yūḡu semanari nuḡu mū ya árīburire iḡu pesubu ba duhua. Eropīḡu diez niyeruserire wajatagū yujuse mūre ohoa,” arīpū fariseo masu Goāmūre. ¹³ Eropīḡu wajasea coreḡupū yoarogue nīḡuḡu muhri siunūḡaja, ĭḡu ñerire bujawere, umarogue ĭabirīpū. Īḡu ñerire bujaweredīḡu árīḡu ĭḡu coretībī pa, werenīḡupū Goāmūre: “Goāmū, yuḡu ñeḡu āhraa. Eropīḡu muḡu yure mojomoro ĭaque,” arīpū ĭḡu Goāmūre. ¹⁴ Eropīḡu mūare arīḡu iāa. ĭhī wajasea coreḡupū ĭḡu wihīḡue ĭḡu dujagū ĭḡu ñerire Goāmū mera cóādīḡu dujapū. Gajīḡu fariseo masu ĭḡu ñerire cóādīḡu árībīrīpū. “Yūḡu ōaḡu āhraa,” arīḡu Goāmū ĭḡu ĭacū

ñegu árîmi. “Yuhu ñegu ãhraa. Eropigu yu ñerire bujawerea,” arîgure Goãmu ðagu iigucumi ïgure, arîpu Jesu.

Majirãgã ya árîburire Goãmure serêbasapu Jesu
Mt 19.13-15; Mr 10.13-16

¹⁵ Eropi masa erã porã majirãgãre Jesure mohmepiñadoremorã ïgu pohrogue aï erariñorã. Erã eropiicũ iarã Jesu buherã erãgãre aïrarãre turiñorã. ¹⁶ Erã eropa turicũ ïagu Jesu majirãgãre sihubeopu ïgu pohrogue. Sihubeo ðpa arîpu ïgu ïgu buherãre:

—Majirãgã yu pohrogue aripuro. “Waque,” arîbita erãgãre. Erãgã Goãmure erã opu iro dopa pepima. Eropirã Goãmũ ïgu opu árîroguere oãgã iro dopa pepirã ãhrama eroguere. ¹⁷ Diaye arîgu iiaa muare. Oãgã Goãmure erã gamediro dopa ta mua Goãmure gamebirã ïgu pohrogue wasome mua. Mua wabiricũ mua opu árîsome ïgu, arîpu Jesu.

Doberi opagu Jesu mera werenigupũ
Mt 19.16-30; Mr 10.17-31

¹⁸ ïgu eropa arîra puhru judio masa oparã mera majagu Jesure serêpi erapu.

—Ne ðagu, buhegu ãhraa muhu. ¿Yu árîpehrerineri Goãmũ mera árîdiagu dohpa iigucuri yuhu? arîpu ïgu.

¹⁹ ïgu eroparicũ Jesu yuhripu:

—¿Dohpa arîronore yure “Oãgu,” arî piyuri muhu? Goãmũ dihta ðagu ãhrimi. ²⁰ I Goãmũ dorerire masia muhu. “Gajigu marapo mera árîbircãque. Masare wejêbircãque. Yajabircãque. Guyabircãque. Mu pagu sumarãre umupeoque,” arî doremi Goãmũ. Eropigu irire iique muhu, arîpu Jesu.

²¹ ïgu eroparicũ ïgu Jesure yuhripu:

—Iri árîpehrerire majigugãque ta iibu yuhu, arîpu ïgu.

²² ïgu eroparicũ peegu Jesu ïgure ðpa arî werepu:

—Yujuñe dihta duhyaa mure mu iiboro. Árîpehreri mu yare duagu waque. Eropa iigu árîpehreri niyeru mu wajatarire mojomorocurãre oque. Mu eropa iicũ wuaro mu ya ðari muhu opaburire umaroguere Goãmũ pohrogue arîroca. Eropa iituha yu mera majagu árîbu arique, arîpu Jesu ïgure.

²³ ïgu eroparicũ peegu ïgupu baja doberi opagu arîgu irire mojomorocurãre odiabigu, turaro bujawere waha wapu. ²⁴ ïgu eropa bujawerecũ ïagu Jesu ðpa arî werepu gajirãre:

—Doberi oparãre Goãmũ ïgu opu árîroguere erã wacũ diasataria.

²⁵ Camello waicugu waibugupu ïgupu awiru gobegãque ïgu ñajacũ masiya mara ïgure. Eropa ta doberi opagu Goãmũ mera ðaro arîgu ïgu opu árîroguere wacũ diasataria, arîpu Jesu.

²⁶ ïgu eroparicũ ïgure peerã ðpa arîñorã:

—Cue. Mu arîro dopa ta diaye arîcũ, ne yujugu masure Goãmũ taubiribocumi ïgu pohro waborore, arîñorã erã Jesure.

²⁷ Erã eroparicũ Jesu yuhripu:

—Masa erã bocaturo erã ðaro iira mera Goãmũ pohrogue wama-sibeama. Goãmupu masare peamegue wabonirãre taumasimi. ïgu árîpehrerire ðaro iimasipehocãmi, arîpu Jesu erãre.

²⁸ ïgu eroparicũ Pedro ïgure ðpa arîpu:

—Peenique. Gua árîpehreri gua yare apicâbu mu mera warã, arîpu îgu Jesure.

²⁹ Îgu eroparîcû Jesu ôpa arîpu:

—Diaye mûare arîgu iiaa. Árîpehrerã mua Goãmû yare iimorã mua wirire, mua marasã nomere, mua pagu porãre, mua pagu sumarãre, mua porãre mua apinirã mua wûaro wajatarãca dohpaguere. ³⁰ Mua apidiro tauro wajatarãca. Eropirã mua sîrira puhru árîpehrerinûri Goãmû mera árîrãca mua, arîpu Jesu erãre.

*Dipaturi Jesu îgu sîriburiñere îgu masa mûriaburiñere werepu
Mt 20.17-19; Mr 10.32-34*

³¹ Eropi doce îgu buherã dihtare aîgã erãre werepu:

—Peeque yure. Dohpaguere mari Jerusalengue warã iiaa. Eroque yure Goãmû îgu obeodigure Goãmû ya weremuhtanirã iribojegue erã werediro dopa ta eropa waroca yure. ³² Ero masa yure ñeha, judio masa árîbirãre orãcoma yure. Yure erã ora puhru erã yure wereya, ñero arî, disico ehosûrãcoma. ³³ Eropirã yure tãratuhaja wejêrãcoma yure. Eropigu ya sîrira puhru uhrenu waboro masa mûriaguca yuhu, arîpu Jesu erãre.

³⁴ Îgu eroparîcû îgu buherã îgu wererire ôaro pee masibiriñorã. Goãmû irire erãre masicû iibirinipu dohpa.

*Cuiri îhajabigure îhajacû iipu Jesu
Mt 20.29-34; Mr 10.46-52*

³⁵ Eropi Jesu sã Jericó waïcari maca pohrogue ejañorã. Îgu wari maha tãrogue yujugu masu cuiri îhajabigu doapu. Niyeru serêgu iipu.

³⁶ Eropigu masa bajarã îgu pohro aricû peegu serêpipu ero árîrãre.

—¿Duhpirã masa bajarã tarigãri? arî serêpipu îgu.

³⁷ —Jesu Nazare majagu arigu iimi, arîñorã gajirã îgure.

³⁸ Erã eropa arî werecû peegu îgu gaguiniguinagapu:

—Jesu, opu Davi mûru pãrami masare taubu, yure mojomoro ñaque, arî gaguiniguipu Jesure.

³⁹ Îgu eroparîcû îgu pohro árîrãpu “Ejarimaricãque,” arî turiñorã îgure. Erã eropa arî turiquerecã ta îgu ero core îgu gaguiniguidiro tauro gaguiniguinemopu daja.

—Opu Davi mûru pãrami, yure mojomoro ñaque, arî gaguiniguipu îgu.

⁴⁰ Îgu eropa gaguiniguicû peegu Jesupu nûgaja, “Sihubeoque îgure,” arîpu. Îgu eroparîcû erãpu cuiri îhajabigure sihugãñorã. Erã eropa sihugãcû îgu Jesu pohrogue îgu ejacû Jesupu îgure serêpipu:

⁴¹ —¿Dohpa yu iicû gahmeri mûhu? arîpu Jesu.

—Yu Opu, yure ñacû iique, arîpu cuiri îhajabigu.

⁴² —Ñaque pare. Yure umupeonijagu, ôagu wahaa mûhu, arîpu Jesu îgure.

⁴³ Îgu eroparîcû ta cuiri îhajabigu ôaro îha wapû. Eropa ôagu wanijagu îgu Jesu mera wapû. “Goãmû turagu àhrimi,” arî umupeopu îgu. Eropirã masa bajarã cuiri îhajabiridigu îgu ôagu wacû ñarã, “Goãmû ôagu, turagu àhrimi,” arî umupeoñorã erã sã.

1 Eropii Jesu Jericógue eja, iri macague tarigābu iipū. 2 Doberi opū Zaqueo waīcūgu wajasea corerā opū ero arīpū. 3 Eropigu īgu Jesure “¿Nihino arīcuri?” arī īha masibu Jesure ĩadiaripū. Eropa īgu ĩadiaquerecū ta īgu yebagugā arīcū masa bajarā īgugāre cāhmotacāñorā. 4 Eropigu īgu masare omatarigā wa, sicómoro waīcudigu yucugugue mūribejapū Jesure ĩabu. Pūhrū ñarigā Jesu irigu pohro tarigābu iipū. Eropigu Zaqueo irigugue coregu iipū. 5 Īgu eropa corero watope Jesupū irigu gubuye ejanugaja, Zaqueore ĩhamuju īgure werepū:

—Zaqueo, dohpaguere mū ya wihi dujagara. Eropigu duru dijarique, arīpū Jesu.

6 Īgu eroparīcū Zaqueopū umūdiaro mera dijari, mucubiriri mera īgu ya wihigue aridorepū Jesure. 7 Īgu eropa bocatīricū īha, masa arīpehrerā erā basi ōpa arī wereniguiñorā:

—Īhī Jesu ñegu ya wihigue curigu wadiami, arī wereniguiñorā arīpehrerā masa erā basi.

8 Zaqueopū bocatīrituha ero nigui, Jesure werepū:

—Opū, peeque yure. Arīpehreri yahare deco mera mojomorocurāre ogura. Eropigu yūhu gajigure cien niyuserire guya aīdigū arīgu, cuatro cientos niyuserire wajayenemogura īgure, arīpū Zaqueo Jesure.

9 Īgu eroparīcū Jesupū werepū īgure:

—Dohpagāre mure mū ya wihi arīrā sāre peamegue wabonirāre Goāmū tautuhami. Mū sā Abrahā mūru acaweregu ta āhraa. 10 Yūhū masū Goāmū īgu obeodigu peamegue wabonirāre amagu arīgu iibū. Erogu wabonirāre ōaro taugu arīgu iibū, arīpū Jesu Zaqueore.

Niyuseri oroseri queorire werepū Jesu

11 Eropi īgure peerāre Jesu queori mera werepū daja. Merogā dūhayoro Jerusalēngue īgu ejaboro. Eropirā īgure peerā ōpa arī pepirñorā: “Goāmū dohpaguere opū arīnugabu iimi,” arī pepirñorā erā.

12 Erā eropa arī pepicū Jesu i queorire ōpa werepū erāre:

—Yujugū gajī yebague yoarogue wabu iīñumi. Eroguere ero majagu erā tauro opū arīgu īgure īgu ya maca majarā opūre acucū wabu iīñumi. Pūhrū īgu ya wihigue dujarabu iīñumi. 13 Nere īgu waboro corere diez mohme corerāre sihubeoñumi. Eropa sihubeogu, īgu erāre yujurāyerire yujuse niyuseri orosere oñumi. Otuha wereñumi erāre: “Yū maricū i niyeru mera mūa wajatanemoburire amaque,” arīñumi īgu mohme corerāre. 14 Īgu ya yeba majarāpū īgure gamebiriñuma. Eropa gamebirā īgu opū arību wara pūhrū gajirāre īgure weredorerā obeoñuma. “Mūhū gua opū arīcū gamebeaa gua,” arīñuma erā weredorenirāpū. 15 Eropa erā gamebiriquerecū ta pūhrū erā opū ñajañumi īgu. Eropa opū ñajatuha, īgu īgu ya wihigue dujariñumi. Eropa dujaragu īgu mohme corerāre īgu niyeru mera erā wajatanemorare masibu, erāre sihubeoñumi. 16 Īgu eropa sihubeora pūhrū, eramūhtagū īgure wereñumi: “Opū, mū niyuseri, mū yure orase mera diez seri wajatanemoabu yūhū,” arīñumi mohme coregu īgu opūre. 17 “Ōaro iibū mūhū. Ōagu mohme coregu āhraa. Mū merogā mera yū dorero dopa iipehogū arīgu dohpague diez macari majarā erā opū arību waguca mūhū,” arīñumi opū mohme coregu. 18 Īgu pūhrū eragu īgu mera majagu ōpa arīñumi: “Opū, mū niyuseri, yure mū orase mera cinco seri wajatanemoabu yū sā,” arī wereñumi īgu opūre. 19 “Cinco macari majarā opū waguca mūhū,” arīñumi

ĩgu opu ĩgure. ²⁰ ĩgu eropa arĩra puhru gajigu mohme coregu eraa werepu: "Opu, mu niyeruse ohõ ahraa. Suhri gasiro mera oma, irisere dihbuabu. ²¹ Mũhu turaro mohmedoregu ahraa. Eropigu gajirãre mohmedorequeregu oteri moogu arĩqueregu ta mu dihta iri dũcare aĩa. Eropigu mure güiabu," arĩnumi ĩgu opure. ²² "Mu yure eropa arĩgu ñegu ahraa. Yure mu eropa arĩri dipuwajare dipuwaja moagura yũhu. Yũhu mure turaro mohmedoregu arĩcũ muhu yure masia. Gajirã yare yũhu aĩcũ yũhu otebirira arĩquerecũ iri dũcare yũ aĩgu arĩcũ masituhabu muhu. ²³ ¿Yũ eropa arĩcũ ĩaqueregu duhpiгу yũ orasere niyeru diburi wihigue dibubirari muhu? Irire erã wayura waja wajatanemoboaya muhu. Irire mu icũ dujaragu wajatanemoboaya yũ sã," arĩnumi erã opu. ²⁴ Eropa arĩtuha ĩgu pohro niguirãre doreñumi: "Niyeruserere emaque ĩgure. Diez seri opagure oque," arĩnumi ĩgu opu. ²⁵ ĩgu eroparĩcũ erãpu wereñuma ĩgure: "Opu, diez seri opaga baja opatuhami," arĩnuma erã ĩgure. ²⁶ Erã eroparĩcũ opu yuhriñumi: "Mũare arĩgu iia. Arĩpehrerã wuaro oparãre onemogura. Moorãpũre merogã erã opaquerecũ ta erãre emagura. ²⁷ Dohpague tamerare yure ĩhaturirãre yure erã opu arĩdorebirinirãre yũ pohro aĩgãrique. Eropirã yũ ĩaro wejẽcãque erãre," arĩnumi opu ĩgu mohme corerãre, arĩ werepu Jesu.

Jerusaléngue ejaпу Jesu

Mt 21.1-11; Mr 11.1-11; Jn 12.12-19

²⁸ Eropa arĩtuha Jesu gajirã core Jerusaléngue wagu iipu. ²⁹ Jerusaléngue ejaboro coregã Olivo waĩcũdigu utãgu gubuyegue ejañorã pe maca arĩrogue. Yuju maca Betfagẽ gaji maca Betania waĩcũyoro. Eroque ejaгу ĩgu buherã mera majarãre perãre obeogu Jesu õpa arĩpu: ³⁰ —Si macague waque. Ero ejarã, burrogãre erã dirinugudigure bocajarãca. Gajirã ĩgure ne peyanibeama dohpa. ĩgure bocarã, ĩgure diriradare pã, aĩgãribasaque yure. ³¹ Mua eropa icũ ĩagupu: "¿Duhpirã burrore pãri?" ĩgu arĩcũ peerã õpa arĩ yuhrique ĩgure: "Mari tĩgu burrore gamebeoniami dohpa," arĩ wereque ĩgure, arĩ weredore obeopu ĩgu buherãre perãre.

³² ĩgu eroparĩcũ erã perãpu ĩgu obeodiroque ejañorã. Erã eropa ejaцũ Jesu arĩpehreri ĩgu erãre arĩdiro dopa ta eropa wayoro. ³³ Eropirã burrogãre erã pãcũ ĩugãrã oparã serẽpiñorã erãre:

—¿Duhpimorã diriradare pãri burrogãre? arĩ serẽpiñorã erã.

³⁴ —Mari tĩgu burrogãre gamebeoniami, arĩ yuhriñorã erã.

³⁵ Eropirã ĩugãrã burrogãre Jesu pohroque aĩ ejañorã. ĩugãrã aĩ ejatuhaja erã weca maja suhrire ĩgu weca duhpeñorã. Eropirã ĩgu weca Jesu ĩgu muribejacũ itamuñorã erã Jesure. ³⁶ Jesu ĩgu weca ĩgu peyagu wacũ erã masa erã weca suhri sañari suhrire tuwea aĩ mague seõpi muhtañorã ĩgu core. ³⁷ Eropirã Jerusalén pohroque eja, Olivo waĩcũdigu dijariri mague ejañorã. Eroque ejarã Jesu buherã bajarã arĩpehrerire ĩgu deyoro moarare, ĩgu õari ĩgu iirare erã ĩarare guña mucubiri Goãmure õaro wereniguinũgañorã. Goãmure "Õagu, turagu ahrimi," arĩ gaguiniguiñorã. Eropirã burigã gaguinigui Goãmure umupeo õpa arĩñorã:

³⁸ —ĩre umupeorã. ĩhĩ Goãmũ ĩgu obeodigu, mari Opu õaro arĩporo. ĩmaro majarã õaro arĩporo. Goãmũ ĩgu turagu arĩcũ arĩpehrerã masiporo, arĩ umupeoñorã erã.

³⁹ Erã eroparicũ peerã fariseo masa bajamerãgã erã watope árĩrã Jesure wereñorã:

—Buhegu, mu buherãre ejarimaricãdoreque, arĩñorã erã.

⁴⁰ Erãre yuhripu Jesu:

—Muare arĩgu tiãa. Oã yare umupeorã erã wereniguibiricũ utãyeripu yare umupeoro dopa ta gaguiniboca, arĩpu Jesu erãre fariseo masare.

⁴¹ Eropa arĩtuha Jesu Jerusalén pohrogue eja, iri macare ñhabeogu orepu. ⁴² Ōpa arĩpu ñgu:

—Jerusalén majarã, dohpague tamerare muare ñaro arĩburire mua masicũ ñatariaboya. Eropa arĩquerecũ mua dohpaguere irire ne peediabirabu. Eropigu Goãmu muare irire masidorebirimi. ⁴³ Muare ñhaturirã mua árĩri macare cãhmotarãcoma. Eropa iirã erã muare wiriãro iisome. ⁴⁴ Irisubu erã mua ya macare cóãpehorãcoma. Muare mua porã sãre wejẽrãcoma. Muare ñhaturirã ñaro weasirirãcoma mua ya macare. Goãmu peamegue wabonirãre muare ñgu taubure yare mua masidiabirabu. Mua masidiabirira dipuwaja muare ñhaturirãre Goãmu cóãdoregucumi mua ya macare, arĩpu Jesu Jerusalén majarãre.

Goãmu wihigue eja pu Jesu

Mt 21.12-17; Mr 11.15-19; Jn 2.13-22

⁴⁵ Eropi Jerusaléngue eja pu, Jesu Goãmu wihigue ñaja wapũ. Eropigu doberi duarãre iri wihigue bocajagu, erãre cohã wiucãpu. Ōpa arĩpu ñgu erãre:

⁴⁶ —Goãmu yare erã gojarapũ ñpa ñhraa: “Goãmu arĩmi: Yaha wihi Goãmu mera wereniguiri wihi waicuroca,” arĩñuma ñgu yare erã gojarapũ. ñgu eropa arĩquerecũ ta muapu i wihire Goãmu wihire duadoarã bu game yajarã iiaa, arĩpu Jesu.

⁴⁷ Ūmuri nuçu Goãmu wihigue Jesu buhepu. Eropirã pahia oparã, judio masare buherã mera, masa oparã sã, ñgure erã wejẽburire guñamaañorã.

⁴⁸ Masa arĩpehrerã ñgure eropa peenigui, ñgu buherire ñaro peenurãrã arĩñorã. Erã eropa ñaro peenuracũ Jesure wejẽdiarãpu ñgure erã wejẽburire bocabirĩñorã.

20

Jesure doredigure ñgure serẽpiñorã

Mt 21.23-27; Mr 11.27-33

¹ Gajinu Goãmu wihigue Jesu masare ñari buherire buhegu iipu. ñgu eropa buhecũ pahia oparã, judio masare buherã, murã mera ñgu pohrogue erarã, ñgure serẽpiñorã:

² —Wereque guare. ¿Noa doreri mera eropa iiri muhu? ¿Nihino mure Goãmu wihigue arĩnirãre cóãdoreari? arĩñorã erã Jesure.

³ Erã eroparicũ Jesu yuhripu erãre:

—Yuhu muapure serẽpimãtagura. Wereque yu sãre. ⁴ ¿Ñu masare ñgu waĩyecũ nihinopu ñgure waĩyedoremuriyuri mua pepicũ? ¿Goãmu doreyuri? ¿O masapu doremuriyuri? arĩ serẽpipu erãre.

⁵ ñgu eroparicũ erãpu erã basi game wereniguñorã:

—¿Dohpa arĩ yuhrirãcuri mari? “Goãmu Ñure doredigu arĩmi,” mari arĩcũ, “¿Goãmu Ñure ñgu dorequerecũ ta duhpirã ñgu wererare peebirari mua?” arĩbocumi Jesu marire. ⁶ Oã masapu “Diaye ta Ñu Goãmu yare weremuhtadigu arĩmi,” arĩ pepima erã. Erã eropa arĩ pepirã maripu

“Ñu ĩgu waĩyecuĩ Goãmũpu ĩgure dorebiridigu árĩmi,” mari arĩcũ masapu marire utã mera dearãcoma, arĩ wereniguiñorã erã erã basi. ⁷ Eropã arĩ wereniguituha erã Jesure yuhriñorã:

—Ñure waĩyedoredigure gua masibeaã, arĩñorã erã.

⁸ Erã eroparĩcũ Jesu yuhripũ:

—Irisubu tamerare yũ sã yũre doredigure werebeã mãare, arĩpu ĩgu erãre.

Ñerã mohme corerã iira queorire werepu Jesu

Mt 21.33-44; Mr 12.1-11

⁹ Eropi Jesu queori moã õpa arĩ buhenũgapu masare:

—Yeba opu árĩñumi. ĩgu ya pohere ĩgure oteñumi. Otetuha, iri pohere gajirãre deco mera apĩñumi erã mohme corera waja. Eropã apĩgu erãre iri pohere ĩhadibudoretuhaja gajĩ yebague waha wañumi. Yoari boje deyobiriñumi. ¹⁰ Eropĩgu ĩgui ñirisubu arĩcũ pohe opu ĩgu pohro majagure pohere mohme corerã pohrogu obeoñumi. Põhe maja ĩgu oteri ðucare ĩgu ya sero majare aĩdoregu obeoriñumi. Eropirã pohere mohme corerãpu ĩgu pohro majagure bocatĩri pañuma ĩgure. Eropirã erã ĩgure ĩguitõrĩre obiriquererã dujadoreñuma ĩgure. ¹¹ Eropĩgu pohe opu gajĩgu ĩgu pohro majagure iri pohe maja ðucare aĩdoregu obeoriñumi daja. Eropirã pohere mohme corerã ĩgu sãre pa ñero iĩñuma ĩgure. Eropã iĩtuha ĩgu iri ðucare obiriquererã dujadoreñuma daja. ¹² ĩgure erã eropã iira puhũ gajĩgu pohro majagure obeoriñumi daja. Eropirã mohme corerã daja ĩgure camĩ moã, iri pohe tũro cóãcãñuma ĩgure.

¹³ “Erã eropã iira puhũ pohe opu õpa arĩ pepiriñumi: “¿Dohpa iigũcũri yuhũ? Õpa iigũra. Yuhũ yũ magure yũ mahĩgure obeogura. Erã ĩgure umupeobocoma,” arĩ pepiriñumi pohe opu. ¹⁴ Eropirã ĩgu magure ĩgu obeodigu ejacũ ĩarã mohme corerãpu erã basi õpa arĩ wereniguiñuma: “Ihĩ pohe opu magu ãhrimi. ĩgure wejẽrã. Eropiro i pohe mari ya pohe ðujaroca,” arĩñuma erã erã basi. ¹⁵ Eropã arĩtuha pohe opu magure ñehã pohe tũro aĩgã, wejẽcãñuma ĩgure. ¿Ne pohe opu ðujaragu dohpa iigũcũri ĩgu ya pohere mohme corerãre? arĩpu Jesu.

—Õpa iigũcũmi erãre. ¹⁶ ĩgu pohere mohme corerãre wejẽgu, gajirãpũre pohere mohme coredoregũcũmi, arĩ yuhripũ Jesu ĩgu basi.

ĩgu eroparĩcũ peerã masapu õpa arĩñorã:

—Marire eropã wabiricãporo, arĩñorã erã.

¹⁷ Erã eroparĩcũ Jesupu erãre ĩha serẽpipũ:

—¿Goãmũ yare erã gojarapũre õpa arĩra dohpa arĩro iiri mãã pepicũ? Ihĩ Cristo utãye iro dopa ta ãhrimi. Masa Cristore gamebirãcoma. Erã ĩgure gamebiriquerecũ Goãmũ ĩgure beye erã opu erãre taubũ acumi, arĩ gojañuma.

¹⁸ Yũre gamebirãpu yũ dipuwaja moamorã árĩrã ñero tarirãcoma, arĩpu Jesu erãre.

Oparã ya wajare wajayeburire gajirã serẽpiñorã Jesure

Mt 21.45-46; 22.15-22; Mr 12.12-17

¹⁹ ĩgu eroparĩcũ peerã judio masa buherã, pahia oparã sã “Jesu iri pohe opu queori mera ‘Erã ñerã mohme corerã iro dopa ãhrima,’ arĩgu marire weresãgu iicumi ĩgu,” arĩ pepiñorã erã.

Eropã arĩ pepirã erã Jesure ñeadiariñorã. Eropã ñeadiaquererã ta masa Jesure gamerã mari mera guari arĩrã erã masare gũĩ arĩñorã.

²⁰ Eropã gũirã Jesure erã ñeaburĩsubure corerã ĩgure ĩhanũñorã.

Īgu ñero arī yuhricū ĩadiarā iiriñorā ĩgure weresāmorā. Eropirā Jesure gajino serēpidorerā obeoñorā guyarāre. Erāre diaye iirā dopa wereniguidoreñorā. Jesu ñero ĩgu werenicū peerā iri yeba majagu opure peresu iidoremorā iiriñorā. ²¹ Eropirā erā Jesure serēpiñorā:

—Buhegu, diaye wereniguigu, guyarī marigu mā árīcū gua masia. Eropigu opu árīcū säre ĩgu bu árīgu ĩgu árīcū säre yujuropa ĩhaa muñu. Muñu Goāmu yare diaye mā buhecū säre gua masia. ²² Wereque guare: ¿Roma majagu árīpehrerā tauro opu árīgure gobierno majare marire wajayero gahmeri mā pepicū? ¿Mari doreripu irire wajayedoreri? arīñorā erā Jesure.

²³ Erā eroparīcū Jesu erā ñero iidiarire masigu erāre werepu:

—¿Duhpirā yu ñero wereniguicū peediarī mua? ²⁴ Dohparagā niyerusere aĩrique. Irisere ĩarā, arīpu.

Irisere erā aĩ eracū ĩagu ōpa serēpipu Jesu:

—¿Nihino gohra waĩcuğu masu tuhyari irisere? ¿Noa waĩ tuhyari? arī serēpipu Jesu erāre.

—César, masa tauro opu waĩ ĩgu masu sã tuhyami iriseguere, arī yuhriñorā erā.

²⁵ Erā eroparīcū Jesu werepu:

—Irisubu tamerare masa tauro opure ĩgu yare oque. Goāmu yapure Goāmure oque, arīpu Jesu erāre.

²⁶ Eropirā masa erā peero Jesure ñero arī wereniguicū iimasibiriñorā erā. Eropirā erā Jesu yuhririre peerā erā peemaria wañorā. Eropa peemariarā, ejarimaria wañorā.

Saduceo masa Goāmu ĩgu sīrinirā masurire serēpiñorā Jesure

Mt 22.23-33; Mr 12.18-27

²⁷ Eropi bajamerāgā Saduceo masa Jesu pohrogue erañorā. “Goāmu sīrinirāre masusome,” arī pepirā árīñorā Saduceo masa. Eropirā erā ōpa arīñorā ĩgure:

²⁸ —Buhegu, marire ōpa arī gojañumi Moise: “Yujugu ĩgu tīgu marapocuğu porā mariqueregu ta ĩgu sīricū ĩagu ĩgu pagu magure ĩgu tīgu marapo árīdigore marapocuro gahmea. Eropa iigu ĩgu tīgu muru ĩgu porācubodiro dopa ta porācuro gahmea ĩgu pagu magure. Eropirā ĩgu tīgu muru porā iro dopa árīrācoma,” arīpu Moise, arīñorā erā.

²⁹ Irire arītuha i queorire werenemoñorā erā Jesure:

—Yujugu porā siete árīñorā. Erā tīguþu marapocu porā sīria wapu. ³⁰ Eropigu gajigu ĩgu pagu magu sã ĩgu tīgu marapo árīdigore ta marapocupu. ĩgu eropa marapocura puñru ĩgu tīgu muru iro dopa ta ĩgu sã porā mariqueregu ta sīria wapu. ³¹ Eropigu ihī pagu magu sã ĩgu tīgu muru iro dopa ta porā mariqueregu sīria wapu. Eropa dihta wañorā yujugu porā gohra. Ne porā mariquererā ta sīripehrea wañorā. ³² Erā marapo sã erā puñru sīria wapo pare, arī, Jesure serēpiñorā: ³³ ¿Ne, Goāmu árīpehrerāre sīrinirāre ĩgu masucū nihino marapo gohra árīgocuri igo? Erā siete árīpehrerā igore marapocunirā árīñorā. ¿Eropigo nihino marapo gohra árīgocuri igo? arī serēpiñorā erā.

³⁴ Erā eroparīcū Jesu yuhripu:

—I yeba majarā ũma nome mera marapocuma. ³⁵ Erā eropa iiquerecū ta ũmusi majarāpu eropa árībeama. Dohpaguere masare ũmare, nome säre diaye iirāre Goāmu ōarā iigucumi. Erā erā sīrira puñru masa

muriarâcoma Goâmũ pohrogue. Eropirã erã eroguere marapocubeama. ³⁶ Eropirã erã anyua iro dopa ta ne sîrisome daja. Erã Goâmũ ïgu masunirã árirã, Goâmũ porã áhrima. ³⁷ Dohpaguere sîrinirã erã masa muriaboropure muare weregura. Irire masia mua ïgu Moise ïgu arĩ gojarare. “Iri yucugugãgue ùjudigugue árigũ Goâmũ òpa arĩ weremi yure,” arĩ gojañumi Moise. “Yũhu Abrahã, Isaa, Jacobo erã opu ta áhrraa,’ arĩ weremi Goâmũ yure,” arĩ gojañumi Moise. ³⁸ Erã sîrira puhrugue “Erã opu ta áhrraa,” arĩñumi Goâmũ. Eropirã erã sîrinirã mura ïgu masunirã árirã erã ojocarirã áhrima. Áripehrerã masa sîriquererã ojocarirã áhrima Goâmũ ïgu ïacũ, arĩpu Jesu erãre.

³⁹⁻⁴⁰ ïgu eroparicũ erãpu dipaturi Jesure serêpidiabiriñorã. Eropirã bajamerãgã judio masare buherã òpa arĩñorã:

—Buhegu, muhu òaro yuhriabu, arĩñorã erã ïgure.

Cristo Davi murũ opu áhrimi, arĩ werepu Jesu

Mt 22.41-46; Mr 12.35-37

⁴¹ Puhru Jesu òpa arĩ werepu masare:

—“Cristo Davi murũ pãrami árigucumi,” arĩ buherima muare buherã.

¿Duhpirã erã eropa arĩ buheri? ⁴² Davi murũ ïgu basi Salmo ïgu gojarapũgue òpa arĩ gojañumi:

Goâmũ yu opuere òpa arãmi: “Ohõ yu diayepu dorebu doaque. ⁴³ Eropigu mure ïhaturirãre mure tarinugabasagura yuhũ,” arĩmi Goâmũ yu opuere, arĩ gojañumi Davi murũ.

⁴⁴ Eropa arĩ gojagu Davi murũ opucũñumi Cristore. ¿Eropigu Davi murũ Cristo ñecu murũ áriqueregu ta duhpigu Davipu Cristore opucuyuri? Cristo Davi murũ opu áhrimi, arĩ werepu Jesu.

Masare buherã erã ñero iirire werepu Jesu

Mt 23.1-36; Mr 12.38-40; Lc 11.37-54

⁴⁵ Masa bajarã watope Jesupu ïgu buherãre òpa arĩ werepu:

⁴⁶ —Masare buherã erã ñeri iirire ïarã òaro pee masique. Eropirã erã iro dopa iibiricãque. Erã yoari suhri sañama masa erãre ïaboro dopa. Doberi duarogue gajirã umupeori mera bocatĩri serêcũ gahmema erã. Eropirã erã mari buheri wiriguere oparã òari doari dihtare doadama erã. Eropirã bosenuri áricũ sãre oparã erã doarigue dihtare doadama. ⁴⁷ Erã wapeweyarã nome erã wajamocũ ïha erã ya wirire ehmada erã nomere. Eropa erãre mojomoro ïabiriquererã erã masa erã ïhurore yoari boje Goãmure serêma, “Gua Goãmure òaro umupeoa,” arĩ guyarã. Erã eropa iira dipuwaja Goâmũ erãre gajirã tauro dipuwaja moagucumi, arĩpu Jesu erãre.

21

Wapeweyo Goãmũ wihigue igo apirare werepu Jesu

Mr 12.41-44

¹ Eropa arĩ weretuha Jesu Goãmũ wihi maja erã amuburi niyeru gameneori comoro pohrogue ïha doapu. Iri comorogue doberi oparã erã niyeru sãcũ ïapu Jesu. ² Eropa ïagu wapeweyo mojomorocugo igo pesegã igo oparaserigãre igo sãcũ sãre ïapu. ³ Irire ïatuha òpa arĩ werepu:

—Diaye arĩgu iiaa muare. Igo wapeweyo mojomorocugopũ ii comorogue igo yare sãgo gajirã áripehrerã erã sãdiro tauro sãmo igoa. ⁴ Gajirã doberi oparã erã wũaro oquerêcũ ta erãpũre erã ya wũaro duhyaa.

Igopu mojomorocugo árīquerego ta árīpehreri igo bari waja árīborare opehocāmo igoa, arīpu Jesu.

—*Goāmū wihi cóāra wihi árīroca, arīpu Jesu*
Mt 24.1-2; Mr 13.1-2

⁵ Eropi gajirā Goāmū wihire ĩarā ōpa arīñorā:

—Ōari utā mera iira wihi, ōari wihi āhraa. Masa Goāmū wihire erā ora sã ōari āhraa, arī wereniguirā iññorā.

Erā eroparīcū Jesu werepu erāre:

⁶ —I wihi majare dohpaguere ĩaraa mua. Gajinu árīcū i wihi maja árīpehreri mari ĩara, i utā sã cohmopehrea waroca. Ne yujuye utāye dujasome, arīpu Jesu erāre.

I umū pehreburiñure werepu Jesu
Mt 24.3-28; Mr 13.3-23

⁷ Īgu eroparīcū peerā erāpu serēpiñorā ĩgure:

—Buhegu, ¿dohpárīcū eropa warocuri mu arīdiro dopa waro? ¿Pehreburiñ coregāre dohpa wanagacū ĩarācuri gua? arī serēpiñorā erā ĩgure.

⁸ Jesu yuhripu erāre:

—Ōaro iiyuque mua. Eropirā gajirā muare erā guyarire peebericāque. Bajarā masa “Cristo āhraa yuhu,” arī guyarā árīrācoma. Eropa arī guyarā “Dohpaguere pehreburiñ merogā duhyaa,” arīrācoma. Erā eroparīcū erāre peebericāque. ⁹ Eropirā mua pohrogā gajirā masa gamewejēcū, masa erā oparāre cóācū peerāca. Eropirā yoarogue majarā sã eropa iicū peebeorāca. Mua irire peerā güibericāque. Pehreburiñ core ōpa wamuharoca. Eropa wamuharocū pehreburiñ duhyaniroca dohpa, arīpu Jesu.

¹⁰ Eropa arītuha ōpa arī werenemopu:

—Irisubure yuju yeba majarā gajī yeba majarā mera gamewejērācoma. Eropirā yujugu opu yarā gajīgu opu yarā mera gamewejērācoma.

¹¹ Eropiro bajasuburi i yeba ñohmeroca. Eropirā masa bajarā oa mera siri, árīpehrero majarā masa dorecurācoma. Eropirā umaro majare deyro moarire guhyadiarire masa ĩarā, ĩha uca warācoma. Eropa wacū muapu güibericāque.

¹² “I árīpehreri eropa waboro core, yaharā mua árīri dipuwaja gajirā muare ñeha ñero iirācoma. Eropirā mari judio masa buheri wirigue muare weresā, peresu iirācoma muare. Erā eropa iicū macari majarā oparā pohrogue erā tauro oparā pohrogue säre muare aīgārācoma erā muare dipuwaja moadorerā. ¹³ Erā eropa muare aīgācū muapu erāre ōari buherire wererāca. ¹⁴ Erā oparā pohrogue muare erā aīgācū erā oparāre mua yuhriborore wuaro guñabiricāque mua. ¹⁵ Yuhu muare wereniguićü ĩgura. Muare eropa itamugu pee masirire, ōari wereniguićü säre mua iicū ĩgura. Mua eropa iicū muare ĩhaturirāpu mua wereniguirire pee bocatumasisome. “Īri diaye árībeaa,” arī yuhrimasisome. ¹⁶ Irisuburi mua yaharā árīcū ĩha mua pagu sumará, mua pagu porā, mua acawererā, mua mera majarā sã muare oparāre wejedorerā orācoma muare. Erā eropa iicū muare ĩhaturirā mua mera majarāre gajirāre wejērācoma.

¹⁷ Eropirā yaharā mua árīcū ĩarā, árīpehrerā muare ĩhaturirācoma.

¹⁸ Muare eropa iicū muapu ne dederesome. ¹⁹ Eropirā erā muare ñero ĩiquerecū ta muare erā ñero iirare yujuro bojerā yare duhubiricū Goāmū muare taugacumi. Eropigu ĩgu pohrogue muare opagucumi.

20 “Eropirā bajarā surara Jerusaléngue erā cāhmotacū ĩarā, Jerusalénre erā cōāborore merogā duhyacū masirāca m̄ua. 21 Eropā wacū ĩarā Judea yeba ārĩrāpū utā yucūgue oma duhriporo. Eropirā Jerusalén ārĩrā s̄a waporō. Eropirā campo ārĩrā Jerusaléngue wabiricāporo daja. 22 Irinuri dipuwaja moarinuri ārĩpehreri Goāmū yare erā gojarapū erā arĩdiro dopa ta eropa waroca. 23 Goāmū oā masare turaro dipuwaja moacū ārĩpehrerogue i yebaguere ñero tarirācoma. Eropā wacū nijiposā nome, erā porāre mihrirāre oparā nome s̄a mojomorocurā nome dujarācoma irisubure. 24 Gajirā i maca majarāre gamewejērācoma. Eropirā gajirā i maca majarāre ārĩpehreri yebarigue aĩgā peresu iirācoma. Eropirā judio masa árĩbirā Jerusalénre ñero iirācoma. Eropirā erā tarinugarācoma. Judio masa árĩbirāre “Iripēta árĩque,” Goāmū ĩgu arĩcūgue Jerusalénre āhri duhurācoma, arĩ werepū Jesu.

Jesu i yebague ĩgu dujariborore werepū

Mt 24.29-35, 42-44; Mr 13.24-37

25 Eropigu erāre werenemopū:

—Irisubure abe um̄a majagu, ñami majagu, necā s̄a guhyaro gohrotoa warācoma. Árĩpehrerā i yeba majarā, “Cue, s̄irirāca,” arĩ pepirācoma. Wuariya turaro busurire pāguri s̄are turaro guirācoma. 26 Irisubure umaro maja s̄a yeba s̄a burigā ñohmeroca. Eropā wacū ĩarā masapū i yeba pehrebore corerā burigā guirācoma dedereri arĩrā. 27 Irisubu ta yuhū masū Goāmū ĩgu obeodigu Goāmū ĩgu turari mera, ĩgu gosesiriri mera umaro maja imica weca i yebaguere yū dujaricū ĩarācoma masa. 28 Yū eropa arĩra wanūgacū ĩarā guibiricāque. Eropirā guñatura umarogue ihamujuque. Irisubure Goāmū muare ĩgu tauboro merogā duhyaroca, arĩpū Jesu.

29 Eropā arĩtuha i queori mera erāre werepū Jesu:

—Higueragu baja gaji yucu s̄a iri yucu waricurire pepique m̄ua. 30 Iri yucu pūricucū ĩarā, “Bojori merogā duhyaa,” arĩ masia mari. 31 Eropā ta i ārĩpehreri yū arĩra iri eropa wacū ĩarā, “Goāmū ĩgu opū árĩburisubu merogā duhyaa,” arĩ pepirāca m̄ua. 32 Muare diaye arĩgu iia. Irisubu majarā erā s̄iriboro core ārĩpehreri yū arĩra eropa waroca. 33 Um̄aro i yeba s̄a pehrea waroca. Yū wereniguiripū ne pehresome. Árĩpehreri yū arĩdiro dopa ta eropa waha ojogorocuroca.

34 “Yū dujariburinure ne masibea m̄ua. Eropirā ōaro arĩyūque. Bosenurire pagari iiniguibiricāque. Eropirā merebiricāque. I yeba maja iiburire wuaro pepibiricāque. Muare yū arĩdiro dopa ta iirā, guñaña mariro i yebaguere yū aricū ne ucasome. 35 Yuhū masare beyegu arigu guñaña mariro ariguca. Waibagu guñaña mariro ĩgu weradague ĩgu mehsihajaro dopa ta irinū waroca masare ārĩpehrerā i yeba majarāre. I yeba majarā “Eropa waroca,” erā arĩbiririnū eropa waroca. 36 Muapū ōaro guñatura coreque. Eropirā Goāmure ire serēniguicāque: “Pehrerinū eropa wacū yure itamuque. Turarire oque yure ōaro yū tariboro dopa. Eropigu Cristore m̄u obeogure guiro mariro yuhū ĩgure bocatĩricū iique yure,” arĩ serēque Goāmure, arĩpū Jesu.

37 Eropi irinurire Goāmū wihigue Jesu buhemuripū. Ñamiri nucū buhetuhajagu Olivo waicudigugue waha irigugue arĩboyotahmuamuripū. 38 Boyocū árĩpehrerā masa ĩgure Goāmū wihigue peerā wamurĩñorā.

22

*Pahia oparã, judio masare buherã mera wejediañorã Jesure**Mt 26.1-5, 14-16; Mr 14.1-2, 10-11; Jn 11.45-53*

¹ Eropi irisubue bugabiriri pan erã baburi bosenu merogã duhyayoro. Iri bosenu Pascua waicuyoro. ² Eropirã pahia oparã, judio masare buherã mera Jesure wejediañorã, erã wejeborore guñamaañorã. Jesure wejediañorerã ta masapure guñiorã guari arirã.

³ Eropi Judapu watĩ igure ñero iidorecũ yuhripu igure. Juda doce Jesu buherã mera majagu arĩripu. ⁴ Eropigu pahia oparãre, Goãmu wihi majarã surara oparã mera sãre weretamugu wapũ. Erã pohrogue eja, erãre Jesure igu ihmuborore weretamupu erã mera. ⁵ Igũ erãre eroparicũ pee erã mucubiri, "Mũre niyeru wajayerãca," arĩñorã erã Judare. ⁶ Erã eroparicũ, "Áu, muare igure ihmugura," Juda arĩpu. Eropigu masa erã ĩabiririsubu Jesure ĩaturirãre igu ihmuborore corenipu.

*Jesu igũ buherã mera igũ baturinu arĩyoro**Mt 26.17-29; Mr 14.12-25; Jn 13.21-30; 1Co 11.23-26*

⁷ Bugaririri panre erã baburinu bosenu arĩñugarinu arĩyoro. Eropiro Pascua majagu arĩbure ovejare erã wejerinu arĩyoro. ⁸ Irisubu ta Pedro, Ñu sãre Jesu werepu:

—Bosenu mari baburire amurã waque, arĩpu Jesu erãre.

⁹ —¿Nohonogue mari baburire amudoregu obeori mũhu guare? arĩ serẽpiñorã erã.

¹⁰ Erã eroparicũ Jesu yuhripu:

—Jerusalengue waque. Eroque mua ejacũ deco sorobu tuhpeogu muare bocatĩrigucumi. Igũ bocatĩricũ igũ mera waque. ¹¹ Eropa warã igũ sihu ñajari wihigue ejarã, wihi opure òpa arĩque: "¿Nohogue yũhu, yũ buherã mera Pascua maja barire barãcuri?" arãmi buhegu," arĩque wihi opũre. ¹² Mua eroparicũ peegu wũari taribure, umaro maja taribure, mari gameri mera erã amura taribure ihmugucumi wihi opũ. Eroque mari baburire iique mua, arĩpu Jesu erãre.

¹³ Igũ eroparicũ erã iri macague wañorã. Eroque erã ejacũ erãre igũ arĩdoro dopa ta eropa wayoro. Eropirã erã Pascua arĩcũ baburire amuñorã.

¹⁴ Erã barisubu arĩcũ Jesu doce igũ buherã mera ba doapu. ¹⁵⁻¹⁶ Eroque erã barogue doagu Jesu erãre werepu:

—Muare arĩgu iiaa. I Pascua bosenure mari iiaa Goãmu igũ yarãre igũ taurare guñarã. Pũhrũ Goãmu igũ opu arĩrogue igũ yarãre tautuhagucumi. Igũ eropa tauboro core inuno majare dipaturi basome yũhu. Eropigu dohpaguere yũ ñero tariboro core i Pascua maja barire mua mera turaro badiabu, arĩpu Jesu.

¹⁷⁻¹⁸ Eropa arĩgu Jesu ihriripare aĩ, Goãmure "Õhaa," arĩ serẽ, erãre werepu:

—Muare arĩgu tiiaa. Goãmu igũ opu arĩrogue igui decore ihriboro core ne dipaturi ihrisome yũhu. Eropirã iri vinore aĩ mua basi ihrique, arĩpu Jesu.

¹⁹ Eropa arĩtuha panre aĩ, Goãmure "Õhaa," arĩpu. Eropa arĩtuha irirure nuha guerepu erãre. Irirure gueregu ta erãre werepu:

—I yu dupu āhraa. Yu dupu yure ihaturirāre erā oburi dupu árīroca. Mua ñeri iira wajare cóābu sīriguca yuhu. Eropirā mua yure guñaburire ire baque, arīpu Jesu.

²⁰ Eropa batuha eropa ta erāre ihriripa säre ópu. Eropigu erāre werepu:

—Mua ñeri iirare cóābu sīriguca. Eropigu yu dire cóāguca. Eropa sīrigu yu Pagu Goāmū “Masare óaro iigura,” ĩgu arīdiro ii ojogorocuguca.

²¹ “Dohpaguere peeque mua. Yure ihaturirāre ihmubu yu mera ohō doami. ²² Goāmū ĩgu arīdiro dopa ta yuhu masu Goāmū ĩgu obeodigu sīriguca. ĩgu eropa sīrdorequerēcū ta yure ihaturirāre ihmudigupu ñetariaro tarigucumi, arīpu Jesu.

²³ ĩgu eroparīcū erāpu erā basi ópa arī serēpiñorā:

—¿Jesure ihaturirāre ihmubu mari mera majagu nihino árīcuriba? arī serēpiñorā erā basi.

“¿Mari mera majagu nihinoru opu árīgucuri?” arī wereniguiñorā Jesu buherā

²⁴ Puhru Jesu buherā ópa arī dūyasoñorā:

—¿Mari mera majagu nihipu árīgucuri opu? arī wereniguiñorā erā basi.

²⁵ Erā eropa arī wereniguićū peegu Jesu erāre werepu:

—Goāmure masibirā oparāpu erā masare dorerā pūiro mera dorema. Eropirā oparāre “Erā masare óaro itamurā āhrima,” arīrima gajirā erāre.

²⁶ Muapu eropa oparā árīdiasome mua basi. Mua mera majagu mua tīgupu mua pagu magu iro dopa árīporo. Mua mera majagu opu árīdiagu gajirā itamugu árīporo. ²⁷ ¿Nihino āhriri opu mua pepicū? ¿Ba doagupu opu āhriri? ¿O barire duhpeogupu opu āhriri? Ba doagu ta árīcumi opu. ĩgu eropa árīquerēcū ta yupu pohro majagu iro dopa ta muare itamugu ahrabu.

²⁸ “Masa erā yure ñero iiquerēcū ta muapu yure duhubirabu. ²⁹ Eropigu yu Pagu ĩgu yure opu acudiro dopa ta mua säre oparāre acugura yuhu.

³⁰ Yu opu árīćū mua sā yu bari mesa ta baha ihrirāca. Eropirā mua oparā doarire doarāca. Mua ero doarā Israe masare doce cururi majarāre beyerāca óarā säre ñerā säre, arīpu Jesu ĩgu buherāre.

Pedro “Jesure masibea,” ĩgu arī guñaburiñere wereñumi Jesu Mt 26.31-35; Mr 14.27-31; Jn 13.36-38

³¹ Eropa arītuhaja Pedrore Jesu ópa arī werepu:

—Simo Pedro yure peeque. Watī Satana muare árīpehrerāre gamegu Goāmure serērami. Mua yure duhu ĩgu yare iicū gamegu serērami. Trigo pohe opu ĩgu trigo gasirire cóāgu puri siriro dopa muare goroweodiami.

³² ĩgu muare eropa gamequerēcū yupu mure Goāmure serēbasabu. Yure mu umupeo duhubirburire serēbasabu Goāmure. Eropigu muhu yu mera majagu dipaturi árīgu mu acawererāre yaharāre guñaturacū iique mūhū, arīpu Jesu Pedrore.

³³ ĩgu eroparīcū Pedro yuhripu:

—Opu, mure erā peresu iiquerēcū ta, yuhu mu mera majagu árīniguićuca. Mure erā wejēquerēcū ta mu mera majagu árīniguićuca, arīpu Pedro.

³⁴ Jesu yuhripu:

—Pedro, mure arīgu iiaa. Dohpagā ñami cāreña ĩgu wereboro core uhresubu “Jesure masibea,” arīguca mūhū gajirāre, arīpu Jesu Pedrore.

Jesure erā ñero iinugaboro merogā duhayoro

35 Eropā arītuha Jesu ģu buherāre werepū:

—¿Sohō árīrasubure mūa niyeru aju moorā, suhri diyeri aju moorā, zapatu moorā muare yu obeorasubure gajino duhyari muare? arī serēpīpū Jesu.

—Ne gajino guare duhyabirabū, arī yuhriñorā erā.

36 —Irisubure muare duhyabiriquerecū ta dohpaguepūre suhri diyeri ajure, niyeru aju sāre oparā irire aīque. Eropirā muare matamijiri maricū iarā mūa suhrīre duarā irimijire asūque. 37 Ire muare arīgū iiaa. Goāmū yare erā gojarapū erā arīdiro dopa ta yure eropa waro gahmea. Ōpa arīñuma iripūgue. “ Ĵgu dorerire tarinugarā mera majagu āhrimi, ’ arīrācoma masa,” arī gojañuma yare, arīpū Jesu. Erāpū arīñorā:

38 —Ĵaque opū. Pemiji matamijirire opaa gūa, arīñorā ģu buherā.

—Iripēta árīca, arī yuhripū Jesu.

Getsemanique Jesu Goāmū mera wereniguipū

Mt 26.36-46; Mr 14.32-42

39 Eropī Jesu ģu ero core ģu iiguadiro dopa ta Olivo waīcudigu utāgugue waha wapū. Ĵgu eropa wacū ģu buherā ģu mera wañorā.

40 Erogue ejagu ģu erāre werepū:

—Goāmūre serēque mūa ñerire iibiriboro dopa, arīpū erāre Jesu.

41 Eropā arītuha ģu seyaro merogā yujugu ta wanemo, mereja Goāmū mera wereniguipū:

42 —Ahū, yu ñero tariburire iidiabigu iibiricāque. Yu eropa serēquerecū ta yu gamero dopa iibita. Mūpū masia. Mū gamero dopa ta iique, arī serēpū Jesu Goāmūre.

43 Ĵgu eropa arī serēcū amarogue aridigu anyu Jesure dehyoapū ģure itamugu. 44 Eropīgu Jesu ñero sīporācu turaro mera Goāmū mera wereniguipū. Eropiro ģu ñajasiri guari di wiriro dopa ģure wiridijayoro.

45 Goāmū mera wereniguituha wahgānugaja, ģu buherā pohrogue dujaa wapū. Ĵgu dujajacū ģu buherā burigā bujawererā árīrā carīrā árīñorā. 46 Eropīgu Jesu erāre ōpa arī werepū:

—¿Duhpirā carīri mūa? Wahgāque. Goāmūre serēque mūa ñeri iibiriburire, arīpū Jesu erāre.

Jesure ĩhaturirā ģure peresu iñorā

Mt 26.47-56; Mr 14.43-50; Jn 18.2-11

47 Ĵgu eropa arī wereniguirisubū masa bajarā erañorā. Juda doce buherā mera majagu arīdigu masare muhtagāridigu arīpū. Eropīgu ģu Jesu pohro eraa, ģu wayuporāre mimipū ģure. 48 Ĵgu eropa mimicū Jesupū ģure serēpīpū:

—Juda, ¿yu masure Goāmū ģu obeodigure yare ĩhaturirāre ĩhmuḡu yu wayuporāre mimiri muhū? arīpū Jesu.

49 Ĵgu eropa arīra pūhrū Jesu buherā masa Jesure erā ñeaburire masirā ģure serēpīñorā:

—Opū, ¿gūa matamijiri mera erāre gamequeāsi? arīñorā erā.

50 Erā eropa arīra pūhrū yujugu Jesu buherā mera majagupū pahia opū pohro majagure ģu matamiji mera ģu gamirore diayerū árīri gamirore tabe coro dijucāpū. 51 Ĵgu eropa iicū ĩagu Jesu ōpa arīpū:

—Iibita, arīpū.

Eropa arītuha pohro majagu gamiro arīrañere mohmepīpū. Ĵgu eropa iicū pohro majagupū mūraro ta dujapū daja. 52 Eropa iitūha pahia

oparāre, Goāmu wihi surara oparāre, murā sāre ĩgure ñeamorāre Jesu serēpīpu:

—¿Mua matamijiri mera, yucu ducari mera arirā yajari masure iro dopa ta yure ñearā arirā iiari? ⁵³ Umuri nucu Goāmu wihigue mua mera yu aricū, mua yure ñeabiribu. Eropa ariquerecū ta dohpague mua ñerā yanu ta āhrraa. Watī ĩgu tarinugaburibusu ārīro iiaa, arīpu Jesu.

“Jesure masibea,” arīpu Pedro

Mt 26.57-58, 69-75; Mr 14.53-54, 66-72; Jn 18.12-18, 25-27

⁵⁴ Erā Jesure ñeatuha pahia opu ya wihigue aĩgāñorā erā ĩgure. Erā aĩgācū Pedro yoarogue erāre ĩhanurūsiapu. ⁵⁵ Opu ya wihigue ejačū, iri wihire cāhmotara sārīro pohecague ōari goro deco peame dihuñorā gajirā. Erā dihucū ĩagu Pedro peame pohro doarā mera doapu. ⁵⁶ ĩgu peame boyorogue doacū yujugo pohro majago ĩgure ōaro ĩhanuru gajirāre ōpa arī werepo:

—Ihī sā ĩgu mera ta āhrami, arīpo igo.

⁵⁷ Igo eroparīcū Pedro yuhripu:

—Nomeo, ĩgure ne masibea yuhu, arīripu Pedro. ⁵⁸ Puhru ñari gajigu Pedroro ĩha, ōpa arī werepu:

—Mu sā erā mera majagu ta āhrraa, arīpu ĩgu.

—Ne, arībeaa, arīripu Pedro.

⁵⁹ Yuju hora puhru gajigu gajirāre ōpa arī werepu:

—Diaye ta āhrraa. Ihī Galilea majagu āhrimi. Diaye ta Jesu mera āhrami ihī sā, arīpu ĩgu gajirāre.

⁶⁰ ĩgu eroparīcū Pedro yuhripu:

—Mu arīgure ne masibea yuhu, arī yuhripu.

ĩgu eropa arī wereniguiribusu cāreña werepu. ⁶¹ ĩgu werecū mari Opu Jesu wihi pohro arīdigu Pedroro maji ĩapu. ĩgu eropa ĩacū Pedropu Jesu ĩgu arīrare guñapu. “Dohpagā ñami cāreña ĩgu wereboro core, uhresubu muhu, ‘Yuhu Jesure masibea,’ arīguca muhu,” Jesu ĩgu arīrare guñapu Pedro. ⁶² Eropigu Pedro erogue wiriri, turaro orepu.

Jesure wereya, pañorā erā

Mt 26.67-68; Mr 14.65

⁶³ Eropirā Jesure corerā surara ĩgure wereya, pañorā. ⁶⁴ Eropa parā ĩgu cuirire diricāhmota, ĩgure serēpiñorā:

—¿Noa mure pari? ĩabiriqueregu ta wereque guare, arī wereyañorā erā.

⁶⁵ Eropirā baja gaji ñero arī wereyañorā erā ĩgure.

Jesure opu serēpīpu

Mt 26.59-66; Mr 14.55-64; Jn 18.19-24

⁶⁶ Eropirā boyorogue ta murā, pahia oparā, judio masare buherā sā gamenererore gajirā erā pohroque Jesure aĩgāriñorā.

⁶⁷ —Wereque guare. ¿Goāmu beyedigu Cristo āhriri muhu? arī serēpiñorā erā Jesure.

Erā eroparīcū Jesu yuhripu:

—Muare yu werecū sāre yure peesome mua. ⁶⁸ Muare yu serēpicū yure yuhrisome mua. Eropirā yure wiusome mua. ⁶⁹ Mua yure wiubiriquerecū ta puhru ñari umuri nucu yuhu masu Goāmu ĩgu obeodigu Goāmu yu Pagu turagu ĩgu diayepu doagu arīguca, arīpu Jesu.

⁷⁰ Īġu eroparīcū erā árīpehrerā serēpiñorā daja dipaturi:

—¿Eropa arīġu “Yuhu Goāmū magu āhraa,” arīri muħu? arīñorā erā.

—Mūa arīro dopa ġu ta āhraa, arī yuhripu Jesu erāre.

⁷¹ Īġu eroparīcū ōpa arī erā basi wereniguñorā erā:

—Īre weresārāre gajirāre mari gamebeaa pare. Erā nuċu ta sihajama.

Īġu Goāmure ġu ñero wereniguicū mari basi ta mari peea. Eropirā ġu ñero iira dipuwajare masituhāa, arīñorā erā erā basi.

23

Pilato Jesure serēpipu

Mt 27.1-2, 11-14; Mr 15.1-5; Jn 18.28-38

¹ Eropa arītuha erā árīpehrerā wahgānugaja, Jesure Pilato waīcuġu opu pohrogue aīgāñorā. ² Aī earā Jesure weresāñugañorā:

—Īhī mari ya yeba majarāre ñero iidorecū peeabu. Mari opure Césare ihī wajayedorebeamī. Eropiġu ġu “Yuhu opu āhraa. Cristo āhraa yuhu,” arī wereniguimi ġu basi, arī weresāñorā erā Jesure.

³ Erā eropa arī weresāra puħru Pilato Jesure serēpipu:

—¿Diaye ta judio masa opu ta āhriri muħu? arīpu ġu Jesure.

—Mū arīro dopa ta ġu ta āhraa, arī yuhripu Jesu.

⁴ Īġu eroparīcū Pilato pahia oparāre, masa sāre wereru:

—Īre gajino waja dipuwaja mara, arīpu ġu.

⁵ Īġu eropa arīquerecū ta erā turaro weresāñemoñorā:

—Īġu, ġu buheri mera masare gamequeācū iimi. Galilea yeba ġu irire iinugami. Eropa iinugatuha árīpehrero Judea yebague irire ġu iimi, arī weresāñorā erā.

Herode waīcuġu opu Jesure serēpipu

⁶ Erā eropa arī weresācū peeġu Pilatopu serēpipu:

—¿Īhī Galilea majagu āhriri? arīpu ġu.

⁷ —Ero majagu ta āhrimi, arī yuhriñorā gajirā.

Erā eropa yuhricū peeġu Pilatopu Jesu ġu arīri yebare masiġu opu Herode ġu ya yeba majagu ġu árīcū masipu. Irire masiġu Jesure Herode pohro obeopu. Irisubure Herode Jerusalén árīpu. ⁸ Ero core Herode Jesure peemuripu. Īġu eropa peera puħru ġure burigā ĩadiaripu. Jesu ġu deyoro moarire ġu ĩi ĩhmuċū ĩadiaripu ġu. Eropiġu ġu Jesure ĩagu mucubiripu. ⁹ Eropiġu baja serēpipu Jesure. Īġu eropa serēpiquerecū ta Jesupu ne yuhribiripu ġure. ¹⁰ Pahia oparā, judio masare buherā sā Herode pohro nuġaja turaro Jesure weresāñorā. ¹¹ Erā eropa arī weresāra puħru Herode ġu surara mera wereya, Jesure ñero iñorā. Eropa wereyarā, ōariñe suhrirore opu yañe dopa bejariñere sāñorā erā Jesure. Eropa wereyatuha, iri suhrirore tuwea aī Pilato pohro obeoñorā daja. ¹² Irinure Herode, Pilato mera ōaro erā basi game iinugarā árīnugañorā. Ero core erā basi game ĩaturirā árīriñorā.

Masa Jesure wejēdoreñorā

Mt 27.15-26; Mr 15.6-15; Jn 18.39-19.16

¹³ Eropi Pilato pahia oparāre, gajirā oparāre, masa sāre ġu sihubecū gamenereñorā. ¹⁴ Erā gamenerecū ĩagu ōpa arīpu erāre:

—Īre yure aīgārīrā, “Īġu masare ñero iidoremi,” arīraa mūa yure. Dohpague mūa ĩhuro ĩre serēpipehoabu daja. Yu eropa serēpira puħru

mua ïgure weresãcũ ñeri dipuwaja mara yu ïacũ. ¹⁵ Herode sã “Ïgure ne ñeri dipuwaja mara,” arãmi. Eropa arïgũ dipaturi ïre ohõ dujuami daja. Eropiro ïre wejẽdorero mara. Mua sã irire ïha masia. ¹⁶ Eropigũ ïgure tãraradari mera tãradoregũca yuhũ. Erã eropa tãrara puhru ïgure wiugura, arïripũ Pilato.

¹⁷ Bojori nãcu Pascua bosenuri nãcu peresu árĩdigure yujugure masa gamegure Pilato eropa wiubasamuripũ. Eropa iiro gameyoro ïgure. ¹⁸ Eropirã Pilato “Jesure wiugura,” ïgũ arĩcũ peerã árĩpehrerã masa õpa arĩ gaguiniguĩnorã:

—Ïgũ Jesure wejẽque. Gua yagũ árĩbure Barrabãpũre guare wiubasaque, arĩ gaguiniguĩnorã masa.

¹⁹ Ero Barrabãpũ Jerusalẽngue oparãre ïgũ cóãdorera dipuwaja, ïgũ gajirãre wejẽra dipuwaja peresu iĩnorã ïgure. ²⁰ Pilato Jesupũre wiudiaripũ. Eropigũ ïgũ masare ïgũ wiabure serẽpi ïapũ daja. ²¹ Ïgũ Jesure eropa wiudiaquerecũ ta erã ïgure arĩnorã daja:

—Crusague pabia wejẽque ïgure. Wejẽcãque ïgure, arĩ gaguiniĩnorã erã.

²² Erã eroparĩcũ Pilato uhresubu waro gohra õpa arïripũ daja erãre:

—¿Ñehenore ñerire iiri ïgũ mua eropa arĩ gaguiniguicũ? Ne ïgure ñeri dipuwaja mara. Eropigũ ïgure wejẽdoremasibeaa. Ïgure tãraradari mera tãradoregũca. Iripẽta iidoregũca. Eropigũ ïgure wiugũca, arïripũ Pilato.

²³ Ïgũ eroparĩcũ ta erã turaro mera gaguinimo, Jesure crusague wejẽdoreĩnorã. Erã eropa arĩ gaguinicũ peegũ Pilato erã gamero dopa ta iidorepũ. ²⁴ Eropigũ erã arĩro dopa ta Pilato Jesure wejẽdorepũ. ²⁵ Eropa doregũ masa serẽdigure wiupũ. Ïgũ peresugue árĩgure, masare gamewejẽcũ iidigure, masare wejẽdigure Pilato Barrabãpũre wiupũ. Eropigũ masa erã gamero dopa ta Pilato Jesure crusague wejẽdorepũ.

Erã Jesure crusague pabia wejẽnorã
Mt 27.32-44; Mr 15.21-32; Jn 19.17-27

²⁶ Eropirã erã Jesure wejẽrã warã, aĩgãĩnorã. Erã eropa warisubu Simo waicũgũ Cirene majagũ pohegue ejadigũ erapũ. Jerusalẽngue ïgũ eracũ ïarã Jesure aĩgãrã ïgure bocatĩri, ñeha, crusare ïgure coãtamudoreĩnorã Jesu puhru.

²⁷ Eropirã masa bajarã Jesure ïhanurusiaĩnorã. Eropirã gajirã nome ïgure erã eropa iicũ ïarã turaro ore nurusiaĩnorã. ²⁸ Erã orecurã peegũ Jesu erãre maji ïha õpa arĩpũ:

—Jerusalẽn majarã nome yũre orebircãque. Mua basi, mua porã ya árĩburire oreque. ²⁹ Gajinuri árĩcũ masa õpa arĩrãcoma. “Porã marirã nome dohpaguere mari árĩcũ õatariaboaya,” arĩrãcoma masa. ³⁰ Irisubure utãgure õpa arĩ wereniguirãcoma masa. “Ïgũ utãgũ gua weca yuri bejaporo. Guare wejẽcãporo,” arĩrãcoma masa. ³¹ Masa yũre dipuwaja marigure erã õpa iicũ, ñeri dipuwaja oparãpũ ñetariaro warãcoma, arĩpũ Jesu.

³² Gajirã perã dorerire tarinũgarã erã árĩcũ erã sãre Jesu mera erã wejẽmorãre aĩgãĩnorã erã. ³³ Erã aĩgã dipu pero waicũrogue eja crusague Jesure pabiaĩnorã. Eropirã gajirã perã sãre yujugure ïgũ diayerpũ gajigure ïgũ copũ crusarĩguere pabiaĩnorã. ³⁴ Erã eropa iicũ Jesu õpa arĩpũ:

—Ahu, oã dohparagã erã ñero iirire cãdijique erãre. Erã erã eropa iirire masibeama. Eropigũ irire cãdijique, arĩpũ Jesu ïgũ Pagure.

Eropirā surara Jesu suhri mūrare “¿Noa yañe árĩrocuroi iñe?” arĩ game bira wajatañorā. ³⁵ Eropirā masa ero niguirā erā ĩaro judio masa oparā Jesure wereyañorā:

—Īgu gajirā masare s̄iribonirāre taurapũ. Eropigu ĩgu Cristo Goāmu ĩgu beyedigu árĩgu ĩgu basi tariporo, arĩ wereyañorā erā.

³⁶ Surara s̄a ĩgure wereyañorā. Jesu pohro ejarā, vino suĩrire erā oriñorā. ³⁷ Irire iirā ōpa arĩñorā erā:

—Mũhu judio masa erā opũ árĩgu ta, mũ basi tarique, arĩñorā erā.

³⁸ Eropi ĩgu weca ōpa arĩ gojarapũre pabia tuñorā: “Ihĩ judio masa tauro opũ árĩgu āhrimi,” arĩ gojaturapũ árĩyoro. Griego ya mera, Roma majarā ya mera, judio masa ya mera gojarapũ árĩyoro.

³⁹ Gajigu ĩgu mera erā pabia tudigu ĩgu ñero arĩ wereniguipũ Jesure:

—¿Mũhu Cristo árĩbeari? Mũ basi, gua s̄are tauque, arĩpũ ĩgu Jesure.

⁴⁰ Īgu eroparĩcũ peegu ĩgu mera majagupũ ĩgure yuhripũ:

—Eropa arĩbircāque. ¿Duhpigũ Goāmure umupeobeari mũhu? Marire yujuro mera dipuwaja moama erā. ⁴¹ Maripũre mari ñeri dipuwajare dipuwaja moarā diaye iirā iima erā. Ihĩpũ ñerire iibiriñumi, arĩpũ gajigu tarinũgagupũ.

⁴² Eropa arĩgu ĩgu Jesure ōpa arĩpũ:

—Jesu, mũhu opũ árĩroque árĩgu yũ s̄are guñaque, arĩpũ ĩgu Jesure.

⁴³ —Mũre ire arāa. Dohpagāre yũ mera paraíso waĩcuroque yũ mera árĩguca, arĩpũ Jesu ĩgure.

Jesu s̄iria wapũ

Mt 27.45-56; Mr 15.33-41; Jn 19.28-30

⁴⁴ Eropi goeri boje gohra árĩcũ árĩpehrerogue uñre hora gohra naitĩa wayoro. ⁴⁵ Naitĩaro árĩrisubu Goāmu wihi majañe suhriro cāhmotara suhriro deco mera yehguea wayoro. ⁴⁶ Eropigu Jesu turaro gaguinipũ:

—Ahũ, yũ siporāre mũre wiaa mũ dibuboro dopa, arĩ gaguinipũ Jesu.

Eropa arĩtuha s̄iria wapũ.

⁴⁷ Eropa wacũ ĩagu surara opapũ “Goāmu turagu āhrimi,” arĩ, “Ihĩ Jesu diaye ta ōagu āhrañumi,” arĩpũ ĩgu.

⁴⁸ Eropirā ero gamenererā iri eropa wacũ ĩarā, Jesu ĩgu s̄ircũ ĩarā, erā ya wihigue dujaa wañorā. Dujaa wa, bujawereri mera waha wañorā.

⁴⁹ Árĩpehrerā Jesu mera majarā, Galileague ĩgu mera arinirā nome s̄a yorogue Jesure ihu niguiñorā.

Jesu dũpũre masa gobegue apiñorā

Mt 27.57-61; Mr 15.42-47; Jn 19.38-42

⁵⁰⁻⁵¹ Irisubure José waĩcũgu ero árĩpũ. Judea yeba Arimatea waĩcuri maca majagu árĩpũ. Eropigu ĩgu ōagu, diaye iigu árĩgu, Goāmu ĩgu opũ arĩnũgagurire coregu árĩpũ. Eropigu ĩgu judio masa oparā mera majagu árĩqueregu ta Jesure erā wejẽdorecũ gamebiriripũ ĩgu. ⁵² Eropigu Pilato pohroque eja, Jesu mũru dũpũre serẽpũ. ⁵³ Serẽtuha Jesu dũpũre aĩ diju, ōari suhriro mera ĩgu dũpũre omapũ. Eropa omatuha masa gobegue utāyegue erā seara gobegue apipũ ĩgu dũpũre. Iri gobere ne yujugu s̄iridigũre yaanibiriñorā dohpa. ⁵⁴ Irinu Sabadonũ maja árĩburire erā amuyurinu árĩyoro. Sabado judio masa soorinu árĩboro merogā duhyayoro.

⁵⁵ Eropirā Galileague Jesu mera arinirā nome masa gobegue José wacũ ĩarā nurasiañorā. Masa gobegue eja, iri gobere ĩha, Jesu dũpũre ĩgu

apirare ñañorã. ⁵⁶ Puhru erã ya wihigue dujaa wañorã. Poresurire ñgu ðupure sũburire amuñorã erã. Eropirã Sabado áricũ Goãmu ñgu dorerire Moiserẽ ñgu apirare iri dorero dopa ta erã sooñorã.

24

Jesu masa mũriapu

Mt 28.1-10; Mr 16.1-8; Jn 20.1-10

¹ Domingo áricũ boyorogue erã nome erã poresuri erã amurare aĩ Jesu masa gobe pohrogue aĩgãñorã. ² Iri gobegue ejarã, iri gobere biharaye utãyere erã pãgũ nugurayere ñañorã. ³ Eropa ñarã erã iri gobegue ñaja wañorã. Jesu ðupure ne bocajabiriñorã erã. ⁴ Ñgu ðupure bocabirã, “¿Dohpa wayuri?” arĩ pepiñorã erã. Erã eropa arĩ pepi erã werenigui amaro gohra perã uma gosesiriri suhricurã erã pohro niguiñorã. ⁵ Ero erã nigucũ ñha, nome güirã merejañorã. Eropirã umapu erãre wereñorã:

—¿Duhpimorã sĩridigu mũru ñgu árdirore ahmari mua? Dohpaguere ñgu ojocarigu áhrimi. ⁶ Ñgu ðre marimi. Masa mũriatuhami. ¿Sohõ ártirasubure Galileague mua mera ártigu ñgu arĩrare guñari mua? ⁷ “Yu masure Goãmu ñgu obeodigure wiarãcoma ñerãre. Erã yure crusague pabia wejẽrãcoma erã yure. Eropigu yu sĩrira puhru uhrenu puhru masa mũriaguca yuhũ,” ¿muare ñgu arĩrare guñari mua? arĩñorã umapu.

⁸ Erã eroparicũ peerã, nomepu ñgu arĩrare guñañorã. ⁹ Erã eropa arĩra puhru erã dujaa wañorã. Once buherãre gajirã sãre irire werepehoñorã. ¹⁰ Erã nomepu María Magdalena, Juana, María Santiago pago ártiñorã. Erã nome gajirã nome sã ártiñorã Jesu buherãre eropa wererã nome. ¹¹ Erã eropa arĩ werequerecũ ta Jesu buherãpu “Erã diaye arĩbiribocoma. Eropa arĩcãrã iima oã nome,” arĩ pepiriñorã. Eropirã erã nomere peediabiriñorã.

¹² Erã eroparicũ peegu, Pedropu masa gobegue omagã, ñagu wapũ. Iri gobegue eja, ñgu muhmereja ñhame acupu. Jesure erã omara gasiro dihtare ñapu. “¿Dohpa wayuri?” arĩ pepigu ñgu wihigue dujaa wapũ.

Emaus waĩcũri maca maja mague Jesu dehyoapu

Mr 16.12-13

¹³ Irinure perã Jesu buherã mera majarã Emaus waĩcũri macague warã iĩñorã. Jerusalenre once kilómetros yoaro áhrra Emaure ejaro. ¹⁴ Emaugue waha, ártipehreri Jesure eropa warare wereniguiñorã. ¹⁵ Erã eropa arĩ werenirisubu Jesupu erã watope erã mera wapũ. ¹⁶ Eropirã ñgure ñaquererã ta erã ñgure ñha masibiriñorã.

¹⁷ —¿Mua curirã warã dohpa arĩ werenigui bujawererã iiri mua? arĩpu Jesu.

Ñgu eroparicũ erã dujanuñorã bujawererã. ¹⁸ Eropigu Cleofa waĩcũgũpu Jesure yuhripũ:

—¿Dohpaguere Jerusalenre erã iirare mu dihta masibeari? arĩ serẽpipu ñgu.

¹⁹ —¿Dohpa wahári Jerusalenre? arĩpu Jesu.

Ñgu eroparicũ Cleofa yuhripũ:

—Jesure Nazare majagure erã iirare arĩrã iiaa. Ñgu Goãmu yare weremuhtagu ártirimi. Eropirã ñgu wereniguirire peerã, ñgu iira sãre ñarã, “Turagu áhrimi,” arĩ pepirima masa. Goãmu sã eropa arĩ pepicumi.

²⁰ Mari pahia oparã, gajirã oparã mera ñgure wejẽdorerã gajirãre ohama.

Erā eropa ocũ gajirāpu ĩgure crusague pabia wejēama. ²¹ “Roma majarāre cóabu Israe masa opu árĭbu āhrimi,” arĭ pepirĭbu gua ĩgure. Dohpagā mera ũhrenũ wahaa ĩgu sĭrira pũhrũ. ²² Bajamerāgā gua mera majarā nome guare ucacũ ĩiama. Boyoro Jesu ĩgu masa gobegue erā eja, ²³ ĩgu dũpũre erā bocabirañorā. Dũpũre bocabiri erā dujara wereama. “Guare anyua dehyoama. Jesu ojocariapu,” arĭ wereama nomepu. ²⁴ Erā eroparĭcũ gajirā gua mera majarāpu iri gobegue eja nome erā arĭdiro dopa ta ĩañorā. Erā sã Jesu mũrũre ĩabirañorā, arĭpu ĩgu Jesure.

²⁵ ĩgu eropa arĭra pũhrũ Jesu werepu erāre:

—Mũa ne peebirā āhraa. ¿Goãmu yare weremuhtanirā mũra erā arĭrare ôaro peebeari mũa? ²⁶ Cristo opu árĭboro core ĩgu ũmarogue ĩgu mũriaboro core ĩgure ñero tariro gahmeabu. ¿Irire masĭbeari mũa? arĭpu Jesu erāre.

²⁷ Eropa arĭgu Goãmu yare erā gojarapũguere erā ĩgure gojayurare Jesu werepehocāpu erāre. Moise mũru ĩgu gojarare Jesu werenũgapũ. Eropigu árĭpehrerā Goãmu yare weremuhtanirā erā gojara sãre erāre werepehocāpu.

²⁸ Erā erā wari macague erā ejacũ Jesupu erāre tarigãgu dopa iipu. ²⁹ ĩgu eropa iiquerecũ ta erāpu ĩgure wadobiriñorā.

—Gua mera dujaque. Ñamicague āhraa. Nairo iica, arĭñorā erā Jesure.

Eropigu Jesu erā mera wihigue ñaja wapu. ³⁰ Pũhrũ ĩgu erā mera erā bari mesague doaja, panre aĭ, Goãmũre “Ōhaa” arĭpu. Eropa arĭgu iri panre nuha aĭ erāre ópu. ³¹ ĩgu eropa iicũ ĩarā erā Jesure ĩha masiñorā pare. Erā ĩha masira pũhrũ ĩgu dederea wapu. ³² ĩgu eropa dederecũ erā erā basi ópa arĭ wereniguiñorā:

—Mague ĩgu marire wereniguirisubu Goãmu ĩgu gojarare ĩgu wereniguirisubu mari sĭporā mera ôaro mucubiriri mera pepĭabu mari, arĭñorā erā basi.

³³ Eropa arĭtuha erā mata Jerusaléngue dujaa wañorā. Erogue eja, once buherāre, gajirā mera gamenererāre bocañorā. ³⁴ Erā ejacũ, once buherā ópa arĭñorā erāpũre:

—Diaye ta mari Opu masa mũriadi āhrami. Simo Pedro ĩgure ĩapu, arĭñorā erā.

³⁵ Erā eroparĭcũ peerā Emau wari maha wanirā sã erā ĩarare wereñorā:

—Jesu ĩgu panre nuha guare ĩgu ocũ ĩha masĭabu gua, arĭñorā gajirāre.

Jesu ĩgu buherāre dehyoapu

Mt 28.16-20; Mr 16.14-18; Jn 20.19-23

³⁶ Erā eropa arĭ wererisubu mata Jesupu erā pohro dehyoanũgajapu.

—¿Āhriri mũa? arĭpu ĩgu erāre.

³⁷ ĩgu eroparĭcũ erā “Sĭridigu mũrũre ĩarā ĩiaa mari,” arĭ pepi, turaro gũñorā. ³⁸ Erā eropa gũicũ ĩagu ĩgu erāre werepu:

—¿Duhpirā gũiri mũa? ¿Duhpirā yare ĩarā “I diaye árĭbeaa, arĭri mũa? ³⁹ Yu mojotorire yũ guburi sãre ĩaque. Mũa irire ĩarā, yare ĩha masirāca. Yũre mohmepique. Mohmepirā masirāca mũa. Sĭridigu mũru dũpu moomi. Yũpu dũpũca, arĭpu Jesu.

⁴⁰ Eroparĭgu ĩgu mojotorire, ĩgu guburire ĩhmupu erāre. ⁴¹ ĩgu eropa ĩhmuquerecũ ta erā burigã mucubiri ũca warā “I diaye árĭbeaa,” arĭ pepiniñorā dohpa. Erā eropa arĭ pepicũ masigu Jesu erāre serēpipũ:

—¿Ōre bari āhriri? arĭpu ĩgu.

⁴² Īġu eroparīcū waimu mupudigure mome imisīri sāre oñorā ĭġure.

⁴³ Irire aī erā ĭhuro Jesu bapū. ⁴⁴ Batuha Jesu werepū erāre:

—Sohō mari árīrasubu mua mera árĭġu yuhū muare werediro dopa ta dohpaguere yure eropa wahabū. Goāmu doreri Moise marire ĭġu apira ĭġu eropa arĭ gojadiro dopa ta yure eropa wahabū. Goāmu yare weremuhtanirā, Salmopūre gojanirā sā iribojegue erā yure arĭ were gojayudiro dopa ta dohpague yure eropa wahabū. Eropa ta waro gahmeabū, arĭpū Jesu.

⁴⁵ Eropa arĭtuha Goāmu yare erā arĭ were gojarare ĭġu buherāre masicū iipū Jesu erāre.

⁴⁶ —Goāmu yare erā gojara ōpa arĭyoro: “Cristo ñero tarigucumi. Eropigu uhrenu puhru ĭġu sīrira puhruere ĭġu masa muriagucumi. ⁴⁷ ĭġu masa muriara puhru árĭpehreri yeba ĭġu yarā Goāmu yare buherācoma. ‘Mua ñerire bujawererā Jesucristo mera mua ñerire cādijirā árĭrāca,’ arĭ wererācoma masare. Eropa weremorā Jerusalén werenugarācoma,” arĭ gojañumi Goāmu yare erā gojarapū, arĭpū Jesu.

⁴⁸ Eropa arĭtuhaja ōpa arĭ werenemopū:

—Muarū i árĭpehrerire ĭanirā āhraa. Eropirā gajirāre wererāca.

⁴⁹ Goāmu “ĭġure muare obeogura,” ĭġu arĭdigure yurū muare obeogura. Eropirā Jerusaléngue ĭġu Espiritu Santo muare ĭġu eraburire coreque mua. ĭġu muare turarire ogucumi, arĭpū Jesu ĭġu buherāre.

Jesu amarogue maria wapu

Mr 16.19-20

⁵⁰ Eropa arĭtuha Jesu erāre Jerusalén árĭrāre Betaniague aĭġapū. Eroque eja, Jesu ĭġu mojotori mera sĭmuju, “Ōaro árĭque,” arĭpū erāre. ⁵¹ Eropa arĭtuha erāre api, amarogue maria wapu. ⁵² ĭġu muriara puhru erā ĭġure umupeo, “Ōagu, turagu āhrimi,” arĭ, Jerusaléngue burigā mucubiriri mera dujaa wañorā. ⁵³ Ero āhri amuri nucū erā Goāmu wihigue Goāmure serēmuriñorā. “Muhū ōagu āhraa,” arĭ umupeoniguicāmuriñorā erā ĭġure. Eropa ta árĭporo. Irĭpēta āhraa.

San Juan

Ñu waicagu ipüre gojadigu Jesucristore ïamuriñumi. Jesucristo i yebare buhecü Ñu ïgu buhegu árimuriñumi. Eropigu Jesu síridigu masa muria ïgu Pagu pohro muriaara pührague Ñu ipüre gojañumi.

Cristo masu ta árínugañumi

¹ Negohraguere i yeba áríboro coregue ta Cristo mata árímuhutamurituhapu. ïgu Goámu mera árípu. Eropigu ïgu Goámu ta árícägu iipu. ² Matague ta Cristo Goámu mera árípu. ³ Eropigu i yebare, umusire árípehrerire ïhacünugudorepu Goámu ïgure. Eropigu masa säre ïhacünugudorepu ïgure. Eropigu irire ïhacünugupehopu ïgu Jesucristo. Eropiro irire ïgu ïhacünugupehobicü i ne mariboya. ⁴ Cristo ojocaririre ogu áhrimi. Boyocü mari mari basi ðaro mari ïha masiro dopa ta, ïgu mari Pagure ðaro ïha masicü iimi marire. Eropigu i yebare eragu mari Pagure masicü iimi masare. ⁵ I yeba majará erä guñaricuri naitíaro iro dopa ñeri áhrraa. Jesucristo boyogoro dopa ta masa pohro eragu erä Goámu yare masicü iimi. Eropiro naitíariñe, boyoriñere ne tarinugabiro dopa ta Cristore ñeripu ne tarinugabiriyoro.

⁶⁻⁷ Goámu Ñu waicagupare obeomuhapu Cristore quere aigã weremuhadoregu. ïgu obeodigu Ñupu eraa guare masare Cristo ïgu ariburire weremi. ⁸ Ñupu Cristo áríbirimi. Eropa áríbiriqueregu ta ïgu Cristore masare weryemuhtagu árími. ⁹ Cristo boyogoro dopa ta árígu árípehrerä masare Goámure masicü iibu i yebaguere aridigu árími. Diaye ta áhrraa. ïgu masare masicü iigu ta áhrimi.

¹⁰ Eropigu Cristo i yebare árídigu árírimi. I yebare ïhacünugudigu árípu. ïgu eropa áríquerecü ta i yeba majará ïgure ne ïha masibirinirä áríma. ¹¹ ïgu ya yeba ïgu masa dehyoadigu árírimi. ïgu ya yeba ïgu masa dehyoadigu áríquerecü ta ïgu ya yeba majaräpu ïgure ne gamebirinirä áríma. ¹² Erä eropa gamebiriquerecü ta árípehrerä ïgure gameräpüre eräre Goámu ïgu porä árícü iimi. ïgure umupeoräre árípehrerä Goámu ïgu porä árícü iimi. ¹³ Erä Goámu porä ta áhrima. Eropirä masa erä gamero Goámu porä wabeama. Goámu gamero mera ïgu porä wahama.

¹⁴ Eropigu Cristo ïgu masu ïgu árínugara pühru mari mera árími ïgu. ïgu eropa árícü ïarä masare mahigu, diaye majare ïgu wereniguigu árícü gua masibu. ïgu dihta Goámu magu árígu turagu árími. ïgu eropa árígu árícü gua masibu. ¹⁵ Ñu waíyegu ïgu buherogue Cristo eracü ïha ðpa arí gaguiniguimi guare weregu:

—Sihí ahrimi yu muare weredigu. ïgu yu pühru masa dehyoadigu áhrimi. Eropa áríqueregu ta yu tauro turagu áhrimi. ïgu yu masa dehyoaboro coregue árituhapu. Eropigu ïgu yu tauro áhrimi. Yuhu muare eropa arí weredigu ta áhrimi ihí, arími Ñu guare.

¹⁶ ïgu Cristopu ðagu turaro masare mahigu árígu marire árípehreräre ðaro iiniguicämi. ¹⁷ Goámu dorerire Moisepu apimuhapu marire. Jesucristopu Goámu masare ïgu mahirire buhegu árími. Goámu ïgu diaye werenigüiri säre buhegu árími ïgu. ¹⁸ Masa ne Goámure ïabeama. ïgure

mari ñabiriquerẽcũ ta ñgu magu ñgu turaro mahigu yujugu ta árigupũ ñgu Pagure marire masicũ iimi.

Gajirã Ñu waĩyegure serẽpiñuma
Mt 3.11-12; Mr 1.7-8; Lc 3.15-17

¹⁹ Judio masa oparã Jerusalén árĩrã pahiare, Goãmu wihi mohmerã sãre Ñu pohrogue obeñorã. “¿Nihino ãhriri muhu?” arĩ serẽpidorerã obeñorã erãre. Erã eropa arĩ serẽpirã ejacũ òpa arĩ weremi Ñupu. ²⁰ Ne yayaro mariro weremi. Diaye ta werepehocãmi guyaro mariro.

—Yuhũ Cristo Goãmu ñgu masare taudoregu ñgu obeodigu árĩbeaa, arĩmi ñgu.

²¹ Ñgu eroparĩcũ erãpu ñgure dipaturi serẽpima daja:

—¿Muhu Cristo árĩbigũ Eliapu ãhriri? arĩma.

—Árĩbeaa yuhũ, arĩmi ñgu.

—¿Gua coredigu Goãmu yare weremuhtagupu ãhriri muhu? arĩma erã.

—Árĩbeaa yuhũ, arĩmi Ñu.

²² Ñgu eroparĩcũ erã ñgure dipaturi serẽpima daja.

—Guare serẽpidorenirãre gua òaro wereboro dopa guare wereque daja.

¿Nihinopũ ãhriri muhu? ¿Dohpa árĩgũno ãhriri muhu? arĩma erã Ñure.

²³ Erã eroparĩcũ òpa arĩ yuñrimi:

—Masa marirogue òpa arĩ gaguiniguũ ãhraa yuhũ. Goãmu ya weremuhtadigu Isaia murũ ñgu werediro dopa ta werea yũ sã: “Mari Opũ ñgu ariboro core òarã árĩyuque ñgure peemorã,” arĩ masare wereyu gaguiniguũ ãhraa yuhũ, arĩmi Ñu erãre

²⁴ Ñure serẽpirã fariseo masa erã obeonirã árĩma. ²⁵ Eropirã erã Ñure serẽpima daja:

—¿Muhu Cristo, Elia Goãmu ya weremuhtagu gua coregu árĩbiriquerẽgu ta duhpigu masare Goãmu ya árĩburire waĩyeri muhu? arĩma erã.

²⁶ Erã eroparĩcũ yuñrimi ñgu.

—Yũ deco mera masare Goãmu ya árĩburire waĩyẽa. Gajigupũ mua masibigupũ mua watope árĩtuhami. ²⁷ Ñgupu yũ puhũ arigu yũ tauro turagu ãhrimi. Òatariagu ãhrimi. Ñgu iro dopa árĩbeaa yũpu. Eropigu ñgure pepigu, “Bu árĩgu ãhraa yuhũ,” arĩ pepia, arĩmi Ñu erãre.

²⁸ Eropa arĩ wereniguima erã Betaniague, dia Jordán waĩcuriya gajipũ masegue, Ñu ñgu masare ñgu waĩyerogue.

—Jesu Goãmu ñgu obeodigu cordero iro dopa ãhrimi, arĩ wereñumi Ñu masare

²⁹ Gajinũ Jesu Ñu pohro ñgu aricũ ñagu Ñu òpa arĩmi guare:

—Ñaque. Ihĩ Goãmu ñgu obeodigu ñgu cordero iro dopa ãhrimi. Cordero mari ñeri iira dipuwajare sĩriro dopa ihĩ sĩrigũ i yeba majarãre erã ñero iirare cóagucumi ñgu. ³⁰ Ihĩ ta ãhrimi yũ òpa arĩdigu: “Yũ puhũ arigu yũ tauro turagu ãhrimi. Yuhũ masa dehyoaboro core ñgu matague ta árĩtuhapũ. Eropigu ñgu yũ tauro turami,” yũ arĩdigu ihĩ ta ãhrimi. ³¹ Yũpu ñre Goãmu magu ñgu árĩrire masibirinibũ. Eropa masibiriquerẽgu ta deco mera waĩyegũ arigu iibũ yũ acawererã Israe masa ñre erã masiborore, arĩmi Ñu.

³² Eropa arĩtuha Ñu werenemomi:

—Espíritu Santo ɯmarogue buja iro dopa bejagu Cristo weca dijarimi. Īgu weca ĩgu dujanuɯgacũ ĩabu. ³³ Īgu weca dujanuɯgajacũ ĩha ĩgure ĩha masibu. Īgu yure masare deco mera waĩyedore obeodigu Goãmuɯu opa arĩ weremuhtatuhami yure: “Espíritu Santo dijari ĩgu weca dujanuɯgajagu ĩgu ta árĩgucumi. Īguɯu Espiritu Santore masa mera eropa árĩniguicũ ĩigu árĩgucumi,” arãmi Goãmu yure. Īgu yure eropa werebircũ ĩha masibiriboya ĩgure. ³⁴ Dohpaguere ĩgure ĩha masituhaa yuhu. Eropa ĩha masigu “Diaye ta Goãmu magu ta aħrimi,” arãa yuhu muare, arĩ weremi Ñu.

Jesu buherã ĩgu ne sihunuganirã árĩñuma

³⁵⁻³⁶ Gajinu Ñu mera gua perã ĩgu buherã ĩgu mera gua niguicũ, Jesu gua pohro tari wahgãgu ĩimi. Īgu eropa tari wahgãcũ ĩagu Ñu dipaturi opa arĩmi guare:

—Īaque. Ihĩ Goãmu ĩgu obeodigu cordero iro dopa árĩgu aħrimi, arĩmi Ñu.

³⁷ Īgu eroparicũ gua perã ĩgu buherãpu irire peerã Jesure nurusiasgãbu. ³⁸ Gua eropa nurusiasgãcũ ĩagu Jesu guare maji ĩha, serẽpimi:

—¿Nohogue wahari mua? arĩmi ĩgu guare. Īgu eroparicũ gua sã ĩgure serẽpibu.

—Buhegu, ¿nohogue aħriri muhu? arĩ serẽpibu gua ĩgure.

³⁹ —Yu mera arinijarã, ĩarã arique, arĩmi guare Jesu.

Īgu eroparicũ guapu ĩgu árĩroque ĩarã wabu. Irisubu ñamicague cuatro hora árĩbu. Eropirã iri ñamire ĩgu mera dujabu gua.

⁴⁰ Gua perã Ñure peerã, Jesure nurusiasgãrã yu mera majagu Andre mera árĩbu. Andrepu Simo pagu magu arĩmi. ⁴¹ Eropigu ĩgu mata ĩgu ĩgure ahma boca, opa arĩ werepu ĩgure:

—Mesiare Goãmu marire taubure Goãmu ĩgu obeodigure bocabu gua, arĩpu Andre Simore. Mesia ero majarã ya mera arĩrã, Cristo arĩrã iima.

⁴² Eropa arĩtuha ĩgu Simore Jesu pohro aĩgãmi. Īgu pohro erã ejacũ ĩagu Jesupu Simore opa arĩmi:

—Muhu Simo waĩcugu Jona waĩcugu magu aħraa. Dohpaguere mure Cefa waĩyegura, arĩmi Jesu Simore. Cefa ero majarã ya mera arĩrã, Pedro arĩma. Eropigu Pedro waĩcumi pare.

Felipere, Natanae sãre sihuñumi Jesu

⁴³ Gajinu Jesu “Galilea yebague ina warã,” arĩmi guare. Eropigu erogue eja ĩgu Felipere bocatĩri opa arĩmi:

—Yu mera majagu árĩbu arique, arĩmi Jesu.

⁴⁴ Felipepu Betsaida majagu arĩmi. Īgu, Andre, Pedro mera yuju maca majarã arĩma. ⁴⁵ Eropigu Felipe Natanaere ahma, boca opa arĩ weremi:

—Goãmu dorerire Moise ĩgu gojarapũgue ĩgu weredigure, gajirã Goãmu yare weremuhtanirã sã erã weredigure gua bocabu. Jesu Nazare majagu José magu ĩgu ta árĩcumi, arĩmi ĩgu Natanaere.

⁴⁶ —Nazareguere ne yujugu õagu marimi, arĩmi Natanaepu.

—Īagu arique muhu, arĩmi Felipe.

⁴⁷ Eropi Natanae Jesu pohro ĩgu ejacũ ĩagu Jesupu opa arĩmi Natanaere: —Ihĩ dohpague arigu diaye ta õagu judio masu gohra aħrimi. ĩgure ne guyari marã, arĩmi Natanaepure.

⁴⁸ Īgu eroparicũ peegu Natanae ĩgure serẽpimi:

—¿Duhpigü yare ðaro masiri mûhü? arîmi.

—Felipe, îgü müre îgü sihuboro core, higuerağü doca mü áricü ìhabu yûhu müre, arîmi Jesu îgüre.

⁴⁹ Îgü eroparîcü Natanaepü ðpa arîmi îgüre daja:

—Buheğü, diaye ta mûhü Goâmü magü ta âhraa. Mûhü Israe masa gûa ðpa áribu âhraa, arîmi Natanae.

⁵⁰ Îgü eroparîcü peegü ðpa arî yahripü Jesu:

—Higuerağü doca yu müre îarare masigü yare “Goâmü magü âhraa,” arî umupeoa mûhü yare. ¿Iri ta müre umupeocü iiri? Müre yu eropa îara tauro Goâmü turari mera yu iicü îağuca mûhü, arîmi Jesu Natanaere.

⁵¹ Eropá arîgü ðpa arî werenemomi:

—Diaye ta müre arîgü iiaa. Yûhu masü Goâmü îgü obeodigü âhraa. Êmarogue Goâmü yarâ anyua erâ yu weca erâ dijaricü, erâ müriacü säre îağuca mûhü, arîmi Jesu îgüre.

2

Caná waîcæri macague erâ mojoto diriri bosenuge Jesu îağü wañumi

¹ Êhrenü pûhrü Caná Galilea áríri macague mojoto diriri bosenu áribü. Eropigo Jesu pago iri wihigue árímo. ² Jesu gûa îgü buherâ sâ erâ mojoto dirirogue sihubeonirâ áribü. ³ Iri bosenu maja vino pehrecü Jesu pago îgüre weremo:

—Dohpaguere vino pehrea wahabu erâre, arîmo igo Jesure.

⁴ Igo eroparîcü peegü Jesu ðpa arîmi:

—Meho, ¿duhpigo irire yare wereri mûhü? Masa erâ yare masiboro dâhyania dohpa, arîmi Jesu îgü pagore.

⁵ Îgü eroparîra pûhrü îgü pagopü mohme corerâre weremo.

—Yu magü îgü dorero dopa ta îique müa, arîmo igo.

⁶ Irisubuguere gûa acawererâ judio masa Goâmü yare iimorâ masare erâ dâpüre eropa coeniguicâdorema. Eropi iri wihi seis gohra máta sorori, deco dicari sorori áribü. Iri deco Goâmü yare iimorâ erâ coeri deco áribü. Iri soroburire ochenta o cien litros sihajabu decore. ⁷ Eropigü erâ mohme corerâre doremi Jesu:

—I soroburire deco mera pisânemo ûjütu dobopehocâque, arîmi Jesu.

Îgü eroparîcü erâpü ðaro ûjütu dobopehocâma iri soroburire.

⁸ Erâ eropa iira pûhrü Jesu erâre doremi daja:

—Dohpaguere iri decore waa aî, sihu bosenu iigure tîarâ waque, arîmi.

Îgü eroparîcü peerâ iri decore waa aîgâ, sihu bosenu iigure tîama erâ.

⁹ Erâ tîacü îgüpu iri decore vino poyara decore ihriñami. Iri vinore “¿Noho majare aîgârayuri erâ?” arî pepipü îgü. Îgü eropa masibiri-querécü îgüre mohme corerâpü iri vinore tîanirâpü masima. Sihu bosenu iigu eropa masibirinijagü, mojoto diridigure sihubeo ¹⁰ ðpa arî weremi:

—Gajirâ masa ðari decore vino decore tîamûhtamurima. Masa erâ ðaro ihrira pûhrü ñequyari vino decopüre tîama erâ. Mûpü ðari vino decore dihbu, pûhrüge guare tîaa, arîmi sihu bosenu iigu mojoto diridigure.

¹¹ Caná Galilea áríri macague decore vino îgü poyacü iira ne Goâmü turari mera îgü deyoro moanagara áribü. Eropa iigu gajirâre îgü turarire ii îhmúmi Jesu. Îgü eropa ii îhmura pûhrü gûa îgü buherâ îgüre umupeobü.

¹² Puhru Jesu, ĩgu pago, ĩgu pagu porã, gua ĩgu buherã mera Capernaungue sihugã wami. Erogue ejarã bajamenarigã dujabu gua.

Jesu Goãmu wihiguere ejañumi

¹³ Pascua árĩcũ gua judio masa bosenu árĩboro merogã duhyanijabu. Eropigu Jesu gua mera Jerusaléngue wami. ¹⁴ Erogue ejaɣu ĩgu Goãmu wihigüe ñajajagu, wecuare, ovejare, bujare duarãre bocajami. Eropigu niyeru gohrotorã erã mesarigüe erã doacũ bocajami. ¹⁵ Eropa bocajagu yuradari mera tãraridari ii, erãre árĩpehrerãre disiporogue tãranaru wiumi. Eropigu niyeru gohrotorã erã ya mesarire yomemuju mehpicãmi. Erã niyeru turi sãre mehsiripicãmi. ¹⁶ Eropa iituha bujare duarãre õpa arĩmi:

—Mua yarã bujare aĩgãque. Yu Pagu ya wihire doberi duari wihi iibiricãque, arĩmi Jesu erãre.

¹⁷ ĩgu eropa iicũ ĩarã gua ĩgu buherãpu Goãmu ya gojarapũ erã arĩrare guñabu. Òpa arĩ gojanirã arĩma. “Goãmu, mu wihire turaro mahia. Eropa mahigu mu wihire ñero erã iicũ ĩagu turaro bujawerea yuhu,” arĩ gojarare guñabu gua Jesu ĩgu buherãpu.

¹⁸ Jesu ĩgu eropa iira puhru judio masa oparã ĩgure serẽpima:

—¿Duhpigu muhu oãre Goãmu wihigüe arĩrãre cohã wiuari? Goãmu irire mre iidoregu árĩcũ Goãmu turari mera ii deyoro moaque gua ĩaburire, arĩma erã Jesure.

¹⁹ Erã eroparĩcũ Jesu yuhrimi:

—I wihire mua cõacũ, uhrenu puhru tuhajaguca yuhu, arĩmi Jesu erãre.

²⁰ —Uhrenu i wihire iisome muhu. Cuarenta y seis bojori gohra erã iira wihi ahraa i wihi, arĩ yuhrima erã Jesure.

²¹ Jesu ĩgu eropa arĩrare erã õaro pee masibirima. Jesu i wihire arĩgu ĩgu dupu waburire arĩgu iirimi. ²² Eropi ĩgu sirira puhru, ĩgu masa muriara puhru gua ĩgu buherãpu ĩgu eropa arĩrare guñabu. Goãmu yare erã gojarapũre, Jesu ĩgu werera sãre guña, “Iri diaye ta ahraa,” arĩbu gua.

Arĩpehrerã erã guñarire Jesu masĩnumi

²³ Pascua bosenu árĩcũ Jesu Jerusaléngue arĩmi. Ero ĩgu árĩcũ masa bajarã Goãmu turari mera ĩgu deyoro moarire ii ĩhmucũ ĩarã ĩgure umupeoma. ²⁴ Erã eropa umupeoquerecũ ta Jesu masa erã guñarire õaro masĩgu, “Yure eropa umupeoniguicãrãcoma,” arĩ pepibiridĩ arĩmi. ²⁵ ĩgu masa erã guñarire õaro masĩmi. Eropa masigu masa ĩgure erã pepirire serẽpibirimi.

3

Jesu Nicodemo mera weretamuñumi

¹ Iri maca majagu Nicodemo waĩcugu, judio masa oparã mera majagu arĩmi. ĩgu fariseo masa ya curu majagu arĩmi. ² Eropigu ĩgu yuju ñami ĩgu Jesu pohro ahri ĩgu mera weretamupu:

—Buhegu, muhu Goãmu ĩgu buhedoredigu ĩgu obeodigu mu árĩcũ gua masia. Goãmu mre ĩgu itamubiricũ mupu ĩgu turari mera ne deyoro moarire ne iibiriboaya. Muhu bajasuburi Goãmu turari mera ii ĩhmua, arĩpu Nicodemo Jesure.

³ ĩgu eroparĩcũ Jesu werẽpu:

—Diaye mure arĩgu iiaa. Ne masa dehyoagu iro dopa dipaturi masa dehyoagu dihta Goãmu yagu árĩmasimi. Mu sã eropa ta árĩmasia, arĩpu Jesu.

⁴—Yaho. ¿Bugupu dohpa ii dipaturi masa dehyoabocuri ĩgu? ĩgu pago niji suhriroguere ñajaa, dipaturi masa dehyoa masiya mariboca ĩgure, arĩpu Nicodemo.

⁵ ĩgu eroparĩcũ Jesu yuhripu:

—Diaye ta arĩgu iiaa mure. Ne masa dehyoagu iro dopa ta deco mera, Espĩritu Santo ĩgu turari mera dipaturi masa dehyoagu dihta Goãmu yagu árĩmasimi. ⁶ Nome nijipo sã nome árĩrã, majirãgãre masa dehyoacũ iima. Espĩritu Santopu masare Goãmu porã árĩcũ iimi. ⁷ “Ne masa dehyoagu iro dopa ta dipaturi masa dehyoagu dihta Goãmu yagu árĩmasimi,” yu arĩcũ ne pee gorowerebita. ⁸ Espĩritu Santo masare Goãmu porã ĩgu iicũ iiri miruñe iro dopa ãhraa. Miruñe iri arirogue ahraa. Iri ariro caricũ mari peea. Eropa peequererã ta iri aridirore, iri waro sãre ne masibea. Eropa ta iimi Espĩritu Santo masare Goãmu porã iigu, arĩpu Jesu Nicodemore.

⁹—Mu eropa arĩrire ðaro masibea, arĩpu Nicodemo.

¹⁰ ĩgu eroparĩcũ peegu ðpa arĩpu Jesu:

—¿Muñu judio masare buhegu arĩqueregu ta, duhpigu yu arĩrire peebeari? ¹¹ Diaye mure arĩgu iiaa. Gua masirare, gua ñarare gua werea. Gua eropa werequerecũ ta ne mua gua acawererã judio masa ne peediabiribu. ¹² I yeba majare yu werenigui queoñaquerecũ ta “Diaye ta ãhraa,” arĩbeaa mua. Eropa arĩbirã Goãmu yare yu werecũ sãre “Diaye ta ãhraa,” arĩsome mua.

¹³ “Ne yujugu umarogue Goãmu pohrogue wagu ne dipaturi dujarisome. Yuhu Goãmu ĩgu obeodigu yu dihta umarogue arĩdigu i yebaguere aribu. Eropigu yu dihta Goãmu yare muare weremasia. ¹⁴ Iribojeguere masa mariroguere Moise maru añare come mera erã wéadigure yucugu erã nugudigugue duhsiupu. Yucugugue ĩgu duhsiudiro dopa ta yure Goãmu ĩgu obeodigure eropa ta yu sãre duhsiurãcoma. ¹⁵ Yure erã eropa iicũ arĩpehrerã yure umupeorã arĩpehrerinuri Goãmu mera arĩniguirãcoma, arĩpu Jesu.

Goãmu arĩpehrerãre mahimi, arĩ gojañumi Ñu

¹⁶ Eropa arĩtuha ðpa arĩnemopu Jesu:

—Goãmu arĩpehreri yeba majarãre turaro mahimi. Eropigu yure ĩgu magure yujugu ta arĩgure Goãmu obeomi arĩpehrerã yure umupeorã peamegue erã wabiriborore. Eropirã arĩpehrerinuri Goãmu mera arĩrãcoma erã. ¹⁷ Goãmu yure ĩgu magure masare dipuwaja moadoregu obeobirimi i yebaguere. Eropigu masare peamegue wabonirãre taubure yure obeomi.

¹⁸ “Yure Goãmu magure umupeorãre ne dipuwaja moasome Goãmu. Yure umupeobirãpũre Goãmu dipuwaja moadoretuhami. Masa yure Goãmu magure yujugu ta arĩgure erã umupeobirira dipuwaja, dipuwaja moagucumi Goãmu erãre. ¹⁹ Yuhu Goãmu magu i yebaguere arigu boyoriñe ðaro ñha masicũ iro dopa ta Goãmu yare ðaro masicũ iiaa masare. Yu eropa masicũ iicũ ñarã yure umupeobirã yare gamebeama. Erã ñerire iiripũre turaro gahmema. Erã eropa gameri dipuwaja erãre dipuwaja moagucumi. ²⁰ Arĩpehrerã ñerire iirã erã ñero iirire duhudiabeama. Eropirã boyoro iiriñe deyoro moaro dopa ta erã ñero

iirare deyro moari arĩrã yure gamebeama. ²¹ Õarire iirãpũ yure, yũ buheri sãre gahmema. Goãmu yare erã iirire yũ õaro deyro moacũ gũhasĩribeama erã. Eropiro yare boyoro iro dopa árĩgure gahmema, arĩ werepũ Jesu.

Dipaturi Ñu waĩyegu Jesure wereñumi

²² Pũhru Jesu gũare ĩgu buherãre Judea yebague sihugã wami. Erogue ejagu ero majarã mera bajamenurĩgã duja, Goãmu ya árĩburire waĩyemi erãre. ²³ Ñu sã masare waĩyegu iipũ Enón waĩcũri macague. Enón waĩcũri maca Salim waĩcũri maca pohro árĩbũ. Ero wũaro dia árĩbũ. Ero eropa árĩcũ ero majarã masare waĩyegu iipũ Ñu. ²⁴ Erã ĩgure peresu iiboro core Enóngue masare waĩyegu iipũ Ñu.

²⁵ Irisubure Ñu buherã mera majarã bajamerãgã judio masa mera waĩyerire wereniguirã duyasoñorã. ²⁶ Tuhaja erã Ñu pohrogue eja irire wereñorã.

—Buhegu, dia Jordán waĩcũriya gajipũ masegue mũ mera árĩdigũ “Īgu ta Cristo ta árĩgũcumi,” mũ arĩdigũpũ dohpague masare waĩyegu iimi. Īgu eropa iicũ árĩpehrerã ĩgu pohrogue wahama pare, arĩñorã erã Ñure.

²⁷ Erã eroparĩcũ peegu Ñu yũhripũ:

—Īgu dorerire ĩgu opacũ Goãmu ĩgure odi árĩmi. ²⁸ “Cristo árĩbeaa yũhũ,” yũ arĩcũ mũa peeabũ. Eropa Cristo árĩbiriqueregu ta ĩgu core weryubure Goãmu ĩgu obeodigu ãhraa yũhũ. ²⁹ Õpa ãhraa iri: Mojoto diridigo ĩgo marapũ mera árĩgo wahamo. Mojoto diridigu mera majagũpũ diridigu ĩgu marapocucũ ĩagu ĩgu werenicũ peegu turaro mucubirimi. Eropigu mojoto diridigu mera majagu ĩgu mucubiridiro dopa ta yũ sã Cristo mera masa erã wacũ ĩagu õaro mucubiria. ³⁰ Cristopure umupeoro gahmea masare. Yũpũre umupeobiricãro gahmea masare, arĩ yũhripũ Ñu.

Goãmu magu umarogue aridigu ãhrimi, arĩ wereñumi Ñu

³¹ Eropa arĩtuhaqu õpa arĩnemopũ Ñu.

—Umarogue aridigu árĩpehrerã nemoro turagu ãhrimi. Mari masa i yeba majarã ãhraa. Eropirã i yeba majare werenĩguia mari. Umarogue aridigũpũ árĩpehrerã nemoro turagu ãhrimi. ³² Īgu ĩarare, ĩgu peerare ĩgu weremi. Īgu eropa werequerecũ ta masa ĩgure ne peediabeama. ³³ Umarogue aridigu ĩgu wererire masa peerãpũ, “Goãmu diaye árĩgu tiimi,” arĩrã iima erã. ³⁴ Ihĩ Cristore Goãmu ĩgu obeodigure Espĩritu Santo ya turarire opehoñumi Goãmu. Eropigu ĩgu Goãmu ya wereniguirire werenĩguimi. ³⁵ Goãmu ĩgu magure turaro mahimi. Eropigu árĩpehrerire, árĩpehrerã sãre erã opu árĩdoremi Goãmu ĩgu magure. ³⁶ Goãmu magure umupeorãpũ umũri nũcu Goãmu mera árĩnigũicãrãcoma. Īgu magure tarĩnũgarãpũ Goãmu pohro wasome. Eropirã umũri nũcu umaroguere arĩsome. Eropigu Goãmu erãre turaro dipuwaja moagũcumi, arĩpũ Ñu masare.

4

Jesu Samaria majago mera weretamuñumi

¹ Jesu Ñu nemoro bajarã ĩgu buherã ĩgu opacũ, Ñu nemoro masare ĩgu waĩyecũ fariseo masa peeñorã. ² Erã eropa peebeoquerecũ ta Jesupũ ĩgu

basi masare waïyebirimi. Gua ïgu buherãpu masare waïyebu. ³ Fariseo masa erã eropa masicũ peegu Jesupu Judea yeba árdigu Galilea yebague sihu dujaa wami guare.

⁴ Galileague warã gua “Samaria yebare tarigã warãca,” arĩbu gua. ⁵ Eropa tarigã Samaria yebague árĩri macague Sica waïcuri macague ejabu. Iri maca pohro iribojegue Jacobo muru ïgu magu José murure ïgu ora yeba árĩyoro. ⁶ Ero Jacobo muru ïgu deco ihrira gobe árĩbu. Eropigu Jesupu yoarogue aridigu, ïgu oëtaria wagu iri gobe pohro doajami. Irisubu ïgu ero doarjarisubu goeri boje gohra árĩbu. ⁷⁻⁸ Gua ïgu buherãpu macague gua barire asũrã wara puhru yujugu ta ïgu erore dujadoami. Eropigo Samaria majago iri gobegue igo deco waague eracũ Jesu igore deco serẽpu:

—Deco oque yure, arĩpu.

⁹ —Mũhu judio masu áhraa. Yupu Samaria majago áhraa. ¿Duhpigu yure decore serẽri mũhu? arĩpo igo Jesure. Judio masa Samaria majarãre game ïadiabirã árĩñorã. Eropigo igo eropa arĩpo Jesure.

¹⁰ Igo eropa arĩra puhru Jesu igore werepu:

—Mure Goãmu ïgu itamudiarire masigo árĩgo, mure decore serẽgure masigo árĩgo, mũpu yũpũre serẽboaya. Mũ eropa serẽcũ gaji decore oboaya yũhu mure. Iri decopũ ojocarinigucãcũ iiri áhraa, arĩpu Jesu igore.

¹¹ ïgu eroparĩcũ peego igo yũhripo ïgure:

—Ne mure sorobu mara. I gobe sã ũhcãri gobe áhraa. ¿Eropigu i ojocaricũ iiri decore nohogue waabocuri mũhu? ¹² Gua ñecu muru Jacobo iribojegue majagu muru i gobere guare apimũripũ. ïgu, ïgu porã, ïgu ejorã sã i decore ihrimuriñorã. “Gaji decore oboaya yũhu,” mũ arĩgu, ¿Jacobu tauro turagu áhriri mũhu eropa arĩ pepigu? arĩpo igo.

¹³ Igo eroparĩcũ Jesu yũhripu:

—Arĩpehrerã i decore ihrirã dipaturi ñemesiburãcoma. ¹⁴ Yaha decopũre ihrirã ne dipaturi ñemesibusome. Epirã yaha decore ihrirã Goãmu mera eropa árĩniguirãcoma. Maũ dipagãgue eropa deco wiriniguero dopa ta yaha deco ne pehresome, arĩpu Jesu.

¹⁵ ïgu eroparĩcũ nomeopũ õpa arĩpo:

—Ne dipaturi yũ ñemesibubiriboro dopa iri decore oque yure. Eropigo dipaturi õguere ne deco waasome, arĩpo igo.

¹⁶ Igo eroparĩcũ Jesu igore werepu:

—Irisubu tamerare mũ marapũre sihugo waque. Sihutuha õgue ariqueru ïgu mera, arĩpu Jesu igore.

¹⁷ —Marapu marigo áhraa yũhu, arĩpo igo.

—Diaye ta arãa mũhu. ¹⁸ Mũhu cincosuburi marapũcutuharibũ. Eropigu dohpague mũ mera arĩgu mũ marapu gohra árĩbeami. Eropigo “Marapu marigo áhraa,” arĩgo, diaye ta arãa mũhu, arĩpu Jesu igore.

¹⁹ ïgu eroparĩcũ peego õpa arĩpo igo:

—Ne, Goãmu yare weremũhtagu áhraa mũhu yũ pepicũ. ²⁰ Gua ñecu samarã mura irigu utãgũgue Goãmure umupeomuriñorã. Epirã mũapu judio masa “Jerusalẽngue masare Goãmure umupeoro gahmea,” arĩmuribũ mua judio masa, arĩpo igo.

²¹ Igo eroparĩcũ Jesu yũhripu:

—Nomeo, yũpũre peenique. Pũhruague irigu utãgũgue, Jerusalẽngue sãre mari Pagure umupeosome mua. ²² Mũapu mua umupeorire masibea. Masare taubũpu judio masu áhrimi. Epirã gua judio masapu

gua umupeogure masia. ²³ Dohpaguere puhrugue sãre Goãmure diaye umupeorã erã òaro pepiri mera ìgure umupeorãcoma. Eropa mari umupeocũ gahmemi Goãmũ. ²⁴ Goãmũ dupu marìgu ta Ìgu áricũ masa ìgure ìabeama. Eropiro ìgure umupeori mera erã òaro pepiri mera ìgure òaro diaye umupeoro ìgurea masare, arìpũ Jesu ìgure.

²⁵ Ìgu eroparìcũ igo yuhripo:

—Mesia, “Cristo,” erã arìgũpũ, masare taubu ìgu ariburire masia yuhũ.

Ìgu arìgu marire árìpehrehire buhepehogucumi, arìpo igo.

²⁶ —Yuhũ ta àhraa Cristo, arìpũ Jesu ìgure.

²⁷ Ìgu eropa arì weretamurìsubu guapũ ìgu buherãpũ erabũ. Jesu nomeo mera ìgu werenìguicũ ìarã uca wacarabũ. Eropa ucaquererã ta “¿Dohpa gahmeri muhũ? ¿Dohpa arìri muhũ ìgore?” arì serèpiñabiribũ.

²⁸ Eropigo nomeo igo sorobure ero duhudobocã, macague waha wamo. Eja masare werego òpa arìpo:

²⁹ —Yũ iirare werepehogure ìarã arique mua. ¿Ìgu diaye ta Cristo árìbocuri? ìarã arique mua, arìpo igo.

³⁰ Igo eroparìcũ iri maca majarã Jesure ìarã arimorã iima. ³¹ Irisubure gua Jesu buherã ìgure turaro badoreribũ.

—Buhegũ, baque, arìribũ gua.

³² —Gajiropa árìri barire opaa yuhũ. Irire mua masibea, arìmi ìgu guare.

³³ Ìgu eroparìcũ peerã gua basi òpa arì werenìguibũ:

—¿Gajirà ìgure barire otuhayuri? arìbũ gua basi. Gua eroparìcũ Jesu weremi:

³⁴ —Masapũ basuama. Yũre obeodìgu ìgu gamerire iigu sua yupũ.

³⁵ “Wapìcurã aberi duhyaa mari òuca aìboro,” pohe opũ ìgu arì pepimi. Muapũ “Goãmũ yare gua masare wereboro duhyania,” arì pepìbìricãque. Diaye arìgu iiaa muare. Dohpague tamerare masare wererã waque. Masare ìaque. Dohpague tamerare yũ buherire masa erã peeburìsubũno árìro tìaa. ³⁶ Dũcare aìrãre erã wajayero dopa ta, yaharã árìmorãre aìnrãre yahare buhenìrãre wajayegura yuhũ. Erã eropiira waja òaro wajayegura erãre. Erã eropa buhecũ peerã yũ buherire peenirà yaharãpũ Goãmũ mera umuri nucũ árìrãcoma. Eropirà erãre buhemũhtanirà, puhru yaharã áricũ iirã sã yujuropa mucubirìma. ³⁷ “Yujugu otemũhtagu àhrimi. Gajìgũpũ dũcare aìgu àhrimi,” arìmũrìnorã irìbojeguere. Iri diaye ta àhraa. Erã eropa arìdìro dopa ta yujurãyeri yahare weremũhtarã àhrìma. Gajirà yahare buhe yaharã áricũ iirã àhrìma. ³⁸ Pohe opũ ìgure mohmerã erã otebìrìnirà árìquerecũ ta erãre dũcare aìdoregũ obeomi. Eropa ta masare buhemũhtabìrìnirà mua árìquerecũ ta erã yare umupeocũ iìdoremorãre obeoa muare. Gajìrãpũ erãre buhemũtatuhama. Erã buhenìràguere dipaturi buhenemorã, yaharã áricũ iirãca muapũ. Eropirà buhemũhtarãpũ erã itamuro mera gajìrãre yaharã áricũ iirãca, arìmi Jesu guare.

³⁹ Irisubure Samaria majago, “Yũ iira mũrare ìgu werepehoami,” igo arìcũ peerã Samaria majarã bajarã Jesure umupeoma. ⁴⁰ Eropirà Samaria majarã Jesu pohro ejarã, “Gua mera dujanìque,” arìma ìgure. Erã eroparìcũ gua penũ ìgu mera ero dujanibũ. ⁴¹ Gajirà sã bajarã Jesure peerã umupeoma. ⁴² Òpa arìma masa nomeore:

—Nere mu arìrãre peerã Jesure umupeonũgarabũ. Dohpague tamerare ìgu werenìguirire gua basi peerã ìgure òaro umupeoa. Eropirà ìgũpũre

peerā i yeba majarāre peamegue wabonirāre taubu diaye ta ĩgu árĩcũ, dohpague gua masia, arĩma masa Samaria majagore.

Opũ magũre dorecũgũre ðagũ wacũ iĩnumi Jesu

⁴³ Penũ puhru Jesu guare Galileague sihu wami daja. ⁴⁴ Neguere ðpa arĩmurimi guare Jesu: “Goãmu ya weremuhtagure ĩgu ya yeba majarā ĩgũre umupeobeama,” arĩmurimi Jesu. ⁴⁵ Eropirā gua Galileague ĩgu mera ejacũ ero majarā ĩgũre ðaro bocatĩrima. Ero core Jerusalengue bosenu árĩcũ Jesu ĩgu iirare ĩanirā arĩma erā.

⁴⁶ Eropi Caná Galilea arĩri macague ĩgu decore vino wacũ ĩgu iira macague waha wabu gua ĩgu mera daja. Caná pohro arĩri maca Capernaum waĩcũri maca opũ magũ dorecũgu iipu. ⁴⁷ Eropigu Jesu Judea árĩdigũ ĩgu Galileague ejari querere peepũ. Irire peegu Jesu pohrogue erami.

—Yũ magũ sirĩgu iiami. Eropigu ĩgũre ðagũ wacũ iigu arique, arĩ yojaro mera sihumĩ ĩgũre.

⁴⁸ ĩgu eroparĩcũ peegu Jesu yũhrimi:

—Goãmu turari mera yũ deyro moarire ĩabirā, ne yũre umupeobea mũa, arĩmi Jesu.

⁴⁹ ĩgu eroparĩcũ peegu opũpũ ðpa arĩmi:

—Opũ, yũ magũ ĩgu sirĩboro core arique, arĩmi ĩgu Jesure.

⁵⁰ —Dujaaque. Mũ magũ ojocarĩgũcumi, arĩmi Jesu.

ĩgu eroparĩcũ peegu, “ĩgu arĩdiro dopa ta ojocarĩgũcumi yũ magũ,” arĩgu opũ dujaa wami. ⁵¹ Eropa dujaniguĩgũre ĩgu pohro majarā ĩgũre bocatĩri wereñorā.

—Mũ magũ masa wahámi, arĩ wereñorā erā ĩgũre.

⁵² —¿Noho gohra abe árĩcũ ðagũ wahári ĩgu? arĩ serẽpipũ ĩgu pohro majarāre.

—Cãrũre goeri boje puhrugā ta nimacũri tahriabu ĩgũre, arĩñorā erā ĩgũre.

⁵³ Erā eroparĩcũ ðpa arĩ pepĩpũ ĩgu: “Jesu yũre ‘Mũ magũ masa wahámi,’ arĩ werera puhru ta nĩmacũri tahria waya,” arĩ pepĩpũ opũpũ. “Diaye ta arãnumi yure,” arĩgu, ĩgu arĩpehrerā ĩgu acawererā mera Jesure umupeoñorā.

⁵⁴ Jesu Judea árĩdigũ Galileague ĩgu ejara puhru opũ magure ĩgu ðagũ wacũ ĩgu iira mera mari queocũ pesubu Goãmu ĩgu turari mera ii ihmũmi Jesu.

5

Curimasibĩgũre ðagũ wacũ iĩnumi Jesu

¹ Puhru judio masa Goãmũre gua umupeori bosenu árĩcũ gua Jesu mera Jerusalengue ejabu daja. ² Ero maca ñajari disiporo oveja waĩcũri disiporo pohro guhari gobe árĩbũ. Gua judio masa ya mera Betesda waĩcũri gobe árĩbũ. Iri deco gobe pohro cinco gohra tiaya mariri tari dipabu árĩbũ. ³ Iri tari dipabugue bajarā dorecurā oyarāre ĩabu. Cuirĩ ĩhajabirā, curimasibirā, gõari marirā, erā iri gobe pohro oyama. Deco ñohmeborore corerā iĩnorā. ⁴ Erogue dijarĩgu iri gobe maja decore yujuyerisuburi ñohmecũ iipu anyu. Iri gobe maja deco ĩgu ñohmera puhru ñaja guhamuhtagupũ ðagũ wapũ. Dohpa arĩri dorere opagu ðagũ wapũ. ⁵ Eropigu ero yujugũ dorecũgu oyami. ĩgu treinta y ocho bojori

gohra dorecugu árīpu. ⁶ Ero ĩgu oyacũ ĩagu ĩgu eropa yoari boje ĩgu dorecucũ masimi Jesu ĩgure. Eropas masigu ĩgure serēpimi:

—¿Oari dapa dore marigu árīdiari muhu? arĩmi Jesu ĩgure.

⁷ ĩgu eroparĩcũ dorecugupu yuhrimi:

—Iri deco ñohmecũ yure decogue aĩ acugu marimi. Iri decogue yu ñajadiaquerecũ ta gajirāpu yu core yuu ñajamuhtama, arĩmi ĩgu Jesure.

⁸ —Wahgānugajaque. Mu omasiariñere aĩ, mu guburi mera cūhrapi wahgā waque, arĩmi Jesu ĩgure.

⁹ ĩgu eroparĩcũ ta dorecugupu wahgānugaja ĩgu omasiariñere aĩ waha wami. Irinu Sabado gua judio masa soorinu árību. ¹⁰ ĩgu eropa ōagu wadigu ĩgu omasiariñere aĩgācũ ĩarā judio masa gua oparāpu dorecudigure ōpa arĩ wereñorā:

—Dohpagāre Sabadonu mari soorinu árĩquerecũ mu yañe omasiariñere aĩ wahgāa muhu. Eropas iigu mari dorerire tarinugagu iiaa, arĩñorā erā ĩgure.

¹¹ —Yure yu dorecurire taudigupu ōpa arāmi yure, arĩpu dorecudigupu. “Mu omasiariñere aĩ, mu guburi mera cūhrapi wahgāque,” arāmi yure, arĩ yuhripu dorecudigu murupu erāre judio masa oparāre.

¹² —¿Irire mure eropa arĩdigupu nihino āhriri ĩgu? arĩ serēpiñorā erā ĩgure.

¹³ Ero bajarā masa erā árĩcũ ĩagu Jesupu waha wadigu árĩmi. Eropigu dorecudigupu ĩgure ōagu wacũ iidigu ĩgu wañre masibiripu. ¹⁴ Puhru Goāmu wihigue gua ĩgure bocatĩricũ Jesu ĩgure weremi:

—Peñique muhu yure. Dohpaguere ōaro dapaçua muhu. Ñerire iinembiricāque. Dipaturi iinemoçu mu dorecudiro tauro waguca, arĩmi Jesu ĩgure.

¹⁵ ĩgu eropa arĩra puhru dorecudigu judio masa oparā ĩgure serēpinirā pohrogue eja, werepu erāre:

—Jesu waicugu yure ōagu wacũ iiami, arĩ werepu ĩgu.

¹⁶ Eropi Sabado árĩcũ Jesu dorecugure ĩgu dorere ĩgu taucũ masirā judio masapu ĩgure ñero iinugañorā. Eropirā erā ĩgure wejēdiariñorā.

¹⁷ Eropas ñero erā iidiarire masigu Jesupu weremi erāre:

—Yu Pagu dohpaguere mohmenimi. Yu sã eropigu mohmenigu iiaa, arĩ weremi ĩgure ñero iidiarāre.

¹⁸ ĩgu eroparĩcũ judio masa gua oparā ĩgu mera turaro guarā, ero core erā arĩdiro tauro ĩgure wejēdiarñorā. Sabadonure erā soorinure ĩgure ōagu iicũ ĩarā erā guañorā. Eropas guarā Goāmure ĩgu “yu Pagu,” ĩgu arĩcũ peerā erāpu tauro guañorā. “Yu Pagu,” arĩgu Jesu ĩgu basi ‘Goāmu mera yujuro mera āhraa,’ arĩ guñacumi ĩgu,” arĩ pepiñorā judio masa gua oparā.

Jesu “Goāmu ĩgu obeodigu āhraa yuhu,” arĩ masare wereñumi

¹⁹ Eropi Jesu erāre weremi:

—Diaye muare arĩgu iiaa. Yuhu Goāmu magu yu gamero iigu iibea. Yu Pagu ĩgu iirare ĩagu irire iiaa. ²⁰ Yu Pagu yure ĩgu magure mahimi. Eropigu ĩgu iirare yure ii ĩhmupehomi. I dohpaguere ĩgu turari mera yu ĩra tauro ĩgu gajire iidoregacumi yure. ĩgu eropa iidorecũ ĩgu turari mera ii ĩhmuçua ĩgure yuhu. Eropas yu ii ĩhmuçũ ĩha uçarāca mua. ²¹ Yu Pagu sīrinirāre ĩgu masuro dopa ta yu sã yu gamerāre masugura. ²²⁻²³ Ne yu Pagupu masa erā ñeri iira dipuwaja, ĩgu basi dipuwaja moagu moabeami.

Yupure irire erã ñeri iira dipuwaja dipuwaja moabure apimi. Erã İğure umupeodiro dopa ta yu sãre umupeoborore eropa apimi. Eropirã yure İgu magure umupeobirã yu Pagu sãre umupeobea maa. İgu aħrimi yure obeodigu, arĩmi Jesu.

²⁴ Eropa arĩtuha õpa arĩ werenemomi:

—Diaye mware arıgu iiaa. Yu wereniguirire peerã yure obeodigure umupeorã umuri nucu umarogue eropa arĩnigucãrãcoma. Eropigu erãre dipuwaja moasome yuhu. Eropirã erã peamegue wabonirã tarirãcoma. ²⁵ Diaye ta mware arıgu iiaa. Peamegue wamorã yure Goãmu magure erã peeburisubu dohpague aħraa. Puhru sãre erã yure peerãcoma daja. Eropa peerã peenurãpu Goãmu mera eropa arĩniguirãcoma. ²⁶ Goãmu yu Pagupu erãre eropa arĩnigucũ iigu aħrimi. Eropigu yure İgu magure erãre eropa arĩnigucũ iibure arĩdoremi İgu yure. ²⁷ Eropigu yuhu masu Goãmu İgu obeodigu arĩcũ İgu masare dipuwaja moadorerire apimi yure. ²⁸ Ire peerã, pee ucabircãque maa. Gajinugure arĩpehrerã sirinirã masa goberigue arĩrã yu werenigucũ peerãcoma. ²⁹ Eropa pee wahgãrã õarire iinirã mura umuri nucu Goãmu mera arĩmorã masa muriarãcoma. Ñeri iinirã murapu ñerire erã iira dipuwaja peamegue warãcoma, arĩ weremi Jesu.

³⁰ Eropa arĩtuha õpa arĩ werenemomi:

—Yu gamero ne gajinore iibea. Ne yu basi yu gamero iibea. Yure obeodigu İgu gamero dopa ta iiaa. Eropigu İgu arĩdiro dopa ta dipuwaja moaa. Eropigu masare yuhu dipuwaja moagu diaye ta iiaa. ³¹ “Yuhu Goãmu magu İgu obeodigu aħraa,” yu basi arĩ wrecũ, “Mu wereniguirire ne diaye arĩbeaa,” arĩboca maa. ³² Gajigu aħrimi yure weregũ. İgu Goãmu aħrimi. İgu yure werera diaye ta aħraa. Irire yu õaro masia. ³³ Maa gajirãpũre Ñure yure serẽpidore obeobu. Eropigu İgu sã diaye ta weremi mware. ³⁴ Masare yure “Goãmu İgu obeodigu aħrimi,” arĩ weremorãre amabeaa yapu. Eropa amabiriqueregu ta Ñu masu İgu arĩquerecũ ta “Yure diaye ta weremi,” arãa. Maa yure umupeoburire, maa peamegue wabonirã maa tariburire yure İgu werera “Diaye ta aħraa,” arĩ weregũ iiaa. ³⁵ Ñu mware buhemuhtagu bajamenurigã buhemi mware. İgu eropa buhecũ peerã bajamenurigã mucubiriribu maa. ³⁶ Ñu yu arĩricurire weremi mware. İgu wereri mera yu arĩricurire masiquererã yu iirire İarã tauro masirãca. Goãmu yu Pagu İgu turari mera İgu yure iidorerare dohpague iigu iiaa. Ire yu iicũ İarã diaye ta Goãmu İgu obeodigu yu arĩcũ masirãca maa. ³⁷ Eropiro yu Pagu yure obeodigu İgu basi yuhu İgu obeodigu arĩrĩre arĩ weremi mware İgu yare erã gojarapũgue. İgu eropa arĩ werequerecũ ta İgu wereniguirire ne peebeaa maa. Eropi maa İgure ne İabeaa. ³⁸ Yure Goãmu İgu obeodigure maa ne peediabeaa. Eropirã maa ne Goãmu yare gamebeaa. ³⁹ Goãmu yare erã gojarapũre maa õaro buhea. Eropa buherã “Gua ipũre buherã umuri nucu Goãmu mera eropa arĩniguirãca,” arãa maa. Iripũ ta yure werea. ⁴⁰ Iripũ yure werequerecũ ta murapu yure gamebeaa. Umuri nucu Goãmu mera maa arĩniguirire yuhu ogu arĩquerecũ yure gamebiribu maa, arĩ weremi Jesu erãre.

⁴¹ Eropa arĩtuha õpa arĩnemomi:

—Yure masa erã umupeorire amabeaa yuhu. ⁴² Eropa amabiriqueregu ta Goãmure maa mahibircũ masia yuhu. ⁴³ Goãmu yu Pagu İgu dorero

dopa ta yu ariquerecu ta mua yure gamebeaa. Gajigupure Goamu Igu obeobiridigu Igu ariquerecu ta igupure gameraca mua. ⁴⁴ Gajira masa muare era umupeocu gahmeaa mua. Goamu mua mera Igu mucubirire gamebeaa mua. Igu dihta Goamu gohra ahrimi. Eropa gamebirã yare peebeaa mua. Yure umupeobeaa mua. ⁴⁵ Muare yu Paguguere ne weresasome yuhu. Iriree pee masique mua. Moise Igu gojarapupu muare weresarooca. "Iripu maja dorerire ipehorã, Goamu pohro waraca mua," ariripupu muare weresarooca. ⁴⁶ Moise Igu gojarapu yupure weremuhtayoro. Eropira iripure oaro umupeora yu sare umupeoboaya mua. ⁴⁷ Moise Igu gojarapure mua oaro peebira, yaha wereniguiri sare peesome mua, arimi Jesu erãre.

6

Cinco mil umare masare bajarã gohrare bari oñumi Jesu
Mt 14.13-21; Mr 6.30-44; Lc 9.10-17

¹ Eropa Igu buhera puhru Galilea waicuri ditaru gajipu masegue gua Jesu mera taribuja wabu. Galilea ditaru ta Tiberia waicubu. ² Ero core Galilea yeba Jesu dorecurãre Igu oara Igu iicu masa Ianira arima. Era eropa Ianira arira Jesu Igu taribujacu Iara masa bajarã Iguere nurusia taribujama. ³ Erogue eja, gua Igu buherã Igu mera utãgugue maria, doabu. ⁴ Iriinu Pascua waicuri bosenu ariboro judio masa bosenu ariboro meroga duhyabu. ⁵ Erogue doagu, Jesu masa bajarã Igu pohro era aricu ihabeomi. Eropa ihabeogu Felipe serepimi Jesu:

—¿Oã masa era baburire nohogue asuracuri mari? ar serepimi.

⁶ Jesu Igu basi Igu iiburire masiqueregu ta Felipe serepi Iami, "¿Dohpa yuhrigucuri?" arigu. ⁷ Igu eropa serepicu Felipe yuhrimi:

—Doscientos niyerupuri waja mera mari asuquerecu ta, masare yurayerire mutariga barire mari guerequerecu ta ne sihasasome, arimi Felipe Jesure.

⁸ Gua mera majagu Andrepu Simo Pedro pagu magupu Jesure weremi.

⁹ —Cinco pan dipuru, pera wai ihã majigu ohõ opami. Iri pan dipuruga Igu opaquerecu ta masapu bajarã gohra ahrima. Eropiro i meroga bari ne sihasasome, arimi Andre.

¹⁰ —Masare doadoreque mua, arimi Jesu guare Igu buherãre.

Ero mutariga taacuro aribu. Gua doadorecu masa aripehrera doajapheera wama taa weca. Uma dihtare queocu cinco mil gohra arima.

¹¹ Era eropa doajacu Iagu Jesupu panre ai Goamure "Ohaa," arimi. Eropa arituha guare Igu buherãre gueredoremi. Igu eropa gueredorecu guapu era doarãre guere wahgabũ. Pera wai sare ai guere wahgabũ. Aripehrera era sihajaro barire guerebu. ¹² Eropira masa era yapicu Iagu Jesu guare doremi:

—Era ba duharire aique. Eropira iri barire ne dedesome, arimi.

¹³ Igu eroparicu guapu cinco pan dipuru duhyarare gua gameneocu doce puiri gohra wiribu. ¹⁴ Eropira masa Jesu Goamu turari mera iri deyoro moariñere Igu iicu Iara opa arima:

—Diaye ta ahraa. Ihã Goamu ya wereniguigu i yebague aridigu mari coredigu ta ahrimi, arima era.

¹⁵ Eropira era Jesure era opu aribure acudiarima. Jesu irire masigu dipaturi yujuga ta utãgugue waha wami.

*Jesu deco weca curiñumi**Mt 14.22-27; Mr 6.45-52*

¹⁶ Ñamicague gaa ñgu buherā dihta ditarugue buhabu. ¹⁷ Eroguere buhaja dohodirugue ñaja, Capernaum waicuri macague taribujabu. Gaa eropa taribujacū ñamigo áribu. Eropigu Jesu gaa pohroque arinibirimi dohpa. ¹⁸ Miruñe turaro aricū gaa taribujariyagure páguri wahgābu. ¹⁹ Cinco kilómetros gohra gaa taribujara puhru Jesu gaa pohroque árimi. Deco weca nigui wahgāricū íabu gaa ñgure. Eropa gaa pohro ñgu aricū íarā gaa güibu. ²⁰ Gaa güicū íagu ñgu guare weremi:

—Ne yure íha ucabiricāque. Guñaturarā árique. Yuhu ta áhraa, arími Jesu.

²¹ Ñgu eroparicū peerā gaa ñgure mucubiriri mera bocatiri ñajadorebu. Ñgu ñajara puhrugā gaa wara yebaguere taribujajabu.

Masapu Jesure amañuma

²²⁻²⁴ Gajinu masa ero dujanirāpu gamenerenugañorā daja Jesure corerā. Iri ñamire gaa yaru mera gaa dihta taribujacū íanirā árima erā. Jesu gaa mera ñgu wabiricū säre íanirā árima erā. Eropa gamenererā Jesure bocabirirā. Bocabiri ero pohro Tiberiague ariri gasi tuhajacū íañorā. Jesu Goāmure “Óhaa,” arí, masare ñgu bari guerediro pohroñarigue aríyoro. Eropirā Jesu gaa sã maricū íarā, iri gasigue ñaja, Capernaumgue guare nurusia taribujajama. Jesure ahma nurusiagārā iima erā.

Yuhu ojocaririre ogu, bari iro dopa arígu áhraa, arí wereñumi Jesu masare

²⁵ Ditarure taribuja, gaa áríroque eja, Jesure bocajanirā erā serēpima ñgure:

—Buhegu, ¿dohpáricū ahrari muhu õguere? arí serēpima erā ñgure.

²⁶ Erā eropa arí serēpicū, Jesu erāre weremi:

—Diaye arígu iiaa muare. Deyoro moarire yu iiquerēcū ta yupure umupeobea ma. Yure umupeobiriquererā ta yure ahmaa ma. Yu mera pagari baha, ma yapinirā arírā yure amagárirā iiaa daja.

²⁷ Bari ne áríniguibea. Puhru pehrea wahaa iri. Eropirā irire eropa amaniguibiricāque. Gaji bari gajiropa aríri baripure amaque ma. Iri barire amarā umuri nucū Goāmū mera arírāca. Eropiro iri bari tamera ne pehrebea. Iri barire yuhu masu Goāmū ñgu obeodigu muare ogura. Goāmū yu Pagu yure irire odoregu áhrimi. Ñgu obeodigu yu árírire íhmutuhami muare, arími Jesu.

²⁸ Ñgu eroparicū erā serēpima ñgure:

—¿Goāmū iidorerire iimorā dohpa iirācuri gaa? arí serēpima erā.

²⁹ —Ire Goāmū muare iidoremi: “Yure ñgu obeodigure umupeoque,” arí doremi Goāmū, arími Jesu.

³⁰ Ñgu eroparicū peerā erā õpa aríma:

—Goāmū ñgu obeodigu ma arígu ñgu turari mera ii íhmuque guare mure gaa õaro umupeoborore. ¿Ñehenore iibocuri muhu? ³¹ Mari ñecu sumarā murague iribojegue majarā masa maríroque mana waicuri dipurure bamurirā. Goāmū yare erā gojaripūgue õpa arí wereyoro: “Ñgu erāre umaro maja dijuri barire omuripū erā baburire,” arí gojañuma Goāmū yare erā gojarapūgue. ¿Ñgu eropa iidiro dopa ta iigu iiri mu sã? aríma erā.

³² Erā eroparicū Jesu weremi erāre:

—Diaye muare arĩgu iiaa. Moisepu iri umaro maja barire mua acawereräre obiriñumi. Yu Pagupu umaro maja barire diaye maja barire muare ogu aħrimi. ³³ Goãmu ĩgu bari umaro dijari árĩpehreri yeba majaräre ojocaririre omasia, arĩmi Jesu.

³⁴ —Opu, umuri nucu iri barire oque guare, arĩma erä.

³⁵ Erä eroparĩcũ peegu Jesu weremi eräre:

—Yupu ojocaririre ogu bari iro dopa arĩgu aħraa. Mari ya barire barä matagä ta oaboa wahaa mari. Ihriri säre mari ihrira puhragä ta ñemesibua daja. Yure gamegupu, yure umupeogupu, ne oaboabigu ñemesibubigu iro dopa ĩgu õaro árĩri ne pehresome ĩgure. ³⁶ Muapu yure iaquererä ta umupeonibeaa dohpa. Irire ta muare wererabu yahu.

³⁷ Árĩpehrerä yu Pagu yarä árĩmoräre ĩgu aĩniräpu yure gameräcoma. Eropigu yure gameräre ne cóasome yahu. ³⁸ Umarogue arigu yu gamero ĩgu arigu iibiribu. Yure obeodigu ĩgu gamero dopa ta ĩgu aribu. ³⁹ Ita árĩbu yure obeodigu ĩgu gameri gohra: Árĩpehrerä yaharä árĩmorä yure ĩgu oniräre yu dedeobiricũ gahmemi. Yure obeodigu pehrerinu árĩcũ eräre yu masucũ gahmemi. ⁴⁰ Árĩpehrerä yure Goãmu magure ĩarä, yure umupeorä umuri nucu ĩgu mera erä árĩcũ gahmemi yu Pagu. Eropigu pehrerinu árĩcũ eräre masugura, arĩmi Jesu.

⁴¹ “Yuhu umarogue ariri bari iro dopa arĩgu aħraa,” ĩgu arĩcũ peerä judio masa gua oparäpu ĩgu mera guarä, erä basi Jesure ñero arĩ wereniguima.

⁴² —¿Ihĩ Jesu José magu árĩbeari? ĩgu pagu, ĩgu pago säre mari masia. ¿Eropa árĩqueregu ta duhpigu “Umarogue aribu,” arĩ wereniguiri ĩgu? arĩ guama erä.

⁴³ Erä eroparĩcũ peegu Jesu weremi eräre:

—Mua basi yure ñero arĩ wereniguibiricäque. ⁴⁴ Yu Pagu yure obeodigupu masare yure gamecũ iimi. ĩgu eropiibiricũ masapu yaharä árĩmasibiriboñuma. Pehrerinu árĩcũ yaharäre masuguca yahu. ⁴⁵ Goãmu ya weremuhtaniräpu õpa arĩ gojañuma: “Goãmu eräre buhegucumi,” arĩ gojañuma. Árĩpehrerä yu Pagu ĩgu buherire peerä ĩgure yuhrirä yure gahmema. Eropirä yaharä aħrĩma.

⁴⁶ “Yu Pagure ne yujugu masu ĩabeami. Yuhu Goãmu ĩgu obeodigu dihta yu Pagure ĩabu. ⁴⁷ Diaye arĩgu iiaa muare. Yure umupeogu árĩpehrerinuri yu Pagu mera árĩniguigucumi. ⁴⁸ Yupu ojocaririre ogu bari iro dopa arĩgu aħraa. ⁴⁹ Mua ñecu sumarä murague masa marirogue manare bamuriñorä. Eropa irire baquererä ta sĩaria wañorä. ⁵⁰ Umarogue ariri baripure masu bagu ne sĩrisome. ⁵¹ Yuhu umarogue ariri bari ojocaririre ori bari iro dopa arĩgu aħraa. I barire bagu umuri nucu yu Pagu mera eropa árĩniguigucumi. I bari ojocaririre ori bari iro dopa árĩri yu dupu ta aħraa. Árĩpehreri yeba majarä Goãmu mera eropa erä árĩniguiburire yu dupure ogura. Eropa oga siriguca, arĩmi Jesu.

⁵² ĩgu eroparĩcũ peerä judio masapu õpa arĩ wereniguima erä basi:

—¿Ihĩ dohpa ii ĩgu dupure baburi ogucuri? arĩma erä erä basi.

⁵³ Erä eroparĩcũ peegu Jesu weremi:

—Diaye arĩgu iiaa muare. Yuhu Goãmu ĩgu obeodigu aħraa. Yu dupure babigu, yu dire ihribigu Goãmu mera árĩsome. ⁵⁴ Yu dupure bagure, yu dire ihrigure, pehrerinu árĩcũ masugura. ⁵⁵ Yu dupu diaye ta bari gohra iro dopa aħraa. Yu di diaye ta ihriri gohra iro dopa aħraa. ⁵⁶ Yu dupure

bagu ya dire ihrigu ya mera mucubiriri mera árñiguigucumi. Eropigu yuhũ igu mera mucubiriri mera árñiguiguca. ⁵⁷ Yu Pagu yure obeodigu eropa árñiguicãmi. Eropa árñiguigũ yu sãre eropa árñiguicũ iimi. Eropirã yure eropa árñiguigure masa barã, Goãmu mera umaroguere eropa árñiguirãcoma erã sã. ⁵⁸ Ita ahraa umarogue ariri bari. Mari ñecu sumarã mura erã bara mura iro dopa árĩbeaa i bari. Erãpu iri barire baquererã ta sãria wañorã. I baripure bagu umaroguere eropa árñiguicãgucumi, arĩmi Jesu.

⁵⁹ Capernaum judio masa gua buheri wihi Jesu buhegu, eropa weremi.

*Jesu igu buherire peerã umarogue eropa árñiguirãca mari, arĩ go-
jañumi Ñu*

⁶⁰ Igu eropa wereniguicũ peerã bajarã gua watope árĩrã Jesure gamerã, igure nurusianirã õpa arĩ wereniguima:

—I buheri diasã ahraa. Eropirã mari peediabiriñaria, arĩ wereniguima erã erã basi.

⁶¹ Erã eroparicũ Jesupu erã wereniguirire masimi. Eropa masigu igu erãre serẽpimi:

—¿I buherire peerã guari mua? ⁶² ¿Yuhũ masu Goãmu igu obeodigu umarogue dujaa wacũ dohpa wabocuri mua? ⁶³ Masu igu siporãre opagu ojocarimi. Igu dupupu igure ojocaricũ iibeaa. Masure igure igu siporã ojocaricũ iro dopa ta ya buheripu muare Goãmu mera eropa árñiguicũ iiaa. ⁶⁴ Gajirã mua mera majarã ne yure umupeobeama, arĩmi Jesu.

Negohraguere Jesu igure umupeobiribonirãre masituhajapu. Igure ñaturirãre wiabu sãre mata masituhapu. Eropa masigu “Gajirã mua mera majarã yure umupeobeama,” arĩmi Jesu guare.

⁶⁵ Eropa arĩtuhaja õpa werenemomi:

—Õpa arĩ wererabu muare. “Yu Pagupu masare yure gamecũ iimi. Igu eropa iibiricũ masapu yaharã árĩmasibiriboñuma,” muare arĩrabu, arĩmi Jesu.

⁶⁶ Igu eropa arĩ buhecũ peerã bajarã Jesure gamenirã mura igure cohã, igu mera dipaturi wabirima. ⁶⁷ Erã eropa iicũ ñagu Jesu guare doce igu buherãre serẽpimi:

—¿Mua sã yure cóacãrãcuri? arĩ serẽpimi guare.

⁶⁸ Igu eroparicũ Simo Pedro yuhrimi igure:

—Opũ, guare gajigu buhegu marimi. Mu buherire peerã Goãmu mera eropa árñiguirãca gua. Mu buheri dihta irire werea guare. ⁶⁹ Eropirã gua mure umupeoa. Eropa muhũ õagu, Goãmu magu igu obeodigu mu aricũ gua masia. Eropirã mure cóasome gua, arĩmi Simo Pedro Jesure.

⁷⁰ Igu eroparicũ peegu Jesu weremi guare:

—Yupu muare doce majarãre beyebu. Yujugu mua mera majagu watĩ yagu árĩbu ahrimi, arĩmi guare igu buherãre.

⁷¹ Eropa arĩgu Judare Simo Iscariote magure arĩgu iimi. Judapu doce gua mera majagu Jesure ñaturirãre wiabu arĩmi.

7

Jesu pagu porã igure peediabiriñuma

¹ Puhru gua mera Jesu Galilea yeba curigu wami. Judea yeba majarã judio masa igure wejediañorã. Erã eropa wejediacũ masigu igu iri yebare

wabirimi. ² Judio masa m̄ta wiriḡa gua iiburin̄u bosenu meroḡa duhyabu.

³ Eropir̄a Jesu pagu por̄a ĩgure werema:

—Judeague bosenure ĩagu waque. Ero mu yar̄are deyoro moarire ii ĩhmuḡu waque muha. ⁴ Masare deyoro moarire ii ĩhmudiagu m̄re dibubiric̄aro gahmea. Deyoro moarire iigu ar̄ıḡu ar̄ıpehrer̄a er̄a ĩhuro ĩıque, ar̄ıma er̄a.

⁵ ĩgu pagu por̄a ar̄ıquerer̄a ta Jesure “Gōamu magu āhrimi,” ar̄ıbirima. Eropir̄a eropa ar̄ıma er̄a ĩgure. ⁶ Er̄a eropa ar̄ıra puhru Jesu weremi er̄are:

—Masa yure er̄a oaro masiburisubu duhyania dohpa. Muapu bosenure ĩadiar̄a waque. ⁷ Ero majar̄a muare ĩhaturibeama. Yur̄ure er̄a ñeri iirare yu werec̄u yure ĩhaturima. ⁸ M̄a seyaro bosenu ar̄ıc̄u waque. Yur̄ure yu waburisubu duhyania dohpa. Eropıgu yapu bosenure ĩagu wanıbeaa dohpa, ar̄ımi Jesu er̄are.

⁹ Eropa ar̄ıgu ĩgu Galilea dujami.

M̄ta wiriḡa er̄a iirin̄ari bosenu ar̄ıc̄u wañumi Jesu Jerusalengu

¹⁰ Bosenugue Jesu ĩgu pagu por̄a er̄a wara puhru Jesu s̄a gua mera er̄a puhru wami. Eropa wagu masa er̄a ĩabiririsubu wami. ¹¹ Bosenu ar̄ır̄a judio masa gua opar̄a ĩgure amañor̄a:

—¿Nohogue ar̄ıcuri ĩgu? ar̄ı ser̄epiñor̄a.

¹² Eropir̄a masa bajar̄a Jesure werewuañor̄a. Gajir̄a, “ĩgu oagu āhrimi,” ar̄ıñor̄a. Gajir̄apu, “ĩgu ñegu āhrimi. Masare guyagu āhrimi,” ar̄ı werewuañor̄a.

¹³ Eropa ar̄ıquerer̄a judio masa gua opar̄are guir̄a, masa er̄a ĩabirogue Jesure werewuañor̄a.

¹⁴ Gua erogue ejara puhru bosenu deco Jesu Gōamu wihigue ñajaja buhemi. ¹⁵ ĩgu eropa buhec̄u judio masa uca wa opa ar̄ıma:

—¿Ihı buherogue buhebiḡu ar̄ıqueregu ta duhpıgu oaro masıpehori ĩgu? ar̄ıma er̄a ĩgure.

¹⁶ Er̄a eropar̄ıc̄u Jesu weremi er̄are:

—Yu buheri yaha werenıguiri ar̄ıbeaa. Yure obeodıgu ya werenıguirıpu āhraa i buheri. ¹⁷ Gōamu gamerire iidıar̄a yu buherire “Gōamu werenıguiri ta āhraa,” ar̄ı masır̄acoma. Yu buheri yaha werenıguiri dihta ar̄ıbiric̄u s̄are masır̄acoma. ¹⁸ Yujugu ĩgu gamero ĩgu masiri mera buhegu ar̄ıḡu “Yu dihtare umupeoque,” ar̄ıḡu āhrimi ĩgu. Yure obeodıgur̄ure m̄a umupeoc̄u gahmea yapu. Yu eropar̄ıc̄u peer̄a, “Diaye ta werenıguimi ĩgu. Ne guyabeami,” ar̄ı masır̄aca m̄a.

¹⁹ “Gōamu dorerire Moise m̄ur̄upu apımur̄ıñumi muare. ĩgu eropa apıquerec̄u ta m̄a ar̄ıpehrer̄a iri dorerire ne yuhribeaa. ¿Duhpir̄a yure wej̄ıdıari m̄a? ar̄ımi Jesu judio masare.

²⁰ —M̄u goroweregu āhraa. M̄re wej̄ıdıar̄a marıma, ar̄ı yuhrima er̄a Jesure. Er̄a eropar̄ıc̄u Jesu yuhrimi:

²¹ —Yuh̄u soorinu yujusubu Gōamu ĩgu turari mera dorecugure ĩgu dorere yu c̄oac̄u m̄a ĩha uca wabu. ²² Mari ñecu sumar̄a irıbojegue majar̄apu er̄a dupure meroḡa gasıroḡare wiri ar̄ı er̄a ar̄ıdıro dopa ta Moise wıridoreñumi. ĩgu eropa dorec̄u majır̄aḡare ocho nurı er̄a masa dehyoara puhru soorinu ar̄ıquerec̄u ta er̄a dupure meroḡa er̄a gasıroḡare wiri aımurıa m̄a. ²³ Mari soorinu ar̄ıc̄u majır̄aḡare er̄a dupure meroḡa gasıroḡare wıhria m̄a Moise doreri iimor̄a. ¿M̄a s̄a soorinu irıre ĩıquerer̄a ta irınu dorecugure yu tauc̄u duhpıar̄a yu mera guarı m̄a? ²⁴ Yu

iirare mua ðaro masibiriboro core, yure ñero pepibiricãque. Mua ðaro masira puhru yure mua ñero pepicũ diaye ta árriroca, arĩmi Jesu.

Jesu negohraguere ĩgu aridirore wereñumi

²⁵ ĩgu eropa arĩ werera puhru bajamerãgã Jerusalén majarã òpa arĩ wereniñorã:

—¿Ihĩ mari oparã erã wejẽdiagu árbeari? ²⁶ Eropigu ĩgure erã wejẽdiaquerecũ ta árrpehrerã masare buhegu iimi ĩgu. Eropirã ĩgure wejẽdianirã árriquererã ta eropa ĩacãma. Eropa ĩacãrã ĩgure “ĩgu diaye ta Cristo Goãmu ĩgu obeodigu áhrimi,” ¿arĩ pepibocuri oparãpu? Maripũ masia. Cristo árribiribocumi. ²⁷ Ihĩ Jesu ĩgu aridirore gũa masia. Cristopũ ĩgu áricũ ĩgu aridirore masiya mara. Eropigu Cristo gohra árribeami Jesu, arĩ werewuañorã erã Jerusalén majarã.

²⁸ Erã eropa arĩrare masigu, Jesu òpa turaro busuro werenigui buhemi Goãmu wihi:

—Yure òpa arĩ pepia mua: “ĩgure masia gũa. Eropirã ĩgu aridiro sãre masia,” arĩ pepiraa mua yure. Mua eropa arĩ pepiquererã ta yũ gamero aribirabu. Yure obeodigu gohrare masibeaa mua. Yure obeodigu diaye árrigu, diaye iigu áhrimi. ²⁹ ĩgu ta yure obeomi. Eropigu ĩgu pohrogue aribu. Eropigu yuhũ ĩgure masia, arĩmi Jesu judio masare.

³⁰ ĩgu eroparicũ peerã ĩgure ñeadiarima. Erã eropa ñeadiquerecũ ta Jesu ĩgu ñero tariburisubu árribiriyoro dohpa. Eropirã erã ĩgure ñeamasibirima. ³¹ Gajirã masapu bajarã ĩgure umupeoma. Òpa arĩma:

—“Cristo bajasuburi Goãmu turari mera deyoro moarire ii ihmugucumi,” erã arĩ werediro dopa ta ihĩ Jesupu bajasuburi Goãmu turari mera ii ihmumi. Árrpehrerã gajirã tauro Goãmu turari mera ii ihmumi ĩgu. Eropigu Cristo Goãmu ĩgu obeodigu ta áhrimi Jesu, arĩma Jesure ne umupeoñagarãpu.

Fariseo masa Jesure peresu iidoreñuma

³² Masa Jesure eropa arĩ werenigucũ peerã pahia oparã, fariseo masa mera Jesure ñeadorerã obeoriñorã surarare.

³³ Eropigu Jesu masare òpa arĩmi:

—Bajamenarigã mua mera árriniguca. Eropigu puhruñarigã yure obeodigu pohro waguca. ³⁴ Yũ árrborore mua wamasibeaa. Eropirã yure amaquererã ta ne bocasome mua, arĩmi Jesu masare.

³⁵ ĩgu eroparicũ peerã erã judio masa òpa arĩ wereniguiñorã:

—¿Ihĩ eropa arĩgu nohogue wagucuri mua pepicũ? ¿Griego masa pohrogue judio masa wasirininã pohrogue erã árrĩ macarigue Griego masaguere buhegu wabocuri ihĩ? ³⁶ “Yũ árrborore mua wamasibeaa. Eropirã mua yure amaquererã ta ne bocasome,” ĩgu arĩgu ¿dohpa arĩronore ĩgu eropa arĩri? arĩ wereniguiñorã judio masa erã basi.

Ojocaricũ iiriyarire wereñumi Jesu

³⁷ Bosenu ojogorocurinu irinu guhyadiarinũ gohra árrĩro iibu. Irinu Jesu ero nigui, turaro mera weremi masare:

—Ñemesiburã decore turaro gamero dopa árrã umuri nucũ Goãmu mera turaro árridiarã yure serẽque. Mua eropa serẽcũ ĩgu yarã árridoregũa mũare. ³⁸ Yure umupeorãre òpa arĩ gojañuma Goãmu yare erã gojarapũgue: “Erã sĩporãriguere ojocaricũ iiri deco eropa árriniguicãroca,” arĩ gojañuma, arĩ turaro weremi Jesu masare.

39 “Erã sîporãriguere ojocaricũ iiri deco eropa árîniguicãroca,” arîgu “Yure umupeorã Espiritu Santore oparãcoma” arîgu iimi Jesu. İgu umarogue İgu marianibiricũ dohpa Espiritu Santopu arinibirimi dohpa erãre.

Judio masa dũca wariñuma pe curu

40 Jesu İgu eroparicũ peerã, masa bajarã õpa arî wereniguima:
—İhî diaye ta Goãmũ yare weremuhtagu mari coredigu ta åhrimi, arî wereniguima.

41 Õpa arîma gajirã sã:

—İhî Cristo marire taubu åhrimi, arîma.

Gajirãpu õpa arîma:

—Cristo arîgu Galilea majagu arîsome İgu. İhî Jesupu ero majagu ta åhrimi. 42 Cristo Davi mura pãrami gajisubu majagu arigu arîbocumi. Eropigu Davi ya maca muraro Belén waicuri maca masa dehyoagucumi Cristopu. Eropa ta arî werea Goãmũ yare erã gojarapũ. İhî Jesupu Belén macague masa dehyoabiripu. Eropigu İgu Goãmũ İgu obeodigu Cristo gohra arîbeami, arîrima erã.

43 Eropirã Jesure peenirã gajirã umupeo gajirãpu umupeobirã árînijarã game dũca warima pe curu. 44 Eropirã bajamerãgã Jesure ñeadiarima. Eropa ñeadiquererã ta İgure ñeabirima.

Judio masa oparã Jesure ne umupeobiriñuma

45 Eropirã surara pahia oparã pohrogue fariseo pohrogue dujaa wañorã daja. Erã dujacũ İarã erã surarare serẽpiñorã:

—¿Duhpirã Jesure ñeagãribirari mua? arîñorã.

46 —İgu õatariaro wereniguigu åhrimi. Gajirã İgu iro dopa wereniguirã ne marima, arî yuhriñorã surara erãre.

47 Erã eroparicũ fariseo masapu õpa arî wereñorã:

—¿Mũare İgu guyacũ, “Diaye ta arîgu iimi,” arãri mua sã? 48 Mari oparã Jesure ne umupeobeama. Gua sã eropirã İgure umupeobeaa. 49 Oã masa Goãmũ dorerire Moiserre İgu apirare masibeama. Eropa masibirã arîrã Jesure umupeoma. Erã eropa umupeori dipuwaja mari Pagu Goãmũ erãre dipuwaja moagucumi, arîñorã fariseo masa.

50 Nicodemo fariseo masu Jesure weretamugu ejadigu ero arîpu erã mera. Erã eroparicũ peegu õpa arîpu İgu erãre:

51 —Jesu İgu ñero iirare masibeaa mari. Eropa masibirã İgu marire wereboro core İgure dipuwaja moamasibeaa mari. Eropa masibiriquererã ta İgure dipuwaja moarã, mari ya dorerire tarinugarã iiaa mari, arîpu Nicodemo erãre.

52 İgu eroparicũ peerã õpa arî yuhriñorã erã:

—¿Mũ sã İgu iro dopa ta Galilea majagu ta åhriri? Goãmũ ya erã gojarapũre buhepehoque. Eropa buhegu, “Goãmũ yare weremuhtagu ne yujugu Galilea majagu marimi,” arî masiguca muhu, arî yuhriñorã erã Nicodemore.

53 Erã eropa arîra puhru erã ya wirigue dujaa wañorã.

8

Mũ mera ñero iidigore judio masa oparã dipuwaja moadiariñuma

1 Jesupu İgu seyaro utãgugue Olivo waicudigugue waha wami. 2 Gajinu Goãmũ ya wihigue gua wabu daja. Jesu ejacũ İarã masa bajarã İgu pohro

gamenerema. Erã gamenerecũ ĩġupu doanijagu erãre buhenugapu. ³ ĩġu eropa buhero watope judio masa buherã, fariseo masa mera iri wihigue nomeore aĩ ñajajama. Igo marapucquerego gajigu mera igo ñero iicũ bocañaorã erã igore. Eropa bocañarã igore Goãmu wihigue aĩ ñajama erã igore dipuwaja moadorerã. Aĩ ñajatuha árĩpehrerã gua ĩaro igore duhu nuguma. ⁴ Duhunugu òpa arĩma Jesure.

—Buhegu, igo marapucugo árĩquerego gajigu mera ñero iigo iicũ bocajabu. ⁵ Moise dorerire òpa àhraa: “Umũ mera ñero iidigore utã mera dea wejẽcãque,” arĩyoro Goãmu doreri. ¿Mũca dohpa arĩ pepiri ire? arĩ serẽpima erã Jesure.

⁶ Jesu ĩġu ñero werenigucũ peediarã iirima erã ĩġure weresãmorã. Erã eropa serẽpiquerecũ ta Jesupu muhmusiu dija, yebague ĩġu mujusĩru mera gojami. ⁷ Eropigu erã eropa serẽpinigucũ peegu Jesupu wahgã doaja, erãre weremi:

—Mua mera majagu ñero iibigu árĩġu igore utã mera deanugaporo, arĩmi Jesu.

⁸ Eropa arĩtuha dipaturi muhrisiu dija, yebague gojami daja. ⁹ Irire peerã igore aĩ ñajarĩnirãpu erã ñeri iirare guñarã, erã tĩrãpu wiria wamuhtama. Erã puhru erã mera majarã sã wiriapehrea wama. Eropigo nomeo dihta Jesu pohro dujanugamo. ¹⁰ Eropigu Jesu wahgã doaja, igore serẽpimi.

—¿Nohogue àhriri erã? ¿Mũre dipuwaja moadianirã mariri dohpa-guere? arĩmi igore.

¹¹ —Marima, opu, arĩ yuhrimo igo.

—Yu sã dipuwaja moabeaa mũre. Waque. Eropigo ñerire iinemobiricãque, arĩmi Jesu igore.

Jesu i yeba majarãre boyoro iro dopa Goãmũre masicũ iimi, arĩ gojañumi Ñũ

¹² Dipaturi Jesu iri wihigue árĩrãre weremi:

—Boyoro iro dopa yuhu i yeba majarãre Goãmũre masicũ iiaa. Yũre umupeogu Goãmu mera eropa árĩnigucãgucumi. Eropigu ĩġu boyorogue árĩġu dopa ta òarire guñagucumi. Eropigu ĩġu ñerire guñadiabeami, arĩ weremi Jesu.

¹³ ĩġu eroparicũ peerã fariseo masapu òpa arĩma.

—Mũhu mũ basi mũ árĩricurire eropa arĩ wereniguimaacãgu iiaa. Mũ òpa arĩ wereniguiri ne waja mara, arĩma erã Jesure.

¹⁴ Erã eroparicũ Jesu yuhrimi:

—Yuhu, yu aridirore masia. Yu waboro sãre masia. Mũapu ne irire masibea. Eropigu yu basi yu árĩricurire werequeregu iri yu werera diaye ta àhraa. ¹⁵ Mũa sihajaro mũa sã ĩara dihtare masia mũa. Eropirã mũa yũre werewuaa. Yuhu mũa iro dopa ta werewuabeaa. ¹⁶ Masa erã árĩricurire ĩagu yuhu yujugu ta ĩhamasibea. Yu tamera yũre obeodigu mera masia. Eropigu yuhu masa erã árĩricurire diaye ta ĩha masia. ¹⁷ Mũare doreri erã gojarapũ òpa arĩ werea: “Masa perã erã yujuro mera erã werecũ erã wereri diaye ta àhraa,” arĩ were gojañuma. ¹⁸ Yũre weregu mera gua perã àhraa. Yuhu, yu árĩricurire werea. Eropigu yu Pagu sã weremi yũre. ĩġu ta àhrimi yũre obeodigu, arĩmi Jesu.

¹⁹ —¿Nohogue àhriri mũ Pagu? arĩ serẽpima erã.

—Yũre mũa masibea. Yu Pagu sãre masibea. Yũre masirã, yu Pagu sãre masiboaya, arĩ yuhrimi Jesu erãre.

²⁰ Jesu erāre buhegu eropa arī wereniguimi Goāmū wihigue erā niyeru apiri comoro pohro. Īgu ñero tariburisubū ejabiribū dohpa. Eropirā erā mera ĩgu árīquerecū ta ĩgure ñeabirima.

Yū waboroguere m̄apū wamasisome, arīñumi Jesu

²¹ Dipaturi masa mera gua árīrisubū Jesu erāre weremi daja:

—Yū aridirogue waguca. Yū wara puhru yure amarāca m̄a. Yū waboroguere m̄apū wamasisome. Eropirā m̄a ñeri dipuwajacurā sīrīrāca, arī weremi Jesu.

²² “Yū waboroguere m̄apū wamasisome,” ĩgu arīcū peerā,

—¿Ihī ĩgu basi wejē sīrigucuri eropa arīgu? arīma judio masa erā basi.

²³ Erā basi erā eroparīcū Jesu weremi erāre:

—M̄apū i yeba majarā āhraa. Yūpū umaro majagu āhraa. I yeba dehyoanirā āhraa m̄apū. Umároque aridigu āhraa yūpū. ²⁴ M̄aare yū árīricurire yū werecū “Diaye árībeaa,” m̄a arīrā, m̄a ñeri dipuwajacurā sīrīrāca m̄a. Eropigu “M̄a ñeri dipuwajacurā sīrīrāca,” arīrabū m̄aare, arīmi Jesu erāre.

²⁵ —¿Noano āhriri m̄uhū? arī serēpima erā.

—Neguere yū m̄aare arīdiro dopa ta āhraa yūhū. ²⁶ M̄aare yū wereburi w̄aro duhyania. Eropiro m̄a ñeri dipuwajare m̄aare yū wereboro w̄aro duhyaa dohpa. Eropigu yure obeodigure yū peerare i yeba majarāre werea. ĩgu werera diaye ta āhraa, arīmi Jesu erāre.

²⁷ “Yure obeodigu,” ĩgu arīcū peerā “Mari Pagu árīcumi,” arī pepibirima erā. ²⁸ Erā eropa arī pepibiricū ĩagu Jesu weremi erāre:

—Yure masure Goāmū ĩgu obeodigure m̄a crusa mera pabia aī wahgū nugurāca. M̄a eropa iirā, “Īgu Goāmū ĩgu obeodigu ta āhrimi,” arī masirāca yure. Eropirā yū gamero dopa ta iibigu yū árīrire masirāca. Eropirā yū Pagu ĩgu yure ĩgu buhera dihtare weregu yū árīcū s̄are masirāca m̄a. ²⁹ Eropigu yure obeodigupū yū mera āhrimi. ĩgu gamerire um̄ari n̄ucu iiniguia. Eropigu ĩgu yure ne cóābeamī, arīmi Jesu.

³⁰ ĩgu eroparīcū peerā masa bajarā ĩgure umupeoma.

Goāmū porāre, ñerire iirā s̄are wereñumi Jesu

³¹ Eropirā gajirā judio masa Jesure umupeoma. Eropigu Jesu erāre weremi:

—Yū dorerire iipehorā árīrā, diaye ta yū buherā āhraa m̄a. ³² Eropirā diaye ta masirāca m̄a. Diaye árīrire masirā, ñero iirire duhumasirāca. Eropirā pohro majarā wiunirā iro dopa árīrāca m̄a, arīmi Jesu erāre.

³³ ĩgu eroparīcū peerā erā ōpa arī yuhrima daja:

—Guapū iribojegue majagu m̄arū Abrahā p̄ramerā árīturiarāgue āhraa. Eropirā ne gajirā pohro majarā árībeaa gua. Eropigu “Pohro majarā wiunirā iro dopa árīrāca,” arīgu ¿dohpa arīgu eropa arīri m̄uhū? arī serēpima erā Jesure.

³⁴ Erā eroparīcū peegu Jesu ōpa arīmi erāre:

—Diaye m̄aare arīgu iiaa. Árīp̄hererā ñerire iirāpū erā ñeri iirire duhumasibeama. Eropiro iri ñeripū erāre dorea. Eropa arīrā árīrā pohro majarā iro dopa āhrima erā. ³⁵ Pohro majagupū ĩgu opū magū iro dopa árībeamī. Doreri opabeamī. Iri wihi majagu magupū um̄ari n̄ucu diaye ta ĩgu pagu doreri opamī. ³⁶ Yūhū Goāmū magū āhraa. Eropigu ĩgu doreri opaa. Eropirā m̄a ñerire yū duhucū iinirā árīrā diaye ta ñerire

duhunirā árīrāca mua. ³⁷ Abrahā muru pāramerā árīturiarā mua árīcū masia. Eropa árīquererā ta yu wereripure peediabeaa mua. Eropirā yure wejēdiaa mua. ³⁸ Yu Pagu ĩgu yure masicū ĩrare werea muare. Yu eropa werequerecū ta mua pagu ĩgu doreripure iiaa mua sã, arĩmi Jesu erãre.

³⁹ —Abrahā muru iribojegue majagu gua pagu muru arĩmuripu, arĩ yuhrima erã.

Erã eroparīcū Jesu yuhrimi:

—Abrahā muru porã árīrã ĩgu iidiro dopa ta iiboaya mua. ⁴⁰ Goãmu yure diaye ĩgu wererire muare yu werequerecū ta yure wejēdiaa mua. Abrahā murupu ne eropa iibiridi arĩmi. ⁴¹ Mua pagu ĩgu iidiro dopa ta iiaa mua, arĩmi Jesu erãre.

Īgu eroparīcū erã yuhrima:

—Mojoto diribiridigo porã árībeaa gua. Yujugu ta āhrimi gua pagu. Īgu ta āhrimi Goãmu, arĩma erã.

⁴² Erã eroparīcū Jesu yuhrimi:

—Goãmu mera majagu árīdigu ta õguere aribu yuhu. Eropirā Goãmu mua Pagu ĩgu árīcū yure mahiboaya mua. Yu gamero aribiribu yu tamera. Yu Pu Goãmu ĩgu obeocū aribu õguere. ⁴³ ¿Duhpirã yu wereniguirire peebeari mua? Yu wererire yujuro bojebeaa mua. Eropirã peebeaa mua. ⁴⁴ Mua pagupu watĩ āhrimi. Eropirã watĩ ĩgu gameripure iidiaa mua. I yeba negohraguere árīnugacūgue, dohpague sãre ĩgu masare wejēgu āhrimi. Īgure diaye maja ne mara. Eropigu ĩgu ne diaye majare wereniguibeamĩ. Īgu negohraguere guyanugadigu arĩmi. Eropigu ĩgu eropa gyaniguigu árīgu, guyarire weremi. ⁴⁵ Yupu diaye majare werea muare. Eropa yu werecū peebeaa mua. ⁴⁶ “Muhu ñero ĩgu āhraa,” arĩmasibeeaa mua yure. ¿Diaye muare yu werequerecū ta duhpirã peebeari mua? ⁴⁷ Goãmu porãpu ĩgu wereniguirire peema. Īgu porã árībirã ĩgu wereniguirire peebeama, arĩmi Jesu erãre.

Abrahā muru ĩgu árīboro core Cristo árīmuhtatuhañumi

⁴⁸ Īgu eroparīcū peerã judio masa ĩgure õpa arĩma:

—“Muhu Samaria majagu āhraa. Eropigu watĩ mera goroweregu āhraa muhu,” gua arĩra diaye ta āhraa, arĩma erã Jesure.

⁴⁹ Erã eroparīcū peegu õpa arĩ yuhrimi Jesu:

—Goroweregu árībeaa yuhu. Yu Pagure umupeoa. Murupu yure umupeobeaa. ⁵⁰ Yure masa erã umupeorire amabeaa yuhu. Yu Pagupu yure umupeocū gahmemĩ masare. Īgu tamera yu árīricurire õaro ĩha masigu eropa ta umupeodoremĩ. Eropigu yu Pagu erã yure gamebiriri dipuwaja, dipuwaja moagacumi. ⁵¹ Diaye muare arīgu iiaa. Yu dorerire ĩgu umuri nucu Goãmu mera eropa árīniguicāgacumi, arĩmi Jesu.

⁵² Īgu eroparīcū peerã õpa arĩma erã:

—Dohpague tamerare mu watĩ mera goroweregu árīcū gua õaro masia. Abrahā muru sīria wañumi. Goãmu yare weremuhtanirã sã sīria wañuma iribojegue. Eropigu “Yu dorerire ĩgu umuri nucu Goãmu mera eropa árīniguicacumi,” arīgu, ¿dohpa arīgu eropa arĩri muhu? ⁵³ ¿Gua ñecu muru tauro turari muhu? Īgu, Goãmu ya weremuhtanirã sã sīria wañuma iribojegue. ¿Murupu nihino āhriri eropa arĩ werenigugu? Mu eropa arĩro dopa árībeaa muhu, arĩma erã.

⁵⁴ Erã eroparīcū peegu Jesu werenemomi:

—Yuhū yu basire umupeodoreri duhpihuri árĭbeaa. Yu Pagupu yure umupeodoregu áhrimi ĩġu. “Gua Pagu” mua arĭġupu yu Pagu ta áhrimi. ⁵⁵ Mupuru yu Pagure ne masibeaa. Yuhū ĩġure masia. “ĩġure masibeaa,” arĭġu mua iro dopa ta ġuyaricġu árĭboaya yuhū. Diaye ta ĩġure masia. Eropiġu ĩġu dorerire iiaa. ⁵⁶ I yebaguere yu árĭboro coregue mari ñecu muru Abrahā muru masimuhatahumarĭñumi yure. Eropa masiġu ĩġu mucubirimarĭñumi, arĭmi Jesu.

⁵⁷ ĩġu eroparĭcū erā yuhrima:

—Abrahā muru iribojegue majagu áhrimi. Mupu cincuenta bojori opanibeaa. ĩEropiġu muhu ĩġu murure duhpiġu ĩha masiboyuri? arĭma ġudimo masa ĩġure.

⁵⁸ —Diaye muare arĭġu iiaa. Abrahā ĩġu árĭboro core yupu árĭmuhatahubu, arĭmi Jesu erāre.

⁵⁹ ĩġu eroparĭcū peerā erā utāyerire aĭ ĩġure deadiarima. Erā eropa deadiaquerecū ta Jesupu Goāmu wihigue árĭdigu duhri wiria wami.

9

Cuiri ĩhajabigure ōaro ĩagū wacū iñumi Jesu

¹ Jesu ġua ĩġu buherā mera mague tariarā ġajigure cuiri ĩhajabigure bocajabu. ĩġu ne masa dehyoaguge ta cuiri ĩhajabigū árĭpu. ² ġua sā ĩġure ĩarā serēpibu Jesure.

—Buheġu, ġihĭ duhpiġu cuiri ĩhajabigū masa dehyoayuri? ĩÑerire iimariyuri eropa wagu? ĩO ĩġu pagu sumarā erā ñero iira dipuwaja eropa wayuri ĩġu? arĭ serēpibu ġua Jesure.

³ ġua eroparĭcū peġu ōpa arĭ yuhrimi:

—ĩhĭ ĩġu pagu sumarā sā erā ñerire iira sā ĩġure cuiri ĩhajabiricū iibeaa. Goāmupu ĩġure cuiri ĩhajabiricū iimi. ĩġure ĩacū iibu masare ĩġu turarire ii ĩhmuburire apimi Goāmu. ⁴ Yure obeodigu ĩġu apirare yure iiro gahmea dohpaguere. Ñamiguere mari mohmemasibiro dopa ta puhruague yure obeodigu ĩġu apirare iimasibeaa yuhū. ⁵ I yebaguere i yeba majarāre Goāmure masicū iiaa, arĭmi Jesu.

⁶ Eropa arĭtuha yebague disico ehomepimi. ĩġu disico ehomepirare nicu mera mohmore nijagu, cuiri ĩhajabigure ĩġu cuirire sūmi. ⁷ Eropa sūġu ōpa arĭmi Jesu:

—Siloé waĭcuri gobegue mu cuirire coeġu waque, arĭmi Jesu. Siloé ero majarā ya mera arĭrā obeora gobe arĭrā iima.

Jesu ĩġu cuiri coedorediġupu waha, coetuhaja, cuiri ĩaguge dujajapu ĩġu ya wihigue. ⁸ ĩġu dujajacū ero majarā ĩġure ĩañorā. Ero core niyeru serēdigu ĩġu árĭcū ĩanirā ĩġure ōpa arĭñorā erā basi:

—ĩĩhĭ sohō árĭdigu niyeru serēdoadigu árĭbeari? arĭñorā erā.

⁹ —ĩġu ta áhrimi, arĭñorā ġajirā.

—ĩġu árĭbeami. Eropa árĭbiriquregu ta ĩġu iro dopa ta bejagu áhrimi, arĭñorā ġajirā.

Erā eroparĭcū peġu cuiri ĩhajabiridigupu ōpa arĭpu:

—ĩġu ta áhraa yuhū, arĭpu erāre.

¹⁰ ĩġu eroparĭcū masa ĩġure serēpiñorā:

—ĩCuiri ĩhajabiridigu árĭdigu dohpa ii ĩhari muhu? arĭ serēpiñorā erā ĩġure.

11 —Jesu waicagu disicore nicu mera mohmore yu cuirire sūami. Yure sūtuhaia “Siloé waicuri gobegue mu cuirire coegu waque,” arāmi yure. Īgu eroparicū coegu ejabu yuhu. Eropa yu coera puhru yu cuiiri ōaro dehyoabu yare, arī werepu ĩgu masare.

12 —¿Mure eropa iidigu nohogue árĩcuiiri ĩgu? arĩñorā erā.

—Ūba. Noho árĩgu árĩcumi, arĩpu ĩgu

Cuiri ĩhajabiridigure fariseo masa serēpiñuma

13 Eropa arī wereniguituha erā cuiiri ĩhajabiridigure fariseo masa pohrogue aī ejañorā. 14 Īrinu Jesu dihta nicure mohmore cuiiri ĩhajabigure ōagu iiranu Sabadonu árĩbu. Irinu gua soorinu árĩbu. 15 Eropirā fariseo masapu ĩgure serēpiñorā daja.

—¿Dohpa ii ĩhari muhu? arī serēpiñorā erā.

—Nicu mera yu cuirire sūami. Eropigu yu cuirire coera puhru ĩhaa yuhu, arī werepu ĩgu erāre.

16 —Īgu mari soorinu mari mohmedobiririnare mohmeami. Eropigu ĩgu Goāmu yagu árĩbeami, arĩñorā gajirā fariseo masa.

Gajirāpu ōpa arĩñorā:

—Ñerire iigu árĩgu ōpa ĩre ōagu wacū iimasibeami. Eropigu ĩgu ōagu árĩbocumi, arĩñorā gajirā Jesure.

Eropirā erā, erā basi pe curu dūca wariñorā. 17 Eropirā dipaturi erā cuiiri ĩhajabiridigure serēpinemoñorā daja.

—¿Mure mu cuirire ōaro iidigure dohpa arī pepiri muhu Jesure? arĩñorā erā ĩgure.

—Īgu diaye ta Goāmu yare weremuhtagu āhrimi, arĩpu cuiiri ĩhajabiridigupu.

18 Negohraguere judio masa ōpa arī pepiriñorā. “Ihĩ cuiiri ĩhajabiridigu árĩbeami,” arī pepiriñorā. Eropa arī pepirā cuiiri ĩhajabigu pagu sumarāre sihubeoñorā erā. 19 Sihubeo ĩgu pagu sumarāre serēpiñorā fariseo masa oparā.

—¿Ihĩ diaye ta mu magu āhriri? ¿Mata ĩgu cuiiri ĩhajabigu masa dehyoari? ¿Diaye ta cuiiri ĩhajabiridigu árĩqueregu dohpa ii ĩhari dohpaguere? arī serēpiñorā erā ĩgu pagu sumarāre.

20 —Ihĩ gua magu ta āhrimi. Eropigu mata cuiiri ĩhajabigu masa dehyoami ĩgu. 21 Irire masiquererā ta ĩgu ĩarare, ĩgure ĩacū iidigu sāre masibea gua. Gua magure serēpique. Bugu āhrimi ĩgu. Īgu basi weremasimi ĩgu, arĩñorā ĩgu pagu sumarā.

22 Judio masa oparā ero coreguere ōpa arĩtuhañorā:

—“Jesu ta Cristo mari taubu āhrimi,” arĩrāre mari buheri wirigue ñajadoresome gua, arĩmuriñorā judio masa gua oparā.

Erā eroparicū peenirā cuiiri ĩhajabigu pagu sumarāpu judio masa oparāre güi arĩñorā. 23 Eropa güirā “Bugu āhrimi ĩgu. Īgure ta serēpique,” arĩñorā erā judio masa oparāre.

24 Puhru judio masa oparā dipaturi cuiiri ĩhajabiridigure sihubeoñorā. Sihubeo ōpa arĩñorā ĩgure:

—Goāmu mera diaye wereque muhu. Jesure ĩgu ñeri iigu ĩgu árĩcū gua masia. Eropigu diaye wereque guare, arĩñorā judio masa cuiiri ĩhajabiridigure.

25 Erā eroparicū peegu ōpa arī yuhripu ĩgu:

—Jesure İgu ñeri iigu İgu árıcũ masibirica yuħu. Yujuñe ta masia yuħu. Iribojeguere cuiri İhajabıgu árımurıbu yuħu. Dohpaguepure İhaa yuħu. İri dihtare masia yuħu, arı yuhripu cuiri İhajabiridıgupu eräre.

26 —¿Dohpa iiri İgu müre? Mu cuirire İhajadoregu dohpa iiri İgu müre? arı serëpiñorã erã daja.

27 —İrire ta müare weretuharabuğu yuħu. Yu eropa arı werequerecũ ta mua ne peediabeaa yure. ¿Dohpa iidiarã ya dipaturi werecũ peediari mua? ¿Mua sã İgu buherã árıdiari? arıpu İgu eräre.

28 İgu eroparıcũ peerã erã İğure turiñorã.

—Mũhu Jesu buhegu añraa. Guapu Moise buherã añraa. 29 Diaye ta Goãmu Moisere wereniguimurıñumi. Jesure obeodıgure gua masıbeaa, arıñorã erã cuiri İhajabiridıgure.

30 Erã eroparıcũ yuhripu İgu:

—¿İğure obeodıgure mua masibiricũ, yure İacũ iidıgu árıgu Goãmu İgu obeodıgu árıbirıocuri İgu? 31 Goãmu ñeri iigure İgu serërire peebeami. İri tamerare mari masia. Ñerire iigure peebirıqueregu ta Goãmure umupeogure, İgu dorerire iigure İgu serërire peemi Goãmu. 32 Negohraguere i yeba árınugacũguere, mata masa dehyoagugue ta cuiri İhajabıgure ne yujugupure İhajacũ iigu marımurıpu. 33 Eropıgu Jesu Goãmu İgu obeodıgu árıbıgu yure İacũ iibirıboñumi, arıpu İgu eräre.

34 Erãpu õpa arı yuhriñorã:

—Mũhu mata ñegu árımurıya. ¿Eropa árıqueregu ta guare buheri mũhu? arıñorã judıo masa oparã.

Eropa arıtuha erã İğure cohã wıuñorã.

Jesu yare gamebirã cuiri İhajabırã iro dopa añrima, arı wereñumi Jesu

35 Eropıgu cuiri İhajabıgure erã cohã wiurare Jesu peemi. Eropa peegu cuiri İhajabiridıgure gua bocajacũ, İğure serëpimi.

—¿Masure Goãmu İgu obeodıgure umupeori mũhu? arımi Jesu.

36 —Opu, ¿noa añriri İgu? İğure masıgu umupeogura, arımi cuiri İhajabiridıgupu Jesure.

37 —İğure İhatuhabu mũhu. Dohpague mu mera werenıguıgu İgu ta añraa yuħu, arımi Jesu cuiri İhajabiridıgure.

38 —Opu, müre umupeoa yuħu, arımi cuiri İhajabiridıgupu.

Eropa arıgu İgu Jesu pohro mereja İğure umupeomi.

39 İgu eropa umupeocũ İagu õpa arımi Jesu masare:

—Õarã, ñerã sã erã iirare masicũ iibu arıbu yuħu. Cuiiri İhajabırã erã İabiro dopa ta yu Pagure masibirã añrima. Eropa masibirãre yu Pagure masicũ iigu arıbu yuħu. “Gua õaro masia,” arı pepinırã sãre õaro erã masibirıre masicũ iigu arıbu yuħu, arımi Jesu.

40 İgu eroparıcũ peerã bajamerãgã fariseo masa İğure õpa arıma:

—“Cuiiri İhajabırã erã İhamasıbiro dopa ta masıbeaa mua sã,” ¿arıri mũhu guare? arıma fariseo masa Jesure.

41 Erã eroparıcũ Jesu õpa arımi:

—“Cuiiri İhajabırã erã İha masıbiro dopa ta diaye õaro masıbeaa gua,” mua arıcũ dipuwaja marıboya. “Gua õaro masırã añraa,” mua arırã añraa. Eropırã yure peediabırira dipuwaja müare dipuwaja añraa dohpague, arımi Jesu eräre.

10

Oveja ïhadibugũ queoriñere wereñumi Jesu

1 Pũru queoriñe mera werenigui queogu buhebu òpa arĩmi Jesu guare gajirã masa sãre:

—Diaye arĩgu iiaa mũare. Oveja diburi sãriro disiporo ñajabigũpũ gajipũgue ñajagũpũ yajari masũ àhrimi. ² Disiporo ñajagũpũ ovejare ïhadibugũ àhrimi. ³ Disiporo coregu disiporo pãgũmi ovejare ïhadibugũ ïgu ñajariborore. Ovejare ïhadibugũ eracũ ïgu wereniguirire peerã àhrima ïgu oveja. Erãre sihugũ, erã waĩ mera sihubeomi ïgu. Eropigũ erãre sãrirogue árĩrãre sihu wiuniguimi disiporogue. ⁴ ïgu yarãre árĩpehrerãre sihu wiu erãre mũhtanugajami. Ovejapũ ïgu wereniguirire masirã, ïgure nurusiamã. ⁵ Gajigure erã masibigure nurusiabeama erã. Eropirã gajirã erã wereniguirire peerã, gũi omagã wahama, arĩmi Jesu masare.

⁶ Iri ïgu werequerecũ ta irire peerã masibirima erã.

Jesu ovejare òaro ïhadibugũ iro dopa ïgu yarãre òaro ïhadibumi

⁷ Eropigũ dipaturi Jesu erãre gũa sãre weremi daja:

—Diaye mũare arĩgu iiaa. Ovejare diburi sãriro disiporo iro dopa àhraa yũhũ. ⁸ Árĩpehrerã yũ core arinirã guyarire buherã yajari masa iro dopa àhrima. Erã dopa árĩquerecũ ta oveja iro dopa árĩrã yaharãpũ gajirãre ne pee wahgãbeama. ⁹ Yũ ovejare diburi sãriro disiporo iro dopa àhraa. Iri disiporo ñajarã iro dopa ta àhrima yure umupeorã. Eropigũ erãre peamegue wabonirãre taugura. Ovejare cãhmotarĩ sãriro erã cãhmotaro dopa ta yũ taunirãre cãhmotaũca. Eropirã erã gamerire oparãcoma, arĩmi Jesu.

¹⁰ Eropa arĩtuha òpa arĩnemomi:

—Mũare gũya buherã ovejare yajari masa iro dopa àhrima. Gajirã yajadiarã wejẽdiagãrimã. Oveja iro dopa árĩrã yaharã árĩpehrerinũri Goãmũ mera árĩcũ iigu aribũ yũpũ. Eropigũ yaharã mũuri nũcũ erã òaro árĩcũ iibu aribũ yũpũ. ¹¹ Ovejare òaro ïhadibugũ iro dopa árĩgu àhraa yũhũ. Ovejare òaro ïhadibugũ sĩribu árĩqueregu ta ïgu ovejare cãhmotaniguigũcumi. Yaharã Goãmũ mera erã eropa árĩniguiburire sĩrigũca. ¹² ïgu mohmeri masũpũ òaro ovejare ïhadibugũ árĩbeami. Eropirã oveja ïgu yarã árĩbeama. Eropigũ nũgu majagu diaye ovejare ñeagu ïgu aricũ ïagu ïgu mohmeri masũpũ ovejare cóacã gũi omagã wahami. ïgu eropa cohãpigãra pũru, nũgu majagu diaye ïgu ovejare ïgu ñeacũ ïarã ovejapũ omasirigã wahama. ¹³ ïgu mohmeri masũpũ ïgu wajatari dihtare gahmemi. Eropigũ ïgu ovejare òaro ïhadibudiabeami, arĩmi Jesu.

¹⁴ Eropa arĩtuha òpa arĩnemomi queoriñe mera:

—Ovejare òaro ïhadibugũ iro dopa àhraa yũhũ. Eropigũ yaharãre masia yũhũ. Eropirã yaharã sã yure masima. ¹⁵ Eropa ta yũ Pagũ sã yure masimi. Eropigũ yũ sã yũ Pagure masia. Yaharã Goãmũ mera erã árĩniguiburire sĩrigũca. ¹⁶ Gajirã oveja gajĩ sãriro majarã iro dopa árĩrã gajirã masa sã yaharã árĩrãcoma. Erã sãre aũguca. Eropirã yũ wereniguirire pee wahgãrãcoma erã sã. Eropirã yaharã árĩpehrerã yuju curu ta árĩrãcoma. Eropigũ yũ dihta yaharãre ïhadibugũca, arĩmi Jesu.

¹⁷ Eropa arĩtuha òpa arĩnemomi daja:

—Yaharā Goāmu mera erā árñiguiburire sîriguca yuhu. Yu sîrira puhru masa mariaguca. Yu eropa iibu árícū yu Pagu yure mahimi. ¹⁸ Yu wejêdorebircū yure wejêmasibiriboñuma erā. Yu gamero mera yure wejêrâcoma. Eropigu yaharā Goāmu mera erā ya árñiburire sîriguca. Sîrimasia yuhu. Eropigu masa mariamasia. Yu Pagu yure irire ta iidoremi, arîmi Jesu.

¹⁹ Īgu eroparícū peerā judio masa pe curu dūca warima daja. Gajirā gajiropa pepi, gajirā sâ gajiropa pepinirā árîma.

²⁰ —Īgu watîre opami. Eropigu goroweregu âhrimi. ¿Duhpirā ĩgure dipaturi peeri mua? arîma gajirā bajarā judio masa.

²¹ Gajirāpu ōpa arîma:

—Watî mera goroweregu árĭgu eropa ōaro arĭ wereniguibiriboñumi. Cuirĭ ĩhajabigure ĩacū ĩmasibiriboñumi watîre opagu. Eropa árĭgu árĭgu ĩgu watîre opabeami, arîma gajirā judio masa.

Judio masa Jesure gamebirĩñuma

²² Gajinū Jerusaléngue bosenu iirā ĩima dipaturi judio masa. Goāmu wihire erā Goāmu ya árñiburire erā apiri bosenu árĭbu. Irisubu yura wahgũro árĭbu. ²³ Irinu Salomo waĩcuri taribugue Goāmu wihigue árĭri taribure Jesu gua mera ĩhacurigu ĩimi. ²⁴ Iri taribugue ĩgu árícū ĩarā judio masa ĩgu pohrogue gamenere ĩgure serêpima daja:

—Yoatariari boje guare ōaro werebeaa muhu. Diaye guare ōaro were purumujuque. ¿Cristo Goāmu ĩgu obeodigu ta âhriri muhu? arîma erā ĩgure.

²⁵ Erā eroparícū peegu ōpa arĭ yuhrimi Jesu:

—Muare weretuhabu yuhu. Yu eropa werequerecū ta yure peebeaa mua. Yu Pagu ĩgu dorero dopa ta ĩgu turari mera ĩi ĩhmurabu muare. Eropa ĩgu yu Cristo árĭrĭre ta muare ĩhmuga iirabu. ²⁶ Yu eropa ĩi ĩhmuquerecū ta yure peebeaa mua. Muapu yaharā árĭbeaa. Eropirā gajigu yarā oveja iro dopa árĭrā yupure peebeaa mua. ²⁷ Oveja erāre ĩhadibugure erā peediro dopa ta yaharā yure peema. Eropigu erāre masia yuhu. Eropirā erā yu mera wahama. ²⁸ Eropigu umuri nucu Goāmu mera árícū ĩaa erāre. Eropirā erāpu peamegue wasome. Eropigu yaharāre yu ĩhadibucū gajirāpu ne yure emamasibeama erāre. ²⁹ Yu Pagu yaharāre yure odigu yu tauro turami. Eropirā yu Pagu sâ yaharāre ĩgu ĩhadibucū gajirā ĩgu sāre ne emamasibeama. ³⁰ Yuhu, yu Pagu mera yujugu ta âhrra, arĭmi Jesu judio masare.

³¹ Īgu eroparícū peerā judio masapu ĩgure deaburi utāre dipaturi aĭma daja. ³² Erā eropa ĩicū ĩagu Jesu erāre serêpimi:

—Yu Pagu ĩgu turari mera baja deyro moarĭre ĩi ĩhmurabu muare. ¿Ñehenore ĩira dipuwaja utā mera deadiari mua yure? arĭ serêpimi.

³³ Īgu eroparícū peerā ōpa arĭma erā:

—Goāmu turari mera mu ĩi ĩhmuri dipuwaja mure utā mera dea wejêdiabeaa gua. Goāmure mu ñero wereniguiri dipuwaja mure utā mera dea wejêdiaa gua. Masu árĭqueregu ta muhu “Goāmu âhrra yuhu,” mu arĭri dipuwaja mure utā mera dea wejêdiaa gua, arĭ yuhrima erā.

³⁴ Erā eropa arĭ yuhricū peegu Jesu erāre weremi:

—Mua sāre “Goāmarā,” arĭ piyumi Goāmu. Eropa ta arĭ gojañuma ĩgu dorerire erā gojarapūgue. ³⁵ Goāmu yare erā gojarapū queoro árícū mari masia. “Guyari âhrra,” iripure arĭmasibeaa mari. Eropigu ĩgu

yare pepiräre diaye ta İgu “Goãmarã,” arĩ piyumi. ³⁶ Goãmu yure beyenijagu i yebaguere obeomi. Eropigu “Yuhu Goãmu magu àhraa,” yu arĩra dipuwaja “Goãmure ñero wereniguigu iimi Jesu,” arãa mua yure. ¿Duhpirã yure eropa arĩri mua? ³⁷ Yu Pagu İgu gamero dopa ta İgu turari mera yu ii İhmubiricũ tamerare yu buherire “Diaye ta àhraa,” arĩbiriboya mua. ³⁸ Yu Pagu İgu turari mera yu ii İhmuquerecũ ta yurure umupeodiabiriboca mua. Eropa umupeodiabiriquererã ta İgu turari mera yu ii İhmucũ İarã yu iirare “Diaye ta àhraa,” arĩque mua. Mua eropa arĩrã, yu Pagu mera gua yujuro mera árĩcũ masirãca mua. Eropirã yuhu, yu Pagu mera yujuro mera yu árĩcũ masirãca mua. Eropirã peerãca mua, arĩmi Jesu erãre.

³⁹ İgu eroparĩcũ erã İgure dipaturi ñeadiarima. Erã eropa ñeadiacũ İgu duhri wiria wami.

⁴⁰ Eropa wiriadigugue ta Ñu masare İgu waĩyemuhtadirogue Jordán waĩcuriya sipu majasegue gua dipaturi wabu daja. Erogu dujacãbu.

⁴¹ Eropirã masa bajarã İgure İarã erama. Őpa arĩma erã erã basi:

—Ñu waĩyegupu Goãmu turari mera deoro moarire ii İhmubirimi. Eropa ii İhmubiriquerecũ ta árĩpehreri Jesure İgu wererapu diaye ta àhraa, arĩma masa erã basi.

⁴² Eropirã masa erogue bajarã umupeoma Jesure.

11

Lázaro waĩcugu sĩria wañumi

¹ Eropi Judea yebague Betania waĩcuri maca majagu Lázaro waĩcugu arĩmi. Iri maca İgu pagu porã nome María, Marta mera árĩma. ² Mariapu Jesure poresuri mera sũbo, igo poari mera İgure tucobodigo árĩmo. Igo tİgu Lázaropu dorecugu iipu. ³ Eropirã erã nome gajirãre Jesure weredorerã obeoñorã.

—Őpu, mu mahigu dorecugu iimi, arĩ weredorerã obeoñorã Lázaro pagu porã nome.

⁴ Erã gua pohrogue eraa, iri querere werecũ peegu ōpa arĩmi Jesu guare.

—Dohpaguere Lázaro İgu dorecuri sĩriburi árĩbeaa. Goãmu turarire masare İhmuburire dohpaguere İgu dorecumi. Eropirã yu turari opagu árĩcũ sãre masa İarãcoma, arĩmi Jesu.

⁵ Jesu Martare, igo pagu mago, Lázaro sãre turaro mahĩmi. ⁶ Eropigu Lázaro İgu dorecurire peequeregu ta ero Jesupu penu dujanimi. ⁷ Penu puhru Jesu ōpa arĩmi guare İgu buherãre.

—Dipaturi Judea yebague dujaa warã daja, arĩmi guare.

⁸ —Buhegu, cãrugã ta mure judio masa utã mera dea wejẽdiama. ¿Duhpigu dipaturi dujadiari muhu? arĩbu gua İgure.

⁹ Gua eroparĩcũ peegu İgu erã wejẽmasibirirare weregu, werenigui queori mera guare ōpa arĩmi:

—Wuaro guñaricubiricãque. Yujunare doce horari gohra àhraa. Abe umu majagu árĩcũ ōaro İhaa mari. Eropirã umure curirã ne cohresome mari. ¹⁰ Naitĩaro curirã cohrema. Abe umu majagu maricũ ōaro İabeama erã, arĩmi Jesu.

¹¹ Eropa arĩgu guare werenemomi.

—Mari mera majagu Lázaro carĩgu iicumi. İgu eropa carĩquerecũ ta yuhu İgure wahgũgu wagura, arĩmi guare.

¹² —Őpu, Lázaro carĩgu arĩgu tarigucumi, arĩbu gua.

¹³ Gaa eropa arīquerecū ta Jesupū “Carīgu iicumi,” arīgu, “Sīria wami,” arīgu iidigu arīmi. Īgu “Lázaro carīgu iicumi,” arīcū peerā “Lázaro soogu iicumi,” arī pepiribu gwarū. ¹⁴ Gaa eropa arī pepicū masigu Jesu guare diaye weremi.

—Lázaro sīria wañumi. ¹⁵ Yu mariro ĩgu sīricū ðapūricāa. Eropirā mua yure umupeonemorāca. Ina ta. Mari ĩarā warā ĩgu pohrogue, arīmi Jesu.

¹⁶ Toma suhruadigu erā arīguṗu ðpa arīmi guare:

—Mari sã Jesu mera warā. Īgure wejērā mari sãre wejēporo, arīmi Toma.

Jesu “Eropa árīniguicācū ĩgu masare masugu āhraa,” arīñumi

¹⁷ Eropi gaa erogue ejara pūhrū ero majarā ðpa arī werema Jesure:

—Wapicūrinū taria Lázaro murure masa gobegue erā apira pūhrū, arī weremā ĩgure.

¹⁸ Betaniapū Jerusalén pohrogā uñre kilómetros yoaro dujabū.

¹⁹ Eropirā judio masa bajarā Martare, María sãre ñehamere orerā eranirā árīma Lázaro ĩgu sīrira pūhrū. ²⁰ Eropigu Jesu mera gaa ejaboro pohro arīcū peego Martapū guare bocatīrigo eramo. Igo bocatīrigo wacū Mariapū igo ya wihi dujadigo árīmo. ²¹ Eropa bocatīrigo Marta ðpa arīmo Jesure:

—Opū, yu tīgu ĩgu sīriboro core muñu ohō arīcū ĩgu sīribiriboañumi.

²² Dohpague sãre Goãmure mu serēcū ĩgu mu serēro dopa ta ĩigucumi, arīmo Marta Jesure.

²³ —Mu tīgu masagucumi, arīmi Jesu ĩgore.

²⁴ —I yeba pehrerinū ĩgu masa mariaborore masia yuhū, arīmo igo.

²⁵ Igo eroparīcū Jesu weremi daja:

—Yuhū sīrinirāre masacū ĩgu āhraa. Masare ya mera eropa árīniguicū ĩgu āhraa. Yure umupeogu sīriqueregu ta eropa árīniguicāgucumi.

²⁶ Eropirā árīpehrerā Goãmū mera árīniguirā yure umupeorā peamegue wasome. ¿Ire masiri muñu? arīmi Jesu ĩgore.

²⁷ —Opū, masia yuhū. “Cristo Goãmū magū i yebague arīgucumi,” erā arīdigu mu arīcū masia yuhū, arīmo Marta Jesure.

Lázaro ĩgu masa gobe pohro Jesu oreñumi

²⁸ Marta eropa arītuha igo pagū magore Mariare sihugo wamo.

—Marire buhegu mari ya macare eranijagu iiami. Mure sihuami, arī yayarogā arī werepo Mariare.

²⁹ Igo eroparīcū peego María pobero mera wahgānugaja, gaa pohrogue árīmo Jesure ĩago arigo. ³⁰ Erā ya macague ejanibiricarabū dohpa. Marta guare igo bocatīridirogue árīnibu gaa. ³¹ Judio masa iri wihi Mariare ñehamere orerā iinirā árīma. Eropirā igo pobero mera wahgā wacū ĩarā erā ĩgore nurusiagānirā árīma. “Igo tīgu murure erā apira gobegue orego wago iicumo igo,” arī pepinirā árīrima erā. Eropa arī pepirā ĩgore nurusiagānirā árīma.

³² Eropigo María gaa pohrogue erago, Jesure ĩha, ĩgu guburi pohro merejamo.

—Opū, yu tīgu ĩgu sīriboro core muñu ohō arīcū ĩgu sīribiriboañumi, arīmo igo ĩgure.

³³ Eropigu igo judio masa igo mera arinirā sã erā orecū ĩagu Jesupū turaro bujawere ñero sīporācumi.

³⁴ —¿Lázaro murure nohogue opari mua? arī serēpimi Jesu.

—Opu, ĩagu arique, arĩ sihugāma erā.

³⁵ Erā eroparĩcũ peegu Jesu oremi.

³⁶ ĩgu orecũ ĩha judio masa ōpa arĩma erā basi:

—Lázaro mure Jesu bariġā mahirañumi, arĩma.

³⁷ Gajirāpu ōpa arĩma:

—Cui ri ĩhajabigure ĩacũ ĩgu āhrimi ihĩ Jesu. ¿Eropigu Lázaro ĩgu s̄riboro core masumasibiriboayuri? arĩma gajirā.

Lázarore masuñumi Jesu

³⁸ Eropigu Jesu dipaturi turaro bujāweremi. Eropirā árĩpehrerā Lázaro mura masa gobegue ejabu. Utāyegue árĩri gobegue ĩgu dupu muraro erā s̄ĩ acura gobegue árĩbu. Eropi iri gobegue wuariye utāye mera erā bihara gobegue árĩbu.

³⁹ —Utāyere aĩ weaque, arĩmi Jesu.

ĩgu eroparĩcũ peego Marta s̄iridigu mura pagu mago ōpa arĩmo:

—Opu, dohpague wapicarinu wahaa ĩgu s̄irira puhru. Eropiro ĩgu dupu muraro urĩ árĩca, arĩmo Jesure.

⁴⁰ —“Yure umupeogo Goāmu turarire ĩagoca,” mure arĩrabu, arĩmi Jesu Martare.

⁴¹ ĩgu eropa arĩra puhru erā utāyere aĩ weama. Erā eropa aĩ weara puhru Jesu umarogue ĩha Goāmure ōpa arĩmi:

—Ahu, yure mu peetuhabu. Irire mu iicũ masigu mucubiria mure.

⁴² Yure muhu umuri nucu peeniguia. Irire masia. Eropa masiqueregu ta yuhu mu obeodigu árĩcũ ōre niguirā erā masiburire mure eropa arĩgu ĩaa.

⁴³ Eropa arĩtuha Jesu turaro gaguiniguimi:

—Lázaro, arique, arĩ gaguiniguimi ĩgu.

⁴⁴ ĩgu eroparĩcũ s̄iridigu murapu ĩgu mojotorire ĩgu guburi s̄are suhri gasiri mera erā diridigu, ĩgu dipurure suhri gasiri mera erā omadigu masa gobegue wiririmi.

—ĩgure dirirare pāque ĩgure, arĩmi Jesu

Judio masa oparāpu Jesure ñeadiariñuma

Mt 26.1-5; Mr 14.1-2; Lc 22.1-2

⁴⁵ ĩgu eropa masucũ ĩarā bajarā judio masa mera majarā María mera arĩnirā Jesure umupeoma. ⁴⁶ Gajirāpu erā mera majarā fariseo masa pohrogue eja, Jesu ĩgu iirare wereñorā erāre. ⁴⁷⁻⁴⁸ Eropirā pahia oparā, fariseo masa oparā s̄ā gamenere, erā basi ōpa arĩ wereniguñorā.

—Jesu bajasuburi deyoru moarire ii ĩhmumi. ĩgu eropa iicũ, “Irire iibita,” mari arĩbircũ árĩpehrerā masa ĩgure umupeo, ĩgu mera wabocoma. Eropirā Roma majarā oparā Goāmu wihire cōādorerā obeerācoma erā yarā surarare. Mari ya yeba s̄are emarācoma erā. Mari ya yeba majarā Jesure erā opu erā apicũ ĩarā Roma majarā oparā guarā ñero iirācoma marire. ¿Eropa iirā dohpa iirācuri dohpaguere? arĩ wereniguñorā erā erā basi.

⁴⁹ Erā eropa arĩquerecũ ta gajigu Caifa waicuga iri bojorire pahia opu arĩgu erāre werepu.

—Murapu ne masibea. ⁵⁰ Judio masa árĩpehrerā mari ya árĩburire yujugu masu ĩgu s̄iricũ ōhaa. ĩgu s̄iribircũ mari árĩpehrerā judio masa pehrea waboca. Irire mua masibea, arĩmi Caifa erāre.

⁵¹ Eropā arīgu ĩgu gamero eropa arĩbiriñumi. Pahia tauro opa ĩgu árĩcũ judio masa ya árĩburire Jesu ĩgu sĩriborore Goãmũũ Caifare eropa arĩ weredoreñumi. ⁵² Jesu ĩgu sĩrigũ judio masa ya dihta sĩribiriñumi. Sĩrigũ árĩpehrerã Goãmũũ porã i yeba árĩpehrero árĩrã sãre erã ya árĩburi sãre sĩriñumi Jesu. Erã yuju curu árĩboro dopa sĩriñumi. ⁵³ Caifa eroparĩcũ peerã erã “¿Jesure dohpa ii wejērãcuri mari?” arĩ wereniguirã ĩgũre wejẽmorã iĩnorã.

⁵⁴ ĩgũre erã wejẽdiacũ masigu Jesu bajarã judio masa watope dipaturi curigu wabirimi. Eropigu masa marirogã Efraĩn waĩcũri macague guare sihu wami. Guare iri maca sihu dujanimi Jesu.

⁵⁵ Irisubure Pascua bosenu gua judio masa bosenu árĩboro merogã duhyabu. Eropirã bosenu core masa bajarã gaji macari majarã masa Jerusalengue gamenerema. Pascua majare erã baboro core Goãmũũ ya árĩburire erã basi coemorã ejanirã árĩma. ⁵⁶ Eropirã erã Jesure amarã iĩnorã. Erã eropa amacũ ĩarã Goãmũũ wihigue árĩrã opa arĩ wereniguiñorã:

—¿Bosenure ĩagu aribiribocuri Jesu mua pepicũ? arĩ wereniguiñorã erã basi.

⁵⁷ Eropirã pahia oparã, fariseo masa sã opa arĩ weredoreñorã masare:

—Jesu ĩgu árĩrore mua masirã wereque guare. ĩgũre ñeamorã iiaa gua, arĩñorã oparã masare.

12

María Jesu guburire poresuri mera pipeñoũmo

Mt 26.6-13; Mr 14.3-9

¹ Pascua bosenu seis nuri gohra duhyacũ Jesu gua ĩgu buherã mera Betaniague ejabu. Lázaro Jesu ĩgu masudigu iri maca majagu árĩmi. ² Gua ejara puhru Jesu sã gua ya bari árĩburire iima gajirã. Eropirã Lázaro, Jesu, gua mera mesare dojabu. Gua eropa doajara puhru Marta barire peomo guare. ³ Eropigo María poresuripure nardo waĩcũri goripure yuju kilo deco aĩgari, Jesu guburire pipeomo. Pipeotuha ĩgo poari mera tucoemo. ĩgo eropa pipeora puhru iri wihi õaro poresu sehya wabu. ⁴ ĩgo eropa iicũ ĩha gua mera majagu, Jesure ĩhaturirãre wiabu Juda Iscariotepũ opa arĩmi:

⁵ —¿Duhpigo iri poresuri eropa iisiriri igoa? Irire igo duaboañumo. Irire duago yuju bojori mohmeri wajapure wajataboañumo. Eropigo mojomorocũrãre oboañumo igo, arĩmi ĩgu.

⁶ Judapũ mojomorocũrãre itamudiabiriñumi. ĩgu gua ya niyeru dibugu árĩqueregũ ta yajaricũgu árĩmi. Eropigu ĩgu gua ya niyeru sãre yujuyerisuburi aĩmurimi. Eropigu iri niyerure aĩdiagũ árĩgu, eropa arĩñumi ĩgu Mariare.

⁷ ĩgu eroparĩcũ peegu opa arĩmi Jesu:

—Eropa arĩbita igore. ĩgo poresurire yure igo duarare yure pipeoamo yure erã yaaboro core yũ dupure amuyugo. Mojomorocũrãpũ mua mera eropa arĩniguiçãrãcoma. Eropirã mua gamero erãre omasia mua. ⁸ Yũpũ i yebaguere eropa arĩniguiçãsome, arĩmi Jesu.

Pahia oparã Lázarore wejẽdiañuma

⁹ Eropirã Jesu ĩgu Betaniague árĩcũ peerã judio masa bajarã ĩgũre ĩarã arima. ĩgu dihtare ĩarã aribirima. Lázaro sĩridigu Jesu ĩgu masudigũre

Īġu sãre ĩarã arirã iima. ¹⁰ Erã ĩarã ejarare pahia oparã masirã Lázarore wejċdiañorã. ¹¹ Lázaro sĳridiġu Jesu ĩġu masudigu áricũ ĩarã bajarã masa Jesure umupeoma. ĩġu eropa masucũ ĩarã bajarã judio masa erã pahia erã buheripure cóama. Erã eropa cóacũ ĩarã pahia oparãpũ guataria wa, Lázaro sãre wejċdiañorã.

Jerusaléngue ejañumi Jesu

Mt 21.1-11; Mr 11.1-11; Lc 19.28-40

¹² Pascua bosenu erã iicũ bajarã masa Jerusaléngue ĩarã wanirã árĳma. Gajinu Jerusaléngue Jesu ĩġu waburire masa peenirã árĳma. ¹³ Eropirã bejepũre aĩgã, ĩġure bocatĩrirã wama. Eropa bocatĩrirã õpa arĳ gaguĩnguima erã.

—Īre umupeorã. Ihĩ Goãmu ĩġu obeodigu õaro ariporo. Ihĩ judio masa mari opu ta áhrimi, arĳ gaguĩnguima erã.

¹⁴ Jesu burrogã ĩġu bocadigu weca peyami. ĩġu eropiigu Goãmu yare erã gojarapũ werediro dopa ta iimi. Õpa arĳ gojañumi Goãmu yare weryumãhtadigugue.

¹⁵ Jerusalén waĩcuro majarã güibircãque mua. ĩaque. Mua opu burrogã weca peyagãrimi, arĳ weremãhtañumi Goãmu yare erã gojarapũgue.

¹⁶ Irire gua ĩġu buherã õaro masinibiribũ. Eropa masibiriquererã ta amarogue Jesu ĩġu muriara puhru gua erã gojara murare guña boca pee masibũ. Õpa arĳ pepibũ: “Goãmu yare erã gojarapũgue Jesure weremãhtañuma. Eropiro Goãmu yare erã gojarapũ arĩdiro dopa ta sihajabũ Jesure,” arĳ pepibũ gua basi.

¹⁷ Lázarore erã apira gobegue árigure Jesu ĩġu piyucũ ĩġure ĩġu masucũ ĩanirãpũ weresiriniguĩnirã árĳma masare. ¹⁸ Eropirã Lázarore Jesu ĩġu masurare erã peenirã árĩrã masa bajarã Jesure bocatĩrirã wama. ¹⁹ Erã Jesure eropa umupeocũ ĩarã fariseo masa erã basi õpa arĩñorã.

—Árĩpehrerã Jesu yarã dihta warã iima dohpaguere. Eropirã mari dohpa iimasibea erãre, arĩñorã fariseo masa erã basi.

Bajamerãgã Griego masa Jesure amagãriñuma

²⁰ Eropi bosenu Goãmu wihigue Goãmure umupeorã eranirã mera majarã bajamerãgã griego masa arĩñorã. ²¹ Eropirã erã Felipe pohrogue erañorã. Felipepũ Betsaida waĩcuri maca Galilea yeba árĩri maca majagu árĳmi. Eropirã ĩġu pohrogue erarã õpa arĩñorã ĩġure:

—Jesure ĩadiaca gua, arĩñorã erã.

²² Erã eroparĩcũ peegu Felipe Andreguere weregu wapu. Eropirã erã peerã Jesure werema. ²³ Erã werera puhru Jesu guare weremi:

—Yuhũ masu Goãmu ĩġu obeodigu áhraa. Yure árĩpehrerã umupeoburibusu árĩro iiaa dohpaguere. Dohpaguere yu sĳriburibusu árĩro ta iiaa. ²⁴ Diaye muare arĩgu iiaa. Oteriyere yebague yaabiricũ, iriyere otebiricũ yujuye ta dujaroca. Eropiro iriyere mari otera puhru bajayeri ducasiua. Eropa ta yu sĳrira puhru yure erã yaara puhru bajarã masare Goãmu mera eropa árĩniguimorãre iigaca yuhũ. ²⁵ I yeba mua árĩrire wãaro pepiboca mua. Eropa pepirã Goãmure guñabirã peamegue warãca mua. I yeba mua árĩrire eropa pepicãrã, Goãmu mera eropa árĩniguirãca.

²⁶ Yahare iidiarã, yu buherire õaro peeque mua. Mua eropa iirã mua sã

yū árīboroguere árīrāca. Yahare iigure yū Pagupū umupeogucumi, arīmi Jesu guare.

Jesu ĩgu sīriburiñere wereñumi

²⁷ Ōpa arīnemomi guare.

—Dohpaguere yuhū ñero sīporācua. ¿Yū Pagure dohpa arīgucuri yuhū? “¿Ahū, yū ñero tariborore tauque,” ¿arībocuri yuhū? Irīre arībeaa yuhū. Ñero taribu ta i yebaguere arību. Eropiro yū ñero tariburisubū dohpaguere āhraa, arī weremi Jesu guare ĩgu buherāre.

²⁸ Eropīgu ōpa arīmi ĩgu Pagure:

—Ahū, mū turagu árīrīre dohpaguere ĩhmuque masare, arīmi Jesu ĩgu Pagure.

Īgu eroparīcū umarogue wereniguiro carību.

—Turagu yū árīrīre masare ĩhmutuhabū. Dohpaguere eropīgu dipaturi ĩhmugūca masare, arīro carību.

²⁹ Eroparīcū peerā ero niguirā masa bajarā ōpa arīma:

—Bupu árīcumī eropa busugū, arīma masa.

—Anyu Jesure weregu iiami, arīma gajirā masa.

³⁰ Ōpa arīmi Jesupū:

—Ūmarogue yūre peedorero eropa busubiro carabū. Mūpare peedorero eropa carabū. ³¹ Dohpaguere i yeba majarā erā ñeri iira dipuwaja dipuwajacurācoma. I yeba majarā erā opure watīre Goāmū cóāgucumi. ³² Eropīgu crusague yare erā aī wahgū nugucū bajarā masare yaharā árīmorāre ĩgucū yuhū, arīmi Jesu.

³³ Eropā arīgu crusague ĩgu sīriborore weregu iimi Jesu masare. ³⁴ ĩgu eroparīcū peerā masapū ĩgure ōpa arīma:

—Goāmū yare erā gojarapū ōpa arāa: “Cristo árīpehrerinuri árīgucumi,” arī gojañuma. ¿Īgu eropa arī gojacū mure masare Goāmū ĩgu obeodigure dohpa arīronore mure wejē crusague aī wahgūrācuri masa? ¿Goāmū ĩgu obeodigu noa āhriri ĩgu? ¿Cristo árībeari mūhū? arī serēpima erā Jesure.

³⁵ Erā eroparīcū ōpa arī yūhrimi Jesu:

—Boyoriñe iro dopa árīgu masare Goāmū yare ōaro masicū iiaa yuhū. Pūhruñarīgā mua mera árīsome yuhū. Mūare yū buhecū dohpaguere peeque ñerire mua iibiriburire, Goāmū mera mua eropa árīniguiburire. Yū buherire peebirā naiñaro curirā iro dopa erā waborore masibeama.

³⁶ Eropīgu boyoriñe iro dopa ta árīgu yuhū ta āhraa. Eropīgu mūare buhegu Goāmū yare ōaro masicū iiaa mūare. Dohpaguere yū waboro core yare umupeoque. Eropā umupeorā yaharā árīrāca mūa, arīmi Jesu.

Eropa arī weretuha waha wami erāre duhri wahgāgu.

Judio masa Jesure umupeobiriñuma

³⁷ Bajasuburi Goāmū turari mera erāre Jesu ĩgu deoro moarire ii ĩhmuquerecū ta judio masa bajarā ĩgure ne peediabirima. ³⁸ Goāmū yare erā gojarapū Isaia mūru ĩgu gojadiro dopa ta eropa iirā iima erā. Ōpa arī gojañumi Isaia:

Goāmū, mū buherire gua werecū masa peediabeama. Mū turarire erāre mūhū ii ĩhmuquerecū ta irire “Diaye árībeaa,” arīma erā, arī gojañumi Isaia Goāmū yare gojarapūgue.

³⁹ Erā eropa peediabiricū ĩagu Goāmū erāre masibiricū iīñumi. Iri sāre Isaia ōpa arī gojañumi daja:

⁴⁰ Cuiiri İhajibirã iro dopa árĩcũ iidii árĩmi Goãmu erãre. Eropigu İgu yare masibiricũ iidii árĩmi erãre. Eropirã İgu turarire erã İaquererã ta erã İarare masibirinirã árĩma erã. Eropirã İgu buherire peequererã ta irire masibirinirã árĩma erã. Goãmu yare masirã erã İerire cóadoreboñuma. Eropigu erãre tauboñumi İgu, arĩ gojañumi Isaia Goãmu yare erã gojarapũgue.

⁴¹ Isaia Cristo turarire masiyudigu eropa arĩ gojamũhtañumi.

⁴² Gajirã Jesure erã umupeobiriquerecũ ta judio masa sã oparã mera majarã sã bajarã Jesure umupeonirã árĩma. Eropa erã umupeoquererã ta erã fariseo masare güirã gajirã masare Jesure erã umupeorire weribirinirã árĩma. Irire erã werecũ peerã gua judio masa buheri wihigue erãre İajadorebiriboñuma fariseo masapũ. ⁴³ Goãmure mucubiricũ iidiaquererã ta erã tauro masapure mucubiricũ iidianirã árĩma erã. Eropirã erã Jesure ne umupeorã “Jesu yarã ähraa,” arĩ gajirãre werediabirinirã árĩma.

Jesu wererire erã peediabiriri dipuwaja masa dipuwajacũräcoma, arĩ wereñumi Jesu

⁴⁴ Masa bajarã gua pohro gamenerenirãre Jesu turaro busuro mera weremi:

—Yũre umupeogu yũ dihtare umupeobeami. Yũre obeodigu sãre umupeomi İgu. ⁴⁵ Eropirã yũre masirã yũre obeodigu sãre masima. ⁴⁶ Yũhu boyoriñe iro dopa ta árĩgu yũhu Goãmu yare buhegu ahraa i yebaguere. Eropigu Goãmu yare mũare masicũ iiaa. Yũre umupeogu naitũaro wagu iro dopa İerire iiniguismo. Yũre umupeogu diaye pepigucumi. ⁴⁷ Gajirã yũ wererire peequererã ta irire yũhibeama. Erã eropa yũhibiriquerecũ ta, erã yũhibiriri dipuwaja moasome yũpũ dohpa. I yebaguere dipuwaja moagu arigu aribiribu yũhu. I yeba majarãre peamegue wabonirãre taugu arigu aribu yũhu. ⁴⁸ Yũre gamebigure yũ wereri sãre gamebigure dipuwaja moari árĩroca. İgu yũre peebirira dipuwaja i umũ pehrecũ dipuwajacugucumi. ⁴⁹ Yũhu yũ gamero werebeaa. Yũ Pagu yũre obeodigupũ yũre weredoremi. Eropiro yũ wereripũ İgu ya wereniguirĩ ähraa. ⁵⁰ İgu ya wereniguirire peerã Goãmu mera eropa árĩniguirãca mua. Eropigu yũ Pagu İgu weredoreldiro dopa ta werea mũare, arĩmi Jesu guare.

13

Jesu İgu buherãre guburire coeñumi

¹⁻³ Eropi Pascua bosenu coregã árĩbu. Iri İamire Jesu gua İgu buherã mera iri bosenure babu árĩmi. Eropigu i yebare İgu wiriaborore İgu Pagu pohro waburire merogã dũhyacũ masidigu árĩmi Jesu.

Gua barisubũ Judare watĩ doretuhadigu árĩmi İgu pepirigue. Eropigu İgure Simo Iscariote magure Jesure İhaturirãre iri İamire İgu wiaburire doretuhadigu árĩmi. Jesu İgu yarãre i yeba árĩrãre burigã mahidigu árĩmi. Eropigu İgu mahirare İhmubu gua guburire coemi. İgu Goãmu pohroque İgu arirare, pũhrũ İgu umarogue İgu muriaburi sãre masidigu árĩmi. İgu Pagu Goãmu İgure árĩpehrerã weca opu İgu apira sãre masidigu árĩmi. ⁴ Eropa masiqueregu wahgãnũgaja, İgu suhriro weca majañere tuwea suhriro gasiro mera İgu paru yũjũre dirimi. ⁵ Dirituha soropa mera decore

pisã, guare ïgu buherãre gua guburire coenugami. Guare coetuha ïgu dirira gasiro mera tucoemi gua guburire.

⁶ Gajirã buherãre coegã, Simo Pedroguere ejami. ïgu guburire ïgu coeboro core, Pedropu ïgure òpa arïmi:

—Opu, çya guburire coebu iiri muhã? arïmi Jesure Pedro.

⁷ —Dohparagã yuhũ mãre iiburire masibeea muhũ. Eropa masibiri-queregu ta puhũ masigũca, arïmi Jesu ïgure.

⁸ —Yu guburire ne coesome muhũ, arïmi Pedro.

—Mãre yu coebiricũ yahagu arïsome muhũ, arïmi Jesu.

⁹ —Opu, yu guburi dihtare coebiricãque. Yu guburire, yu mojotorire, yu dipuru sãre coeque, arïmi Pedro.

¹⁰ ïgu eroparicũ Jesu òpa arïmi:

—Yujugu masu guhagu ïgu dũpũre òaro tucoepehomi. Eropiro ïgure dipaturi tucoema masiya mara. ïgu guburi dihtare coero gahmea. Áripehrerã mua ñeri iirare coenirã mua áriquerẽcũ ta yujugu mua mera majagu ïgu ñerire coeya marigu áhrimi, arïmi Jesu.

¹¹ Jesu ïgure ïhaturirãre wiabure masituhãumi. Eropa masigu “Yujugu mua mera majagu ïgu ñerire coeya marigu áhrimi,” arïñumi ïgu.

¹² Gua guburire coetuha, suhriroro sañatuha, doajami daja ïgu doadiro ta. Tuhaja òpa arïmi guare:

—¿Dohparagã yuhũ muare iirare masiri mua? ¹³ Mua yũre “Buhegu,” arï piyurã, “Opu,” arï piyurã diaye ta arïrã iiaa yũre. Muare buhegu, mua opu diaye ta áhrraa yuhũ. ¹⁴ Eropirã yuhũ muare buhegu, mua opu áriquerẽgu ta mua guburire yu coecũ mua sã mua mera majarãre guburire coeque. ¹⁵ Dohparagã mua iiburire muare ïhmuabu. Mua mera majarãre mua itamuburire muare ïhmuabu. Muare yu iidiro dopa ta mua sã iique. ¹⁶ Diaye muare arïgu ta iiaa. Mua yu pohro majarã dopa áriãrã yu tauro áribeaa. Muare buhedore yu obeorã áhrraa mua. Eropirã yu tauro áribeaa mua. Eropa iigu ta “Yu iidiro dopa ta iique,” arãbu yuhũ muare. ¹⁷ Ire mua masirã, yu dorerire iirã, mucubirirã áriãrãca mua.

¹⁸ “Muare áripehrerãre eropa aribeaa. Yu beyenirãre masia yuhũ. Goãmũ yare erã gojarapũ arïdiro dopa ta eropa waroca. “Yu mera bagu ta yũre wejẽdiami,” arï gojañuma Goãmũ yare erã gojarapũge. ¹⁹ ïgu yũre eropa wiaboro core ire weryugu iiaa muare. Yũre ïgu eropa iira puhũ “Jesu ta Cristo Goãmũ ïgu obeodigu áhrimi,” mua arïburire ire muare weryugu iiaa yuhũ. ²⁰ Diaye ta muare arïgu iiaa. Yu obeonirãre gamegu yu sãre gahmemi ïgu. Eropigu yũre gamegu yũre obeodigu sãre gahmemi ïgu, arïmi Jesu guare ïgu buherãre.

Juda Jesure ïhaturirãre ïgu wiaborore wereñumi Jesu

Mt 26.20-25; Mr 14.17-21; Lc 22.21-23

²¹ Eropa arï weretuha Jesu turaro bujaweremi. Eropa bujawerẽgu òpa arï weremi ïgu guare.

—Diaye muare arïgu iiaa. Yujugu mua mera majagu yũre ïhaturirãre wiagucumi, arïmi Jesu.

²² ïgu eroparicũ peerã Jesure wiabure masibirã, gua game ïhamehtubu.

²³ Yuhũ ïgu buherã mera majagu Jesu ïgu mahigupu ïgu pohro doabu.

²⁴ Eropigu Simo Pedro yũre ïgu mojoto mera sïpu serẽpidoremi Jesure ïgure wiabure: ²⁵ Eropigu yũpu Jesu pohro doadigu serẽpiñabu ïgure:

—Opu, çnihire arïgu iiri muhũ? arïbu yuhũ.

²⁶ —Iru panrure mohwa aĩ, yuħu yoso oġu ĩġu ta āħrimi yare wiabu, arĩmi Jesu.

Eropa arĩtuha iriru panrure ĩġu mohwarañere yosotuha Judare Simo Iscariote magure omi. ²⁷ Eropiġu panre ĩġu ora puhru watĩpu Judare ñero iidorediġu arĩmi. Eropiġu Jesu ĩġare ōpa arĩmi:

—Mũ iiburire yojaro mera ii purumuġuque mũħu, arĩmi Jesu Judare.

²⁸ ĩġu eroparĩcũ peerã ġua mesague doanirã Jesu Judare ĩġu arĩrare masibiribũ. ²⁹ Yujurãyeri ġua ōpa arĩ pepiribũ: “Juda ġua niyerure dibuġu āħrimi. Eropiġu bosenu ġua baburire asũdoreġu obeoami Jesu Judare. Mojomorocurãre niyerure odoreġu iiami Jesu,” arĩ pepiribũ ġua yujurãyeri. ³⁰ Eropiġu Juda iri panre ñeatuha wiria wami. ĩġu wiriarasubure ñami arĩbũ.

Mama doreriñere wereñumi Jesu ĩġu buherãre

³¹ ĩġu wiriara puhru ġuare ōpa arĩmi Jesu:

—Dohpague tamerare yuħu masu Goãmu ĩġu obeodiġu yu turagu arĩrire ĩħmugũcumi Goãmu masare. Eropiġu Goãmu ĩġu turagu arĩrire ĩħmugũca yuħu. ³² Eropiġu Goãmu turarire yu ĩħmucũ ĩġu yu turari sãre dohparagã ĩħmu purumuġuġucumi. ³³ Yu porã, yare peeque. Bajamenurĩgã mũa mera arĩniġuca. Yure amarãca mũa. Eropiġu judio masare yu arĩdiro dopa ta mũa sãre arãa. “Yu waborore mũapu wamasibea,” erãre yu arĩdiro dopa ta mũa sãre werea. ³⁴ Mama doreriñere mũare weregura. Mũa mera majarãre mahiġue mũa. Mũare yu mahidiro dopa ta mũa mera majarãre mahi umupeoġue. ³⁵ Eropirã mũa mera majarãre mũa mahicũ ĩħa ġajirã yaharã mũa arĩcũ ĩħa masirãcoma, arĩmi Jesu.

*“Jesure masibea,” Pedro ĩġu arĩburire wereñumi Jesu
Mt 26.31-35; Mr 14.27-31; Lc 22.31-34*

³⁶ ĩġu eroparĩcũ Simo Pedro Jesure serẽpimi:

—Opũ, ĩnohogue wagũcuri mũħu? arĩmi Pedro. ĩġu eroparĩcũ Jesu yuħrimi:

—Yu waboroġuere dohpaguere yu mera wamasibea mũħu. Dohpague wamasibiriquereġu ta puhru yu pohro wagũca, arĩmi Jesu Pedroro.

³⁷ Pedro arĩmi:

—Opũ, ĩduhpĩġu dohpaguere mũ mera wamasibiribocuri yuħu? Yure erã wejẽdiaquerecũ yuħu mũre duhosome. Itamugũca, arĩmi Pedro Jesure.

³⁸ —;Mũ eropa arĩġu diaye ta yure itamugũcuri? Diaye mũre wereġu iiaa. “Jesure masibea,” arĩġuca mũħu ġajirãre. Uħresubu eropa arĩġuca cãreña ĩġu wereboro core, arĩmi Jesu Pedroro.

14

Jesu Goãmu pohroġue wari maha iro dopa āħraa yuħu, arĩ wereñumi

¹ Puhru Jesu ġuare ōpa arĩ weremi:

—Ne bujawere wũaro ġuñaricũbiricãque. Goãmure “Diaye ta iigu āħrimi,” arĩ umupeoġue. Eropirã yu sãre eropa umupeoġue. ² Yu Pagu ĩġu arĩroġuere baja wiri āħraa. Mũa arĩborore amuyugũ wagura. Iri diaye ta āħraa. Eropiġu mũare irire werea. ³ Eropiġu mũa arĩborore amutuħa, dujarĩġura yuħu. Eropiġu yu pohroġue mũa arĩmorãre aĩġu arĩġura yuħu daja. ⁴ Eropirã yu waburi mare masia mũa, arĩmi Jesu ġuare ĩġu buherãre.

5 —Opu, mu waborore masibea gaa. ¿Eropirā dohpa ii mu waburi mare masirācuri gaa? arī serēpimi Toma Jesure.

6 Īgu eropa arī serēpicū Jesupu yuhrimi:

—Goāmu pohrogue wari maha iro dopa árīgu tiaa yuhu. Eropigu diaye árīre weregu weregu árīcāgu tiaa yuhu. Eropigu umaroguere ojocarínigicū iigu árīgu tiaa yuhu. Eropirā yure umupearā dihta yu Pagu pohrogue warācoma. 7 Nere yure masirā árīrā, yu Pagu säre masiboaya mua. Dohpaguere ĩgure ihāa mua. Eropirā ĩgure masituhabu mua, arīmi Jesu.

8 Īgu eroparīcū Felipe opa arīmi:

—Opu, mari Pagure ĩhmuque guare. Iripēta gahmea gaa, arīmi ĩgu.

9 Īgu eroparīcū Jesu weremi:

—Felipe, ¿yoari boje yu mera árīqueregu ta, mu masinibeari yure? Yure ĩagu yu Pagu säre ĩatuhami. “Eropigu mari Pagure ĩhmuque guare,” ¿duhpigu eropa arīri muhu yare? 10 Yu Pagu mera yujugu ta āhraa yuhu. Irire “Diaye árībeaa,” ¿arīgu meje iiri muhu? Muare weregu yu gamero weregu iibeaa. Yu Pagure werebasagu iiaa. Eropigu ĩgu yu mera árīgu ĩgu turari mera ii ĩhmumi. 11 Yuhu, yu Pagu mera yujugu ta āhraa. Yu eroparīcū irire “Diaye ta āhraa,” arī pepique mua. Irire “Diaye ta árībeaa,” arīdiarā, Goāmu turari mera deyro moarire yu ii ĩhmurire ĩaque. Eropu ĩara puhru yu Pagu mera yu yujugu ta árīre “Diaye ta āhraa,” arī pepique mua. 12 Diaye muare arīgu iiaa. Yure umupegu yu iidiro dopa ta iigucumi. Eropigu ĩgupu yu tauro iigucumi. Yu Pagu pohrogue wabu iiaa dohpaguere. Eropigu yure umupegu yu tauro Goāmu turari mera ii ĩhmugucumi. 13 Eropigu yure umupearā erā yu wai mera serēropē ta iigura. Eropu iigu yu Pagu ĩgu turarire ii ĩhmuguca. 14 Yure umupearā mua árīcū mua serēropē ta iigura, arīmi Jesu.

Espíritu Santore muare obeogura, arī wereñumi Jesu

15 Eropu arītuha guare opa arīnemomi:

—Yure mua mahirā, yu dorerire iipehorāca. 16 Yu Pagure serēgura. Yu eropa serēcū yu Pagupu gajigure muare itamubure muare obeogucumi. Eropigu ĩgu muare itamubupu umuri nucū mua mera árīgucumi. 17 Īgu diaye majare weregu Espiritu Santo āhrimi. I yeba majarāpu Espiritu Santore masibeama. Eropirā ĩgure opamasibeama. Īgu ta mua mera árīgucumi. Eropirā mua ĩgure oparāca. Eropirā ĩgure masia mua. 18 Muare cóasome yuhu. Mua mera árību dujarīguca yuhu daja. 19 Merogā duhyaa yu waboro. Yu wara puhru i yeba majarā yure umupearā yure dipaturi ĩasome. Muapu yure ĩarāca. Yu ojocarīcū mua sā umuri nucū Goāmu mera ojocarīrāca. 20 Irinu yu dujariburinure yuhu, yu Pagu mera yujugu ta yu árīcū masirāca mua. Eropirā yu mera mua árīcū mua mera yu árīcū säre masirāca mua. 21 Yu dorerire iigu yure mahigu ta āhrimi. Eropigu yure mahigure yu Pagupu mahigucumi. Eropigu yu sā ĩgure mahiguca. Eropigu ĩgure yure oaro masicū iiguca, arīmi Jesu guare ĩgu buherāre.

22 Gaa mera majagu gajigu Juda waicugu arīmi Iscariote árībigu. Opa arīmi ĩgu Jesure.

—Opu, ¿dohpa iigucuri muhu guare eropa arīgu? ¿I yeba majarāre mure masicū iibigu dohpa iigucuri muhu gaa dihtare mure masicū iigu? arī serēpimi Juda.

²³ Īḡu eroparīcū Jesu yuhrimi:

—Yüre mahirā yu dorerire ōaro iima. Erā eropa iicū yu Pagupu erāre mahigucumi. Eropirā erā mera árīrā árīrāca gua. ²⁴ Yüre mahibigu yu dorerire iibeami. Eropiro yu wereri mua peerapu yu wereniguii árībeaa. Yüre obeodigu ya wereniguiripu āhraa. Īḡu yu Pagu ta āhrimi.

²⁵ Mua mera árīnigu ire muare wereniguigu iiaa. ²⁶ Puhru yu serēcū yu Pagu Espiritu Santore obeogucumi muare. Eropigu Espiritu Santopu muare itamubu árīḡu, muare buhepehogucumi ĩḡu. Eropigu muare yu wererare guñacū iigucumi ĩḡu.

²⁷ Muare ōaro árīcū iiguca yuhu. Yuhu ōaro árīdiro dopa ta ōaro árīcū iiguca muare. I yeba majarā erā iidiro dopa iisome yuhu. Yu tamera diaye ōaro árīcū iiguca muare. Bujawere wuaro guñaricubiricāque mua. Eropirā güibiricāque mua. ²⁸ “Yuhu waguca. Eropigu mua mera árību dujariguca daja,” muare yu eropa arī werēcū peetuhabu mua. Irire masirā árīrā mucubiriboaya mua. Yüre mua diaye mahinirā árīrā mucubiriboaya mua. Yu Pagupu yu tauro turami. Eropirā ĩḡu pohrogue yu waborore mua masira puhru yure mahirā mucubiriboaya mua. ²⁹ Yüre mua umupeoburire yu waborore wereyugu iiaa muare.

³⁰ “I yeba majarā opu watī doregu iimi dohpaguere. Eropigu ĩḡu eropa dorecū yuhu mua mera wereniguituboro merogā duhyaa. Īḡupu yure tarinugamasibeami. ³¹ Yüre yu Pagu ĩḡu dorero dopa ta iiaa yuhu. Eropa ta iiaa yuhu yu Pagure yu mahirire i yeba majarā erā masiburire.

“Wahgānugajaque. Ina warā, arīmi Jesu guare ĩḡu buherāre.

15

Jesu iguiru iro dopa āhraa, arī wereñumi

¹ Eropigu werenigui queori mera buhegu guare ōpa arīmi Jesu:

—Yuhu iguiru diaye majaru iro dopa árīḡu āhraa. Yu Pagupu iguirure ĩhadibugu iro dopa árīḡu āhrimi. ² Iguirure iri dūpuri gamesuriro dopa ta mua yaharā yu mera āhraa. Dūca mariri dūpurire iguirure ĩhadibugu ĩḡu peha cóāro dopa ta yu Pagu ĩḡu gamerire iibirāre cohāmi. Dūcacuri dūpurire iguirure ĩhadibugu ĩḡu amuro dopa ta yu Pagu ĩḡu gamerire iirāre itamugucumi ĩḡu “Yu gamerire iinemoporo,” arīḡu. ³ Yu wererire peerā, “Diaye ta āhraa,” arāa mua. Eropigu yu Pagu mua ñeri iirare cóātuhami. ⁴ Yüre gamesuriro dopa ta yu mera majarā árīḡue mua. Eropigu mua mera árīḡuca. Iguiru dūpuri iguiru mera gamesuribiro árīro iri dūpuripu dūca mara. Eropa ta yu mera majarā ōaro árībirā sā yu Pagu gamerire iimasibea mua.

⁵ Iguirure iri dūpuri gamesuriro dopa ta mua yaharā yu mera āhraa. Iri dūpuri iguirure ōaro gamesuriro árīro dūcacua. Mua sā yure ōaro gamesurirā yu Pagu gamerire iiaa. Yüre gamesurirā árībirā ĩḡu gamerire iimasibea mua. ⁶ Ñeri dūpurire turira dūpure ĩḡu cóāboro dopa ta yu mera majarā árībirāre yu Pagu cóāgucumi. Iri dūpuri ñaicū ĩha iguirure ĩhadibugu iri dūpurire aī gameneo peamegue soecāgucumi. Eropa ta iigucumi Goāmu yu mera majarā árībirāre.

⁷ “Yu mera majarā árīrā yu buherire cādijibiriboca mua. Eropa cādijibirā mua gameropē ta yure serēque. Eropigu mua serēropē ta ogura. ⁸ Yu Pagu gamerire mua iirā árīcū ĩarā, “Oā Jesu yarā āhrima,” arī masirācoma gajirā masa. Eropirā muare ĩarā yu Pagure umupeorācoma.

⁹ Yu Pagu İgu yure mahidiro dopa ta yu sã muare mahia. Eropirã yu mahiri mera árrique mua. ¹⁰ Yu Pagu İgu dorerire iiaa yuhu. Eropigu İgu mahigu árninguia yuhu. Eropa ta mua sã yu dorerire iirã yu mahirã árninguicãrãca mua.

¹¹ "Ire muare wereabu yu mera mua ðaro mucubiriborore. Eropirã turaro mucubirirãca mua. ¹² Őpa dorea muare: Muare yu mahidiro dopa ta mua mera majarãre mua sã mahique. ¹³ Yujugu masu İgu mera majagu yañe árborañe sirigu İgu mera majagure burigã mahiami gajirã mahidiro tauro. ¹⁴ Eropirã yu dorerire iirã yu mera majarã ahraa mua. ¹⁵ Diaye ta mua yu mera majarã gohra ahraa. Mua eropa árirã árıcũ árpehrerire yu iirare werea muare. Pohro majagu İgu opu iiburire masibeami İgu. Eropigu "Yu pohro majarã bu árirã ahraa mua," aribeaa muare. Yu Pagu İgu yure wererare muare werepehoabu. Eropa weregũ "Yu mera majarã ahraa mua," muare arãa dohpaguere. ¹⁶ Muapu yure beyebiribu. Yupu muare beyebu yu Pagu gamerire mua iimorãre. Mua eropa iicũ mua eropa iiri ne yuju diaye gohra árísome. Mua eropa iicũ yure mua umupeocũ yu Pagu mua serëropë ta muare ogucumi. ¹⁷ Ire muare dorea yuhu: Mua basi game mahi umupeoque, arĩmi Jesu.

Jesure İgu yarã sãre i yeba majarã ihaturirire wereñumi Jesu

¹⁸ Eropigu guare werenemomi daja:

—I yeba majarã muare erã ihaturicũ İarã ire guñaque mua: "Guare eropa ihaturiboro core Jesupure ihaturinugatuhama erã," arĩ guñaque. ¹⁹ I yeba majarã gohra mua árıcũ, erã mera majarãre erã mahidiro dopa ta mua sãre mahiboañuma erã. I yeba majarã mera mua árnicũ muare beyebu. Eropirã dohpaguere i yeba majarã gohra áribeaa mua. Mua eropa árıbiricũ İarã i yeba majarã muare ihaturima. ²⁰ Mua yaharã árırã "Yu tauro áribeaa," muare yu arĩrare guñaque mua. Eropa yu mera majarã árırã yu ñero tariboro dopa ta ñero tarirãca mua sã. Yure ñero iinirã ta mua sãre ñero iirãcoma. Yu buherire yuhrinirã ta mua buheri sãre yuhrirãcoma. ²¹ I yeba majarã yure obeodigure masibeama. Eropirã yure umupeorã mua árıcũ ñero iirãcoma erã muare.

²² "Erãre yu buhegu arıbiricũ erã yure gamebirira dipuwaja mari-boaya. Dohpaguere erãre yu buhera puhru "Ñeri dipuwaja mara guare," arĩmasibeama erã. ²³ Yure ihaturigu yu Pagu sãre ihaturimi. ²⁴ Goãmu turari mera gajirã erã ne iibirirare ii İhmubu. Eropiro erãre irire yu ii İhmubiricũ erã peebirira dipuwaja mariboaya. Goãmu turari mera yu ii İhmurare erã İara puhru yure yu Pagu sãre ihaturima erã. ²⁵ Eropa İhaturirã Goãmu yarë erã gojarapũ matague ta erã arĩ gojadiro dopa ta iirã iima erã. Őpa arĩ gojañuma: "Erãre yu ñero iibiriquerecũ ta yure İhaturima erã," arĩ gojañuma matague ta Goãmu yare erã gojarapũgue, arĩmi Jesu.

²⁶ Eropigu werenemomi daja:

—Yu puhrugue muare itamubu, yu Pagu mera árıgu muare yu obeobu Espiritu Santo ta ahrimi. İgu diaye majare weregũ ta ahrimi. Eropigu İgu arıgu yu árıricurire weregucumi muare. ²⁷ Muare yu buhenugacũgue mua sã yu mera umuri nucu árıbu. Mua sã yu árıricurire wererãca, arĩ weremi Jesu guare.

16

¹ Eropa arĩtuha guare òpa arĩ werenemomi:

—Pũhũ yũ buherire yũ sãre mua cóãbiriburire òpa weregara muare.
² Mari buheri wirigue mua ñajadiacũ ñajadoresome muare yaharã mua arĩri dipuwaja. Eropirã muare gajisubu wejẽ “Goãmu gamerire iirã iiaa,” arĩ pepirãcoma gajirã. ³ Yũ Pagure, yũ sãre erã masibeama. Eropa masibirã muare ñero iirãcoma erã. ⁴ Eropirã muare erã ñero erã iicũ ñarã, “Erã òpa iiboro core ta Jesu guare weremuhtayutuhami,” arĩ guñarãca mua. Mua eropa arĩ guñaburire dohpaguere ire weremuhtagu iiaa muare, arĩ weremi Jesu.

Espíritu Santo ìgu iiburire wereñumi Jesu

Eropa arĩtuha òpa arĩ werenemomi:

—Neguere mua mera arĩgu ire muare werebiribu. ⁵ Dohpaguere yũre obeodigu pohrogue waguca. “¿Nohogue wagucuri muhũ?” arĩ ne yujugu yũre serẽpibeeaa mua yũre. ⁶ Eropa serẽpibiriquererã ta yũ waborore muare werecũ mua ñero siporãca. ⁷ Mua ñero siporãcuqerercũ muare òpa diaye ta werea: Yũ wara pũhũ muare òacãroca. Yũ umarogue wabiricũ muare itamubupu aribiribocumi. Eropa wagu eja muare ìgure obeoguca yũhũ. ⁸ Yũ eropa obeocũ ìgu arigucumi. Eropa eragu i yeba majarãre ñerire iirã erã arĩcũ masicũ iigucumi ìgu. Eropigu òaro arĩricurire ñehegucumi ìgu. Eropigu Goãmu ìgu dipuwaja moaborore weregucumi masare itamubupu. ⁹ Yũre umupeobirã àhrima i yeba majarã. Eropigu itamubupu masa erã ñero iiricurire erãre masicũ iigucumi. ¹⁰ Yũ Pagu pohrogue waguca. Yũ eropa wara pũhũ masa yũre ñanisome. Eropigu itamubupu arigu òaro arĩricuri sãre buhegucumi. ¹¹ I yeba majarã opure watĩre Goãmu dipuwaja moadoretuhami. Eropigu Goãmu masare ìgu dipuwaja moaburi sãre weregucumi itamubupu.

¹² “Wũaro àhrra muare yũ wereburi. Yũ eropa werenemodiaquerecũ ta ire yũ werecũ dohparagã masisome mua. ¹³ Yũ eropa werenemobiricũ Espiritu Santopũ irire werenemogu arigucumi. Ìgu ìgu gamero muare weresome. Yũ Pagu ìgu weredorerare muare weregucumi. Eropigu muare diaye majare werepehogucumi. Eropiro pũhrugue waburire muare masicũ iigucumi ìgu. ¹⁴ Eropigu ìgu yare muare weregucumi. Eropa weregũ yũre umupeocũ iigucumi muare. ¹⁵ Arĩpehreri yũ Pagu ya sã yaha àhrra. Eropigu “Espiritu Santo yahare weregucumi,” arãbu muare, arĩ weremi Jesu.

Bujawererã arĩquererã ta pũhũ mucubirirãca mua, arĩ wereñumi Jesu

¹⁶ Eropa arĩtuha òpa arĩ werenemomi guare daja:

—Bajamenuri yũre ñasome mua. Eropirã pũhrugã ta daja mua yũre ñarãca, arĩmi Jesu.

¹⁷ Ìgu eroparicũ peerã, guapũ bajamerãgã òpa arĩ wereniguibu gua basi:

—“Bajamenuri yũre ñasome mua. Eropirã pũhrugã ta daja mua yũre ñarãca,” arĩgu ¿dohpa arĩgu eropa arãri marire? Eropigu “Yũ Pagu pohrogue waguca,” ¿dohpa arĩronore eropa arãri ìgu? ¹⁸ “Bajamenuri pũhũ,” arĩgu ¿dohpa arĩgu eropa arãri ìgu? Ìgu wererare òaro pee masibeaa mari, arĩbu gua basi.

¹⁹ Gua eropa arĩ wereniguicũ Jesu ìgure gua serẽpidiarire masigu guare òpa arĩ weremi:

—“Bajamenuri yure ñasome mua. ¿Eropirã puhrugã ta yure ñarãca daja,” yu arĩrare serẽpidiari mua? ¿Irire yu arĩrare masibeari mua? ²⁰ Diaye muare arĩgu iiaa: Yuhu sĩricũ ñarã mua orerãca. Eropirã burigã bujawererãca. Yure umupeobirinirãpu mucubirirãcoma. Muapu bujawerenirã arĩquererã puhru mucubirirãca mua. ²¹ Ōpa ãhraa iri: Nomeo nihi wahgũgo igo ñero tariburisubu ãhraa. Eropigo igo turaro bujaweremo. Eropa bujawerequerego, igo magugã dehyoacũ ñago mucubirimo. Eropigo igore pũrirare guñabeamo igo pare. ²² Eropa ta mua dohpaguere bujawererãca. Puhru mua yure ñarãca daja. Eropirã mua turaro mucubirirãca. Mua eropa mucubiririre gajirã muare bujawerercũ imasisome.

²³ “Irinu yure mua ñarinure yure serẽpisome mua. Yu Pagupu mua serẽrire ogucumi. Diaye ta muare arĩgu iiaa. Yure mua umupeocũ ñagu yu Pagure yu waĩ mera mua serẽrire igu muare ogucumi. ²⁴ Yu ōpa waboro core mua yure waĩpeo Goãmure serẽnibiribu mua. Dohpaguere yure waĩpeo Goãmure serẽque. Mua eropa serercũ muare igu ogucumi mua turaro mucubiriburire, arĩmi Jesu guare.

Ñerãre Jesu igu tarinugarire wereñumi igu buherãre

²⁵ Eropa arĩtuha ōpa arĩnemomi:

—Werenigui queori mera muare weremurabu. Eropa werequeregu ta puhru muare werenigui queori mera weresome pare yuhu. Yu Pagupure mua ōaro peeboro dopa weregura muare. ²⁶ Irinure mua ya arĩburire muare serẽbasasome yuhu. Yure umupeorã yaha waĩ mera mua basi igu sererãca. ²⁷ Mua yure mahirã ãhraa. Eropirã yu Pagu pohrogue yu aridigu arĩcũ “Diaye ta ãhraa,” arãa mua. Eropa arĩrã mua arĩcũ ñagu, yure mahirã mua arĩcũ ñagu yu Pagu sã muare mahimi. Igu eropa mahicũ mua igure sererãca. ²⁸ Yu Pagu pohro arĩdigu arĩgu i yebaguere aribu yuhu. Eropigu dohpaguere i yebague arĩdigu arĩgu yu Pagu pohrogue dujaguca daja, arĩmi Jesu.

²⁹ Igu eroparĩcũ gua igu buherã ōpa arĩbu:

—Dohpague tamerare werenigui queori mariro wereniguigu ōaro diaye wereniguigu iiaa muhu guare. ³⁰ Muhu ōaro masipehogu mu arĩcũ gua dohpague ta ōaro masia. Eropirã gajirã mure buhemasibeama. Eropirã irire gua dohpaguere ōaro masia. Gua irire ōaro masirã arĩrã Goãmu pohrogue mu aridigu arĩcũ “Diaye ta ãhraa,” arãa, arĩbu gua Jesure.

³¹ Gua eroparĩcũ Jesu yuhrimi guare:

—Dohpaguere “Diaye ta ãhraa,” ¿arĩri mua pare? ³² Puhruñari mua ya wirigue wasirirã yure cõarãca mua. Mua eropa cõaquerecũ ta yu Pagupu yu mera ãhrimi. Eropigu yuhu yujugu ta arĩbeaa. ³³ Ire muare wereyubu yure mua guñaturari mera mua ōaro arĩboro dopa. I yeba arĩrisubu Goãmure gamebirã pohrogue mua arĩcũ muare ñero iirãcoma erã. Erã eropa iiquerecũ ta guñaturaque mua. I yeba majarã erã ñero iirare tarinugagu ãhraa yuhu. Eropirã yure guñatura mucubirique mua, arĩmi guare igu buherãre.

17

Jesu igu buherã ya arĩburire igu Pagure Goãmure serẽbasañumi

¹ Eropa arĩ weretuha Jesu ãmarogue ñhamuju ōpa arĩ wereniguimi Goãmure igu Pagure:

—Ahu, dohpaguere mu werediro dopa ta yure erā ñero iiburisubū ejanijaro iiaa. Yure mu magure erā masare umupeocū iique. Mu eropa iicū masare mure umupeocū iigura yu sã. ² Árīpehrerā tauro opu apibu muhu yure. Eropigu mu yure onirāre mu mera eropa árīniguiicū iiguca muhu. ³ Mu dihta Goāmū gohra āhraa. Yuhu Jesucristo mu obeodigu āhraa. Eropirā árīpehrerā mure masirā, yu säre masirā mari mera umaroguere eropa árīniguiicārācoma, arīmi.

⁴ Eropa arīgu ta ōpa arīnemomi Goāmure:

—I yebaguere mu iidorerare iipehoabu yuhu. Eropa iigu masare mu turagu árīrire ihmuabu yuhu. ⁵ I yeba árīboro core mu mera yu árīcū ōaro turari opabu. Eropigu dohpaguere mu árīrogo irire yu ōaro turagu árīrire ihmuque.

⁶ “I yeba árīrāre yure mu onirāre mure masicū iiabū. Mu onirā mu yarā āhrima. Eropigu erāre ohabū muhu yure. Eropirā mu dorerire iiaa erā. ⁷⁻⁸ Yure mu wererare erāre buheabu. Yu buhecū peerā yu buherire gahmeama erā. Eropirā diaye ta mu pohro aridigu yu árīcū masima erā. Eropirā mu obeodigu yu árīcū säre “Diaye ta āhraa,” arī pepima erā.

⁹ “Erā ya árīburi mure serēgu iiaa. Gajirā ya árīburipure serēgu iibea yuhu. Yure mu onirā mu yarā āhrima. Eropigu erā ya árīburire serēgu iiaa mure. ¹⁰ Erā árīpehrerā mu yarā āhrima. Eropirā mu yarāpū yaharā āhrima. Yure umupeorā yu turagu árīrire ihmuma erā masare.

¹¹ “Dohpaguere i yebaguere dujasome yuhu. Mu pohro wabu iiaa. Yu eropa waquerecū ta dohpaguere yure mu onirā i yebaguere dujama. Ahu, muhu ōagu āhraa. Yure mu onirāre mu turari mera ihadibuque. Mu eropa dibucū mari yujugu ta árīdiro dopa ta yuju curu ta árīrācoma erā sã. ¹² Erā mera arīgu mu turari mera erāre ōaro ihadibuabu. Yujugu tamera peamegue wāgucumi mu yare erā gojarapū werediro dopa ta.

¹³ “Dohpaguere mu pohrogo wabu iiaa. Eropigu i yeba i árīpehrerire mu yarāre werea yu mera erā ōaro mucubiriborore. ¹⁴ Mu yare wereabu erāre. Erā yu iro dopa ta i yeba árīwajamorā árībeama. Eropirā i yeba majarāpū erāre ihaturima. ¹⁵ “I yeba árīrāre, yaharāre aīaque,” arībeaa. Eropa arībiriqueregu erāre ōaro ihadibuque watī ñerire iidoreri erāgue arīgu. ¹⁶ I yeba majagu árībeaa. Erā sã yu iro dopa ta i yeba árīwajamorā árībeama. ¹⁷ Yaharāre mu buheri mera ōarā árīcū iique erāre. Mu wereripū diaye ta āhraa. ¹⁸ I yebaguere yure mu obeodiro dopa ta yu yu yaharāre mu yare buhedoregu obeoa. ¹⁹ Mu gamerire iibu arīgu, sīribu arīgu erā ya árīburire sīribu āhraa. Eropa sīribu āhraa yuhu yaharā sã mu gamerire diaye erā ōaro iiburire.

²⁰ “Yaharāre dohpague árīrā dihtare itamuque,” arī serēbeaa yuhu. Yaharā gajirāre erā buhera pūhrū gajirā sã yure umupeorācoma. “Erā säre itamuque,” arāa yuhu. ²¹ Yaharā árīpehrerā erā yuju curu árīboro dopa itamuque. Yuhu mu mera yujugu ta āhraa. Mari yujugu árīdiro dopa ta erā mari mera yuju curu ta árīporo. Yujuro mera ta árīporo mu obeodigu yu árīrire árīpehrerā masa “Diaye ta āhraa,” erā arīburire. ²² Yure mu ora turarire yaharāre ohabū. Iri turarire oparā yujugu ta mari árīdiro dopa ta erā sã yuju curu ta árīrācoma. ²³ Yuhu erā mera āhraa. Eropigu muhu yu mera āhraa. Mari eropa árīrā árīcū mari yarā diaye ta ōaro yuju curu ta árīrācoma. Yuju curu erā árīcū iarā mu obeodigu

yū árĩrĩre i yeba majarã masirãcoma. Eropirã yure mũ mahidiro dopa ta yaharã sãre mũ mahĩrĩre masirãcoma masa.

²⁴ “Ahũ, i yeba árĩboro core yure mahĩbũ mũhũ. Eropa mahĩgũ yũ turagũ árĩrĩre ĩhmubũ mũhũ. Eropĩgũ yure mũ onĩrã yũ mera erã árĩcũ gahmea yũ turagũ árĩrĩre erã masiboro dopa. ²⁵ Ahũ, mũhũ ðagũ áhraa. I yeba majarã ñerã mure masibeamã. Yũpũ mure masia. Eropirã yũhũ mũ obeodĩgũ árĩcũ masima yaharãpũ. ²⁶ Mure erãre masicũ iĩabũ. Pũhrũ sãre mure erãre masicũ iĩgũca yure mũ mahidiro dopa ta gajĩrãre erã mahĩburĩre. Eropĩgũ yaharã mera árĩgũca, arĩmi Jesu mari Pagure.

18

Jesure peresu iĩũma

Mt 26.47-56; Mr 14.43-50; Lc 22.47-53

¹ Īgũ eropa arĩra pũhrũ Jesu gũã sã ĩgũ buherã Cedrón waĩcuriyare tarĩbuja, Olivo waĩcurĩ gorogue ejabũ. ² Bajasuburi iri gorogue Jesu mera gũã gameneremurĩbũ. Eropĩgũ Juda Jesure ĩhaturĩrãre wiabu iri gorore masĩmi. ³ Eropa masĩgũ pe curu surara mera aridĩ arĩmi ĩgũ. Yuju curu surara gohra arĩma. Gajĩ curu surara Goãmũ wĩhire corerã arĩma. Pahia oparã, fariseo masa erã obeonĩrã arĩma surara. Eropa arĩrã sihãri dipurure, eropãrĩcũ yucũ mojócamã erã. ⁴ Iri gorogue gũã pohrogue erã erara pũhrũ Jesu ĩgũ ñero tarĩborore masĩgũ, erãre bocatĩri serẽpĩmi:

—¿Noare amarã iiri mũã? arĩmi Jesu.

⁵ —Jesu Nazare majagure ahmaa, arĩ yũhrĩma erã.

—Īgũ ta áhraa yũhũ, arĩmi Jesu.

Judapũ Jesure ñeadoregũ erã mera arĩmi. ⁶ Eropirã Jesu “Īgũ ta áhraa yũhũ,” ĩgũ arĩcũ erãpũ uca wa yebague dusirĩmaagã mehmereja wama.

⁷ Erã eropa wacũ ĩagũ dipaturi serẽpĩmi Jesu:

—¿Noare amarã iiri mũã? arĩmi.

—Jesu Nazare majagure amarã iĩaa gũã, arĩ yũhrĩma erã daja.

⁸ —Īgũ ta áhraa, arĩrabũgũ yũhũ mũare. Eropirã yure ñearã oãre yũ mera majarãre peresu iĩbirĩcãque, arĩmi Jesu.

⁹ Eropa gũare mahĩgũ ne yũjugure dederecũ iĩbirĩmi. Eropa iĩgũ ero core Goãmũre ĩgũ arĩdiro dopa ta iĩgũ iĩmi ĩgũ. “Yure mũ onĩrãre ne yũjugure dedeobĩrĩbũ,” ĩgũ arĩdiro dopa ta iĩgũ iĩmi Jesu. ¹⁰ Eropi Simo Pedro matamĩjire opagũ irimĩjire tuãwea aĩ, pahia opũ pohro majũre Malco waĩcũgure ĩgũ gamĩrore pacoro medijucãmi. Diayepũ maja gamĩrore pacoro medijucãmi ¹¹ Īgũ eropa pacorocũ ĩagũ Jesu ðpa arĩmi:

—Mũ matamĩjire dibuque. Yũ Pagũ ĩgũ yure ñero tarĩdorero dopa ta ñero tarĩgũra, arĩmi Jesu Pedroro.

Pahia tauro opũ pohrogue Jesure aĩgãũma erã

Mt 26.57-58; Mr 14.53-54; Lc 22.54

¹² Īgũ eropa arĩtuhacũ ta surara, erã opũ mera, Goãmũ wĩhire corerã surara sã Jesure ñeha ĩgure dirĩma. ¹³ Dirĩtuha Ana waĩcũgũ pohrogue aĩgãmũhtama erã. Anapũ Caifa mũñecũ arĩmi. Caifapũ iri bojorire pahia tauro opũ arĩmi. ¹⁴ “Judio masa ya arĩburĩre yũjugũ masũ sĩricũ ðhaa,” arĩdigũ arĩmi ĩgũ Caifapũ.

—*Jesure masibeaã, arĩũmi Pedro*

Mt 26.69-70; Mr 14.66-68; Lc 22.55-57

¹⁵ Eropigu yuhu Simo Pedro mera Jesure yoañarirogue nurusiabu. Yupu pahia opu ĩgu ĩha masigu árĭbu. Eropigu Jesu puhru, opu árĭri wihi árĭri sãriro pohecague ñajaa wabu. ¹⁶ Pedropu disiporo dujanugajami. Eropigu maji wiriri disiporo coregore serēbasabu Pedrore aĭ ñajabu. Yu eropa serēpiñacũ igo Pedrore ñajaridoremo. Igo ñajaridorera puhru yuhu Pedrore aĭ ñajaa wabu. ¹⁷ Yu eropa aĭ ñajacũ ĩago disiporo coregopu Pedrore serēpimo:

—¿Jesu buherã mera majagu árĭbeari muhu? arĭmo igo Pedrore.

—Árĭbeaa yuhu, arĭ yuhrimi Pedropu.

¹⁸ Ero core ero majarã pohro majarã, surara mera erã sōhmaburi peamere dihunirã árĭma. Yusaa árĭbu. Eropirã erã iri peame turo sōhma niguima. Erã sōhmacũ ĩagu Pedro sã sōhmagu wami.

Pahia tauro opu Jesure serēpi ñañumi

Mt 26.59-66; Mr 14.55-64; Lc 22.66-71

¹⁹ Eropi pahia tauro opu árĭgu Jesu ĩgu buherire, gua ĩgu buherã sãre serēpi ĩapu Jesure. ²⁰ ĩgu eropa arĭ serēpicũ Jesupu yuhripu ĩgure:

—Árĭpehrerãre buhegu erã core niguibu. Eropa buhegu mari buheri wiri Goãmu wihi sãre masa gamenererogue eropa buhe niguicãbu. Duhrinijagu ne buhebirabu yuhu. ²¹ ¿Duhpigu yure serēpiri muhu? Serēpidiagu yure peenirãre serēpique. Yu wererare erã masima, arĭ yuhripu Jesu.

²² ĩgu eroparĭcũ surarapu ero niguidigu ĩgu mojoto mera Jesure papu.

—Eropa arĭbiricãque pahia tauro opure, arĭpu surara Jesure.

²³ ĩgu eroparĭcũ Jesu opa arĭpu:

—Ñero arĭ yu wereniguirare wereque yure. ¿Diaye majare yu mware werequerecũ duhpigu pari muhu yure? arĭpu Jesu surarare.

²⁴ Puhru Ana Jesure erã diridigure Caifa pahia tauro opu pohrogu obeopu.

—Jesure masibea, dipaturi arĭñumi Pedro

Mt 26.71-75; Mr 14.69-72; Lc 22.58-62

²⁵ Eropi Simo Pedro peame turo sōhma niguigu iimi. Eropa ĩgu sōhma niguicũ ĩarã ero majarã ĩgure serēpima.

—¿Mu sã Jesu buherã mera majagu árĭbeari? arĭ serēpima erã Pedrore.

—Árĭbeaa yuhu, arĭ yuhrimi Pedro.

²⁶ Eropigu pahia tauro opu pohro majagupu Pedro ĩgu gamiro pa-corodigu acaweregupu Pedrore serēpimi:

—¿Jesure erã ñearasubu yu árĭcũ mu sã erã mera árĭsabu? arĭ serēpimi ĩgu Pedrore.

²⁷ —Yuhu ĩgu mera árĭbirabu, arĭ yuhrimi Pedro. ĩgu eroparĭcũ ta cãreña weregu carimi.

Jesure Pilato serēpiñumi

Mt 27.1-2, 11-14; Mr 15.1-5; Lc 23.1-5

²⁸ Ñamiñarigã árĭcũ Caifa ya wihigue árĭnirã Jesure aĭ wiria, iri maca majarã opu Pilato ya wihigue aĭgã wama erã. Eropa waquererã ĩgu ya wihigure ñajabirima. Pascua árĭcũ erã bamorã árĭrã opa arĭma: “Judio masu árĭbeamu Pilato. Eropirã mari i wihigue judio masu árĭbigu árĭri wihire ñajarã, mari dorerire tarinugarãca. Eropirã mari ñajacũ ĩarã ñerã dopa ĩabocoma marire. Eropirã marire bosenu barire marire

badorebiribocoma," arĩma. Eropa arĩrã opu ya wihire ñajabirima Jesure aĩgãnrãpu. ²⁹ Erã ñajabiricũ ïagu Pilato erã pohrogue wihi disiporogue wiriranugaja, erãre serẽpimi:

—¿Ñehenore ïre weresãdiari mua? arĩ serẽpimi Pilato erãre.

³⁰ —Ihĩ òagu ïgu arĩcũ mure ïgure obiriboaya. Ñegu ãhrimi ïgu, arĩ yuhrima erã.

³¹ Erã eroparĩcũ Pilato òpa arĩmi:

—Mua basi ïgure aĩaque. Eropirã mua ya doreri arĩro dopa ta ïgure dipuwaja moaque, arĩmi Pilato erãre.

—Gua judio masapu masure wejẽdoremasibea, arĩma erã Pilatore. Eropa arĩrã Jesure wejẽdoremorã iima.

³² Erã eropa wejẽdorecũ Jesupu crusague ïgu sĩriborore ero core ïgu werediro dopa ta eropa wabu. ³³ Erã eropa arĩra puhru Pilatopu wihigue maji ñaja, Jesure sihubeo ïgure serẽpipu:

—¿Judio masa erã opu ta ãhriri muhu? arĩ serẽpipu.

³⁴ Jesu yahrĩpu ïgure.

—¿Mũ guñaro yure eropa arĩ serẽpiri muhu? ¿O gajirã mure erã wererare peenijagu yure serẽpigu iiri muhu? arĩpu Jesu Pilatore.

³⁵ —Judio masu arĩbeaa yuhu. Mũ ya yeba majarã, pahia oparã sã, mure wiama yure. ¿Ñehenore ñero iiri muhu erã eropa mure dipuwaja moadiacũ? arĩpu Pilato.

³⁶ —Yu opu arĩri i yeba maja arĩbeaa. Yuhu i yeba majarã opu arĩcũ, yaharã yure itamuboñuma judio masare ñeadorebirã. Yu opu arĩri i yeba maja arĩbeaa, arĩpu Jesu Pilatore.

³⁷ —¿Eropigu opu ãhraa arĩri muhu eropa arĩgu? arĩpu Pilato.

—Mũ arĩro dopa ta opu ta ãhraa. Masa opu arĩbu masa dehyoabu yuhu. Eropigu i yebague arigu erã opu arĩbu aribu. Diaye majare weregu aribu. Arĩpehrerã diaye arĩrire peediarã yu wererire peema, arĩpu Jesu.

³⁸ —¿Ñeheno ãhriri diaye arĩri? arĩpu Pilato.

Judio masa Jesure wejẽdoreñuma

Mt 27.15-31; Mr 15.6-20; Lc 23.13-25

Eropa arĩtuha Pilato judio masa pohro maji dujaa wa erãre weremi:

—Ïre ne gajino dipuwaja mara. ³⁹ Bojori nucũ Pascuanũ arĩcũ yujugu peresu arĩgure mua wiudorea. ¿Eropigu ïre Jesure ta mua opu arĩbupure mure wiubasacuri yuhu? arĩmi Pilato judio masare.

⁴⁰ ïgu eroparĩcũ peerã erã judio masa òpa arĩ gaguiniguima:

—Ïgure wiubiricãque. Barrabãpũre guare wiubasaque, arĩ gaguiniguima judio masa Pilatore. Barrabãpu yajaricugu arĩdigu arĩpu.

19

¹ Erã eropa arĩ gaguiniguira puhru Pilato Jesure tãradorepu. Eropirã ïgu yarã surarapu ïgure tãrañorã. ² Tãratuha pora bero iituha, Jesure ïgu dipuru weca duhpeoñorã. Duhpeotuha, oparã ya suhrirore ïgure sãñorã.

³ Eropirã ïgu pohro nugaja òpa arĩñorã erã òpa arĩ weweyarã:

—Òaro arĩporo. Judio masa opu òaro arĩporo, arĩ werya erã mojotori mera ïgure pañorã.

⁴ Eropigu Pilato dipaturi waha, judio masare weremi:

—Peeque mua. Ïre ñeri dipuwaja mara. Eropigu irire mua masiburire ïgure mua pohro aĩgãribu iia, arĩmi Pilato.

⁵ Īgu eropa arīra pūhrū Jesu pora berore peyadigu, oparā ya suhrironore sañadigu wihigue árīdigu wiririmi. Īgu wiriricū Pilato ōpa arīmi:

—Īaque. Ihī ta āhrimi ĩgu, arīmi Pilato.

⁶ Īgu eropa arītuhacū peerā pahia oparā, surara Goāmū wihi ĩhadibu corerā sā Jesure ĩarā gaguĩnguima:

—Crusague pabia wejēque ĩgure. Crusague pabia wejēque ĩgure, arī gaguĩnguima erā.

—Īgure ne ñeri dipuwaja mara. Eropirā mūa basi ta ĩgure aĩgāque. Eropirā mūa basi ta ĩgure crusague pabia wejēque, arīmi Pilato erāre.

⁷ —Īgu, ĩgu basi “Goāmū magū āhraa,” arīmūrami. Īgu eropa arīra waja gua doreripu ĩgure wejēdorea, arīma erā Pilatore.

⁸ Erā eroparīcū peegu ucataria Pilatorū. ⁹ Eropigu dipaturi ĩgu wihigue Jesure aĩ majiñajagu Jesure serēpipu daja:

—¿Nohogue majagu āhriri mūhū? arīpu Pilato Jesure.

Īgu eropa arī serēpīquerecū ta Jesu ĩgure ne yūhribirīpu:

¹⁰ Īgu yūhribiricū ĩagu Pilato ĩgure serēpinemopū:

—¿Yūre yūhribeari mūhū? Yūhū mūre peresu árīgure wiumasia. Eropigu mūre crusague pabia wejēdoremasia yūhū. ¿Īrire masibeari mūhū? arīpu Pilato Jesure.

¹¹ Īgu eroparīcū Jesu yūhripū daja:

—Goāmū mūre dorebiricū ne iimasibiriboaya mūhū. Eropigu yūre ĩhaturirāre wiadigupu mū tauro ñero dipuwajacagucumi, arīpu Jesu Pilatore.

¹² Īgu eroparīcū peegu Pilatorū ĩgure wiudiarīpu. Īgu eropa wiudiarerecū ta dipaturi judio masapu gaguĩnguima:

—Jesu “Opū āhraa,” arīgu mari tauro opū árīgure Roma majagure ĩhaturīgu iimi ĩgu. Eropigu ĩgure wiugu mū sā mari tauro opū árīgure ĩhaturīgu āhraa, arī gaguĩnguima judio masa Pilatore.

¹³ Erā eroparīcū peegu Jesure wihigue árīgure aĩ wiriri, ĩgu dipuwaja moadoregu ĩgu doari pēro doajami Pilatorū. Īgu dipuwaja moadorero judio masa ya mera gabata waĩcuro empedrado waĩcūbu. ¹⁴ Irinū Pascuanū bosenu árīcū gua baburi gua amurinū árībū. Irisubu goeri boje core árībū. Doajatuha Pilato masare ōpa arī weremi:

—Ihī ta āhrimi mūa opū, arīmi ĩgu.

¹⁵ Īgu eroparīcū peerā judio masa gaguĩnguima daja:

—Sīriporo ĩgu. Sīriporo ĩgu. Crusague pabia wejēque ĩgure, arī gaguĩnguima erā.

—¿Mūa opū árīquerecū ta ĩgure crusague pabia wejēdiari mūa? arīmi Pilato erāre.

Īgu eroparīcū ōpa arī yūhrima pahia oparā:

—Mari árīpehrerā tauro opū Roma majagu āhrimi. Gajīgu opū marimi marire, arī yūhrima pahia oparā.

¹⁶ Erā eropa arī werenīguira pūhrū Pilato Jesure crusague pabia wejēdoregu wiame erāre pare.

Jesure pabia wejēñuma erā

Mt 27.32-44; Mr 15.21-32; Lc 23.26-43

Eropirā surara Jesure aĩ wiriama. ¹⁷ Erā aĩ wiriacū Jesupu crusare ĩgu basi aĩ coā, dipu pero waĩcurogue ejami. Gua judio masa ya mera Gólgota waĩcūbu. ¹⁸ Erogue eja erā Jesure crusague pabiama. Eropirā gajirā perā säre yujugu ĩgu diayerū, gajīgure ĩgu copū pabiama erā. Eropigu Jesu erā

deco árĭmi. ¹⁹ Pilato taboamijire goja, crusague Jesu weca pabia tuodorepũ ĩġu gojaramijire. Őpa arĭ gojara árĭbu: "Ihĭ Jesu Nazare majagu, judio masa tauro opu aħrimi," arĭ gojara árĭbu irimijire. ²⁰ Irimijire gojagu judio masa ya mera, Roma majarã ya mera, Griego ya mera gojara árĭbu. Eropiro Jesure crusague erã pabianugudiro maca pohrogã árĭbu. Eropirã bajarã judio masa Pilato ĩġu gojarare ĩha buhema. ²¹ Eropirã pahia oparã iri buhetuhaja ōpa arĭrã wañorã Pilatore:

— "Ihĭ judio masa opu aħrimi," arĭ gojabita. Gua opu árĭbeami ĩġu. Eropigũ ōpa arĭ goja amuque muħu. Ihĭ "Judio masa opu aħraa," arĭ yujugũ ta ĩġu basi ta eropa arĭ pepigũ aħrimi, arĭ goja amuque, arĭñorã pahia oparã.

²² Pilatopũ yuhripũ erãre:

— Yũ gojarare ne yũ goja amusome, arĭpũ Pilato erãre.

²³ Jesure erã pabiara pũhrũ wapicurã surarapũ Jesu suhri murare erã basi game gueremorã iima. Erã eropa guerediaquerecũ ta ĩġu suhriro yoari suhriro dohori mariri suhriro árĭbu. Iri suhriro suara suhriro árĭbu.

²⁴ Iri suhriro eropa árĭcũ ĩarã ōpa arĭma erã basi:

— Iñe suhrirore yeguesiribircãrã. Yujugũ dihta aĭporo. Eropirã iñe suhriro aĭbure masimorã deabirarã mari, arĭma erã basi.

Eropa deabirarã Goãmu yare erã gojarapũ erã gojadiro dopa ta eropa iirã iima erã. "Yũ suhrirore erã basi guerema. Eropirã yaha suhrirore aĭbure masidiarã deabirama erã," arĭ gojañuma Goãmu yare erã gojarapũgue. Erã gojadiro dopa ta eropa iima erã.

²⁵ Jesu pago, Jesu buamo María Cleofa marapo, María Magdalena mera Jesu crusa pohrogã ĩha niguima. ²⁶ Eropigũ ĩġu pago, yũhu ĩġu mahigũ sã ĩġu pohrogã gua niguicũ ĩagu ĩġu pagore yure weremi:

— Dohpaguere ihĭ mu magũ árĭbu aħrimi, arĭmi Jesu ĩġu pagore.

²⁷ Eropa arĭtuha yure ōpa arĭ weremi ĩġu:

— Dohpaguere ĩgo mu pago árĭbo aħrimo, arĭmi Jesu yure.

ĩġu eropa arĭra pũhrũ Jesu pagore yaha wihigue aĭ opamuribũ.

Jesu sĭria wañumi

Mt 27.45-56; Mr 15.33-41; Lc 23.44-49

²⁸ ĩġu eropa arĭ werera pũhrũ árĭpehreri Goãmu ĩġure mohmedoregu ĩġu apirare ĩpehogu árĭġu masipũ Jesu. Eropa masigũ Goãmu yare erã gojarapũ iribojegue erã arĭ wereyudiro dopa ta ōpa arĭmi Jesu:

— Ñemesibuca yare, arĭmi Jesu.

²⁹ Ero vino sãiri deco dicuri sorobu ero doabu. Eropirã ero árĭrã Jesu eroparĭcũ pee mimi arĭi yusure deco mera erã yosora yusure yucũgu hisopo waicũdigũ ojogoro dirituma. Eropirã aĭ muju Jesu disiro sĭtuma.

³⁰ Iri decore Jesu mimituha ōpa arĭmi:

— Iripẽta árĭca, arĭġu ta ĩġu dipurure muhmusiudija sĭria wami.

Yujugũ surara Jesu patore gubuye gohra ñoseñumi ñoserimiji mera

³¹ Irinũ Pascua bosenu core árĭbu. Iri bosenu gua baburire gua amurinũ árĭbu. Eropirã gajinu Sabado árĭcũ iri ōari bosenu árĭcũ crusarigue sĭrinirãre judio masa apidiabirima. Irinũ ta bosenu gua judio masa bosenu wuari bosenu árĭro ĩbu. Eropirã erã sĭrinirã mura irinũ crusarigue árĭcũ gamebirima. Eropirã pabianirã murare erã ñigagu gõarire panuadorerã judio masa serẽñorã Pilatore erãre sĭri purumujoderã. Erã eropa iira pũhrũ erã dupũ murare aĭdijumorã iima. ³² Erã eropa dorecũ surarapũ

crusari pohrogue eja, yajaricugure copu árġu ñigagure panuama: Gajipu árġu sãre eropa ta iima erã. ³³ Eropa liquererã Jesu ñigagure panu-
 abonirã ġu pohro eja ġu siridigü árġü ĩha panuabirima.

³⁴ Eropa panuabirã yujugü surara ġu patore gohra gubuye ġure ñosemi. ġu eropa ñosecũ mata ġu di, deco mera wiribu. ³⁵ ġu eropa wacũ ĩabu yuħu. Yuħu ipũre gojagu diaye muare werea. Diaye yu wereri árġü masia yuħu. Muare irire werea mua sã Jesure mua umupeburire. ³⁶ Goãmu yare erã gojarapũ werediro dopa ta eropa wabu. "ġu gõare ne yuju gõare panuabirima," erã arĩ gojadiro dopa ta Jesu ñigagu gõare ne yuju gõa panuabirima. ³⁷ Eropiro gajipũ sã Goãmu yare erã õpa arĩ gojayudiro dopa ta wabu: "ġure erã ñosedigü murure ĩarãcoma erã," erã arĩ gojadiro dopa ta gua Jesure erã ñosedigü murure ĩabu.

Jesu dupure masa gobegue yaañuma

Mt 27.57-61; Mr 15.42-47; Lc 23.50-56

³⁸ ġu sirira puhru José Arimatea majagu Jesu dupu murarore aĩ dijubu Pilatore serẽgu ejapu. Josẽpu gajirã judio masare güġu, Jesure umupeogu ġu árĩrire werebiridigü árĩmi. Eropigu ġu dupu murarore ġu serẽra puhru Pilatopu ġu dupure aĩdorepu. ġu aĩdorecũ José crusa pohro eraa Jesu dupu murarore aĩgã wami. ³⁹ Nicodemo sã ġu poresurire mohmorerare treinta kilo ñucurire aĩgãrimi Jesu dupu ġu amuburire. Yucugü di pohga, mirra waĩcũri poresuri, yucugü pohga mera árĩyoro ġu mohmorera. ġu Jesu mera ñami weretamudigü árĩmi. ⁴⁰ Eropirã erã perã Jesu dupu murarore aĩma. Judio masa sirinirãre yaaro dopa ta ġu dupu murarore poresuri sũra puhru suhri gasiri mera omama. ⁴¹ Crusague Jesure erã pabia wejẽdiro pohro pohe árĩbu. Iri pohegue masa gobe utãyegue erã seara gobe árĩbu. Iri gobere ne yujugü siridigure cõañibirima dohpa. ⁴² Pascuanu bosenu maja gua judio masa baburire amurinũ árĩbu. Eropirã iri gobe pohrogã crusa árġü ero apima erã Jesu dupu murarore.

20

Jesu masa muriañumi

Mt 28.1-10; Mr 16.1-8; Lc 24.1-12

¹ Domingo ñamiñarigã árġü, boyoboro coregã María Magdalena Jesu masa gobegue ejapo. Eroge ejago iri gobere erã biharayerere gajipu tunuguraye árġü ĩapo igo. ² Eropa ĩadigo árġo gua pohrogue omagãrimo igo. Simo Pedro mera perã árĩbu gua. Eraa õpa arĩ weremo guare igo.

—Mari Opu dupu murarore aĩcãnrã áhrama. Eropirã ġure erã apidirore mari masibea, arĩmo igo guare.

³ ġo eroparġü peerã, yuħu Pedro mera gua perã masa gobegue ĩarã wabu gua. ⁴ Eropa ĩarã warã gua perã omagãabu. Eropa omarã, yuħu Pedore omatarigãgu masa gobegue ejamuhtabu. ⁵ Eroge ejagu muhmumereja ĩha acubũ iri gobere. Eropa ĩha acugü ġure erã omara gasiro seyarore ĩabu. Eropigu iri gobere ñajabiribu. ⁶ Yu eropa ĩara puhrugue Simo Pedro sã erami. Eraa masa gobegue ñajaa, ġu dupu murarore erã omara suhri gasirire ĩami ġu. ⁷ Eropigü Jesu dipurure erã omara gasiro sãre ĩami daja. Iri gasiro boje oyaro, yeguera gasiro árĩbu. ⁸ Eropigu yu sã masa gobegue ñajabu. Jesu ġu maricũ ĩagu "Diaye ta Jesu masa muriañumi," arĩ pepibu yuħu. ⁹ Iri gobegue gua waboro core Goãmu

yare erã gojarapũ Cristo sĩriburire erã wererare ðaro gua masinibiribũ. Dohpaguepure iri gobere yu ĩara puhũ, “Diaye ta Jesu masa muriañumi,” arĩ pepibũ yuhũ. ¹⁰ Eropa ĩatuhajarã gua whigüe dujaa wabũ.

Jesu María Magdalenare dehyoañumi

Mr 16.9-11

¹¹ Eropi masa gobe disiporo María niguigo ore niguipo. Eropa orequerego ta muhmumereja igo ĩhame acupo masa gobere. ¹² Eropa ĩhame acugo perã anyuare boreri suhricurãre Jesu ĩgu oyadiro murarogue erã doacũ ĩapo igo. Yujugu ĩgu dipuru oyadiro doapũ. Gajigu ĩgu guburi oyadiro doapũ. ¹³ Erãre igo ĩacũ erãpũ igore serẽpiñorã:

—Nomeo, ¿dohpa árironore orego iiri muhũ? arĩñorã erã.

—Yu Opũ dupũ murarore aĩcãñirã ãhrama. Eropigo erã apidirore masibeaa yuhũ, arĩpo igo.

¹⁴ Eropa arĩtuha, majinũgaja nijago Jesure ero niguigure ĩapo igo. Eropa ĩaquerego ta Jesure ĩha masibiripo igo.

¹⁵ —Nomeo, ¿dohpa árirono orego iiri muhũ? ¿Noare amago iiri muhũ? arĩpũ Jesu igore.

“Ĩhĩ i pohere ĩhadibugũ ãhrimi,” arĩ pepiripo igo Jesure. Eropa arĩ pepigo ðpa arĩpo igo:

—Muhũ ĩgu dupũ murarore aĩdigũ árĩgu wereque mu apidirore yure. Mu werera puhũ aĩgora ĩgu dupũ murarore, arĩpo igo ĩgure.

¹⁶ Igo eropa arĩra puhũ Jesu ðpa arĩpũ:

—María, arĩpũ.

ĩgu eropa piyucũ peego, majiñabeo igo Hebreo ya mera ðpa arĩpo:

—Rabuni, arĩpo igo Jesure. Rabuni, erã ya mera arĩrã “Buhegu,” arĩma.

¹⁷ Jesu arĩpũ:

—Yu Pagũ pohrogue murianibeeaa dohpa yuhũ. Yu eropa murianibiricũ yure mohpiñabiricãque. Eropigo gajirã yaharã pohrogue waque. Erã pohrogue ejago ðpa arĩ wereque: “Jesu ðpa arĩdoremi muare: ‘Yu Pagũ pohrogue wabu ĩaa. Mũa Pagũ sã ãhrimi ĩgu. Goãmu pohrogue wabu ĩaa. Mũa yagu Goãmu sã ãhrimi ĩgu,’ arãmi Jesu,” arĩ wereque erãre, arĩpũ Jesu Mariare.

¹⁸ ĩgu eropa arĩra puhũ María Magdalena guare Jesu buherã pohrogue eraa weremo guare:

—Mari Opure ĩabu yuhũ, arĩ Jesu igore guare weredorerare weremo igo.

Jesu ĩgu buherãre dehyoañumi

Mt 28.16-20; Mr 16.14-18; Lc 24.36-49

¹⁹ Irĩnũ soorĩnũ ñamicague gua Jesu buherã gua acawererãre judio masare güirã, gua ya whigüe biha ñaja doabu gua. Gua eropa doacũ Jesu gua watope dehyoanũgaja ðpa arĩmi:

—¿Ãhriri mua? arĩmi.

²⁰ Eropa arĩtuha ĩgu mojotorire, ĩgu patore sãre guare ĩhmũmi. Eropirã gua ĩgure gua opure masa muriadigure ĩarã mucubiribũ. ²¹ Dipaturi Jesu guare ðpa arĩmi daja:

—Õaro árĩque mua. Yu Pagũ ĩgu yure obeodiro dopa ta yu sã muare obeoa, arĩmi guare.

²² Eropa arĩtuhaja guare ĩgu purisãmi. Eropa purisãgu Espĩritu Santore gua ñeaburire ĩhmugũ iimi. ĩhmutuhaja ðpa arĩmi:

—Dohpaguere Espĩritu Santore ñeaque mua mua mera árĩbure. ²³ Masa erã ñeri dipuwajare bujawerecũ ĩarã, “Mũa ñero iirare cohãa,” arĩmasia

mua erāre. Erā bujawerebircū ĩarā, “Mua ĩeri iirare cóābiribu,” arĩmasia mua, arĩmi Jesu guare ĩgu buherāre.

Jesure masa muriadigure Toma ĩañumi

²⁴ Jesu gua watope ĩgu dehyoacū Toma suhruadigu erā arĩgu gua mera marimi irisubure. ²⁵ ĩgu eropa maricū gua ĩgu mera majarā ĩgure werebū.

—Mari Opure gua ĩabu, arĩ wereribu gua ĩgure.

Gua eropa arĩ werequerecū ta ōpa arĩmi Toma:

—ĩgu mojotorire erā pabiara goberire ĩabigu iri goberire yū mujusĩru mera puñabigu “Diaye ta masa muriañumi,” ne arĩsome. Eropigu ĩgu patore gubuye árĩri gobere yū mojoto mera sĩ acubigu, “Diaye ta masa muriañumi,” ne arĩsome yuhū ĩgure, arĩmi Toma.

²⁶ Yuju semana puhru gua ĩgu buherā gua ya wihigue árĩbu. Irisubure Toma gua mera arĩmi. Iri wihi bihara wihi árĩbu. Bihara wihi árĩquerecū ta Jesu ĩaja, gua watope dehyoanugaja ōpa arĩmi:

—¿Āhriri mua? arĩmi.

²⁷ Eropa arĩtuha ĩgu Tomare weremi:

—ĩaque yū mojotorire. Eropi mū mujusĩru mera yū mojotorire erā pabiara goberire puñaque. Eropigu mū mojoto mera yū patore gubuye árĩri gobere sĩ acuñaque. “Diaye árĩbeaa,” arĩbircāque. “Diaye ta āhrraa,” arĩque mūhū, arĩmi Jesu Tomare.

²⁸ ĩgu eropa arĩra puhru Toma yuhrimi:

—Mūhū yū Opū āhrraa. Mūhū yahagu Goāmū āhrraa, arĩmi Toma Jesure pare.

²⁹ —Yure mū ĩara puhru yure “Diaye ta āhrraa,” arāa. Gajirāpu yure ĩabiriquererā ta “Diaye ta āhrraa,” arĩ umupeorācoma. Eropirā erā turaro mucubirirā árĩrācoma, arĩmi Jesu Tomare.

Jesure masa erā masiburire ipure gojañumi Nũ

³⁰ Eropigu baja gaji sāre Goāmū ĩgu turari mera ii ĩhmūmi Jesu gua mera árĩgu. Irire ĩgu iirare ipure gojapehobirabu yuhū. ³¹ Eropa gojapehobiriqueregu ta ipū yū wererare gojagu, “Jesu ta Cristo Goāmū ĩgu obeodigu āhrimi. ĩgu diaye ta Goāmū magu āhrimi,” mua arĩ masiburire gojabū. Eropirā mua ĩgure umupeorā Goāmū mera mua eropa árĩniguiburire gojabū ipure.

21

Jesu siete ĩgu buherāre dehyoañumi

¹ Puhru Tiberia waĩcari ditaru turo dipaturi guare ĩgu buherāre dehyoami daja. Guare dehyoagu ōpa iimi ĩgu daja. ² Simo Pedro, Toma suhruadigu erā arĩgu, Natanae Galilea yeba árĩri maca Caná waĩcari maca majagu, gua perā Zebedeo porā, gajirā sā perā gua oā nucū gamenere árĩbu.

³ Gua eropa gamenerera puhru Simo Pedro ōpa arĩmi:

—Wai wejėgu wagu iiaa, arĩmi ĩgu.

—Gua sā mū mera warāra, arĩbu gua ĩgure.

Eropa arĩtuha buha wabū. Eropirā dohodiru mera wabū. Iri ĩamire gua ōaro boyotahmuquerā ne yujugu waimure wejėbircarabū. ⁴ Boyodiji merejacū Jesu imiporo ĩgu niguicū ĩaribu gua. Eropa ĩaquererā ĩgure ĩha masibircarabu gua. ⁵ Eropigu guare ōpa arĩ serėpimi:

—Ne, ¿wai wejėari mua? arĩmi Jesu.

—Ne wejēbirabu, arī yuhribu gua.

⁶ —Dohodiru diayepu wejēdire mehyuque. Iripu mehyurā wai wejērāca, arībeo niguimi guare. Īgu eroparicū peerā Īgu arīdiro dopa ta mehyubu. Gua mehyura puhru bajarā wai űajama. Bajarā wai űajacū ĩarā wejēdigure dohodirugue aīsā turabiricarabu gua. ⁷ Eropigu yuhū Jesu Īgu mahigū Pedrore werebū:

—Mari Opū āhrimi sihī imiporo niguigu, arību Pedrore.

Yū eroparicū Jesu Īgu árīcū masigu, Simo Pedro Īgu suhrirore sañami. Wai wejēbu Īgu suhrirore tuweadigu árīmi. Īgu suhrirore sañatuha diague yuriñajami. ⁸ Eropirā gajirā gua buherā dohodirugue árību. Cien metro yoaro diaguere payabu gua. Eropirā wejēdigure wai bajarā űajadigure dohodiru mera taramajaabu gua. ⁹ Turogue tuhajarā pea niti dihta gose oyari peame weca waire Īgu mupunugupidigure ĩabu gua. Panru sāre ĩabu gua.

¹⁰ Gua eropa ĩacū Jesu guare ōpa arīmi:

—Dohparagā mūa wejēnirāre bajamerāgā aīgārique, arīmi guare.

¹¹ Īgu eroparicū Simo Pedro Jesu mera árīgu Īgu sā dohodirugue űaja, wejēdire tara majaami imiporogue. Pagarā wai űajanirā ciento cincuenta y tres wai árīma. Bajarā wai űajaquererā wejēdire ne yehguebirima.

¹² —Banirā arique, arīmi Jesu guare.

—¿Noano āhriri muhū? arī serēpiñabiribu gua ĩgure. Gua Opū ĩgu árīcū masibu gua. ¹³ Eropigu Jesu peame pohrogue eja, panre aī guare gueremi. Wai sāre gueremi.

¹⁴ Eropigu Jesu Īgu masa muriaara puhru imiporo dehyoagu ũhresubu guare ĩgu buherāre dehyoagu iimi.

Jesu Simo Pedro mera weretamuñumi

¹⁵ Gua bara puhru Jesu Simo Pedrore serēpimi:

—Simo, Jona magu, ¿ōare mū mahiro tauro yāre mahiri muhū? arīmi Simo Pedrore.

—Opū, mure mahia yuhū. Mure yū mahirire masia muhū, arī yuhrimi Simo Pedro.

Jesu arīmi:

—Eropigu ovejagāre mari ejodiro dopa ta yaharāre buheque muhū, arīmi Jesu.

¹⁶ Eropa arītuha dipaturi ĩgu Simo Pedrore serēpimi daja:

—Simo, Jona magu, ¿yāre mahiri muhū? arīmi Jesu.

—Opū, mure mahia yuhū. Mure yū mahicū masia muhū, arī yuhrimi Simo Pedro.

Jesu arīmi daja:

—Ovejare ĩhadibugu ovejare ĩgu ōaro ĩhadiburo dopa ta yaharāre ōaro ĩhadibuque, arīmi Jesu Pedrore.

¹⁷ Eropa arītuha dipaturi Simo Pedrore serēpimi:

—Simo, Jona magu, ¿diaye ta yāre mahiri muhū? arīmi Jesu daja.

ũhresubu ĩgu eropa serēpicū peegu Simo Pedro turaro bujaweremi.

—Opū, muhū masipehoa. Mure yū mahicū masia muhū, arīmi Simo Pedro.

—Ovejare mari ejodiro dopa ta yaharāre buheque muhū. ¹⁸ Diaye mure arīgu iiaa. Muhū mamū árīgu mū suhrire saña, mū gamerogue curimuribu muhū. Eropa árīdi árīqueregu ta puhru muhū bugu árīcū, mū mojotorire sībeocū gajigu mure mū suhrire sāgucumi. Eropigu mū wadiabirugue mure aīgāgucumi, arīmi Jesu Simo Pedrore.

19 Eropa arĩḡu Simo Pedro dohpa wa ĩḡu sīriborore wereyugū iimi. Eropigū Simo Pedro sīrigū Goāmure, “Ōagu, turagu āhraa,” masa erā arīcū ĩḡu iiborore wereyugū iimi. Eropigū Pedro mera weretamutuhagu ōpa arīmi Jesu ĩḡure:

—Diaye ta yu buhediro dopa iique muḡu, arīmi Jesu Pedrose.

Jesu ĩḡu mahigū ipūre gojadigū arīmi

20 ĩḡu eroparīcū Pedropu yure Jesu ĩḡu mahigure erāre yu nūrusiacū ĩami ĩḡu. Yūpu ĩḡu ĩagupu ero core Jesu pohrogā badoagu ĩḡure ōpa arīdigū arību. “Ōpu, ĩmure ĩhaturirāre wiabupu nihino arīcuri ĩḡu?” arī Jesure serēpidi arību yūpu. Eropa yure ĩagu Pedro serēpimi Jesure:

21 —Ōpu, ĩhī Nupu dohpa wagucuri? arī serēpimi:

22 —Ire mure werebeaa. I yebaguere yu dujariboro core ĩḡure arīnigūicū yu iicū irire masibea muḡu. Eropigū ĩḡu waborore guḡabita muḡu. Diaye ta yu buhediro dopa iique muḡu, arīmi Jesu Pedrose.

23 Irire ĩḡu yure Nure wererare peerā arīpeherā Jesu yarā weresiririma. Irire weresirirā ōpa arīrima erā: “Jesu ĩḡu mahigū buhegu sīrisome,” arī weresiririma yure Jesu yarā erā basi. Erā eropa arīquerecū ta “ĩḡu sīrisome,” arĩḡu iibirimi Jesu. “I yebaguere yu dujaricū ĩḡure arīnigūicū yu iicū irire masibea muḡu,” arīmi Jesu Pedrose.

24 Jesu buhegu ire weregu, ipūre gojagu āhraa yuḡu. Eropirā i wereri diaye ta arīcū masia mari.

25 Baja gaji sāre Jesu iimi. ĩḡu iirare mari gojapehocū iripūri gojarapūri baja tariari pūri waboya. Eropiro iripūrire mari dibucū sihabiriboya i yeba. Ujuturia waboya yu pepicū. Iripēta āhraa.

Jesu buhedore ĩgu apinirã erã iirare wereripũ ãhraa

—*Espíritu Santo arigucumi, arĩnumi Jesucristo ĩgu buherãre*

¹⁻² Teófilo, ero core yu gojamũhtarapũ mera Jesu ĩgu iirare, ĩgu buherare mure weretuhabu. Te umarogue ĩgu mariarare weretubu. Jesu ĩgu mariaboro core ĩgu Espiritu Santo turari mera dorepu ĩgu apinirãre. Erã ĩgu beyenirã arĩñorã. ³ Eropi Jesu ĩgu crusague ĩgu sirira puhru yujuyerisuburi dupucugu dehyoapu ĩgu apinirãre. Cuarenta nuri puhru dehyoatupu. Eropigu ĩgu ĩgu basi ojocarigu arĩrire ihmupu erãre. Eropa dehyoagu Goãmu mari Pagu ĩgu opu arĩrire ðari buherire werepu erãre.

⁴ Gajisubu Jesu ĩgu apinirã mera arĩgu ðpa arĩ erãre werepu:

—Jerusalén ta arinique dohpa. “Espiritu Santore muare obeogura,” yu Pagu ĩgu arĩdigure corenique. Irire ĩgu eropa arĩrare muare wereabu yuhu. ⁵ Ñu muare waiyegu deco mera muare waiyemi. Yupu ĩgu iira tauro iigura muare. Espiritu Santo mua mera ĩgu arĩnigucacũ iigura muare, arĩpu Jesu.

Jesu umarogue mariara

⁶ Eropi gajisubu utãgugue Olivo waĩcudigugue Jesu erãre dehyoacũ erã serẽpiñorã ĩgure:

—Opu, ¿i Israe yebare mari ya yebare dohpãricũ guare dipaturi doreburire apibocuri muhu guare? ¿Dohpãricũ mari acawerã gohrare opu acugucuri muhu? arĩñorã ĩgure. ⁷ Erã eropãricũ peegu Jesu ðpa arĩpu:

—Mari Pagu dihta irinũrire mua ya yebare mua ðaro arĩborore apimasimi. Irinũrire muare masiya mara. ⁸ Eropirã muare Espiritu Santo ĩgu eracũ Goãmu ya turarire oparãca mua. Iri turarire mua oparã Jerusalén majarãre, arĩpehrerã Judea majarãre, Samaria majarãre, arĩpehreri yeba majarãre ðari buherire buherãca mua yaha arĩburire. Yu sirirare, yu masa mariarare erãre buherãca mua, arĩ werepu Jesu erãre.

⁹ Eropa arĩ weretuhaja, Jesu umarogue maria wapu. Erã ĩgure erã ãhanũrusia mujucũ imica cururi pohecague ñaja dedere maria wapu.

¹⁰ Eropirã erã Jesu ĩgu mariagure erã ãhanũrusia mujurisubu perã anyua boreri suhricurã Jesu ĩgu apinirã pohro dehyoanũgajañorã. ¹¹ Eropirã erãre ðpa arĩñorã:

—Mua Galilea majarã, ¿duhpirã ãhamuju niguirã iiri mua? Ihĩ Jesu umarogue mariagu, ĩgu mariadiro dopa ta dipaturi arigucumi daja, arĩ wereñorã anyua.

Jesu ĩgu apinirã Judare gohrotobure beyeñorã

¹² Eropiira puhru Jesu yarã utãgugue Olivo waĩcudigugue arĩñirã dijari, Jerusalengue dujajañorã. Irigu utãgu yuju kilómetro wecañari Jerusalén ejaboro pohro arĩyoro. ¹³ Dujaja erã umarogue erã arĩri taribugue maria wañorã. Oã arĩñorã erã: Pedro, Ñu, Santiago, Andre, Felipe, Toma, Bartolomé, Mateo, Santiago, Simo, Juda arĩñorã. Santiagopu Alfeo magu arĩpu. Simopu celote waĩcari curu majagu arĩpu. Judapu Santiago acaweregu arĩpu. ¹⁴ Eropirã bajasuburi oã arĩpehrerã, nome mera,

María Jesu pago mera, Jesu pagu porã mera ðaro gamenere, turaro mera Goãmure mari Pagure serẽmuriñorã.

¹⁵ Eropi irinurire masa bajarã ciento veinte ejaboro gohra gamenereñorã. Eropigu Pedropu igu mera majarã Cristo yarã watope nũgaja, werepu erãre.

¹⁶ —Yu acawererã, Goãmu iribojegue igu arĩdiro dopa ta eropa wahaa. Irire Espĩritu Santo Davire weredoreñumi Juda muru eropa warare. Juda Jesure ñeha wejẽmorãre ihmudi árĩmi. ¹⁷ Juda muru mari mera Jesu yare ii, gua mera majagu ta árĩrimi. ¹⁸ Judapu igu Jesure ihmura wajare iri niyerure igu wiara puhru igu basi wefe siripu. Eropigu yuhridija wa, igu guramisida yehguea sĩa wa. Igu wiara niyeru muru mera gajirã merogã yebare asuñorã. ¹⁹ Eropirã arĩpehrerã ohõ Jerusalén majarã masipehrecãma Juda muru igu ñero warare. Eropa masirã igu niyeru mera erã asũra yebare Acældama di cóari yeba waĩcua, arĩma iri yebare. ²⁰ Iribojegue erã arĩ gojadiro dopa ta eropa wahãmi Juda muru. Salmo waĩcuripũgue õpa arĩ gojañuma:

Igu arĩdirore cóãdiro arĩporo. Eropirã gajirã igu arĩdirore arĩbiricãporo, arĩ gojañuma.
Ohõ sãre õpa arĩ gojañuma:

Gajigu igu mohmerare gohrotogu arĩgucumi, arĩ gojañuma Salmogue, arĩpu Pedro.

²¹⁻²² “Eropirã mari yujugu beyerã Juda murare gohrotobure. Ñu waĩyegu igu masare buherasubu arĩdigure, Jesu mera mari mera arĩdigure beyero gahmea mari mera majagu arĩbure. Jesu masa muriacũ sãre iadigure beyero gahmea. Eropa beyera puhru Jesu igu masa muriarare mari mera buhegucumi, arĩ werepu Pedro igu acawererãre Cristo yarãre. ²³ Igu eroparicũ peerã perãre beyedoboñorã erã. Yujugu José Justo waĩcugure beyeñorã. Igu Barsabá erã arĩ piyugu arĩpu. Eropirã gajigure Matia waĩcugure beyeñorã. ²⁴⁻²⁵ Erã perãre beyedobotuhaja, erãre Goãmure õpa arĩ serẽñorã:

—Mũhu gua Opu arĩpehrerã masa erã pepirire masia. Oã àhrima gua perã beyerã. Juda murare gohrotobure nihi mu gamegure beyeque. Juda muru Jesure cóãdigu peamegue wadigu árĩmi. Eropigu igure gohrotogu Jesu igu apidigu arĩgucumi. Eropigu gua mera ðari buherire buhegucumi, arĩñorã erã Goãmure.

²⁶ Eropa arĩrã ta utã mera deamuriñorã beyemorã. Matia yañe ðaro wiricũ, Matiapu Jesu Igu apinirã once apinirã mera majagu dujapu.

2

Espĩritu Santo igu yarã mera arĩnũgapu

¹ Eropii Pentecoste waĩcurinu arĩũ erã yujuro mera arĩpehrerã yuju wihi gamenereñorã. ² Irisubure ta miruñe burigã ariro dopa ta umarogue busuro cariyoro. Ero eropa busuro caricũ peeñorã arĩpehrerã iri wihigue gamenere arĩrã. ³ Eropiro peame porãrigã dopa bejari erã arĩpehrerã dipu wecare dehyoayoro. Iri peame porãrigã nediru dopa bejari dehyoayoro. ⁴ Eropigu Espĩritu Santo erapu erãre igu turarire õgu arigu. Eropirã Espĩritu Santo erãre igu itamuropẽ erãpu gajirã yare ðaro wereniguinũgañorã.

⁵ Irinurire Jerusalén bajarā judio masa eranirā árĩñorā. Goāmure umupeorā erarā árĩñorā. Erā macari nucu majarā árĩñorā. ⁶ Eropirā umarogue busucū peerā masa bajarā Jesu buherā pohrogue gamenere wahgāñorā. Masa nucu yare Jesu buherā erā wereniguicū peeñorā. Erā eropa wereniguicū peerā, erā pee uca wañorā.

⁷⁻⁸ —Yaho, ¿Duhpirā oā Galilea majarā árĩquererā òaro mari yare wereniguiri? Erā mari masa dehyoadirogue árĩnirā iro dopa ta wereniguirā iima, arĩñorā erāpu. ⁹⁻¹⁰ Árĩpehrerā mari yare dohpaguere wereniguirā iima. Partia majarā, Media majarā, Elam majarā, Mesopotamia majarā, Judea majarā, Capadocia majarā, Ponto majarā, Asia majarā, Frigia majarā, Panfilia majarā, Egipto majarā, Africa majarā, Cirene majarā, Romague arirā āhrraa mari. Yujurāyeri judio masa āhrraa mari. Gajirā judio masa árĩbirā judio masa ya buheripure buherāgue āhrraa mari. ¹¹ Creta majarā Arabia majarā sā mari mera āhrraa. Eropirā oā mari yare erā wereniguicū peea mari. Erā mari ya mera Goāmu turari mera igu òaro iirare wererā iima, arĩ wereniguĩñorā masa erā basi.

¹² Erā eropa arĩrā uca wañorā. Erā ĩarare erā peerare òaro masibiriñorā.

—¿Dohpárĩrono oā gajirā ya mera Goāmu yare eropa òaro wereniguiri mua pepicū? arĩ game serēpiñorā erā erā basi.

¹³ Eropirā gajirā wereyañorā.

—¿Dohpa oā siburi ihrinijarā mererā iiri? arĩ wereyañorā gajirā erā basi.

Pedro masare werepu

¹⁴ Eropigu Pedro once Jesu ĩgu apinirā mera wahgānugaja, masare werepu:

—Mua Judea majarā, árĩpehrerā Jerusaléngue árĩrā, ire yu werecū òaro peeque mua. ¹⁵ Mua pepiri diaye árĩbeaa. Dohpaguere nueve āhrraa. Ũmugue āhrraa. Eropirā oā merebeama. ¹⁶ Oā Goāmu iribojegue ĩgu werediro dopa ta iirā iima. Irire Joere Goāmu ya weremuhtadigure ire weredoreñumi Goāmupu.

¹⁷ Ojogorocurinu árĩcū òpa árĩroca: Yuhu Espĩrigure masare árĩpehrerāre obeogura. Eropirā mua porā Goāmu yare wererācoma. Eropirā mua mera majarā mamarā Goāmu deyoro moarire ĩarācoma. Eropirā mua mera majarā murāpu quērire quērācoma. ¹⁸ Eropigu yu pohro majarāre yu Espĩrigure obeogura. Eropirā erā yahare wererācoma. ¹⁹ Eropigu yu turari mera ĩiguca umusigue. Yebague sāre yu turari mera irire ĩhmuḡuca. Eropigu di mera, peame mera, imica mera ĩhmuḡuca yu turarire. ²⁰ Yu eropiicū abe umu majagu naitia wagucumi. Nami majagu abe diagu guhyaro wagucumi. Őpa waroca Cristo mua opu ĩgu dujariburinu, yu arĩranu core. Irinu ĩha uca warāca mua. Eropiro irinu guhyarinu árĩroca. ²¹ Eropiro òpa árĩroca: Árĩpehrerā masa Cristore erā ñerire cóadore serēnirāre ĩgu erāre peamegue wabonirāre taugucumi Goāmu, arĩ gojañumi Joe, arĩpu Pedro masare.

²² “Mua Israe masa yuhu werecū peeque, arĩpu daja. Jesu Nazare majagupu Goāmu ĩgu obeodigu árĩmi. Jesure “Goāmu obeodigu āhrrimi,” masa erā arĩ masiboro dopa Jesu Goāmu turari mera deyoro moarire masare ii ĩhmucū iidi árĩmi Goāmu Jesure. Mua irire masia. ²³ Mua Jesure wejēdorecū Goāmu iribojegue ĩgu “Eropa waroca,” ĩgu arĩdiro dopa ta

eropa wahabu. Eropirã mua Jesure crusague wejêdorerã wiabu Ìgure masa ñerãre. ²⁴ Goãmupũ Jesu sîridigure masuami. Eropigũ dipaturi ne sîrisome Ìgu. Ìgu sîri wajabeami. Eropa ojocarinigucãbu àhrimi. ²⁵ Òpa arĩnumi Davi iribojegue majagũ Cristo Ìgu arĩbodiropã dopa ta:

Yũ Opũ, yũ mera àhraa muhũ. Òmuri nũcu Goãmu yũ Opũ yũ pohro muhũ áricũ Ìamurabu yũhu güibiriboro dopa. ²⁶⁻²⁷ Muhũ Goãmu yũ sîporãre sîrinirã erã áríroguere ne cóãsome. Yũre mu mahigure ñerogue yũ sîporãre cóãsome muhũ. Yũhu mu pohro majagũ mũre umupeogu àhraa. Yũ dupure boadoresome muhũ. Eropigũ burigã mucubiria. Mucubiriri mera werenigua. Eropigũ mũre Goãmure burigã umupeogu árgũ güiro mariro òaro áricãa. ²⁸ Yũre dipaturi ojocaricũ iiguca muhũ. Yũ mera muhũ áricũ burigã mucubiria, arĩ gojañumi Davi Cristo Ìgu arĩbodiropã dopa ta, arĩpũ Pedro.

²⁹ “Acawererã, òpa òaro weregura mũare Davire mari acaweregũ mũrũre, iribojegue majagure, arĩnemopũ daja Pedro. Ìgũ Davi sîria wañumi. Eropigũ Ìgure erã yaara gobe dohpaguere árinia. Eropigũ “Yũ dupure boadoresome muhũ,” arĩ gojagũ Ìgu basi waĩpeo weregũ iibirĩnumi. ³⁰⁻³¹ Iribojegue Goãmu Davire òpa arĩnumi: “Diaye ta arĩgũ iiaa. Mu pãramerã árturiarã mera majagũ mu iiro dopa ta i maca majarã weca opũ árigucumi,” arĩnumi Goãmu Davire. Davi Goãmu yare weryugũ árinĩnumi. Eropigũ Cristore Goãmu ta opũ acuborore masigu, Cristo Ìgu masa muriaborore weremũtatuhañumi Davipũ. Òpa arĩ wereñumi Ìgũ: “Ìgũ sîrinirã erã áríroguere áriwajosome. Ìgũ dupũ ero boasome,” arĩnumi Davi. ³² Ìre Jesucristore Goãmu masuami. Ìgũ masudigure gua árípehrerã Ìabu. ³³ Eropigũ Cristo umarogue mari Pagu diayepũ áricumi doregũ árigũ. Eropigũ Ìgu Pagũ “Espíritu Santore yebague obeogura,” arĩpũ Ìgure. Eropigũ Cristopũ Espíritu Santore dohpaguere obeomi guare. Eropirã Espíritu Santore Ìgu guare obeorare Ìarã iiaa mua. Eropirã mua peea. ³⁴ Davipũ Jesu Ìgu muriadiropã dopa ta umaroguere muriabirinĩnumi. Eropigũ Ìgu Ìgu basi òpa arĩnumi:

Goãmu arĩmi yũ Opũre: “Ohõ yũ diayepũ doaque muhũ. ³⁵ Eropigũ mũre Ìhaturirãre mũre tarinugabasagura yũhu mu pohro majarã dopa árimorãre,” arĩmi Goãmu yũ Opũre, arĩ gojañumi Davi.

³⁶ “Eropirã árípehrerã Israe masa ire òaro masique mua. Ihĩ Jesure mua crusague wejêdigure mua opũ acumi Goãmupũ. Ìgure mũare taubure Cristore apiami Goãmu, arĩ werepũ Pedro masare.

³⁷ Ìgũ eroparicũ peerã burigã bujawere, güirã masapũ Pedro sãre serẽpi Ìañorã:

—Gua acawererã, ¿dohpa iirãcuri gua? arĩ serẽpi Ìañorã erã.

³⁸ Erã eropa arĩ serẽpi Ìacũ yũhripũ Pedro sã.

—Mua ñero iirire bujawererã árique. Òarire gohrotoque. Eropirã Jesu waĩ mera waĩyenirã árique mua árípehrerã. Mua eropa iicũ mua ñerire cãdijigucumi Goãmu. Mua eropa iicũ Espiritu Santo mua mera árigucumi. Goãmu Ìgu Espiritu Santore eropa ocãgucumi mũare. ³⁹ Mũare, mua porãre, mua pãramerã árturiarãre yorogue majarãre, árípehrerã Goãmu mari Opũ Ìgu beyenirãre “Diaye ta itamugura mũare,” arĩ apĩnumi Goãmu, arĩpũ Pedro masare.

⁴⁰ Eropa arĩtuhaja baja werenemopũ Pedro. Eropigũ turaro mera werepũ erãre.

—I yeba majaräre erä ñero iira dipuwaja dipuwaja moagucumi Goãmu. Eropirã muapu Goãmu yarã áríque. Mua eropa árícũ ĩgu muare dipuwaja moasome, arĩpu Pedro masare.

⁴¹ ĩgu eroparĩcũ peerã bajarã ĩgu wereniguirire ðaro peeñorã. Eropigu ĩgu sã eräre waiyepu. Eropirã Goãmu yarã mera majarã tres mil masa wanemoñorã. ⁴² Eropirã erã masa Cristo ĩgu apinirã mera umuri nucu árímunorã. Eropirã erã buherire umuri nucu peemuriñorã. Erã barire game guere, Goãmure serẽ, Cristo ĩgu apinirã mera ðaro árícãñorã erã.

Jesu yarã ne áríñugarã erã áríricurire werepu Luca

⁴³ Eropii Goãmu ĩgu turari mera deyoro moarire ii ĩhmuñorã ĩgu apinirã. Erã eropa iicũ ĩarã masa árípehrerã ĩha uca wañorã. ⁴⁴ Eropirã árípehrerã Jesure umupeorã gamenere, ðaro árícãñorã. Eropirã erã yare game gueremuriñorã. ⁴⁵ Erã yare dua, árípehreräre gajinore mooräre erã nucu omuriñorã erã. ⁴⁶ Eropirã umuri nucu erã Goãmu wihigue gameneremuriñorã. Árípehrerã yujurayeri erã wirigue yujuyeri cururi mucubiriri mera gamenere bamuriñorã. ⁴⁷ Erã eropa gamenererisubu “Goãmu ðagu áhrimi,” arĩ umupeomuriñorã. Eropirã gajirã masa eräre gametarimuriñorã. Eropigu umuri nucu Goãmu gajiräre ĩgu yarã wacũ ĩmuriu.

3

Curimasibigu ðagu wapu

¹ Ñamicague tres árícũ Goãmure serërisubu árícũ Pedro, Ñu mera Goãmu wihigue warã ĩñorã. Iri wihi disiporo yujugu umu doapu. ² Umuri nucu iri wihi disiporo ðari disiporo waicuri disiporo gajirã ĩgure aigãri duhudoboñorã. ĩgu umupu ne masa dehyoagugue ta curimasibigu arĩpu. Eropigu ĩgu iri disiporo pohro ðagu niyerure serëmuripu iri wihire ñajaräre. ³ Eropii Pedro, Ñu iri wihigue erã ejanugajacũ curimasibigupu eräre ĩha, niyerure serëpu. ⁴ Eropirã erã Pedro, Ñu mera ĩgure ĩha, Pedropu ðpa arĩpu:

—Guare ĩaque muhu, arĩpu Pedro ĩgure.

⁵ ĩgu eroparĩcũ peegu eräre ĩha “Niyerure orãcoma yure,” arĩ pepiripu.

⁶ ĩgu eropa arĩ pepiquerecũ ta Pedro ĩgure ðpa arĩ werepu:

—Niyerure opabeaa yuhu. Opabiriqueregu ta ire iigura yuhu mure. Jesucristo Nazare majagu ĩgu turari mera curique muhu, arĩpu Pedro curimasibigure.

⁷ Eropa arĩgu ta ĩgu mojotore diayepu maja mojotore ñeha, ĩgure tarawañgũ nugupu. ĩrisubu ta curimasibigu ĩgu guburire, ĩgu ñigarire turari ñajayoro. ⁸ Iri eropa ñajara puhru ĩgu wahgãñugajapu. Eropigu ĩgu waha buhrima muria “Goãmu turagu ðagu áhrimi,” ĩgu arĩ mucubiridiro mera erã mera Goãmu wihigue ñajapu pare. ⁹ ĩgu eropa curicũ, “Goãmu ðagu áhrimi,” arĩ gaguinigucũ masa árípehrerã ĩgure ĩañorã. ¹⁰ Eropirã masa ĩgure ĩha masiñorã. “Ĩhi iri wihi maja disiporo ðari disiporo pohro ĩgu niyerure serẽ ðagu áhrimi,” arĩñorã erã. Eropirã ĩgu eropa curicũ ĩarã ĩhamaria wañorã.

Pedro Goãmu wihigue masare buhepu

¹¹ Eropii curimasibiridigu Pedro sãre ĩgu duhubirisubu, masa árípehrerã ĩhamaria warã Pedro sã pohro omagã, gamenereñorã. Erã

Goãmu wihigue árfirã Salomo waicuripague árfñorã. ¹² Erã eropa gamenerera puhru Pedropu werepu erãre.

—Mua Israe masa, ¿duhpirã ire iha ucari? ¿Duhpirã guare mua ihanurari? Guapu gua ya turari mera, Goãmure gua umupeori mera, gua ejatuharo ire curicũ iibirabu gua. Jesu irire iiami. ¹³ Mari ñecu sumarã mura Abrahã, Isaa, Jacobo mura Goãmure umupeomuriñorã. Erã umupeodigupu Goãmupu iġu magure Jesure turagu, ðagũ iġu árficũ ihmumurimi. Mua Jesure ihatirirãre ohabu. Eropiġu Pilato iġure iġu peresugue wiudiacũ muapu iġure iġu wiucũ gamebirabu. Pilatore Jesure ohabu mua. ¹⁴ Pilato iġure wiudiarami. Muapu Jesure ðagure, ðaro iġure gamebirã gajigure masa wejẽdigupure wiudoreabu mua. ¹⁵ Eropirã Jesure mari ojocaricũ iġure wejẽabu mua. Iġu sãricũ Goãmu iġure masuami. Iġure masudigure gua iabu. ¹⁶ Eropirã gua iġure umupeorã áhrraa. Gua eropa umupeocũ iagu ire mua dohpague iagure mua iha masigure Jesupu iġu turari mera iġu curicũ iiami.

¹⁷ “Yu acawererã, mari oparã mera Jesure ðaro masibiriquerã iġure wejẽabu mua. Irire masia yuhu. ¹⁸ Iribojegue majarã Goãmu yare weremuhtanirã Goãmu erãre iġu weredoreiro dopa ta wereñuma erã sã. “Cristo ñero tarigucumi,” arĩ wereyuñuma erã. Erã eropa arĩ werediro dopa ta eropa wabu dohpaguere. ¹⁹ Eropirã dohpaguere mua ñero iirare bujawererã árfique. Óaripure gohrotoque. Cristore umupeoque. Mua eropa iicũ mua ñerire cãdijigucumi Goãmu. Eropiġu muare mucubiririnurire apigucumi iġu. Eropirã ðaro siñajarãca. ²⁰ Eropiġu Goãmu Cristore iġu beyedigure muare obeogucumi daja. Cristo Jesu ta áhrimi. ²¹ Iġu Jesu Goãmu pohrogue árficumi dohpa. Iribojegue Goãmu iġu yare weremuhtanirãre wereyudoreñumi iġu iiburire. Iġu werediro dopa ta árfipehrero amugu iicumi. Iġu amutuhaja Cristore obeogucumi daja. ²² Moise irire wereġu ðpa arĩñumi: “Mari mera majagure mari acaweregure Goãmu yare weremuhtagure Goãmu mari Opu obeogucumi muare. Yare iġu obeodiro dopa ta obeogucumi iġu sãre. Eropirã muare iġu werecũ peephecarãca mua. ²³ Ópa árfiroca. Árfipehrerã iġure peebirã, iġu dorerire iibirã iġu cóanirã árfirãcoma. Goãmu yarã mera majarã árfisome erã,” arĩmuriñumi Moise iribojeque.

²⁴ “Árfipehrerã Goãmu yare weremuhtanirã nucũ, Samue iġu puhru árfirã sã i dohpague warire wereyuñuma. ²⁵ Mari ñecu sumarãre iribojegue majarãre “Masare ðaro iigura,” arĩ weremuriñumi. Iġu erãre werediro dopa iimi marire dohpaguere. Eropiġu Abrahãre iġu arĩdiro dopa ta mari sãre arĩ wereġu iĩñumi. Ópa arĩ wereñumi Goãmu Abrahãre: “Árfipehreri yeba majarãre ðaro iigura. Ópa irire iigura: Mu acaweregure puhru árfigupu masare ðaro iibasagucumi yare,” arĩñumi Goãmu Abrahãre. ²⁶ Maripure Goãmu Jesure iġu magure iġu masudigure mari pohrogue obeomuhtami mari ñero iirare cóãbure. Eropa iigũ iġu muare ðaro iiami, arĩpu Pedro erãre.

4

Pedro, Ñu mera oparãre weretamuñorã

¹⁻³ Iġu eropa wereniguisubu pahia, Goãmu wihire corerã surara opu, saduceo masa sã erãre peeñorã. Ópa buhepu Pedro Ñu mera masare:

—Jesu ĩġu sĳirira puhru masa muria wami. ĩġu eropa masa muriacũ ĳarã, puhru mari sã ĩġu yarã mari masa muriaborore masia mari, arĳ werepu Pedro sã. Erã eroparicũ peerã, oparãpu erã mera guańorã. Eropa guarã naimerecũ ĳarã erã Pedrore, gajirã Jesu apinirã sãre ńeha, peresu ińńorã. ⁴Oparã eropa gamebiriqerecũ ta masa bajarã Goãmu yare Pedro sã buherire peerã “Diaye ta áhraa,” arĳ pepińorã erã. Eropirã Jesu yarã bajarã wańorã. Erã ıma dihtare queocũ Jesure umupeorã cinco mil masa árĳńorã.

⁵Eropii gajinu iri maca majarã murã, oparã, judio masa buherã mera Jerusalengue gamenereńorã. ⁶Eropiġu pahia opu Ana waicũġu ero arĳpu. ĩġu acawererã sã árĳńorã. Caifa, ńu, Alejandro, gajirã mera Ana acawererã árĳńorã.

⁷Eropirã erã Pedro sãre erãre gamebeocũ, surarapu peresugue erãre ańwiu oparã watopegue erãre aĳ ejańorã. Erã eropa iira puhru oparã serẽpi ĳańorã Pedro sãre.

—¿Noa ya turari mera mua curimasibigure õagu iiri? ¿Noa áhriri muare irire iidoreġu? arĳ serẽpi ĳańorã erã.

⁸Erã eroparicũ peegu Espĩritu Santo ĩġu itamurire õaro opagu werepu Pedro erãre.

⁹—Mua oparã, mua murã, ¿ġua curimasibigure ġua õagu iirare serẽpi ĳarã iiri mua guare? ¹⁰Ire masique mua árĳpeherrerã, Israe masa. Ire Jesucristo eropa iiami. Jesu Nazare majagu, mua crusague wejẽdigu, Goãmu masudigu, ĩġupu ihĳ curimasibigure õagu wacũ iiami. Eropirã ĳre dohpaguere mua ĳhuro ĩġu curicũ ĳhaa mua. Őpa áhraa Goãmu yare erã gojarapũgue Cristore weryuro: ¹¹“ĳhĳ Cristo utãye iro dopa ta Goãmu beyedigũ áhrimi. ĩġu Goãmu beyedigũ árĳquerecũ masa ĳġure gamesome. ĳġure erã gamebiriqerecũ Goãmu ĳġure opu acumi árĳpeherrerãre dorebure,” arĳ gojańumi iriboġegue. ¹²Ne gajigu masare peameġue wabonirãre taugu ne marimi. I yebaguere Jesu dihta masare taugu áhrimi. Ne gajirã ĩġu iro dopa árĳrã ne marima, arĳ werepu Pedro erãre.

¹³ĩġu eropa arĳ werera puhru, Pedro ńu mera buheya marirã erã árĳcũ ĳarã, ġũiro mariro erã buhecũ ĳarã, murã, oparã, judio masa buherã mera pee ıca wańorã. Eropirã Jesu iro dopa erã buhecũ ĳarã, õpa pepińorã erã. “Pedro, ńu sã diaye ta Jesu mera majarã ta áhřima oã,” arĳ pepińorã erã. ¹⁴Eropiġu curimasibiridigu Pedro sã mera arĳpu. ĩġu, ĩġu õagu árĳcũ ĳańorã murã, oparã, judio masa buherã mera. Eropirã erã Pedro sãre “ńero iirã iiaa,” arĳ weresãmasibirińorã. ¹⁵Eropa weresãmasibirã oparã erã gamenereri taribugue árĳrãre Pedro sãre wiriadoreńorã. ¹⁶Erã wiriara puhru erã basi weretamuńorã.

—¿Oãre dohpa iirãcuri mari? arĳ wereniguińorã erã.

Őpa arĳ wereniguinemońorã:

—Pedro, ńu mera Goãmu turari mera curimasibigure curicũ iinirã áhřama. Eropirã Jerusalén majarã árĳpeherrerã erã eropa õaro iirare masiama. Eropirã maripu “Eropa iibirama erã,” arĳmasibeeaa mari. ¹⁷Eropirã Jesu ĩġu buherare gajirãre buhedorebircãrã erãre gajirã erã buherire gameri arĳrã, arĳ wereniguińorã erã erã basi.

¹⁸Eropa arĳ wereniguituha Pedro sãre sihubeo õpa arĳńorã:

—Jesu ĩġu buherare ne buhebircãque gajirãre. ĳirire ne wereniguibircãque, arĳińorã erãre.

19 Erā eroparīcū peerā Pedro Ńu mera ōpa arīñorā erāre:

—Mua ōpa arīcū muare yuhrirā Goāmūpure tarinūgārā iiboca gua. ¿Nihī yapure gua werecū gahmeri mua? ¿Mua yapure gua iicū gahmeri mua? ¿Goāmū yapure gua iicū gahmeri mua? 20 Guapure gua iarare, gua peerare guare yayasāma masiya mara masare, arī yuhripū Pedro Ńu mera.

21 Erā eroparīcū peerā oparāpū dipaturi doreriñorā daja erāre.

—Jesu īgu buherare mua buherā ñero tarirāca mua, arīriñorā oparā erāre.

Erāre “Ńu, Pedro mera ñero iirā iima,” arīmasibiriñorā erā. Eropirā masapū curimasibiridigu īgu ōgaŋu wacū iarā, “Goāmū diaye ta ōgaŋu āhrimi,” arīñorā masa. Erā eroparīcū peerā oparāpū Pedro säre dipuwaja moamasibiri, erāre wiuñorā. 22 Curimasibigu ōgaŋu erā iidigu cuarenta bojori opagu árīpū.

Jesu yarā erā güibiriburire serēñorā Goāmūre

23 Eropii, Pedro Ńu mera erā mera majarā pohrogue eja, pahia oparā, murā erāre erā arīrare wereñorā. 24 Erā eroparīcū peerā erā árīpehrerā yujuro mera mari Pagure Goāmūre serēñorā.

—Gua Opū, muhu umarore, yebare, diarire iigu, árīpehrerāre ojocarīcū iigu āhraa muhu. 25 Mū Espiritu Santo gua ñecure Davi murare mū pohro majagure ōpa weredoreyoro mū arīdiro dopa ta:

¿Duhpirā judio masa árībirā guari? Pee masibirā āhrima masa.

26 Baja macari majarā oparā gamenere, mari Opū Goāmūre, īgu opū acudigu Cristo säre ñhaturi, ñero iidiana erā, arī weredoreyoro muhu Davire iribojegure.

27 Eropa ta āhraa, arī serēnemoñorā Goāmūre. I macare Herode, Poncio Pilato, judio masa árībirā, judio masa mera mū beyedigure Jesure ōgaŋu mū pohro majagure wejēdia gamenereama. 28 Irisubu mū gamediro dopa ta “Eropa waroca,” mū arīdiro dopa ta iima erā. Mū masiri mera eropa wereyoro muhu. 29 Eropigu, gua Opū, erā guare “Mua buheri waja ñero tarirāca,” erā arīrare guñaque muhu. Guare itamuque. Eropigu guare mū pohro majarāre güiro mariro mū buherire weredoreque guare. 30 Muhu mū turari mera dorecurāre ōarā iique. Eropigu mū buherire güiro mariro werecū iique guare. Eropigu mū deyoro moarare Jesu mū pohro majagu īgu turari mera ii ihmūdoreque guare. Eropigu dorecurāre ōarā gua wadorecū mū turari mera itamuque guare, arī serēñorā erā mari Pagure.

31 Erā eropa arī serēra puhru, erā gameneri wihi ñohmemaa wayoro. Ero eropa ñohmecū ta Espiritu Santo īgu turari mera guñaturarā wacū iipu erāre. Eropa warā, Espiritu Santo īgu dorediro dopa ta iuñorā. Güiro mariro Goāmū yare wereñorā erā.

Jesu yarā erā yare duca wañorā

32-33 Eropirā Goāmū īgu turari mera erā Jesu īgu apinirā ōpa arī wereñorā masare: Jesure Goāmū masudigure gua ñabu, arī wereñorā erā masare. Eropigu Goāmū erā árīpehrerāre ōaro itamumūripū. Eropirā Jesure umupeorā bajarā árīñorā. Erā yujuropa ta pepirā arīmuriñorā. Eropirā erā erā yare erā doberire “Yaha dihta āhraa,” ne arībiriñorā. Erā árīpehrerā erā yare gajinore moorāre erā mera majarāre duca wamuriñorā. 34 Eropirā erā mera majarā mojomorocurā marimuriñorā. Erā mera majarā yeba oparā, wiri oparā erā yare duamuriñorā. 35 Eropa

duarā erā wajasearare erā aīgāri, Jesu īgu apinirāre omuriñorā. Eropirā erāpu irire erā mera majarāre đuca wamuriñorā. Árīpehrerā opabirāre đuca wañorā. ³⁶ Irisubure yujugu erā mera majagu José waīcugu árīpu. Jesu īgu apinirā Josére Bernabé waīyeñorā. Īgu waī Bernabé “Masare mucubiricū iigu āhrimi,” arīma Griego ya mera. Īgu Leví ya curu majagu Chipre nuğuro majagu árīpu. ³⁷ Eropigu īgu poeri opagu árīgu irire duapu. Eropigu īgu wajasearare Jesu īgu apinirāre ópu īgu gajirāre gueredregu.

5

Ananía ĩgu marapo Safira mera guypu

¹ Gajirā sā Bernabé iro dopa iimuririñorā. Erā Ananía waīcugu, ĩgu marapo Safira waīcugo árīñorā. Eropigu Ananía erā ya poerire duapu ĩgu. ² Eropa duaqueregu ta ĩgu wajasearare ĩgu basi aīpu. ĩgu marapo sā ĩgu eropa iirare masipo. Eropigu erā wajasea đuharare aīgāri, Jesu ĩgu apinirāre ópu Ananíapu. Eropa ogu, “Opehogu iiaa,” arīripu ĩgu. ³ ĩgu eropa iicū ĩagu Pedro ĩgure werepu.

—Ananía, watī mre guyadrecū muhu guyabu Espiritu Santore. Eropigu mua ya poerire dua, mu wajasearare mu basi aību āhrabu muhu. ⁴ Mu duaboro core mua ya poeri árīribu. Eropiro mu duara puhru mu ya wajatari ta āhrabu. ¿Eropigu dohpa árīronore eropa guyarī muhu? Muhu gua dihtare guyabeaa. Goāmu sāre guyabu muhu, arīpu Pedro ĩgure.

⁵ ĩgu eroparicū peegu ta, Ananíapu mehmereja, sīria wapu. Eropirā árīpehrerā ĩgu eropa warare masirā, burigā güiñorā. ⁶ ĩgu sīria puhru mamarā ahrī, ĩgu đupure suhri mera oma, disiporogue aīgā, yaañorā ĩgure.

⁷ Eropii uhre hora puhru Ananía muru marapo ĩgu sīrirare masibigo Pedro pohrogue ñajapo. ⁸ Eropigu Pedro igore ópa arīpu:

—¿Mua ya poerire duanijarā dipē wajatari mua? arīpu ĩgu. Eropigo igo igo marapu muru ĩgu arīrañepē ta, “Īripeta wajatabu gua,” arī wereripo igo sā. ⁹ Eropigu Pedro igore werepu:

—¿Duhpirā mua yujuro mera Goāmu Espiriture guya ĩhadiari mua? Peeque dohpaguere. Mu marapu murure yaanirā ta ahrima daja. Mu sāre mu đupure airā ahrima, arīpu Pedro.

¹⁰ ĩgu eropa arī wrecū ta igo mehmereja, sīria wapo. Eropirā mamarā iri wihire ñajarā, igo ya đupu murarore aī wiria wañorā. Aīgā, igo marapu muru dipaba yaañorā. ¹¹ Eropirā Jesu yarā árīpehrerā gajirā irire peerā sā, güitariacāñorā.

Jesu ĩgu apinirā Goāmu turari mera ii ĩhmuñorā

¹² Eropirā masa watope Jesu ĩgu apinirā bajasuburi Goāmu turari mera deyoro moarire ii ĩhmuñorā. Eropirā erā Salomo waīcari taribugue óari taribugue gameneremuriñorā. ¹³ Eropirā gajirā erāre güirā, erā pohrogue wabiriñorā. Eropa güiquererā erāre Jesu ĩgu apinirāre, “Óarā āhrima oā,” arīñorā masa. ¹⁴ Eropirā uma, nome bajarā Jesure umupeonugañorā. ¹⁵ Eropirā erā dorecurāre aīgāri, omasiariñe mera pütāpi apigañorā Pedro waburi mague erāre. Eropirā dorecurāre óarā wacū gamerā Pedro erāre ĩgu ñapeocū gameñorā erā aīgānirāpu. Erāre ĩgu ñapeobiricū Pedro erā weca ĩgu watī merejariñe dihtare gameñorā erā. Iri dihtare gameñorā erā erā óarā waboro dopa. ¹⁶ Eropirā

Jerusalén pohro áriri macari majarã sã, dorecurãre, watëa ñajãsünirã sãre aĩgãriñorã. Eropirã erã árĩpehrerã erã dupu òaro wañorã.

Oparãpu Jesu ĩgu apinirãre ñero iidoreñorã

17 ĩgu eropa iicũ ĩarã pahia opu, ĩgu mera majarã mera Pedro sãre peyocupu. Pahia opu mera majarã saduceo masa árĩñorã. 18 Pedro sã iirare peerã erã guatarirã Jesu ĩgu apinirãre ñehadore, peresu iĩñorã.

19 Eropiira puhru iri ñami ta Goãmũ ĩgu anyu pãgũpu erãre peresugue árĩrãre. Tuhajanugu erãre wiriridore òpa arĩ werepu anyu:

20 —Goãmũ wihigue waque. Iri wihigue árĩrã Goãmũ masare ĩgu tauburire, iri òari buherire wereque masare, arĩpu anyu erãre.

21 ĩgu eroparicũ peerã ñamigã ñari Goãmũ ya wihigue ñaja, masare buheñorã erã.

Irinã ta pahia opu, ĩgu mera majarã, Israe masa oparã mera gamenere, Jesu ĩgu apinirãre peresugue árĩrãre aĩgãridoreripu surara oparãre.

22 Eropirã surara oparã peresugue doarãpure aĩgãrirã wariñorã. Erãre bocabiriñorã. Bocabiri dujaa wañorã daja. 23 Dujaja wereñorã erã oparãre.

—Peresugue áriri disiporori bihara disiporori àhrabu. Eropirã erã iri disiporori pohro peresu iinirãre corerã niguiama. Eropa ĩabu gua. Eropirã gua disiporore pãgũcũ, masa marabu, arĩ wereñorã erã.

24 Erã eroparicũ peerã, surara Goãmũ wihire coreñirã opu, pahia oparã mera irire pee uca wa, “¿Dohpa waha ojogorocurãcuri erã eropa iirã?” arĩ pepiñorã erã. 25 Eropigu erã pohrogue gajigu ahri, erãre werepu.

—Mua peresu iinirã Goãmũ wihigue àhrama. ĩarã waque bu. Iri wihigue masare buherã iama erã, arĩ werepu.

26 ĩgu eroparicũ pee, surara opu, ĩgu surara mera waha, Jesu ĩgu apinirãre dipaturi ñeagãriñorã daja. Eropa ñearã erãre surara turibiriñorã. Eropirã erãre pabonirã árĩquererã, masare gũira pabiriñorã epãre. “Oãre mari pacũ gajirã masapu utã mera dearãcoma marire,” arĩ pepiñorã erã surarapu. 27 Eropirã erãre aĩgãri, oparã core duhudoboñorã erãre. Erã eropa aĩ eraa dobocũ pahia opu erãre turipu.

28 —Muare gua weretuhabu. Jesu yare buhebiricãque, arĩrabu gua muare. Gua eropa arĩquerecũ ta muapu árĩpehrerã Jerusalén majarãre buhea mua. Jesu ĩgu sãrira waja, guare dipuwajacucũ iidiarã iica mua, arĩpu pahia opu.

29 ĩgu eroparicũ peegu Pedropu gajirã Jesu ĩgu apinirã mera yuhripu.

—Goãmũ ĩgu dorerapure iimuhhtarãra. Eropirã puhru Goãmũ gamecũ masa erã dorerire iirãra. 30 Goãmũ mari acawererã iribojegue majarã opu Jesure masudi árĩmi. ĩgu ta àhrimi mua crusague pabia wejẽdigu.

31 Jesure masura puhru Goãmũ ĩgure “Òagu àhrimi,” arĩ, ĩgu diayepu doadoremĩ Jesure ĩgu Pagupu. Eropigu Jesu masa opu, masare masugu árĩgu, Israe masare erã ñeri iirare bujawererã árdoregu, erã ñerire cõãdiamĩ Jesu. 32 Eropirã guapu Jesu ĩgu iirare ñanirã árĩrã irire werea gua.

Espĩritu Santo irire ĩhmuqu árĩgu weremĩ ĩgu sã. ĩgure Espĩritu Santore Goãmũ obeoamĩ. Árĩpehrerã Goãmũ dorerire iirãre ĩgu Espĩritu Santore ohomĩ, arĩ werepu erãre.

33 ĩgu eroparicũ peerã oparãpu guatariacãñorã. Eropirã erã Jesu ĩgu apinirãre wejẽdiariñorã. 34 Irisubure erore Gamalie fariseo masu ero

árĩgu eräre wejẽdoregu iibiripu. Īgu oparã mera majagu, dorerire buhegu ĩgu árĩcũ, masa erã umupeogu árĩpu. Eropigu Īgu Jesu ĩgu apinirãre merogã coredoregu gajipugue eräre aĩgãdorepu surarare. ³⁵ Erã eropa aĩgãra puhru ĩgupu werepu masare.

—Mũa Israe masa, oãre mũa iiburire õaro pepique mũague wejẽri arĩrã. ³⁶ Guñaque Teuda mũrũre. Īgu, ĩgu basi “Masare tarinugagu aħraa yũhũ,” arĩmi masare. Eropirã masa bajarã cuatrocientos masa ĩgu mera majarã dujama. Eropirã gajirãpu ĩgure wejẽnirã árĩma. Īgu sĩricũ ĩha ĩgu buherire buhenirãpu wasiria wanirã árĩma. Eropirã erã dohpaguere marima. ³⁷ Pũhru masare erã queorisubu árĩcũ Galilea majagu Juda waĩcũgu masare ĩgu buhecũ ĩgu mera masa bajarã dujama. Īgu sã sĩaria wadi árĩmi. Eropii ĩgu yarã árĩpehrerã wasiria wanirã árĩma erã sã. ³⁸ Eroparĩgu dohpaguere mũare ire arĩgu iiaa. Eropa ĩacãque oãre Jesu yare wererãre. Eropii i buheri oã erã ya buheri Goãmu ya buheri árĩbiro, pehrea waroca. ³⁹ Goãmu ya buheripu árĩro, ne pehresome. I buheri Goãmu ya árĩcũ ne ire ne dederecũ iimasibea masa. Mũa ire dederecũ iidiarã Goãmu mera gamequeãrã iiboca masa, arĩpu Gamalie eräre.

Īgu eropa arĩ werecũ peerã, “Diaye ta aħraa,” arĩ, peeñorã oparã. ⁴⁰ Eropirã erã Jesu apinirãre sihubeo, erã eracũ ĩarã eräre tãrañorã. “Jesu yare buhebiricãque masa,” arĩtuhaja, eräre wadoreñorã.

⁴¹ Eropa wadorecũ peerã erã oparã pohrogue árĩnirã waha wañorã. Jesu ya árĩburire ñero tarirã burigã mucubiriñorã Jesu ĩgu apinirã. ⁴² Eropirã umuri nũcu erã ya wirigue, Goãmu wihigue sãre Jesucristo yare buhe weremuriñorã erã.

6

Siete itamumorãre beyeñorã Jesu yarã

¹ Irinũrĩre Jesure umupeorã bajarã wañorã. Eropirã griego masa judio masa mera gameturiñorã erã Jesu yarã dihta árĩquererã. Griego masa wapeweyarã nomere umuri nũcu erã barire õaro erã guerebiricũ ĩarã judio masare turiñorã. ² Eropirã Jesu ĩgu apinirã, docepu Jesure umupeorãre árĩpehrerãre erã pohrogue sihubeo, õpa arĩ wereñorã:

—Gua Goãmu yare buherã aħraa gua. Barire gueremorãno árĩbeaa gua. ³ Eropirã mũa gua acawererã, siete umare, gajirã “Õarã,” erã arĩrãre, Espĩritu Santo oparãre amaque. Erãpũre barire gueredoreque masa. ⁴ Eropirã guapu umuri nũcu Goãmũre serẽ Goãmũ yare buherãca, arĩñorã Jesu apinirã erã Jesure umupeorãre.

⁵ Erã eroparĩcũ peerã, “Aũ, eropa ta ĩarã,” arĩñorã erã árĩpehrerã Jesure umupeorã. Eropirã Estebanre Cristore umupeogure, Espĩritu Santo turarire wũaro opagure beyeñorã erã. Gajirã sãre beyeñorã. Felipere, Prócorore, Nicanore, Timore, Parmenare, Nicolare bari gueremorãre beyeñorã erã. Nicolapu judio masũ árĩbigũ Antioquía majagu judio masa buherire gamegu erã mera ñajadigu árĩpu. ⁶ Erã beyenirãre Jesu ĩgu apinirã pohro aĩ erañorã gajirã Jesu yarãpu. Erã eropa aĩ eracũ ĩarã erã Goãmũre serẽbasañorã. Eropirã erã beyenirã weca erã mojotorire duhpeñorã Goãmũ turarire orã.

⁷ Eropirã iri yeba majarã Goãmũ yare masipehrenijarã iĩñorã. Eropirã Jerusalẽngue árĩrã Jesure umupeorã bajarã wanemoñorã daja. Eropirã pahia sã bajarã Jesu yarã wañorã.

Gajirã Estebanre ñeañorã

⁸ Eropigu Esteban Goãmu turarire opagu árĩpu. Īgu Goãmu ðaro iigu árĩpu. Eropigu ĩgu Goãmu turari mera deyoro moarire ii ĩhmupu masa erã ĩaro. ⁹ Judio masa erã buheri wihi majarã ĩgure ĩhaturĩñorã. Eropirã ĩgu mera game ðuyasonuğañorã. Erã Liberto waĩcurã árĩñorã. Eropirã erã Cirene majarã, Alejandría majarã, Cilicia majarã, Asia majarã mera bajarã árĩñorã erã Esteban mera ðuyasorã. ¹⁰ Esteban masigu dopa ta, Espiritu Santore wũaro opagu ta ĩgu wereniguicũ peerã erã yujuro bojebirĩñorã ĩgure. ¹¹ Eropa yujuro bojebirã erã gajirãre ahma guyadore, wajayeñorã erãre. Erã eropa guyadorecũ ðpa arĩ weresãñorã erã Estebanre:

—Īhĩ Goãmure ĩgu ñero wereniguicũ, Moisere ĩgu ñero wereniguicũ sãre gua peeabu, arĩ weresãriñorã erã guyarãpu gajirãre.

¹² Erã eroparicũ peerã masa, judio masa buherã, murã sã ĩgu mera guañorã. Eropirã erã Estebanre ñeha erã oparã pohro aigãñorã ĩgure.

¹³⁻¹⁴ Eropirã erã gajirãre gyanemodoreñorã. ðpa arĩñorã erãpu:

—Īhĩ umuri nũcu Goãmũ wihire, ĩgu doreri sãre ñero wereniguigu àhrimi. Peeabu gua ĩgure ĩgu ðpa aricũ. “Jesu Nazare majagu Goãmũ wihire cóagucumi. Eropigu ĩgu Moise dorerare marire ĩgu wererare gohrotogucumi Jesu,” arãmi Esteban gua peecũ, arĩ guya weresãriñorã erã. ¹⁵ Eropirã árĩpehrerã ero doarã Estebanre ðaro ĩhamehtu, ĩgu diapore ñañorã erã. Anyu iro dopa deyoyoro ĩgu diapo.

7

Esteban Jesu yare werepu

¹ Eropii pahia opu serẽpipu Estebanre.

—¿Oã erã arĩri diaye ta àhriri? arĩ serẽpipu ĩgu Estebanre. ² Īgu eroparicũ peegu, Estebanpu erãre ðpa arĩ werepu:

—Acawererã, murã, gua pagu sumarã, peeque. Abrahã mari ñecu muru iribojegue majagu Mesopotamiague ĩgu áricũ, Harãngue ĩgu árĩboro core, Goãmũ turagu gosesiriro dopa ĩgure Abrahãre dehyoanumi. ³ Eropa dehyoagu Goãmũ wereñumi ĩgure. “Mũ ya yebare mũ acawererã mera árĩbircãque. Eropigu gaji yebague waque. Mũ eropa wacũ mure iri yebare ĩhmugura yuhu,” arĩpu Goãmũ Abrahãre. ⁴ Īgu eroparicũ peegu Abrahã sã Caldea majarã ya yeba árĩrã wañuma. Pu Harãngue ejañuma. Eroque eja árĩñuma. Eropigu ĩgu pagu ĩgu sirira puhru i yeba dohpague mua árĩri yeba Goãmũ ta árdoreñumi Abrahãre.

⁵ Īgure eropa árdorequeregu Goãmũ Abrahã ĩgu árĩri yebare ðaro gohra apibirimuriniñumi ĩgure. Ne merogã apibiriniñumi. Eropigu Abrahã ĩgu porã marigu árĩquerecũ ta Goãmupu ĩgure ðpa arĩ wereñumi. “Mure mũ pãramerã gaji turi majarãguere i yebare ogura,” arĩñumi Goãmũ Abrahãre. ⁶ Eropa arĩgu ta ðpa arĩ werenemoñumi Goãmũ Abrahãre. “Mũ pãramerã gaji turi majarãgue gaji yebague waha, erogue gajirã pohro árĩrã erã pohro majarã árĩrãcoma erã. Eropirã cuatrocientos bojori gohra ero majarã ñero iirãcoma mũ pãramerã árĩturiarãguere.

⁷ Eropigu ero majarãre erã eropa iira waja dipuwaja moagura yuhu. Yuhu eropiira puhru mũ pãramerã i yeba erarãcoma daja. Eropirã i yeba yu dorerire iirãcoma erã,” arĩñumi Goãmũ Abrahãre. ⁸ Eropa arĩgu Goãmũ “Yu arĩdiro dopa ta ĩgura,” arĩgu Abrahã ĩgu guñaburire ðpa apiñumi ĩgure. Merogã gasirogãre ĩgu ðupure wiri árdoreñumi ĩgure, ĩgu eropa

arī wereraġuere ġuñadoreġu. Eropiira puħru Abrahā Isaare porācuñumi. Ocho nuri puħru merogā gasiroġare wiri aññumi Isaa dupu sāre. Puħru Isaa Jacobore ġu porācura puħru wiri aññumi ġu dupu sāre. Eropiġu Jacobo doce goħra porācuñumi. Erā docepa mari cururi nuċu oparāġue ārīmuriñuma.

⁹ “Eropirā erā Jacobo porā mari ñecu sumarā mura Josére erā pagu magure peyocumuriñuma. Ġure cohā, duacāñuma Egiptogue warāre. Eropiġu Josére Goāmū itamumuriñumi. ¹⁰ Ġu ñero taricū ġaġu Goāmū Ġure itamumuriñumi. Ġu eropa itamucū Josépu ōaro pee masiġu wañumi. Eropiġu faraō Egipto majagu opupu Josére ġu gamecū iññumi Goāmupu. Ġu eropiicū faraōpu Josére Egipto majagu opu, ġu ya wihi majagu opu apiñumi.

¹¹ “Eropii irisubure ta Egiptogue, Canaa waicuri yeba sā ne deco aribiriyoro. Eropirā ero majarā ñero tariñuma. Eropirā Canaague ārīrā Jacobo porā mari ñecu sumarā mura bari bocabirimuriñuma. ¹² Eropiġu Egiptogue trigo árīcū peġu, Jacobo ġu porāre erogue bari asūdoreġu ne obeoġu iññumi. ¹³ Puħru Egiptogue erā ejacū José ġu tīrāre wereñumi. “Maa pagu magu ta āħraa yuħu,” arīñumi erāre. Eropiġu José acawererāre ne ġagu iññumi opu faraō waicūġu. ¹⁴ Puħru José ġu tīrāre erā pagu Jacobore sihudoreġu obeoñumi. Ġu acawererā senteta y cinco masa árīñuma irisubu. ¹⁵ Ġu magu ġu siħubeocū peġu Jacobo Egiptogue wañumi ġu magu pohrogue. Ġu magu pohro āħri, puħru sīria wañumi pare. Eropirā ġu porā mari ñecu sumarā mura erogue sīripeħrea wañuma erā sā. ¹⁶ Eropirā Siquē waicuri yebague erā dupure aī, masa goberigie seatuha yaañuma erā dupure. Abrahā ġu asūra yebague ārīyoro iri yeba erāre yaara yeba. Ero core Abrahā iri yebare Hamor porāre asūyuñumi niyeru mera.

¹⁷ Eropiġu Goāmū Abrahāre “I yebare ogura mure,” arīmuriñumi. “Iri yebare ogura,” ġu arīrasubu ejacū Abrahā pāramerā Israe masa bajarā masa wañuma. Egiptogue árīñuma. ¹⁸ Egipto yeba erā árīnicū, ġajġu opu ñajañumi. Eropiġu ġu opupu José murure masibiriñumi. ¹⁹ Eropiġu ġu mari acawererāre ñero iidia, erā porāre wejēdia, erā porāre wejē cóacādoreñumi erāre. Eropiġu mari ñecu sumarāre ñero iññumi opu faraōpu. ²⁰ Ġu eropiirisubu Moise árībupu masa dehyoañumi. Ġu ōaġu, Goāmū ōaro ġhasuagu arīmuriñumi. Eropirā ġu pagu sumarā urerā abe goħra ōaro ġhadibuñuma ġuġare. ²¹ Moiserē dibunemomasibiricū Ġure erā cóara puħru opu mago Ġure boca aī majaa, ġo magu iro dopa ta dibuñumo Ġure. ²² Eropirā Egipto majarā ōaro masirā yare buheñuma Moiserē. Eropiġu ġüiro mariro wereniġuġu opu iro dopa iġu árīñumi Moise.

²³ “Eropiġu Moise cuarenta bojori ġu opaboro core ġu acawererāre Israe masare ġadiagu erā pohrogue curiġu wañumi. ²⁴ Eropa curiġu eġaġu Egipto majagu Moise acaweregure ġu ñero iicū Moise ġañumi. Eropa ġaġu ġu acaweregure itamuñumi Moise. Ġu acaweregure itamugu Egipto majagupure pa wejēcāñumi ġu. ²⁵ Eropirġu Moise ōpa arī pepiriñumi. Yu acawererā erā acaweregure yu itamucū ġarā, ‘Goāmū marire ōaro taricū iidoreġu obeoñumi ġre,’ yu acawererā yare arī pepirācoma,” arī pepiriñumi Moise. Erāpu ne eropa pepibiriñuma. ²⁶ Ġajinu Moise ġu acawererāre perā erā basi gamequeārāre ġapu. Eropiġu ġu erāre

bosariñumi. “¿Mua basi áríquererã gamequeãri mua?” aríñumi Moise erãre. ²⁷ Ígu eroparicũ peegu yujugu Ígu acaweregure ñero iigu Moisere tuubeoñumi. “Muhũ gua opu áríbeaa. Guare doregu áríbeaa muhũ. ²⁸ ¿Carãre Egipto majagure mu wejẽdiro dopa ta yu sãre wejẽdiagu iiri muhũ?” aríñumi Ígu Moisere. ²⁹ Ígu eroparicũ pee uca wa Moise oma duhrigã waha wapu. Madiãn waicuri yebague waha wañumi. Eroque nomeore boca perã porãcuñumi.

³⁰ “Eropii Moise cuarenta bojori gohra ero Ígu árira puhru Sinai waicudigu utãgu pohro masa marirogue Ígu aricũ anyu Ígure dehyoañumi. ³¹ Eropa irigugã ùjacũ íagu Moise íha uca wañumi. Iri peamere pohrogã òaro ígu íagu wacũ gohra Goãmu Ígure wereñumi. ³² “Goãmu ãhraa yuhũ. Mu ñecu sumarã, Abrahã, Isaa, Jacobo erã Goãmu ãhraa yuhũ,” aríñumi Goãmu Moisere. Ígu eroparicũ peegu Moisepu naragãñumi. Ne íha wahgũbiriñumi. ³³ Eropigu Goãmu wereñumi Ígure. “Dohparagã yu pohro nigũigu íiaa muhũ. Eropigu guhyadiaro mera mu zapature tuweaque. ³⁴ Yaharã masa Egiptogue erã ñero taricũ íabu. Erã siwererire peeabu. Eropigu erãre itamugu ahrabu. Erã eropa wacũ íagu waque mu sã. Egiptogue mre obeogura erãre itamudoregu,” aríñumi Goãmu Moisere.

³⁵ “Erãpu mari acawererã Israe masa Moisere gamebirituhajañuma. “Muhũ gua opu áríbeaa. Muhũ guare doregu áríbeaa,” Moisere eropa arirã gamebirã iituhajañuma. Eropa erã Moisere gamebiriqrecũ Goãmu Ígure Egiptogue obeoñumi mari acawererãre, Israe masare itamubure, erãre dorebure. Ígu eropa obeogu anyupure Ígure yucugugue dehyoadigure itamudoreñumi Ígure. ³⁶ Moise ta mari acawererãre Israe masare Egiptogue árírãre wiudigu aríñumi. Eropigu Egiptogue aja, ihĩ Moise Goãmu turari mera ii íhmunugañumi. Eropigu wuãriya diariyague eropa ta iññumi daja. Puhruquere masa marirogue sãre cuarenta bojori gohra Goãmu turari mera deyro moarire ii íhmunuriñumi Ígu erãre. ³⁷ Ihĩ Moisepu mari acawererãre Israe masare weremuriñumi. “Yu iro dopa ta Goãmu yare weremũhtabure Goãmu obeogucumi. Eropigu Ígu mua mera majagu mua acaweregu árígucumi. Ígu eropa eracũ Ígure òaro peeque mua,” arimuriñumi Moise erãre. ³⁸ Moise masa marirogue mari acawererã Israe masa mera arimuriñumi. Eropigu mari ñecu sumarã iribojegue majarã mera aríñumi Ígu. Eropa arígu Sinai waicudigu utãgugue Ígure weredigu anyu mera aríñumi. Eroque Goãmu Ígu dorerire aĩdigu aríñumi Moise.

³⁹⁻⁴⁰ “Iri dorerire utãgugue Moise waha aĩrisubu mari ñecu sumarã mura Egiptogue dujadiarã Moisere tarinugañuma. Erã Ígure gamebiriñuma. Eropa gamebirã Aarõre Moise tígure òpa aríñuma: “¿Ígu Moise marire Egiptogue aĩgãridi dohpa wayuri Ígu? Masibirica mari. Eropigu goãmarã wéanirãre iique mari yarã arimorã. Eropirã mu wéanirã marire doreri mari wadiari maha marire aĩgãrãcoma,” aríñuma erã. ⁴¹ Eropa arira puhru erã wecure oro mera wéañuma. Eropa iituhaja, erã waimurãre wejẽ, erã wéadigu pohro aĩgãri umupeoñuma Ígure. Eropirã erã erã iidigure wecure íarã, mucubiri, bosenu iññuma. ⁴² Eropigu Goãmu erã wéadigure erã umupeocũ íagu, erãre cóacãriñumi. “Erã yure cóarã gajirã umaro majarãpũre umupeo curaporo,” arígu cohãgã wariñumi. Goãmu yare weremũhtanirã òpa arĩ gojañuma Goãmu wereniguirire:

Mua Israe masa, yure ñe ñero iiabu. Masa marirogue cuarenta bojori gohra árîrâ waimurâre mua wejênirâre mua soenirâre yure mua obodiro dopa ta umupeorabu mua. Eropirâ yapure umupeobirabu mua. ⁴³ Eropirâ mua Molo waicugure umupeorâ árîrâ, ïgure umupeori wihire iiahu mua. Eropirâ “Refa gua goâmu âhrimi,” arîrâ ïgu necâmu mua weadigure mua umupeoabu daja. Erâ weânirâre mua iinirâre mua umupeoabu. Mua eropa iira waja muare Babilonia sipugue cõabeogura yuhu, arîñumi Goâmu ïgu ya weremuhtanirâ mera.

⁴⁴ “Eropirâ masa marirogue Goâmu masa mera ïgu árîri wihire waimurâ gasiri wihire opamuriñuma mari ñecu sumará iribojegue majarâ. Iri wihi Goâmu masa mera ïgu wereniguiiri wihi árîyoro. Iri wihigue Goâmu dorerire ïgu gojara mijiri utâ mijiri árîyoro. Iri wihire Goâmu ïgu werediro dopa ta Moiserere ïgu ïhmudiro dopa ta ii ïhacudoreñumi Goâmu Moiserere. ⁴⁵ Puhrugue majarâ mari ñecu sumará Josué mera iri wihire aïgariñuma mari árîri yebague erarâ. Erâ iri yebaguere Goâmu ïgu apira yebaguere erâ eraboro core iri yeba majarâ murare Goâmu cóacãñumi. Irisubure Goâmure umupeori wihire waimurâ gasiri wihire opamuriñuma mari ñecu sumará. Ne Davi muru ïgu árîcugue opatuñuma iri wihire. ⁴⁶ Eropigu Davi muru Goâmure mucubiricã iññumi. Eropigu Goâmu ya wihi árîburire iidiagu Davipu sereriñumi Goâmure. ⁴⁷ ïgu eropa serêquerecũ ta Salomopu Davi magupu Goâmu ya wihire iññumi. ⁴⁸ ïgu eropa iiquerecũ ta Goâmupu masa erâ iira wihiguere árîbeami. Õpa arîñumi Goâmu wereniguiirire weremuhtadigu:

⁴⁹ Õmarogue ya doaro âhrraa. Ero doagu dorea yuhu. Eropiro yebapu yu guburire duhpeoro iro dopa ta âhrraa. Yuhu turatariagu âhrraa. Yaha wihi árîborore iimasibea mua. Goâmu ya árîcũ yu árîburi wihire mua iimasibea. ⁵⁰ Yu basi i yebare árîpehrero iiabu yuhu, arîmi Goâmu, arî gojañumi Goâmu yare weremuhtadigu, arîpu Esteban.

⁵¹ Eropigu õpa werenemopu Esteban erâre:

—Mua ne yuhridiabrâ âhrraa. Goâmu yare peequererâ, ïgure yuhridiabea. Espiritu Santore tarinugataria mua. Mua ñecu sumará erâ iidiro dopa ta iiaa mua. ⁵² Mua ñecu sumará árîpehrerâ Goâmu ya weremuhtanirâre ñero iññuma. Erâ Goâmu yare weremuhtanirâpu “Puhru õagu Goâmu yare weremuhtagu arigucumi,” arî erâ wererâ árîcũ peeñuma mua ñecu sumará mura. Eropa arî werenirâ murare wejêmuriñuma. Eropirâ “Õagu,” erâ arîgure mua sã dohpaguere ïgu ya curu majarâ árîquererâ ta ïgure wejêabu. ⁵³ Goâmu dorerire anyuapu wereriñuma muare. Eropirâ mua iri dorerire opariyoro. Eropirâ iri dorerire tarinugabu mua, arî wereniguitupu pare Esteban.

Erâ Estebanre utâyeri mera dea wejêñorâ

⁵⁴ ïgu eroparicũ peerâ erâpu burigã guañorâ. Eropa turaro guarâ, guhyarâ wañorâ. ⁵⁵ Erâ eropa guaquererã ta ïgu Espiritu Santo ïgu dorero dopa ta iipehogu árîgu, ïgu turarire õaro opagu árîgu, umarogue ïhamemuju Goâmu gosesiririre ïapu Esteban. Jesu Goâmu diayerpu ïgu niguicũ ïapu ïgu. ⁵⁶ Eropa ïagu õpa arîpu

—Õmarogue merogã ero tuweamaacũ Jesu Goâmu obeodigu Goâmu diayerpu ïgu niguicũ ïhaa yuhu, arîpu Esteban.

⁵⁷ ïgu eroparicũ peerâ ta erâ burigã gaguinigi, erâ gamirire bihacã, yujuro mera ïgu pohrogue omagã, ïgure ñeañorâ. ⁵⁸ Ñehatuhaja, ïgure

aĩgã, iri maca turo pohrogue cóãñorã ĩgure. Eropirã utãyeri mera dea wejẽcañorã erã ĩgure. Erã eropa wejẽboro core ĩgure utãyeri mera deamorã erã weca maja suhrĩre tuwea, mamũre Saulo waĩcũgure iri suhrĩre opabasadoreñorã erã.

⁵⁹ Eropĩgũ Esteban erã ĩgure utãyeri mera dea wejẽrisubu õpa arĩpũ.

—Jesu yũ Opũ, yũ sĩporãre aĩque, arĩpu.

⁶⁰ Eropĩgũ ĩgũ mereja õpa arĩpũ:

—Opũ Jesu, oã dohpague ñero erã yare iirire erãre dipuwaja moabita muhu, arĩpu Esteban.

Eropa arĩtuhajagũ ta sĩria wapũ ĩgu.

8

¹ Eropĩgũ Esteban ĩgu sĩricũ ĩagũ, “Õhaa,” arĩpũ Saulo.

Saulopũ Jesu yarãre ñero iipũ

Eropirã irinũre ta Jesu yarãre Jerusalẽngue árĩrãre ñero iinũgañorã Jesure gamebirãpũ. Erã eropa ñero iicũ Jesu yarã Judea yebague, Samaria yebague yoarogue duhrisirigã wañorã. Jesu ĩgu apinirã dihta wabirĩñorã.

² Eropirã gajirã Goãmũre umupeorã Esteban dupũ mumarore yaa, burigã oreñorã erã. ³ Saulopũ Jesu yarãre ñetariaro iimũriripũ. ĩgu erã ya wĩngue ñaja, amare, nomere ñeha, ñesugue bihadobomũripũ.

Samariague Jesu yare buhepũ Felipe

⁴ Eropirã yoarogue wasirinirã Jesu yarãpũ Jesu yare buheñorã. ⁵ Eropĩgũ Felipe Samaria waĩcũri macague eja, Jesu yare buhepũ iri maca majarãre.

⁶ ĩgu eropa buhecũ ero majarã õaro peeñorã. Eropirã Goãmũ turari mera deyro moarire ĩgu ii ihmucũ ãañorã erã. Eropa ĩarã ĩgure õaro peeñorã erã. ⁷ Bajarã watẽa ñajasũnirãre ĩgu pohro erã eracũ ĩagũ watẽapũre wadorepũ ĩgu. Watẽapũ burigã gaguĩguĩ, duhugã waha wañorã erãre. Eropĩgũ bajarã dupũ buhanirãre, curimasibirãre dupũ õarã iimũripũ.

⁸ ĩgu eropa iicũ ĩarã iri maca majarã bajarã masa mucubirĩñorã.

⁹ Irisubure Simo waĩcũgũ iri maca majagũ yee arĩpũ, Eropĩgũ yeea erã iirare ii ihmumũripũ Samaria majarãre. ĩgu eropa ii ihmucũ ero majarã ĩha uca wa ĩgure guhyadiaro mera ĩarã árĩñorã.

—Yũhu masipehogũ ahraa, arĩpũ Simopũ erãre.

¹⁰ ĩgu eropa iicũ ĩarã masapũ õpa arĩmũrirĩñorã:

—Ihĩ Goãmũ ya turari opagũ ahrimi. Goãmũ iro dopa turagũ ahrimi, arĩmũrirĩñorã masa erã oparã mera. Erã arĩpehrerã õaro peeñorã ĩgure.

¹¹ ĩgu yeea erã iiri ĩgu purisiriri mera yoari boje ii ihmumũripũ erãre. ĩgu eropa ii ihmucũ ĩarã erã uca wamũriñorã. Eropirã erã ĩgure umupeomũriñorã. ¹² Felipepũ erã ĩgure eropa umupeoquerecũ Goãmũ ĩgu opũ árĩrĩre, Jesucristo yare õari buherire werepũ. ĩgu eropa werecũ erã ĩgure õaro peeñorã. Erã eropa õaro peecũ ĩagũ ũma, nome mera waĩyepũ Felipe. ¹³ Eropĩgũ Simo ĩgu yee sã Felipe õaro peepũ. Eropĩgũ ĩgu sãre waĩyepũ. ĩgu eropa iira pũhrũ Felipe mera dujapũ ĩgu. Felipepũ Goãmũ turari mera ii ihmucũ ĩagũ, dorecurã õarã ĩgu iicũ ĩagũ Simo ĩha uca wamũripũ.

¹⁴ Eropirã Samaria majarã Goãmũ yare erã burigã gamecũ pee-beomũriñorã Jerusalẽngue árĩrã Jesu ĩgu apinirãpũ. Erã eropa peebeorã Pedrone, Ñu sãre obeoñorã Samariague. ¹⁵ Erogue erã ejara pũhrũ Pedro

sã Goãmure serēbasañorã. “Oã Samaria majarã mure umupeorã mu Espiritu Santore opaporo,” arĩ, serēbasañorã erã Goãmure. ¹⁶ Erã Samaria majarã Jesucristo waĩ mera waĩyesũnirã árĩñorã. Iri dihtare masiñorã erã. Eropirã Espiritu Santore opabiriniñorã dohpa. ¹⁷ Eropigu Pedro Ñu mera Samaria majarãre erã mojtotorire erã weca duhpeora puhru Espiritu Santore opanuñorã erã.

¹⁸ Eropigu Pedro sã erã ya mojtotori mera erã duhpeora puhru Espiritu Santo eracũ ãapu Simo yeepu. Eropa ãagu árĩgu, erã turarire gamegu niyeru mera wajayediariapu. ¹⁹ Ōpa arĩriapu Simo:

—Yu sãre oque i turarire. Yu sã yu mojtotori mera masa weca duhpeodiaca Espiritu Santore erã ñeaboro dopa. Eropigu i yu iiburi wajare wajayediaa, arĩriapu Simo erãre.

²⁰ Īgu eroparĩcũ peegu Pedro ōpa arĩpu.

—Mu niyeru mera Goãmu ya turarire mu asũdiara waja mu niyeru mera ta peamegue waque muhu. ²¹ Goãmu mu pepirire masimi. Muhu ñegu árĩnia. Eropirgu ire gua iirire iimasibea muhu. I mu iirino árĩbeaa. ²²⁻²³ Burigã peyocua muhu. Eropigu mu ñeri iirire ne duhumasibea muhu. Eropigu ire muhu ñero iirare bujawereque muhu. Goãmure mu ñero pepirire ero diaye ta serēque muhu. Muhu eropa iicũ ãagu ĩgu mu ñerire cãdijibocumi, arĩ werepu Pedro ĩgure.

²⁴ Īgu eroparĩcũ peegu Simo yuhripu ĩgure.

—Yure serēbasaque mua Goãmure mu arĩdiro dopa yu wabiriboro dopa. Iri waja peamegue wadiabeaa yuhu, arĩpu Simo ĩgure.

²⁵ Ero puhru Pedro Ñu mera Goãmu yare wereñorã. “Jesu ĩgu masa muriacũ ãabu gua,” arĩ, Samaria yeba árĩri macari majarãre ōari buherire buheñorã. Erãre Goãmu yare buhetuhaja Jerusalēgue dujaa wañorã.

Felipe Etiopía yeba majagure buhepu

²⁶ Eropii Goãmu ĩgu obeodigu anyu Felipere werepu:

—Dohpaguere ōdoca surgue waque. Jerusalén pohro árĩri mague Gazague warĩ mague waque, arĩ werepu anyu Felipere. Iri maha masa marirogue árĩyoro.

²⁷ Īgu eroparĩcũ peegu ĩgupu iri mague waha wapu. Puhru iri mague yujugu masare bocatĩribu iipu. Īgu bocatĩribu árĩpu Etiopía yeba majagu opu. Eropigu Candace waĩcugo Etiopía majago opo buro yare niyerure árĩpeherrerire ñhadibugu árĩpu. Eropigu ĩgu Jerusalēgue mari Pagure umupeogu ejadi árĩpu. ²⁸ Īgu ya macague tũrudiru mera dujaagu irirugue waqueregu ta buhegu iipu. Goãmu yare weremãhtadigu Isaia ĩgu gojarapũre buhegu iipu.

²⁹ Eropigu Espiritupu Felipere ōpa arĩ werepu.

—Sihĩ tũrudirugue wagu pohrogue waque, arĩpu Espiritu Santo ĩgure.

³⁰ Īgu eroparĩcũ peegu, Felipepu tũrudiru pohrogue omagã, Isaia ĩgu gojarare Etiopía majagu ĩgu buhecũ peepu. Eropa peegu Felipe serēpiapu ĩgure.

—¿Mu buherire masiri muhu? arĩpu ĩgu.

³¹ Īgu eroparĩcũ peegu Etiopía majagu ōpa arĩ yuhripu:

—Gajigu yure weretaugu maricũ ōaro masibea yuhu. Ohõ yare weredoagu ariqwe yuhu dipaba, arĩ yuhripu ĩgu Felipere.

—Áu, arĩ, dojapu ĩgu pohro. ³² Eropii Goãmu yare Etiopía majagu ĩgu buheripũ ōpa árĩyoro:

Ovejare erã ñeha wejẽdiro dopa ta ïgu sãre ñeha wejẽrãcoma masa. Eropigu ovejagãre ïgu poare erã seacũ ïgu gaguiniguibiro dopa ta ïgu masu sã ejari mariro árĩgucumi. ³³ ïgure erã wereyarãcoma. Eropirã ïgu ïgu ñero iibiriqerrecũ ta erãpũ ñero iirãcoma ïgure. ïgu i yebague ïgu árĩcũ erã ïgure wejẽrãcoma. Eropigu ïgu porã marigu sãria wagucumi, arĩ gojara árĩyoro.

³⁴ Iripũ eroparĩcũ ïagu, Etiopía majagu Felipere serẽpipũ:

—Wereque yure. ¿Opa Isaia ïgu arĩgu nihino arĩcuri ihĩ? ¿Isaia ïgu basi weregu iicuri? ¿O gajĩgure weregu iicuri? arĩ serẽpipũ Etiopía majagu.

³⁵ ïgu eropa serẽpi ïacũ peegu Felipe iripũre ïha, Jesu yare werepũ Etiopía majagure. ³⁶ Eropirã erã iriru mera waha, maugãgue ejañorã.

—Ïaque. Ohõ maugã áhraa. I maugãgue yure waĩyegue, arĩpũ Etiopía majagu.

³⁷ —Jesure muhu ðaro umupeocũ ïagu mure waĩyegura, arĩpũ Felipe ïgure.

—Jesure umupeoa yuhu. ïgu Cristo Goãmu magu áhrimi. Irire ðaro masia yuhu, arĩpũ Etiopía majagu.

³⁸ Eropa arĩgu ta ïgu tũrudiru autugure yaudorepũ. Iriru yusumerejara puhru wiriañorã erã. Wiria waha, iriyagãgue eja, ñumu wiri nugajañorã. Ero ñumunugaja, Felipepũ ïgure waĩyerũ. ³⁹ Waĩyetuhaja erã majajanugajacũ Goãmu ïgu Espĩritu Felipere aĩgã warũ. ïgu eropa wara puhru Etiopía majagu ðaro mucubirigu ïgu ya yebague dujaa warũ. ïgu eropa iira ujutuyacũ ne dipaturi Felipere ïabiripũ. ⁴⁰ Felipepũ eropa iituhaja Azotogue ejapũ. Eropigu baja macarire ðari buherire buherũ masare. Pũ Cesareague buhetumaripũ.

9

Saulo Jesucristore ïagu ïgure umupeonugaru

¹ Irisubure Saulo Jesu yarãre ïhaturigu, “Erãre wejẽgura,” arĩgu, ïgu opu pohrogue warũ. ² Erogue ejagu ïgu gojarapũrire serẽpũ pahia opure. Opa arĩpũ:

—Damasco maca maja wirigue mari buheri wirigue Jesu yarãre, umare, nomere yuhu erãre bocaja, ñeha dihri, Jerusalengue aĩgãrigura. Iri wirigue árĩrãre yu erãre ñeaburipũre paperapũre yure goja oque, arĩ serẽpũ pahia opure.

³ Iripũre aĩtuhaja, waha, ïgu Damasco pohro ïgu ejabu iicũ gohra umaro maja gosesiri medijuyoro ïgure. ⁴ Eropa gosesiri medijucũ ta ïgu yebague mehmerejagu, wereniguicũ peerpũ.

—Saulo, Saulo, ¿duhpigu muhu yure ñero iiri? arĩro cariyoro.

⁵ —Opũ, ¿nihino áhriri muhu? arĩpũ Saulo.

—Yuhu mu ñero iigu ta áhraa arĩpũ Jesu. Muhu yu mera guagu yure yuhribigu, mu basi ta ñero tariaa, arĩpũ Jesu Saulore.

⁶ ïgu eroparĩcũ Saulo güiri mera naragãnjagu ða serẽpipũ:

—Opũ, ¿dohpa yuhu iicũ gahmeri muhu? arĩpũ Saulo.

ïgu eroparĩcũ ða arĩpũ Jesu ïgure:

—Wahgãnugajaque muhu. Macague waque. Iri macague ejacũ ero majagu mu iiburire weregucumi mure, arĩpũ Jesu Saulore.

7 Īḡu eroparīcū Saulo mera majarāpū ĩḡu wereniguiuri dihtare peeñorā. Jesupure ĩabiriñorā. Īḡu eropa wacū ĩarā güirā erā wereniguimasi-biriñorā. 8 Eropiḡu Saulo yebague oyadigū wahḡānugaja, ĩḡu ĩacū ĩḡu cuiři deyobiriŷoro. Eropirā erā ĩḡu moŷotore ñeha, Damascogue tuā wahḡa wañorā erā ĩḡure. 9 Eropiḡu ĩḡu uñrenū gohra ne ĩabiri, babiri, ne ĩhribiriḡu.

10 Eropii Jesu ĩḡu buheḡu Ananía waĩcuḡu Damasco árīpū. Eropiḡu Jesu dehyoapū Ananiare. Eropa dehyoagū piyupū ĩḡure:

—Ananía, ¿āhriri? arīpū Jesu ĩḡure.

—Āhraa yū, arī yuhriḡu Ananía ĩḡure.

11 Īḡu eroparīcū Jesu ĩḡure wereḡu.

—Diaye waĩcūri mague waque. Eropa wagū Juda ya wihigue Tarso majagure Saulo waĩcuḡure amaque. Īḡu Goāmure serēnigiḡu iicumī.

12 Eropiḡu quēro dopa ta ĩḡu ĩarare ĩagū iicumī eroguere. Ōpa árīrire ĩagū iicumī. Muḡu mu moŷotore ĩḡu weca duhpeo, ĩḡu cuiři ōaro wacū ĩagū iicumī ĩḡure dehyoarare, arīpū Jesu Ananiare.

13 Īḡu eroparīcū peeḡu Ananiapū ōpa arīpū:

—Opū, ĩḡu mu yarāre ōarāre Jerusalén majarāre ñero iiapū. Bajarā masa yure eropa arī wereama. 14 Eropiḡu ōre ĩḡu árīpehrerā mure umupeorāre peresu iḡu arigū iiapū. Pahia oparā ĩḡure eropa iidoreañorā, arīpū Ananía Jesure.

15 Īḡu eropa arīquerecū Jesupū wereḡu ĩḡure.

—Īḡu Saulopū yū beyedigū āhrimi. Īḡu yaha buherire baja macari majarāre, oparāre, Israe masa sāre buheḡucumi. 16 Eropiḡu bajasuburi yahare ĩḡu buheri waja ĩḡu ñero tarigucumi. Irire ĩḡure masicū iigura. Eropiḡu waque muḡu, arīpū Jesu Ananiare.

17 Īḡu eropa arīra pūhrū Ananiapū, waha eja, Saulo ĩḡu árīri wihigue ñaja wapū. Ñajaja, ĩḡu moŷotore Saulo weca duhpeo, wereḡu ĩḡure:

—Acawereḡu Saulo, mari Opū Jesupū mague mure dehyoadigū yure oboami mu cuiři mu ĩaboro dopa. Espiritu Santore mu opaboro dopa, ĩḡu dorediro dopa mu ĩaboro dopa yure oboami mu pohrogue, arī wereḡu Ananía Saulore.

18 Īḡu eroparīcū ta ĩḡu cuirire wai nuturi dopa bejarire ĩḡu cuirire cohrodijacū ĩapū pare Saulo. Īḡu eropa ĩatuhara pūhrū ĩḡu wahḡānugajacū gajigupū waĩyepū ĩḡure. 19 Eropiḡu ĩḡu, ĩḡu bara pūhrū turagū wapū.

Saulo Damascogue Jesu yare buhenugapū

Eropii bajamenuri Damascogue Jesu yarā mera árīmariḡu Saulo. 20 Eropiḡu irisubure ta ĩḡu judio masa buheri wiri árīḡu, Jesu yare buheḡu masare. “Jesu Goāmu magū ta āhrimi,” arī wereḡu Saulo. 21 Īḡu eropa werecū ĩarā árīpehrerā ĩḡure peerā uca wañorā.

—Ihī Goāmu yarāre Jesure umupeorāre ñero iidigū āhrimi. Eropiḡu ĩḡu erāre ñeha, dihiri, pahia oparāre odiadigū árīrimi. Eropiidiagū ōguere aridigū árīrimi, arīñorā masa ĩḡure peerā.

22 Erā eroparīquerecū Saulo güiro mariro turaro mera buhenugapū. Judio masare Damasco majarāre ōaro wereḡu. “Ihī Jesu diaye ta Cristo marire taubu āhrimi,” ĩḡu arī werecū erāpū ĩḡure “Ḡayagū iimi ihī,” arīmasibiriñorā ĩḡure.

Saulo duhri wahgāpū judio masare

²³ Eropirā bajanūri puhru judio masa ĩgure wejēdiañorā. Eropirā erā basi gamenere ĩgure erā wejēburire wereniguiñorā. ²⁴ Eropirā ĩgure wejēdiarā, iri maca maja disiporore umare ñami säre coremuriñorā. Saulo wiricū ĩha wejēmorā coreñorā. Erā eropa wejēdiaquerecū Saulo erā wejēdiarire masipū ĩgū mera majarā mera. ²⁵ Eropirā ñamigie Saulo buherā ĩgure puibu wuari puibu mera aĩsā, iri maca maja sāriro purupugue duhudijucāñorā ĩgure.

Saulo Jerusalén árĩpū

²⁶ Eropigū Saulo Jerusaléngue ejagu, erogue Jesu yarā mera ĩgu árĩdiaripū. ĩgu eropa árĩdiacū erā ĩgure “Jesure umupeogu árĩbeami ihĩ,” arĩñorā. ĩgure güi arĩñorā. ²⁷ Erā eropa güiquerecū ta Bernabépu ĩgure aĩgāpū Jesu ĩgu apinirā pohrogue. Eropigū Saulo mague Jesure ĩgu ĩarare, Jesu mera ĩgu wereniguirare, Damascogue güiro mariro Jesu yare ĩgu buhenugarare werepū Bernabépu. ²⁸ ĩgu eropa werera puhru Saulo erā mera ñajagu, Jerusaléngue erā mera árĩmuriñorā. ²⁹ Eropigū ĩgu güiro mariro Jesu yare buhepū. Eropigū ĩgu judio masare Jesu yare weretarinugagu iipū. Erā judio masa griego masa ya wereniguirā árĩñorā. Eropirā Saulo ĩgu eropa weretarinugari waja ĩgure wejēdiañorā. ³⁰ Erā eropa wejēdiacū ĩarā, Saulo mera majarā Jesu yarāpū ĩgure Cesareague aĩduhriğā waha wañorā. Erogue ĩgure sihu árĩniguiari Tarsogue oboeñorā erā ĩgure.

³¹ Eropi árĩpehrerogue Judea yebague, Galilea yebague, Samaria yebague Goāmū yarā ðaro árĩmuriñorā. Irisubure ne masa ñero ĩbirimuriñorā erāre. Eropirā ðaro buheñorā erā. Eropirā erā Goāmure guhyadiaro ĩañorā. Espĩritu Santo erāre ĩgu itamucū erāpū Jesure umupeorā bajarā wañorā.

Pedro Eneare ðagu wacū iipū

³² Eropii Pedro árĩpehreri macarigue wagu, Jesu yarā Lida majarā pohrogue säre ejañu ĩgu. ³³ Erogue ejagu Enea waĩcugure bocajapū. Enea ðupū buhadigu árĩgu, ocho bojori gohra erā pütāpidi oyamuriñorā.

³⁴ Eropigū Pedropū ĩgure ðpa arĩpū:

—Enea, Jesucristo ðagu árĩcū ĩimi mure. Wahgānugajaque. Mure pütāpira gasirore amuque, arĩpū Pedro ĩgure.

ĩgu eroparĩcū ta ĩgu wahgānugaja waha wapu. ³⁵ Eropirā árĩpehrerā Lida majarā, Sarón majarā ĩgure ĩarā, erā erā ñeri iirare duhu, Jesure umupeonugañorā.

Dorca waĩcugore masupū Pedro Jesu turari mera

³⁶ Eropii Jope waĩcūri macague Jesure umupeogo Tabita waĩcūgo árĩpo. Igo waĩ Tabita griego ya wereniguiari mera Dorca āhraa. Igo ðarire ĩgo baja omuriñorā masare. ³⁷ Eropigo irisubure igo dorecū wahgū, sĩaia wamuriñorā. Igo sĩricū ĩarā, erā igo ðupū murarore ðaro coe, umaro maja taribugue apiñorā igore. ³⁸ Lida waĩcūri maca Jope pohrogue árĩyoro. Ero eropa árĩcū Jesure umupeorā Jope maca majarā Pedro Lidague ĩgu árĩcū peebeñorā. Eropa peebeorā perā umare oboeñorā Pedro pohrogue. ĩgu pohrogue ejarā wereñorā Pedrorer erā.

—Yojarō mera waque gua árĩrogue, arĩ wereñorā erā.

³⁹ Erã eroparicũ peegu erã mera waha wapu ïgu. Erogue ïgure erã aĩ ejara puhru umaro maja taribugue sīridigo pohro aĩmuriã wañorã ïgure. Pedro áricũ ïha áripehrerã wapeweyarã nome orerã ïgu pohro ejanugamuriñorã. Tabita erã mera árinigogue baja suhrire iibasamuripo. Eropirã erã igo eabasara suhri murare ihmũñorã Pedrorẽ. ⁴⁰ Pedro erãre iri taribugue árirãre wiriadorepu. Erã wiriara puhru ïgu mereja, Goãmure igore serēbasapu. Eropigu igo dũpu murarore maji ïha,
—Tabita, wahgãque, arĩpu ïgu.

Ïgu eroparicũ ta igopu ïha wahgũ, Pedrorẽ ïha, wahgã doajapo. ⁴¹ Igo eropa wahgã doajacũ ïha, ïgu igo mojtore ñeha tarawahgũ nugupu igore. Eropigu ïgu ero majarãre Jesu yarãre, wapeweyarãre sihubeo, igore ojocarigore wiapu erãre. ⁴² Ïgu eropa iira puhru áripehrerã Jope majarã irire masirã bajarã masa Jesure umupeonugañorã. ⁴³ Puhru Jopegue Simo waimurã gasirire amugu mera bajanuri Pedro ïgu mera áripu.

10

Pedro Corneliore Jesu yare werenugapu

¹ Irisubure Cesareague Cornelio waĩcugu árigu. Ïgu cien surara opu áripu. Erã surarapu erã ya curu Italiano waĩcuyo ro. ² Cornelio ïgu ya wihi majarã mera mari Pagure umupeorã, guhyadiaro ïarã áriñorã. Eropigu ïgu judio masa mojomorocũrãre itamugu baja gajinore omuripu. Eropigu ïgu umuri nucu mari Pagure serēmuripu. ³ Eropiĩ ñamicague tres áricũgue Goãmu yagu anyu ïgure dehyoapu. Eropa dehyoagu Cornelio pohrogue ñajajapu.

—Cornelio, arĩ piyupu anyu ïgure. ⁴ Eropigu Cornelio ïgure ïha güigu õpa arĩpu:

—Opu, ¿ñehenore gahmeri? arĩpu ïgu.

—Masare mu orare, mari Pagure mu serēniguirare Goãmu peemi.

⁵ Eropigu Jopegue mu umare obeoque. Erogue Simo Pedro waĩcugu áhrimi. Ïgure aĩgãridoreque mu umare. ⁶ Ïgu gajigu Simo waimurã gasiri amugu pohro, wuuriya turo áriĩri wihi ta áhrimi, arĩpu anyu Corneliore.

⁷ Anyu eropa arĩtuhaja, wiria waha wapu. Ïgu wiriara puhru Cornelio perãre ïgure itamurãre yujugu ïgu surara mera majagure sihupu. Surarapu Goãmure umupeogu árigu, umuri nucu Corneliore itamudigu áripu. ⁸ Eropigu Cornelio erãre werepeho, Jopegue obeopu erãre.

⁹ Eropi gajinu Jopegue erã warisubu goeri boje gohra áricũ Pedropu wihi wecague Goãmure serēgu wapu. ¹⁰ Eropigu ïgure oa pũricũ badiapu. Eropigu gajirã barire erã moarisubu ïgupu dehyoacũ ïapu. ¹¹ ðmarore pãrimaacũ, wuuri gasiro wapicurisubu pepuri ojogorori dirira gasiro dijericũ ïapu. ¹² Iri gasiro pohecague bajarã waimurã nugũ majarã, yebague paha curirã, mirimagu porã majarã áriñorã. ¹³ Irire ïgu ïara puhru, Pedrorẽ wereniguiro caricũ peepu.

—Pedro, wahgãnugajaque. Oãre wejẽ baque, arĩro cariyoro ïgure.

¹⁴ Ïgu eroparicũ peequeregu ta Pedro õpa arĩpu:

—Opu, ne erãre babeaa yuhu. Ñerãre, Goãmu ïgu badorebirinirãre ne babirimurabu yuhu, arĩpu Pedro.

¹⁵ Eropigu Pedro dipaturi wereniguiro caricũ peepu.

—Goãmu, “Oãrã áhrima,” ïgu arĩnirãre “Ñerã áhrima,” arĩbiricãque muhu erãre, arĩro cariyoro Pedrorẽ.

16 Eropii ʔhresubu eropa arī wereniguirā pʔhrū iri gasiro ʔmarogue mʔria wayoro daja. 17 Eropigu Pedro bʔrigā guña “¿Dohpa arīdiari iiri yʔre eropa dehyoaro?” arī pepipʔ īgu īgu basi. Īgu eropa pepirisubu Cornelio ʔma īgu obeonirāpʔ Pedro ya wihigue ejañorā. “¿Simo ya wihi nohogue āhriri?” arī, erā serēpira pʔhrū īgu ya wihigue ejañorā erā. 18 Eropirā erā serē īha purumuñorā. “¿Simo Pedro waicʔgu i wihire āhriri?” arī serēpi ñañorā erā.

19 Eropigu Pedro īgu pepirisubu Espiritu Santo īgure werepʔ:

—Īaque. ʔrerā ʔma mʔre amarā iima. 20 Wahgānʔgajaque. Dijaque. Erā mera waque. “¿Dohparīri?” arī pepibigu ta waque ʔaro mera. Yʔpʔ erāre ʔguere obeobʔ, arīpʔ Espiritu Santo Pedroe.

21 Īgu eroparīcū peegu Pedro erā pohrogue dija wa,

—Īaque. Ohō āhraa yʔhū mʔa amagārigʔ. ¿Duhpirā arirā iiri mʔa yʔ pohro arirā? arīpʔ Pedro erāre.

22 Īgu eroparīcū ta erāpʔ ʔpa arīñorā.

—Cornelio cien surara opʔ, ʔarire iigu, mari Pagure gʔhyadiaro mera umupeogu, árīpehrērā judio masa “Ōagu” erā arīgu mʔre sihgāridoregʔ obeoami guare. Goāmʔ ʔagu anyu Cornelio mʔre sihudoreapʔ. Ōpa arāpʔ: “Pedroe mʔa ya wihigue aīgāridoreque mʔ ʔmare. Eropii īgu mʔre weregʔcumi,” arī, sihudoreapʔ anyu Cornelio, arī wereñorā Cornelio Pedroe īgu sihudorenirāpʔ.

23 Erā eroparīcū Pedropʔ erāre ñajaridore, bari oho, īgu ya wihigue carīdorepʔ erāre. Eropigu gajinʔ Pedro wahgā, erā mera waha wapʔ. Eropirā gajirā Cristo yarā Jope majarā Pedroe wapicʔgāñorā.

24 Gajinʔ erā Cesareague ejañorā. Eropigu Cornelio pʔ īgu acawererāre, īgu mera majarā sāre sihu gameneo, Pedroe corepʔ. 25 Eropigu Pedro Cornelio ya wihi pohrogue īgu aricū ñagu Cornelio pʔ īgure bocatīri wiria, īgu guburi pohro merejapʔ. 26 Īgu eropa iicū Pedropʔ īgure aī wahgūnugupʔ.

—Niguique mʔhū. Yʔ sā mʔ iro dopa ta arīgu āhraa. Goāmʔ árībeaa, arīpʔ Pedro īgure.

27 Īgu eropa arītuhajara pʔhrū Cornelio īgure aīñaja wapʔ īgu ya wihigue. Erogue ñajajagu masa bajarā iri wihigue gamenere īgure corerāre ĩapʔ Pedro. 28 Eropigu Pedro erāre werepʔ:

—Judio masu árīqueregʔ ta gajī curu majarā mera arīgu gua dorerire tarīnʔgagu iiaa yʔhū. Irire ʔaro masia mʔa. Eropigu gajī curu majarāre “Ñerā āhrima,” arīdorebirami Goāmʔ. Ōpa arī wereami īgu yʔre. 29 Īgu eroparīcū peegu ʔguere mʔa pohroguere ahrabʔ. Mʔa yʔre sihubecū “Ne wasome,” arībirabʔ. ¿Dohpa árīronore yʔhū ʔgue aricū gahmeari mʔa? arīpʔ Pedro erāre.

30 Īgu eroparīcū peegu Cornelio pʔ ʔpa arīpʔ:

—Tres arīcū i horano gohra ta mari Pagu yagu anyu yʔre dehyoami. Wapicurinʔ wahaa īgu yʔre dehyoara pʔhrū. Īrinʔ ta mari Pagure yʔ serēniguirisubu cuimijuri suhricʔgu yʔ pohro dehyonʔgajami. 31 Eropigu īgu yʔre ʔpa arāmi: “Cornelio, mʔhū mari Pagu mera mʔa serēcū īgu peami. Eropigu mojomorocurāre erā gamerire mʔ ocū ñagu mari Pagu mʔ mera mucubirigu itamugʔcumi. 32 Eropigu Jopegue mʔ ʔmare obeoque Simo Pedro waicʔgure mʔ pohrogue erā aīgāricū. Īgu gajigu Simo waimarā gasiri amugu ya wihi, wʔariya turo pohro arīri wihi āhrimi

Īgu. Īgu ma pohro eragu mare weregucumi,” arī wereami Īgu yare. ³³ Īgu eroparīcū peegu yu umare mare aīgāridoregu obeoabu yuhu. Eropīgu ōaro iigu ahraya muhu gua pohroguere. Eropirā gua ārīpehrerā ōre mari Pagu Īgu ĩhabeoro ārīrā iiaa gua. Ārīpehrerire mari Pagu Goāmu mare ĩgu weredorera peediarā, cohreabu gua, arīpu Cornelio Pedrore.

Pedro Jesu yare werepu Cornelio ya wihi majarāre

³⁴ Īgu eroparīcū peegu, Pedro ōpa arī werepu:

—Dohpague masia pare. Diaye ta āhraa. Goāmu yujuropa ta ōaro iimi marire. ³⁵ Eropīgu ārīpehreri macari majarā Goāmure guhyadiaro erā ĩacū, ōarire erā ĩicū, Goāmuru erāre mucubirimi. ³⁶ Goāmu gua judio masa pohro Jesucristore obeomi. Masa Goāmu mera ōaro erā ārīboro dopa Jesupu ōari buherire weremi. Iri buherire mua masia. Jesucristopu ārīpehrerā masa opu āhrimi. ³⁷ Ūu waīyegu “Mua űerire bujawereque. Eropirā waīyenirā ārīque,” masare ĩgu eropa arī werera puhru Galileague ōari buherire Jesupu werenugami. Puhru Judea yebague iri buherire werepohomi. ³⁸ ĩhĭ Jesu Nazare majagure Goāmuru ĩgu turarire, Espiritu Santo mera ĩgu iimasiburire odi ārīmi Jesure. Eropīgu Jesu ōaro iigu wami. Eropa wagu watēa űajasūnirāre, űero tarirāre, ārīpehrerāre ōarā wacū iimi. Mari Pagu Jesu mera ārīdi ārīmi. ³⁹ Judea yeba, Jerusalén sāre ārīpehreri ĩgu ĩirare gua ĩabu. Puhru erā crusague pabia wejēma ĩgure. ⁴⁰ Eropīgu uhrenu waboro Goāmu ĩgure masudi ārīmi. Eropīgu Jesure ĩgu masura puhru gajirāre dehyoacū ĩidigu ārīmi mari Pagu. ⁴¹ ĩrisubu Jesure ārīpehrerā ĩabirima. Guare bajamerāgāre dehyoami. Mari Pagu ĩgu gamerāre, Jesure ĩamorāre iribojegue Goāmu guare beyepu. Guapu Jesu ĩgu sīridi masara puhru ĩgu mera baha, ĩhribu. ⁴² Eropīgu ĩgu guare doremi ōpa arīgu: “Masare wereque. Yuhu Jesu ārīpehrerā ojocarirāre, sīrinirāre erāre dipuwaja moabu yu ārīcū ĩiami yare Goāmu. Eropirā ĩrere wereque,” arī doremi Jesu guare. ⁴³ Ārīpehrerā Jesure erā umupeocū ĩagu Goāmu erā űerire cādijigucumi. ĩrere ārīpehrerā Goāmu ya weremuhtanirā iribojegue majarā wereyuűuma, arī werepu Pedro.

Judio masa ārībirā Espiritu Santore opanugaűorā

⁴⁴ ĩri ārīpehrerire ĩgu eropa arī wererisubu, ārīpehrerā ĩrere peerā mera Espiritu Santo ārīnugamuripu. ⁴⁵⁻⁴⁶ Eropirā erā judio masa ārībirā peeyamariri wereniguiiri mera mucubiriri mera wereniguinugaűorā. Erā ya wereniguiiri mera “Goāmu turagu, ōagu āhrimi”, arīrā ĩiűorā. Erā eroparīcū peepu Pedro ĩgu acawererā judio masa mera. Eropirā Espiritu Santo judio masa ārībirā mera ĩgu ārīnugacū ĩarā judio masapu uca waűorā. Eropīgu Pedro ōpa arī werepu judio masare:

⁴⁷ —Mari iro dopa ta Espiritu Santore opama oā sā. Erā eropa opacū ĩarā oāre waīyedoremasia mari, arīpu Pedro erāre.

⁴⁸ Eropa arĭtuhaja Jesu waĭ mera judio masa ārībirāre waīyedorepu Pedro. Ērā eroĭira puhru “Gua mera bajamenarigā dujanique,” arĭűorā erā Pedro sāre.

11

Pedro Jerusalén majarāre Jesu yarāre werepu

¹ Eropĭi judio masa ārībirā sā Goāmu yare erā ōaro gamecū Jesu ĩgu apĭnirāpu erā acawererā Judeague ārīrā mera peebeoűorā. ² Eropirā

Pedro Jerusaléngue ïgu dujajacũ ïarã judio masa Jesu yarã bajamerãgã ïgure ôpa arĩñorã: ³ —¿Judio masa árĩbirã pohro duhpigu ejari muhu? ¿Dohpa árironore erã mera bahari muhu? arĩ turiñorã erã Pedrore.

⁴ Erã eroparicũ peegu Pedro ïgu iirare werepohpu erãre. ⁵ Ôpa arĩ werepu:

—Yuhu Jopegue árĩgu Goãmure serẽgu iibu. Eropigu yare ôpa dehyoabu. Yuhu ïacũ wuari gasiro wapicarisubu pepuri dirira gasiro umarogue yu pohrogue dijaricũ ïabu. ⁶ Eropigu iri gasirore ôaro ïabu “¿Ñeheno iri gasiroguere áhriri?” arĩbu. Eropigu ïabu iri gasiroguere árĩrãre. Waimurã nuğu majarãre, yebague paha curirãre, mirimagu porã majarãre ïabu. ⁷ Eropigu Goãmu ïgu yare wereniguirire peebu. “Pedro, wahgãnugaque. Wejẽ baque oãre,” arĩgu carimi yare. ⁸ ïgu eroparicũ peegu ôpa arĩbu yuhu. “Opu, ne erãre babeaa yuhu. Ñerãre Goãmu badorebirinirãre ne babirimurabu yuhu,” arĩbu yupu. ⁹ Eropigu umarogue yare dipaturi wereniguigu carimi daja. “Goãmu ïgu ‘Ôarã áhrima,’ ïgu arĩrãre ‘Ñerã áhrima,’ arĩbiricãque muhu,” arĩgu carimi yare. ¹⁰ Eropigu uhresubu ïgu eropa arĩ wereniguira puhru iri gasiro dipaturi maria wabu daja. ¹¹ Yu eropa ïarisubu ta urerã uma gua árĩri wihigue ejanirã árĩma. Erã Cesarea majagu ïgu obeonirã árĩnirã árĩma. ¹² Eropigu Espiritu Santopu yare erã mera wadoregu “‘Erã ñerã áhrima,’ arĩbiricãque erãre,” arĩ weremi ïgu yare. Eropirã oã seis mera yu acawererã mera Cesarea majagu ya wihigue ñajajabu gua. ¹³ Eropigu ïgu guare ôpa arĩ weremi. “Anyu yaha wihĩ dehyoacũ ïabu yuhu. Ôpa weremi yare. ‘Jopegue Simo waicugure aigãridoreque. ¹⁴ ïgu mure mu acawererã mera muare árĩpehrerãre peamegue wabonirãre mua tariborore weregucumi,’ arĩmi anyu yare,” arĩ weremi yare Cesarea majagu. ¹⁵ Eropii yuhu erãre wereniguirisubu Espiritu Santopu erã mera árĩnugami marire ïgu iimuhadiro dopa ta. ¹⁶ Eropigu Jesu ïgu wererare guñabu yuhu. Ôpa arĩ weremi ïgu: “Ñu muare waĩyegu deco mera waĩyemi. Yupu iri tauro iigura muare. Puhru Espiritu Santore mua mera árĩniguicũ iigura,” arĩ weremi. ¹⁷ Eropigu Jesucristo mari Opure mari umupeocũ ïagu Goãmu ïgu Espiritu Santore ohãmi marire. Eropigu Goãmu marire ïgu Espiritu Santore ïgu odiro dopa ta judio masa árĩbirã sãre ïgu ohãmi. Goãmu ïgu eropa iicũ ïagu ïgure tarinugamasibea yuhu, arĩpu Pedro erãre judio masare Jesu yarãre.

¹⁸ ïgu eroparicũ peerã, erã ïgure ne arĩnemobiriñorã. ïgure erã turimasibiriñorã. Eropirã erã Goãmure mucubirãrã,

—Goãmu ôagu, turagu áhrimi, arĩñorã.

Ôpa arĩnemoñorã erã:

—Judio masa árĩbirã sã erã ñerire bujawererã árĩrã Goãmu ïgu taunirã árĩrãcoma. Eropa ïgu taunirã árĩrã erã sã umuri nucu ïgu mera árĩniguirãcoma, arĩnemoñorã erã.

Antioquia gajirã Jesu yarã árĩñorã

¹⁹ Eropii Estebanre erã wejẽra puhru masa Jesu yarãre ñero iĩñorã. Erã eropa iicũ ïarã Jesu yarã duhrisirigã wañorã. Eropirã erã Feniciague, Chipregue, Antioquiague waha, judio masa dihtare Goãmu yare wereriñorã erã. ²⁰ Gajirãpu Jesu yarã mera majarã Chipre majarã, Cirene majarã Antioquiague eja, judio masa árĩbirãre Jesu yare buheñorã Goãmu

eräre ĩġu tauboro dopa. ²¹ Eropiġu mari Opu eräre itamupu. Eropirā masa bajarā Jesure umupeo, oaripure gohrotoñorā.

²² Eropii “Antioquia majarāgue Jesure gamecoma,” arĭ peebeoñorā Jerusalén majarā Jesu yarā. Erā eropa peebeora puħru Jerusalén majarā Bernabé waicugure Antioquiaque oboeñorā. ²³ Eropiġu ĩġu Antioquiaque ejaġu, Goāmu itamuri mera judio masa árĭbirā ĩġu yarā erā wacū ĩaġu, buřigā mucubiripu. Eropiġu ĩġu ero majarāre opa arĭ werepu:

—Jesure eropa umupeoniguicāque. ĩġu yare ne duhubiricāque, arĭ werepu ĩġu árĭpehrerāre erāre.

²⁴ Bernabé oagū árĭġu, Espiritu Santore wuaro opagu árĭġu, Jesu dorediro dopa iigu árĭġu Jesure oaro umupeodigu árĭpu. Eropirā ĩġu buhera puħru bajarā masa Jesure umupeoñorā.

²⁵ Puħru ĩġu Tarso waicuri macague Saulore amagu wapu. ²⁶ Erogue ĩġure bocajapu. ĩġu bocajara puħru Antioquiaque aĭġapu Saulore. Erogue erā ejara puħru yuju bojori gohra erā Goāmu yarā mera gamenere, bajarā masare buhemuriñorā erā. Eropirā Antioquiaque Cristo yarā Cristiano waicunugañorā.

²⁷ Irisubure Goāmu ya weremahtarā Jerusalén árĭnirā waha, Antioquiaque ejañorā. ²⁸ Eropiġu erā mera majagu Agabo waicugū Jesu yarā watope niguigu, Espiritu Santo ĩġu turari mera werepu erāre. “Árĭpehreri yebaguere buřigā oanū waroca,” arĭ wereyupu ĩġu. Irisubure bari maririsubu árĭcū árĭpehrerā weca opu Claudio árĭpu. ²⁹ Eropirā Jesu yarā árĭpehrerā erā oparopē erā acawererāre odiarā erā basi game wereniguiñorā. “Judea yeba majarāre Jesu yarāre niyerure oboerā,” arĭñorā erā basi. ³⁰ Erā eropa arĭra puħru Bernabé Saulo mera erā iri niyerure aĭġabasañorā. Erogue ejarā Judea majarāre Jesu yarāre wiañorā iri niyerure.

12

Pedrore peresu iñorā

¹ Irisubu opu Herode yujurayerire Jesu yarāre ñero iinugapu. ² Eropiġu ĩġu Ņu ĩġure Santiagopure matamiji mera ĩġu wejēdorecū gajigupu ĩġure wejēpu. Santiagore ĩġu wejēcū judio masa mucubiriñorā. ³ Erā mucubiririre Herode masigu, “Eropa dihta iicū gahmema erā,” arĭġu Pedro säre peresu iipu. Irinurire buġabiriri pan erā bari bosenu Pascua árĭyoro. ⁴ Eropiġu Herode Pedrore ñeha, peresu iipu. Eropiġu diez y seis surarare ĩhadibudorepu ĩġure. Wapicurā surara ĩġure ĩhadibuñorā. Puħru wapicurā erā gohrotonirā ĩġure ĩhadibumuriñorā. Eropa ta iñorā erā diez y seis surara. Herodepu Pascua puħru Pedrore peresugue árĭġure masa core duhudobodiaripu ĩġure wejēdorebu. ⁵ Eropiġu Pedro peresugue árĭpu. ĩġu erogue árĭcū ta Jesu yarāpu Goāmure buřigā serēbasañorā ĩġure.

Goāmu peresugue árĭġure Pedrore wiupu

⁶ Iri ñamire ta Pedro comedari peda mera erā diridigu perā surara watope carĭġu iipu. Eropirā perā surara disiporo coreniguiñorā ĩġure. Eropiġu iri ñami boyoro Herode Pedrore judio masa core duhudobodiaripu ĩġure wejēdorebu. ⁷ Eropiġu Goāmu anyupu Pedro carĭġu pohro ĩġu niguicū ĩġu peresu árĭri taribu boyopehrea wayoro. Eropiġu anyu Pedro pohro niguigu ĩġu patorere puucarepu ĩġure.

—Duru wahgãque, arĩpu ĩgu Pedrore. ĩgu eroparĩcũ ta ĩgu mojtotorire erã dirira comedari pãrisiri dija wayoro. ⁸ Eropigu anyu ĩgure werepu:

—Mu ya suhrire sañaque. Mu zapatu sãre sañaque, arĩpu ĩgu.

Ĩgu eroparĩcũ Pedropu ĩgu arĩro dopa ta iipu.

—Mu weca majañe suhrirore saña, yu mera arique, arĩpu anyu.

⁹ ĩgu eroparĩcũ iri taribugue arĩdigu wiria anyu puhru waha wapu ĩgu. Eropa waqueregu ta opa arĩ pepiripu ĩgu. “¿I diaye arĩbircuri? ¿O quẽgu iicuri yuhũ?” arĩ pepiripu ĩgu. ¹⁰ Eropirã erã ĩgu arĩri taribu pohro niguirã surarare tarigã, gajirã yoañariro niguirã sãre tarigã, wuãri disiporogue ejañorã. Iri disiporo macague wari mare cãhmotayoro. Iri biharise irise basi pãricũ erã wiriañorã. Wiria wa erã mague waha wañorã. Anyupu waha wapu. Eropigu Pedro yujugu ta dujapu. ¹¹ Eropa ĩgu anyu ĩgu wara puhru ĩgu iirare Pedro masipu pare. Opa arĩ pepipu ĩgu. “Anyu Goãmu ĩgu obeodigu peresugue arĩgure yure wiugu erami. Dohpague irire masia ĩgu eropa iirare. Judio masapu yure erã ñero iidiarare Goãmupu erãre iidorebirami. Eropigu yure Herode ĩgu peresu iidigure wiuami,” arĩ pepipu Pedro.

¹² ĩgu eropa arĩ pepira puhru María Ñu pago ya wihigue ejapu Pedro. Ñupu Marco waĩcugu arĩpu. Iri wihigue masa bajarã gamenere, Goãmure serẽrã iĩñorã. ¹³ Eropigu Pedro disiporore eraa dotepu. Rode waĩcugo pohro majago ĩgu dotecũ peego, ñago ejapo igo. ¹⁴ Eropigo Pedro igo piyucũ peego ĩgu wereniguirire pee masi, burigã mucubiri disiporore pãgũbiripo. Eropa mucubirigo ĩgure pãgũbodio cãdija wapo. Pedro ero niguicũ ta igo majinugaja oma ñaja wapo.

—Pedro disiporogue erami, arĩ werego ñajapo. ¹⁵ Eropirã iri wihi arĩrã igo eroparĩcũ peerã,

—Eropa arĩmaacãgo iiaa muhu, arĩñorã erã igore.

—Diaye ta ãhraa. Diaye ta arĩgo iiaa, arĩpo igo. Igo eroparĩcũ peerã,

—Ĩgu arĩbircumi. ĩgu siporã muraro eraro iica, arĩñorã erãpu.

¹⁶ Erã eropa arĩrisubu Pedro disiporore eropa ta doteniguicãpu. ĩgu eropiicũ peerã, erã disiporore pãgũ, ĩgure ñha, uca wañorã. ¹⁷ Eropigu Pedro ĩgu mojtoto mera “Ejarimaricãque,” arĩgu, Goãmu peresugue ĩgure ĩgu wiurare werepu erãre.

—Ire wereque Santiagore gajirã Jesu yarã sãre, arĩpu Pedro.

Eropa arĩ weretuhaja, ĩgu gajipugue tarigã waha wapu.

¹⁸ Eropii boyodijiricũ surara Pedrore ñhadibunirã ĩgu dohpa ii wiriarare ne masibiriñorã. Eropa masibirã uca wañorã. ¹⁹ Eropigu Herode Pedrore amadoreripu. Eropigu ĩgu surarare peresu corerãre ĩgu serẽpira puhru erãre wejẽdorepu Herodepu. Eropii Herode Judeague arĩdigu waha Cesareague arĩgu waha wapu.

Herode sñria wapu

²⁰ Ero puhru Tiro waĩcuri maca majarã mera Sidón waĩcuri maca majarã mera sãre Herode guapu. ĩgu eropa guacũ ñarã iri macari majarãpu Herode mera amurã wañorã. ĩgu erã mera ĩgu guarare wereniguirã wañorã. Ejaa Herodere ñaboro core Herode itamugu Blasto waĩcugu mera weretamuñorã. Eropirã erã ĩgu Blasto ĩgu itamuri mera Herode pohro ejañorã. ĩgu pohro ejarã opa arĩñorã:

—Mari ñaro arĩrã. Mari basi ñhaturibircãrã, arĩ serẽñorã erã Herodere.

Erā ya yeba majarā Herode ya yeba barire bocamuriñorā. Eropirā Herode erāre ñhaturicū gamebiriñorā erā. ²¹ Eropigu Herode erā ñgure ñarinū ñgu queoranū árícū, opu ñgu sañari suhri ñari suhrire sañamuripū ñgu. Eropigu ñgu ñgu doaro doanijagu, masare werenigui ñhmmuripū. ²² ñgu eropa werenigui ñhmucū peerā masapu gaguiniguñorā:

—Ñhi wereniguigu masu áríbeami. Goāmū āhrimi, arí gaguiniguimuririñorā erā Herodere.

²³ Erā eropa arīra puhru Goāmū ñgu anyu Herodere dore ópū. “Goāmū áríbeaa yuhū,” ne aríbiripū Herode. ñgu eropa aríbirira dipuwaja anyu ñgu dorecucū iipū. ñgu eropa dorecucū ñgure beca ba wejēcāñorā.

²⁴ Eropii Jesu yarā masa bajarāre Jesu ya buherire buheñorā.

²⁵ Eropirā Bernabé, Saulo mera Jesu yarāre itamupehotuhaja Jerusaléngue árīnirā Antioquíague dujaa wañorā. Eropirā Ñure Marco waícugare erā aīgāñorā erā mera.

13

Jesu yarā Bernabére Saulo mera Goāmū yare buhedore oboeñorā

¹ Irisubure Antioquíague Jesu yarā gamenererā mera majarā, Goāmū yare weremuhtarā árīñorā. Masare buherā ta árīñorā erā sã. Bernabé, Simo Negro waícugu, Lucio Cirene majagu, Manaén, Saulo mera erā árīñorā. Manaénpu opu Herode murū mera erā perā yujuro mera ta masanirā árīñorā. ² Eropirā erā Goāmū yare erā buherisubu, erā ba duhurisubu, Espírítu Santopū werepu erāre:

—Bernabére, Saulo mera apique yu gamero dopa iimorāre. Irire iimorāre beye apigu iiaa erāre, arípu Espírítu Santo.

³ ñgu eroparícū erāpu ba duhu Goāmure serē, Bernabé weca Saulo weca erā mojotorire duhpeñorā. Eropa duhpeorā erāre buhedorerā oboeñorā.

Chípregue Jesu ñgu apinirā buheñorā

⁴ Eropirā erā Espírítu Santo ñgu oboenirā árīrā, Seleuciague eja, iri macare tarigā, Chípre waícari ñugurogue ejañorā erā. ⁵ Eropirā Salamina waícari peramague ejañorā. Iri maca judío masa buheri wírigue Goāmū yare werenugañorā erā. Eropigu Ñu Marco sã erā mera waha, erāre itamupu.

⁶ Eropirā erā iri ñuguro ojogoro maja. Pafu waícari macague ejarā, yeere bocañañorā erā. ñgu judío masu Barjesu waícugu árīpu. Barjesu griego ya mera Elima erā arí piyugu árīpu. “Goāmū yare weremuhtagu āhraa yuhū,” arí masare guyaniguicāgu árīpu ñgu. ⁷ Eropigu ñgu Sergio Paulo waícugu mera majagu árīpu. Sergio Paulopū iri ñuguro majarā opu masipehogu árīpu. Eropigu Goāmū yare peediagu erāre Bernabé, Pablo mera bocatiripū ñgu. ⁸ Eropigu Elima yeepū erāre buhedorebiriripū. ñgu Sergio Paulo Jesu yare ñgu umupeocū gamesābiripū yeepū. Sergio Paulore Goāmū yare ñgu peecū cāhmotadiaripū. ⁹⁻¹⁰ ñgu eropa buhedorebiririrecū ta Saulo, Pablo waícuga Espírítu Santore ñaro opagu árīgu yeere ñaro ñadihupi ñgure werepu:

—Muhū guyaricugu, ñegu, watí ñgu dorerire iigu, ñarire ñhaturigu āhraa muhū. ¿Duhpigū mari Opū yare “Ñeri āhraa. Guyari āhraa,” eropa arīniguicāri muhū? ¹¹ Muhū eroparīra waja Jesu mari Opū mure

Īgu pēhrecū cuiři ĩhajabıgı  rĭgıca muĥı. Eropıgı bajamenurıg  muĥı ĩnurıre ĩarısıme, arĭpı Pablo.

Īgu eroparıc  ta ĩgu yeepı ĩmica ĩro dopa  rĭrıre ĩamuĥtagı, naitĭaro dıĥtare ĩapı ĩgu. Eropıgı ĩgure tu  curıbure amapı ĩgu. ¹² Īgu eropa wac  ĩagı, Sergio Paulopı Jesu yare “Diaye ta  hraa,” arĭ masıpı. Marı Opı yare ĩgu pee, ıca wa, Jesure umupeonugapı.

Pablo Bernab  mera Antioqu a Pisidia yebague  rĭrı macague  rĭnor 

¹³ Eropı Pablo s  Pafogue  rĭnır  dohodıru mera waha, Pergegue ejaĭnor . Perge Panfilıa yebague  hraa. Erogue eja,  nu Marcopı er re coh  wahg , Jerusalengue waha wapı. ¹⁴ Er pı Pergegue  rĭnır  waha, Antioquıague ejaĭnor . Antioquıa Pisidia yebague  hraa. Erogue ejar , Sabadonı  rĭc  er  judıo masa buherı wıhıgue  ıajaja, erogue doador . ¹⁵ Eropır  ĩrı wıhı majar  opar  Go mı dorerıre, Moısegue marıre ĩgu apırare, Go mı yare weremuĥtanır  er  gojarare er  buhera pıĥrı er  sıhubeo nor  Pablo s re.

—Acawerer ,  masare mu  weredıar  ĩrı? ĩrıre weredıar  wereque doĥparag , arĭnor  ĩrı wıhı majar  opar .

¹⁶ Er  eroparıc  peegu, Pablo wahg nugaja, “Werenıguıbrıc que,” arĭgı ĩgu moĭoto mera paatupı. Er  ejarımarıc  ĩha, ĩgu  pa arĭpı:

—Israe masa, mu  marı Pagıre umupeor , peeque. ¹⁷ Marı  ecu s mar  m ra Go mıre umupeom rı ma. Er  m rare Go mı beyem rı nımi. Eropır  er  marı  ecu s mar  yoarı boje Egıptogue  rĭm rı nıma gajır  arĭquerer . Erogue er   rĭc  Go mı  aro ĩm rı nımi er re. Eropır  bajar  masa pore  rĭnıma er .  pa ĩnımi er re. Er re Egıptogue  rĭr re ĩgu turarı mera aı wıu nımi Go mı. ¹⁸ Īgu eropa wıura pıĥrı er  cuarenta boĭorı goĥra masa marırogue curım rı nıma. Erogue ĩgure er  tarıngac  Go mı eropa ta pepıc nımi. ¹⁹ Eropıgı Canaa waıcırı yebagure sıete currı majar re c tuhaja, Go mı ĩrı yebare o nımi Israe masap re. ²⁰ ĩrı yebare otuhaja cuatrocıentos cıncuenta boĭorı goĥra masare doremor re apım rı nımi Go mı Israe masare.

—“Go mı ĩgu apınır  Samue ĩgu  rĭc gue  rĭtum rı nıma. Samuepı Go mı yare weremuĥtagı  rĭm rı nımi. ²¹ Samue  rĭrısubı Israe masapı er  opı  rĭbure amam rı nıma. Eropır  Go mıre ser m rı nıma. Er  eropa ser c  ĩagı Go mı Saulore apım rı nımi. Saulo Cis magı  rĭnımi. Benjamı ya curı majagı  rĭnımi. Eropıgı cuarenta boĭorı goĥra er  opı  rĭbure apınımi Go mı ĩgure. ²² Eropıgı Go mı Saulore ĩgu c ara pıĥrı Davıre apım rı nımi ĩgu.  pa  rĭnımi Go mı Davıre. “Davı Isai magıre bocabı yıĥı. ĩgure mucubırıa yıĥı. ĩgu yı gamerıre ĩpehogıcumı,” arĭnımi Go mı. ²³ ĩhı Davı ĩgu p ramı  rĭrtıragı  hrımi Jesu. Go mı Jesure apıdıgı  rĭmı Israe masare ĩtamubıre. “Masare  aro ĩgıca,” arĭnımi Go mı. ĩgu arĭdıro dopa ta ĩıdı  rĭmı ĩgu Jesu. ²⁴ ĩgu eropa ĩıborı core Jesu ĩgu arıborı core  nu waıyegı  pa arĭ buĥpı: “Mu   erıre bujawereque.  arıp re goĥrotoque. Eropır  waıy s nır   rĭıque,” arĭ buĥpı  nu  rĭpeĥrer  Israe masare. ²⁵ Eropıgı  nu ĩgu buĥtuboro core, ĩgu sĭrıborı core  pa arĭ werem rıpı. “ Nıhıno  hrırı yıĥı mu  pepıc ? ĩrıbojegı majagı Go mı yare weremuĥtıdıgı  rĭbea yıĥı. Cristo  rĭbea yıĥı.

Gajigu āhraa. Cristo yuhu árībiriquerecū yu puhru yu tauro turagupu arigucumi. Īgupu ōtariagu āhrimi. Īgu iro dopa árībeaa yuhu,” arī werepu Ñu masare, arīpu Pablo.

²⁶ “Acawererā, Abrahā pāramerā, árīpehrerā mari Pagure guhyadiaro ĩarā, marire i Īgu tauborore wereri buherire obeodi árīmi mari Pagu. ²⁷ Jerusalén majarā erā oparā mera Jesu erāre taugu Īgu árīcū masibirinirā árīma. Sabadonuri árīcū Goāmu yare weremuhtanirā erā gojarare buhequererā ta Jesure masibirinirā árīma. Eropa masibirā Jesure wejēdoreñorā. Eropa iirā Goāmu yare weremuhtanirā erā gojadiro dopa ta iirā iinorā. ²⁸ Īgure erā wejēboro core erā Jesure weresārīñorā. Īgu ñerire iibiriquerecū ta erā Pilatore Jesure wejēdoremorā serēñorā. ²⁹ Eropirā iribojegue majarā erā gojadiro dopa ta Jesure iituhaja, Īgure crusague árīgure aīdiju, masa gobegue utāyegue erā seara gobegue apiñorā erā Īgure. ³⁰ Eropa erā Īgure wejēquerecū ta Goāmu masudi árīmi Īgure. ³¹ Eropirā Galileague arinirā Jerusaléngue Īgu mera ejanirā bajanuri Īgure sīri masa deydigure ĩañorā. Eropirā dohpaguere Īgure erā ĩarare masare werema erā.

³²⁻³³ Eropa masare wereniguigu ōpa arī werenemopu daja Pablo:

—Eropirā ōari buherire werea gua muare. Goāmu mari ñecu sumarāre “Masare ōaro ĩguca,” iribojegue Īgu arīdiro dopa ta dohpaguere marire erā acawererāre iiami. Irire Īgu wererare ōpa iiami Īgu. Goāmu Jesure masudi árīmi. Eropirā Jesure Īgu masurare werea gua muare. Salmopūgue iribojegue Īgu ōpa arī gojadiro dopa eropa wayoro Jesure: “ ‘Muhu yu magu āhraa. Dohpagāre mare dehyoacū iiabū,’ arīmi Goāmu Īgu magure,” arī gojañumi iribojegue. ³⁴ Eropigu Goāmu Jesure Īgu masuburire dipaturi Īgu sīribiriborore werega ōpa arī were gojadoreñumi Salmopūgue: “Davire yuhu mojomoro ĩadiro dopa ta diaye ta ōaro ĩigura mua säre,” arī gojadoreñumi. ³⁵ Eropigu gaji Salmo säre ōpa ta arī wereñumi: “Goāmu mu ōagu Īgu dupure boadobirabu muhu,” arī gojañumi. ³⁶ Eropigu Davi Goāmu Īgu gamediro dopa ta Īgu árīrasubu majarāre itamumuriñumi. Puhru Īgu sīria wañumi. Īgu sīrira puhru Īgu pagu sumarāre erā iidiro dopa ta yaañuma Īgu säre. Eropigu Īgu boa wañumi. ³⁷ Eropigu ihī Jesu Goāmu Īgu masudigupu ne boabiridi árīmi. ³⁸ Eropirā mua, yu acawererā, ire masique: Goāmu mua ñerire Īgu cóaborore muare ire werea gua. Jesupu mua ñerire cóabu āhrimi. ³⁹ Eropigu Īgure umupeorāre erā ñero iirare cādijicāgucumi Īgu. Moiseru Īgu apira dorerire mua iira mera Goāmu pohrogue wasome mua. Eropigu iri dorerire iiri mera taridiarāre erā ñerire cóasome Goāmu. ⁴⁰ Eropirā ōaro iique. Mua ōaro iibiricū Goāmu ya weremuhtanirā erā gojadiro dopa ta muare waroca. Ōpa arī gojañuma:

⁴¹ Peeque mua queoricurā. Yure ĩaturirā āhraa mua. Yu ōpa iicū ĩūique mua. Eropirā peamegue waque. Mua árīrinurire muare ii ĩhmugura. Yu eropa ii ĩhmcū ĩaquereā “Diaye ta āhraa,” arīsome mua. Gajigu irire muare Īgu ōaro werequerecū ta “Diaye ta āhraa,” arīsome mua, arī gojañumi Goāmu yare weremuhtadigu, arī werepu Pablo erāre.

⁴² Īgu eropa arī werera puhru judio masa buheri wihigue erā wiriara puhru judio masa árībirāpu erāre serēñorā.

—Gaji semanague Sabado árīcū ire buheba daja guare, arī serēñorā erā Pablöre.

⁴³ Eropirā iri wihigue árīnirā wiria, judio masa bajarā, judio masa árībirā sã Pablo, Bernabé sã mera wañorā. Judio masa árībirā judio masa yare buherā árīñorā. Erā erā mera wacū Pablo Bernabé mera òaro wereñorā erāre. “Goāmũ muare mahimi. Eropirā ìgure umupeorā árīniguicāque,” arī buheñorā erā.

⁴⁴ Eropirā gajī semana Sabado árīcũ árīpehrerā Jesu yare peediarā gamenereñorā. ⁴⁵ Eropirā judio masapũ bajarā masa Jesu yare peediarā gamenerecũ ìarā guañorā. Eropa guarā, erā gajiropa arī werenigui, Pablora ñero quere goroweoñorā. “Muare ìgu buheri diaye árībeaa,” arīñorā erā. ⁴⁶ Erā eroparīcũ peerā, Pablo, Bernabé mera erāre quere goroweonirāre güiro mariro wereñorā.

—Goāmũ ìgu dorediro dopa ta muare judio masare buhemũtarabu gua. Mũapũ irire gamebirituhabũ. Òmuri nũcu Goāmũ mera árīniguicũ sãre gamebirituhabũ mua. Eropirā guapũ judio masa árībirāpũre buhenugarāca. ⁴⁷ Òpa ta doreñumi mari Opũ guare:

Mua judio masa árībirāre buherā erāre Goāmũ yare òaro masicũ iirāca mua. Eropigũ mua yorogue árīrāre mua buhecũ peerāre erāpũre peamegue wabonirāre tauguca yuhũ, arī wereñumi Goāmũ guare ìgu yare gojarapũgue, arī werepũ Pablo, Bernabé mera.

⁴⁸ Erā eroparīcũ peerā judio masa árībirāpũ mucubiriñorā. “Mari Opũ yapũ òari àhraa,” arīñorā erā. Eropirā Goāmũ ìgu gamenirā, òmuri nũcu ìgu mera erā árīniguiborore ìgu odianirā Jesure umupeonũgañorā.

⁴⁹ Eropirā mari Opũ Cristo yare iri yebague werepehoñorā. ⁵⁰ Erā eropa iicũ ìarā judio masa suabiria wañorā. Erogue mari Pagure umupeorā nome, òarā nome árīñorā. Eropirā judio masa Pablo sãre ñero wereniguñorā. Erā eropa wereniguicũ peerā erā nome Pablo mera Bernabé mera guañorā. Eropirā iri maca majarā oparā sã erā mera guañorā. Eropa quarā ero majarā ñero iñorā Pablo sãre. Erā eropiira, pũhrũ Pablo sãre erā ya yebague árīrāre cohā wiucāñorā. ⁵¹ Erā eropa iicũ ìarā, Pablo Bernabé mera erā guburi maja nicure pasiripiñorā iri maca majarā erā ñeri wajare ìhmurā. Eropa iituhaja erā ìconioague waha wañorā. ⁵² Eropirā erā Jesu yarā wũaro mucubiri, Espiritu Santo wũaro ìgu dorediro dopa iirā iñorā.

14

Pablo Bernabé mera Iconioague árīñorā

¹ Eropirā Iconioague árīrā Pablo Bernabé mera judio masa buheri wihigue ñaja, Jesu yare wereñorā. Eropirā judio masa bajarā Jesure umupeonũgañorā. Eropirā judio masa árībirā sã Jesure umupeoñorā.

² Judio masa Jesu yare peediabirāpũ judio masa árībirāre Jesu yarā mera erā guacũ iñorā daja. Erā eropa iicũ judio masa árībirā ñero pepiñorā Jesu yarāre. ³ Erā eropa pepicũ ìarā Jesu yarāpũ Pablo sã erogue yoari boje árīrā, güiro mariro mari Opũ yare òari buherire buheñorā. Goāmũ masare ìgu mahirire buheñorā. Erā eropa buherisubũ Goāmũ turari mera deyoro moarire ii ìhmũñorā, “I buheri diaye ta àhraa,” arī ìhmurā.

⁴ Eropirā iri maca majarā deco mera judio masa yare gamerā dujañorā. Deco mera ta Jesu yare gamerā sã dujañorā. Erā pe curu dũca wariñorā.

⁵ Eropirā Jesu yare gamebirāpũ judio masa sã árībirā, judio masa sã erā oparā mera gamenere Jesu ìgu apinirāre ñero iidiariñorā. Òtā mera dea wejēdiariñorā erāre. ⁶ Erā eropa iidiarire masirā, Pablo, Bernabé mera

Licaonia yebague duhriḡā waha wañorā. Iri yeba áriri macari tari wahḡā Lистра waicuri macare Derbe waicuri maca sare ejañorā. ⁷ Eroḡue ejarā, òari buherire buheñorā daja erā.

Listrague Pablöre utā mera deañorā

⁸ Eropii Listrague curimasibigü doapu. İḡu ne masa dehyoagugue ta curimasibiridigü arıpu. ⁹⁻¹⁰ Eropigü İḡu Pablo İḡu buhecü peepu. İḡu peerisubu Pablopü İḡu dihtare İapu. İḡure İanuru òpa arı pepıpu: “İhı Jesure umupeomi. Eropigü ‘Jesu yare dıpu òacü iimasimi,’ arı pepıgu İucumi,” arı pepıpu Pablo curimasibigü. Eropa pepıgu turaro mera òpa arıpu Pablo İḡure:

—Wahḡanugajaque, arıpu Pablo İḡure.

İḡu eroparıcü peegu ta curimasibıgıpu buhrimanugaja, wapu. ¹¹ Pablo İḡu eropa İıcü İarā masa gaguiniḡıñorā. Erā Licaonia ya mera òpa arı gaguiniḡıñorā:

—Goāmarā masa dopa bejarā umarogü árırā mari pohrogue dijarama, arı gaguiniñorā erā.

¹² Eropirā erā Bernabére “Mari goāmü Zeus āhrimi,” arı piyuñorā. Eropirā Pablo buhemıhtadigü opu iro dopa İḡu árıcü İarā “Mari goāmü Hermes āhrimi,” arı piyuñorā erā İḡure. ¹³ Eropirā Zeure umupeorā ya wihi iri maca turo pohro árıyoro. Eropıgu Zeus yarā erā pahıpu İri wihıge árıḡu macague ñajariri disiporo pohrogue wecuare, gori amurare aḡārıpu. Iri mera Pablöre Bernabére “Mari goāmarā āhrıma,” arı umupeodiariñorā. Eropirā erā wecuare soemuju Pablöre, Bernabére umupeodiariñorā. ¹⁴ Erā eropa İıdiacü İarā Pablo, Bernabé mera erā basi erā ya suhrıre yehuenugañorā erā bujawererıre masare İhmurā. Erā yehuenugara puhru masa watope omagā, gaguiniḡıñorā erā.

¹⁵ —Mıa òpa İıbirıcäque. Gua sä mıa iro dopa ta masa āhraa. Mıa òpa İiri ne duhpıburi árıbeaa. Eropirā mıare òarire buherā ahrabu. Òpa İırire duhudorerā arırā İıabu. Oā mıa goāmaräre mıa wėanıřäre ñeräre cóacäque. Eropirā Goāmıre ojocarıḡıpuıre umupeoıque. Goāmıpuı umarore, yebare, wuarıyare, árıpehrerıre, árıpehrero majaräre İıḡu āhrımi. ¹⁶ Eropıgu İḡu irıbojegue árıpehreri macari majarā erā gamero İırare eropa İacāñumi. ¹⁷ İḡu eropa İacäquereḡu İḡu árıřıcurıre İhmumi marıre. İḡu masare òarire İı, deco arıcü İı, dıcare oo, masare barıre onıḡımi. İḡu eropa ocü masa mucubırıma. Eropa ta İḡu árıřıcurıre İhmumi masare, arıpu Pablo, Bernabé mera.

¹⁸ Eropirā erā eroparıcü peequererā ta masa wecuare wejē soemuju eräre umupeodiariñorā. Eropa erā umupeodiacı İarā eräre eropa İıdorebirıñorā Pablo sä. Erā eropa İırire duhıdiabırıřıquererā duhuñorā.

¹⁹ Eropii gajırä judıo masa Antıoquía majarā, Iconıo majarā sä Listrague ejañorā. Eroḡue ejarā, Pablöre ñero werenıḡıñorā ero majaräre. Erā eropa werenıḡıcü peerā masa İḡu mera guanugañorā. Eropa guarā masapu utā mera deañorā Pablöre. Utā mera İḡure deatuhaja, “İhı sıria wahımı,” arırā, İri maca turo pohrogue İḡure taragā mehıcä, waha wañorā. ²⁰ Erā eropııquerecü Jesu yarā Pablo pohro erā gamenerenugacıcü gohra Pablo masa wahḡanugaja, erā mera macague waha wapu. Eropirā gajınu İḡu Bernabé mera Derbegue wapu.

²¹ Eropirā erā erogü erā òari buherire bajarā masare erā werera puhru, erā Listrare eja daja İri macare tarıḡā, Iconıore eja daja İri macare tarıḡā,

Antioquía Pisidia yebague árri macare ejañorã daja. ²² Iri macarigue ejarã, ero majarã Jesu yarãre ôari buherire wereñorã daja. Erãre ôaro sïporãcucũ iñorã. Eropirã Jesure umupeodorenigucãrã ôpa arï wereñorã erãre.

—Goãmũ árïoguere mari wadiarã, buriğã marire ñero tariro gahmea, arï wereñorã erã.

²³ Eropirã macari nucũ majarãre Jesu yarãre erã oparã árïmorãre apiñorã Pablo Bernabé mera. Eropirã erã ba duhura pũhrũ Goãmũre serẽñorã.

—Opũ, oã mũ yarãre ñhadibuque, arï serẽbasañorã erã Goãmũre erã umupeogure.

Pablo Bernabé mera Antioquíague erã árïmũhtara macague dujaa wañorã

²⁴ Erã eropa iira pũhrũ erã Pisidia yebague tariara pũhrũ waha wañorã Panfilia yebague. ²⁵ Eropirã Pergeguere erã buhetuhaja Atalia waïcũri macague buha wañorã. ²⁶ Eropirã iri macague eja, Antioquíague dujaarã, dohodiru mera waha wañorã. Iri maca coregue erã árïnicũ Jesu yarã Goãmũ yare buhedorerã Pablo sãre obeñorã. Eropa obeorã Goãmũre ôpa serẽñorã:

—Goãmũ, mũ mahiri mera oãre ñhadibuque, arï serẽ, obeñorã erã.

Eropirã erã buhedorerare buhepehonirã árïrã Pablo Bernabé mera dujaniñorã iri macare. ²⁷ Eropirã erã Antioquíague erã dujjara pũhrũ Goãmũ yarã mera gamenere, Goãmũ ñgu turari mera erã iirare werepehoñorã erã. Judio masa árïbirã sã Goãmũ yarã erã warare wereñorã erã.

²⁸ Eropirã Pablo sã eroguerẽ Jesu yarã mera yoari boje árïcãmũriñorã.

15

Jerusaléngue Jesu yarã gamenereñorã

¹ Eropi Judea yeba majarã bajamerãgã Antioquíague ejarã, Jesu yarãre ôpa arï buhenũgañorã erã.

—Goãmũ ñgu dorerire Moiserẽ apigu ôpa arï apimũriñumi. Árïpehrerã erã dũpũre miri gasiroğã erã wiri alborore were apimũriñumi Moiserẽ. Mũa irire iibiricũ Goãmũ muare tausome, arï buheñorã erã ero majarãre.

² Erã eropa arï buhecũ peerã Pablo Bernabé mera gamebiriñorã. Iri buherire buriğã game dũyasoñorã Judea yeba majarã mera. Erã eropa game dũyasora pũhrũ Jesu yarãpũ Pablõre, Bernabére, gajirã ero majarã sãre Jerusaléngue obeñorã. Judea yeba majarã erã buherire Jesu ñgu apinirãre Jesu yarã oparã sãre serẽpi ñdorerã obeñorã Pablo sãre.

³ Eropirã Jesu yarã erãre erã obeocũ waha, Fenicia yebare eja tarigã, Samaria yebague ejañorã. Iri macarigue ejarã, judio masa árïbirã Goãmũ yare erã gemenũgarare wereñorã erã ero majarãre. Erã eropa werecũ peerã ero majarã Jesu yarã buriğã mucubiriñorã.

⁴ Eropirã erã Jerusaléngue ejacũ ñarã ero majarã Jesu yarã Jesu ñgu apinirã, ñgu yarã oparã mera mucubiriri mera ôaro bocatiriñorã erãre. Eropirã Pablo, Bernabé gajirã mera Goãmũ ñgu turari mera erã iirare wereñorã Jerusalén majarãre. Judio masa árïbirã Jesu yarã erã wara sãre wereñorã erã. ⁵ Erã eropa werequerecũ eroguerẽ fariseo masa Jesu yarã bajamerãgã árïñorã. Eropirã erã eroguerẽ wahgãnũgaja, ôpa wereñorã.

—Eräre judio masa áribiräre erä dupure miri gasirogäre wiriro gahmea. “Goãmu Moiserre igu dorere iique mua sã,” ariro gahmea eräre, arñorã erä fariseo masa.

⁶ Erä eroparicũ pee, Jesu igu apinirã, Jesu yarã oparã mera irire amudiarã, gamenëñorã. ⁷ Eropirã erã yoari boje erã wereniguirã puhru Pedro wahgãngaja, wewepu eräre.

—Acawererã, iribojegue yuhu mua mera árigure Goãmu òpa iidoregu yure apimi. Igu yure òari buherire judio masa áribiräre weredoregu apimi. Eräre Jesure umupeodoregu yure eräre buhedoremi. ⁸ Eropigu Goãmu masa erã pepirire masimi. Eropigu igu judio masa áribiräre igu yaräre igu iirare ihmubu igu Espiritu Santore ohãmi eräre marire igu iidiro dopa ta. ⁹ Eropa ogu igu marire erã sãre yujuropa ta òaro iimi. Erã igure umupeocũ erã ñerire cadijimi igu. ¹⁰ Maripu Moise dorere yujuro bojebeaa. Mari ñecu sumarã mura sã irire yujuro bojebirimurĩnuma. ¿Eropa mari yujuro bojebiriquererã duhipirã Jesu yaräre judio masa áribiräre irire Moise dorere iidorediari mua? ¿Duhpirã Goãmu judio masa áribiräre igu yarã wacũ igu iirare “Ero wabeaa,” arĩri mua? ¹¹ Eropa arĩbirã mari òpa pepia. Dohpaguere judio masa áribirã iro dopa ta mari sãre mari Opu Jesu mahiri mera Goãmu taugucumi, arĩpu Pedro eräre.

¹² Igu eroparicũ peerã árĩpehrerã ejarimaria wañorã. Eropirã Pablo Bernabé mera judio masa áribirã watope Goãmu turari mera erã ii ihmurare wereñorã eräre. ¹³ Eropa erã weretuhajara puhru Santiago sã wewepu.

—Acawererã, peeque yure. ¹⁴ Goãmu judio masa áribiräre igu yarã árĩmorãre igu ne iirare weretuhajami Pedropu. ¹⁵ Iribojegue Goãmu ya weremuhtanirã erã werediro dopa ta eropa wahabu judio masa áribiräre. Òpa arĩ Goãmu wereniguirire gojañuma erã iribojegure:

¹⁶ Iribojeque Davi muru ya curu majarã erã oparã árĩra pehrea wabu. Puhru dujariguca yuhu. Eropigu dipaturi igu ya curu majagure opu acuguca. ¹⁷ Yu eropa acura puhru árĩpehrerã judio masa áribirã yure erã opure gamerãcoma erã. “Yaharã árĩque,” yu arĩ sihubeorãpu yure gamerãcoma. ¹⁸ Eropa ta arĩmi mari Opu. Iribojegue igu ire masare weremurĩpu, arĩ gojañuma Goãmu ya weremuhtanirã.

¹⁹ “Eropigu òpa pepia yuhu, arĩpu daja Santiago. Judio masa áribiräre Goãmu yare ne gamenugaräre baja iidorebircãrã mari. ²⁰ Eropirã eräre goja, obeorã mari. Òpa arĩ gojabeorã. “Goãmarã wéanirãre erã umupeora barire babiricãque. Eropirã nome mera ñero iibiricãque. Nome sã ùma mera ñero iibiricãque. Eropirã wũnũgu mohweñenirãre waimurãre babiricãque. Dire ihribiricãque,” iripëta arĩ were gojabeorã. Iri doreri Moise apira doreri sã ahraa. ²¹ Yoari boje judio masa buheri wirigue Sabado árĩcũ Goãmu Moiserre igu apira dorere buhemurima masa. Eropii árĩpehreri macarigue Moise dorere buhemurima masa. Eropirã yu arĩdiro dopa ta judio masa áribiräre Jesu yaräre were gojabeocũ, judio masapu pee, “Gua iiguari ta ahraa,” arĩrãcoma, arĩpu Santiago.

Judio masa áribiräre erã gojarapũ obeoñorã

²² Eropirã Jesu igu apinirã, Jesu yarã oparã árĩpehrerã Jesu yarã mera Santiago arĩrare peerã, “Eropa ta iirã,” arñorã. Tuhajanugu erã mera majarãre beyeñorã erã obeomorã. Antioquíague Pablo, Bernabé mera erã wamorãre erã beyeñorã. Eropirã erã Judare, Sila mera beyeñorã

erã obeomorã. Judapũ Barsabá peñe waĩcupũ. Erã beyerã acawererã Jesu yarã erã umupeonirã árĩñorã. ²³ Erãre erã beyera pũhrũ Jesu yarã gojabeorapũre obeoñorã erã mera. Ōpa arĩ gojañorã erã:

—Jesu ĩgu apinirã, Jesu yarã oparã, mũa acawererã Jesu yarã mera gua òadoreã mũare. Árĩpehrerã judio masa árĩbirã Antioquíague, Siriague, Ciliciague árĩrãre mũare Jesu yarãre òadoreã gua. ²⁴ Gua mera majarã mũa pohrogue ejarã, mũare baja dorerire iidoreañorã. Eropirã mũare gariboañorã. Erã Goãmũ dorerire Moiserẽ ĩgu apiraguere, mũa dupũ merogã gasirogãre wiriri sãre iidoreañorã. Guapũ erãre irire buhedorerã obeobirabũ. ²⁵⁻²⁶ Eropirã gua árĩpehrerã mũa pohrogue obeomorãre gua beyeabũ. Mari mera majarãre, mari mahirãre, Pablo, Bernabé mera Cristo Jesu mari Opũ yare gũiro mariro erã buhecũ bajasuburi gajirã erãre wejẽbocuriñorã. Erã eropa wejẽbocuricũ merogã mera tarimũriñorã erã. Erã Pablo, Bernabé mera gua beyenirãre dohpaguere obeoa. ²⁷ Eropirã Juda, Sila mera mũa pohrogue obeoa. Gua gojabeorare erãpũ mũare wererãcoma. ²⁸ Espĩritu Santo ĩgu guñaro dopa ta gua sã pepia. Ōpa àhraa iri: Gaji doreriguere apibeaã mũare. I doreri dihtare apirãca mũare. ²⁹ Goãmãrã wéanirãre erã umupeora barire babiricãque. Dire ihriribicãque. Wũũũũũũ mohwejẽnirãre waimũrãre babiricãque. Eropirã nome mera ñero iibiricãque. Nome sã ũma mera ñero iibiricãque. I gua eropa dorera iibirã òarire iirã iica mũa. Iripẽta àhraa mũare gua werediari, arĩ gojabeoñorã Jesu yarã Jerusaléngue árĩrã.

³⁰ Iripũre gojatuhaja, wiañorã Antioquíague warãre. Erã wiara pũhrũ waha, Antioquíague ejañorã. Erã erogue ejara pũhrũ bajarã mũare gameneredore, erã gojarapũre wiañorã erãre. ³¹ Iripũre erã buhera pũhrũ, iri òarire erã werebeorare peerã, òaro mucubiriñorã. ³² Juda, Sila mera Goãmũ yare weremuhtarã árĩñorã. Eropirã yoari boje Jesu yarãre Goãmũ erãre ĩgu weredorerare wereñorã. Erã eropa werecũ peerã, Jesu yarãpũ mucubiri òaro sĩporãcũñorã. ³³ Eropirã Juda, Sila mera erogue bajamenũrigã erã árĩra pũhrũ erã dujaricũ, ero majarã erã goeriserecũ, “Ōaro waque mũa,” arĩñorã Antioquíã majarã. Eropirã Juda sãre obeonirãre òadorebeoñorã. Erã eropa arĩra pũhrũ Juda waha wapũ. ³⁴ Silapũ dujapũ Antioquíague. ³⁵ Eropirã Pablo Bernabé sã bajamenũri dujañorã iri maca ta daja. Eropirã erã gajirã bajarã mera Jesu yare buhe wereñorã.

Dipaturi Pablo òari buherire buhecurigũ wapũ daja

³⁶ Eropii bajamenũri pũhrũ Pablo werepũ Bernabére.

—Ina, árĩpehrerãre mari buhenũganirãre ĩhacurirã warã daja, arĩpũ Pablo.

³⁷ Eropigũ Bernabépũ Ñure erã mera aĩgãdiaripũ. Ñũ Marco peñe waĩcupũ. ³⁸ Pablopũ ĩgure aĩgãdiabiripũ. Ero core ĩgu erã mera Panfliague ejaũ erãre cohã dujaa wapũ. Eropigũ ĩgu erã iirire yujuro bojebiri dujaa wapũ. ĩgu eropa yujuro bojebiricũ ĩagũ Pablo dipaturi ĩgure aĩgãdiabiripũ. ³⁹ ĩgu aĩgãdiabiricũ ĩagũ Bernabé Pablo mera erã basi perã burigã arĩ game erã basi purumujucãñorã. Erã eropa arĩra pũhrũ Bernabépũ Chipre waĩcũri nũgurogue Marcore aĩtaribuja wapũ. ⁴⁰ Pablopũ Sila mera waha wapũ. Eropirã erã buherã waboro core Jesu yarã erãre obeorã, “Goãmũ mũare òaro ĩhadibuporo,” arĩñorã. Erã eropa arĩra pũhrũ, Pablo Sila mera waha wapũ. ⁴¹ Eropa warã, Siria yeba, Cilicia

yeba säre eja, erogue Jesu yaräre ðaro sîporăcu iri eră mucubirică iîñoră eră.

16

Timoteo Pablo Sila mera wapicugăp

¹ Eră eropa iira pühru Pablo sâ Derbegue, Listrague ejañoră. Erogue ejaġu Timoteore bocajapu. Timoteo Jesu yagu árġu, judio maso magu árġu ġu. ġu pago sâ Jesu yago ta árġo. ġu pagupu Griego masu árġu. ² Eropiră Litra majară, Iconio majară, Jesu yară Timoteore masa “Ōagu āhrimi,” arġ weremuriñoră. ³ Eropġu Pablo Timoteore aġġadiapu. Eropiră iri yeba majară judio masapu Timoteo pagu griego masu ġu árġcū masiñoră. Eropġu Pablo judio masare guari arġu, Timoteo dăpurre miri gasiroġă wiri aġpu. Judio masa doreri iri arġo dopa ta iġpu ġgure. ⁴ ġu eropa iira pühru waha eră ejari macari majaräre eră gojabeorapū majare wereñoră. Iripū Jesu ġu apiniră, Jesu yară opară mera Jerusalėngue arġră eră gojabeorapū arġyoro. Eropiră eră iri dorerire ðaro wereñoră ero majară Jesu yaräre. ⁵ Eră eropa werecū peeră, Jesu yarăpu Jesure umupeonemoñoră. Eropiră Jesu yară ũmuri năcu bajară wanġuicăñoră.

Pablo quėroque Macedonia majagure ġapu

⁶⁻⁷ Eropġu Asia yebagupure ðari buherire buheră wadorebirġu Espġritu Santo eräre. Eropiră eră Frigia yebare taria, Galacia yebare taria, Misia yeba turo pohro ejañoră. Bitinia yebapu wadiariñoră eră. Eropġu Espġritu Santopu eräre erogueru wadorebirġu. ⁸ ġu eropa dorera pühru erăpu Misia yebare tarġă, Troague erañoră. ⁹ Erogue ġu erara pühru iri ñamire ðpa quėpu Pablo. Macedonia yeba majagu ġu pohro nġuicū ġapu ġu. “Guare Macedonia yeba majaräre itamugū arique,” arġ, siġupu ġu Pablure. ¹⁰ ġu eropa quėra pühru wahġă, gua yare amutuhaja, Macedoniague waha wabu gua. “Goămu iri yebare ðari buherire buhedoreġu iimi marire,” arġ pepġu gua.

Pablo, Sila mera Filipogue árġu

¹¹ Eropiră gua Troague arġră dohodiru mera Samotracia waġuri nġurogue tarġubajabu gua. Eropiră ġajinu Neăpolique wabu gua. ¹² Iri macare taria, Filipogue Roma majară ya macague ejaġu gua. Iri maca Macedonia yeba arġri maca arġbu. Guhyadiari maca arġro iġbu. Eroguere bajamenurġă gua arġbu. ¹³ Eropiră Sabado árġcū gua iri maca turo pohroque, dia weca pohroque ejaġu. Ero Goămu mera eră werenġuġro arġbu. Ero doară ero gameneră nome mera weretamubu gua. ¹⁴ Yujugo guare peego Tiatira majago Lidia waġcuġo arġmo. Eropġo ġo ðari suhri wajacuri suhrire duago arġmo. Mari Pagu Goămu säre umupeogo arġmo. Eropġu Pablo ġu wererire ðaro peecū iimi Goămu ġgore. ¹⁵ Eropġi ġgore ġo ya wihi majară mera waġyemi Pablo. ġu eropa waġyera pühru ðpa arġmo ġgo:

—“Jesu yago āhraa,” arăa mua sâ yare. Eropiră yaha wihi ñajarinique mua. Yu mera dujanique, arġmo ġgo guare.

ġgo eroparġcū peeră ġgo ya wihi dujanġu gua. ¹⁶ ġajinu Goămu mera eră werenġuġroque gua wacū watġ ñajasūdġo bocatġrimo guare. ġgo ġajră pohro majago arġmo. Eropġo ġgo masare “Ōpa waroca muare,” arġ

wereyugo árīmo. Irire masare werego wuaro wajatabasamo igo oparāre.

¹⁷ Eropigo Pablo mera gua wacū, guare nurusia, gaguiniguimo igo.

—Oā Goāmu turatarigu ĩgu itumurā āhrima. Mari sīrira puhru Goāmu marire ĩgu ōaro tauborore werema erā, arī gaguiniguimo igo.

¹⁸ Bajanuri eropa arī garibomo Pablöre. Igo eropa arī gaguiniguicū daja Pablo gamebigu maji ĩha, ōpa arīmi watīre:

—Jesucristo turari mera dorea mure. Igere duhuque. Wanisa mūhu, arīmi Pablo.

Īgu eroparīcū ta watīpu waha wapu.

¹⁹ Watī igore eropa wara puhru igo ōago dujago masa erā waburire werego árībirimo pare. Eropirā igo oparāpu niyerure igo wajatabigo igo wacū ĩarā, erā Pablo Sila mera űeama. űehatuhaja, erāre taragāma iri maca decogue oparā pohroge. ²⁰ Eropa aīgārā, dipuwaja moadorerā pohroge erāre apima erā ōpa arīrā:

—Oā judio masa mari ya macare gariborā iima. ²¹ Erā mari dorerire cóadorerā, gaji buherire buherā iima. Mari ya dorerire tarinugacū iidiarā iima. Mari Roma majarā árīrā oā erā wereripure iimasibea mari. Eropirā erā buherire mari gamebeaa, arīma igo oparā dipuwaja moadorerāre.

²² Erā eroparīcū peerā masa bajarā Pablo sā mera guatariacāma. Eropirā dipuwaja moadorerāpu Pablo Sila sā ya suhrire erā yehgue cóara puhru muta yucugā mera táradorema erāre. ²³ Burigā erā tārara puhru peresu iima erāre. Erā eropa peresu iira puhru peresure coregure ōaro ĩhadibudoreñorā erā. ²⁴ Erā eropa dorera puhru erāre coregupu iri wihi poheca maja taribugue erāre api, taboamiji goberigue sihacu erā guburire bihačāpu. ²⁵ űami deco Pablo, Sila mera Goāmure serē ĩgure bayapeoñorā. Erā eropa bayacū peeñorā gajirā peresugue árīrā. ²⁶ Erā eropa bayacū ta iri wihi burigā űohmeyoro. Ero eropa űohmecū yujuro mera árīpehreri disiporori pārīmaapehrea wayoro. Peresugue árīrāre erā diriradari sā pārīsiri dija wayoro. ²⁷ Eropa wacū ĩagu, iri wihire coregupu wahgā, ĩgu űoserimijire aībeo, ĩgu basi űosediaripu. ²⁸ ĩgu eropa ĩcū ĩagu Pablo ĩgure burigā gaguinigu ĩpa arīpu.

—Mu basi űero iibiricāque. Árīpehrerā ōre āhraa gua, arīpu ĩgu erāre coregure.

²⁹ ĩgu eroparīcū peegu erāre coregupu sihāgodore, erā pohroge omagā Pablo, Sila guburi pohroge naragā merejapu ĩgu. ³⁰ Eropigu ĩgu erāre iri taribugue árīrāre aī wiria, serēpipu erāre.

—¿Dohpa iigucuri yahu Goāmu ĩgu yure taucū gamegu? arī serēpipu ĩgu.

³¹ —Jesucristore umupeoque mūhu. Mu acawererā sā ĩgure umupeoporo. Mua eropa ĩcū Goāmu muare taugucumi ĩgu pohro mua waboro dopa, arī wereñorā erā.

³²⁻³³ Erā eropa arīrisubu űami deco puhrugā árīyoro. Erā eropa arīra puhru erāre coredigu ĩgu ya wihigue aīgāpu erāre. ĩgu ya wihigue aīja, erā camire coepu ĩgu. ĩgu eropa coetuhajara puhru ĩgu acawererā mera Goāmu yare buhepu Pablo sā. Erāre ĩgu buhera puhru waiyepu. ³⁴ Erāre waiyetuhajara puhru erāre coredigu Pablo sāre bari peopu. Eropirā ĩgu ĩgu acawererā mera ōari buherire erā peera puhru burigā mucubiriñorā. Goāmure masinugañorā.

³⁵ Boyodiji merecũ ĩarã oparãpu erã surarare peresugue oboeñorã Pablo sãre wiudorerã. ³⁶ Erã eropa wiudorera pũhrũ iri wihire coregũpu Pablo sãre werepu.

—Oparã mũare wiudoreañorã. Eropirã gũiro mariro wirique, arĩpu ĩgu Pablo sãre.

³⁷ Eropa erã wiudiaquerecũ ta Pablo werepu surarare:

—Gua ñero iibirabũ. Eropirã gua ne dipuwaja mara. Bu gohra ta erã oparãpu masa bajarã erã ĩhurore yucu mera tãrama guare. Gua Roma majarã gaa arĩquerecũ ta guare tãrama. Tãratuhaja peresu iama guare. Eropirã dohpaguere masa erã ĩabiro wiudiana guare, guare erã ñero ĩirare guhyasiuro tariri, arĩrã. Oparã erã basi ta ahri aĩ wiurã ariporo guare, arĩpu Pablo surarare.

³⁸ ĩgu eropa arĩ werecũ peerã dujaa wereñorã oparãre surarapu. Erã eropa arĩ werera pũhrũ Pablo Sila mera Roma majarã erã arĩcũ masirã oparãpu gũĩ arĩñorã. ³⁹ Eropirã erã Pablo sã pohro ejarã, õpa arĩñorã:

—Ñero iibabũ gua mũare. Ne eropa dipaturi iisome, arĩñorã oparã Pablo sãre.

Eropa arĩtuhaja oparã erãre peresugue aĩ wiu, erã ya macare wiri-doreñorã. ⁴⁰ Eropirã Pablo Sila mera peresugue arĩñirã wiri, Lidia waĩcũgo ya wihigue eja, Jesu yarãre bocafĩñorã. Eropirã erã Jesu yarãre õaro wereñorã. Óaro siporãcũcũ iĩñorã erãre. Erã eropa iira pũhrũ Pablo Sila mera waha wañorã.

17

Tesalónica majarã guañorã Jesu yarã mera

¹ Eropirã erã Anfĩpoligue eja taria, Apoloniague eja taria, Tesalónicague ejañorã erã. Ero judio masa buheri wihi arĩyoro. ² Eropigu Pablo iri buheri wihigue wapũ ĩgu iiguaro dopa ta gaji macarigue arĩgu. Erogu eja, uñre semana gohra erã soorinũrĩre Sabadonũrĩre Goãmũ yare iribojegue erã gojarare masare buhe, irire erã mera werenigũpu Pablo. ³ Eropigu ĩgu Goãmũ yare werepu õpa arĩgu:

—Judio masa, mũa Opũ mũa coregu Cristo arĩpu masa ya arĩburire ñero tarĩbu. Eropigu ĩgu sĩria waha masa muriapu. Eropigu ĩhĩ Jesu yuhũ arĩ weregu, ĩgu Cristo gohra ta aħrimi marire taubu. ĩgu ta aħrimi mua coregu. Eropa ta werea Goãmũ yare erã gojarapũ, arĩ werepu Pablo.

⁴ ĩgu eroparĩcũ peerã bajamerãgã ero arĩrã “Diaye ta aħraa,” arĩñorã. Eropirã erã Pablo sã mera wañorã. Eropirã gajirã sã griego masa bajarã Goãmũre umupearãpu, Pablore peerã erã mera majarã nome sã, bajarã oparã nome sã, ĩgure peerã Jesu yarã dujañorã. Eropirã Pablo sã mera wañorã. ⁵ Judio masapu erã eropa iicũ ĩarã erãre ĩhaturiñorã. Eropirã erã ñerãre mohmebirãre bajarãre sihu gameneo, õpa arĩdoreñorã: “Pablo ĩgu mera majarã mera ñero iirã iima,” arĩ gaguĩniguidoreñorã erãre ĩri maca majarãre. Eropa gaguĩniguirã arĩpehrerã ĩri maca majarãre guacũ iĩñorã Pablo sã mera. Eropirã erã judio masa Jasõ ya wihigue ñaja Pablo sãre amariñorã erãre masaguere omorã. ⁶ Eropa amarã erãre bocabiriñorã. Eropirã Jasõre, gajirã Jesu yarã sãre ñeha tarawiriañorã erãre. Oparã pohrogue aĩ eja, õpa arĩ weresãñorã erã.

—Pablo sã masare arĩpehroguere garibotariañorã. Eropirã dohpaguere mari ya macaguere eratuħajama. ⁷ Eropigu ĩhĩ Jasõ erãre ĩgu ya wihigue ñajaridoreami. Erã arĩpehrerã mari weca opu Roma majagu ĩgu dorerire tarinũgama. “Gajigu mũa opu aħrimi. Jesu ĩgu ta aħrimi,” erã

erĩcũ mari opu César dorerire tarinũgama erã, arĩ weresãñorã judio masa erã oparãre.

⁸ Erã eropa arĩ weresãcũ peerã, arĩpehrerã masa, oparã sã gua “¿Dohpa wahari?” arĩ pepiñorã. ⁹ Eropirã oparã Jasõre, ïgu mera majarã sãre niyerure wajayedore, wiucãñorã.

Pablo Sila mera Bereague ejañorã

¹⁰ Iri eropa wacũ iri ñami ta mata Jesu yarã Pablo sãre dihbu obeocãñorã Bereague. Eroque eja judio masa buheri wihigue ñaja wañorã. ¹¹ Judio masa Berea majarãpu Tesalónica majarã tauro Goãmu yare õaro peerã arĩñorã. Eropirã erã Jesu yare erã peera puhru “¿Diaye ta àhriri?” arĩ masidiarã, umuri nucu Goãmu yare erã gojarapũre eropa buheniguicãñorã erã. ¹² Eropirã erã bajarã Jesure umupeoñorã. Griego masa sã, uma, oparã nome mera Jesure umupeoñorã. ¹³ Eropirã Pablo Bereague Goãmu yare ïgu buhecũ sãre peebeo Tesalónica majarã judio masa Bereague ejañorã. Eroque ejarã, Berea majarãre quere goroweoñorã. Pablo sã mera guacũ iññorã erã. ¹⁴ Erã eropa iicũ ïarã Jesu yarã Pabloure yojaro mera wuaria turogue obeoñorã. Eropigu Sila, Timoteo mera Bereague ta dujañorã. ¹⁵ Eropirã gajirã Pabloure Atenague aĩgã soñorã. ïgure sotuhaja maji dujaa wañorã. Eroque ejarã,

—Yojaro mera waha, wapicurã waque Pabloure, arĩ wereñorã Silare, Timoteo sãre. Eropa arĩ weredorepu Pablo erãre.

Pablo Atenague arĩpu

¹⁶ Eropigu Pablo Atenague coregu iipu Sila, Timoteo sãre. Eropigu Atena majarã erã goãmarã wéanirãre bajarã erã opacũ ïagu Pablo burigã bujawerepu erã mera. ¹⁷ Eropa bujaweregu judio masa buheri wihigue judio masa mera duyaso wereniguipu ïgu. Eropigu daja judio masa arĩbirã mera sãre wereniguipu ïgu. Erã yujurãyeri Goãmure umupeorã arĩñorã. Eropigu Pablo iri maca deco umuri nucu ïgu pohrogue eropa curimaji ñajarã mera wereniguipu. ¹⁸ Gajirã epicúreo yare buherã, estoico yare buherã sã Pablo mera wereniguñorã.

—¿Ihĩ wereniguiri pehrebigu dohpa arĩ wereniguigu iiri ïgu? arĩñorã erã.

Pablo Jesu yare, ïgu masa muriarare ïgu werecũ peerã õpa arĩ pepiriñorã erã masa. “Ïgu gajirã goãmarãre weregu iicumi,” arĩ pepiriñorã erã. ¹⁹ Erã peera puhru erã wereniguiroque Areópago waicurogue Pabloure aĩgãñorã.

—I buheri, mama buherire muhu dohpague wererare masidiaa gua. ²⁰ Mu buheri gajiropa àhraa. Eropirã gua irire masidiaa, arĩñorã erã Pabloure.

²¹ Arĩpehrerã Atena majarã umuri nucu mama buherire wereniguidiañorã. Eropirã irire peediañorã. Gaji yeba majarã sã Atenague erarã eropa dihta iidiañorã. Eropirã Pablo ïgu wererire peediañorã erã.

²² Eropigu Pablo Areópago waicuro wahgãnũgaja õpa arĩ werepu:

—Atena majarã, bajarã goãmarã wéanirãre mua burigã umupeocũ masia yuhu. ²³ I maca mua ya macare goãmarã wéanirãre mua umupeori gororire ïhacuriabu yuhu. Eropa ïhacurigu ya sã yuju gorogue mua goja apirare buheabu. “Goãmu, mari masibigu yare umupeori goro àhraa,” arĩ gojarare buheabu mua irire apiroguere. Mua ïgure masibiquererã ïgure umupeoabu mua. ïgure ta mua masibigure weregu iiaa yuhu muare.

²⁴ “Goãmu árîpehreri yebare, yeba maja sãre deyoro moañumi. Īgu umarore, yebare opu árîgu Īgu masa erã iira wiri árîbeami. ²⁵ Eropigu Īgu mari árîricurire ogu mari itamurire gamebeami. Īgu mojomorocugu árîbeami.

²⁶ “Īgu yujugu umu mera árîpehreri yeba majarãre masare iinñumi. Eropigu árîpehreri yebaguere marire apiñumi Īgu. “Ipẽ yoari boje õguere árîrãcoma,” arîgu queo apiñumi marire. ²⁷ “Erã amarã yare bocarãcoma,” arî pepiñumi Goãmu. Eropigu Goãmu yoarogue árîbeami. Mari mera ta ãhrimi. Ōpa arî gojañumi gajigu. ²⁸ “Marire árîcũ iimi Īgu. Īgu maricũ mariboya mari sã. Eropigu masa nucure eropa árîniguicãmi Īgu,” arî gojañumi. Mũa mera majarã iribojegue majarã bayarire õaro gojarã erã gojara ãhraa iri. “Mari sã Goãmu porã ãhraa,” arî gojañorã erã. ²⁹ Eropirã mari Īgu porã árîrã, goãmarã wéanirãre, oro, plata, utã mera mũa gamero mũa iinirãre “Goãmu ãhrimi,” arî pepibiricãque mũa. ³⁰ Iribojegue masa masibirã erã árînicũ erã ñero iiquerecũ ta Goãmu eropa ñacãniñumi. Eropa iiqueregu dohpaguepure árîpehreri yeba majarãre erã ñerire bujaweredoremi Goãmu. ³¹ Puhru Īgu queorinu árîpehreri yeba majarãre diaye ta beyegucumi Goãmu õarãre, ñerãre. Īgu beyedore Īgu apidiro dopa Jesupu beyegucumi. Jesure sîridiguguer masupu Īgu. Eropa masugu “Ihĩ yu apidigu ãhrimi,” arî, ñmugũ iipu Goãmu masare, arî werepu Pablo Atena majarãre.

³² Īgu eroparicũ sirinirã masa mûriarare Īgu wereniguicũ peerã gajirã ĩgure wereyañorã.

Gajirãpu õpa arîñorã:

—Dipaturi ire mu werecũ gua peediaa daja, arîñorã erã Pablöre.

³³ Erã eropa arîra puhru Pablo waha wapũ. ³⁴ Eropirã bajamerãgã Īgu mera árîrã Jesure umupeonugañorã. Dionisio Areópago majagu oparã mera majagu Jesure umupeonugapũ. Dámari waicũgo sã, gajirã mera Jesure umupeonugapũ.

18

Pablo Corintogue árîpu

¹ Eropigu Pablo Atenague árîdigũ waha Corinto waicũri macague ejapu. ² Erogue ejagu judio masũ Aquila waicũgure bocajapu Īgu. Arîpehrerã weca opu Claudio waicũgu judio masare Romague árîrãre Īgu cóacũ Aquilapu Īgu marapo Priscila mera waha, Corintogue ejapu. Aquilapu Ponto waicũri yeba masa dehyoadigu árîpu. Eropirã erã Corintogue árîcũ Pablo erã pohrogue ejapu. ³ Aquila sã suhri wirire iirã árîñorã. Pablo sã suhri wirire iigu ta árîpu. Eropigu Īgu erã mera mohme ero dujapu. ⁴ Eropigu Pablo Sabado árîcũ semanari nucũ judio masa erã buheri wihigue judio masare, judio masa árîbirã sãre Goãmu yare werepu. —Ihĩ Īgu wereniguiri diaye ta ãhraa, arîñorã masapu erã peera puhru.

⁵ Eropigu Sila, Timoteo mera Macedoniague árîñirã Pablo pohrogue ejañorã. Erogue erã ejara puhru, Pablo suhri wiri mohmerire duhcã umuri nucũ judio masare buhemuripũ. —Jesucristo marire taubu mari coredigu ta ãhrimi, arî werepu erãre. ⁶ Īgu eropa arî buhequerecũ ta judio masapu ĩgure peediabiriñorã. Eropirã erã ñero quere goroweoñorã ĩgure. Erã eropa iicũ Pablo erãre ĩgu turibodiro dopa ta, ĩgu suhri maja mera pasiri mehpiũ.

—Mua ya dipuwaja peamegue warāca. Goāmu ĩgu dorediro dopa ta muare buherabu yuha. Muapu yure peediabirabu. Dohpaguere yupu judio masa áribirāre buhegu wagura, arĩpu Pablo judio masare.

⁷ ĩgu eropa arĩra puhru ĩgu erogue árdigu waha, Tito Justo waicugu ya wihigue eja. Justo Goāmure umupeogu arĩpu. ĩgu ya wihipu judio masa buheri wihi pohro arĩyoro. ⁸ Eropirā Crispo waicugu iri buheri wihi opu, ĩgu marapo, erā porā mera mari Opu Jesure umupeonorā. Eropirā gajirā Corinto majarā bajarā Goāmu yare peerā, Jesure umupeonorā. Erā eropa umupeorā árcū erāre waíyepu. ⁹⁻¹⁰ Yuju ñami Goāmu quēroque werepu Pablore. ĩgure opa arĩpu:

—Mu mera āhraa. I macare yaharā bajarā āhrima. Eropirā gajirā masa mere ñero iimasibeama. Eropigu güibita muhu. Eropigu yahare burigā wereque. Eropa pepibiricāque, arĩ werepu Goāmu Pablore.

¹¹ Eropigu yuju bojori ñaro gaji bojori deco gohra ero majarāre Goāmu yare buhe, ármuripu Pablo.

¹² ĩgu eropa árrisubú Galiō waicugu Acaya yeba majarā opu ĩgu árcū, judio masa árípehrerā yujuropa ta Pablore ñero weresārā erañorā. ĩgure ñeha dipuwaja moadorerā pohroque aigāñorā erā Galiō pohroque. ¹³ Aigā opa arĩ weresāñorā ĩgure:

—Ihĩ masare Goāmure umupeodoregu i yeba maja doreripure coādoremi, arĩ weresāñorā judio masa dipuwaja moadorerāre.

¹⁴ Erā eropa arĩ weresācū peegu Pablopū erāre werediaripu. Eropigu Galiō opupu judio masare werepu.

—Ihĩ ñerire iidigu árcū gua Romano majarā ya dorerire tarinugagu árcū, muare yuhriboaya yuha. ¹⁵ Mua ya doreripure ihĩ tarinugagu ĩgu árcū mua basi ire amuque. Ire masibea yuha mua mera, arĩ werepu ĩgu judio masare.

¹⁶ Eropa arĩgu ta erāre Pablore weresāñirāre ĩgu ya taribugue árrirāre cohā wiucāpu ĩgu. ¹⁷ ĩgu eropa cohā wiura puhru árípehrerā iri wihi árrirā Sóstenere judio masa buheri wihi opure Jesu yagure ñeha, dipuwaja moadorerā pohroque pañorā ĩgure. Erā eropa pacū ĩagu Galiō eropa ĩacāpu.

Pablo Antioquíague dujaa wapū daja

¹⁸ Eropigu Pablo Corintogue yoari boje árdigu “Wagu iiaa,” arĩ goeriserepu ĩgu Jesu yarāre.

ĩgu eropa arĩra puhru ĩgu Priscila, Aquila mera Siria yebague árriri macague taribuja wapū. Cencrea waicuri macague erā taribujara puhru Pablo Goāmure “Ōpa mere iibasagura,” ĩgu arĩrare iituhajagu arĩpu. Eropigu eropa iigu judio masa erā iiro dopa ta ĩgu poarire wuapehocādorepu. ¹⁹ Eropirā erā Efeso waicuri macague eja, Priscilare, Aquila säre apipu Pablopū. Erāre ero api, ĩgupu judio masa erā buheri wihigue wapū. Iri wihigue eja, Goāmu yare werepu. Eropa weregu judio masa mera duyaso werenigupu. ²⁰ ĩgu eropa werera puhru ĩgure erā mera dujadoreriñorā erā. Erā eroparíquerecū,

—Dujabea mua mera, arĩpu Pablo erāre. ²¹ Eropa arĩgu ta,

—Jerusaléngue yure waro gahmea. Bosenure ĩagu wabu iiaa. Eropigu wagu iiaa. Goāmu gamecū dipaturi dujariboca, arĩpu erāre.

ĩgu eropa arĩtuhaja Efesogue árdigu taribuja wapū. ²² Eropigu Cesareague taribujaja tarigā, Jerusaléngue eja. Eroque eja, ero majarā

Jesu yaräre “¿Ne áhriiri mua?” arí, eräre íha taria Antioquíague ejapu daja. ²³ Ero bajamenuri áripu. Ero áridigu tariapu. Galacia yeba áriiri macarigue, Frigia yeba áriiri macarigue dipaturi eja, iri macari majaräre Jesu yaräre buhe ðaro mucubiricü iipu.

Apolo waicugu Efesogue buhepu

²⁴ Írisubure, judio masu Apolo waicugu, Alejandria maca majagu Efesogue ejapu. Ígu ðaro weremehregu áripu. Eropigu ígu Goãmu ígu gojarare ðaro masipu. ²⁵ Gajigu ígure Goãmu yare weretuhamuripu. Eropigu ígu Ñu waíyegu ígu buheri dihtare masipu. Eropa áriqueregu ígu buhigã mucubiriri mera Jesu yare ðaro buhepu. ²⁶ Eropigu judio masa erã buheri wihigue ígu güiro mariro eräre buhenugapu. Ígu eropa buhecü erã peera puhru Priscila Aquila mera ígure erã mera aigãñorã. Goãmu yare ðaro diaye ðaro ígu werepehobiricü íarã diaye werepehocãñorã erã ígure. ²⁷⁻²⁸ Eropigu ígu Apolopu Acaya yebague ígu wadiacü Jesu yarã ígure “Ïaro waque,” arí, erã gojarapürire oñorã ígure. Iripüri Acayague áriirã Jesu yaräre Apolore ðaro bocatiridoreripüri áriyoro. Eropigu Apolo erogue ejagu ero majaräre Jesure umupeoräre Goãmu mahiri mera ðaro itamupu. Judio masare iri maca áriiräre ðpa arí werepu:

—Goãmu ígu obeodigu mua coredigu áhrimi Jesu. Cristo gohra áhrimi, arí werepu judio masare gajirã masa erã íaro.

Ígu eroparicü, Goãmu wereniguiiri gojarapüre ðaro queroro werecü erã pee “Diaye áribeaa,” arímasibiriñorã erã. Eropigu Jesu mahiri mera Jesure umupeoräre ígu ðaro itamupu eräre Apolo.

19

Pablo Efesogue wapu

¹ Corintogue Apolo ígu áriisubu, Pablopü utã yucague muri taria, Efesogue ejapu. Erogue eja, yujurãyeri Jesu yaräre bocajapu. ² Eräre ígu bocajara puhru ígu eräre serëpi íapu.

—¿Mua Jesure umupeora puhru mũapu Espiritu Santore opanugari? arí serëpi íapu Pablo.

Ígu eroparicü peerã ígure ðpa arí wereñorã erã:

—“Espiritu Santo áhrimi,” arí ne werebirama guare, arí wereñorã erã.

³ Erã eropa arí werera puhru Pablo eräre serëpi íapu daja:

—¿Noa ya buherire mua peera puhru waíyeari mũare? arípu ígu daja.

—Ñu ya buherire gaa peera puhru waíyema guare, arí wereñorã erã.

⁴ Erã eroparicü peegu ðpa arípu Pablo:

—Masa erã ñeri iirare erã duhucü íagu waíyepu Ñu. Eropiro ígu waíyeripu erã ñeri iirare erã duhurare masare íhmuburi áriyoro. Eropigu gajino sãre werenemopu Ñu. “Yu puhru aribure ígure umupeoque mua,” arípu Ñu masare. Eropa arígu Jesure ta umupeodoregu iipu, arí werepu Pablo eräre.

⁵ Ígu eroparicü erã peera puhru, Jesu wai mera waíyepu eräre.

⁶ Eropigu Pablo erã yujurãyeri weca ígu mojotorire ígu duhpeocü, Espiritu Santopü erapu erãguere. Ígu eropa erara puhru erãpu peeyamariri yare werenigui, Goãmu yare wereñorã. ⁷ Erã áripehrerã doce uma erã áriñorã.

⁸ Puhru Pablo judio masa erã buheri wihigue ñaja, urerã abe gohra güiro mariro Goãmu ígu opu áriirare were, wereniguiipu erã mera. Ígure

erā eropa peera puhru “I diaye ta āhraa,” arīñorā erā. ⁹ Gajirāpu peediabiriñorā. Eropirā erā masa erā peeuro iri ōare buherire ñero arī werenigui ihmūñorā. Erā eroparicū peegu Pablopū Jesu yarāre sihu wiria, gajipugue waha wapū. Waha, Tirano waicugu ya buheri wihigue umuri nucu masare Goāmū yare werepu igū. ¹⁰ Pe bojori gohra buhepu erāre. Īgu eropa buhecū arīpehrerā Asia yeba majarā judio masa, judio masa arībirā mera mari Opū Jesu yare peeñorā. ¹¹ Eropigu Goāmū turari mera Pablo bajasuburi deyro moarire ii ihmupū. ¹² Pablo Īgu suhri gasirore, Īgu suhrirore Īgu dupū pēhrera gasirore dorecurāre aīgāñorā gajirāpu. Masa dorecurā iri suhrire pēhrerā ōarā wañorā. Eropirā watēa ñajasūñirā iri suhrire erā pēhrera puhru watēa wiria wañorā erāre.

¹³⁻¹⁴ Gajirā judio masa eropa curiniguirā watēare cōārā judio masa yea arīñorā. Esceva waicugu siete Īgu porā arīñorā. Escevapū judio masū pahia opū arīpu. Eropirā erā Pablo Īgu iidiro dopa ta Jesu turari mera watēare cōādiariñorā. Eropirā watēa ñajasūdigure boca watēare doreriñorā erā.

—Jesu Pablo Īgu weregu Īgu turari mera dorea muare. Duhuque ĩre, arīñorā erā. ¹⁵ Watēare erā wadorera puhru, watēapu masugure ōpa arīñorā erāre.

—Jesure masia. Pablo säre masia. Mūapure masibea, arīñorā watēa erāre.

¹⁶ Erā eroparicū ta watēa ñajasūdigupu burigā erāre ñehamaa wapū. Eropigu erāre ñetariaro iipu. Īgu eropa iira puhru suhri marirā, camicūrā oma wiriañorā erā iri wihire watēa cōādiarāpu. ¹⁷ Erā eropa iira puhru arīpehrerā Efeso majarā, judio masa, judio masa arībirā mera irire pee, gūitariacāñorā erā. Eropirā mari Opū Jesu yare wereyaro mariro wereniguiñorā masapu.

¹⁸ Eropirā masa bajarā Jesure umupeorā erā ñero iirare wererā arīñorā. ¹⁹ Erā mera majarā bajarā yea arīñorā. Eropirā erā erā gojarapūrire purisiriri wereripūrire erogue aīgari, masa erā ĩaro iripūrire soe cōācāñorā erā. Iripūri wajacurare erā queocū, arīpehreripūri cincuenta mil plata arīripūri wajacuriyoro iripūri. ²⁰ Eropirā Goāmū yare gamerā bajarā wañorā. Goāmū turari mera Īgu yarā wañorā.

²¹ Erā eropa wara puhru Pablo ōpa arī pepipū: “Macedonia yeba ejamuhta, iri yebare taria Acaya yebagure ejagura. Iri yebare yū ejara puhru Jerusalengue wagura. Iri macare yū ejara puhru Romague ĩagu wagura,” arī pepipū Pablo. ²² Eropigu perāre Īgure itamurāre Īgu core obeomūhtapu Macedonia yebague. Timoteo Erasto sā arīñorā erā. Eropigu Pablopū yujugu ta dujapu Asia yebague.

Efesogue masa gua gaguñiguñorā

²³ Irisubure Efesogue Jesu yare gajirā gamebirā Pablo säre ĩhaturiñorā.

²⁴ Yujugu platare mohmegū Demetrio waicugu arīpu. Īgu plata mera erā goāmo Artemisa waicugo umupeori wihi wéara wirire mūta wirigāre iigu arīpu. Eropigu Īgu gajirā plata mohmerā mera erā wéanirāre wūaro dua wajatamuriñorā erā. ²⁵ Eropigu Demetrio gajirā plata mohmerāre sihu gameneo, werepu erāre.

—Peeque mūa. I mohmeri mera mari wéanirā mera wūaro mari wajatarare masia mūa. ²⁶ Īhī Pablo Īgu iirare Īgu buhera säre masia mūa. Ōpa arī buhemi Īgu: “Goāmarā wéanirā masa erā iinirā ojocarirā

árĭbeama,” arĭ weremurami ĭgu. ĭgu eroparĭcũ peerã, Efeso majarã, árĭpehrero Asia yeba majarã sã ĭgu buherare “Diaye ta ähraa,” arãñorã irire. ²⁷ Eropa arĭrã mari mohmerire mari wéarare masa gamesome. Eropirã mari goãmo wuago Artemisa ya wihire cóãbocoma. Eropirã árĭpehrerã Asia yeba majarã, árĭpehreri yeba majarã igore umupeosome pare. Eropirã masa igore masibirã mari wéarare asũsome, arĭpũ Demetrio erãre.

²⁸ ĭgu eroparĭcũ peerã burigã gua, gaguiniguiñorã:

—Artemisa Efeso majarã yago goãmo turago ährimo, arĭ gaguiniguiñorã erãpũ.

²⁹ Erã eropa gaguiniguiçũ Efeso majarã árĭpehrerã sã gaguiniguitaria wa pee masiri pehrea wañorã. Eropa warã Gayore, Aristarco sãre ñeha, masa erã gamenererogue erãre taragãñorã. Gayo, Aristarco mera Macedonia majarã árĭñorã. Pablo mera curirã árĭñorã. ³⁰ Erãre ñeacũ ĭha Pablopũ masa pohro weregu wadiaripũ. Jesu yarãpũ ĭgure wadobiriniñorã.

³¹ Eropirã gajirã sã iri yeba majarã oparã, Pablo mera majarã árĭrã erã pohro majarãre weredoreñorã Pablore:

—Masa erã gamenererogue wabiricãque, arĭ weredoreñorã oparã Pablore.

³² Eropirã ero gamenererã mera majarãpũ bajarã “¿Duhpimorã mari gamenererã iiri?” arĭ masibiriniñorã. Eropirã erã gaguiniguinemoñorã. ĭpũgue árĭrã gajiropa arĭ gaguinigui, gajirã sã gajiropa arĭ gaguiniguiñorã.

³³ Eropirã judio masapũ Alejandro waicũgure masare weredoreriniñorã. Eropigũ Alejandro “Ejarimaricãque,” arĭgu ĭgu mojoto mera paatupũ. “Oã guare judio masare turirã iima,” arĭ pepigũ judio masare cáhmotadiagu wereniguiripũ. ³⁴ ĭgu eropa wereniguidiaquerecũ judio masũ ĭgu árĭcũ ĭarã masa árĭpehrerã yujuro mera pe hora gaguiniguiñorã.

—Artemisa, Efeso majarã yago mari goãmo turago ährimo, arĭ, gaguiniguiñorã erã.

³⁵ Erã eropa arĭ gaguiniguiçũ ĭagu Efeso majarã oparãre itamugũ masare “Ejarimaricãque,” arĭ, werepũ erãre.

—Mũa Efeso majarã peeque. Mari Efeso majarã turago Artemisa ya wihirerã mari árĭcũ árĭpehreri yeba majarã masima. Eropirã igo wéarare umarogue dijaridigore diburã mari árĭcũ sãre masima masa. ³⁶ Eropirã “I diaye árĭbeaa,” arĭmasibeama. Eropirã guabiricãque mũa. Ōaro pepique mũa.

³⁷ Oã mũa ñeagãrirã mari goãmore ñero arĭ wereniguibirama. Eropirã erã goãmarã ya wiriguere ñaja, yajabirama. Eropirã ōaro ĭique mũa. ³⁸ Demetrio, plata mohmerã mera oãre mũa ñearãre weresãdiarã, dipuwaja moaropure wereporo erã. Erã oparãre oãre weresãmasima.

³⁹ Mũa gajino iidiarã, ōaro mera irire gamenere ĭique. Mũa iiro dopa ĭinembiricãque. ⁴⁰ Dohpagãre mũa gua, gaguinirare mari oparã peerã, erã marire weresãbocoma. “Marire cóãrã ĭicoma,” arĭ pepirãcoma oparã marire. Eropirã mari arĭ gaguiniguirare erãre ōaro diaye weremasibeaa mari, arĭpũ oparãre itamugupũ masare. ⁴¹ Eropa arĭ weretuhaja, “Tripãta ähraa. Waque,” arĭpũ ĭgu masare.

20

Macedonia yebague sãre, Grecia yebague sãre Pablo ejaɓu

¹ Erã eropa wara pũhru, Pablopũ Jesu yarãre sihu gameneo werepũ. Weretuhaja, mojoto ñeha, goeriserepũ. Goeriseretuhaja, Macedoniague

waha wapu. ² Erogue eja were, ero majarã Jesu yarãre mucubiricũ iipu ïgu. Erãre weretuhaja, Greciague ejapu ïgu. ³ Erore ïgu urerã abe gohra árïpu. Ero árïgu Siria yebague taribuja wadiaripu. Eropirã judio masa duhri, ïgure ñeadiariñorã. Irire pee Pablo gaji mague Macedonia wari mague waha wapu. ⁴ Eropa wagu Asiague ta ejapu. Ero Berea majagu Sópater waicugu Pablöre wapicugãpu. Eropirã Tesalónica majarã Aristarco, Segundo sã ïgure wapicugãñorã. Eropirã Asia majarã Tíquico, Trófimo sã Asiague ïgure wapicugãñorã. Derbe majagu Gayo waicugu Timoteo sã ïgu mera wañorã. ⁵ ïgu mera majarã ïgu core waha, Troa waicuri macague ïgure coreñorã. ⁶ Erã eropa corecũ bugabiriri panre bari bosenu puhru guapu Filipogue árñinã dohodiru mera waha, cinco nuri taribujarã Troague gua ejabu. Siete nuri gohra árïbu gua eroguerẽ.

Troague Pablo curigu wapu

⁷ Soorinu árïcũ Jesu yarã gamenere panre duhpeoñorã Goãmu yare bocatïrimorã. Erã eropa iiboro core Pablo erãre buhepu. Eropigu Pablo gajinupure wabu árïgu yoari boje ïgu buhepu. Ñami deco mera buhe duhubu iiripu. ⁸ Eropirã erã umaro maja taribugue baja dipu sihãgori dipu árïri taribugue gamenereñorã. ⁹ Pablöre erã peerisubu mamu Eutico waicugu ventana weca muribejaja doapu. Eropigu Pablo erãre yoari boje buhenemocũ ïgu mamure wuja ariyoro. Eropigu ïgu carïa wa uhre caya wecague doadigu majimadija wapu. ïgu eropa yuhridijara puhru erã ïgure sïriadiuguere aïwahgũ doboñorã. ¹⁰ Erã eropa iicũ ïagu Pablo dijari, mamure papeoru. ïgu eropa iira puhru Jesu yarãre werepu ïgu:
—Sïporã ñebiricãque. Sïribeamĩ ihĩ. Ojocarimi, arïpu Pablopũ.

¹¹⁻¹² ïgu eroparïcũ mamupu sïridigupu masa wapu. ïgu masacũ ïha erã mucubiritaria wañorã. Eropa mucubirãrã umaro maja taribugue muria, panre duhpeoñorã bocatïrimorã. Erã eropa iira puhru yoari boje Pablo erãre buhepu daja. Boyoboro coregã erãre buheduhupu. Buhetuhajacã waha wapu Pablo.

Pablo Troague árïdigu waha, Miletogue ejapu

¹³ Pablo core dohodiru mera Asogue guapu ejamuhtabu. Pablopũ mague wadiami. Pablo ïgu arïdiro dopa ta Asogue ïgure gua bocatïribũ. ¹⁴ ïgure gua bocatïricũ, gua mera ñajami dohodirugue. Iriru mera waha, Mitilenegue gua ejabu. ¹⁵ Eroguerẽ eja taria gajinu Quïore tariabu gua. Gajinu Samogue ejabu gua. Gua carïra puhru gajinupure Miletogue ejabu pare gua. ¹⁶ Pablo Pentecostenũ gohra Jerusalénguerẽ ejadiami. Eropigu Asia yebague yoari boje árïdiabirimi. Eropigu Efesore diaye taria, Miletogue ejatuhajabu gua.

Pablo Efeso majarã Jesu yarã oparãre werepu

¹⁷ Eropigu Pablo Miletogue árïgu, Goãmu yarã Efeso majarã Jesu yarã oparãre sihubeoimi ïgu. ¹⁸ Eropa ïgu sihubeoira puhru erã Pablo pohrogue erama. Erã eracũ ïagu erãre Pablo weremi.

—Asiague ne eragu mua mera yu iirare masia mua. ¹⁹ Mua mera árïgu ne gajiropa arïro mariro Jesu mari Opũ yare iimuribu yuhu. Eropigu muare mojomoro iabu. “Muare tarinũgaa,” arïbirimuribu yuhu. Judio masa erã yure ñero iiquerecũ ta Goãmu yare iimuribu yuhu. ²⁰ Eropigu mua ñaro waburi dihtare muare buhepehocãbu yuhu. Masa erã ñaro mua wirigue sãre buhebu yuhu. ²¹ Eropigu judio masare, judio masa árïbirã

sāre yujuropa ta buhebu yuhu. “Mua űerire bujawereque. Goāmu yare gohrotoque. Eropirā Jesu mari Opure umupeoque,” arī weremuribu yuhu. ²² Eropigu Espiritu Santo ĩgu dorediro dopa ta dohpaguere Jerusalēngue wagu iiaa. Yu erogue wagu yu gajiropa waborore masibea yuhu. ²³ Őpa arāmi Espiritu Santo yare: “Jerusalēngue muhu űero tariguca. Eropirā mre peresu iirācoma,” arāmi Espiritu Santo yare. Dohpaguere yu ejara macari nucuque eropa arī wereama yare. Jerusalēngue wagu Espiritu Santo ĩgu werera dihtare masia. ²⁴ Eropigu ōari buherire, Goāmu ĩgu mahiri buherire werebu āhraa yuhu. Jesu mari Opu ĩgu ya ārīburire iipethodiaa yuhu. Ire ĩgu ārīgu, yu sīriborore giūbeaa yuhu.

²⁵ “Eropigu mua mera ārīgu Goāmu ĩgu opu ārīrare weremuribu yuhu muare. Mua yu eropa arī buhenirāre ne dipaturi muare ĩasome yuhu. Ire masia yuhu. ²⁶⁻²⁷ Eropa masīgu dohpagāre ire werea muare. Arīpehri Goāmu yare werebu yuhu muare. Eropirā ārīpehriā mua mera majarā Goāmu yare gamebirā erā ārīcū yaha dipuwaja ārībeaa. ²⁸⁻²⁹ Mua basi ōaro iique. Eropirā mua Jesu yarāre Espiritu Santo muare ĩgu ĩhadibudorerare ĩhadibuque. Ovejare ĩhadiburā ovejare erā ĩhadiburo dopa ta Goāmu yarā sāre ĩhadibuque mua. Goāmu magu ĩgu sīrigu ĩgu di cōaro mera Goāmu erāre ĩgu yarā ārīmorā iidi ārīmi. Yuhu ōre wara puhru gajirā űerāpu mua pohro ahri erā buheri mera muare goroweo dūca waricū iirācoma. Eropirā Jesu yarāre ōaro ĩhadibuque. ³⁰ Puhruquere gajirā mua mera majarā ta Jesu yarāre guya, gajī buherire peedorerācoma. Erā eropa peedorecū erā peerācoma. ³¹ Eropirā ōaro iique mua. Ūmuri nucu, űamiri nucu mojomoro ĩari mera buhemuribu yuhu muare. Ūhre bojori gohra ōaro buhebu mua ārīpehriāre. Irire yu buhera ōaro guāniguicāque mua.

³² “Dohpaguere yu wara puhru Goāmu muare ĩhadibugucumi. ĩgu mahiri buherire mua buherā ōaro ārīrāca mua. Goāmu ĩgu buheri mera muare ĩgu yarāre ōaro itamumasimi. Eropigu ĩgu yarā dihtare ĩgu iidiadiro dopa ta mua tamerare ōaro iigucumi. ³³ Mua niyeru oparire, mua suhri opari sāre “Yare oque,” arībirimuribu. ³⁴ Yu basi mohme wajatabu yaha ārīburire. Eropigu yu gamerire, yu mera majarā erā gameri sāre yu mohme wajatarā mera aīmuribu. Yuhu eropa iirare masia mua. ³⁵ Mari ōpa burīgā mohmerā gajino moorāre itamuro gahmea marire. Ire muare ĩi ĩhumuribu yuhu. Jesu mari Opu ĩgu arīrare guāaque mua. “ĩgu ocū ĩhadigu taribu odigupu mucubirimi,” arīpu Jesu ĩgu basi, arī weremi Pablo Jesu yarāre.

³⁶ Eropa arītuhaja Pablo erā mera mereja, Goāmure serēma. ³⁷ ĩgu eropa serētuhajacū erā ārīpehriā Pablora pabua wayuporā mimi ore goeriserema. ³⁸ “Muare dipaturi ĩasome yuhu,” ĩgu arīcū peerā burīgā bujawerema erā. Eropirā erā ĩgure tuunrusia buhama peramague. Erogue ĩgure ĩhanrusiasama gua wacū.

21

Pablo dipaturi Jerusalēngue wapu

¹ Jesu yarāre “Wagu iiaa,” arī, dohodiru mera, Cos waīcūri nūgurogue diaye waha taribujabu gua. Gajinu Roda waīcūri nūgurogue taribujaja, taria, Pátara waīcūri macague ejabu gua. ² Pátara ārīrā, Feniciague waburidire dohodire bocaabu gua. Eropirā iriru mera wabu gua.

³ Eropa warā Chipre waicuri nugurore diaye ta iha tariabu gua. Copu dujabu iri nuguro. Iri nugurore taria, Siria waicuri yebague ejabu gua. Eropirā dohodiru maja doberire dohodiru majagu Tiro waicuri maca iḡu durimujucū, ero payanibu. ⁴ Ero Jesu yarāre iārā, siete nuri gohra dujanibu gua iri maca ta. Eropirā ero majarā Jesu yarā Espiritu Santo iḡu werediro dopa ta erā Pablora Jerusaléngue wadorebiririma. ⁵ Erā eropa arīquerecū iri macare siete nuri gua árīra puhru, waha wabu daja. Gua waboro coregā árīpehrerā Jesu yarā, erā marasā nome mera, erā porā mera, maca turo pohro guare ihadujarā wama. Eropirā árīpehrerā gua imiporogue eja, mereja Goāmure serēbu. ⁶ Gua eropa serēra puhru, “Warā iiaa,” arī, erāre pabuatuhaja goeriseretuhaja waha wabu gua. Gua wacū ihanurusia, erāpu majaa wama erā ya wirīgue.

⁷ Tiro waicuri macare maja tariabu gua. Eropirā Tolemaidague tuhajabu gua. Ero ta wuariyare watubu. Iri macare eja, Jesu yarāre “Acawererā, źähriri mua?” arī, yujunu erā mera árīriba. ⁸ Eropirā iri maca ma buharo árīcū gajinu daja Pablo mera mague wabu gua Cesarea waicuri macague warā. Eroque eja, ōari buherire weregu Felipe waicugu ya wihigue ejabu. Eropirā iḡu mera dujabu gua. Felipe Jesu yarā erā siete beyenirā mera majagu árīmi. ⁹ Eropigu iḡu wapicurā nome pagu árīmi. Erā nomepu Goāmu yare wererā nome árīma. ¹⁰⁻¹¹ Eroque gua bajamenuri gua árīra puhru, Agabo waicugu Goamu yare weremūtagu Judeague árīgu guare iḡu erami. Eropigu iḡu Pablo yadare tuādiuridare ai, iḡu basi iḡu guburire, iḡu mojotorire diri ihmu wereyūmi.

—Ōpa arīmi Espiritu Santo. “Idare opagu Jerusaléngue iḡu ejacū, judio masa eropa ta dirirācoma iḡure. Dirituhaja, judio masa árībirāre orācoma erā iḡure,” arīmi Espiritu Santo, arī wereyūmi Agabo.

¹² Iḡu eroparīcū peerā, gua Cesarea majarā mera Pablora burigā mahibu. Iḡure “Jerusaléngue wabiricāque,” arīriba. ¹³ Gua eroparīcū Pablopu yuhrimi:

—¿Dohpa arī orerā iiri mua? Yurure bujawerecū iiaa mua. Erā yure peresu iicū ōaroca. Yuhu Jerusaléngue Jesu mari Opu yare yu iira waja yu síricū ōaroca, arīmi Pablo guare.

¹⁴ “Wabeaa,” iḡu arīcū peediarā iiribu gua. Iḡu “Wagura,” iḡu arīcū, eropa pepicābu gua. Ōpa arību:

—Mari Opu iḡu gamero dopa ta iiporo, arību gua.

¹⁵ Irire weretamutu, gua yare ahmu, waha wabu daja Jerusaléngue warā. ¹⁶ Eroque gua wacū bajamerāgā Cesarea majarā Jesu yarāpu gua mera wama. Eropirā Jerusaléngue eja erā mera majagu Mnasón waicugu ya wihigue ejabu gua. Mnasón Chipre majagu iḡu yoari boje Jesu buhegu árīmi. Eropirā iḡu ya wihi gua árīguri wihi árību. Eropirā Jerusaléngue ejabu gua.

Pablo Santiagore iḡu wapu

¹⁷ Jerusaléngue gua ejacū, ero majarā Jesu yarāpu “¿Erarari?” arī, mucubiriri mera bocatūrima guare. ¹⁸ Gajinu Pablo gua mera Santiagore iḡu ejami. Gua erogue ejacū ero árīpehrerā Jesu yarā oparā árīma. ¹⁹ Eropigu Pablo erāre iḡu mojoto űeara puhru judio masa árībirāre iḡu buherare werepehomi. Goāmu iḡu itamuri mera iḡu iirare werepehomi Pablo Jesu yarāre. ²⁰ Iḡu eropa arī werecū peerā,

—Goãmu òagu, turagu àhrimi, arĩ umupeoma erãpu. Eropa arĩtuhaja erã Pablora òpa arĩ werema.

—Acaweregu, dohpaguere bajarã judio masa Jesure umupeorã àhrima. Muñu irire masia. Eropirã erã òpa arĩ pepima: “Goãmu Ìgu dorerire, Moisegue marire Ìgu apirare marire ipehoro gahmea,” arĩrã iima. ²¹ Òpa arĩnemoma erã. “Gajipugue árĩrãre judio masa árĩbirã watope árĩrãre judio masare Goãmu Moiserẽ Ìgu apirare ‘Ibircãque,’ arĩ doremi Pablo,” arãma ò majarã judio masa mure. “Pablo judio masa porãre mari dorero dopa miri gasirogãre wiri aĩdorebeami,” arãma erã mure. “Judio masa erã iidorerire Pablo duhadoremi,” arĩ i sãre werewuama mure. ²² Eropirã muñu òre eracũ peerã erã gamenererãcoma mure turimorã. Eropigu òpa iiro gahmea mure. ²³ Mure gua dorero dopa ta iique. Dohpague òre wapicurã uma Goãmure umupeorã “Òpa iirãra,” arĩrã àhrima. ²⁴ Erã mera waque. Eropirã Goãmũ Moiserẽ Ìgu dorediro dopa ta erã basi Goãmũ yare iiburire iimorã erã ñeri iirire coerã iima. Mu sã eropa ta iique. Eropa Ìgu erã eropa iira wajare wajayeque mapu. Muñu eropa wajayera puhru erã poarire wuadoremã erã. Mu eropa iicũ Ìarã masa mure erã arĩra iri guyara árĩcũ masirãcoma erã árĩpehrerã. Goãmũ Moiserẽ Ìgu apira dorerire iigu mu árĩcũ masirãcoma erã. ²⁵ Judio masa árĩbirã Jesu yarãpure gua gojarapũre obeotuhajabu. Òpa arĩ gojabu gua. “Goãmarã weanirãre umupeora barire, dire, wuunugu mohwejenirã waimurãre babircãque mua. Eropirã nome mera ñero iibircãque. Nome sã uma mera ñero iibircãque,” arĩ were gojabu gua gojarapũre, arĩma erã Pablora.

Goãmũ wihigue judio masa Pablora ñeañorã

²⁶ Erã eropa arĩ wereniguirã puhru gajinu Pablopũ wapicurã uma mera erã basi Goãmũ yare iimorã erã ñeri iirire comemorã, Goãmũ wihigue ñaja wañorã. Iri wihigue ñajajagu, erãre werepu Pablo: “I nucũ nurĩ duhyaa mua coeboro,” arĩ werepu Ìgu wapicurãre. Eropirã erã coeturinu erã nucũ Goãmure waimurãre erã oburinu árĩbu.

²⁷ Eropii erã coepehodiro merogã duhyacũ gohra Goãmũ wihigue Pablo Ìgu árĩcũ Asia yeba majarã judio masapu Ìañorã Ìgure. Eropa Ìarã gajirãre iri wihi árĩrãre Pablo mera guacũ iñorã erã. Eropa guarã judio masa Pablora ñeha òpa arĩ gaguiniguñorã:

²⁸ —Mua gua acawererã Israe masa guare itamurã arique. Ihĩ àhrimi. Moise dorerire i wihi sãre cõadore buhemi árĩpehrerãre. Eropigu Ìgu Goãmũ wihiguere judio masa árĩbirã sãre aĩñajadi àhrimi. Eropigu i wihire ñeri mariri wihire Ìgu gorowoadi àhrimi, arĩ gaguiniguñorã judio masa Asia yeba majarã ero majarãre.

²⁹ Ero core Jerusalén Pablo Tróximo mera Ìgu árĩcũ judio masa Ìañorã. Tróximo Efeso majagu judio masu árĩbiridigu árĩmi. Ìgu eropa árĩcũ masirã òpa arĩ pepiñorã erã: “Pablo Tróximo Goãmũ wihire aĩñajagu iicumi,” arĩ pepiñorã judio masa.

³⁰ Masare erã eropa arĩ were erã gaguiniguira puhru iri maca majarã árĩpehrerã burigã guañorã. Bajarã omagãri, Goãmũ wihi árĩgure Pablora ñeha tarawiria wañorã. Tuhajanugu iri wihi disiporore bihañorã erã Ìgugue ñajariri arĩrã. ³¹ Eropirã erã Ìgure wejemorã iriñorã. Erã eropa iicũ Ìarã gajirãpu wererã wañorã surara opure. “Árĩpehrerã Jerusalén majarã gamenere gua, gaguiniguirã iimã,” arĩ wererã wañorã surara opure. ³² Erã eroparicũ peegu opupu Ìgu surarare, erã dorerã sãre

gameneo, erã mera Pablöre wejēdiarã pohrogue omağã ejañorã. Surara erã ejacũ iarã Pablöre panirã pa duhuñorã. ³³ Eropigu surara opu Pablo pohrogue eja, igure ñeha, peda comeda mera diridorepu. Erã dirituhajacũ ñha, opu Pablöre serēpipu masare:

—¿Nihino ãhriri ihĩ? ¿Ñeheno dipuwaja igure eropa iiri mua? arĩ serēpipu igu erãre.

³⁴ Igu eropa serēpicũ peerã masapu “Ōpa iiami igu,” arĩ, gajirã sã gajiropa arĩ, gaguinigu wereñorã surara opure. Erã eropa gaguiniguicũ surara opu ñaro peebiripu. Eropigu igu surara ya wihigue Pablöre aĩğãdorepu. ³⁵ Iri wihigue eja, Pablo mariariñere igu mariacũ masapu igure padiarã cãhmotañorã. Erã eropa iicũ surarapu igure aĩcoã maria wañorã. ³⁶ Masa bajarã erãre nurusia, gaguinigu nurusiañorã.

—Iğure wejēcãque, arĩ gaguiniguñorã erã Pablöre.

Pablo “Ne masare ñero iibea yuhu,” arĩ werepu

³⁷ Eropii Pablöre iri wihigue erã peresu iiboro core, Pablopõ opure serēpipu.

—Yuhu mu mera weretamudiaca, arĩ serēpipu Pablo.

—¿Muhu griego masa yare werenigui? ³⁸ ¿Sohõ árĩdigu, Egipto majagu árĩbeari muhu? Igu masare igu oparãre cóãdoregu, cuatro mil masa gamewejērãpore masa marirogue aĩğãapu. ¿Igu árĩbeari muhu? arĩpu opu Pablöre.

³⁹ Igu eroparicũ peegu Pablo yuhripu.

—Igu árĩbeaa yuhu. Judio masu ãhraa. Tarso Cilicia yeba árĩri maca masa dehyoabu yuhu. Bu árĩri maca majagu árĩbeaa yuhu. Yuhu oã masa mera wereniguidiaa, arĩpu Pablo igure.

⁴⁰ Igu eroparicũ peegu opu wereniguidorepu masa mera. Eropigu Pablo mariariñegue nigui, igu mojotori mera “Ejarimaricãque,” arĩpu masare. Igu eropa iicũ iarã, ejarimaripheara wañorã. Erã ejari-mariphecũ ñha, Pablo judio masa ya mera werepu erãre.

22

¹ Yu acawererã, yu iirare weregura mua. Yuhu werecũ peeque mua, arĩpu Pablo.

² Igu eroparicũ Pablo judio masa ya mera igu werenigucũ peerã masa ejarimariro dujañorã. Eropigu Pablo erãre werepu:

³ —Yuhu judio masu ta ãhraa. Tarso waĩcũri maca, Cilicia yeba árĩri maca masa dehyoabu yuhu. Eropigu i maca ta Jerusalén ta masabu yuhu. Eropigu yare Gamalie waĩcũgu buhemurimi yare. Eropigu yuhu mari ñecu sumarã mura dorerire ñaro buhebu. Dohpaguere Goãmure mua umupearo dopa ta yu sã umupeonigua. ⁴ Eropigu Jesure umupearãre ñero iimuricarabu yuhu. Yujurãyeri erãre wejēcãmuricarabu yuhu. Ñmare, nome sãre ñeha, peresu iimuribu yuhu. ⁵ Pahia opu, murã mera yu eropa arĩri “Diaye ta ãhraa,” arĩ weremasima mure. Erã gojaripũrire Jesu yarãre ñeadoreburipũrire yare gojabasama. Mari acawererãre Damasco majarãre iripũre ihmubu iiribu Jesu yarãre ñeabu. Erãre ñeha, aĩğãri peresu iibu iiribu. Jerusalengue erãre aĩğãdiaribu erãre dipuwaja moabu, arĩpu Pablo.

Pablo Jesu yagu igu warare werepu

⁶ Eropa arĩtuhaja õpa werenemoru:

—Jesu yaräre ñeari masu wadigu áríqueregu goeri boje árícũ, Damascogue yu ejaboro pohro gohra árícũ umarogue gosesiri medijubu yure. ⁷ Ero eropa wacũ yebague mehmerejacobu yuhu. Yu mehmerejara puhru wereniguigu carimi yure. “Saulo, ¿duhpigu yure ñero iiri mahu?” arigu carimi yure. ⁸ “Opu, ¿nihino áhriri mahu?” arí serépibu yuhu. “Yuhu Jesu Nazare majagu, mu ñero igu ta áhraa yuhu,” arí yuhrimi igu yure. ⁹ Yu eropa wacũ yu mera majarã boyorore ñama. Eropirã yu mera igu wereniguicũ peebirima erã. ¹⁰ “Opu, ¿dohpa iigacuri yuhu?” arí serépibu Jesure. “Wahgãnujague. Damascogue waque. Ero mahu wacũ, mure arípehreri yu iidoreburire gajigu weregucumi mure,” arími igu yure. ¹¹ Burigã ero cuimijuro wacũ yu cuiiri boboa wacabahu yuhu. Eropirã yu mera majarã yu mojtore ñeha, Damascogue tuã wahgãma yure.

¹² “Ero Ananía waicugu, Goãmure umupeogu, marire Goãmã dorerire iipehogu arími. Ero majarã judio masa arípehrerã erã umupeogu arími. ¹³ Eropigu igu yu pohro eranugara yure weremi. “Acaweregu Saulo, ñaqua dipaturi daja,” arími igu. Igu eropa aríra puhru dipaturi ñabu yuhu daja. Eropigu igure ñabu yuhu. ¹⁴ Yu eropa ñacũ igu Ananía yure weremi. “Mari Pagu igu gamerire ñaro masibure iribojegue beyetuhapu mure. Eropigu ‘Yu magu ñagure ñha peegucumi,’ arí weremuhapu mare mari Pagu iribojegue mu aríboro core. Igu áhrimi mari ñecu sumarã mura erã umupeodi. ¹⁵ Eropigu mu ñarare mu peerare wereguca arípehrerãre. ¹⁶ Eropirã dohpaguere yuari boje aríbiricãrã. Wahgãnujague. Eropigu waíyedigũ áríque. Jesure mu seręcũ mu ñerire cõagucumi,” arími igu yure, arípu Pablo.

Pablo judio masa aríbirãre igu buherare werepu

¹⁷ Igu eropa arítuhaja Pablo masare werenemopu:

—Eropa iituhaja yuhu Jerusalengue dujari, Goãmã wihigue Goãmure serëgu ejabu. ¹⁸ Yuhu ero árícũ yu Opu Jesu yare dehyoami. Eropa dehyoagu yure weremi. “Jerusalén majarã yahare mu weręcũ peediabeama. Eropigu duru gajipugue waque,” arími yu Opu Jesu yure. ¹⁹ Igu eroparícũ peegu werebu igure: “Opu, mu yaräre judio masa buheri wiri aríbirãre yu ñeha para sãre, peresugue erãre iimurirare masima Jerusalén majarã. ²⁰ Eropigu mu yare weregure Estebanpure erã wejęcũ ñagu ñaro iirã wejẽma, aríribu. Igu erã wejęcũ erã ya suhrire opabasabu yuhu. Iri sãre masima i maca majarã,” arí werebu yuhu Jesure. ²¹ Yu eroparícũ peegu yu Opu yare weremi: “Yoarogue judio masa aríbirãre buhebre obeogura mure. Eropigu waque mahu,” arími yure yu Opu, arípu Pablo masare.

Surara opu Pablo mera weretamupu

²² Igu weremuhara dihtare ñaro peeriñorã masa. Eropa peequererã judio masa aríbirã pohro Jesu Pablora igu obeoburire igu weręcũ peerã erã gua gaguiniguinũgãnorã daja.

—Íhí dohpague tamerare síricuraporo, arí gaguiniguinũnorã erã.

²³ Eropirã erã gaguinuginemo, guari mera erã suhrire wejësiribeo, nicu mera deañorã. ²⁴ Erã eropa iicũ ñha surara opu surara ya wihigue Pablora añajadorepu igu surarare. Eropigu surara opu “¿Duhpirã Pablo mera gua eropa siari gaguinuguirã iiri masa?” arí serépidiaripu. Pablora irire

serēpibu, yuradari mera tāradoreripu ĩgure. ²⁵ ĩgu tāradorequerecũ ĩgure erā dirira pũhru, ĩgu pohro árĩgure surarare werepu Pablo.

—Yũhu Roma majagu āhraa. Eropirā “Ñero iigu āhrimi,” yure arĩmasibeeaa mũa. Eropirā yuradari mera tāramasibeeaa mũa, arĩpu Pablo ĩgure.

²⁶ ĩgu eroparĩcũ surara ĩgu opũre weregu wapu.

—Ihĩ Roma majagu āhrimi. Eropigu ðaro iique ĩre, arĩ werepu ĩgu ĩgu opũre.

²⁷ ĩgu eropa arĩra pũhru surara opũpu Pablora serēpigu wapu.

—¿Diaye ta mũhu Roma majagu āhriri? Wereque yure irire, arĩpu ĩgu.

—ĩgu ta āhraa yũhu, arĩ yũhripu Pablo.

²⁸ ĩgu eroparĩcũ peegu opũpu ĩgure werepu.

—Yũhu Roma majagu árĩdiagu niyeru wũaro wajayebu, arĩpu ĩgu.

—Yũhu Roma maja macague masa dehyoabu. Eropigu Roma majagu āhraa, arĩpu Pablo.

²⁹ ĩgu eroparĩcũ peerā ĩgure tārabonirā waha wañorā. Eropigu Pablo Roma majagu ĩgu árĩcũ masigu, ĩgure comedari mera erā dirirare guñagu, gũĩ arĩpu surara opu.

Pablo judio masa opũre werepu

³⁰ Eropigu surara opu judio masa Pablora erā weresārare ðaro masidiapu. Eropa masidiagu gajinugue comedarire ĩgure ĩgu padorera pũhru pahia oparāre, judio masa erā mũrā mera gameneredorepu surara opu. ĩgu eropa gameneredorera pũhru ĩgu erogue Pablora aĩgā, erā core duhudobopu ĩgure.

23

¹ Eropigu Pablo judio masa mũrā oparāre ĩabocatiunugaja werepu:

—Acawererā, Goāmũ ĩgu ĩaro mũmũri nũcu ðaro iiniguicābu yũhu, arĩpu Pablo.

² ĩgu eroparĩcũ peegu árĩpehrerā pahia weca árĩgu opu Ananíapu Pablo disirore padorepu. ³ ĩgu pohro niguirāre padorepu. ĩgure erā para pũhru Pablo Ananiare turipu.

—Masa erā ĩaro dihtare ðaro iigu āhraa mũhu. “Goāmũ dorerire tarinugagu iiaa,” yure arĩqueregu ta yure padorea mũhu. Eropa padoregu mũpu dorerire tarinugagu iica, arĩpu Pablo ĩgure.

⁴ ĩgu eroparĩcũ peerā Pablo pohro niguirā ðpa arĩñorā ĩgure:

—Goāmũ ĩgu beyedigu pahia opũre ñero arĩ wereniguibiricāque mũhu, arĩñorā erā Pablora.

⁵ Erā eroparĩcũ peegu Pablo arĩnemopu:

—Acawererā, ĩgu, ĩgu pahia weca opu ĩgu árĩrere masibirabu yũhu. Eropigu eroparĩmaacābu yũhu. Goāmũ ya erā gojarapu ðpa arĩ werea ĩgure: “Mũa maca majarā opũre ñero arĩ wereniguibiricāque,” arĩ gojara āhraa, arĩpu Pablo erāre.

⁶ Eropirā ero pe curu majarā árĩñorā. Yuju curu saduceo masa árĩñorā. Gaji curupu fariseo masa árĩñorā. Pe curu erā árĩcũ masigu, Pablo erāre busuro mera werepu:

—Acawererā, yũhu fariseo masu āhraa. Fariseo masu magu ta āhraa yu sã. “Sĩrinirā masa mũriarācoma,” yu arĩ wereri dipuwaja yure ñero iidiaa mũa, arĩpu Pablo.

⁷ Īgu eroparīcū peerā fariseo masa, saduceo masa erā basi gameturiñorā. Eropirā erā basi pe curu dūca wariñorā. ⁸ Saduceo masa ōpa arīrā árīñorā: “Sīrinirā masa mūriasome. Espírítua anyua sã ne marima,” arīrā árīñorā. Eropirā fariseo masapu erā arīro dopa arībiriñorā. Eropirā Pablo “Sīrinirā masa mūriarācoma,” Īgu arīcū erā erā basi gameturiñorā. ⁹ Eropa gameturirā, burigā gaguiniguñorā. Eropirā fariseo masa mera majarā judio masa buherā wahgānūgaja, tuhri, wereñorā:

—Ihī Pablo ñero iibirami. Eropigu Espírítu, o anyu diaye Īgu mera wereniguigu arībocumi. Eropirā Īgure dipuwaja moarā Goāmure ĩhaturirā árīboca mari. Eropiibiricāque, arīñorā erā.

¹⁰ Erā eropa arīra puhru erā árīpehrerā gameturi, burigā guañorā. Erā eropa burigā guacū ĩha gūisāpu Pablora surara opupu. “Pablora patasiricārācoma,” arīgu Īgu ya wihigue aīgāridoregu Īgu masa watope Īgu surarare obeopu.

¹¹ Gaji ñami Jesu mari Opu Pablo pohro dehyoa, werepu Īgure:

—Gūibiricāque. Dohpague ōre Jerusalēgue yaha buherire wereabū muhū. Eropigu Romague sãre ōpa ta ĩgu waque, arīpu mari Opu Pablora.

Judio masa Pablora wejēdiariñorā

¹² Gajinu ñamiñarigā arīcū judio masa bajamerā gamenereñorā.

—Ōpa iirā, arīñorā. Pablora wejēcārā. Eropirā Īgure mari wejēboro core ĩhribiricārā. Babiricārā. Īgure wejēbirā oa mera sīrirā. Īgure mari wejēbiricū Goāmū marire wejēporo, arīñorā erā.

¹³ Erā eropa arīrā cuarenta weca ñari judio masa árīñorā. ¹⁴ Erā eropa arī wereniguira puhru erā pahia oparāre, murā sãre wererā wañorā:

—Pablora gua wejēboro core barire babea gua. ¹⁵ Eropirā mua, mari murā mera ōpa arī sihubeoque. “Pablora dipaturi serēpidiaca,” arībeoque surara opure. Mua eropa arīra puhru surara opure aīgāridoreque Pablora. Eropirā Pablo Īgu ōre Īgu eraboro pohro gohra arīcū Īgure wejērāca gua, arīñorā erā pahia oparāre.

¹⁶ Eropigu Pablo tīgo magu erā eropa arī wereniguicū peepu. Erā eroparīcū peegu waha, surara ya wihigue Pablora weregu ñajapu. ¹⁷ Īgu eropa werera puhru Pablopū yujugu surarare sihubeo, werepu Īgure.

—Ihī mamure mu opu pohroque aīgāque. Ihī mu opure werediagu ĩimi, arīpu Pablo.

¹⁸ Īgu eroparīcū peegu surarapu Pablo tīgo magure Īgu opu pohroque aī eja, werepu.

—Peresugue arīgu Pablopū yure sihubeo, ĩre mamure mu pohroque aīgāridoreami. Ihī mure weregu arīgu ĩimi, arīpu surara Īgu opure.

¹⁹ Īgu eroparīcū peegu opupu mamure Īgu mojotore ñeha tuāgā, masa marirogue Īgure serēpi ĩapu.

—¿Dohpa arību ĩari muhū yure? arīpu Īgu Pablo tīgo magure.

²⁰ Īgu eropa serēpicū peegu ōpa arī werepu.

—Judio masa yujuro mera, “Ōpa iirā,” arī, wereniguia. Ñamigāre judio masa oparā pohroque mure Pablora aīgādorērācoma. “Murā dipaturi Pablora serēpidiama,” arī guyarācoma. ²¹ Eropirā cuarenta weca ñari masa Īgure wejēdiariñorā mague duhrinijarā corerācoma. Erā Īgure wejēboro core barire basome. Eropirā ĩhrisome. “Īgure mari wejēbiricū, Goāmū marire wejēporo,” arāma erā erā basi. Eropirā dohpaguere mure Pablora aīgādorērā erāpu duhri coretujajama Pablora wejēmorā.

Eropigu erā wererā eracū erāre yuhribita muhu, arī werepū mamū surara opure.

²² Īgu eroparīcū peegu surara opu ōpa arīpu:

—Yure mu wererare gajirāre werebiričāque, arī werepū mamure. Eropa arītuhaža mamure “Wahanisa,” arīpu.

Pablöre opu Feli waīcugu pohrogue obeopu

²³ Eropigu surara opu perā Īgu surarare sihugā, erāre dorepu:

—Doscientos surarare, setenta cabayu peyarāre, doscientos ñoseri mijiri oparāre Cesareague wamorāre erā yare amudorerā waque. Eropirā dohpagā ñami nueve árīcū muu waborore coreque. ²⁴ Eropirā Pablöre cabayuare Īgu peyamorāre amubasaque. Opu Feli pohrogue, Cesareague ōaro sorā waque ĩgure, arīpu surara opu.

²⁵ Eropa arītuhaža patera gojapu. Ōpa arī gojapu ĩgu: ²⁶ “Yuhu Claudio Lisia mare turagu opu Felire ōadore. ²⁷ Judio masa ĩre ñeha, wejērama. Eropigu ĩgu Roma majagu ĩgu árīcū masigu, yu surara mera ĩgure itamugu ejabu. ²⁸ Eropigu ĩgure erā weresārare masidiagu judio masa oparā pohro aīgābū ĩgure. ²⁹ Eropigu ĩgu judio masa ya doreri dihtare ĩgu tarinugacū, mari ya dorerire ĩgu tarinugabiricū ĩagu, ĩgure peresugue apidiabirabu. Ñeha dipuwaja sīriro mara ĩgure. ³⁰ Eropigu judio masa ĩgure wejēdiarā, erā duhri corecū ĩagu gajigu wereami yure. Īgu eropa werera puhru Pablöre dohpagure mu pohro obeogu iiaa. Eropigu ĩgure weresānirāre ĩgu ñero iirare mare weredoretuhajabu yuhu,” arī gojapu surara opu.

³¹ Eropirā surara erā opu ĩgu dorediro dopa ta iñorā. Iri ñamire Antīpatri waīcūri macague Pablöre aī ejañorā. ³² Gajinu gajirā surara cabayua weca peyabirā iri maca ta dujariñorā erā ya macague. Gajirā surara cabayua peyarā dihta ĩgure aī tarigañorā. ³³ Pu Cesareague aī ejañorā Pablöre. Eropirā surara opu ĩgu obeorapūre opu Felire wiañorā. Eropirā Pablöre aī ejañorā opu pohrogue. ³⁴ Erā eropa wiara puhru iripūre ĩgu ĩara puhru ĩgu gajirāre serēpi ĩapu:

—¿Di yeba majagu āhriri ihī Pablo? arī serēpi ĩapu.

—Cilicia yeba majagu āhrimi, arī wereñorā ĩgure.

³⁵ Erāre serēpituhaža, Feli Pablöre werepu:

—Mure weresānirā ōre erā eracū mu wererire peegura, arīpu Feli Pablöre.

Īgu eropa arīra puhru Herode ya wihigue ĩgure apipu. Eropigu ĩgu umare ĩgure coredorepu ĩgu opu.

24

Pablo “Ñero iibirabu,” arī werepū Felire gajirā weresāra puhru

¹ Cinco nari puhru Ananía pahia opu, judio masa erā murā, dorerire weremehregu Tértulo waīcugu mera Cesareague ejañorā. Eropirā erā Pablöre weresādiarā, opu Feli pohrogue ejañorā. ² Eropigu Pablöre erā gamenererogue erā aī ejara puhru Tértulo ĩgure weresānugapu. Eropa weresānugagu ōpa arīpu Felire:

—Muhu ōaro masigu, gua opu muhu ōaro dorecū gua i yeba majarā ōaro árīcāa gua gamequeāro mariro. Mu doreri mera ōaripure gohrotoro iiaa i yeba. ³ Eropirā gua ōaro árīcārā mucubiria. Eropirā mu mera ōaro mucubiria. ⁴ Dohpague merogā mare garibogura yuhu. Merogā mu mera weretamudiaca. Guare peenique dohpa. ⁵ Ihī guare garibotariami.

Árīpehreri yebari majarāgue judio masare erā gua gaguiniguicū iimi ihī. Eropigu masa erā basi gameturicū iimi ihī. “Oparāre cōārā,” arīrā mera majagu āhrimi ihī. Eropigu nazareno waicuri curu opu āhrimi. ⁶ Eropigu Goāmū wihire ñero ĩgu iidiacū ĩarā gua ñeabu ĩre. Gua ñeara puhru gua ya dorerire ĩgu tarinugagu árīcū ĩgure dipuwaja moadiarabu gua. ⁷ Eropā moadiquerecū surara opu Lisia waicuga ĩgure guare turaro mera emacāmi. ⁸ Puhru ĩgure weresānirāre mu pohrogue wadoreami Lisia. ĩgu eroparīcū peerā ahrabu gua. Mu tamera ĩre serēpigū, árīpehrerire ĩgu ya dipuwajare masiguca mūhū, arīpu Tértulo Felire.

⁹ ĩgu eropa arīra puhru gajirā judio masa Tértulo ĩgu arīdiro dopa ta “Diaye ta āhraa,” arīñorā erā sā. ¹⁰ Erā eropa arī weresāra puhru opu Feli Pablōre weredorepu. Ōpa arī werepu Pablō:

—Baja bojori i yeba majarāre mu dorerare masia yūhū. Eropigu yū ĩirare mure weregu mucubiria. ¹¹ Doce nuri ta wahaa Jerusalēngue Goāmure yū umupeora puhru. Mūhū i diaye árīcū masidiagu gajirāre serēpi ĩaque. ¹² Judio masa yure Goāmū wihiguere boca erā ñeacū masare arī gaguiniguigū ĩibirabu. Eropigu “Oparāre cōāque,” arīgu ĩibirabu. Eropigu judio masa buheri wirire, erā ya maca sāre ne ñero ĩibirimurabu. ¹³ Eropirā yure weresānirāpu erā weresārare “Ōpa iiami ihī,” arī weremasibeama mure. ¹⁴ Dohpague yū ĩirare weregura mure. Matague ta gua ñecu sumarā erā umupeodiro dopa ta Goāmure umupeoa yū sā. Eropigu Goāmū yare ĩaa Jesu ya ōari buheri ĩri arīro dopa ta. Ōā “Jesu ya gayabirari āhraa,” arī wereniguima oā judio masa. Eropigu Goāmū doreri, Moiseguere ĩgu apirare ĩri sāre umupeoa yūhū. Eropigu Goāmū ya weremūhtanirā erā gojara sāre umupeoa yūhū. ¹⁵ Ōā gajirā judio masa mera ta “Goāmū árīpehrerā masare sirinirāre ōarā, ñerā mera erā masa mūriacū ĩgucumi,” erā arī pepiro dopa ta yū sā eropa ta arī pepia. ¹⁶ Eropigu dipuwaja mara yūhū. Goāmū ĩre masimi. Eropirā masa sā ĩre masima. Eropigu diaye ta werea yūhū mure.

¹⁷ “Gaji bojorire gajipugue yūhū curigu árīgu dujarabu Jerusalēngue. Yū acawererā Jerusalén majarā mojomorocūrāre niyeru ogu arigu ĩiabu. ¹⁸ Dujara, Goāmure umupeobu ĩgu ya wihigue ejarabu. Eropigu Goāmū ĩgu coedorero dopa yū basi ĩira puhru waibugure odiarabu Goāmure umupeobu. Eroque yū árīcū oā judio masa yure bocama. Erā bocacū gajirā yū mera majarā marama. Gua gaguiniguirā marama. ¹⁹ Eropirā gajirā judio masa Asia yeba majarā ero āhrama. Erā yū ñero ĩicū ĩanirā arīrā weresārā ariporo ōguere. ²⁰ Ōā ōgue árīrāpu judio masa oparā gamenererogue yū árīcū ĩanirā yū erogue ñero ĩirare masirā, erā sā weresāporo. ²¹ Gaji tamerare yure erā weresāmasima: Erā mera árīgu ōpa arī būrigā gaguiniguibū yūhū: “‘Sirinirā masa mūriarācoma,’ yū arīra waja dipuwaja moaa mūa,” arībū erāre, arī werepu Pablō Felire “Ñero ĩibiribu,” arīgu.

²² ĩgu eropa arī werera puhru Feli ōpa arī werepu Pablōre:

—Dohpaguere ĩripēta āhraa. Surara opu Lisia ĩgu erara puhru mure yū ĩiborore masiguca yūhū, arīpu Feli Pablōre. Felipu Jesu yarā erā ĩirare ōaro masipehogu árīpu.

²³ Eropā arītuhaja, Pablōre coregure surarare Feli ōaro ĩhadibudorepu peresugue árīgu duhriri arīgu. Eropā ĩhadibudorequeregu ōaro ĩidorepu

ĩgure. Eropigu merogã ópu ĩgu curiborore. Pablo mera majarãre ĩgure peresugue árĩgure itamudoregu eropa dorepu Feli.

²⁴ Bajamenuri puhru Feli ĩgu marapo Drusila waĩcũgo mera ahri, Pablöre sihuñorã daja. Feli marapopu judio maso árĩpo. Pablöre erã si-hura puhru, Jesucristore ĩgu umupeorire Pablopũ werepu erãre. ²⁵ Eropã weregu, òarire, òaro guñamasirire, ñerire gamebiririre, pehrerinũ árĩcũ masare Goãmũ dipuwaja moaborore werepu Pablo. ĩgu eropa arĩ werecũ peegu Feli güigu, Pablöre werepu:

—Dohpaguere waque. Puhru yure mohmeri maricũ sihgura daja, arĩpu Pablöre.

²⁶ Eropã arĩgu, Pablo ĩgure niyeru ocũ gameripu Feli. Eropigu ĩgu niyerure gamegu, bajasuburi Pablöre sihu, ĩgu mera wereniguimuripu Feli. Niyerure ĩgu wajayecũ ta Pablöre wiuboñumi gajisubũ arĩgu. ²⁷ Pe bojori puhru Porcio Festo waĩcũgu Felire gohrotogu árĩpu. Eropigu Felipe opu árĩgu judio masare mucubiricũ iidiapu. Eropigu ĩgu Palöre peresu árĩdorepu dohpa.

25

Festore Pablo ĩgu iirare werepu

¹ Eropii Festo iri yebague ahrenũ ĩgu opu ñajara puhru, Cesareague árĩdigũ waha, Jerusaléngue ejapu. ² Ero ĩgu ejacũ ĩha pahia oparã, judio masa oparã mera Pablöre erã weresãrare wereñorã Festore. ³ Pablo ĩgu mague wacũ iri mague ĩgure cohre, wejẽdiariñorã ĩgure erã. Jerusalén mague aricũ gameriñorã ĩgure wejẽmorã. Eropirã erã òpa Festore upũta serẽriñorã:

—Pablöre õguere Jerusaléngue obeoque, arĩ serẽriñorã erã Festore Pablöre wejẽdiarã.

⁴ Erã eroparicũ peegu, Festo werepu erãre:

—Dohpaguere Pablo Cesareague peresu ahrimĩ. Dohpaguere yũhũ erogue wabu iiaa. ⁵ Pablo ĩgu ñero iigu árĩcũ, mũa oparã Cesareague yũ mera waha, ĩgure weresãque, arĩpu Festo.

⁶ Eropigu Festo ocho o diez nuri erã mera ĩgu árĩra puhru Cesareague dujaa wapũ. Gajinu ĩgu dipuwaja moadoreri wihi doagu, Pablöre aĩgãridorepu. ⁷ Eropirã Pablo Festo pohrogue ĩgu eracũ, judio masa Jerusaléngue arinirãpu Pablo pohro nigui, ĩgure burigã weresãnugañorã. Eropã weresãquererã “Ihĩ ĩgu ñero iicũ ĩabu,” arĩ weresãmasibiriñorã.

⁸ Erã eropa arĩ weresãra puhru Pablo ĩgu iirare werepu:

—Judio masa erã dorerire, Goãmũ wihi maja dorerire, Roma opu ĩgu dorerire ne tarinũgabirabu, arĩpu Pablo.

⁹ Festopũ judio masare mucubiricũ iidiagu, Pablöre serẽpipũ.

—¿Jerusaléngue wadiari mũhũ? Mũ iirare yure erogue wereguca mũhũ, arĩpu Festo Pablöre.

¹⁰ ĩgu eroparicũ Pablo yũhripũ:

—Arĩpehrerã weca opu ĩgu ya wihi dipuwaja moadoreri wihi ahraa dohpaguere. I wihino ta ohõ sã ahraa. Eropigu yũ iirare ohõ ta amũ puru-mujuque. Judio masare yũ ñero iibirirare òaro masia mũhũ. ¹¹ Ñerire iigu dorerire tarinũgagu árĩgu “Yũre wejẽbiricãque,” arĩbiriboaya. Eropigu oã weresãripũ guyarĩ iri árĩcũ yure weresãñirãre yure omasĩbeaa mũhũ. Yũ iirare arĩpehrerã weca opũre Césare weregu wadiaca yũhũ, arĩpu Pablo.

¹² Īḡu eroparīcū peegu Festopu ōaro masi wererāre serēpituhaja, werepu Pablōre.

—Muḡu árīpehrerā weca opure mu iirare mu werediacū, Īḡu pohrogue Romague obeorāra mure, arīpu Festo Pablōre.

Pablo opu Agripare Īḡu iirare werepu

¹³ Festo opu űajara puhrugue opu Agripa, Berenice waīcugo mera Cesareague Festore ĩarā ejañorā.

—¿Ne, erarari mu sā? arīñorā erā Festore bocatīri serērā. ¹⁴ Ero bajamenurīgā erā árīra puhru Festo werepu Agripare Pablōre erā iirare.

—Ōre Feli Īḡu peresu iidigu āhrimi. ¹⁵ Eropirā Jerusaléngue yu wacū judio masa erā pahia oparā, erā murā mera ĩre weresāma. “Īḡu ya dipuwajare wejēque ĩgure,” arī serēama erā yure. ¹⁶ Erā eroparīcū peegu yu ōpa wereabu: “Gua Roma majarāpu peresu erā iinirāre masare eropa ta ocābirimuribu. Eropigu ĩgure osome muare. Gua ñeadigure ĩgure weresānirā guare wereniguiboro core ĩgure dipuwaja moamasibeeaa gua.

Īḡu basi sā Īḡu iirare ĩḡu werenibiricū ĩgure dipuwaja moamasibeeaa gua,” arābu erāre. ¹⁷ Eropigu ōre erā weresārā eracū ĩagu yoari boje ĩbirabu yuḡu. Eropigu gajĩnure masa dipuwaja moadoreri wihi yu doagu, erā weresādigure sihubeoabu. ¹⁸ Eropirā iri wihi ĩḡu eracū ĩarā ĩgure ĩhaturirā wahgānugajama. Erā eropa wahgānugajacū ĩagu ñetariaro arī weresārācoma arī pepirabu yuḡu erāre. ĩgure weresādiaquererā weresāmasibirama erā. ¹⁹ Eropirā ĩre Goāmū yare ĩḡu werera dipuwaja judio masa ĩgure ĩhaturiamā. “Jesu waīcugu ĩḡu sīridigu masa mūriadi árīmi,” arī ĩḡu werera waja weresāma ĩre. I dihtare weresāma. ²⁰ Ire masibigu ĩgure ōaro serēpi ĩabu. “¿Jerusaléngue wadiacuri yu mera? Erogue wereque mu iirare yure,” arīrabu ĩgure. ²¹ Yu eroparīcū peegu ĩḡu wadiabiramī. “Yu iirare árīpehrerā weca opure werediacā,” arāmi ĩḡu yure. ĩḡu eropa arīra puhru ohō ta ĩgure coredoeabu árīpehrerā weca opu pohro ĩgure yu obeoboro core, arīpu Festo Agripare.

²² —Yu basi peediacā ĩgure, arīpu Agripa Festore.

—Ñamigā ta ĩgure peeguca muḡu, arī yuhripu Festo.

²³ Eropirā gajĩnū árīcū Agripa, Berenice mera masa dipuwaja moadoreri wihigū eja, “Oparā āhraa gua,” arīrā guhyadiaro ii ĩhmuñorā erā, surara oparā, iri maca majarā oparā mera. Eropa ii ñajarā iri wihigūere ñajañorā. Erā ñajajara puhru Pablōre sihueopu Festo. ²⁴ Eropigu Festo ōpa werepu:

—Opu Agripa, mua árīpehrerā i wihire gamenererā peeque. Ōre ĩhī bajarā judio masa erā weresāgu āhrimi. Jerusaléngue Cesareague sāre erā ĩgure weresāma. “ĩgure wejēque,” eropa arīniguicārā iima erā.

²⁵ Erā eropa arīquerecū ta ōpa arī pepia yuḡu. ĩhī ne ñero iidigu árībeamī. ¿Ñehe dipuwaja mari wejēbocuri ĩgure? Eropigu árīpehrerā weca opure César Augustore ĩḡu iirare ĩḡu werediacū árīpehrerā opu pohrogue obeogura ĩre. ²⁶⁻²⁷ Eropigu ĩhī ĩḡu iirare masibirinica yuḡu dohpa. Eropa masibirinigu mari opure were gojamasibirica. Eropigu muare ĩḡu werecū peedoregu iiaa dohpaguere. Opu Agripa, dohpague tamerare ĩhī āhrimi mu serēpi ĩabu. Mu serēpi ĩatuhaja mari masira puhru ĩre erā weresārare ōaro were gojagura. ĩhī ĩḡu ñero iirare yu masibiriqueregu ta opu pohrogue ĩgure yu obeocū ōabeeaa. Eropigu dohpaguere erā weresārare ōaro masidiagu iiaa, arīpu Festo erāre.

26

Pablo Agripare ĩġu iirare werepũ

1 ĩġu eropa arĩra pũhrũ Agripa Pablora arĩpũ:

—Mũ basi ta wereque, arĩpũ ĩġu Pablora. ĩġu eropa arĩra pũhrũ Pablora, “Ejarimaricãque,” arĩġu ĩġu mojotorire aĩ wahġũbeo, ĩġu iirare werenũgarũ:

2 —Opũ Agripa, yũre judio masa erã weresãrare, yũ iirare mũre wereġũ, dohpaguere ôaro sĩporãcũa. 3 Ģũa judio masa ġũa iiricũrire, ġũa buheri sãre mũhũ ôaro masicũ tamerare mucubiria yũhũ. Eropiġũ mũhũ yũre ôaro peeque, arĩnũgarũ Pablo.

Pablo Jesu yaġũ ĩġu árĩboro core ĩġu árĩricũrare werepũ

4 Eropa arĩtuhajaġũ ôpa arĩnemopũ ĩġu:

—Mamũ arĩġũ yũ árĩricũrare árĩpehrerã judio masa masima. Ũmũri nũcũ yũ masa dehyoara pũhrũ yaha yebaguere, Jerusalengue sãre yũ árĩrare masima erã. 5 Negohraguere fariseo masũ árĩribũ. Eropiġũ fariseo masa erã dorerire, erã iirinore yũhũ iipheodigi arĩcũ erã masima. Erã mũre werediarã, irire weremasima erã. 6 I dipuwaja ta yũre weresãmurima. Ģũa ñecũ sumarãre “Sĩrinirãre masugũra,” Goãmũ ĩġũ arĩ apirare “Diaye ta ãhraa,” yũ arĩri waja oã yũre weresãmurima. 7 Yũ acawererã judio masa, árĩpehrerã doce cururi majarã Goãmũ masare ĩġũ masuborore mucubiri cohrema. Eropirã Goãmũre umupeonigũcãma. Eropa corerã árĩrã yũ iiro dopa ta iima erã sã. Opũ Agripa, eropa yujuropa ġũa iirã árĩquerecũ ta erãpũ yũhũ ĩġũ masuborore ii coreri waja yũre weresãmurima judio masa. 8 ¿Duhpirã sĩrinirãre Goãmũ ĩġũ masuborore peediabeari mũa judio masa? arĩ werepũ Pablo.

Pablo Jesu yarãre ĩġu ñero iirare werepũ

9 Eroparĩtuhaja ôpa werenemopũ:

—Jesu Nazare majagũre ñanibigũ dohpa ñeri dihtare iidiaribũ yũhũ ĩġũ yarãre. 10 Eropiġũ Jerusalengue eropa iimũrĩribũ yũhũ. Pahia oparã yũre erã dorera pũhrũ bajarã Jesu yarãre peresu iimũrĩribũ yũhũ. Eropiġũ oparã erãre erã wejẽdorecũ, wejẽmurĩbũ yũ sã. 11 Bajasuburi árĩpehreri judio masa erã buheri wirĩgue Jesu yarãre ñero iidoremũricarabũ. Eropiġũ Jesu yarã Jesure erã coãcũ iidiaribũ yũhũ. Erã mera burĩgã guabũ yũhũ. Eropiġũ ġaji macarĩgue sãre erãre ñero iĩġũ ejamũricarabũ yũhũ, arĩ werepũ Pablo.

Pablo Jesu yaġũ ĩġu warare werepũ

12 Eropa arĩtuhaja ôpa werenemopũ:

—Eropiġũ Damascogue Jesu yarãre ñero iidiagũ ejaribũ. Erãre yũhũ ñero iidiacũ ĩarã pahia oparã yũre wadorema. 13 Ôpa árĩbũ, opũ Agripa: Goeri boje árĩcũ gohra mague yũ wacũ umaro maja gosesĩrĩ, abe umũ majagũ tauro yũre yũ mera warã sãre gosesĩribũ. 14 Ģũa árĩpehrerã yebague mehmerejabũ. Judio masa ya mera yũre ĩġũ werenĩguicũ peebe. “Saulo, Saulo, ¿duhpĩġũ mũhũ yũre ñero iiri? Mũhũ yũ mera guagũ yũre yũhrĩbigũ, mũ basi ñero taria,” arĩmi yũre. 15 “Opũ, ¿nihino ãhrĩri mũhũ?” arĩ serẽpĩbũ yũpũ. “Yũhũ Jesu ta ãhraa mũ ñero iĩġũ. 16 Wahġãnũġajaque mũhũ. Yũ pohro majagũ mũre iĩbũ dohpague dehyoara yũhũ. Dohpagãre mũhũ yũre ĩarare, pũhrũ mũre yũ ĩhmuburi sãre ġajĩrãre weredorebu apĩġuca mũre. 17 Judio masare, judio masa árĩbirã

sāre mure buhedoregu obeogura. Erā pohro mu ārīcū, mure erā īhaturicū mure itamugara. ¹⁸ Yahare erāre masicū iique muhu. Eropigu erā űerire duhucū iique muhu. Ōaripare gohrotocū iique erāre. Watire erāre gamebircū iique muhu. Eropigu Goāmu yapure iicū iique muhu erāre. Mūhu eropa iicū erā yure umupeorācoma. Erā eropa umupeocū īaḡu erā űeri iirare cādjijūca. Eropirā erā Goāmu īḡu beyenirā mera majarā mera ārīrācoma. *Īḡu oburire opamorā ārīrācoma erā,*” arīmi Jesu yure, arī werepū Pablo.

Pablo īḡu iirare īḡu mohmerire werepū

¹⁹ Eroparītuhaja ōpa werenemopū:

—Opū Agripa, űmaro maja yū peerire tarinūgabiribu. ²⁰ Damascogue buhemūtabū. Pūhrū Jerusalén buhebu daja. Pūhrū Judea yeba, judio masa ārībirā pohroḡe sāre masare erā űero iirare bujaweredore, Goāmu yare gamedorebu. “Ōarire mua iicū īarā mua űeri iirare mua bujawererare gajirā masirācoma,” arīḡu, erāre ōarire iidoreḡu buhebu. ²¹ Goāmu ya wihi yū ārīcū yū eropa arī wereri waja judio masa yare űeha wejēdiarima. ²² Eropigu űmuri nucu Goāmu īḡu itamuro mera eropa buheniguicāa. Eropigu dohpaguere mua ārīpehrerāre oparāre bu ārīrā sāre īḡu yare wereḡu iiaa. Iriboḡeḡe majarā Goāmu yare weremuhtanirā Moise mera erā wereyudiro dopa ta werea yū sā. Ōpa arī wereyūnorā erā: ²³ “Cristo Goāmu īḡu obeodigupu űero tarigucumi. Eropigu sīrigū masa mūriamūhtagū arīḡucumi īḡu. Eropigu masare īḡu itamuborore judio masare judio masa ārībirā sāre masicū iigucumi,” arī wereyū gojamūriñuma iriboḡeḡe majarā. Yū sā erā wereyudiro dopa ta werea, arī werepū Pablo Agripare.

Pablo Agripare Jesu yagū iidiaripu

²⁴ Īḡu eropa arī werera pūhrū Festo īḡure būrigā gaguinigui wereniguiḡu:

—Pablo, muhu gorowereḡu āhraa. Mūhu baja buheḡu gorowereḡu wahaa, arī gaguiniguiḡu Pablore.

²⁵ Īḡu eroparīcū peegu ōpa yūhripu Pablo Festore:

—Opū, gorowereḡu ārībeaa yūhu. Yū wereri diaye ta āhraa. Eropigu yūhu ire guhyadiaro mera arāa. ²⁶ Opū Agripapū i yū wererire ōaro masimi. Eropigu yūhu īḡure ḡūiro mariro werea. I wererire ārīpehrerā masa masima. Eropigu ārīpehreri ire yū arīrare opū Agripa īḡu masicū masia yūhu, arīpū Pablo Festore.

—Īḡu eropa arītuhaja ōpa arīpū Agripare:

²⁷ —Opū Agripa, Goāmu ya weremuhtanirā erā wererare peea muhu. Erā wererire mū peecū masia yūhu, arīpū Pablo Agripare.

²⁸ —Īre yure wereḡu merogā mū wereri Jesu yagū yū wacū iidiagū iiri muhu? arīpū Agripa Pablore.

²⁹ Īḡu eroparīcū Pablo yūhripu.

—Merogā wereniguiḡu o yoari boje wereniguiḡu mua ārīpehrerāre yūhu ārīro dopa ta Jesu yarā ārīcū gahmea. Irire serēbasaa Goāmure. Eropigu yū iro dopa ta peresugue mua ārīcū tamerare gamebeaa yūhu, arīpū Pablo.

³⁰⁻³¹ Īḡu eropa arīra pūhrū Agripa, Festo, Berenice ārīpehrerā gajirā mera wahḡānūga wiria, erā basi wereniguiñorā:

—Ihĩ ĩḡu iira waja ne peresu iimasibeeaa mari. ¿Eropirã mari ñeheno dipuwaja ĩḡure wejẽbocuri? arĩ werenĩḡuĩnorã erã erã basi.

³² —Ihĩ “Arĩpehrerã weca opũre yu iirare werediaca,” ĩḡu arĩbiricũ mari wiuboaya ĩḡure peresugue arĩḡure, arĩpũ Agripa Festore.

27

Pablo ĩḡure weresãrare Romague weregũ wapu

¹ Pablöre Italiague arĩpehrerã weca opũ pohrogue dohodiru mera obeerã, ĩḡu mera gajirã peresu arĩrã sãre obeerã. Eropirã Julio waĩcũḡure erãre ĩhadibudorerã obeerã erã. Julio cien surara opũ arĩpũ. ĩḡu ya curu Augusto yarã surara waĩcũñorã. ² Yu sã Pablöre wapicũḡãbũ. Eropirã Adramitĩo waĩcũro majaru dohodiru mera ñajabũ gua. Iriuru Asiague waburiduru arĩbũ. Ñajatuhaja, iruru mera wabũ. Aristarco Tesalõnica waĩcũri maca majagu gua mera wami. Tesalõnica Macedonia yeba arĩbũ. ³ Gajinũ gua Sidõngue ejabũ. Eroque ejagu Julio Pablöre õaro iimi. Eropigũ Pablöre ĩḡu mera majarã pohrogue ĩagu wadoremi. Eropigũ Pablo mera majarã ĩḡure ĩḡu gamerire erã ocũ “Õaroca,” arĩmi Julio. ⁴ Dohodirugue ñajarã daja gua taribujacũ burigã miruñe guare gajipũḡue weãtaribujubũ. Eropirã Chipre waĩcũri nũḡuro cãhmotarogue diayepũ wabũ gua. ⁵ Pũ Ciliciare taria, Panfilia sãre taria, Mira waĩcũri macague Licia yebague arĩri macague tuhajabũ gua.

⁶ Eroque ejarã, Alejandriague aridirure, Italiague wadirure dohodirure bocabũ. Eropigũ surara opũ guare irurugue wadoremi. ⁷ Bajanũri dabero waro waha, “Ñe yeboca,” arĩ, waha, Gnido waĩcũri maca diaye ejabũ gua. Eroque eja taria, miruñe burigã weã, gua wadiadireore guare weãbeobiribũ. Eropirã gua copũḡue majipa wabũ. Eropirã Creta waĩcũri nũḡuro iri nũḡuro cãhmotari masepũ gua taribuja waha, Salmõn waĩcũri ñorore tariabũ gua. ⁸ Eroque tari, iri nũḡuro pohro waha, “Ñe yeboca,” arĩ waha, “Õari peramaha” waĩcũrogue tuhajabũ. Peramaha Lasea waĩcũri maca pohrogue arĩbũ.

⁹ Eroque gua yoari boje arĩra pũhrũ, gua waboropũ ḡuhyataribũ. Eropiro erã ba duhurinũ bosenu tarira pũhrũ, Pablo dohodiru majarãre weremi.

¹⁰ —Peeque mũa. Ba duhurinũ bosenu pũhrũ mari wacũ marire mirimaja ḡuhyataria. Iru dohodiru, dohodiru maja, mũa doberi sã mari mera majarã sã mari dedereboca warã, arĩrimi Pablo.

¹¹ ĩḡu eroparĩquerecũ surara opũ dohodiru opũpũre peegũ, autugu sãre peegũ, Pablo ĩḡu wereripũre peediabirimi wadiagu. ¹² Erã payari peramaha puhirõ arĩcũ õari payari peramaha arĩbiribũ. Ero eropa arĩri peramaha arĩcũ dohodiru majarã bajarã wadiarã, Fenicegue mũriadiarima puhirõ waboro core. Fenice Creta waĩcũri nũḡuro maja peramaha arĩro, miruñe ero aridirogue abe mũririroguepũ copũḡue diayepũḡue sãre ĩhabeo miruñe aricũ õaro cãhmotari maca arĩbũ. Ero eropa arĩri peramaha arĩcũ masirã erã erogue yuju puhibũḡu arĩrisubũ arĩdiarima.

Wũariyague miruñe, deco wũaro ariyoro

¹³ Eropii docapũ surgue daberogã miruñe arinũḡabũ. “Dohpagãre õarinũ mari waburinũ ãhraa,” arĩ pepiriñorã erã. Miruñe ero aricũ

erā comeyere tarawahgū, Creta nūguro pohrogā mariabu gua. ¹⁴ Eropii pūhruñari miruñe gohroto noreste waicuri miruñe burigā weābu. ¹⁵ Eropiro dohodirure miruñe burigā weā erabu. Miruñe ero weābeero wamasibiri, majipa, miruñe mera wabu gua. ¹⁶ Claudia waicuri nūgurogā pohrogue docapugue waha, iri nūgurogā guare merogā cāhmotabu. “Marire yebo āhraa,” arirā erore dohodiru majaru miridirugā gasirure ōaro tarapeo diribu gua. ¹⁷ Irirure dohodirugue gua tarasā diripehora pūhru wuarida mera erā wañea peoma. Libia yeba turo pohro ariri imipororire “Iriru gasiru dohodiru iri mehtuhajari,” arirā güi arīma erā. Eropirā erā miru ñeari suhrire erā aīdjura pūhru dohodiru dihtare miruñe weābeobu. ¹⁸ Miruñe, deco mera burigā aribu. Gajinu sāre miruñe muraro ta daja aricū ĩarā erā erā doberire diague duhrimeyura pūhru taribujabu gua. ¹⁹ Gajinu dohodiru majare diague cóama erā erā basi. ²⁰ Bajanuri ñipirinuri aricū, abe umu majagu necā sā ne deyobirima. Eropiro burigā miruñe aribu. Eropirā “Miria waha mari. Eropirā siria warāca,” arī pepiribu gua.

²¹ Eropigu Pablo yoari boje erā ba duhura pūhru ĩgu erā core nūgaja, weremi erāre.

—Muare yu werecū peebirabu mua. “Cretague arirā mari wacū guhya arīca,” yuhu aricū peebirabu mua. Yare peerā, iru maja arīpehrerire dedeobiriboaya mua. ²² Eropigu dohpague muare werea. Guñaturaque. Eropirā güibiricāque. Arīpehrerā mari tarirāca. Iru dohodiru dihta marire wahribasaroca. ²³ Dohpagā ñamire Goāmu anyu yare dehyoami. Goāmu yagu āhraa yuhu. Eropigu ĩgure umupeoa yuhu. Anyupu yu pohro arigu wereami. ²⁴ “Pablo, güibita. Arīpehrerā weca opure mu iirare mare werero gahmea. Goāmu ōagu āhrimi. Eropigu ĩgure mu serēro dopa ta dohpague mua mera majarā sāre itamugucumi,” arāmi yare anyu. Eropirā güibirāta mua. ²⁵ Anyu yare ĩgu arīdiro dopa ta eropa waroca. Goāmure umupeoa yuhu. Eropigu ĩgu werediro dopa ta “Diaye ta āhraa,” arī pepia yuhu. ²⁶ Marire nūgurogue miruñe weābeo cóarooca, arī weremi Pablo erāre.

²⁷ Yuju ñami pe semana pūhru wuariya Adria waicuriya miruñe guare burigā weābu. Irisubure ñami deco dohodiru majarā umapu “Turogue āhraa mari,” arī pepima erā. ²⁸ Erā eropa arī pepirā yurada nūcudiru comerure dihri, duhmiumediju queoñama. Treinta y seis metro gohra ũhcābu. Mero ta waha, queoma daja. Irisubure veintisiete metro gohra ũhcābu. ²⁹ Eropirā utāre mehtuhajari arirā dohodiru auturogue wapicuriye comeyerire dirimiu dijuma erā diague dabero wacū gamerā. Eropirā “Yojaru boyoporo,” arirā, burigā serēma erā. ³⁰ Dohodiru majarā umapu erā dihta duhririma. Erā miridirugāre dohodiru majarure diague taradijupo dohodiru ĩguiru come dipure erā dijudio dopa ta iirima erā miridirugā marire ĩhari arirā. ³¹ Erā eropa duhridiaquerecū Pablo erā eropa iicū masigu surara opure, ĩgu surara mera weremi:

—Oā, uma miridirugā mera erā wacū mua arīpehrerā sirirāca, arīmi Pablo.

³² ĩgu eroparicū peerā surarapu miridirugāre diriridarire wirita, irirure cóácāma.

³³ Boyoboro coregā Pablo erāre badoremi.

—Pe semana gohra mua ne babeaa. ³⁴ Eropirā dohpaguere barā arique. Eropigu muare badorea. Mua ojocaridiarā baque. Árīpehrerā mua tarirāca, arīmi Pablo erāre.

³⁵ Īgu eropa arīra puhru Pablo panre ai, árīpehrerā erā pohro Goāmure “Ōhaa,” arī, duhpeo, irire bami Īgu. ³⁶ Īgu eropa bacū ĩha erā siporā turarā waha, árīpehrerā erā sā bama. ³⁷ Gua árīpehrerā doscientos setenta y seis masa dohodirugue árību gua. ³⁸ Eropirā erā árīpehrerā yapia waha “Iru dohodiru nucu árīca,” arī, baja trigo barire diague cóama daja.

Dohodiru imiporogue mehbejayoro

³⁹ Boyocū dohodiru majarā uma nugurore ĩarā, “Ōpa waĩcari nuguro āhraa i nuguro,” arī ĩha masibirima. Eropirā erā dipatūgure imiporo árīcū ĩarā, “Mari iritūgugue warā, erogue mehmejaboca imiporogue,” arīma erā. ⁴⁰ Eropa arīrā, come dipure diriridarire wirta medijucāma erā. Erā eropa ĩira puhru dohodiru ĩguiru maja suhriro ai wahgū nuguma diaye miruñe weābeocū gamerā. ⁴¹ Eropiro dohodirupu ĩguirupu imiporogue sīmaja merejamasibiribu. Eropiro auturore burigā pāgūri pamehtucū iriru auturo wahria wabu.

⁴² Eropa wacū ĩarā ōpa arīma surara.

—Iru miricū mari peresu ĩinirā turogue baatuhaja duhricārācoma. Eropirā erāre wejēpehocārā, arīrima surara.

⁴³ Eropigu surara opu pu Pablora wejēdiabigu árīpehrerā peresu árīrāre wejēdorebirimi. Eropigu árīpehrerā baamasirāre surara opu mata turogue baatujadoremi. ⁴⁴ Eropirā gajirā dohodiru maja wahriira mijiri mera yuuriñaja, iri mijiri weca peya baa majama. Gua eropa ĩirā gua árīpehrerā turogue tuhajabu ōaro.

28

Pablo Malta waĩcari nuguro árīpu

¹ Eropii iri nugurogue gua árīpehrerā majajanugajara puhru iri nuguro waĩre masibu. Malta waĩcari nuguro árību. ² Iri nuguro majarā masa ōarā árīrā, ōaro ĩima guare. Eropirā deco gua weera puhru yusatariabu guare. Eropirā ero majarāpu peame dihutuhaja, guare sōhmadorema. ³ Pablo peare aĩgāri aĩtīami. Īgu aĩtīara puhru iri pea pohecague árīdigu aña coñorporre wirigu, Pablo mojoto curītuhajami yahawearo mariro. ⁴ Īgu curītuhajacū ĩarā, iri nuguro majarā erā basi wereniugima:

—Īhī masa wejēdigu árībocumi. Eropigo mari turago dipuwaja moago umaro majago ĩgure dipuwaja moago, ojocaridorebeamo. Īgu wuariyague mirigu tarituhajadigu árīrami. Dohpaguere igopu ĩgure ojocaridorebeamo, arīrima erā basi.

⁵ Eropigu Pablo añare peamegue wejēsiri mehpeomi. Īgu aña pūribirimi. ⁶ “Bijiroca,” arīrā, corerima erā. Ne bijibiribu ĩgure. “Īgu sīria wagucumi,” arīrā erā ĩha corerima. ĩgure pūribirimi. Yoari boje ero bijibiricū ĩarā, ĩgure pūribiricū ĩarā, gajiropa pepirima erā. “Īhī goāmarā mera majagu árībocumi,” arīrima erā.

⁷ Erā baa tuhajadiro pohro Publio waĩcugu ya poeri árību. Īgu iri nuguro majagu opu árīmi. Eropirā ĩgu guare ōaro ĩicū uhrenu gohra ĩgu ya wihigue árību gua. ⁸ Publio pagu yojoroca, nimacuricuga árīmi. Eropigu

Īgu camague oyami. Eropigu Pablo dorecugu ya taribugue ñaja, Goãmure serē, Īgu mojotorire Īgu weca duhpeo, ðagu wacū iimi Īgure. ⁹ Īgu ðagu wacū ĩarā árĭpehrerā gajirā iri nuguro majarā dorecurāre Pablo pohrogue aĭgārĭma. Erā eropa aĭ eracū ĩagu Pablo erāre ðarā wacū iimi erā sāre. ¹⁰ Puhru erā baja sāre waja mariro oma. Gua waboro coregā árĭpehreri gua gamerire, gua warā gua baburire dohodirugue durisābasama erā.

Pablo Romague ejapu

¹¹ Ħrerā abe iri nugurogue gua árĭra puhru dohodiru mera wabu gua daja. Iriro dohodiru ĩguiru perā goāmarā Cástro, Pólux waĭcurā erā weanirā niguima. Alejandriague ariduru árĭbu iriru. Puhirópē iri nugurogue iriru dohodiru payabu. ¹² Waha, Siracusa waĭcūri macague ejarā, uhrenu gohra iri macare árĭbu gua. ¹³ Iri macare wiri waha, Regio waĭcūri macague ejabu gua. Gajinu surgue miruñe ahri guare weābeobu. Penu puhru Puteoli waĭcūri macague ejabu. ¹⁴ Eroque Jesu yarā bajamerāgā guare bocatĭrima.

—Yuju semana gohra gua mera dujaque, arĭma erā guare.

Erā eroparĭcū peerā yuju semana gohra erā mera dujanibu. Puhru mague majaa, Romague ejabu gua pare. ¹⁵ Ero majarā Jesu yarāpu gua ejarare peerā, Apio waĭcurogue doberi duarogue guare bocatĭrima. Gajirā Jesu yarā “Ħhre wihi” waĭcurogue guare bocatĭrima erā sā. Erā eropa bocatĭricū ĩagu Pablo mucubiriri mera Goãmure “Ōhaa,” arĭ, ðaro siñaja wami. ¹⁶ Romague gua ejara puhru erā peresu erā iinirāre ero majagu peresu corerā opure weremi. Eropirā Pablopure yujugu ta apima ero majarā oparā. Eropigu Īgure yujugu surara coremi.

Pablo Romague buhepu

¹⁷ Ħhrenu puhru Pablo judio masa buherā mera gamenerebu, erāre sihimu. Erā gamenerera puhru Īgu erāre weremi:

—Acawererā, mari acawererāre, mari ñecu sumarā erā iimurirare, marire erā buhera sāre tarinugabirimurabu yuhu. Yu eropa tarinugabiriquerecū ta Jerusalén yure ñehama Asia majarā judio masa. Erā eropa ĩira puhru Roma majarāre yure peresu iidorema erā. ¹⁸ Erā eropa ĩicū Roma majarā yure serēpi, yuhu ñero ĩibigu yu árĭcū yure “Dipuwajacugu āhrimi,” arĭmasibirama. “¿Ñehe dipuwaja dipuwaja wejēbocuri mari ĩgure?” arāma erā yure. Eropirā yure serēpirāpu yure wiudiarama. ¹⁹ Judio masapu yure wiudorebirama. Eropigu yu acawererāre judio masare weresādiabiriqueregu ta, “Árĭpehrerā weca opure yu ĩirare diaye werediaca yuhu,” arĭ serēabu. Judio masa yure erā wiudorebircū ĩagu “Roma majagu opure weregu waro gahmea yure,” arābu. ²⁰ Eropii muare ire werediagu sihuabu. Cristo marire taubu judio masa erā coredigu Īgu yare yu wereri waja yuhu peresugue āhrra. Eropigu ĩirire muare werebu sihuabu, arĭmi Pablo judio masa oparāre.

²¹ Īgu eroparĭcū peerā erāpu ĩgure werema.

—Judio masa mure quere wererĭpūrire guare ne obeobirama. Eropirā erogue arinirā sā gua acawererā guare mu eropa warare werebirimurama. Erā “Īgu ñero ĩigu āhrimi,” arĭ mure werebirimurama. ²² Mua ya curure árĭpehrerogue masa erā ñero werenĭguicū gua masia. Eropa masirā mu buherire mu werecū peedĭaa gua, arĭma erā ĩgure.

²³ Eropa arĭtuhaja, “Gajinu árĭrā,” arĭma erā. Gajinugue Pablo mera gameneremħtanirā tauro masa bajarā ĩgu árĭroguere erama.

Ñamiñarigã Goãmũ ĩgu opu árĩrare ðari buherire ĩgu buhenũga, pu ñamigue buhe duhúmi. Goãmũ dorerire Moisegue ĩgu apirare, Goãmũ ya weremuhtanirã erã gojarare buhemi. Eropa buhegu, erãre Jesure masicũ iidiagu iirimi Pablo. ²⁴ Yujurãyeri ĩgu buherire gamema. Eropirã gajirãpu peediabirima. ²⁵ Eropirã erã basi pe curu game dũca wari wama. Erã wiriaboro core Pablo Isaia ĩgu wereniguirare weremi. Ōpa arĩmi erãre:

—Isaia Goãmũ yare weremuhtadigu ĩgu werera diaye ta ãhrra. Mari ñecũ sumarãre weregu árĩgu Espĩritu Santo Isaiare ōpa arĩ were gojadoreñumi:

²⁶⁻²⁷ Ire oãre weregu waque: “Dipu burirã ãhrra mũa. Eropirã yahare peediabeaa mũa. Gamiri toyobirã dopa ta peediabeaa mũa. Eropirã yahare peequererã peesome mũa. Mũa eropa árĩbirã ðaro peeboaya mũa. Eropirã ðaripure gohrotoboaya mũa. Eropigu mũare peame wabonirãre tauboaya yuhũ,” arĩmi Goãmũ, arĩ gojañumi Isaia, arĩmi Pablo erãre.

²⁸ ĩgu eropa arĩra puhũ Pablo werenemomi:

—Ire masique mũa. Goãmũ buherire masare ĩgu ðaro taurire judio masa árĩbirãre buherãca gua. Erãpu peerãcoma, arĩmi Pablo judio masare.

²⁹ ĩgu eroparĩcũ peerã judio masa irire erã basi burigã game dũyaso wiriama.

³⁰ Pe bojori gohra Pablo ĩgu eropa wajayeniguri wihigue árĩpu. Ero árĩgu, árĩpehererã ĩgu ya wihigue warãre mucubiriri mera bocañimãripũ ĩgu. ³¹ Eropigu ĩgu güiro mariro Goãmũ ĩgu opu árĩrare, mari Opu Jesucristo ya sãre buhemũripũ. ĩgu eropa buhequerecũ ta ne gajirã ĩgure “Buhebiricãque,” arĩbiriñorã.

Romanos

Pablo Roma majaräre Jesu yaräre gojabeoñumi

¹ Yuhũ Pablo muare Roma majaräre gojabeoa. Yuhũ Jesucristo pohro majagu ähraa. Eropigu ðari buherire buhedoregu apimi igu yure.

² Iri ðari buherire iribojegue Goãmũ “Ïpa masare ðaro iigura,” arĩ wereyuñumi igu yare weremuhtanirã merague. Erã irire gojañuma. ³ Iri buheri ta igu magure wereri ähraa. Igu Jesucristo masa dehyoagu árĩgu Davi murũ pãrami arĩturiagu árĩdigu árĩmi. ⁴ Igu ta Goãmũ magu igu árĩrire ihmudigu árĩmi Goãmũ igu Espĩritu Santo mera. Eropigu igu Jesu sirira puhũ Goãmũ igu turari mera igure masa mũriacũ iidigu árĩmi. Eropigu Jesucristo diaye ta Goãmũ magu igu árĩrire ihmudigu árĩmi masare. Igu Goãmũ magu ta mari Opũ Jesucristo ährimi. ⁵ Igu ta guare mojomoro ïagu guau magure wereri ähraa. Igu Jesucristo masa dehyoagu árĩre igu yare buhedoregu obeomi árĩpehrero majaräre igu yare pee masi, Jesucristore erã umupeocũ iimorãre. ⁶ Eropirã mua sã Jesucristo yarã árĩmorã igu beyenirã ähraa.

⁷ Muare Goãmũ igu mahirãre, igu yarã árĩmorãre iidi árĩmi igu muare. Eropigu muare Romague árĩrãre ipũre gojabeoa. Eropigu Goãmũ mari Pagũ mari Opũ Jesucristo mera muare ðadoreã. Igu itamuri mera ðaro árĩtque mua.

Pablo Romaguere ïagu wadiarica, arĩ gojañumi

⁸ Ire weremuhtagura muare. Árĩpehreroguerẽ Jesucristore mua umupeora querere werema. Erã eropa arĩ wercũ peerã “Ïhaa,” arĩ serẽa yuhũ Goãmũre. Jesucristo igu itamuro mera eropa arĩ serẽbasaa. ⁹ Goãmũre serẽgu mua ya árĩburire árĩpehrerinari serẽbasaniguicãa. Mua ya árĩburire eropa yũ serẽbasaniguicũ Goãmũ masimi. Igu dorerire turaro mohmea igu magu ya buherire buhegu. ¹⁰ Eropa serẽgu Goẽrã judio masa árĩbirã Jesure umupeoama. Erã umupeodiro dopa ta mua mera majarã sã erã umupeoborore mua pohrogu wadiarabu yuhũ. Eropa bajasuburi wadiaqueregu ta wamasibirimurabu yuhũ. ¹¹ Goãmũ yarẽ muare buhediacã Jesure mua umupeonemoburire. Eropigu muare burigã ïadiaca yuhũ. ¹² Jesucristore umupeorã ähraa mari. Eropigu muare ïadiaca Jesucristore mari umupeori mera pepuri majarã mari game mucubiricũ iiborore. ¹³ Yũ acawererã, ire mua masicũ gahmea. Gajipugue ðari buherire yũ buhera puhũ gajirã mua acawererã judio masa árĩbirã Jesure umupeoama. Erã umupeodiro dopa ta mua mera majarã sã erã umupeoborore mua pohrogu wadiarabu yuhũ. Eropa bajasuburi wadiaqueregu ta wamasibirimurabu yuhũ. ¹⁴ Árĩpehrerãre ðari buherire buhero gahmea yure. Wuari maca majarãre, noho gamero árĩrãre, masirãre, masibirã sãre buhebu árĩgu iiaa yuhũ. ¹⁵ Eropa arĩgu, árĩgu mua sãre Roma majarãre ðari buherire burigã buhediacã.

Ïari buherire masa peerã Jesure umupeonugama, arĩ gojañumi Pablo

¹⁶ Ïari buherire peerã masa Jesure umupeonugama. Eropigu árĩpehrerãre Jesure umupeorãre Goãmũ igu turari mera erã peameguẽ

waboniräre tuami. Īgure umupeorā ðaro waborore masigu iri buherire ðari buherire buhegā guhyasūro taribea. Iri buherire judio masapure buhemāhtanirā árima. Puhru judio masa áribirā säre gua buheabu. ¹⁷ Iri buheri ðpa werea: Jesucristore umupeioräre “Ñeri marirā ðarā áhrima,” arī íhami Goāmū. Jesucristore umupeorā dihtare eropa arī íhami Goāmū. Īgū eropa arī íarire iribojegue erā arī gojadiro dopa ta arāa: “‘Ðarā áhrima,’ arī Īgū íarā Goāmūre ‘Diaye ta iigu áhrimi,’ arī umupeorā áhrima. Eropa umupeorā áriþehrerinuri Goāmū mera árirācoma,” arī gojañuma.

Masa erā ñero iiri mera dipuwajacurā áhrima, arī were gojañumi Pablo

¹⁸⁻¹⁹ Īgū árīricurire masare ðaro masicū iipu Goāmū. Eropirā Īgure Īgū árīrīre masicū diasabea masare. Īgū árīrīre masare masicū iiquerecū masapū erā ñerire iirā Goāmūre masidiabeama. Erā iri ñeri iiri mera gajiräre Goāmū yare peebiricu iima erāpu. Eropigū Goāmū umarogue arīgū masa áriþehrerā erā Īgure tarinugarire, eerā ñero iiri säre Īgū eerā eropa iiri dipuwaja guami. Eropa Īgū guarire masicū iimi erāre. ²⁰ Goāmū umaro majagu Īgū árīrīre turagu Īgū árīrīre mari íabiriquerecū ta, Īgū basi Īgū árīrīre masicū iimi Īgū marire. I yebare Īgū iira puhru áriþehrerire Īgū íhacūnugurare íarā, “Goāmū Īgū iira ta áhraa. Īgū turagu ta áhrimi,” arī guñama masa. Eropirā “Goāmū áhrimi,” arī masima masa áriþehrerā. Eropirā masa “Goāmū áhrimi,” arī masiquererā eropa ñerire iiniguicārā, dipuwajacuma. “Mure masibirabu. Eropigū ñerire iibabu,” masa arīmasisome Goāmūre. ²¹ Goāmū Īgū árīricurire masiquererā ta erā Īgure umupeobeama. “Mūhū Goāmū, turagu ta áhraa,” arībeama. Eropirā Īgū erāre ðaro iiquerecū ta “Ðhaa,” arībeama Īgure. Eropirā pee masibirā árīrā, ñeri dihtare pepima erā. ²² “Pee masirā áhraa,” arīquererā ta pee masibirā wahama erā. ²³ Eropa warā Goāmūre eropa arīniguigūre ðagure umupeobeama. Eropa umupeobirā “Goāmū áhrimi,” erā arīrāpure erā wéanirāpure umupeonugama erā. Eropirā masare, mirimagū porāre, píruare, waimuräre wéanugu umupeoma erā, “Mari Goāmū áhrimi,” arīrā.

²⁴ Erā eropiicū Īgū “Erā gamero dopa ta ii curaporo,” arīgū Goāmū erāre cohāmi. Īgū eropa cóara puhru, erā ñeri dihtare uaribejarā erā basi ñeri dihtare iiniguicāma. ²⁵ Eropirā Goāmū yare peebiri, guyaripure ðaro peema. Goāmū yapure guyarī iro dopa ta wacū iima erā. “Diaye ta Goāmūre áriþehreräre iidigure umupeoro gahmea,” mari arīquerecū erāpu Īgure umupeobeama. Eropa Goāmū gohrare umupeobirā Īgū iirapure umupeoma erā.

²⁶ Erā eropiiniguicācū Īgū “Erā gamero ñerire ii curaporo,” arīgū Goāmū cohāmi erāre. Eropirā erā mera majarā nome marapucurā nome iro dopa arībeama. Eropirā erā nome seyaro ñero iima erā basi. ²⁷ Erā iro dopa ta árīrā ũma sã nomere gamebirā erā basi ta erā dupurire uaribejarā áhrima. Eropirā erā basi ta erā ñero iira dipuwaja erā dupure ñero goroweoma.

²⁸ Eropa Goāmūre masidiabirā Īgure gamebirira dipuwaja Goāmū “Erā gamero ii curaporo,” arīgū erāre cohāmi. Īgū eropa cóacū erāpu ñerire guñanigu, ñerire uaribejarire iiniguicāma. ²⁹ Eropirā erā burigā ñero iiniguima. Nome mera ñero iiniguirā, erā ñerire uaribejaniguirā, gajirā yare gametarirā, gajiräre ñero iiniguirā, gajirā gajinore opacū íhaturirā,

masare wejērā, game duyāsorā, guyaricurā, masare ĩhaturirā, ñeri quere iirā āhrima erā. ³⁰ Gajirā erā iibiriquerecū ta ñero arī werewuarā, Goāmure ĩhaturirā, gajirāre papūro yuhrirā, “Gua tamera gajirāre tarinugarā ōarā āhraa,” arī pepirā, gajirāre eropa arī weremaacārā, gajī ñerire iinugarā, erā pagu sumarāre tarinugarā āhrima. ³¹ Pee masibirā āhrima. Erā werediro dopa ta iibirā, masare ne umupeobirā, erāre ñero iirare ne cādijibirā, ne gajirāre mojomoro ĩabirā āhrima. ³² Eropa árĩrāre Goāmū erāre dipuwaja moa peamegue cóagucumi ĩgu erāre. Eropa ĩgu cóāburire masiquererā erā ñerire iinigucāma. Eropirā gajirā erāre ĩhacūcū, erā iiro dopa ta ñero iicū ĩarā “Gua iiro dopa ta iima,” arī mucubirima.

2

Masare erā ñero iira dipuwaja moadoregu irire diaye ta iigucumi Goāmū, arī were gojañumi Pablo

¹ Erā eropa ñerire iicū ĩarā gajirā ōpa arībocoma: “Erā ñetariarā āhrima. Goāmū erāre dipuwaja moaporo,” arībocoma. Eropa arĩrāre ōpa arī werediaca. Mua sā erā iiro dopa ta iiaa. Eropirā “Erā ñetariarā āhrima,” gajirāre arī werewabiricāro gahmea muare. Eropa arī wererā mua basi ta erā ñerire iiro dopa ta iirā dipuwajacurāca. Iri ñerire masiquererā iirā mua ñero dipuwajacurāca. ² “Goāmū diaye ta dipuwaja moagu āhrimi,” arī masia mari. Árĩpehrerāre ñerire iirāre dipuwaja moagucumi. ³ Eropigu mua ñero iira dipuwaja árĩcū mua sāre dipuwaja moagucumi. “Gajirā dipuwajacurācoma,” arī werewuarā, “Guapure dipuwaja moasome,” arī pepiboca mua. Árĩbeaa. Mua sāre mua ñero iira puhru dipuwaja moagucumi. ⁴ Goāmū muare mojomoro ĩagu mata dipuwaja moabeami. Eropirā “Goāmū yu mera guabeami,” arī pepiboca mua ñerire iira puhru. Árĩbeaa. Goāmū muare mojomoro ĩagu mata mua ñero iira puhure dipuwaja moabeami. Mua ñero iirire bujawerecū ĩadiagu, ĩgure mua yuhricū gamegu mata dipuwaja moabeami. ⁵ Eropa mata dipuwaja moabiriqueregu. mua Goāmure peebirinigucācū, mua ñero iirire bujawerebircū ĩagu dipuwaja moagucumi. Mua eropa ñero iiniguirāre ĩgu dipuwaja moarinu árĩcū burigā dipuwaja moagucumi muare Goāmū. Irinure Goāmū masare dipuwaja moacū árĩpehrerā ĩarā “Diaye ta erā ya dipuwaja āhraa,” arī masirācoma. ⁶ Eropigu árĩpehrerā nucu erā ñero iira dipuwajare dipuwaja moagucumi Goāmū. Eropigu erā ōarire iirā sāre ōarire erāre ogucumi. ⁷ Yujurāyeri ōarire iima. Erā ōarā árĩdiarā, Goāmū ĩgu gamero dopa iidiarā umuri nucu Goāmū mera árĩdiarā āhrima. Erā tamerare umuri nucu ĩgu mera erā árĩborore iigucumi Goāmū. ⁸ Gajirāpu erā iro dopa árĩbeama. Erā erā gamero iirā árĩcāma. Diaye majare gamebirā ñerire iiniguirā āhrima. Goāmū erā mera turaro guagucumi. ⁹ Árĩpehrerā ñerire iirā ñero tarirācoma. Judio masare eropa wamuhtaroca. Eropirā judio masa árĩbirā sāre eropa ta waroca. ¹⁰ Árĩpehrerā ōarire iirāpure “Ōaro mua iiaa,” arī ĩagucumi Goāmū. Eropirā erāpu Goāmū mera ōaro mera árĩrācoma. Judio masare eropa ta wamuhtaroca. Eropiro judio masa árĩbirā sāre eropa ta waroca. ¹¹ Goāmū mari iirare ĩagu queoro beyemi árĩpehrerāre. Judio masare, judio masa árĩbirāre Goāmū yujuropa ĩhami marire. ¹² Gajirā Moise dorerire erā mooquerecū erā ñerire iicū erāre dipuwaja moagucumi

Goām̄. Iri doreri oparāp̄u ñerire erā iicū erā dorerire erā tarinūgari waja dipuwaja moagucumi Goām̄ erā säre. ¹³ Moise dorerire peequererā ta yuhribirāre “Ōarā āhrima,” arībeami Goām̄. Īgu dorerire iirāp̄ure “Ōarā āhrima,” arī ĩhami Goām̄. ¹⁴ Judio masa arībirā Moise dorerire mooquererā erā pepiro mera ōarire iirā Goām̄ dorerire iirā iima. Eropirā Moise dorerire gojarapūre mooquererā erā, erā pepirigue iri dorerire opama. ¹⁵ Eropirā Goām̄ dorerire erā pepirigue diaye opama. Eropa oparā ñerire ĩ mata erā ñero iirare masima erā basi. Eropigu ñerire iidigu, “¿Duhpigū ñerire iayuri yuhū?” arī pepimi ĩgu. Eropigu ōari säre ĩgu iirare masimi ĩgu. ¹⁶ Eropigu Goām̄ Jesucristore ĩgu obeocū masa erā iirare ĩagucumi. Masa erā ĩricurire gajirāre weribirare erā duhrare Jesucristo masipehogu ĩgu erā ĩricurare ĩagucumi. Eropa ta ĩha beyegucumi, arī buhea yuhū ĩgu ya ōari buherire buhegu.

Goām̄ Moisere ĩgu apira dorerire were gojañumi Pablo

¹⁷ Muap̄u judio masa arīrā, Goām̄ Moisere ĩgu apira dorerire umupeorā arīrā, “Goām̄ yarā āhraa gua,” arī pepiraa m̄ua. ¹⁸ Eropirā Goām̄ dorerire masirā arīrā, ĩgu gamerire masia m̄ua. Eropa masirā arīrā “Ōarire gua iiborore beyemasia,” arī pepiraa m̄ua. ¹⁹ Eropa arī pepirā ōpa arī pepinemoa m̄ua judio masa: “Gajirā ne masibirāre ōaro masicū ĩaa gua. Erāre gua buhebiricū ne Goām̄re masibiriboñuma. Eropirā ñerire ne duhubiriboñuma,” arī pepiraa m̄ua. ²⁰ Eropirā “Pee masibirāre ōarire buhea gua judio masa. Majirāgā säre buherā āhraa gua,” arī pepiraa m̄ua. Eropirā “Goām̄ dorerire oparā diaye arīrere masipehoa gua,” arī pepiraa m̄ua. ²¹ ¿M̄ua eropa arī pepirā arīquererā ta duhpirā muap̄u m̄ua buhediro dopa ta iibeari? ¿Gajirāre yajadorebiriquererā duhpirā muap̄u yajari? ²² ¿Gajigu marapo mera ñero iidorebiriquererā duhpirā muap̄u marapo mera ñero iiri? “Goām̄ āhrimi,” erā arī wéanirāre umupeorire doorā arīquererā ¿duhpirā Goām̄ gohrap̄ure ōaro umupeobeari muap̄u? ²³ “Goām̄ Moisere ĩgu apira dorerire opaa guap̄u,” arīrā arīquererā ta ĩgu dorerire tarinūgaa m̄ua. Eropa tarinūgarā Goām̄re erā umupeobiricū iirā iica m̄ua gajirāre. ²⁴ Eropa ta werea Goām̄ yare erā gojarapūgue: “Judio masa arībirāp̄ure ñero Goām̄re wereniucū ĩaa m̄ua judio masap̄u,” arī gojañuma Goām̄ yare erā gojarapūgue.

²⁵ M̄ua judio masa Goām̄ dorerire iiniguirā arīrā gasiro merogā wiri aīsūnirā circuncisión iinirā arīcū ōapūrica. ĩgu dorerire iibiricū m̄ua judio masa arīricuri duhpiri arībeaa. ²⁶ Eropiro judio masa arībirā merogā gasirogāre wiri aīsūbirinirā erā arīquerecū ta Goām̄ dorerire erā iirā arīcū ĩagu, “Yaharā masa ta āhrima,” arī ĩabocumi Goām̄ erāre. Judio masapure ĩgu eropa arī ĩadiro dopa ta judio masa arībirā säre eropa ta arī ĩabocumi. ²⁷ Bajarā judio masa Goām̄ yare gojarapūre Moise dorerire opaquererā irire iibeama erā. Eropirā gajirā judio masa arībirāp̄u Moise dorerire opabiriquererā gasiro merogā wiri aīsūbirinirā arīquerera Goām̄ dorero dopa ta iima. Eropa iirā arīrā judio masare erā ñero iirare masicū iirā iima. ²⁸ “Gua judio masa Goām̄ yarā āhraa,” arī pepiraa m̄ua. Eropigu Goām̄ yagu gohra arīgure weregura muare. ĩgu dupupure merogā gasirogāre wiri aīsūdigu arīqueregu ta Goām̄re umupeobigu arīgu diaye ta Goām̄ yagu arībeami. Judio masu gohra arībeami. ²⁹ Espiritu Santore opagup̄u, ĩgure yuhriugu ĩgu ta judio masu

gohra Goāmu yagu gohra āhrimi. Eropirā Goāmu yarā gasiro merogā wiri aīsūnirā dihta áríbeama. Erā Espírítu Santo mera erā pepirigue ōari mera gohrotorā āhrima Goāmu yarā. Eropa árírāre “Ōarā āhrima,” arī íhami Goāmu. Masa erāre eropa arī íabiriquerēcū ta eropa arī íhami Goāmupū erāre.

3

¹ Yū eropa arīquerēcū judio masa erā árírícūri, gasiro merogā wiri aīsūnirā erā áríri ōapūricāa. ² Judio masa erā áríri yuju diaye gohra áríbeaa. Goāmu ígu werenigūri judio masare were apimūhtatuhañumi. Erā ígu yare erā gojarapūre opamuhtañuma. Eropirā judio masa erā árícū ōapūricāa erāre. ³ Eropirā bajarā judio masa Goāmure erā peebiriquerēcū ta ígu werera diaye ta āhraa. Eropígu ígu arī werediro dopa ta iigucumi ígu. ⁴ Eropa ta āhraa. Árīpehrerā masa erā guyaricūrā erā árīquerēcū ta Goāmupū ne guyabeami. Ígu yare gojarapūgue eropa ta arī gojara āhraa: Diaye ta eropa ta arī wereniguígu āhraa muhu Goāmu. Eropirā masa mure ne weresāmasibeama, arī gojañuma iribojeuere.

⁵ Masa erā pepiri mera ōpa arī pepimaacābocoma: “Mari ñeri iiri árícū, Goāmu ígu ōari iiripū deserea. Eropiro mari ñeri iiri mera Goāmu ígu ōaro iiri deserecū ígu marire mari ñeri iiri dipuwaja moagu queoro iibeami,” arī pepimaacābocoma. ⁶ Eropa áríbeaa. Mari ñeri iirapū ōari árícū Goāmu mari ñeri iira waja dipuwaja moamasibiriboañumi.

⁷ Masapū guyaricūrā āhrima. Goāmupū ne guyari marígu āhrimi. Guyari marígu ígu árícū ōaro masía mari. Eropirā masa yujurāyeri ōpa arī pepirima: “Gua guyari mera Goāmu ígu diaye árírípū deserea. Eropiro gua guyaripū ōha āhraa. ¿Eropiro gua guyari ōacū duhpígu gua guyari waja dipuwaja moabocuri guare Goāmu?” arī pepimaacāma yujurāyeri erā basi. ⁸ Eropirā ōpa arī guyama yujurāyeri guare: “Mari ñerire iiri mera Goāmu ígu ōagu árírípū deserea. Eropirā ñerire iiro gahmea,” aríma. “Pablo sá eropa ta arī buhemi,” arī guya weresāma erā guare. Erā eropa arī guyari dipuwaja Goāmu erāre dipuwaja moagucumi. Eropa ta iiporo erāre.

Árīpehrerā ñeri iira dipuwajacūrā āhraa mari, arī gojañumi Pablo

⁹ ¿Eropirā dohpa pepiri maa? ¿Mari judio masa gajirā tauro ōarā árícūri? Áríbeaa mari. Judio masa, judio masa áríbirā sá árīpehrerā dipuwajacūrā āhraa mari. Eropa ta āhraa yū árīpehrerāre arī buhediro dopa ta. ¹⁰ Eropa ta arī gojara āhraa Goāmu yare erā gojarapūgue sá. Ōpa arī gojañuma:

Ne yujugu masū ōagu marimi. ¹¹ Mari árīpehrerā masa peediabirā dihta āhraa. Eropirā árīpehrerā mari masa Goāmure ne guñabeaa.

¹² Eropirā mari Goāmu yare gamebirā árīpehrerā ñerire iirā āhraa. Ne yujugu ōarire iigu marimi. ¹³ Mari werenigūri, ñeri dihta wíría mari disírore. Burígā guyaricua. Eropa werenigūirā aña gūcūrire ígu pūriri wiuro dopa ta pūrío mera werenigūiwua mari. ¹⁴ Eropirā mari gajirāre ñero werenigūirā, papūro werenigūirā āhraa. ¹⁵ Eropirā mata guarā masare mata wejā mari. ¹⁶ Eropirā noho mari waro, masare ñero ii, ñero taricū iiaa mari gajirāre. ¹⁷ Eropirā gajirā masa mera ōaro áríbeaa mari. ¹⁸ Eropirā Goāmure ne umupeobea, arī gojamūriñuma iribojeuere mari masare.

19-20 Eropirā ōpa masia mari: “Mari masa űnerā āhrraa,” eropa arī gojarā judio masa sāre Moise doreri iirā sāre arī wereniguimūriñuma. Eropirā árīpehrerā mari judio masa sā “Gua tamera űneri dipuwaja mara guare,” arīmasibea. Goāmū doreripure mari masa ne iibeaa. Eropirā iri dorerire iibirā Goāmū mera ōmasibea mari. Īgu dipuwaja moamorā āhrraa. Eropiro mari űnerā árīrere Īgu doreripu masicū iiaa marire. Iri dorerire masirā “Gua iiricuri űneri āhrraa,” arī masia.

Jesucristore ōaro umupeocū Goāmū marire “Ōarā āhrima,” arī ĩhami, arī gojañumi Pablo

21 Dohpaguere Jesucristore umupeorāre “Dipuwaja moorā, ōarā āhrima,” arī ĩhami Goāmū pare. Īgu eropa arī ĩaborore Goāmū yare weremuhtanirā Moise sā weremuhtañuma. Eropigu masare erā űnero iira wajare Īgu taurare weremi marire Goāmū. Moise dorerire mari iira mera mari űnerire taubeami. Ōpa āhrraa: 22 Árīpehrerā Jesucristore umupeorāre, Īgu yare peerāre, “Ōarā āhrima,” arī ĩhami Goāmū. Erā űnero iira dipuwajare taumi. Eropa iigu árīpehrerāre yujuropa ōaro iimi. 23 Mari masa árīpehrerā űnerire iirā āhrraa. Eropirā Goāmū Īgu gamero dopa ne iibeaa mari. 24 Mari eropa iiquerecū Goāmū árīpehrerā masare Īgu mojomoro ĩadigu árīmi. Eropigu Jesucristo mari masa űneri iirare wajayebasadi árīmi. Īgu eropa iira puhru “Dipuwaja moorā āhrima,” arī ĩhami Goāmū Jesure umupeorāre. Waja gamero mariro mari űnerire cohāmi. 25 Iribojegu majarā erā űnero iirare ĩagu Goāmū mata dipuwaja moabiriñumi erāre. Īgu eropa dipuwaja moabigu erā űnero iirare bu gohra pepicāgu iibiriñumi. Eropigu erā űnerire cādijibu Īgu Jesucristore obeodigu árīmi árīpehrerā masa erā űneri dipuwajare sīribasabure Īgu di cóābure. Eropigu mari masa Jesucristore umupeocū Goāmū mari űneri iirare cādijigucumi. Eropa iigu “Īgu diaye iigu āhrimi,” marire arī masicū iidi árīmi. 26 Īgu magure obeodigu árīmi dohpague majarā sā erā űneri iira dipuwajare wajayebasabure. Eropiidigu árīmi “Īgu ōaro diaye iigu āhrimi,” mari masa arī masiborore. Jesure umupeorāre “Ōarā āhrima,” ĩgu arī ĩaborore eropiidi árīmi.

27 Eropirā dohpaguere mari ejatuharo “Ōarā āhrraa mari,” ne arīmasibea mari. “Moise dorerire iirā ōarā āhrraa,” iri sāre arīmasibea mari. Ōpa arīmasia mari: “‘Diaye ta yu űnerire Īgu cohāmi,’ mari Jesucristore arī umupeocū, ‘Ōarā āhrima,’ arī ĩagucumi marire Goāmupu,” arīmasia mari. 28 Ōpa masia mari: Moise dorerire mari iiquerecū, iri mera “Ōarā āhrima,” Goāmū arī ĩabeami marire. Jesucristore mari umupeocū ĩagu marire “Ōarā āhrima,” arī ĩhami ĩgu.

29 Goāmū judio masa opu dihta árībeami. Judio masa árībirā opu sā āhrimi. 30 Eropa árīgu Goāmū yujugu ta árīgu, árīpehrerā wecague opu āhrimi. Eropa árīgu judio masa Jesure erā umupeocū, “Erā dipuwaja moorā āhrima,” arī ĩagucumi. Eropigu judio masa árībirā sāre Jesure erā umupeocū, erā sāre “Dipuwaja moorā āhrima,” arī ĩagucumi Goāmū. 31 ¿Eropirā Jesucristore umupeoturā Goāmū Moisere ĩgu dorerire cóārā iibocuri mari? Irire cóābeaa mari. Jesure umupeorā tamera Goāmū dorerire diaye ta iirā iiaa mari.

4

Abrahã Goãmure ïgu umupearare were gojañumi Pablo

1 Mari ñecu árĩmuhtadigu Abrahã Goãmure “Diaye iigu ãhrimi,” arĩ umupeomariñumi ïgu sã. ïgu eropa umupeiõri mera õañumi Goãmũ mera. 2 Abrahã õaro ïgu iiquerecũ “Õagu ãhrimi,” arĩ ïanibirimariñumi Goãmũ ïgure. ïgu Goãmure umupeocũ tamerare “Õagu ãhrimi,” arĩ ïamariñumi ïgure. Eropigu ïgu ejatuharo õarire iiqueregu ta ñegu árĩniçu “Yũ tamera õagu ãhrraa,” arĩmasibiriñumi Abrahã Goãmũ ïgu ïacũ. 3 Goãmũ yare gojarapũ õpa ãhrraa: “Abrahã Goãmũ ïgure arĩrare õaro ïgu peecũ, ïgure ïgu umupeocũ ïha Goãmũ ïgure ‘Õagu ñeri iira dipuwaja moogu ãhrimi ïgu,’ arĩ ïañumi ïgure,” arĩ gojara ãhrraa. 4 Õpa ãhrraa: Mari masare yuju diaye wajayebeamã. Mari õaro mohmera waja marire wajayema. Goãmupũ eropa iibeami. 5 Mari gamero õarire iiro mariro mari Jesucristore umupeocũ ïha marire yuju diaye ïgu õarire ocãmi. Eropigu marire “Õarã ãhrima,” arĩ ïhami marire Jesucristore umupeorãre. Ñerire iinirãre erã ñeri iira dipuwaja maricũ iigu ãhrimi. Eropirã masa Jesucristore umupeocũ ïagu “Dipuwaja moorã ãhrima,” arĩ ïhami Goãmũ erãre. 6 Masa erã gamero mera õaro iirare Goãmũ ïabeami. Erã ïgure umupeocũ tamerare ïhami. ïgure umupeorãre “Õarã ãhrima,” arĩ ïhami. ïgu eropa arĩ ïadigupũ ïgu mucubiririre õpa arĩ gojañumi Davi murgũ iribojegue majagu:

7 Erã ñerire ïgu cãdijinirã tauro mucubirima.

8 “Õarã ãhrima. Erã ñero iirare guñasome yuhũ,” arĩmi Goãmũ erãre. Eropirã burigã mucubirima, arĩ gojañumi Davi.

9 Judio masare merogã gasirogãre wiri aĩsũnirã dihtare erã ñero iirare cãdijibeami Goãmũ. Judio masa árĩbirã sãre erã ñero iirare cãdijimi ïgu. Dipaturi Abrahãre guñaque mua. ïgu Goãmure umupeocũ ïagu ïgu ñero iirare cãdiji, “Õagu ãhrimi,” arĩñumi Goãmũ. 10 ¿Dohpãricũ eropa arĩyuri Goãmũ Abrahãre mua pepicũ? ïgu merogã gasirogãre ïgu wiri aĩboro coregue ta ïgure “Õagu ãhrimi,” arĩ ïañumi Goãmũ. Eropigu gasirogãre wiri aĩgu ïgu ñerire cõatuhadigugue wiri aĩñumi. 11 Eropigu gasiro merogã wiri aĩboro coregue Goãmure umupeonugatuhañumi Abrahã. ïgu eropa umupeocũ “Õagu ãhrimi,” arĩ ïañumi Goãmũ ïgure. Eropa ïgu umupeorire, ïgu yagu ïgu árĩrĩre ïhmudoregu Goãmũ ïgu dupure merogã gasirore wiri aĩdoreñumi. Eropigu Abrahã ïgu gasirogã wiri aĩboro core Goãmupũ “Õagu ãhrimi,” arĩ ïatuhãñumi ïgure. Eropigu Abrahã Goãmure “Diaye ta iigu ãhrimi,” ïgu arĩ umupeodiro dopa ta árĩpehrerã Goãmure eropa arĩ umupeorãre “Õarã ãhrima,” arĩ ïhami Goãmũ. Eropigu judio masa árĩbirãre gasirogã wiri aĩsũya marirã sãre “Õarã ãhrima,” arĩ ïhami Goãmũ. Eropirã erã Abrahã pãramerã iro dopa ta dujama. 12 Erã iro dopa ta judio masa sã gasirogã wiri aĩsũnirã sã, Goãmure erã umupeorã árĩrã Abrahã pãramerã diaye ta ãhrima. ïgu gasirogã wiri aĩboro coregue, Goãmure umupeo ïgu mera õañumi. Eropirã ïgu umupeodiro dopa Goãmure umupeorã õaro ãhrima Goãmũ mera.

Goāmũ Abrahamẽre ĩgu werepira diaye ta árĩcũ masiĩume Abrahamã, arĩ gojañumi Pablo

13 Iribojegue òpa arĩñumi Goāmũ Abrahamẽre: “I yebare mũre, mũ pãramerã árituriarã sãre oğũca,” arĩ werepiñumi Goāmũ Abrahamẽre. Moise dorerire Abrahamã òaro iira waja eropa arĩbiriñumi Goāmũ ĩgure. Abrahamũ Goãmũre “Diaye ta ĩgu àhrimi,” arĩ umupeora pũhũ eropa arĩ werepiñumi. ĩgu eropa arĩ umupeocũ ĩagu Goãmũ ĩgure “Òagũ àhrimi,” arĩ ãañumi. 14 Goãmũ oburire Moise dorerire iirã dihta aĩbeama. Erã dihta aĩcũ mari Goãmũre umupeori ñehe arĩburi arĩbiriboya maripare. Eropiro Goãmũ ĩgure umupeorãre “Mũare oğura,” ĩgu arĩ werepira duhpiburi arĩbiriboya. 15 Goãmũ Moiserẽ ĩgu apira dorerire iirã bocatiubeaa mari. ĩgu dorerire mari pee tarinũgara waja, dipuwaja moasũmorã àhraa mari. Iri doreri maricũ tamera ĩgu dorerire tarinũgaro mariboya.

16 Eropirã Goãmũre umupeorã dihta ĩgu oburire aĩrãcoma. Abrahamã Goãmũre “Diaye ta ĩgu àhrimi,” arĩ umupeomuriñumi. Eropirã arĩpehrerã Abrahamã Goãmũre umupeodiro dopa ta umupeorã ĩgu pãramerã iro dopa dujama. Eropigũ “Ire mũre mũ pãramerã sãre oğũca,” Goãmũ Abrahamẽre arĩgu arĩpehrerãre ĩgure umupeorãre arĩgu iĩñumi. Eropirã Moise dorerire iirã dihta Goãmũ ĩgu oburire aĩsome. Arĩpehrerã Abrahamã iidiro dopa Goãmũre umupeorã erã ĩgu oburire waja mariro aĩrãcoma. 17 Irire Abrahamẽre ĩgu arĩdiro dopa ta arĩ gojañuma iribojeguerẽ: “Baja yebari majarã ñecu arĩbu apibu mũre,” arĩ, apipu Goãmũ Abrahamẽre,” arĩ gojañuma iribojegue ta. Eropigũ ĩgu Goãmũre “Diaye ta ĩgu àhrimi,” arĩ umupeomuriñumi. ĩgu eropa umupeocũ Goãmũre umupeorã ñecu iĩñumi Goãmũ ĩgure. Goãmũpũ sĩrinirãre masugu, arĩpehrerire ihacũnugudigu àhrimi.

18 “Baja macari majarã mũ pãramerã árituriarã aĩrãcoma,” arĩmuriñumi Goãmũ Abrahamẽre. Goãmũ ĩgu eroparicũ Abrahamũ porã marigu arĩqueregu, “Diaye ta àhraa,” arĩ pepimuriñumi. 19 Eropigũ cien bojori opagu arĩqueregu, ĩgu marapo sã bũro ne porã marigo arĩquerecũ, “Porãcũsome gũa,” arĩ ne pepibiriñumi Abrahamã. Eropigũ Goãmũ ĩgure arĩ werepira “Diaye ta àhraa,” arĩ pepiñumi Abrahamã. 20 “Goãmũ ĩgu arĩdiro dopa ta ne iĩsome,” arĩ ne pepibiriñumi Abrahamã. Eropigũ ĩgu Goãmũ ĩgure werepirare òaro peeñumi. ĩgu eropa arĩrare peenijagu, “Goãmũ turagu àhrimi,” arĩ umupeogu iĩñumi. Eropigũ Goãmũre “Diaye ta ĩgu àhrimi,” arĩ umupeonemoñumi ĩgu. 21 “Goãmũ ĩgu arĩdiro dopa ta òaro ĩgũcumi,” arĩ pepi òaro masiĩñumi Abrahamã. 22 ĩgu eropa masicũ, Goãmũre ĩgu umupeocũ ĩha Goãmũpũ “Dipuwaja moogu àhrimi,” arĩ ãañumi Abrahamẽre. Eropa ta arĩ gojañuma Goãmũ yare erã gojarapũgue.

23 Abrahamã Goãmũre ĩgu umupeora pũhũ Goãmũ òaro ãañumi ĩgure, arĩ gojañuma. Eropa gojarã “Mũa sãre Goãmũre umupeorãre òaro ĩagũcumi,” arĩ mari sãre gojajuñuma. 24 Irire mari masiburire gojañuma. Eropigũ Goãmũre “Diaye ta ĩgu àhrimi,” mari arĩ umupeocũ “Dipuwaja moorã àhrima,” arĩ ĩagũcumi Goãmũ mari sãre. ĩgu tamera mari Opũ Jesu ĩgu sĩricũ masudigu àhrimi. 25 Jesupũ mari ñeri iira dipuwaja sĩridigu arĩmi. ĩgu sĩrira pũhũ masa muriadigu arĩmi ĩgu Goãmũ marire “Dipuwaja moorã, òarã àhrima,” arĩ ĩgu marire ĩaburire.

5

“Dipuwaja moorā āhrima,” Goāmū ĩḡu arī ĩacũ õpa waroca marire, arī gojañumi Pablo

¹ Jesucristore mari umupeoturacũ ĩaḡu “Dipuwaja moorā, õarā āhrima,” arī ĩhami Goāmū marire. ĩḡu eropa arī ĩacũ Goāmū mera mari õaro árĩcũ iimi marire mari Opu Jesucristo. ² Eropirā mari ĩḡure umupeocũ ĩaḡu Goāmū marire mahiḡu, marire aĩmi ĩḡu mera mari õaro árĩboro dopa. Goāmū tamera õatariagũ āhrimi. Eropiḡu ĩḡu iro dopa ta õarā árĩcũ iigucumi ĩḡu marire. ĩḡu eropiiburire õaro masia mari. Eropirā mucubiria. ³ Eropirā ñero tariquererā mucubiria mari. Ñero tarirā irire yujoro bojemasia mari. Eropu yujoro bojerā ñero tariquererā õaro Goāmure guñaturarā wahaa mari. Eropirā Goāmū yare duhubeaa mari. ⁴ Mari eropa árĩcũ ĩaḡu, “Õaro iiabũ mũa,” arĩḡucumi Goāmū marire. ĩḡu marire eroparĩcũ, marire ĩḡu tauborore õaro masia mari. Eropirā ñero tarirā sã mucubirimasia mari. ⁵ Eropiḡu Goāmū marire Espĩritu Santore obeomi mari mera árĩdoreḡu. Eropiḡu Espĩritu Santopũ mari mera árĩḡu Goāmū marire eropa mahiniguicãrire masicũ iimi. Eropirā “Goāmū õaro taugucumi marire,” arī “ĩḡu mera árĩniguicãrãca,” arī masia mari.

⁶ Eropiḡu ero core mari ñeri iirare mari basi mari cóãmasibiricũ ĩaḡu, ĩḡu queodiro sihajacũ mari ñerā árĩra dipuwaja Cristo sĩripũ. ⁷ Mari masa gajigũ ya árĩburire sĩribasadiabeaa. Oaḡu árĩḡure yujugu sĩribasabocumi gajisubũ arĩḡu. ⁸ Maripũ ñerā mari árĩquerecũ Jesucristo sĩribasadi árĩmi mari ya árĩburire. ĩḡu eropiicũ Goāmū turaro marire ĩḡu mahirare masia mari. ⁹ Mari ya árĩburire ĩḡu sĩricũ, ĩḡu di cóãcũ, Goãmũpũ marire “Dipuwaja moorā āhrima,” arī ĩhami. ĩḡu eropa arī ĩara pũhrũ dohpaguepũre marire peamegue wabonirãre taumi Jesucristo. Eropiḡu ĩḡu yarā marire ĩḡu iira pũhrũ marire dipuwaja moasome Goāmũ. ¹⁰ Eropirā Goãmure gamebirā mari árĩquerecũ ta ĩḡu magũ sĩriḡu mari ñeri iira dipuwaja wajayebasadiḡu árĩmi. Eropu wajayebasagu ĩḡu Pagure Goãmure guabiricũ iimi ĩḡu mari mera. Eropirā ĩḡu yarā wahaa mari. Dohpague tamerare tauro õaro iigucumi marire. ĩḡu yarā mari árĩcũ, Jesu ĩḡu masa muriara mera marire peamegue wabonirãre õaro taugucumi ĩḡu. ¹¹ Pũhrũḡe mari tariborore mucubiria mari. Goãmũpũre guña mucubiria. Mari Opu Jesucristo mari ñeri dipuwaja ĩḡu sĩrira pũhrũ Goāmũ yarā āhraa mari. Eropirā mucubiria.

Adãre Cristo sãre wereñumi Pablo Roma majarãre

¹² Jesucristo taunirā árĩrã õpa masia mari: Adán ĩḡu ñerire iinũgarasubugue i yebare ñeri árĩnũgayoro. Ñeri árĩnũgacũ masa sĩrinũgañuma. Mari árĩpehrerā ñerire iiaa. Eropirā árĩpehrerā mari ñerā árĩri waja sĩrirãca. ¹³ Goāmũ ĩḡu dorerire Moisere apĩboro core diaye ta i yeba majarā ñerire iimuriñuma. Eropu ñerire iiquerecũ iri doreri maricũ ĩḡu doreri tarinũgari waja dipuwaja moamasibiriñumi dohpa. ¹⁴ ĩḡu eropa dipuwaja moamasibiriquerecũ ta Adãnpũ ĩḡu pũhrũ árĩrã iri doreri mariquerecũ ta sĩrimuriñuma. Moise ĩḡu árĩboro core iri doreri mariquerecũ ta masa sĩrimuriñuma. Gajirā ñerire iirã Adán ĩḡu ñero iimuridiro dopa gohra iibirimuriñuma. Eropiibiriquererā erã sã

sīrimuriñuma. Eropigu Adán ñerire iinugadigu árĩñumi i yebare. Yoara puhrugue i yeba arigu Jesucristopu ðarire iinugadigu árĩmi.

¹⁵ Adán ĩgu iira Jesucristo iira dopa árĩbeaa. Adán yujugu ta ĩgu ñeri iira dipuwaja bajarā masa sīrinugañuma. Goāmupu marire mahigu Jesucristore obeodigu árĩmi. Eropigu Jesucristopu ĩgu yujugu ta mari ya árĩburire sīribasagu mari bajarā ĩgu yarā Goāmu mera umuri nucu árĩniguiborore iidi árĩmi. ¹⁶ Eropigu Goāmu masare ĩgu mojomoro ĩadiro Adán ĩgu Goāmure tarinugadiro dopa árĩbeaa. Adánpu ĩgu yujugu ta ñerire ĩgu iira dipuwaja árĩpehrerā masa dipuwaja opama. Erō eropa dipuwaja opaquerecū, masa wuaro erā ñerire iiquerecū dohpaguere masare mojomoro ĩagu Goāmu erā ñerire cohāmi. Eropa cóagu “Dipuwaja moorā, ðarā āhrima,” arī ĩhami ĩgu Jesucristo sīrira mera. ¹⁷ Adán yujugu ta ĩgu dipuwaja mera ta árĩpehrerā masa sīrimorā dihta wañuma. Goāmu ĩgu iirañepu ðataria. Dohpaguere masare mojomoro ĩagu Jesucristo ĩgu yujugu sīrira mera iri ñeri dipuwaja cóagu marire “Ōarā āhrima,” arī ĩhami. Eropirā árĩpehrerā ĩgu eropa arī ĩanirā ĩgu mera ðaro árĩniguiçārācoma.

¹⁸ Yujugu Adán ĩgu ñerire iinugacū árĩpehrerā ñerire iinugañuma. Erā eropiicū ĩagu Goāmu erāre “Dipuwajacurā āhrima,” arī ĩañumi. Gajigu Jesupu ĩgu ðarire ĩgu iicū masa erā ñeri iira dipuwaja sīribasacū, árĩpehrerā mari ñeri dipuwaja cóadigu árĩmi Goāmu. Mari ñerire ĩgu cóānirā árĩcū “Ōarā āhrima,” arī ĩagucumi Goāmu marire. Eropirā árĩpehrerinuri ĩgu mera árĩniguiçārāca mari. ¹⁹ Yujugu Adán Goāmure tarinuga nuğañumi. ĩgu eropiicū bajarā masa ñerire iiricurā wañuma. Jesucristopu Goāmu ĩgu dorediro dopa iipu. ĩgu eropiicū bajarā masa ĩgu ñerire cóānirā warācoma. Erā eropa wacū “Ōarā āhrima,” arī ĩagucumi Goāmu erāre. ²⁰ Goāmu ĩgu dorerire Moiserē apiñumi árĩpehrerā masa erā ñero iirare erā masiburire. Mari masa burigā ñerire mari iiquerecū Goāmupu marire burigā mahimi. Eropa mahigu Jesucristo sīrira mera mari ñerire cóadigu árĩmi. ²¹ Ero core mari árĩpehrerā mari ñeri iira dipuwaja sīrimorā árĩmuriribu. Goāmu marire turaro mahigu mari Opu Jesucristore ĩgu obeocū ĩgu marire ñeri dipuwaja marirā wacū ĩimi dohpaguere. Eropirā erā “Dipuwaja moorā āhrima,” Goāmu ĩgu marire arī ĩacū mari árĩpehrerinuri ĩgu mera eropa árĩniguiçārāca.

6

Cristo yarā ñerire iniguibeama, arī gojañumi Pablo

¹ ¿Goāmu eropa marire mahicū ĩarā dohpa iirācuri mari m̄a pepicū? ¿Goāmure marire mahicū iinemodiarā ñerire iinemorācuri mari?

² Árĩbeaa. Ñerire iibiricārā mari. Jesucristo marire sīribasadō árĩmi mari ñerire cóagu. Eropirā Cristo yarā árĩrā marire ñerire iibiricāro gahma.

³ Eropa ta Jesucristo yarā mari árĩrre masa erā ĩha masiborore deco mera wañyesūba. Jesu mari ñeri iira dipuwaja sīridigu árĩmi. Eropirā ĩgu yarā árĩrā, wañyesūnirā árĩrā mari ñeri iirare duhucāba. ⁴ Mari wañyeri ðpa ĩhmua: Jesucristo sīrira mera mari ñerā árĩdiro pehrea. Eropa wacū mari Pagu ĩgu turari mera Jesucristo sīridire masudiro dopa iri turari mera marire ðaripure gohrotomi. Eropirā ðarire iirā wahaa.

⁵ Eropirā Cristo yarā árĩrā Cristo sīrira mera mari ñerā árĩdiro pehrea. Eropirā mari ñeri iirare duhua mari. Eropirā Cristo yarā árĩrā ĩgu

masa m̄ariara mera ɔaripure gohrotorā āhraa mari. Iri diaye ta āhraa. ⁶ Jesucristo crusague s̄iriḡu mari ñerā ár̄irare pehrecū iidi ár̄imi. Mari ñeri ɯaribejarire duhumasicū iidi ár̄imi dipaturi mari ñerire iibiriboro dopa. ⁷ Mari ñeri ɯaribejarare cóānirā ár̄irā ñerire iiniguirā ár̄isome pare mari. Irire mari masia. ⁸ Eropirā mari gohrotonirā ár̄irā ñerire Jesucristo mera ɔarire iinugarā ár̄irāca. “Iri diaye ta āhraa,” ar̄i pepia mari. ⁹ Ire mari masia: Cristo iḡu s̄iri, masa m̄ariara puh̄ru dipaturi s̄irisome. Iḡu s̄iribodirore tarituhadiḡu ár̄imi. ¹⁰ Eropiḡu Cristo yujusubu s̄iriḡu, masa ñerire cóāḡu s̄irimi. Iḡu masa m̄ariadiḡu dohpaguere Goām̄u gamerire iigu āhrimi. ¹¹ “Iḡu iidiro dopa ta yu s̄ā āhraa,” ar̄i pepique m̄ua: “Jesucristo mari ñerire cóādiro dopa ta mari s̄ā mari ñerire cohāa. Ñerire iibirā Jesu yarā ár̄irā Goām̄u gamerire iimorā ár̄irā tiiaa mari,” ar̄i pepique m̄ua s̄ā.

¹² Eropirā ñeri iiniguirā ár̄ibiricāque. Eropirā ñerire ɯaribejabiricāque. ¹³ Ñerire iirā ár̄ibiricāque. M̄ua peamegue wabonirāre Jesucristo iḡu taunirā āhraa. Iḡu eropa iinirā ár̄irā ɔpa ar̄ique Goām̄ure: “M̄uh̄u, yu Op̄u āhraa. Eropiḡu yuh̄u m̄u gamero dopa iigu, m̄u dorerire iiniguicāḡuca ɯm̄uri n̄acu pare,” ar̄ique Goām̄ure. Eropirā ɔarire iirā Goām̄u iḡu gameri dihtare iirā ár̄ique m̄ua. ¹⁴ Dohpaguere Goām̄u mera ɔaro ár̄iborore Moise doreri muare dorebeaa. Jesucristo m̄ua ya ár̄iburire s̄iribasara mera Goām̄u mera ɔarā āhraa. Eropiro m̄ua ñerip̄u muare dorebeaa pare. Eropirā ñerire iiniguisome pare m̄ua.

M̄ua ñerire iiniguicū iri ñeri m̄ua op̄u iro dopa āhraa, ar̄i gojañumi Pablo

¹⁵ ¿Yu eroparicū dohpa ar̄i pepiri m̄ua? ¿Jesucristo yarā ár̄irā, Moise dorerire umupeobirimorā ár̄irā, ñerire iiniguibocuri mari? Ñerire iiniguibiricārā. ¹⁶ Muare doreḡu m̄ua op̄u āhrimi. Eropirā iḡu pohro majarā āhraa m̄ua. Eropa ta ñerire iiniguirā m̄ua ár̄icū iri ñeri m̄ua op̄u iro dopa āhraa. Eropirā ñerire duhumasiya mara muare. Eropirā peamegue wamorā āhraa m̄ua eropa iirā. Goām̄ure ɔaro yuh̄rirā ár̄irā tamera iḡu pohro majarā āhraa. Eropirā iḡu yarā ɔarire iirā āhraa m̄ua. Irire masia. ¹⁷ Iribojegue ñerire iiniguirā m̄ua ár̄icū, iri ñeri muare dorem̄uriyoro. Dohpaguep̄ure ɔari buherire peerā, Jesure umupeorā, Goām̄u dorerire ɔaro iirā wahabu m̄ua. Eropa ár̄irā Goām̄ure “Óh̄aa,” ar̄i ro gahmea. ¹⁸ Eropa warā dohpaguere ñerire doresūrā ár̄ibeaa m̄ua. Eropirā Goām̄u doresūrā ár̄irā ɔarire iiaa. ¹⁹ Irire muare ɔpa ar̄i gojaa m̄ua ɔaro peeboro dopa. Iribojegue ñerire iipehorā, ñerire iiniguicārā m̄ua ár̄idiro dopa ta dohpaguep̄ure ɔarire iiniguicārā ár̄ique m̄ua. Eropirā Goām̄u gameri dihtare iirāca m̄ua.

²⁰ Iribojegue ñeri dihtare iirā ár̄irā, ɔaripure iibirim̄uriyoro m̄ua. ²¹ Irisubure ñerire iira waja ɔarire bocabiriyoro m̄ua. Iri m̄ua ñeri iirare guñarā dohpaguere guhyas̄irica m̄ua. Iri ñerire m̄ua iira dipuwaja peamegue wabonirā ár̄irib̄u. ²² Dohpaguep̄ure Jesucristo muare ñeri doresūnirāre wiucāmi pare. Eropirā Goām̄u dorerire iirā wahabu m̄ua. Eropirā Goām̄u gameri dihtare iirā ár̄irāca. Eropirā ár̄ipehrerin̄uri Goām̄u mera ár̄irāca. ²³ Ñerire mari iira dipuwaja peamegue wabonirā āhraa mari masa ár̄ipehrerā. Mari eropa ár̄iquerecū Goām̄upu mari Op̄u Jesucristore mari umupeocū iḡu, ár̄ipehrerin̄uri iḡu mera ár̄icū iiḡucumi. Waja mariro marire eropa iiḡucumi.

7

Moise dorerire were gojanemoñumi Pablo

¹ Yu acawererā, Goāmũ Moisere ĩgu dorerare ðaro masia mua. Masure iri doreri ĩgu ojocaribusu dorea. ĩgu sĭrira puhru ĩgure dorebeaa iri. Iri säre masia mua. ² Ōpa āhraa: Nomeore igo marapũ mera dihta árdidorea Moise ĩgu doreripũ. Iri eropa dorequerecũ ta igo marapũ sĭrira puhru igo pu gajigu mera marapũcumasimo. Eropo ta arĭ werea iri doreri. ³ Eropigo igo marapũ árĭquerecũ ta gajigure marapũcugo, ñero iigo iimo goa. Igo marapũ ĩgu sĭrira puhrugue ta gajigure marapũcugo, Moise dorerire tarinũgabeamo igo. Eropigo ñero iigo iibeamo igo.

⁴ Eropo ta mua sã yũ acawererā, Jesucristo sĭrira mera Jesu yarã warã, iri doreri iiri mera Goãmũ yarã wabeaa mua. Eropirã sĭrinirã murare iri doreri mera dorebiro dopa ta mua säre iri doreri dorebeaa. Mua Cristo ya curu majarã āhraa. Eropirã dohpaguere ĩgu yarã āhraa mua. ĩgupu ĩgu sĭrira puhru masa mariadigu árĭmi Goãmũ gamerire mari iiboro dopa. ⁵ Jesucristo yarã árĭbirirasubuguere ñerire mari Ƴaribejarire iimuribũ. Eropirã Moise dorerire mari masira puhru iri dorerire tarinũgadiaribũ. Eropo tarinũgã ñerire iirã, mari peamegue wamorã ta árĭmuriribũ. ⁶ Dohpaguere Cristo yarã árĭrã iri doreri docague árĭbeaa pare mari. Goãmũ ĩgu mera ðaro mari árĭborore iri dorerire iidorebeami pare. Espĭritu Santo mari mera árĭgu marire ðarire gohrotocũ iimi. Eropirã Goãmũ gamerire iirã mari iribojegue maja doreri gojara mera árĭmasibeaa pare.

Mari ñeri iidiarire were gojañumi Pablo

⁷ ¿Eropirã Goãmũ Moisere ĩgu dorerare dohpa arĭ pepibocuri mari? ¿Iri doreri ñeri árĭcuri mua pepicũ? Árĭbirica. Iri ĩgu doreri ta ñerire yure masicũ iibũ. Eropirã ĩgu doreri maricũ ñerire mari iirare masibiriboya mari. ĩgu doreri ōpa arãa: “Gajirã yaguere turaro Ƴaribejabiricãque,” arãa Moise doreri. Iri eroparĭbiricũ, gajirã yare Ƴaribejariñe iri ñeri árĭcũ masibiriboya mari. ⁸ Eropigu iri dorerire yũ masira puhru gajirã yare burigã Ƴaribejamuribũ. Iri dorerire masibirinigu gajirã yare burigã yũ Ƴaribejara iri ñeri árĭcũ masibiriboya yuhũ. ⁹ ĩgu dorerire yũ masiboro core eropa pepicãnibũ dohpa. Dipuwajacuborore guñabiriribũ. Eropigu ĩgu dorerire yũ masira puhru yũ Ƴaribejari ñeri árĭcũ masibu yuhũ. Eropigu yũ dipuwajacuborore masibu. ¹⁰ Iri doreri mera mari Goãmũ mera ðaro árĭbonirã árĭquerecũ mari iri doreri mera dipuwajacurã dederebonirã árĭribũ. ¹¹ ĩgu Goãmũ Moisere dorerare masira puhru tarinũgadiaribũ. Ñerire Ƴaribejagu árĭcũ iri ñeri yure goroweobũ. Ñerire iirã iri dorerire tarinũgara waja dipuwajacumorã árĭribũ mari. Eropirã iri doreri tarinũgari mera peamegue dederebonirã árĭribũ.

¹² Eropiro Moise doreri Goãmũ ya ðari āhraa. Eropiro queoro árĭro iiaa. ¹³ ¿Eropa árĭquerero iri ðari doreripu peamegue marire wacũ iiri mua pepicũ? Wadorebeaa. Mari ñeri iiri dipuwaja marire peamegue ñero wacũ iiaa. ĩgu dorerire mari masira puhru iri dorerire tarinũgarã, “Ñerire iiaa mari,” arĭ masia. Eropirã mari ñerã árĭrre masirã mari peamegue waboro säre masia mari. Eropirã ĩgu dorerire masirã, mari tarinũgara iri ñeri árĭcũ masia mari.

¹⁴ Moise doreri Goãmu ĩgu apira iri árĩcũ masia mari. Irire masiquererã maripũ ñeri uaribeja iirã i õaripure iibea. Eropirã ñerire iiniguirã áhraa. ¹⁵ Mari õarire iidiaquererã iibea mari. Eropirã mari ñerire iidibiriquererã ta iiniguicãa. Eropirã mari iirire pee masibea mari. ¹⁶ Eropirã ñerire iidibiriquererã ñerire iiaa mari. Iri ñerire iidibirã Moise ĩgu dorerire “Õari doreri áhraa,” arĩdiarã iiaa. ¹⁷ Eropirã “Yũ basi ñerire dipaturi iisome pare,” arĩquererã ta ñerire iiniguia. Mari pepirigue árĩripũ ñerire marire iicũ iiaa. ¹⁸ Óarire turaro iidiaquererã ta, ne bocatĩubirica. Eropirã õpa masia. Ñeripũ marire goroweomãraa. Mari pepirigue ñeri dihta áhraa. Ne õari mara. ¹⁹ Óari mari iidiaripure ne iibea. Ñerire mari iidibiriripure iiaa. ²⁰ Eropirã “Yũ basi ñerire dipaturi iisome pare,” arĩquererã ta ñerire iiaa daja. Mari pepirigue árĩripũ marire ñerire iicũ iiaa.

²¹ Eropiro õpa wahaa marire. Óarire mari iidiaquerecũ ta mari uaribejari mari pepiri ñeri áhraa. Eropirã õaripure iibea mari. ²² Goãmu dorerire mari turaro yuhridiarica. ²³ Eropirã mari ire masia: Goãmu dorerire gamequererã mari ñeri pepiri mari uaribejari áhraa marire. Mari ñeri pepiri tarinũgaa mari õari iidiaripure. Eropirã mari ñerire duhumasibea.

²⁴ Eropa ñerire duhumasibirã ñero dujaa mari. ¿Mari ñeri uaribejarire duhuboro dopa, mari ñeri pepiri marire dorebiriboro dopa noa marire taugũcuri? ²⁵ Jesucristore mari guñaturacũ ĩgupũ mari ñerire iibiriboro dopa taugũcumi. ĩgu mari Opũ mari ñeri uaribejarire tautuhajadi árĩmi. ĩgu eropiicũ Goãmure “Óhaa,” arãa mari. Eropirã dohpaguere mari Goãmu dorerire yuhridiarã áhraa. Eropa yuhridiaquererã ta mari pepirigue ñero pepiri áhraa dohpa. Mari eropa árĩrãre Jesucristo marire taumi.

8

Espíritu Santore oparã erã árĩricurire were gojañumi Pablo

¹ Dohpaguere Jesucristo yarãre erã dipuwajacuboro mara. Erã ñerire erã uaribejarire iiniguibeama. Eropirã Espĩritu Santo ĩgu dorero dopa ta iiniguicãma erã. ² Eropigu Jesucristo yarã mari árĩcũ Espĩritu Santo ñero iirire duhcũ iimi marire. Eropigu Espĩritu Santo árĩpehrerinũri Goãmu mera árĩcũ iimi marire. Ñerire marire duhcũ iigu, marire peamegue wabonirãre taumi. ³ Moise dorerire mari gamero iirã ne bocatĩusome. Eropirã iri doreri mera mari Goãmu mera õaro árĩmasibiribũ. Mari eropa árĩrã árĩquerecũ ta õpa Goãmu marire õarã árĩcũ iidigu árĩmi. Irire mari ñeri dipuwajare wajayebasabure ĩgu magure obeodigu árĩmi. ĩgu magu mari iro dopa ta dupucũdigu árĩmi. Eropigu wajayebasagu mari pepirigue ñeri árĩrĩre cóadĩgu árĩmi. ⁴ Marire eropa ta iidigu árĩmi Goãmu ĩgu dorerire õarire ĩgu turari mera mari iiboro dopa. ĩgu dorerire iirã árĩrã mari uaribejarire iibea mari. Eropirã Espĩritu Santo ĩgu itamuri mera ĩgu dorero dopa ta iiaa mari.

⁵ Erã gamero ñerire iidiarã, ñeri dihtare uaribejama. Espĩritu Santo ĩgu dorero dopa ta iiniguirãpũ õari dihtare iidiamã erã. ⁶ Erã gamero ñeri dihtare iidiarã, iri dihtare uaribejarã peamegue warãcoma. Espĩritu Santo ĩgu gamerire turaro iidiarãpũ árĩpehrerinũri Goãmu mera árĩrãcoma. Eropirã erã õaro árĩcãrãcoma. ⁷ Erã gamero iirã Goãmure

gamesuribirā āhrima. Erā Goāmu dorerire ne yuhribeama. Īgu dorerire ne yuhrimasosome erā. ⁸ Eropirā erā gamero iirā Goāmure ihasuacū iimasibeama.

⁹ Muapu mua gamero iibeaa. Espiritu Santo mua mera árícū ĩgu gamerire iiaa. Eropirā Espiritu Santore moorāpu Cristo yarā áribeama.

¹⁰ I amure masa ñerire iira dipuwaja mari árípehrerā sírímorā dihta āhrraa. Mua sírímorā áríquererā ta Cristo yarā mua árírā ĩgu mera eropa áríniguirāca mua. Goāmu muare “Ōarā āhrima,” ĩgu arī ĩacū ĩgu mera eropa áríniguirāca mua. ¹¹ Goāmu Jesure masudigu árími. Eropa masudigu árígu, Espiritu Santo mua mera ĩgu áríniguiicū mua sírira puhru Goāmu mua säre masugucumi. Eropa masugu ðaro árícū iigucumi muare. Jesure ĩgu masudiro dopa ta eropa masugucumi muare.

¹² Yu acawererā, “Īgu eropa ta iigucumi,” arírā mari gamero iibiricārā.

¹³ Mari gamero ñerire iirā, peamegue wamorā árícārā tíiaa mari. Espiritu Santo ĩgu itamuri mera mari ñeri iiricurire duhurā, árípehrerínuri Goāmu mera árírāca.

¹⁴ Árípehrerā Espiritu Santore yuhrirā Goāmu porā ta āhrima.

¹⁵ Espiritu Santo mari mera ĩgu árínugacū Goāmu porā árínugabu mari. Eropigu ĩgu porā árícū marire dipuwaja moasome. Peamegue wadoresome. Eropirā güibeaa mari iribojeguere mari güidiro dopa. ĩgu porā árírā, Espiritu Santo ĩgu itamuri mera dohpaguere “Ahu,” arāa mari Goāmure mari Pagure ¹⁶ Eropigu Espiritu Santo mari pepirigue õpa masicū iimi: “Diaye ta Goāmu porā āhrraa mari,” marire arī masicū iimi ĩgu. ¹⁷ Eropirā ĩgu porā árírā, Goāmu árípehrerire ĩgu porāre “Ogura,” ĩgu arírare marípu oparāca. Jesucristo mera irire oparāca mari. Cristo yare mari iira waja gajirā mera ñero tarinirā árírā, mari ĩgu mera amarogue ðaro árícārāca. Eropirā Goāmu ĩgu porāre “Ogura,” ĩgu arírare oparāca mari.

¹⁸ Dohpaguere i yebare ñero taria mari. Puhruguerere amaroguere ðaro árícārāca. Eropirā dohpaguere ñero tarirā wuaro bujawere pepibiricāque. Mari ñero tarirapu pehrea waroca. Puhru ðaro árícārāca Goāmu pohroge. Eropirā mucubirirāca mari. Iri mucubirirípu ne peshresome marire. ¹⁹ Eropirā Goāmu porā Goāmu pohroguere ðaro árírācoma. Mari eropa wacū, árípehreri Goāmu ĩgu ihacünugura sã mama dihta gohroto pehrea waroca. ²⁰ Dohpaguere ĩgu ihacünugura árípehreri ñero taria. Iri gamero eropa wabiriyoro. Adán ñeri iinugara puhru Goāmu ĩgu ihacünugurare ñero wacū iinumi. Eropigu Goāmu ĩgu ihacünugurare eropa ta ñero árídoreniñumi dohpa. Puhru ĩgu ihacünugurare ðaripure gohrotogucumi daja ĩgu. ²¹ Eropigu Goāmu ĩgu ihacünugura boapehreaborare ðaripure gohrotogucumi. Goāmu porāre ðarā erā gohroto dopa ta, i umu maja ĩgu ihacünugura säre árípehrerire ðari dihta gohrotogucumi. ²² Ire mari masia: Ñerire masa iinugara puhru árípehreri Goāmu ĩgu ihacünugura ñeri wayoro. Eropiro Goāmu ðarire ĩgu gohrotoborore corero iiaa. ²³ Marípu Espiritu Santore oparā āhrraa. ĩgu yarā mari wacū Goāmu Espiritu Santore mata omi marire. ĩgu ihacünugura iro dopa ta mari sã ñero taria. Eropirā ðaripure gohrotoborore burigā gamerā cohrea. Eropirā ĩgu porā mari ĩgu pohro waboro säre burigā gamerā cohrea mari. Mama dupure ĩgu marire ĩgu oboro säre burigā gamerā cohrea. ²⁴ Mari eropa corerā árícū, ĩgu ta

marire peamegue waboniräre taugucumi. İgu pohrogue árñirä árñrã İgu pohrogue mari waborore corebiriboya mari. Marire İgu tautuhara puhru árñcũ irire corenemobiriboya. ²⁵ Eropirã İabiriquererã ta dohpa, Goãmũ marire İgu tauborore corerã eropa corenigua õaro yojaro mariro.

²⁶ Eropirã mari Goãmure õaro guñaturabirã İgu gamerire õaro masibirã árñcũ İha Espiritu Santo marire itamumi. Eropirã Goãmure queoro serẽmasibiriquerẽ Espiritu Santopũ mari ya árñburire Goãmure serẽbasami. Marire mojomoro İagu mari ya árñburire Goãmure serẽbasami. ²⁷ Goãmũ İgu gamero dopa ta, mari Jesu yarã árñborore serẽbasami İgu Espiritu Santo. İgu eropa arĩ serẽbasacũ Goãmũ mari pepirire masipehogu árñgu Espiritu Santo İgu serẽrare masimi.

Cristo ya turari mera ñeri iirire tarinugarãca mari, arĩ gojañumi Pablo

²⁸ Ire masia: Árñpehrerã Jesure mahirã mari árñcũ İgu gamerire iimorãre beyepũ İgu marire. Eropa beyegu Goãmũ eropa İhadibuniguicãmi marire. Eropigu mari ñero taricũ İagu Goãmupũ marire õaro wacũ iigucumi. ²⁹ Goãmũ marire İgu yarã árñmorãre matague ta mari ne masa dehyoaboro coregue ta guñatuhapũ. Eropa guñagu İgu magũ İgu õagu árñro dopa ta marire õarã árñrare guñapũ. İgu magũ iro dopa marire árñdorepũ bajarã masa İgu magure mari tũgucuborore. Eropigu árñpehrero marire eropa wara mera marire õarã gohrotocũ iimi. ³⁰ Matague ta İgu yarã İgu árñdorenirã mari árñcũ, İgu porã mari árñmorã sãre beyepũ marire. Eropigu marire İgu beyenirãre “Dipuwaja moorã, õarã àhrima,” arĩ İhami. Marire İgu eropa “Õarã àhrima,” arĩ İagu İgu mera umaroguere õaro árñcũ iigucumi.

³¹ Irire masirã õpa pepia mari: Goãmũ marire İgu mahinirãre, ne gajirã İhaturirã bocatũbeama. ³² Goãmũ mari ya dipuwaja sñribure İgu magure obeodigu árñmi. “Yu magure mahia. Eropigu İgure obeobea,” arñbiridi árñmi. Eropigu mari ya árñburire İgu magure obeodigu árñgu Jesucristo mera árñpehrerire õari dihtare ogucumi İgu marire. ³³ Goãmũ beyenirã mari árñcũ, İgu marire “Dipuwaja moorã, õarã àhrima,” arĩ İhami. Mari İgu eropa arññirã árñcũ, gajirã marire “Ñerã àhrima,” ne arĩ weresãmasibeama. ³⁴ Cristo mari ya dipuwajare sñrira puhru masa muriadi árñmi. Eropigu Goãmũ diayepũ dohpagure İgu àhrimi dohebũ. Eropigu İgu mari ya árñburire diaye ta umuri nucũ serẽbasagu iimi Goãmure. Eropirã gajirãpũ ne marire “Erã ñeri iira dipuwaja moaque,” arñmasibeama. ³⁵ Cristo marire İgu burigã mahicũ gajirãpũ “Erãre ne mahibiricãque,” arñmasisome İgure. Eropigu mari ñero tariquerẽ ta, mari guiquerẽ ta, gajirã marire erã ñero iiquerẽ ta, mari oaboquerẽ ta, suhri marirã mari árñquerẽ ta, guhyaro marire árñquerẽ ta, marire erã wejẽquerẽ ta, Cristo marire eropa mahiniguicãgucumi. ³⁶ Goãmũ yare erã gojarapũ marire eropa waburire werero õpa arĩ werea:

Goãmũ, mu yarã gua árñri waja erã wejẽsumorã ta árñniguirã tiiaa gua. Oveja erã wejẽmorã erã árñro dopa ta, gua sãre eropa ta wahaa, arĩ gojañuma Goãmũ yare erã gojarapũgue.

³⁷ Eropirã mari ñero tariquererã ta, Cristo marire mahigu İgu itamuri mera, turaro mera ñerire tarinugarãca mari. ³⁸⁻³⁹ Goãmũ marire İgu mahirare İhmudi árñmi mari Opũ Jesucristo mari ya árñburire sñricũ.

Eropigu ĩgu marire burigā mahigu ne duhusome. Mari sīricū sāre, mari ojocaricū sāre mahi duhusome. Dohpaguere, puhrugue sāre, marire ĩgu ne mahi duhusome. Eropirā anyua, watēa oparā umaro majarā, i yeba majarā oparā, ñerā deyobirā sū marire Goāmure “Mū yarāre mahibiricāque,” arirā, bocatusome. Eropiro ne yujugu ne yujuñe ĩgu ĩhacūnugura marire ĩgupure mahi duhudoreri ne mara. Marire ĩgu ne mahi duhusome.

9

Judio masa Goāmū ĩgu beyenirā āhrima, arī gojañumi Pablo

1-2 Yū acawererā Israe masare guñagu burigā bujawerea. Cristore gamebeama erā. Eropigu ñero siporācu pepia yuhu. Iri yū eropa arīri diaye ta āhraa. Yuhu Cristo yagu āhraa. Eropigu muare diaye arīgu iiaa. Espiritu Santo yū mera árīcū dohpaguere yū acawererāre yū arīri iri diaye árīcū ōaro masia yuhu. ĩgu yure irire ōaro masicū iimi. ³ Israe masa yū acawererā, yaha curu majarā Jesucristore gamebirā peamegue warācoma, arī guñaricua. Eropigu yuhu erāre peamegue wamorāre taumasigu ōpa arīboya Goāmure. “Erā ya dipuwajare yūpure peamegue wadoreque,” arīboya. Eropigu “Erā ya dipuwajare yūpure cóāporo Cristo,” arīboya. Yū eropa arīborañe wajaye masiya mara erā ya dipuwajare. ⁴ Erā yū acawererā Goāmū yare ōarire mata opamuhtanirā árīma. Israe muru pāramerā árīturiarā āhrima. Eropigu Goāmū ĩgu porā erā árīburire mata apiñumi Goāmū erāre. Eropigu Goāmū ĩgu gosesiriri mera erā watope árīñumi. Eropiro árīpehrerire ĩgu masare ōaro iiburire weremuriñumi erāre. Eropigu Moiserē ĩgu dorerare mata apimuhtañumi Israe masare. Eropirā Goāmure umupeoburi wihire iimuhtañuma erā. Eropigu erāre ĩgu ōaro itamuborore weremuriñumi Goāmū. ⁵ Gua ya cururi gohra doce cururi āhraa. Eropirā gua ñecu sumará Abrahā sā murgue, erā pāramerā árīturiarāgue āhraa gua Israe masa. Eropigu Cristo masa dehyoanijagu gua acaweregu Israe masu gohra árīmi Cristo. ĩgu Goāmū ta āhrimi. Eropigu ĩgu árīpehrerā weca opu āhrimi. Árīpehrerinuri ĩgure ōaro umupeorā mari. Eropa ta iirā.

⁶ Israe muru ĩgu pāramerā árīturiarā árīquererā árīpehrerā Goāmū yarā gohra árībeama. Eropirā árīpehrerā Goāmū ōaro oburire opamorā árībeama. Eropirā Israe masare “Ōaro iigura,” arīdigu árīqueregu Goāmū erāre árīpehrerāre ōaro iibiricū ĩarā “Goāmū ĩgu arīdiro dopa ta iibeami,” arī pepibiricāro gahmea. ⁷ Ōpa āhraa: Gajirā Israe masa Abrahā pāramerā árīturiarā erā árīquerecū ta, “Abrahā pāramerā gohra yaharā gohra āhrima,” arī ĩabeami Goāmū erāre. Eropigu ōpa arīñumi Goāmū Abrahāre. “Mū magu Isaa pāramerā árīturiarā erā tamera diaye ta mū pāramerā árīturiarā árīrācoma,” arīmuriñumi Goāmū Abrahāre. ⁸ ĩgu eropa arī werecū ire masirāca mari: Árīpehrerā Abrahā pāramerā erā masa dehyoara puhru, mata Goāmū porā wasome erā. Goāmū ĩgu arī werepirare ōaro peerā ĩgure umupeorāpu erā dihta árīrācoma Goāmū porā. Eropirā erā ta āhrima Abrahā pāramerā árīturiarā gohra. ⁹ Ōpa arīñumi Goāmū Abrahāre: “Gaji bojori inosubu ta yū dujaricū mū marapo Sara majigugāre opagocumo mū magure,” arīñumi Goāmū Abrahāre. Eropa ta arī werepiñumi ĩgure Abrahā magu Isaa masa dehyoaborore. Eropigu ĩgu magu Isaa masa dehyoañumi. ¹⁰ Puhru Isaa Rebeca mera marapocucū ĩgo ūma perā suhrūanirā porācuñumo. Erā pagu Isaa gua

ñecu muru árĩñumi. ¹¹⁻¹² Eropirã erã porã erã masa dehyoaboro core, òarire, ñeri sãre erã iibiricũ ta Goãmũ erã pago árĩbore òpa arĩmuriñumi: “Ìgu pagu magupu ìgu tĩgure doregacumi. Eropigu ìgu opu árĩgacumi,” arĩmuriñumi ìgore ìgo porãcaboro core. Goãmũ ìgu gamero dopa ta beyemi ìgu. Eropa árĩgu, árĩgu ìgu dehyoaboro core Jacobore Esaũ pagu magu árĩgure opu árĩbure beyemuriñumi. Eropigu masa erã iirire ìaboro core ìgu gamero dopa ta ìgu yarã árĩmorãre beyemi. ¹³ Eropa ta arĩ gojañuma ìgu yare erã gojarapũgue: “Jacobopũre mahimuribũ. Eropigu Esaũpũre mahibirimuribũ,” arĩmi Goãmũ, arĩ gojañuma iribojeguere.

¹⁴ ¿Irire peerã dohpa arĩ pepibocuri mari? “¿Erã iiricũrire ìaboro core yujugure eropa beyegu Goãmũ queoro iibeami,” ¿arĩ pepibocuri?” Árĩbeaa. Queoro iigu ta àhrimi. ¹⁵ Òpa arĩñumi Goãmũ Moise sãre: “Yũ gamegu dihtare mojomoro ìagura,” arĩmuriñumi ìgu Moisere. Eropigu yujugũre ìgu gamero beyegu queoro iigu iimi Goãmũ. ¹⁶ Eropirã mari gamero Goãmũre marire mojomoro ìadoremasibeeaa mari. Eropirã mari òarire iira waja sãre ne mojomoro ìabeami ìgu. Ìgu gamero dopa ta mojomoro ìhami. ¹⁷ Eropigu eropa ta ìgu gamero dopa iĩñumi Egipto majarã opu sãre. Òpa arĩñumi Goãmũ ìgure faraõre: “Egipto majarã opu árĩbure apigu iibu mũre yũ turarire árĩpehrerãre ìhmubure. Eropigu árĩpehreri yeba majarãre, yure erã masibore opu acugu iibu yũhũ mũre,” arĩñumi Goãmũ ìgure, arĩ gojara àhraa Goãmũ yare erã gojarapũgue. ¹⁸ Eropigu ìgu gamerãre mojomoro ìhami ìgu mari masare. Eropigu ìgure erã gamebiricũ ìagu ìgu gamero erãre yũhibiricũ iimi ìgu. Eropigu Goãmũ ìgu gamero dopa ta iimi.

¹⁹ Ìgu eropiigu árĩcũ ìarã òpa arĩboca mũa: “¿Goãmũ erãre ìgure yũhibiricũ iidigu duhpigu ero puhũ erã ìgure yũhibirira dipuwaja moayuri erãre?” arĩ papũri serẽpiboca mũa. ²⁰ Eropa arĩbiricãque. Mari masa bu árĩrã àhraa. Goãmũ mera papũrimasibeeaa. Mátasoro wéagore “¿Duhpigo yure eropa iiri mũhũ?” iri soro arĩ serẽpimasibeeaa. Eropa ta mũa sã Goãmũre ìgu gamero iigure “¿Duhpigu eropa iiri mũhũ?” arĩ serẽpimasibeeaa. ²¹ Mátasoro wéago máta mera ìgo gamero dopa iimo. Eropigo òarire dibuburi sorore iimasimo ìgo. Iri máta mera ta bu árĩri dibuburi soro sãre iimasimo ìgoa. Ìgo iiro dopa ta Goãmũ sã ìgu iidiaro dopa ta iimi.

²² Eropigu Goãmũ peamegue ìgu cóãmorãre erã ñero iirare ìha guagu, erãre dipuwaja moadiaqueregu ta yoari boje erã ñeri iirire eropa ìacãnimi. Árĩpehrerãre ìgu turarire ìhmubu, mata erãre dipuwaja moanibirimi. ²³ Eropa ta iimi marire ìgu mojomoro ìarãre, ìgu òatariagu ìgu árĩrire, ìgu turari sãre marire masidorebu. Matague ta marire, “Erãre mojomoro ìagura yũhũ. Yũ òarire ogura erãre,” arĩ apiñumi Goãmũ marire. ²⁴ Eropirã maripũ ìgu beyenirã árĩrã ìaa. Eropirã ìgu beyenirã judio masa dihta árĩbeama. Judio masa árĩbirã sã àhrima ìgu beyenirã. ²⁵ Eropa ta àhraa judio masa árĩbirãre Goãmũ yare Osea waĩcũgu ìgu òpa arĩ gojadiro dopa ta:

Èro coregue yaharã árĩbirinirãre puhũ erãre “Yaharã àhrima,” arĩgura. Eropigu ero coregue yũ mahibirinirãre puhũgue erãre “Yũ mahirã àhraa mũa,” arĩgura, arĩpũ Goãmũ. ²⁶ “Yaharã árĩbeaa mũa,” Goãmũ ìgu arĩra yeba majarã Goãmũ ojocaríniguicãgu porã ta árĩrãcoma, arĩ gojamuhtamuriñumi Osea iribojeguere.

27-28 Eropigu iribojegue majagu Isaia Israe masare òpa wereñumi: “Mari Opu i yeba majaräre bajarä masare yojaro mera diaye ta dipuwaja moa purumujugacumi. Eropirä wuariya maja imipayeri iro dopa Israe masa bajarä gohra erä áriquerecü ta bajamerägä tariräcoma erä,” arimuriñumi Isaia. 29 Eropigu dipaturi ta wereyugu òpa arí gojañumi Isaia:

Mari Opu áripehrerä weca opu bajamerägä mari mera majaräre taubigu, marire judio masare áripehreräre dederecü iiboñumi igu. Sodoma majaräre, Gomorra majarä säre igu dedeopehocü iidiro dopa ta mari säre dederecü iiboñumi igu, arí gojamuriñumi Isaia.

Judio masa òari buherire gamebirima, arí gojañumi Pablo

30 Eropa ta ähraa. Eropirä ire masique mua: Judio masa áribiräpu Goãmure amabiriquererä igure bocama. Jesucristore erä umupeocü, “Òarä ährima,” arí ìhami Goãmü eräre. 31 “Goãmü dorerire Moiserere igu apirare mari iicü igu marire òarä ìagacumi,” aríriñorä judio masapu. Eropa igu dorerire erä iiquerecü ta Goãmü ìha saabirimuripu eräre. Eropirä òarä árdiaquererä bocatubirimuriñorä. 32 Erä Jesucristore umupeoro mariro erä gamero Moise dorerire iidiarima Goãmü mera òaro árdiarä. Eropirä Cristore erä ñeri iirare cóabure gamebirä Goãmü pohrogue ne ejasome. 33 Eropa ta arí gojamuhtañuma Goãmü igu magure wereyurire:

Ûtäre iro dopa árigure, yu beyedigure dohpague Jerusalengue apigu iiaa. Igure umupeobirä, igure tarinugarä yu pohrogue ne ejasome. Eropirä igure umupeoräpu igu mera òaro mucubiriniguiräcoma. Yu pohro waräcoma, arími Goãmü, arí gojañuma Goãmü yare erä gojarapüguere.

10

1 Yu acawererä, Israe masare Goãmü igu tauborore burigä gahmea yuhü yu siporä mera. Eropigu Goãmü eräre igu tauburire serëbasaa yuhü. 2 Diaye ta erä Goãmü gamerire iidiarima. Eropa iidiaquererä ta igu gamerire masibeama. 3 Eropirä Goãmü eräre òacü iiburire masibeama. Eropa masibirä erä gamero òarire iiquererä bocatubirima. Erä eropiicü, erä Goãmü Jesucristore umupeodoreldiro dopa erä iibiricü, igupu eräre “Òarä ährima,” arí ìabirimi. 4 Cristore umupeoräre “Dipuwaja moorä, òarä ährima,” arí ìhami Goãmü. Eropirä “Mari ñeri iira dipuwaja Goãmü tauboro dopa Moise dorerire iiro gahmea daja,” arí pepibiricäro gahmea. Cristore umupeorä igu mera taria.

5 Moise iribojegue majagu òpa arí gojañumi: “Goãmü dorerire mari duhyaro mariro iipehocü Goãmü marire ‘Dipuwaja moorä, òarä ährima,’ arí ìagacumi,” arí gojañumi igu. 6 Igu eropa arí gojaquerecü ta dohpaguere masa Cristore erä umupeocü Goãmü eräre “Òarä ährima,” arí ìhami. Iri buheri “Cristore umupeoque,” i arí buheri òpa arí werea: “Òpa arí pepibiricäque mua: ‘¿Noa Cristore amaroguere árigure aidijugacuri marire igu buhecü daja?’ arí pepibiricäque mua. Cristore eratuhadigu árimi marire taugu eragu i yebaguere. 7 Eropirä daja ‘¿Noa sirinirä pohroguere Cristore masu aigãribocuri?’ arí pepibiricäque mua. Igu siridigu masa muridigu árimi,” arí werea i buheri. 8 Eropro òpa arí werea Goãmü yare erä gojarapüguere: “Goãmü ya buherire mari amacü igu buheri ohö ähraa. Igu buherire masituhaa mua. Eropirä igu buherire

wereniguimurabu," arī gojañuma. Iri buherire "Cristore umupeoque," arī buherire masare werea gua. ⁹ Iri buheri ōpa arī werea: "Jesu yu opu āhrimi," arī mari disiro mera werēcū, "Goāmū Jesure sīridigare diaye ta masuñumi," arī mari pepicū īha Goāmū marire peamegue wabonirāre taugucumi. ¹⁰ Jesure mari umupeocū īha Goāmūpū marire "Ōarā āhrima," arī īagucumi. Eropigu gajirāre "Yuhū Jesucristore umupeoa," mari arī werēcū īha īgu marire peamegue wabonirāre taugucumi.

¹¹ Ōpa arāa Goāmū yare erā gojarapū: "Īgure umupeorā, īgure erā umupeorare ne bujaweresome. 'Īgure umupeobiricū ōaboja yure,' ne arīsome," arīyoro Goāmū yare erā gojarapūgue. ¹² Judio masare, judio masa árībīrā sāre Goāmū yujuro mera ta itamumi. Mari Opu árīpehrerā tauro opu āhrimi īgu. Eropigu árīpehrerāre īgure serērāre itamugucumi īgu. ¹³ Eropa ta arī gojañuma Goāmū yare gojarapūgue ōpa arī gojarā: "Yu ñerire cóaque. Eropigu yare tauque,' masa erā serēcū erāre peamegue wabonirāre mari Opu taugucumi," arī gojañuma. ¹⁴ Eropirā masa Cristore "Diaye ta marire tauqu āhrimi," arī umupeobirā īgure eropa serēmasibeama erā. Eropirā īgu buherire Jesucristo erāre tauburi buherire peebirā īgure umupeomasibeama. Eropirā īgu buherire erāre weregu maricū Goāmūre erā masisome. ¹⁵ Eropirā īgu buherire weremorāre erā obeobiricū īgu buherire weremasibeama. Ōpa arī gojañuma Goāmū yare erā gojarapūgue: "Ōari buherire marire ōarā wacū iiburi buherire weremorā erā eracū īarā ōaro mucubiria mari," arī gojañuma iribojegure.

¹⁶ Eropa arīquerecū ta masa bajarā Jesucristo yare ōari buherire peediabeama. Eropa ta arī gojamuriñumi Isaia: "Opu, erāre mari wererare ne peediabeama," arī weremuriñumi Isaia Goāmūre. ¹⁷ Eropirā masa Jesucristo yare ōari buherire peerā peenarā Cristore umupeoma.

¹⁸ Eropigu ire serēpidiaca muare: ¿Israe masa Jesucristo yare peebiriyuri mua pepicū? Yuju diaye ta erā peemuriñuma. Eropa ta āhraa Goāmū yare erā gojarapū sāre:

Goāmū yare wererā árīpehreroguerere weresirirā wama. Eropirā árīpehrero majarāgue īgu yare peema, arī gojañuma iribojegue.

¹⁹ Dipaturi muare serēpidiaca daja: ¿Israe masa peequererā ōaro masibiriyuri mua pepicū? Masiriñuma. Masiquererā Jesucristore umupeodiabiriñuma. Erā eropa peediabiricū gaji yeba majarā Goāmū yarā wahama. Irire werenemogu Moise īgu arīrāre weremuhtagura: Ōpa arī gojañumi īgu:

Ōpa arī weremi Goāmū Israe masare: " 'Bu árīrā āhrima,' mua arī īanirāre yaharā árīmorā iigura. Yu eropiicū muapu erāre īhaturirāca. Eropigu muare erā mera guacū iiguca yuhū, arī weremi Goāmū," arī gojañumi Moise.

²⁰ Isaia sā doyarō mariro ōpa arīmuriñumi:

Ōpa arīmi Goāmū: "Yure amabirāpū yure bocama. Eropigu yure masibirāre erāre yure masicū iibu yuhū," arīmi Goāmū, arī gojañumi Isaia. Judio masa árībīrā Goāmū yarā erā waburire weregu eropa ari gojañumi.

²¹ Israe masa pūre ōpa ari gojañumi Isaia: "Ōpa arimi Goāmū: 'Mua ñeri iirare bujawereque yaharā wamorā, arimuriribu erāre. Erāpū yure tarinugarā yure yuhribirimurima,' arimi Goāmū," arī gojañumi Isaia.

11

Yujurāyerire Israw masare taugucumi Goāmū, ari gojañumi Pablo

¹ ¿Eropigu Israe masare Goāmū igu beyenirāre erā tarinugacū erāre cōāpēhocāyuri igu mua pepicū? Áribeaa. Erāre cōābirimi ĩgu. Yu sā Israe masu, Abrahā pārami árĩturiagu āhrraa. Eropigu Benjami ya curu majagu āhrraa. ² Iribojegue Goāmū Israe masare beyemuriñumi. ĩgu eropa beyenirāre cōābeami. Goāmū yare erā gojarapū Elia ĩgu ĩrare werea. Iripū Israe masare Elia Goāmūre ĩgu arĩ weresārare masica mua. Ōpa arĩ weresāñumi ĩgu: ³ “Ōpu, erā Israe masa mu yare weremuhtanirāre wejēpēhocāma. Eropirā mure umupeori mesarire cōāpēhocāma. Eropigu erā watope yu dihta mu yagu dujaa dohpaguere. Yu eropa árĩcū ĩarā yu sāre wejēdiana dohpaguere,” arĩñumi Elia Goāmūre. ⁴ ĩgu eroparĩcū peeḡu ōpa arĩ yuħriñumi Goāmū Eliare: “Muħu yahagu yujuḡu ta árĩbeaa. Siete mĩl ũma yaharā āhrrima dohpaguere. Erāre dihbuabu yuħu. Erā sā yare ōaro umupeoma. Baal waicugu weadĩgure ne umupeobirimurama erā sā. Eropigu ḡuibita muħu,” arĩñumi Goāmū Eliare iribojeguerē. ⁵ Irisubure Elia ĩgu árĩrisubure ĩgu yarā árĩmorāre Goāmū ĩgu dibudiro dopa ta dohpague sāre bajamerāḡā Israe masare ĩgu yarā árĩmorāre dihbumi. Goāmū erāre mojomoro ĩagu dihbumi. ⁶ Ōarire erā iicū ĩagu dibubirimi. Erāre mojomoro ĩagu dibugu beyemi. “Ōarire mua iira puħru muare beyegura,” arĩḡu, ĩgu diaye ta erāre mojomoro ĩagu iibiriboñumi. Ōarire erā iira puħru erāre ĩgu beyecū erāre wajariari árĩboya. Ōarire erā iibiriquerecū ta erāre diaye ta mojomoro ĩagu Goāmū beyemi erāre. ⁷ Eropa iri ōpa āhrraa: Israe masare Goāmū erāre, “Ōarā āhrrima,” ĩgu arĩ ĩacū gamequererā ta erā yujuro bojebeama. Goāmū ĩgu basi ĩgu beyenirāpu ōarā wahama ĩgu mera. ĩḡure yujuro bojebirāpu ĩgu yare peediabeama. ⁸ Eropa ta arĩyoro Goāmū yare erā gojarapū: “Goāmū ĩḡure gamebirāre ĩgu yare peebiricū iimi. Eropigu diaye árĩrĩre erā peequerēcū erāre ōaro peebiricū iimi Goāmū. Eropa ta árĩnĩguicāma dohpague sāre,” arĩ gojañuma iribojeguerē.

⁹ Eropigu ōpa arĩñumi Davi muru iribojegue majagu Goāmūre:

Erā Israe masa erā bosenrĩ mucubirirĩnuri ĩarā ñero iima erā. Erā eropa iicū ĩagu dipuwaja moaque muħu erāre. ¹⁰ Erāre ōaro peebiricū iique muħu. Eropirā eropa dipuwajacurā árĩnĩguicāporo erā. Eropirā eropa bujawerenĩguicārācoma, arĩñumi Davi Goāmūre.

Judio masa árĩbirāre peameḡue wabonirāre taugucumi Goāmū, arĩ gojañumi Pablo

¹¹ ¿Judio masa Cristore erā gamebiricū ĩagu Goāmū erāre cōācāyuri mua pepicū? Cōāḡohracābirĩñumi. Eropa erā Cristore erā gamebiricū dohpaguere judio masa árĩbirāpu Goāmū ĩgu taumorā wahama. Dohpaguere ĩgu yarā iimi Goāmū erāre. ĩḡu eropiicū ĩarā yujurāyeri judio masapu erāre ĩhacū erā sā Jesucristore umupeodiana. ¹² Judio masa erā Goāmūre tarinugacū judio masa árĩbirāpu Goāmū ĩgu ōari buherire peema. Eropirā árĩpehrero majarā judio masa árĩbirā Goāmū taumorā wañorā ōaro warā. Puħru judio masapu Cristore erā umupeonḡgara puħru tamerare i yeba majarāre ōatariaro waroca.

¹³ Dohpaguere muare judio masa árĩbirāre werebu iiaa. Cristo apimi yare muare judio masa árĩbirāre buhebure. Eropa buheḡu bu ḡohra

iigu iibea. ¹⁴ Yure eropa buhedoredigu árīgu masare weremura. Yu acawereräre judio masare mua Jesucristo umupeorare ihacücü iidiagu werea. Goãmu taunirã mua árīcũ iarã erã sã Cristore gahme īgu taumorã wabocoma, arīgu werea. ¹⁵ Dohpaguere judio masare Goãmu boje apīgu, gajirãguere ðari buherire Goãmu weredoremi īgu mera erã ðaro árīmorãre. Eropiro judio masare īgu boje apicũ ðaro wahabu i yeba majarãre judio masa árībirãre. Īgu eropiidiro tauro judio masa sãre īgu yarã árīmorãre īgu iicũ tamerare ðatariaro waroca i yeba majarãre. Goãmu mera erã ðaro árīcũ bajarã masa Jesure umupeorãre peamegue wabonirãre taugacumi. ¹⁶ Ōpa āhraa: Abrahã gua ñecũ murũ Goãmu mera ðaro īgu árīdiro dopa ta īgu pãramerã arīturiarãgue sã Goãmu mera ðaro árīrãcoma Cristore umupeorã árīrã.

¹⁷ Yujurãyeri erã eropa árīrã árīquerecũ ta gajirã erã acawererãpure judio masare Goãmu boje apinimi dohpa. Judio masa Goãmu īgu beyemuhtanirã olivo waĩcudigu otedigu dũpurĩ iro dopa āhrima. Mua judio masa árībirã īgu beyemuhtanirã árībirã nuqu majagu dũpurĩ iro dopa āhraa. Olivo otedigu dũpurire yujuyeri dũpurĩ īgu tabe cóãdiro dopa ta gajirã judio masapure Goãmu cóãmi. Eropa cóãgu īgu yarã árībirã wacũ iimi erãre. Īgu cóãra dũpurire gajĩ dũpurire nuqu majagu dũpurire gohroto tuhboro dopa, Goãmu judio masare judio masa árībirã mera gohrotomi. Eropa gohrotogu muare judio masa árībirãre īgu yarã wacũ iimi. ¹⁸ Muare īgu eropa gohrotocũ, “Judio masa tauro ðarã āhraa pare gua,” arĩ pepibiricãque. Ire guñaque: Judio masapure beyemuhtapu Goãmu. Muapu erã puhru Goãmu yarã árīrã mua sã Goãmu ðari oburire opa. Eropirã “Judio masa tauro ðarã āhraa,” arĩ pepibiricãque.

¹⁹ Mua judio masa árībirãpu ðpa arĩboca: “Yujurãyeri dũpurire īgu cóãdiro dopa ta Goãmu judio masare cóãmi yujurãyerire. Eropa cóãgu īgu gajĩ dũpurire gohroto īgu tuhdiro dopa ta īgu yarã mari wamorãre apimi,” arĩboca mua judio masare tarinugadiarã. ²⁰ Ōpa āhraa. Erã Jesure umupeobirira dipuwaja cóãpu Goãmu erãre. Eropigu mua sãre Jesure mua umupeobiricũ īgu yarã árīmorãre muare apibiriboañumi. Eropirã “judio masa tauro ðarã āhraa gua,” arĩ pepibiricãque mua. Eropa arĩbirã ta Goãmure ðaro umupeoque. ²¹ Muhtari dũpurĩ iro dopa judio masa Goãmu yarã árīmuhtañuma. Iri gohroto tuhra dũpurĩ iro dopa ta erã puhru mua Goãmu yarã wabu. Eropigu Goãmu īgu yarã árīmuhtanirã ĩgure umupeobiricũ ĩagu cóãpu erãre. Īgu erãre eropiidiro dopa ta mua sãre cóãgucumi mua ĩgure umupeobiricũ. Eropirã Goãmure ðaro umupeoque mua. ²² Goãmu muare ðaro iigu īgu árīcũ masique mua. Eropirã guhyadiaro mera, īgu dipuwaja moagu īgu árīcũ sãre masique mua. ĩgure umupeobirãre īgu dipuwaja moagucumi. Eropa árīqueregu ta mua ĩgure umupeoniguicũ muare ðaro iigucumi īgu. ĩgure umupeobiricũ ñeri dũpurire īgu tabe cóãdiro dopa ta mua sãre cóãgucumi Goãmu. ²³ Masapu erã tabe cóãra dũpurire tuhumasibeama daja. Goãmupu árīpehrero iimasigu āhrimi. Eropigu judio masa īgu cóãnirã Cristore erã umupeodiacũ Goãmu īgu yarã árīcũ iigucumi daja erãre. ²⁴ Mua judio masa árībirã Goãmu yarã árībirimuriyoro. Eropa árībirã mua árīquerecũ ta Goãmu muare īgu yarã arīcũ iigucumi. Eropigu īgu beyemuhtanirã mua árībiriquerecũ ta īgu yarã árīcũ muare iidiãmi īgu. Eropigu judio masare īgu beyemuhtanirãpure īgu yarã árīcũ īgu tauro iidiãgucumi.

Pũhrũ Israe masare taugũcumi Goãmu, arĩ gojañumi Pablo

²⁵ Yu acawererã, ire masa erã masibirirare muare weregura. Mũa õpa arĩboca: “Dohpaguere gua dihtare beyemi Goãmu. Guapũ masipehocã,” mũa arĩ pepiboca. Mũa irire arĩ pepibiriboro dopa ire weregura muare. Õpa ãhraa masa erã masibirira: Dohpaguere bajarã judio masa Goãmure peediabirã áhrima. Eropirã bajarã judio masa arĩbirãre Goãmu ìgu queodiropẽ ìgu yarã wacũ iigucumi. Ero pũhrũ judio masapũ ìgure gamerãcoma daja. ²⁶ Erã eropa gamecũ árĩpehrerã Israe masare Goãmu taugũcumi erã peamegue wabonirãre. Goãmu yare erã gojarpũgue eropa ta arĩ gojañuma:

Jerusalén waĩcũri macague judio masa ya macague erãre taubu arigucumi. Eropigu Jacobo murũ pãramerã árĩturiarãre erã ñerire ìgu cóãgucumi. ²⁷ Eropigu erãre taugu iribojegue yũ arĩ erãre werepirare iigucumi, arĩmi Goãmu, arĩ gojamũhtañuma Goãmu yare erã gojarapũgue.

²⁸⁻²⁹ Dohpaguere erã judio masa Cristo yare umupeobirã Goãmure gamebeama. Erã eropiicũ dohpaguere muapũ judio masa arĩbirãpũ Cristore umupeonũgabũ. Judio masapũre Goãmu beyemuhtañumi. Goãmu ìgu arĩ werepidiro dopa ta masare ìgu beyediro dopa ta diaye iimi ìgu. Eropigu judio masa ñecu sumarã mura ìgu beyenirã erã árĩcũ dohpague erã árĩturiarã sãre ìgu mahimi. ³⁰ Iribojegue mũa sã Goãmure tarinũganirã árĩriyoro. Dohpaguere judio masa Goãmure erã tarinũgacũ ìagu ìgu muapũre mojomoro ìagu taumi. ³¹ Dohpaguere judio masa ìgure tarinũgarã áhrima. Erã eropa árĩquerecũ ta Goãmu dohpamasapũre Goãmu beyemuhtañumi. Goãmu ìgu arĩ werepidiro dopa ta masare ìgu beyediro dopa ta diaye iimi ìgu. Eropigu judio masa ñecu sumarã guere muare mojomoro ìadiiro dopa ta erã sãre pũhrũ mojomoro ìagucumi. ³² Õpa ãhraa: Árĩpehrerã masare Goãmu ìgure erã tarinũgara waja yujuro mera dipuwajacudoremi. Eropigu árĩpehrerã erã dipuwajacurã erã árĩcũ ìha árĩpehrerãre yujuro mera mojomoro ìagucumi ìgu.

³³ Õatariagu áhrimi mari Goãmu. Turatariagu áhrimi. Õaro masipehogu áhrimi ìgu. Eropiro ìgu guñarire, ìgu iiburire marire ðaro masiya mara. ³⁴ Õpa arĩ gojañuma Goãmu yare erã gojarapũgue: “Goãmu mari Opũ ìgu guñarire ne masa ðaro masibeama. Eropirã masa ìgure ‘Õpa iique,’ arĩ weremasibeama. ³⁵ Eropirã masa Goãmure erã gajino ora pũhrũ ‘Ìgu marire wajamomi,’ arĩ masiya mara masa,” arĩ gojañuma iribojeguere. ³⁶ Goãmu árĩpehrerire iidi arĩmi. Eropigu ìgu turari mera árĩpehrerire árĩcũ iidoredi arĩmi ìgu. Eropiro árĩpehreri ìgu iiburi ãhraa. Eropirã árĩpehrerinuri ìgure umupeorã mari. Eropa ta iirã mari.

12

Goãmu gamerire marire iiniguicãdoreñumi Pablo

¹ Goãmu marire turaro mojomoro ìhami. Ìgu eropa mojomoro ìagu árĩcũ ìarã, yũ acawererã, mũa basi ta Goãmu gamerire iiniguicãrã árĩque. “Mũhu yũ opu ãhraa,” arĩque ìgure. Eropirã ðaripũre gohrotonirã, ñeri marirã árĩque. Eropa ta iiro gahmea marire Goãmure umupeorãre. Mũa eropa arĩrã árĩcũ ìgu mucubirigucumi. Eropigu muare irire burigã iidorea. ² I yeba majarã erã gamero dopa ta pepibiricãque mũa. Eropirã mũa pepiriguere Goãmu gamerire gohrotoque mũa. Eropirã ðaripũre

gohrotonirã árîrãca mua. Eropa gohrotořã Goãmu muare îgu iidorerire masirãca mua.

³ Goãmu yure mojomoro îagu muare buhedoregu beyemi yure. Eropigu árîpehrerãre muare ôpa dorea yuhu. "Ôatariagu âhraa yuhu," arî pepibiricãque. Eropa pepicãque. Jesucristore mua umupeorã "Goãmu yure îgu itamuro mera iimasia yuhu îgu yare," arî pepique. ⁴ Ôpa arî werenemogura yuhu: Mari mojotori, guburi, cui, árîpehreri mari dupu árîri baja âhraa. Mari dupu árîri sã yuju dupu árîquerero gajiropa árîri mohmeri opaa. Mari dupu mari Jesu yarã iro dopa âhraa. Cristo dupu iro dopa árîrã yuju curu ta âhraa mari. ⁵ Mari eropa árîcũ îagu gajiropa árîri dihta mohmerire apimi Goãmu marire. Eropirã bajarã masa árîquererã ta Cristore umupeorã árîrã îgu dupu iro dopa yuju curu âhraa mari.

⁶ Eropigu marire mari nucure gajiropa árîri mohmerire mari iimasi-burire îgu turari mera apidigu árîmi. Îgu eropiicũ maripu îgu apirare ôaro iiro gahmea. Eropirã Jesu yarã ôpa game itamuporo: Yujurãyerire Goãmu îgu yare weretaumasimorãre apidi árîmi. Eropirã erã Cristore erã masiopẽ îgu yare ôaro weretauporo gajirãre. ⁷ Gajirãre Goãmu yarãre erã itumumasimorãre apidi árîmi. Eropirã erãpũ masare ôaro mera itamuporo. Gajirãpũre Goãmu yare buhemorãre apidi árîmi. Eropirã erã masare ôaro buheporo. ⁸ Gajirãre masare mucubiricũ iimorãre apidi árîmi. Eropirã irire ôaro iiporo. Gajirãre erã ya erã gamerire omorãre apidi árîmi. Eropirã gajinore orã, ôaro mera mucubiriri mera oporo. Eropirã gajirãre doremasimorãre apimi. Erã dorerã ôaro mera doreporo. Eropigu daja mojomorocurãre itumumasimorãre apidi árîmi. Erãre itamurã mucubiriri mera itamuporo, arî werea muare.

Jesu yarã árîrã ôpa iirã âhrima, arî gojañumi Pablo

⁹ Gajirãre mahi umupeorã, diaye ta mahi umupeoque. Eropirã ñero iirire doorã árîque mua. Eropirã ôaripũre gameniguicãque. ¹⁰ Mua pagu porãre mua umupeoro dopa ta Jesu yarã mua mera majarã sãre umupeoque. Eropirã mua mera majarã erã gameripũre itamumãtaque. Pũra mu yare iique.

¹¹ Goãmu gamerire iirã ne tebiricãque. Eropirã mari Opu îgu dorediro dopa ta ôaro mucubiriri mera iique.

¹² Goãmu muare peamegue wabonirãre îgu taunirã âhraa mua. Irire masirã mucubirique mua. Eropirã ñero tarirã Cristo yare duhuro mariro yujuro bojeque mua. Eropirã Goãmure eropa serẽniguicãque.

¹³ Gajino Jesu yarãre duhyacũ îarã oque erãre. Eropirã mua ya wirigue masa erã ejacũ ôaro siporãcu erãre bocatirique.

¹⁴ Muare ñero iirãpũre erã ôaro árîburire serẽque Goãmure. Eropa ôadorerã erãre ujapeobiricãque.

¹⁵ Gajirã mucubiricũ îha erã mera mua sã mucubirique. Gajirã orecũ îha erã mera oreque.

¹⁶ Mua mera majarã mera ôaro árîque mua. Eropirã "Gajirã tauro ôagu âhraa," arî pepibiricãque. Bu árîrã mera sãre ôaro árîque. Eropirã "Masitarinugarã âhraa gua," arî pepibiricãque.

¹⁷ Gajirã muare ñero iiquerecũ ta, erãre ñero ii gamebiricãque. Eropirã ôarire iique. Eropirã ôarã mua árîrãre árîpehrerã masa îha masirãcoma. ¹⁸ Mua masiopẽ turaro mera ôarire iique árîpehrerã mera mua ôaro árîcãboro dopa. ¹⁹ Mua yu mahirã, yu acawererã, gajirã muare erã ñero iiquerecũ ta erã iro dopa ñero ii gamebiricãque. "Erã ñero iira dipuwaja

Goãmupũ dipuwaja moagucumi,” arĩ guñarã ñero ii gamebircãque erãre. Goãmũ yare erã gojarapũgue eropa ta arĩ gojañuma: “Yũpu masa erã ñero iira dipuwaja moagu ãhraa. Eropigu diaye ta dipuwaja moagura, arĩmi mari Opũ,” arĩ gojara ãhraa. ²⁰ Eropirã õpa iique mua: Mũare ñaturidigu ñgu oaboacũ ñarã ejoque ñgure. ñgu ñemesibucũ deco ñiaque ñgure. Eropa iirã mũare ñaturidigu ñgu ñero iirare guhyasĩricũ iirãca. ²¹ Eropirã gajirã mũare erã ñero iiquerecũ mũapũ erãre ñero ii gamebircãque. Eropirã erãre õaro iique. Eropa iirã ñeripũre tarinũgarã iirãca mua.

13

¹ Áripehrerã oparãre Goãmũ dihta apimi. Eropigu mua tauro oparã sãre Goãmũ ta beye apidigu arĩmi. ñgu eropa apinirã erã arĩcũ ñarã arĩpehrerã mua erãre yũrique. ² Mari tauro oparã arĩrãre tarinũgarã Goãmũ ñgu apinirãre tarinũgarã iirãca mari. Eropa tarinũganirãre Goãmũ dipuwaja moagucumi. ³ Óarire iirãre güicũ iimorã arĩbeama oparã. Ñerire iirãpũre güicũ iirã ãhrima oparã. Eropirã õarire iique mua oparãre mua güibiriburire. Eropa iirã güisome mua. Óarire mua iicũ, opũpũ “Óarire iiabũ,” arĩgucumi mũare. ⁴ Oparã Goãmũre itamurã ta ãhrima mua õaro arĩcãborore. Erã eropa arĩquererã ta erã dorerire tarinũgarãpũre dipuwaja moamorã ta ãhrima. Áripehrerã ñerire iinirãre dipuwaja moadoregu Goãmũ erãre apidi arĩmi. ⁵ Eropirã mari oparãre yũrique. Goãmũ ñgu dipuwaja moaborore güiro mera yũrique. Eropirã umupeori mera “Óaro iiro gameca yure,” arĩ pepiri mera õaro yũrique erãre. ⁶ Mua oparãre iri mohmerire apidi arĩmi Goãmũ. Eropirã iri mohmerire erã iicũ ñarã mua oparã ya arĩburire wajaseabasaa mua erãre.

⁷ Áripehrerãre mua oparãre õaro yũrique. Eropirã oparã erã wajaseadorerare wajayeque mua. Eropirã oparã gajire wajayedorecũ sãre wajayeque. Eropirã arĩpehrerã oparãre umupeoque, arãa yũhũ mũare.

⁸ Gajirãre wajamobircãque. Erãre mahi umupeoro gahmea. ñgu pohro arĩgũre mahigu Goãmũ dorerire iipehocãgu ãhrimi. Eropirã mua pohro arĩrã sãre mahiro gahmea. ⁹ Ópa arãa Goãmũ doreri: “Gajigu marapo mera ñero iirã arĩbircãque. Masare wejëbircãque. Yajabircãque. Gajirãre guya ñeri quere iibircãque. Gajirã yare turaro ñaribejabircãque,” arĩ werea ñgu doreri. Gaji ñgu doreri sã ãhraa. Iri eropa arĩquerecũ ta yujuñe doreriñere mũare werebu iiaa. Ópa ãhraa: “Mũ basi mahiro dopa ta mũ pohro arĩrãre mahique,” arĩ werea ñgu doreri. Mua pohro arĩrãre mahirã Goãmũ dorerire arĩpehrerire yũhirã ñiaa. ¹⁰ Gajirãre mahirã erãre ñero iisome. Eropirã erãre mahi umupeorã Goãmũ dorerire yũhripehorã ãhraa mua.

¹¹ Eropa gajirãre mahique õpa masirã: Jesu marire ñgu dujariboro merogã duhyanijaa. ñgure mari ne masinũgarã õpa arĩ pepiribũ: “Yoara pũhrũgue marire taugu arigucumi Jesu,” arĩ pepiribũ. Mari eropa arĩ pepiquerecũ ta merogã duhyaa Jesu marire ñgu taugu ariboro. Eropirã carĩrã iro dopa arĩbircãque. ñgu yare õaro guñanũruque. Jesu ariboro corere õaro pee masi yuque. ¹² Dohpaguere ñerã erã iirinãri arĩro iiaa. Cristo ñgu arininũ iri ñeri pehreroca. ñgu ariboro merogã duhyaa. ñgu ariboro merogã duhyacũ ñarã ñerire iibircãrã mari. Eropirã Goãmũ gameripũre iirã mari. Eropa Goãmũ yare iirã ñeripũre duhucãrãca mari.

¹³ Eropirā ðaripure iirā. Eropa iirā bosenuri áricũ mari uaribejarire ñeri iibirabicārā. Eropirā merebircārā. Eropirā nome mera ñero iibiricārā. Gajirā mera game ðaturirā áribircārā. Nome sã uma mera ñero iibiricãporo. ¹⁴ Eropirā mari Opũ Jesucristo ðũ itamuri mera ðũ gamero dopa ta ðaro áricãque. Eropirā mua uaribejarire ñerire ne iibiricãque.

14

Mua acawererãre Jesu yarãre “Ñero iirã iima,” arĩ werewuabircãque, arĩ gojañumi Pablo

¹ Jesure umupeogure, Jesu gamerire ðũ ðaro masinibircũ dohpa, ðũre ðaro bocatĩrique. Eropa bocatĩrirā Jesu gamerire ðũ masinibircũ ðarā ðũ masibiririre dũyasobircãque ðũre. ²⁻³ Gajirā “Goãmũ áripehrerire badoremi marire,” arĩ pepima. Eropirā gajirãpũ ðaro masinibirā “Waibũgũ dihipure bacũ Goãmũ gamebeami,” arĩ pepima. Eropirā oteri dihtare bahama. “Dihire bamasia,” arĩrā, “Dihire bamasibea,” arĩrā sã erā Jesucristore umupeorā áricũ ðha Goãmũ ðarā ðhami erãre. Eropirā “Áripehrerire Goãmũ badoremi,” arĩrãpũ “Iri dihire bamasibea,” arĩrãre ðaturibircãporo. Eropirā dihire babirãpũ dihire barãre “Ñero iirã iima,” arĩ werewuabircãporo. ⁴ Mua Jesure umupeorā yujugũ dorero doca áhrra mua. Mua eropa áricũ ðarā mua basi game werewuamasibea. Jesucristo mua Opũ ðũ gamerire mua iibiricũ ðagũ ðũ dihta irire weresãmasimi. Mua ðaro iicũ sãre irire ðũ weremasimi mũare. Eropigũ ðũ dorerire iirãre ðarire bocatĩucũ iigacumi mari Opũ.

⁵ Yujurãyeri yujunũre “Irinũ dihta soorinũ gamenere Goãmũre umupeorinũ áhrra,” arĩ pepima. Gajirãpũ “Umuri nũcũ gamenere Goãmũre umupeoro gahmea,” arĩ pepima. Eropigũ ðpa werea mũare yũhũ: Mua nũcũ mua pepirire “¿Dinũ áhriri mari gamenere umupeorinũ? ¿Dinũ áribeari?” arĩ pepi masique mua. ⁶ Gajigũ yujunũ iimi ðũ Goãmũre umupeoburinũre. Eropigũ umuri nũcũ gamenere umupeobiriqueregũ, Goãmũre ðaro umupeomi ðũ sã. Eropigũ áripehrerire bagũ sã “Óhaa,” arĩ serẽmi Goãmũre. Eropigũ ðũ sã Goãmũre umupeogu ta áhrimi. Eropigũ gajinore babi sã ðũ sã umupeomi Goãmũre. Eropigũ ðũ sã Goãmũre “Óhaa,” arĩ serẽmi.

⁷ Mari gameri dihtare iirā árimasibea mari. Cristo áhrimi mari Opũ. Eropigũ mari ojocaricũ, mari sircũ mari Opũ áhrimi ðũ. ⁸ Dohpaguere mari ojocaripõ Cristo yare iimorā dihta áhrra mari. ðũ yarā áhrra. Mari sãrira puhũgue sãre ðũ yarā árinigucãrãca. Eropigũ mari ojocaricũ mari sircũ sãre Cristo mari Opũ ta áhrimi. ⁹ Eropa ta áhrra. Cristo sãri, masa maria, ojocarimi sãrinirā sãre erā opũ áribũ.

¹⁰ ¿Duhpirā mua acaweregũre Jesu yagũre “Ñero iigũ iimi,” arĩ werewuadiari mua? ¿Duhpimorā mua acaweregũre curadiupidiari mua? Mari áripehrerā Cristo core mari nigucũ ðũpũ mari iirare masipehogũ, mari iirare ðagũcumi. ðũ eropa ðabu ðũ áricũ mua acaweregũre “Ñerire iigũ áhrimi,” arĩ werewuabircãque. ¹¹ Goãmũ yare erā gojarapũgue ðpa arĩ gojañuma:

Ópa arĩmi mari Opũ: “Yũhũ ojocarigũ áhrra. Iri diaye ta áhrra. Eropirā áripehrerā yare gamerā, gamebirā sã yũ core merejarãcoma.

Eropirā árīpehrerā ‘Muḥu turagu gua Goāmu ta āhraa,’ arī, yare umupeorācoma,” arīmi mari Opu, arī gojañuma.

¹² Eropigu mari árīpehreri mari iirare Goāmu serēpigucumi. ¿Duhpirā eropa iari? arī serēpigucumi. Īgu eropa serēpicū yuhrirāca mari.

Mua acaweregu ñero dujacū iibiricāque mua, arī gojañumi Pablo

¹³ Eropirā mari mera majarā sāre “Ñerā āhrima,” arī werewuabiricārā. Eropirā mari acaweregure Jesu yagure ñero dujacū iibiricārā. Īgu Goāmu yare duhucū iibiricārā. ¹⁴ Yuhu Jesucristo yagu āhraa. Eropigu opa oaro masia yuhu: “Árīpehreri Goāmu ĩgu badorera āhraa,” arī masia. Gajigupu eropa arīmasibeami. Īgupu gajinore bagu “Ñero iigu iiaa,” arī pepimi. Eropiro ĩgu irire arī pepiqueregu bagu diaye ta dipuwajacugu dujami. ¹⁵ Iri diaye ta āhraa. Mua dihire mua bacū mua acaweregu “Iri Goāmu badorebirira āhraa,” arīgupu ihacūbocumi muare. Eropigu irire bagu, “Ñero iigu iica yuhu,” arī wuaro guñaricubocumi ĩgu. Eropirā mua bari mera ĩgu ñero pepicū iha irire dipaturi babiricāro gahmea muare. Muḥu muraro ta bagu mu acaweregure umupeosome. Mua acaweregu yañe árīborañe sāre sīridi arīmi Jesucristo. Eropirā mua irire badiaquererā mua acaweregure Goāmu yare duhucū iibiricāque. Eropirā irire babiricāque. ¹⁶ “Ire gua eropa iicū oapūricāca,” mua arī pepiquerecū gajirā muare iha werewuabocoma. Erā eropa werewuacū ĩarā dipaturi irire iinemobiricāque guare werewuari arīrā. ¹⁷ Goāmupu mari opu āhrimi. ĩgu eropa árīcū, mari badiari mari ihridiari sã eropa árīcāro iiaa. Bu gohra āhraa. Eropiro mari Opu ĩgu dorerire oarire mari iicū iri oari gohra árīro tiiaa. Eropiro gajirā mera mari oaro árīcācū oari gohra árīro iiaa. Eropiro Espiritu Santo ĩgu itamuri mera mari mucubiricū oari gohra árīro iiaa. ¹⁸ Eropa ta Cristo yare oarire iicū ĩarā Goāmu sã, masa sã “Oaro iibabu muḥu,” arīrācoma.

¹⁹ Eropa ta iirā mari tamera mari oaro árīcāborore, mari basi mari game itamuburire. Eropa iiricūrā Jesure umupeonemorāca. ²⁰ Eropirā mua bari mera Jesu yarāre Goāmu yare duhucū iibiricāque. Gajigu Jesu yagu “Goāmu badorebirira bari āhraa,” ĩgu arīra barire mua bacū ĩagu ĩgupu Goāmu yare duhubocumi. Eropirā irire babiricāque. Diaye ta árīpehreri bari Goāmu ĩgu badorera bari āhraa. Iri eropa árīquerecū gajigu “Iri barire Goāmu badorebeami,” arī pepimi. Eropigu mua iri barire bacū ĩagu ĩgupu ihacū babocumi ĩgu sã. Eropa bagu “Ñero iigu iiaa,” arī pepi Goāmu yare duhubocumi. Eropirā marire ĩgu ihacū bacū iirā mari sã ñero iirā tiiaa. Eropirā iri barire babiricāro gahmea marire. ²¹ Waimurā dihire mua bacū vinore mua ihricū ĩagu, gajigu Jesu yagu ĩabocumi. Eropa ĩagu ihacū babocumi daja. “Irire bagu ñero iigu iica yuhu,” arī pepibocumi. Eropa arī pepigu tamera bagu ñero iigu iimi. Eropirā ĩgu ñero ĩgu iibiriborore waimurā dihire, vino sāre muapu ba duhucū oacāroca. Jesure ĩgu umupeo duhubiriborore iibiricāro gahmea marire. ²² Eropirā mua baburire, ihriburire game duyasobiricāque. “Árīpehreri barire Goāmu marire badoredigu arīmi,” arī pepirā irire Goāmu dihtare wereque. “Ñerire iibigu, oaro iigu iica,” ĩgu pepirigue arī masigu mucubirigu āhrimi. ²³ Gajigupu iri barire bagu, “Ñero iigu iiboca yuhu,” arī pepigu árīqueregu iri barire bagu, dipuwajacugu āhrimi ĩgu. ĩgu ta “Ire bagu diaye ta oarire iigu iiaa,” ĩgu pepirigue arīmasibeami.

Eropa arīmasibigu irire bagu, Īgu bara waja dipuwajacumi Īgu. “Ōarire iigu iiaa,” arīmasibirinijagu irire iigu dipuwajacuga āhrimi.

15

Mari pohro árīrāre ōaro umupeorā, arī gojañumi Pablo

¹ Eropirā Jesucristore ōaro mari umupeorāpū, ōaro umupeoturabirāre itamuro gahmea. Eropirā mari ya árīburi dihtare iibiricāro gahmea. ² Mari pohro árīrāre erā gamero dopa ta iiro gahmea erā ōaro árīcāborore. Goāmure erā ōaro guñaturanemoburire iiro gahmea. ³ Jesucristo sã Īgu ya dihtare iibiridi árīmi. Eropa ta arāa Goāmū yare erā gojarapū. Ōpa arī gojañuma: “Cristo ōpa arīmi Goāmure: ‘Mupure ñero wereniguibonirā yupure ñero wereniguima,’ arīmi Cristo Goāmure,” arī gojañuma iribojeguerē. ⁴ Iribojegue erā Goāmū yare gojañuma mari ōaro buheborore. Eropirā iri erā gojarapūre buherā sīporā turarā wahaa mari. Eropa buherā ñero tarirā yujuro bojerāca. ⁵ Goāmū mware turacū iigu sīporā turacū iigu mware game ōaro árīcācū iiporo Jesucristo iigu gamediro dopa ta. ⁶ Eropa ta iiporo Īgu mua árīpehrerā yujuro mera Goāmure umupeoborore, mari Opū Jesu Pagure “Ōagu āhrimi. Turagu āhrimi,” mua arīborore.

Judio masa árībirāre ōari buherire werenugama, arī gojañumi Pablo

⁷ Cristo Īgu mware iidiro dopa ta mua mera majarāre ōaro game bocatīrique. Mua eropiicū ĩarā “Diaye ta Goāmure ōagu masa yujuro mera ōaro árīcācū itamugū āhrimi,” arī ĩarācoma masa. ⁸ Mware ire arīgu iiaa: Īgu Pagu Īgu arī werediro dopa diaye ta iigu Īgu árīcū ĩhmugu, judio masare itamubu aridigu árīmi Cristo i yebaguere. Eropigu Goāmū Abrahā säre arī werepidiro dopa ta iigu aridigu árīmi. ⁹ Masare Cristo Īgu itamucū Īgu Pagu Goāmū mojomoro ĩagu iidigu árīmi erāre. Īgu eropa mojomoro ĩacū ĩarā judio masa árībirā sã Goāmure “Ōagu āhrimi. Turagu āhrimi,” arī umupeoma dohpaguere. Erā säre Īgu yarā árīcū iigu aridigu árīmi Cristo. Goāmū yare erā gojarapūgue eropa ta arī gojañuma:

Cristo ōpa arīmi Īgu Pagure: Judio masa árībirā watope mure umupeogura. “Goāmū ōagu āhrimi,” arīgura. Eropigu erā watope bayagu mū ya árīburire bayagura, arīmi Cristo Īgu Pagure, arī gojañuma iribojeguerē.

¹⁰ Eropirā ōpa arī gojañuma daja:

Goāmū Īgu beyenirā mera judio masa mera game mucubirique mua sã judio masa árībirā, arī gojañuma iribojeguerē.

¹¹ Eropirā ōpa arī gojañuma daja:

Judio masa árībirā árīpehrerā Goāmure umupeoporo. Eropirā árīpehrero majarā ĩgure “Ōagu āhrimi. Turagu āhrimi,” arī umupeoporo, arī gojañuma.

¹² Eropigu Isaia murū sã ōpa arī gojañumi:

Davi pagu Isai murū pārami árīturiagu arīgucumi. Eropa arigu judio masa árībirā tauro opu árīgucumi Īgu. Eropirā erāpū ĩgure umupeorā erāre peamegue wabonirāre Īgu tauborore masirācoma, arī gojayuñumi iribojeguerē.

¹³ Goāmū marire taugu árību ōaro mware mucubiricū iiporo. Eropigu Jesure mua guñaturacū mware ōaro árīcācū iiporo Īgu. Mware Īgu

eropiicũ “Ígu pohro mari warãca,” arĩ mucubiri masinemorãca mua Espĩritu Santo Ígu turari mera, arãa yũhu muare.

14 Yũ acawererã, ðaro mera muare guñaã. Mua ðarã àhraa. Eropirã Jesu yare ðaro masia. Eropa masirã mua mera majarãre game ðaro were, buhemasia. 15 Mua eropa masirã mua árĩquerecũ ta ipũguere muare gũiro mariro irire ðaro werepehobũ yũhu erãgue cãdĩjiri arĩgu. Goãmu yare mahigu muare buhedoregu apimi yure. Eropigu Ígu apidĩro dopa ta muare guñacũ iigu iiaa. 16 Yure Ígu apicũ Jesucristo yare ðari buherire judio masa árĩbirãre buhea yũhu. Eropa buhecũ peerã judio masa árĩbirã Jesure umupeorãcoma. Erã eropa umupeocũ Íagu Goãmu erãre “Óarã àhrima,” arĩ Íagucumi. Eropigu erãre gamegucumi. Eropigu Espĩritu Santopũ Goãmu yarã wacũ iigucumi erãre.

17 Eropigu Jesucristore umupeogu árĩgu Goãmu yare buhedore apirare mucubiriri mera werea masare. 18-19 Judio masa árĩbirãre Cristo itamuri mera erãre yũ buhecũ peerã, Cristore umupeoma. Eropirã masa árĩbirãre buhea yũhu. Eropa buhecũ peerã judio masa árĩbirã Jesure umupeorãco yũ ðaro iiricurire Íarã, Goãmu turari mera yũ deyro moarare Íarã, Espĩritu Santo Ígu turari mera erã Cristore umupeoma. I árĩpehrerire muare ðiaye werediaca. Gajirã erã iirare werebeaa. Jerusaléngue ne yũ buhenũgara puhru árĩpehreri macarigue buhe curibũ. Yoarogue, Íliria yebague sãre Jesucristo ya buherire ðari buherire buhegu ejabũ. 20 Eropigu Cristo yare masibirã dihtare ðari buherire turaro buhediabũ. Yũ mera majarã erã buhenirãguere buhediabiribũ. 21 Eropa arĩ gojañuma Goãmu yare erã gojarapũguere. Ópa arĩ gojañuma: Iribojegue Ígure ne masibirinirã Ígure masirãcoma. Eropirã Ígure ne peebirinirã Ígu yare ðaro peerãcoma, arĩ gojañuma Goãmu yare erã gojarapũgue.

Pablo Romague Ígu waborore wereñumi

22 Eropigu árĩpehrero majarãre buhegu árĩgu bajasuburi mua pohro wadiaqueregu ta wamasibirimurabũ. 23 Dohpaguere i yebaguere a árĩbirã Jesure umupeorãcoyũ mohmeri pehrea wahaã. Eropa pehrecũ Íagu baja bojori mua pohro wadianiguigu árĩgu, mua pohrogue wagura. 24 Eropigu Españague wagu muare ero Íhatari wahgãgura. Eropigu mua mera mucubirigura. Eropigu mua mera árĩdigu wagu mua yare itamuri mera wagura daja. 25 Dohpaguere Jerusaléngue wanibu iiaa. Ero majarãre yũ acawererãre Jesu yarãre niyeru sonigu wagu iiaa. 26 Macedonia majarã, Acaya majarã, ðaro mera Jesu yarã Jerusaléngue árĩrãre mojomorocurãre niyerure oboeama erãre itamurã. Eropigu erãre obeorare sogũ wagu iiaa. 27 Iri niyerure orã ðaro mera ohãma. Erã eropiicũ ðapũrica yũ pepicũ. Erãre judio masa árĩbirãre, gua judio masapũ Goãmu yare buhemũhtabũ. Eropirã erãre Ígu tauboro sãre buhemũhtabũ gua judio masa erãre. Gua eropa buhecũ Íagu, Macedonia majarã, Acaya majarã mera judio masapũre Jerusalén majarãre itamucũ ðapũrica yure. Erãre erã buhera waja àhraa iri niyeru yũ pepicũ. 28 Eropigu Jerusalén majarãre iri niyerure yũ ora puhru Españague wagura. Eroque wagu muare Íhatari wahgãgura. 29 Eropigu mua pohrogue yũ wacũ Cristo yare yũ muare buhecũ Cristo marire ðaro sĩporãcucũ iigucumi.

30 Mua, yũ acawererã, mari Opure Jesucristore umupeoa. Eropirã Espĩritu Santo Ígu turari mera gajirãre umupeoca mua. Mua eropiirã árĩrã

yū sãre turaro serēbasaque Goãmure. ³¹ Ōpa arī serēbasaque: Judea yeba majarā Jesure umupeobirā yure erā ñero iidiacū Goãmū yure itamuboro dopa serēque. Eropirā Jerusalén majarāre iri niyerure yū ocū erā irire mucubiriri mera erā ñeaboro dopa serēque. ³² Mũa eropa serēcū Goãmū gamecū mucubiriri mera mũa pohrogue waguca. Eropigu mũa mera árīgū mucubiriri mera soogura. ³³ Goãmū marire ōaro árīcāgū ĩgū mũa mera árīporo. Eropa ta ĩporo.

16

Pablo ōadoreñumi

¹ Mari acawerego Febe waĩcūgo mũa pohrogue wabo iimo. Igo Cencrea waĩcūri macague Jesu yarāre itamugo āhrimo. ² Eropigo bajarāre yū sãre itamugo āhrimo igo. Eropirā mũa igo mera yujuro mera mari Opure umupeorā āhrra. Eropirā igore ōaro mera bocatīrique. Eropa ta ĩiro gahmea marire Jesu yarāre. Eropirā igore igo gamerire gajino duhyacū igore oque mũa.

³ Aquila, ĩgū marapo sã Priscila sã ōaporo. Jesucristo yare yū buhecū erā sã yū mera mohmeama. ⁴ Erāre mero wejēbocurima gajirā erā yure wejēdiacū itamuri waja. Eropigu erā mera mucubiria yuhū. Eropirā judio masa árībirā Jesu yarā árīpehrerā erā sã erā mera mucubirima. ⁵ Eropirā Aquila ya wihi gamenererā sã Jesu yarā ōaporo. Yū mahigū Epenéta sã ōaporo. ĩgū Asia majagu ero árīgū Cristore umupeomūhtadigū árīmi. ⁶ María sã ōaporo. Igo mũa mera turaro mohmeapo. ⁷ Yū acawererā Andrónico, Junia sã ōaporo. Peresu yū árīcū erā ta yure wapicunirā āhrrama. Eropirā yū core Cristore umupeonugañorā erāpu. Gajirā Jesu ĩgū apinirāpu erāre “Diaye ta ōarā āhrima,” arī werenigūima.

⁸ Amplia sã yū mahigū Jesu yagu āhrimi. ĩgū ōaporo. ⁹ Eropigu Urbano sã ōaporo. ĩgū sã mari mera Cristo ya árīburire mohmeami. Eropigu yū mahigū mera majagu Estaqui ōaporo. ¹⁰ Eropigu Apele sã ōaporo. ĩgū diaye ta ōaro Jesucristore umupeomi. ĩgū iiricūrire ĩarā irire masia mari. Eropirā Aristóbulo ya wihi majarā árīpehrerā ĩgū marapo ĩgū porā sã ōaporo. ¹¹ Yū acaweregu Herodión ōaporo. Eropirā Narciso ya wihi majarā Jesu yarā ōapehrecāporo. ¹² Eropirā Trifena, Trifosa sã ōaporo. Erā nome mari Opū Jesu mohmerire ĩiama. Mari mahigo Pérsida sã ōaporo. Igo mari Opū Jesucristo yare turaro mohmemo. ¹³ Eropigu Rufo mari Opū Jesure ōaro umupeogu, ĩgū yare ōaro ĩigu ōaporo. ĩgū pago sã ōaporo. Igo yū pago iro dopa ta árīgo āhrimo. ¹⁴ Asíncrito, Flegonte, Herma, Patroba, Herme, gajirā Jesu yarā erā mera majarā sã ōaporo. ¹⁵ Eropirā Filólogo, Julia, Nereo, ĩgū pagu mago sã Olimpa, gajirā erā mera majarā sã Jesu yarā ōaporo.

¹⁶ Eropirā mũa mera majarāre bocatīrirā mucubiriri mera mojoto ñeaque. Árīpehrerā Jesu yarā árīpehrero majarā muare ōadorema.

¹⁷ Yū acawererā, mũa mera yujurāyeri muare game ĩhaturicū ĩirā game dūca waricū ĩirā árīcoma. Eropirā muare Jesu ya buherire goroweoma. Eropirā eropa ĩirāre ōaro ĩique goroweorī arīrā. Eropa árīrāre wapicubiricāque. ¹⁸ Eropa ĩirā mari Opū Jesucristo yare ĩibeama. Ñerire erā ũaribejari dihtare ĩiama. Eropirā ōaro wereniguirā iro dopa guyama masibirāre erā. Erā eropa guyacū erāre ōaro peenurama.

Eropirã erãre wapicubiricãque mua. ¹⁹ Muapu Jesure ðaro yuhrirã àhraa. Irire áripehrerã masima. Eropa ðaro mua yuhrirã mua áricã pee mucubiria yuhu. Eropigu ðaro mua iiborore masicũ gahmea yuhu. Eropigu ne ñeri sãre mua iibiricũ gahmea yuhu. ²⁰ Eropigu Goãmũ marire ðaro áricãcũ iigu merogã puhru watire tarinũgagu iibasagucumi muare. Mari Opũ Jesucristo ðaro muare itamuniguicãporo.

²¹ Timoteo ya mera majagu muare ðadoremi. Yu acawererã Lucio, Jasõ, Sosípate muare ðadorema.

²² Yuhu Tercio ipũre gojabasagu àhraa Pablore. Yuhu Jesu yagu árigũ mua Jesu yarãre ðadorea.

²³ Gayo ya wihi áricãgu iiaa yuhu Pablo. Igũ ya wihigue Jesu yarã gamenerema Goãmũre umupeomorã. Igũ sã muare ðadoremi. Eropigu Erasto i maca majarã oparãre niyeru dibubasagu muare ðadoremi. Mari acaweregu Jesu yagu Cuarto sã muare ðadoremi.

²⁴ Mari Opũ Jesucristopũ muare áripehrerãre ðaro iiporo. Eropa ta iiporo.

Pablo Goãmũre umupeori mera gojatuñumi

²⁵⁻²⁷ Mari Opũ Jesucristo ya buheri mera ðari buheri mera Goãmũ muare igũre guñaturanemocũ iimasimi. Iribojegue iri ðari buheri ne masa masibiriri buheri áriyoro. Dohpaguere Goãmũ yare weremũhtanirã erã gojara mera iri buherire masidoregu iimi. Yu sã irire buhea. Iri buherire áripehrero majarã dohpaguere masima. Goãmũ eropa áriniguicãgu dorero dopa ta erã masima. Iri buherire igũ ta weredorepũ masa igũre erã yuhrigorore, igũre erã umupeoboro sãre. Eropirã igũre “Diaye ta ðagu, turagu àhrimi,” arĩ umupeorã. Igũ yujugu ta Goãmũ ðaro masipehogũ àhrimi. Jesucristo igũ itamuri mera Goãmũre eropa umupeoniguicãrã mari. Eropa ta iirã. Iripeta àhraa.

1 Corintios

Pablo Goãmu yarãre Corinto majarãre gojabeoñumi

1-2 Yuhũ Pablo, Jesucristo yare ïgu buhedore apidigu ãhraa. Goãmu ïgu gamero dopa ta Jesu ïgu apibure yure beyepũ ïgu. Sostene Jesu yagu mari acaweregu mera muare Goãmu yarãre Corinto majarãre gojabeoa gua. Jesucristo mera majarã mua áricũ Goãmu yarã árimorãre beye aidi árimi Jesucristo muare. Eropirã árípehrero majarã gajirã mari Opũ Jesucristore sererã árirã, erã sã Goãmu yarã ta áhrima. Jesucristopũ erã opũ mari Opũ sã áhrimi. ³ Eropirã Goãmu mari Pagũ, mari Opũ Jesucristo mera muare ðadorea. ïgu itamuri mera ðaro árique mua.

Jesucristopũ muare ðaro iibasadigu árimi Goãmure, arĩ gojañumi Pablo

⁴ Jesucristo muare ðaro iibasadigu árimi Goãmure. ïgu eropa iicũ ïagu, Goãmure yũ mahigure, Ôhaa," arãa yuhũ umuri nũcu. ⁵ Cristo yarã mua áricũ ïagu Goãmupũ muare ðaro áricũ iimi. Eropigu ïgupũ ïgu yare muare gajirãre weremorãre iimi ïgu. Eropigu ïgu, ïgu yare ðaro masicũ iimi muare. ⁶ "Cristo muare ðaro iigucumi," muare gua arĩ werediro ta wahabũ muare Cristo yarã mua wacũ. ⁷ Eropigu árípehreri ïgu ya áriburire mua iimasicũ iimi Goãmu muare. Eropiro ne duhyabeaa muare. Mari Opũ Jesucristo i yebague ïgu dujariborore mua corerisubũ Goãmupũ muare eropa itamuniguicãgucumi. ⁸ Eropigu Jesucristopũ mua ïgure umupeoniguicũ iigu áhrimi. ïgu eropa árigũ áricũ muapũ i umũ pehrecũ mua ñeri iira dipuwaja moorã áricũ iigucumi. ⁹ Goãmu "Ôpa ïgura," ïgu arĩdiro dopa ta ïgu iimi. Eropigu ïgu, ïgu magũ mari Opũ Jesucristo mera yujuro mera árimorãre marire beyedi árimi.

Jesu yarã Corinto majarã erã game dũca warirare Pablo arĩ gojañumi

¹⁰ Yũ acawererã, mari Opũ Jesucristo ïgu dorero mera muare burigã serẽbu iiaa: Mua basi game duyasobiricãque. Eropirã mua basi game dũca waribiricãro gahmea. Yuju curu ta árique mua. Eropirã yujuropa ta ðaro áriniguicãque. Eropa iirã mua iiburire pepirã, yujuropa iique mua. ¹¹ Yũ acawererã, mua basi game duyasorã iiayoro mua. Eropa arĩ wereama Cloé ya wihi majarã yure. ¹² Gajirã mua mera majarã ðpa arãnorã: "Pablo ya curu majarã áhraa gua," arĩ wereniguiayoro gajirã mua. Eropirã gajirã "Apolo ya curu majarã áhraa gua," arãyoro gajirã. Eropirã gajirãpũ daja, "Pedro ya curu majarã áhraa gua," arãyoro mua. Eropirã gajirãpũ daja, "Gua tamera Cristo ya curu majarã áhraa gua," arãyoro mua. ¹³ Mua eropa arĩquerecũ ta yuhũ ðpa werea muare: Cristo ya curu majarã yuju curu ta áhraa mari. Eropirã mari basi yujurãyeri dũca warimasibea mari. Yuju curu ta árirã iiaa mari. Yuhũ Cristo áribeaa. ïgu iidiro dopa mua ya dipuwajare crusague síridigu áribeaa. Eropigu muare gajigu waĩyegu yaha waĩ mera waĩyebami. Cristo ya waĩ mera waĩyecumi muare. ¹⁴ Muare mua mera majarã sãre waĩyebiribũ yũpũ. Crispore, Gayo sãre erã dihtare waĩyebũ yuhũ. "Pablo waĩyenirã dihta áhraa," arĩmasibea mua. Eropigu gajirãre waĩyebiridigu yũ árigũ "Ôhaa," arĩ pepia Goãmure. ¹⁵ Bajarã masare waĩyedigu yũ áricũ "Pablo ya waĩ mera ïgu waĩyemi guare," arĩboaya mua. Eropa

arĩrã Jesucristore umupeobirã mua yũpũre umupeoboaya. Eropigu irire gamebirabũ. ¹⁶ Estéfana ya wihi majarã sãre waĩyebũ yũhũ. Erã nũcũ ta waĩyebũ yũhũ. Gajirã yũ waĩyenirãre guñabirica. ¹⁷ Cristo yũre obeogu, gajirãre waĩyebure apibirimi ĩgu yũre. Ōari buherire werebupũre apimi ĩgu yũre. Iri ōari buheri “Cristo ĩgu crusague sĩriñumi,” arĩ buheri masare gohrotori buheri ãhraa Goãmu yare erã iiburire. Eropigu yũhũ irire buhegu gajigu ōaro masitarigu iro dopa buhebeaa. Masa erã masiri mera buhebeaa. Yũhũ eropa yũ ejatuharo mera buhecũ mua ōari buheripũre umupeobiriboaya.

Goãmu ĩgu turarire ĩgu masiri sãre opagu ãhrimi Cristo, arĩ gojañumi Pablo

¹⁸ Peamegue dederemorãpũ iri buheri “Cristo crusague ĩgu sĩridi árĩmi,” arĩ buherire peerã ōpa arĩma: “Pee masibirã ya buheri ãhraa,” arĩmaacãma. Maripũ Cristo ĩgu taumorã árĩrã ōpa arãa: “ ‘Crusague ĩgu marire sĩridi árĩmi,’ arĩ buheri tura ãhraa. Iri buheri mera Goãmu marire gohrotomi,” arãa mari. ¹⁹ Eropa ta arĩñumi Goãmũpũ ĩgu yare erã gojarapũgue:

Eropirã i yeba majarã masare “Ōaro masirã ãhraa,” erã basi arĩrãre erã masiripũ duhpiburi árĩbeaa, arĩ ĩhmugũca yũhũ, arĩñumi Goãmũ.

²⁰ Eropirã i yeba majarã ōaro masirã duhpimorã árĩbeama. Dohpaguere wereniguimeherã sã duhpimorã árĩbeama. I yeba majarã “Ōaro masirã ãhrima,” arĩnirã erã arĩquerecũ ta “Pee masibirã erã ãhrima,” arĩ ĩhmumi Goãmũ erãre. ²¹ Goãmũ tamera ōaro masigu ãhrimi. ĩgu eropa árĩcũ i yeba majarã erã ya masiri mera Goãmũ yare ne masisiyã mariroca erãre. Goãmũ “Erã masiri mera yũre masisome,” ĩgu arĩdiro dopa ta eropa wahabu erãre. Ōpa arĩñumi: “Yaha ōari buherire werecũ masa yũre masirãcoma,” arĩñumi. Eropigu “Iri buheri pee masibirã ya buheri ãhraa,” gajirã arĩquerecũ, gajirãpũre erã ōari buherire peerãpũre Goãmũ taumi. Cristore erã umupeocũ ĩagu “Erãre peamegue wabonirãre taugũra,” arĩmũhtapu.

²² Judio masa deyoro moarire ii ĩhmudorema erã iri buherire umupeoboro core. Eropirã griego masa judio masa árĩbirã arĩrãpũ erã pepiro dopa buhecũ gahmema. ²³ Maripũ “Jesucristo mari ñeri iira dipuwaja crusague sĩridi árĩmi,” arĩ buherire buhea mari. Iri buherire peerã judio masapũ gamebeama. Eropirã iri buherire judio masa árĩbirãpũ “Pee masibirã ya buheri ãhraa,” arĩma. ²⁴ Goãmũ ĩgu yarã arĩmorã ĩgu beye añinirãpũ iri buherire pee ōpa arĩ masima: “Goãmũ masipehogu turagu ãhrimi. Cristo marire sĩribasara mera marire peamegue wabonirãre Goãmũ taumi,” arĩ masima. Erã judio masa, judio masa árĩbirã sã eropa arĩ masima Jesu yarã árĩrã. ²⁵ Goãmũ ōaro masipehogu ãhrimi. “Goãmũ pee masibigu ãhrimi,” masa arĩ pepiquerecũ ta i yeba majarã tauro ōaro masipehogu ãhrimi. Eropigu “Turabigu ãhrimi,” masa arĩ pepiquerecũ ta erã wecague turatarinũgagu ãhrimi ĩgu. ²⁶ Yũ acawererã, Goãmũ mũare ĩgu beyeboro core mua arĩmũhtarare guñaque. I yeba majarã “Ōaro masirã ãhrima,” erã arĩnirã watopegue Goãmũ mũare bajamerãgã dihtare beye aĩdi árĩmi. Eropirã masa tĩrã oparã sã arĩnirã bajamerãgã ãhraa mua Jesu yarã. ²⁷ I yeba majarã “Pee masibirã ãhrima,” erã arĩnirã watopepũre mũare Goãmũ beye aĩdi árĩmi. Eropa beyedi árĩmi “Ōaro masirã ãhrima,”

erā arīnirā erā masibirā dujaboro dopa. Eropigu i yeba majarā “Turabirā, doyarā āhrima,” erā arīnirāre Goāmū aīdigu arīmi doyarā erā doyarā dujaro dopa. ²⁸ Masa erā ĩadiabirāre “Duhpimorā arībeama,” arīma. Erā eropa arīnirāre bu arīrāre Goāmū ĩgu yarā arīmorāre aīdigu arīmi mūare. Eropa aīgu i yeba majarā oparāre, guhyadiarāre, “Guapū bu arīrā āhraa,” erā arīcū iigu iimi Goāmū erāre. ²⁹ ĩgu eropa iicū i yeba majarā ne yujugu ĩgu gamero mera “Yū tamera turagu, ōaro masigu āhraa,” arī tarinūgamasibeami Goāmū ĩgu ĩacū. ³⁰ Goāmūpū marire Jesucristo yarā arīcū iimi. ĩgu yarā arīrā ũmuri nūcū Goāmū mera arīrāca mari. Jesucristopū Goāmūre ōaro masicū iimi marire. Eropigu mari űerire cōāgu marire ōarire gohrotocū iigu āhrimi. Eropigu marire peamegue wabonirāre taubu āhrimi. ³¹ ĩgu eropa iicū Goāmū yare erā gojarapū ĩgu arī gojadiro dopa ta eropa wahaa. Ōpa arī gojañuma: “ ‘Yū gamero masipehogu āhraa,’ arīgu irire arībiricāporo. Ōpa arīporo: ‘Mari Ōpūpū masipehogu ta āhrimi,’ arīporo ĩgu,” arī gojañuma Goāmū yare erā gojarapūgue.

2

Cristo crusague ĩgu sīrira buheri āhraa i, arī gojañumi Pablo

¹⁻² Yū acawererā, mūa pohro wabu ōpa arī pepibū yūpū: “Erā mera arīgu Jesucristo crusague sīridigu waīpeo ĩgure erā masibiri dihtare buhegūra erāre,” arī pepibū mūare. Eropigu mūa pohro arīgu Goāmū yare mūare buhebu. Goāmū yare mūare buhegu, weretarinūgagu iro dopa “Masitarigu āhraa,” arī buhegu iibiribū. ³ Eropigu mūa mera arīgu bu arīgu iro dopa arībū yūhū. Eropigu yare umupeori arīgu doyañariro dopa buhebu yūhū. ⁴ Eropigu Goāmū yare buhegu “Masipehoa yūhū,” arīgu weretarinūgagu iro dopa buhebiribū. ĩgu yare buhecū Espīritu Santo ĩgu turari mera mūare iri buherire umupeocū iimi. ⁵ Eropa ta arī buhebu yūhū mūare masa erā gamero erā ya masiripure mūa gamebiriboro dopa. Goāmūpūre mūa umupeoburire eropa arī buhebu yūhū “Goāmū turagu āhrimi,” mūa arīboro dopa.

Espīritu Santopū Goāmū ĩgu arīricurire buhemi marire, arī gojañumi Pablo

⁶ Eropirā Goāmū ya buherire Jesure ōaro umupeorāguere werea guā. Iri buheri masiri ta āhraa. I ũmū maja masa erā gamero erā masiri iro dopa arībeaa i mūare guā buheri. I yebare dorerā ya masiri sā arībeaa. Erā masiri i ũmū mera pehrero ĩaa. ⁷ Goāmū ya masiripure werea. Iribojegue i buherire ne masisiya mariyoro. Negohraguere mari ōaro arīborore Goāmū arī pepituhajamūripū. Marire peamegue wabonirāre ĩgu tauborore, ĩgu mera mari arīboro sāre “Masare eropa ta iigura,” arī pepiyupū. ⁸ ĩgu masare ōaro arī pepirare i ũmūre dorerā masibirinūma. Irire ōaro masirā, mari Ōpūre Goāmū magū gohrare crusague pabia wejēbiriboñuma erā. ⁹ Erā eropa masibirirare Goāmū yare erā gojarapūgue ōpa āhraa:

Arīpehrerā Goāmūre mahirā ya arīburire Goāmū ōaro amubasayutuhapū. Iri ĩgu amubasarapūre masare masima masiya mara. Ne gajino iro dopa ĩaya mara irire, arāa Goāmū yare erā gojarapūgue.

¹⁰ Iri eropa arīquerecū ta Espiritu Santopu Goāmū yare, masisūya marirare masicū iimi marire. Árīpehreri Goāmū yare ĩgu pepira säre Espiritu Santo masipehomi. Eropā masigu ĩgu marire irire masicū iimi.

¹¹ Ne gajirāpu masu ĩgu pepirire masibeama. Masupu ĩgu seyaro ĩgu guñarigüe ĩgu pepirire masimi. Eropā ta masa Goāmū ĩgu pepirire ne masibeama. Espiritu Santo dihta ĩgu pepirire masimi. ¹² Eropirā mari Jesu yarā árīrā erā i umu majarā Jesu yarā árībirā erā pepiro dopa pepibeaa. Goāmū ĩgu Espiriture ohomi maripure ĩgu pepiro dopa mari pepiburire. ĩgu marire ōaro ĩgu orare masicū iimi Espiritu Santopu. ¹³ Eropirā Goāmū yare muare buherā, masa ya masiri mera gua gamero buhebeaa gua. Espiritu Santo ĩgu gamero dopa ĩgu guare wereniguidoreripure muare buhea. Eropā buherā Espiritu Santo gamero dopa Goāmū yare ōaro buhea gua ĩgu yarāre.

¹⁴ Espiritu Santore opabirāpu irire Espiritu Santo yare erāre buhecū, “Pee masibirā wereniguiiri āhraa,” arīma erā. Eropirā gamebeama. Espiritu Santo ĩgu itamuro mariro ĩgu yare masima masiya mara masare. Eropirā erā ĩgu yare ne masibeama. ¹⁵ Espiritu Santore oparāpu Goāmū yare ōaro masima. Gajirāpu erāre “Pee masibirā āhrima,” arīmasibeama Espiritu Santore oparāre. ¹⁶ Ōpa arāa Goāmū yare erā gojarapūgue: “Ne yujugu ĩgu gamero mera mari Opū ĩgu guñarire masigu ne marimi. Eropirā ĩgure masa ne buhemasibeama,” arāa ĩgu yare erā gojarapūgue. Maripu Cristo yarā árīrā, Cristo iro dopa masia.

3

Jesu yarā yujuro mera Goāmū mohme corerā āhrima, arī gojañumi Pablo

¹⁻² Yu acawererā, muare buhegu Espiritu Santore ōaro yuhrirāre ya buhediro dopa buhemasibiribu muapure. Mua pepiri Espiritu Santo opabirā pepiro dopa árību. Cristo yarā mua arīquererā ta ĩgure ōaro yuhrirā árībirā majirāgā erā pee masibiro dopa ta Goāmū yare ōaro pee masibiribu muapu dohpa. Eropā mua pee masibiricū ĩagu Goāmū yare ōarire buhenemomasibiribu muare. Eropigu majirāgāre apico dihtare mari oro dopa ta diasabiriri buheri dihtare buhebu daja muare. Dohpague säre muraro ta masinibeaa dohpa mua. ³ Ōpa iirā iiaa mua Espiritu Santore yuhrirā. Muapu mua mera majarāre ĩadiabirā, erā gajinore opacū ĩhaturirā, mua basi yujurāyeri cururi Yu acawererā, muare buhegu Educa warirā iiaa. Eropirā Espiritu Santore opabirā Cristore gamebirā iro dopa iirā iiaa mua. Eropirā Goāmū yare ōaro peebeaa mua. ⁴ Ōpa āhrayoro mua. “Pablo ya curu majarā āhraa gua,” arāyoro mua yujurāyeri. Eropirā gajirā mua mera majarāpu “Apolo ya curu majarā āhraa gua tamera,” arāyoro mua. Eropā arī duyasorā Espiritu Santore opabirā iro dopa arī wereniguiia mua.

⁵ ¿Yahu Pablo, Apolo mera duhpimorā āhriri gua mua pepicū? Árībeaa. Goāmure mohme corerā āhraa gua. Guare ĩgu iidorero dopa iimorā āhraa. Eropirā gua muare buhecū peerā Jesucristore umupeonugabu mua. ⁶ Ōari buherire buherā pohegue mohme corerā iro dopa āhrima mari werenigui queori mera buhecū. Pohegue ĩgu otemuhtadiro dopa ta yuhu muare Goāmū yare buhemuhtabu. Eropigu gajigu ĩgu pohere ĩhadiburo dopa ta Apolopu ya puhru muare buhenurusiami. Gua eropa buhequerecū ta pohe maja yucure iri bugacū ĩgu iidiro dopa ta Goāmupu

muare ĩgu yare masinemocũ iimi. ⁷ Eropigu yu buhemahtadi arĩqueregu ta bu arĩgu aħraa. Eropigu Apolo yu puhru buhenemodi sã bu arĩgu ta aħrimi. Goãmu tamera õagu aħrimi. ĩgupu muare ĩgu yarã arĩcũ ĩgure masinemocũ iimi. Eropirã Goãmupare umupeoro gahmea muare. ⁸ Otemuhtagu puhru pohere ĩhadibugu yujuro mera mohme corerã aħrima erã. Eropirã erã nucũ erã mohmediropẽ ta wajatama erã. Eropa ta aħraa gua Apolo mera. ⁹ Eropirã gua Goãmu yare mohme corerã aħraa. Eropa gua mohme corerã Apolo yu mera majagu aħrimi. Muapu Goãmu ya pohe iro dopa ta aħraa. Mua eropa arĩcũ Goãmu ya pohe iri maja yucũ ĩgu buganemocũ iidiro dopa ta muare ĩgu yare masinemocũ iimi ĩgu.

Eropigu Goãmu muare ĩgu yarãre õarã arĩcũ iigu iimi. Eropirã mua Goãmu mohmeri wihi iro dopa aħraa mua gaji werenigui queori mera werediacũ. ¹⁰ Yure Goãmu ĩgu itamuro mera yupu wihi iimehregu borari ĩgu nugumuhtaro dopa ta Jesucristo yare muare buhemahtabu. Eropigu iri weca gajigu ĩgu peoturia mariaro dopa ta gajigu yu puhru buhenemogu iimi. Eropa buhenemogu õaro gahyadiaro mera Goãmu yare buhero gahmea ĩgure. Queoro buhero gahmea. ¹¹ Wihire iirã borarire nugumuhtabiricũ wihi iima masiya mara. Eropa ta Cristore buhebircũ ĩgu yarã wacũ iima masiya mara. Cristo mari ya dipuwajare siribasare muare buhetuhajabu. Eropirã mua Jesucristore umupeorã Goãmu yarã watuhajabu. Mua eropa arĩrãguere gaji buherire buhema masiya mara mua Goãmu yarã wamorãre. ¹²⁻¹⁵ Goãmu yarãre buhenemorã aħrima. Erã watope gajirã queoro buhema. Gajirã queoro buhebeamã. Queoro buheri oro, plata, waja pagari utãyeri iro dopa aħraa. Queoro arĩbiriri buheripu yucu, taa, ñaira pũri iro dopa aħraa. I umu pehrerinuri arĩcũ Jesucristo dujarigu mari buhera queoro arĩcũ ĩhmugucumi. Mari buherare soẽnagu iro dopa ta queoro arĩcũ ĩhmugucumi. Eropiro oro, plata, waja pagari utãyeri soecũ ãjubiro dopa ta mari buhera queoro ta arĩro dujaroca ĩgu ĩacũ. Eropa mari queoro buhenirã mari arĩcũ õaro mari buhera waja wajayegucumi. Eropa ta yucu, taa, ñaira pũri soecũ ãjupehrero dopa ta mari buhera queoro arĩbiro pehreroca ĩgu ĩacũ. Eropigu queoro buhebirinirã mari arĩcũ ĩagu marire wajayesome. Erã eropa arĩrã erã wajatabiriquerecũ Goãmu erãpure taugucumi. Eropirã eropa queoro õaro buhebirinirã merogã mera tarirãcoma. Eropirã wihi ãjurisubu tariro dopa tarirãcoma.

¹⁶ Mua Jesu yarã mera Espĩritu Santopu mua mera aħrimi. Eropirã mua Goãmu ya wihi iro dopa aħraa. ¿Irire masibeari mua? ¹⁷ Eropirã mua Goãmu ya wihi arĩro dopa arĩrã ĩgu yarã gohra aħraa. Eropigu ĩgu yarãre yujugu ĩgu goroweocũ Goãmu peamegue deodeogucumi ĩgupare.

¹⁸ Irire õaro masique mua. Mua basi pee wisibiricãque. I umu maja buherire opagu "Masitarinugagu aħraa," arĩ pepibocumi. Eropa arĩ pepigu mua mera majagu arĩgu, "Yuhu Goãmu masiri mariro pee masibigu aħraa," arĩ pepiporo ĩgu. ĩgu eropa arĩ pepigu diaye ta õaro masigu wagucumi. ¹⁹ I umu maja masa erã gamero erã basi masiri "Bu gohra ta aħraa," arĩ pepimi Goãmu. Eropa ta werenemoã Goãmu yare erã gojarapũ. Õpa arĩ gojara aħraa: "Erã gamero masirã erã pepiri mera 'Õpa iirãra,' erã arĩrare gajiropa wacũ Goãmu iimi," arãã Goãmu yare erã gojarapũ. ²⁰ Eropi gajipũgue õpa arãã daja: "Masa erã gamero 'Masipehorã aħraa,' erã arĩ pepiri duhpiburi arĩbiricũ masimi mari Opu

Goãmupũ,” arãa Goãmũ yare erã gojarapũgue. ²¹⁻²² Eropirã “Pablo ya curu majarã ähraa gua,” arĩrã, “Apolo ya curu majarã ähraa gua,” arĩrã, “Pedro ya curu majarã ähraa gua,” arĩrã arĩbiricãque mua pare. Gua arĩpehrerã mua ya arĩburire iirã dihta ähraa. Goãmũ arĩpehreri mua ya arĩburire utuhajadiga arĩmi. İgu ihacũnugurare mua ya arĩburire odigu arĩmi muare. Muare ojocaricũ iimi mua ya arĩburire. Eropigu siricũ sãre iigucumi mua ya arĩburire. Dohpague mua arĩrire, puhrugue mua arĩburi sãre ogucumi. Eropirã arĩpehreri mera ähraa. ²³ Eropirã muapu Cristo yarã ähraa İgu ya arĩburire iimorã. Eropigu Cristopũ Goãmũ yagu ährimi İgu ya arĩburire iibu. Eropirã “Gua tamera Pablo ya curu majarã ähraa,” arĩbiricãque mua pare.

4

Cristo İgu yare İgu buhedoregu İgu apinirã erã mohmerire werepu Pablo

¹ Öpa arĩ pepique mua yure, Apolo sãre: Eropa ta erã Cristore mohme corerã ährima. Eropirã “Masa erã masibirare Goãmũ yare buhedore İgu apinirã ährima,” arĩ pepique mua. ² Yujugu İgu ya arĩburire iidore apinirãre İgu gamero dopa ta ii corero gahmea erãre. Yu sãre eropa ta ii corero gahmea Cristo İgu gamerire. ³ Mua yure werewuquerecũ eropa pepicãa yuhũ. Gajirã masa erã yure werewuacũ sãre eropa pepicãa yuhũ. Yu iirire İarã “I öari ähraa. I ñeri ähraa,” arĩ beyemasibeeaa mua yure. Yu basi arĩqueregu ya iirire öaro beyemasipehobea ya sã. ⁴ Öpa arĩ pepia yuhũ. “Mari Opũ yure İgu apidiro dopa İgu gamerire iipehorabu yuhũ,” arĩ pepia yuhũ. Yu öpa arĩ pepiquerecũ ta yũ arĩ pepiri diaye arĩbiriboca. Mari Opũ Cristo dihta yũ iiricũrire İagu öaro masimi yũ İgu yare öaro iicũ. ⁵ Eropirã mari Opũ İgu dujariboro core masare erã iirare arĩ werewuabiricãque. İgu dujarigu masa erã iirare iribojegue gajirã erã masibirare Cristo deyoro moagucumi. Eropirã mari iidiarare İgu masicũ iigucumi gajirã masare. Irisubu ta mari nũcere İgu yare mari iidiro dopa ta “Irire öaro iibabũ,” arĩgucumi Goãmũ marire.

⁶ Yu acawererã, yuhũ Apolo mera gua arĩricũrire werebu yuhũ muare buhebu. Eropa werebu Goãmũ İgu yare İgu gojarapũ İgu arĩdirore mua tarinugabiriboro dopa. Eropa tarinugabirã arĩrã mua yujurãyerire umuobiricãque. Mua eropa iibirã arĩtarinugadiarã iiaa. ⁷ Mua eropa iibiriboro dopa gua iirare werebu muare. Mua eropa tarinugadiaquererã muapu gajirã tauro öarã arĩbeaa mua. Goãmũ muare İgu ora dihtare opaa mua. Eropirã İgu muare masicũ iira dihtare masia mua. ¿Mua gamero oparã, mua bocatiuro masirã arĩbiriquererã ta, duhpirã “Masipehorã ähraa,” arĩri mua? Eropa arĩrã “Goãmũ guare obirimi. Eropigu guare masicũ iibirimi,” arĩdiarã dopa ta iiaa mua.

⁸ Muapu “Arĩpehrerire opaa gua. Guare ñehe duhyabeea,” arĩraa mua. Eropirã gua mua pohro arĩbiricũ öpa arĩ pepiraa: “Oparã iro dopa masirã ähraa gua,” arĩ pepiraa mua. Diaye ta oparã iro dopa mua masipehorã arĩcũ muare öatariaboya. Mua eropa arĩcũ mua mera gua sã oparã iro dopa masipehorã arĩboya. “Masirã ähraa gua,” arĩ pepirã, ¿öaro arĩ pepiri mua? Öaro pepibeeaa yũ İacũ. ⁹ Öpa arĩ pepia yũ tamera: Goãmũ guare Jesu İgu yare buhedore apinirã doca maja curu apimi guare. I yeba majarã masa, anyua sã gua ñero taricũ guare İamurima eropa wacũ. ¹⁰ Cristo yare gua buhecũ İarã, “Pee masibirã ährima,” arĩma masa

guare. ¿Muapu Cristo yare òaro pee masirã àhriri mua? “Turabirã, bu àrĩrã àhrima,” arĩma masa guare. ¿Muapu òaro turarã àhriri mua? Mua basire umupeoa. Guapure masa ne umupeobeamã. ¹¹ Guapu dohpaguere ñero tarirã, oaboarã, ñemesiburã, ñeri suhricurã, wiri moorã àhraa. Eropirã guare gajirã umupeobirã, guare pabiramurima. ¹² Eropirã gua buheniguiquererã teboricurã àrĩrã gua àrĩburi majare gua baburi sãre mohmea. Eropirã gajirã guare erã ñero wereniguiquerecũ ta guapu Goãmure òaro erã àrĩburire serēbasaa. Eropa iirã gajirã guare ñero iimorã erã nuruquerecũ ta eropa pepicãa gua. ¹³ Eropirã “Ñero iirã àhrima,” guare erã werewuaquerecũ ta guapu erãre òaro wereniguia erã òaro àrĩburire. Eropirã erã burigã dohoma guare. Iribojegue eropa iinugama. Dohpague sãre muraro ta iima guare.

¹⁴⁻¹⁵ Muare òari buherire buhemuhtabu. Eropa buhecũ mua peecũ Jesucristo muare igu yarã wacũ iidi arĩmi. Eropa muare buhedigu mua pagu iro dopa ta wahabu yuhu. Bajarã muare Cristo yare buherã erã àrĩquerecũ ta muare buhemuhtagu yuhu yujugu ta àhraa. Eropigu yuhu yujugu ta mua pagu iro dopa àhraa. Eropigu muare guhyasĩricũ iibu ire gojagu iibeaa. Yu porã yu mahirãre muare werebu ire gojaa yuhu. ¹⁶ Eropigu ire turaro muare werebu iiaa yuhu. Yure ñhacũque mua sã.

¹⁷ Mua eropa iicũ gamegu mua pohro Timoteore obeogu iiaa. Igu yu magu iro dopa yu mahigu mari Opu Jesucristo yagu àhrimi. Eropigu Cristo gamero dopa iiniguigu àhrimi igu. Timoteo mua pohro ejagu Jesucristo yare yu iidiro dopa muare guñacũ iigucumi mua sã eropa iiboro dopa. Jesu yarã pohrogu noho wagu Jesucristo yare erã iiburire buheniguiçãa. ¹⁸ Yujurãyeri mua mera majarã oparã àrĩdiarã òpa arãñorã: “Pablo mari pohroguere arisome,” arĩ pepirañorã erã. ¹⁹ Goãmu gamecũ mua pohrogu dohparagã ta ejaguca. Eropa ejagu erã oparã àrĩdiarã mua mera majarã erã eropa arĩrare ñagura. Eropigu erã Goãmu turari opacũ ñagura yuhu. ²⁰ Goãmu mari Opu àhrimi. Mari arĩ weretarinugaquerecũ ta igu yare mari iibiricũ mari wereniguiiri duhpiburi àrĩbeaa. Igu turari mera igu gamero dopa iicũ gahmemi. ²¹ ¿Mua pohrogu mua yu dipuwaja dipuwaja moagu yu wacũ gahmeri mua yure? ¿O mua òaro iira waja mucubiriri mera waro gahmeri mua yure?

5

Corinto majarã erã ñeri iirare werepu Pablo

¹ Gajirã òpa arĩ querecũma guare: Yujugu mua mera majagu igu buamore ta marapocu waicumi. Eropa ta arĩ werema masa guare. Erã eroparicũ peemaria wahabu. Gajirãpu Goãmure masibirã àrĩquerecũ erãpu eropa iirã àrĩbeama. ² Mua mera majagu igu eropa iiquerecũ ta muapu “Òatariarã àhraa gua,” arĩ pepiraa. ¿Duhpirã igu eropa ñeri iirare masiquerecũ ta guhyasĩrisãbeari mua igure? Eropa ñero igure mua Jesu yarã mera majagure cóacãque mua. ³⁻⁴ Yuhu mua mera àrĩbiriqureregu ta yu guñari mera mua mera àrĩgu iro dopa àhraa yuhu. Eropigu mua mera àrĩgu yu àrĩbodiro dopa ta ñero igure igu eropa ñero iira dipuwaja, dipuwaja moadoretuhaa yuhu. Jesucristo igu dorero mera ta eropa iidorea. Eropa mua Jesu yarã gamenererã yu guñabeori merague yuhu mua mera àrĩcũ, mari Opu Jesu igu turari mera ⁵ igure ñero igure cóaque. Watĩ mera igu ñero tariborore apique. Eropa ta cóaque igure igu

ñero tariri mera ñerire ïgu ñaribejarire ïgu gohrotoboro dopa. Mari Opu Jesucristo ïgu dujaririna ñero iidigu maru Jesu mera ïgu ðaro tariboro dopa dohpaguere ïgure eropa apinique, araa yuhu.

⁶ “Óaro áhraa gua,” mua aríquererã ta ñero iirã iica mua. Ñero iigu ïgu ñerire mua eropa íacãrã, árípehreri ñeri muare ii íhmucú árípehrerã ñero iirãca. Eropiro árípehreri ñeri sehya wa mua áríroque. Panre bugacũ iiri pohga ðaro seyanugajaro dopa ta iri ñeri ðaro seyaroca muaguere. ¿Irire masibeari mua? ⁷ Yu acawererã judio masa Pascua áricũ ovejare wejêmurima erã ñeri iira dipuwajare Goãmure cãdijidorerã. Oveja sîridiro dopa ta Cristo mari ñeri dipuwajare sîribasadi árîmi. ïgu eropa sîribasarañe mera mua ñerire cõãnirã áhraa. Irire guñarã muapu ñero iigure mua mera majagure cõãque ñeri mua watope mariboro dopa. ⁸ Iribojegue ñerire íhacú iinirã árîribu mari. Eropirã dohpaguere mari ñerire cõãnirã árîrã mari ñerire ñaribejaro mariro, ñero iiro mariro árîrã. Iribojegue mari ñerire iimuridiro dopa ta iibiricãrã. Eropirã diaye maja ðaro wereniguiiri mera, ðaro iiricari mera árîrã pare.

⁹ Muare yu gojabeorapũre nome mera ñero iirã, ñerire iimajiñajarã mera ne wapicudorebiriribu. ¹⁰ Eropa arígu “Jesu yarã árîbirã mera árîbiricãque,” arîbiribu. Eropigu “Nome mera ñero iirã mera, gajinore turaro gamenemocãrã mera, yajaricurã mera, goãmarã wéanirãre umupeorã mera árîbita,” aríbeaa. I yebare eropa árîrã mariro Jesure gamebirã mariro mari dihta árîmasibeeaa. Árípehrerogue áhriima erãpu ta. ¹¹ Eropigu muare gojabeogu ðpa arî doreribu: “Mua mera majarã Jesu yarãpu erãpu ñerire iicú íha erãpure wapicubiricãque,” arî goja doreribu. Eropirã mua mera majagu “Jesu yagu áhraa,” ïgu arígu áríqueregu ta nome mera ñero iigu, gajinore turaro gamenemogu, goãmarã wéanirãre umupeogu, ñero quere moa coregu, merericugu, yajaricugu ïgu áricú ïgupure wapicubiricãque. Eropirã eropa iigu mera ne babiricãque. ¹²⁻¹³ Jesu yarã árîbirãpure Goãmuru dipuwaja moagucumi. Eropigu Jesu yarã árîbirãre erã ñero iiri dipuwaja moadoregu áríbeaa yuhu. Eropa iibiricãro gahmea yure. Eropa aríquerecú ta mari Jesu yarã watope mari ñero iira dipuwajare moaro gahmea mari basire. Eropirã mua Jesu yarãpu mua mera gamenererã mua basi mua iirare íha masiro gahmea muare. Eropirã yujugu mua mera majagu ïgu ñero iicú íarã ïgure dipuwaja moadorero gahmea muare. Eropirã Goãmuru yare gojarapũgue arîdiro dopa muapu mua mera majagure ñero iigure dipuwaja moaro dopa iirã ïgure cõãque.

6

Jesu yarãre weresãrare werepu Pablo

¹ ¿Mua basi game duyasorire duhpirã Jesu yarã árîbirã pohroque amudorerã wahari mua? Jesu yarãre mua mera majarãre weresãdiarã gajirã Jesu yarãre irire wereró gahmea muare. Eropirã Jesu yarãpu amubasaporo. ² Pehrerinu áricú mari Jesu yarãpu mari árípehrerã masa erã iirare beyerãca. ¿Irire masibeari mua? Eropirã pehrerinu áricú masa árípehrerãre beyemorã árîrã, dohpague sãre amumasia mari. Eropirã dohpague gajiropa wacú sãre amumasia mari. ³ Anyua erã iira sãre beyerãca mari. ¿Irire masibeari mua? Mari eropa anyuare beyemorã árîrã diaye ta dohpague sãre Jesu yarã erã iirare íarã beyemasica mari.

4 ¿Eropirā duhpirā mua mera majarāre weresādiarā Jesure gamebirā, “Bu árirā” mua arirā pohrogue amudorerā wahari mua? 5 Ire arigu iiaa mua guhyasiuro mua tariborore. Mua duyasorire werebu ōaro masigu áricumi mua watopere, yu arāa. 6 Igu eropa áriquerēcū ta mua mera majagu Jesu yagu gajigu Igu acaweregure weresādiagu Jesu yarā árībirāre beyedoregu wahami.

7 Masare beyegu pohrogue mua acawererāre weresārā Goāmu gameripure tarinugarā iiaa mua. Gajigu mua mera majagu muare ñero Igu iicū eropa íacāboaya mua. Jesu yarā árībirāre mua weresābiriborore mua acaweregure muare Igu ñero iirare mua eropa íacācū ōatariaboaya. Jesu yagu muare Igu yajacū ígure mua weresāboro core Igu muare yajarare mua eropa íacācū ōaboaya. 8 Mua eropiibeaa. Gajirāre ñero iirā áhrra mua sã. Yajarā ta áhrra mua sã. Jesu yarā mua acawererā erā árīquerēcū ta erāre ñero iirā, yajarā iiaa mua.

9 Eropa iirā Goāmu Igu opu árīroguere wamasibeama. ¿Irire masibeari mua? Pee wisibiricāque mua. Ōpa iirā Goāmu pohroguere wasome: Gajirā nome mera ñero iirā, goāmarā wéanirāre umupeorā, gajigu marapure marapocurā, gajigu marapu mera ñero iirā nome, uma seyaro erā dupuri mera ñero iirā, nome sã eropa ta iirā, 10 yajarā, gajinore turaro gamenemorā, merericurā, gajirā masare ñero quere moa corerā, guyari mera yajarā ne Goāmu Igu opu árīroguere wamasibeama. 11 Iribojeguere mua yujurāyeri eropa iirā árīyoro. Eropa iinirā mua árīquerēcū ta dohpaguere mua ñero iirare cóātuhami Jesucristopu. Eropa Igu taunirā mua áricū Igu yarā árīmorā iimi Goāmu muare. Eropa iigu “Ōarā áhrrima,” arī íhami Igu muare. Eropa ta iimi muare mari Opu Jesucristo mera, Espiritu Santo mera.

Mari dupu ōarire iiburi dupu árīro iiaa, arī gojañumi Pablo

12 “Goāmu iidorebirira árīpehreri iimasiri áhrra yare,” arīmi Pablo,” arāa mua yare. Yu iimasipehoqueregu ta, yu iiri yare gajirā sãre itamubiricū íha irire iibeaa. Eropa ta árīpehreri iimasiri áhrra yare. Eropa iimasiqueregu ta yujuyerisuburi irire eropa ipogu duhumasibiriboca, arīgu irire iisome yuh. 13 Mari bari mari paru maja árīburi ta áhrra. Eropiro “Mari paru bari dicuburidiru paru áhrra,” arāa mua yujurāyeri. Mua eropa árīquerēcū ta puhru Goāmupu mari barire mari paru sãre iri pehrea wacū iigacumi. Eropirā mua yujurāyeri “Mari dupupu mari uaribejari iiburi dupu áhrra,” arīraa mua. Eropa árībeaa. Mari dupu uaribejari iiburi dupu árībeaa. Mari dupupu mari Opu ya árīburire iiburi dupu áhrra. Eropigu mari Opu mari mera áhrrimi mari Igu yare ōaro iiboro dopa. 14 Eropigu Goāmu Igu turari mera mari Opu Cristo dupu murarore masupu. Eropa ígure masudiro dopa ta mari dupu sãre masugacumi Igu.

15 ¿Mua ya dupu Cristo ya dupu árīri iro dopa áricū masibeari mua? ¿Cristo ya dupu árīri iro dopa árīrā nomeo ñero iiricugo mera mari áricū ōhari mua pepicū? Ōabirigohracāca. 16 Ñego mera yujugu igo mera áricū Igu dupupu igo ya dupu mera árīro yuju dupu iro dopa ta áhrra. ¿Irire masibeari mua? Eropa arī gojara áhrra Goāmu yare erā gojarapugue. Ōpa arāa: “Nomeo umu mera árīrā perā árīquererā yuju dupu iro dopa wahama,” arī gojamuriñumi. 17 Mari Opu Igu yarā mera áhrrimi. Eropigu

yujugu ĩgu mari Opu mera perã árĳquererã yujugu iro dopa ährima erã guñari mera.

¹⁸ Eropirã nome mera ñero iirire, uma mera ñero iirire uaribejabiricãque. Irire mua uaribejabiriboro dopa ta irire duhrigã waque. Gaji ñerire mari iira mari dupurire mari goroweobeaa. Nomeo mera ñero iigupu ĩgu dupure ñetariaro goroweomi. ¹⁹ Espiritu Santore marire ohomi Goãmu. Eropigu mari dupu mera wihicumi Espiritu Santo. ¿Irire masibeari mua? Eropirã mua dupu mua ya dupu gohra árĳbeaa. Goãmu ya dupu ähraa. ²⁰ Mua ĩgu yarã árĳmorãre mua ñeri dipuwajare wajayedigo árĳmi Cristo. Eropirã ĩgu yarã árĳrã mua dupu mera Goãmu ĩgu gamero dopa ta iique. Eropa iirã Goãmure umupeorã iiaa mua. Eropirã gajirã sãre ĩgure umupeocã iirã iiaa.

7

Mojoto diririre werepu Pablo

¹ Dohpaguere mua yure serẽpi gojarare yu sã muare yuhrigura. Masu marapo maricũ sãre õhaa yu ĩacũ. ² Iri eropa árĳquerecũ ta ero mua árĳro baja uaribejari ähraa. Eropirã uma erã nucũ nome marapocũporo gajirã nome mera erã ñero iibiriboro dopa. Eropirã nome sã erã nucũ marapocũporo gajirã uma mera erã ñero iibiriboro dopa. ³ Eropigu marapocũgure ĩgu marapore õaro iiro gahmea. Igo marapu sãre eropa ta iiro gahmea. ⁴ Marapocũgo igo dupu iro ya dihta árĳbeaa. Igo marapu ya sã ähraa ĩgu ĩhadiburo dopa. Igo marapu sãre ĩgu dupu ĩgu ya dihta árĳbeaa. ĩgu marapo ya sã ähraa iro ĩhadiburo dopa ta. ⁵ Mua perã árĳburire “ĩibiricãrã,” arĳbita. Gajisubu mua perã Goãmu mera mua wereniguidiarã “I nucũ nuri duhunirã dohpa, Goãmu mera wereniguirã dohpa,” yujuro mera eropa arĳrã duhumasia mua. Mua eropa duhura puhugã mua dipaturi mua eropa árĳniguidiro dopa ta árĳque daja watĩ ñero muare iidorebiriboro dopa. “Gajirã mera ñero iiboca,” arĳrã mua basi duhubita. Mua árĳmuhtadiro dopa ta árĳniguidicãque daja.

⁶ Ire muare dohpague yu arĳrare arĳgu muare dore gohrari mera dorebeaa. Eropa weregu iiaa mua iiburire mua masima õaro. ⁷ “Uma marapocũporo,” arĳquerecũ, árĳpehrerã mua yu iro dopa ta marapo marirã mua árĳcũ õaboaya yure. Mua eropa árĳcũ gamequerecũ ta Goãmu mari árĳpehrerãre yujuropa iimasiburire apibeami. Yujurãyerire marapocũmasiburire marapocũmasiburire apimi Goãmu. Eropigu ĩgu gajirãpũre marapocũmasibiriburire marapocũmasibiriburire apimi.

⁸ Eropigu marapo marirãre, marapu marirãre, wapeweyarãre õpa arãa: Marapo marirã, marapu marirã mua árĳmasirã, yu árĳro dopa árĳcũ õhaa. ⁹ Eropa árĳmasibirã turaro nomere gahmema. Irire turaro uaribejarã diaye ta marapocũcãporo. Nome sã marapocũporo. Mua eropa uaribejarã mua marapocũcũ õapũricãa. Eropiro marapocũcũ sãre õapũricãa.

¹⁰ Mua marapocũrãre, marapocũrã nomere õpa dorea: Yaha doreri gohra árĳbeaa i. Mari Opu Cristo ire doredi árĳmi. Mua nomepu mua marapu sumarãre cóãbiricãque. ¹¹ Mua marapu sumarãre cóãrã, marapu marirã dujaque. Dipaturi mua marapu árĳdigũ mera ahmu õaro árĳbiricũ daja marapu marirã dujaque. Eropirã mua uma sã mua marasã nomere cóãbiricãque.

¹² Eropigu mua sãre gajirã sãre õpa arãa yuhu. Mari Opu ĩgu dorediro árĳbeaa i. Yuhu ĩgu apidigupu õpa arãa muare: Yujurãyeri mua

mera majarā Jesu yarāpu Jesure umupeobirā nomere marapocurā āhraa. Eropigu ōpa arī werea muare: Mua marasā nome mua mera erā dujadiacū erā nomere cōābircāque muapu. ¹³ Eropirā yujurāyeri mua mera majarā nome Jesu yarā nome Jesure umupeobirā mera marapucurā nome āhraa. Mua marapu sumarā mua mera erā dujadiacū erāre cōābircāque. ¹⁴ Mua marapu sumarā Jesure umupeobirā erā arīquerecū ta Jesu yarā nomere erā marapocucū, Goāmū ōarā ūma iro dopa īhami erāre. Eropirā mua ūmapu Jesu yarā mua arīcū mua marasā nome Jesure umupeobirā nome arībocoma. Erā eropa arīquerecū ta mua mera erā nome marapucucū Goāmū ōarā nome iro dopa īhami erāre. Īgu eropa īabircū mua porā Jesure umupeobirā porā iro dopa arīboñuma. Eropigu mua porā säre ōarā iro dopa īhami Goāmū. ¹⁵ Eropirā mua ūmapure mua marasā nome Jesure umupeobirā nome erāpu muare cōācū ōaroca. Mua nome säre mua marapu sumarā Jesure umupeobirā erāpu muare cōācū ōaroca. Mari ōaro dujacū gahmemi Goāmū. Eropirā erā eropa cōādiacū “Yū mera dujaque,” erāre arīdorebeamī Goāmū. Eropirā mua erā marasā nome erā marapu sumarā arībeaa pare. ¹⁶ Mua ūma mua marasā nome mua mera dujaquerecū erā peamegue wabiriborore Jesure umupeocū iimasibiriboca. Mua nome säre eropa ta Jesucristore umupeocū iimasibiriboca mua marapu sumarāre. Eropirā erā muare cōādiacū ōaroca.

¹⁷ Ōpa ta iiro gahmea muare: Arīpehrerā mua mari Opū Cristo muare Īgu arīdorero dopa ta arīque. Goāmū muare Īgu apirare iique mua. Irire arīpehrero Jesu yarā gamenererāre eropa doreniguica yūhū. ¹⁸ Jesu yarā mua arīboro core circuncisión iinirā gasiro mero wiri aīnirā arīrā eropa ta dujaque. Eropirā Jesu yarā mua arīboro core gasiro merogā wiri aībirinirā arīrā mua arīro dopa ta dujaque. ¹⁹ Dohpaguere gasiro mero wiri aīnirā mua arīcū duhpiburi arībeaa. Irire iibirinirā mua arīcū säre gajiropa wasome. Goāmū dorere mari iicūpure iri tamera ōhaa. ²⁰ Eropirā Goāmū Jesu yarā muare Īgu aīcū irisubu mua arīmūhtadiro dopa ta dujaque.

²¹ Goāmū muare Jesu yarā aīboro core gajirā pohro majarā mua arīcū ōaroca. Eropa ta dujanique. Mua Opū Īgu muare wiudiacū wirique mua. Mua wiricū säre ōaroca muare. ²² Ōpa arī pepique mua: “Yūhū masū pohro majagu wiribiriqueregu ta dohpaguere Jesu yagu arīgu, Īgu wiudigu iro dopa āhraa Īgu yare iiboro dopa,” arī pepique. Eropa ta gajirā Goāmū Jesu yarāre aīcū masa pohro majarā mua arībiriquererā ōpa arī pepique: “Dohpaguere Jesu pohro majagu āhraa yūhū,” arī pepique. ²³ Mari űeri dipuwajare mari Īgu yarā arīmorāre wajayetuhadi arīmi Cristo. Eropirā Īgu dorero dopa iique. Mua iiburire masa dorebircāporo. ²⁴ Eropirā yū acawererā, Jesu yarā arīmorā Goāmū muare Īgu aīcū irisubu mua arīmūhtadiro dopa ta dujaque. Eropa dujarā Goāmū mera ōaro arīque.

²⁵ Dohpaguere marapo marirāre, marapu marirā säre werediaa muare. Yū wereburi mari Opū weredorediro gohra arībeaa. Eropa arībiriquerecū yūhū Īgu mojomoro īadigū, Īgu itamudigū arīcū mua yū wererire ōaro mera peerāca. Ōpa werea muare. ²⁶ Dohpaguere mari űero tarirā iica. Eropirā mua arīro dopa mua dujacū ōhaa yūre. ²⁷ Eropirā muapu marapocurā, marapucurā säre eropa ta dujaque. Erāre cōābircāque. Marapo marirā, marapu marirā säre mua arīrā eropa

ta dujaque. Marapore o marapure amabita. ²⁸ Eropa yuhu muare ariquerecu "Marapocugura," aricu gajiropa aribeaa umare. Eropira mua nome sare marapucudiacu oaroca. Opa ahraa. Irisubu nero taririsubu marapocura, marapucura muare teboricuburi dujaroca. Eropigu muare eropa teboricuri arigu, marapo marira, marapu marira dujaque, araa yuhu.

²⁹ Yu acawererã, eropa arigu opa aridiagu iiaa. Mari nero tariboro meroga duhyaa. Eropira dohpaguere marapo marira Goamu yare era oaro mohmemasiro dopa ta, oaro mohmero gahmea marapocura sare. Eropira marapucura nome sare eropa ta Goamu yare oaro mohmero gahmea.

³⁰ Eropira mari nehamere orequerera Goamu yare mohmeboropure guñaro gahmea. Bosenu arira mucubiriquerera Goamu yare mohmeboropure guñaro gahmea. Mari asurare opaquerera irire guñabiricaro gahmea. Goamu yare mohmero gahmea. ³¹ I yeba dohpague ariro dopa pehrero iiaa. Eropira i yeba majare iiburire wuaro guñabiricaro gahmea.

³² Mua gajinore wuaro mua guñaricucu gamebeaa yuhu. Marapo marigu Jesu yagu arigu mari Opu Jesu yare igu gamerire guñaniguimi.

³³ Marapocuguru Jesu yagu i yeba maja sare igu marapo gamerire guñami. ³⁴ Eropigu peñe guñami. Marapu marigo mari Opu Jesu yare iiburire guñaniguimo. Eropa guñago igo igo dupu, igo pepiri mera ta mari Opu yago oaro aridiamo. Marapucuguru i yeba majare igo marapu gameripure baringa iidiamo.

³⁵ Ire muare arigu iiaa muare itamubu. Teboricuri dorerire muare cahmotadiabeaa. Eropa cahmotadiabiriqueregu ta oaro mua iicu gahmea. Eropigu baja guñaricuro mariro Jesu mari Opu igu gameri dihtare mua turaro iidiacu gahmea yuhu.

³⁶ Mua mera majagu igu mago igo buro wacu igu marapucudoreporo igu igore. "Igre oaro iibeaa. Marapucuro gahmea igore," ar pepigu igu aridiro dopa ta nomesoporo. Eropigo igo marapucumasimo. Eropa igore marapucudoregu nero iibeami. ³⁷ Gajiguru igu magore "Marapucubiricaporo," aribocumi. Yujugu umure wereyudiro mariro, yujuñe ta pepigu arigu, "Igre marapucubiricaporo," arigu oaro iimi.

³⁸ Eropigo igu mago marapucudoredigo oaro wagocumo. Igu mago marapucudorebiridiguru gajigo tauro oaro wagocumo dohpaguere nero taririsubu aricu.

³⁹ Marapucugore igo marapu mera ariniguicadoremi Goamu. Igo marapu sirira puhru igo gajigu mera igo gamegu mera marapucumasimo daja. Jesure umupeogure marapucuro gahmea igore. ⁴⁰ Igo marapu marigo dujago tauro oaro mucubirigo arigocumo igo. Eropa ta ar pepia yuru. Eropa arigu Espiritu Santo igu gamero dopa ta arigu iiaa.

8

Goamarã weanirãre erã umupeomorã waimurã wejẽ erã apira barire Jesu yarã asũ baburire werepu Pablo

1-4 "Gua tamera oaro masia," ar pepira mua. Eropa ar pepira mua masiri mera gajirãre masitarinugadiarã iiaa mua. Eropa iira gajirãre itamubeaa mua. Gajirãre umupeori mera mahirãpu erãre itamua erã Jesucristore umupeonemoboro dopa. "Masipehocãa yuhu," aribiricaro gahmea marire. Eropa arira oaro masibeaa mari. Eropira

“Ōaro masinibirica dohpa,” arī pepiro gahmea marire. Mari Goāmure mahirāpure marire masicū iimi.

Eropigu goāmarā wéanirāre umupeorā erā pohro apira barire “¿Mari bamasicuri?” arī weregura muare: Goāmarā wéanirā ne duhpimorā árībeama. Diaye ta erā wéanirāre ne síporāri mara. Eropigu Goāmu yujuḡu ta āhrimi. Gajirā goāmarā marima. Ire mari masia. ⁵ Gajirā masa ōpa arīma. “Mari goāmarā bajarā āhrima. Erā mari oparā āhrima,” arī pepirima. “Ūmusiguere, i yeba sāre goāmarā āhrima,” erā arīquerecū ta maripure yujuḡu ta Goāmu gohra āhrimi. ⁶ Īḡu mari Paḡu árīpehrerāre, árīpehrerire árīdoredigu āhrimi. Eropirā Īḡu ya árīburire iimorā āhraa mari. Eropigu mari Opu Jesucristo yujuḡu ta āhrimi. Īḡu árīpehrerire mari Paḡure ĩhacūnugubasadigu āhrimi. Īḡu yarā árīmorāre iipū Īḡu marire. Eropirā Īḡu mera eropa árīniguirāca mari.

⁷ Yu arīdiro dopa ta eropa arīquerecū gajirā Jesu yarā irire masibeama. Iribojegue erā goāmarā wéanirāre umupeorā “Oā goāmarā ojocarirā āhrima,” arī pepimuriñorā. Irisubuguere eropa arīponirā árīrā dohpague sāre erā wéanirāre erā apira barire barā “Goāmarāre umupeorā iiaa,” arī pepirima. Eropirā iri barire barā, “Mari ñero iirā iiaa,” arī pepirima ōaro masibirā. Eropirā “Ñerire iirā iiaa,” arī pepiquererā erā irire iicū erā pepiri gajiropa waca. ⁸ Eropigu ōpa arī werea muare: Iri barire mari bacū mari babiricū sāre Goāmu mera ōaro árīcū iibeaa marire. Irire mari babirā ñero iibeaa. Mari irire barā sā gajirā tauro ōarā árībeaa mari, arī werea yuhū. ⁹⁻¹⁰ Eropu muare werequerecū ōaro iique mua. Iri barire barā mua árīcū gajirā Jesu yarā muare ĩabocoma. Muare ĩarāpū ōaro masinibirā “Iri barire barā Goāmure umupeobeama,” arī pepirā árīrācoma. Eropu arī pepiquererā muare ĩhacū erā sā babocoma. Iri barire eropa barā “Ñero iirā iiaa mari,” arī pepirācoma erā. Erā eropa arī pepicū erāpure ñero iicū iiboca mua. Eropirā ōaro iique. ¹¹ Muapu masirā árīrā, “Gua iri barire gua bacū ōaroca,” mua arī pepirā árīrā gajirā ōaro masibirinirāre ñero iicū iiboca mua muare erā ĩhacūcū. Erā ya árīburi sāre síridi árīmi Cristo. Eropirā mua bari mera mua Cristo yarāre mua acawererāre ñero iicū iirā erāre goroweoboca mua. ¹² Ōaro masibirāre mua acawererāre erā arī pepiro dopa iibiricū erā pepiri gajiropa wacū iiboca mua. Eropu iirā Cristo sāre ñero iirā iiaa mua. ¹³ Eropigu wéanirāre erā ora barire yu bagu yu acaweregure ñero iicū iiboca yuhū. Jesu yarā erā ñero iicū gamebeaa. Eropigu yuhū “¿Erāre ñero iicū iiri?” arīḡu, iri barire ne dipaturi basome yuhū.

9

Pablo Jesu ĩḡu apidigu ĩḡu árīrare werepu

¹ Jesu ĩḡu yare buhedore ĩḡu apidigu āhraa. Eropigu gajirā ĩḡu apinirā erā iiro dopa ta iimasia yu sā. Jesu ĩḡu apidigu ta āhraa yu sā. Mari Opu Jesure ĩadigu ta āhraa yu sā. Eropirā Jesu yare yu buhecū muapu irire ōaro peenirā árīrā ĩḡu yarā wahabu mua. Mua eropa ĩḡu yarā wara puhru Jesu ĩḡu apidigu yu árīrare masituhabu mua. ² Gajirā yure werewuarā “Īḡu Jesu ĩḡu apidigu árībeami,” arībocoma. Erā eropa arīquerecū ta muapu eropa arīmasibeaa. Muare yu buhera puhru Jesu yarā warā, “Jesu ĩḡu apidigu āhrimi,” arī yure masituhaa mua. Eropirā gajirā erā werewuquerecū ta muapu ĩḡu apidigu yu árīricurire mua masia.

³ Yüre werewuaräre òpa ta arĩ yuhrigura. ⁴ Muare yu buheri waja yu baburire, yu ihriburire yüre oro gahmea muare. ⁵ ¿Eropigu marapocugu arĩgu yu marapo Jesu yago igo arĩcũ igo mera aĩ curimasibiribocuri yuhu mua pepicũ? Gajirã Jesu ïgu apinirã, Jesu pagu porã, Pedro sã erã marasã nome mera erã curiro dopa ta yu sã curimasiboaya. Yu eropa curicũ yu marapocugu arĩcũ, igo sãre barire oboaya mua. ⁶ Yuhu Bernabé mera muare òari buherire gua buhequerecũ ta guare ne gajinore obeaa mua. Eropirã gua basi ta gua baburire mohme wajatabu gua. Gajirã Jesu apinirãpure erã buheri waja oayoro mua. ¿Gua dihta eropa buherã, waja mariro buhero gahmeri mua pepicũ? ⁷ Yujugu surara ïgu mohmecũ ïgu oparã ïgu arĩburire wajayemurima. ïgu basi wajayebeamĩ. Barire otegu sã ïgu otera ducacucũ irire ta tea aĩ bamasimi. Eropigu ovejare ïhadibugu ïgu ejorã apĩcore aĩmasimi ihribu ïgu sã. ⁸ Eropa arĩgu masa erã doreri dihtare muare werebeaa. Goãmu ïgu dorerigüe ïgu arĩra sãre muare weregu iiaa. ⁹ ïgu dorerire erã gojarapũgue òpa arĩ werea: “Wecu trigo yerire ïgu guburi mera ïgu suhri wearisubũ ïgu badiacũ ïgu disirore cãhmotabiricãque,” arĩyoro Moise dorerigüe. Goãmu eropa doregu wecuare ïhadiburire arĩgu iibiriñumi. ¹⁰ Eropa doregu guare Goãmu yare buherãre itamudorerore weregu iinũmi marire buhebu. Pohere séanirã sã iri ducare aĩnirã sã erã mohmera puhũ, ducacurisubũ iri dũca wajataborore cohrema. Eropa mohmerãre barire oro gahmea marire. ¹¹ Muare Goãmu ya buherire òari buherire buhebu gua. ¿Gua eropa buheri waja muapure guare barire obiro gahmeri mua pepicũ? Oro gahmea muare. Mua ocũ òaboaya guare. Eropa arĩquerecũ mua obirimuribu guare. ¹² Eropa guare obirã arĩquererã ta gajirã buherã muare irire odorecũ mua erãpure ohayoro. Erã muare odorecũ guapu erã tauro odoremāsiboaya muare turaro gua buheri waja.

Eropa dorebonirã arĩquererã ta guapu “Guare oque,” ne arĩbiribũ. “Cristo ya buherire gamebiribocoma gua dorecũ,” arĩrã guare duhuayquerecũ ta muare ne odorebiribu. ¹³ Masa Goãmure umupeorã Goãmu wihigüe bari aĩ apima. I wihi mohmerã iri barire aĩ bahama. Eropirã Goãmure erã umupeori mesa pohro mohmerã waibugure erã soedigüre masa erã aĩ apidigüre merogã aĩ bahama erã sã. ¿Irire masibeari mua? ¹⁴ Eropa erã iidiro dopa ta òari buherire buherãre erã buhera waja oro gahmea erã baburire. Eropa ta iidorepu mari Opu Jesu. ¹⁵ Eropigu muare serëbodi arĩqueregu ta yuhu gajinore ne serëbiribu muare. Eropigu ire dohpaguere gojagu gajinore waja gamebu gojagu iibeaa. Muare ne waja seadiabeaa. Sĩribu arĩqueregu ne waja gamesome yuhu muare. Waja mariro buhegu suaa. Eropigu muare iri buhera waja ne wajata basome.

¹⁶ Òari buherire buhedoregu apimi yüre Goãmu. Irire buheri masu arĩgu tiiaa yuhu. Òari buherire buhebigu ñero waboaya yuhu. Eropigu iri buherire buhegu “Gajirã masitarinũgagu ãhraa,” arĩbodigu ne arĩbeaa yuhu. ¹⁷ Òari buherire yu gamero buhegu yu buheri waja wajaseaboaya yuhu. Yu gamero buhebeaa. Goãmu ïgu yare buhedoregu apimi yüre. ¹⁸ Òari buherire buhegu muare yu buhera waja serëmasiboaya yuhu. Eropa serëmasiqueregu ne gajinore serëbigu waja mariro iri buherire buhea muare. Yuhu eropa iigu arĩgu “Òaro wajatagũca Goãmu mera,” arãa. Iri ta ãhraa yu wãjatari.

¹⁹ Eropigu yuhu masare buhegu erã yu buherire peediacũ òpa iigu iiaa

Jesu yarã erã waboro dopa. Ne masa pohro majagu árïbiriqueregu ta árïpeherrerã pohro majagu iro dopa iiaa yũhũ erã yũ buherire peediacũ iigu. ²⁰ Eropigu yũ acawererã judio masa mera árïgu, judio masa iiro dopa ta iiaa yũhũ yũ buherire erã peediacũ iigu. Goãmũ ïgu dorera Moiserẽ ïgu apira yure iri dorebiriquerecũ ta, iri doreri dihtare umupeorã mera árïgu erã dorerire umupeogu iro dopa ta áhrraa yũ sã. Eropa ta iiaa yũhũ erã yũ buherire erã peediacũ iigu Jesu yarã erã waboro dopa. ²¹ Moise dorerire umupeobirã mera árïgu iri dorerire umupeobigu iro dopa ta iiaa. Yũ buherire erã peediacũ eropa ta iigu iiaa yũhũ erã Jesu yarã erã waboro dopa. Eropa iiqueregu Goãmũ dorerire umupeoniguia. Cristo dorerire iiaa. ²² Eropigu ðaro masibirã mera árïgu erã iro dopa ta áhrraa. "Masipehogu áhrraa," ne arïbeaa yũhũ erãre. Eropa ta iiaa yũhũ erã sã Jesu yarã erã waboro dopa. Eropigu árïpeherrerã masa erã árïricuro dopa ta iiaa yũhũ erãre yũ buherire peediacũ iigu. Yujurãyeri Jesu taurã erã waboro dopa iiaa. ²³ Eropa iiaa ðari buherire árïpeherrerã erã ðaro peeburire. Erã eropa peera puhru Jesucristo erãre peamegue wabonirãre taumi. Eropigu yũhũ erã mera ðaro mucubiriborore eropa iiaa.

²⁴ Mũare werenigui queori mera ðpa werea. Omabirarã erã omarã árïpeherrerã omama. Erã eropa omapehrequerecũ ta burigã omaturagupu omajamũhtami. Eropa ejamũhtagu wajatami. Eropirã erã burigã omadiro dopa ta mua sã Goãmũ gamerire burigã iique mua wajataboro dopa. ²⁵ Árïpeherrerã omamorãpu yũ dupure gajiropa iiri arĩrã gajinore duhucãma erã omaboro core. Eropa ta iima erã pũri berore erã wajataboro dopa. Iri pũri bero erã dipuru peyama masa erã wajatarare ïaboro dopa. Eropiro erã eropa ii erã wajatara bero mata pehrea wahaa. Mari sã Goãmũ yare ðaro buhemorã gajinore duhucãrã mari wajataboro dopa. Iri mari wajatari tamera ne pehrebeaa. ²⁶ Eropigu omabiragu ïgu noho gamero omaro dopa iibeaa yũpu. Yũ gamero iimaacãbeaa. Goãmũ gamerire masigu iiaa gajirãre itamuboro dopa. ²⁷ Eropigu yũ gamero dopa iibeaa. Yũ uribejari yure dorebeaa. Masa erã Goãmũ mera taricũ itamuburi dihtare iiaa. Eropa iibigu gajirãre Goãmũ yare buhedigu yũ árïquerecũ ta Goãmũ yure "Õaro iibu," arïbiribocumi.

10

"Goãmũ áhrimi," erã arĩ goãmarã wéanirãre umupeodorebiripu Pablo

¹ Eropirã yũ acawererã, ire masique mua. Mari ñecu sumarã mura iribojegue majarã árïpeherrerã murague mera Goãmũ árïmuriñumi. ïgu imica curu mera erãre wamũhtañumi. Erã ïgure eropa nurusia wahgãrã wũariya deco diariya waĩcuriya eja ðaro taribuja wañuma. ² Erã árïpeherrerã imica curu doca árïnirã wũariya taribujanirã Moise yarã wañuma. ³ Eropirã erã árïpeherrerã umaro maja dijuri barire bamuriñuma. Goãmũ ïgu orire bamuriñuma. ⁴ Eropa barã erã árïpeherrerã Goãmũ ïgu ori deco sãre ihrimuriñuma. Iribusugũere erã ihriburi decore Goãmũ ïgu apira utãyegue iri decore wiridoreñumi. Erã iri deco ihridiro dopa Cristo iri utãye iro dopa ïgu ta erãre ojocariro odi árïñumi. ïgu erã mera árïmuriñumi. ⁵ Erã eropa wanirã erã árïquerecũ ta erã mera majarã bajarã ñero erã iicũ ïagu Goãmũ erãre ïhasubiriñumi. Eropigu erãre masa marirogue boacũ iñumi Goãmũ.

⁶ Eräre eropa wara marire güisāburi āhraa erā iidiro dopa ta mari ñerire uaribejabiriborore. ⁷ Eropirā goāmarā wéanirāre erā umupeodiro dopa iibita mua. Wecüre erā wéadigüre erā umupeodirore Goāmū yare erā gojarapū werero ōpa arāa: “Masa erā ba doaja ihrituha, wahgānugaja, bosenu iinūma,” arī gojamuriñumi iribojegüre. ⁸ Puhru gajirā erā mera majarā nome mera ñero iinūma. Erā iidiro dopa iibiricāro gahmea marire. Erā eropa ñero iira dipuwaja yujunū ta erā veintitrés mil gohra masa siria wañuma. ⁹ Gajisubugue gajirā erā yujurāyeri Goāmū erā gamero dopa iicū gamerā ōpa igüre arī turiñuma. “Mari Opū itamumasibeami marire,” arīñuma Goāmure turirā. Eropa arī turirā igüre guacū iinūma. Erā iidiro dopa iibiricāro gahmea marire. Erā eropa iira dipuwaja Goāmū eräre añaa mera cūri wejēdoreñumi. ¹⁰ Gajisubū daja erā mera majarā gajirā ñerā erā basi Goāmū iirare duyasocū anyu masare wejēgupa eräre wejēñumi. Eropirā erā iidiro dopa iibiricāro gahmea.

¹¹ Eropa iinūmi Goāmū marire buhebu. Maripu pehrerinu coregā árīrā āhraa. Mari eropa árīrā árīcū iribojegue majarā erā eropa warare Goāmū gojadoreñumi marire güisāgu. ¹² Eropirā muapu “Yu tamera ōaro iiaa yuhū,” arī pepirā árīrā ōaro iique ñerire iiri arīrā. ¹³ Mari árīpehrerā yujugu duhyaro mariro yujuyerisubiri ñerire guñaa. Eropa guñarā iri ñerire iidiaa. Mari eropa iidiaquerecū ta Goāmū marire itamuniguicāgu iimi. Igu arīdiro dopa iigu āhrimi. Eropigu marire iri ñerire iidiarare tarinugacū itamumi. Marire guñaturacū iimi. Eropa guñaturarā warā iri ñerire iidiasome. Eropirā árīpehreri ñeri iidiaquererā iri ñerire tarinugarāca.

¹⁴ Eropirā mua yu mahirā yure peeque. Ne merogā goāmarā wéanirāre ne umupeobiricāque. ¹⁵ Mua ōaro pee masirā mua árīcū muare werea. Eropirā yu arīri diaye árīcū masique mua. ¹⁶ Mari gamenere bocatīrirā Goāmure “Ōhaa,” arīra puhru iri vino deco dicuripare ihrira mari. Eropa ihrirā “Cristo mari ya ñero iira dipuwajare Igu di cóara mera Igu mera árīrā āhraa mari,” arī masia. Eropirā panrure mari Cristo yarā nuha barā iiaa mari. Eropa barā “Mari ya árīburire Igu dupu crusague sīrira mera mari Igu mera árīrā yuju dupu iro dopa āhraa mari,” arī masia. ¹⁷ Eropirā mari yujuru panrure nuha baro dopa árīpehrerā mari Cristo yarā yuju dupu iro dopa āhraa. Eropirā yuju curu ta āhraa.

¹⁸ Moise dorerire iirā erā iirire guñaque mua. Goāmū wihigue erā waibugure wejē soema Goāmure umupeomorā. Erā eropa wejē soera puhru erā soedigure bahama. Eropa barā yuju curu ta Goāmū yarā árīrā ta iima. ¹⁹ Ōpa ta arīgu goāmarā wéanirā diaye āhrima, arībeaa. Goāmā marima, arāa. Eropirā goāmāre wéanirā eropáricārā iima. Eropiro goāmarā wéanirā pohrogue erā apira baripu bu gohra ta āhraa. Iri bari bacū marire gajiropa iibeaa, arāa yuhū. ²⁰ Yuhū eropa arīqueregu ta iri barire mua bacū gamebirica. Ōpa āhraa iri: Jesu yarā árībirā goāmarā wéanirā pohrogue waibugure wejēburire apirā Goāmure umupeobeama. “Gua goāmāre umupeorā iiaa,” arīrā watēapure umupeorā iima erā. Erā eropa umupeocū erā umupeori wihigue erā mera mua batamurā watēa mera árīrā iro dopa iirā iica mua. Mua eropa iicū tamerare ne gamebeaa. ²¹ Bocatīrirā vino deco dicuripare ihrirā panrure nuha barā “Cristo mera āhraa,” arāa mari. Mari eropa iirā árīrā, watēa yapure ihri,

bamasibeeaa mari. Eropirā goāmarā wéanirā pohro apira barire erāre umupeorā mera iri barire batamumasibeeaa mari.

²² Mari Opu ĩgu yarāre mahimi. Eropirā eropa barā watēa yarā iro dopa iirā ĩgure guacū iirāca. ĩgu guacū mua turabeea ĩgu dipuwaja cāhmotaboro dopa.

Goāmũ ĩgu gameri dihtare iique, arĩ gojañumi Pablo

²³ “Goāmũ iidorebirira árĩpehreri iimasiri āhraa yure,” arĩboca mua. Mua iiri ñeri iri árĩbiriqerēcū ta irire iirā gajirāre itamubiriboca mua. Eropirā Jesure umupeonemocū iibiriboca mua gajirāre. ²⁴ Mari ya ōaro árĩburi dihtare iibiricāro gahmea. Gajirā ya árĩburi sāre ōaro itamuque mua.

²⁵⁻²⁶ Eropirā gajirāre itamuburire ōpa iique: Bari duarogue barire asūrā warā “¿I bari goāmarā wéanirā pohrogue erā apira bari āhriri?” arĩ, serēpiñabicāque. “¿Ñerire iiri?” arĩrā, serēpiñaboca mua. Goāmũ yare gojarapūgue ōpa āhraa: “I yeba árĩri árĩpehreri Goāmũ ya āhraa,” arĩ gojañuma. Eropirā iri barire “Goāmũ badorebirira bari āhraa,” arĩbiricāque.

²⁷ Jesure umupeobigu muare badoregu ĩgu sihucū wadiarā waque. Eropa warā muare ĩgu ejorire baque. “¿I bari goāmarā wéanirā pohro erā apira bari āhriri?” arĩ serēpiñabita. ²⁸ Gajigu ero árĩgu ōpa arĩbocumi muare: “I bari goāmarā wéanirāre erā wejē apira dihi āhraa,” arĩbocumi ĩgua. ĩgu eropa arĩ werēcū iri bari tamerare babita. Muare eropa arĩ weredigū “Iri barire barā ñerire iirā iica,” arĩ pepibocumi. ĩgu eropa arĩ pepibiriboro dopa “Babita,” arāa yuhũ muare. ²⁹ Eropa arĩgu mua ya árĩburire weregū iibeeaa. Muare iri barire weredigū ya árĩburipure arĩgu iiaa muare. Irire mua bacū ĩha muare ĩhacū ĩgu sã babocumi. ĩgupu eropa bagu “Ñero iigu iiaa,” arĩ pepibocumi. Eropirā “¿Eropa iibocuri ĩgu?” arĩ iri barire babita.

“Babita,” yu arĩcū ōpa arĩ yuhriboca mua yure: “¿Dohpa árĩrono gajigu gajiropa pepiri arĩrā gua gamero iimasibiribocuri gua? ³⁰ Goāmure gua ‘Ōhaa,’ gua arĩra puhũ gua bacū gajigu irire gua barare guare weresāmasibeeaa,” arĩboca mua yure. Yupu ōpa yuhria. ³¹ I árĩpehrerire muare yu wererare weregū ōpa arĩgu iiaa muare: Ūmuri nucũ mua mohmerā, barā, ihrirā, árĩpehrerire iirā irire Goāmũ ya árĩburi dihta iique. Eropirā árĩpehrerā masa Goāmure “Ōagu, turagu āhrimi,” erā arĩ umupeoboro dopa iique. ³² Ne mua iiri mera judio masare, judio masa árĩbirāre, Goāmũ yarā sāre goroweobiricāque. ³³ Ōpa iiaa yupu. Masa árĩpehrerā erā suaboro dopa iiaa árĩpehreri mera. Eropigu yu gamero dopa iiniguicābeaa yua. Gajirā masa ya árĩburipure ōaro iiaa. Erāre Jesucristore umupeoborore eropa iiaa. Erā ĩgure umupeora puhũ erāre peamegue wabonirāre taugacumi.

11

¹ Cristo gajirā ya árĩburire árĩpehrerire iimi. Eropirā Cristore yu ĩhacūdiro dopa ta mua sã yu iidiro dopa ta yure ĩhacūque.

Corinto majarā erā gamenererogue nome erā iiborore werepu

² Muare yu árĩpehrerire buherare, buhe turiarare guñapeo waĩcuabu. Eropa guñarā muare yu arĩrare yu iidorediro dopa ta ii waĩcuabu

mua. Eropa iirã ðaro iiaa mua. ³ Dohpaguere i sãre mua masicũ gahmea: Árĩpehrerã ume opu Cristo àhrimi. Eropigu nomeo opu ume àhrimi. Eropigu Cristo opu, Ìgu Pagu Goãmu àhrimi. ⁴ Mua Goãmure umupeo gamenerecũ yujugu Goãmure serẽgu dipuru bua serẽgu ðaro Ìgu opure umupeogu iibeami. Goãmu yare weretaugu sã dipuru buagu Ìgu opure umupeobeami Ìgu sã. Eropirã umapu Goãmure serẽrã dipu buabiricãporo. ⁵ Eropigo nomeopu dipuru buabigo Goãmure serẽgo igo marapure umupeogo iibeamo. Goãmu yare werego sã dipuru buabigo eropa ta igo sã umupeobeamo. Eropirã nomepu Goãmure serẽrã dipu buaporo. Dipuru buabigo igo poarire erã ðaro wuapehodigo iro dopa ta àhrimo igo. ⁶ Dipuru buadiabigore igo poarire seapheporo. “Yu poarire sea wuapehodiabeaa. Guhyasĩriboca,” arĩgo igo dipurure buaporo. ⁷ Mua umapu Goãmu iro dopa oparã àhraa. Eropirã Goãmu ðagu, turagu, Ìgu arĩricarire ìhmuma erãpu. Eropirã erã dipu buabiricãporo. Nomepu “Gua oparã ume àhrima,” arĩ ìhmuma. Eropirã erãpu dipure buaporo. ⁸ Goãmu umure iigu, nomeo ya dupu mera umure iibiriñumi. Nomeopure iigu, ume ya dupu mera igore iinũmi. ⁹ Eropigu umure iigu sã nomeo yagu arĩbure iibiriñumi. Nomeopure iigu ume yago arĩbore iinũmi Goãmu igore. ¹⁰ Eropirã mua Goãmure umupeorã gamenerecũ nome dipure buaporo anyua sã erã ìhasuaboro dopa. Eropa buarã “Uma gua oparã àhrima,” arĩ ìhmurã iima. ¹¹⁻¹² Goãmu nomeore iigu, ume dupu maja mera iinũmi. Dohpaguere uma masa dehyoarã nome dupugue masa dehyoama. Eropiro ume Ìgu arĩmuhtabiricũ nome mariboñuma. Eropi nome maricũ ume sã mariboñuma. Eropirã erã Jesu yarã arĩrã, uma seyaro nome seyaro arĩmasibeama. Goãmupu arĩpehrerire apidi arĩmi. I yeba arĩrĩre i yeba iiburire apidi arĩmi.

¹³ ¿Mua basi dohpa pepiri? ¿Nomeo igo dipuru buabigo, Goãmure igo serẽcũ ðhari mua pepicũ? Òabeaa. ¹⁴ Eropirã ume Ìgu poa ñapo Ìgu ómacũ ìha masa werewuama. Árĩpehrerã masa irire masima. ¹⁵ Nomeopu poa ñapo ómago arĩcũ ðapũrica. Igo poari igo dipuru buari iro dopa ta àhraa. Iri sãre arĩpehrerã masima. ¹⁶ Mua mera majagu ire yu wererare duyasodiagu ðpa masiporo Ìgu: Irire yu arĩdiro dopa ta eropa dihta iiniguicãa mari. Gajirã Jesu yarã sã erã gamenererogue eropa dihta iiniguicãa.

Bocatĩrĩrã erã barisubu goroweoñorã Corinto majarã

¹⁷ Dohpaguere muare gajinore werebu, “Òaro iirã àhraa,” arĩbeaa yuhu muare. Mua gamenererã ðaro iirã iibeaa. Eropirã mua gamenererore goroweorã iiaa. ¹⁸ Òpa arĩ weremuhtagura muare: Mua gamenererogue eropa game duyasarã mua basi yujurayeri cururi ðuca wariayero mua. Gajirã yure irire erã eropa arĩ werecũ “Diaye ta arĩca,” arĩ pepia yuhu. ¹⁹ Eropa ðuca warirã ðpa arĩca mua: “Ðuca wari wiriario gameca marire Jesu yarã gohra arĩrãpũre ìhmuborore,” arĩca mua basi. ²⁰ Mua basi gamenere barã mua yujuro arĩbirã mari Opu Jesucristo dorediro dopa diaye ta bocatĩrĩrã iibeaa. ²¹ Mua gamenere barã yujurãyeri mua seyaro bamuhta, ìhrimuhta gajirãre corero mariro. Mua eropiicũ gajirã oaboa wahama. Gajirãpu merea wahama. ²² ¿Mua seyaro badiarã duhpĩrã mua ya wirigue babeari? ¿Eropirã duhpĩrã dohpaguere Goãmu yarã gamenererore “Duhpiburi arĩbeaa,” arĩdiari? ¿Eropirã duhpĩrã Jesu

yaräre mojomorocuräre bari mooräpure mua guhyasüuro taricü iiri? ¿Dohpa arí weregucuri yuhu müare? Öaro iirä iiaa mua, aríbeaa yuhu.

Goãmü yare bocatîrîrâ diaye erâ iiburire werepü Pablo

²³ Goãmü yare bocatîrîburire mari Opü Jesu weremi yure. Eropa îgu wererare yupü müare irire werebû. Iri öpa ähraa: Îgare îhaturiräre Juda îgu sihurisubu iri ñami ta mari Opü Jesucristo panrure aî, ²⁴ Goãmäre “Öhaa,” arîpü. Îgu eropa arîra puhru iriru panrure nuha, îgu buheräre guerepü. Eropa gueregu öpa arîpü: “I yu dupü ähraa. Mua ya árîburire sírigüca. Yure mua guñaburire yuhu dohpaguere müare ihmuro dopa aî baque,” arîpü Jesu mari Opü. ²⁵ Erâ bara puhru îgu panrure aîdiro dopa ta ihriripare aîgu öpa arîpü: “Mua ñeri iirare cóabu sírigüca. Eropa îgu ya dire cóagüca. Yu di cóara mera Goãmü masare ‘Mua mera amugara,’ îgu arîdiro ojogorocuroca. Ipa dicurire ihrirä yu di cóarare guñaräca. Ire ihrirä mua yure guñaburire yuhu müare ihmudiro dopa iique,” arîpü Jesu. ²⁶ Yü werediro dopa ta iru panrure mua barä, ihririre ihrirä, Jesu mari Opü mari ya árîburire îgu sírirare ihmurä iiaa mua. Eropa îhmuniguiräca müapü ne îgu i yebague îgu dujaracügue.

Goãmü yare bocatîrimorâ öpa iique, arí gojañumi Pablo

²⁷ Mua Goãmü yare bocatîrimorâ gamenere baha, ihrirä, umupeoro marîro guhyadiaro marîro iirä dipuwajacuräca. Eropa iirä mari ya árîburire Jesucristo îgu dupure îgu di cóara säre wereyaro dopa iirä iiaa mua. ²⁸⁻²⁹ Öpa arí guñaro gahmea: “Mari Jesu yarä gamenererä yuju curu yuju dupü iro dopa ähraa. Mari Jesucristo yarä ähraa,” arí guñaro gahmea. Irîre queoro guñabirä, mari iri panrure baha, ihriripare ihrirä queoro iibirä mari dipuwajacumorä árîräca. Eropirä mari bocatîriboro core mari árîricurire guñamühtarö gahmea ñero iiri arîrâ. Eropa iira puhru bocatîri ihri bamasia mari. ³⁰ Eropa guña amubirira waja bajarä mua mera majarä dorecurä árîcoma. Erâ yujuräyeri turabirä árîcoma. Eropirä gajirä erâ eropa iira dipuwaja síria wañuma. ³¹ Erâ baha, ihrîboro core erâ árîricurire öaro guña, erâ ñeri iirire duhunirä, erâ ñeri dipuwajare dipuwajacubiriboñuma. ³² Mari Opüpü marire îgu yaräre dipuwaja moagu mari ñeri iirire duhucü îgu iimi. Jesure gamebiräre îgu dipuwaja moaboro dopa marire dipuwaja moabirîborore eropa iimi. Mari peamegue wabirîborore dohpaguere marire dipuwaja dabero moami mari Opü.

³³ Eropirä yu acawererä, bocatîrimorâ gamenererä, mua basi corenique. ³⁴ Eropirä mua mera majarä oaboarä, erâ ya wihigue bamühtarö. Eropirä bocatîrimorâ öaro gamenere baque mua ñero dipuwajacurä wabirîborore. Gajinore werediarabu müare. Puhru yu basi ejaqu müare weregura irire.

12

Goãmü ya árîburire mari mohmeburire apîgu marire irire iimasicü iimi Espîritu Santo, arí gojañumi Pablo

¹ Yü acawererä, öpa müare weregu ire müare masicü gahmea. Goãmü ya árîburire mari mohmeburire apîgu marire árîpehreräre irire iimasicü iimi Espîritu Santo.

² Mũa Jesu yarã árĩnibirã gajiropa árĩri buherire pee nururã árĩrã, mũapu goãmarã wéanirãre umupeoyoro. Noho mũa bocarãre werenigubirãre umupeoyoro. Irire masia mũa. ³ Eropa árĩnirã mũa áricũ dohpaguere õpa arĩ werediaca mũare. Espĩritu Santo itamuri mera wereniguirã “Jesu ñero waporu,” ne arĩmasibeama. Eropirã Espĩritu Santo itamuri mariro wereniguirãpũ “Jesu árĩpehrerã wecague opu mari Opu ãhrimi,” arĩmasibeama.

⁴ Goãmu ya árĩburire mohmemasiburi baja ãhraa. Irire marire iimasicũ iigupu yujugu ta ãhrimi. Ĩgu Espĩritu Santo ãhrimi. ⁵ Eropiro Goãmu ya árĩburire iimasiri mera mari mohmeburi baja ãhraa. Irire mari iiburire doregu yujugu ta mari Opu Jesu ãhrimi. ⁶ Mari ĩgu yarã ĩgu ya árĩburire iimasiri mera mari mohmeri yujuropa ta árĩbeaa. Iri mohmeri õaro wacũ iigu yujugu ta Goãmu ãhrimi. ⁷ Espĩritu Santo marire Jesu yarã nũcare mari iimasiburire apigu Goãmu turarire ĩhmuũ iimi. Opa ta iimi ĩgu Jesu yarãre árĩpehrerã mari õaro mohmeboru dopa. ⁸ Yujurãyerire õaro masiri mera werecũ iimi Espĩritu Santo ta. Eropigu gajirãre Goãmu yare õaro buhecũ iimi ĩgu Espĩritu Santo. ⁹ Eropigu gajirãre “Mari Goãmu mera õaro iimasia,” arĩ Goãmũre guñaturacũ iimi Espĩritu Santo ta. Eropa iigu gajirãre turarire Espĩritu Santo ta ohomi ĩgu. Iri turarire ĩgu ocũ erãpu dorecurãre õarã wacũ iima. Espĩritu Santo yujugu ta árĩgu iri turarire ohomi. ¹⁰ Eropigu ĩgu gajirãre deyoro moarire iimasicũ iimi ĩgu. Eropa iigu Goãmu yare õaro weretaumasicũ iimi ĩgu gajirãre. Eropa iigu gajirã Jesu yarãre buherire õaro beyemasicũ iimi ĩgu. Eropa masirã watĩ ya buheri áricũ masima erã. Espĩritu Santo gohra ya iri buheri áricũ sãre masima erã. Eropigu gajirãre erã peeyamarirã yare wereniguimasicũ iimi ĩgu. Eropigu peeyamarirã yare erã wereniguicũ gajirãre weretaumasicũ iimi. ¹¹ Iri árĩpehrerire iimasirire apigu ta Espĩritu Santo ta yujugu ta ãhrimi. ĩgu gamero dopa ta marire yujurãyerire mari mohmeburire apimi.

Cristo yarã árĩrã yuju curu ta ãhraa mari, arĩ gojañumi Pablo

¹² Werenigui queori mera mũare weregura: Mari dũpu yuju dũpu árĩquerecũ ta, mojotori, cuiiri, guburi, gamiri, iri tamera baja ãhraa mari dũpure árĩri. Eropa ãhraa mari Cristo yarã. Bajarã árĩquererã ta yuju dũpu iro dopa ta yuju curu ta ãhraa ĩgu mera. ¹³ Eropirã Cristo yarã árĩrã ĩgu dũpu iro dopa yuju curu ta ãhraa mari. Judio masa, judio masa árĩbirã, pohro majarã, pohro majarã árĩbirã, baja cururi árĩquererã ta yujugu árĩgu ĩgu dũpu iro dopa yuju curu ta ãhraa mari. Espĩritu Santo yujugu ta árĩgu ĩgu turari mera wãyesũnirã marire yuju curu Cristo yarã áricũ iimi. Eropirã mari árĩpehrerã yujugu Espĩritu Santore opaa Cristo ya curu majarã árĩrã.

Eropirã mari Cristo yarã yuju dũpu iro dopa ãhraa. ¹⁴ Mari dũpu yuju dũpu árĩquerecũ ta mojotori, cuiiri, guburi, gamiri iri mari dũpu árĩri baja ãhraa. ¹⁵ Mũ guburo wereniguirã guburo árĩro õpa arĩboya mũre gajiropa arĩro: “Mũ mojoto árĩbeaa yũũ. Eropiro mũ dũpu maja árĩbeaa yũũ,” arĩboya. Mũ guburo eropa arĩquerero ta mũ dũpu maja árĩro ta iiaa. ¹⁶ Mũ gamiro wereniguirã gamiro árĩro õpa arĩboya mũre: “Mũ cuiuru árĩbeaa yũũ. Eropiro mũ dũpu majaru árĩbeaa yũũ,” arĩboya. Mũ gamiro eropa arĩquerero ta mũ dũpu maja gamiro árĩro

ta iiaa. ¹⁷ ¿Mari dapa cuiru dihta árciũ dohpa peebocuri mari? Masiya mara. ¿Eropirã mari dapa gamiro dihta árciũ dohpa ii wiji pepibocuri mari? Masiya mara. ¹⁸ Eropa áribeaa mari dapa. Ōpa áhraa. Mari dapa árinore áripeherire Goãmu igu gamero dopa ta apidi árimi mari dapa. ¹⁹ ¿Mari dapa árii maricũ dohpa waboyuri mari dapa? Mariboya. ²⁰ Mari dapa ōpa áhraa: Yuju dapa áriquerecũ ta mari dapa árii baja áhraa. Eropa ta mari Jesu yarã yuju dapa iro dopa áriquererã bajarã áhraa mari basi game itamumorã.

²¹ Eropiro mu cuirupu mu mojtore “Mu itamucũ gamebeaa,” arimasibea. Eropiro mu dipuru mu guburire “Mu itamucũ gamebeaa,” arimasibea. ²² Gaji mari dapa árii “Bu áriñariri áhraa,” mari áriipure uputu gahmea mari. ²³ Eropirã gaji mari dapa árii “Bu áriñariri áhraa,” arí pepia. Eropirã irire ōaro deyoporo arĩã ōaro ahmu. Eropirã gaji mari dapa árii mari guhasirisãre ōaro ahmu ōaro áriboro dopa. ²⁴ Gaji mari dapa árii mata ōari deyopure eropa amubeaa mari. Goãmu mari dapa árii yujuũe gajĩne gamebiriũ iibiridi árimi. Igu mari dapa árii áripeherire ōaro amudigu árimi yuju dapa ōaro dapauburire. Eropa igu “Bu áriñariri áhraa,” mari áriipure mari ōaro gamecũ iimi. Eropa ta ne yujugure Jesu yagure “Bu áriũ áhrimi,” arimasibea mari. ²⁵ Eropa ta áridoredi árimi Goãmu mari dapa árii yujuro mera iri basi game itamuboro dopa. ²⁶ Mari dapa árii yujuũe ñero taricũ gaji mari dapa árii sã ñero taria. Eropiro mari dapa árii yujuũe ōaro árciũ mari dapa áripeherero ōaro pepia.

²⁷ Eropa arĩgu ōpa arĩdiagu iiaa muare: Mupaũ Cristo igu dapa iro dopa áriã yuju curu ta áhraa. Eropirã áripehererã mua igu dapa árii iro dopa áhraa igu yarã áriã. ²⁸ Eropigu Jesu yarã gamenererã watope mari game itamuburire apidigu árimi Goãmu marire. Ōpa apipu igu marire: Yujurãyeri guare buhedoregu Cristo apimuhadidigu árimi. Ero puhũ gajirãre igu yare weretaumore apidi árimi. Ero puhũ gajirãre Jesu yarãre buhemore apidi árimi. Eropigu gajirãre deyoro moarire iimorãre, gajirãre dorecurãre erã taricũ iimorãre, erã puhũ gajirãre masare itamumorãre, gajirãre oparã árimorãre apidi árimi. Ero ojogoro peeyamarĩã yare wereniguimorãre apidigu árimi marire. ²⁹ Eropa igu apicũ áripehererã yujuropa iimorã áribeaa mari. Mari áripehererã Jesu-cristo yare buhedore igu apinirã áribeaa mari. Eropirã Goãmu igu yare weretaurã mari áripehererã áribeaa. Eropirã áripehererã masare buherã áribeaa. Eropirã mari áripehererã deyoro moarire iimasirã áribeaa mari. ³⁰ Eropirã mari áripehererã dorecurãre taumasirã áribeaa mari. Eropirã mari áripehererã peeyamarĩã yare wereniguimasimorã áribeaa. Eropirã gajirã erã wereniguire weretaumasimorã mari áripehererã áribeaa. ³¹ Eropirã Goãmu ya áriburire mohmemasiburiñere gamerã ōaripure turaro gameque mua. Eropigu áripehereri ya arĩa tauro ōaro mua iiburire dohpagure weregura yuhã.

13

Gajirãre erã ōaro mahiburire, umupeoburire wereñumi Pablo

¹ Peeyamarĩã yare masa ya wereniguirire, anyua ya sãre wereniguimasiquererã ta gajirãre mahibirã, duhpimorã áribiriboya mari. Eropiro

mari wereniguiri sã eropa busumaacãboaya mari gajirãre mahibirã árfãrã. ² Goãmũ yare òaro weremuhtamasiquererã ta gajirãre mahibirã bu árfãmaacãrã árfãboya mari. Eropirã masa erã masibirirare Goãmũ yare árfãpehreri masiri masipehoquererã ta gajirãre mahibirã, bu árfãmaacãrã árfãboya mari. Goãmũre òaro umupeatariri mera utãgu “Gajipugue waporõ,” arãrã wadoremasiquererã, mari gajirãre mari mahibirã bu árfãrã árfãboya. ³ Mari yare árfãpehrerire mojomorocurãre oquerecũ ta erãre mahibiricũ iri mari ora duhpiburi árfãbiriboya. Eropirã Goãmũ ya árfãburire mari iira dipuwaja mari dupure gajirãpũ soequerecũ ta, gajirãre mari mahibiricũ iri duhpiburi árfãbiriboya.

⁴ Gajirãre mahirã mata guabeaa erã mera. Erãre mahirã òaro iiaa. Eropirã gajirãre mahirã erã marire opanemocũ ìhaturibeaa. Eropirã mari mahigũ mera árfãrã “Mũ tauro árfãgu áhrraa yuhũ,” arãrã iibeaa mari. Gajirãre mahirã, “Erãre masitarinugaa,” arã pepibeaa. ⁵ Eropirã gajirãre mahirã erãre umupeiõri mera queoro iiaa mari. Gajirãre mahirã mari ya árfãburi dihtare guñabeaa. Erã ya òaro árfãburi sãre guñaa. Eropirã erãre mahirã disitũri wereniguibeaa mari. Eropirã marire erã ñero iicũ sãre erã mera guawajabeaa mari. ⁶ Gajirãre mahirã erã ñero iirire mucubiribeaa mari. Diaye majapure erã iicũ ìarã burigã mucubiria erã mera. ⁷ Gajirãre mahirã erã ñeri iicũ gajirãre ne quere moabeaa. Eropirã gajirãpũ erãre erã werewuacũ peequererã ta irire peediabeaa mari. Òari dihtare peediaa mari. Gajirãre mahirã “Òarire iirãcoma,” arã cohrea mari erãre. Gajirãre mahirã erã iira mera mari ñero tariquererã ta erãre mahi duhosome mari.

⁸ Gajirãre game mahiri ne pehresome. Goãmũ yare weretauripũ pũhrũ duhpiburi árfãsome. Peeyamarirã ya wereniguiri sã pehrea waroca. Goãmũ yare masitariri wajamariroca pũhrũgue. Mari masipehora pũhrũgue duhpiburi gohra árfãsome iri. ⁹ Dohpaguere Goãmũ yare mari merogã masia. Eropirã mari ìgu yare wererã mari merogã weremasia. ¹⁰ Pũhrũgue ta mari masipehorãca. Eropiro mari merogã masira duhpiburi árfãsome. Irisubugue masipehorãca.

¹¹ Iri òpa áhrraa: Majigũ árfãgu majigũ dopa wereniguiribũ yuhũ. Eropigũ majigugã dopa pepiribũ. Eropigũ bugũ wagũ majigũ iro dopa árfãrãre duhcãbũ. Eropa ta pũhrũguere mari dohpaguere merogã masirare duhura pũhrũ masipehorãca. ¹² Diuru òaro masure deyocũ iibiro dopa ta dohpaguere òaro masipehonibeaa dohpa mari. Pũhrũ Goãmũre mari òaro ìhamasirãgue mari masipehorãca. Dohpaguere mari merogã dihta masia dohpa. Goãmũ marire ìgu masipehodiro dopa ta pũhrũ mari sã òaro masipehorãca.

¹³ Eropirã dohpaguere mari iimasiburi uhreñe dujaroca. Goãmũre “Diaye ta árfãgu áhrrimi,” arã umupeoniguirãca. Eropirã marire ìgu mera òaro árfãniguiburire mucubiri coreniguirãca. Eropirã gajirãre game mahiniguirãca. Goãmũre umupeiõri, ìgu mera árfãborore mucubiri coreri tauro áhrraa game mahiripũ.

14

Peeyamarirã yare wereniguirire wereñumi Pablo

¹ Eropirã gajirãre game mahirã árfãque mũa. Eropirã Goãmũ ya árfãburire mũa mohmmasiburire Espiritu Santo ìgu apirare turaro gameque. Goãmũ yare mũa weremasiburi tamerare burigã gameque mũa.

² Peeyamarirã yare wereniguigu Goãmũ dihta peeborore wereniguimi. Eropa arĩ wereniguigu masa peeborore wereniguigu iibeami ìgu. Ìgu eropa arĩ wereniguicũ peerã masapũ ne peebeama ìgure. Masa erã masibirire Espiritu Santo ìgu turari mera wereniguigu iimi ìgu. ³ Goãmũ yare weretaugupũ masapũ peeburire weremi. Eropa weregu ìgu masare itamugũ iimi ìgu. Eropigu erãre Jesucristore umupeonemocũ iimi. Eropigu ìgu erã ñero taricũ ìgu erãre òaro siporãcucũ iimi. ⁴ Peeyamarirã yare wereniguigu ìgu basi dihtare Jesucristore umupeonemocũ iimi. Gajirãre Jesucristore umupeonemocũ iibeami. Goãmũ yare weretaugupũ gajirãre Jesu yarã gamenererãre Jesucristore umupeonemocũ itamumi ìgu.

⁵ Peeyamarirã yare árìpehrerã mua wereniguicũ òaboya yũ pepicũ. Eropa árìquerecũ ta Goãmũ yare mua weretaucũ tamerare turaro gahmea. Goãmũ yare weretaugupũ peeyamarirã yare wereniguigu tauro òagu àhrimi. Eropa árìquerecũ ta peeyamarirã yare wereniguigu ìgu wereniguirire gajigu ìgu weretaucũ ìgu sã òagu dujami. Ìgu wereniguirire weretaugu Jesu yarã gamenererãre Jesucristore umupeonemocũ iimi. ⁶ Eropigu, yũ acawererã, yũhũ mua pohrogu peeyamarirã yare wereniguigu wagu muare itamumasibiriboya yũhũ. Goãmũ ìgu yare wererare weregu itamua. Ìgu yare Espiritu Santo yare masicũ iirare buhegu muare itamugu iiaa.

⁷ Peeyamarirã ya wereniguigu ìgu wereniguiri mari peebero òpa iro dopa àhraa. Tarusure purirã, mari buamutêriñere irire mari queoro iibiricũ, iri bayarire gajirãre masima masiya mara. ⁸ Eropigu cornetare purigu surara árìgu erã gamewejëboro corere queoro ìgu puribiricũ gajirã surarapũ masisome erã gamewejëboro gamenererore. Eropirã erã gamewejëboro core erã wejëburi mojore amuyubirã àhrima erã. ⁹ Eropa ta mua sã peeyamarirã yare wereniguicũ peerã gajirã irire peebeama. Eropa peebericũ mua wereniguiri duhpiburi árìbeaa erãre. ¹⁰ I yebare baja wereniguiri árìca. Eropirã irire wereniguirã erã basi erã eropa wereniguirire òaro peema. ¹¹ Ìgu ya wereniguirire yũ peebericũ ìagu irire werenigugupũ "Gajirã yare wereniguimi," arĩ pepicumĩ yare. Eropigu yũ sã eropa ta arĩ pepica ìgure. ¹² Eropirã mua peeyamarirã yare wereniguirã, Espiritu Santo ìgu yare mohmemasi apira mera turaro mohmediaraa mua. Irire eropa iidiarã Jesu yarã gamenererãre òaro itamuburipũre burigã mohmediaque mua.

¹³ Eropigu peeyamarirã yare wereniguigu "Yũ wereniguirire gajirãre òaro weretaumasiburire itamuque yare," Goãmũre arĩ serëporo ìgu. ¹⁴ Peeyamarirã ya mera Goãmũre serëgu yũ pepiri mera serëgu iiaa. Eropa serëgu yũ pepirire masibigu yũ wereniguirire masibeaa. Eropa ìgu gajirãre itamubeaa yũhũ. ¹⁵ Ire masirã, òpa iirãca mari: Espiritu Santo ìgu turari mera peeyamarirã ya mera Goãmũre serërãca. Eropirã gajisubu òaro masi pepirã gajirã erã òaro peebero dopa erã ya mera Goãmũre serërã iri sãre serërãca mari. Espiritu Santo ìgu turari mera peeyamarirã ya mera Goãmũ yare bayarãca. Eropirã gajisubu òaro masi pepi gajirã erã òaro peebero dopa erã ya mera Goãmũre bayarãca. ¹⁶ Mari eropa iibiricũ peeyamarirã ya mera wereniguirã Espiritu Santo ìgu turari mera Goãmũre, "Òagu turagu àhrimi," mari arìquerecũ ta gajirã ne peebeama. Erã eropa peeberã "Diaye ta àhraa," arĩmasibeama. ¹⁷ Peeyamarirã ya mera Goãmũre "Òhaa," arĩmasia mari. Mari eropa arĩri

ðaro áriquerecũ ta gajirã peebeama. Eropirã erãre Jesucristore umupeonemocũ itamubeaa mari. ¹⁸ Áripehrerã mua tauro yuɸu peeyamarirã yare wereniguia. Eropigu Goãmu yare eropa wereniguimasigu iɸu iicũ iɸure "Óhaa," arãa yahu. ¹⁹ Eropa wereniguigupu yu áriquerecũ Jesu yarã gamenererã watope peeyamarropa peebirã "Diaye ta áirã ya mera yoari boje yu wereniguiquerecũ duhpiburi áribeaa erãre. Yuhu masa erã ðaro peemasiboro dopa buhegu merogã yu buhequerecũ ta iri tamera ðapũrica erãre.

²⁰ Yu acawererã, majirãgã pee masibirãgã iro dopa áribiricãque mua. Murã erã pee masirã áriro dopa árique mua. Eropirã ne masa dehyoarã erã ñeri iirire erã masibiro dopa ta árique mua. ²¹ Goãmu yare erã gojarapũ ðpa áhrra Goãmu wereniguirire: "Gajirã ya queo wererẽre oã masare yahare weredoregura. Eropigu gaji yeba majarã masare ðarire yahare weredoregura oã masare. Yu eropa weredorequerecũ ta erã yare peesome yu wererire," arĩmi Goãmu mari Opũ, áhrra Goãmu yare erã gojarapũgue. ²² Peeyamarirã yare wereniguirĩ Goãmure umupeobirãre erãre ihmuri áhrra. Eropiro peeyamarirã yare wereniguirĩ Jesu yarãpũre Goãmu turarire ihmuri áribeaa. Eropiro Goãmu yare wereripũ Jesure gamebirãre Goãmu turarire ihmuri áribeaa. Goãmu yare wereripũ Jesu yarãpũre Goãmu turarire ihmuri áhrra. ²³ Eropirã mua Jesu yarã gamenerecũ, peeyamarirã yare mua áripehrerã wereniguicũ, Goãmu yare masibirã gajirã Jesure umupeobirã sã ñajari peebocoma. Mua eropa wereniguicũ peerã, erã muare "Cue, goroweorã wahama," arĩbocoma erã. ²⁴ Áripehrerã mua Goãmu yare mua werecũ tamera Goãmu yare masibigu, Jesure umupeobigu sã ñajari peegu, iɸu ñero iirare masigucumi iɸu. Eropigu iɸu ñeri iirare bujawerebocumi iɸu. ²⁵ Eropigu iɸu áriurire iɸu pepiri sãre guñagucumi iɸu. Eropigu mereja Goãmure "Yu opu áhrimi," arĩgu umupeogucumi. Eropigu "Goãmu diaye ta mua mera áhrimi," arĩgucumi iɸu muare Goãmu yare werecũ peegu.

Mua gamenererã ðaro iique goroweoro mariro, arĩ gojañumi Pablo

²⁶ Eropigu, yu acawererã, muare ire arĩgu iiaa: Mua gamenerecũ yujurãyeri mua mera majarã Goãmu yare bayadama. Eropirã mua gajirã buhediaa. Eropirã gajirã Goãmu muare iɸu wererare werediaa. Eropirã mua gajirã peeyamarirã yare werenigidiaa. Eropirã mua gajirã iri wereniguirire weretaudiaa. Mua eropa iirã gajirãre erã Jesucristore umupeonemoboro dopa irire iique. ²⁷ Eropirã peeyamarirã yare mua wereniguirã mua perã o urerã, erã nucu ta wereniguique mua gamenererisubu. Eropirã yujurãyeri wereniguique. Mua eropa wereniguicũ, yujugu mua mera majagu mua wereniguirire gajirãre weretauporo. ²⁸ Mua wereniguirire weretaubu maricũ mua gamenererogue peeyamarirã yare wereniguibiricãque. Eropirã mua seyaro peeyamarirã yare Goãmu mera wereniguique. ²⁹ Eropirã Goãmu yare werediarã perã o urerã iripẽta wereque mua. Mua eropa werecũ gajirã muare peerã mua wererire Goãmu ya áricũ ðaro masiporo. Eropirã Goãmu ya áribiricũ sãre ðaro masiporo. ³⁰ Eropigu Espiritu Santo Goãmu yare gajigure ero doagure iɸure wereri ocũ, iɸu sã Jesu yarãre werediami. Iɸu werediacũ iha Goãmu yare weremuhtagupu werenigui duhuporo. ³¹ Eropirã mua áripehrerã Goãmu yare wererã, yujurãyeri wereque mua áripehrerã gajirã erã ðaro peeboro dopa, erã ðaro mucubiriboro dopaa.

³² Eropirā Goāmū yare wererā árīrā, òaro pee masirā, òaro peeñanugu wereniguirā árīque. ³³ Goāmū ĩḡu yarā erā gamenererogue erā game wisicū gamebeamī ĩḡu. Goroweoro mariro erā òaro árīcū gahmemī ĩḡu. Eropirā òaro iique mua árīpehrerogue Jesu yarā gamenererā.

³⁴ Árīpehrero Jesu yarā gamenererore nomere wereniguibiricāro gahmea. Erā nomere maripū wereniguidorebeaa. Goāmū yare erā gojarapū sā ariro dopa ta nomere muare òaro yuhrirā nome árīro gahmea. Eropirā mua gamenererore nome masare werebiricāporo. ³⁵ Jesu yarā erā gamenererore nome erā wereniguicū òabeaa. Eropigo gajinore masidiago nomeo igo ya wihigue ta igo marapūre serēpiporo.

³⁶ Ire yū wereburi òaro masique mua. Goāmū yare weremuhtarā árībeaa mua. Eropirā ĩḡu yare peenirā mua dihta árībeaa. Gajirā sā ĩḡu ya buherire opama. ³⁷ Mua mera majagū “Yū tamera Goāmū yare weregu āhraa,” arī pepibocumī. Eropā arī pepigū i yū muare gojarare “Goāmū doreri ta āhraa,” arī masiporo ĩḡu. Eropigū gajigū, “Espíritu Santo iimasiburire ĩḡu apirare òaro opaa yūhū,” arī pepibocumī. Eropā arī pepigū ĩḡu sā i yū muare gojarare “Goāmū ya doreri ta āhraa,” arī masiporo. ³⁸ Irire ĩḡu masidiabiricū yū gojarare “Diaye árībeaa,” ĩḡu árīcū ĩḡure duhucāque. Peebiricāque ĩḡure.

³⁹ Eropirā yū acawererā, Goāmū yare weremasiburire burigā gameque mua. Eropirā mua mera majarā mua gamenererogue peeyamarirā ya erā wereniguidiacū, “Wereniguibiricāque,” arībiricāque erāre. ⁴⁰ Eropā iirā òaro iique. Eropirā gamenererā òaro game, goroweoro mariro iique mua.

15

Cristo ĩḡu masa muriarare werepū Pablo

¹ Dohpaguere yū acawererā, òari buherire yūhū muare wererare muare guñacū iidiaca. Iri buherire òaro peebu mua. Eropā peerā iri buherire umupeonijarā òaro āhraa mua. ² Mua eropā umupeocū irire mua cóabiricū Cristo muare peamegue wabonirāre taugucumī. Mua eropā peera pūhrū Cristo yare mua duhucācū iri mua peera duhpiburi árībiriboya.

³ Ōpā arī weremuhtagura muare. Bu gohra árībeaa. Muare buhegu yare Cristo ĩḡu wererare òpā arī werebu: Goāmū yare erā arī gojayudiro dopa ta mari ñeri wajare Cristo sīripū. ⁴ Eropigū Goāmū yare erā arī gojayudiro dopa ta Cristo ĩḡu sīrira pūhrū gajirā ĩḡure erā yaara pūhrū uhrenū waboro ĩḡu masa murīapū. ⁵ ĩḡu eropā masa murīara pūhrū Pedrore dehyoapū. ĩḡu eropā dehyoara pūhrū ĩḡu buherāre doce mera majarāre dehyoapū daja. ⁶ Erāre dehyoara pūhrūre yujusubu ta quinientos weca árīrāre ĩḡu yarāre dehyoapū daja. Gajirā ĩḡure ñanirā sīrituhañorā. Gajirā ĩḡu ñanirā bajarā erā mera majarā árīnirā dohpaguere árīnima. ⁷ Pūhrū Cristo Santiagore dehyoapū daja. Eropā ĩḡu dehyoara pūhrū árīpehrerā ĩḡu buhedore apinirāre dehyoapū daja.

⁸ Árīpehrerā gajirāre ĩḡu dehyoara pūhrū yū sāre dehyoami daja. Majigugā queoro masa deyobigugā ĩḡu masa dehyoanurusiadiro dopa ta yū sā Jesure umupeo nurusiagu āhraa. Yū eropā árīcū erā pūhrūre dehyoami Jesu yū sāre. Yare ta ĩḡu dehyoatumi pare. ⁹ Ero coregue Jesu yarāre ñero iiribu. Eropā iidigu árīḡu gajirā Jesu ĩḡu apinirā árīpehrerā erā docague gohra āhraa yūhū. Eropigū dohpague sāre Jesu ĩḡu buhedore

Īġu apibodigū árĭbiriribū yuħu. ¹⁰ Eropa árĭquereġu ta Goāmu ĩġu yure mahicū dohpaguere Jesu ĩġu apidigū āħraa yu sā. Eropigū ĩġu yure mahicū dohpaguere ĩġu gamerire iipehoa. Eropigū ĩġu yure mahicū ĩġu yagu eropa árĭcāġu iibeaa. Árĭpehrerā ġajirā ĩġu apinirā tauro yuħu turaro mohmeabū. Eropa mohmegu yu gamero ĩri mohmerire iibirabū. Goāmu yure mahigū yare itamuami. ¹¹ Yuħu muare ōari buherire buheġu yu árĭcū erā muare buherā árĭcū säre yujuropa āħraa. Ġuapū ire buherā árĭquererā ta bu gohra árĭrā iiaa. Ġua buheripū bu árĭri árĭbeaa. Eropirā muapū i buherire ōaro peeabū.

Sĭrinirā mura erā masa mariaborore werepū Pablo

¹² Cristo ĩġu sĭrira puħru ĩġu masa mariarare ġua buhequerecū “Sĭrinirā mura ne masa mariabeama,” arĭma mua mēa majarā yujurāyeri. ĶDohpa arĭrono eropa arĭri erā irire? ¹³ Ōpa masiporo erā. Sĭrinirā murare Goāmu masa mariacū iibigū Cristo säre ne masa mariacū iibiriboñumi. ¹⁴ Eropigū Cristo ĩġu masa mariabiricū ōari buherire ġua werera ne waja mariboya. Mua ĩġure umupeori sā waja mariboya. ¹⁵ Masa mariari maricū ġuapū Goāmu yare wererā ġuyarā iiboya. Sĭrinirā mura erā masa mariabiricū Goāmupū Cristore masa mariacū iibiriboñumi. ĩġu eropa iibiricū ġua “Goāmu Cristore masa mariacū iipū,” arĭrā ġuyarā iiboya. ¹⁶ Sĭrinirā murare Goāmu masubigū, Cristo säre ĩġu masubiriboñumi. ¹⁷ Eropiro Cristo ĩġu masa mariabiricū ĩġure mua umupeori waja mariboya. Eropiro mua ñeri dipuwajacurā árĭboya dohpa peamegue wamorā. ¹⁸ Masa mariariñe maricū Cristo yarā mura sĭrimuhtanirā mura peamegue wamorā árĭboñuma. ¹⁹ Cristore mari umupeora puħru mari sĭrirāġue mari masa mariamasibirimorā árĭrā árĭpehrerā masa tauro mojomorocurā árĭboya maripū. Eropirā ĩġure umupeorā bu gohra árĭrire umupeorā iiboya mari.

²⁰ Eropa árĭbeaa. Diaye ta Goāmu Cristore ōaro masa mariacū iicādi árĭmi. Cristo ĩġu masa mariara puħru mari sā sĭrirāġue masa mariamorā ta āħraa. ĩġu eropa masa mariagu, Cristo masa maria gubuyecūñumi marire. ²¹ Ōpa ta āħraa i: Adán masu árĭmuhtadigū ĩġu ñerire iinugara puħru masa sĭrinuġañuma. Eropigū ġajigū masu Jesucristo ōarire ĩġu ĩira puħru sĭrinirā mura masa mariamasima. ²² Adán yarā árĭnurusiarāġue mari árĭpehrerā sĭrirāca. Eropa ta Cristo yarā mari árĭcū mari sĭrira puħru marire masa mariacū iigucumi Goāmu. ²³ Yujurāyeri cururi marire Goāmu sihurisubu masa mariarāca. Cristo marire árĭmuhtadigū masa mariamuhtapū. Puħru ĩġu i yebague dujaricū ĩġu yarā sā masa mariarācoma. ²⁴ Irisubu ta i ĩmu pehrerinū árĭroca. Eropigū árĭpehrerā ñerā oparāre, dorerāre, turarāre Cristo cóāġucumi. ĩġu eropa ĩira puħru árĭpehrerā weca opu ĩġu árĭrāre wiagucumi Goāmure mari Paġure. ²⁵ ĩġu wiaboro core mari Paġu Cristore ĩhaturirāre ĩġu tarinugapehoboro core Cristo tamera árĭpehrerā weca opu árĭġucumi. Eropa ĩibu ta árĭro ġahmea ĩġure. ²⁶ ĩġure ĩhaturirāre ĩġu cóāra puħru sĭiriñe säre peħrecū iigucumi ĩġu. ²⁷ Goāmu yare gojarapūġue ōpa āħraa: “Árĭpehrerā weca dorebure apipū Goāmu Cristore. Árĭpehreri säre apipū ĩġure.” Eropa ta arāa Goāmu yare erā gojarapūġue. “Árĭpehrerā weca dorebure apipū Goāmu Cristore,” arĭ ġoġaġu, “Goāmu weca doreġu Cristo āħrimi

ĭgu,” arĭdiabiriñumi. Goāmupũ Cristore eropa apiñumi. ²⁸ Árĭpehrero Goāmure ĭhaturiräre ĭgu cóara puhru árĭpehrerã weca doregu Cristo Goāmu magu ĭgu árĭtuhagu ĭgu opu árĭrare Goāmure ĭgure apidigupure wiagucumi. Eropiigucumi “Goāmupũ árĭpehrerã weca opu árĭpehreri opu gohra āhrimi,” árĭpehrero árĭpehrerã arĭmasiboro dopa.

²⁹ “Sĭrinirã masa m̃ariasome,” arĭma gajirã. ĭErã arĭri diaye arĭcũ duhpimorã gajirã masa sĭrinirã m̃ura ya árĭburire erã waĭyebasanirã āhriri m̃ua pepicũ? Sĭrinirã m̃ura masa m̃uriabiricũ erã ya árĭburire gajirã waĭyebasara duhpiburi árĭbiriboya.

³⁰ Guapu gua buheri dipuwaja umuri nucũ gajirã guare erã ñero iidicũ guhya āhraa gua sãre. Guare eropa guhyaquerecũ ta masa m̃uriari arĭcũ masirã eropa buheniguicãa gua. ³¹ Mari Opu Jesucristo yarã m̃ua arĭcũ ĭgure umupeonemorã m̃ua wacũ yapu turaro mucubiri pepia yuhu muare. Iri diaye ta āhraa. Eropigu “Yure noho erã gamerinu wejẽmaja guhya āhrima,” yu arĭcũ iri sã diaye ta āhraa. ³² Efeso majarã guarã õari buherire yu buhera waja yure pama. Masa m̃uriariñe maricũ Jesu yagu yu árĭbiricũ, yu ñero tarira waja duhpiburi árĭbiriboya. Sĭrinirã m̃ura erã masa m̃uriabiricũ õpa arĭboya mari: “Puhruñari sĭrirãca. Dohpa wasome mari. Eropirã bania, ihrirã, mari gamero dopa irã,” arĭboya mari.

³³ Eropa arĭ guyarire pepibiricãque m̃ua. “Ñerãre wapicurã, õarire m̃ua iirare cãdijirãca m̃ua,” arĭma masa. Iri diaye ta āhraa. ³⁴ Óarire pepirã arĭque m̃ua. Eropirã õarire iirã arĭque daja. Eropirã ñerire ĭnemobiricãque daja. Gajirã m̃ua mera majarã ne Goāmure masibeama. M̃ua guhyasĭrĭburire muare eropa arãa.

Sĭrinirã m̃ura erã masa m̃uriaborore werenemopũ Pablo

³⁵ Eropi m̃ua mera majagu õpa arĭ serẽpibocumi yure: “ĭDohpa ĭi sĭrinirã m̃ura masa m̃uriarãcuri? ĭDohpa bejari dupucurã masa m̃uriarãcuri? arĭ serẽpibocumi yure. ³⁶ Eropa arĭ serẽpigu pee masibigu āhrimi. Oteriyere mari oterã iriye boacũ gohra puhri wiria. Boabiricũ ne puhri wirimasibea. Irire masia m̃ua. ³⁷ Puhritaridigu yucuguguere otebea mari. Dipayeri dihtare otea mari. Iriyeri trigo yeri arĭro āhri, o gajiyeri arĭro arĭca. ³⁸ Iriyerire mari otera puhru Goāmupũ ĭgu gamediro dopa ta iriyerire buga m̃uriacũ ĭimi. Eropigu ojoducayerire ojoducañu wacũ ĭimi ĭgu. Trigo yerire trigo sari wacũ ĭimi. Eropa ta puhridoremi Goāmũ. ³⁹ Árĭpehrerã dupucuri yujuropa deyobeaa. Masa dupũ yujuropa ta āhraa. Waimurã dupũ sã gajiropa ta dehyoa. Mirimagu porã dupũ sã gajiropa ta dehyoa. Eropirã wai sã gajiropa ta dupucuma. ⁴⁰ Eropirã umaro majarã sã āhrima. Eropirã ĭ yeba majarã sã āhrima. Eropirã umaro majarã dupũ gajiropa dehyoma. Eropiro ĭ yeba majarã umaro majarã iro dopa árĭbeama. ⁴¹ Ópa ta āhraa. Abe umũ majagu gosemĭ. Eropi ñami majagu sã boje āhrimi ĭgu sã. Yuju diaye ta boyomi. Eropirã necã sã gajiropa bejari gosesirima. Necã majarã sãre mari ĭacũ gajĩ dipu daberogã gosesiriri dipu dehyoa. Eropiro gajĩ dipu turaro gosesiriri dipu dehyoa. ⁴² Eropa ta āhrima sĭrinirã m̃ura erã masa m̃uriacũ. Masu ĭgu dupure mari yaara puhru ĭgu dupũ boa waroca. Eropiro gajĩ dupũ gajiropa arĭri dupũ umuri nucũ ojocariburi dupũ masa m̃uriaroca. ⁴³ ĭgu dupure mari yaacũ sĭridigu dupũ ñeri dupũ āhraa. Goāmũ ĭgure masucũ ĭgu dupũ õatariari dupũ arĭroca. Eropiro ĭgu dupũ mari yaara dupũ turari mariri dupũ āhraa. Eropiro Goāmũ ĭgure

Īgu masucū dāpu turatariari dāpu ārīroca. ⁴⁴ I yeba maja dūpure mari yaarāca. Īgu sīridigu muru Īgu masa mūriacū Īgu dāpu ūmaro maja dāpu ta ārīroca. I yeba maja dūpure mari opaa dohpaguere. Pūhru ūmaro maja dāpu sāre oparāca.

⁴⁵ Eropa ta arī werea Goāmū yare erā gojarapūgue: “I yeba ārīmuhtadigu Adán waicugu Goāmū Īgure iicū ojocarīgu wañumi,” arī gojañuma. Adán iro dopa ārīgupu ūjutuyagupu Cristopu ojocarīre ogu āhrimi. ⁴⁶ I yeba maja dāpu ārīmuhtara dāpu āhraa. Pūhru gue ūmaro maja dāpu ārīroca. ⁴⁷ Ōpa ta āhraa: Árīmuhtadigu Adānpu i yeba maja nicu mera Goāmū Īgu iira dūpure dūpucuñumi. Īgu pūhru aridīgupu Cristopu ūmaro majagu ārīpu. ⁴⁸ Nicu mera dūpucumuhtadigu Adán ārīdiro dopa ta mari ārīpehrerā nicu mera iira dūpucurā āhraa mari. Eropirā ūmarogue aridigu Jesucristo Īgu ārīdiro dopa ta Īgu yarā ārīpehrerā Īgu iro dopa dūpucurāca mari. ⁴⁹ Mari Adán iro dopa ta dūpucurā ārīrā pūhru Cristo iro dopa dūpucurāca.

⁵⁰ Yu acawererā, muare ire werediaa: I yeba maja dāpu di mera diro mera ārīri dāpu Goāmū Īgu opu ārīroguere ūmaroguere ne wasome. Mari dāpu boaburi dāpu āhraa. Eropiro ūmarogue ūmuri nūcu mari ārīboroguere i dāpu wasome. ⁵¹⁻⁵² Iribojegure masa erā masibirirare dohpaguere muare werediaa: Mari mera majarā yujurāyeri sīrisome. Eropirā mata erā dūpure gohrotorā ārīrācoma. Corneta Īgu puriturīnu eropa ta waroca marire. Ōpa waroca: Corneta busura pūhru sīrinirā murare Goāmū masugucumi ūmuri nūcu erā ārīmorāre. Eropirā dūpure gohrotonirā ārīrāca mari sā. ⁵³ Dohpaguere mari dāpu boaburi dāpu āhraa. Eropīgu mari Goāmū mera ārīnīguicāburire mari dūpure gohrotogucumi Goāmū. Eropīgu mari sīriburi dūpure gohrotogucumi mari ne sīribiriburi dūpure. ⁵⁴ Mari dūpure ne boabiriburi dūpure gohrotogucumi. Eropīgu marire sīribiriburi dūpure eropa ārīnīguiburi dūpure gohrotogucumi. Iri eropa marire gohrotocū iribojegue Goāmū yare gojarapūgue arī gojadiro dopa ta eropa waroca: Goāmū sīrinīnere cōacāmi. ⁵⁵ Dohpaguere ne dipaturi sīrisome. Eropiro sīrinīne mera dipaturi mari ñero tarisome. ⁵⁶ Mari ñeri iira waja ārīcū tamera sīrinīne mera ñero tarirāca. Eropiro Goāmū doreri mari iimasibirira waja dipuwajacua mari. Eropa dipuwajacurā peamegue mari masa wamorā āhraa. ⁵⁷ Mari eropa ārīquerecū ta mari Opu Jesucristopu marire peamegue wabiricū iimi. Īgu eropa iigu ārīcū masirā Goāmū mera mucubiri “Ōhaa,” arāa mari.

⁵⁸ Eropirā yu acawererā, yu mahirā, Cristore mūa umupeorire duhubiricāque. Eropirā gajirā muare ōari buherire erā cōādorecū ne cōābiricāque irire. Eropirā ūmuri nūcu mari Opu Jesucristo Īgu iidorerare ōaro iinīguicāque mūa. Mari Opu Jesucristo yare mari iicū bu gohra ta ne ārībeaa. Ire masirā Īgu iidorerire ōaro iinīguicāque mūa.

16

Gajirāre Jesu yarāre Corinto majarā niyeru erā oburire werepu Pablo

¹ Dohpaguere gajirāre Jesu yarāre mūa niyeru oburire weregura muare. Galacia yeba majarāre Jesu yarāre yu dorediro dopa ta wema sā iique. ² Semanari nūcu soorīnu ārīcū ārīpehrerā mūa Jesu yarāre gajirāre mūa oburi niyerure merogā gameneoque. Merogā oparā merogā oque. Eropirā

wuañariro oparã wuañariro oque. Semanari nucu mua eropa iique mua pohrogue yu ejacũ mua obeoburi niyeru opayutuhaboro dopa. Eropigu erogue ejagu iripẽ niyeru wahasõ arĩripũre gojabasagura. ³ Eropigu iripũre iri niyeru aĩgãmorãre mua beyenirãre ogura. Eropa otuhagu Jesu yarãre mua obeoburi niyeru aĩgãmorãre erãre obeogura Jerusalengue. ⁴ Iri macaguere yu iiburi arĩcũ yu sã waguca. Yu eropa wacũ yu mera ta erã sã warãcoma iri niyeru orã warã.

Ĩgu erogue curiborore werepu Pablo

⁵ Macedonia yeba majarãre ihatari wahgãguca yuhu erãre. Tariagu mua pohro Corintogue ejaguca. ⁶ Erogue ejagu mua mera bajamenuri arĩboca yuhu gajisubu iigu. Yoañariri boje puhirõ dihta mua mera arĩboca yuhu. Eropirã gajipũgue yu wacũ mua sã yare itamubeomasia. ⁷ Muare bajamenurigã iadiabirica yuhu. Eropigu Goãmu gamecũ yoañariri boje mua mera arĩguca yuhu. ⁸ Eropa arĩdiaqueregu ta pentecoste bosenu arĩcũgue Efeso arĩniguca dohpa. ⁹ Ohõ Efesogue dohpaguere mari Opu Jesu yare peediarã bajarã àhrima. Erã eropa arĩrã arĩcũ erãre werea. Yuhu erãre eropa werecũ yare iadiabirã bajarã àhrima. Eropigu Efesogue arĩniguca dohpa.

¹⁰ Timoteo yu iro dopa ta mari Opu yare iimi. Īgu eropa iigu arĩcũ mua pohrogue ĩgu ejacũ ðaro mera ĩgure bocatĩri, ĩgu mera ðaro mucubiriri mera arĩque mua. ¹¹ Eropirã ĩgure tarinugabiricãque mua. Eropirã ĩgu muare goeriserecũ ðaro mera ĩgure itamuque ĩgu yu pohrogue dujaricũ. Gajirã Jesu yarã mera gua ĩgure corerã iiaa. Eropirã ðaro mera itamubeoque ĩgure.

¹² Apolo mari acaweregu Jesu yagu muare ĩgu ĩagu wacũ turaro gamerabu. Eropigu ĩgure wadorerabu gajirã Jesu yarã mera ĩgu waborore. Yu eropa wadorequerecũ ta ĩgu dohpaguere wadiabeami. Eropigu puhru ĩgure iiri maricũ mua pohrogue wagucumi ĩgu daja.

Pablo ðadoretu

¹³ ðaro pee masiyurã arĩque mua. Cristore umupeorã duhubiricãque. ðaro guñaturarã arĩque. Eropirã Goãmu ya turari mera turarã arĩque mua. ¹⁴ Arĩpehrerore iirã gajirãre mahiri mera irire iique.

¹⁵ ¿Estéfana ĩgu ya wihl majarã mera guñari mua? Erã Acaya yeba majarã ðari buherire peemuhtarã, iri yebare Cristore umupeomuhtanirã arĩma erãpu. Eropirã gajirãre mari acawererãre Jesu yarãre erã ðaro itamuniguicãma. ¹⁶ Eropigu erã iro dopa arĩrãre, gajirãre Cristo yare itamurãre mua ðaro yuhricũ gahmea yuhu. ¹⁷ Īgu Estéfana, Fortunato, Acaico sã yu pohrogue eratuhamã. Ohõ erã arĩcũ wuaro mucubiria yuhu. Mua maricũ mua mera mucubirimasibiribu yuhu. Eropigu erã eracũ mucubiria yuhu. ¹⁸ Erã mera arĩgu ðaro siporãcũgu wahabu yuhu. Mua sãre eropa ta mucubiricũ iiañuma yu pepicũ. Mua pohrogue erã dipaturi wacũ daja erãre ðaro umupeoque mua. Eropirã gajirãre erã iro dopa arĩrã sãre umupeoro gahmea muare.

¹⁹ Asia majarã Jesu yarã muare ðadorema. Eropirã Aquila, Priscila, erã ya wihl gamenererã mera Cristo ĩgu mahiri mera muare wuaro ðadorema. ²⁰ Õ majarã Jesu yarã arĩpehrerã muare ðadorema. Mua mera majarãre bocatĩrirã ðaro mera mojoto ñeaque.

²¹ Yuhu Pablo, yu basi i dihtare gojaa. Muare ðadorema.

²² Mari Opu Jesucristore gajigu ĩgu mahibircũ, Goãmu ĩgure dipuwaja moaporo. Mari Opu duru dujariporo.

²³ Mari Opu ĩgu mahiri mera muare õadorea. ²⁴ Muare árĩpehrerãre bũrigã mahia Jesucristo mera. Eropa ta árĩporo. Iripẽta ãhraa.

2 Corintios

Ōpa gojabeoñumi Pablo Corinto majaräre

¹ Yuhũ Pablo Jesucristo yare İġu buhedore İġu apidigu ähraa. Mari Pagu İġu gamero dopa ta apimi yare Jesu. Yuhũ, mari acawereġu Timoteo mera muare Goãmure umupeoräre Corinto majaräre gojabeoa. Árĩpehrerä Jesucristo yaräre Acaya majaräre mua säre gojabeoa. ² Eropirä Goãmu mari Pagu, mari Opu Jesucristo mera muare ðadoreä. İġu itamuro mera ðaro árĩque mua.

Pablo İġu ñero tarirare ðpa arĩ wereñumi

³ Mari Opu Jesucristo Pagu Goãmu marire mojomoro İhami. Eropigu İġu dihta marire árĩpehrerinuri ðaro sĩporäcucü iimi. “Ōtariagu ährimi İġu,” aräa mari. ⁴ Mari ñero taricü İagu marire İġu yaräre itamumi İġu gajiräre mari itamuboro dopa. Eropirä gajirä erä ñero taricü eräpüre itamuro gahmeä marire. Goãmu marire İġu itamuro dopa ta mari sä eräre itamurä. ⁵ Cristo yarä mari árĩrä İġu ñero taridiro dopa ta mari sä burigä ñero taria. Mari ñero taridiro dopa ta İġu itamurire wuaro opaa. ⁶ Guapu muare itamurä ñero taria. Eropirä Cristo mera mua ðaro árĩboro dopa gua muare werera dipuwaja gajirä ñero iima guare. Gua ñero tariquerecü Cristo guare itamumi. Eropirä Cristo guare itamucü guapu mua säre itamumasia. Eropirä gua ñero taridiro dopa ta mua sä ñero tarirä ðaro mera yujuro bojeräca. ⁷ Ōaro mera mua yujuro bojerä árĩborore gua masia. Gua ñero taridiro dopa ta ñero taria mua sä. Eropirä Goãmu İġu itamuri mera gua yujuro bojediro dopa ta mua sä yujuro bojeräca.

⁸ Gua acawererä, dohpaguere ire mua ðaro masicü gua gahmeä. Asia yebaguere ñetariaro taribu gua. Gua gamero iirä ne bocatũbiriboya. Ōpa arĩ pepiribu gua: “Ne bocatũsome mari. Eropirä mari sĩriräca,” arĩ pepiribu gua. ⁹ Eropirä “Marire wejêcäräcoma,” arĩ pepiribu gua. Gua eropa ñero taribu Goãmu dihtare gua guñaturaboro dopa. İġupu sĩriniräre masugu ährimi. Eropa İġure guñaturarä gua gamero gua bocatũbirirare masia. “Goãmu ta marire itamumi,” aräa pare. ¹⁰⁻¹¹ Guare guhyaquerecü ta İġu itamuro mera taribu. Puhrugue säre dipaturi guare taugucumi. Mua sä guare itamumorä mua Goãmure serêbasacü säre İagu İġu guare taugucumi. “İġu ta guare taugucumi,” arĩ masia mari. Eropirä İġu guare taucü İarä, İġure “Ōhaa” arĩräca muapu. Mua bajarä serêrare İġu yuhricü İarä “Ōhaa, diaye ta ähraa,” arĩräca mua bajarä Goãmure.

Pablo Corintogue İġu wadiarare wereñumi

¹² Eropirä gua iirare guñarä mucubiriri mera ðpa arĩ pepia gua: I yebare Goãmu İġu itamuro mera ñeri mariro ðari mera masare wapicu buhebu. Mua säre ðaro wapicu buhebu. Ōpa iirä gua masiri mera iibiribu. Goãmu guare İġu mahicü İġu turari mera eropa iibu gua. ¹³⁻¹⁴ Eropirä ðaro were muare gojabeorä diaye ta werebu muare ðaro mua masiburire. Dohpague guare ðaro masinibeaa mua. Gua árĩricurire mua turaro masicü gahmeä gua. Eropirä mari Opu Jesucristo dujaricü gua mera mucubiriräca mua. Mua mera gua mucubiridiro dopa ta mua sä gua mera mucubiriräca.

15-16 Eropa arĩ pepigu Macedonia yebague wagu mua pohrogue wamuhtadiarabu. Eropigu muare ihatariwahgãboya. Eropigu erogue ejadigu dujarigu dipaturi mua mera bajamenurigã árĩboya yuhu. Eropirã pesubu mua mera yu árĩcũ ĩarã turaro mucubiriboya mua. Mua pohrogue yu árĩcũ ĩanirã Judea yebague yu wacũ ĩarã yare itamuboya mua. 17 “Wagura,” yu árĩcũ peenirã árĩrã, yu wabiricũ ĩarã “Pablo Jesure umupeobirã iro dopa guyagu iĩnumi,” ĩarĩ pepiri mua? “‘Wagura,’ arĩqueregu ĩgu gamero mari pohro aridiabirĩnumi ĩgu,” ĩarĩ pepiri mua yure? “Īgu arĩdiro dopa iibeami,” ĩarĩ pepiri mua? 18 Eropa arĩ guyagu iibeaa yuhu. Eropigu “Īgura,” arĩgu yu arĩdiro dopa ta diaye ta iiaa yuhu. Irire masimi Goãmu. 19 Yuhu, Sila, Timoteo mera Jesucristo Goãmu magu yare muare werebu. Īgu Jesucristo “Īgura,” arĩgu, diaye ta iigu ahrimi. Goãmu ĩgu arĩdiro dopa ta Cristo iimi. 20 Árĩpehreri ĩgu Pagu ĩgu masare “Ōpa ðaro iigura,” arĩ wererare Cristo iipehocãdi árĩmi. Īgu eropa iigu árĩcũ gua ĩgu yare gajirãre werea Goãmure erã umupeoboro dopa. 21 Cristo yarã marire árĩniguicũ iigu Goãmu ta ahrimi. Eropigu ĩgu yare weremorãre marire apimi ĩgu. 22 Eropigu ĩgu yarã mari árĩcũ ĩagu irire marire masicũ iimi ĩgu. Eropigu ĩgu Espiritu Santore mari mera arĩdoremi ĩgu. Mari mera árĩcũ ĩha Goãmu ĩgu marire ðaro iiburire masia mari.

23 Dohpaguere yuhu mua pohro wabirirare diaye ta weregara muare. Yu wereri diaye árĩcũ Goãmu masimi. Īgu ta yu pepirire masimi. Mua ñero iira dipuwaja turidiabigu mua pohroguere wadiabiribu. Erãre bujawerecũ ĩiri, arĩgu mua pohroguere Corintoguere wabiribu. 24 Eropirã “Muare dorerã ahraa gua,” arĩrã iibeaa. Eropirã “Ōpa Cristore umupeoro gahmea muare,” arĩrã iibeaa gua. Mua Cristore ðaro umupeotuhabu. Muare umupeonemocũ ĩirã mua ðaro mucubirirã árĩcũ iidiaca gua.

2

1 Wabigu ðpa arĩ pepibu: “Dipaturi erãre bujawerecũ iidiabeaa. Eropigu dohpaguere wabeaa,” arĩ pepibu. 2 Muare bujawerecũ iidiabeaa. Mua bujawerecũ ĩagu yupu mucubiribiriboya. Eropirã yure mucubiricũ iimorã árĩbiriboya mua sã. 3 Eropigu mua pohrogue wabiribu. Wabigu mua árĩricurire amuboro dopa muare gojabeobu. Mua yare mucubiricũ iibonirã arĩquereã ta yare bujawerecũ iiboya mua mua pohrogue yu wacũ. Mua mera yu mucubiricũ mua sã yu mera mucubirirãca. Irire masia yuhu. Eropigu mua mera bujawerediabigu “Wabeaa,” arĩ, carta gojabeobu. 4 Eropigu muare gojagu wuaro pepigu ñero sĩporãcugu, turaro co deco wiriri mera muare gojabeobu. Eropa gojagu muare bujawerecũ iidiabiribu. Muare yu buriã mahirare muare masicũ iidiagu muare eropa gojabeobu.

Erã mera majagu ĩgu ñero iirare cãdijidoreñumi Pablo Jesu yarãre

5 Mua mera majagu ĩgu ñero iira mera yare bujawerecũ iimi ĩgu. Muare ĩgu turaro bujawerecũ iidiro dopa ta yu sãre wuaro bujawerecũ iimi ĩgu. Īgu marire eropa buriã bujawerequerecũ ta wuatariaro dipuwaja moadorebeaa dohpaguere. 6 Bajarã mua mera majarã ĩgu ñero iira dipuwaja moatuhãnorã. Iripãta dipuwaja moa duhuro gahmea ĩgure. 7 ĩgure mua dipuwaja moaniguicũ buriã bujawerebocumi ĩgu. Eropigu

Cristo yare duhubocumi. Eropirã ĩġu ñero iirare cãdijique mua. ĩġure itamuque ĩġu ðaro sĭporãcuboro dopa. ⁸ Eropirã ĩġure ðaro iique mua ĩġure mua mahirare ĩġu masiboro dopa. Mua eropa iicũ burigã gahmea yũũ. ⁹ Ero core muare gojabeogu “¿Diaye ta yũre yũhrirãcuri?” arĩ pepiġu gojabeobũ muare. Yũre mua yũhricũ ĩadiagu gojabeobũ. ¹⁰⁻¹¹ Dohpagueere ĩġu ñero iirare mua cãdijicũ ĩagu yũ sã ĩġu ñerire cãdijigura. Yũre ñero iibirimi ĩġu. Muapũre ñero iidi arĩmi. ĩġu eropa iidiġu arĩquerecũ ta ĩġu ñero iirare cãdijia yũ sã. Muare ðaro itamudiagu Cristo ĩġu ĩhabeoro ĩġu ñero iirare cãdijia. Irire cãdijia Satana marire ĩġu tarinũgabiriboro dopa. ĩġu mari ñerire iicũ gahmemi. Irire ðaro masia. Eropirã Jesu yarã erã ñeri iirare ġũnaniġuibea mari Satana yapũre iiri arĩrã.

Troa waĩcũri maca arĩġu Titore bocabigu wũaro bujawere pepiũumi Pablo

¹² Eropiġu Troa waĩcũri macague Cristo yare buhegu ejaribũ. Eroque yũ ejacũ bajarã masa ðari buherire peediarã arĩma. Mari Opũ ĩġu itamuri mera ĩġu yare yũ buherire peerã bajarã masa arĩma. ¹³ Eropa arĩquerecũ ta mari acawereġu Titore bõcatĩribirinijagu wũaro bujawere pepiġu erore arĩmasibiribũ, Eropiġu ero majarãre goeriseretuhagu Macedonia yebague wabu wabu ĩġure amagu.

Goãmũ marire tarinũgacũ iimi, arĩ gojaũumi Pablo

¹⁴ Goãmũre mucubirimi mera “Õhaa,” arãa. Goãmũ ñerire arĩpehrerire tarinũgagu àhrimi. Cristo yarã mari arĩcũ ĩagu marire tarinũgacũ iimi. Poresudiro poresu sehyaboro dopa ta àhraa mari. Poresu sehyaro dopa ta Goãmũ dorero mera arĩpehreroguerẽ Cristore masicũ iiaa mari. Eropa ĩġure masirã erã ðaro pepima. ¹⁵ Cristo yarã arĩrã masare Cristore ġũnacũ iiaa mari. Mari eropiicũ ĩha Goãmũ mucubirimi. Masare Cristore ġũnacũ iicũ erã ĩġu arĩrĩre masima. Goãmũ ĩġu taumorã Cristo arĩrĩre masima. Gajirã erã peamegue wamorã sã Cristo arĩrĩre masima mari mera. ¹⁶ Cristo arĩrĩre masirã erã peamegue wamorãpũ peamegue erã waborore masima erã. Goãmũ ĩġu taumorãpũ arĩpehrerĩnũri ĩġu mera erã arĩburire masima. Eropirã ire Cristo yare mari mari gamero mera buhe ojogorocumasibea. Goãmũ ĩġu itamuri mera ta mari ĩġu yare buhe ojogorocumasia. ¹⁷ Bajarã gajirã Goãmũ yare buhemaacãma niyerure wajatadiarã. ġũpũ erã iro dopa ta iibea. ġũyaro mariro Cristo ĩġu turari mera ĩġu yare buhea ġua. Goãmũ ġuare ĩġu obeorã arĩrã ĩġu ĩhurore ðaro buhea ġua.

3

“Õpa iĩġura,” Goãmũ ĩġu arĩ werepirare mama buherire wereũumi Pablo

¹ ¿Dipaturi ġua arĩricũrĩre muare wererã iiri ġua mua pepicũ? Gajirã muare erã buheborõ core erã buheri queoro arĩrĩre masidiarã erã ġojarapũre serẽmuhtabũ mua erãre. ¿ġũare masituhquererã ta iripũnore serẽri mua ġuare? ¿O gajirã pohroque ġua buherã warã iripũnore ġuare aĩġãro ġahmeri mua pepicũre? ² Iripũnore gamebea ġua. Muapũre ðari gohrotonirãre arĩpehrerã gajirã ĩarã muare ġua ðaro buherare masirãcoma. Muare ġua buhecũ Cristore umupeorã ĩġu yarã arĩnũgabũ mua. ³ Cristo yarã mua arĩcũ ĩarã masa muare Goãmũ ya buheri ġohrare

gua queoro buherare masituhama. Muare buherã Goãmũ yagu Espiritu Santo ïgu itamuri mera buheabũ. Ïgu Goãmũ ojocarigu gohra ährimi. Gua eropa buhecũ peerã Cristore ðaro gahmeabu mua. Eropa gamerã mua áricũ gajirã muare iarã Cristo yarã mua áririre ðaro masima. Eropa masirã muare Goãmũ ya buheri gohrare gua queoro buherare masima masa.

⁴ Eropa wacã masia gua Goãmũre guñaturari mera. Cristo ïgu itamuri mera eropa guñaturaniguia mari. ⁵⁻⁶ “Gua gamero i mohmerire iiaa gua,” arĩmasibea. Goãmũ ïgu itamuri mera ire iiaa gua.

Eropigu dohpaguere ïgu wererire ðari buherire Goãmũpu ðaro guare buhemasicũ iimi. Eropa buherã iribojegue ïgu doreri Moisere ïgu apira dorerire buhebeaa. Espiritu Santo mera mari Goãmũ mera ðaro áriburipure buhea gua. Ïgu dorerare mari gamero mera ne bocatũbeaa. Eropa mari bocatũbirira dipuwaja peamegue waboya mari. Espiritu Santopũ mari Goãmũ mera áripehrerinuri ðaro árniguicũ iimi. Õari buheri buhecũ peeñanirãre ðaro árniguicũ iimi.

⁷ Goãmũ ïgu dorerire utãmijirigue gojanijagu Moisere apiñumi. Ïgu eropa apira puhru ïgu áriro gosesiriri dehyoamuriyoro Moisere “Goãmũ ïgu apira ðari ähraa,” arĩro dopa. Eropro Moise diapo burigã gosesiriyoro. Cuimiju áriyoro. Puhru ïgu gosesiriri pehrerisubũ ïgu áriquerẽcũ ta masa ïgure ne ïamehtumasibiriñuma. Iri dorerire ïgu apira puhru iri dorerire iibirã masa dipuwajacurã peamegue wamorã wañuma. Eropro iri doreri masare peamegue wadorequerero ta, Goãmũ ïgu áriro gosesiriri mera árnugayoro. ⁸ Iri doreri tauro ðari buheripũ “Jesucristo masare taumi,” arĩ buheri ðataria. Iri buherire gajirãre mari buhecũ erã ðaro peecũ Goãmũ ta erã mera árigucumi ïgu Espiritu Santo mera. Eropro iribojegue maja doreri tauro Cristo ya buheripũ ðataria. ⁹ Goãmũ Moisere apira doreri iribojegue maja masare peamegue wadoreyoro. Eropa dorequerero Goãmũ ïgu gosesiriri mera árnugayoro. Iri tauro ðari buheripũ Goãmũ ïgu turari mera ähraa. Iri buheri mera ðarã wahama masa Goãmũ ïgu ïacũ. ¹⁰ Iribojegue Goãmũ ïgu doreripũ turari áriquerero dohpaguere bu gohra ta ähraa. Õari buheripũ iri tauro turatariari ähraa. Iri buheri mera umaroguere mari wamasia. ¹¹ Iribojegue Goãmũ ïgu doreri Moisere ïgu apira doreri Goãmũ gosesiriri mera árnugaquerero ta pehreburi áriyoro. Õari buheripũ “Jesu marire taugucumi,” arĩ buheripũ árniguicãroca. Eropro “Iri doreri tauro ðari buheripũ ðataria,” arĩ masia mari.

¹² Irire eropa masirã, güiro mariro ðari buherire ðaro werepehocãa gua. ¹³ Moise gua iro dopa áribiriñumi. Ïgure Goãmũ ïgu gosesiriri pehrerore yũ acawerã masiri arĩgu dopa ïgu diapore suhri gasiro mera cãhmotacãñumi Moise. ¹⁴ Moise ïgu diapore ïgu cãhmotacã Goãmũ gosesirire ïgu ðarire erã ñecu sumarã ïhamasibiridiro dopa ta erã dohpaguere ðari buherire ðaro masibeama. Goãmũ wererire iribojegue erã gojarapũrre erã buherã ne masibeama erã Israe masapu. Cristore gamebirã masisome erã. Ïgure umupeorã tamera ïgu yare masirãcoma. ¹⁵ Dohpague sãre Israe masa Goãmũ dorerire Moisere ïgu apirare buhequererã, erãre cãhmotaro dopa ta ne masibeama erã. ¹⁶ Erã mari Opure Jesucristore erã gamecũ ïgu ta erãre masicũ iimi. Iri cãhmotariñere airo dopa ta mari Opũ marire ïgu yare ðaro masicũ iimi. ¹⁷ “Mari Opũ,” arĩrã Espiritu Santore arĩrã iiaa. Mari Opũ ïgu Espiritu

Santo mari mera İġu árċiũ İġu yarã áhrraa. Eropã árĳrã “Iribojegue maja dorerire iiro gahmea Goãmu yarã árĳmorã,” arĳbeaa mari. ¹⁸ Eropirã Jesu yarã árĳrã, Jesucristo İġu õarire İhmurã iiaa mari. Eropiġu mari Opũ Espĳritu Santo marire gohrotocũ iimi. İġu eropa iicũ Cristo õaġu árĳdiro dopa ta õarã warã iiaa mari sã.

4

¹ Goãmu ġuare mojomoro İaġu, õari buherire weremorãre apimi ġuare. İġu eropa apicũ masirã İġu yare buherã duhudiabeaa. ² Masa İabiro ñerire iicoreri ġuhyasiuri áhrraa. Irire ġuapũ ne iibeaa. İġu yare buherã ġuayarire buhebiribu. Eropirã ġua Goãmu yare ne gohrotobeaa. Eropã iibirã õari buherire õaro diaye buhea ġua Goãmu İġu İhuro árĳrã. ġua eropa árĳricurire árĳpehrerã õaro masima ġuare İarã gohra. ³ ġua iri buherire õari buherire werea. ġua irire buhequerecũ ta ġajirã masibeama. Eropã masibirãpu peamegue wamorã áhrrima. ⁴ Satana ñegu i yeba majarã opu erãre Goãmu yare masibiricũ iimi. Cuiiri İhajabirã erã İhajabiro dopa ta masibirã wacũ iimi erãre. Õari buherire Cristo İġu turarire erã masibirã wacũ iimi İġu erãre. Cristo Goãmu İġu árĳricurire opami. İġu Cristo Goãmu gohra ta áhrimi. ⁵ ġua buherã “ġuapũre umupeoġue,” arĳ buhebeaa. Õpa arĳ buhea ġua: “Jesucristopũ áhrimi mari Opũ,” arĳ buhea ġua. ġuapũ Jesure yũhrirã áhrraa. Eropirã muare itamurã áhrraa ġua. ⁶ Negohraguere õpa arĳ dorepu Goãmu i umũ naitũaro árĳcũ: “Boyoro árĳque,” İġu árĳcũ boyoa wayoro. Eropiġu dohpaguere İġu ta iri turari mera marire masicũ iimi boyoro árĳro dopa. Eropã marire masicũ iġu İġu õaro árĳricurire marire masicũ iimi. Jesucristore masirã İġu Paġu İġu õaro árĳricurire masia mari.

Cristo turari mera mari áhrraa, arĳ gojañumi Pablo

⁷ Eropã masirã árĳrã, Goãmu İġu turarire ġajirãre masicũ iiaa. Eropã iirã árĳquererã ta turabirã áhrraa ġuapũ. Mátasoro mata wahrirasoro iro dopa ta ġua sã turabirã áhrraa. ġua eropa turabirã árĳquererã ta ġua masare Goãmu yare werecũ İarã, ġua gamero mera iimasibirirare İarã õpa arĳ masirãcoma erã. “Goãmu turari mera eropa arĳ wereniġuma marire,” arĳrãcoma masa. Eropirã Goãmupure umupeorãcoma. ⁸ Árĳpehrerã ġajirã ġuare ñero iiquererã ta Goãmu ġuare taucũ erã ġuare tarinũgabeama. Eropirã ġua ġarĳborequererã ta ne Goãmu yare buhe duhudiabeaa. ⁹ ġuare erã ñero iinĩġuquerecũ ta Goãmu ġuare eropa itamunĩġucãmi. ġuare erã pamehpiquerecũ ta İġu itamuri mera sĳrĳbeaa ġua. ¹⁰ Erã wejẽsũmorã árĳcãrã tiiaa ġua Cristo i yebaguere ñero İġu taridiro dopa ta. Erã wejẽsũmorã árĳquererã eropa árĳnĩġuirã tiiaa ġua sã Cristo İġu ojocaririre İhmumorã. ¹¹ Eropirã umuri nucu ġajirã ġuare wejẽmaja ġuhya áhrrima Cristo yarã ġua árĳri dipuwaja. Õpa ta ñero tariquererã árĳnĩġuia ġua Cristo İġu ojocaririre İhmumorã. ¹² Eropirã muare ġua buheri dipuwaja ġuare ġajirã wejẽmaja ġuhya áhrrima. ġua buherire mua peenirãpu umuri nucu Goãmu mera árĳmorã áhrraa.

¹³ Goãmu yare erã gojarapũ õpa áhrraa: “Goãmure umupeobũ. Eropiġu İġu yare werebu,” arĳ gojañumi iribojegue majagu. ġua sã yujuropa ta áhrraa. Goãmure umupeorã İġu yare werea. ¹⁴ I sãre õaro masirã İġu yare werea ġua. Cristo İġu sĳrĳra puhru Goãmu İġure masudi árĳmi. Eropiġu

Cristo yarã mari áricũ ïagu ïgu mari sãre masugucumi. ïgu eropa masura puhru ïgu pohrogue aïgãgucumi marire. ¹⁵ Eropirã muare itamudiarã ñero taria gua. Eropirã Cristo yarã mua bajarã warã, bajarã mua Goãmure mucubiriri mera umupeorãca. ïgure “Õhaa,” arĩrãca.

¹⁶ Mua eropa umupeocũ ïarã, gua ñero tariquererã ta bujawerebeaa. Eropirã Cristo yare were duhubeeaa. Gua dũpu umuri nũcu turabiri wahgãro iiaa. Eropa turabiri wahgãquererã ta õaro siporãcua Jesucristore guñaturari mera. ¹⁷ Dohpaguere ñero tariquererã ta puhru ñero tarisome. Eropirã Cristo yare were duhubeeaa. Iri ñero mari tariri pehrea waroca. Eropirã marire merogã ñero tariro gahmea. Eropa mari ñero tarinirã árirã, puhruquere wuaro mucubiriri mera árniguirãca Goãmũ mera. Eropirã mari ñero taridiro tauro burigã mucubiriri mera eropa árniguicãrãca. ¹⁸ Eropirã mari ïarire dohpaguere mari warore guñanurubeaa. Mari ïabiriripure puhru mari Goãmũ mera árniguiburire guñanurua. Mari dohpaguere ïari pehrea waroca. Mari ïabiriripu árniguicãroca.

5

¹ I sãre masia mari: Wihire mari cõadiro dopa ta mari dũpũre cõãrãca. Eropigũ mama wihi iibodiro dopa ta Goãmũ mama dũpũre iigucumi. Eropigũ iri dũpũre marire ogucumi. Eropirã umaroguerẽ eropa árniguirãca iri dũpu mera. Irire masirã ñero tariquererã Goãmũ yare duhubeeaa. ² Eropirã iri dũpũre umaro maja dũpũre turaro gamerã, mari eropa coreniguirã iiaa. ³ Suhrirore turaro mari sañadiaro dopa ta iri dũpũre turaro gahmea mari. Eropa ta cohrea mari iri dũpu marirã árdiãbirã. ⁴ Dohpague maja dũpũre cõãdiãbiriquererã umuri nũcu Goãmũ mera mari áriburi dũpũre burigã gahmea mari. Eropirã i mari dũpu siriburi dũpu iri áricũ masirã, mama dũpu mera Goãmũ mera eropa árniguidiaa mari. ⁵ Mari ïgu mera árniguiborore amuyudi árimi Goãmũpu. Eropa amuyugu ïgu Espiritu Santore omũhtami marire. Eropigũ ïgu Espiritu Santo mari mera áricũ ïha marire Goãmũ ïgu iiborore, “Diaye ta áhraa,” arĩ masia mari.

⁶ Eropirã Goãmũ mera siporã turarã áhraa. Güiro mariro áhraa mari. I sãre mari masia. I dũpu mari árnũhtara dũpu mera árirã, mari Opũ pohro árnibeaa. ⁷ Umãro majare Goãmũ sãre mari ïabiriquererã ta “ïgu diaye ta áhrimi,” arĩ masia mari. Eropirã ïgure umupeoa. ⁸ Eropirã mari Goãmũ pohro waborore masia. Mari dũpũre i yeba maja dũpũre cõãrã mari Opũ mera umarogue mari árdiaa. ⁹ Eropirã Cristore mucubiricũ iidiaa mari. I yeba maja dũpu mera árirã ïgure mucubiricũ iidiaa mari. Umãroque árirã sã ïgure mucubiricũ iidiaa. ¹⁰ Áripehrerã Cristo pohrogue mari wacũ ïagu ïgu mari iirare beyegucumi. Eropiro mari iira masisũroca. Eropigũ marire õarire mari iira wajare ogucumi. Ñerire mari iira waja sãre ogucumi. ïgu eropa beyegu áricũ masirã ïgure mucubiricũ iidiaa mari.

Goãmure mari mera õaro áricũ iimi Cristo, arĩ gojañumi Pablo

¹¹ Eropirã guhyadiaro mera mari Opũre umupeoro gahmea marire. ïgu marire eropa beyeburire masirã, Cristo yare masicũ iiaa gua masare. Erãre güisãrã, ïgure umupeocũ iidiaa gua. Gua õarã áririre Goãmũ õaro masimi. Gua eropa iirire mua sãre õaro masicũ gahmea yũhũ.

12 Dipaturi gua ðarã árĩrire muare wererã iibeaa. “Gajirãre tarinugaa,” arĩmaacãnirãre mua wereburire eropa wererã iiaa gua muare. Erã basi eropa arĩ pepirãpu erã pepiriguere ñerã, guyaricurã árĩquererã ta masa erã ihuro dihtare ðarã iro dopa iirima. Eropirã mua guare mucubiriboro dopa, “Ôaro iirã iima,” gajirãre mua guare arĩ cãhmotaburire i árĩpehrerire muare were gojarã iiaa. 13 ¿Gua ôpa arĩ wererã pee masibirã ãhriri gua mua ãacũ? Masa guare ãarã pee masibirã iro dopa ihama guare. Goãmu yare gua werecũ ãarã eropa ãabocoma guare. Erã eropa arĩ ãabonirã árĩquererã ta pee masirã ta ãhraa gua muare eropa itamumorã. 14 Cristo ãgu guare mahicũ ãarã masare eropa itamua. ãgu eropa mahicũ ãarã ãgu yare eropa buheniguia gua. Marire mahigu yujugu ta Cristo mari árĩpehrerã ya ñeri dipuwajare sĩridi árĩmi. Eropigu árĩpehrerã mari ñeri dipuwajare sĩrimorã árĩnirãre sĩribasadi árĩmi. Irire guñarã ãgu yare iiniguia gua. 15 Árĩpehrerã mari ñeri dipuwajare sĩridi árĩmi ãgu mari gamero dopa mari iibiriboro dopa. Eropigu ãgu gameripure iidoregu sĩridigu árĩmi ãgu. Maripure Goãmu pohrogue mari ejaborore eropa sĩridi árĩmi. ãgupu mari ya árĩburire sĩrira puhru masa muriadi árĩmi. Eropirã mari gamero dopa mari ãaribejarire iibirã ãgu yare iiro gahmea pare marire. 16 Eropirã dohpaguere Jesure gamebirã gajirã erã árĩricurire ãha werewuaro dopa ne arĩ ãabeaa gua. Iribojeguere gua Cristore eropa ãaquererã dohpaguere ãgure ðaro masia. 17 Eropirã árĩpehrerã Cristo yarã warã ðaripure gohrotoa mari. Iribojegue mari gamero mari árĩrare duhucãa mari. Dohpaguepure ðaripure corerã iiaa mari.

18 Goãmupu marire ðarire gohrotocũ iimi. Iribojegue mari Goãmu mera ðaro árĩbirimuriribu. Eropigu Jesucristo mari ñeri iira dipuwaja sĩribasara mera Goãmu marire ãgu mera ðaro árĩcũ iidi árĩmi. Eropa iigu guare ãgu yare buhedoregu apimi. Eropa buherã, gajirãre Goãmu mera erã ðaro árĩcũ iiaa gua sã. 19 Ôpa arĩ masare weredoremi Goãmu guare: “Mari masa ãgu mera ðaro árĩbirinirã árĩquerecũ Goãmu Cristo sĩrira mera marire ãgu mera ðaro árĩcũ iimi. Eropigu Cristore mari umupeocũ ãgu mari ñeri dipuwajare dipuwaja moabeami Goãmu marire,” arĩ weredoremi Goãmu guare. 20 Eropirã Cristo yare weremorã ãgu obeonirã ãhraa gua. Goãmu ãgu basi muare ãgu werebodiro dopa ta guapu muare ôpa arĩ werea: Cristore werebasarã iiaa. Eropirã muare werea. Goãmure mua ãhaturirare iripãta duhuque. 21 Cristo ãgu ñerire iibiriquerecũ ta Goãmu ãgure mari ñeri dipuwajare sĩrdoredi árĩmi. Eropa iigu mari ñeri dipuwajare dipuwaja moadi árĩmi Goãmi ñeri dipuwajare dipuwaja moabeami Goãmu marire,” arĩ Jesucristore. ãgu eropa iidi árĩmi Cristo yarã mari wacũ, Goãmu iro dopa ðarã mari árĩboro dopa.

6

1 Goãmu eropa iigu ãgu muare ãgu ðaro mojomoro ãarare ãhmumi. Eropirã Goãmu yare mohmebasarã árĩrã ire turaro muare iidorea gua. Goãmu ðaro iirare ðari buherire mua peediro dopa ta iique mua. Mua peediro dopa ta mua iibiricũ mua peera duhpiburi árĩbeaa. 2 Ôpa arĩmi Goãmu ãgu yare erã gojarãpũge:

beamĩ Goãmũ marire,” arĩ Muare yũ ðaro iiburinuri árĩcũ mua serẽrĩre pee yuhrigura. Eropigu muare peamegue wabonirãre yũ tauburinuri árĩcũ itamugura, arĩmi ãgu.

Peeque mua. Dohpaguere Goãmu masare İgu ðaro iiburinuri àhraa. Dohpaguere masa Jesucristore umupeoburinuri àhraa Goãmu eràre tauboro dopa. Eropirã dohpaguere İğure umupeoro gahmea, arı werea gua.

³ “¿Öari buheripure gamebiribocuri?” arırã, ne merogã gajirãre ñero iibeaa gua. Gajirãre ne ñero arı wereniguibeaa. ⁴ Irire iibirã Goãmu pohro majarã gua árırire muare masicũ iidiaa. Eropirã İgu yare buherã òpa àhraa gua: Ñero tarirã gajino moorã bocatıua. Guare erã ñero iiquerecũ ta guaro mariro àhraa. ⁵ Öpa ñero taribu gua: Masa guare pacũ, peresu erã iicũ, masa bajarã guare wejèdiarã erã gaguinigucũ peerã ñero taribu gua. Gua turaro mohme oèarã sã, wuja püriquerecũ ta carıbirã sã, oaboarã sã ñero taribu. ⁶ Eropirã ðaro árıricuri mera diaye buhebu. Eropirã Goãmu yare buherã ðaro masiri mera buhebu muare. Eropirã ne guabiribu gua. Eropirã ðaro mera buhebu gua muare. Eropã iirã Goãmu pohro majarã gua árırire İhmurã iibu gua muare. Espıritu Santo İgu itamuri mera eropa ta Goãmu pohro majarã gua árırire İhmurã iibu gua muare. Eropirã diaye muare gua mahicũ İarã İgu pohro majarã gua árırire masia mua. ⁷ Eropirã öari buherire diaye muare werecũ İarã, Goãmu turari mera gua iicũ İarã, İgu pohro majarã gua árırire masia mua. Öaripu árıpehreri gua iira gua mojo iro dopa àhraa gua ðaro cãhmotaboro dopa. Iri öarire iirã gua watıre cãhmotarã iiaa. Eropirã iri öari gua iira mera gua İğure tarinugaa. ⁸ Eropã iirã gajirã guare umupeoma. Gajirãpu guare umupeobeama. Gajirã ðaro wereniguima guare. Gajirãpu ñero arı wereniguima guare. Diaye gua werequerecũ ta “Guyarã àhrima,” arı weresãma gajirã guare. ⁹ Gajınurire guare masirã dopa iima. Gajınurire guare masibirã dopa iima. Guare erã wejèdiaquerecũ ta ojocarınia gua. Erã burigã panirã árıquererã ta ojocaria gua. ¹⁰ Gua yujuyerinuri bujawererã árıquererã ta, eropa mucubiriniguia. Mojomorocurã árıquererã ta erãre öari buherire buherã erãre wuaro doberire gua obodiro dopa ta iirã iiaa erãre. Gajino moorã árıquererã ta, diaye ta Goãmu yare opapehocãa gua.

¹¹ Corinto majarã, yu acawererã, muare ðaro mera werepeho gojabu gua muare. Muare turaro mahirã eropa werebu. ¹² Guapu muare mahi duhubirabu. Muapu guare mahibiriñaria. ¹³ Eropıgu yu porãre yu werebodiro dopa ta muare weregura: Muare gua pepidiro dopa ta mua sã eropa ta ðaro pepique guare. Eropirã guare mahıque mua.

Cristore umupeobirãre wapıcudorebiriñumi Pablo

¹⁴ Eropirã Cristore umupeobirã mera eropa wapıcuniguibiricãque. Erã mera majagu árıbita. Yujuro mera árıbeaa mua. Öarire iigu, ñerire iigu mera ðaro árımasibeami. Boyoro iro dopa árırã Goãmure gamerã àhrima. Naitıaro iro dopa árırã Goãmure gamebirã àhrima. Eropirã erã perã game wapıcumasibeama. ¹⁵ Eropıgu Cristo watı mera yujuro pepibeami. Eropıgu Cristo yagu, Cristore umupeobıgu mera ðaro game wapıcumasibeami. ¹⁶ Goãmure umupeori wıhıgue goãmarã wéanırãre mari apicũ queoro wabeaa. Eropã ta Cristo yarã Cristore gamebirã mera wapıcunıguicũ queoro wabeaa. Erã pe curu majarã yujuro mera erã árımasibeama. Goãmu wihi iro dopa àhraa mari. İgu wihi árıro dopa ta mari mera àhrimi İgu. Öpa arıñumi Goãmu İgu yare erã gojarapıgue:

Erā mera ta árfigura yuhu. Eropigu erā watope ta eropa árfíniguigura. Yuhu Goāmu erā opu árfigura. Eropirā erāpu yaharā masa árfirācoma, arīñumi ĩgu.

¹⁷ Eropigu ōpa arīnemoñumi ĩgu mari Opu:

Erā ñerā mera ne dujabita. Eropirā erāre wapicubita. Yure gamebirā yare ñerire ne iibiricāque. Eropigu yāpu muare wapicugura. ¹⁸ Eropigu mua pagu árfigura. Muapu yu porā árfirāca, arīñumi mari Opu turatariagu.

7

¹ Yu acawererā, yu mahirā, muare ire weregura: I árfipehrerire Goāmu marire ĩgu eropa arī werēcū ĩarā árfipehrerire mari dupure goroweorire duhurā. Eropirā mari pepiri sāre goroweorire duhurā. Eropirā Goāmure ōaro umupearo mera ñero iiro mariro árfirā mari.

Pablo mucubiriri mera wereñumi Corinto majarāre

² Ōaro guare mahique. Ne merogā mera ñero iibiribu gua muare. Eropirā gua buheri mera muare ñero iicū ne iibiribu gua. Ne yujugare mua mera majagure gayari mera waja gamebiribu. ³ Eropa arīgu “Dipuwajacurā áhrra mua,” arīgu iibeaa muare. Muare mahia gua. Irire muare weretuhabu. Ojocarirā yuju curu ta áhrra mari. Mari sīrira puhrugue sāre yuju curu ta árfirāca mari. ⁴ Ōaro mua iirare masia yuhu. Eropigu muare guñabeogu mucubiria. Eropirā gua ñero taririsubure mua ōaro iira quererere pee burigā mucubiribu yuhu.

⁵ Eropi Macedonia yebague gua ejara puhru, erogue ejarā ne soobiribu gua. Eroguere ñero taribu gua. Gajirā gua mera game duyasoma. Eropirā “Cristo yare duhubocoma,” arīrā Cristo yarāpure wuaro guñaricubu gua.

⁶ Gua eropa ñero taricū Goāmupu guare ōaro siporācucū iimi. ĩgu marire bujawererāre mucubiricū ĩgu áhrimi. Eropigu Tito gua pohrogue ĩgu dujariro mera guare mucubiricū iimi Goāmu. ⁷ Tito ĩgu eracū ĩarā mucubiribu. Iri dihtare mucubiribiribu. Muare ĩgu ōari quere werēcū sāre turaro mucubiribu. Yure mua ĩadiarare weremi guare. Yure mua bujawerera sāre weremi ĩgu. Yure “Goāmu yare ĩgu iimi Pablo,” mua gajirāre arī werera sāre weremi ĩgu. ĩgu eropa arīcū peegu turaro mucubiribu yuhu.

⁸ Ero core yuhu mua ñero iirare were gojabeorapū mera muare merogā bujawerecū iiribu. Eropa iidigu árfiqueregu ta “Iri carta mera ñero iibu,” arībeaa. Iripure mua buhera puhru bujawereyoro mua. Eropigu ne gojabeora puhru ta “¿Ñero iiari yuhu?” arī pepiribu. Eropa arīqueregu ta “Ñero iibu,” arībeaa dohpaguere. ⁹ Dohpague tamerare mucubiria yuhu. Mua bujawererare peegu mucubiribeaa. Mua bujawererā ōaripure gohrotorapure peegu mucubiria yuhu. Mua ñero iirare bujawerecū ĩagu Goāmupu muare ōarire gohrotocū iidi arīmi. Eropirā muare bujawerecū iirā ñero ii goroweorā iibiribu gua muare. ¹⁰ Eropirā Goāmu ĩgu gamero dopa ta bujawererā, mari ñerire bujawere ōaripure gohrotorāca. Eropa ta mari bujawerecū ĩagu mari peamegue wabonirāre taumi Goāmu. Eropiro mari eropa bujawerecū ōha áhrra marire. Cristore gamebirāpu erā bujawerequererā erā ñerire duhubirā peamegue wamorā arīnima. ¹¹ Muapu Goāmu ĩgu gamero dopa ta bujawereyoro. Mua eropa bujawererā ōpa iirā waicubabu mua: Dohpaguere ñerire iirāre eropa ĩacābirā waicubabu mua. Ne iri ñerire gamebirigohracāyoro mua.

Erã ñeri iira mera guayoro. Erãre ñerire iirire duhudorerã waĩcuabu mua. Eropirã erã ñerire guirã waĩcuabu mua erã iro dopa iiri arĩrã. Eropirã yure mahirã yure iadiayoro mua. Eropirã ñeri iigure dipuwaja moayoro. Iri arĩpeherrerire mua iira mera iri ñeri dipuwaja marirã mua arĩrere ihmuabu mua guare. ¹² Iribojegue ñero iigure muare were gojabeoqueregu ta ĩgure itamubu eropa arĩ gojabeobiribu yũũ. ĩgu ñero iidigu sãre itamubu eropa arĩ gojabeobiribu. Muapure itamubu iripũre gojabeoba. Goãmu ĩgu ihurore guare ðaro umupeoa mua. Irire mua umupeorare mua ðaro gunãboro dopa iripũre gojabeoba muare. ¹³ Eropirã Tito mua iira quere guare werecũ peerã burigã mucubiria gua.

Tito sã mua mera turaro mucubiricũ iha gua sã mucubiribu. ĩgure mua ðaro mera bocatĩricũ peerã, mua mera ĩgu mucubirirare peerã, gua sã ðaro mucubiribu. ¹⁴ Negohraguere mua pohro ĩgu waboro corere mua mera yu mucubirirare, ðarã mua arĩrare werebu ĩgure. Eropirã yu arĩdiro dopa ta ðaro iayoro mua ĩgure. Eropigu ĩgure yu arĩrare guhyasiribirabu. Titore muare gua werera diaye ta arĩbu dohpaguere ĩgu iadiro dopa ta. ¹⁵ Mua pohroge ĩgu ejacũ umupeori mera bocatĩriayoro mua. Eropirã guhyadiaro mera iarã tarinũgaro mariro mua yuhrirã arĩcũ ĩapu ĩgu. Eropigu muare mahinemogu iimi ĩgu. ¹⁶ Dohpaguere ðaro yuhrirã Goãmu ĩgu gamero dopa ta mua ðaro mua iipehorã arĩcũ ðaro masia yũũ. Eropa masigu burigã mucubiria.

8

Cristo yarã arĩrã gajirãre eropa ocãro gahmea marire, arĩ gojañumi Pablo

¹ Gua acawererã, ire muare masicũ gahmea gua. Cristo yarã Macedonia yeba majarã Goãmu mahiri mera ĩgu mojomoro ĩari mera erã iirare muare weregura. ² Erã ñero tariquererã ta, niyeru moorã arĩquererã ta mahiro mariro eropa ocãma gajirãre. Cristo mera turaro mucubirirã arĩrã, erã gajirãre ðaro mera erã oparire eropa ocãma. ³ Muare arĩgu iiaa. Erã erã oparopẽ orã, tauñariro oma. Erã gamero oma erã. ⁴ Goãmu yarãre mojomorocurãre turaro itamudiarã, erãre erã obeorire aĩdorema guare. ⁵ "Ipẽ orãcoma erã," arĩ gua pepidiro tauro oma erã. Ōpa iima erã: Negohraguere niyerure erã oboro core mari Opu ĩgu gamerire iidiarã arĩtuhama. Eropirã Goãmu ĩgu gamero dopa ta gua sãre umupeori mera yuhririrã arĩma. Eropa iirã arĩrã erã niyeru sãre oma. ⁶ Erã eropa ocũ iarã Titore guapũ ðpa arĩbu: "Erãre mu buhenugadiro dopa ta Corinto majarã sãre erã mojomorocurãre oburire weregue," arĩbu gua ĩgure. ⁷ Eropirã muapũ arĩpeherrerire ðaro iirã arĩtuhaa. Cristore diaye ta ðaro umupeoa mua. Eropirã ĩgu yare ðaro werea. Eropirã Goãmu yare ðaro masia mua. Eropirã Goãmu ĩgu gamero dopa ta turaro iiaa. Eropirã guare mahia mua. Eropa ta ðaro iirã arĩtuhaa mua. Mua eropa ðaro iirã arĩquerecũ ta merogã duhyania mua iipehoburi. Mojomorocurã tamerare mua mojomoro ĩacũ gahmea gua. Eropirã erãre mua ðaro mera wuaro ocũ gahmea gua.

⁸ Eropa arĩgu muare doregohragu iibeaa yũũ. Eropa arĩ weregu iiaa muare. Gajirã mojomorocurãre erã turaro itamurare muare weregu iiaa. ¿Mua diaye ta gajirãre mojomoro ĩhari? arĩ masidiagu iiaa. ⁹ Mari Opu Jesucristopũ marire ĩgu mojomoro ĩarare masia mua. Iri diaye ta

āhraa. Īgu umaroguere wuaro opagu árīqueregu ta i yebaguere arigu mojomorocuro wapu. Eropigu mua ya árīburire sīrigu sã mojomorocuro wapu. Ōpa ta wapu muapu mua wuaro opaboro dopa, ĩgu mera mua ōaro árīniguicāborore.

¹⁰ Muare weregū iiaa. Ōpa pepia yupu: Yuju bojori wahaa mua mojomorocurāre odiara puhru. Muapu mojomorocurāre odiamuhtaribu. Eropirā erāre omuhtaribirā árību mua. ¹¹ Eropirā mua odiarare dohpaguere oho ojogorocūque. Mua odiamuhtadiro dopa ta dohpaguere ōaro opehoque. Eropirā pagari opará árīrā wuaro oque. Merogā opará árīrā merogā oque. ¹² Burigā mua odiari mera irire mua orare Goāmu mucubirigūcumī. Eropirā ōaro mua omasiropē oque. Mua oropē ta mucubirigūcumī. Mua opabirirare mua ocū gamebeami ĩgu.

¹³ “Mojomorocurāre oque,” arīgu erāre wuaro opadoregu iibea. Eropigu muapure mojomorocurā dujacū iidiabeaa. ¹⁴ Muare yujuro mera opadoregu eropa arīgu iiaa. Dohpaguere muapu wuaro opaa. Eropa opará gajinore moorāre omasia mua. Puhru muare gajino moocū erā sã muare omasima. Mua eropa game orā yujuropa oparáca árīpehrerā Cristo yarā. ¹⁵ Eropa ta āhraa Goāmu yare erā gojarapū: “Wuaro aīgu sã gajigu tauro opabeami. Merogā aīgu säre ne merogā duhyabeaa,” arāa Goāmu yare erā gojarapū.

Tito ĩgu mera majarā mera Corintogue wañumi

¹⁶ Eropi muare yu itamudiro dopa ta Tito sã muare itamudiami. Goāmupu ĩgu itamudiacū iimi ĩgure. Īgu eropa iicū ĩagu “Ōhaa,” arāa Goāmure. ¹⁷ Titore gua mua pohrogue wadorecū ĩgu ōaro mera yuhriami. Eropigu ĩgure mua pohrogue gua wadoreboro coregue ta mua pohrogue “Wagura,” arī guñatuhadi āhrami ĩgu.

¹⁸ Īgu gajigu Jesu yagu mera wapimoa obeobu gua. Tito mera majagu árīpehrerā gajirā Jesu yarā erā umupeogu āhrimi. Ōari buherire ōaro ĩgu mohmegu árīcū ĩarā ĩgure ōaro umupeoma. ¹⁹ Eropirā Jesu yarā ĩgure ta gahmeama gua mera curibure. Iri niyerure mojomorocurā pohrogue gua aīcū gua mera curibure gahmeama ĩgure. Iri niyerure mua gameneorare gua mojomorocurāre orā wacū ĩarā mojomorocurāpu “Marire mari Opū itamugu iimi,” arīrācoma. Gua eropa ocū, erāre burigā mari itamudiarare masirācoma. ²⁰ Eropirā i niyerure wuaro Jesu yarā erā odorerare gua aīrā ōaro ĩhadiburāca erā orare guare weresāri arīrā. ²¹ Mari Opū ĩgu ĩhabeoro diaye ōaro iidiaa gua. Eropirā masa erā ĩhuro säre ōaro iidiaa.

²² Eropa iimorā gajigure mari acaweregure obeorāca Tito sã mera. Gua ĩgu mera obeogure bajasuburi gajirāre ĩgu ōaro itamucū ĩabu gua. Eropigu dohpaguere muapu gajirāre mua itamudiacū ĩagu ero core ĩgu iidiro tauro ōaro muare itamudiami. ²³ Tito säre muare weregura. Īgu yu mera majagu āhrimi. Muare yu itamucū ĩgu yu mera mohmegu āhrimi. Gajirā ĩgu mera wamorā Jesu yarā erā beyenirā erā obeorā āhrima. Erā Cristo yare iima gajirā Cristore erā umupeoboro dopa. ²⁴ Erā eropa árīrāre mahiri mera ōaro erāre bocatīrique mua. Mua eropa iicū ĩarā gajirā Jesu yarāpu ōarā mua árīricurire masirācoma. Mari obeonirāre “Ōaro mera bocatīrācoma Corinto majarā,” arī weretuhabu gua mera majarāre. Mua eropa ōaro bocatīricū ĩarā gua werera diaye árīcū ĩha masirācoma gajirā Jesu yarā.

9

Jesu yaräre mojomorocuräre erā oburire wereñumi Pablo

¹ Eropirā Goāmū yaräre mua itamuborore mua oburire masituhaa mua. ² Gajiräre mua itamudiarire masia yū sã. Eropa masigū Macedonia majaräre òpa arī werebũ: “Corinto majarā Jesu yarāpũ gajiräre itamudiatuhama. Yuju bojori taria erā itamudiadiro,” arī weretuhabũ eräre muare. Mua eropa itamudiacũ peerā bajarā erā sã mojomorocuräre itamudiana. ³ Mua mojomorocuräre oborare gajiräre werequeregũ “Iri niyerure gameneobiribocoma yū ejaboro core,” arī pepia muare. Eropigũ dohpaguere oäre mari acawereräre mua pohrogue obeomuhtagũ iiaa. Mojomorocuräre mua oburire gameneo mua opayuboro dopa oäre obeomuhtagũ iiaa. ⁴ Eräre obeobigũ Macedonia yeba majarā mera mua pohrogue yū ejagũ, mua oburire mua opabiricũ ïagũ guhyasirisãboya yuhũ muare. “Mojomorocuräre orãcoma,” yuhũ muare arĩra puhru mua obiricũ ïagũ guhyasirisãboya yuhũ muare. Mua sã guhyasiriboya. ⁵ Eropigũ mua pohrogue yū ejaboro core eräre mari acawereräre obeomuhtagũ iiaa. “Mojomorocuräre wũaro orãca,” mua arĩrare mua opayuboro dopa eräre obeomuhtagũ iiaa. Mua oburire mua gameneocũ erāpũ muare weresererãcoma. Eropigũ yũpũ eja mua oburire mua opayutuhacũ ïha mucubiriri mera mua odiarare masigũra. Muare gũa odorera arĩsome iri.

⁶ Eropirā ire guñaque mua: Bajameyerigã otedigu bajamegã dũcare aĩgũcumi. Bajayeri otedigu baja dũca Eropigũ mua pohrogue yū ejaboro core eräre mari acawereräre obeomuhtagũ iiaa. “Mojomorocuräre wũaro orre aĩgũcumi. Eropa ta āhraa mojomorocuräre mari ocũ. Merogã mari ocũ, Goāmũ merogã ogũcumi marire. Wuaro mari ocũ wũaro marire ogũcumi. ⁷ Eropirā yujurāyeri mua “Ipẽ ogura,” arī oque. Mahĩnari obiricãque. “Marire odoreama,” arĩro marĩro oque. Mucubiriri mera oräre gahmemi Goāmũ. ⁸ Īgũpũ mua gameri tauro muare ogũcumi. Eropirā arĩpehrerire mua gameri dũhyarire opapehorãca. Eropirā gajiräre mua oburi sã òaro sihajaroca mua opari. ⁹ Eropa ta āhraa Goāmũ yare erā gojarapũ:

Mojomorocuräre wũaro ohomi ĩgũ. Ōaro mera masare itamuniguimi ĩgũ, āhraa ĩgũ yare erā gojarapũ.

¹⁰ Eropiro oteri dũcacura puhru oteri masũ ĩgũ oteburi coyere ohomi Goāmũ. Puhru ĩgũ oterare dũcacũcũ iimi ĩgũ baburire. Mojomorocuräre mua wũaro ocũ oteri masure ĩgũ coyere oro dopa ta mua sãre wũaro ogũcumi Goāmũ. Eropa ta muare ogũcumi mojomorocuräre mua onemoboro dopa. ¹¹ Eropa ta āhraa. Wuaro ogũcumi gajiräre wũaro mua eropa oniguicãboro dopa. Eropirā mua iri niyerure odorere gũa ocũ erā ñearāpũ mucubiriri mera Goāmũre “Ōhaa,” arĩrãcoma. ¹² Eropirā mojomorocuräre Goāmũ yaräre orã, eräre itamurã iiaa mua. I dihtare iibeaa mua. I sãre iirã iiaa mua. Mua eropa orã bajarã masa Goāmũre mucubiriri mera “Ōhaa,” arĩcũ iirãca mua. ¹³ Eropa mua gajiräre itamucũ ïarã, Goāmũre umupeori mera wereniguirãcoma masa. Eropirā eräre gajirã sãre wũaro mua ocũ ïarã Goāmũre “Ōtariagu āhrimi,” arĩrãcoma masa. Eropa arĩrãcoma Cristo ya buherire òari buherire mua òaro yuhricũ ïarã. ¹⁴ Eropirā Goāmũ ĩgũ mojomoro ïadiro dopa ta mua sã eräre mojomoro ïacũ erāpũ muare gamerãcoma. Eropa gamerã muare

serēbasarācoma Goāmure. ¹⁵ Goāmu marire ōatariaro iigucumi. Īgu eropa iiborore masirā “Ōataria,” arāa mari ĩgure.

10

Jesu ĩgu apidigu ĩgu árĩrire wereñumi Pablo

¹ Dohpaguere yuhũ Pablo muare weregura. Cristopũ ne guabigu, masare ōaro iigu árĩñumi. Īgu iidiro dopa ta yũ sã muare werediaa ōari mera. Yujurãyeri mua mera majarã ōpa arãyoro yure. “Mari mera árĩgu eropa pepicãgu bu árĩgu iro dopa árĩmi Pablo. Eropa árĩqueregu ta gajipugue árĩgu marire doyarõ mariro turibeomi,” arãyoro mua yujurãyeri yure. ² Eropigu muare ire barigã dorea: Mua pohrogue yũ ejacũ ōaro iique mua, “¿Pablo guare turiri?” arĩrã. Yujurãyeri yure ōpa arãyoro: “Īgu, ĩgu gamero, Goāmu dorebiriqerēcũ iimi,” arãyoro mua yure yujurãyeri. Eropa arĩrã tamerare turiboca yuhũ. ³ Gua sã i yeba majarã ta árĩrã iiaa. Eropa árĩquererã ta i yeba majarã erã gamero iiro dopa ta iibeaã gua. ⁴ Surara erã tarinũguro dopa ta guapũ ñerire tarinũgadiala. Surara erã mojo oparo dopa ta gua sã mojo opaa. Gua mojo i yeba majarã erã masiri, erã wereniguĩtarinũgari, erã turari árĩbeaa. Gua mojo Goāmu ya turaripũ ãhraa. Iri turari mera masa Goāmure erã umupeodorebirirare duhucũ iiaa gua. Eropirã erã gamero erã masirire iri duhpiburi árĩbirićũ masicũ iiaa gua iri turari mera. ⁵ Eropirã árĩpehrerã erã gamero pepirare Goāmure erã masidorebirirare duhucũ iiaa gua. Eropirã iri turari mera Goāmure gamebirãre Cristore ōaro yũhrĩrã erã árĩćũ iiaa gua. Cristo ĩgu gamero dopa ta erãre pepicũ iiaa gua. ⁶ Eropirã gajirã mua mera majarã Cristore tarinũgacũ ĩarã erãre dipuwaja moamorã árĩrãca gua. Mua ōaro yũhrira pũhrũ Cristore tarinũgarãpure eropa dipuwaja moamorã árĩrãca gua.

⁷ Yũ árĩricuri dihtare masia mua. Yũ pepiripure ne masibeaã mua. “Cristo yarã ãhraa,” arĩrã árĩrã ōpa masique mua: Gua sã mua iro dopa ta Cristo yarã ta ãhraa. ⁸ “Mari Opũ ya buherire ōari buherire buhedoregu apimi guare,” arĩgu bajasuburi muare iri dihtare eropa arĩ werequeregu ta guhyasĩrbeaa yuhũ. Guare eropa buhedoregu muare itamomorãre apimi guare. Muare goroweomorãre apigu iibirimi guare. ⁹ I yũ gojabeoripũre mua ĩha ućacũ gamebeaa yuhũ. ¹⁰ Yujurãyeri mua mera majarã ōpa arãyoro: “Pablo gojabeogu pũriro dihta gojabeomi marire. Eropa árĩqueregu ta mari mera árĩgu eropa árĩćãgu ãhrimi. Bu árĩgu iro dopa ãhrimi. Eropiro ĩgu marire wereniguiri duhpiburi árĩbeaa,” arãyoro mua yujurãyeri. ¹¹ Eropa arĩrãre ōpa arĩ weregura: Mua arĩdiro dopa ta iibeaã gua. Muare gua arĩ gojabeodiro dopa ta eropa ta arĩ wererãca mua pohro arĩrã. Eropirã “Ōpa iirãca,” gua arĩ gojabeodiro dopa ta eropa ta iirãca mua pohro arĩrã sã.

¹² Yujurãyeri mua mera majarã “Ōaro masipehorã ãhraa gua,” arĩ wereniguĩmaacãma erã basi. Erã game ĩha bocatĩrirã “Maripũ ōatariarã ãhraa,” arĩma erã. Eropa arĩmaacãrã “¿Gajirã ōarã iro dopa ãhriri mari?” arĩbeama erã basi. Guapũ erã iro dopa iisome. ¹³ Goāmu guare ĩgu buhedore ĩgu apira dihtare werea guapũ muare. Gajirã erã mohmerare “Iibũ guapũ,” arĩrã iibeaã. Goāmu mua sãre buhedoregu guare apimi. ¹⁴ Eroparĩrã guyarã iibeaã gua. Ōari buherire Cristo yare muare buhemũhtarã ta ejabũ gua. Eropirã Goāmu guare buhedore

Īġu apira dihtare wererā iiaa muare. ¹⁵ Eropirā gajirā muare itamucū ĩha “Ġuapu irire iibu,” ne arĭbeaa ġua. Cristore mua umupeonemocū iiburĭpure ġahmea ġua. Eropa gamerā muare buhenemodiaa ġua. Eropa ġua buherā Goāmu Īġu apirañe pēta buhedĭaa ġua muare. ¹⁶ Eropa buhedĭaa mua ya yeba core majarāre ōari buherire peebirāre ōari buherire wererā waboro dopa. Eropa warā gajirā erā buhera puhru ejarā, “Ġuapu erāre buhemuhtabu,” arĭsome ġua.

¹⁷ Goāmu yare gojarapūgue ōpa āhraa: “Mari iirire ĩarā mucubirĭbiricāro ġahmea. Mari Opu Īġu iirĭpure ĩarā mucubirĭro ġahmea. Iirĭpure gajirāre werero ġahmea,” arĭ gojara āhraa. ¹⁸ Masa erā basi “Ġuapu iibu,” erā arĭcū ĩha mucubirĭbeami Goāmu. Mari Opu Cristo Goāmure “Oā ōaro iima,” Īġu arĭrāpure suami Goāmu.

11

“Jesu ĩġu apinirā āhraa ġua,” arĭ ġuyarāre wereñumi Pablo

¹ Yu basi yu arĭricurire wereġu pee masibġu iro dopa wereġu iiaa, arĭ pepia. Yu arĭricurire muare wereġu ġahyasĭrĭñaria. Yu eropa arĭ werecū peenĭque mua yare dohpaguere. ² Goāmu muare Īġu mahiro dopa ta turaro mahĭa yu sā muare. Nōmeo ġajġu umu mera igo ñero iibigo igo yujugre ta gamedigo iro dopa mua Cristo dihtare ġamecū gamerabu yuhu muare. ³ Eropa ġamequereġu “Erā Cristo yare cōabocoma,” arĭ ġuñarĭcua muare. Gajirā ñerā muare ġuyarā, ġajĭropa arĭri buherire ġamecū iibocoma muare. Pĭru Īġu masiri mera Evare ġuyacū igo Goāmure tarinugañumo iribojeguere. Īġu eropa iidiro dopa ta dohpaguere ñerā muare ġuyarā, Cristore mua ōaro umupeorire ġoroweobocoma. Eropġu muare ġuĭsāa. ⁴ Erā ġua muare buhedĭro dopa ta buhebĭriquerecū mua peeraa. Eropirā erā “Ōpa arĭdi arĭmi Jesu,” erā gamero ġajĭropa arĭ werequerecū ta peea mua. Watĭ Īġu pepiro dopa arĭ erā werequerecū ta peea mua. Muare ġua wereġu Espĭritu Santo ġohra āhrimi. Īġupure erā werebĭriquerecū ta muare ġuya buherāre peea mua. Erā ġajĭropa arĭri buherire erā buhecū ōari buherire erā buhebĭriquerecū ta irire peea mua. ⁵ Erā “Jesu ĩġu apinirā āhraa,” arĭnirā yure masitarinugabeamā. “Erāre doca merebeaa,” arĭ pepia yuhu. ⁶ Ōaro weretarinugaġu arĭbiriboca yuhu. Ōaro weretarinugaġu ġajĭroereġu Goāmu yare ōaro masĭa. Yu eropa masĭire bajasuburi muare masicū iibu.

⁷ Ōari buherire Goāmu yare muare buheġu ne waja ġamebirĭbu. Muare itamudiġu waja ġamebirĭbu. Bu arĭġu iro dopa arĭbu yuhu. ¿Yu eropa waja ġamebirĭcū ōabeari mua pepicū? ⁸ Muare yu buhecū ġajĭ macari majarā Jesu yarā yure itamuma. Erā eropa orare ñeabu muare itamubu. Mua yure oborare erāpu yure oma. ⁹ Mua mera arĭġu ġajĭno yure duhyaquerecū ta muare niyerure ne serēbirĭbu. Mari acawererā Macedonia yeba majarā Jesu yarā arĭpehrerā yu ġamerare aĭ erama yare. Iribojeguere muare ne ġarĭbobirĭbu yuhu. Puhrugue sāre muare ne ġarĭbosome. ¹⁰ Cristo diaye Īġu werediro dopa ta yu sā muare dohpaguere diaye wereġu iiaa. Arĭpehrero Acaya yeba arĭrāre i muare yu serēbirĭrare eropa wereniġuġura. ¹¹ ¿Muare yu serēbirĭrare ġajĭrāre yu eropa wereniġuġu peerā dohpā pepiri mua? “Pablo ġuare eropa arĭ

weregu guare umupeobigu iimi,” ¿arĩ pepiri mua? Áríbeaa. Muare umupeoa. Goãmu irire masimi.

¹² Waja mariro yu muare buhenugadiro dopa ta buhe ojogorocugura. “Jesu ĩgu apinirã áhrraa,” arĩ guyanirãre yure tarinugacũ iibiriboro dopa waja mariro buhenuguigura. Erãpu “Gua sã Pablo iro dopa Jesu yare buherã áhrraa,” arĩma. Eropa áríbeama. Yũpu waja mariro buhea. Erãpu waja gamerã buhema. ¹³ Erã diaye ta Jesu ĩgu apinirã gohra áríbeama. Erãre ne apibirĩnumi ĩgu. “Jesu ĩgu apinirã áhrraa,” arĩ guyarã gua iro dopa árírima erã. ¹⁴ Erã eropa iicũ ĩagu ĩhamariabeaa yũhu. Satana sã anyu Goãmu yagu õagu iro dopa dehyoacumi masare. ¹⁵ Eropigu erã Satanare itamurã õarã Goãmure itamurã iro dopa erã iicũ ĩagu ĩhamaria wabeaa yũhu. Dohpaguere erã eropa iiquerecũ ta pehrerinũ áricũ árípehreri erã ñero iira dipuwaja dipuwaja moagucumi Goãmũ erãre.

Īgu ñero tarirare wereñumi Pablo

¹⁶ Dipaturi muare ire weregura. Ne “Pee masibigu áhrimi,” yure arĩbiricãque. Yu eropa arĩdorebiriquerecũ ta yure mua eropa arĩ pepicũ õaroca yure. “Pee masibigu áhrimi,” arĩ yure pepiquererã ta peenique mua yure. Merogã yu árícurire yu basi werecũ peenique mua. ¹⁷ Muare eropa weregu guhyasĩriñaria yũhu. Pee masibigu iro dopa iigu iiaa, arĩ pepia. Mari Opũ Jesu yure irire “Eropa wereque,” arĩbirimi. ¹⁸ ĩgu eropa arĩbiriquerecũ ta ire weregura muare. Erã gamero “Õarã áhrraa,” arĩmaacãrã erã áricũ ĩagu yu sã yu árícurire muare weregura. ¹⁹ Muapu eropa arĩmaacãrãre peerã mucubiriri mera ĩhaa mua erãre. ¿Õaro masirã áhrriri muapu eropa peerã? ²⁰ Muare erã pohro majarã moacũ, mua yare erã emacũ eropa ĩacãa mua. Eropirã muare erã docapicũ mua wayuporãre erã pacũ eropa pepicãa mua. ²¹ ¿Õapũricãri muare erã eropĩcũ? Cue, ¿turatariarã áhrriri erã? Guapu erã iro dopa turarã áríbeaa. Eropirã erã iro dopa ñerire iibeaa.

Erã iro dopa áríbiriqueregu ta erã “Õpa arĩrã áhrraa,” erã arĩcũ peegu yu sã eropa arĩ wereboca. Dipaturi guhyasĩriqueregu ta õpa arĩgura muare. ²² Erã “Hebreo masa áhrraa,” arĩma gajirãre tarinugadiarã. Hebreo masu ta áhrraa yu sã. “Israe masa mari Pagũ ĩgu beyenirã áhrraa,” arĩma daja erã. Erã iro dopa ta ĩgu beyedigu ta áhrraa yu sã. “Abrahã pãramerã áhrraa,” arĩma daja erã gajirãre tarinugadiarã. Erã iro dopa ta Abrahã pãrami ta áhrraa yu sã. ²³ “Cristo yare itamurã áhrraa,” arĩma daja erã. Yu sã Cristo yare itamugu ta áhrraa. Erã tauro Cristo yare õaro iiaa yũhu. Eropa yu basi arĩ wereniguigu guhyasĩriñaria yũhu. Pee masibigu iro dopa wereniguigu iiaa, arĩ pepia yu basi. Erã tauro mohmebu yũhu Cristo yare iigu. Bajasuburi erã tauro Cristo yagu yu áríri dipuwaja peresu iima yure gajirã. Erã tauro bajasuburi tãrama masa yure. Erã tauro Cristo yare yu iira dipuwaja masa yure wejẽdiarima. Eropigu merogã mera taribu yu sĩribodirore. ²⁴ Cinco suburi judio masa yure ñeama. Yure erã ñeari nũcu suburi treinta y nueve suburi yure tãrama. ²⁵ Ũhresubu gajirã yure ñeama. Eropa ñearã erã tamera yure ñero yucugu mera pama. Gajisube yure gajirã utã mera deama. Ũhresubu dohodiru mera utãyegue mehtuhaja mirĩbu. Eropigu yujunũ, yuju ñami taboamiji wecague wuuriya decoguere baa payabu. ²⁶ Bajasuburi macariguere buhe curigu ejabu. Yu eropa buhe curicũ guhyatariacãbu yure. Yure mirimaja guhya arĩbu. Yure yajamaja guhya arĩma. Yaha yeba majarã judio masa,

judio masa árībīrā sā yure ñero iimaja guhya árīma. Macarigue, masa marirogue, wuariyague säre yure sīrimaja guhya árību. “Mu mera majarā āhraa,” arī guyarā sā yure ñero iimaja guhya árīma. ²⁷ Cristo yare iibu burīgā mohmebu. Eropā mohmegu ñero wabu. Bajasuburi wūja yure ñero pūriquerēcū ta eropā mohmeniguicāmūribu. Ñero oaboamūribu. Eropiro yure ñemesibumūribu. Bajasuburi barire bocabirimūribu. Yūhu yūsarō säre pepimūribu. Suhri sañaburi sā ne marimūribu yure.

²⁸ Eropā ñero tarigu ta umūri nūcu gajirā Cristo yarāre, mūa säre burīgā guñaa. ²⁹ Eropigu Cristo yagu īgu turabiricū īagu bujawerea yūhu. Gajirā Cristo yagure ñero iidorebocoma. Erā eropā iicū īagu Cristo yagure guhyasīsāsū, erā ñero iidorerā mera guaa yūhu. ³⁰ Werediabiriqueregu ta yū árīricurire weregu, yūhu turabigu yū árīrire mūa masiboro dopa mūare weregura. ³¹ Goāmū mari Opū Jesu Pagu umūri nūcu mari umupeobu īgu ta mūare yū guyabiricū masimi. Ire mūare diaye weregura. ³² Damasco waīcuri macague yūhu Jesucristo yare buhecū īagu árīpehrerā masa tauro opū Areta waīcūgu īgu doca árīgu opū yure ñeadiaripu. Eropā ñeadiagu iri maca maja sārīro disiporori nūcu surarare codedoreripu. ³³ Erā eropā corero watope ta yū mera majarā wūari puibugue yure duhusā iri sārīro pūrupugue yuju gobegue yure duhu dijuma. Erā eropā duhu dijura pūhrū duhrīgā wabu.

12

Cristo īgure īhmurare wereñumi Pablo

¹ Yū árīricurire mucubiriri mera yū werēcū duhpiburi árībeaa. Duh-piburi árībiriquerēcū ta werenemogura mūare. Mari Opū Jesu īgu yure īhmurare īgu yure masicū iirare weregura mūare. ² Ōpa īhmunūgami īgu yure: Catorce bojori gohra wahaā yure Cristo yagure umarogue īgu aī mūriara pūhrū. Ūmarogue necā wecague yure aī mūriami. Yū sīporā dihtare īgu aīgācū masibeaa yūhu. O yū dūpū säre īgu aīgācū säre ne masibeaa yūhu. Goāmū dihta irire masimi. ³⁻⁴ Eropigu paraíso waīcurogue yure aī mūrijami. Irire masia yūhu. Yū sīporā dihtare īgu aīgācū masibeaa yūhu. O yū dūpū säre īgu aīgācū masibirica. Goāmū dihta irire masimi. Īgu eropā aī mūriacū ejaḡu eroguerē īgu wererire peebe. Iri yū peerare masa ne masibeama. Iri wererire gajirāre weredorebirimi yure. ⁵ Eroguere īgu yure eropā wererare mūare weregu, “Yūhu yujugu ta gajirāre tarinūgagu āhraa,” arībōya yūhu. Eropigu irire werebeaa yūhu. Yū masibirira dihtare yū turabirira dihtare mucubirigu mūare weregura. ⁶ “Gajirāre tarinūgaa yūhu,” mūare arī werediacū yū arīra diaye árīboca. Eropigu eropā arī weregu eropā arīmaacābiribōya yūhu. Eropā árībiriquerēgu ta “Ōpa gajirāre tarinūgaa,” arī weresome yūhu mūare, guhyadiaro yure īhari arīgu. Yū árīro tauro mūa yure umupeocū gamebeaa.

⁷ Cristo ōatariarire umaroguere īgu yure īhmucū īadigu arīgu, “Gajirāre tarinūgaa yūhu,” arīboca yūpū. Eropā yū arībōriboro dopa Satana īgu yure dore moacū īagu “Ōaroca,” arī apidi árīmi Goāmū. Eropigu yū ñero tariboro dopa yure dore moadi árīmi Satana. Iri dore poraru ñajaro dopa ta yure pūribu. ⁸ Iri dore yure taridoregu serēmūribu mari Opūre. Ūhresubu serēribu. ⁹ Yū eropā serēquerēcū ta i dore tamerare yure taricū iibirimi īgu. Ōpa arī yure yūhrimūrimi īgu:

"Mure mahia. Yu mahiri mera ðaro árĩgũca muhu. Püriniguicãsũgu, turabigu árĩgu yu turarire ðaro ihmugũca muhu. Turarã tauro muhu yu turarire masare masicũ iigũca," arĩ yuħrimurimi Goãmu yũre. Īgu eroparĩcũ peegu turabigu yu árĩrãre masigu mucubiria. Eropigu yu turabirirãre masare mucubiriri mera weregara. Eropa arĩ weregũca Cristo ĩgu turaripure yuħu gajirãre ðaro masicũ iiboro dopa. ¹⁰ Eropigu Cristo yagu yu árĩri dipuwaja yũre pũriro árĩquerecũ ta, gajirã ñero yũre wereniguiquerecũ ta, ñetariaro tariqueregu ta, yũre erã ñero erã iiniguiquerecũ ta, yũre bujawerecũ erã iiquerecũ ta mucubiria yuħu. Eropa ñero tariqueregu ta, eropa turabigu árĩqueregu ta Cristo turari mera bocatũua ĩgare guñaturagũ. Eropigu mucubiria.

Corinto majarãre Cristo yarãre wuaro guñaricuñumi Pablo

¹¹ Yu árĩricurire yu basi weregu guhyasĩriñaria yuħu. Pee masibigu iro dopa weregu iiaa, arĩ pepia yuħu. Yu eropa werequerecũ ta iri mua yu dipuwaja aħraa. Muapu yu árĩricurire gajirãre ðaro werecũ yu basi werebiriboaya. Yuħu bu árĩgu árĩqueregu ta "Jesu ĩgu apinirã aħraa," arĩ guyarãre doca merebeaa yuħu. ¹² Diaye ta ñero tarigu árĩqueregu muare Goãmu turari mera deoro moarire ii ihmuribũ. Eropa ii ihmugũ Cristo ĩgu apidigu yu árĩrãre ihmugũ iiribũ muare. ¹³ Gaji macari majarãre Jesu yarãre mua sãre yujuro mera ihmuribũ yuħu. Muapure gajiropa ñari iribũ. Mua dihtare garibobiribũ. Mua dihtare gajinore yaha árĩburire serẽbiriribũ. ¿Yuħu muare itamurire serẽbiricũ ñehe árĩri muare? Iri ñeri árĩcũ irire cãdijique mua yũre.

¹⁴ Ire peeque mua. Pesubu mua pohrogue yu ejara puħru dipaturi wadiaa daja. Eroque ejagu muare garibosome yuħu. Gajinore serẽsome yuħu muare. Mua yare gamebeaa yuħu. Cristo yapure mua yuħrirã árĩcũ gahmea yuħu. Masa porãpu erã pagu sumarãre erã gamerire obeama. Erã pagu sumarãpu erã porã gamerire ohoma. Eropa ta mua yu porã iro dopa árĩrã yu gameripure osome mua. ¹⁵ Eropigu yu tamera yu oparipure odiaa muare itamubu. Mua pohro majagu iro dopa árĩdiaa muare itamubu. Muare yu turaro mahiquerecũ ta muapu yare daberogã mahia yu pepicũ.

¹⁶ Eropigu mua mera árĩgu muare garibobiribũ. ¿Eropa ta iiri yuħu mua pepicũ? Eropa iiquerecũ ta yujurãyeri mua mera majarã ðpa arĩrãcoma: "Pablo gajinore marire aĩdiagu guyamĩ," arĩrãcoma. ¹⁷ ¿Erã arĩro dopa ta iigu árĩgu doħpa irire iiboyuri yuħu? ¿Mua pohrogue yu obeonirã ñehenore yare guyabasayuri erã muare mua ĩacũ? ¹⁸ Sohõ arĩrasubugue Titore mua pohrogue wadoretuhabu ĩgure. Eropigu gajigure Jesu yagure ĩgu mera obeobũ. ¿Tito muare gajinore guya aĩri mua ĩacũ? Īgu yu iro dopa ta Goãmu ĩgu gameri dihtare iigu aħrimi. ¿Eropigu yu iro dopa ta iibiriri ĩgu mua ĩacũ?

¹⁹ ¿Ipũ mera gua basi arĩ cãhmotarã iiri gua mua pepicũ? Árĩbeaa. Cristo yarã aħraa. Eropirã Goãmu ĩgu ihuro muare wererã iiaa. Yu acawererã, yu mahirã, muapure eropa arĩ werea muare itamudiarã. ²⁰ Yu erogue ejacũ yu gamero dopa iirã árĩbiriboca mua. Eropigu muare turaro guñaricua. Eropigu mua gamero dopa iigu árĩbiriboca yu sã erogue ejagu. Gajiropa mua iicũ ĩagu weregũca muare. Eroque yu ejacũ muapu mua basi game duyasorã, gajino erã opacũ ĩarã ĩhaturirã, mata guarã, mua gamero gajirãre tarinugadiarã, gajirãre ñero wereniguirã, ñeri quere moarã, "Gua tamera gajirãre tarinugaa," arĩrã, mua gamenererore

goroweorã áriboca mua. Mua eropa iicũ bocaboca arĩgu, guñaricua yuhũ muare. ²¹ Erogue yũ ejacũ muare yũre guhyasĩrisãcũ iibocumi Goãmũ yũre. Eropigu áripehrerã iribojegue ñero iinirãre erã ñerire bujawerebiricũ ïagu turaro bujaweregua yuhũ. Nome mera ñero iirãre, ñerire uaribejarãre ïagu bujaweregua yuhũ.

13

Pablo weretuñumi

¹ Dohpaguere mua pohroge wagu uhresubu ejagua eroguerẽ. Pesubu ero coreguere ejatuhabu. Eropigu muare ire weregura. Ōpa áhraa Goãmũ yare erã gojarapũ: “Yujugure mari dipuwaja moaboro core perã, urerã ïgure weresãro gahmea. Erã eropa weresãra puhũ dipuwaja moamasia mari,” áhraa Goãmũ yare erã gojarapũ. ² Iribojeguere ñero iirã mua áricũ muare áripehrerã gajirã ñero iirã sãre dipaturi guhyadiaro mera weregura. Yujusubu ejadi mua pohro dipaturi ejagu muare ire werebeogu iiaa daja: Dohpaguere mua pohroguere ejagu, ñero iirãre diaye ta dipuwaja moagura yuhũ. ³ Yũ eropa iicũ ïarã, Cristo ïgu apidigu ïgu turari mera yũ buhecũ masirãca masidiarã. Cristopũ muare doregu turatariagu áhrimi. Eropigu ïgu turarire ïhmumi muare. ⁴ Mari iro dopa dupucugũ, ïgu turabigu arĩgu, crusague siripũ. Eropa siriqueregu ta Goãmũ ïgu turari mera ojocarimi ïgu dohpaguere. Gua sã ïgu iidiro dopa ta turabirã áhraa. Eropa turabirã áriquererã Cristo mera ojocarirã Goãmũ ya turari mera árirãca muare itamumorã.

⁵ Eropi muapu mua basi ōpa arĩ pepique. “¿Diaye ta Cristore umupeogu áhriri yuhũ?” arĩ pepique mua. Diaye ta Cristo mua mera majagu ïgu áriboricũ ïgu yarã gohra áribeaa mua. ⁶ ¿Mua guapure “Jesu yarã ïgu apinirã áribeama,” arĩ pepiri? ïgu yarã gohra áhraa gua. Irire mua masicũ gahmea yuhũ. ⁷ Eropigu mua ñero iibiriboro dopa Goãmũre serẽbasaa muare. Eropa serẽbasaa gua mua ōarire mua iiboro dopa. Mua Goãmũ itamuri mera eropa ōarire iicũ ïarã ōpa arĩboca: “Guapu erãre ōarã wacũ iibu,” arĩboca gua gajirãre guare umupeocũ iimorã. Eropa arĩ umupeodorebeaa gua. Iri duhpiburi áribeaa. Eropirã muare eropa Goãmũre serẽbasarã mua ya áriburire serẽbasarã iiaa. Ōarire mua iicũ tamerare gahmea gua. ⁸ Eropa dihta gahmea gua. Goãmũ ya diaye árrire goroweomasibea gua. ⁹ Eropirã mua ōarire iicũ gamerã turabirã iro dopa áriquererã gua mucubiria. Ōarire iirãpũ muapu turarã áricũ ōhaa. Eropirã mua ōarã waborore Goãmũre serẽbasaniguicãrãca gua muare. ¹⁰ Eropigu mua mera áribigu muare ipũre gojabeoyugu iiaa. Mua pohroge ejagu mua ñero iirã áricũ ïagu muare dipuwaja moagua. Cristo yũre ïgu dorediro dopa ta muare dipuwaja moagua. Yũ eropa dipuwaja moabiriboro dopa ipũre muare gojabeoyugu iiaa. Mua ōarire gohrotocũ ïadiagu gojabeoyugu iiaa. Cristo ïgu dorediro dopa muare itamudiaca. Mua dipuwaja moadiabeaa.

¹¹ Dohpaguere yũ acawererã, muare ōadoreã. Cristore guñaturanemoque. Eropa iirã ōarã árique. Muare yũ wererere ōaro peenuruque. Mua mera majarã mera yujuro mera pepique. Mua basi ōaro mera árique. Mua eropa áricũ ïagu mua mera Goãmũ árigucumi. ïgu marire game mahicũ iigu, marire ōaro mera áricũ iigu áhrimi.

¹² Eropirã mũa mera majarãre bocatĩrirã erãre õaro mera mojoto ñeaque mũa. ¹³ Árĩpehrerã õ majarã Goãmũ yarã muare õadorema.

¹⁴ Mari Opũ Jesucristo mera muare árĩpehrerãre õadorea. Eropigu Goãmũ ĩgu mahiri mera árĩpehrerã muare õadorea. Eropigu Espĩritu Santo árĩpehrerã mũa mera õaro ãhrimi. Eropa ta árĩporo. Iripẽta ãhraa.

Gálatas

Pablo Galacia majaräre Jesu yaräre gojabeoꝑu

¹⁻² Yuhu Pablo mua Galacia majaräre ipüre gojabeoꝑu iiaa. Yuhu Goãmu yare buhedore Jesucristo igu apidi ahraa. Masa ne yare buhedore apibirima. Jesucristoꝑu igu Pagu Goãmu mera yare apimi. Goãmu ahrimi Jesucristo sîridire masudigu. Eropigu yuhu yu mera majarã mera Jesucristo yarã mera muare oadorea. ³ Goãmu mari Pagu mari Opu Jesucristo mera muare oadorea. Igu muare itamuri mera oaro árique mua. ⁴ Jesucristo, igu Pagu Goãmu gamediro dopa ta iigu, igu basi mari ñeri iira dipuwaja sîribasadigu árimi. Eropiidi árimi i umu majarã ñero áriticurire mari iibiriboro dopa. ⁵ Igu eropiicũ iha mari Goãmure “Muhu oagu oaro iiaa,” umuri nucu ariro gahmea. Eropa ta iirã.

Jesucristo masare igu tauburi yujuñe ta buheriñe ahraa, arĩ wereꝑu Pablo

⁶ Mua mata Goãmu yare duhurã iica. Goãmu muare igu yarã árimoräre aïdigu árimi Jesucristo igu marire sîribasara mera. Igu muare eropa aiquerecũ muapu igure duhu gajirã ya buherire peenugarã iica. “Gaji ahraa marire tauburi buheri,” erã arĩ werecũ peerã iica mua gajiräre. Mua eropiira querere peegu pee uca waha yuhu. ⁷ Opa waro iica mua árïrore. Gajirã mua pohro eja muare were goroweorã iicoma. “Jesucristo marire taumi,” arĩ buherire gohrotodiarã, “Gaji ahraa marire tauburi buheri,” arĩ buherã iicoma muare. Eropigu muare ire werediaca. Gaji buheri marire tauburi buheri marica. ⁸ “Gaji buheri ahraa mari tauburi buheri,” muare arĩ were goroweoräre Goãmu burigã dipuwaja moagu peamegue wadoreporo. Yu basi ta were goroweocüre Goãmu yu sãre dipuwaja moaporo. Anyu umaro majagu igu eropa buhecũ igu sãre dipuwaja moaporo. ⁹ Gua gajisubu arirare dipaturi yuhu werea daja muare. Yujugu muare oari buherire gajiropa buhecũ, gua muare buhediro dopa werebigure igure Goãmu burigã dipuwaja moaporo. Peamegue wadoreporo.

¹⁰ Yuhu masare buhegu Goãmu gamero dopa ta diaye majare buhea. Masa peesuacũ, peesuabiricũ sãre buhea. Eropigu dohpaguere yuhu masa peediri dihtare werenigubeaa. Cristo gamero dopa ta buhediaca. Igu pohro majagu oagu árdiagu eropa buhea yuhu.

Pablo igu Jesucristo yare buhebure apirare wereꝑu

¹¹ Opa weregura muare: Yuhu muare oari buheri eropa arĩ buhera masa ya pepiri árïbeaa. ¹² Ne yujugu masu iri buherire yare weredobirimi. Ne yujugu masu yare buhebirimi iri buherire. Jesucristo igu basi yare irire masicũ iimi.

¹³ Iribojegue yu áriticurare yuhu judio masa buherire peenururasubu yu iirare mua peetuhabu. Yuhu Jesucristo yaräre burigã ihaturigu nurasiamuribu eräre ñero iibu. Eropigu Jesu yaräre burigã ñero iigu eräre wejêpehocãdiaribu. ¹⁴ Eropigu gua judio masa ya buherire yu mera masanirã tauro umupeomuricaribu. Gua ñecu sumarã áriticurire burigã iimuricaribu. ¹⁵ Yu eropa iirisubu opa wabu yare. Goãmu igu oaro mahiri

mera yure sihumi pare. Īgu yu dehyoaboro coregue beyetuhapu yure. ¹⁶ Eropigu Īgu magure Jesucristore yure masicū iimi. Īgure masicū iigu yure judio masa árĭbirāre buhebure apimi. “Jesucristo marire taumi,” arĭ buherire werebure apimi yure. Eropa Goāmu yure masicū iira puhru gajirāre serēpigū wabiribū. ¹⁷ Jerusalēngue árĭrāre yu core Jesu Īgu apinirā sāre serēpigū wabiribū. Erote eropa wabigu Arabia yebaguepare diaye wabū. Puhruquere Damascogue dujāa wabū.

¹⁸ Īhre bojori puhru Jerusalēngue wabū. Pedrore ĩagu wabū. Pe semana ta árĭbū Īgu mera. ¹⁹ Gajirā Jesu Īgu apinirāre ne ĩabiribū irisubure. Mari Opū Jesucristo pagū magū Santiago dihtare ĩabū. ²⁰ Yūhū mūare eropa arĭgu diaye weregū iiaa. Yu ōpa arĭrire Goāmu masimi. Eropa arĭgu ōpa arĭdiaca mūare. Jesucristo dihta yure masicū iimi Īgu buherire.

²¹ Jerusalēngue árĭra puhru Siria yebague Cilicia yebague ejabū. ²² Irisubu Judea yeba majarā Jesucristo yarāpu yure ĩha masibirima dohpa. ²³ Yūhū Jesucristo yagu árĭri querere peenirā árĭma. “Īgu Pablo marire Jesu yarāre űero iidianuru curidigu dohpagure Jesucristo yare buhegu āhrimi. Mari Jesucristore umupeoire dedeodiadigu dohpagure irire Jesucristore umupeoburire buhegu wahami,” gajirā erāre eropa arĭ werecū peenirā árĭma Judea yeba majarā. ²⁴ Eropa peerā Goāmu mera mucubiriñorā.

2

Gajirā Jesucristo ĩgu apinirā gameñorā Pablo buherire

¹ Catorce bojori puhru Jerusalēngue wabū daja. Bernabé wami yu mera. Tito sāre aĭgābū. Goāmu yure wadoremi Jerusalēngue. Eropigu erogue wabū. ² Eropigu erore eja Jesure umupeorā gamenerogue yūhū erā oparāre boje sihuu werebū erāre. Judio masa árĭbirāre Jesucristo marire tauburi buherire yu buherare werebū oparāre. Eropa weregu erā yu buherire ōaro masicū erāre “Ōapūrica,” arĭcū iidibū erāre. Erā yu buherire gamebirā yu buheri sāre “Waja mariri āhraa,” arĭbocoma, arĭ pepirabū yūhū. Erā gamema. ³ Eropirā erā Titore ĩgu judio masa árĭbiriqeregu ĩgu Jesure umupeogu arĭcū ĩha erā judio masa dorero dopa iidorebirima ĩgure. Eropirā ĩgure gasiro merogā wiri aĭdorebirima ĩgure. ⁴ Gajirāpu Jesure umupeorā gamenerogue űajajanirāpu ĩgure circuncisión gasiro merogā wiri aĭcū gamerima. Erā Jesure umupeorā gohra arĭbirima. Erā gua sihubiriqerecū gua pohrogue peedurirā űajajanirā árĭma. Guare weresādiama. “Erā Jesu yarā Moise dorerire iibirā āhrima,” arĭdiama guare. “Goāmu pohro wadiarā gua dorerire iiro gahmea marire,” arĭ dorediarima daja. Gua Jesucristo yarāpūre Jesucristo tautuhajami gua Goāmu mera ōaro árĭborore. ⁵ Eropirā erā eropa guare dorecū ĩarā erāre ne yūhribiribū. Erāre yūhriřā iri Jesucristo marire tauburi buherire queoro buhemasibiriboaya mūare. Eropirā erā dorediarire cāhmotacābū.

⁶ Eropirā Jesu yarā oparā yu buherire erāre weretuhajara puhru “Mū buheri ōhaa,” arĭrā, yu buherire yure gohrotodiabirima. Gua judio masa dorerire iiburi sāre buhedorebirima. Erote erā oparāre masa umupeoquerecū erā iiro dopa iibiribū. Goāmu árĭpehererāre oparā árĭrā sāre bu árĭrā sāre yujuropa ta ĩhami. “Erāre beyediro dopa ta yu sāre Goāmu beyemi,” arĭ pepibū. ⁷ Eropirā oparā yu buherire gohrotodiabirā

judio masare árĭbiräre yu buhe curirare peema. Eropirä yuĥu Jesucristo ĭġu yare buhebure apidigü árĭcũ ĭha masima yure. Eropirä öpa arĭma yure: “ĭġu Goãmu judio masare iri öari buherire buhebure ĭġu Pedrore apidiro dopa ta mu säre apiñumi. Judio masa árĭbiräpüre iri buherire buhebure mre apiñumi,” arĭma yure. ⁸ Eropigü ĭġu Goãmu Pedrore judio masare buhebure obeodigü ta yu säre obeomi judio masa árĭbiräre buhebure.

⁹ Eropirä erä oparä urerä Santiago, Pedro, Ñu mera yure ĭha masima. Goãmu ĭġu mahiri mera ĭġu yure beyedigü yu árĭcũ masima. Eropirä yure Bernabé säre öaro bocatirima. “Eropa ta iirä mari. Mari yujuro mera buherä. Muapu judio masa árĭbirä pohrogue buherä waräca. Guapu judio masare buherä waräca,” arĭma yure Bernabé säre. ¹⁰ “Iri dihta iiro gahmea,” arĭma guare. “Mojomorocuräre itamunigucäro gahmea,” arĭma. “Eropa ta iiaa,” arĭbu gua eräre. Eropigü eropa ta yu buhe curirogue Jesu yarä mera niyerure gameneo erä mojomorocuräre ohaa dohpa.

Antioquiague Pablo Pedrore wereru ĭġu öaro iibirirare

¹¹ Ero puhru gua Antioquia macague árĭcũ Pedro curigü erami gua árĭrore Jesure umupearä gamenererogue. Erogue erara puhru Pedro queoro iibiricũ ĭha ĭġu eropa iira dipuwaja burigä werebu ĭġure Jesure umupearä peeuro. ¹² Eropigü Pedro Antioquiague ne eragu gamenere bamurimi judio masa árĭbirä Jesure umupearä mera. Irisubu gajirä judio masa Santiago obeonirä erama. Erä eranirä öpa arĭ pepirä arĭma. “Árĭpehrerä Jesure umupearä judio masa árĭbirä sä gua dorerire iiro gahmea Goãmu eräre öaro ĭaborore. Eropirä árĭpehrerä judio masa iiro dopa gasiro merogä wiri airo gahmea. Eropa árĭbirä mera babiricäro gahmea,” arĭrä arĭma eraniräpü. Eropigü Pedro erä eracü ĭha judio masa árĭbiräre dca wami. Erä gasiro merogä wirisübirinirä árĭcũ eräre dca wami erä eranirä weresärire güĭġu. Erä mera babirimi pare. ¹³ ĭġu eropiicü ĭha ero majarä gajirä judio masa erä sä dca wama judio masa árĭbiräre. Bernabé sä erä iiri queoro árĭbiricü masiquereġu eräre ĭhacü ĭġu sä dca wami eräre. ¹⁴ Erä eropiicü ĭha gamebirigohracäbu yuĥu. Erä judio masa árĭbiräre dca warä “Jesu dihta marire taumi,” arĭ ĭhmubirima. “Moise doreri säre umupearo gahmea,” arĭ ĭhmurima erä judio masa árĭbiräre. Eropigü yuĥu árĭpehrerä Jesure umupearä peeuro burigä arĭbu Pedrore. “Muĥu judio masu árĭquereġu öguere ne eragu judio masa árĭbirä mera yujuro mera bagu gua judio masa árĭricurire guñabirabu. ¿Duhpigü muĥu dohpaguere gohrotodiari? ¿Eropigü duhpigü dohpaguere erä judio masa árĭbiräpüre gua árĭricurire ĭdorediari?” arĭ werebu ĭġure ĭġu queoro iibirira waja.

Árĭpehrerä Jesure umupearä Goãmu taumi eräre, arĭ wereru Pablo

¹⁵ Gua judio masa porä ähraa. Eropa árĭrä gajirä Moise dorerire tarinugarä iiro dopa árĭbeaa. ¹⁶ Eropa árĭbiriquererä gua Jesure umupearä dohpaguere öpa masirä ähraa. Yujugu Moise dorerire ĭicü Goãmu pohro waburi árĭbeaa. ĭġu Jesucristore umupearä ĭġu ñeri iira dipuwajare cädijisüdigü wahami. Iri mera dihta öhami Goãmu mera. Eropirä gua judio masa árĭquererä Goãmu mera öaro árĭmorä Jesucristore umupearä. Goãmu mera öaro árĭmorä Moise dorerire iibiribu. ĭġu mera

ōaro árīmorā gua dorerire umupeorā Goāmū mera ōaro árībiriboaya. Eropirā Jesucristore umupeobū gua ñeri iira dipuwaja pehrebro dopa.

¹⁷ Eropirā gua Jesucristore umupeori mera gua Goāmū mera ōaro árīrāca. Eropa Jesucristore umupeorā Moise dorerire iibiriquererā Goāmū dorerire tarinugarā iibeaa. Jesucristo sã Goāmū dorerire tarinugadoregu ne árībeami. ¹⁸ Eropigū masare ōpa arī buhea yuhū. Goāmū muare “Ōarā āhrima,” ĩgu arī ĩaboro dopa Jesucristopare umupeoro gahmea. Eropigū “Mua Goāmū mera ōaro árīdiarā Moise doreri sãre umupeoro gahmea,” arībeaa. Yuhū Moise dorerire doregu Goāmū dorerire tarinugagu árīboya. ¹⁹ Ero corere Moise dorerire iimuriribū Goāmū mera ōaro árīdiagu. Eropa iiqueregu dipuwajacugū árīmuriribū. Dohpaguere Jesucristo mera dipuwajacubeaa. Eropigū “Iri Moise dorerire iiro gahmea,” arībeaa pare. Eropigū yuhū Goāmū ĩgu dorero dopa ta ĩgu iiaa. ²⁰ Jesucristo crusague sīrigū yu ñegu árīrare gohrotodigū árīmi. Eropigū yu ero coregue árīdiro dopa árībeaa pare. Cristo yu mera árīgu yure ĩgu dorerire ōaro iimasicū iimi. Eropigū yu árīricurare iibeaa. Jesucristo yapare iiaa. ĩgu Jesucristo yure mahitarigū yure yu ñero iira dipuwaja sīribasadi árīmi. Eropigū ĩgure guñaturagu ĩgu dorerire iiaa. ²¹ Goāmū mera ōaro árīmorā mari ñecu sumarā árīricurire, Moise dorerire iicū Jesucristo mari ñero iira dipuwaja sīribasara wajamariboya. Eropigū ne umupeogu duhusome “Jesucristo marire taumi,” arī buherire.

3

Jesucristore umupeori mera Goāmū marire “Ōarā āhrima,” arī ĩhami, arī werepū Pablo

¹ Mua pee masibirā āhraa dohpaguere. Muare Jesucristo ĩgu basi mari ñeri iira dipuwajare sīribasarare muare werecū mua ōaro ĩha masiribū. ¿Mua eropa ōaro masicū noa muare goroweoari dohpaguere iri diaye maja mua umupeoborañere? ² Eropigū ōpa serēpidiaca muare. ¿Mua Moise dorerire umupeori mera Espiritu Santo muare eranugari? Erabirimi. Mua “Jesucristo marire taumi,” arī buherire peecū Jesucristore umupeocū ĩgu Espiritu Santo muare erami. ĩgu yarā mua árīmorā árīcū erami. ³ ¿Mua duhpirá pee masibirā iiro dopa wahari dohpaguere? Mua ne Jesucristore umupeorā Espiritu Santo itamuri mera ĩgu yare iimuribū. ¿Eropirā duhpirá dohpaguere mua turari mera iidari? ⁴ ¿Mua Jesucristo yarā árīnugarā mua Jesucristore umupeora waja mua ñero tarirare guñabeari? ¿Mua eropa umupeora “Bu gohra āhraa,” arī pepiri mua dohpaguere? ⁵ Ōpa ōaro guñaro gahmea. Goāmū muare ĩgu Espiritu Santore odigu árīmi. Espiritu Santo mua mera árīgu mua watope deyoro moarire muare ōarire iimi. ĩgu eropiigu Moise dorerire mua umupeori mera eropa iibeami. Mua “Jesucristo marire taumi,” arī buherire ōaro pee ĩgure umupeocū eropa iimi.

⁶ Gua judío masa ñecu Abrahāpū Goāmure “Diaye ta árīgu āhrimi,” arī ōaro umupeoñumi. ĩgu eropa umupeocū ĩha Goāmū ĩgure “Ñeri dipuwaja marigu ōagu āhrimi,” arī ĩañumi. ⁷ Eropirā ōpa masique mua. Goāmū ōpa arīmi: “Árīpehrerā masa judío masa árībirā sã Abrahā umupeodiro dopa ta yure umupeorā Abrahā pāramerā āhrima. Eropirā yaharā āhrima,” arīmi Goāmū. ⁸ Iribojegue irire Goāmū arī wereyutuhanumi. ĩgu werepira ōpa āhraa ĩgu yare gojarapūgue: “Árīpehrerā masa judío

masa árĭbirā sā yure umupeorāre ‘Ōarā āhrima,’ arĭ ĩaguca. Ńero iira dipuwaja marirā ĩaguca erāre,” arĭñumi. Eropigu iri ōari buherire Abrahāre arĭ wereyuñumi. “Árĭpehrerā masa mahu yure umupeoro dopa ta yure umupeocū ‘Ōarā āhrima,’ arĭ ĩaguca yuhu erāre. Erāre ōaro ĩguca,” arĭñumi Goāmū Abrahāre. ⁹ Abrahā Goāmure ĩgu umupeocū Goāmū ōaro iññumi ĩgure. Eropigu árĭpehrerā masa mari sā ĩgure umupeocū Goāmū ōaro ĩgucumi mari säre.

¹⁰ Gajirā ōpa arĭrā āhrima. “Moise dorerire ōaro iicū Goāmū ‘Ōarā āhrima,’ arĭ ĩagucumi marire,” arĭrima. Eropa arĭrā dipuwajacurā āhrima dohpa. Goāmū yare gojarapūgue ōpa arĭ werea. “Moise dorerire iirā erā iri dorerire árĭpehrerire queoro iipehobirā dipuwajacurā āhrima,” arĭ gojara āhraa. Eropirā iri dorerire iipehomasibirira waja dipuwaja moasūmorā āhrima árĭpehrerā. ¹¹ Ne yujugure iri dorerire iipeho masiya mara. Eropirā Moise dorerire iiri mera Goāmū mera ōamasibeama. Ōpa arĭ gojañuma Goāmū yare gojarapūgue. “Īgure umupeorāre Goāmū ‘Ōarā āhrima,’ arĭ ĩhami. Ńero iira dipuwaja marirā ĩhami. Eropirā erā ōaro árĭniguicārācoma Goāmū mera,” arĭ gojañuma. Eropirā mari masia. Ne yujugure iri dorerire ĩgu iiri mera Goāmū ĩgure “Ōagu āhrimi,” arĭ ĩabeami. Goāmure umupeogu dihta ōaro árĭgucumi ĩgu mera. ¹² Goāmure umupeoguru, “Goāmū yare yu ñero iira dipuwaja maricū ĩgucumi,” arĭmi. Moise dorerire ĩguru “Yu basi iri dorerire ĩgu ñero iira dipuwaja mariro ōaro árĭguca,” arĭrimi. Eropigu ĩgu iri dorerire iipehomasibigu árĭgu ñero iira dipuwajacugu dujami.

¹³ Eropirā mari árĭpehrerā iri doreri mera ñero iira dipuwajacurā dujamuriribu. Mari eropa árĭcū ĩha, Jesucristo mari ñero iira dipuwaja ĩgu basi wajayemi ĩgu crusague sĭrigu. Goāmū yare gojarapūgue ōpa werea: “Īgu yucugugue dirisiudigu Goāmū ĩgu ñero iira dipuwaja moadigu āhrimi,” arĭ gojañuma iribojegue. Eropigu Jesucristore crusague dirisiudigure mari ñero iira dipuwajapure Goāmū ĩgure dipuwaja moadigu arĭmi. Eropirā maripu ñero iira dipuwaja marirā dujaa pare. ¹⁴ Jesucristo eropiicū Goāmū Abrahāre ōaro ĩadiro dopa ta judio masa árĭbirā säre ōaro ĩanugami. Eropigu ĩgu arĭdiro dopa ta ĩgu obeodigu Espĭritu Santopu erami marire Jesucristore umupeorāre.

Īgu buherare werenemopu Pablo

¹⁵ Mari masa mari iiro dopa ta weremuhtagura muare. Perā “Ōpa iirāca,” erā arĭ weretamura puhru gajigu gohrotomasibeami. ¹⁶ Eropigu Goāmū Abrahā mera weretamura puhru Abrahāre ĩgu arĭrare gohroto masiya mara. Ōpa arĭ werepiñumi ĩgure: “Mu pārami arĭturiagu mera árĭpehrerā masare ōaro ĩgura,” arĭ wereñumi. Eropa arĭgu ĩgu pāramerā arĭturiarāgue mera arĭgu ĩibiriñumi. Yujugu ta ĩgu pārami arĭturiagu dihtare arĭgu iññumi. Eropa arĭgu ĩgu pārami arĭturiagu Jesucristo arĭburire arĭ wereyugu iññumi. ¹⁷ Eropigu ōpa arĭ werea muare: Iribojegue Goāmū Abrahā mera weretamugu masare ĩgu ōaro ĩiburire wereñumi. Īgu eropa weretamura puhru yoari boje puhru cuatrocientos treinta bojori arĭturiagu mera árĭpehrerā masare ōaro ĩgura,” arĭ wereñumi. Eropa arĭgu ĩgu pāramerā arĭturiarāgue mera arĭgu ĩibiriñumi. Yujugi puhru Moisere ĩgu doreri apiñumi. Moise doreri árĭnugaquerecū Goāmū Abrahāre werepira pehrecū ĩibiriyoro. ¹⁸ Goāmū

Abrahāre mahiḡu ōpa īḡure arī weretuhañumi. “Árīpehrerā masare mū yūre umupeoro dopa ta yūre umupeorāre ōaro iigūca,” arī weretuhañumi. Eropiro Moise doreri árīnūgaquerēcū Goāmūpū iri dorerire iiri mera masare taubeami. Moise doreri iiri mera mari taricū Goāmū muare “Waja mariro ōaro iig mera arīḡu iibirīñumi. Yujugūca,” īḡu arīrapū duhpiburi árībiriboaya.

¹⁹ ¿Eropiḡu duhpiburire iri dorerire Moisere apiyuri Goāmū? Masa erā ñerire masiborore apiñumi iri dorerire erā ñero iira dipuwaja masiborore. Abrahā pārami árīturiagu Jesucristo īḡu eracūgue árītuya iri doreri. Eropiḡu Jesucristo īḡu eracū Goāmū Abrahāre īḡu werediro dopa ta masare ōaro iīñumi. Goāmū iri dorerire apigū anyuare weremuhtañumi. Erā anyua wereñuma Moisere. īḡu Moisepū masare wereñumi. ²⁰ īḡu masare ōaro iiburire Goāmū īḡu basi ta werepiñumi Abrahāre. Gajirā mera werebeobiriñumi īḡu iri dorerire apidiro dopa ta. Eropiḡu īḡu Abrahāre werepirapū Moise doreri tauro ōhaa.

Moise dorerire werepū Pablo

²¹ Goāmū Moisere īḡu dorerire apigū, ero coreḡue Abrahāre īḡu arīrare “Yū arīdiro dopa iisome pare yūhū,” arīḡu iibiripū īḡu. Abrahāre īḡu arīmūhtadiro dopa iibu iipū. “Masare ōaro iigūca,” īḡu arīrare iibu iipū dohpa. Moise dorerire iiri mera mari Goāmū mera ōaro árīmasirā mari iri dorerire ōaro iirā ñero iira dipuwaja opabiriboya. ²² Eropa árīquerēcū Goāmū yare gojarapūḡue ōpa āhraa: “Masa árīpehrerā erā ñero iira dipuwaja opama, arī gojara āhraa. Eropa dipuwajacūrāre erā Jesucristore umupeocū Goāmū ōaro iigūcumī erāre. īḡu Abrahāre werediro dopa ta iigū erāre ñero iira dipuwaja marirā īagūcumī.

²³ Jesucristore umupeori mera masare tauburi árīboro core ḡua Moise doreri doca árīmūribū. Eropa Moise dorerire iirā peresugue árīro dopa árīmūribū. Jesucristo ḡuare tauboro core Eropa árīmūribū. ²⁴ Ōpa sã árīburi árībū Moise doreri: Moise doreri mera Jesucristore mari masiburi erabū. Mari porāre erā buherogue soro dopa ta Moise doreri marire Jesucristore masicū iibu. Eropirā mari Jesucristore umupeocū īḡu marire taumi. Mari ñero iira dipuwaja maricū iimi. ²⁵ Eropirā dohpaguere mari Jesucristore umupeorāre Goāmū “Ōarā āhrima,” arī īhami. ḡua Jesucristore masirā īḡure umupeorā árīrā dohpaguere Moise doreri doca árībea pare.

²⁶ Mūa sã árīpehrerā Jesucristore umupeorā īḡu yarā árīrā Goāmū porā āhraa. ²⁷ Eropirā mūa árīpehrerā Jesucristore umupeorā īḡu waī mera waīyesūnirā árīrā Jesucristo īḡu iro dopa ta āhraa. Jesucristo Goāmū magū árīro dopa ta mūa sã Goāmū porā āhraa. ²⁸ Eropirā árīpehrerā Jesucristo yarā yujuro mera āhraa. Yujugū porā iro dopa āhraa. Eropiḡu ḡua judio masare mūa judio masa árībīrā sãre Goāmū yujuropa ta īhami. Masa pohro majarāre erā oparā sãre yujuropa ta īhami. Ūmare nome sãre yujuropa ta īhami. ²⁹ Eropirā mūa Jesucristo yarā árīrā Abrahā pāramerā sã āhraa. Eropiḡu Goāmū Abrahāre “Mūre ōaro iigūra,” arīrare mūa sãre iimi. Cristo yarā mūa árīcū īḡu mūare ōaro iigūcumī.

4

¹ Mari iri doreri doca árībiriborore mari Jesu yarā árīborore wereḡura daja. Yujugū majiḡu īḡu paḡu yare wūaro opapehobu árīquerēḡu majiḡu

árġu pohro majagu iro dopa áhrimi. Gajirã dorero doca áhrimi dohpa. ² Gajirã Ĩgu pagu apinirã Ĩgu ya árġburire ĩhadibuma dohpa. Ĩgu pagu gameranu árġcũgue Ĩgu basi Ĩgu yare doremi pare. ³ Ĩgu majġu gajirã dorero doca Ĩgu árġro dopa ta mari masa mari ñecu sumarã árġricuri doreri doca árġmuriribu. Pohro majarã iro dopa ta árġmuriribu. ⁴ Mari eropa árġnirãre mari Pagu Goãmu Ĩgu gameranu ejacũ Ĩgu magure Ĩgu pohro árġdigure obeodġu árġmi. Ĩgure obeocũ Ĩgu nomeoguere dehyoadġu árġmi. Eropa dehyoagu judio masu árġdigu árġmi Moise dorerire ĩgu. Eropġu Goãmu obeodġu árġmi Ĩgu magure. ⁵ Gua iri doreri doca árġrãre taubure obeodġu árġmi Ĩgu magure. Ĩgu marire taugu mari pohro majarã iro dopa árġnirãre wiugu Ĩgu porã árġcũ iimi.

⁶ Eropiituhaja mua sã Ĩgu porã árġcũ Ĩgu Jesucristo mera Espiritu Santore obeomi muare. Eropirã Espiritu Santo marire Ĩgu itamuri mera Goãmure mari Pagure “Ahu,” arãa mari pare. ⁷ Eropirã mua Goãmu porã ta áhraa. Ĩgu porã árġrã mua ñecu sumarã doreri doca, pohro majarã iro dopa árġbeaa pare. Goãmu magu Jesucristo wiunirã áhraa. Mua eropárġrã Ĩgu porã árġrã Goãmu oburire oparãca mua árġpehrerire.

Pablo Galacia majarã Jesu yarãre guñaricuru

⁸ Mua ero core Goãmure masibirã árġrã gajirã goãmarãre umu-peomuriribu. Eropirã erã pohro majarã iro dopa árġmurirabu. Goãmu gohrare umupeobirimuribu. ⁹ Eropa árġquererã ta dohpaguere Goãmure masia. Goãmuru muare ĩha masimi. ¿Ĩgu eropa masiquerecũ ta duhpirã i yeba majarã erã pepirire gahmeri daja? ¿Duhpirã iribojegue mua ñecu sumarã doreri mua ĩidiro dopa ta muraro ta Cristo mariro dopa ta ĩidiari daja? ¿Eropirã duhpirã dohpaguere Moise dorerire mua ĩinugarã, pohro majarã iro dopa árġdiari daja mua? ¹⁰ Judio masa erã bosenuri iro dopa mua sã ĩica Goãmu mera õadiarã. Soorinuri nuçu, aberi nuçu, bosenurire eropiica. Bojori nuçu bosenurire õaro ĩica. Mua eropiiri queoro árġbeaa. ¹¹ Mua eropiicũ pee ñero siporãcaca yuru. Muare yu turaro buhequerecũ ta “Iri waja mariboca,” arġ pepia.

¹² Eropġu yuhu muare burigã õpa arġ werea. Mari Jesucristore umupeoturadiro dopa ta umupeoque daja. Yu Jesucristore umupeogu gua judio masa doreri yure taubiricũ ĩha irire umupeobiribu pare. Eropirã mua sã Jesucristore umupeorã iri dorerire umupeobiricãro gahmea Goãmu mera õaro árġmorã. Yuhu mua pohro ne árġcũ mua ne ñero ĩibiribu yure. ¹³ Mua masia yuhu mua pohro ne árġdirore. Yuhu Jesucristo marire tauburire ne muare buhegu eġagu dorecugu árġbu. ¹⁴ Yu dorecugu ñero taribu. Yu eropa dorecugu árġquerecũ mua yure doobiribu. Yure õaro umupeo õaro bocatiribu. Goãmu obeodġu anyu árġro dopa yure ĩabu. Yure Jesucristore ĩiro dopa õaro ĩibu. ¹⁵ Yure burigã gamebu. Yure burigã gamera yu serẽropẽ ta árġpehrerire omorã árġbu yure. ¿Mua eropa árġcũ dohpa wahari dohpaguere? Mua negohraguere yure mucubiridiro dopa ta dohpaguere mucubiribeaa. ¹⁶ ¿Muare diaye majare yu werera waja mua ĩaturġgu wahari dohpaguere?

¹⁷ Mua pohrore gajġ buherire buherã muare õaro umupeocoma. Erã eropa umupequererã muare siporã mera mahibiricoma. Mua yure yu buheri sãre gamebiricũ gahmema erã. Mua erãpũre umupeocũ gahmema. Eropirã muare umupeocoma. ¹⁸ Masare umupeocũ õapũrica.

Erā weca dihta umupeocū ðabeaa. Yu árícū dihtare umupeocū ðabeaa. Árīpehrerāre yujuropa ta ðari mera umupeoniguicāro gahmea. ¹⁹ Mũa yu porā iro dopa āhraa. Eropigu mũare guñaricua. Mũaare burigā guña teboricua. Yujugo porācũbo teboricuro dopa ta yu sã teboricua mũare guñaḡu. Igo magu ðaro dehyoacū gamego teboricum. Mũa Goāmũ porā ðaro árícū gameḡu teboricua yu sã. Mũa Jesucristo árīrcũre ðaro opacū gahmea. ²⁰ Mũa pohro burigā wadiarica. Yu mũa mera árīḡu yu basi mũare ðaro weremasiboya gojaripũ gojaro mariro. Eropigu mũare dohpaguere ĩabigu mũa Jesucristore ðaro umupeoturanemoborore masibirica.

Agar Sara mera erā árĩrare werequeoḡu mari Goāmũ porā árĩrare werepũ Pablo

²¹ ¿Mũa Goāmũ mera ðaro árĩmorā Moise dorerire iiniguicādiarā mũa Moise arĩ gojarare masibeari? ²² Őpa arĩ gojañumi Moise: Abrahā porā ũaa perā árĩñuma. Īḡu marapo pohro majago Agar waĩcũgo yujugu porācũñumo. Pũhrũ Abrahā marapopũ Sara waĩcũgo gajigu porācũñumo. ²³ Īḡu pohro majago magu mari masa iro dopa ta masa dehyoañumi ĩḡu. Abrahā igore porā moara pũhrũ mata nijipo āhri porācũñumo. Īḡu marapopũ mata porā bocamasibirĩñumo. Eropigu Goāmũ ĩḡu arĩdiro dopa ta igore porā bocacū iĩñumi. ²⁴⁻²⁵ Erā perā nome iribojegue eropa warare ōpa buhegura mũare. Goāmũ Abrahāre wererare iirā Sara árĩro dopa āhrima. Gajirā Moise dorerire iirā Agar iiro dopa āhrima. Agar igo porā sã gajirā dorero doca árĩmuriñuma. Pohro majarā árĩmuriñuma. Erā arĩdiro dopa āhrima Moise dorerire iirāpũ. Eropirā Moise doreri doca árĩmuriñũ āhrima pohro majarā iro dopa árĩrā. Iri dorerire iirā “Goāmũ mera ðaro árĩrāca,” arĩmuriñuma. Iri dorerire Goāmũ Moiserẽ apĩñumi Sinaĩ waĩcũdigu utāḡugue Arabia yebague. Dohpaguere iri dorerire Jerusalēngue judio masa umupeoma. Eropirā iri doreri doca āhrima. ²⁶ Őpa āhrima Goāmũ Abrahāre wererare iirāpũ. Erā Jesucristore umupeorā āhrima. Sara arĩdiro dopa āhrima. Sarapũ pohro majago árĩbirimuriñumo. Mari Jesucristore umupeorā “Moise doreri mera taribeaa,” arāa. Jesucristo marire taucū Goāmũ porā árĩrā mama Jerusalén maca majarā āhraa. ²⁷ Eropirā Jesucristore umupeorā Goāmũ porāpũ bajarā árĩrācoma. Moise dorerire iirāpũ bajamerā árĩrācoma. Eropa ta arĩ werea Goāmũ yare gojarapũgue: Mũhũ ne porā opabigo, porācũri pũririñe pepibigo ðaro mucubirique. Gajigo igo marapũ mera árĩgo igo porā árĩquerecū igo pāramerā arĩturiarā bajamerā árĩrācoma. Mũpũre dohparagā mũ porā mariquerecū mũ pāramerā arĩturiarā tauro bajarā árĩrācoma. Eropigo mucubirique, arĩñumi Goāmũ.

²⁸ Isaa Abrahā magu arĩdiro dopa mari Goāmũ porā āhraa. Isaa Abrahā magu dehyoagu Goāmũ ĩḡu werediro dopa ta dehyoañumi. Mari Goāmũ porā árĩrā Goāmũ ĩḡu werediro dopa ta ĩḡu porā āhraa. ²⁹ Eropirā Abrahā porā perā árĩñuma. Pohro majago magu Ismael árĩpehrerā masa iro dopa dehyoañumi. Isaapũ ĩḡu pago igo porā bocamasibiricũ Espĩritu Santo itamuri mera porācũñumo. Erā dehyoara pũhrũ Ismaepũ pohro majago magupũ Isaare Abrahā marapo magure ĩḡu ñero taricũ iimuriñumi. ĩḡu iidiro dopa dohpaguere eropa wahaa. Erā Moise dorerire iidorerāpũ marire ñero taricū iima. Mari Espĩritu Santo itamuri mera Goāmũ porā

ãhraa. Mari eropa árîrãre marire ñero taricũ iima. ³⁰ Eropa wacũ Goãmu yare gojarapũgue irire dohpa arîrire buherãca. Õpa Goãmu arîñumi Abrahãre. “Mũ pohro majago magu mũ oparire ne opasome, arîñumi. Mũ marapo magu dilta opapehogucumi. Eropigu mũ pohro majago igo magu mera cõaque mũ pohrore,” arî wereñumi Goãmu Abrahãre. ³¹ Eropirã, yu acawererã, mari Goãmu porã árîrã pohro majago magu iro dopa árîbeaa. Ìgu pagu oburire opamasibiriñumi. Maripu mari Pagu Goãmu ìgu oburire opamasirãca. Marire ìgu mera õacũ iimi.

5

Cristo marire ìgu taura pũhrũ turarã árîro gahmea marire, arî gojapu Pablo

¹ Eropigu marire mari ñecu sumarã árîricuri dorero doca árîñirãre Jesucristo tautuhajami. Mari ñero iira dipuwajare Jesucristo ìgu basi wajayebasami mari Goãmu mera õaro árîboro dopa. Eropirã mari Goãmu porã árîrã Jesucristore guñaturaniguicãro gahmea. Eropirã peebiricãro gahmea erã Moise dorerire iidorerãre.

² Õaro peeque yure. Yũhu Jesucristo ìgu apidigu ãhraa. Eropigu muare õpa werea. Mũa Goãmu mera õaro árîmorã mũa gasiro merogã wiri aĩcũ Jesucristo muare ìgu sribasara waja mariboya. ³ Eropigu guhyadiaro mera werea daja. Goãmu mera õaro árîborore erã gasiro merogã wiri aĩrã Moise dorerire árîpehrerire iiro gahmea erãre. ⁴ Eropirã mũa “Goãmu marire taugucumi Moise dorerire iicũ,” mũa arîdiarã, mũa Jesucristore cõarã iiboca. Mũa eropiirã Goãmu ìgu mera õaro árîburire muare õaro ìgu iiburire cõarã iiboca. ⁵ “Maripu Goãmu mera õhaa,” arîmasia Jesucristore umupeori mera, Espiritu Santo ìgu itamuri mera. “Goãmu guare Ñero iira dipuwaja mariro õarã áhrimi, arî ìagucumi,” arîmasia. ⁶ Eropiro gasiro merogã wiri aĩñirã árícũ sãre, wiri aĩbirinirã árícũ sãre ìabeami. Mari Jesucristore umupeorã árícũ gajirãre mari mahi umupeocũ ìhami Goãmu.

⁷ Mũa ne Jesucristore umupeorã ìgu yare õaro diaye iimuribu. Eropirã dohpaguere mũa Jesucristo yare diaye majare õaro iibiricũ gajirã muare cãhmotañorã. ⁸ Goãmũpu eropa iibirimi. Ìgu muare Jesucristo yarã árîmorãre beyegu áhrimi. ⁹ Eropigu õpa werea muare. Yujugu masu ìgu guyarire buhenũgacũ peerã masa árîpehrerã ìgure peerã guyarire umupeorã wahama õaripure peediabirã. ¹⁰ Ìgu muare eropa guyarire buhenũgaquerecũ õpa arî pepia. “Erã Jesucristore umupeorire oparã erã iri guya buherire umupeosome,” arî pepia yũhu muare. Muare goroweocoregure noho árîgure ìgu eropa iira dipuwajare Goãmu dipuwaja moagucumi ìgure.

¹¹ Õpa arî werewuañorã gajirã yũpũre: “Mari Goãmu mera õaro árîmorã mari gasiro merogã wiri aĩro gahmea, arî buhemi Pablo,” arãñorã yure. Yũhu eropa arî ne buhebeaa. Yũhu dohpaguere “Gasirogã wiri aĩro gahmea,” yu arî buhecũ irire iidorerãpu yure ñero taricũ iibiriboañuma. Yu õpa arî buhea: “Mari ñero iira dipuwajare Jesucristo wajayebasadi árîmi crusague siringu. Eropirã mari Goãmu mera õaro árîmorã Jesucristore umupeoro gahmea,” arî buhea yũhu. Yu eropa arî buhecũ judio masa pee guama. Yure ñero taricũ iima. ¹² Erãpu muare goroweorãpu gasiro merogã wiri aĩdorerãpu erã basi wiri aĩpehocãporo.

¹³ Muapure Goãmu mua ïgu porã ářĩmorãre aïgu mua Moise dorerire iimorãre beyebiripũ. Muare iri dorerire iidorebiriquerecũ mua mua ïaribejarire iibiricãro gahmea. Őpa iiro gahmea. Mua ářĩpehrerãre ôaro mahi umupeorã erãre itamuniãicãro gahmea. Mua gajirãre umupeorã Moise dorerire ářĩpehrerire iirãca. ¹⁴ Eropã ta arĩ gojara áhraa: “Mu basi mahiro dopa ta mu pohro ářĩrãre mahique,” arĩ gojara áhraa. ¹⁵ Eropirã mua game ïhaturicũ, papũri, mua disitĩri wereniãicũ mua basi ôaro mua game umupeoro pehboca. Eropirã mua basi ôaro ářĩro gahmea.

Masa erã gamerire iire Espĩritu Santo ïgu gameri sãre werepũ Pablo

¹⁶⁻¹⁷ Őpa arĩ werediaca muare. Mari Jesucristo yarã ářĩcũ mari pepirigue ôpa áhraa. Mari ñeri ïaribejari áhraa. Espĩritu Santo ïgu gameri sã áhraa. Mari ïaribejari Espĩritu Santo ïgu gameri mera yujuro mera ářĩbeaa. Eropiro marire masiya mariro wahaa. Eropirã mua Espĩritu Santopure yũhrirã mua ïaribejaripure iisome. Eropirã Espĩritu Santo ïgu gamerire iinigiãcãque. ¹⁸ Eropirã Espĩritu Santo gamerire iirã ářĩrã “Moise doreri mera mari tarirãca,” arĩ pepibea mua.

¹⁹ Masa erã ñeri ïaribejarire erã iicũ ôaro ïhamasica mari. Őpa iima erã ïaribejarire iirã: Őma gajirã nome mera ñero iima. Nome sã gajirã uma mera ñero iima. Diayea iiro dopa iiricũma. Ñerire pepima. Ñerire wereniãicũ. ²⁰ Eropirã goãmarã wãanirãre umupeorã “Mari goãmu áhrimi,” arĩ umupeoma. Gajirãre dojama. Eropirã masare doho áhřima. ïhaturima. Disitĩri wereniãicũ. Gajirãre doẽma. Mata guama. Gajirãre tarinũgadiama. Yujuro mera ářĩdiabeama. Yuju curu majarã gajiri curu majarãre ïhaturima. ²¹ Eropirã gajirãre gajinore erã opacũ ïhaturima. Gajirãre wejẽdiarã wejẽma. Merericurã áhřima. Mererã ñerire ïaribejama. Eropã iirã gajino ñeri sãre iima. Eropiã yũhu muare werediro dopa ta werea daja gahyadario mera. Iri ñerire iinigiãcũ Goãmu ïgu opu ářĩroguere ejamasisome.

²² Espĩritu Santo yapũ ôpa áhraa. Erãre ôpa iirã ářĩcũ iimi. Ářĩpehrerãre mahi umupeoma. Mucubirima. Gũiro mariro áhřima. Gajirã erãre ñero iiquerecũ erã mera guabeama. Mojomoro ïhama. Duhuro mariro Goãmu ïgu gamerire ôaro iima. Erã mohmediarire erã mohmediabiriri sãre ôaro iima. ²³ Eropirã ñijiyajaro mera iima. Erã ñero iidiaquererã iibeama. Eropã ta iima Espĩritu Santore yũhrirã. Eropã iirãre “Eropã iibiricãcãque,” ne arĩbeamĩ gajigu. ²⁴ Eropirã mari Jesucristo yarã ářĩrã mari ñero ářĩdirore duhucã mari gamerire mari ïaribejarire iinigiãcãbeaa. ²⁵ Eropirã mari Espĩritu Santo itamuri mera iirã ářĩrã ïgure yũhriniãicãro gahmea.

²⁶ Eropirã mari “Yũhu gajirãre tarinũgaa,” arĩ pepibiricãrã. Eropirã gajirãre game ïhaturicũ iibiricãrã. Gajirã erã ôari oparire obobiricãrã.

6

Mua mera majarãre itamuque, arĩ werepũ Pablo

¹ Acawererã, mua mera majagu Jesu yagu ïgu ñerire iicũ ïha ïgure itamuro gahmea mua Espĩritu Santo dorerire iirãpũre. ïgu iri ñerire duhucũ ôaro mera werero gahmea. Eropã itamurã mua ôaro pee masique mua sã ñerire iiri arĩrã. ² Eropirã mua basi game itamuque ářĩpehrero. Mua eropã itamurã Jesucristo dorediro dopa ta iirãca.

³ Yujugu “Yuhu ðarire iigu áhraa,” arí pepigu, ígu ðarire iibiriqueregu ðpa arígu ígu basi guyagu iimi. ⁴ Eropirã marire ðpa iiro gahmea. Mari basi mari iiricurire ðaro queoñanurusiario gahmea. Eropa íara puhru mari áríricuri ðari árícũ íha “Yuhu ðarire iiaa,” arímasia. Eropirã mari ðari áríricuri mera mucubirimasia gajirã áríricurire íaro mariro. ⁵ Eropigu mari áríricurire Goãmu beyegucumi. Eropirã mari gajirã erã iiricurire íhanurubiricãro gahmea. Eropirã mari yujurãyeri iiripure íaro gahmea.

⁶ Eropirã Jesucristo yare ðari buherire peerãpu erãre buherãpãre erã gamerire itamuporo árípehrerire ðarire.

⁷ Eropirã “Goãmu yu ñerire iira dipuwaja dipuwaja moasome yare,” arí pepi masiya mara. Ópa arí pepirã mua diaye arí pepibirica. Eropiro Goãmure guya masiya mara. Eropirã mari dohpaguere iira waja puhrgue bocarãca. ⁸ Eropirã mari ñaribejarire iiniguirã iri ñeri iira waja dipuwajacurãca. Eropirã peamegue warãca. Mari Espíritu Santo gameripure iirã ðaro wajatarãca. Eropirã Goãmu mera umuri nucũ ðaro áríniguirãca. ⁹ Eropirã mari Espíritu Santo gamerire iinigucãrã. Gariborebiricãrã. Goãmu gamerinu mari wajatarãca ðarire duhubirã. Eropirã ðarire iinigucãro gahmea. ¹⁰ Eropirã árípehrerisubure ðaro umupeoro gahmea árípehrerãre. Eropirã Jesucristore umupeorãre burigã mahi umupeoro gahmea yujugu porã iro dopa.

Pablo ígu weretura

¹¹ Íata. Yu basi muare gojagu pagari deyori mera gojagu iiaa. ¹² Eropigu ðpa werea muare. Erã muare gasiro merogã wiri aídorerãpu ðpa gahmema. Erã dorerire mua iicũ íha gajirã judio masa erã mera ðaro áríboboma. Eropirã erãre ñero taricũ iibiribocoma daja erã Jesucristo yare umupeoquerecũ. ¹³ Erã basi gasiro merogã wiri aíquererã Moise dorerire gajire iibeama. Erã eropa iibiriquererã, muapure erã dorerire iídorerã mua gasiro merogã wiri aicũ gahmema erã. Eropa gahmema gajirã judio masare ðpa erã aríboro dopa mucubiriri mera. “Gua dorero mera Galacia majarã judio masa áríbirã mari áríricurire iiaa,” erã aríboro dopa muare erã dorerire iicũ gahmema. ¹⁴ Yu tamera erã eropa mucubiridiario dopa ta ne mucubirissime. Mari Opu Jesucristo iira mera dihta mucubiria. Ígu mari ñero iira dipuwajare wajayebasadigu árími crusague sírigu. Iri dihtare mucubiria. Jesucristo eropa iira mera yuhu ígu taudigu arígu masa erã ñaribejarire guñabeaa pare. I umu maja masa erã ñaribejari sã doremasibeaa yare. ¹⁵ Eropiro gasiro merogã wiri aicũ, wiri aibiricũ sãre Goãmu íabeami. Masa Jesucristo mera ðari mera gohrotorã árícũ íhami. ¹⁶ Erã eropa gohrotonirã árípehrerã iri buherire Jesucristo yare yuhrirãre “Erã ðaro áríporo,” arí serãa Goãmure. “Erãre mu ya curu majarã gohra áríãre mojomoro íaque,” arí serëbasaa yuhu Goãmure.

¹⁷ Yuhu Jesucristo dorediro dopa ta iigu ígu yare buhera dipuwaja gajirã yare ñero taricũ iima. Erã eropa iira cami mura áhraa yare yu dupure. Eropigu ðpa gahmea: Iripëta yare bujawerocũ iiporo Jesucristo yarãre gorweorã.

¹⁸ Muare árípehrerãre ðaro árícũ gahmea. Mari Opu Jesucristo muare árípehrerãre ðaro iiporo. Eropa ta iiporo. Iripëta áhraa.

Efesios

Efeso majaräre gojabeoñumi Pablo

¹ Yuhũ Pablo Goãmũ İgu gamero dopa ta Jesucristo yure İgu yare buhedore apidigu añraa. Eropigu muare Efeso majaräre gojabeoa. Muare Jesucristore ðaro umupeoräre gojabeoa yuhũ. ² Goãmũ mari Pagu mera Jesucristo mari Opu mera muare ðadorea. İgu muare itamuri mera ðaro árıque mua.

Cristo yarã mari árıcũ İagu Goãmũ ðaro iimi marire, arı gojañumi Pablo

³ Goãmũ mari Opu Jesucristo Pagu marire ðaro iiniguicãmi. Árıpehreri İgu ya ðari mera İgu mari pepirire ðarire ohomi mari İgu pohro árıro dopa. Marire siporã turacũ iimi. Cristo yarã mari árıcũ İagu eropa marire ðaro iimi. Gua İgu eropiicũ İha ðaro umupeoa. İğure ðaro wereniguia. ⁴ Őpa iipu İgu marire İgu yarãre: I yeba árıboro coregue İgu yarã árımoräre beyemuhtapu İgu marire. Eropu beyegu İgu marire İgu İarore ñeri iiro marirã mari árımoräre iipu. Eropigu İgu marire “Ñerã àhrima, arısome. ⁵ Marire mahigu mojomoro İagu iribojegue ðpa arımuhtapu İgu marire: “Yu magu Cristo İgu itamuro mera erã yu porã ðaro árırãcoma,” arı apıpu marire iribojegue ta. İgu gamediro dopa ta eropa iipu İgu marire. ⁶ Marire İgu eropa ðaro iicũ İarã umupeoa. İğure ðaro wereniguia. İgu magu İgu mahigu Jesucristo yarã mari árıcũ İagu, ðaro iimi İgu marire. ⁷⁻⁸ Eropigu İgu magu Jesucristo İgu di coãgu sirıgu mari ñeri iira dipuwajare wajayebasadi árımi. İgu eropa wajayebasacũ mari ñeri iirare cãdijidi árımi Goãmũ. Eropigu marire turaro mahıgu, marire mojomoro İagu eropa iipu Goãmũ. Eropıgu marire peamegue wabonıräre taudi árımi. İgu ðaro masipehori mera eropiipu İgu. Eropırã İğure ðaro wereniguia. ⁹⁻¹⁰ Eropıgu İgu marire İgu iiborore marire masicũ iimi. Iribojegue majaräre irire masicũ iibirımurıpu İgu. Őpa añraa marire İgu iiboro. İgu gamediro dopa ta İgu pepidiro dopa ta árıpehreräre Cristo dorero doca árıcũ iıgucumi. Eropıgu árıpehrerire İgu ya árıcũ iıgucumi. İgu queorasubu árıcũ umaro majaräre, i yeba majarã säre İgu dorero doca árıcũ iıgucumi İgu. Eropıgu umaro maja säre i yeba maja árıcũ säre İgu ya dihta árıcũ iıgucumi. Eropıgu Jesucristopu árıpehrerã weca opu árıgucumi. Eropıro árıpehreri İgu ya dihta árıroca. Eropu árıbure árıdorepu Goãmũ İğure.

¹¹ Eropı Cristo yarã mari árıborore masiyugu Goãmũ marire beyetuhapu İgu yarã árımoräre. I árıpehrerire apıpu İgu, İgu pepidiro dopa ta İgu gamediro dopa ta iibu. ¹² İgu eropiipu İgu yare gua iiborore. İgu yare gua ðaro iicũ İarã gajırã sä İğure umupeorã “Turagu àhrimi,” arıırãcoma. Guapu judio masa Cristore gamenuganırã árırã İğure umupeomuhtanırã árıbu. ¹³ Mua sä diayere werenıguirire, ðari buherire peeabu. Iri buheri mera ta Goãmũ pohrogue warãca mua. Irıre peerã İğure umupeoa. Eropırã İgu yarã wahabu mua. Őpa arıpu Cristo: “Yure umupeoräre Espıritu Santore obeogara,” arı werepipu. Eropıgu İğure mua ua iiborore.

Īgu yare gva ōaro iicū ģarā gajirā sā ūmupeocū ģagu ģgu Espiritu Santore odigu ārīmi muare. Eropigu ģgure mva opacū, "Jesucristo yarā āhraa," arī masicū iimi ģgu muare. ¹⁴ Goāmū marire taricū iiami. Eropigu puhru ģgu pohrogue aġagucumi marire ģgu oburire marire obu. Marire aġaboro core Espiritu Santopū mari mera āhrimi. Ģgu mari mera ārīcū Goāmū mera mari ārīborore ōaro masia. Goāmū marire ģgu eropiicū ģarā ģgure umupeiari mera, "Ōagu āhrimi," arāa mari.

Pablo Goāmure serēbasānumi Jesu yarāre

¹⁵⁻¹⁶ Eropigu Jesucristore umupeiari mva ārīcū peebeo, ārīpehrerā ģgu yarāre mva umupei mahirire peebeogu Goāmure "Ōhaa," arāa. Eropigu ūmuri nūcu serēbasaa muare Goāmure. ¹⁷ Mari Pagū ūmaro majagu ģgu yare muare ōaro masicū iidoregu serēbasaa. Eropigu ģgure mva ōaro masinemoboro dopa serēbasaa. Ģgu Goāmū Jesucristo mari Opū Pagū āhrimi. ¹⁸ Eropigu mva ōaro masiboro dopa muare serēbasaa Goāmure. Ģgu muare taugu, ģgu yarā ārīmorāre iimi ģgu muare. Eropigu muare ģgu yarāre ģgu pohro ōaro wacū ģigucumi. Irire mva ōaro masiboro dopa serēbasaa yahu Goāmure. Eropigu ģgu marire oburi sāre "Ōataria āhraa," iri mva arī mva masiboro dopa serēbasaa. Ōpa mva masiboro dopa serēbasaa muare Goāmure. ¹⁹ Mari Jesucristore umupeiari ģgu itamugu, ģgu turari mera ģgu iimi. Ģgu gajirā tauro turagu āhrimi. Muare iri sāre ōaro masiboro dopa serēbasaa mari Pagū Goāmure. ²⁰ Ģgu turari mera Cristo sīridigure masudigu ārīmi. Eropigu ģgu turari mera ūmarogue ģgu diayepū Cristo ģgu doacū iidi ārīmi Goāmū ārīpehrerāre ģgu doreboro dopa. ²¹ Ero doagu ārīpehrerā ūmaro majarā oparā weca, ārīpehrerā dorerā weca āhrimi Cristo. Eropigu i ūmū majarā weca opū, gajipū majarā sā weca opū, ārīpehrerā dohpague majarā, gajisubū majarā sā, puhrugue majarā sā erā weca opū ārībū ta āhrimi ģgu. ²² Eropigu ārīpehrerā weca, ārīpehreri weca apīpū Goāmū Cristore. Eropigu ārīpehrerire opucucū iipū ģgure. Eropiro Cristo yarā yuju curu ārīrā erā opū ārībure acupū ģgure. Erā dipuru iro dopa ārīgu āhrimi ģgu. ²³ Cristo yarā yuju curu ārīrā ģgu dūpū iro dopa ārīrā āhraa mari. Cristo ārīpehreroġue ārīniguimi. Eropigu mari ģgu yarā mera ārīniguigu marire itamuniguicāmi.

2

Goāmū marire mahigu, mojomoro ģagu taupū marire, arī gojañumi Pablo

¹ Ģeri dipuwajacubonirā peamegue dederebonirā ārīquerecū ta Goāmū muare taumi. ² Iribojeguerē i yeba majarā Goāmū tarinugarā iro dopa iimūrinirā ārīribū mva. Eropirā watī ģgu gamero dopa ta iimūrinirā ārībū mva. Ģgu watī i yeba doregu Goāmure tarinugarā opū āhrimi. ³ Iribojegue ārīpehrerā mari ōpa dihta iinirā ārīribū. Mari űeri dihtare ūaribejaribū. Mari ejatuharo mari pepiro dopa iimūribū. Eropa ārīrā gajirā ārīpehrerā iro dopa ta mari sā űerā ārīmūribū. Mari ārīpehrerā masa mera eropa ārīrā ārīcū ģagu Goāmū mari mera guagu dipuwaja moadiaripū. ⁴ Eropa iidiaqueregu ta marire turaro mahigu mojomoro ģapu. ⁵ Eropa mahitarigu mari űeri iira waja peamegue dederebonirā mari ārīquerecū ta marire ģgu mera ārīniguimorā ārīcū iimi. Jesucristo ģgu

sĩribasara mera mari ĩgu yarã árcũ marire iimi. Marire mojomoro ĩagu taumi ĩgu marire. ⁶ Goãmu Jesucristo sĩridire masugu ĩgu pohro apidigu ářĩmi ářĩpehrerãre dorebu. Eropigu ĩgu mari sãre ĩgu yarãre Cristo dorerire opacũ iimi. Eropirã ĩgu pohro ĩgu mera ářĩřãca mari. ⁷ Eropiimi ĩgu pũhrũge majarã marire ĩgu mojomoro ĩarare erã masiboro dopa. Jesucristo marire ĩgu õaro itamura mera ĩgu masare turaro ĩgu mahĩřire ĩhmumi. ⁸ Cristore mari umupeocũ Goãmũpũ marire taricũ iimi. Marire mahigu ĩgu pohro ejaćũ iigacumi. Mari gamero õaro iĩricuri mera Goãmũ pohro ejadiarã ejamasisome. Mari iĩbiriquerecũ apimi mari ĩgu pohro ejaburire. Eropiro waja mariro umuri nucũ ĩgu mera mari ářĩburire ohomi marire. ⁹ Mari basi tarimasibirica. Mari iiri mera mari gamero mera tarirã mari “Gua basi taria,” arĩboca. Goãmũpũ marire taumi ĩgu pohro mari wamorãre. ¹⁰ Jesucristo yarã árcũ iimi marire Goãmũpũ. Eropigu Jesucristo yarã mari árcũ ĩagu õarire iirã dihta wacũ iimi marire. Iribojegue ĩañumi marire õarire iĩmorãre.

Cristore oparã õaro áhřaa, arĩ gojañumi Pablo

¹¹ Eropirã mua ero coregue ářĩricũřare dohpague sãre guñaque. Mũare judio masa ářĩbirãre gua judio masapũ ĩhaturimuribu. Gua circuncisiõn iĩnirã gasiro merogã wiri añĩrãpũ mũare gasiro merogã wiri aĩbirãre “Goãmũ yarã ářĩbeaa mũapũ,” arĩmuribu mũare. ¹² Irisubure mua Cristo yarã ářĩbirã boje majarã ářĩmuribu. Goãmũ beyenirã judio masa iro dopa ářĩbirimuribu mũapũ. Mua eropa ářĩnirã ĩgu beyenirã mera pepuri majarã ĩhaturirã ářĩmuribu. Goãmũ mũare “Masare õaro iigura,” ĩgu arĩ apinirã ářĩbirinirã ářĩribu mua. Mua ñeri dipuwaja peamegue wabonirã ářĩrã ářĩribu mua. Goãmũ moorã ářĩnirã peamegue dederebonirã ářĩnirã ářĩribu. ¹³ Dohpaguepure Jesucristo yarã áhřaa pare mua. Iribojegue boje majarã ářĩnirã ářĩquererã, dohpaguere ĩgu yarã áhřaa pare mua. Cristo mua ñeri dipuwaja crusague ĩgu di cõara pũhrũ Goãmũ yarã árcũ iimi mũare. ¹⁴ Eropigu judio masare mua ĩhaturirã árcũ Cristo marire bosadigu ářĩmi. Masare bosagu áhřimi ĩgu. Judio masa, judio masa ářĩbirã mera pe curu mari árcũ ĩagu ĩgu marire yuju curu ta árcũ iidi ářĩmi. Mari ĩhaturiri duhucũ õaro mera árcũ iimi ĩgu marire. ¹⁵⁻¹⁶ Őpa iimi ĩgu marire. Mari ñeri dipuwaja crusague sĩřĩgu, marire peamegue wabonirãre taugu iimi. Eropa taugu ĩgu yarã ĩgu iimi marire. Eropigu mari ĩgu yarã wacũ pe curu mari ářĩquerecũ ta yuju curu ta mama curu iimi marire. Eropigu iribojegue mari game ĩhaturinirã ářĩquerecũ ta marire crusague sĩribasagu bosadigu ářĩmi. Eropigu judio masa doreri pehrecũ iimi ĩgu. Erã doreri marire duca wayoro pe curu majarã wacũ. Eropigu yuju curu ta árcũ iimi pare. Eropigu Cristo Goãmũ yarã árcũ iimi marire.

¹⁷ Eropigu marire bosagu arigu õari buherire Goãmũ mera õaro ářĩburire weregu aridi ářĩmi. Mua judio masa ářĩbirã Goãmũre opabirã boje majarã ářĩnirã ářĩribu. Mua eropa árcũ ĩagu mũare õari buherire weregu aridi ářĩmi. Gua judio masa sãre Goãmũ yare oparã sãre weregu aridi ářĩmi. Eropigu ářĩpehrerãre marire bosagu aridi ářĩmi ĩgu. ¹⁸ Dohpaguere ářĩpehrerã gua judio masa, mua judio masa ářĩbirã sã mari Pagu mera õaro ářĩmasia mari. Espĩritu Santo ĩgu itamuri mera Cristopũ marire eropa árcũ iimi. ¹⁹ Eropirã dohpaguere mua boje majarã ářĩbeaa. ĩgu ya curu majarã ta áhřaa. Goãmũ yarãre ĩhaturirã ářĩbeaa. Goãmũ

yarã mera majarã ähraa pare. ²⁰ Goãmu yare weremuhtanirã iribojegue majarã ïgu ya wereniguirire goja, masare weremariñuma. Gua sã ïgu yare buhedore apinirã Jesucristo ya ðari buherire werea masare. Gua arïpehrerã eropa werecũ peerã Cristore umupeonugabu mua. Cristopu ährimi mari arïpehrerãre ïgu yarã arïcũ iigu. ïgu eropa iibiricũ mari ïgu yarã arïmasibiriboya. ²¹ Eropigu ïgu turari mera marire ïgu yarãre yuju curu ta arïcũ iimi ïgu marire. Eropirã ïgu turari mera ðarã wahaa mari. Mari eropa arïcũ ïagu ïgu mari Opu ta mari mera ährimi. ²² Eropirã Cristo yarã arïrã arïpehrerã gajirã mera ïgu yarã mera yuju curu wahabu mua sã. Mua eropa wacũ Goãmu ïgu Espiritu Santo mua mera ährimi.

3

Judio masa arïbirãre ðari buherire wereñumi Pablo

¹ Mua judio masa arïbirã eropa ïgu ya curu majarã arïburire yu werera dipuwaja peresugue ähraa yuhu. ² Muare judio masa arïbirãre Jesucristo yare buhebure Goãmu yure apimi. Yure mojomoro ïagu, yure mahigu ðari buherire yure weredoregu, yure apimi. Irire peetuhabu mua. ³ Iribojegue masa erã masibirirare Goãmu dohpaguere yure masicũ iimi. Ire merogã were muare gojabeotuhabu. ⁴ Yu eropa gojabeorare buherã Cristo ïgu yare yu masirare masirãca mua sã. ⁵ Iri ïgu wererare iribojegue majarãre ïgu erã masipehocũ iibiripu. Dohpaguepure guare Jesu ïgu apinirãre Goãmu yare weremuhtarã sãre irire masipehocũ iimi Goãmu. ïgu Espiritu Santopu guare masicũ iibasami. ⁶ Opa ähraa ïgu werera gajirã masibirira: Judio masa dihtare Goãmu itamubeami. Judio masa arïbirã sãre ïgu itamumi. Oari buherire erã ðaro peecũ itamugucumi ïgu erãre. Eropirã gua judio masa, mua judio masa arïbirã mera yuju dupu iro dopa yuju curu ta ähraa mari. Eropirã mari arïpehrerã Jesucristo yarã arïrã yujuro mera Goãmu ïgu masare "Oaro iigura," ïgu arï werepirare oparãca mari.

⁷ Goãmu mojomoro ïagu yure mahigu ire ðari buherire werebure yure apimi. ïgu masiri mera apimi ïgu yure. ⁸ Arïpehrerã gajirã Jesucristo yarã erã doca arïrã erã docague majagu gohra ähraa yuhu. Yu eropa arïquerecũ ta judio masa arïbirãre ðari buherire werebure apimi Goãmu yure. Iri buheri Cristo ðatariagu ïgu arïrãre, ðatariari ïgu oparire, ðaro ïgu oburire werebure apimi yure. ⁹ Yure eropa apigu Goãmu "Opa masare tauguca," arïgu, arïpehrerã masare dohpa ïgu itamuborore ðaro werepehobure apimi yure ïgu. Goãmu arïpehrerire ïhacünugudigu ährimi. Iribojegue majarãre irire masare ïgu tauborore masare werepehobirinipu Goãmu. Dohpagueere yure iri ðari buherire weredoregu apimi masare ïgu ðaro tauborore masicũ iibu. ¹⁰ Eropirã iri buheri mera masa ïgu yarã wahama. Erã eropa wacũ ïha umaro majarã oparã anyua Goãmu masipehogu ïgu arïricurire masima. Erã eropa masicũ gamepu Goãmu. ¹¹ Eropigu i yeba arïboro coregue ta "Masare peamegue wabonirãre taugura," arïtuhapu Goãmu. Eropa arïdigu arïgu dohpague mari Opu Jesucristo ïgu siriro mera ïgu arïdigo dopa ta marire taudi arïmi. ¹² ïgu eropa taucũ dohpaguere Cristore umupearã ïgu yarã wahaa mari. ïgu yarã arïrã güiro mariro Goãmu mera wereniguimasia mari. Eropirã güibiricãque mua. ¹³ Eropirã ðari buherire yu wereri waja dohpaguere peresugue arïgu yu ñero taricũ ïarã bujawerenijarã Goãmu

yare duhubiricãque. Ôari buherire yu werecũ peerã Goãmu yarã wahabu mua. Yuhu eropiira dipuwaja peresugue ãhraa. Eropa árigu mua igu yarã áriburire ñero tarigu iiaa. Eropigu turaro mucubiridorea muare.

Cristo masare turaro mahimi, arĩ gojañumi Pablo

¹⁴ Eropigu i áripeherrerire mari Opu Jesucristo Pagu Igu iirare guñagu mereja igure serēbasaa muare. ¹⁵ Áripeherrerã Igu yarã Pagu áhrimi. Igu áripeherrerĩ cururi majarã Igu yarã Igu pohrogue árirã i yeba árirã sã erã Pagu áhrimi. ¹⁶ Igu masipehogu áhrimi. Turatarigu áhrimi. Eropigu igure òpa serēbasaa muare. Muare siporã Igu masiri mera òaro turacũ iiboro dopa serēbasaa muare. Eropigu Espiritu Santo Igu itamuri mera eropa iigucumi. ¹⁷ Eropigu Cristore “Diaye iigu áhrimi,” mua arĩ umupeonemoboro dopa Igu mua mera òaro áriboro dopa serēbasaa muare. Eropigu gajirãre òaro mahirã mua áriboro dopa, Cristo Igu turaro mahirire mua masiboro dopa serēbasaa muare. ¹⁸⁻¹⁹ Mua áripeherrerã gajirã Goãmu yarã mera “Cristo Igu marire turaro mahimi,” mua arĩmasiborore serēbasaa muare. Igu mari masare turaro mahigu áhrimi. Igu mahiri eropa òatariari áricũ mua òaro masiboro dopa serēbasaa muare. Eropigu Igu mahirire mua masicũ gahmea Goãmu mua mera Igu òaro áriboro dopa. Eropigu irire serēbasaa muare Goãmure.

²⁰ Eropirã Goãmure wuaro umupeori mera “Igu turagu áhrimi,” arĩrãca. Igu turari mera òaripure gohrotomasimi Igu marire. Marire òarã áricũ iimasimi. Mari serēra tauro iimasimi Igu. Mari gamerire, mari pepira tauro iimasimi Igu. ²¹ Jesucristo yarã mari áricũ iha Cristo Igu árricuri sãre iha áripeherrerinre. Eropigu Igu mahirire mua masicũ gahmea Goãmu mua mera Igu òaro áriboro dopa. Eropigu irire serēbasaa muaruri áripeherrerã Goãmure umupeoporo. Eropa ta iiporo.

4

Cristo yarã árirã yuju curu ta ãhraa mari, arĩ gojañumi Pablo

¹ Mari Opure yu itamuri waja peresugue árigu muare turaro werea yuhu. Goãmu Igu yarã árimorãre muare beyepu. Eropirã Igu beyenirã árirã Igu áridoreldiro dopa ta òarã árique mua. Irire muare werea yuhu. ² Òpa iirã òarã árique mua: “Gajirãre masitarinũgaa yuhu,” arĩ pepibiricãque. Gajirãre òaro mera iique. Eropirã guabiricãque. Mua mera majarã muare gariboquerecũ ta erãre umupeori mera yuju diaye iacãque. ³ Eropirã Espiritu Santo Igu itamuri mera òaro mera yujuro mera árniguique mua. Eropirã gamequeãro mariro áricãque mua. ⁴ Yuju dupu iro dopa yuju curu ta ãhraa mari. Eropigu Espiritu Santo yujugu ta áhrimi marire. Eropigu Goãmu Igu yarã árimorãre marire beyemuripu marire itamubu. Eropirã Igu itamuborore masia mari. Iri mari masirãñe yujuñe ta ãhraa. ⁵ Mari Opu Cristo mari umupeogu yujugu ta áhrimi. Igu buheri sã yujuñe ta ãhraa. Igu yarãre wañyeriñe sã yujuñe ta ãhraa. ⁶ Eropigu Goãmu yujugu ta áhrimi. Igu áripeherrerã Pagu áhrimi. Eropigu áripeherrerã weca mari Opu áhrimi. Eropigu áripeherrerã marire itamumi Igu. Áripeherrerã mari mera áhrimi Igu. Eropigu áripeherrerogue áhrimi Igu.

⁷ Yuju curu mari árĩquerecũ ta árĩpeherrerã marire yujurãyerire mari mohmemasiburire apidi árĩmi marire Cristo. Īgu eropa apidiro dopa ta mohmemasia mari. Īgu marire eropa apigu gajinore Īgu eropa ocãbodiropo dopa ta apidi árĩmi Īgu marire. ⁸ Eropa ta ähraa Goãmu yare erã gojarapũgue sã:

Goãmure ìhaturirãre Īgu tarinũgara puhru Īgu dipaturi muria wagucumi. Eropigu masare baja eropa ocãgucumi, arĩ gojañuma iribojegue Jesucristo Īgu eraboro coreguere.

⁹ Erã eropa arĩ gojarã õpa werediarã iiriñuma: Jesucristo umusigue muria wadigu árĩgu Īgu ero coreguere dijarimuhadigu árĩmi. Iyebaguere dijaridigu árĩmi. ¹⁰ Eropigu Īgu dijaridi muria wadi ta árĩmi Goãmu pohroge. Árĩpehrero weca muria wadi árĩmi Īgu árĩpeherrerogue árĩbu. ¹¹ Eropigu Īgu yarãre baja eropa ocãgu erã Goãmu ya árĩburire mohmemasiburire apidigu árĩmi. Erã mohmemasiburire õpa apidigu árĩmi Īgu yarãre. Yujurãyerire Cristo Īgu buherare buhemorãre apidi árĩmi. Gajirãre Goãmu yare weretaumorãre apidigu árĩmi. Õari buherire buhe curimorãre gajirãre apidi árĩmi. Cristo yarã gamenererã oparã árĩmorãre erãre õaro buhemorãre apidi árĩmi gajirãre. ¹² Eropa dihta apidigu árĩmi marire gajirã Īgu yarãre mari game itamuboro dopa. Eropa apidigu árĩmi marire Īgu yarãre, ĩgure mari umupeonemoboro dopa, siporã turarã mari waboro dopa. ¹³ Eropirã mari árĩpeherrerã õaro mera, yujuro mera árĩrãca. Eropa ta árĩro gahmea marire Cristore umupeorã árĩrãre. Eropirã mari árĩpeherrerã Goãmu magure Jesucristore õaro masirãca. Eropirã Cristo turagu, pee masigu Īgu árĩro dopa ta, mari sã pee masia warãca. ¹⁴ Mari eropa warã majirãgã iro dopa árĩsome mari. Majirãgã iro dopa ta árĩrã õaro pee masinibeama dohpa. Eropirã gajirã guyarã erãre buherã eracũ “I diaye ähraa,” erã arĩcũ erã peema. Puhru gajirã gajiropa árĩri buherire buherã eracũ erã sãre peema. Erã iro dopa árĩsome mari. ¹⁵ Eropa árĩbirã mari mera majarã mera game mahirã diaye ta wererire game wererãca mari. Eropirã majirãgã erã buga erã pee masirã erã waro dopa ta mari sã Goãmu yare pee siporã turarã Goãmu yare õaro masirã warãca. Cristo Īgu árĩro dopa ta warãca. Īgu ährimi mari dipuru. ¹⁶ Īgu yarã árĩrã Īgu dupu iro dopa yuju curu ta ähraa mari. Mari bajarã árĩquererã ta yujuro mera õaro árĩrã iiaa. Mari eropa árĩborore Cristo itamumi. Eropirã mari yuju dupu iro dopa õaro gamesurirã mari õaro itamua gajirãre Cristo yarãre. Eropirã mari mera majarãre Cristo yarãre õaro mahirã, erãre õaro itamura, turarã, Cristore umupeonemorã árĩrãca mari.

Cristo yarã warã mari ñerire duhu, õaripũre gohrotoa mari, arĩ gojañumi Pablo

¹⁷ Eropi mari Opu Cristo Īgu dorero mera õpa werea mũare. Goãmure gamebirã gohra iiro dopa iibiricãque mua. Erã, erã pepiripũ ñeri dihta ähraa. Eropiro erã pepiri duhpiburi árĩbeaa. ¹⁸ Eropigu watipũ Goãmu yare erãre peebiricũ iimi. Eropirã Goãmu yapure peebirigohracãma. Peediabeama erã. Eropirã Goãmu Īgu õaro árĩdorediri dopa ta árĩbeama erã. ¹⁹ Eropirã erã ñerire iirã ne guhyasiribirigohracãma. Eropirã ne bujawerebeama. Ñerire erã uaribejari dihtare iiniguicãma. Árĩpehneri ñerire erã iirire ne duhudiabirã iinemoniguicãma. ²⁰⁻²¹ Mũapu diaye

ta ĩġu yare peerā mua árĭcū, Jesucristo yare ōaro masirā mua árĭcū muaþure erā ñero iiro dopa iidorebeami Goāmũ. ²² Iribojegue ñerire iiniguicārā mua árĭcū iri ñeripu muare goroweoro iidiro árĭbũ. Iri ñeri iiri mera mucubiridiaquererā ta ne mucubirimasibirimuribũ mua. Eropirā “Iribojegue mua árĭrare duhcāque,” yu muare arĭ buhecū peebu mua. ²³ Eropirā mua pepirĭþure ōarĭþure gohrotoro gahmea muare. ²⁴ Ero core mua ñero iirare duhcāque. Eropirā ōarĭþure gohrotonirā árĭque mua. Goāmũ ĩġu ōaġũ árĭdiro dopa muare ōarā árĭcū iimi. ĩġu eropa iinirā árĭrā ōarire iiniguicārāca. Eropirā ñerire gamebirāca.

²⁵ Mari yuju dũþu iro dopa yuju curu majarā ta árĭrā iiaa. Eropirā mua basi guyabita. Mua mera majarāre diaye wereque guyaro mariro.

²⁶ Gajirā mera guarā, erāre ñero iibiricāque. Mata irinũ ta amucāque gua wajaro mariro. ²⁷ Yoari boje guarā watĭ ĩġu gamero dopa iirā iiaa. Eropā iibiricāque.

²⁸ Gajirā mua mera majarā Jesu yarā erā árĭborο core yajari masa árĭnirā árĭñorā. Dipaturi yajabiricāporo. Eropirā dohpaguere ōaro mohmeporo. Mojomorocurāre oburire mohmeporo.

²⁹ Ne ñero wereniguibiricāque. Ōarire wereniguirā gajirāre itamua mua. Erā bujawererā erā árĭcū ĩarā eropa ta mucubiricū iicāque erāre. Eropirā ōari dihtare wereniguique. ³⁰ Ñerire iirā Espĭritu Santore bujawerecū iirā iiaa mua. Eropā iibiricāque. Dohpaguere ne i umũ pehrerinũ core, Cristo marire ĩġu aġģaboro core, Espĭritu Santo marire ĩhadibumi. Ñerire mari iibiriboro dopa ĩhadibumi. Eropiġu Cristo yarā mari árĭrĭre masicū iimi ĩġu marire. Eropirā ĩġure bujawerecū iibiricāque mua.

³¹ Eropirā ne papũriniguibiricāque. Guanemobiricāque. Game dũyasonemobiricāque. Erāre ñero arĭ gaguiniguibiricāque. Gajirāre quere moanemobiricāque. Gajirāre ĩhaturinemobiricāque. ³² Eropi mua mera majarāre ōaro mera ōaro iique. Cristo yarā mua árĭcū ĩaġu mua ñerare cādĭjicāmi Goāmũ. Eropā ta mua sã gajirā muare erā ñero iicū ĩarā erā ñerire cādĭjicāque.

5

Goāmũ porāre ōpa árĭro gahmea, arĭ wereñumi Pablo

¹ Eropirā Goāmũ porā ĩġu mahirā árĭrā ĩġure ĩhcūque mua. ² Eropirā gajirāre mahi umupeoniguicāque. Cristo marire mahġu, mari ñeri iira waja sĭripũ. Eropā sĭriġu Goāmũre mucubiricū iipu ĩġu. Eropirā marire ĩġu mahĭdiro dopa ta mua sã gajirāre game mahique.

³ Eropirā Goāmũ yarā árĭrā ne nome mera ñero iibiricāque. Nome sã uma mera ñero iibiricāque. Gaji ñerire eropa árĭrĭre ne iibiricāque. Gajĭnore gametarĭbiricāque. Ne eropa iibiricāro gahmea Goāmũ yarā árĭrāre. ⁴ Eropirā guhyasĭuro wereniguibiricāro gahmea muare. Pee masibirā iro dopa wereniguibiricāro gahmea muare. Eropirā ñero arĭ wereyabiricāro gahmea. ĩþure iiro gahmea muare: Goāmũre serēro gahmea muare. Eropā serērā ĩġure, “Ōaro iibũ muħu guare,” arĭro gahmea. ⁵ Gajĭnore gametarĭrā goāmarā wėanirāre erā umupeoro dopa iirā iiaa mari irire. Eropirā nome mera ñero iirā, ñeri dihtare pepirā, gajĭnore gametarĭnũgarā Goāmũ Cristo mera ĩġu opu árĭroguere ne wasome erā. Irire ōaro masia mari. ⁶ Ōpa iirāre erā iira dipuwaja,

turaro dipuwaja moagucumi ĩgure tarinuganiräre. Eropirã gajirã muare gajiropa arĩmaacãcũ erã guyarire peebiricãque. ⁷ Eropirã eropa ñerire inĩguicãräre wapicubiricãque.

⁸ Cristo yarã mua árĩboro core mua sã eropa ta iinirã árĩribũ. Dohpaguepure ĩgu yarã árĩrã, Goãmure ðaro masia mua. Goãmu yarã ðarire iima. Eropirã eropa ta iiro gahmea muare. ⁹ Eropirã Cristo yarã árĩrã ðarire, Goãmu gamerire, diaye maja árĩrire iirãca mua. ¹⁰ Õarire mari iicũ ĩagu mari Opũ Cristo mucubirimi. Eropa ðarire iiburire ðaro masique mua. Eropa masirã irire iique. ¹¹ Cristore gamebirã ñeri erã iimaacãri ñeri gohra àhraa. Eropa erã iiro dopa ta muapũ iibiricãque. Õari buherire Cristo yare wereque eräre. Eropirã erã ñeri iirare eräre masicũ iique. ¹² Masa erã ĩabiro erã ñero iicorema. Erã eropa iirare mari werenĩguirã guhyasĩriboca. Eropirã ñetariaro iirã iima erã. ¹³ Eropirã eräre ðari buherire mari wererã, ñetariarã erã árĩricurire eräre masicũ iirã iiaa mari. Erã ñeri iirire eräre masicũ mari iicũ erã ñeri iirire bujawerebocoma. Eropirã ðaripure gohrotobocoma. ¹⁴ Iri diaye ta àhraa. Eropirã ðpa wereñorã Goãmu yare wererã:

Ne, yure peediabirã, yure peeque. Mua ñero iirare bujawereque. Irire ñero iirire duhuque. Eropigu Cristo mua ñeri iirire masicũ iigu, muare ðarire masicũ iigucumi, arĩñorã.

¹⁵ Eropirã umuri nucũ ðaro iique mua. Pee masibirã iro dopa árĩbiricãque. Pee masirã árĩque. ¹⁶ Dohpague majarã masa ñetariaro iinĩguima. Eropirã muapũ ðarire, Cristo yare mua iinĩguirã mata erã Cristo yarã árĩcũ itamuque. ¹⁷ Eropirã pee masibirã árĩbiricãque. Goãmu ĩgu gamerore ðaro masique. Eropirã irire iique. ¹⁸ Eropirã ne merebiricãque. Mererã erã basi ñero goroweoma. Eropirã merediabirã, Espĩritu Santopure burĩgã gameque. ĩgure ðaro yuhrirã árĩque. ¹⁹ Eropirã mua basi Goãmure umupeori bayarire game bayaque. Eropirã Salmo gojaripũre, Goãmu yare bayarire, gaji ĩgure umupeori bayari sãre ĩgure bayapeoque. ðaro guña umupeori mera bayapeoque. Eropirã mari Opũre “Õagu àhrimi,” arĩ ðaro umupeoque. ²⁰ Goãmu mari Pagũ arĩpehrerire muare ĩgu ðaro iirire guñanĩguicãque mucubiriri mera. Mari Opũ Jesu yarã árĩrã ĩgure “Õhaa,” arĩnĩguicãque mua.

Mua yuju wihĩ majarã Jesu yarã árĩrã, ðpa iique, arĩ wereñumi Pablo

²¹ Mua mera majarãre game umupeo yuhrĩque. Mua eropa game umupeo yuhrirã Cristo sãre umupeo yuhrirãca.

²² Mua marasã nomere weregura dohpaguere. Mari Opũre Cristore mari yuhrĩro dopa ta mua marapũ sumarãre ðaro yuhrĩque. ²³ Jesucristo marire taudigu árĩmi ĩgu ya curu majarã mari árĩboro dopa. Eropirã mari ĩgu ya curu majarã árĩcũ mari Opũ ĩgu árĩro dopa ta mua marapũ sumarã mua marasã nomere weca oparã àhrima. ²⁴ Eropirã Cristo yarã árĩrã ĩgure yuhrĩa. Eropirã mari Cristore yuhrĩro dopa ta mua marapũcũrã nome mua marapũ sumarãre ðaro yuhrirã nome árĩque.

²⁵ Mua marapũ sumarã sãre weregura dohpaguere. Cristo marire ĩgu yarãre mahĩgu mari ya árĩburire sĩridigu árĩmi. Eropirã marire ĩgu mahĩdĩro dopa mua sã mua marasã nomere eropa mahĩnĩguicãque. ²⁶ Cristo marire ĩgu yarã árĩcũ iibu sĩripũ mari ñeri marirã árĩcũ iibu. Eropigu mari ñerire coeweadi árĩmi ĩgu werenĩguiri mera deco mera ĩgu waĩyeri mera. ²⁷ Eropa coeweadi árĩmi ĩgu marire ĩgu yarã ðarã

árīmorāre iigu. Īgu eropiicū ņeri dipuwaja marirā árīrāca ĩgu ĩacū. Ne merogā eropa árīri ņeri árīsome marire. Eropirā ōarā Cristo iro dopa árīrāca. ²⁸ Eropirā mua marasā nomere mahi umupeorā, mū basi mū dūpūre mū umupeoro dopa ta mua mū marapore umupeoque. Īgu marapore umupeogu ĩgu basi umupeogu iimi. ²⁹⁻³⁰ Ne mari dūpūre ņero wacū gamebeaa mari. Mari basi mari ya dūpūre ĩhadibua. Cristo yarā árīrā ĩgu dūpū iro dopa āhraa. Eropīgu marire ĩgu ōaro ĩhadibumi. Eropirā Cristo marire ĩgu ōaro iidiro dopa ta mari sā mari dūpūre ōaro iiaa. Mari marasā nome sāre eropa ta ōaro iiro gahmea marire. ³¹ Eropa ta āhraa Goāmū yare erā gojarapūgue: Ōpa gojara āhraa: “Eropi umū ĩgu pagū sūmarāre wirīgu, ĩgu marapo mera árīcāgucumi. Eropirā erā perā árīquererā ta yuju dūpū iro dopa árīrācoma,” arī gojañumi iribojegue. ³² I gojarare ōaro peebirinirā árīma. Eropīgu irire ōaro weregura muare. Ōpa werero iica: Cristo ĩgu yarā mera yuju dūpū iro dopa ta yuju curu ta āhrima. ³³ Eropīgu muare ōpa arī werenemogura daja: Mū basi mū mahiro dopa ta mū marapo sāre mahi umupeoque. Eropirā nomepū mua marapū sūmarāre ōaro guhyadiaro mera umupeoque mūa.

6

¹ Dohpaguere majirāre weregura: Mari Opū Cristo yarā árīrā mua pagū sūmarāre ōaro yūhrirā árīque. Mūa eropiirā ōaro iirā iiaa. ²⁻³ Ōpa arīñumi Goāmū doregu: “Mūa pagū sūmarāre ōaro umupeoque,” arī doreñumi ĩgu. I doreriñe mera Goāmū werenemoñumi. Ōpa arīñumi: “Mūa pagū sūmarāre umupeorā i yebaguere yoari boje mucubiriri mera árīrāca mūa,” arī wereñumi. Eropa arīgu iñe doreriñe mera, “Mūa eropa iirā ōaro árīrāca,” arī weremuhtañumi Goāmū. Eropirā ĩgu arīdiro dopa mūa pagū sūmarāre umupeoque mūa.

⁴ Dohpaguere erā pagū sūmarāre weregura. Mūa porāre eropa turiniguibiricāque guacū iiri arirā. Mari Opū Cristo ĩgu mahiri mera ĩgu itamuri mera erāre ōaro mera masuque. Eropirā erāre masurā ōaro wereque.

⁵ Dohpaguere pohro majarāre weregura. Guhyadiaro mera umupeori mera i yeba majarāre mūa oparāre ōaro yūhrirā árīque. Gūyaro mariro ōaro yūhrirā árīque. Cristore mūa yūhribodiro dopa ta yūhrique erāre mūa. ⁶ Erā ĩhuro dihtare yūhrirā árībircāque yure ĩhasuaporo arirā. Erā ĩhurore mūa yūhriro dopa ta erā ĩabiro sāre ōaro iirā árīque. Cristo ĩgu pohro majarā mūa árībodiro dopa ta mūa oparā sāre eropa yūhriniguicāque. Eropirā Goāmū ĩgu gamero dopa ta ōaro mucubiriri mera mūa oparāre ōaro yūhrirā árīque. ⁷ Eropirā “Cristopure yūhrirā iiaa,” arī pepirā mucubiriri mera yūhrique mūa oparāre. ⁸ Eropirā ire guñaque: Árīpehrerā mari árīpehreri ōarire mari iicū ĩagu Goāmū ōaro ĩgucumi marire. Pohro majarāre, pohro majarā árībirā sāre ōaro ĩgucumi ĩgu.

⁹ Eropīgu oparā sāre weregura: Mūa pohro majarāre ōaro iique. Erāre ōaro ya iidorediro dopa ta iique erāre ōaro. Ōpa masique. Ūmūsi majagu Goāmū diaye ta erā opū āhrimi. Mūa yagu opū āhrimi ĩgu. Eropirā mūa árīpehrerā ĩgu pohro majarā dihta āhraa. Eropīgu ĩgu yujuropa ĩhami muare árīpehrerāre. Eropirā turibircāque mūa pohro majarāre.

Cristo yarā watire erā cāhmotarire wereñumi Pablo

10 Ōpa weretugura muare. Ōaro guñaturarā árrique mua. Mari Opu Cristo mua mera áhrimi. Eropirā ígu ya turari mera guñaturarā árrique. 11 Watí marire ígu pepiri mera guyagu ñero iidoremi marire. Mari Jesucristore umupeorire goroweodiami. Goāmupu marire cāhmotami ñerire mari iibiriboro dopa. Marire ígu cāhmotaro surara ígu cāhmotari suhriro come suhriro iro dopa áhraa. Eropirā iri suhri mera erā cāhmotaro dopa ta Goāmu ígu yare iirā cāhmotaque watí ígu ñero iidorerire. 12 Jesu yarā mari áricū marire goroweodiarā masa gohra áribeama. Erā bajarā umaro majarā, ñerā, turarā, oparā erāpu áhriima. Watí ígu mera majarā mera i umu majarāre Jesucristo yarā áribirāre dorema erā. Eropirā erā mari Jesucristo yarā áricū marire goroweodiana. 13 Eropirā erā marire goroweobiricū dohpaguere Goāmu yare opapehoque mua cāhmotaborore. Eropirā watí muare ñero goroweodiacū, muare ígu ñero iidorecū ígure cāhmotarāca. Eropirā tarinugarāca. Eropa ígure tarinugarā, turarā dujarāca mua. 14-17 Eropirā turarā árrique Goāmu ya mera. Surara gamewejērā warā erā come suhri sañarā erā dupure ōaro cāhmotama. Erā coretihbi cāhmotama erā come suhriro sañarā. Come zapatu sañama. Erā diapore cāhmotama comese mera. Come sãpea peyama. Noserimijire opama erā cāhmotaboro dopa. Erā surara cāhmotaro dopa ta mua watíre ōaro cāhmotapehoborore ōpa Goāmu yare iique. Diaye majare Goāmu yare ōaro peeque. Eropirā Goāmu gamero dopa ōarire iiniguicāque mua watíre cāhmotamorā. Jesucristo ya ōari buherire peerā ōaro áhraa. Eropirā iri ōari buherire ōaro wererā waque gajirāre. Watí muare ñero iidorediarimi. Eropirā ígure cāhmotamorā Jesucristore “Diaye ígu áhrimi,” arí umupeoniguicāque. Cristopu marire peamegue wabonirāre taumi. Mua ígu taunirā árīrā watí ñero iidorerire yuhribiricāque. Eropirā watíre tarinugamorā Goāmu yare ōaro masique mua Espíritu Santo ígu itamuri mera. 18 Eropirā mua watíre cāhmotarā Goāmure eropa umuri nucū serēniguicāque. Espíritu Santo ígu itamuri mera serēniguique. Eropirā ōaro guña masique. Eropa serērā garibebiricāque. Árīpehrerā Goāmu yarāre eropa serēbasaniguicāque. 19 Eropirā yu sãre serēbasaque Goāmure. Ōpa arí serēbasaque: Ōari buherire iribojegue masa erā ōaro masibirirare ōaro erāre masicū yu iiborore serēbasaque. Eropirā güiro mariro yu wereborro dopa serēbasaque yare. 20 Cristo ígu yare weredoregu yare obeomi. Yu eropa werera waja peresugue áhraa dohpaguere. Yuhu ohō árīqueregu ta güiro mariro ígu yare yu wereborro dopa serēbasaque yare. Ígu yare werebu árīgu tiaa.

Pablo òadoretuñumi

21 Tíquico yu mera majagu mua pohroque ejagu yu árīricurire muare werepohogacumi. Ígu mari acaweregu mari mahigu áhrimi. Eropigu mari Opu yare ōaro itamugu eropa árīniguicāmi. 22 Gua árīricurire muare weredoregu ígure obeogu iiaa mua pohroque mua ōaro mucubiriboro dopa.

23 Goāmu mari Pagu mari Opu Jesucristo mera muare árīpehrerāre gua acawererāre òadorea. Cristore mua ōaro umupeori mera mua game mahiboro dopa Goāmure serēbasaa muare. 24 Árīpehrerā mari Opu Jesucristore eropa mahiniguicārāre Goāmu mera òadorea. Eropa ta árīniguicāporo. Iripēta áhraa.

Filipenses

Peresugue árġu ipüre gojabeopu Pablo

¹ Għa Pablo Timoteo mera Jesucristo pohro majarā āhraa. Eropirā árġpehrerāre muare oarāre Jesucristo yarāre Filipino majarāre gojabeoa għa. Mħa oparā sāre muare itamurā sāre gojaa. ² Eropirā Goāmħu mari Pagħu mari Opħu Jesucristo mera muare oadorea. Ġghu itamuri mera oaro árġque mħa.

Pablo Jesu yarāre Goāmħure serēbasapħu

³⁻⁶ Goāmħu muare oaripure gohrotocħi iighu iimi. Eropighu muare Ġghu iinugadiro dopa ta ii ojogorocugacumi. Eropirā Jesucristo i yebaguere Ġghu eracūguere ħeri marirā árġrāca mħa. Negohraguere Jesu yarā mħa wara pħrħu, dohpague sāre itamua mħa yure oari buherire yħ buhecħi. Mħa eropa iirā árġcħi Goāmħure “Oħaa,” arāa yħħu. Muare guħagħu oħa dihta arāa yħħu. Muare Goāmħure serēbasagħu mucubiriri mera serēbasaa. ⁷ Eropighu muare yħ oaro mera eropa pepicħi oapūrica. Oari buherire “Diaye ta āhraa,” oparāre yħ arġtarinugacħi mħa yure itamubħu. Iri buherire diaye ta iri árġrġre masare yħ werēcħi itamubħu mħa. Peresu yħ árġcħi sāre itamubħu. Eropa mħa itamucħi mari yujuro mera Goāmħu itamurire opaa. Eropighu yħ sġporā mera turaro mahia yħħu muare. ⁸ Jesucristo Ġghu mahiri mera burġgā muare guħaa yħħu. Yħ eropa guħacħi Goāmħu irire masimi. ⁹ Muare oħa arġ serēbasaa yħħu Goāmħure. Goāmħu yare oaro masiri mera oaro pee masipehori mera Goāmħure masa sāre mħa mahinemoburire serēbasaa yħħu Goāmħure. ¹⁰ Oarire mħa masiburi sāre serēbasaa muare. Mħa eropa masirā Cristo i yebague Ġghu dujaricħi oarire iinirā árġrā, dipuwaja marirāca mħa. ¹¹ Eropa oarire iirā Goāmħu gamerire iirāca mħa. Eropa iimorā wacħi iigacumi Jesucristopħu muare. “Goāmħu oagħu, turagħu āħrimi,” árġpehrerā Ġghure erā arġ umupeoburire Ġghu gamerire mħa iicħi iigacumi muare.

Pablo Jesucristo yagħu Ġghu warare werepu

¹² Yħ acawererā, ire mħa masicħi għmea. Yħ dohpaguere peresu yħ árġquerēcħi ta oari buheripħu eropa mħtaniguicħa. ¹³ Eropighu Cristo yagħu yħ árġri waja peresu yħ warare masipehrema opħ ya wiħi majarā surara. Árġpehrerā gajirā sā ore irire masima. ¹⁴ Eropirā peresu yħ árġcħi ġarā, bajarā mari acawererā Jesu yarā mari Opure Jesure umupeonemoma. Eropa umupeorā gūiro mariro oari buherire gajirāre buhema erā.

¹⁵ Yujurāyeri Cristo yare buhebonirā árġquererā yare ġhaturima. Cristo yare buherā erāpure masa ġhasuacħi għmema. Gajirāpħu oaro mera Cristo yare buhema. ¹⁶⁻¹⁷ Oari buherire yħ werenigui turaburire Goāmħu yure Ġghu apirare oaro masima. Oāpħ eropa masirā yure umupeorā Cristo yare buhema. Gajirāpħu yure ġhaturirā masare erāpure ġhasuacħi gamerā Cristo yare buheama. Eropirā yħ peresu árġcħi erā yure bujawerēcħi iidiama. ¹⁸ Oaroca. Cristo yare ta buherā iima. Erā yure umupeobiriquererā Cristo yare buhema. Gajirāpħu oari mera buhema. Árġpehrerā erā Ġghu yare buhecħi mucubiria.

¹⁹ Eropigu mucubiriniguicāgūca yūhu. Goāmure mua yure serēbasara mera, Jesucristo īgu Espiritu Santo itamuri mera Goāmū yure ōaro taricū itamugūcumī. Irire masia. ²⁰ Ōpa ta būrigā iidiaca yūhu dohpa. Ne yū iirare űero pepidiabeaa. űero pepibigu āriḡu doyarō mariro āriḡupū masare Cristore ōaro umupeocū būrigā iidiaa. Ŭmuri nūcu yū iidiro dopa ta dohpague sāre erā Cristore “Ōagu, turagu āhrimi,” erāre arī umupeocū iidiaa. Ojocarigu gohra eropa ta iidiaa. Erā yure wejēdiaquerecū ta eropa ta iidiaca. ²¹ Ojocariniḡuḡu gohra Cristo yare iiniguica dohpa. Sīriḡuḡe tamera ojocarirā tauro ōaro dujaguca yūhu. ²² Ojocariniḡuḡu Cristo yare yū iinemoboro dopa ojocariniḡuicādiaca. Eropa iidiaguereḡu ta sīriri sāre gahmea. ¿Dipure yū gamebocuri? Masibirica yūhu. ²³ Yū ōpa arī wereniguicū masisūya mara yure. Cristo mera būrigā āriḡidiaa. Eropigu dohpaguere īgu pohroḡe wadiaca. Ojocariri tauro sīriḡipū ōatarinugacāroca. ²⁴ Eropa āriḡuerecū ta muare yū itamuboro dopa ojocarinemoro gahmea yure. ²⁵ Irire masigu ohō mua mera yū āriḡorore masia yūhu. Eropa āriḡuicāgūca yūhu mua Cristore umupeonemoboro dopa, iri umupeoturari mera mua mucubiriborore. ²⁶ I yebague āriḡuḡu mua pohroḡe dipaturi yū wacū mua mucubirirāca. Eropa yūhu mua pohro ejacū Cristo Jesu yure īgu itamurire masirā, “Turagu āhrimi īgu,” arī umupeorāca mua īḡure.

²⁷ Dohpaguere i dihtare iique. Cristo ya buheri iri arīro dopa ta āriḡucaque mua. Guñaturarā āriḡuḡe. Eropirā game dūca wariro mariro ōari buherire yujuro mera būrigā buheḡe. Eropa ta yū mua pohro wabiricū sāre yū wacū sāre mua eropa iicū gahmea. Eropa mua yujuro mera āriḡā āriḡū peebeodiaa yūhu. ²⁸ Muare īhaturirāre ḡuibiricāque. Mua eropa ḡuibiricū īarā Goāmū yarā mua āriḡū masirācoma erā. Eropa masirā erā peameḡe waboro sāre masirācoma. Eropirā Goāmū īgu tauboro sāre masirācoma. Ōpa ta masicū iimi Goāmū masare. ²⁹ Cristore mua umupeobure Goāmū apidi āriḡimi. I sāre apidi āriḡimi. “Cristo yare mua werera waja űero tarirāca,” arī apidi āriḡimi Goāmū muare. ³⁰ Eropirā Cristo yarā mua āriḡi waja ḡajirā muare űero iima. Muare erā iidiro dopa ta yū sāre űero iima erā. Mua mera yū āriḡū yure erā eropiicū īabū. Dohpague sāre erā yure eropiicū pee waicua mua. Eropirā mari yujuropa ta űero taria.

2

Cristo bu āriḡu iro dopa eradigu āriḡehererā weca opu āriḡu wapū, arī ḡojañumi Pablo

¹⁻² Cristo muare ōaro sīporācūcū iinirā, Cristo īgu mahiri mera mua mucubirirā, yūpūre ōaro mucubiricū iique. Eropirā Espiritu Santo āriḡehererā mua mera īgu āriḡū ḡajirāre mahirā, mojomoro īarā āriḡā, yure ōaro mucubiricū iique mua. Ire mua iicū mucubirigūca. Yujuropa ta ōaro sīporācūque mua. Eropirā mua basi game mahique. Ōari mera āriḡucaque. Eropirā āriḡehererā yuju diaye ōaro āriḡuḡe. ³ ḡajirāre tarinugadiarā āriḡiricāque. Eropirā eropa ta pepi āriḡāque. Eropirā ḡajirāre ōaro umupeo ōpa arī pepique: “Erāpū yū tauro ōarā āhrima,” arī pepique. ⁴ ḡajigu ḡajirāre itamudiabiribocumi. īḡu iro dopa iibiricāque. ḡajirā sāre itamuḡe.

5 Jesucristo ĩgu eropa pepicãdiro dopa ta mua sã eropa ta pepicãque. 6 ĩgupa Goãmu gohra árĩqueregu ta “Goãmu yu árĩrire ne duhusome yuhu,” arĩbiripu ĩgu. 7 Eropigu ĩgu Goãmu ĩgu árĩrare duhu, masu ta masa dehyoadigu pohro majagu iro dopa árĩnugapu i yebaguere. 8 Eropigu ĩgu masu dupucugu bu árĩgu gohra árĩnugapu. Eropa árĩnugagu “Crusague wejẽre ĩgure,” erã arĩcũ ĩgu Goãmure yuhrigu tarĩnugabiripu. Crusague ta guhyasiuro mera siribu árĩqueregu ta ĩgu tarĩnugabiripu ĩgu Pagure. 9 Eropigu ĩgu eropiicũ ĩha mari Pagu árĩpehrerã masa erã umupeobure apipu Jesure. Eropigu árĩpehrerã gajirã weca opu acupu Goãmu ĩgure. 10 Eropirã árĩpehrerã umaro majarã, i yeba majarã, sirinirã mura sã Jesu waire peerã erã mereja muju ĩgure umupeorãcoma pare. 11 Eropa ĩgure opu acugucumi mari Pagu árĩpehrerã Jesucristore “Mari Opu ahrimi,” erã arĩbure. Eropa arĩrã mari Pagu Goãmure umupeorãcoma.

Cristo yarã ðarire wererã masare masicũ iima

12 Eropirã, yu mahirã, mua mera yu arĩcũ mua yuhridiro dopa ta, dohpaguere yu yoarogue arĩcũ sãre ðaro yuhriquerẽ yure. Eropirã peamegue wabonirã mua Goãmu taunirã árĩrã Cristo ĩgu itamuro mera ĩgu gamero dopa ii purumujuque. Eropirã umupeori mera biraro mariro Goãmu yare iique. 13 Goãmu ðaripure muare gamecũ iigu iimi. ĩgu eropa gamero dopa ta mua iiborore iimi. Eropigu irire mua ĩgu yare ðaro iiborore itamuniguicãmi Goãmu. ĩgu eropa iicũ irire yu arĩdiro dopa ta iique mua.

14 Árĩpehrerire iirã turiro mariro, mua basi gajinore werericuro mariro iique. 15 Eropiique mua ñeri dipuwaja marirã, ñerire iibirã Goãmu porã ðaro mua árĩmorã. Eropiique mua masa guyarã, ñerã watopere goroweoro mariro mua árĩmorã. Erã ñerã watope mua árĩrã ðari buherire buherã masicũ iiaa mua i yeba majarãre. 16 Iri buherire mua peeñanirã Goãmu mera eropa árĩniguimorã wabu mua. Iri buherire i yeba majarãpure mua eropa buhecũ ĩagu mua mera mucubiriguca yuhu. Eropigu yu muare buherare guñagu, “Bu gohra ta muare buhebiriya yuhu,” arĩguca yuhu. Eropigu Cristo ĩgu i yeba ĩgu dujaricũ mua mera mucubiriguca yuhu. Eropigu guhyasiuro tarisome yuhu. 17 Cristore mua umupeoturacũ Goãmu muare ĩhasuagucumi. ĩgu eropa ĩhasuacũ ĩagu muare Cristo yare yu buheri waja yure erã wejẽdiaquerecũ ta mucubirigura. Eropirã mari árĩpehrerã yujuropa ta mucubirirãca. 18 Eropa ta mua sãre yu mera mucubiro gahmea puhru yu siricũ iarã.

Timoteore, Epafrodito sãre werepu Pablo

19 Mari Opu Jesu ĩgu gamecũ yojarõ mera Timoteore mua pohrogue obeodiaa yuhu mua árĩricurire masibu. Eropa masigague ta mucubiriguca. 20 ĩgu Timoteo mua ðaro árĩborore diaye ta burigã guñami muare. Gajigu ĩgu iro dopa ta árĩgu marimi yure. 21 Gajirãpu árĩpehrerã erã gameri dihtare iidia, Jesucristo ĩgu gameripure iidiabeama. 22 Timoteopu ĩgu ðaro iirire masia mua. Yu magu iro dopa ta árĩgu ĩgu yu mera ðari buherire weremurimi. Eropirã gua yujuropa ta Cristo yare buhemurabu. 23 Eropigu ð majarã oparã yure erã duhpihurire masira puhru, Timoteore mua pohrogue obeodiarã. 24 Eropigu mari Opu Jesu ĩgu itamuri mera yojarõ mera yu sã mua pohrogue waguca.

25-26 Yüre itamudorerã mua Epafroditore obeoaba yu pohrogue. İgu yu acawerega, yu mera mohmegu, yu wapi, Goãmu yare buheturagu ahrimi. İgu muare turaro guñabeomi. Eropigu İgu dorecurare mua peecũ masigu İgu yu "Erã yure guña bujawerecoma," arı guñaricumi. Eropia İgu wuaro guñaricucũ İagu İgure mua pohrogue omedujuro gahmea yure, arı pepia yuhu dohpaguere. 27 Arıro ta İgu turaro dorecũami. Mero sırıbocuri tariami İgu. İgu eropa dorecaquerecũ ta, Goãmu İgure mojomoro İagu taricũ iiami. İgu sırıcũ yupu burigã bujawereboaya. Eropigu yu sãre Goãmu mojomoro İami İgure taricũ iigu. 28 Eropigu dohpague tamerare yojaro mera İgure mua pohrogue obeodiaa dipaturi mua İgure İha siñajaboro dopa. Mua eropa mucubiricũ peegu yu sã mucubirigura. 29 Eropirã İgure Epafroditore mari Opu yagure ðaro mucubiriri mera bocatırıque. Eropirã gajırãre İgu iro dopa arırãre umupeoque. 30 İgu Cristo yare itamudiagu sırirami. Muapu yare itamumasibiricũ İgu yu yare itamubasamurami. Eropigu dorecu sırirami İgu.

3

Ðaro arıri gohrare wereñumi Pablo

1 Dohpague tamerare ire weregura. Mari Opu mera mucubirique. I buherire ero coregue yu wererare dipaturi ðpa arı gojabeogu mucubiria yuhu. Eropigu ire werenemogu itamugu iiaa muare. 2 Gorowerebirã ta arıque mua. Nerire iiniguicãrã, diayea iro dopa ta arırã, ñerã, gasiro merogã wiri aıdorerã mua ya dupure wiridiana. Eropia iidorerã arıcũ İha "Queoro buheri arıbeaa," arırã ðaro iique mua. 3 Erã circuncisión gasiro merogã aıdorediarã "Deyoro maja mera Goãmure umupeocũ ðhaa," arırıma. Marıpu eropa arıbeaa. Espırıtu Santo İgu itamuri mera diaye ta Goãmure umupeoa mari. Mari deyoro maja iiri mera mucubiribeaa. Jesu yarã mari arıri mera mucubiria mari. 4 Eropia mucubiriqueregu ta, yu iirare erã iro dopa arıdiagu, erãre docapıcãboya yu sã. Gajıgu ðpa ta arı tarınugacãdiami. Yupu İgu tauro eropa arıboaya. 5 ðpa iigu arırıbu yuhu: Ocho nuri yu masa dehyoara puhru gasiro merogã wiri aınırã arırıma yure. Israe masu arıgu Benjami ya curu majagu ahraa yuhu. Yu pagu samarã hebreo masa erã arıcũ diaye ta hebreo masu gohra ta masa dehyoabu. Moise dorerire diaye ta iıpehodiagu fariseo curu mera ñajarıbu yuhu. 6 "Goãmu ya arısaca," arıgu ðaro iirıbu yuhu. Eropıgu Jesu yarãpüre ñero iımurıcarabu yuhu. Diaye ta Moise dorerire iigu irire tarınugaro mariro iıpehomurırıbu yuhu. 7 Iribojeguere "Iri ðari arısaca," arı pepımurırıbu. "Iri yu eropa arı pepira irıbojegue yu eropa arırã duhpıburı arıbirıgohracãdıro arıbu," arı pepia dohpaguere. ðpa ta arı pepınugabu yuhu Cristore umupeonugagu. 8 Jesucristo yu Opure yu masıcũ tamerare ðataria. Eropıgu gajı dorerıpüre duhpıburı arıbeaa, arı pepia yuhu. Iri arıpehrerire coãcãbu Cristo yapure iıbu. Eropıgu irıbojegue yu iirare coãgu "Ñeri gohra ahraya," arı pepia. Cristo yare ðaro masıbu İgu mera majagu arıbu eropa pepia. 9 Eropıgu yu ejatuharo ðaro yu iira waja "Ðagu ahrimi," arı İabeami Goãmı. Eropıro Goãmı dorerire Moısere İgu apırare yu iira waja sãre "Ðagu ahrimi," arı İabıramı. Cristore yu umupeora puhru "Ðagu ahrimi," arı İami pare İgu yure. Goãmıpu marire dipuwaja marırã arıcũ iımi İgure mari umupeocũ.

¹⁰ Eropigu ero coregue yu árĩmũhtarare duhcũbũ Cristore ðaro masigu wabu. Goãmu ĩgu turari mera Cristo masa muriapũ. Iri turari mera árĩdiaca yuhũ. Eropigu iri turari mera ðarire iidiaca. Cristo crusague sĩripũ mari ñeri iirare cóãbu. Eropigu ĩgu yare iigu ĩgu iidiro dopa ta ñero taridíaa yu sã. ¹¹ Eropigu Cristo ĩgu masa muriadiro dopa ta, yu sã masa muriadiaca.

¹² I árĩpehreri eropa arĩgu “Cristo iro dopa ñeri marigu árĩtuhajaa,” arĩ pepibeaa. Yu eropa arĩ pepibiriquerecũ ta Cristo ĩgu yagu árĩbure ðagu árĩbure iiami yure. Eropigu ĩgu yare ĩgu sãre ðaro masinemodiagu turaro mera ĩgu yare iidiãa yuhũ. ¹³ Yu acawererã, yuhũ muare eropa arĩgu, “Jesucristore ðaro masipehotuhajaa yuhũ,” arĩgu iibeaa. Eropa arĩbiriqueregu ta i tamerare iiaa. Yu iribojegue iirare cãdijigu dohpaguere “¿Goãmu dohpa iicũ gahmeri yure?” arĩgu burigã irire iidiãa. ¹⁴ Omabiragu pohbegu ejamũtadi ĩgu wajatadiaro dopa ta burigã iiaa yuhũ yu wajataborore yu ñeaboro dopa ta. Cristo ĩgu yagu yu árĩcũ ĩagu yuhũ wajataborore obu amarogue sihubeomi yure.

¹⁵ Ōpa yu arĩro dopa ta pepique mua sã Cristore ðaro masirã árĩrã. Eropirã muare yu wererare mua peediabiricũ gajiropa mua pepicũ Goãmu muare ðaro masicũ iigucumi. ¹⁶ Eropirã ĩgu yare mari masirare ðaro ii ojogorocurã.

¹⁷ Yu acawererã, mua árĩpehrerã yure ihacũque. Eropirã gajirã gua iiro dopa iirãre ihanũruque mua erã sãre mua ihacũboro dopa. ¹⁸ Bajasuburi gajirãre ñerãre wereabu yuhũ muare. Dohpague sãre burigã bujaweregu erãre ta werea muare daja. Erã ñero iiri mera “Cristo crusague ĩgu sĩridi árĩmi,” arĩ buherire ĩhaturirã àhrima. ¹⁹ Erã peamegue wamorã ta àhrima. Erã uaribejaripure burigã gahmema. Eropirã iri muare guhyasĩrisãborare erãpũ “Mari iiri ðari àhraa,” arĩma erã. I umu maja dihtare pepima erã. ²⁰ Maripure mari ejaburi maca amarogue ta àhraa. Eropigu erogue ta marire taubu mari Opũ Jesucristo dujarigucumi. Eropirã ĩgu dujariborore corerã iiaa mari. ²¹ ĩgu dujarigu mari dupure bu árĩri dupure gajiropa árĩri dupure gohrotogucumi ĩgu. Eropigu ĩgu ya dupũ iro dopa ta ðari turari dupure gohrotogucumi marire ĩgu turari mera. Árĩpehrerã opũ ñajami ĩgu iri turari mera. Eropigu árĩpehreri Opũ àhrimi ĩgu iri turari mera.

4

Umuri nũcu mari Opũ mera mucubirique, arĩ gojaũumi Pablo

¹ Eropirã yu acawererã, yu mahinirã, burigã yu guñarã, yure mucubiricũ iirã, mua guñaturadiro dopa ta mari Opũre burigã guñaturaniquie mua.

² Ire weregura muare Evodiare, Sĩntique sãre: Jesu yarã nome àhraa mua. Eropirã mua game duyasorire duhu ðaro mera árĩricũ árĩque mua basi. ³ Mũpũ diaye ta yu wapi gohra àhraa. Mu sãre weregura: Erã nome yu mera, Clemente mera, gajirã yu wapicurã mera mohmeama ðari buherire gua buhecũ. Goãmu erã waĩ sãre gojatutuhãnumi ĩgu yapũgue. Umuri nũcu ojocariburire ĩgu onirã waĩre ĩgu gojatutuhãnumi erã waĩ sãre. Eropigu erã nomere bosaque muhu.

⁴ Mua árĩpehrerã umuri nũcu mari Opũ mera mucubirique. Dipaturi ta weregura daja: Mucubirique. ⁵ Ōaro iiniguicãque mua ðaro iinirã árĩrãre

árípehrerã masa ìhamasiborore. Mari Opu Cristo ìgu ariboro merogã duhyaa.

⁶ Mũa árfiricũre ne bujawere guñaricubiricãque. Mũa guñaricu bujawererire Goãmure ðaro werepehocãque. Eropirã ìgure ðaro serẽque. Eropirã mũa serẽrã ìgure “Ôhaa,” arĩque ìgure. ⁷ Mũa eropiicũ, ðaro árficũ guñaricuro mariro iigucumi Goãmũ muare. ìgu eropa iiri ðataria. I mari ðaro árfiri ðataria. Eropiro Jesucristo yarã mari árficũ marire ðaro árficũ iigucumi Goãmũ. Marire ðaro siporãcucũ iigucumi. Eropigu bujawererire guñaniguicãcũ iisome ìgu marire mari ìgure serẽra puhũ.

Ôarire pepique, arĩ gojañumi Pablo

⁸ Acawererã, ire weretubu iiaa muare. Queoro árfirire, masa erã umupeorire, ðaro iirire, ñero marirore, suarire, masa “Ôari áhraa,” erã arĩrere pepique mũa. Ôatariari iri árficũ iripure pepique. Masa ôarire ìarã erã mucubirĩre mũa sã mucubiri pepique. Iri árfípehrerire guñaque irire mũa iiboro dopa.

⁹ Muare yũ buhediro dopa ta eropa ta iiniguicãque mũa. Eropirã yũre ìhacũque mũa. Mũa eropa iicũ Goãmũ muare ðaro árficũ iigu mũa mera árfigucumi.

Filipo majarã Pablore erã orare wereñumi ìgu

¹⁰ Dohpague tamerare yoara puhũgũe mũa dipaturi yũre guñarã mũa itamurare mucubiria. Eropa mucubirigu mari Opu Cristore “Ôhaa,” arãa. “Yũre cãdijia wabu mũa,” arĩbeaa yũhũ. Iribojeguere yũre itamudiaquererã itamumasibirinirã árĩbu mũa. ¹¹ Yũre mũa itamurare werẽgũ “Yũre duhyaa dohpa,” arĩ werebu iibeaa yũhũ. Muare gajinore gamegu eropa arĩgu iibeaa. Yũ opari mera árfimasia yũhũ. ¹² Gajinore moogu sã ðaro árfimasia yũhũ. Eropigu baja opagu sã ðaro árfimasia yũhũ. Æmuri nũcu oaboagu sã oare nugapoa waca. Yapigu arĩgu sã ðaro árĩpoa waca. Dabero opagu sã árĩpoa waca. Yũre gajino maricũ sãre ðaro árĩpoa waca. ¹³ Cristo yũre turacũ iigu mera árfípehrerire yũ eropa warire ii bocafũumasia yũhũ. ¹⁴ Yũ eropa árĩpoadigu árĩquerecũ ta yũ ñero taricũ mũa itamurã yũre ðaro iibabu mũa.

¹⁵ Ôari buherire yũ buhediacũ Macedonia yeba mũa ya yeba árĩdigu yũ wacũ gaji maca majarã Jesu yarã yũre itamubirama. Mũa dihta yũre itamuabu. Irire masia mũa. Muare yũ buhecũ yũpũre mũa itamucũ mari yujuropa ta Cristo yare iirã iibabu. ¹⁶ Eropirã Tesalónicague yũ árfinicũ ìarã yũre itamubeobũ. Yujuyerisuburi yũre duhyacũ ìha yũ gamerire obeobu mũa. ¹⁷ Gajinore serẽgu eropa arĩgu árĩbeaa. Gajirãre mũa itamucũ Goãmũ muare ðaro itamugucumi. ìgure mũa itamuri waja Goãmũ muare ìgu ðaro iicũ gahmea yũhũ. Mũa eropa itamurã guñaturarã wacũ sãre gahmea yũhũ. Eropigu yũre mũa itamurare guñacũ iiaa muare. ¹⁸ Dohpaguere yũre ðaro opehoabu mũa. Yũ gamera tauro ohabu mũa yũre. Yũre Epafrodito mera mũa obeora puhũ gajino ne duhyabeaa yũre. Mũa yũre ora Goãmure ora iro dopa áhraa. Yũre mũa ora Goãmure ðaro suacũ iiaa. ¹⁹ Jesucristo marire ðaro iidi árĩmi. Eropigu árfípehrerire muare duhyarare ogucumi mari Pagu muare. Ôatariari ìgu oparire ogucumi. ²⁰ Æmuri nũcu mari Pagure Goãmure umupeorã. Eropa ta iiporo.

Pablo òadorepũ

²¹ Árĩpehrerã Goãmu mera árĩrã Jesucristo yarã òaporo. Mari acawerã Jesu yarã yũ mera majarã sã mũare òadorema. ²² Árĩpehrerã ò majarã òarã Jesu yarã òadorema. Roma majarã weca opũ ya wihi majarã tamera burigã òadorema.

²³ Mari Opũ Jesucristo mera mũare òadorea. Eropa ta árĩniguicãporo. Iripêta àhraa.

Colosenses

Colosa majaräre gojabeonorã Pablo sã

¹⁻² Yuhu Pablo Jesu yagu mari acaweregu Timoteo mera muare Colosa majaräre gojabeoa gua. Jesucristo igu yare buhedoregu igu apidigu ta ahraa yuhu. Goamu igu gamero dopa ta Jesucristo yare igu yare buhebure apimi. Eropirã muare gua acawereräre Cristore umupeoräre gojabeoa. Eropirã mari Pagu Goamu mera muare oadorea. Eropirã igu mera oaro arique mua.

Jesu yaräre Pablo serëbasapu Goãmure

³⁻⁸ Mua ya ariburire Goãmure serërã mucubiriri mera eropa serëbasaniguicãa gua. Igu mari Opu Jesucristo Pagu ahrimi. Aripehrerinuri mua umusigue oaro aricũ iigucumi Cristopu. Igu eropa iibu aricũ mua mucubirimuhtarã waicua. "Jesucristo diaye iigu ahrimi," arĩ igure umupeorã waicua mua. Eropirã igu yaräre mahi waicua mua. Mua eropa arirã aricũ Goãmure "Ohaa," arĩ mucubiriri mera serëbasaa gua. Aripehreroguere Jesu yarã diaye ariri buherire oari buherire erã werecũ peerã masa oaripure gohrotoma. Goamu yare masinemorã wahama. Opa ta mua sãre Epafra oari buherire weredi arimi. Igu gua mera Cristore mohme coregu ahrimi. Iri mohmerire duhubeami igu. Muare igu eropa werecũ peerã, mata Goamu yare oaro iiniguicãmurayoro mua. Eropirã Goamu muare mahirire diaye ta masirã mata oaro iayoro mua. Mua eropa iirare iagu Epafra weremi guare. Espiritu Santo itamuri mera Jesu yaräre mua mahirare weremi igu guare. Igu eropa arĩ werecũ peerã "Ohaa," arãa gua Goãmure.

⁹ Eropirã muare guñarã eropa Goãmure serëbasaniguicãa. Goamu igu gamerire mua masipehoboro dopa serëbasaa gua. Igu yare oaro masirã mua ariboro sãre serëbasaa gua. ¹⁰ Opa ta serëbasaa gua mari Opu Cristo igu gamero dopa ta oaro mua iiburire. Mua eropa iicũ iagu igu muare suagucumi. Eropa ta mua aripehrerire oarire mua iiburire serëbasaa. Goãmure mua masinemoboro dopa serëbasaa. ¹¹ I sãre serëbasaa gua. Goamu igu oaro turari mera mua oaro siporã turarã ariboro sãre serëa. Eropa ta serëa ñero tariquererã mua Goamu mera yujuro bojeboro dopa. Nero tariquererã mua eropa pepicãburire mua mucubiriri mera eropa ariniguiboro sãre serëbasaa daja gua. ¹² Goamu igu yarã aricũ marire iimi. Eropa iigu igu orire mari opamorã mari aricũ sãre iimi igu. Igu arirogue oarogue mari ariborore amutuhajami igu. Igu eropa iicũ iarã mucubiriri mera mari Pagure "Ohaa," mua ariborore serëbasaa gua muare. ¹³ Igu ta marire peamegue waboniräre taricũ iidi arimi. Iribojegue ñerire duhumasibiriribu mari. Ñegupu marire doredi arinirimi. Eropigu Goãmupu marire taudi arimi. Igu magu igu mahigure opu acugu igu dorero dopa marire aricũ iimi. ¹⁴ Igu magu mera marire peamegue waboniräre taudi arimi Goamu. Igu magu igu sirirañe mera mari ñeri iirare cãdijidi arimi Goamu.

Masa Goãmure gamebircũ ñha Cristo amupu, arĩ gojañumi Pablo

15 Goãmure mari Pagure ïaya mara. Cristo ïgu magu ïgu Pagu ïgu áríricurire ïhmudigu árími masare. ïgu ïgu magu árípehrerã core, árípehreri core árituhadigu árími. Eropigu tauro opu áhrimi ïgu. 16 Goãmu ïgu dorecũ ïgupu ïgu Pagu mera árípehrerire ïhacũnuguñumi. ïmusigue árírire i yebague áríri sãre ïhacũnuguñumi. Mari ïarire mari ïabiriri sãre ïhacũnuguñumi. I yeba majarãre, umusi majarã oparãre, árípehrero dorerãre, mari ïarãre, mari ïabirã sãre, árípehrerãre ïhacũnuguñumi. ïgu árípehrerire, árípehrerãre ïhacũnuguñumi. Eropirã árípehrerã ïgu iinirã áhriima. Árípehrerigüe ta ïgu iira áhriaa. 17 Árípehrerã core árípehreri core Cristo árímahtañumi. Eropiro ïgu turari mera árípehrerã dohpaguere árírã iima. Árípehreri sã áríro iiaa. 18 Mari ïgu yarã árípehrerã ïgu ya curu majarã árírã ïgu dupu waícua. Eropigu ïgupu mari dipuru áhrimi. ïgu sírigu masa muriamãhtadigu árími árípehreri weca árípehrerã weca áríbu. 19 Cristo mari Pagu Goãmu mera yuju dupu ta áríro dopa ta áhrimi. ïgu eropa árícũ ta gamepu mari Pagupu. 20 Árípehrerã masa erã ïgure gamebirimuricã ïagu erã ïgu mera amubere Cristore obeopu. ïgure eropa obeogu ïgu Cristo crusague síri ïgu di cóara ñera amupu. Eropigu umusi majarãre, i yeba majarã sãre ïgu mera ðaro árícũ iipu. ïmusi maja i yeba áríri sã ðaro árícũ iipu. Eropigu ïgu guñadiro dopa iipu.

21 Mua sãre eropa ta ïgu mera ðaro árícũ iidi árími. Mua sã ñerire iiniguinirã Goãmure boje majarã árírã mua pepiri mera ïgure gamebirinirã árímuriribu. 22 Mua eropa árínrãre Cristo síriro mera ïgu Pagure mua ïgu mera ðaro wacũ iipu ïgu. Eropa iipu ïgu mua ïgu yarã ðarã ñeri marirã, dipuwaja marirã mua áríboro dopa. Mua eropa árícũ ïgu áríroguere mua áríborore eropa iipu. 23 Eropa ta iigucumi ïgu mua ïgure duhuro mariro umupeoturaniguicãcã. Mua ðari buherire mua Goãmu mera áriniguiborore mua cãdijibiricã, ïgu mera mua árícũ iigucumi muare. Iri mua peera buherire ðari buherire árípehrerã i yeba majarã peenirã áríma. Eropigu yuhu Pablo sã iri ðari buherire weregu ta áhriaa.

Jesu yarãre itamubure apipu Goãmu Pablöre

24 Cristo mari ïgu yarã áríborore crusague sírigu ñero taripu. Eropigu yu sã mua ïgu yarã áríburire ñero tarigu mucubiria. Eropa ñero tarigu Cristo marire ïgu apirare ii ojogorocugu iiaa. Eropigu mucubiria. Cristo yare mari iira dipuwaja mari ñero tarinemoboro duhyania dohpa. Eropigu ïgure mua guñaturaborore ñero tari mucubiria yahu. ïgu dupu iro dopa árírã ïgu ya curu majarã áhriaa mua. 25 Jesu yarãre itamubure apimi Goãmu yure. Mua ya áríburire iibure yure apimi ïgu. ïgu yare muare werepehobure apimi ïgu yure. 26 Iri ïgu yare iribojegure baja cururi majarãre erã masipehocũ iibirimuriñumi mari Pagu. Dohpaguere dohpague majarãre ïgu yarãre irire ðaro masipehocũ iimi pare. 27 Eropigu “Judio masa áríbirã sãre yaha buheri ðataria,” arí ïgu yarãre irire weremi. Iribojegue erã masibirirare weremi Goãmu. Õpa áhriaa dohpaguere ïgu werera: Cristo ïgu yarã mera áhrimi. ïgu eropa árícũ ïgu yarã umusiguere ðatariaroguere árírãcoma. Iri áhriaa iribojegue erã masibirira mari Pagu ya.

²⁸ Cristore ta werea. Árípeherreräre güisägu eräre werea yuhū. Ōaro masiri mera buhea yuhū ōaro Cristore masare masicū iibu. Eropa buhea yuhū erā ĩgu yare ōaro iirā erā áricū iibu. ²⁹ Iri ta áhraa yū mohmeri. Jesucristo ĩgu ya turari mera yare ĩgu ora turari mera turaro mohmea yuhū ĩgu yare buhegu.

2

¹ Ire mua masicū gahmea. Mua ya áriburire, Laodicea majarā ya áriburire, árípeherrerā ya áriburire turaro mohmea yuhū. Árípeherrerā masa yare íabirā ya áriburi säre turaro mohmea yuhū. ² Ōpa ta mohmea yuhū mua árípeherrerā ōaro síporācuborore. Mua mera majarāre mua yujuro mera game umupeoburi säre eropa mohmea yuhū. Iribojegue majarāre Goāmū werebirira Cristore masicū iiri áhraa. ĩgu yare masirā Cristore umupeoa mua. Mua ĩgure ōaro masiborore mua ĩgu mera ōaro áriborore burigā itamua yuhū muare. ³ Cristo dihta masipehocāmi gajirā masibirirare. ĩgu árípeherrerire ōaro masigu áhrimi. ĩgu masiri ōatariaro áhraa. ⁴ Irire werea muare gajirā muare peesuari wereniguiri mera guyari arĩgu. ⁵ Yuhū mua watope áribiriqueregu yū guñari mera mua watope arĩgu dopa áhraa. Erogue áribiriqueregu Cristore mua ōaro umupeonigüire mua ōaro iirare peeḡu mucubiria yuhū.

⁶ Eropirā mari Opū Jesucristore opamorā ĩgure mua umupeonugadiro dopa ta umupeonigüicāque. “Eropa ta yare itamugacumi,” arĩrā umuri nūcu ĩgu mera ōaro árinigüicāque. ⁷ ĩgure ōaro masirā arĩque mua. Eropirā umuri nūcu ĩgure masinemoque gajirā erā ero core muare erā buhediro dopa ta. Eropirā Cristore mucubirirā “Ōhaa,” arĩnigüicārā arĩque mua.

Cristo yarā arĩrā ōaripure gohrotoa mari, arĩ gojañumi Pablo

⁸⁻¹⁰ Ōaro pee masique mua. Masa erā gamero erā buherire erā guyarire peebiricāque. Erā iribojegue majarā áricurare buhema. Masa erā pepiro dopa pepirā arĩrā i doreri dihta buhema. Cristo yapure buhebeama. Cristo mari Pagū áriro dopa ta arĩgu Goāmū gohra ta áhrimi. Eropigu Jesucristo Goāmū arĩgu i yebague masa dehyoadigu Goāmū ta arĩmi. Eropirā ĩgu yarā arĩrā Goāmū mera ōaro árinigüia mari. ĩgu ta árípeherrerā deyobirā oparā tauro opū arĩgu áhrimi. Ūmusi majarāre i yeba majarāre árípeherrerā majarāre doremi. Eropirā guyari buherāre peebiricāque. ¹¹ Eropirā Cristo yarā arĩrā circuncisiónre iinirā gasiro merogā wiri ainirā iro dopa árirā áhraa mua. Masa erā dupure merogā gasirogāre erā wiri cóaro áribiriya. Mua pepiripure Cristopū mua ñeri waribejarire cóāmi. ¹² ĩgu yarā arĩra puhru waıyesünirā árinirā áribū mua. Eropa waıyesünirā arĩrā ōpa íhmurā iinirā áribū mua: Iribojegue mua ñero iirare duhurare íhmurā iibū mua. Jesucristo síridigu mera mua waribejarare cóāmirā áribū mua. Eropirā Jesucristo síridigu masa muriara mera ōaripure gohrotonirā áribū mua. ĩgu Goāmupū Cristore masidigu arĩmi. “ĩgu turagu áhrimi,” arĩrā ĩgure umupeorā arĩrā ōaripure gohrotonirā áribū mua. ¹³ Iribojegue mua ñerā áriira dipuwaja peamegue wabonirā áriyoro mua. Eropa wabonirā áriyoro mua Goāmū yarā áribirā. ĩgu dorerire opabirā áriyoro mua. Dohpaguere mari Pagū marire ĩgu mera eropa ōaro árinigüimorā iimi. Cristo ĩgu

sĩridiro mera eropa iimi ĩġu marire. Eropa iġu mari árĩpehreri ñeri iirare cãdijicãdi árĩmi ĩġu. ¹⁴ Goãmu ĩġu dorerire gojarare mari tarinuganirã mari árĩquerecũ ta ĩġu marire dipuwajacũdorebeam. Cristo crusague ĩġu sĩridiro mera Goãmũpu mari ñeri dipuwajare cãdijipehocãdi árĩmi. ¹⁵ ĩġu Cristo crusague sĩricũ watẽa ya dorerapũre Goãmũpu tarinugacãpu. Eropirã bu árĩrã dujacãñorã erã watẽapu. Eropa iġu erãre guhyasiũro wacũ iipũ erã ihuro.

Umusi majare Goãmu yare gameque, arĩ gojañumi Pablo

¹⁶ Eropirã gajirã erã dorerire dorediaricoma muare. “Muare irire barã, irire ihrirã ñerire iirã iiaa mua,” arĩ werewuama muare. Erã eropa arĩ werewuacũ eropa iacãque erãre. Bojori nũcu árĩrinuri, aberi nũcu árĩrinuri, semanari nũcu árĩrinuri, bosenuri mua iidiabiricũ werewuama. Erã eropa werewuacũ eropa pepicãque erãre. ¹⁷ Erã muare doreri iribojegue Goãmu apira doreri Jesucristo mari ñeri iira dipuwaja sĩriburire ĩhmuhtarañe árĩyoro. Dohpaguere Cristo arĩmi marire. Eropirã ĩġure umupearã iri doreripũre umupeobea pare. ¹⁸ Erã dorerire iidorerã muare dipuwajacurã dujacũ iidiama erã. Erã eropiciũ eropa iacãque erãre. “Gajiropa dehyoarire ĩabũ gua,” arĩmaacãrã erã anyuare umupearima Goãmũre umupeoboro dopa. Erã eropa pepicãrã iro dopa iirima. Gajirã masa iro dopa erã ñeri uaribejarire pepirima erã. Eropa pepirã árĩrã “Masipehocãa gua,” arĩ pepirima erã. ¹⁹ Eropa iirã árĩrã Cristopũre umupeobeama. Cristo dihta ĩġu yarãre doregu ãhrimi. Cristopũ mari ĩġu yarã dipuru ãhrimi. ĩġu yarãpu ĩġu ya curu majarã árĩrã ĩġu dupũ waĩcua. Mari dipuru mari dupũre gamesũriro dopa ta ãhrimi Jesucristo ĩġu yarãre. ĩġu yarãre itamugu marire ĩġure umupeonemocũ iimi. Goãmu gamero dopa ta ĩġu yarãre ĩġure masinemocũ iimi.

²⁰ Marire ñero iira dipuwajacũnirãre Cristo taudigu árĩmi crusague sĩrĩgu. Eropirã Cristore umupearã ĩġu yarã ãhraa. Mua eropa árĩrã i yeba maja buherire anyuare umupeori buherire gamebiro gahmea muare. ¿Duhpirã gajino buherã erã dorerire iidiari mua? ²¹ Opa arĩ dorema erã basi erã gamero: “Irinore babiricãque. Irinore pẽhrebiricãque,” arĩma. ¿Erã eropa arĩdorecũ duhpirã yuhriri mua? ²² Erã doreriñe bari iro dopa ta pehrea waroca. Erã doreriñe i umu maja dihta ãhraa. Masa erã suaro erã buheri dihta ãhraa i buheri. Eropiro duhpiburi árĩbeaa. ²³ Erã dorerire iirã Goãmũre umupearã iro dopa árĩrima. Eropirã eropa pepicãrã iro dopa ii ĩhmuma. Erã dupũre ñero taricũ iirã “Goãmũre umupearã iiaa,” arĩrima. Erã eropa iirã erã doreripũ masipehorã ya doreri iro dopa iirima. Eropa árĩbeaa. Erã dorerire iiquererã erã ñeri uaribejarire duhubeama. Eropiro erã doreripũ duhpiburi árĩbeaa.

3

¹ Eropirã Cristo yarã ãhraa mua. Eropirã mua ero core mua ñeri iirare duhunijarã õaripũre gohrotonirã ãhraa mua. Eropa gohrotorã árĩrã umusi majare Cristo yare gameque mua. Erogue Cristo ĩġu Pagũ diyepũ doagu árĩpehrore doregu ãhrimi. ²⁻³ Mua uaribejari cóanirã árĩrã Cristo gamerire opaa. ĩġu Cristo mua õaro iiborore õaro ĩhadibumi. Eropirã iri ñerire guñabeaa mua. Eropirã umusi majare Goãmu yare guñamũhtaque. I yeba majare guñaniguibiricãque. ⁴ Eropirã umusigue Cristo marire

eropa árĩniguimoräre aĩgu ĩgu aricũ ĩgu mera warāca. Eropo warā ĩgu mera umusĩque Goāmũ yare oparāca.

Cristo yarā árĩbirā ñerire iiribũ mari, arĩ gojañumi Pablo

⁵ Eropi i yeba maja ñerire duhucāque. Ne yujugu mojoto diribiri-queregu nomeo mera árĩbircāque. Ne yujugo mojoto diribiriquerego umũ mera árĩbircāque. Eropo ñeri mua iirire iripēta duhucāque. Ñeri uaribejarire iibircāque. Mua opaburire gajinore gametaribircāque. Mari gajinore burigā gamerā goāmarā wéaniräre erā umupeoro dopa iirā iiaa mari irire. ⁶ Iri ñerire iirā Goāmure tarinugarā āhrima. Erā eropa árĩcũ ĩagu ĩgũpũ eräre gamebeamĩ. Eropigu eräre burigā dipuwaja moagucumi. ⁷ Iribojeguere muapũ iri ñerire iinirā mera majarā árĩriya mua. ⁸ Dohpaguere i ñerire duhuphecāque mua. Guarire, disitĩri wiarire, gajiräre ñero arĩ pepirire, gajiräre ñero quere wereniguirire, ñero wereniguirire iri árĩpehrerire duhucāque. ⁹⁻¹⁰ Muapũ Jesu yarā warā ñerā mua árĩdiro dopa ta iri ñeri uaribejarire duhutuhajanirā árĩbũ. Eropirā ñaripure gohrotonirā āhraa mua. Muare ñaripure gamecũ iigu iimi Goāmũ. ĩgu árĩro dopa mua árĩboro dopa eropa iimi. Eropo ta iimi ĩgu mua ĩgure ñaro masiboro dopa. Eropirā ĩgu eropiicũ mua mera majaräre gũyabircāque. ¹¹ Cristo yarā mua árĩrā judio masa, judio masa árĩbirā sã yujuropa dihta āhraa mua Goāmũ ĩgu ĩacũ. Gasiro merogã wiri aĩnirā, irire aĩbirinirā sã Cristo yarā árĩrā yujuropa āhraa Goāmũ ĩgu ĩacũ. Gaji yeba majarā sã, masibirā sã, mua ya yeba majarā sã Cristo yarā árĩrā yujuropa āhraa Goāmũ ĩgu ĩacũ. Pohro majarā, erā pohro majarā árĩbirā sã, Cristo yarā árĩrā yujuropa ta āhrima Goāmũ ĩgu ĩacũ. Jesucristo tamera árĩpehrerā ĩgu yarā mera āhrimi. ĩgu yarā erā ĩacũ bu árĩgu árĩbeami ĩgu.

¹²⁻¹³ Eropi Goāmũ ĩgu beyenirā, ñarā, ĩgu mahirā árĩrā ñpa árĩque mua: Gajiräre mojomoro ĩarā, gajiräre ñaro iirā árĩro gahmea. Muare ñero iiquerecũ ta eropa pepicārā árĩro gahmea muare. Mua mera majarā mera guarā, eräre quere iirā árĩbircāro gahmea muare. Eropirā “Yũhu bu árĩgu āhraa,” arĩ pepique. Mari Opũ mua ñeri iirare cãdijimi. ĩgu eropa cãdijidiro dopa ta mua sã mua mera majarā erā ñero iirare cãdijique. ¹⁴ I doreri tauro ñpa arĩ dorea muare: Gajiräre mahi umupeoque. Mua eropa iirā árĩpehrerā gajirā mera yujuro mera árĩrāca. ¹⁵ Cristo marire ñaro árĩcũ iimi gajinore mari wereniguibiriboro dopa. ĩgu eropa iicũ ñaro árĩque mua. Mari ĩgu yarā yuju curu ta āhraa. Mari eropa árĩräre mari Pagũ marire ñaro árĩmoräre ta apimi. ĩgu eropa iicũ ñaro árĩque mua mua basi. Eropirā Goāmure “Ōhaa,” arĩ mucubirirā árĩque mua Goāmũ mera.

¹⁶ Cristo ya buherire ñaro guñaniguicāque mua. Ōaro pee masiri mera ĩgu yare gajiräre buheque. Guhyadiaro irire wereque. Eropirā Salmo gojaripũre, Goāmũ yare bayarire, gaji ĩgure umupeori bayarire ĩgure bayapeoque. Ōaro guña umupeori mera bayapeoque. Eropo bayarā ĩgu yare ñaro guñaque mua. Eropirā Goāmure “Ōhaa,” arĩ mucubirirā árĩque mua Goāmũ mera. ¹⁷ Árĩpehreri mua iirire ñaro siporācu iique mari Opũ Jesu ĩgu mucubiriboro dopa. Mua wereniguirā ĩgu ya árĩburi dihtare wereniguique. Eropirā Cristo ĩgu itamuri mera Goāmũ mari Pagure serērā “Ōhaa,” arĩ mucubirique ĩgure.

Jesu yaräre yujuro mera árĩburi doreri òpa àhraa, arĩ gojañumi Pablo

¹⁸ Mũa marapucurã nome, mũa marapũ sumaräre òaro yuhrique. Eropa ta iiro gahmea mari Opũ yarã Cristo yarã nome árĩrã. ¹⁹ Mũa marapocurã, mũa marasã nomere mahi umupeoque. Igore turibircãque. ²⁰ Mũa erã porã sã mũa pagũ sumaräre tarinũgabirã dihta árĩque. Mũa eropa iicũ ìagũ mari Opũ òaro suagu árĩgucumi. ²¹ Mũa erã pagũ sumarã sã mũa poräre eropa turiniguibircãque bajawerecũ iiri arĩrã. ²² Mũa pohro majarã, mũa oparäre i yeba árĩrãre eropa yuhrirã árĩque. Erã ìhurore erã dorero dopa ta mohmeque. Erã maricũ sãre mohmeque. Mari Opure Cristore guhyadiaro mũa ìadiro dopa ta òaro mera yuhrique mũa oparã sãre. ²³ Diaye ta Cristo yarã árĩrã òaro yuhrirã àhraa mũa ìgure. Eropirã mũa oparäre ò majarã sãre yuhrirã, Cristore mũa yuhriro dopa ta yuhrique mũa. Eropirã mũa oparã erã dorero dopa ta turaro mera mohmeque “Cristo ya doreri àhraa,” arĩrã. ²⁴ Mũa eropa iicũ Cristo muare wajayegucumi. Muare ìgu oburire muare ogucumi mari Opũ. Irire masia mũa. Mari Opũ Cristo ìgu pohro majarã àhraa mũa. Eropigũ ìgũpũ mũa Opũ gohra àhrimi. ²⁵ ìgure tarinũgaräre dipuwaja moagucumi mari Opũpũ. Árĩpehrerã tarinũgaräre ne yujugu duhyaro mariro yujuro mera dipuwaja moagucumi ìgu. Eropa yäre iiri arĩrã òaro yuhrique mũa.

4

¹ Mũa oparãpũ, mũa pohro majaräre diaye ta òaro iique eräre. Mũa sã opũ opaa. Mũa opũpũ umusi majagu Goãmũ àhrimi.

² Mũa árĩpehrerã umuri nucũ Goãmure serẽniguique. Òaro guña pee masi serẽniguique. Eropirã mari Pagũ òaro iirare guñaque. ³⁻⁴ Gua ya árĩburipure serẽque daja. Cristo yare iribojegu majarã erã masibirirare buherã iiaa gua. Masare gua òaro buheboru dopa serẽbasaque mari Pagure. Yuhũ Goãmũ yare wereniguiri waja dohpaguere peresugue àhraa. Eropigũ mũa eropa serẽcũ gahmea ìgu yare yũ òaro iiboru dopa. Cristo ìgu dorediro dopa ta yũ wereburire serẽque.

⁵ Jesu yarã árĩbirã mera árĩrã òaro iique mũa. Cristo yare wereque eräre. Erã mera mũa árĩropẽ ta eropa ta òaro iique erã Jesu yarã árĩboru dopa. ⁶ Gajirã mera weretamurã òaro suaro mera weretamuque. Òari dihtare wereniguique. Mũa eropiirã gajirã erã Jesucristo yare muare serẽpicũ òaro masiri mera yuhrirãca eräre.

Òadoretupũ Pablo

⁷ Tíquico mari acaweregu Jesu yagu àhrimi. ìgu yũ árĩricurire muare weregucumi. ìgu mari mahigu àhrimi. Cristo yare buhegu, gua mera mohmegũ àhrimi. Ne iri mohmerire duhubeami ìgu. ⁸ Mũa pohrogue ìgure obeogu iiaa yuhũ gua árĩricurire mũa masiboru dopa. ìgure obeogu iiaa yuhũ muare mucubiricũ iibure. ⁹ Onésimo mari acaweregu mera wapimua obeogu iiaa. ìgu sã Cristo yare ne duhubeami. Mũa mera majagu àhrimi. Erã perã yũ dohpa tarirare wererãcoma muare.

¹⁰ Aristarco peresugue árĩgu yũ mera majagu muare òadoremi. Marco sã òadoremi. ìgu Bernabé pagũ magũ àhrimi. Mũa pohrogue ìgu ejaçũ òaro mera ìgure bocatĩrique yũ muare werebeodiro dopa ta. ¹¹ Jesu waĩcũgu “Justo,” erã arĩ piyugu òadoremi ìgu sã. Oã ta yũ mera mohmerã judio masa gohra àhrima. Judio masa gohra erã dihta

Goãmu yare yu mera buhema. Õpa buhea gua Goãmu yarã masa waboro dopa. "Jesucristo yu Opu àhrimi," erã aríboro dopa buhea gua. Erã yure òaro itamunirã àhrima. ¹² Epafra mua mera árídigu muare òadoremi. Ìgu Jesucristo dorerire òaro iigu àhrimi. Goãmure serêgu, turaro mua ya áríburire serêbasaniguicãmi Ìgu. Goãmure òaro guñaturaniguimorãre, Ìgu gamero dopa iimorã mua áríboro dopa eropa Goãmure serêbasaniguicãmi Ìgu. ¹³ Ìgu mua ya áríburire turaro serêbasami. Laodicea majarã ya áríburire, Hierapoli majarã ya áríburi sãre Ìgu turaro serêbasami. Ìgu eropa iigu árícũ Ìagu muare weregu iiaa. ¹⁴ Duhturu Luca waĩcugu mari mahigu muare òadoremi. Dema sã òadoremi.

¹⁵ Òaporo mari acawererã Laodicea majarã. Ninfra sã òaporo. Jesu yarã igo pohro gamenererã sã òaporo. ¹⁶ Ipũre yu gojabeorapũre buhetuha Laodicea majarã sãre obeoque. Eropirã erãre Laodicea majarãre yu gojabeorapũre mua sã buheque. ¹⁷ Eropirã òpa arĩque Arquipore: "Mari Opu Jesu yagu mu árícũ Ìgu mohmerire apidi árĩmi mure. Ìgu eropa apicũ iri mohmerire òaro mohme ojogorocũque muhu," arĩque Ìgure.

¹⁸ Yũhu Pablo, yu mojoto mera ire gojaa. Muare òadoreya yũhu. Peresugue yu árĩrĩre guña serêbasaque Goãmure. Òaro arĩque mua. Goãmu Ìgu mahiri mera muare òadoreya. Iripêta àhrraa.

1 Tesalonicenses

Pablo gojañumi Jesu yaräre Tesalónica majaräre

¹ Yü Pablo, Silvano, Timoteo mera ipüre müare gojabeoa. Mwapü Tesalónica majarä mari Pagu Goämu yarä árírã mari Opü Jesucristo yarä sä ähraa mua. Eropigu Goämu mari Pagu, Jesucristo mari Opü mera müare ðadoreä. İgu itamuri mera ðaro áríque.

Jesu yarä Tesalónica majarãpü Jesure erä ðaro umupeorare wereñumi Pablo

² Goämure sererä mua árípehreräre guñaä mucubiriri mera. Mua Jesure umupeorire guñarä “Öatariari ähraa,” arí serëniuguicã gua Goämure. ³ Mua Jesucristore “Diaye iigu ährimi,” arí umupeoniguicã waícua. Eropa umupeoniguicãrã Jesucristo ya áríburire ðaro iirã waícua. Jesucristore, gajirã säre mua ðaro mahi umupeorã waícua. Eropa mahirã Jesucristo ya áríburire buriğã iirã waícua mua. Eropirã Jesucristo İgu itamurire corerã waícua mua. İğure eropa corerã İgu yare iirã duhubirã waícua. Eropa iirã mua Goämu mari Pagu İacü ðaro iiaa. Goämure gua sererä irire mua eropa ðaro ii waícurare guñaniguicã. ⁴ Gua acawererä, öpa peeque. Müare Goämu mahimi. Eropigu müare İgu yarä árímoräre beyepü. Irire masia gua. ⁵ Gua sohö árírasubu mua mera árírã ðari buherire müare gua wererã gua pepiri mera werebirabu. Espiritu Santo İgu doreri mera İgu yare wereabu gua müare. Eropa werecü iri buheri diaye ta árírã ðaro masiabu mua.

⁶ Eropa masirã mua iri ðari buherire ðaro pee ñeabu mua mucubiriri mera. Eropirã mua eropa peecü İha gajirã gamebirã müare ñero iima. Erä müare ñero iiquerecü ta mua Espiritu Santo itamuri mera ðaro mucubiriabu. Eropirã gua mua watope árírã gua ðaro áríricurire masiabu mua. Eropirã mua gua diaye maja iirare İarã guare İhacübü. Eropirã Jesu mari Opü İgu iidiro dopa ta iiabü mua. ⁷ Mua eropiicü pee Jesu yarä Macedonia yeba majarä, Acaya yeba majarä sä mua eropa ðaro iirare peeañorã. Eropa peerã erãpü mua iidiro dopa ta iiañorã erä sä.

⁸ Eropirã müaguere Jesucristo mari Opü yare peesüyoro. Goämure mua umupeorare Macedonia majarä Acaya majarä sä peeañorã. Erä dihta peebirañorã. Árípehrero majarã mua umupeorare peeañorã. Eropirã gua mua umupeorare gajirã masituhajacü İha werebirica eräre guapü. Erãpü guare werema. ⁹ Öpa arİma guare mua iirare wererä. “Tesalónica majarä müare ðaro bocatüriñorã mua erogue ejacü. Erä Jesucristo yare pee erä goämarä wëaniräre umupeonirã árírã gohrotoañorã. Gohrotorã Goämu gohra ojocarigure diaye iigure umupeonugañorã. Eropirã dohpague Goämu yare iirã iiañorã. ¹⁰ Eropirã Goämu magu Jesucristo İgu umüsigue ariburife ðaro corerã ährañorã,” arí werema guare. Jesure sirdigure Goämu masupü. Eropigu Jesupü marire ñetariaro dipuwajacuboniräre taudigü ährimi.

2

Pablo Tesalonicague İgu buherare wereñumi

1 Maa pohro gua árfirã eropa árficãrã iibirabu. Muare ðaro itamurã árfimurabu gua. Irire ðaro masia maa, gua acawererã. 2 Ero core Filipo maca gua árfirã ñero taribu. Guare ñero erã iirare masia maa. Guare erã eropa ñero iiquerecũ ta Goãmu itamuri mera güiro mariro Goãmu yare ðari buherire wereniguirã gua ejabu maa pohroguere. Maa árfiro sãre guare masa bajarã erã ihaturiquerecũ ðari buherire buheabu gua muare. 3 Eropirã maa pohro árfirã muare gua werera ðaro diaye majare buheabu gua muare. Eropa wererã muare ñero iidiarã árfibirimurabu gua. Muare guyadiarã buhebirimurabu gua muare. 4 Goãmu gamero dopa ta buhea gua. ðari buherire buhemorãre Goãmu beyemi guare. Eropa beyegu igu ya buherire guare weredoremi. Eropirã masa guare erã ihasuaburire buherã iibeaa gua. Goãmupu guare igu ihasuaburire igu yare buhea gua. Goãmu mari pepirire dohpa mari iidiarire ðaro masimi. 5 Eropirã gua muare ðari buherire wererã gajinore amarã ejabirimurabu. Eropirã werenigui guyarã iibirimurabu gua muare. Eropirã gua buherã muare niyerure aïmorã iibirimurabu. Irire gua maa pohro eropa ðaro iirare maa masia. Goãmu sã irire masimi. 6 Gua eropa buherã maa guare umupeoburire dorebirimurabu. Gajirã sãre eropa ne dorebirimurabu. 7 Gua Cristo igu apinirã árfirã muare doremasiboaya. Ne eropa dorebirabu gua. Gua dorebirã majirãre nijisoro dopa ta muare ðaro iimurabu mahiri mera. 8 Eropirã muare ðaro gamerã Goãmu yare ðari buherire weremurabu gua muare. Gua basi ta árfiherero gua iimasiburire muare itamumurabu. Gua mahirã maa árficũ eropa itamuabu muare. 9 Eropirã muare mahirã burigã itamumurabu. Irire guñaa maa, gua acawererã. Goãmu yare ðari buherire wererã árfirã, maa oparire serẽ garibobirimurabu muare. Eropirã gua basi mohmemurabu gua baburire wajatamorã. Eropirã umare, ñamigue sãre mohmemurabu gua.

10 Eropirã ðaro Goãmu gamero iirã ñeri dipuwaja mariro diaye ta iimurabu muare Jesu yarãre. Eropirã gua maa mera eropa queoro árfirare masia maa. Goãmu sã irire masimi. 11 Eropirã erã pagu igu porãre igu ðaro were igu mucubiricũ iidiro dopa ta gua maa sãre árfihererãre wererã mucubiricũ iiaabu muare. Irire masia maa. 12 Goãmu muare igu opu árfirogue igu ðatariaro árfirogue maa árfimorãre beyedigu árfimi. Eropirã maa igu yarã árfirã igu árfiro dopa ta ðaro iiniguicãro gahmea, arimurabu.

13 Eropirã Goãmu yare muare gua wererare maa peerã ðpa pepibu maa: "Masa erã pepiri mera iri buheri árfibeaa. Goãmu ya buheri ta áhraa," arĩ pepibu maa. Irire maa eropa pepicũ masirã mucubiria gua. Eropirã Goãmure sererã, "Óhaa," arãa gua igure. Eropa ta áhraa. Muare gua buheri, Goãmu werenigui diaye ta árfiri áhraa. Eropigu maa Goãmu yare ta peecũ igu ya buheri mera ðaripure gohrotocũ iimi muare. 14 Eropirã Jesucristo yarã maa árficũ iarã i yeba majarã Jesure gamebirãpu ñero iiañorã muare. Maa eropa wadiro dopa ta Judea yeba majarã sãre wayoro. Eroque sãre Jesucristore umupeorãre erã ya yeba majarã sã ñero iiañorã. Judio masa Jesure gamebirã erãre ñero taricũ iiañorã. 15-16 Mata judio masapu iribojegue majarã Goãmu ya weremuhtanirãre wejẽmurinirã árfima. Eropirã mari Opu Jesucristo sãre wejẽñorã erã. Eropirã erã Jesucristo yare gamebirã gua sãre ñero ii cohãma guare erã ya yebare. Eropirã erã judio masa árfibirãre erã dederebiriborore gua erãre Goãmu yare werecũ guare judio masa cãhmotamurima. Goãmu

yare weredorebirima guare. Erã Jesu yarãre ìhaturi árimurima. Erã eropiirare Goãmu gamebirigohracãmi. Eropiro erã judio masa ñero iira dipuwaja wuaro árituhaya. Erãre Goãmu burigã dipuwaja moagucumi.

Pablo Tesalónica majarã pohrogue dipaturi curigu wadiaripu

¹⁷ Gua acawererã, mua mera dohpaguere áribiriquererã ta muare guñarã iiaa. Eropirã muare burigã ìadiarã mua pohrogue wadiarabu gua. ¹⁸⁻¹⁹ Bajasuburi yuhu muare ìagu wadiarabu. Watipu gua wabodirore goroweoami. Eropirã gua wabiricarabu. Guare mucubiricũ iirã mua áricũ muare ìadiarabu. Mari Opu Jesucristo i yebague dujaricũ turaro mucubirirãca mua mera. Eropirã mucubirirã mua mera Jesu core niguirãca. ²⁰ Eropa ta áhrraa. Muare ìagu Jesupu “Ôaro buhenirã áhrraa mua,” arigucumi guare. Eropirã ôaro mucubirirãca gua.

3

¹⁻² Eropii muare yoari boje gua ìabirã muare burigã peediarã irire guñarã Timoteore mua pohrogue oboeabu. Igu mari acaweregu Jesu yagu Goãmu pohro majagu gua mera ôari buherire buhegu áhrimi. Eropirã igure oboeabu Jesucristore mua ôaro umupeoburire mua mucubiriburi sãre. Iguere oboerã gua seyaro Atena maca dujabu. ³ Mua Jesucristore umupeora waja gajirã muare ñero iiañorã. Eropirã mua Jesu yare mua cóãbiriboro dopa itamubure oboeabu Timoteore mua pohrogue. Mari Jesu yarã árirãre eropa ta gajirã marire ñero taricũ iirãcoma. Irire masia mua. ⁴ Mua mera ero coreguere árirã ôpa arì weretuhajabu muare: “Mari Jesucristore umupeora waja gajirã marire ñero iirãcoma,” arì weretuhajabu muare. Eropirã gua werediro dopa ta erã ñero iima muare. Irire mua ôaro masia. ⁵ Eropigu muare mahitariagu muare yoari boje ìabigu muare burigã peediabu yuhu. Eropigu Timoteore oboeabu yuhu mua Jesure umupeorire masibu. “Watì muare ñero iidoreri,” arigu, “Muare gua buherare muague duhuri,” arigu igure oboeabu yuhu.

⁶ Eropigu dohpaguere Timoteo mua pohrogue áridi gua pohrogue dujarami. Eropã dujaragu ôari querere guare wereami Igu. Jesure mua ôaro umupeorare mua gajirã mera ôaro mahira sãre igu wereami guare. Eroparigu guare mua ôaro guñara sãre wereami. “Erã sã muare burigã ìadiama,” arì wereami igu guare. Igu eropa arì wrecũ peerã mucubiria. ⁷ Eropirã gua dohpaguere ñero tarirã áriquererã mua Jesure ôaro umupeocũ peerã gua mucubiria. ⁸ Jesure mua ôaro umupeorare pee igu yare mua cóãbirirare peerã ôaro pepia gua. ⁹ Eropa pepirã Goãmu ìaro gua burigã mucubiria. Eropa mucubirirã Goãmure serëa, “Ôhaa,” arirã. ¹⁰ Eropirã gua basi muare ìaburire Goãmure serëniquia. Ùmuri ñamiri sãre serëniquicãa. Muare ìadiarã Jesucristo yare mua ôaro masipheocũ itamudiaca igure mua ôaro umupeonemoboro dopa.

¹¹ Goãmu mari Pagu igu basi mari Opu Jesu mera guare itamuporo mua pohrogue gua waburire. ¹² Eropigu mari Opu Jesu áripehrerã mua mera majarãre áripehrerã gajirã sãre mahinemoburire iiporo muare. Gua muare mahi umupeodiro dopa ta mua sã burigã mahinemocũ iiporo muare. ¹³ Muare Igu ôaro itamuri mera mua dipuwaja marirã ñeri marirã árirãca Goãmu mari Pagu ìacũ. Eropa ta árirãca mua mari Opu Jesu dujaricũ áripehrerã Igu yarã ôarã mera i yebague.

4

Goãmure mucubiricũ iidiarã õpa iique, arĩ were gojañumi Pablo

¹⁻² Dohpaguere Jesu mari Opu ïgu dorero mera muare õpa werea: "Goãmure mucubiricũ iidiarã õpa iique," arĩ buheabu gua muare. Gua eropa buhera pũru gua buhediro dopa ta iayoro mua. Iri buherire õaro masia mua. Eropirã mua Goãmu yare õaro iirã ãhraa. Eropirã mua eropa iidiro dopa ta duhubirã ta. Muraro ta iinemoque daja. Irire burigã werea muare.

³ Irire muare werenemoguãra. Mua õpa áricũ gahmemi Goãmu. Ñerire iibirã Goãmu yare iirã árique. Eropirã nome mera ñero iiro mariro árique mua ãma. Mua nome sã ãma mera ñero iiro mariro árique.

⁴ Ñero iibiraro mariro umupeori mera mua marasã nomere opaue. Mua irire masicũ gahmemi Goãmu. ⁵ Goãmure gamebirã Goãmure masibirã ñerire uribejarã nomere erã gamero dopa ta iibiricãque mua. ⁶ Õpa ta mua iibiricũ gahmemi Goãmu: Ne yujugu mua acaweregu marapore yajabiricãporo. Eropa yajagu ïgu acaweregure umupeobigu iimi ïgu. Eropigu eropa iigure mari Opu iri ñerire ïgu ya dipuwaja moabu árigu tiimi. Eropirã muare gũisãrã irire wereabu muare. ⁷ Ñerire pepimorãre, ñerire iimorãre beyebirimi marire Goãmu. Ñerire iibirimorãre õarire iimorãre beyemi Goãmu marire. ⁸ Eropigu õarire mari iimorã áricũ ïgu Espiritu Santo odigu árimi marire. Eropirã iri ñerire iibiricãro gahmea. Eropigu yujugu i gua wererare yuhribigu Goãmu yapu sãre yuhribigu áhrimi.

⁹⁻¹⁰ Mua acawererãre, Jesu yarãre mua game mahiburire Goãmu muare buhetuhajami. ïgu eropa buhecũ mua diaye ta Jesu yarãre Macedonia majarã sãre áripehrerãre õaro mahi umupeo waĩcua. Mua eropa mahicũ peegu "Mua acawererãre mahique," arĩ buhebeaa daja muare. Eropigu õpa dorea daja yuha. Mua gajirãre mahiro dopa ta erãre mahinemoque. ¹¹ Eropirã mua basi game ñaturiro mariro árique. Gajirãre gajiropa arĩ wereniguibiricãque. Eropa ñacãque erãre. Eropirã mua ya mohmeripure õaro mohmeque. Ero coregue ta muare eropa iidoreabu. ¹² Mua eropa mohmerã gajirãre barire amasome. Eropirã erã muare õaro wereniguirãcoma.

I yebaguere Jesucristo ïgu dujariborore werepu Pablo

¹³ Jesure gamebirã Jesu pohroguere wasome. Eropirã erã mera majarã erã síricũ ñarã burigã bujawerema. Sírinirã mura erã waborore diaye ta õaro mua masicũ gahmea gua. Gajirã erã bujawerediro dopa mua bujawerebiriboro dopa muare masicũ iidiaa. ¹⁴ Jesu ïgu sírira pũru masa muriadigu árimi. "Iri diaye ta ãhraa," arãa mari. Eropa arirã árirã i sãre "Diaye ta ãhraa," arãa mari. Goãmupu ïgu yarã sírinirã murare erã masa muriacũ Jesu mera aricũ iigucumi. Iri sãre "Diaye ta ãhraa," arãa mari.

¹⁵ Mari Opu ïgu buhediro dopa ta ire werea. Jesucristo ïgu dujaricũ ïgu yarã ojocarirã sírinirã core masa mariamũhtasome. Sírinirã murapu ojocarirã core masa mariamũhtarãcoma. ¹⁶ Õpa áriroca Jesu ïgu dujaricũ: Mari Opu ïgu basi dijarigucumi amũsigue áridigu. Dijarigu busuro mera werenigu, doregucumi. ïgu dorecũ ïgu anyua opu burigã piyugucumi. Eropa ïgu piyucũ Goãmu ya corneta busumũriroca. Erã eropiicũ Cristore umupeonirã sírinirã mura masamũria mũhtarãcoma. ¹⁷ Erã pũru mari ojocarirãre sírinirã masanirã mera Goãmu aĩ mariagucumi. ïgu eropa

iicũ mari Opu Jesure bocatĩrĩrãca mari. Eropirã mari Opu Jesu mera áriniguicãrãca. ¹⁸ Eropirã i yu wererare mua mera majarãre wereque. Eropa arĩ wererã mucubirĩrãca mua áripehrerã. Mari Opu Goãmu ĩgu wereri ta áhraa i.

5

¹ Jesu ĩgu dujariburinũre “Inuri áricũ ĩgu dujarigucumi,” arĩ mũare were gojabeosome. ² ĩgu dujaririnũre marire masima masiya mara. Yajari masu ñamigue guñaña mariro ĩgu yajagu ariro dopa ta i yebaguere mari Opu guñaña mariro dujarigucumi. Iri sãre masia mua. ³ Eropirã masapu “Dohpaguere mari õaro áricãa. Gũhyari mara marire,” erã eropa arĩ pepirisubu mata ñero waroca erãre. Ero eropa wacũ ne nohogue gohra duhri wiria masisome. Dederea warãcoma. Niji wahgũgo guñaña mariro ĩgo pũriro pepiro dopa guñaña mariro eropa waroca masare Jesu ĩgu dujaricũ. ⁴ Yu acawererã, muapũre eropa wasome. Yajari masu wihĩ opũre ĩgu ucudiro dopa ta muapũre eropa wasome. Jesu arigu mũare ucusome. Naitĩarore erã ĩha masibiro dopa gajirã Jesure ne masibeama. Muapu erã iro dopa áribeaa. ⁵ Mua áripehrerã Jesu yarã áhraa. Eropirã boyorore erã ĩha masiro dopa ta Jesu ĩgu ariborore masia mua. Gajirã ĩgure masibirã iro dopa áribeaa mua. Eropirã ucasome ĩgu dujaricũ. ⁶ Eropirã carĩrã iro dopa áribiricãro gahmea. Ōaro pee masirã áhri Goãmu yare õaro pepiro gahmea. Eropirã Jesucristo dujariborore õaro corero gahmea. ⁷ Ñamire carĩrã dopa áribiricãro gahmea. Ñamire mererã dopa áribiricãro gahmea. ⁸ Ūmure áriro dopa õaro pee masi áriro gahmea. Eropirã marire watĩ ñero iidoreburire iibiricãro gahmea. Surara gamewejẽgu wagu come suhriro saña, come sãpea peya ĩgu cãhmotaboro dopa mari sãre watĩ ñero goroweoborore cãhmotaro gahmea. Ōpa iiro gahmea watũre cãhmotabure: Jesucristore “Diaye iigu áhrimi,” arĩ umupeoniguicãro gahmea. Goãmũre masa sãre mahiniguicãro gahmea. Eropirã Jesu mera mari Goãmu pohro mari áriburire masi corero gahmea. Mari eropiirã ñero iibiriburire cãhmotarã áriĩrãca. ⁹ ĩgu dipuwaja moamorãre marire beyebirĩpu Goãmu. Jesucristo mari Opu marire dipuwaja marimorãre, peamegue wabonĩrãre ĩgu taumorãre beyepũ marire. ¹⁰ ĩgu Jesu mari ya áriburire ta sĩribasadigu árimi ĩgu mera mari áriburire. Eropirã ĩgu dujaricũ ojocarirã áriĩrã sĩrinirã sã yujuropa ta ĩgu mera áriĩrãca mari ĩgu yarã áriĩrã. ¹¹ Eropirã mua mera majarãre dohpague mua mucubiricũ iidiro dopa ta mua basi mua mucubiricũ iique daja. Eropirã mua basi ta Goãmũre umupeonemocũ iique mua mera majarãre Goãmu yare wererã.

Jesu yarãre Pablo weretuñumi

¹² Jesucristo yare buherã mua õaro iiburire wererã áhriima mua pohro. Erãre mari Opu Jesucristo buhedoregu beyeñumi. Erã ĩgu beyenirã áricũ õaro umupeoque erãre. Mua erãre eropa umupeocũ gamegu burigã dorea mũare. ¹³ Erã mohmerire erã iicũ erãre mahiri mera õaro umupeoque. Eropirã gamequeãro mariro áriĩrã gahmea.

¹⁴ Gua acawererãre, mũare, õpa burigã werea daja. Mohmediabirãre mohmedoreque mua. Duhudiarãre “Goãmũ itamuri mera duhubiricãque,” arĩque erãre. Jesure merogã umupeorã sãre itamuque. Erã mata pee masibiricũ ĩha guabiricãque erã mera.

15 Yujugu mũare ĩgu ñero iiquerecũ mũapu dipaturi ĩgure ñero ii gamebircãque. Mũa mera majarãre áripehrerã gajirã sãre õaro mera umupeoque.

16 Eropirã umuri nũcu Goãmu mera eropa mucubiriniguicãro gahmea mũare. 17 Eropirã Goãmure eropa serẽniguicãro gahmea. 18 Mũa õaro tarirã, mũa ñero tariquererã Goãmure “Õhaa,” arĩro gahmea. Goãmure “Õhaa,” arĩrã, Goãmũ ĩgu gamediro dopa ta iirãca mũa Jesucristo yarã arĩrã.

19 Eropirã Espĩritu Santo mũare ĩgu wererire yuhribirã áribircãque.

20 Espĩritu Santo ĩgu masiri mera gajirã mũare buheama. Erã eropa buhecũ erã buherire gamebirã áribircãque. 21 Eropirã gajirã mũare gajiropa erã arĩ buhecũ iri Goãmũ ya áribircũ masique mũa. Eropirã Goãmũ ya buheri iri áricũ sãre masique mũa. Eropirã õari dihtare gameque. 22 Eropirã iri ñerire áripehreri ñerire gamebircãro gahmea.

23 Eropigu Goãmũ marire õaro iirã áricũ iigu áhrimi. ĩgu ĩgu basi mũare ĩgu yarãre mũa õarã ñeri marirã áricũ iinemoporo mũare. Mũa dupũ sãre mũa siporã sãre õaro ĩhadibuporo mũare. Mari Opũ Jesucristo i yebaguere ĩgu dujariboro core Goãmũ mũare õaro ĩhadibuporo mũa ñerire iibiriboro dopa. ĩgu eropa iicũ Jesucristo dujaricũ ñeri marirã árirãca mũa. 24 Eropa ta iigucumi Goãmũ. ĩgu mũare beyedigu ĩgu arĩdiro dopa ta iimi.

Pablo erãre õadorebeõumi

25 Gũa ya õaro áriburire Goãmure serẽbasaque mũa sã, gũa acawererã.

26 Jesu yarãre bocatĩrirã áripehrerãre mahiri mera mojoto ñeaque mũa.

27 Jesu mari Opũ ĩgu doreri mera mũare werea yũhũ. Áripehrerã Jesu yarã gamenererãre ipũre buheque mũa.

28 Jesucristo mari Opũ ĩgu mahiri mera mũare burigã õadorea. Eropa ta áriniguicãporo. Iripẽta áhraa.

2 Tesalonicenses

Pablo ĭgu mera majarã mera gojabeoñumi daja Jesu yarã Tesalónica majarãre

¹ Yũhũ Pablo, Silvano mera, Timoteo mera ipũre mũare gojabeogu iiaa. Mũa Tesalónica majarã mari Pagũ yarã àhraa. Mari Opũ Jesucristo yarã àhraa mũa. ² Eropigu mari Pagũ Goãmũ, Jesucristo mari Opũ mera mũare òadore. ĭgu itamuri mera òaro árĩque mũa.

I yebaguere Jesucristo dujarigu dipuwaja moagũcumi, arĩ gojañumi Pablo

³ Mũa Jesucristore “Diaye ta iigu àhrimi,” arĩ umupeorã umupeonorã árĩ waĩcuabu. Eropirã mũa gajirãre mahi umupeorã turaro mahi waĩcuabu. Mũa eropa árĩcũ pee Goãmure òaro mera serẽro gahmea guare. “Mũhũ erã mera òaro iiaa,” arĩro gahmea Goãmure. ⁴ Mũa Jesure umupeora waja gajirã mũare erã ñero iiquerecũ mũa ñero tariquererã Jesure umupeonigui waĩcuabu. ĭgure umupeorã duhubirã waĩcuabu. Mũa eropa iicũ pee mucubiriri mera werea gua gajirãre Goãmũ yarãre. ⁵ Eropirã mũa Jesure umupeora waja gajirã mera ñero tariquererã Goãmure umupeoniguicã waĩcuabu. Goãmũpu diaye iigu àhrimi. Eropigu ĭgu mũa ĭgure eropa umupeocũ ĩha ĭgu Opũ árĩroguere wadoregũcumi mũare.

⁶ ĭgu Goãmũ diaye iigu árĩgu gajirãpũre mũare ñero iinirãpũre erãpũre ñero taricũ iigucumi Goãmũ. ⁷ Eropigu mari ñero tarinirãre marire soocũ iigucumi mari Opũ Jesu dujarigu. ĭgu dujarigu anyua turarã mera peame ũjũro iro dopa dehyoagu arigucumi umarogue. ⁸ Eropa arigu Goãmure masibirãre erã ya dipuwaja moagũcumi. Mari Opũ Jesucristo ĭgu òari buherire tarinũganirãre dipuwaja moagũcumi erãre. ⁹ Eropirã erã erã ya dipuwaja dedererãcoma. Peamegue ñero tariniguirãcoma. Eropirã erã mari Opũ Jesu ĭgu dorerogue ĭgu òari árĩroguere ne wamasisome. Eropa ta waroca irinure Jesucristo ĭgu dujaricũ. ¹⁰ Irinũ ta ĭgu aricũ ĭgu yarã ĩhamariarã “Diaye ta turagu, òagu àhrimi,” arĩ wereniguirãcoma. Eropirã ĭgure òaro peenirã ĭgure ĩarã umupeorãcoma òaro ĭgure. Mũapũ Jesu yare gua buherare òaro peeabu. Eropirã mũa sã ĭgu mera árĩrãca.

¹¹ Eropirã Goãmure serẽniguica gua mũa ya árĩburire. Őpa arĩ Goãmure serẽbasaa ĭgure mũare itamudorerã. “Erã mũ beyenirã mũ árĩro dopa ta erã árĩcũ iique,” arĩ serẽbasaa. “Goãmũ, mũ doreri mera erã òaro iidiarire erã iicũ itamuque. Erã mũre umupeorã mũ gamerire erã iicũ iique,” gua arĩ serẽbasaa Goãmure. ¹² Mũa eropa Goãmũ gamerire iicũ ĩha gajirã sã umupeorãcoma mari Opũ Jesucristore. Eropigu Jesucristopũ mũare òaro ĩagũcumi. Eropigu Goãmũ marire mahigu gua arĩ serẽbasaro dopa ta iigucumi mari Opũ Jesucristo mera.

2

Ñeri mera masare weresãgu dehyoagũcumi, arĩ gojañumi Pablo

¹ Dohpague mari Opũ Jesucristo i yebaguere ĭgu dujariborore werenodiaca yũhũ mũare. ĭgure mari gamenere bocatĩriburire werediaca. Eropigu òpa arĩ bũrigã werea mũare, gua acawererãre. ² Gajirã mũare

õpa arĩbocoma: “Mari Opũ ĩgu dujariburinũ, pehrerinũ árĩroque iiaa,” arĩbocoma muare. Erã eroparicũ peerã pee ucabiricãque. Eropirã peerã peewisibiricãque. “Goãmu yãre eropa ta arĩdi árĩmi,” arĩbocumi muare gajigu. Gajigu sã muare buhegu eropa ta arĩbocumi. Gajigu sã eropa ta arĩ gojabeobocumi, “Yũhu Pablo ta àhraa,” arĩ guya gojabeogu. Irire muare weregure masibeaa yũhu. ³ Eropirã gajirã muare guyacũ ne peebiricãque. Irinu Jesucristo dujariburinũ árĩboro core õpa waroca. Bajarã masa Goãmure cóarãcoma. Eropigu ñeri mera masare weresãgu dehyoamũtagucumi. ĩgu dederebu árĩgu àhrimi. ⁴ ĩgu Goãmure umupeorire, goãmarã sãre umupeorire gamebigucumi. ĩgu dihtare umupeodoregu “Árĩpehreri weca opũ àhraa yũhu,” arĩgucumi ĩgu. Eropigu ĩgu Goãmũ ya wihĩ doagu, “Yũhu ta Goãmũ àhraa,” arĩgucumi ĩgu masare ĩgure umupeodoregu.

⁵ Yũhu mua mera árĩrasubure irire ta werebu. ¿Irire guñari mua? ⁶ Dohpaguere ĩgure ñeri mera masare weresãgure árĩdorebeami dohpa. ĩgure árĩdorebigure masica mua. Queorinu árĩcũ ĩgu ñeri mera masare weresãgu dehyoagucumi. ⁷ Dohpaguere ĩaro mariro ĩgu ñerire mohmenugatuhajacumi. ĩgu ñeri iidiarire árĩpehrerire iimasibeami dohpa. ĩgure árĩdorebigũ ĩgu wara puhũ árĩpehrerire ñerire iigu ĩgu ñeri mera masare weresãgu dehyoagucumi. ⁸ Eropiira puhũ mari Opũ Jesucristo ĩgu wereniguiiri mera ĩgure wejẽcãgucumi. Eropigu Jesupu dujarigu ĩgu dehyoari mera ĩgure wejẽ dedeocãgucumi ĩgure. ⁹ ĩgu ñeri mera masare weresãgupu watĩ dorero mera arigu baja deyoro moaro dopa árĩrĩre ii gũyagucumi masare. ¹⁰ ĩgu eropa árĩpehrerire ii gũyacũ peamegue wamorãpu ĩgure peerãcoma. Erã diaye árĩrĩre gamebirã àhrima. Erã eropa gamebiricũ Goãmũ erãre dederemorãre tausome. ¹¹ Eropigu diaye árĩrĩre gamebirãre Goãmũ erãre gũyaripure peecũ iigucumi. ¹² Goãmũ árĩpehreri diaye árĩrĩre peediabirinĩrãre, ñerire iidianirãre erã ya dipuwaja moagucumi.

Goãmũ muapũre beyeñumi ĩgu taumorãre, arĩ gojañumi Pablo

¹³ Acawererã, mari Opũ mahirã, matague ta Goãmũ muapũre dederebonirãre ĩgu taumorãre beyepũ muare. Mua Espĩritu Santo itamuri mera ñeri mariro mua árĩmorã sãre beyepũ. Mua ĩgu yare peemorã árĩmorãre beyepũ. Eropirã ĩgu muare beyerare guñarã Goãmure serẽrã “Õhaa,” arĩnigũicãro gahmea guare. ¹⁴ Eropigu iri õari buherire gua buhera mera Goãmũ muare ĩgu yarã árĩcũ iimi mari Opũ Jesucristo ĩgu õari oparire mua sã opaboro dopa.

¹⁵ Eropirã õaro guñaturarã árĩque mua. Eropirã gua wereniguiiri mera gua gojabeorapũri mera iri buherire õaro guñaque mua. Eropirã iri buherire tarinũgabiricãque. ¹⁶ Mari Opũ Jesucristo ĩgu basi Goãmũ mari Pagũ mera marire mahigu, umuri nucũ marire mucubiricũ iimi. Marire mahigu peamegue wabonirãre taugucumi marire. Eropirã Goãmũ ĩgu tauborore õaro masi mucubiria mari. ¹⁷ Eropigu Jesucristo mari Pagũ mera muare siporã turanigũicũ iiporo. Eropigu mua ĩgu yare duhubiricũ iiporo. Árĩpehreri õari iirire õari wereniguiiri sãre muare iicũ iiporo.

3

Gua ya árĩburire Goãmure serẽbasaque, arĩ gojañumi Pablo

¹ Acawererã, dohpague gua ya árĩburire Goãmure serẽbasaque. Mari Opũ buheri cãhmotaro mariro bajarã masare buheburire serẽbasaque. Eropirã ìgu buherire mua òaro gamediro dopa ta gajirã bajarãpũ iri buherire umupeori mera erã gameboro dopa serẽbasaque mua Goãmure. ² Gajirã Jesure umupeobeama. Eropirã erã Jesure umupeobirã ñerã masa guare erã ñero iidiarire Goãmure serẽbasaque guare ìgu itamuboro dopa. ³ Mari Opũ òagu ìgu werediro dopa ta iimurimi ìgu. Eropigu muare ìgure umupeocũ iigucumi. Eropigu mua ñero iibiriburire ìgu muare cãhmotagucumi. ⁴ Ìgu muare ìgu eropa cãhmotarare masia gua. Eropirã muare gua dorediro dopa ta iiaa mua. Eropirã irire iirãca daja muraro ta. Iri sãre masia gua. ⁵ Eropigu mari Opũ Goãmũ ìgu muare mahirire muare masicũ iiporo. Eropigu Cristo ñero taririsubu ìgu sĩporã turadiro dopa ta mua sãre sĩporã turaniguicũ iiporo mari Opũ.

Marire turaro mohmero gahmea, arĩ gojañumi Pablo

⁶ Jesucristo mari Opũ ìgu dorero mera òpa dorea muare: Mua Jesu yarã mera majarã mohmediabirãre gua dorerire iibirãre wapicubiricãro gahmea. Eropa ìacãque erãre. ⁷ Sohõ árĩrasubu mua mera gua árĩrasubure gua turaro mohmecũ ìabu mua. Eropirã gua iidiro dopa ta mua sãre mohmero gahmea. Mua basi irire òaro masia. ⁸ Eropirã mua barire waja mariro ne babirabu. Eropirã umuri nucũ, ñamiri sãre burigã mohmemurabu gua muare barire serẽri arĩrã. ⁹ Gua muare buhera waja muare wajayedoreboaya gua. Wajayedorebirã gua basi burigã mohmeabu mua guare ìhacũburire. ¹⁰ Mua mera árĩrasubu òpa arĩ buheabu muare: “Mohmebigũ babiricãporo,” arĩ buhemurabu gua muare. ¹¹ Yujurãyeri mua mera majarã ne mohmebirañorã. Eropirã gajirãre serẽrã garibotariañorã erã. ¹² Eropirã mohmediabirãre mari Opũ Jesucristo dorero mera òpa arãa: “Erã yare ìha erã basi mohmeporo erã baburire,” arãa yuhũ.

¹³ Gua acawererã, muapu òarire iiniguirã gariborebiricãque. ¹⁴ Eropirã ero majarã yujugu ire gua gojabeo dorerare tarinugacũ ìha masi ìgure wapicubiricãque. Ìgu ñero iira mera ìgu guhyasiuro pepiboro dopa ìgure wapicubiricãque. ¹⁵ Ìgure wapicubiriquererã ìgure ìhaturibiricãro gahmea. Ìgu mua acaweregu Jesu yagu ta àhrimi. Eropirã ìgu tarinugagure òaro wereque ìgure ìgu dipaturi irire iibirimaja òaro dopa.

Pablo gojatuñumi

¹⁶ Mari Opũ marire òaro árĩcũ ìgu mera umuri nucũ òaro árĩque mua. Eropigu “Mari Opũ mua árĩpehrerã mera árĩporo,” arĩgu muare òadorea.

¹⁷ Dohpaguere yũ basi ta gojatugu iiaa. Eropigu muare òadorea. Árĩpehreri pũrire yũ gojabeori pũrire òpa ta arĩ gojatuhaa yuhũ. Eropa gojatura puhru yũ basi iripũre arĩ gojagu árĩcũ masirãca mua. ¹⁸ Mari Opũ Jesucristo ìgu mahiri mera burigã òadorea muare árĩpehrerãre. Eropa ta árĩniguicãporo. Iripẽta àhraa.

1 Timoteo

Pablo Timoteore gojabeopu

¹ Yuhu Pablo mure Timoteore ire gojabeogu iiaa. Goamu marire peamegue wabonirare taudigu ahrimi. Jesucristo yare buhedoregu igu apidigu ahraa yuhu. Mari Pagu Jesu mera igu dorediro dopa igu apidigu ahraa. Jesu ta marire itamumi. Eropira marire igu tauborore masira irire mucubiri cohrea mari. ² Yuhu mure Jesucristo yare buhecū peegu Jesure umupeonugabu. Eropigu muhu diaye ta yu magu iro dopa arigu ta ahraa. Eropigu Goamu mari Pagu mera, mari Opu Jesucristo mera oadore mure. Eropigu igu itamuri mera oaro arigu muhu.

Pablo guya buherire buhedorebiripū

³ Sohō arirasubure Macedonia yebague wagu mure Efeso macague api tari wahgabu. Ero yujurayeri gaji buherire guya buherā arīma. Iri buherire buhedorebiribure apibu yuhu mure. ⁴ Erā guyarā erā gamero buhemaacāma. Erā acawererā iribojegue majarā erā arī bocarare eropa buheniguicāma. Iri buheri mera gajirāre dūyasocū iima. Eropira Goamu igu dorerare gajirāre iicū iibeama erā eropa buherā. “Goamu yure itamugucumi,” arī umupeorā igu dorerare iima. Eropigu erā gamero buhedorebiribure apibu yuhu mure.

⁵ Goamu opa gahmeme. Ńeri dipuwaja mariri mera, ōari guñari mera, diaye Jesucristore umupeori mera, gajirāre mari mahi umupeoburire gahmeme. Irire erā iiboro dopa apibu mure. ⁶ Erā yujurayeri i ōari buheripure cóātuha gaji buheripure gahmema daja. Eropira iri buheripure dayaso gorowerema. Iri erā buheri erā game dūyasori duhpiburi arībeaa. ⁷ Erā Moise dorerire masare buherā arīdiaquererā ta erā basi ne ōaro masibeama. Eropira guhyadiaro mera buhequererā erā buherire ne masibeama erā.

⁸ Moise dorerire diaye ta mari buhecū ōari doreri ahraa. Irire mari ōaro masia. ⁹ Iri dorerire buherā ire masiro gahmea: Iri doreri ōaro iirāre erāre buheburi arībeaa. Ńero iirāpūre erāre buheburi ahraa. Ōpa ta iirāre buheburi ahraa: Dorerire tarinugarāre, Goamure tarinugarāre, Ńeri dihtare iirāre, Goamure gamebirāre, Ńero werenigui corerāre, erā pagu sumarāre wejērāre, erā pago sā nomere wejērāre, gajirā masare wejērāre, ¹⁰ nome mera Ńero iirāre, ūma mera Ńero iirā nomere, ūma seyaro Ńero iirāre, nome seyaro arīiquererā Ńero iirāre, masa porāre yaja duarāre, guyaricūrāre, Moise dorerire erāre buheburi ahraa ii. Eropiro gajirā arīpehrerāre ōari buherire tarinugarāre buheburi ahraa Goamu igu doreri. ¹¹ Goamu ōagu igu ōari buheri mera iri Ńeri iirare cóādoremi. Iri buheripure yure Goamu buhedoremi.

Goamu igu marire mojomoro iarire werepu Pablo

¹² Eropa yu buhecū, Jesucristo mari Opu turarire igu ogu itamumi. “Pablo ōaro buhegucumi yahare,” arī pepiñumi Jesu yure. Eropigu yure beyeguge ta igure itamubure apimi yure. Igu eropa iicū “Ōhaa,” arāa yuhu igure. ¹³ Iribojegue yu Jesucristore Ńero wereniguiquerecū ta, igu yarāre Ńero iiquerēcū ta igu yure beyemi. Eropigu igure masinibigu igu yarāre Ńero iigu “Ńero iigu iica,” arī pepibirimūricarabu. Yu eropa

masibiricũ ãgũ ãgũmojomoro ãami yũre. ¹⁴ Eropigu Goãmu mari Opũ yũre burigã mahigu ðaro iimi yũre. Eropigu Jesucristore umupeocũ iimi ãgũ yũre. Eropigu ãgũre masa sãre mahicũ iimi yũre.

¹⁵ Yũ gajirã tauro ñetariagu áriřibu. Ñerã mari áriřuerẽcũ ta Jesucristo mari ñerire cõabu i yebaguere erami. Marire peamegue wabonirãre taubu erami. Iri diaye ta áhrra. ãgũ eropa áriřũ áricũ áriřehrerã irire masiporo. ¹⁶ Ñetariagu yũ áriřuerẽcũ ta ãgũ yũremojomoro ãami. Eropamojomoro ãagũ Jesucristo guaro mariro, ãgũ yũre ðaro iirare masicũ iigũ iimi. Pũhrũ ãgũre umupeomorã erã sã ãgũ ðaromojomoro ãaburire erã masiboro dopa ðaro iimi yũre. ãgũre eropa umupeorã áriřehrerinũri umaroguere eropa ðaro áriřniguicãrãcoma. ¹⁷ Goãmu áriřehrerinũri masa tauro opũ áhrimi. ãgũ ne siribeamĩ. Mari mera ãgũ áriřuerẽcũ ta ãgũre ãabeaa mari. Eropigu ãgũ dihta Goãmu gohra áhrimi. Eropirã “Diaye ta ðagu, turagu áhrimi ãgũ,” arĩrã ãgũre. Umuri nucũ ãgũre umupeorã. Eropa ta iirã.

¹⁸ Timoteo yũ magũ iro dopa ta áhrra muhũ. Eropigu dohpaguere ire mũre dorea. Jesu yarã Goãmu ya weremũhtarã erã mũre werediropa ta mũre dorea. Cristo yare ðaro wereniguique. Eropigu ñero tariqueregu ta ãgũre umupeo duhubiricãque muhũ. ¹⁹ Jesure eropa umupeoniguicãque. Ñeri dipuwaja mariro áriřue. Eropigu ðari dihtare iique. Yujurãyeri irire iibirã Jesu yare erã cohãma. Eropa cõarã ãgũre umupeo duhucãma. ²⁰ Eropa ta iiaama Himeneo, Alejandro mera. Eropigu “Wafi ãgũ gamero erãre iiporo,” arĩgũ eropa apicãbu erãre Goãmure erã ñero wereniginemobiriboro dopa.

2

Goãmure serẽbasarire werepu Pablo

¹ Dohpaguere õpa arĩ doremũhtaa mũare: Áriřehrerã ya áriřburire Goãmure serẽbasaque. Eropa serẽrã “Õhaa,” arĩque Goãmure. ² Oparã, gajirã masa tauro dorerã sãre, erã ðaro doreburire Goãmure serẽbasaque erãre mari ðaro áriřicũ áriřboro dopa. Eropirã gamequeãro mariro ñeri marirã Goãmure umupeorã mari ðaro áriřboro dopa erãre serẽbasaque. ³⁻⁴ Eropa ta gajirã ya áriřburi sãre mari Goãmure serẽbasacũ ðapũricãa. Irire mari iicũ ãgũ Goãmu marire taubupu marire ðaro ãhasuami. Áriřehrerã masa peamegue wabonirãre ãgũ taumorã dihta áricũ gahmemi Goãmu. Eropigu ðari buherire diaye majare erã masicũ gahmemi ãgũ. Eropigu gajirã ya áriřburire mari ãgũre serẽbasacũ mucubirimi Goãmu. ⁵ Yujugu ta áhrimi Goãmu. Eropigu Goãmu mera mari ðaro áricũ amubasagu yujugu ta áhrimi. ãgũ áhrimi Jesucristo. Jesucristo sã masu ta áhrimi. ⁶ Eropigu áriřehrerã erã ñeri iira dipuwajare wajayebasadigu áriřmi ãgũ crusague siriđigu. Eropigu Goãmu ãgũ queorasubu masare ire masicũ iimi. ⁷ Masa masicũ iibure ãgũ yare werebure irire Goãmu yũre apimi. Eropigu judio masa áriřbirãre Jesure umupeoburire ðari buherire buhebure beyemi yũre. Diaye ta mũre weregu iiaa yũhũ. Guyabeaa.

⁸ Áriřehrero majarãpu Goãmu yare ðaro iirã Goãmure erã serẽcũ gahmea. Eropa Goãmure serẽrã erã guaro mariro, game duyasoro mariro erã áricũ gahmea. ⁹⁻¹⁰ Nomepure Jesu yarã erã ðaro áriřicũre iicũ gahmea. Eropirã queoro erã ejatuharo suhri sañarã áriřoro. Eropirã

gajiropa bejari poaricu “Yuhu ðago áhrra,” arí íhmubiricãporo. Eropirã ðari dari oro dari waja pagari býarire, ðari suhri waja pagari suhri sañarire guñabiricãporo. Eropirã ðaro erã iira mera, erã ðarã nome Jesu yarã nome erã árĩrere ii íhmuporo. ¹¹ Ejarimarino umupeori mera peerã ðari buherire peeporo erã nome. ¹²⁻¹⁴ Eropirã nome mua gamenererogue umare buhebiricãporo. Eropirã umare dorebiricãporo. Erã nomepu ejarimarirã nome árĩporo. Goãmu Adánre íhacúnugumuhtañumi. Ígu puhru Evare íhacúnuguñumi. Eropigu watí ígu guyacũ peedigu Adán árĩbirĩñumi. Ígu guyacũ peedigopu Eva árĩñumo. Eropa ígu guyacũ peego Goãmure tarinugago wañumo igo. Eropirã nomepu umare dorebiricãporo. ¹⁵ Nomeo árĩmuhtadigo igo tarinugaquerẽ ta nome erã porãre ðaro opacũ íagu erãre Goãmu peamegue wabonirãre taugacumi. Eropirã nomepu Goãmure erã umupeoniguicãcũ, Goãmu erãre itamugacumi. Eropigu masare Goãmu sãre erã mahiniguicũ pee masirã nome erã árĩniguicũ Goãmu itamugacumi erãre.

3

Jesu yarã tauro oparã erã iiburire werepu Pablo

¹ Jesu yarã doregu árĩdiagu ðarire iidiagu áhrimi ígu. Iri diaye ta áhrra. Eropigu Jesu yarã doregure apigu òpa árĩgupure beyeque. ² Dipuwaja marigure beyeque. Eropirã gajirã ígure weresã masiya mara. Eropigu yujugore ta marapocugu árĩgure beyeque. Eropigu ðaro pee masigure, guhyadiagure, masare ðaro mera ígu wihire ñajaridoregure, gajirãre ðaro buhemehregure beyeque mua. ³ Eropa beyegu ne merebigure, gamequeãbigure, masare ðaro iigure, game duyasobigure, niyerure gamebigure beyeque. ⁴ Ígu porãre ígu marapo sãre ígure umupeori mera erã yuhrirã árĩcũ iigure beyeque Jesu yarãre dorebure. ⁵ Ígu porãre ígu marapo sãre ðaro yuhricũ iimasibigu árĩgu Goãmu yarã sãre ðaro yuhricũ iimasibiribocumi. ⁶ Jesu yarã opu árĩbure beyegu ne Jesu yagu ñajagure beyebita. Ne ñajagure beyecũ ígu “Jesu yarãre tauro áhrra yuhu,” arí pepibocumi. Ígu eropa arí pepicũ Goãmu ígure dipuwaja moadorebocumi watire ígu iidiro dopa ta. Watí Goãmu tauro árĩdiari waja Goãmu ígure dipuwaja moapu. Eropigu ne Jesure umupeogu árĩgure beyebita. ⁷ Jesu yarã doregure beyegu Jesu yarã árĩbirã “Óagu áhrimi,” erã arĩgu dihtare beyeque erã ígure werewuabiriborore. Óaro iigu ígu árĩbiricũ íarã gajirã ígure werewuabocoma. Eropigu ígu watí gamero dopa ta iigu árĩbocumi.

Jesu yarãre itamurã díaconoare erã iiburire werepu Pablo

⁸ Eropirã Jesu yarãre itamurãpũre beyerã ðarã árĩrã sãre beyeque. Erã guhyadiaro árĩrãre, ðaro diaye ta wereniguirãre, merebirãre, niyerure gamebirãre beyeque muhu. ⁹ Eropa ta Jesucristore ðaro umupeorã “Goãmu yare ðaro diaye ta áhrra,” arĩrã árĩrãre beyeque. ¹⁰ Eropirã Jesu yarãre itamurã árĩdiarãre erã iirare íamuhtaque mua. Mua eropa íara puhru erãpu dipuwaja marirã árĩrã Jesu yarãre itamurã ñajaporo erã. ¹¹ Eropirã erã marasã nomepu òpa árĩporo: Pee masirã nome, ñeri quere iibirã nome, guhyadiarã nome árĩporo erã nome sã. Eropirã árĩpehreri ðarire iiniguirã nome árĩporo erã nome. ¹² Eropirã Jesu yarãre itamurãre beyerã yujurãyeri nome ta marapocurã árĩrãre beyeque. Erã porãre gajirã erã ya wihí majarã sãre ðaro íhadiburã árĩrãre beyeque. ¹³ Mu eropa

beyenirā Jesu yarāre ōaro erā itamucū gajirā erāre ōaro ihasuarācoma. Eropirā ōari buherire, Jesucristore erā umupeoburi sāre gūiro mariro buherācoma erā.

Goāmū ya buherire werepū Pablo

¹⁴⁻¹⁵ Dohpaguere mū pohrogue wadiagu iraa. Eropa wadiaqueregū dohpaguere wanibigu ipū mera mure were gojabeogū iiaa. Jesu yarā gamenererā watopē mūa dohpa iiborore mure were gojabeogū iiaa, “Dohparagāre wabiriboca,” arīgū. Jesu yarā Goāmū ojocarīgū yarā āhrima. Īgū yarā diaye árīri buherire Goāmū ya buherire ōaro opama. Eropa oparā irire buheniguima. ¹⁶ I diaye āhraa. Marire Goāmū Īgū buhera mari ōaro iiburi buheri āhraa. Goāmū iri buherire marire masicū imi. Iribojegue mari masibirira mura ōatariari buheri āhraa. I buheri ōpa āhraa:

Īgū Cristo mari dupū iro dopa ta dupucūgū masa dehyoadigū árīmi. Ōagū ñeri marīgū Īgū árīcū ĩhmudi árīmi Espírītu Santopū. Anyua sā ĩgure ĩanirā árīma. Eropirā gūa Īgū buhedore apinirā gajī yeba majarāre Īgū yare buhebu. Eropirā i yebare masa bajarā ĩgure umupeoama. Pūhrū umarogue Goāmū aĩadi árīmi ĩgure. Iri ta āhraa ōari buheri.

4

Ōari buherire cóarācoma arī werepū Pablo Timoteore

¹ Espírītu Santo ire ōaro weremi: Pehrerinū coregā yujurāyeri masa Jesu ya buherire cóarācoma. Eropirā gūyari buheripūre wafī yare buherāpūre peenūrūrācoma erā. ² Iri buherire buherā gūyaniguirā wererācoma masare. Erā gūyaniguirāpū “Gūa tamerare dipuwaja mara,” arī pepirā árīrācoma. Erā ñero iirapūre ne guñasome. ³ Ōpa arī buherācoma erā: “Marapocubiricāque. I barire babiricāque,” arī buherācoma erā. Erā eropa badorebiriqūrecū ta Goāmū barire ĩhacūnugudi árīmi mari baburire apīgū. Mari Cristore umupeorā árīcū ōari buherire mari masirā árīcū, mari ya árīburire ōarire iri barire apipū ĩgū. Iri barire oparā ĩgure “Ōhaa,” mari arīcū gahmemi ĩgū. ⁴ Árīpehreri Goāmū ĩgū ĩhacūnugura ōari āhraa. Eropirā ĩgū ĩhacūnugurare barire aĩrā. Goāmūre “Ōhaa,” arīrā, “Irire basome,” arībiricāro gahmea. Iri barire basuaro gahmea marire. Eropirā “Irire babiricāque,” gajirā erā arīcū peebiricāque erāre. ⁵ Īgū ĩhacūnugura iri ōari árīcū weretuhapū Goāmū. Eropirā ĩgure “Ōhaa,” mari arīra pūhrū “Iri bari ōari bari āhraa,” arī baro gahmea marire.

Jesu pohro majagū ōagūre werepū Pablo Timoteore

⁶ I yū wererare diaye majare Jesu yarāre buhegū Jesucristo pohro majagū ōagū āhraa mūhū. Eropa buhegū ōari buherire peenūrūgū árīgūca. Ōaro mū peerare peenūrū masipehogū árīgūca mūhū. ⁷ Eropīgū eropa erā arī bocarare, Goāmū ya maja árībirirare peebiricāque. Eropīgū Goāmū gameri dihtare iniguicāgū árīque mūhū. ⁸ Mū mohmepocū ōañaria. Mū mohmepodiro tauro Goāmū gamerire mū ĩpocū ōataria mure. Goāmū gamerire ĩpogū dohpaguere ōaro āhraa mūhū. Eropīgū mū sīrira pūhrūgū sāre masa mūriagu ōaro árīgūca mūhū. Eropīgū Goāmū gamerire iniguicāque. ⁹ Iri diaye ta āhraa. Árīpehrerā irire yū arīrare

masirā, “Diaye ta āhraa,” arīro gahmea erāre. ¹⁰ Eropigu árīpehrerā yu arīrare masirā “Diaye ta āhraa,” erā arīburire Goāmū gahmemi. Eropirā erā eropa iiburire mari turaro mohmea. Eropirā űero taria mari gajirā marire űero erā iicū. Goāmū ojocarigu árīpehrerāre peamegue wabonirāre taugu āhrimi. Īgure umupeorā tamerare Īgu taumi. Goāmū marire űaro iiburire masirā ĩgure mucubirirā iiaa. Eropa mucubirirā Goāmū gameripure masa iiburire burigā buhe mohmea mari.

¹¹ Iri árīpehreri yu arīrare doreque Jesu yarāre. Eropigu irire buheque muhu. ¹² Mamū mu árīcū ĩarā gajirā Jesu yarā mre peediabiribocoma. Erā mre peeboro dopa űpa ii ĩhuque erāre: Masare mahique. Eropigu Jesure umupeoturanigūicāque. Eropa árīgu dipuwaja marigū árīque. Mamū árīqueregu ta mu irire iicū ĩarā mre peerācoma erā. Eropirā mu wereniguirire peerā, mu iirare ĩarā mre ĩhacūrācoma. ¹³ Eropigu mu pohrogue yu ejaboro core űpa ii űaro mohmeyuque. Jesu yarā gamenererāre Goāmū yare gojarapure buhe ĩhuque erāre. Eropigu erāre irire buhetuha werenemoque daja. Eropigu erāre űaro masinemocū iique. ¹⁴ Ero core Jesu yarā oparā Goāmū dorecū erāpu mu weca erā mojotorire duhpeoma. Erā mre eropa duhpeocū Goāmū ĩgu turarire odi árīmi mre. Eropigu Goāmū ya árīburire mu mohmemasiburire apidigu árīmi mre Goāmū. Īgu mre eropa mohmemasiburire apirare cādijibita.

¹⁵ Yu eropa wererare guña eropa iinigūicāque muhu. Mu eropiira puhru űarire mu iinemocū árīpehrerā ĩarācoma. ¹⁶ Mupū űaro iique. Eropigu űaro buheque muhu gajiroga buheri arīgu. Muhu eropiigu ĩgu taudigu árīgu Goāmū mera árīnigūicāgūca. Eropirā mre peenirā sā ĩgu taunirā árīrā Goāmū pohro árīrācoma.

5

“Jesu yarāre űpa iique muhu,” arīpu Pablo Timoteore

¹ Ne bugure turibiricāque. Mu pagure mu űaro iidiro dopa ta, bugu sāre űaro mera wereque. Eropigu mu pagu porāre mu űaro iidiro dopa ta, mamarā sāre űaro umupeori mera erāre wereque. ² Eropigu mu pagore mu űaro iidiro dopa ta murā nome sāre űaro umupeori mera wereque. Eropigu mu pagu porā nomere mu űaro iidiro dopa ta, nōme sāre űero űaribejaro mariro űaro umupeori mera wereque erāre.

³ Eropigu wapeweyarā nomere diaye ta mojomorocurā nomere umupeori mera itamuque erā nome sāre. ⁴ Wapeweyo porācūgo igo árīcū pāramerācūgo igo árīcū sāre, erāpu igore itamuporo erā masura waja. Eropa itamurā Goāmū masare erā acawererāre ĩgu itamudorediro dopa ta ĩirā iima erā. Erā eropīcū ĩagu űaro Goāmū mucubirimi. ⁵ Mojomorocūgo wapeweyo acawererā moogo árīgo, Goāmū igore itamuburire cohremo igoa. Eropigo űamiri nucu, umuri nucu igo Goāmūre eropa serēnigūicāmo. ⁶ Gajigopu wapeweyo árīgo eropa iimaacāgo árīgo ojocarigo árīquerego igo siporā dederebo sīridigo iro dopa ta iimo. ⁷ Eropigu i árīpehreri yu werera wapeweyo itamuburire Jesu yarāre iidoreque muhu. űpa wereque erāre űari dihtare erā iiburire gajirā erāre werewuabiriburire. ⁸ Eropigu yujugu ĩgu acawererāre ĩhadibubigu, ĩgu porā erā pagu sāre űaro ĩhadibubigu “Jesu yagu āhraa,” arīmasibeami. Goāmū dorediro dopa iibeami. Eropigu Goāmū ya buherire yuhribigu āhrimi. Jesure gamebirā tauro űetariagu āhrimi ĩguru.

⁹ Wapeweyarã nome mua itamumorã áricũ erã waïre gojaturãca. Mua eropa gojaturã òpa árirãre erã waïre gojatuque. Sesenta bojori ejabigo igo waïre gojatubiricãque. Eropirã wapeweyo yujugu ta marapucãdigore gojatuque. ¹⁰ “Igo òarire iigo àhrimo,” masa erã arìgore gojatuque. Eropirã igo porãre òaro masugo arìdigore gojatuque. Eropirã igo ya wi-hire gajirãre òaro mera ñajaridoregore gojatuque. Eropirã pohro majago iro dopa Jesu yarãre itamugore ñero tarirãre itamugore, arìpehrerãre mojomoro ìagore, òari dihtare iidiagore gojatuque. Eropa árirãre ìagu iripũ ta erã waïre gojatuque mua erã mua itamumorã árìborore.

¹¹ Wapeweyarã nóme, nómeñari erã áricũ erã waïre gojatubiricãque erã Jesu yarãre itamumorãre. Puhru erã waïre mua gojatura puhru erã gamero iidiarã Cristo yare duhu, dipaturi mojoto diribocoma. ¹² Eropirã erã mojoto dirirã Cristore “Mu yarãre itamugora,” erã arìdirore iibiribocoma. Erã eropa iibirira dipuwaja dipuwajacurãcoma. ¹³ Erã nómeñari eropa itamura árirã tericurã nome wahama. Eropirã wirigue ñajacurirã ñeri querere werenigui curima. Erã weredorebirare werema erã nome. ¹⁴ Eropirã erã Jesu yarãre itamumorã ñajabiricãporo. Eropigu erã òpa iicũ gahmea yuhu: Wapeweyarã nome, nómeñari árirã mojoto diriporo daja. Eropirã erã porãcũporo. Eropirã erã ya wihi majare òaro ìhadibuporo. Erã nome wapeweyarã nome eropa ta iicũ marire Jesu yarãre ìhaturirã “Ñerire iirã iima,” arìmasibeama marire. ¹⁵ Dohpague tamerare yujurãyeri nome wapeweyarã nome Cristo yare duhu watì gameripure iinugatuhama. Eropigu òpa werea mure.

¹⁶ Jesu yarã erã acawerego wapeweyo igo áricũ erã igo acawererãpũ igore itamuporo. Gajirã Jesu yarãpũre igore itamudorebiricãporo. Eropirã erã Jesu yarã igore acawererã opagore itamubirã, gajirã nome wapeweyarã nomepare itamumasima.

¹⁷ Jesu yarã oparãre erã mohmerire erã òaro iicũ ìarã umupeoque erãre. Eropirã òaro wajayeque. Yujurãyeri mua mera majarã Goãmũ yare wererã muare buherã sã àhrima. Erã tamerare tauro umupeo wajayeque. ¹⁸ Goãmũ yare erã gojarapũgure mohmegure mua wajayeborore òpa werea: “Wecu trigo yerire cãhratãcũ ìgu disirore cãhmotabiricãque. ìgu gamero baporo,” arì gojañorã. Eropiro gajipũ òpa arãa: “Mohmegure ìgu mohmeri wajare oro gahmea,” arãa Goãmũ yare erã gojarapũgure. Goãmũ ya gojarapũ eropa arìcũ peerã oparãre òaro umupeoque mua. Eropirã òaro wajayeque erãre.

¹⁹ Jesu yarã mera majagu opãre yujugu ta ìgure weresãcũ peebiricãque. “Opũ ìgu òpa ñeri iirare ìabu,” perã o urerã arì weresãra puhru peeque. ²⁰ Eropa peerã ìgu ñero iira arìcũ ìatuhaja Jesu yarã gamenererogue turique ìgure, gajirã ìgure ìha masi gũiporo arìrã.

²¹ Eropigu Goãmũ Jesucristo ìgu beyerã anyua erã ìhabeoro ire dorea mure. Dohpague ya mure dorerare ìpehoque. Eropa iigu gajigure gajiropa, gajigu sãre gajiropa iibiricãque. Yujuropa ta iique arìpehrerãre Jesu yarãre. ²² Gajirãre Goãmũ mohmerire mu beyemorãre erã weca mu mojotorire duhpeoboro core òaro ìaque muhu ìha masiri mera yojaro mariro. Ñerire iirã árìbocoma. Eropigu mu erãre beyera puhru erã ñerire iicũ erã ñeri iira dipuwaja opagũca mu sã. Eropigu erãre beyeboro core erã árìricurire òaro masique. Eropigu arìpehreri ñeri mariro arìque muhu.

²³ Bajasuburi paru pũrisũgu àhraa muhu. Eropigu dohpaguere deco dihtare ihrigu arìgu, merogã vino sãre ihrigue muhu ococũgu.

²⁴ Yujurāyeri erā ñerire iicū mari ihaa. Eropirā Goāmū erāre dipuwaja moaborore masia mari. Gajirāpure erā ñeri iirare mari iha masibeaa. Puhru erā ñeri iirare masirāca Goāmū dipuwaja moarinū áricū. ²⁵ Eropa ta yujurāyeri óarire erā iirare masia mari. Gajirā erā óarire erā iirare dohpaguere masibiriquererā ta puhru masirāca mari. Mari iabirirare áripehrerā erā iirare puhru iri dehyoacū iaráca.

6

¹ Pohro majarā Jesu yarāpu erā oparāre óaro umupeoporo. Erā eropa umupeocū iará gajirā Goāmure mari arī buheri säre ñero werewamasibeama. ² Erā oparā Jesu yarā áricū iará erā pohro majarāpu gua oparā sã Jesu yarā ta áhrima. Eropirā “Erāre umupeobiricū óaroca,” arībocoma. Eropa iibiricāro gahmea. Erā oparā Jesu yarā árirā erā mahirā yujugū porā iro dopa áhrima. Eropirā erā tamerare turaro itamuporo.

Goāmure umupeori säre, óaro árirī säre werepu Pablo

³ I ya wererare buheque. Eropigu ire doreque. Gajiropa áririre guyarire buherā mari Opū Jesucristo ya buherire umupeobeama. Erā Goāmure umupeori buherire gamebirā ópa iirā áhrima. ⁴ “Masipehogū áhraa,” arīquererā ta diaye majare ne masibeama. Eropirā pee masibirā iro dopa ta turaro game dūyasodiama erā. Eropirā Goāmū yare arīmaacāa dūyasorā áhrima. Eropa dūyasorā, game ihatirirā wahama. Eropirā gajirāre ñero quere moamasibiriquererā masare ñero arī pepima erā. ⁵ Eropirā erā ñeri dihtare pepinigurā, diaye áririre ne masibirā eropa dūyasoniguicāma. Eropirā “Goāmū yare buherā niyerure wajatarāca,” arī pepirima. Erā eropa árirāre wapicubiricāro gahmea. ⁶ Mari ya mari oparī mera mucubirirā Goāmure umupeorā diaye ta wajatarā ta iiaa. ⁷ I yebaguere masa dehyoarā ne gajinore aīgāribiribū mari. Eropirā mari sirirā warā ne gajinore aīgāmasibeaa mari daja. Eropirā mua oparī mera dihta mucubirique. ⁸ Eropirā mari barire, mari suhri säre oparā, gajire gamenemobiricārā. Iri nūcū mera ta mucubiricārā mari. ⁹ Niyerure gamerā doberi wuaro oparā árdiarā watī ñerire iġu iidorerire áripehreri ñerire iirā arībocoma. Eropirā erā bajasuburi pee masibirā iro dopa ta gajinore gametarirā, ñeri uaribejari duhubirā, erā basi ta ñero tarima. Eropa dedererā wacārā iima. ¹⁰ Niyerure gametarirā áripehreri ñerire iinūgama masa. Yujurāyeri niyerure gametarirā, Jesure umupeo duhura puhru bajasuburi erā ñero iira waja turaro bujawerema erā. Eropirā mari opariñepē ta mucubiro gahmea marire.

Goāmū ya áriburire iiboro dopa ñerire tarinūgaque, arī gojañumi Pablo

¹¹ Mū tamera Goāmū yagu ta áhraa. Eropigu i ñerire iibiricāro gahmea. Eropigu óaripure gameque. Goāmū yare iique. Eropa iġu Jesure “Diaye iġu áhrimi,” arī umupeoque. Eropigu gajirāre mahiique. Ñero tariqueregu ta bocatūique. Nijiyajagu áriique masa mera. Eropigu gajirāre tarinūgadiagu arībiricāque. ¹² Iġu mera áripehrerinuri mū óaro árinūguicāburire Goāmū beyemi mure. Eropigu Jesucristore mū umupeorire bajarā masare óaro werebū mūhū. Eropigu ñero tariqueregu ta iġure umupeo iġu yare duhubita umarogue iġu mera eropa mū árinūguicāboro dopa. ¹³ Goāmū áripehrerāre áripehrerire áricū iġu áhrimi. Jesucristopū Poncio Pilatore Goāmū yare óaro werepu. Eropigu Goāmū Jesucristo sã erā iħabeoro ire mure iidoregara: ¹⁴ Mure Goāmū

Īġu dorerare iipehocāque. Jesucristo Īġu dujariboro core ñeri mariro, dipuwaja mariro Īġu dorero dopa ta iinigucāque. ¹⁵ Īġu queoranu árĭcū Goāmu Cristore dujaricū iigucumi. Goāmupu ōagu Īġu dihta masare doregu āhrimi. Eropiġu árĭpehrerā gajirā oparā erā tauro opu árĭġu āhrimi. ¹⁶ Eropiġu Īġu dihta ne sĭribiġu āhrimi. Īġu gosesiriri mera árĭġu āhrimi. Eropirā masa Īġu gosesirirogue ejamasibeama. Eropiġu masa erā ne ĭabiġu āhrimi. Eropirā dohpague säre Īġure ĭabeama. Īġu eropa árĭġure umupeorā. Eropirā árĭpehrerinari “Turagu āhrimi Īġu,” arĭrā Īġure. Eropa ta iirā.

¹⁷ Eropiġu i yeba majarāre doberi oparāre ōpa arĭ doreque muhu: “Gajirāre tarinugaa yuhu,” ne arĭ pepibiricāporo. Erā doberi erā opari pehrea waroca. Eropirā “Yuhu wuaro opari mera ōaro árĭġuca,” arĭ pepiporo. Árĭpehreri diaye ta mari gameripure oġu āhrimi Īġu Goāmu. Īġupure umupeoturaporo erā doberi oparā. ¹⁸ Eropirā erā ōaripure iiporo ōarire erā iirā árĭboro dopa. Eropirā erā oparire mojomorocurāre orā árĭporo. ¹⁹ Erā eropiicū umusigue Goāmu pohroque erā ya árĭroca. Eroque árĭcū iri ne pehresome. Eropirā erogue ōaro arĭnigucārācoma erā.

Pablo Timoteore doretupu

²⁰ Mahgu, mure Goāmu Īġu apirare Īġu buhedorerare duhubita. Yujurāyeri masa Goāmure gamebirā iro dopa ta guyarire, pee masibirā ya buherire wereniguima. Eropa wereniguirā “Ōaro masirā buheri āhraa,” arĭrima erā. Eropa erā wereniguirire peenururā Cristo ya buheripure cóacāma. ²¹ Gajirā yujurāyeri erā wereniguirire peenururā Cristo ya buheripure cóacāma.

Goāmu Īġu mahiri mera mure turaro ōadorea. Eropa ta arĭnigucāporo. Iripēta āhraa.

2 Timoteo

Pablo Timoteore dipaturi gojabeopu

¹⁻² Mũhu Timoteo yu magu iro dopa ta yu mahigu ahraa. Yũhu Pablo mũre ire gojabeoa. “Árĩpehrerã Jesucristore umupeorã umũsigue ðaro árĩniguicãrãcoma,” arĩ apimi marire Goãmu. Īgu eropa arĩ apirare werebure yare beye apimi Jesucristo Goãmu Īgu gamero dopa ta. Eropigu Goãmu mari Pagu Jesucristo mari Opu mera mũre ðadorea. Eropigu Īgu itamuri mera ðaro árĩque mũhu.

Masare Cristo yare erã wererare werepu Pablo

³ Goãmu mera wereniguigu mũ ya árĩburire serẽniguicãa umuri nũcu. Eropa serẽgu Goãmure “Óhaa,” arãa yũhu. Iribojegue majarã yu acawererã ñeri dipuwaja mariro Īgu Goãmure ta umupeoũuma. Erã umupeodiro dopa ta dohpaguere yu sã Īgu Goãmure ta umupeoa. Īgu Goãmu gohra ta ahrimi yu mũre serẽbasagu. ⁴ Sohõ árĩrasubure yu wacũ mu orenurũsiarare guñaqu mũre turaro ĩadiaca daja mu mera ðaro mucubiridiagu. ⁵ Eropigu Jesure diaye ta mu umupeorire guñaa yũhu. Mũ ñeco bũro Loida, mũ pago Eunice sã Jesure umupeomuhtama mũ core. Eropigu dohpaguere ĩgure mũ umupeocũ ðaro masia yũhu.

⁶ Eropigu ire mũre guñacũ iidiaa. Mũ dipuru weca yu duhpocũ Goãmu ĩgu ya turarire omi mũre. Īgu ya árĩburire mũ mohmemasiburire mũre omi. Iri mohmemasiburi mera mohmeque mũhu. ⁷ Goãmu marire ĩgu Espĩritu Santore omi. Mari mera árĩgu masare marire guicũ iibeami Espĩritu Santo. Eropigu turarã, masare mahirã, pee masirã mari árĩcũ iimi ĩgu. ⁸ Eropigu mari Opu ya árĩburire gajirãre weregu guhyasĩribita mũhu. Yũhu ĩgu yare iicũ ĩha gajirã gamebirã yare peresugue doboma. Peresu yu árĩcũ sãre ĩagu yare guhyasĩrisãbircãque. Mũhu sĩporãguere ñero bujawerebircãque. Óari buherire mũ buheri dipuwaja mũ sã eropa wagu “Óaroca,” arĩ pepique mũ sã. Mũ eropa ñero taricũ ĩagu Goãmu mũre itamugucumi. ⁹ Eropigu Goãmũpu marire peamegue wabonirãre taumi. Eropigu ðarã ĩgu yarã árĩmorãre beyepu ĩgu. “Óarã ahrima erã. Eropigu erãre beyegura,” arĩbiripu marire beyegu. Īgu marire mahigu ta negohraguere marire beyepu ĩgu gamero dopa ta iigu. “Eropigu Jesucristore erãre taubure obeogura,” arĩ beyepu marire. ¹⁰ Eropigu dohpaguere Jesucristore marire taubure obeodigu árĩmi marire diaye ta ĩgu mahirire ĩhmuqu. Eropigu Jesucristo marire taugu marire ĩgu yarãre dederebircũ iimi. Eropa iigu “Yũre umupeorã Goãmu mera ðaro árĩniguicãrãcoma,” arĩgu ðari buherire marire weregu arĩpu ĩgu.

¹¹ Eropigu ĩ ðari buherire werebure ĩgu apimi yure. ¹² Eropa ĩgu yare buhegu árĩgu dohpaguere ñero taria yũhu. Eropa ñero tariqueru ta sĩporã mucubirigu ahraa. Yu guñaturagure Jesure masia yũhu. Turagu ahrimi ĩgu. Eropigu ĩgu yare buhedore apigu ðaro itamugucumi. Eropigu ĩgu yare apirare yure buhe ojogorocũ ĩhadibugucumi yure. “Yũre itamugucumi,” arĩ irire ðaro masigu sĩporã mucubirigu ahraa.

¹³ Mũre yu wererare iipehocãque. Jesucristo mũre ĩgure ðaro umupeocũ iimi. Eropigu ĩgure gajirã sãre ðaro mahicũ iimi mũre. Eropigu

“Diaye āhraa,” arī irire guñaniguicāque mūhū. ¹⁴ Eropigu Espiritu Santo mari mera árīgu ĩgu itamuri mera ōari buherire ōaro buheque. Queoro buheque gajiropa arīro mariro.

¹⁵ Yū peresugue árīcū ĩarā yare cóāgāpehrea wama. Árīpehrerā Asia yeba majarā Jesu yarā yare itamudiabirā cóāgāpehrea wama. Erā mera majarā perā Figelo, Hermógene eropa ta iima erā sã. Erā eropa cóāgārare masituhaca mūhū. ¹⁶⁻¹⁷ Erā eropa cóāquerecū ta Onesiforopū bajasuburi yare itamugū ōaro siñajacū iimi. Eropigu ĩgu yū peresu árīcū ĩgu yare guhyasĩrisābeami. Eropigu Romague eragu yure amaniguicādi árīmi. Eropa amaniguigu yare bocami. Efesogue sãre ĩgu marire itamurare ōaro masia mūhū. ĩgu eropiira waja ĩgu porāre, erā pago sãre mojomoro ĩagucumi mari Opū Jesucristo. Goāmū eropa iiboro dopa ĩgure serēbasaa. ¹⁸ Eropigu i yebague Jesu mari Opū dujaririnū arigu ĩgure mojomoro ĩagucumi. ĩgure eropa iiboro dopa ta serēbasaa Goāmure.

2

Ñero tariqueregū ta Jesu yagure bocatiuro gahmea

¹ Mupū yū magū iro dopa ta Jesucristo ĩgu itamuri mera turagu árīque. ² Eropigu bajarā masare yū buherare mū peerare gajirā sãre wereturiaque mūhū. Erā mū buherā Goāmū gamerire iiniguicārā árīporo. Eropirā gajirāre buheturiarā árīporo erā sã.

³ Surara ñero tarigu ĩgu yujuro bojero dopa ta Jesu yagu árīgu ñero tariqueregū yujuro bojeque. Eropa iigu gajirā Jesu yarā iiro dopa iigu iiaa mūhū. ⁴ Surara ĩgu opū ĩgu doreripure iimi. Eropigu ĩgu surara árībirā erā iiripure iibeami ĩgu. Mū sã eropa ta mari Opū ĩgu dorera dihtare iique. ⁵ Omabiragu erā dorediro dopa queoro iibigu ĩgu omatariara waja wajatabeami. Eropa ta mū sã Goāmū dorediro dopa ta iibigu Goāmū mera wajatasome. ⁶ Eropigu pohere ōaro mohmedigupū ĩgu mohmera waja iri pohe majare aĩmūhtami. Eropa ta mū sã Goāmū yare ōaro mohmera waja Goāmū oburire aĩmūhtaguca. ⁷ Irire ōaro masicū iigucumi Jesu mari Opū mure. Eropigu dohpaguere yū mure arĩdirore ōaro guñaque.

⁸ Jesucristore guñaque. ĩgu opū Davi mure pārami ĩgu árīpū. Eropigu sĩridigu masa muriapū ĩgu. ĩgu eropa sĩri masa muriara marire tauburi buheri ta āhraa. I ōari buherire buhegu iiaa. ⁹ Iri buherire buhegu ñero taria yūhū. Eropirā irire yū buhecū ĩha gajirā gamebirā ñegu iro dopa ta yare dipuwaja moa yare peresugue doboama. Masa yure cāhmotaquererā Goāmū ya ōari buherire cāhmota masiya mara. ¹⁰ Eropigu Goāmū ĩgu beyenirāre buhegu bajasuburi ñero taria yūhū erā Jesucristo yarā erā árīburire. ĩgu yarā árīborore erā peamegue wabonirāpū tauborore ñero tarigu yujuro bojea. Eropigu erā Goāmū mera ōaro árīniguicāborore ñero taria ĩgu yare buhegu.

¹¹ I diaye ta āhraa:

Cristo ya árīburire mari iira dipuwaja gajirā marire wejēquerecū ĩgu mera umāsigue ōaro árīniguicārāca. ¹² Eropirā ĩgu yare mari iira dipuwaja ñero tariquererā ta ĩgu yare duhubirā árīrā ĩgu opū árīroguere ĩgu mera dorerā árīrāca mari sã. “Cristore yū masibea,” mari gajirāre arīcū ĩgu sã marire eropa ta arīgucumi.

13 Īgure mari tarinugacũ ĩagu ĩgu arĩdiro dopa ta marire dipuwaja moagucumi. ĩgu arĩro dopa ta iigu aħrimi ĩgu. Ne guyabeami ĩgu. I arĩpehreri ĩgu werera diaye ta aħraa.

Goãmu ĩgu ĩhasuarãre, ĩgu yare buherãre werepu Pablo Timoteore

14 Ire yu wererare mu mera majarãre masicũ iique. Erã ejatuharo game duyaso wereniguiiri duhpiburi arĩbeaa. Eropirã erãre peerãre ñero wacũ iima. Eropigu mari Opu ĩgu ĩhuro õpa arĩ wereque erãre. "Mũa eropa wereniguiiro dopa wereniguibiricãque," arĩque erãre. 15 Mũpu Goãmu yare õaro buheque. Eropigu Goãmu ya arĩburire turaro iique. Mu eropa iicũ ĩagu "Õaro iibu mũhu," arĩgucumi Goãmu mũre. Eropigu mu buherare ĩgu ĩacũ guhyasĩrisome mũhu. ĩgu buheri diaye aħraa. Eropigu ĩgu buherire õaro masique. Eropigu ire queoro buheque. 16 Erã ejatuharo bu arĩrire wereniguirã ñerire eropa iiniguicãma. Eropigu erã eropa arĩ wereniguirire ĩha gamebiricãque mũhu. 17 Erã wereniguiiri camiro boagãro iro dopa ta aħraa. Erã wereniguiiri gajirã Jesu yarãre ñerã wacũ iiaa. Eropa wereniguirã mera majarã Himeneo, Fileto sã aħrima. 18 Eropirã erã õari buherire cõarã, "Jesu yarã sĩrinirã erã ya dupu mũra masa mũriatuhanirã aħrima," arĩ buhemaacãma. Eropa gajiropa buherã bajamerãgã Jesu yarãre goroweorã iima. 19 Erã eropa ñero buhequerecũ ta, Goãmu ya buheripu ne gohrotobea. ĩgu ya diaye maja arĩro pehrebeaa. Opa arĩ gojara aħraa: "Mari Opu ĩgu yarãre masimi. Eropirã arĩpehrerã 'Jesu yarã aħraa,' arĩrã ñerire duhucãporo," arĩ gojañuma.

20 Jesu yarã watope aħrima Goãmu yare õaro iirã. Gajiropa iirã sã aħrima ñeri buherire wereniguirã. 21 Eropigu yujugu Goãmu ya arĩburire õaro itamudiagu iri ñeri buherire peebiricãporo. Arĩpehreri ñerire duhucãporo. ĩgu eropiigu õagu arĩgu arĩpehreri Goãmu yare õaro iimasimi. Goãmu gamegu õaro arĩgucumi.

22 Eropigu mu mamũ arĩgu mamarã erã ñeri uaribejari iro dopa iibiricãque. Eropigu õarire iique. Jesure umupeoturaniguicãque. Eropigu ĩgure masa sãre mahi umupeoque. Eropigu gamequeãro mariro gajirã mera õaro arĩque mũhu. Eropa ta iique gajirã ñeri dipuwaja marirã mera Goãmure game serẽniguirã mera arĩgu. 23 Eropigu pee masibirã erã arĩ duyasore mu sã peenurubita. Eropigu mu sã duyasobita. Eropa arĩ duyasorã masa game gameturinugama. 24 Mari Opu pohro majagure duyasobiricãro gahmea. Eropigu arĩpehrerãre õaro iigu buhemehregu, mata guabigu ĩgure arĩro gahmea. 25 Eropigu gajirã ĩgu mera duyasocũ ĩgu erãre weregu õaro mera yojaro mariro mera yuħriro gahmea ĩgure. ĩgu õaro yuħricũ ĩarã erãpu Goãmu ĩgu itamuri mera erã ñeri iirire bujawerebocoma. Eropirã õari buherire diaye majare masinugabocoma. 26 Erãre watĩ oparimi ĩgu gamerire iimorãre. Eropirã erã ñero iirare bujawerera puħru õari buheripure masirã, watĩre cõarãcoma.

3

Pehreburinu majare werepu Pablo Timoteore

1 I umũ pehreburi coregã ñero tarirãcoma masa. Irire õaro masique mũhu. 2 Irisubure masa gajirãre guñabirã, erã ya arĩburi dihtare guñarã, niyerure gamerã, "Gajirãre tarinugaa gua," arĩ erã basi pepirã, masare

ñero turirã, erã pagu sumarãre tarinugarã, erãre oquerecũ ta “Õhaa,” arĩbirã, Goãmure umupeobirã árĩrãcoma. ³ Eropirã masare mahibirã, mojomoro iabirã, ñeri quere iirã, ñeri ñaribejarire duhumasibirã, masare eropa paniguirã, ñarire gamebirã árĩrãcoma. ⁴ Erã mera majarãre ñero iirã, pepiri moorã, “Masipehorã àhraa,” arĩ pepirã árĩrãcoma masa. Eropirã erã, erã ñaribejarire iisuarã árĩrã Goãmure umupeo suabeama. ⁵ Eropirã erã masa erã ñhabeoro Goãmure umupeoquererã ta “Goãmũ duhpibu árĩbeami,” arĩ pepirima erã.

Eropa árĩrãre wapicubiricãque muhũ. ⁶ Erã mera majarã pee masibirã nome pohro ñaja, erã nomere gũyarire buhema. Erã nomepũ turaro ñerire iiniguirã árĩrã, turaro ñerire iidiarã àhrima. ⁷ Erã nome eropa peeniguirã nome árĩquererã ta, diaye majapũre ne masibeama. ⁸ Iribojegue Jane, Jambre sã yeea árĩnirã Moise wererere gamebiridiro dopa ta erã sã ñari wereniguirire diaye majare gamebeama. Erã ñeri dihtare pepirã àhrima. Eropirã Jesure umupeorã gohra árĩbeama. ⁹ Eropa iirã gũyari mera erã iidiarire yujuro bojesome. Puhru erã gũyarire, erã pee masibirã sãre árĩpehrerã ñha masirãcoma. Jane, Jambre mera erã gũyarire iribojegue masa erã ñha masidiro dopa ta eropa ta masirãcoma masa pehburinũ coregã árĩrã erã gũyarire.

Pablo Timoteore doretupũ

¹⁰ Mũpũ yũ buherare, yũ árĩricũrãre, yũ iidiarare, Jesure yũ umupeorare ñero ñhabũ. Eropigũ guaro mariro yũ iirare, masare yũ mahi umupeorare, ñero tariqueregũ yũ yujuro bojerare masia muhũ. ¹¹ Eropigũ Jesucristo yare yũ iira waja yare erã ñero iirare, yũ ñero tarirare masia muhũ. Eropigũ Antioquíague, Iconiogue, Listrague yare ñetariaro erã iira sãre masia muhũ. Eropa yũ wacũ ñha mari Opũ Jesucristopũ yare itamumũrimi. ¹² Árĩpehrerã Jesucristo yarã árĩdiacũ Goãmũ gamerire iiniguidiacũ gajirã erãre ñero iirãcoma. Iri diaye ta àhraa. ¹³ Eropirã ñerãpũ, gũyarã sã, ñetariarã árĩnigucãrãcoma erã. Gajirãre gũyarã, erã basi sã gũyarire peerã eropa ta ñetariarã árĩnigucãrãcoma.

¹⁴ Mũpũ yũhũ mũre buherare ñero mũ peerare eropa iiniguicãque. Mũre buhenirãre masia muhũ. ¹⁵ Mũ majigũ árĩgũgue ta, Goãmũ yare erã gojarapũre masinũgayoro. Ñgũ yare erã gojarapũ mũ buhegũ masia Jesucristo marire tauburire. Eropa buhegũ “Jesucristore umupeorã dihtare peamegue wabonirãre taumi Goãmũ,” arĩ masia. ¹⁶ Goãmũ yare erã gojarapũre árĩpehrerire Goãmũpũ gojadorepũ erãre. Eropirã iripũre buherã mari masinemoa. Iripũre buherã mari ñero iiburire masia. Eropirã mari ñeri iirire masia iripũre buherã. Eropiro iripũ marire ñaripũre gohrotodorea. Eropiro mũmuri nũcũ mari ñarire mari iiniguiburire werea iripũ. ¹⁷ Eropigũ Goãmũ yagũ ñgũ yapũre buhegũ, masipehocãgũcumi. Eropa masigũ árĩpehrerire ñarire iimasigũcumi ñgũ.

4

¹ Jesucristo árĩpehrerãre doregũ arigu dujarigũcumi. Eropa dujarigu ojocarirãre, sĩrinirã sãre dipuwaja moagũcumi. Eropigũ ñgũ ñhabeoro ire mũre dorea yũhũ: Goãmũ sã ñgũ ñhabeoro ire dorea mũre. ² Mũmuri nũcũ masa erã peediacũ, erã peediabiricũ sãre Goãmũ yare wereque. Eropa weregũ masare erã ñeri dipuwajare masicũ iique erãre. Eropigũ “Mũa ñeri iirire iinemobiricãque,” arĩ wereque erãre. Ñaripũre iidoreque.

Eropa weregu ne guabigu gariborebigu árrique muhu. Eropigu gajiräre buhe duhubita. ³⁻⁴ Puhru, gajisubuguere masa ðari buherire peediasome. Eropa peediabirä erä gamero dopa ta iirä, erä peediari dihtare buhemoräre amaräcoma erä. Eropirä guvari buherirë buherä bajarä oparäcoma erä. Erä eropa iirä ðari buheri diaye majapure cohä, erä eropa arï bocara buheripure peenuräräcoma. ⁵ Eropigu mupu diaye majare buhe duhubita. Eropa igu umuri nucu ðaro pee masigu árrique. Eropigu ñero tariqueregu ta yujuro bojeque. Eropigu ðari buherire eropa buheniguique masa Jesu yarä waboro dopa. Goämu mare igu iidorerare iipehocäque muhu.

⁶ Yuhu Goämu yare yu iira dipuwaja yu siriboro merogä duhyaa. Eropigu bajamenurigä árninguca. Eropigu dohpaguere mare dorea. ⁷ Yu siriboro coregä ire weregura: Jesucristo yare ðari buherire buhedoregu igu apirare ðaro buhe ojogorocubä. Igu dorerire ðaro iipehocäbu. Eropigu ñero tariqueregu ta igure ne umupeo duhubiribu. ⁸ Yu eropa ðarire iira wajare umusigue dibugucumi yare. Eropigu mari Opu árripehreräre masipehogu, diaye ta dipuwaja moabu árigu, queoro weregu igu dujaririnu yu wajatarare ogucumi yare. Gajirä säre igu dujariborore coreräre, igure mahiräre erä wajatarare ogucumi Jesu.

Pablo werenemopu Timoteore

⁹ Yu pohrogue yojaro ñagu arique muhu. ¹⁰ Dema waicugu i yeba majare árripehrerire gamegu yare cóägä waha wami Tesalónicague. Crescentepu yare cóabiriqueregu Galacia yebague wahámi Goämu yare buhegu. Tito sä eropa ta Dalmaciague wahámi. ¹¹ Luca dihta yu mera ährimi. Marco yare ðaro itamubu ährimi. Eropigu igure aigárique muhu. ¹² Tiquicore Efeso macague obeoabu. ¹³ Eropigu muhu ögue arigu, yu weca sañari suhrirore, Troa maca Carpo ya wihi yu apirañere aigárique. Eropi sohö árira gojara turirire aigárique. Sohö árira gojara gasiri tamerare turaro gahmea yuhu. Eropigu iri gasiri säre aigárique.

¹⁴ Alejandro comere mohmegu yare ñetariaro iimi. Eropigu igu eropa iira dipuwaja Goämu dipuwaja moagucumi. ¹⁵ Igu Alejandro mari buherire ne gamebirimi. Eropigu muare ñero iiri arigu ðaro igure guña masique.

¹⁶ Peresu iidoregure yu iirare igure yu ne werecū ne yujugu Jesu yagu yare itamudiabirimi. Árripehrerä yare itamubirä cóägäpehrea wama. Erä eropa cóäquerecū ta yare erä cóara dipuwaja Goämu "Eräre dipuwaja moabita," aribu. ¹⁷ Yu yujugu ta árriquerecū ta Goämu ðaro ährimi yu mera. Eropigu igu buherire yu ðaro wereburire weremasicū igu turari mera itamumi yare. Árripehrerä Judio masa árribirä iri buherire erä peeburire werecū itamumi. Eropigu masa erä yare ñero iidiaquerecū ta yare erä ñero iibodigure itamumi mari Opu. ¹⁸ Árripehrerire erä yare ñero iirire yare taugucumi mari Opu. Eropigu umusigue igu Opu árrirogue yu árriborore itamugucumi igu. Eropirä "Mari Opu ðatariagu, turatariagu ährimi," árripehrerinuri arirä mari. Eropa ta arirä.

Pablo ðadorepu Timoteo pohro áriräre

¹⁹ Priscila, igo marapu Aquila, Onesíforo ya wihi majarä sä ðaporo. ²⁰ Erasto Corintogue dujami. Tróximo dorecua wahámi. Eropigu Miletogue apiabu igure. ²¹ Puhiró core yojaro arique muhu. Eubulo, Pudente, Lino, Claudia sä, árripehrerä Jesu yarä mare ðadorema.

²² Mari Opu Jesucristo ma mera arĩporo. Eropigu muare Goamu mera turaro oadorea. Eropu ta arĩniguicãporo. Iripeta ahraa.

Tito

Pablo Titore gojabeopu

¹ Yuhu Pablo mure Titore gojaa. Goamu pohro majagu, Jesucristo yare igu buhedore igu apidigu ahraa. Goamu igu beyenira Jesure era umupeoburire, oari buherire era masiburire Jesu buhedoregu yare apimi. Iri buheri Goamu igu dorediro dopa ta mari iiburire werea. ² Eropigu aripehrerinuri Goamu yara umarogue era oaro ariniguiboro sare buhea erare. Goamu ne guyari marigu i yebare igu ihacunuguboro core "Yu pohrogue eropa oaro ariniguicaracoma," ari apipu marire. ³ Eropigu igu queoranu aricu igu eropa ari apirare masidoredigu arimi masare. Eropa ta masidoregu yare erare weredoremi igu marire taugu. ⁴ Mure Jesu yare buhebu. Yu eropa buhecū peegu, Jesure umupeonugabu muhu ya umupeoro dopa. Eropigu muhu ya buhedigu arigu diaye ta ya magu iro dopa arigu ta iiaa. Mure ire gojabeogu iiaa. Eropigu Goamu mari Pagu, Jesucristo marire taugu itamuri mera mure oadorea. Igu itamuri mera oaro arique muhu.

Creta waicuri nuguro majarare Tito igu wereburire werepu Pablo

⁵ Creta waicuri nuguro ya mure apicu Jesu yara era buheboro duhyanibu irisubure. Eropigu era iiburire werebure apibu yuhu mure. Eropigu macari nucu majara Jesu yara opara arimorare beyedoregu apibu mure. ⁶⁻⁸ Era opara Goamu pohro majara ahrima. Eropigu erare beyegu oarare beyeque gajiropa iibirare. Eropigu yujugo ta marapocara arirare beyeque. Eropigu "Bu arigu ahraa yuhu," ari pepirare beyeque. Eropigu mata guabirare, merebirare, masa mera gamequeabirare, niyerure gamebirare beyeque. Eropa beyegu era ya wihire najarare oaro ihadiburare, oaripure suarare, pee masirare, oaripure iiniguirare, neri marirare, era naribejarire iibirare, teboru mariro mohmerare, oarire iiniguirare beyeque. Eropira mua beyera porare opa ariro gahmea. Jesure umupeora, oarire iiniguira, aripehrerare oaro yuhrira ariro gahmea opara porare. ⁹⁻¹⁰ Eropira oari buherire queoro mari buhediro dopa ta ne duhubira ariporo opara mu beyenira. Eropira oari buherire werera ariracoma. Eropa iira oari buherire gamebirare buhera era ya guyari aricu masicu iracoma era. Eropigu oaro beyeque Jesu yara weca opara aripehrerare. Bajarare era oparare tarinugarare, oaro pepi wereniguibirare, guyara ahrima dohpaguere. Eropa iira yujurayeri Moise dorerire iidorerare tamera netariaro iira iima. Era buheri iri diaye aribiricu erare masicu iro gahmea. ¹¹ Era Moise dorerire iidorerapu guyarire buhera niyerure wajatadiara buhema. Eropa buhera yujuyeri wiri majarare aripehrerare Goamu yapure cocu iira iicoma era. Era eropa iicu erare iidorebircaro gahmea.

¹² Iribojegue weredigu Creta majagu ariqueregu ta opa ari werepu: "Creta nuguro majara eropa guyaniguira waicuma. Nerire iira diaye iro dopa iira ahrima. Eropira pagari bara arira ne mohmediabeama," aripu igu igu ya nuguro majarare. ¹³ Igu eropa arira diaye ta ahraa. Era eropa aricu igu erare turaro wereque Jesu ya buheripure era oaro pee masiboro dopa. ¹⁴ Eropigu "Judio masa iri bojegue majara era ari bocarare

peebiricãque,” arĩ wereque erãre. Jesu yare gamebirã erã doreri sãre Creta majarã erã peenurubiriborore wereque erãre.

¹⁵ Ōpa āhraa. Dipuwaja marirã ōari dihtare pepima. Ñerire iiniguirãpũ ñeri dihtare pepima. Erã pepiripũ ñetaria. Eropirã ōaripũre beyemasi-beama. ¹⁶ Erã “Goãmũre masia gua,” arĩquererã ta ñerire iima. Eropa iinirã erã árĩcũ ñarã Goãmũre masibirã erã árĩcũ masia mari. Eropirã erã ñetariarã, Goãmũ yare tarinugarã āhrima. Eropirã ōarire iimasibeama.

2

Ōari buherire weredorepu Pablo Titore

¹ Mũpũ buhegu ōari buheri arĩdiro dopa ta ōaro buheque. ² Mũrãpũre ōpa wereque: “Mũa guhyadiarã, masa erã umupeorã, pee masirã, ‘Goãmũ ñaye iigu āhrimi,’ arĩ umupeorã, ōari buherire ōaro iirã, Jesure masa sãre mahirã, ñero tariquererã ta yujuro bojerã árĩque,” arĩ wereque erãre. ³ Mũrã nome sãre eropa ta arĩ wereque: “Guhyadiarã nome, ñeri quere werewuabirã nome, merebirã nome árĩque,” arĩ wereque erã nome sãre. Eropirã erã nome ōarire gajirãre buheporo. ⁴ Eropa iirã ōpa arĩ buheporo mũrã nome nómeñaripũre: “Mũa marapũ sumarãre mũa porã sãre mahique,” arĩ buheporo. ⁵ “Eropirã mũa pee masirã nome, gajirã ũma mera ñero iibirã nome, mũa ya wihi majare ōaro ñhadiburã nome, ōaro iirã nome, mũa marapũ sumarãre ōaro yũhrirã nome árĩque,” arĩ buheporo mũrã nome nómeñaripũre. Erã eropiicũ ñarã gajirãpũ “Goãmũ yare umupeorã ñero iirã āhrima,” arĩmasibeama mũare.

⁶ Eropigũ mamarã sãre ōpa wereque: Pee masirã árĩporo erã. ⁷ Eropigũ mũpũ ōari dihtare iinigucãque mũre erã ñhacũburire. Buhegu ne guyarõ mariro buheque. Eropa buhegu guhyadiaro mera buheque mũhu. ⁸ Eropa buhegu ōaro pee masiri mera buheque ne gajirã mũre erã weresãmasibiriburire. Mũ eropa buhecũ ñarã marire ñhaturirã árĩquererã ta marire bu gohra ta werewuamasibeama. Marire eropa werewuamaacãrã guhyasiuro warãcoma erã.

⁹ Eropigũ pohro majarãre ōpa doreque: Erã oparãre ōaro yũhrirã árĩporo. Eropirã erã oparãre ōaro mucubiricũ iiporo. Eropa dihta iiporo. Eropirã erã oparãre pũriro mera yũhriricãporo. ¹⁰ Eropirã erã oparã yare yajabiricãporo. Eropirã ōarã erã oparã dorerire ōaro iinigucãrã árĩporo. Erã eropa ōaro yũhrirã árĩcũ ñarã Goãmũ marire taugu ñgu buherire pee suarãcoma gajirã.

¹¹ Masare ñgu mahirire Goãmũ mari masare masicũ iituhajami. Mari masare eropa mahigu árĩpehrerã peamegue wabonirãre Goãmũ turaro taudiami. ¹²⁻¹³ Masare eropa mahigu Goãmũ marire ōpa doremi: Ñeri iirire, ñerire ñaribejarire duhucãdoremi marire. Goãmũ turagu, Jesucristo marire taugu ñgu ōarire mari ñaburinũre, ñgu ōaro mera dujariburinũre mari corerã iiaa. Eropigũ mari corerĩnũ mari corerĩsubu, mari pee masirã, ōarire iiniguirã, Goãmũre umupeoniguirã marire árĩdoremi Goãmũ. ¹⁴ ñgu Jesucristo mari ya árĩburire ta sĩridi árĩmi. Árĩpehrerã mari ñeri iirire duhucũ iibu, marire ñgu yarã wacũ iibu sĩridi árĩmi. Mari ñerire ñgu eropa cóacũ mari ñerire iira dipuwaja marirã árĩrãca. Eropirã turaro ōarire iidiarã árĩrãca.

¹⁵ Ire áriþehrerire iri nuḡuro majarãre Jesu yarãre buheque muḡu. Erã opu áriḡu ta iiaa muḡu. Eropiḡu erãre wereque. Eropiḡu erã ñerire iicã iḡu wereque erãre. Eropirã áriþehrerã gajirã mre coãdiabiricãporo.

3

Jesu yarã erã iiburire werenemopu Pablo

¹ Ōpa guñacũ iique ero majarã Jesu yarãre: Erã oparãre ðaro yuḡrirã áriþoro. Eropirã áriþehrerire ðari dihtare iirã áriþoro. ² Eropirã gajirãre ne quere goroweobiricãporo. Game ðuyasobiricãporo. Eropirã masa ðarã, áriþehrerãre umupeorã áriþoro.

³ Iribojegue mari sã pee masibirã, tarinugarã, guyarire peenururã, ñerire iisuarã, ñerire uaribeja duhumasibirã, umuri nuca ñerire iinigu-irã, gajirãre erã gajinore opacũ iḡaturirã árimuriribu mari sã. Eropirã marire gajirã iḡaturimurima. Eropirã mari sã erãre iḡaturimuriribu. ⁴⁻⁵ Eropa árinirã áriquerecũ ta Goãmu marire peamegue wabonirãre taumi. Eropa taugu iḡu iḡu ðaḡu áririre, masare iḡu mahirire marire iḡmudi árimi. Ōaro mari iira mera taubirimi marire. Marire mojomoro iḡu mari ñeri iirare coegu Espiritu Santo mera marire taumi. Eropa iḡu marire iḡu porã wacũ iimi. Eropiḡu Espiritu Santopu mari ðarã áriburire marire gohrotomi. ⁶ Jesucristo mari ñeri iira dipuwaja iḡu siri, masa muriaara mera Goãmu iḡu Espiritu Santore omi marire wuaro iḡu turarire mari opaboro dopa. ⁷ Marire mahiḡu, marire ðaro iidiami. Eropiḡu iḡu, iḡu Espiritu Santore omi, ñeri iira dipuwaja marirã mari áriborore, amarogue mari eropa ðaro áriniguicãborore. Mari eropa áriniguiburire masirã irire mucubiri corerã iiaa mari.

⁸ Iri yu werera diaye ta áhraa. Eropiḡu irire yu werediro dopa ta masare buheḡu iri dorerire ipehodoreque muḡu. Eropiḡu Goãmure umupeorãre irire buheque ðarire erã ðaro iiboro dopa. I yu arĩ buhera ðari buheri áhraa. Eropirã masa i buherire erã peenurucũ ðaro itamuri áriroca erãre.

⁹ Gajirã wereniguiripu duḡpiburi áribeaa. Erã masibiriquerã ta erã arĩ ðuyasoma. Erã ñecu sumarã arĩ bocarare game ðuyasoma. Moise dorerire arĩ ðuyasoma. Erã eropa arĩ ðuyasori iri áriþehrerẽ duḡpiburi áribeaa. Eropiḡu irire peenurubiricãque. Mu sã ðuyasobiricãque.

¹⁰ Mua mera majagu eropa game ðuyasogu mua basi game ðuca wacũ iḡu iicũ iḡu "iibiricãque," arĩque iḡure. Yujusubu, pesubu irire iḡure mu iidorebirira puḡru iḡu yuḡribiricũ iḡu iḡure wapicu duhucãque.

¹¹ Eropa ðuyasogu ñeri dihtare uaribejaniguigu áhrimi. Eropa iḡu iicũ iarã iḡu ñegu áricũ masi, iḡure wapicubiricãro gahmea.

Pablo doretupu

¹² Nicopoligue puhirópẽ áribu iiaa. Eropiḡu Artemare o Tíquicore mu pohroge yu obeomhtacũ erogere yure bocatirigu árique muḡu.

¹³ Eropiḡu dorerire ðaro mehregure Zena waicugure, Apolo sãre ðaro itamuque erã waborore. Eropiḡu erã gamerire áriþehrerire oque erãre duḡyaro mariro. ¹⁴ Eropirã Jesu yarã mari mera majarã ðarire iipoporo. Gajinore opapehobirãre erã itamuboro dopa, ðarire iiniguirã erã áriboro dopa eropa iiporo.

Pablo ðadorebeopu Jesu yarãre

¹⁵ Árīpehrerã yu mera majarã mure òadorema. Ero árĩrã Jesu yarã guare mahirã òaporo. Árīpehrerãre muare Goãmu ĩgu mahiri mera turaro òadorea. Eropa ta árĩniguicãporo. Iripêta ãhraa.

Filemón

Pablo Filemo waicugure gojanugapu

¹ Yuhu Pablo Jesucristo yagu ya árii dipuwaja peresugue áriḡu iiaa. Yuhu, mari acawereḡu Jesu yagu Timoteo mera müre Filemore gojabeoa gua. Muhu gua mahiḡu Cristo yare guare mohmetamugā āhraa muhu. ² Eropirā Jesu yarā mü ya wi gamenererā sāre gojabeoa gua. Mari mahiḡo mari acawereḡo Jesu yago Aplā sāre gojabeoa gua. Arquipo sāre gojabeoa gua. Arquipopu gua iro dopa Cristo yare wereḡu āhrimi. ³ Eropirā Goāmu mari Pagu, mari Opu Jesucristo mera müare ðadorea. İḡu itamuri mera ðaro áriḡu müa.

Filemo gajirāre iḡu mahire, Cristore iḡu umupeorire werepu Pablo

⁴⁻⁵ Yu acawereḡu, Filemo, müre guña Goāmure müre serēbasamuraa. Eropa serēbasagu “Ōhaa,” arāa yuhu iḡure. Cristore mü mahicū iḡure mü umupeocū gajirā Jesu yarāre mü mahicū peeabu yuhu. Eropiḡu Goāmure “Ōhaa,” arī mucubiria. ⁶ Cristore mari umupeorire gajirāre wereḡu āhraa muhu. Mü eropa áriḡu áricū i sāre serēbasaa Goāmure. Jesucristo yarā áriḡā wuaro ðarire oparāca mari. Irire mü opaburire ðaro müre masipehodoreḡu serēbasaa Goāmure. ⁷ Acawereḡu, gajirāre mü mahicū peeḡu mucubiria yuhu. Áriḡpehrerā Goāmu yarāre ðaro siporā turacū iḡu waicua muhu. Mü eropa iicū peeḡu mucubiria yuhu.

Pablo Onésimo ya áriḡurire serēpu Filemore

⁸⁻¹⁰ Eropiḡu dohpaguere Onésimore mü pohro majagu áriḡidigure müre serēbasadiaa. Peresugue gua áriḡā Cristo yare werebu yuhu iḡure. Irire peeḡu Cristore gahmeami iḡu. Eropiḡu iḡu Goāmu yagu wahāmi. Eropa wagu ya magu iro dopa āhrimi. Eropiḡu ya buḡu áriḡu Cristo yare ya buhera dipuwaja peresu ya áriḡu müre Onésimo mera werebeogura iḡure mü iiburire. Cristo iḡu buhedore iḡu apidiḡu āhraa yuhu. Eropa áriḡu, áriḡu iḡure mü iiburire müre dorebu āhraa yuhu. Eropa áriḡu áriḡuereḡu ta müre doresome yuhu. Mahiri mera müre werebeogura iripēta.

¹¹ Cristo yagu iḡu áriḡoro core Onésimo mü pohro majagu áriḡu duhpibu áriḡuridigū áriḡu. Müre ðaro itamubiridigū áriḡu. Dohpague tamerare yare ðaro itamugū āhrimi. Mü sāre ðaro itamugū áriḡucumi. Dohpaguere bu áriḡu gohra áriḡeami. ¹² Eropiḡu dohpaguere iḡure müre wiagu iiaa. İḡure turaro mahia. İḡu ya turaro mahiḡure müre wiagu iiaa. ¹³ İḡure müre wiabiricū iḡu ya pohro dujaboñumi. Ōari buherire ya buheri dipuwaja peresu ya áriḡisubū iḡure yare itamudoreboya yuhu. Eropiḡu ya mera dujadoreboya yuhu. Müpu yare itamumasibiricū iḡupu müre gohrotogu áriḡoñumi. ¹⁴ Eropa áriḡuerecū müre wiagu iiaa iḡure. Muhu iḡure “Dujaque,” mü arībeocū, iḡure dujadoreboya. Yupu müre “Yu pohro iḡure apique,” arīdiabirica. Eropiḡu iḡure müre wiagu iiaa. ¹⁵ İḡu Onésimo müre bajamenurigā iḡu müre duhrigāra puhru dipaturi mü mera áriḡucumi daja. İḡu müre duhricū Goāmu gamero dopa ta wahabu, arī pepia yuhu, iḡu Jesu yagu iḡu áriḡorore. Eropiḡu mü pohro

árĩgu daja ðaro árĩniguigucumi. ¹⁶ Eropigu ĩgu dohpaguere mu pohro majagu gohra árĩbeami. Pohro majarā tauñariro árĩgu āhrimi ĩgu yu pepicũre. Dohpaguere ĩgu mu acaweregu Jesu yagu āhrimi. Eropigu ĩgure turaro mahia. Mũpu yu tauro ĩgure mahique. Mu eropa mahigu mu pohro majagu ĩgu árĩqueregu ta mu pohro majagu gohra árĩbeami ĩgu. ĩgu mu acaweregu Jesucristo yagu āhrimi.

¹⁷ Eropigu yure mu bocatĩridiro dopa ta ĩgu sãre ðaro bocatĩrique. Mu mera majagu yu árĩcũ ĩgu sãre ðaro bocatĩrique. ¹⁸ Eropigu gajiropa mure ĩgu iicũ, mure ĩgu wajamogu árĩcũ yũpu irire wajayegura. ¹⁹ Yũhu Pablo yu basi ire were gojagura: Yũpu wajayegura mure. Mure yu buhera pũhũ Cristo yagu mu wacũ árĩpehrerinari Goãmu mera árĩbu āhraa mũhu. Mure yu eropa buhera waja mu sã yure wuaro wajamogu árĩboca. Mu eropa árĩquerecũ ta mure wajayegura ĩgu mure wajamorire. ²⁰ Eropigu yu acaweregu, yu mahigu, mari Opũ Cristo yagu āhraa mũhu. Mu eropa árĩgu Onésimore ðaro bocatĩrique. Cristo yagu árĩgu yu acaweregu āhraa mũhu. Eropa árĩgu, árĩgu yure ðaro mucubiricũ iique.

²¹ I yu wererare ðaro iiguca mũhu. Eropigu yu werera tauro iiguca mũhu. Irire masigu mure gojabeogu iiaa. ²² I sãre weregura mure: Mũa pohrogue yu waborore Goãmure mũa serēbasarare ĩgu yũhribocumi. “Áũ,” ĩgu arĩcũ gahmea yũhu. Eropigu mũa pohrogue yu ejaburi toẽre amuyuque mũhu.

Pablo ðadoretupu Filemore

²³ Epafra mure ðadoremi. ĩgũpũ Cristo yare ĩgu iira dipuwaja yu mera peresu árĩgu āhrimi. ²⁴ Eropirā Marco, Aristarco, Dema, Luca yu mera mure ðadorema. Cristo yare yu buhecũ erãpu yure itamurā āhrima.

²⁵ Mari Opũ Cristo mera ðadorea mũare. ĩgu mũare ðaro iigucumi. Eropa ta iiporo. Iripēta āhraa.

Hebreos

Goãtmu magu Goãtmu yare werepu marire

¹ Iribojegue Goãmu masare werenugapu. Īgu bajasuburi mari ñecu sumarãre iribojegue majarãre ĩgu gamerire weremuripu. Īgu yare weremuhtanirã mera erãre weremuripu ĩgu. Gajirãre ĩgu dehyoa weremuripu. Gajirãre ĩgu bocafĩriro weremuripu. Gajirãre quẽroque weremuripu. Eropa weremuripu ĩgu mari acawererãre. ² Dohpaguere pehburinu coregã arĩrinãrĩre ĩgu magure ĩgu yare ĩgu weredore obeocũ ĩgupu marire wereami. Jesucristo ĩgu Pagu iidorero mera i yebare umaro sãre iidigu arĩmi. Īgu Pagupu pehlerinũ arĩcũ arĩpehlerire opabure apipu ĩgure. ³ Eropigu ĩgu magupu ĩgu Pagu õarire opagu arĩgu, ĩgu turari mera marire ii ĩhmudi arĩmi. Eropigu yujuro mera ĩgu Pagu mera arĩgu, ĩgu Pagu arĩricurire marire ĩhmudi arĩmi. Eropigu ĩgu turari mera ĩgu dorecũ i yeba, umaro sã eropa arĩniguia. Eropiro dederebeaa ĩgu doreri mera. Eropigu mari ñero iirare ĩgu coera puhũ ĩgu Pagu turatarigu diayeru doapu ĩgu opu ĩgu arĩrĩre ĩhmubu.

Goãtmu magu anyua tauro ahrimi

⁴ Īgu Goãmu magu waĩcumi. Eropa waĩcugu gajirã tauro opu ahrimi. Eropigu ĩgu anyua weca tauro opu ahrimi. ⁵ Īgu anyuare Goãmu ne õpa arĩ werebirimuripu ĩgu magure werediro dopa ta: Yũ magu ahraa muhu. Dohpagãre mure dehyoacũ iabũ, arĩpu Goãmu ĩgu magure.

Anyuapũre ne eropa arĩ werebirimuripu. Eropigu erãre i sãre ne werebirimuripu:

Īgu pagu ahraa yũhu. Eropigu ĩgu yũ magu arĩgucumi, arĩpu Goãmu ĩgu magure.

Anyuapũre ne eropa arĩ werebirimuripu. Eropigu ĩgu magu anyua tauro arĩpu. ⁶ Eropigu gajisubu ĩgu magure masa dehyoagure i yeba apõpa aĩgu õpa arĩpu Goãmu ĩgure:

Arĩpehlerã yaharã anyua yũ magure mereja, ĩgure umupeorãcoma erã, arĩpu ĩgu.

⁷ Eropigu ĩgu anyuapũre werebu õpa arĩpu ĩgu:

Yaharã anyuare miruñe iro dopa dupucurãre iiaa yũhu. Erã yũ pohro majarã ahrima. Eropigu erãre peame iro dopa arĩcũ iiaa yũhu, arĩ werepu Goãmu mari Pagu.

⁸ Erãre ĩgu eropa arĩqueregu ta ĩgu magupũre õpa arĩpu:

Mũhu Goãmu arĩpehlerã tauro opu eropa arĩniguicãgũca. Diaye ta doreguca muhu mu yarãre. ⁹ Diaye arĩrĩre, õaro iirire turaro gahmea muhu. Eropigu ñero iirire gamebeaa muhu. Mũhu eropa arĩgu arĩcũ ĩagu, yũhu mu Pagu arĩpehlerã gajirã tauro mure mucubiricũ iabũ, arĩpu Goãmu.

¹⁰ I sãre arĩpu ĩgu ĩgu magure "Opu," arĩ piyugu:

Opu, negohraguere i yebare, umaro sãre ĩhacũnugubu muhu. ¹¹ Iri arĩpehleri pehrea waroca. Mũpu eropa arĩniguigũca. I yeba arĩpehleri suhriro iriñe boaro dopa ta pehrea waroca. ¹² Iri arĩpehleri i yebare umaro sãre gohrotocũ ĩguca muhu. Mũrañe

suhrirore ma cohã gajiñe mera gohrotoro dopa ta áripehrerire gohrotocũ iiguca muhu. Mupu mu áriñero dopa áriñiguicãguca. Eropigu ne gohrotosome. Eropa áriñiguicuca muhu, aripu Goãmu igu magure.

¹³ Gajisubu opa igu magure arigu iri sare anyuapure ne werebirimuripu Goãmu:

Yu diayepu doaque muhu. Eropigu mere ihaturirãre tarinugabasadoregura. Eropigu erã weca opu arique muhu, aripu Goãmu igu magure.

¹⁴ Áripehrerã anyuapu Goãmu pohro majarã dihta áhrima. Eropiro Cristo igu taumorãre itamudoregu Goãmu obeomurimi erãre.

2

Goãmu yare ðari buherire marire eropa pepibircãro gahmea

¹ Eropigu Goãmu magu gohra marire weregu igu áricũ masirã igu wererare mari peerare ðaro guñaro gahmea marire irire cãdijiri arirã.

²⁻³ Anyua masare erã wererare masapu erã tarinugacũ ñagu Goãmu masare dipuwaja moapu. Eropigu erã anyua werera iri diaye áricũ ihmugũ iipu. Eropiro anyua erã werera iri diaye áricũ marire irire peero gahmea. Erã tauro Cristopure peero gahmea marire. Igu mari Opu igu marire tauborore weremuhtapu. Eropirã igure peenirãpu igu wererare marire wereturiañorã marire ðaro masicũ iirã. Eropigu iri buherire “Jesucristo marire igu taugacumi,” arã buherire mari eropa pepicãcũ Goãmu marire dipuwaja moagucumi. Igu dipuwaja moaborore duhrimasibea mari. ⁴ Irire peemuhtanirã erã buhe weca peero watope Goãmuru iri buherire diaye ta áricũ ihmudi arimi. Eropigu erã irire buherã igu turari mera baja deyoro moari erã ii ihmucũ iri buherire diaye ta áricũ ihmudi arimi masare. Eropigu igu Espiritu Santo mera iri buheri diaye ta áricũ ihmudi arimi. Espiritu Santo Jesu yarãre yujurãyerire Goãmu yare erã mohmemasiburire apidi arimi erã game itamuboro dopa. Igu gamediro dopa ta apidi arimi erã mohmemasiburire erãre.

Jesucristo mari iro dopa ta dupucugu masa dehyoapu, arã gojañumi

⁵ I mu pehrerinu áricũ Goãmu pohro arirã tauro oparã arisome anyuapu. Erãre oparã acusome Goãmu. ⁶ Anyuare oparã acubiriquerecũ Goãmu yare weremuhtadigu opa arã gojañumi iribojeguere Goãmu igu oparã acumorãre:

Gua masa bu gohra gua arirã ariquerecũ ta guare guñaa muhu. Gua masare ðaro áricũ iiaa muhu. ⁷ Bajamenurigã anyua doca masare apiyoro muhu. Eropa apiqueregu ta guare turari ogu oparã acuyoro muhu. ⁸ Muhu eropa acucũ i yeba maja weca aripehreri weca áhrraa gua masa, arã gojañumi iribojegue majagu mari Pagure.

Goãmu masare apigu i yebaguere aripehrerã waimurã sare masa dorero doca arimorãre apiñumi. Masare igu eropa oparã acuquerecũ ta erã waimurãre aripehrerãre doremásibeama dohpa. ⁹ Jesupu aripehrerã weca opu áhrimi. Bajamenurigã anyua doca mari Pagu igu sare apipu. Mari yañe áriborañere siribasabure igure eropa apidi arimi. Mari Pagu marire mahigu Jesure mari ya áriburire igu siricũ gamepu. Eropigu igu eropa siricũ ñagu igure turarire ogu, opu acupu igure pare aripehrerã igure umupeoborore.

¹⁰ Goãmu árĩpeherrerire ìhacũnuguñumi. Eropiro árĩpeherrerire Ìgu ya dihta àhraa. Eropigu Jesure s̄iridoregu masa erã ñerire cãdijicũ iipu ìgure. Ìgu masa bajarã Ìgu porã árĩmorãre umarogue òarogue aìgãbu eropa iipu. Ìgu eropiicũ tamera òapũrica. Eropigu Jesupu marire taugu mari opu ta àhrimi. ¹¹ Árĩpeherrerã masa erã ñerire cóadi árĩmi Jesucristopũ. Eropigu Ìgu ñerire cóãnrã mera Pagucumi Goãmure. Eropigu mari Pagu yujugu ta àhrimi. Mari Pagu Ìgu árĩcũ Jesu marire Ìgu ñerire cóãnrãre “Yu acawererã àhrima,” arĩ piyugu ne guhyasĩribeami. ¹² Òpa arĩgu iipu Ìgu Pagure:

Mũ árĩricurire weregura yũ acawererãguere. Árĩpeherrerã yaharã gamenererã pohro mũre umupeogu “Turagu àhrimi,” arĩ weregura yũhũ erãre, arĩpu Ìgu Ìgu Pagure, arĩ gojara àhraa.

¹³ Eropigu òpa arĩpu daja:

Yu Pagure guñaturagũca yũhũ, arĩpu, arĩ gojara àhraa.

I sãre arĩpu Ìgu Jesucristo:

Ohõ àhraa yũhũ. Goãmu porã Ìgu yũre apinirã yũ acawererã mera ohõ àhraa, arĩpu Ìgu. Ìgu yarãre “Yu acawererã,” arĩ piyugu eropa arĩpu.

¹⁴ “Yu acawererã,” Ìgu arĩ piyurã dũpũcũrã mari árĩcũ ìagu, Jesupu mari ya dũpũ mari iro dopa árĩgu aripũ. Eropa árĩgu arigu Ìgu crusague s̄irigu aripũ watĩre dederecũ iibu. Ìgu watĩpu s̄iridoregu àhrimi marire.

¹⁵ Eropa ii ìgure dederecũ iidi árĩmi marire tauboro dopa. Maripu umuri nũcu mari s̄iriborore gũiribu. Eropa gũirã gũiro doca árĩrã, ñero s̄iporãcũrã árĩribũ mari. Eropa árĩrã mari árĩcũ ìagu Ìgu marire taumi.

¹⁶ Eropa taugu anyuapũre itamugu aribiripu Ìgu. Abrahã pãramerãre maripũre itamugu aripũ. ¹⁷ Eropigu Ìgu mari acaweregu iro dopa aripũ. Yujuropa ta mari iro dopa ta dũpũcũgu aripũ. Eropa arĩgu mari masa ya árĩburire s̄iribasagu mari ñeri iĩrare Goãmure cóãdoregu aripũ. Eropigu pahia oparã erã Goãmu ya árĩburire serẽbasaro dopa ta òaro itamuboro dopa mari iro dopa dũpũcũgu arigu iipu. Erã tauro marire Ìgu mojomoro ìhami. Eropigu marire òaro itamuniguicãmi. ¹⁸ Ìgu ñero taripu. Eropigu watĩ ìgure ñero iidoreripu. Iibiripu Ìgu. Eropa ñerire tarinũgadigu árĩgu, Ìgu mari sãre ñerire tarinũgacũ iimasimi. Watĩ Ìgu ñerire iidorecũ ìagu marire ñerire iibiricũ iimasimi.

3

Jesu Moise tauro árĩgu àhrimi

¹ Jesu Ìgu eropa árĩgu árĩcũ ìarã ìgure burigã guñaque mũa. Yu acawererã, Jesu yarã, Goãmu Ìgu yarã árĩmorãre mũare beyedigu árĩmi Ìgu. Ìgu Jesupu Goãmu Ìgu apidigu árĩgu mari pahia opu àhrimi. I yeba majarã pahia oparã tauro ìgũpu mari ya árĩburire Goãmure serẽbasagu àhrimi marire. Eropirã ìgure òaro guñaque mũa umupeodigure. ² Goãmu ìgure marire Ìgu tauborore Ìgu apicũ ìgũpu Ìgu apidiro dopa ta iipu. Ne tarinũgabiripu. Moise sã irĩbojegue majagu Goãmu yarã Israe masare itamugu ne tarinũgabiripu. Eropa ta iipu Jesu sã. ³ Eropiro Moisere erã umupeodiro tauro Jesupũre umupeoro gahmea marire. Òpa àhraa iri. Wihire mari “Òari wihi àhraa,” arĩro tauro wihire iidigũpũre “Òapũricãmi,” arĩro gahmea marire. Eropigu Jesupu wihi iidigu iro

dopa áhrimi. Ígu eropa árġgu árġcū ġgupure Moise tauro umupeoro gahmea marire. ⁴ Masapu wirire iirā áhrima. Goāmupu árġpehrerire iigu áhrimi. ⁵ Moisepu Goāmu mohme coregu árġgu Goāmu ya curu majarāre itamuniguġu árġmurġpu. Puhruġue Goāmu ġgu masare wereborore weremurġpu masare. ⁶ Cristopu Goāmu magu árġgu ta, Goāmu yare iġnġguicāgu árġgu Goāmu ya curu majarā tauro opu áhrimi. Eropirā Moise tauro Cristopure umupeoro gahmea marire. Eropirā marġpu Cristore ġuñatura duhubirā árġrā marire ġgu tauborore eropa mucubiri corenġguicārā ġgu ya curu majarā áhraa mari.

Goāmu ġgu yarāre ġgu mera ōaro soocū gameñumi

⁷ Eropirā Jesucristore mari umupeo duhubiriborore ōpa iro gahmea marire. Irire weremi Espġritu Santo Goāmu yare gojarapūġuere.

Dohpagāre yahu Goāmu muare yu werecū yuhridiabirā árġbircāque mua. ⁸ Eropirā ōaro yuhrique yure mua. Iriboġue Israe masa masa marirogue árġrā yu werequerecū ta umupeodiabirā yure yuhribirimurġma. Eropa iirā yure ġhasuabircū iima. Eropirā erā iġdiro dopa iġbircāque muapu yure. ⁹ Eroġuere cuarenta bojori gohra erāre deyro moarire š ġhmurġbu erāre itamugu. Yu eropa ġ ġhmuquerecū ta erāpu ōpa arġ pepimurġma yure duyasorā. “Goāmu marire itamumasisome,” arġ pepimurġma. Eropa arġ pepirā ñero iimurġma. ¹⁰ Erā eropiicū ġagu erā mera guabu. Eropa guagu ōpa arġbu: “Erā yahare peediabirā gajiropa árġri buherire eropa ġuñamaacārā áhrima,” arġbu. “Yahapure ne buhediabeama,” arġbu erāre. ¹¹ Eropġgu erā mera guagu ōpa arġ werebu: “Erā yu mera majarā ne árġsome. Eropirā yu mera ōaro soosome erā,” arġ werepu Goāmu.

¹² Eropirā, yu acawererā, ōaro iique mua Goāmure cohmore arġrā. Mua ñerire pepirā, Goāmu ojocarġgure “Diaye iimi ġgu,” arġ umupeobirā, ġgure cóāboca mua. Ne yuġgu mua mera majagu eropa iġbircāporo. ¹³ Eropirā ġpure iiro gahmea: Mua mera majarā umurġ nucu Goāmu yare mua basi game werenġguique ñerire iiri arġrā. Ñerire iirā “Iri mera mucubiria,” arġrā, ġuyarire pepirā iiaa mari. Eropa pepibircāque. Ñerġpure iġnġguirā Goāmu yapure suabeaa mari. Eropa iirā ñerire duhudiabirā wahaa. Eropa iiri arġrā mua mera majarāre Goāmu yare mua basi game werenġguique. Jesucristo ġgu dujarġboro core eropa game werenġguique. ¹⁴ Eropirā negohrare Cristore mari umupeonugadiro dopa ta eropa ta mari umupeonġguicārā, mari ojocarġropē ġgu yare duhubirā ġgu mera majarā áhraa.

¹⁵ Goāmu yare erā gojarapū yu dohparagā werediro dopa werea daja muare Goāmu werenġguirire:

Dohpagāre yahu Goāmu muare werecū ōaro yuhrique mua yure. Iriboġue majarā Israe masa erāre yu werequerecū ta umupeodiabirā yure yuhridiabirġma. Eropirā erā iġdiro dopa iġbircāque mua, arġmi Goāmu, arġ gojañuma iriboġuere.

¹⁶ Eropirā Goāmu ġgu wererare peenirā árġquererā erā ġgure yuhribirimurġnorā. Erā árġpehrerā Eġptogue ñero tarġnirāre Goāmu Moise mera ġgu wiunirā árġñorā. Erā eropa árġquererā ġgure ne yuhribiriñorā. ¹⁷ Eropġgu erā ñero iicū ġagu cuarenta bojori gohra Goāmu erā mera guapu. Erā ñero iira dipuwaja erogue masa marirogue erāre dujadorepu. Eropirā erore sirġa wamurġñorā erā. ¹⁸ ġgure erā

eropa yuhridiabicũ ĩagu õpa guhyadiaro mera arĩpu ĩgu: “Erã yu mera majarã ne árisome. Eropirã yu mera ne õaro soosome erã,” arĩpu ĩgu. ¹⁹ ĩgu eropa arĩcũ peerã ire masia mari: Erã Goãmure erã umupeobiriri waja, ĩgu mera majarã árimasibiriñorã. Eropirã ĩgu mera õaro soomasibiriñorã.

4

¹ Eropigu iribojegue majarãre ĩgu mera õaro erã sooborore gamegu erãre “Yu mera soorãca,” arĩ apĩpu Goãmũ. Mari sãre eropa ta arĩ apĩpu ĩgu. Eropirã guhyadiaro mera Goãmure õaro yuhřirã mari wieri marigue arĩrã. Eropa wierã ĩgu mera õaro soosome mari. ² Iribojegue majarã Goãmũ yare erã peediro dopa ta mari sã õari buherire peebũ. Erãpu peerã “Goãmũ diaye ĩgu áhrimi,” arĩ pepibirimuriñorã. Goãmure umupeobirimuriñorã. Eropiro Goãmũ yare peequererã yuhřibiricũ erã peera ñehe arĩburi arĩbiriyoro erãre. ³ Marĩpu ĩgure umupeorã dihta Goãmũ mera majarã arĩrãca. Eropirã ĩgu mera õaro soorãca. Goãmũ õpa arĩpu:

Erã mera guagu guhyadiaro mera õpa arĩ werebu: “Yu mera ne soosome erã,” arĩ werebu, arĩyoro Goãmũ yare erã gojarapũgue.

Eropa arĩpu ĩgu. I yebare ĩgu ĩhacũnugura pũhrũ soopũ ĩgu. Eropigu masa sã ĩgu mera sooborore amuyupũ. Amuqueregu erãpũre “Yu mera ne soosome erã,” arĩpu Goãmũ. ⁴ Seis nũri ĩgu ĩhacũnugura pũhrũ ĩgu soorare õpa arĩ gojañuma Goãmũ yare erã gojarapũgue:

Seis nũri pũhrũ arĩpehrerire ĩgu iirare pehogu, Goãmũ mohmeduhu soopũ, arĩ gojañuma ĩgu yare erã gojarapũgue.

⁵ Eropiro Goãmũ yare erã gojarapũ õpa arĩ werea daja ĩgu mera õaro arĩbirinirãre:

Yu mera majarã ne árisome erã. Eropirã ne yu mera soosome, arĩpu Goãmũ.

⁶ Eropirã õari buherire peemuhtanirã, ĩgure erã tarinugara dipuwaja ĩgu mera majarã arĩbirã ĩgu mera soobiriñorã erã. Gajirãpu ĩgu mera majarã arĩrãcoma. ĩgu mera soorã arĩrãcoma. ⁷ Eropigu masa ĩgu mera õaro arĩburire erã ĩgu mera sooburire apigu daja, “Dohpaguere áhraa,” arĩ apĩpu Goãmũ. Israe masa Goãmure erã tarinugara pũhrũ baja bojori pũhrũ irire weredorepu Davire. Davi were gojarare muare weretuhajaqueregu weregura daja yuhũ. Eropigu õpa arĩ gojañumi Davi Goãmũ wereniguirire:

Dohpagãnure yuhũ Goãmũ muare yu werecũ, tarinugaro mariro õaro yuhrique mua yare, arĩ gojañumi iribojeguere.

⁸ Ero coregue Josuẽ Israe masare Goãmũ ĩgu ora yebague aĩ ejapu. “Yu mera soorã arĩrãcoma,” arĩgu iri yebague erã sooborore arĩgu iibirĩpu Goãmũ. Iri yeba soodoregu gajĩnũ erã sooburire apibiriboñumi ĩgu. ⁹ Seis nũri pũhrũ i yebare ĩgu iira pũhrũ Goãmũ ĩgu mohmeduhu soodiro dopa ta mari ĩgu yarã sã ĩgu mera mari sooburiñe áhraa. ĩgu mera mari õaro arĩburiñe áhraa. ¹⁰ Eropigu Goãmũ soogu, ĩgu mohmerare duhcãnipũ. Eropa ta ĩgu mera soorã mari gamero mera iirire duhcãrãca. ¹¹ Eropirã mari ĩgu yarã õaro iirã. Goãmũ yare õaro yuhřirã ĩgu mera mari sooboro dopa. Iribojegue majarã mari acawererã erã tarinugara pũhrũ Goãmũ mera majarã ne árimasibirimuriñorã erã. Erã iidiro dopa iibiricãrã mari.

¹² Goãmũ ya wereniguirĩ marire Goãmũ mera õaro arĩniguiicũ iiaa. Őarĩpũre marire gohrotocũ iiaa. Eropiro ĩgu ya wereniguirĩ bu arĩri

árĭbeaa. Eropiro matamiji pepuripu usirimiji mera dirore erā wiri ĩha erā masiro dopa ta, ĩgu ya wereniguiiri mari árĭricurire mari pepirire ōaro masicū ĩaa marire. Eropa masirā mari ĩiricuri ōaro árĭcū, ōaro árĭbiricū sāre masia ĩgu wereniguirire peerā. Iri mari buhecū mari árĭricurire ōaro masipehocū ĩaa marire. ¹³ Ne Goāmure mari árĭricurire mari ĩirare duhmasibeaa mari. Árĭpehrerire ĩgu ĩhacūnugurare ĩgu ĩhacūnugunirā sāre ĩhami ĩgu. ĩgu tamerare mari ĩirare mari pepirire werepehorāca mari.

Jesu turagu mari pahia opu āhrimi

¹⁴ Jesu Goāmu magu ĩgu sirira puhru ĩgu Pagu pohrogue dujadigu árĭmi. ĩgu turagu mari pahia opu āhrimi. Eropigu mari ya árĭburire Goāmure serēbasami. ĩgu eropa árĭgu árĭcū ĩarā maripu ĩgu yare ōaro yuhrirā árĭrā ĩgure ōaro umupeoniguicārā. ¹⁵ ĩgu Jesucristo mari pahi árĭgu mari űero taricū ōaro mojomoro ĩagu āhrimi. Mari űerire uaribejarire masimi ĩgu. Watĭ árĭpehreri űerire ĩgu marire ĩidorero dopa ta Jesu sāre űerire ĩidoreripu. ĩgu eropa ĩidorequerecū ĩgu űerire ĩibiripu. ĩgu eropa űerire ĩidorerire ĩidoredigu árĭgu marire mojomoro ĩagu marire itamumasimi. ¹⁶ Eropirā “Yure yuhrigucumi,” arĭrā Goāmure serērā. ĩgu marire mahimi. Eropigu mari ĩgure serēcū marire mojomoro ĩagu marire itamugucumi. Eropigu mari űero ĩidiacū sāre ĩgu marire itamugucumi.

5

¹ Árĭpehrerā pahia oparā, masa mera majarā āhrima. Beyenirā āhrima erā mera majarā yare Goāmure serēbasamorā. Eropirā masa űerire erā ĩira dipuwajare Goāmure serēbasama erā mera majarāre. Eropa serēbasarā waibugure wejē soe mujuma Goāmure. ² Pahia oparā gajirā masa iro dopa ōaro masipehobirā āhrima. Gajisubu ōarire ĩibirā āhrima erā sā. Eropa masibirā árĭrā gajirā masibirāre itamumasima nijiyajaro mera. Eropirā ōarire ĩibirā sāre ōaro mera itamumasima. ³ Eropirā ōaro masipehobirā űeri ĩira dipuwajacurā āhrima erā sā. Eropirā erā basi erā űerire erā ĩira dipuwaja waibugure wejē soe mujuma Goāmure. Gajirā masa ya árĭburire erā űeri ĩira dipuwaja erā serēbasadiro dopa ta, erā basi erā ya árĭburi sāre serēma Goāmure.

⁴ Eropigu ĩgu ĩgu gamero pahia opu űajabeami. Goāmupu ĩgure beyegu, pahia opu acumi. Iribojegue majagu Aarō murure ĩgu apidiro dopa ta gajirā pahia oparā sāre apimi ĩgu. ⁵ Eropa ta Cristo sā ĩgu basi ĩgu gamero pahia opu űajabiripu. Goāmupu ĩgure opu acugu ōpa arĭpu: Yū magu āhraa muhu. Dohpagāre mure dehyoacū ĩiabū yuhū, arĭpu Goāmu.

⁶ Gajisubu ōpa arĭpu Goāmu Cristore:

Árĭpehrerinurire pahi árĭniguicāguca muhu. Melquisede ĩgu árĭdiro dopa ta pahi árĭniguicāguca muhu, arĭpu ĩgu magure.

⁷ Cristo ĩ yeba árĭgu burigā gaguĭngui, co deco mera Goāmure turaro serēpu ĩgu, “Yure masuque,” arĭgu. Mari Pagupu Goāmupu ĩgure sĭridigure masumasigu árĭpu. ĩgu eropa serēcū Goāmu peepu ĩgure. Goāmu gameri dihtare ĩgu ĩidiacū ĩagu Goāmupu ĩgu serērare peegu yuhripu. ⁸ Eropigu Cristo Goāmu magu árĭqueregu űero taripu ĩgu. Eropa űero tarigu yuhripu Goāmure. Eropa yuhrigu ōaro yuhririre masituhapu. ⁹ Eropa yuhridigu crusague sĭrigu masa erā űerire cādijigu árĭpehrerā

ĭgure yuħrirāre taubu wapu. ¹⁰ Eropigu Goāmpu ĭgure pahia opu masa yare serēbasabure apipu. Eropigu Melquisede pahia opu ĭgu ārīdiro dopa ta āħrimi Cristo.

Cristo yarā ĭgure umupeo duhucū guhya āħraa

¹¹ Baja ōpa ārīrire muare werenemodiaa gua. Gua eropa werenemodiaquerecū ta muapu peediabirā āħraa. Eropirā muare gua werecū mmasumasigu ārīpu. ĭgu eroasiya mara. ¹² Yoari boje Cristo yarā ārīraa mua. Eropā ārīrā dohpaguere gajirāre buherāgue ārīboca mua. Mua eropa ārībonirā ārīquerecū ta gajirā muapure buherācoma. Goāmu yare muare buhemuhtarare muare buhero gahmea daja. Ne buhenugarā iro dopa ta āħraa mua. ¹³ Apīco mħrirā majirāgā ārīnima. Erā iro dopa ta mua sā āħraa ōaro masibirā ārīrā. “I ĩeri āħraa. Ipu ōari āħraa,” arī ĩha masibea mua. ¹⁴ Barire barāpu murā āħrima. Erā iro dopa ārīrā ōaro buhenirā ōaro pepi masirā mua ārīcū ōaboaya. “I ĩeri āħraa. I ōari āħraa,” mua arī ĩha masirā ārīcū ōaboaya.

6

¹⁻² Eropirā Goāmu yare ōaro masirā, ōaro yuħrirā ārīrā. Cristo yare negohraguere buhenugarā ōpa masinugabu mari: Mari gamero mera mari iiri duhpiburi ārībeaa. Mari iiri mera tarisome mari. Tarimorā Goāmure umupeoro gahmea marire. Ire negohraguere buhenugama marire. Eropirā marire waĭyema. Mojotorire marire erā duhpeorire buhe, sīrinirā erā masa mħriborore buhe, i umu pehrera puhru Goāmu ĭgu dipuwaja moaborore buhe, ĭgu dipuwaja moamorā erā ĩero tariniguiboro sāre buhe, i sāre marire negohraguere buhenugama. Eropā ārīri buherire mari masituhajarare buhenemobirā gaji buherire ōaro buhenemorā. ³ Eropirā Goāmure, ĭgu ya sāre masinemorā. Goāmu ĭgu gamecū eropa ta irāca mari.

⁴ Goāmu yare masinirā irire duħurāre ne dipaturi erāre erā ĩeri iirare erāre bujawerecū iimasiya mara daja. Eropā ārīrā, Cristo ĭgu taunirā ārīrā Espīritu Santore oparima. ⁵ Eropirā Goāmu ya wereniguirire peerā ōari wereniguiri iri ārīcū masirima. Eropirā pehrerinu puhrugue Goāmu ĭgu turari mera mari eropa ārīniguiborore, masare ĭgu dipuwaja moaboro sāre erā masirima. ⁶ Eropā ārīrā Cristo yare erā duħurā Goāmu magure dipaturi crusague erā pabiadiro dopa ta ĭgure iirā iima. Erā eropiicū ĩarā gajirā masa Cristore wereyema. Eropirā dipaturi erāre, erā ĩeri ĩiare erā bujawere ōarire goħrotocū iimasiya mara. ⁷ Ōpa āħraa iri mari werenigui ĩeori mera buhecū: Ōari yebare wuaro deco aricū erā oteri ōaro puhri ducacua. Eropigu iri pohe opu ducare opami ĭgu baburire. Iri yeba ōari yeba ārīcū ĩha mucubirimi. Eropā ta Goāmu iimi ĭgu yare peenirā sāre. Erā ĭgu yare ōaro iicū ĩha mucubirimi erā mera. ⁸ Gaji yepapu aħapora mera, taa mera iri yeba tiaro duhpiburi yeba ārībeaa. Eropā ārīri pohere cōācāro gahmea. Eropā ta Goāmu iimi ĭgu ĭgu yare peequererā iibirāre. Erāre dipuwaja moa peamegue cōāgucumi.

Cristore eropa umupeoniguirāre taumi Goāmu

⁹ Yu mahirā, muare eropa arī werequeregu ta muapure “Cristore duħuristo yare erā duħurā Goāmu mā āħraa,” arīgu iibeaa. Muapu Cristo ĭgu taurā āħraa. Eropirā ōarire iirā iica mua. Irire masia yuħu. ¹⁰ Mari ōaro iira waja Goāmu queoro marire ōaro iigu āħrimi. Eropigu

Īgu ya árĭburire mua turaro mohmerare cādijisome Īgu. Mua ĩgure mahirā ĩgu yarāre itamuabu mua. Dohpague sāre erāre itamuniguia mua. Īgure mua eropa mahirare cādijisome ĩgu. ¹¹ Mua ojocariniguićāropē gajirāre mua umupeocū, mua itaisto yare erā duhurā Goāmū mmuniguicū sāre gahmea gua. Mua eropiicū ĩagu ōaro iigucumi mari Pagū muare. ¹² Eropirā mua tericurā árĭcū gamebeaa gua. Gajirā Cristo yarā ĩero tariquererā Goāmure “Īgu diaye ta árĭgu āhrimi,” arĭ umupeoniguicāma. Erā eropiicū ĩagu Goāmū “Masare ōarire ogura,” ĩgu arĭdiro dopa ta erāre opehogucumi. Eropirā mua sā erāre ĩhacūrā erā iro dopa ta iiniguicāque.

¹³⁻¹⁴ Iribojegue Goāmū Abrahāre ōpa arĭ apipū: “Yū waĭ mera diaye ta ire arĭgu iiaa mure. Mure ōaro iigura. Eropigu mu pāramerā árĭturiarāre bajarā masa árĭcū iigura,” arĭ werepipū Goāmū. Eropa arĭ werepigu ĩgu ya waĭ mera waĭpeopū. Gajigu ĩgu tauro árĭgu ne maricū ĩgu ya waĭ mera eropa waĭpeopū. ¹⁵ “Mure ōaro iigura,” Goāmū ĩgu arĭ apirare Abrahāpū ōaro ĩgu umupeoyura puhru Goāmū ĩgu arĭdiro dopa ta ĩgure ōaro iipū. ¹⁶ “Goāmū mera diaye arĭgu iiaa,” masapu arĭrā, erā erā tauro árĭgu waĭ mera waĭpeorā iima. “Goāmū mera diaye arĭgu iiaa yuhū,” yujuĭgu ĩgu arĭcū gajigu peegu “Diaye āhraa,” arĭgucumi. Duyasomasibeami. ¹⁷ Eropigu Goāmū Abrahāre “Mure ōaro iigura,” arĭ apigu “Yū waĭ mera diaye ta arĭgu iiaa,” arĭ waĭpeopū. Īgu eropa waĭpeo wererare peerā “Diaye ta āhraa iri,” arĭ masia. Eropirā “Īgu arĭrare ne gohrotosome,” arĭ masia mari. Irire mari masiboro dopa ĩgu arĭ apira mera ĩgu waĭpeogu eropa werepipū. ¹⁸ Eropigu ĩgu arĭ apira mera, ĩgu waĭpeora mera diaye ĩgu arĭrare masicū iipū Goāmū marire. Eropiro ĩgu waĭpeocū ĩgu arĭ apira ne gohrotosome. Eropigu Goāmū ne guyabeami. Īgu eropa árĭgu árĭcū masirā, mari marire ĩgu tauborore mucubiri corerāca, “Eropa ta iigucumi,” arĭrā. ¹⁹⁻²⁰ Eropa ĩgu tauborore corerā guĭaturarā āhraa mari. Eropa árĭrā “Mari sĭrirā Goāmū pohro warāca,” arĭ masirā ĭuibeeaa. Pahia opū Goāmū ĩgu árĭri taribu gohrague ĩajagu, cāhmotariĭne suhriro pohecague tariĭajami. Eropa ĩajagu masa ya árĭburire serēbasami Goāmure. Īgu eropiidiro dopa ta Jesu sā ũmarogue Goāmū árĭroque ĩajamuhtadi árĭmi. Eropa ĩajamuhtagu mari sāre erogue ĩajaburire ahmu serēbasami. Eropigu árĭpehrerinari nacu serēbasagu iimi pahia opū árĭgu. Melquisede pahi ĩgu árĭdiro dopa ta pahia opū āhrimi ĩgu Jesu.

7

Melquisede pahi ĩgu árĭdiro dopa ta Jesu pahia opū āhrimi, arĭ gojaĭumi

¹ Melquisede iri bojegue majagu Salem waĭcūri maca majagu opū árĭmūripū. Eropigu pahi árĭgu Goāmū turagure ũmaro majagure masare serēbasagu árĭmūripū. Eropigu gajirā oparāre Abrahā gamewejētuhā, ĩgu dujaricū gohra, Melquisede ĩgu ya maca árĭdigu waha, Abrahāre bocatĭripū. Eropa bocatĭrigu ĩgure serēbasapu Goāmure: “Ōaro iique ĩre,” arĭ serēbasapu Abrahāre. ² Abrahāpū ĩgu gamewejē tarinugara puhru gajirā oparā yare aĭ dujapu. Īgu eropa aĭ dujare merogā duhapū ĩgu Melquisedere. Diez ĩgu aĭ dujara árĭcū yujuĭne opū Melquisedere. Melquisede ĩgu waĭ mari ya mera arĭro “Tauro opū ōaro iigu āhrimi,” arĭdiro iiaa. Eropigu ĩgu Salem waĭcūri maca majarā opū ĩgu árĭcū iri

maca maja waĩre waĩcũpu. Salem waĩ õpa arĩdiaro iiaa: “Tauro opu masare õaro game mahicũ iigu ãhrimi,” arĩdiaro iiaa. ³ Ne Melquisede pagu samarãre, ĩgu core ármuhtanĩrãre, ĩgu acawererãre erã were gojatura mara. ĩgu masa dehyoarare, ĩgu sĩrira sãre were gojatura ne mara. Eropigu eropa árnĩguigu iro dopa áripũ ĩgu. ĩgu eropa ářĩgu ářĩcũ Goãmu ĩgu magu ĩgu pahĩ ĩgu ářĩrãre marire buhemi. Melquisede pahĩ eropa árnĩguigu iro dopa ta ãhrimi ĩgu Jesucristo Goãmu magu. ĩgu iro dopa ta Cristo sã pahĩ ářĩgu eropa árnĩguicãgu ãhrimi.

⁴ Eropigu Melquisede turagu ářĩrãre guãaque. Abrahã mari ñecu muru opu gohra ářĩqueregu ta Melquisedepure ĩgu duja aĩrãre duhapũ. Diez ĩgu duja aĩra ářĩcũ yujuñe õpu Melquisedere. Eropa ta ĩgu duja aĩ ĩgu duharare õpu ĩgure. ⁵ Eropiro Moise ĩgu doreri mera ářĩpehrerã gajirã Israe masare iripẽta wajayedorepu erã pahiare. Eropa doregu Levĩ pãramerã ářĩturiarãre erã acawererã ářĩturiarã erã wajayerire ñeadoregu apimurĩpu. Levĩ pãramerã ya curu majarã pahia dihta wamurĩñorã. Eropirã gajirã ya curu majarã sã Levĩ pãramerã mera Abrahã pãramerã ářĩturiarã ářĩmurĩñorã. Erã acawererã ářĩquereã erã Levĩ pãramerãre wajayemurĩñorã. ⁶ Melquisedepu Levĩ pãrami ářĩturiagu ářĩbiriquregu ta wajaseapu Abrahãre. Eropigu “Mure õaro iĩgura,” ĩgu Goãmu arĩ apidigu ářĩqueregu Abrahãpu Melquisedere wajayepu. Eropigu Melquisedepu Goãmure Abrahãre serẽbasagu õaro ářĩdoremurĩpu. ⁷ Óaro ářĩdoregu Melquisedepu ĩgu õaro ářĩdoredigu Abrahã tauro ářĩpu. Irire mari õaro masia. ⁸ Mari mera majarã pahia marire merogã wajasearã mari iro dopa ta masa ãhrima. Eropa ářĩrã sĩrimorã ta ãhrima erã sã. Ihi Melquisedepu iribojegue Abrahãre merogã wajaseadigu eropa árnĩguigu iro dopa ãhrimi ĩgupũ. “ĩgu sĩa wañumi,” arĩ werera ne mara. Eropa ta ãhraa Goãmu yare erã gojarapũgue. ⁹ Dohpague majarã Levĩ pãramerã ářĩturiarã pahia ářĩrã masare merogã wajaseamurima. Eropa ářĩrã erã ářĩquerecũ ta Abrahã erã ñecu ářĩgu Melquisedere merogã wajayegu ářĩpehrerã Levĩ pãramerã ya ářĩburi sãre wajayebasagu iimurĩpu. Eropirã Levĩ pãramerã sã Melquisedere wajayenirã iro dopa ãhrima. ¹⁰ Melquisedere Abrahã ĩgu wajayerasubure Levĩpu masa dehyoanibirĩpu dohpa. Eropa masa dehyoabiriquregu ta ĩgu ñecu Abrahã dupũgue ĩgu ářĩbodiropã dopa ta Levĩpu ářĩtuhagu iĩpu. Eropigu Melquisede Abrahãre ĩgu bocařĩricũ Levĩ sã ĩgu ñecu mera ĩgu ářĩboro dopa ářĩgu iĩpu. Eropa ářĩgu Levĩ, ĩgu pãramerã mera Melquisedere merogã wajayenirã iro dopa ářĩrã erã ĩgu doca ářĩrã iĩñorã.

¹¹ ĩgu dorerire apigu Goãmu Aarõ pãramerã ářĩturiarã Levĩ ya curu majarãre pahia ářĩdoremurĩpu. Eropirã ĩgu doreri dorediro dopa ta erã pahia waimurãre soe mujurã masa ya ářĩburire serẽbasamurĩñorã Goãmure. Erã pahia erã eropũquerecũ masa Goãmu mera õaro wamorã ářĩbirimurĩñorã dohpa. Erã pahia erã iira mera masa õarã wacũ Goãmu erãre gohrotobure Cristore obeobiriboñumi. Eropigu ĩgu obeodigu marire Goãmu mera õaro ářĩcũ iigu aridi ářĩmi Cristopũ. ĩgu Levĩ ya curu majagu Aarõ muru iro dopa ářĩbirĩpu. Melquisede iro dopa ářĩpu. ¹² Eropigu pahiare gohrotogu, marire doreri sãre gohrotoro gãmemi ĩgure. Pahia erã itamuri mera mari taribiro dopa ta iri doreri mera mari taribea. Eropiro iri dorerire gohrotopẽhoro gãmemi. ¹³ Aarõ Levĩ sã, erã ya curu

majarā dihtare pahiare acumuripu Goāmu ĩgu dorerire apigu. ĩgu eropa acuquerecū ta dohpaguere mari Opure Cristore pahire Goāmu ĩgu acudigu gaji curu majagu āhrimi. ¹⁴ ĩgu mari Opu Cristo Judá ya curu majagu masa dehyoapu. Moise pahiare acugu, Judá ya curu majarāre ne acubirimuripu. Irire ōaro masia mari.

¹⁵ Ire masirā, ōpa mari ōaro masia: Dohpaguere ne ĩgu acudigu pahi Cristo Melquisede iro dopa árĳgu āhrimi. ¹⁶ Iribojegue maja doreri dorediro dopa ta Leví ya curu majarā dihta pahia űajamuriñorā. Jesucristopu Goāmu ne ĩgu acudigu gajirā pahia erā iro dopa pahi űajabiridigu árĳmi. ĩgu Goāmu turari mera árĳpehrerinari árĳgu āhrimi. Eropigu iri turari mera pahi űajadi árĳmi ĩgu. ¹⁷ Őpa āhraa Goāmu yare weremuhtanirā erā gojarapūgue:

Árĳpehrerinurire pahi árĳniguiguca muhu. Melquisede ĩgu pahi ĩgu árĳniguidiro dopa pahi árĳniguicāguca muhu, arĳpu Goāmu ĩgu magure, arĳ gojañuma iribojeguere.

¹⁸ Goāmu ĩgu doreri Moisere ĩgu apimuhtara doreri turari árĳbiribu. Eropigu iri dorerire duhcādĳ árĳmi Goāmu. ¹⁹ Moisere ĩgu apira doreri mera ne ōaro tariburire opabirimuribu mari. Eropigu dohpagupere Goāmu marire ĩgu taubore marire apidigu árĳmi. ĩgu eropiicū dohpaguere ĩgu pohrogue wamasia mari. Eropirā ĩgu mera wereniguimasia.

²⁰ Eropigu Cristore pahi acugu, “Yu waĳ mera mure acugu iiaa,” arĳpu Goāmu. Gajirā pahia űajacū ĩgu iro dopa waĳpeo acubiripu erāre.

²¹ Cristopu ĩgu Pagu waĳ werepira mera pahi űajapu. Őpa arĳ werepipu ĩgu Pagu Cristore:

Yuhu mu opu yu waĳ mera mure weregu diaye weregura. Eropigu ire ne gohroto mariro werea mure. Árĳpehrerinurire pahi árĳniguicāguca muhu, arĳ werepipu Goāmu ĩgu magure.

²² Eropa werepigu mama buherire marire apigu, marire ĩgu taubore apigu iipu. Iribojegue maja doreri tauro mari ōaro árĳbore apigu iipu. Eropigu Goāmu masare “Őaro iigura,” ĩgu arĳdiro dopa ta iibu, Jesure obeodigu árĳmi marire taubure.

²³ Árĳmuhtanirā pahia erā sĳricū ĳarā gajirā gohroto űajamuriñorā daja. Eropirā erā bajarā pahia wañorā.

²⁴ Jesupu eropa árĳniguicāmi. Eropirā ĩgure gohrotorā ne marima pahia.

²⁵ Eropigu ĩgu eropa árĳniguiguca, Goāmure eropa serēbasaniguicāmi ĩgu ĩgu yarā ya árĳburire. Eropigu Goāmu mera erā eropa árĳniguiboro dopa masare taumasimi ĩgu. Árĳpehrerā ĩgure umupeorā Goāmu pohrogue warāca. Eropigu Jesu āhrimi uputu marire taubu.

²⁶ Eropigu Jesu āhrimi mari pahia opu. ĩgu tamerare burigā gahmea mari. Ne űeri dipuwaja marigu āhrimi ĩgu. Eropigu masa iro dopa űerire iibiridi árĳmi. Eropigu Goāmu ĩgure űerā watope árĳdigure aĳgu, umarogue api, árĳpehrerā gajirā tauro árĳgu opu acupu. ²⁷ Gajirā pahia iro dopa árĳbeamĳ ĩgu. Erāpu umuri nucu waibugure wejē, soe muju serēmurima Goāmure masa űeri iira dipuwaja cāĳidorerā. Erā basi erā űeri dipuwajare serēmuhtamurima. Puhru gajirā űeri dipuwaja säre serēbasamurima erā. Eropirā erā bajasuburi eropa Goāmure serēbasamurima. Jesupu pahi árĳgu, yujusubu ta masa űeri dipuwajare Goāmure serēpu. ĩgu waibugure wejēbiri ĩgu basi sĳridigu árĳmi mari masa űeri iira dipuwajare taubu. ²⁸ Goāmu doreri Moisere ĩgu apira mura pahia oparā űajadorea. Eropa erā űajaquererā, űeri marirā

áríbeama pahia ñajarã. Iri doreri puhru Goãmu ĩgu magure pahire acugu "Diaye ta pahi árĩniguicãgucumi," arĩ acupu. ĩgupu ñeri mariro eropa árĩniguicãmi.

8

Goãmu masare "Muare taugura," arĩ apĩpu daja ĩgu Moisere arĩ apirare gohrotogu. ĩgu mama apirare werebasagu àhrimi Jesu

¹ Iri árĩpehrerire arĩ wererã i tamerare muare arĩrã iiaa: Muare gua weredigũ pahia opu ĩgu tamera mari yagu gohra àhrimi. Mari ya árĩburire Goãmure serẽbasagu ta àhrimi. Umarogue Goãmu tatarigũ ĩgu opu doaro pohro ĩgu diayepu doami ĩgu Cristo mari pahia opu. ² Eropigu Goãmu wihi i yeba maja wihi, masa erã iira wihigue mohmebeamĩ. Umarogue árĩri wihire mari Opu ĩgu iira wihire Goãmu ya árĩburire mohmebasami. Iri wihi tamera Goãmu ya wihi gohra àhraa.

³ Eropirã árĩpehrerã i yeba majarã pahia oparã waimurãre wejẽ soe muju Goãmure omurima masa ñero iira dipuwajare cãdijidorerã. Eropa ta iimorãre apidigu árĩmi Goãmu. Eropigu mari yagu pahi Cristo sãre apigu eropa ta iidorepu. Eropigu mari ñeri iira dipuwajare Jesucristo ĩgu basi sĩridi árĩmi. ⁴ Moise doreri dorediro dopa ta i yebague pahia masa erã ñeri dipuwaja cõaburire mohmebasama. Eropirã i yebague pahia árĩtuhama. Erã erõpa árĩtuhajacũ Jesupu mari yagu pahi i yeba árĩniguigu, pahi árĩbiriboñumi ĩgu. ⁵ I yeba majarã pahia erã mohmerire i yeba maja wihi ta Goãmu wihi mohmerã árĩtuhajama. Goãmu wihi gohra umarogue àhraa. Eropiro Goãmu wihi i yeba maja wihi umaro maja maja wihi ihacũ iira wihi àhraa. Eropigu Moise iri wihire i yeba maja wihire ĩgu moaboro coregã Goãmu õpa arĩpu ĩgure. "Utãgugue árĩgu mure yu ihmudiro dopa ta yaha wihire õpa iique. Yuhu dorediro dopa ta yaha wihire queoro iique," arĩmurĩpu Goãmu ĩgure. ⁶ Dohpaguepũre Jesu pahi árĩgu ĩgure apira mohmeri i yeba majarã pahia mohmeri tauro õaro àhraa. Bu gohra árĩbeaa. Goãmu masare "Cristo mera muare õaro iigura," ĩgu arĩ apira iribojegue maja doreri Moise doreri tauro õari àhraa. Marire ĩgu arĩ were apira iri doreri tauro marire õaro árĩcũ iiroca. Eropigu marire Goãmu mera amubasagu árĩgu, Cristopũ gajirã tauro pahi àhrimi.

⁷ Negohrague Moise dorera mera mari Goãmu mera õamasibirimuribũ. Iri doreri mera mari õacũ gaji buherire apibiriboñumi Goãmu. Iri doreri mera mari õacũ, "Cristo mera muare õaro taugura," arĩ werebiriboñumi marire. ⁸ Iri dorerire erã bocatĩubirirare weregu õpa arĩpu ĩgu yarãre ĩsrae masare:

Õpa arãa yuhu mũa opu: "Õaro peeque. Puhrugue gaji buherire weregura yaharãre ĩsrae masare, Judã ya curu majarã sãre. ⁹ Iri buheri erã ñecu sumarãre erãre werepira iro dopa ne árĩsome. Yu basi erãre Egipto yebague árĩnirãre wiugu erãre werepiribũ. Yu eropa arĩ werepirare tarinugama erã. Erã eropiicũ ĩagu negohrare erãre yu wererare duhucãbu. ¹⁰ Eropigu puhrugue ĩsrae masare õpa arĩ weregura: Yu dorerire erãre guñacũ iigura. Erãre yu dorerire yuhridiacũ iiguca. Eropigu yu Goãmu erã opu árĩgura. Eropirã erãpu yaharã masa árĩracoma, arĩ weregura. ¹¹ Eropirã irisubure erã mera majarãre erã acawererãre ne erã õpa erã basi game arĩsome: 'Dohpague mari Opũre Goãmure masique mũa,'

ne arĩ game buhesome. Erã árĩpehrerã yũre masituharãcoma. Majirãgã, murã sã yũre masirã dihta árĩrãcoma. ¹² Eropigu erã ñeri iirare cãdijiguca yũhu. Eropigu erãre dipuwaja moasome yũhu," arãa yũhu mua Opũ, arĩpũ Goãmu ĩgu ya wereniguiuri erã gojarapũgue.

¹³ Eropa arĩgu mama buherire apigu, iribojegue maja dorerire duhucũ ĩgu iimi. Eropiro mura doreri ĩgu duhucũ iira pũhrũ iri doreri mura gohrotopehrea waro iiaa.

9

I yeba maja taribure umaro maja taribu sãre Goãmure umupeori taribure werepu

¹ Negohraguere Goãmu ĩgu dorerire Moisere apigu masa ĩgure umupeoburi sãre werepipũ. Eropigu Goãmure erã umupeoburi wihi sãre iidore apipũ. ² Iri wihi waimurã gasiri wihi árĩyoro. Pe taribu opayoro. Wũari taribu erã ñajamuhtari taribu Goãmu ya taribu waĩcũyoro. Iri taribure erã sihãgori yucu duhpeodigu árĩyoro. Eropãrĩcũ mesa sã árĩyoro. Iri mesa weca Goãmure erã ori pan peyayoro. ³ Gaji taribu suhri mera erã cãhmotara taribu árĩyoro. Iri taribu Goãmu ĩgu árĩri taribu gohra waĩcũyoro. ⁴ Iri taribugue oro mera erã iira mesa, incienso erã soeri mesa árĩyoro. Eropiro oro õari mera erã sũra comoro ero oyayoro. Iri comoro waĩcũyoro Goãmu arĩ werepira gojara dicũri comoro. Iri comoro pohecague dicũyoro. Yuju coro oro coro dicũyoro. ĩgu masare ejorañegã mana waĩcũriñegã dicũri coro árĩyoro. Eropiro iri comoro pohecague Aarõ yagũ ĩgu tuadigu pũcudigu árĩyoro. Eropiro pemiji utãmiji Goãmu ĩgu doreri ĩgu gojatura mijiri iri comoro pohecague dicũyoro. ⁵ Iri comoro weca perã anyua wãanirã árĩñorã. Erã wãanirã Goãmu ĩgu gosesiriri mera, "Iri taribure ĩgu àhrimi," arĩ werero iiyoro. Iri comoro buariñe erã quẽdũpũri mera buasũyoro. Iri comoro buariñe weca masa ñero erã iira dipuwajare cãdijidoregu waimurã di Goãmure erã orare wejẽsiripeopũ pahi opu. Iripẽta weregura i wihi majare dohpaguere.

⁶ Eropirã iri wihire eropa erã õaro erã amura pũhrũ pahia umuri nũcu erã ñajajamuhtari taribu erã mohmerire iimuriñorã. ⁷ Eropigu pahia opũpũ dihta gaji taribuguerẽ ñajapũ. Bojori nũcu ĩgu iri taribure yujusubu ta ñajapũ ĩgu. Eropa ñajagu erã wejẽdigu waibũgu dire aĩ ñajagũ, Goãmure umupeopũ. Iri di mariro ne ñajabiripũ. ĩgu basi ĩgu ñeri iira wajare, árĩpehrerã gajirã Israe masa erã ñero iira dipuwaja sãre cãdijidoregu dire aĩ ñaja apimuripũ ĩgu Goãmure. ⁸ Árĩpehreri i mera Espĩritu Santo marire õpa arĩ buhebu iimi: Iri wihi Moisere ĩgu apira wihigue Goãmure umupeoburi árĩrisubu masapũ Goãmure umupeorã iri wihigue ñajamasibiriñorã. Pahia opu dihta Goãmu ĩgu árĩri taribu gohraguere ñajamasimi masare serẽbasagu. ⁹ I árĩpehreri Goãmure umupeori wihi majare masare apira, marire dohpague majarã buheburi dihta árĩyoro. Pahia erã ñeri dipuwajare waimurãre wejẽra mera masa ne Goãmu mera tarimasibiriñorã. Pahia erã eropa soe mujuquerecũ masa erã ñeri erã pepirigue ne pehresũbiriñorã. ¹⁰ Goãmu Moisere apira doreri deoyoro maja iiri dihta àhraa. Erã õpa baburi, erã õpa ihriburi, erã õpa coeburi, erã õpa iiri dihta árĩyoro. Eropiro iri doreri marire õarã wacũ iibiriyoro. Goãmu iri dorerire masa erã iiburire apiñumi Cristo ariboro core.

¹¹ Dohpaguere Cristopu mari pahi opu árġu arituhadigu āhrimi. Eropigu marire sġribasara mera marire ōarā wacū iituhadi árġmi. Eropigu Goāmure mari űeri dipuwajare cóadoregu Goāmu árġroge űajaja i yeba maja taribure űajabiripu. Ūmaro maja wihi űajapu. Iri wihi i yeba maja wihi tauro āhraa. Eropiro masa erā iira wihi árġbeaa. ¹² Eropigu Cristo űmarogue Goāmu ġu árġro gohrague yujusubu ta mari űeri dipuwajare űajatupu. Eropa űajagu cabritoa dire, wecuā dire Goāmu árġri taribugue erā aġ űajaro dopa iibiripu ġu. ġu basi sġrigu ġu di gohrare cóagu árġpehrerinuri Goāmu mera mari ōaro árġniguicāborore iipu. ¹³ űeri oparāre guhraricurāre coewearā erāre wejēsiripeomuriűorā cabritoa di mera, wecuā di mera, wecuare erā soera niti mera. ¹⁴ Eropa iġnorā masa erā dupare űerire coewea cóarā. Iri tauro Cristopu ġu di mera mari pepirigu mari űerire ōaro coewea cóacādi árġmi. Iri űeri dipuwaja oparā peamegue wabonirā árġribu mari. Jesucristopu űeri marigu árġgu ta ġu basi crusague sġrigu Goāmure opu. Espġritu Santo eropa árġniguigu ġu itamuri mera eropa opu ġu ġu basi. Eropigu ġu mari űerire ġu coeweadu árġmi, Goāmu ojocarigu ya árġburire mari ōaro iimasiboro dopa.

¹⁵ Eropigu “Ūpa muare ōaro iigura,” Goāmu arġ ġu mama werepidiro dopa ta Cristopu iidigu árġmi. Eropa iidi árġmi ġu Goāmu ġu beyenirāre taubu. ġu eropa taucū árġpehrerinuri ġu mera ōaro árġrāca mari ġu yarā. Eropirā Goāmu ġu yarāre ġu oburire oparāca mari. Moise doreri dihta árġcū masa erā űeri iira dipuwajacurā árġmuriűorā dohpa. Eropa űeri iira dipuwajacurāre taubu ġu crusague sġribasadi árġmi. ġu eropa sġricū mari ġu yarāre ġu oburire oparāca. ¹⁶⁻¹⁷ Ūpa āhraa mari masare. Yujugu ġu sġriboro core ġu acawererā ġu yare aġ gueremasibeama. Eropiro ġu oparire ġu acawererāre ġu oburire ġu gojatuyurapū ġu sġriboro core iripū wajacubeaa dohpa. ġu sġricū ġarā iripū ġu arġ gojadiro dopa ta ġu yare guererācoma erā. ¹⁸ Eropa ta Goāmu masare werepimuhtara Moisere ġu apira doreri sġriro mariro di cóaro mariro ne duhpihuri árġbiriyo. Eropigu waibugu dire Moise wejēsirira puhru ġu dorerire diaye ta iigu iipu. ¹⁹ Eropigu ōpa iimuhtapu Moise: Goāmu ġu apira dorerire masare werepehopu. Puhru cabritoa dire, wecuā dire deco mera morepu. Eropigu isopu waicudigu dupu mera oveja poari diari poari mera erā űimurare turāpu. Iri dupu mera dire yosogu, Goāmu dorerire ġu gojarapū weca wejēsiripu. Árġpehrerā masa weca sāre wejēsiripeopu. ²⁰ Eropa iigu ōpa arġpu ġu: “Goāmu marire ġu werepira ġu dorera i di mera iri diaye árġcū masia mari. I dire ġarā diaye ta ġu arġdro dopa ta ġu marire iiburire masia. Maripure irire yahridoremi,” arġpu Moise. ²¹ Eropigu masare ġu iidiro dopa ta Goāmu unupeori wihi waimurā gasiri wihire, árġpehreri iri wihi árġri sāre wejēsiripeopu. ²² Eropa ta āhraa. ġu doreri iri dorediro dopa ta baja űerire di mera coeweadoreyoro. Eropigu di cohoro mariro Goāmu mari űeri iurare ne cādijsome.

Cristo ġu dire cóagu, ġu yarā erā űeri iurare coewearu

²³ Eropiro i yeba maja wihire, iri wihi árġri sāre űerire coewearo dopa ta waimurā di mera wejēsiripeomuripu. Eropiro iri tauro űmarogue wamurāre erā űeri dipuwaja oparare coero gahmea. Eropiro waimurā di tauro árġgu ya di mera erā űerire coero gahmea. Eropirā Jesucristo ya di mera coenirā wabu maripu. ²⁴ Eropigu Cristo mari űeri iira dipuwajare Goāmure cóadoregu Goāmure erā unupeori wihi masa erā iira wihire

ñajabiripũ. I yeba maja wihi umaro maja wihi ñhacũ iira wihi ñhraa. Goãmũ ya wihi gohra umaro maja wihi ñhraa. Eropigũ mari ñeri iira dipuwajare cóãdoregũ Goãmũ áriro gohrague ñajapũ Cristo. Umarogue wapũ ĩgũ Goãmũ core mari ya árĩburire serēbasabu. ²⁵ Pahia opũ bojori nucũ Goãmũ ĩgũ árĩri taribugue erã ñeri iira dipuwajare cóãdoregũ ñajamũripũ waimurã di mera. Cristopũ sĩrigũ ĩgũ dire cóãdigũ Goãmũre mari ñeri iira dipuwajare cóãdoregũ erã iiro dopa bajasuburi ñajabiripũ. ²⁶ Bajasuburi ĩgũ dire cóãbu árĩgũ, i yeba árĩropē bajasuburi ĩgũ ñero sĩriniguicãboñumi. Yujusubu ta dehyoapũ ĩgũ i yebaguere i umũ pehrerĩnũ coregã. ĩgũ dehyoagũ ĩgũ yujusubu ta sĩribasara mera mari árĩpehrerã ñeri iirare cóãbu dehyoapũ. ²⁷ Árĩpehrerã mari masa sã yujusubu ta sĩrirãca. Mari eropa sĩrira puhũ, ñarãre, ñerã sãre beyegucumi Goãmũ. ²⁸ Yujusubu ta mari sĩriro dopa ta Cristo sã yujusubu ta sĩripũ bajarã masa erã ñero iirare cóãbu. Puhũ dipaturi dujarigucumi. Mari ñerire cóãdigugue dujarigucumi. Eropigũ irire dipaturi cóãgũ arisome. Eropa arigũ mucubirĩri mera ĩgũre corerãre taugũ arigucumi. ĩgũ pohroguere erãre aĩgãbu arigucumi.

10

¹ Moise doreri puhũ Cristo masare ĩgũ ñaro iiburire ñmura dihta árĩbũ. Eropiro Cristo masare erã ñeri iirare ñaro cóãboro dopa iri doreri erã ñerire cóãmasibiriyoro dohpa. Eropiro iri doreri iri iidorero dopa ta pahia bojori nucũ Goãmũre waimurãre wejē, soe muju, iĩngu-iquerecũ masa erã ñerire cóãmasibiriyoro. Goãmũre umupeomorãre ñarã árĩcũ iimasibiriyoro iri doreri. ² Iri mera masa erã ñerire cóãcũ, yujusubu ta Goãmũre erã waimurã wejē di cóãra puhũ erã ñerire cóãpehosũboñuma. Eropirã irisubu majarã, “Dipuwaja mara guare,” arĩ pepiboñuma masa. Eropirã iripēta dipaturi Goãmũre waimurã wejēburire duhucãboñuma. ³ Ōabirimuriñorã dohpa. Eropirã bojori nucũ Goãmũre waimurãre wejē di cóãcũ masa erã ñeri dipuwajare guñaniguicãñorã. ⁴ Wecua di mera, cabritoa di mera ne mari ñeri dipuwajare cóãmasiya mariyoro dohpa.

⁵ Iri eropa árĩcũ ĩagũ Cristo i yebaguere ĩgũ ariboro core ñpa arĩpũ Goãmũre ĩgũ Pagure:

Waimurãre erã soe muju ocũ, trigo pogare erã ocũ sãre mũ ĩagũ ñhasuabea mũhũ. Eropigũ masa dehyoacũ iibũ mũhũ yare. Mũhũ yare iira ñapũ mũre mucubiricũ yũ iiburi ñapũ árĩroca. ⁶ Ñerire erã cóãborore waimurãre wejē erã soe mujucũ ĩagũ ñhasuabirabũ mũhũ. ⁷ Mũ eropa ñhasuabiricũ ĩagũ ñpa arĩbũ mũre: “Mũ gamerire yebague iĩgũ wagura. Yũ eropiiburire arĩ gojara ñhraa mũ yare erã gojarapũgue,” arĩbũ yũhũ, arĩmũripũ Cristo ĩgũ Pagure.

⁸ Negohraguere Goãmũ ĩgũ doreri waimurãre trigo poga sãre erã ori mera erã ĩgũre umupeodorequerecũ ta ñpa arĩpũ Cristo ĩgũre. “Waimurãre soe muju erã ocũ, trigo pogare erã ocũ sãre gamebirĩbũ mũhũ,” arĩpũ ĩgũ.

⁹ Eropa arĩtuhagũ ñpa arĩnemopũ: “Mũ gamerire yebague iĩgũ wagura,” arĩpũ. ĩgũ eroparĩcũ ñpa masia mari. Iribojegue Goãmũre erã ñerire cóãdorerã waimurãre wejē di cóãrãre gohrotogu iipũ Goãmũ. Eropa gohrotogu Cristo ĩgũ sĩridiro mera masare erã ñeri dipuwajare taugucumi Goãmũ. ¹⁰ Jesucristo ĩgũ ñapũre ogũ sĩrigũ árĩpehrerã mari ñero iirare

cóadigu árími. Yujusubu ta Goãmure ìgu ðupure ogu marire dipuwaja maricũ iidi árími. Eropã iigu Goãmũ ìgu gamediro dopa ta iidi árími.

¹¹ Árípehrerã pahia umuri nucũ Goãmure umupeori wihi mohmenigu-ima. Eropã mohmeniguirã muraro ta waimurãre wejẽ soe mujuma Goãmure masa ñerire cãdijidoremorã. Erã eropã iiquerecũ ta erã ñero iirire cãdijibeami ìgu. ¹² Cristopũ yujusubu ta mari ñeri dipuwajare sãrigũ, mari ñero iirare ðaro cãdijipehocãcũ iidigu árími. Iirire cãdijipehocũ iituha waha wapũ ìgu Pagũ pohrogue ìgu diayepũ doagũ wagu. Opũ árìgu erogue doacumi. ¹³ Erogue doagũ coregũ iimi. Ìgure ìhaturirãre ìgu Pagũ ìgu tarinugabasaborore coregũ iimi. ¹⁴ Yujusubu ta ìgu sãridiro mera ìgu coenirãre ðarã ñeri mariro erã árìniguicũ iidi árími. Eropìgu Goãmũ pohro doami pare. ¹⁵ Jesucristo eropã ìboro core erã arĩ gojamuhtarare arĩ weremi Espiritu Santo marire. Òpa arĩ weremi ìgu:

¹⁶ Òpa arĩmi mari Opũ: “Pũhũguere òpa arĩ weregũra Israe masare. ‘Yũ dorerire erã yũhridiacũ iigu erã pepirigue apigura,’ arĩ weregũra,” arĩmi ìgu.

¹⁷ Òpa arĩnemomi Goãmũ:

“Erã ñero iirare dipaturi guñanemosome yũhũ,” arĩmi ìgu, arĩ weremi marire Espiritu Santo Goãmũ yare gojarapũgue.

¹⁸ Mari ñeri iirare ìgu cãdijicũ dipaturi mari ñeri dipuwajare sãribure gamebeaa mari.

Goãmũ pohro mari ejaro dopa ta ìgu mera gũiro mariro mari werenigu-imasia

¹⁹ Cristo ìgu sãriro mera ìgu di cóaro mera mari sã dohpaguere gũiro mariro Goãmũ mera wereniguimasia. Eropirã ìgure serẽmasia. ²⁰ Iribojegue Goãmũ ìgu árìri taribugue Goãmure serẽbu pahia opũ dihta ñajamasimi. Iri taribure Goãmũ árìrore cãhmotara suhrìrore ìgu dihta tari ñaja serẽmasimi. Dohpague ta mari basi Goãmũ árìro ñajaro dopa ta Goãmure serẽmasia. Pahia opũ ìgu iri taribugue ìgu dire aĩ ñajaro dopa ta Cristopũ Goãmũ pohrogue ejapũ mari ñeri iirare cãdijidoregũ ejagũ. Eropã iigu Goãmũ mera mari wereniguibodirore cãhmotadirore cóadi árími. ²¹ Goãmũ pohrogue serẽbasagũ mari Goãmũ yarã yagũ pahia opũ turatariagu àhrimi Jesucristo. ²² Eropirã, yũ acawererã, Cristo mari pahia opũ árìcũ ìha mari Goãmũ mera wereniguimasirã árìrã Goãmure serẽrã. Diaye pepirã árìrã, “Ìgu yũhrigucumi,” arĩ umupeorã ìgure serẽrã. Cristo mari ñerire ìgu di mera coenirã àhraa. Eropirã “Dipuwajacurã àhraa,” arĩ pepirã árìbeaa mari. Eropirã guhrari mariri deco mera coeweasunirã iro dopa àhraa. Eropã árìrã Goãmure serẽrã. ²³ “Mũare taugũra,” ìgu arĩdiro dopa ta iigucumi. Eropirã ìgu marire ìgu tauborore ðaro mucubirimuhtayua mari. Iirire mucubirimuhtayua ne cãdijibiricãrã. Goãmure eropã guñaturaniguicãrã. Eropã guñaturarã iirire gajirãre wererã mari. ²⁴ Mari mera majarãre mahirã itamurã mari arĩpehrerã mari game mahi mari itamuboro dopa. ²⁵ Eropirã ðaro gamenererã Goãmure umupeomorã. Gajirãpũ gamenerebeama Goãmũ yare buhemorã. Erã iiro dopa iibiricãrã. Mari mera majarãre Jesucristore umupeonemocũ iirã. I yebaguere mari Opũ ìgu ðujariboro merogã duhyaa. Iirire masirã turaro itamurã mari mera majarãre, Jesu yarãre erã Jesucristore umupeorire.

²⁶ Diaye árĩri buherire mari masiquererã ta irire cóãrã ñerire mari eropa iiniguicũ, Jesucristo sĩrira mera mari ñerire cóãnemoboro ne mara. ²⁷ Eropiro eropa iirãre guhyaro dujaa. Árĩpeherrerã ĩgure ĩhaturĩrãre dipuwaja moagu turaro ũjurogue cóãgucumi Goãmu erãre. Eropirã ĩgu dipuwaja moaborore gũirã dihta ãhrima ĩgu yare cóãnirã. ²⁸ Moise dorerire tarinũganirãre dipuwaja moarã erãre wejẽmuriñorã. Ne mojomoro iaro mariro wejẽmuriñorã erãre. Urerã erã ñero iirare weresãcũ peerã erã tarinũgarare masima. Urerã maricũ perã erã ñero iirare weresãcũ peerã erãre wejẽmuriñorã Goãmu dorero dopa ta. ²⁹ Erã iidiro tauro Goãmu magure ĩhaturirã dipuwaja moasũmorã árĩrãcoma. Cristo ĩgu di cóãro mera marire mari ñeri iirare cóãdi árĩmi Goãmu. ĩgu eropa cóãborore wereyupu ĩgu. Eropirã ĩgu cóãnirã erã arĩquererã ta, puhru ĩgu di cóãrare “Bu gohra ãhraa,” arĩrã ĩgu dipuwaja moamorã gohra árĩrã ta iirãcoma. Eropa árĩrã Espĩritu Santore ñero arĩ wereniguirã ãhrima. ĩgu erãre mahigu ãhrimi. Erã eropa ñero werenigucũ ĩagu turaro dipuwaja moagucumi Goãmu erãre. ³⁰ Goãmu eropa iigu arĩgure masia. Goãmu ĩgu basi ta õpa arĩpu: “Yũhu ãhraa dipuwaja moabu. Erã ñerire iira dipuwaja, dipuwaja moagura yũhu,” arĩpu ĩgu. Õpa arĩnemopũ: “Yaharãre ñero iirãre dipuwaja moagura,” arĩpu ĩgu, arĩ gojaũuma ĩgu yare gojarapũgue. ³¹ Goãmu ojocarĩgu marire dipuwaja moacũ guhyataria.

³² Iribojegue mua árĩrare guñaque mua. Irisubure Goãmu yare ne masinũgarã ñero tariquererã bajasuburi ñero tariquererã ne ĩgu yare cóãbiribu mua. ³³ Yujuyerisuburi masa erã ĩhuro gajirã muare ñero arĩ, ñero pabirama muare. Eropirã gajirã Jesu yarãre erã ñero iicũ ĩarã erãre mojomoro ĩabu mua. ³⁴ Erã Cristo yarã erã árĩra waja erã peresugue árĩrãre mojomoro ĩabu mua. Eropirã mua yare erã emaquerecũ ta mucubiriri mera “Õaroca,” arĩmũribu mua. I yeba maja tauro õarire umaroguere mua opaburire masimũribu. Iri õari pehrebiriborore masibu mua. Irire masirã mua oparire erã emacũ bujawerebiribu mua. ³⁵ Eropirã irire guñatura duhubiriãcãque. Goãmure eropa umupeonigucãcãque. Mua eropa iira waja muare õaro iigucumi. ³⁶ Goãmu yare õaro iiniguicãro gahmea ne duhuro mariro. Goãmu yare iirã bocatũuro gahmea. Eropa iirã árĩrã ĩgu gamerire mua iira puhru ĩgu “Muare õpa ogura,” ĩgu arĩ apirare oparãca. ³⁷ Õpa ãhraa Goãmu yare erã gojarapũgue:

Merogã duh, ñero pabirama muare. Eropiryaa Cristo ĩgu eraboro.

Eropa eragu mata erapurumujugucumi. ³⁸ Yaharã õarãpu yure umupeonigucãrãcoma. Eropirã yaharã arĩnigucãrãcoma. Yu mera eropa arĩnigucãrãcoma. Yahare cóãnirãpũre ĩhasuasome yũhu, arĩmi Goãmu, arĩ gojaũuma.

³⁹ Marĩpu Goãmu yare cóãrã árĩbeaa mari. Eropirã peamegue wamorã árĩbeaa mari. Goãmure umupeoa mari. Eropirã ĩgu taunirã ãhraa ĩgu pohro wamorã.

11

Umupeorire werepu

¹ Õpa ãhraa umupeori: Goãmure umupeorã, marire ĩgu õaro iiburire õaro masia. ĩgure ĩabiriquererã ĩgure umupeorã “Diaye ta iigu ãhrimi,”

arī pepia mari. ² Iribojegue majarā Goāmure “Diaye ta iigu āhrimi,” erā arī umupeocū ĩagu ĩhasuapu Goāmuru.

³ Goāmu ĩgu werenĩguiri mera árĩpehrerire ĩhacũnugupu. Eropĩgu ĩgu mari ĩabirirare árĩpehrerire mari dohpague mari ĩari säre ĩhacũnugupu. Irire mari ōaro masia Goāmure umupeorā.

⁴ Goāmure umupeogu Abelpu cordero wejē, soe mujupu Goāmure umupeogu. Eropa iigu ĩgu tĩgu tauro ōaro umupeopu ĩgu Goāmure. Eropĩgu Goāmu ĩgu orare mucubiripu. Eropa mucubirĩgu “Ōagu āhrimi,” arī ĩapu ĩgu Abelre Goāmure umupeogure. Abel iribojegue sĩridĩgu muru árĩquerecū ĩgu Goāmure eropa ĩi umupeorare guñaa mari sã. Eropa guñarā. Goāmure umupeoa mari sã.

⁵ Enoco Goāmure ĩgu umupeocū ĩagu mucubirimuripu Goāmu. Eropa mucubirĩgu ĩgure ĩgu pohrogue aĩmuriapu. Eropa ta werea Goāmu yare werenĩguirire erā gojarapũgue. ĩgu eropa aĩmuriara puhru masa ĩgure ne bocabiriñorā. ĩgu eropa aĩmuriadĩgu arĩgu ne sĩribiripu. ⁶ Goāmure umupeobirā ĩgure mucubiricū iimasibea mari. Goāmure serēdiarā ōpa ĩgure arī pepiro gahmea marire. “Diaye ta ĩgu Goāmu gohra āhrimi. Eropĩgu ĩgure mari umupeocū marire ōaro iimi ĩgu,” arī pepiro gahmea. Mari eropa arī pepibirā mari ĩgure serēmasibea.

⁷ Noé Goāmure umupeogu ĩgure ĩgu wererare ōaro yuhripu. Puhru erā ñero waborore Goāmu ĩgure werecū peegu ōaro yuhripu ĩgu. Eropa yuhriгу wuadiru dohodiru ĩpu ĩgu acawererā dia miririñere tarimorā. Noé eropa umupeogu arĩgu i yeba majarā ñerā erā umupeobirirare, erā taribiriboro säre ĩhmuḡu iimuripu. Eropĩgu ĩgu umupeocū ĩagu “Ōagu āhrimi,” arī ĩamuripu Goāmu ĩgure.

⁸ Abrahā sã Goāmure umupeogu ĩgure yuhripu. Gaji yebaguere ĩgure ĩgu oburi yebaguere Goāmu ĩgure wadorecū ĩgure yuhripu. ĩgu ya yebare wirigāgu ĩgu masibiriri yebague ejapu. ⁹ “I yebare mare ogura,” Goāmu ĩgu arĩcū peegu ĩgure umupeogu ĩri yebague eja árĩmerejapu ĩgu. Ero arĩmerejaqueregu ĩgu gaji yeba majagu arĩro dopa waimurā gasiri wiri mera wihicu curimuripu murano árĩbirinjagu arĩgu. ĩgu magu Isaa sã ĩgu pãrami Jacobo sã ĩgu iiro dopa ta iimuriñorā. “Muare i yebare ogura,” arī weremuripu Goāmu erā säre. ¹⁰ Eropĩgu i yebare curĩgu macari ĩbirimuripu Abrahā. Gaji macague Goāmu ĩgu arĩri macague umarogue ĩgu waborore coregu ĩpu Abrahā. Iri maca Goāmu iira macau. Eropĩgu ĩgu umupeocū ĩ arĩyoro. Eropĩgu ĩri macare ne pehrebiriburi macare coregu ĩpu.

¹¹ Goāmure umupeogo Sara waĩcuḡo, buro gohra árĩquerego porā marigo árĩquerego ta porācuḡo. “Goāmu ĩgu arĩdiro dopa ta iiguḡumi,” arĩgo ĩgure umupeogo porācuḡo. ¹² Eropĩgu Abrahā buḡu gohra árĩqueregu ta porācuḡu. Eropirā ĩgu pãramerā árĩturiarāgue bajarā wacãñorā. Necãre, ĩmpa yerire mari queorā yujuro bojeya mariro dopa ta, ĩgu pãramerā árĩturiarā säre queo bocatĩyua mariñorā.

¹³ Árĩpehrerā oã yu werenirā murague Goāmure umupeotuhajanirāgue sĩriñorā. Goāmu “Muare ogura,” ĩgu arĩrare opañbirāgue sĩriñorā. Eropa opañbiriquererā “Goāmu ĩgu arĩdiro dopa ta puhrugue ogucumi guare,” arī masiñorā. Eropa masirā mucubirimuhtañorā. Eropirā ōpa arĩñorā erā: “I yebague curirā āhraa. Gaji yeba majarā āhraa,” arĩmuriñorā erā. ¹⁴ Eropa arĩrā gaji yebare erā ya yeba arĩborore corerā iñorā. Irire ōaro masia mari. ¹⁵ “Gaji yeba majarā āhraa,” erā arĩrā

iribojegue erā cōāra yebare guñarā iibiriñorā. Iri yebague dujaa wadiarā dujaa waboñuma. ¹⁶ Ōari yebapure gahme corerā iiñorā. Iri yeba umarogue āhraa. Erā eropa gahme corecū īagu Goāmure “Gua opu āhrimi,” erā arīcū peegu ne guhyasīribiripu Goāmu. Īgu pohro erā ya maca ārīborore iibasatuhadi ārīmi īgu. Eropigu guhyasīribiripu.

¹⁷⁻¹⁸ Goāmu Abrahāre īgu magure Isaare wejē soe mujodorepu. Īgure īadiagu eropa dorepu, “¿Diaye ta yare umupeori?” arīgu. Eropigu Goāmure umupeogu īgu arīdiro dopa ta iiripu Abrahā. “Mū magu Isaa mera mū pāramerā ārīturiarāre opaguca mūhu,” Goāmu īgu arīdiro ārīquerecū īgu magure wejēbu iiripu Goāmu dorero dopa ta. ¹⁹ “Yū magure Isaare yū wejēcū Goāmu īgure masugūcumi,” arī pepigu īgure wejēbu iiripu. Eropigu Goāmu īgure cāhmota īgure wejēdorebiripu. Īgu pagu īgu eropa wejēbu arīgu Isaa sīribudigu arīpu. Eropigu sīridi masadigu iro dopa arīpu īgu. Eropigu Abrahā īgure ojocarigu dipaturi opapu īgure.

²⁰ Isaa Goāmure umupeogu īgu porāre Jacobore, Esaū sāre “Pūhrague Goāmu muare ōaro iigūcumi,” arīpu.

²¹ Goāmure umupeogu Jacobo īgu sīriboro coregā wahgānugaja īgu tuadigu mera tuañanugaja Goāmure serē umupeopu. Eropa serēgu José porāre umare “Goāmu muare ōaro iigūcumi,” arīpu Jacobo.

²² Goāmure umupeogu José īgu sīriboro coregā Israe masa Egipto arīrā erā wiriaborore weremūtapu. Eropa erā wiriaborore masiyugu īgu sīrira dūpu murarore aīgādorepu īgu porāre.

²³ Goāmure umupeorā unerā abe gohra Moisere dibuñorā īgu pagu sumarā īgu masa dehyoara pūhru. Ōagugā īgu arīcū iarā īgugāre dibuñorā. Iri yeba majagu tauro arīgu opu īgu majirāre wejēdorerire tarinugarā īgure dibuñorā erā. Erā erā opure güibiriñorā. ²⁴ Moisere masudigo i yeba majarā opu mago arīpo. Eropa igo masudigu arīqueregu, Goāmure umupeogu “Opu mago magu āhrimi,” erā arī piyucū gamebiripu īgu Moise. Oparā mera majagu arīdiabigu Goāmu yarā mera majagu arīdiapu. ²⁵ Goāmure tarinugadiagu arīgu īgure masudigo pohroue bajamenūrigā ōaro ārīboñumi. Eropa ōaro arību arīqueregu īgu Goāmu yarā mera ñero taridiapu. ²⁶ Eropigu Egipto majarā ya ōarire tauro Cristo ya arīburire ñero tariburire gamepu. Pūhrague Goāmu īgure īgu ōarire oborore masigu ñero taridiapu. ²⁷ Goāmure umupeogu Egipto majagu tauro opu, īgu mera īgu guacū güibiripu. Eropa güibigu iri yeba arīdigu iri yebare cōācā waha wapū. Goāmure īabiriqueregu “Goāmu arīcumi,” arī pepipu īgu. Eropigu īgu iiborore ne duhubiripu.

²⁸ Goāmure umupeogu Moise Israe masare Goāmu īgu tauborore masipu. Eropa masigu Goāmu īgu dorediro dopa ta Israe masa erā disipororire erā tura mijirire di mera wejēsiri tuhdorepu. Eropa dorepu anyu masare wejēgu erā masa tīrāre wejēbodigu Israe masa erā masa tīrāre wejēbiriboro dopa. ²⁹ Goāmure umupeorā Israe masa deco diariya waīcūriya deco watope arīri maha deco mariri maha taribujañorā. Erā eropa taribujacū iarā Egipto majarāpu erāre nurusiarā erāre īhacū taribujanirā miri sīria wañorā.

³⁰ Goāmure umupeorā Israe masa Jericó maca sāriro, wūari sāriro pūrupu majisora curiñorā. Siete nuri gohra iri macare majisora curiñorā erā. Iri nucu nuri erā majisorara pūhru iri sāriropu dijapehrea wayoro.

³¹ Iri maca majago ūma mera ñero iidigo Rahab waīcūgo Goāmure

umupeogo Israe masare itamupo. Iri macare erã cóãboro core bajamerãgã Israe masa erogue erã ñaja duhricũ ìha igo erãre itamupo. Eropirã Israe masa iri maca majarãre Goãmure tarinũganirãre wejẽpehoquererã ta gopure wejẽbiriñorã.

³² Gajirãre Goãmure umupeonirãre werenemoboya yũhũ. Eropa werediaqueregu ta bajarãre eropa Goãmure umupeorã sãre were gojape-homasibirica yũhũ. Gedeõ, Baraca, Sansõ, Jefté, Davi, Samue, Goãmũ yare weremãntanirã sã áripehrerã yũ werebonirã áhrima. ³³ Goãmure umupeorã yujurãyeri gaji yebarigue áriiri macari majarãre gamewejẽ tarinũgañorã. Eropirã gajirã diaye dorenirã áriñorã. Gajirã Goãmũ erãre “Muare itamugura,” ìgu arĩdiro dopa ta ìgu itamurire bocañorã. Eropa ìgure umupeorã yeea erãre badiacũ erãre erã babiricũ iñorã erã. ³⁴ Turaro ãjuri peameri áriquerecũ ta ãjubiriñorã erã Goãmure umupeonijarã. Gajirã erãre ñose wejẽdiacũ duhriãgã wañorã erã Goãmure umupeorã. Turabirã áriquererã Goãmure umupeo, turarã wañorã. “Goãmure umupeorã áhrea. Gamewejë turarã áhrea,” eropa arĩrã áricũ gaji yebari majarã surara erã wejẽrã arirã ne yujuro bojebiriñorã. ³⁵ Goãmure erã umupeocũ ìagu yujurãyeri nome erã acawererã sãricũ ìagu Goãmũpũ erãre masupũ.

Gajirãpũre “Goãmure gamebiriãque,” erã arĩ peresu iicũ erãpũ Goãmure duhudiabiriñorã. “Mũa Goãmure duhucũ mũare taurãca,” arĩñorã erãre. Erãpũ duhubiriñorã Goãmũ mera erã õaro masaborore gamerã. Eropirã erãre erã ñero iicũ sãria wañorã. ³⁶ Gajirãre Goãmure umupeorãre ñero arĩ wereya erãre tãramuriñorã. Eropirã gajirãre guburire, mojotorire diricãa peresu iñorã. ³⁷ Goãmure umupeorãre ñerã utã mera dea wejẽmuriñorã. Gajirãre erã dupure seroti mera wiritamuriñorã. Gajirãre ñoserimijiri mera ñose wejẽmuriñorã. Erãre Cristore cóãdorerã erã ñero iimuriñorã. Gajirã erãre ñero iicũ oveja gasiri mera, cabra gasiri mera suhricurã mojomorocurã árimuriñorã. ³⁸ Erã õatariarã erã áricũ i yeba majarã ñerã erã mera majarã áribonirã áribeama. Wiri marirã áriãrã, masa marirogue utã yucugue áriãgãri siaricãmuriñorã. Eropa áriãgãri siarirã utã yucugue áriiri goberigue, yebague áriiri goberi sãre carĩãgãri siaricãmuriñorã. ³⁹ Oã áripehrerã Goãmure erã umupeocũ ìagu mucubiripũ ìgu. “Õaro iibũ mũa,” arĩpũ. Erã eropa õaro umupeoquerecũ Goãmũ erãre “Muare taugũra,” ìgu arĩdiro ejanibiriya dohpa. ⁴⁰ Õpa arĩ pepipũ Goãmũ: “Oãre yaharãre, puhũgue áriãrã yaharã mera yujuro mera taugũra,” arĩ pepipũ. ìgu eropa arĩ pepidiro dopa ta iigucumi. ìgu eropiicũ õatariaro áriãroca ero core ìgu iidiro tauro.

12

Jesure eropa umupeoniguiãrã mari

¹ Eropirã oãre yũ werenirãre bajarã Goãmure umupeonirãre, ñerire iibirinirãre masirã áripehreri ñero iire duhucãrã mari sã. Õpa áhrea mari queoriñe mera werecũ: Nũcurire opagu omari masũ turaro omamasibeami. Eropa ta mari Goãmũ gamerire iimasibeaa mari ñerire iicũ. Eropirã irire duhucãrã mari. Eropirã Goãmũ ìgu gamero dopa ta õarire iiniguiãrã. ² Eropirã Jesure eropa guãaniguirã. ìgu ta áhrimi marire umupeo guãaturacũ ìgu. Eropigũ marire umupeonemocũ sãre

iimi ĩġu. Crusague sĳrĩġu yujuro bojepu. Puhru ĩġu mucubiriborore masĩġu crusague sĳrĩpu. Eropu sĳrĩġu guhyasĳrĩbodĩġu arĳqueregu guhyasĳrĩbirĩpu ĩġu. Eropu iira puhru dohpaguere Goamu ĩġu opu ĩġu doaro diayepu doanjagu ĩġu dorebu iimi.

³ Nera masa ĩġure nero era iicũ yujuro bojepu ĩġu. ĩġu eropa iidĩġure ġuĩaque mua, mua sã nero tarirã “Yujuro bojebiriboca,” arirã. Irire ġuĩaque mua ĩġure umupeo duhuri arirã. ⁴ Nerire mua tarinugaboro dopa Jesu iro dopa ñetariaro gohra tarinibea mua. Nera muare wejẽnibeamu. ⁵ ĴGoamu muare ĩġu porãre ĩġu wererare cãdijicãri mua?

Őpa arĩpu ĩġu:

Yu magu, yuhu mre werecu eropa pepicãbita. Yuhu mre turicu peegu bujawerebita. ⁶ Arĩpehrerã yu mahirãre werea. Eropĩġu arĩpehrerã “Yu porã ahraa mua,” yu arĩ ĩarãre tarinugadorebeaa. Eropĩġu erã tarinugacũ ĩha erãre yu porãre merogã dipuwaja moaa, arĩpu Goamu.

⁷ Nero tarirã yujuro bojeque “Goamu yare wereġu iimi,” arirã. ĩġu yare duhubiricãque. Goamu muare ĩġu porãre merogã dipuwaja moagu iimi. Erã pagu sumarã erã porãre eropa werema. Eropirã erãre dipuwaja moama. Eropu ta iimi Goamu sã marire ĩġu porãre. ⁸ Goamu arĩpehrerãre weremi. Goamu muare ĩġu werebiricũ ĩġu porã gohra arĩbeaa mua. Eropirã ĩġu porã arĩbirã yujugu majĩġu ĩġu pagure ĩġu masibiro dopa ta ĩġu weresũya marĩġu arĩro dopa ta ahraa mua. Eropirã Goamure “Yu pagu gohra ahrimi,” arĩmasibea mua ĩġu muare werebiricũ. ⁹ Mari pagu sumarã marire erã werecu peerã erãre umupeoa mari. Mari pagu sumarãre mari umupeoro tauru umupeoro gahmea mari Pagu Goamu ĩġu werecu. Eropirã ĩġure yuhriro gahmea marire. Eropu yuhrirã arĩpehrerinuri ĩġu mera arĩrãca. ¹⁰ Bajamenurĩgã mari pagu sumarã erã gamero dopa marire were dipuwaja moama. Goamupu marire oaro weremi. Eropĩġu ĩġu masiri mera marire dipuwaja moami marire oarã masadoreġu. Eropu iimi ĩġu marire ĩġu iro dopa oarã mari arĩboru dopa. ¹¹ Marire ĩġu dipuwaja moacũ mucubiribea mari. Mari bu bujawerea. Eropu bujawerequererã ta ĩġu eropa dipuwaja moara puhru oarã arĩrãca mari. Eropirã ĩġu wererire peenirã arĩrã ġajiropa iiro mariro oaro arĩrãca.

Goamu marire ĩġu dorerire mari yuhribiricũ ġuhya ahraa marire

¹² Eropirã ġuĩaturabirã arĩquererã ta Goamure oaro ġuĩaturarã arĩque. ĩġure duhubiricãque. ¹³ Őaro diaye maja mare mua waro dopa ta pee gorowero mariro oaro diaye ta Goamure yuhrique. Mua eropĩcũ ĩhacũrã ġajirã Jesu yarã ġajiropa arĩrĩre iisome. Eropirã turabirã turarã warãcoma.

¹⁴ Arĩpehrerã masa mera oaro arĩque gamequeãro mariro. Eropirã nero iibiricãque. Neri marirã dihta mari Opu Cristore ĩarãcoma. ¹⁵ Oaro iique mua. Goamu muare ĩġu itamucũ oaro yuhrique. Neri tiari iri oterire iri goroweoro dopa ta mua sã Cristo yare duhu nerire ġuĩaniguibiricãque ġajirãre goroweori arirã. ¹⁶ Ne nome mera nero iirã arĩbiricãque. Eropirã Goamu yare gamebirã arĩbiricãque. Eropu arĩġu arĩpu Esaũ. ĩġu masa ĩġu arĩripu. Eropĩġu ĩġu pagu yare ĩġu sĳrira puhru opabu arĩripu. Eropu arĩquereġu yujunu barire gametarĩġu iri bari mera ĩġu pagu magure ĩġu ĩġu opaborore bu gohrotopu. ¹⁷ Puhru ĩġure warare masia mua.

Īgu eropiira pūhru Īgu pagu Īgure Esaúre ōaro árīdoreburire Goāmure serēbasarire turaro gamerīpu daja Esaúpu. Īgu eropa gamequerecū ta Īgu pagu magupure Īgu tīgu opaburire gohrotora dipuwaja Īgjiropa árīrire iisome. Eropirū pagu Īgure obirīpu. Eropa gamegu turaro orequeregu Īgu pagure serēqueregu irire opamasibirīpu Esaú.

¹⁸ Goāmu dorerire Moiserē Īgu apicūge mari acawererā Israe masa mura Goāmu pohro ejaboro guhya árīyoro. Dohpaguere muapure eropa árībeaa. Ōpa wayoro erāre. Goāmu Īgu dorerire Moiserē iri dorerire apīgu erā árīri yeba majagu utāgugue árīpu. Irīgupu Sinaí waīcudīgu árīyoro. Eropiro erā Goāmu pohro ejamorā irīgugue erā ejacū turaro peame ūjuyoro. Eropiro naitīaro, imica curu, turaro miru sā árīyoro irīgu utāgure. ¹⁹⁻²⁰ Erogue erā ejacū corneta busuyoro. Eropiro werenīguo carīyoro. Īgu eropa werenīguiri ejaricūcū peerā masa yujuro bojebirīñorā. Goāmu erāre guhyaro mera ōpa arī dorepā erāre: “Árīpehrerā irīgu utāgure pēhrerāre utā mera dea wejēque erāre. Irīgu utāgure pēhregu waībugu gohra Īgu árīquerecū Īgu sāre utā mera dea wejēcāque. O ñoserimīji mera ñose wejēque Īgure,” arīpu Goāmu. Īgu eroparīcū peerā yujuro bojebirīñorā erā. ²¹ Eropīgu árīpehrerire utāgugure guhyaro árīrire Īagu ōpa arīpu Moise: “Būrigā gūīgu naraḡāgu īaa,” arīpu Īgu.

²² Irībojegue Israe masa Goāmu Īgu árīdīgu utāgugue ejamasibirīñorā sīriri arīrā. Dohpaguere muapu Jesu yarāpu Goāmu árīdīgu utāgugue, Sión waīcudīgugue, ūmaro majagugue murījaro dopa ta diaye ta Goāmu mera werenīguimasīa. Goāmu ojocarīgu Īgu ya macague murījaro dopa ta diaye ta Īgu mera werenīguīa mūa. Iri maca gajī maca mama maca Jerusalén ūmaro maja maca āhrraa. Ero anyua bajarā gohra āhrrima. Goāmure umupeorā mucubiriri mera gamenererā āhrrima. ²³ Eropirā muapu Īgu ya maca majarā árīrā, erogue Goāmu porā árīmūhtarā mera mūa gamenere árībodiro dopa ta āhrraa. Īgu porā erā waīre Īgu gojaturapūgue ūmarogue erā waīre gojatunirā āhrrima. Īgupu mari Pagupu árīpehrerā beyebu āhrrimi. Īgu mera majarā āhrraa muapu. Eropirā gajirā ōarā Goāmu yarā mera gamenererā dopa ta āhrraa mūa sā. Erāre ta ñeri marirā iituhapu Goāmu. ²⁴ Eropirā Jesu mera majarā āhrraa muapu. Negohraguere Īgu dore apirare gohrotogu “Mūare ōaro īigura yuhū,” arī apīpu Goāmu marire. Īgu eropa arī apīdiro dopa ta īīdīgu árīmi Jesu. Īgu dire cohā Īgu sīrirañe mera marire ōaro taricū īīmi Īgu. Abelre Īgu di cóārare Īagu Goāmu Abelre wejēdīgure dipuwaja moapu. Jesucristo Īgu di cóārapure Īagu marire dipuwaja marirā árīcū īīpu. Eropiro Abel Īgu di cóāra bu gohra árīya. Cristopu Īgu di cóāra pūhru ōatarīaro īīpu Goāmu marire. Eropiro Cristo Īgu di cóāra bu gohra árībiriya.

²⁵ Eropirā ōaro īīque mūa. Goāmu yare mūare weregure ōaro yūhrirā árīque. Irībojegue ī yeba árīdīgu Moise Goāmu yare Īgu werecū peerā, bajarā irire peediabirīñorā. Erā eropa peediabirira dipuwaja, dipuwaja moapu Goāmu erāre. Erā tauro dipuwaja moagucūmi Cristore cóārāre. Cristopu ūmarogue árīgu Goāmu yare weregu āhrrimi. ²⁶ Irisubure Moiserē Īgu dorerire Īgu apirasubure Goāmu Īgu werenīguo mera yeba ñohmecū īīpu. Dohpaguepūre ōpa weremi Īgu: “Ī yeba ñohmecū yujusubu ta īīnemogura. Ī yeba dihta ñohmecū iisome yuhū. Ūmarogue

sãre ñohmecũ iigura," arĩ werepu ĩgu. ²⁷ "I yeba ñohmecũ yujusubu iinmogura," arĩgu, "Árĩpehrerire yu ĩhacũnugurare cóãgura," arĩgu iipu. Goãmu ĩgu opu árĩroguẽpũre cóãmasiya mara. Eropiro ĩgu ĩhacũnugurare ĩgu cóãcũ ĩgu opu árĩro dilta dujaroca. ²⁸ ĩgu opu árĩroguẽ warãca mari. Eropirã ĩgu opu árĩrore ĩgu cóãbiricũ ĩarã, Goãmũre "Õhaa," arĩrã mari. Eropirã umupeori mera, guhyadiaro mera ĩgu yare iirã mari ĩgure mucubiricũ iimorã. ²⁹ Peame ũjuro guhyaro dopa ta Goãmũ guhyaro dipuwaja moagu áhrimi. Eropirã ĩgure guhyadiaro mera umupeorã.

13

Õpa Goãmũre mucubiricũ iique

¹ Mũa mera majarãre mahi duhubiricãque. ² Masa mũa masibirã árĩquerecũ erãre ðaro mera mũa ya wirĩgue ñajaridoreque. Gajirã eropirã, masibiriquererã anyuare erã ya wirĩgue ñajaridoreñorã. Eropirã mũa sã eropa ta iique.

³ Peresu árĩrãre mojomoro ĩaque. Mũapu erã mera peresugue árĩrã mũa árĩboro dopa ta erãre mojomoro ĩaque. Gajirã erã ñero tarirã sãre mojomoro ĩaque. Erã iro dopa mũa sã ñero tariro dopa ta erãre mojomoro ĩaque.

⁴ Mũa mojoto dirinirãre árĩpehrerã ðaro game umupeoque mũa. Eropirã mojoto dirinirã gajirã mera ñero iirã árĩbiricãque. Árĩpehrerã ũma nome mera ñero iinirãre, nome ũma mera ñero iinirã sãre dipuwaja moagucumi Goãmũ.

⁵ Niyerure gamerã ne árĩbiricãque. Õpa arĩpu Goãmũ: "Mũare ne cóasome. Eropa itamuniguigura," arĩpu ĩgu. Eropirã mũa opari mera iripeta mucubirique. Wũaro gamenemobiricãque. ⁶ Eropirã gũiro mariro õpa arĩ pepirãca marmera mũa ya wirĩgue ñajaridori: Mari Opu marire itamugu áhrimi. Eropirã ne gũisome mari. Masa marire erã ñero iiborore gũisome mari, arĩ pepirãca mari.

⁷ Goãmũ yare mũare werenirãre mũare dorenirãre guñaque mũa. Eropirã ðaro erã árĩricũre guñaque. Eropa guñarã, Cristore erã umupeorare ĩhacũque mũa.

⁸ Jesucristo ne gohrotobeami. Iribojegue, dohpague sãre, puhũgue sãre ĩgu árĩdiro dopa ta árĩniguicãgucumi ĩgu. ⁹ Baja buheri gajiropa árĩri buherire peebiricãque ðari buherire guague cohãri arĩrã. "Ire baque. Ire babiricãque," arĩ buhemaacãma gajirã. Eropa arĩrire mari yũhricũ iri marire itamubeaa. Eropiro eropa arĩ buherire mari iicũ bu gohra ta áhrraa. Iri marire guñaturarã árĩcũ iibeaa. Goãmũ marire guñaturacũ iimi.

¹⁰ Cristo mari ñeri dipuwajare sĩridi árĩmi mari ñerire cóãbu. Pahiapũ õpa arĩrã áhrrima: "Waibũgu yũ Goãmũre wejẽ soe mujucũ, Goãmũ mera tarĩguca," arĩrã iirima erã. Eropa arĩrã erã ñeri iirare ne cóãnirã árĩmasibeama. ¹¹ Pahia opu Goãmũ ĩgu árĩri taribu gohrrague waibũgu wejẽdigũ dire aĩ ñajagu Goãmũre opu masa erã ñerire cóãdoregu. Eropigu ĩgu wejẽdigũ waibũgure iri maca tũroque soe cóãcãñorã. ¹² Eropa ta Jesu sã maca tũroque sĩripũ. ĩgu di cóãri mera masa ñeri marirã wacũ iibu sĩripũ. ¹³ Maca tũroque ĩgu sĩricũ ĩarã, erã buherire ĩgu cóãcũ ĩarã judio masa ĩgure ĩhaturĩñorã. Eropirã mari sã ĩgu mera majarã arĩrã. Mari eropa árĩcũ ĩarã masa mari sãre ĩhaturĩrãcoma. ¹⁴ Erã marire

ihaturiquerecũ ähraa. I yebague mari árwajaburi maca árĩbeaa. Mari puhrugue árĩburi macare corerã iiaa mari. ¹⁵ Eropirã Jesu ĩgu itamuro mera ĩgu Pagu mera wereniguia mari. Eropirã ĩgure ðaro serēniguicãrã. “Mari Pagu turagu ährimi,” arĩ umupeoniguirã gajirãre wererã. Mari eropa arĩ werecũ ĩgu mucubirigucumi. ¹⁶ Maa mera majarãre ðaro ĩique. Maa oparire gajirã sãre oque. Irire cãdijibiricãque. Maa eropa ðaro ĩirã Goãmure umupeorã iica. Eropa ĩirã ĩgure mucubiricũ ĩirãca.

¹⁷ Maa oparãre ðaro yuhrique. Erã dorero dopa ta yuhrique. Goãmu mware ĩhadibu buhedoregu apimi erã oparãre. ĩgu eropa apinirã árĩrã eropa mware ĩhadibuniguirã iima Goãmure tarinugadiabirã. Eropirã erãre ðaro yuhrique maa erã mucubiriri mera mware itamuboro dopa ta. Maa yuhribiricũ ĩarã erã bujawererãcoma. Eropa yuhribirã ðaro árĩsome maa.

¹⁸ Gware serēbasaniguique Goãmure. Ũmuri nucũ ðari dihtare iidiaa gua. Eropirã “Ñerire ĩirã iiaa,” arĩ pepibea gua. ¹⁹ I tamerare turaro serēbasaque Goãmure yare: Yojaro mera yu maa pohrugue wamasiborore serēque Goãmure.

Ipũ gojabeodigu ðadoretupu

²⁰ Goãmu marire ðaro árĩcũ ĩigu ährimi. ĩgu mari Opũ Jesucristo sĩridigure masupũ. ĩgu “Mware ðaro ĩigura,” marire arĩ apidigu ährimi. ĩgu eropa arĩrare ĩinijagu Jesupũ marire taugu ährimi. Mari ñeri dipuwajare ĩgu di cohã sĩripũ ĩgu. Eropigu ĩgu turagu, ovejare ĩhadibugũ iro dopa árĩgu, marire ĩgu yarãre ðaro ĩhadibumi. ²¹ Eropigu Goãmu ĩgure masudigu maa sãre itamuporo árĩpehreri ĩgu gamerire maa ĩiboro dopa. Eropigu Jesucristo ĩgu itamuri mera Goãmu ĩgu gamero dopa ta árĩpehrerã marire ðarire gohrotocũ ĩiporo. Eropirã árĩpehrerinũri Cristore umupeorã. Eropa ta ĩirã.

²² Yu acawererã, ire turaro mware doregura: Ipũ mware yu wererare ðaro mera peeque maa. I yu mware gojabeoripũ wuaripũ árĩbeaa. Eropirã ire ðaro peeque. ²³ I sãre mware weregura: Mari acaweregure Timoteore peresu árĩdigure wiuañorã. Dohpagohragã ĩgu aricũ yuhũ ĩgu mera mware ĩagu wagura.

²⁴ Maa oparãre, árĩpehrerã gajirãre Goãmu yarãre ero árĩrãre ðadorea. Italia majarã Jesu yarã sã mware ðadorema.

²⁵ Árĩpehreri mera Goãmu mware ðaro ĩiporo. Eropa ta ĩiporo. Iripēta ähraa.

Santiago

Santiago Israe masare macari wasirinirãre gojabeoñumi

¹ Yũhũ Santiago ipũ mera mũare ðadore gojabeogu iiaa. Goãmũ mari Pagũ pohro majagu áhrraa. Mari Opũ Jesucristo yare mohmegũ ta áhrraa yũhũ. Eropigu mũare Israe masare doce cururi majarãre Jesu yarãre macari wasirinirãre yũ acawererãre gojabeogu iiaa.

Goãmũ ðaro pee masirire ohomi marire, arĩ gojañumi Santiago

² Yũ acawererã, baja áríroca mua ñero tariburi. Mua ñero tariquererã ðaro mucubiriri mera pepicãque. ³ Eropa ñero tarirã, Jesure mua umupeorire diaye ta áricũ íhmurã iica. Eropirã ñero tariquererã Jesure mua ðaro umupeoniguicãñirã ïgure umupeonemorã warãca. Eropa warã mua ñero taririre bocatĩurãca. ⁴ Eropirã eropa bocatĩurã áríque mua duhuro mariro ðaro pee masirã mua áríboro dopa.

⁵ Goãmũ duhyaro mariro árípeherrerãre ohomi. Eropa ogu ïgure serẽrãre turibeami ïgu. ïgu eropa árígu áricũ masirã mũare pee masiri duhyarire ïgure serẽque. Mua eropa serẽcũ mua masiburire onemogacumi ïgu mũare duhyaro mariro. ⁶ Eropa serẽrã Goãmũre ðaro guñaturanijarã serẽque mua. “Gua serẽcũ Goãmũ guare obiribocumi,” arĩ pepibiricãque. Eropa arĩ pepirã wũariya maja pãgũri iro dopa áhrrima. Pãgũri iri durũro gohrotoro dopa ta erã sã erã guñarire durũro gohrotoma. Eropirã Goãmũre “Diaye ta iigu áhrrimi,” arĩ umupeobeama. ⁷ Eropa arĩ pepirãre erã serẽquerecũ ta ne merogã erã serẽrire osome erãre mari Opũ. ⁸ Dohpagãre ire gamedigu áríqueregu daja ñamigãre gajiropa guña wahgãmi daja. Eropa guñagure ero wabeaa.

⁹ Jesu yarã bu árírãre mojomorocurãre Goãmũpu oparã iro dopa íhami erãre. ïgu eropa íarã árírã mucubiriri mera áríporo. ¹⁰ Eropirã Jesu yarã doberi oparã árírãpu erã doberi pehrebore masirã mucubiriporo. Erã doberi bu áríri áhrraa Goãmũ ïgu íacũ. Doberi oparã erã doberi taa gori iro dopa pehrea waroca. Eropirã erã sã mucubiriporo. ¹¹ Abe muririgu ïgu turaro asicũ taapu ñañia wahaa. Eropiro goripu ñañi dija wa, ðari gori iri áríra pehrea wahaa. Eropa ta waroca doberi oparã erã doberire erã aĩ gameneoro watope. Erã iri doberi mera ta dederea warãcoma.

Ñero iidorerire tarinũgagu mucubirigu áhrrimi, arĩ gojañumi Santiago

¹² Ñero tarigu bocatĩugu, ñero iidorerire tarinũgagu mucubirigu áhrrimi. ïgu eropa bocatĩucũ, ïgu ñerire tarinũgacũ árípeherrerinuri nucu umaro maja ojocaririre ïgure ogucumi Goãmũ. “Íri ojocaririre oguca,” arĩ apipu Goãmũ árípeherrerã ïgure mahirãre. ¹³ Mua ñerire iidiarã “Goãmũ yare ñero iidoregu iimi,” arĩ pepibita. Ñerire iidorebeamĩ Goãmũ marire. Eropigu ïgupu masare ñero iidoregu áríbeami. ¹⁴ Masa erã turaro ñerire erã uaribejari ta iri ta erãre ñero iicũ iiaa. ¹⁵ Eropirã iri ñerire uaribejama masa. Eropirã iripure pepima. Eropa pepirã iri ñeripure iinigucãma erã. Erã eropa iiniguirĩ dipuwaja Goãmũ erãre peamegue cóagucumi.

¹⁶ Eropirã yũ acawererã, yũ mahirã, ne yujugu mũ basi guyabita. “Goãmũ yare dorecũ ñero iiaabũ,” arĩ pepibita. Diaye áríbeaa iri. ¹⁷ Mari

Pagu umaro majagu marire ðari dihtare ohomi. Īgu tamera abe umu majagure, ñami majagure, necã sãre ihacũnugudigu árĭgu, ĩgũpu ne gohrotobeami. Eropigu ĩgu árĭniguidiro dopa árĭnigucãmi. ¹⁸ Īgu gamediro dopa ta ĩgu ðari buheri mera marire ĩgu porã wacũ iimi mari ĩgu yarã árĭmũhtarã árĭboro dopa.

Diaye maja Goãmure umupeori ðpa ãhraa, arĭ gojañumi

¹⁹ Yu mahirã, yu acawererã, ire ðaro peeque mua. Goãmu yare ðaro peeque mua. Eropa peerã, pepiro mariro wereniguibiricãque. Eropirã guabiricãque. ²⁰ Yujugu ĩgu guagu árĭcũ suabeami Goãmu. ²¹ Eropirã árĭpehreri mua ñeri iirire, mua ñerire ñaribejarare duhuque mua. Eropirã Goãmure ðaro yuhirã árĭrã ĩgu buherire peeñaque mua. Īgu ya buherire mua peecũ Goãmũpu muare peamegue wabonirãre taugucumi.

²² Īgu yare peequererã ta yuhribirã ñerire guyarire pepirã iiaa mua. “Yuhribiricũ ðaroca,” arĭ pepirã guyarire pepirã iica mua. Eropirã ĩgu yare peerã iripure iique. ²³ Goãmu yare peequererã ta yuhribirã, ĩgu diapore diuru mera aĩ ĩaro dopa ãhraa mua. ²⁴ Īgu ĩgu diapore ĩara puhru waha, ĩgu ĩarare cãdijiro dopa ta mua Goãmu yare peequererã irire cãdija waha. ²⁵ Eropigu gajigũpu ĩgu peerare cãdijibigũpu Cristo ĩgu dorerare ðaro guñagu irire iigu mucubirigu árĭgucumi. Īgu tamera ĩgu peerare iicũ Goãmu ðaro iimi ĩgure. Iri doreri “Cristo ĩgu mahiri mera masare taumi,” arĭ buheri ãhraa. Iri buherire ne cõabigu mucubirigu árĭgucumi.

²⁶ Yujugu ĩgu gamero arĭmaacãgu, diaye ta Goãmure umupeobeami. “Goãmure ðaro umupeoa,” arĭ pepibodigu árĭqueregu ta ĩgu basi ta guygũ iimi. “Goãmure umupeoa,” arĭgu árĭqueregu ĩgu Goãmu yare yuhribiricũ ĩgu umupeori ne dulpiburi árĭbeaa. ²⁷ Diaye ta Goãmu mari Pagure mari umupeorã, ĩgu gamero dopa ta umupeorã ðpa iiaa mari: Pagu sumarã marirãre, wapeweyarã sãre erã ñero taricũ ĩarã, erãre itamua mari. Eropirã i yeba majarã ñeri erã iirinore iidiabeaa mari. Eropa iirã diaye ta Goãmure umupeorã iiaa mari.

2

Masare yujuropa ðaro iiro gahmea marire, arĭ gojañumi

¹ Yu acawererã, ðatariagure Jesucristo mari Opũre peerã, ĩgure umupeorã ãhraa mua. Eropa umupeorã árĭrã masare yujuropa ðaro iiro gahmea muare. ²⁻³ Eropi doberi opu oro berorire, mojoto sañari berorire opagu, wajacũre suhricũgu mua Jesu yarã gamenerero pohroque ĩgu aricũ ĩarã ĩgure ðaro mera bocatĩriboca. “Ohõ doaro ãhraa,” arĭboca mua ĩgure. Eropa ĩgure arĭquererã ta irisubu ta gajino moogu mojomorocũgu sã ñerĩne suhricũgu sã mua pohro ĩgu aricũ ĩarã ĩgũpũre ðaro bocatĩribiriboca mua. “Ohõ niguique. Ohõ yeba doaque,” arĭboca mua ĩgure. ⁴ Mua eropa iirã masare yujuropa iibirã iiaa mua. Eropirã ñerire pepirã masare beyerã iro dopa árĭrã iica mua. “Īpu niyerucũgu ðagu ãhrimi. Īpu gajino moogu ñegu ãhrimi,” arĭ beyea mua.

⁵ Yu acawererã, yu mahirã, yure peeque. Bajarã mojomorocũrãpũre Goãmure erã ðaro umupeomorãre, ĩgu opu árĭroguere árĭmorãre beyepũ Goãmu. “Eroguere warõca mua,” arĭ apipũ Goãmu ĩgure mahirãre. ⁶ Erãre ĩgu beyequerecũ ta muapu mojomorocũrãre ðaro umupeobeaa. Doberi oparãpu muare ñero iimũrima. Eropirã erã opu pohroque muare

aĩ taragãma muare weresãmorã. ⁷ Muapũ “Cristo ðagu yarã,” masa erã arĩrã àhraa. Baja doberi oparãpũ Cristore ñero arĩ wereniguima.

⁸ Goãmũ mari Opũ doreri tauro doreri òpa arãa: “Mũ basi mahiro dopa ta mũ pohro árrã sãre mahique,” arãa. Iñe dorerĩnere iirã, ðarire iiaa mua. ⁹ Masare yujuropa umupeobirã ñero iirã iiaa mua. Eropa iirã Goãmũ dorerire tarinugarã àhraa mua. Eropa ta arãa Goãmũ yare erã gojarapũ. ¹⁰ Goãmũ dorerire iirã árĩquererã ta yujuñe dorerĩnegãre mua iibirã ñeri dipuwajacurã wahaa. Mua yujuñegãre tarinugarã árĩpehreri ĩgu dorerire tarinugarã wahaa. Eropa iirã ñeri dipuwajacurã árĩnia mua dohpa. ¹¹ “Gajĩgu marapo mera ñero iibita,” arĩgu Goãmũ ta àhrimi. “Masare wejẽbita,” arĩ ðoregu ĩgu ta àhrimi Goãmũ. Gajĩgu marapo mera ñero iibiriqueregu ta masare wejẽgu Goãmũ ĩgu dorerire tarinugarã àhrimi ĩgu. ¹² Cristo marire turaro mahigu, marire doremi taubu. ĩgu dorerare mari iirare, mari iibirira sãre ĩagu marire beyegu arigucumi. ĩgu eropa beyemorã árĩrã ĩgu dorerire ðaro iirã. Eropirã ĩgu gamero dopa ta wereniguirã mari. ¹³ Dohpaguere mari gajirãre mojomoro iabiricũ Goãmũ muare ĩgu masare beyerĩnũ árĩcũ muare mojomoro ĩasome. Eropigu mari mojomoro ĩacũ ĩagu Goãmũpũ marire dipuwaja moasome.

Cristore umupeorãpũ ðarire iima, arĩ gojañumi

¹⁴ Yũ acawererã, peeque mua yure. “Cristore umupeoa yuhũ,” yujuju ĩgu arĩ pepiquerecũ ta gajirãre ĩgu ðaro itamubiricũ ĩgu “Cristore umupeoa yuhũ,” ĩgu arĩrapũ ne duhpiburi árĩbeaa. Eropa arĩ pepimaacãgure Goãmũ tausome. ¹⁵⁻¹⁶ ¿Jesu yagu, Jesu yago ñeri dilta erã suhri opacũ ĩarã erã bari moocũ ĩarã dohpa iiri mua erãre? “Òaro árĩque mua. Eropirã ðaro suhricuque. Òaro bari mera yapi wahgãque,” arĩquererã erã gamerire mua obiricũ mua eropa arĩri ne duhpiburi árĩbeaa. ¹⁷ Eropirã “Cristore umupeoaa yuhũ,” mua arĩquererã ta ðarire mua iibiricũ Cristore mua umupeori ne duhpiburi árĩbeaa.

¹⁸ Gajĩgu i yũ wererire ĩgu peediabiricũ ðpa arĩnemoboya yuhũ ĩgure. ðarire iibiriqueregu ta “Cristore umupeoa yuhũ,” arĩraa mũhũ. Mũhũ ðarire iibigu Cristore mũ umupeorire ĩhmupiburi árĩbeaa. Eropa arĩ pemasibeaa mũhũ. Yũpũ yũ ðari iiri mera Cristore yũ umupeorire ĩhmua, arĩnemoboya yuhũ ĩgure. ¹⁹ “Goãmũ yujuju ta àhrimi,” arĩ pepima masa. Mua eropa arĩ pepicũ ðapũricãa. Eropa árĩquerecũ ta iripẽta mua Goãmũre yuhribiricũ “ĩgu Goãmũ àhrimi,” mua arĩri duhpiburi árĩbeaa. Watẽa sã mua pepiro dopa ta “Goãmũ ta àhrimi yujuju ta,” arĩ pepima. Eropirã Goãmũ ĩgu árĩricũre masima erã. Eropa masirã gũi naragãma. ²⁰ Yujuju ðarire iibiriqueregu ta “Cristore umupeoa,” arĩ pepigu árĩgu pee masibigu àhrimi. “Cristore umupeoa,” arĩguno gajirãre ðaro iibigu ðiaye ta Cristore umupeobeami. Òpa arĩ weregura muare irire: ²¹ Iribojegue Abrahã mari ñecũ ĩgure umupeorire Goãmũ masidiañumi. Eropigu ĩgu magure Isaa waicũgure aĩgã wejẽdoreñumi. “Yũre umupeogu yũre yuhribocumi,” arĩ ĩgu árĩricũre masima erã. Eropa masirã gũi naragãmagũ wejẽdoreñumi. Eropigu Abrahã Goãmũ ĩgu dorediro dopa ta ĩgu magure aĩgã Goãmũre obu ĩgure wejẽbu iiriñumi. ĩgu eropa yuhricũ Goãmũ ĩgure “Wejẽbita,” arĩñumi. ĩgu dorediro dopa ta iibocuricũ ĩagu “Diaye ta ðagu àhrimi,” arĩ ĩañumi Goãmũ ĩgure. ²² ĩgu eropa arĩ ĩacũ ire masia mua: Abrahã Goãmũre umupeogu ĩgu dorerire yuhriñumi.

Eropa yuhriḡu Goāmure iḡu umupeorire ii iḡmuñumi. ²³ Eropiḡu erā Goāmū yare erā gojarapū erā arī gojadiro dopa ta eropa wayoro: “Abrahā Goāmure umupeorū. Iḡu eropa umupeocū iḡaḡu “Ōaḡu āhrimi iḡu,” arī iapū Goāmū iḡure,” arī gojañuma Goāmū yare erā gojarapūḡuere. Iḡu eropa arī iacū masirā “Abrahā Goāmū mera majagū āhrimi,” arīñuma masa iḡure.

²⁴ Eropirā ire masia mūa: “Goāmure umupeoa,” arīḡu, iḡu ḡarire iibiricū iḡaḡu Goāmupū iḡure “Ōaḡu āhrimi,” arī iabeami. Goāmure umupeogupū diaye ta iḡu ḡaro iicū iḡaḡu “Ōaḡu āhrimi,” arī iḡami Goāmū iḡupure. ²⁵ Eropa ta arī iañumi Goāmū Rahab waicugore ūma mera ñero iimuridigore. Josué iḡu obeonirāre ḡaro bocatūri “Ōaro ñajarique,” arīñumo iḡo erāre. Eropa iḡo erā dujadiacū iḡopū erāre gajī mare iḡmuñumo erāre iḡaturirā wejēri arīḡo. Eropa Goāmū yarāre itamugo Goāmure iḡo umupeorire iḡmuñumo. Iḡo eropa iicū iḡaḡu “Ōaḡo āhrimo,” arī iañumi Goāmū iḡore. ²⁶ Eropa ta āhraa. Mari dupure sīporā maricū ojocaribea mari. Eropiro sīporā mariro mari dupū duḡpiburi dupū árībeaa. Eropa ta “Goāmure umupeoa,” arīquererā ta gajirāre ḡaro iibirā mari árīcū diaye árībeaa mari umupeori. Eropiro mari umupeori duḡpiburi árībeaa. Sīporā mariro erāre iḡaturirā wejēri arīḡo. Eropa Goāmū yarāre itami dupū iro dopa ta āhraa.

3

Mari disiro wiririre wereñumi

¹ Goāmū yare masare buherāre iḡu yare erā buhemaacācū, erā ḡaro iibiricū iḡaḡu erā tamerare gajirā tauro dipuwaja moaḡucumi Goāmū. Irire mūa masia. Eropirā mūa mera majarā masare buherā bajarā árībita. ² Árīpehrerā mari bajasuburi ñerire iiaa. Yujugu ñerire ne wereniḡuibigū Goāmū gamerire ḡaro iḡu āhrimi iḡu. Eropiḡu gajī ñeri sāre iibeami. ³ Mari wereniḡui queori mera buhecū ḡpa āhraa i: Cabayure iḡu disiro comemiji iḡu nerore ñehadiuburimijire mari apia iḡure majinḡacū iimorā. Eropirā irimiji comemiji mera iḡure iḡu waborore mari taramajinugua. Irimijigā mirimijigā árīquerecū ta irimiji mera iḡu dupure wacū iiaa. Eropa ta mari disiro mera miri disirogā árīquerecū ta wūaro wacū iiaa mari. ⁴ Dohodiru queoriñere werenemogura mūare: Gasiru wūadiru iriru árīquerecū ta irirure miruñe turaro weāquerecū ta autugupū miri mijigā mera iriru waborore autumi. ⁵ Eropa āhraa mari wereniḡuri. Mari disiro miri disirogā árīquerecū ta baja wereniḡuri wiria. Miri peamegā wūaro ūju wahḡūro dopa ta mari disiro mera wūaro ñero wacū iiaa. ⁶ Eropiro mari wereniḡuri peame iro dopa āhraa. Mari wereniḡuri árīpehrerire ñerire iicū iiaa marire. Peame ūjunūgaro ⁴ Dohodiru queoriñere werenemogura mūare: Gasiru wūadiru iriru árīquerecū ta irirure m dopa ta mari wereniḡuri mera mari ḡaro árībodirore goroweoa mari. Mari ñerire wereniḡuirā watī dorero dopa ta eropa iirā iiaa. ⁷ Árīpehrerāre nuḡu majarāre waimurāre, mirimagū porāḡāre, waimarā paharāre, waire mari masa seyacū iimasia. Eropirā mari bajarā erānore masa seyacū iituhabu. Eropirā erā ḡaro masa seyacoma. ⁸ Erāre masa seyacū iiquererā ta mari wereniḡuri mera mari basi pee masiri mera wereniḡuicū iimasibea. Marriru árīquerecū ta

irirure mi ejoräre nijiyajaro dopa ta mari disiropu ne nijiyajabirigohracãa. Mari wereniguiiri ñetariari ähraa. Eropiro añã gajiräre igu wejêro dopa ta marire gajirã säre ñetariaro wacũ iiaa mari disiro. ⁹ Mari disiro mera mari Pagu mari Opu Goãmure mari ôaro arĩ wereniguia. Eropa wereniguiquererã ta masapure ñero arĩ wereniguia. Goãmu iro dopa árĩrã igu ñhacũnugunirã árĩquerecũ ta eräre ñero arĩ wereniguia mari. ¹⁰ Yuju disirorriru árĩquerecũ ta irirure me ta ñeri wereniguiiri sã, ôari wereniguiiri sã wiria. Yu acawererã eropa arĩ wereniguibiricãro gahmea. ¹¹ Maugã dipa ohma wiuri gobere yuju gobere ôari dihta wiria. Gaji gobere ñeri dihta wiria. Eropirã Goãmu yarã säre ôari dihtare wereniguiiro gahmea. ¹² Yu acawererã, iguigu poegu ducare ducacumasibea. Eropiro poegupu iguigu ducare ducacumasibea. Eropi maugã dipa ohma wiuri gobere moayuari deco wiricũ, imisiri deco sã wirimasibea. Eropa ta mari disirore ôari wereniguiiri, ñeri wereniguiiri mera wiricũ gamebiricãro gahmea.

Diaye maja masiri ôpa ähraa, arĩ gojañumi Santiago

¹³ Yujuräyeri mua mera majarã masirã ährima. Eropirã “Gajirã tauro gua masirã ähraa,” arĩbiricãporo. Eropa arĩbirã ta ôarire iique mua. Eropa ôarire iirã diaye ta masirã ähraa mua. ¹⁴ Eropirã gajigu gajinore igu opacũ ñhaturirã, mua ya arĩburi dihtare iidarã árĩrã, “Goãmu yare ôaro masia gua,” arĩbiricãque. Mua eropa arĩrã árĩrã guyarã ähraa mua. ¹⁵ Eropa ñerire pepirã erã ya pepiri Goãmu ya pepiri arĩbeaa. Erã pepiri i yeba majarã erã ñero pepiri ähraa. Erã pepiripu watĩ ya ähraa. ¹⁶ Masare ñhaturirã, erã ya arĩburi dihtare iidarã eropa game duyasoniguicãma. Árĩpehreri ñerire iima. ¹⁷ Gajirãpu Goãmu yare ôaro masiri oparãpu erã tamera eropa iimaacãrã iibeama. Eropirã erã ne game duyaso beama. Eropa iirã masa ôarã, dorerire ôaro yuhrirã, mojomoro ñarã, masare itamurã, masare yujuropa iirã ährima erã. Irire iirã guyaro mariro iima erã. Eropirã pee masirã gohra ährima. ¹⁸ Eropirã gamequeãro mariro árĩrã, gajiräre “Gamequeãbiricãrã mari,” arĩ bosarã ôarã wacũ iirã iiaa mari masare.

4

I yeba maja ñerire gamerã, Goãmure gamebirã ähraa mua, arĩ gojañumi igu

¹ ¿Duhpirã mua game duyasori? ¿Eropirã duhpirã gamequeãri mua? Ñerire ñaribejarã gamequeãdiaa mua. ² Gajinore mua gahmea. Eropa gamerã masare wejêa mua mua erã yare emamorã. Eropirã gajigu gajinore igu opacũ ñarã irire mua burigã gahmea. Eropa gamerã irire aĩmasibea mua. Eropirã irire game duyaso gamequeãa mua. Goãmure serëbirã, mua gamerire bocabeaa. ³ Eropirã serërã mua ya arĩburi dihtare serëa mua mua gamero dopa ta iiniguicãmorã. Eropa mua serëcũ Goãmu mua serërire obeami. ⁴ Goãmure cóarã ña mua. I yeba maja ñerire gamerã, Goãmupure gamebirã ähraa mua. ¿Irire masibeari mua? Eropigu i yeba majarã ñerire gamegu Goãmure gamebigu arĩtuhami. ⁵ Ôpa arĩñumi Goãmu yare erã gojarapũ: “Goãmu igu Espiritu Santore mari mera arĩbure apimi. Eropigu Espiritu Santopu marire mahigu ñerire mari ñaribejarire gamesãbeami igu. Eropigu doero dopa ta marire turaro mahimi erãgue ñerire iiri arĩgu,” arĩ gojañumi iribojegure. Igu

eropa arĩ gojara bu gohra árĩbeaa. Diaye árĩro tiaaa. ⁶ Eropigũ Goãmu marire òaro itamumi mari ñerire iibiriburire. Òpa àhraa Goãmu yare erã gojarapũ: “Yũ tamera gajirãre masi tarinũgaa,” arĩgure Goãmu ñaturimi. Gajigũpure ‘Ñegu bu árĩgu àhraa yũhũ,’ arĩgũpure Goãmu itamumi ñerire ïgu iibiriborore,” arãa ïgu yare erã gojarapũ. ⁷ Eropirã Goãmure òaro yũhrirã árĩque mua. Eropirã watĩre yũhribiricãque. Mua eropa yũhribiricã ïagu ïgũpũ muare duhucãgũcumi. ⁸ Goãmure òaro yũhrique mua. Mua eropa iicũ ïgũpũ muare mahi itamugũcumi. Ñerã àhraa mua. Eropirã ñerire iinemobiricãque. Ñeri sãre gahme, òari sãre gamerã àhraa mua. Eropirã mua ñeri iirare bujawereque. Mua eropa iicũ ïagu Goãmu mua ñeri iirare cãdijigũcumi. ⁹ Mua ñeri iirare turaro bujawereque. Eropirã mua ñeri iira dipuwajare oreque. Mucubirirã árĩbiricãque. Eropirã mua ñeri iirare ñero sĩporãcu, irire guhyasĩriñariro pepique. ¹⁰ “Ñegu bu árĩgu àhraa yũhũ,” arĩrã Goãmure umupeoque. Mua eropa iicũ ïagu ïgũpũ mua ñeri iirare cóãgu “Òarã àhraa,” arĩ ïagũcumi muare.

Erã acawererãre Jesu yarãre erã basi ñeri quere iidorebiriñumi

¹¹ Yũ acawererã, Jesu yarã árĩrã, mua basi ñeri quere iibiricãque. Mua acaweregure ñeri quere iirã ïgure dipuwaja moadorediarã árĩca mua. Cristo doreripũ masare dipuwaja moadoreri árĩtuhaa. Eropirã masare ñeri quere iirã Cristo ya dorerire òpa arĩrã iica: “Marire òaro dorebeaa Cristo ya. Eropirã mari gamero dipuwaja moadorerã,” arĩrã iica masare ñero werewuarã. Eropã arĩrã Cristo dorerire ñero arĩ wereniguirã dujaa mua. Eropirã iri dorerire yũhribirã dujaa. ¹² Masare dorerire ogũ, masare beyegũ Goãmu ta àhrimi. Eropigũ masare peamegue wabonirãre ïgu ta taumasimi. Eropigũ ïgu ta masare peamegue cóãmasimi. Eropirã maripũ masare “Ñerã àhrima,” arĩmasibeeaa. Mari acawererãre beyebu Goãmu dihta àhrimi.

Ñamigãguere dohpa marire waborore masibeeaa mari

¹³ Dohpaguere yure peeque mua. Òpa arĩboca mua Goãmure guñaro mariro: “Dohpagãre o ñamigãre gajĩ macague árĩrã warãca. Eroguere yuju bojori árĩrã, gajinore dua, asũ iirãca. Eropã iirã wajatarãca mari,” arĩboca mua. Eropã arĩrã árĩrã, yũpũre peeque mua. Eropã arĩrãre ire werebu iiaa: ¹⁴ Ñamigãguere dohpa marire waborore masibeeaa mari. Imica àhri, mata pehremaaro dopa ta àhraa mari árĩricuri. Imica merogã árĩniguirĩ pehrea waha. Eropã mari sã merogã árĩniguirĩ sĩria warãca. ¹⁵ Eropirã òpa arĩ pepiro gahmea muare: “Goãmu ïgu gameropẽ árĩrãca mari. Eropirã ïgu gamero mera iirãca mari,” arĩ pepiro gahmea muare. ¹⁶ Muapũ “Dohpaguere mari gamero òpa iirãca,” arĩniguirãa mua Goãmure guñaro mariro. Eropã arĩ wereniguirã ñerire iirã iiaa mua. ¹⁷ Eropirã òarire mari iiburire masiquererã ta irire iibirã ñerire iirã iiaa mari.

5

Doberi oparãre wereñumi Santiago

¹ Doberi oparã mua dohpaguere peeque yure. Pũhũguere mua ñero tarirãca. Eropirã gaguinĩgui orerãca mua. ² Mua doberi boapehrea waroca. Eropiro mua suhrire surirã sã bapehocãrãcoma. ³ Mua niyerure

mua wuaro dibura ne duhpiburi áríbeaa. Mua eropa dibucú ïagu mua niyerure mahicú masimi Goámu. Eropirá niyerure mua mahira dipuwaja ñero tarirāca. Iri dipuwaja peamegue warāca. ⁴ Mua ya poerire mohme corerāre wajayebeaa mua. Eropirá mua erāre guyaa. Eropigu erāre mua wajayebirira niyerure ïagu, mua guyarare masimi Goámu. Muare mohme corerā wajaseadiarā, gaguiniguima erā. Erā eropa arī gaguiniguicú mari Opu turatarigu peemi erāre. ⁵ I yebaguere baja doberi mera áríricua mua. Árípehrerire opará mua gameri dihtare mua uaribejarire iiaa mua. Eropirá wuagu wecu erā ōaro ejogu iro dopa áríricua mua. Eropirá wuagu wecu ïgu diserecú ïarā ïgure erā wejēburi gorogue aī wahgāma. Eropa ta mua sāre wuaro mua opara puhru muare ïgu dipuwaja moarogue aīgāgucumi Goámu muare. ⁶ Ōarāre peresu iidore wejēdorebu mua erāre. Mua eropa iicú erāpu duhri wiriamasibirama.

Cristo ïgu dujariborore ōaro coredorepu marire Santiago

⁷ Eropirá yu acawererā, mari Opu Cristo ïgu i yeba ïgu dujariborore ōaro coreyuque. Pohe opu ïgu oteri ducacaburisubure ïgu ōaro corero dopa ta ōaro coreyuque Cristo dujariborore. ïgu oteriguere “Deco ariporo,” arīgu ïgu pohere ōaro puhriburire ōaro cohremi ïgu. ⁸ Eropa ta mua sā ōaro coreyuque. Mari Opu ïgu dujariboro merogā duhyaa. Eropirá Goāmure eropa guñaturaniguicāque mua. Eropirá eropa coreniguicāque mua.

⁹ Yu acawererā, mua basi duyasobiricāque Goámu muare dipuwaja moabiriboro dopa. Eropirá ire guñaque mua. Dipuwaja moabu ïgu dujariboro merogā duhyaa. ¹⁰ Yu acawererā, ñero tariquererā ta yujuro bojeque Goāmure cóaro mariro. Goámu yare weremuhtanirā mura erā Goámu ya áriburire iirā ñero tariquererā duhubirimariñuma. Erā duhubiridiro dopa ta duhubiricāque mua sā. ¹¹ Eropirá ire guñaque mua. Ñero tariquererā ta Goāmure duhubirāre Goámu ōaro iigucumi. Iribojeque majagu Job waicugure peebe mua. ïgu ñero tariqueregu ta Goāmure duhubiriñumi. Eropigu ïgu ñero tarira puhru, Goámu ïgure ōaro iinñumi. Goámu mari Opu marire ōaro mojomoro ïagu arīgu eropa iinñumi ïgure. Iri árípehrerire masia mua.

¹² Yu acawererā ire masique. Ōpa arīma waípeo piyurā: “Ūmaro majagu mera diaye arīrā iiaa,” arī waípeoma masare peedorerā. Erā iro dopa arī waípeo piyubiricāque. Ire muare turaro dorea. Mua gajirāre wererā, ōaro diaye wereque erāre guyaro mariro. Arīnemopeobiricāque. Eropa mua diaye werecú ïagu Goámu mua gajiropa arīra dipuwajare dipuwaja moasome.

¹³ Mua mera majagu ñero tarigu arīgu, Goāmure serēporo ïgu. Gajigu mucubirigu arīgu Goāmure mucubiriri mera bayaporo. ¹⁴ Mua dorecurā, Jesu yarā oparāre sihubeoque mua. Mua eropa sihubecú erāpu muare uyu mera sūrācoma. Eropa iirā Goāmure mari Opure mua dorecurare serēbasarācoma erā. ¹⁵ Eropa arī serēbasarā “Mari serēro dopa ta ïgu iigucumi,” erā arī pepicú muare dorecurāre Goámu itamugucumi. Eropa iigu muare ōarā wacú iigucumi mari Opu. Eropigu mua ñeri iira dipuwaja mua dorecurā arīcú ïarā muare serēbasarācoma. Erā eropa serēbasacú ïagu mua ñeri iirare cādijigucumi Goámu. ¹⁶ Eropirā mua mera majarāre mua ñeri iirare game pepuri weretarique. Eropirā mua basi Goāmure game serēbasaque. Mua eropa arī serēbasacú mua serēbasanirāre Goámu taugucumi. Ōarire iirā mua arīcú Goāmure

mua turaro serēbasadiro dopa ta iigucumi Goāmũ. Eropiro mua erāre serēbasari bu árĩri árĩbeaa. ¹⁷ Goāmũ ya weremuhtadigu mũrũ Elia mũrũ mari iro dopa masũ árĩñumi. Eropigu masa ñero iira dipuwaja “Deco aribiricāporo,” arĩ turaro serēñumi Goāmũre. Ĩgu eropa arĩ serēcũ uñre bojori gohra gaji bojori deco deco aribiriyoro i yebaguere. ¹⁸ Eropigu dipaturi Goāmũre deco ĩgu aridore serēcũ deco mereyoro daja. Eropiro dipaturi i yebaguere yucũ bugũ ðaca ðacacuyoro. Eropiro Goāmũre mari serēri bu árĩri árĩbeaa.

¹⁹ Yũ acawererã, mua mera majagu Goāmũ yare diaye maja árĩrire duhudigu Goāmũ yare dipaturi ĩgu gameborore ĩgure wererã, ðaro iirã iiaa mua. ²⁰ Eropirã ire masique mua: Goāmũre duhudigũre Goāmũre dipaturi gamecũ iirã, peamegue wabodigũre taricũ iirã iica mua. Eropigu baja ĩgu ñeri iirare Goāmũ cãdijicũ iirãca mua ĩgure.

1 San Pedro

Jesu gaji macari waniräre gojabeoñumi Pedro

¹ Yuhü Pedro Jesucristo igu buhedore apidigu ta ähraa. Eropigu müare yoaro maja macarigue waniräre, Pontó yebague waniräre, Galacia yebague, Capadocia yebague, Asia yebague, Bitinia yebague wanirä säre müare árìpehreräre gojabeogu iiaa yuhü. Müare òadore gojabeoa yuhü.

² Negohraguere Goämü mari Pagü "Òpa iigüra," igu arìdiro dopa ta müare beyerü. Igu beyera pührü igu Espiritu Santo mera müare Goämü yarä árìmoräre acupü. Òpa ta acupü igu Jesucristore òaro yührimorä mua árìboro dopa. Igu di cóáro mera ñerire coenirä mua árìboro dopa iipü. Eropirä Goämü igu mahiri mera òaro árìque mua.

Jesu yarä árìrã marire umarogue igu aigãborore corerã iiaa mari, arì gojañumi Pedro

³⁻⁵ Goämü marire turaro mojomoro ñagu, Jesucristo sîridigu igu masa müriaro mera marire òarã gohrotocü iimi. Eropa iigu igu gohrotori mera Goämü porã ta wahaa mari. Eropa warã igu mera eropa mari òaro árìniguicãborore òaro masia mari. Eropigu müare igu òari opaburire odiagu müare coregu iimi. Iri müare igu oburi ne pehresome. Eropigu ñgure mua umupeoräre Goämü igu turari mera müare ñhadibugü, taricü iigucumi. Pehrerinü árìcü müare igu taurare masicü iigucumi igu. Eropirä igu marire òaro mojomoro ñacü ñarã, ñgure Goämure mari Opü Jesucristo Pagure "Òagu, turagu ährimi," arì umupeoro gahmea marire.

⁶ Eropa igu taumorã árìrã burigã mucubiriro gahmea. Mero i yeba mua árìropë, bajasuburi mua ñero tariquererã ta burigã mucubiriro gahmea. ⁷ Eropa ñero tariquererã ta Goämure cóãbirã mua árìrã "Queoro Jesucristore umupeoa gña," arìmasia mua ñgure. Mua ñero tariquererã Jesucristore umupeoniguicü mua umupeoripü yuju diaye árìbeaa. Eropigu mua ñero taricü ñagu "¿Árìro ta mua yure umupeori?" arì queoñagu iimi Goämü müare. Mua eropa ñero tarirã diaye ta Cristore òaro umupeoniguicü "Òaro iiabu mua," arìgucumi Cristo müare. Eropigu Jesucristo dujarigu mua ñgure òaro umupeoniguiniräre òaro ñagucumi mucubiriri mera.

⁸ ñgure Jesucristore ñabiriquererã mahia mua. Eropirä dohpaguere ñgure ñabiriquererã ta ñgure "Diaye ta iigu ährimi," arì umupeoa. Eropa umupeorã turaro mucubiria mua. Mua eropa mucubirirã mua Goämü pohro mucubiriboro dopa ta mucubiria. Müare eropa mucubiricü iimi Goämü. Eropirã turaro mucubiria. ⁹ Eropigu Goämü müare peamegue waboniräre taricü iigucumi mua ñgure òaro umupeoro mera.

¹⁰ Goämü igu masare eropa tauborore iribojegue Goämü yare weremuhtanirã irire masidiarã serëpi ñamuriñuma. ¹¹ Cristo igu ñero tariborore, igu sîridigu masa müriaborore, árìpehrerã tauro opu igu árìborore erã ero coregue ta weremuhtañuma. Jesucristo igu Espiritu Santo igu itamuri mera eropa wereñuma erã. Erã eropa weremuhtaquererã erã wererare masibiriñuma. Eropirã erã wererare òaro masidiarã serëpi ñamuriñuma erã Goämure. ¹² Iri erã werera Jesucristo ariburi erã ya árìburi árìbiriyo. Mari òaro árìburi árìyo.

Irire eräre masicũ iĩñumi Goãmũ. Eropirã dohpaguere umarogue obeodigu Espiritu Santo İgu itamuri mera õari buherire muare gua werea. Iribojegue mua ya árĩburire erã weremuhtara iri ta árĩcãro tiaa dohpaguere gua muare wereri. Iri buherire anyua sã burigã masidiariñuma.

Goãmũ marire ñeri marirã árĩdoremi, arĩ gojañumi Pedro

13 Eropirã õarire guña masi arĩyuque mua. Eropirã guhyadiaro árĩque. Cristo İgu dujaricũ Goãmũ muare İgu õaro tauborore guñaque. Eropirã irire õaro mucubirimuhtarã coreque. 14 Iribojegue Goãmure masinibirãque ñerire uaribejarã árĩmurnirã árĩribu mua. Dohpaguere irire iibiricãque. Eropirã majirã erã pagu sumarãre õaro yuhriro dopa ta Goãmure õaro yuhrique daja. 15 Eropirã İgu yarã árĩmorãre muare sihubeodigu ñeri marigu İgu árĩro dopa ta mua sã ñeri marirã ta árĩque. Eropirã õari dihtare iirã árĩque. 16 Eropa ta arĩ gojañuma Goãmũ yare erã gojarapũque: “Ñeri marigu ahraa yuhu. Yu eropa árĩcũ mua sã ñeri marirã árĩque,” arĩmi Goãmũ, arĩ gojañuma.

17 İgu Goãmũ mari Pagu yujurãyeri árĩpehrerã erã iirare İagu yujuro mera beyemi İgu eräre. İgu eropiigu árĩcũ İgure “Ahu,” arĩdiarã õaro iiquerire uaribejarã árĩmurine. I yeba mua árĩropẽ guhyadiaro mera õaro iique mua. 18 Mua ñecu sumarã mura erã árĩricuri ne duhpburi árĩbiriyo. Mua sã erã iidiro dopa ta iinirã mua árĩquerecũ ta Cristo muare İgu yarã árĩmorãre iimi. Mari wajamorire İgu wajayebasaboro dopa ta mari ñeri iirare cãdijiborore mari ñeri iira dipuwajare wajayebasami. Irire õaro masia mua. Eropa wajayebasagu İgu niyeru mera, oro mera wajayebasabirimi. Niyeru, oro sã dederea waroca. 19 İgu di cõara mera ta wajayebasami mari ñeri iira dipuwajare. Ovejagã erã Goãmure obodigu õagu İgu árĩdiro dopa ta Jesucristo õagu ñeri marigu árĩdigũ árĩmi. 20 Iribojeguere i yebare İgu İhacũnuguboro coregue Jesucristo İgu eropa waborore masituhapu mari Pagu Goãmũ. Dohpaguepure pehrerinu coregã árĩcũ, Cristo sĩribasami muare mua ya árĩburire. 21 Eropirã Jesucristo İgu itamuro mera Goãmure umupeoa mua. Goãmupu Cristore sĩridigure masudigu árĩmi. Eropigu İgure umarogue apigu, árĩpehrerãre İgure umupeocũ ipu mari Pagu. İgu eropiicũ İgure mari Pagure “Diaye ta iigu ahrimi,” arĩ umupeoa mua. Mua eropa umupeocũ õaro iimi muare. Eropirã mua İgu mera õaro árĩniguiboro õaro masia mua.

22 Óari buherire diaye majare yuhrirã mua ñerire duhunirã ahraa mua. Eropa árĩrã, diaye ta mari acawererã Jesu yarãre mahi umupeomasia mua. Eropirã mua mera majarãre mua siporãri mera turaro mahi umupeoque. 23 Mua dipaturi masa dehyoaro dopa ta Goãmũ porã wahabu mua. Mari pagu sumarã mera masa dehyoanirã árĩrã, puhru sĩria warãca. Iri iro dopa árĩbeaa Goãmũ porã mua wacũ. Goãmũ mera árĩniguicãrãca. Goãmũ İgu buheri mera İgu porã wahabu mua. Iri buheri pehrebiriburi buheri marire Goãmũ mera eropa árĩniguicũ iiaa. 24 Ópa ahraa Goãmũ yare erã gojarapũ:

Árĩpehrerã masa taa iro dopa wahama. Eropiro õari erã opari sã gori iro dopa ahraa. Taa masa, sĩria wahaa. Gori sã masa, sĩria wahaa. Iri taa iro dopa ta mari masa sã wahaa. 25 Mari Opu ya buheripu ne pehresome. İgu arĩdiro dopa ta eropa waroca, arĩ gojañuma.

Iri buheri muare erã werera ðari buheri ta Jesucristo marire tauburi buheri ta ahraa.

2

¹ Eropirã áriþehreri ñeri iirire, erã purupupu erã ñero ii corerire, gajirã gajinore opacũ ihaturirire, gajirã ñeri quere moarire, irire duhuque mua. ²⁻³ Mari Opu muare ðaro igu iirire dabero masituhaa mua. Eropirã ne masa dehyoarãgã apicore erã gamero dopa ta mua sã ðari buherire Goãmu yare turaro gameque. Eropa igu yare gamerã mua igure mua guñaturanemorãca. Igu yarã ðaro pee masirã árirãca.

Cristo ojocaricũ igu utãye iro dopa árigu ahrimi, arĩ gojañumi Pedro

⁴ Cristo ojocaricũ igu utãye iro dopa árigu ahrimi. Masa Cristore gamebirima. Erã gamebiriqerecũ Goãmupu igu Pagupu igure beyedigu árĩmi. Ôatariagu ahrimi. Igu eropa árigu áricũ igure gameque. ⁵ Eropirã mua Jesu yarã árirã mera Goãmu ahrimi. Eropirã yujuro mera igu yare ðaro iirã árique mua. Igu ya áriburire mua iimorãre beyedigu árĩmi. Eropirã mua Jesucristo itamuri mera igu yare ðaro iirã igu Goãmure mucubiricũ iiaa. ⁶ Ôpa ahraa Jesucristore Goãmu yare erã gojarapũ: Cristo utãye iro dopa yu beyedigu ahrimi. Eropigu ôatariagu ahrimi.

Igu mariro yaharã wamasibeama. Eropigu igure Jerusalengue dohpague apigu iiaa. Igu masare ðaro áricũ iigucumi. Eropirã igure umupeorã mucubiriniguirãcoma, arĩmi Goãmu, arĩ gojañuma Goãmu yare weremuhtanirãgue.

⁷ Igu umupeorãpu “Ôatariagu ahrimi,” arĩrãcoma. Igu umupeo- birãpu ñero warãcoma. Erãre ôpa ahraa Goãmu yare erã gojarapũgue: Ihĩ Cristo utãye iro dopa ta Goãmu beyedigu ahrimi. Igu Goãmu beyedigu

áriqerecũ masa igure gamesome. Igu gamebiriqerecũ Goãmu igure opu acumi áriþehrãre dorebure, arĩ gojañuma.

⁸ Ô sãre arãa Goãmu yare erã gojarapũ:

Igu utãye iro dopa árigure gamebirã dederea warãcoma, arĩ gojañuma iribojeguere.

Eropa gojarã Jesucristore masa gamebiriburire ôpa arĩ gojamuhtañuma. Erã igure gamebirã Goãmu ya buherire yuhribirima. Cristore gamebirã, igure tarinugarã, Goãmu pohrogue ejasome erã. Erã eropa waborore apipu Goãmu erãre.

Ôpa ahrima Goãmu yarã, arĩ gojañumi Pedro

⁹ Muapu Goãmu igu beyenirã ahraa. Igu mari Opu igu yarã pahia igu yare itamurã ahraa mua. Eropirã igu ya curu majarã ñeri marirã Goãmu yarã ta ahraa mua. Eropigu muare naitãro áriþonirãre boyoropu árimorãre, ñerire iibirimorãre, ðaripure iimorãre aĩdigu árĩmi muare. Eropa ta aĩdigu árĩmi Goãmu mua igu ðarire igu ðaro iirare gajirãre weremorãre. ¹⁰ Ero coregue duhpimorã áriþirimuriribu mua. Dohpague tamerare Goãmu yarã ahraa mua. Ero core muare mojomoro iãbupu marinimi muare dohpa. Dohpaguepure muare Goãmu mojomoro iãgu ahrimi.

Goãmu yare iirã árique mua, arĩ gojañumi

¹¹ Yu mahirã, mua i umure wari masa iro dopa ahraa dohpaguere. Goãmu pohro wamorã ta ahraa. Mua eropa árirã áricũ, ire turaro werea

muare: M̄ua ñeri uaribejarire iibiricãque. Iri ñerire uaribejarã, ñerã warã iica m̄ua. ¹² Goãmure gamebirã watope árĩrã òaro iirã árĩque m̄ua guare werewuari arĩrã. M̄ua eropa iirã árĩcũ muare dohpaguere ñero werewuadiaquererã m̄ua òaro iirire masirãcoma erã. Eropã masirã erã Goãmure “Òagu, turagu àhrimi,” arĩrãcoma. Òpa ta arĩrãcoma Cristo ìgu i yebague ìgu dujaricũ.

¹³ Mari Opu yare iirã árĩrã ò majarã oparã sãre yuhrique m̄ua. I yeba majagure m̄ua árĩpehrerã tauro opu árĩgure ìgu sãre yuhrique.

¹⁴ Goãmũ erã oparãre apipu tarinugarãre dipuwaja moamorãre. Eropigu òaro iirãre “Òaro iiabu m̄ua,” arĩdoregu apipu erãre. Ìgu eropa apicũ erãre yuhrique m̄ua. ¹⁵ M̄ua òaro iicũ ìarã, pee masibirã erã sihajaro muare weresãdiaquererã ta weresãmasibeama. Eropigu m̄ua òaro iicũ gahmemi Goãmũ.

¹⁶ M̄ua ñecu sumarã árĩricuri doca árĩnirãre Goãmũ muare taudigu árĩmi. Eropa taunirã árĩquererã ta, “Guare doreri mara. Eropirã gua ñerire iirãca,” arĩ pepibiricãque ñerire iiri arĩrã. Eropirã “Goãmũ pohro majarã àhraa gua,” arĩ pepique m̄ua. Eropa arĩ pepirã ìgu dorerire iique m̄ua. ¹⁷ Árĩpehrerã masare mahi umupeoque. Mari acawererã Jesu yarãre mahi umupeoque. Goãmure guhyadiaro ìaque. I yeba majagu opu sãre umupeoque.

Cristo ñero tarigu ìgu yujuro bojediro dopa ta yujuro bojeque m̄ua sã, arĩ gojañumi Pedro

¹⁸ M̄ua pohro majarãre weregu iiaa dohpaguere. M̄ua òaro umupeori mera m̄ua oparãre yuhrirã árĩque. Òarã, muare òaro iirã mera dihtare yuhrirã árĩbiricãque. M̄ua mera guarã sãre yuhrique m̄ua. ¹⁹ M̄ua ñero iibiriquerecũ, muare erã dipuwaja moabocoma. Erã eropa dipuwaja moarare Goãmũ ìgu gamero dopa ta irire m̄ua yujuro bojecũ “Òaro iiabu m̄ua,” arĩgucumi Goãmũ muare. ²⁰ M̄ua ñero iira wajapu erã muare dipuwaja moasũcũ irire m̄ua yujuro bojequerecũ Goãmũ “Òaro iiabu m̄ua,” arĩsome. Mari òaro iiquererã erã dipuwaja moasũcũ irire mari òaro mera guaro mariro árĩcũ yujuro bojecũ Goãmũ marire òaro ìhasuagucumi. ²¹ Eropa iimorãre ìgu yarã árĩdoremi Goãmũ muare. Cristo sã m̄ua ya árĩburire ñero tarimi m̄ua ìgure ìhacũboro dopa. ²² Ìgu ne ñero iibirimi. Eropigu ne guyabirimi. ²³ Ìgure turicũ, Ìgupũ erãre ne turi gamebirimi. Ìgure erã ñero iiquerecũ ta “Muare ñero iigura,” ne arĩbirimi ìgu. Eropigu “Ahũ queoro dipuwaja moagu àhrimi. Ìgugue amugucumi,” arĩ pepiñumi ìgu. Eropirã mari sãre ìgu iidiro dopa ta iiro gahmea. ²⁴ Ìgu Cristo ìgu basi crusague mari ñeri dipuwaja s̄irimi. Eropã s̄irimi dipaturi mari ñerire iibiriboro dopa, Goãmũ gameripure mari iiboro dopa. Ìgu ñero camicumi marire peamegue wabonirãre marire taricũ iibu. ²⁵ Oveja erã dedereboro dopa ta m̄ua sã peamegue dederebonirã árĩribu. Dohpaguepure Cristore umupeorã ìgu yarã wahabu pare. Eropigu ovejare ìhadibugu iro dopa Cristo muare ìhadibumi. M̄ua s̄iporã mera dederebiriborore òaro ìhadibumi.

3

Mojoto dirirãre òpa iiro gahmea erãre, arĩ gojañumi Pedro

1 Eropigu pohro majaräre yu doreldiro dopa ta mua marasã nomere doregura. Mua marapu sumaräre ðaro yuhrique erã Goãmu buherire erã gameboro dopa. Yujurãyeri mua marapu sumarã Goãmu buherire gamebirã àhrama. Eräre mua yuhricũ ìarã Goãmu ya buherire gamebocoma erã. Eropirã ìri buherire mua eräre werebiriquerecũ ta ìgu yare gamebocoma erã. 2 Eropa ta gamebocoma mua eräre ðaro ìire, mua umupeori sãre ìarã. 3 Mua nome, mua poarire wãapuwea seapatanirã nome, oro dari buyanirã nome, ðari suhri sañanirã nome árdiarire guñabiricãque mua. Mua ya dupu masare ìhasuacũ ìibiricãque. 4 Eropa ìibirã ðpa ìique. Mua pepiri ðaro áricũ guñaque. Eropirã mua guhyadiarã nome ìro dopa gajiräre nijiyajaro mera ìirã nome áricque. Guhyadiaro mera weretamurã árirã ìpure masare ìhasuacũ ìique. Iripu pehsome. Iri ðatariari àhraa Goãmu ìacũ. 5 Òpa ta ìimuriñuma ìribojegue majarã nome Goãmu yarã nome. Erã nome Goãmure umupeorã nome árirã, erã marapu sumaräre ðaro yuhrimuriñuma. 6 Eropa Sara ìgo marapure Abrahãre ðaro mera yuhrimuriñumo. Eropigo ìgure “Opu,” arĩ piyumuriñumo. Eropirã mua ðaro ìirã nome árirã, güiri marirã nome árirã, Sara árdiro dopa àhraa mua.

7 Òpa ta mua marapu sumarã sã mua marapo sãre ðaro ìique. Erã nome mari uma ìro dopa turarã áribeara. Eropirã umupeori mera ðaro ìique erã nomere. Goãmu áripheherinuri ìgu mera mari áriniguiBORORE ìgu muare odiro dopa ta ogucumi erã nome sãre. Erã eropa árimorã áricũ erã nomere ðaro ìique. Goãmure mua serëire ìgu yuhriBORO dopa erã nomere ðaro ìique mua.

Òaro erã ìiquerecũ ta gajirã eräre erã ñero ìire werepu Pedro

8 I mera weretugura: Mua áripheherã yujuro mera ðaro áricque. Eropirã mua mera majaräre ðaro mojomoro ìarã áricque. Mua acawererã Jesu yaräre pepiri majarã game umupeoque. Eropirã ðaro ìique eräre. Eropirã “Gajiräre masitaugu àhraa,” arĩ pepibirã erã gamero dopa ta ìique. 9 Gajirã muare erã ñero ìicũ eräre ñero ìi gamebiricãque. Muare erã turicũ eräre turi gamebiricãque. Muare erã eropa ìiquerecũ ta ðaro ìique eräre. Eropirã ðaro yuhrique eräre. Irire ìimoräre ta apimi Goãmu muare ðaro ìibu. 10 Eropa ta àhraa Goãmu yare erã gojarapũ: Mua ðaro mucubiriri mera árdiarã ne ñero wereniguibiricãque.

11 Áripheheri ñeri ìire duhucãque. Òaripure ìique. Game mua basi ìhaturo mariro áricque. Irire turaro ìique. 12 Òaräre mari Opu eropa ìhadibunigucãgu ìimi. Eropigu ìgure erã serëire eropa peenigucãgu ìimi. Ñero ìirãpure ìgu gamebeam, arĩ gojañuma Goãmu yare gojarapũque.

13 Òarire mua turaro ìidiacũ gajirãpu muare ñero ìidiaquererã ta ne yujuro bojesome. 14 Òaro mua ìiquerecũ ta muare erã ñero ìicũ ìagu Goãmupũ muare ðaro ìigucumi. Eropirã muare ñero ìidiaräre, “Muare wejërãca,” arĩräre güibiricãque. Eropirã buyawerebiricãque. Irire pee guñaricubiricãque. 15 Eropirã mua Cristore “Gua Opu àhrimi,” arĩ pepirã, umupeoque ìgure. Eropirã Cristore mua umupeorire, Goãmu mera mua áriborore, gajirã muare serëpibocoma: Erã muare serëpiboro core eräre yuhriburire ðaro guñayuque. Eropa eräre yuhrirã nijiyajaro mera, ðaro umupeori mera wereque eräre. 16 Òarã áricque. Eropirã “Ñerire ìiaa,” arĩ pepisome mua. Eropirã Cristo yare mua ðaro ìirã áricũ gajirã muare

ñeri quere moarã guhyasĩuro warãcoma. ¹⁷ Ñerire mari iira dipuwaja mari ñero taricũ ðabeaa marire. Eropiro Goãmu gamecũ ðarire mari iira dipuwaja mari gajirã mera ñero taricũ ðapũrica iri tamera.

¹⁸ Eropa ta ñero tarimi Cristo. Yujusubu ta árĩpehrerã ñeri dipuwajare sĩrimi ĩgu. Ōagũ árĩmi. Eropa árĩgu ñerã mari árĩcũ mari ya árĩborare ñero tarimi ĩgu. Ñero tarimi ĩgu Goãmu yarã mari wacũ iibu. ĩgu sĩaia wami. Eropa sĩriquerecũ ta ĩgu sĩporã ojocariyoro. ¹⁹ Eropigu ĩgu sĩporã mera sĩrinirã mura erã dipuwaja moaburire corerã erã pohrogue Goãmu yare werepũ erã sĩporãrĩre. ²⁰ Erã murapu iribojegue Goãmure yuhribirimũriñuma. Irisubuguere Noé ĩgu árĩrasubuguere, wuadiru dohodirure dohogu iĩnumi. Irirure ĩgu dohorisubu Goãmure yuhribirinirã mura erã yuhricũ gamerĩnumi. Eropigu erã yuhriborore yoari boje dipuwaja moabigu corerĩnumi Goãmu. Yuhribirimũriñuma. Eropigu erãre dipuwaja moaĩnumi. Eropirã bajamerãgã ocho dihta dia miririñere tariwereñuma. ²¹ Miricũ erã taridiro dopa ta marire waĩyecũ peamegue wabonirãre mari tariborore ĩhmua. Deco mera marire waĩyecũ mari ðupure mari guhrarire tu coero dopa árĩbeaa. Marire waĩyecũ ñeri marirã mari árĩborore Goãmure mari serẽ. Eropirã Jesucristo ĩgu masa muriara mera peamegue wabonirã taria mari. ²² ĩgu Jesucristo umarogue wadi árĩmi Goãmu mera dorebu. Eropigu ĩgu anyua tauro, umaro majarã oparã tauro, árĩpehrerã dorerã tauro erãre doregu aħrimi.

4

Cristo yarã árĩrã ðarire gohrotonirã árĩrãca, arĩ wereñumi

¹⁻² Mari ñero tarirã mari ñero iirire duhucãa mari. Eropa duhucãrã mari dipaturi mari uaribejarire iibeaa. I yeba mari árĩropẽ Goãmu gamerire iĩnguirãca. Eropirã Cristo ĩgu ñero tarigu ĩgu guĩbiridiro dopa ta mua sã ñero tariborore guĩbircãque. ³ Iribojegue Goãmure gamebirã erã ñerire uaribejadiro dopa ta iimuriyoro mua. Guhyasĩiro mariro ñerire iirã, ñeri uaribejarire iirã, mereri bosenuri iirã, Goãmu dorerire tarinugarã, goãmarã wéanirãpure umupeorã iimuriyoro. Eropirã iripẽta iri ñerire iipurumujucãque pare. ⁴ Eropirã erã muraro ta iirãpu mua dohpaguere iri ñerire erã mera iibircũ ĩarã erãpu ĩha uca wahama. Eropirã erã muapure ñero wereniguirã, querere goroweoma. ⁵ Erã eropĩcũ ĩagu erã ñeri iirare Goãmupũ serẽpi ĩagu, weretaridoregucumi erãre. ĩgu ojocarirãre, sĩrinirã sãre beyebu aħrimi. ⁶ ĩgu eropa beyebu árĩgu erã sĩrinirãpure ðari buherire werepũ Goãmu mera erã ðaro árĩniguiborore. Eropirã i yebare erã árĩpehrerã masa iiro dopa sĩrinirã árĩquerecũ Goãmu ĩgu mera erã ðaro árĩniguiborore werepũ erãre.

⁷ Pehreburinũ merogã duhyaa. Eropirã ðaro pee masirã árĩque. Eropirã Goãmure serẽnigucãque. ⁸ Gajirãre mari ðaro mahirã baja gajiropa erã marire ñero iiquerecũ ta eropa ĩacãa mari. Eropirã mua mera majarãre bũrigã umupeo mahinigucãque. ⁹ Mua mera majarãre mucubiriri mera mua ya wirigũ ñajaridoreque. ¹⁰ Goãmu ĩgu yarã nũcure ĩgu yare mua mohmemasiburi nũcure apimi. ĩgu eropa apicũ mua iĩmasiro dopa ta mua mera majarãre irire ðaro itamuque. Goãmu mua nũcure mua ĩgu yare mohmemasiburi nũcure apimi. ĩgu apirañe mera gajirãre ðaro itamurã, Goãmu ĩgu apidiro dopa ta ðaro iirã iiaa mua. ¹¹ Eropirã mua

õaro wererã árirã, Goãmu İgu werebodirop dopa ta õaro wereque mua sã. Masare itamurã árirã, Goãmu İgu apira turari mera gajirãre itamuque. Árípehreri mua iira nucu Goãmure masa erã umupeoboro dopa irire iique. Jesucristopã mua irire iicũ itamugacumi. İgure árípehrerinuri umupeoque. “Õagũ, turagũ àhrimi,” arĩro gahmea árípehrerãre. Eropa ta arĩporo.

Jesu yarã erã árĩri dipuwaja erã ñero taririre were gojañumi Pedro

¹² Yu mahirã, dohpaguere ñetariaro tarirã, “Gajiropa arĩro wãca yũre,” arĩ guña iibiricãque. Mucubirã áríque. ¹³ Bujawerebirã ta mucubirãpũ áríque. Eropirã “Cristo İgu ñero taridiro dopa ta gua sã eropa ta wahaa,” arĩ mucubiricue mua. Eropa mucubirã Cristo İgu õarire İgu ñumũgũ dujaricũ mua turaro mucubirãca. ¹⁴ Cristo yarã mua árĩri dipuwaja gajirã muare erã turicũ Goãmu İgu Espĩritu Santo İgu õagũ mua mera árĩgu iimi. Eropirã õaro mucubirã àhraa mua. ¹⁵ Eropirã masare wejẽra waja dipuwajacurã, yajara waja dipuwajacurã, ñero iira waja dipuwajacurã, gajiropa arĩ goroweora waja dipuwajacurã áribiricãque. Iri dipuwaja mua ñero taricũ ñehe àhraa. ¹⁶ Cristo yarã mua árĩra wajapũ ñero taricũ õhaa. Eropirã Cristo yarã mua áricũ İha ñero iima muare. Erã eropiicũ guhyasiribiricãque. Ñero tariquererã ta Cristo yarã mua árĩrire mucubirã, Goãmure “Õhaa,” arĩ umupeoque mua.

¹⁷ Goãmu İgu yarã erã iirare İgu beyerisubũ arĩro iiaa dohpaguere. Árípehrerã mari İgu yarã mari iirare İha serẽpimuhtagucumi. ¿Eropa marire serẽpimuhtagũ dohpa iigucuri İgu yarã áribirãpure mua pepicũ? İgure yuhribirinirãpure turaro dipuwaja moagucumi. ¹⁸ Eropirã õarã İgu yarã eropa ñero tarira puhũ Goãmũ erãre tau erãre İgu pohro aiagucumi. Goãmure gamebirãpũ ñetariaro tarirãcoma. Eropirã dederea wa peamegue warãcoma. ¹⁹ Eropirã Goãmũ İgu gamecũ mua ñero tarirã árirã, õarire mua iirare duhubiricãque. Eropirã muare İhacũnugudigũre muare ne duhubigũre İgure umupeoro gahmea. “Yũre İhadibugumi,” arĩro gahmea.

5

Jesu yarã erã iiborore were gojañumi Pedro

¹ Dohpaguere muare Jesu yarã oparãre weregura: Yũhu Jesu yarã opũ àhraa. Mua sã erã oparã ta àhraa. Muare yũ iro dopa oparã árirãre ire werebu iiaa yũhu: Cristo İgu ñero tarirare İadigũ árĩgu, mua mera umarogue Cristo mera õaro árĩniguibu árĩgu ire muare weregura: ² Goãmũ yarã oveja iro dopa àhrima. Muapũ ovejare İhadiburã iro dopa àhraa. Eropirã Goãmũ muare İgu apinirãre İgu yarãre õaro İhadibuque mua. Eropirã Goãmũ İgu gamediro dopa ta õaro siporãcuri mera erãre İhadibuque. Eropirã erãre İhadiburã “Niyerure wajatarãca,” arĩ pepibiricãque mua. ³ Eropa İhadiburã erãre pũriro mera dorebiribiricãque. Eropirã õaro iique mua Jesu yarã muare erã İhacũboro dopa. ⁴ Mua eropa iirã Cristo marire árípehrerãre İhadibugũ İgu dujaricũ İgu muare õarire oburire oparãca. Iri mua opaburi ne pehresome.

⁵ Erãre yũ dorero dopa ta mua mamarã sã erãre mua oparãre yuhrirã áríque. Eropirã mua Jesu yarã árípehrerã game yuhri áríque.

“Ōatariagu āhraa,” arī pepirāre Goāmū gamebeami. Gajirāre umupe-orāpūre “Bu arīrā āhraa,” arī pepirāpūre ōaro mahi itamumi ĩḡu, arī gojara āhraa.

⁶ Eropirā Goāmū turagupūre muare dorecū yūhriḡue. Eropirā mua basi “Yū ōagu āhraa,” arī pepibiricāque. Mua eropa ōarire iicū ĩagu Goāmū ĩḡu queoranā arīcū masa ĩhuro muare “Ōarā āhrima,” arī ĩhmugūcumi.

⁷ ĩḡu muare wūaro pepi ĩhadibumi. Eropirā ĩḡare guñaturarā, ne wūaro bujawere guñaricūbiricāque muapū.

⁸ Muare ĩhaturigū wafī yee guagu ĩḡu ehma baro iro dopa ta āhrimi. Muare űero iidoreḡu goroweodiami. Eropirā pee masi arīḡue.

⁹ Arīpehrerogue sāre gajirā Jesu yarā eropa dihta teboricūma wafī goroweodiari mera. Irire masirā ĩḡare yūhribiricāque. Eropirā Cristore umupeorā turaro guñaturaque mua. ¹⁰ Mua i yeba arīrisubu dihta wafī űero iidorediaro mera teboricūrāca. Merogā āhraa. Pūhrū mua Jesucristo pohro arīrā, muare ōarā turarā arīcū iigūcumi. Eropigū mua sīñajarā ōaro arīcū iigūcumi muare. ĩḡu Jesucristo iira mera arīpehrerinari űmūsigue mua ōaro arīborore muare apigūcumi. ĩḡu Goāmū āhrimi arīpehrerāre mojomoro ĩagu. ¹¹ Eropirā űmūri nūcu “ĩḡu turagu āhrimi,” arī umupeorā ĩḡare. Eropa ta iirā.

Ōadoretuñumi Pedro

¹² ĩpūḡāre miripūḡāre yū muare gojabeocū Silvanopū yūre gojabasami. Silvano Jesu yagu yū acawereḡu Jesure duhubigū āhrimi yū pepicū. Muare ōaro werediaa. Eropigū “I buheri diaye ta Goāmū muare ĩḡu mahiri buheri āhraa,” arī wereḡu muare ipūre gojabeoa. Eropirā i buheri mera sīporā turarā arīḡue mua.

¹³ Muare ĩḡu beyediro dopa ta Jesu yarā Babilonia majarā sāre beyedigu arīmi Goāmū. Erā muare ōadorema. Marco sā yū magū iro dopa arīḡu sā muare ōadoremi. ¹⁴ Mua mera majarāre bocatīrirā ōaro mera mojoto űeaque.

Arīpehrerā muare Jesucristo yarāre ḡua ōadorea. Eropa ta arīḡue. ĩripēta āhraa.

2 San Pedro

Jesu yaräre gojabeoñumi daja Pedro

¹ Yuhũ Simo Pedro Jesucristo ñgu buhedore ñgu apidigu ãhraa. Eropigu ñgu pohro majagu ta ãhraa. Eropigu muare gojabeoa yuhũ. Goãmu marire taudigu Jesucristo mera marire árĩpehreräre diaye ñgu ãhrimi. Eropa ñgu árĩgu Cristore umupeocũ, ñgu yarã wacũ iimi muare. Eropa warã mua sã gua iro dopa ta ñgu yarã ãhraa. Mari yujuro mera ñgu yarã árĩräre muare gojabeoa. ² Eropirã Goãmu sãre mari Opu Jesucristo sãre masinemorã ñgu mahiri mera ðaro árĩrãca mua. Eropa ðaro mua árĩboro dopa muare serëbasaa Goãmure yuhũ. Eropa arĩgu muare ðadorea.

Õpa ãhrima Cristo yarã, arĩ gojañumi Pedro

³⁻⁴ Ñgu yarã árĩmoräre Cristo marire aĩdigu árĩmi. Ñgu eropa aĩcũ peerã, ñgure yuhribu mari. Eropa yuhrirã Jesucristo ðagu, ðarirepa ta ñgu yarã ãhraa. Mari yujuro mera ñgu yarã árĩrã iimasigu árĩro dopa ta mari sã ñgu iro dopa ta árĩmasia. Eropa Goãmure mari masinemorã, ñgu turari mera ñgu gamero dopa ta ðarã árĩrãca. Ñgu ãhrimi ñgu yarã árĩmoräre marire aĩdigu. Õagu ðarire iimasipehogu ñgu árĩro dopa ta marire árĩpehreräre aĩdigu árĩmi. Eropa ta iri ñgu turari mera marire ðatariaro wahabu. “Õpa ta muare ðaro ñgura,” ñgu arĩdiro dopa ta marire ðatariaro iimi ñgu. Marire ñgu eropiicũ i yeba maja ñerire mari ñaribejarire mari duhucãa. Iri ñeripu marire goroweotariaca. Eropirã ñgure yuhrirã árĩrã Goãmu ñgu arĩdiro dopa dujarãca mari. ⁵ Eropirã Cristore umupeorã arĩtuhaa mua. Eropirã ñgu turarire oparã õpa iinemoque daja: Õarã árĩque mua. Eropa ðarã árĩrã ðaro pee masirã árĩque mua. ⁶ Eropa pee masirã árĩrã ñerire iidiaquererã ta Goãmu ñgu gameripure iiniguicãrã árĩque. Eropa iirã Cristo yarã mua árĩri dipuwaja gajirã muare ñero iiquerecũ ta eropa yujuro bojeniguicãque mua. Eropa yujuro bojerã Goãmure umupeorã, ñgu gamerire iirã árĩque mua. ⁷ Eropa iirã mua mera majaräre mahi umupeoque. Erãre ðaro itamurã árĩque. Eropa iirã árĩpehrerã gajirã sãre mahi umupeoque.

⁸ Mua eropa iinemocũpure ðataria. Mua eropa iinemorã, ðaro iirã árĩrãca. Eropirã mari Opu Jesucristore ðaro guñaturarã ñgu gamerire ðaro iiniguirã árĩrãca mua. Bu árĩrĩre iisome. ⁹ Mua eropa iinemobirã Goãmu yare ne masibirigohraboja mua. Eropirã Cristo mua ñeri iirare ñgu coerare ne guñabiriboya mua. Eropa ta cãdijicãdiaboya mua. ¹⁰ Eropirã yu acawererã, Goãmu yarã árĩmoräre muare ñgu áridorecũ yuhrinirã árĩbu mua. Eropa yuhrirã árĩrã, ñgu yare guña duhudiabirã ñgu gamerire turaro eropa iiniguicãque. Mua eropa iirã diaye ta Goãmu mera árĩrãca mua. Eropirã diaye ta ñgu beyenirã árĩrãca mua. Eropirã ñerire iiniguirã árĩsome. ¹¹ Mua eropa ñgu gamero dopa ta iirã árĩrã mari Opu marire taudigu Jesucristo ñgu árĩroque ðaro warãca mua. Diaye ta ñgu yarã mua árĩcũ ñagu “Õaro mera yu mera árĩque mua,” arĩgucumi Jesu muare.

¹² Eropigu muare ire eropa guñaniguicũ ñgura. I muare yu wererare masituhabu mua. Eropa masirã Goãmu yare mua peediro dopa ta ðaro iirã iiaa mua. Eropa iirã mua árĩquerecũ ta i muare yu wererare eropa

guñanemocũ werenemogura. ¹³⁻¹⁴ “Merogã duhyaa mu s̄iriboro,” arĩ weremi yare mari Opu Jesucristo. Eropigu ojocarinigũ ire yũ muare wererare eropa guñaniguicãcũ iiniguigura. Yũ eropa iicũ ðapũrica. ¹⁵ Eropigu i yũ were gojara muare gojapipehogura yũ s̄irira puhru mua ðaro masiboro dopa. Eropirã i yũ wererare eropa guñaniguirãca mua.

Cristo ïgu turagu árĩricurire ïabu yũhu, arĩ gojañumi Pedro

¹⁶ Eropirã mari Opu Jesucristo ïgu turari sãre, ïgu dujariboro sãre muare wererã, gua gamero gua arĩ bocarire wererã ïbiribũ. Turagu ïgu árĩrĩre gua basi ta ïabu. ¹⁷ Cristo ïgu turatariagu ïgu árĩrĩre guare ïhmumi Goãmu mari Pagu. ïgu eropa ïhmucũ Cristo ðaro gosesiricũ ïabu. ïgu eropa gosesiricũ ðpa arĩro caribũ: “Ihĩ yũ magu yũ mahigu àhrimi. ïgu mera ðaro mucubiria,” arĩro caribũ gua peecũ. ¹⁸ Umarogue eropa arĩro caricũ peebe gua. Utãgu wecague Goãmu yagu utãgu wecague Cristo mera eroparĩcũ peebe gua irire.

¹⁹ Irire ïanirã árĩrã, Goãmu yare weremuhtanirã iribojegue majarã erã gojara diaye árĩcũ ðaro masia gua. Erã gojarare mua ðaro buheniguirã ðaro iirã iica mua. Iri erã gojara muare sihãgodiru iro dopa àhraa. Naitfaroguere ðaro sihãgodiru mera mari ïhamasiro dopa ta erã gojarapu marire Goãmu yare ðaro masicũ iiaa. Eropirã ïgu yare eropa buheniguique ne ïgu Jesucristo dujaricũgue. Jesucristo dujaricũ ïgu yare masipehorãca mari pare. ²⁰⁻²¹ Yũ werediro tauro ipure ðaro masique mua: Iribojegue majarã ðarã Goãmu yare erã weremuhtarã erã guñabocarire wereniguibiriñuma. Espĩritu Santopũ erã Goãmu yare wereniguiburire erãre masicũ iĩnumi. Eropirã mari erã wereniguirã gojarare buherã mari pepiri mera irire buherã “Õpa arĩro iica,” arĩmasibirica. Espĩritu Santo ïgu itamuri mera mari masia.

2

Goãmu yare diaye buhebirãre were gojañumi Pedro

¹ Iribojegue mari acawererã judio masa mera majarã gajirã “Goãmu yare weremuhtarã àhraa,” arĩ guyamuriñuma. Erã iidiro dopa ta dohpague sãre mua mera majarãre eropa ta arĩ guyarã árĩrãcoma. Erã diaye Goãmu yare buherã arĩ buheboro dopa ta guyaripure buherãcoma. Eropa buherã Cristo yapure goroweorãcoma. Eropa iirã Cristo erã yã dipuwajare s̄iribasadigure guñabirãcoma. Eropirã ïgure “Gua Opu àhrimi,” arĩ ne pepisome. Iri árĩpehrerire erã eropa iira dipuwajare mata Goãmu erãre peamegue wadoregucumi. ² Eropa erã guya buhecũ peerã erã, erã ñerire uaribejaro dopa ta bajarã masa erãre ïhacũ ñero iirãcoma. Erã ñero iicũ ïha gajirã Jesucristo yare diaye majare ñero wereniguirãcoma. ³ Eropirã erã guyaricurã niyerure waja gamerã guyarĩ buherire buherãcoma muare. Eropa buhera dipuwaja Goãmu erãre peamegue wadoregucumi. Iribojegue ta eropa iinirãre dipuwaja moadoretuhañumi ïgu.

⁴ Eropa ta iribojegue dipuwaja moadoreñumi ñerã anyua sãre. Erãre peamegue peresu iĩnumi. Eropa ïgu i umu pehrerinu árĩcũ erãre dipuwaja moagucumi. ⁵ Eropa ta iribojegue majarãre Goãmure gamebirinirãre dipuwaja moañumi ïgu. Eropigu árĩpehrero i yebare miugu, árĩpehrerã ñerã masare miu wejẽpehocãñumi. Noé dihtare gajirã siete masa mera tauñumi. Noépu irisubu majarãre Goãmu yare ðarire buhemuririñumi. ⁶ Eropa ta Sodoma waĩcarĩ maca majarãre Gomorra

waĩcuri maca majarã sãre Goãmu dipuwaja moañumi. Iri macarire pa iinirãre dipuwaja moadoretupeame mera òaro soepehocãñumi. Eropigu pũhrague árimorãre igure gamebirinirãre igu dipuwaja moaborore ihmugũ iĩñumi. Ñerãre igu dipuwaja moaborore ihmugũ iĩñumi “Gũiporo,” arĩgu. ⁷ Eropigu Lote waĩcũgure tauñumi. Lotepũ òagu áriñumi. Eropa áriũgu áriũgu Sodoma majarã Goãmu dorerire tarinũgarã ñetariaro erã iicũ ïagu gariborea wañumi. Eropigu ũa erã basi erã ñero iicũ ïagu gariboretaria wañumi igu. ⁸ Igu òagu ñerã watope áriñumi. Eropigu ւmuri nucũ ñetariaro erã iicũ ïagu ñero erã werenigucũ peegu ñero sĩporãcuñumi. ⁹ Igu Goãmu taucũ iarã ire masia mari. Goãmu mari Opũ marire igure gamerãre mari ñerã watope áricũ marire taugucumi mari ñero iibiriboro dopa. Eropigu ñerãpũre erã ñero iira dipuwajacũrã áricũ apigucumi. Pehrerinũ áricũguere erãre dipuwaja moagucumi.

¹⁰ Ñerire turaro ւaribejarã Goãmu dorerire tarinũgarã erã tamerare ñero dipuwaja moagucumi igu. Oã mua mera majarãre guya buherã ñeri ւaribejarire iirã ne mari Opũre umupeobeama. “Gajirãre mari tarinũgaa,” arĩ pepirã áhrima erã. Eropa arĩrã erã deyobirãre ւmaro majarãre, ñerã turarãre ne gũibirã ñero arĩ weryama erãre. Erãpũre tauro dipuwaja moagucumi Goãmu. ¹¹ Goãmu yarã anyuapũ ne erã iiro dopa iibeama. Erã tauro turarã áhrima. Eropa turarã áriquererã ta erã ne weryari mera ւmaro majarãre ñerã turarãre “Peamegue waporo,” arĩ weresãbeama mari Opũre.

¹² Erã guya buherãpũ nũgu majarã waimurã iro dopa pee masibirã áhrima. Erã gamero dopa ta iima erã. Eropirã erã masibirirare werya ñero arĩ werenigucorema. Eropa iirã erã áricũ waimurãre mari wejẽro dopa ta Goãmu erãre peamegue cóãgucumi. ¹³ Eropigu erã ñero iira dipuwaja dipuwaja moagucumi Goãmu. Erã ñerire ւaribejataricãma. Eropirã ñerire ñero iiniguicãma. Mua mera bosenu iiquererã iri bosenu iri ñerire iidiana. Erã eropiirã guhyasĩricũ iima erã querecũrã áriãrã.

¹⁴ Eropirã nomere iarã ñeadiama erã. Eropirã ñerire eropa iinigu-idiama. Goãmu yare dabero masinũgarãre ñerire iidorerã, eropa áriãrãre erã ihacũcũ iima. Eropirã erã seyaro gajinore, niyeru sãre guya emamehrerã áhrima. Eropirã erã Goãmu igu dipuwaja moamorã áhrima. ¹⁵ Erã diaye majare duhu Balaam igu iidiro dopa iirã iima. Balaam murũ Beor murũ magũ áriñumi. Igu iribojegue igu ñeri iiri mera niyerure wajatadiariñumi. ¹⁶ Igu eropa iigu wacũ igu burropu igure turiñumi. Igu burro wereniguimasibigu igu áriquerecũ ta Goãmu igure werenigucũ iĩñumi. Igu eropa werenigucũ peegu Balaam turaro igu ñeri iidiarare duhucãñumi.

¹⁷ Erã guyaricũrã mau dipague deco mariro iro dopa áhrima. Deco mariri mauri dipari iri duhpihuri áribiriro dopa ta erã guyaricũrã ne duhpimorã áribeama. Eropirã imica cururi miruñe weãbeori cururi gohrotoro dopa ta erã guyaricũrã sã erã wereniguirire gohrotonigu-ima. Eropigu naitiarogue erã warore amutuhapũ Goãmu erogue erãre dipuwaja moabu. ¹⁸ Erã guyaricũrã erã wereniguirã duhpihuri gohra áribeaa. Masirã iro dopa masare eropa buhemaacãma. Ōpa arĩ buhema erã: “Mari gamero dopa ta mari iicũ òapũrica,” arĩ buherima erã. Erã eropa arĩ buhecũ masa peerã, erã ւaribejarire iidiarã erã ya buherire gahmema. Gajirã masa Goãmure ne umupeonũgarã erã guyaricũrãre

peerã áhriima. Erã ñerire erã duhura puhrugã erã guyarire peenugama daja. Eropa peerã Goãmu yapure erã peeborapure peebeama daja. Ñeripure gohrotoma daja Goãmu yarã árihonorã. ¹⁹ Erãre õpa arĩ buhema guyarã: “Mari iidiaro dopa ta mari iimasia,” arĩrima erã. Erã eropa arĩ buhequerecũ ta erã arĩdiro dopa wabea erãre. Õaripure iidiaquererã iimasibeama. Ñerire yoari boje duhudiabirã, puhru irire duhudiakererã duhumasibeama. Iri ñeri erãre dorea. Erã ñeri uaribejari erãre dorea. Eropiro yujugure ñeripu tarinugacũ ïgũpure ñerire duhumasiya mara. ²⁰ Mari Opu Jesucristore marire taugure ne masinugarã i yeba maja ñerire duhucãma. Erã eropa duhura puhru dipaturi ñerire gohrotorã daja, ñero gohra dujaboñuma erã. Cristore erã masiboro core erã áriũhtadiro tauro ñetariaro dujama pare dipaturi ñerire gohrotorã daja. ²¹ Eropa ñero dujarã õari buheripure erã ne masinugabiricũ õatariaboya erãre. Erã Goãmu dorerire masira puhru irire cõanirã ñetariaro dujarãcoma. ²² Eropirã dipaturi ñerire gohrotorã, masa nucu erã õpa arĩ wereniguidiro dopa ta iirã iima erã. “Diaye etocapi ïgu etocapirare dipaturi ïgu basi ta bahami daja. Eropigu yese ïgure guhbura puhru dipaturi ïgu ñeri tarague oyami daja,” arĩ wereniguiima masa. Eropa ta iima õarire ne gamenugarã dipaturi ñerire gohrotorã daja.

3

Cristo ïgu i yeba ïgu dujariborore were gojañumi Pedro

¹ Yu mahirã, muare yujupũ gojabeotuhabu. Eropigu ipũre daja dohpagure muare gojabeogu iiaa. Eropigu muare pesubu gojabeogu i áripehrerire guñacũ iidiagu iiaa õari dihtare mua iiboro dopa. ² Irire guñaque mua: Iribojegue majarã õarã Goãmu yare weremuhtanirã erã were gojarare guñaque. Eropirã mari Opu marire taugu Cristo ïgu doreri sãre guñaque. Iri dorerire gua ïgu apinirã muare buheabu.

³⁻⁴ Eropirã negohrare ire guñamũhtaque: Pehrerinũ coregãgue Goãmu yare weryarã áriřãcoma. Erã ñerire uaribejaniguirã áriřãcoma. Õpa arĩ weryarãcoma: “‘Cristo dujarigura,’ ïgu arĩqueregu ne dujarisome. ¿Dujaridiaqueregu duhpigu ne deyobeari ïgu? I yeba áriñugara puhru mari ñecu sumarã mura erã sirira puhru áripehrero muraro ta áriñiguia. Eropigu i yebague dujaribu ne umaroguere marimi,” arĩ weryarã áriřãcoma. ⁵ Eropa arĩ weryarã ipure ne guñadiabeama erã: Iribojegue Goãmu ïgu dorediro mera i yebare umusi sãre ñacũnuguñumi. Eropa ñacũnugugũ deco mera i yebare iĩñumi. Eropigu i yeba deco mera áriřã iĩñumi. ⁶ ïgu eropiira puhru i yebare miũñumi. Miugu i yeba maja dederepehrecũ iĩñumi. ⁷ Eropigu ïgu ta umusire, i yeba sãre dipaturi dederepehrecũ iigucumi ïgu. Peame mera dederecũ iigucumi. Dohpagure ïgu ïgu dorero mera i yebare umusi sãre áriñiguicũ iimi dohpa. Eropigu coregu iimi puhru áripehrerore soebu. Eropa coregu iimi Goãmu ïgure gamebirãre dipuwaja moabu. Eropigu ïgu beyerinũ áriřã soepehocãgucumi. Irisubu erã ñerãre dedeogucumi.

⁸ Yu mahirã, ipure guñaque mua: “Yoatariari boje áhraa,” mari arĩ pepiquerecũ ta, mil bojori yujunũ iro dopa ta áhraa Goãmu ïgu ñacũpure. ⁹ “Goãmu ïgu arĩdiro dopa ta ne yojaro mera iibeami,” arĩma masa. Eropa áriřã. Masare õaro iidiagu corenigu iimi. Ne yujugu masure peamegue cõadiabeami ïgu. Eropigu áripehrerã erã ñeri iirire bujawerecũ, ñerire ii duhucã corenimi ïgu dohpa.

¹⁰ Ñamigue yajari buğu, İgu guñaña mariro yajagu ñajariro dopa ta Cristo i yebaguere guñaña mariro arigucumi. İgu aricũ umusi maja pehrea waroca turaro busuro mera. Ejupehrea waroca. I yeba maja sã ujupehrea waroca.

¹¹ "I árĩpehreri pehrea waroca," Goãmu İgu eroparĩcũ peerã ñerire duhu, Goãmu gameripure iirã árĩro gahmea marire. ¹² Mari Opũ i yebague İgu dujariborore mua corerã árĩrã yojaro mera İgu aricũ iique mua. İrinure umusi maja ujupehrea waroca. ¹³ Eropa guhyaro watope ádopa maripũ Goãmu İgu arĩ apidiro dopa ta árĩpehrerire İgu gohrotoburire cohre mucubiriyua mari. Árĩpehreri iri ujura puhru opa árĩroca: Umusi i yeba sã gaji dihta árĩroca. Eropirã irisubuguere ðari dihtare iirãcoma árĩpehrerã. İrire ta cohrea mari.

¹⁴ Eropirã yu mahirã, mari Opũ İgu dujariborore corerã Goãmu İgu İarore ñeri marirã, ñerire iibirã árĩque mua. Eropirã Goãmure İadiabirã árĩbircãque mua. Eropirã Goãmu mera ðaro árĩque. ¹⁵ Eropirã yoañariri boje İgu deyobiricũ İarã opa masique mua. Masa erã ñerire bujawerecũ corenigu iimi dohpa Goãmu erãre tauborore. Eropa ta arĩ muare gojabeodigu árĩmi mari mahigu mari acaweregu Pablo. Goãmu masiri mera irire gojabeodigu árĩmi İgu. ¹⁶ Eropa dihta arĩ gojabeodi árĩmi Pablo İgu gojabeora nucu. Cristo İgu dujariborore, ñerire iibirã mari árĩboro sãre weregu opa dihta arĩ gojabeodigu árĩmi İgu. Yujuyerisuburi diasarire were gojabeodigu árĩmi. Gajirã ne masibirã, pee masibirã guyarı mera İgu eropa arĩrare gohrotomurima. Eropirã İgu eropa werera árĩquerecũ ta gajiropa arĩ gohroto werecãma erã. Goãmu yare erã gojarapũgue gaji sãre eropa ta iima erã. Erã eropiicũ İagu Goãmu erãre dipuwaja moagu peamegue cóagucumi.

¹⁷ Yu acawererã, yu mahirã, i árĩpehrerire i eropa waboro core weretuhabu muare. Eropirã ire masirã ðaro iique mua. Ñerã muare erã gajiropa arĩ buhecũ, peeigu árĩmi. Gajirã ne masibirã, pee masibirã guyarı mera İgu eropa arĩrare gohrotomurbircãque erãre Cristo yare duhuri arĩrã. ¹⁸ Eropa duhubirã mari Opure marire taudigure Cristore ðaro umupeonemoque muapu. İgare ðaro masinemoque. Árĩpehrerinuri İgare ðaro umupeorã mari. "Öagu turagu ahrimi," arĩrã mari İgare. Eropa ta arĩrã. İripẽta ahraa.

1 San Juan

Ñu Jesucristore were gojara áhrraa

¹ Dohpague ta gúa Jesucristo yare were gojará iiaa muare. Mata negue ta árinidigu áhrimi igu. Igu masare mari Pagu mera eropa áriniguicú iigu áhrimi. Iguare íabu gúa. Igu wereniguirire pee gúa ya cuiri mera íabu gúa igure. Eropirá igure íarā, gúa ya mojotori mera mohmepibu igure. ² Igu masare mari Pagu mera áriniguicú iibu áriġu Igu i yebague igu dehyoami. Igu masa dehyoacú gúa íabu igure. Eropirá igure werea gúa muare. Igu umuri nuču mari Pagu mera áriniguicádigu mari pohro erami. Eropirá igure gúa íarare werea muare. ³ Mari Pagu mera gúa óaro áhrraa. Igu magu Jesucristo mera säre gúa óaro áhrraa. Eropirá mua sá gúa mera, mari Pagu mera, igu magu mera mua óaro áriburire gúa mua säre Jesucristore werea. Gúa íarare gúa peerare werea. ⁴ Irire ta gúa gojaa mua óaro mucubiriburire.

Goámu mera óaro áriburi áhrraa

⁵ Dohpague ta Jesucristo wereniguirare werea gúa muare. Iri buherire Jesucristo guare buhecú gúa peebu. Ópa áhrraa. Goámu óagu dihta áhrimi. Neripu ne mara igure. Irire werea muare. ⁶ Eropirá mari ñeri iirire iiniguirā, “Goámu mera óaro áricāa yuhu,” aríquerā mari guyarā iiaa. Eropirá diaye majare iibeaa. ⁷ Eropirá mari Goámu iidiro dopa ta mari óarire iiniguirā tamera, Goámu mera óaro árīrā iiaa. Mari basi sá óaro árīrā iiaa. Eropigu Jesucristo Goámu magu mari ñeri iirire áripehrerire coegu áhrimi. Igu crusague sirigu igu dire cóami. Igu eropiigu mari ñeri iirire coeniguicāmi.

⁸ Yujugu “Yu tamera ne ñerire iibeaa,” eropa aríġu igu basi ta gujami. Eropigu diaye majare pepibeami. ⁹ Eropirá mari ñero iirare werero gahmea Goámure. Eropa wererā mari ñero iira puhru Goámure mari weretaripehocácú, igu mari ñero iirare cādijipehocágucumi. Igu arídiro dopa ta diaye ta iigu óagu áhrimi. Eropigu daja mari ñeri áripehreri säre coeweagucumi. ¹⁰ “Áripehrerā ñerire iirā áhrima,” arítuhajapu Goámu. Eropirā “Ne ñerire iibeaa yupu,” mari arīrā óaro aríbeaa mari. Mari eropa arīrā “Goámu guyaricugu áhrimi,” arídiarā iiaa. Ópa arīrā Igu ya buherire gamebirā áhrraa.

2

Jesucristo marire itamumi, arí wereñumi Ñu

¹⁻² Yu porā, mua ñerire iibiriboro dopa ire gojagu iiaa. Yujugu ñero iirare iicú Jesucristo itamumi marire mari Pagu iri ñero iirare cādijiboro dopa. Igu Jesucristo óagu Pagu pohro áriġu Igu Pagure ópa arí serébasacumi mari ñero iira puhru: “Ihí ñero iira dipuwaja moabita igure,” arīrā “Goámu guyaricugu áhrimi,” arídiarā iiaa. Ópa arīrā Igu ya buhe arícumi mari Pagure. Eropigu Jesucristo mari ñero iira dipuwaja wajayebasadi árīmi. Mari ñero iira dihtare wajayebasabiridigu árīmi. Áripehrero majarāguere erā ñero iirare wajayebasadi árīmi.

³ Maripū Goāmū dorerire iirā árīrā “Goāmure diaye ta masia yūhū,” arī masia mari. ⁴ Yujugū Goāmū dorerire iibigu, “Yū sã Goāmure diaye ta masia yūhū,” arīgu guyagu āhrimi. Eropigu Cristo yare masibeami. iiaa. Ōpa arīrā ĩgu ya buhe ⁵ Goāmū dorerire iigupū ĩgu Goāmure ōaro mahigu āhrimi. Eropa arīgu ta “Yūhū Goāmū mera ōaro árīcāgu āhraa,” arī masimi ĩgu. ⁶ Mari “Goāmū mera ōaro āhraa,” arīrā Jesucristo ĩgu ōaro árīricuđiro dopa ta iiro gahmea.

Goāmū doreriñe āhraa

⁷ Yū acawererā, yūhū muare dohpaguere werebeoburi mama doreriñe árībeaa. I doreriñe mua negohraguere Jesu buherire peerañe ta āhraa. Eropirā iriñe doreriñere peetuhajabu mua. ⁸ Iri doreriñe “Gajirāre mahi umupeoque,” arāa. Cristo iri doreriñere iigu masare umupeomi. Eropiro dohpaguere iri doreriñe murañe doreriñe árīquerero ta mama doreriñe sã āhraa. Dohpaguere mua pee masibirirañe pehre wahgāro iiaa ōaro. Jesucristo muare pee masicū iigu eratuhami. Eropirā mua sã masare umupeorā iiaa.

⁹ Eropigu yujugū gajigūre ĩhaturigu arīgu ñerire iigu āhrimi. ĩgu ta “Yūhū ōarire iigu āhraa,” arīmasibeami ĩgu gajigūre ĩhaturinijagu. ¹⁰ Eropigu yujugū gajirāre mahi umupeogu tamera ōarire iigu ōaro āhrimi. Eropigu ñerire iibeami. ¹¹ Gajirāre ĩhaturigupū ñerire iigu āhrimi. Eropigu ĩgu ōaro iiburire pee masibeami ĩgu.

¹² Yū porā, Goāmū mua ñeri dipuwajare cādijipehodi árīmi Cristo ĩgu sīrirañe mera. Eropa mua ñerire cādijisūrā árīcū muare wegū arīgu ñerire iigu āhrimi. ĩgu ta “Yūhū ōarire iigu āhraa,” arīmasibre gojagu iiaa. ¹³ Mua pagu sumarā sã, mua Cristore negohraguere árīdigūre masirā āhraa pare. Mua eropa masicū mua säre were gojagu iiaa. Mua mamarā, mua wañire tarinugabu mua. Mua eropa tarinugarā árīcū muare were gojagu iiaa.

Yū porā, mua mari Pagure masia. Mua eropa masirā árīcū were gojagu iiaa. ¹⁴ Mua pagu sumarā, mua Cristore negohraguere árīdigūre masia mua. Mua eropa masirā árīcū muare were gojagu iiaa. Mua mamarā, mua Goāmū yare umupeoturarā āhraa. Eropirā ĩgu yare diaye majare iiaa. Goāmū werenigūrire masia. Mua eropiirā wañire tarinugabu. Eropigu muare were gojagu iiaa.

¹⁵ I yebare, i yeba majare gamebircāque. I yeba majare gamerā maripū mari Pagure gamebeaa mari. ¹⁶ I yeba maja āhraa: Masa erā ñerire uaribejari, ñero ĩha iidiari āhraa. Eropárīcū masa erā ya dihta guña mucubiriri āhraa. Iri Goāmū mari Pagu ya árībeaa. Iri árīpehleri i yeba maja āhraa. ¹⁷ Eropirā i yeba majare iirā erā ñero iidiari mera dederea wahama i yeba mera. Goāmū yapu pehresome. Eropirā Goāmū yare iirāpū Goāmū mera árīnigūcārācoma.

Diaye maja árīri, diaye maja árībiriri āhraa, arī gojañumi Ñu

¹⁸ Yū porā, i umū pehrebro merogā duhyaa. “Cristore ĩhaturidigu gohra arigucumi,” arī Jesu yarā muare weretuhajama. Dohpaguere Cristore ĩhaturidigū bajarā árītuhajama. Eropirā dohpaguere i umū pehreburiñu merogā ero duhyacū mari masia. ¹⁹ Oā Cristore ĩhaturirāpū mari mera árīquererā mari yarā diaye árībeama. Eropirā marire cohā wiriama. Erā mari yarā árīrā mari mera dujaboañuma. Eropirā marire

cohã wiriama. Erã eropa wiriacũ mari mera majarã erã árĩbirirare masia mari.

²⁰ Muapure Cristo Espiritu Santore muare otuhajadi árĩmi. Eropigu Espĩpehreri i yeba maja àhraa. Íritu Santo mua mera àhrimi. Ígu árĩro mera mua árĩpehreri diaye maja árĩrire masia. ²¹ Eropigu yu muare weregu, “Diaye maja árĩrire masibeaã mua,” arĩbeaa yuhu. Mua diaye maja árĩrire masirã guyacũ sãre masia. Eropigu muare werea yuhu.

²² Ihĩ diaye majare masibigu àhrimi guyagupu. “Jesucristo Goãmũ magu árĩbeami,” arĩgupu guyagu àhrimi. Ígu Cristore ìhaturigu àhrimi ígu. Eropigu mari Pagure ígu magu sãre “Erã diaye ta árĩbeama,” arĩgu Cristore ìhaturigu ta àhrimi. ²³ Òpa àhraa: Jesure gamebigupu mari Pagu sãre gamebeamĩ. Jesure umupeogu mari Pagu sãre umupeomĩ.

²⁴ Negohraguere mua Goãmũ yare peebũ. Irire òaro guñaque. Irire guñarã Jesucristo mera òaro árĩrãca. Eropirã mari Pagu mera sãre òaro árĩrãca. ²⁵ Jesucristo marire weremi: Òpa àhraa ígu werera: “Mua umuri nũcu Goãmũ mera árĩrãca,” arĩ werepimi Jesu marire.

²⁶ Gajirã muare guyadiarima. Eropigu muare were gojaa. ²⁷ Muapure Cristo Espiritu Santore otuhajamĩ. Espiritu Santo mua mera árĩnguimi. Eropigu Espiritu Santo mua mera árĩgu diaye majare muare masicũ iimi. Espiritu Santo muare buhecũ ìha gajigu muare buhegure amabeaa mua. Árĩpehrerire diaye maja árĩrire buhemi muare Espiritu Santopũ. Guyarire ne buhebeamĩ ígu. Eropirã Espiritu Santo ígu muare buhediro dopa ta Jesucristo yare peerã ígu mera òaro árĩque.

²⁸ Eropirã, yu porã, Jesucristo mera majarã árĩque. Mua eropiirã Cristo ígu dujaririnũ árĩcũ ne gũisome ígure. Eropirã ígu dujaririnũ árĩcũ mua guhyasĩriri mariro árĩrãca. ²⁹ Cristo Goãmũ magu ígu òari dihta iidigu árĩcũ mua masia. Irire masirã iri sãre masia mua. “Árĩpehrerã diaye maja òarire iirã Goãmũ porã ta àhrima,” arĩ masia mua.

3

Mua ta Goãmũ porã àhraa, arĩ werera àhraa

¹ Goãmũ mahitaricãmi marire. Eropigu ígu marire “Mua yu porã ta àhraa,” arĩmi. Eropirã ígu porã ta àhraa mari. I yeba majarã ñerã Goãmũre masibeamã. Eropirã erã mari sãre masibeamã Goãmũ porã mari árĩcũ. ² Yu mahirã, dohpague Goãmũ porã àhraa mari. Puhrague mari dohpa árĩburire mari òaro masibeaã dohpa. Cristo dehyoacũ daja diaye ta irire masirãca. Ígu árĩricurire ìha masirãca. Eropirã Cristo marire dehyoacũ daja ígu iro dopa ta mari gohroto árĩrãca. Eropirã ígu òagu iiro dopa ta iirãca pare. Irire masia mari. ³ Eropa masirã ñerire duhu Cristo ígu árĩro dopa ta òarire iidiaa dohpague sãre.

⁴ Árĩpehrerã ñerire iirã Goãmũ dorerire tarinugarã àhrima. Ñero iiri Goãmũ dorerire tarinugari àhraa. ⁵ Cristo márĩburire mari òaro masibeaã dohpa. Cristo dehyoacũ daja diaye ta irire masirãca. Ígu árĩricurire ìha masirãca. Eropirã Cristo marire dehyoacũ daja ígu iro dopa ta mari gohroto árĩrãca. Eropirã ígu òagu iiro dopa ta iirãca pare. Irire ari masa ñerire cóãbu eramĩ. Ígupure ñeri ne mara. Mua irire masia. ⁶ Eropirã árĩpehrerã Cristo mera majarã árĩrã erã sã ñerire eropa iiniguicãbeama. Ñerire eropa iiniguicãrã Cristore ne masibeamã. Eropa iirã Cristo yarã

áríbeama. ⁷ Yu buherã, muare gúyarãre peebiricãque. Árîpehrerã diaye majare iirã, Cristo iro dopa ôarã áhriima. ⁸ Ñerire eropa iiniguicãgu watí yagu áhrimi. Watí tamera mata ñerire iinugadigu árîñumi. Eropigu Goãmu magu Jesucristo watí dorerire cóagu erami.

⁹ Eropirã Goãmu porã ígu árîrire opama. Eropirã erã ñerire eropa iiniguicãbeama. Goãmu erã Pagu árîcũ erãpu ñerire iiniguicãmasibeama. ¹⁰ Ôpa Goãmu porã árîrãre, watí porã árîrã sãre masirãca. Watí porã Goãmu porã iro dopa ta áríbeama. Diaye maja árîrire iibirã, gajirãre umupeobirã Goãmu porã áríbeama.

Mña mera majarãre mahi umupeoque, arí werera áhraa

¹¹ “Mari mera majarãre mahi umupeoro gahmea,” ne arí buhecũ peeabũ mña. ¹² Eropirã mari Caín iribojegue majagu ígu ñero iidiro dopa ta ñerire iibiricãrã. Ígu Caín watí yagu árîdi ígu pagu magure wejêcãñumi. Caín ñerire iimuriñumi. Ígu pagu magupu ôarire iimuriñumi. Ígu eropa ôarire iira dipuwaja Caínpu ígure íhaturiñumi. Eropigu ígure wejêcãñumi.

¹³ Eropirã i mũmu majarã ñero iiricurã mari ôarire iicũ íha íhaturima marire. Eropirã “¿Duhpirã yure íhaturiri erã?” arîrire masirãca. ¹⁴ Negohrare mari Goãmu yare iibirã árîñirã mari dederebonirã árîribũ. Dohpaguere pare Goãmu yare iirã árîrã ígu mera árîñiguimorã áhraa. Eropirã ígu itamuri mera Jesu yarãre mahi umupeorã áhraa. Eropa umupeorã árîrã “Goãmu yarã áhraa,” arí masia mari. Masare mahibirã peamegue wamorã áhriima. ¹⁵ Eropirã erã erã mera majarãre íhaturirãpu masare wejêrã iro dopa ta iima Goãmu ígu íacũ. Masare wejêrã umarogue árîmorã áríbeama. Irire ôaro masia mña. ¹⁶ Cristo ígu sîrirañere guñarã marire ígu mahira gohrare masia. Cristo mari masare mahitarigu mari dipuwajare aî mari Goãmu mera árîñiguiborore sîrimi. Mari sã gajirãre itamugu sîribu ta árîqueregu mari acawererãre mahi itamuro gahmea. ¹⁷ Yujugu baja opagu Jesucristo yagure mojomorocugure íaqueregu ta ígure mojomoro íabigu Goãmure mahibeami ígu. ¹⁸ Yu porã, mari “Yuhũ masare umupeoa,” mari arí wererã erãre ítamuro gahmea. Erãre ítamubirã erãre mahi umupeobirã iiaa.

Güiro mariro Goãmu pohro árîmasia mari

¹⁹ Eropa gajirãre mahi umupeorã, “Mari diaye ta Goãmu yarã áhraa,” arîmasia. ²⁰ Eropirã mari basi “Gajino yu ñero iira dipuwaja árîca yure,” arí pepiquererã ta Goãmu mera ôaro sîporãcurã árîmasia. Goãmupũ árîpehrerire masigu ôaro masimi mari sîporãre. ²¹ Eropirã mari “Ñeri dipuwaja marica yure,” arí pepirã ôarire iirã Goãmu mera mari güiro mariro árîmasia. ²² Goãmu ígu dorerire ígu gamerire mari iicũ ígure mari serêri nũcure ogucumi marire. ²³ Ôpa doremi ígu marire: “Goãmu magu Jesucristore umupeoque. Eropirã mña mera majarãre mahi umupeoque Cristo marire ígu dorediro dopa ta,” arí doremi marire. ²⁴ Goãmu dorerire iirã Goãmu mera ôaro árîcãa mari. Ígu Goãmu sã mari mera ôaro áhrimi. Goãmu ígu Espîritu Santore obeomi marire. Mari mera árîgu “Goãmu yu mera áhrimi,” mari arí masiburire Espîritu Santo marire masicũ iimi.

4

Goãmu yarã gohrare masiro gahmea marire, arí werera áhraa

¹ Yu mera majarã, dohpaguere i umure bajarã guyarã àhrima, “Goãmu yare wererã àhraa,” ariquererã. Eropirã gajirã mua watopegue Goãmu yare buherã aricũ òaro ãaque erãre. “¿Erã buheri noa buheri àhriri?” arĩ ãaque. “¿Erã Goãmu yarã àhriri?” arĩ ãaque. ² Òpa masique erãre serëpirã: “¿Jesucristo i yebague aridigu diaye ta masu gohra ariyuri?” arĩ serëpiñaque erãre. Mua eroparicũ pee erã Goãmu yarã arirã “Masu ta árĩñumi Jesu,” arĩ yuhrirãcoma. ³ Erã Goãmu yarã árĩbirãpu “Jesucristo masu gohra árĩbiriñumi,” arĩ yuhrirãcoma. Erã eropa arĩ yuhricũ “Erã ya pepiri Cristore ìhaturigu ya dorero dopa ta àhraa,” arĩ masirãca mua. “Cristore ìhaturigu arigucumi,” peetuhajabu mua. Eropigu ìgu ya buheri i yebaguere arituhajaa.

⁴ Yu porã, Goãmu yarã àhraa muapu. Eropirã mua Goãmu yare were guyarãre tarinugatuhajabu. Mua mera arigu Espiritu Santopu watĩ tauro àhrimi. Watĩ i umu majarã yagu àhrimi. Eropirã muare guyarãre tarinuga, erãre peebirabu mua. ⁵ Guyarãpu i umu majarã àhrima. Eropirã erã i umu majare guyarire buhecũ i umu majarã dihta erãre peema. ⁶ Maripu Goãmu yarã àhraa. Eropirã Goãmure masirãpu marire peema. Gajirãpu Goãmu yarã árĩbirãpu marire peebeama. Eropirã òpa arĩ masia mari. “Erã Goãmu yare peerã Goãmu doreri diaye majare opama. Erã Goãmu yare peebirãpu watĩ doreri guyarĩ majare opama,” arĩ masia mari.

Goãmu árĩpehrerãre burigã mahiniguigu àhrimi, arĩ werera àhraa

⁷ Yu mahirã, mari gajirãre mahicũ Goãmu iigu àhrimi. Ìgu eroparicũ ìarã mari mera majarãre mahirã. Masare òaro mahirãpu Goãmu porã àhrima. Eropirã erã Goãmure òaro masima. ⁸ Masare árĩpehrerãre Goãmu burigã mahiniguigu àhrimi. Ìgu eropa mahiniguigu aricũ masare mahibirãpu Goãmure masibeama. ⁹ Goãmu marire ìgu mahirare ìhmudi arĩmi ìgu magure obeogu. Ìgu magure yujugu ta arìgure marire taubu obeodi arĩmi i yebaguere. Eropa obeogu marire ìgu mahirire masicũ iidi arĩmi. ¹⁰ Ìgu magure obeora mahiri gohra àhraa. Mari masa Goãmure mahibiriquerecũ ìgu Goãmupũ marire burigã mahidi arĩmi. Eropigu ìgu magure obeodi arĩmi mari ñerire còabure. Ìgu magure obeora iri ta àhraa marire ìgu mahiri gohra.

¹¹ Eropirã, yu mahirã, Goãmu burigã marire mahicũ ìarã mari sã mari mera majarãre mahirã. ¹² Masapu ne mari Pagure Goãmure ìabeama. Ìgure ìabirã mari arìquerecũ ta mari mera majarãre mari mahicũ Goãmupũ mari mera òaro eropa arĩniguicãmi. Eropigu ìgu mari mera arìgu marire gajirãre òaro mahinemocũ iimi. ¹³ Goãmu marire ìgu Espiriture ohami. Eropirã ìgu Espiriture mari oparã “Goãmu mari mera òaro àhrimi,” arĩ masia mari. ¹⁴ Mari Pagu ìgu magure i yeba majarãre taubure ìgu obeocũ gua ìabu. Eropirã ìrìre ìanirã gajirãguere ìrìre werea gua. ¹⁵ “Jesucristo Goãmu magu ta àhrimi,” arìgu ìgu ta Goãmu mera òaro arìgu iimi. Eropigu Goãmu sã ìgu mera òaro arìcãgu iimi.

¹⁶ Eropirã Goãmu marire mahirire masia mari. Eropirã marire diaye ta mahigu ìgu aricũ masia mari. Goãmu masare árĩpehrerãre burigã mahiniguicãgu àhrimi. Eropirã masare mahiniguirãpu Goãmu mera òaro àhrima. Goãmu sã erã mera òaro àhrimi. ¹⁷ I yeba arìdigu Cristo Goãmure gajirã sãre ìgu mahidiro dopa ta mari sã Goãmure gajirã sãre mahia. Eropirã mari eropa mahirã mahinemoa, dipuwaja moarinũ aricũ mari

güibiriboro dopa. ¹⁸ Eropirā mari Goāmure mahirā güibeaa. “Goāmū marire burigā mahimi,” arī ōaro masirā güisome pare. “Mata Goāmū yare dipuwaja moagucumi,” arī pepirāpu güia mari. Mari eropa pepirā Goāmū marire İgu mahirire ōaro masibeaa.

¹⁹ Marire Goāmū mahimuhtami. Eropirā mari sā İğure mahia. ²⁰ Yujugu masu gajigure İhaturigu árİqueregu “Yu sā Goāmure mahia,” arİgu guyagu āhrimi. Gajigure İhaturigu Goāmure mahibeami İgu. Gajigure İgu masigu árİqueregu ta mahibigu Goāmū sāre İgu ne İabigure mahimasibeami İgu. ²¹ Eropa āhraa marire Cristo İgu doreri: Goāmure mahirā árİrā mua pohro árİrā sāre mahi umupeqoe.

5

Goāmū porā árİrā Goāmū dorerire iima, arī werera āhraa

¹ Árİpehrerā Jesupure “Cristo āhrimi. Goāmū obeodigu ire burigā mahimi,” arİāhrimi,” arİrā Goāmū porā ta āhrima. Gajirā pagure mahirā İgu porā sāre mahia mari. Eropa ta mari mari Pagure Goāmure mahirā, İgu porā sāre mahia. ² Eropirā Goāmū porāre mari mahirire mari ōpa masirāca: Goāmure mahi, İgu dorerire ōaro ii, İgu porā sāre mari mahirā iiaa. ³⁻⁴ İgu dorerire ōaro iirā Goāmure mahirā iiaa mari. Marire Goāmū İgu dorerire iicū teboricusūya mara. Eropirā mari árİpehrerā Goāmū porā árİrā, i umu maja İerire eropa iiniguicāsoma. Goāmure umupeorā ne İerire gamebeaa. Eropirā İğure mari umupeora puhru İerire İidiabeaa. ⁵ İerire gamebirā ōpa arİrā āhraa mari Jesucristore. “Jesu Goāmū magu ta āhrimi,” arī umupeorā ta āhraa. Eropa arİrā árİrā İerire gamebirā āhraa mari.

Goāmū magu árİricurire werera āhraa

⁶ Jesucristo i yebague erami. I yebague arİgu deco mera waİyesūmi. Deco dihta árİbeaa. Puhru sİrigu İgu di cóami. Eropirā Jesucristore İgu deco mera waİyecū İha İgu ya di cóacū İha “İgu Goāmū magu ta āhrimi,” arİ masia mari. Jesucristo árİricurire diaye ta marire árİpehrerāre masicū iimi Espíritu Santo. Espíritu Santo diaye majare marire masicū iimi. ⁷⁻⁸ Umarogue sāre irire “Jesucristo Goāmū magu ta āhrimi,” arī wererā urerā āhrima. Mari Paga, İgu magu, Espíritu Santo erā ta āhrima. Erā urerā ta āhrima. Eropirā yujugu iro dopa ta āhrima. I yebague sāre “Jesucristo Goāmū magu āhrimi,” arİ masisūa. İgu magu İgu árİricurire Espíritu Santo marire masicū iimi. Eropi Jesure deco mera İgu waİyerare masirā “İgu Goāmū magu āhrimi,” arİ mari masia. Eropirā mari árİburire Jesu sİrigu İgu di cóarañere İha masirā “Goāmū magu ta āhrimi,” arİ masia mari. Iri mera marire masiro gahmea. ⁹ Mari masa dihta wereniguicū mari peea. Eropirā marire Goāmūpu İgu magu árİricurire wereniguicū ōaro peero gahmea. ¹⁰ Eropirā Goāmū magure umupeorā İgu Jesure were buherire ōaro peema. “Diaye ta āhraa,” arİ pepima erā Jesu yare buherire. Goāmū İgu magu yare “Diaye árİbeaa,” arİ pepirāpu “Goāmū guyagu āhrimi,” arİrā āhrima erā. Goāmū İgu magure arİ wererire peebirā āhrima. ¹¹ Goāmū marire umuri nucu İgu mera mari árİniguicū İigucumi. Goāmū magure gamerā árİrā mari árİcū İgu mera eropa árİniguicū İigucumi marire. I āhraa Goāmū magure İgu wereri. ¹² Eropirā Goāmū magure umupeorā Goāmū mera árİniguicārāca. Eropirā gajirā İğure gamebirāpu İgu mera árİsome.

Weretu ĩḡu gojara āhraa

¹³ Mũa Goãmũ magure umupeorã ĩḡure peerã mũa Goãmũ mera eropa árĩniguiçãrãca. Mũa Goãmũ mera árĩburire õaro masicũ mũare were gojagu iiaa.

¹⁴ Mari, mari dohpa árĩrire Goãmũre serẽrã ĩḡu gamediro dopa ta mari serẽcũ ĩḡu marire õaro peenũrugucumi. Eropa mari serẽrã, "Diaye ta õaro peemi ĩḡu," arĩ masia mari. ¹⁵ ĩḡure mari eropa serẽcũ ĩḡu marire peemi. ĩḡu pee mari serẽropẽ ta ogucumi. ĩḡu eropa peecũ masirã ĩḡure mari serẽropẽ ta ĩḡu obu árĩcũ sãre masia mari.

¹⁶ Mari mera majagu gajigu Jesucristore umupeogu ñerire ĩḡu iigu árĩcũ ĩha ĩḡure Goãmũre serẽbasaro gahmea. Eropa serẽcũ Goãmũ ĩḡure taugucumi ĩḡu dedereborañere. Gaji ñero iiri āhraa. Iri ñero iirire gajigu ĩḡu iigu árĩcũ ĩha Goãmũ ĩḡure dedereburĩñere taubeami. Eropigu mũ acaweregu iri ñerire iicũ Goãmũ taubiriburire iicũ "Ĩḡure Goãmũre serẽbasaque," arĩbeaa yũhu mũare. ¹⁷ Árĩpehreri ñero iiri ñetariari āhraa Goãmũ ĩḡu ĩacũ. Eropa árĩquerecũ gaji ñeri iiri peamegue wacũ iibeaa masare.

¹⁸ Goãmũ magu Jesucristo Goãmũ porãre õaro cãhmotami. Eropigu watĩpu Goãmũ porãre ñero iirire doremasibeami. Eropirã Jesucristo cãhmotari mera Goãmũ porã ne ñero iirire eropa iiniguiçãbeama. Iri mari masia.

¹⁹ Mari Goãmũ porã āhraa. Watĩ i mũmu majarã opu āhrimi. Iri sãre masia mari.

²⁰ Goãmũ magu i yebague aridi Goãmũre õaro masicũ iimi ĩḡu marire. Eropirã Goãmũre "Diaye ta āhrimi," arĩ masia mari. Eropirã Goãmũ magu Jesucristo yarã āhraa mari. Eropirã Goãmũ mera mari õaro árĩniguiçãrã iiaa. Ihĩ diaye ta Goãmũ gohra ta āhrimi. Eropirã ĩḡu mera árĩniguiçãrãca.

²¹ Yũ buherã, goãmarã wéanirãre "Goãmũ āhrimi," arĩ umupeobiricãque. Goãmũ dihtare umupeoque. Iripẽta āhraa.

2 San Juan

Gajiräre were gojañumi Ñu. Jesu yare, diaye mahiri säre wereñumi

¹⁻² Yuhü bugu müre Goämu beyedigore mü porä säre ipüre gojabeoa. Jesucristo yare diaye majare opaa mari. Iri mari mera árñiguicäroca. Eropigu diaye ta mahia yuhü müare. Yu dihta mahibea müare. Gajirä Jesu yare masirä sä diaye ta müare mahima. ³ Goämu mari Pagu, Jesucristo igu magu mera diaye igu mahiri mera marire öaro iigucumi. Eropigu marire mojomoro iagucumi. Eropigu marire öaro árícü iigucumi igu.

⁴ Mari Pagu marire igu dorediro dopa ta mü porä yujuräyeri igu yare öaro yührirä árícü peebü. Eropa peegu mucubiriabu. ⁵ Eropigu, acawerego, mari mera majaräre mahi umupeodorea marire. Yu doreri mama doreriñe áríbeaa. Iri doreriñe marire mata árítuhaya. ⁶ Eropirä Goämu dorerire iipehorä mari igüre mahia. Eropiro iri doreriñe ähraa müa negohrare peerañe. Gajiräre eropa mahiniguicärä áríque.

Bajarä guyaricurä áríräcoma, arí werera ähraa

⁷ Bajarä guyarä i umu majaräre buherä wahama. "Jesucristo i yebaguere aridigu masu dupu gohra árígu aribiriñumi," aríma. Erä guyarä Cristore ihaturigu iro dopa ta iima. ⁸ Eropirä öaro pee masique müa. Müare guyaräre peebiricäque Goämu müare igu öaro iiburire cóari arírá. Eräre peebiricü Goämu müa öari iira waja obeogucumi müare.

⁹ Árípehrerä Jesucristo buherire peenirä irire cóarä Goämu yarä áríbeama pare. Jesucristo buherire öaro peenürüräpu Goämu mari Pagu yarä ährima. Goämu magu Jesucristo yarä sä ährima. ¹⁰ Eropirä müa yujugu Jesucristo ya buherire gamebigu gaji buherire buhegu müa pohro eracü igüre game bocatíribiricäque. Müa ya wirigue ñajadorebiricäque. ¹¹ Gaji buherire buhegu Jesucristo yare umupeobigu ñero iigu ährimi. Eropirä müa igüre bocatíri sererä ñero iidigüre itamurä iiaa. Eropirä igüre bocatíri serëbiricäque.

Were gojatura ähraa

¹² Baja yuhü müare werediaqueregu ta irire paperapüque gojabeodia-birica. Yu basi ta müare iagu wadiaca. Müare iagu weretamugaca mari öaro mucubiriburire.

¹³ Mü pagu mago Goämu beyedigo igo poräpu müare öadorema. Iripëta ähraa.

3 San Juan

Gaji carta gojañumi daja Ñu. Gayo ĩgu ðaro iirare wereñumi

¹ Yũhũ buçu mũre Gayore diaye ta yũ mahĩgũre ipũre gojabeoa.

² Yũ mahĩgũ, mũhũ Goãmũre ðaro umupecũ masia yũhũ. Mũhũ Goãmũ mera ðaro árĩro dopa ta mũ dupũ sã ðaro árĩcũ serẽbasaa yũhũ Goãmũre.

³ Gajirã Jesucristo yarã yũ pohro erarã mũ árĩricurire yũre wereama. Cristo gamerire diaye mũ iirare wereama erã yũre. Erã eropa werecũ peegu bũrigã mucubiriabu yũhũ. ⁴ Jesucristo yarã yũ buhenirã Jesucristo yare diaye ta árĩrĩre erã iicũ pee bũrigã mucubiria yũhũ.

⁵ Yũ mahĩgũ, mũhũ Jesucristo yarãre itamugu ðaro iiaa mũhũ. Jesucristo yarã mũ ĩha masibirã sãre itamugu ðatariaro iiaa. ⁶ Erãpũ erãre mũ umupearare wereama guare Jesucristo yarã gamenerogue. Eropĩgu Goãmũ yare buhe curirãre mũ pohrogue erarã erã gajipũ wacũ itamuque erãre. Mũ eropa iigu ðaro iigu árĩguca mũhũ. Eropa ta marire itamuro gahmea Goãmũ yare buherãre. ⁷ Erã Jesucristo ya árĩburire buhe curirã warã, Jesucristore umupeobirãpũre erã itamurire ne serẽbeama.

⁸ Eropirã marire Jesucristo yare buhe curirãre itamuro gahmea. Erãre eropa itamurã erã iiro dopa ta mari sã Goãmũ yare buherire itamurã iiaa.

Diotrefe ĩgu ñero iira àhrraa

⁹ Eoãmũ yare buhe curirãre mũ pohrogue erarã erã gajipũ wacũ itamuque erãre. Mũ eropa ro majarãre Jesucristo yarãre yũ gojarapũre gojabeorabu. Diotrefepũ ĩgu basi erã opu árĩdiagũ yũ wererare peedibiripũ. ¹⁰ Eropĩgu mũa pohro yũ ejara pũhrũ ĩgu iirare werepehogura. Guare ñero werenigupũ. Eropĩgu Jesucristo yare buhe curirãre bocatĩribiripũ. Gajirã ero árĩrã erãre bocatĩridiacũ gamebiripũ. Gajirãpũ erã buhe curirãre bocatĩricũ ĩha ĩgu Diotrefe erã bocatĩrira waja erãre cohã wiupũ Jesucristo yarã gamenereri wihigue.

¹¹ Yũ mahirã, ñero iirãre ĩhacũbircãque. ðaro iirãre ĩhacũque. ðarire iirã Goãmũ yarã àhrrima. Ñerire iirã Goãmũre masibeama.

Demetrio ĩgu ðari iira àhrraa

¹² Árĩpehrerã “Demetrio ðagũ àhrrimi,” arĩma. Eropirã ĩgu iirire ĩarã ðaro ĩgu iira árĩcũ masima masa. Gua sã ĩgu ðaro iirare eropa ta werea. Gua wereniguiripũ diaye árĩcũ masia mũa.

Ñu weretura àhrraa

¹³ Mũare baja werediarabu. Iirire gojasome. ¹⁴ Merogã pũhrũ mũare ĩagũ wadiaca. Eropirã mari basi weretamurãca.

¹⁵ ðaro árĩque mũhũ. Mari mera majarã Jesucristo yarã mũre ðadorema. Ero majarã mari mera majarã sã ðaporo. Iripẽta àhrraa.

San Judas

Juda Jesu yaräre gojabeoñumi

¹ Yuhũ Juda Santiago pagu magu Jesucristo pohro majagu muare Jesu yaräre ipũre gojabeoa. Muare mari Pagu Goãmu ïgu beyenirã áhraa. Eropirã ïgu mahiri mera ôaro áhraa mua. Eropigu muare Jesucristo ïhadibumi mua ñerire iibiriborore. ² Ôadorea muare. Goãmu itamuro mera ôaro árique mua. Eropigu Goãmure mojomoro ïhadore, muare mahidoregu serêbasaa yuhũ Goãmure. Mua gajirã mera ôaro áhri eräre mahiborore serêbasaa Goãmure.

Guyarã erã buherire werenugañumi Juda

³ Goãmu marire peamegue wabonirãre ïgu itamuripure turaro gojabeodiarabu muare, yu mahirãre. Eropa gojadiaqueregu ta dohpaguere guyari buherire gamedorebigu muare gojabeoa. Gajirã mua pohro ejanirã erã guyari buherire mua peebiriboro dopa muare gojabeoa dohpaguere. Eropirã Jesucristo ya buheripure buhe tarinugaque. I buheripure peerã, mari Goãmure ôaro umupeoa. I buheripu Jesu ïgu apinirã ïgu yaräre erã buhera eropa áriniguicãro iiaa gohrotoro mariro. ⁴ Bajamerãgã masa ñerã ïha masiya marirã mua pohro ejanirã árima. Mua mera árirã erã buherire buhe guyama guare ïha masiri arãrã. Ôpa arã buhema: “Goãmu yarã mua áricũ, ïgu mahimi muare. Eropigu nome mera mua ñero iicũ ïgu muare ne dipuwaja moasome,” arã buherima erã. Eropirã mari Opure yujugu ta árigure Jesucristore “Goãmu magu árĩbeami,” arã buherima erã. Eropa arã buherãre Goãmu ïgu dipuwaja moaborore wereñumi iribojeguere ïgu yare erã gojarapũgue.

⁵ Dohpaguere gajire guñacũ iidiaa muare. Ire mua masiquerecũ ta dipaturi muare ire guñacũ iidiaa. Goãmu ïgu yaräre Egipto árinirãre ïgu wiura puhru erã mera majarã ïgure umupeobirinirãre Goãmu wejẽñumi.

⁶ Eropirã mua gajirã sãre guñaque. Gajirã anyuapu Goãmu doreri iinirã, puhru iidiabiriñuma. Eropirã erã ïgu árdidore apidiro sãre erã árdidiabiriñuma. Eropirã erã árdidore coãcãñuma erã. Erã eropa coãcũ ïagu Goãmu eräre naitiarogue eräre peresu iinñumi. Eropirã erã pehrerinũ core comedare dirinirã iro dopa áriniguicãrãcoma. Eropigu pehrerinũ áricũ dipuwaja moagucumi Goãmu erãre. ⁷ Eropa ta ñero iinũma gajirã sã. Erã sãre guñaque mua. Erã Sodoma waicuri maca majarã, Gomorra waicuri maca majarã iri macari pohro árirã macari majarã sã nome mera ñero iimuriñuma. Eropirã gajiropa árirã sãre iinũma. Erã umapu erã basi ta erã dupu mera ñero iinũma. Nome sã eropa ta iinũma erã seyaro. Erã eropa iira dipuwaja Goãmu eräre soepuhocãñumi. Eräre soegu Goãmu árĩpehrerã ïgure tarinugarãre ïgu dipuwaja moaburire ïhmuugu iinñumi. Eräre ïgu dipuwaja moari peame ne yarisome.

⁸ Erã Goãmure tarinaganirã iidiro dopa dohpague sã eropa ta iiniguicãma guyarire buherã. Erã pee masibirã iro dopa ta erã dupu mera ñero iima. Eropirã mari Opu dorerire gamebeama erã. Eropirã deyobirãre, umaro oparãre, turarãre erãpu ñero werenigui corema.

⁹ Ôagu anyua opãpu Migue waicugu ïgu turagu árĩqueregu ta watĩpure ñero werenigui corebirãpu. ïgu Moise dupu murarore gamegu, watĩ

mera game duyasopu. Turagu árĩqueregu ta ĩgu watĩ tauro “Yu tamera turaa,” arĩ pepibiripu. Eropĩgu ĩgu gamero watĩre “Peamegue waporo,” arĩ weresábiripu Goãmure. Eropĩgu opa arĩpu watĩre. “Goãmugue mure turiporo,” arĩpu Migue watĩre. ¹⁰ Oã guyarãpu erã masibirare ñero werenĩgui corema. Eropirã waimurã pee masibirã erã gamero ñero iiro dopa ta erã guyarĩ wererãpu eropa iimaacãma. Eropa iirã árĩrã peamegue warãcoma.

¹¹ Erã ta ñero tarĩrãcoma. Caĩn iribojegue majagu iidiro dopa ta ñero iima erã. Eropirã Balam sã ĩgu iidiro dopa ta erã niyerure mahi, aĩdiarã guyarire buhema. Eropirã niyeru aĩri dihtare pepima erã. Eropirã iribojegue majagu Coré waĩcugu ĩgu opure Moiserẽ ĩgu cóãdorediagu ĩgu iidoreldiro dopa ta erã sã Jesure eropa ta cóãdoreldama. Eropirã ĩgu iidiro dopa ta erã sã peamegue warãcoma. ¹² Erã muare guya wererãpu mua game mahi ii ĩhmburi bosenuire barã, umupeori mariro erã erã gamero bira, erã seyaro ta barire bapheocãma gajirãre oro mariro. Eropirã ñerire iirã erã mua bosenuire õarinuri waboraãñere goroweoma. Deco mariri imica cururi iri mari otera itamubiro dopa ta erã guyarire buherã ne muare itamubeama. Eropiro iri imica cururi miruñe weãcũ eropa gohrotoniguicãma. Yucu ducacubiriri yucu duhpiburi árĩburo dopa erã duhpimorã árĩbeama. Erã buheri mera gajirãre Goãmure umupeocũ iibeama. Yucugu duca maricũ ĩha mari duha peamegue soe cóãcãa irigure. Eropa ta Goãmu erãre guyarãre peamegue cóãgucumi. ¹³ Pãgũri pumarare pamujupira iro dopa erã ñerire guhyasiurire wereniguima. Necãmu yuridija ĩgu pehrero dopa ta erã sã pehrea warãcoma. Erã eropa ñero iira dipuwaja dederea warãcoma. Goãmũ erãre dipuwaja moacũ naitiarogue árĩniguicãrãcoma.

¹⁴⁻¹⁵ Enoco iribojegue majagu Adãn puhru siete cururi puhru majagu opa arĩmuriñumi. “Peeque yare. Goãmũ bajarã ĩgu anyua õarã mera arĩpehrerã ñerãre erã ñerire iira dipuwaja moagu arigucumi. Eropĩgu arĩpehrerã Goãmure ĩhaturirã erã ñeri iira dipuwajare erãre masicũ ĩgu arigucumi Goãmũ. Eropĩgu Goãmure erã ñero wereniguira dipuwaja sãre erãre masicũ ĩgu arigucumi,” arĩmuriñumi Enoco murũ. ¹⁶ Erã guyarã gajirãre duyaso ñero werenĩgui corerã, erã ñero uaribejari dihtare iirã aħrma erã. Eropirã “Gajirãre masitarinugaa gua,” arĩrĩma erã. Eropirã erã gamero dopa iidiarã gajinore emadiarã, peemaja õaro wereniguima masare.

Jesu yarãre werenemoñumi Juda

¹⁷ Mari Opu Jesucristo buhedore ĩgu apinirã erã buherare guñaque muapu, yu mahirã. ¹⁸ Opa arĩma erã muare. “I yeba pehreboro coregã Goãmure ñero arĩ wereyarã árĩrãcoma. Eropirã erã Goãmure gamebirã, ñerire erã uaribejarire iirãcoma erã,” arĩ werema Jesu ĩgu apinirã muare. ¹⁹ Jesu yarãre erã basi erã game ĩhaturicũ iima erã guya wererãpu. Eropirã ñerã erã ñeri uaribejarire iirã árĩrã, Espĩritu Santore ne opabeama erã.

²⁰ Muapu yu mahirã, Jesucristo ya buherire õaro peenemoque guñaturarã mua árĩboro dopa. Iri buheripu õataria. Espĩritu Santo itamuri mera Goãmũ mera wereniguiche mua. ²¹ Goãmũ muare burigã mahimi. Eropirã ĩgu muare mahiniguiboro dopa ñeri mariro árĩniguicãque Goãmũ ĩgu dorero dopa. Eropirã Jesucristo mera mua

eropa árĩnĩguiburire coreque. Īgu marire mojomoro ĩagu ɯmaroguere eropa árĩnĩguicũ iigucumi.

²² Cristo yare peediabiriñarirãre mojomoro ĩaque. Eropirã erãre Jesucristo ya diaye árĩrĩre wereque. ²³ Erãre peamegue wabonirãre Goãmure itamucũ iique mũa. Gajirã ñerire iirã wahama. Erã ñerire dooque. Erãpure mojomoro ĩaque mũa. Erãre itamurã mũa sã õaro iique erã ñeri iirire ĩhacũri arĩrã. Guhraricuri suhrĩrore mũa gamebiro dopa ta, gajirã erã ñeri iirire gamebircãque irire pẽhreri arĩrã.

Juda Goãmure ĩgu umupeori ahrũ ɯmaroguere eropa árĩnĩguicãa

²⁴⁻²⁵ Goãmũ mari Opũ marire ĩhadibumasimi ñerire mari iibiriboro dopa. Eropigu ĩgu marire ñeri dipuwaja marirãre ɯmarogue ĩgu pohroque apimasimi. Eropa marire ĩgu erogue apicũ mari mucubirirãca. Īgu Goãmũ yujugu ta ahrimi. Eropigu peamegue wabonirãre taugu ahrimi ĩgua. Īgũru iribojegue dohpague sãre õatariagu, mari tauro opu árĩgu, turatariagu, árĩpehrerãre doregu ahrimi. Īgu eropa árĩgu árĩcũ Jesucristo yarã arĩrã ĩgure umupeorã. Eropa ta iirã. Iripẽta ahraa.

Apocalipsis

Puhruquere I umu dohpa waborore marire masicũ iimi Jesucristo, arĩ gojañumi Ñu

¹ Ipũ mera Jesucristo ĩgu yaräre masicũ iirare were gojabeogu iiaa. Mari Pagu Goãmupũ irire weredoregu apipũ Jesucristore. ĩgu yaräre ĩgu pohro majaräre masicũ iidoregu apipũ. Eropigu puhru waburire marire masicũ iidoregu apipũ Jesucristore. Eropigu Jesucristo marire eropa eropa masicũ iibu ĩgu anyure obeodigu árĩmi yare Ñure irire weredoregu. ² Eropigu yuhũ Ñu baja ĩamũhtabũ Goãmũ ĩgu dohpa iiburire. Goãmũ ĩgu werenigui ri säre peeabũ. Eropigu árĩpehreri yũ ĩarare yũ peerare were gojabeogu iiaa. Jesucristo ĩgu basi ta diaye arĩrare were gojabeogu iiaa.

³ Ipũ mera puhruque dohpa waburire were gojagu iiaa. Merogã duhyaro iiaa iri árĩpehrero eropa waboro. Eropirã árĩpehrerã ipũre buherã, yũ wererire õaro yuhirã õaro mucubirirã árĩrãcoma.

Siete iglesia majaräre Jesu yarã gamenereräre gojabeopũ Ñu

⁴ Yuhũ Ñu mũare siete cururi majaräre Jesu yaräre Asia yeba majaräre gojabeoa. Goãmũ ĩgu mahiri mera mũare õadorea. Eropirã ĩgu itamuri mera õaro árĩque mũa. ĩgu negohraguere eropa árĩniguidigu árĩñumi. Dohpague säre eropa ta árĩnigui. Puhruque säre eropa ta árĩniguiucumi. Goãmũ ĩgu opu doaro core Espĩritu Santo ahrimi. Siete suburi maja turari árĩpehreri opagu ahrimi. ĩgu mera säre yũ mũare õadorea daja. ⁵ Cristo ĩgu mahiri mera mũare õadorea daja. ĩgu Cristo Goãmũ yare gũyaro mariro weregu ahrimi. Eropigu ĩgu siridigu ĩgu masa mũriadigu ne dipaturi sirisome ĩgu. ĩgu yarã waborore masa mũriamũhtadigu ahrimi. Eropigu i yeba majarã árĩpehrerã oparã tauro opu ahrimi ĩgu. Marire mahigu ĩgu di cõara mera mari ñeri iirare cõadi árĩmi ĩgu. ⁶ Eropa cõagu marire oparã wamoräre wacũ iidigu árĩmi ĩgu. Eropigu marire pahia masare Goãmũre serẽbasarã wamorã säre wacũ iidigu árĩmi. Eropigu Goãmũ mari Pagu yare iimoräre wacũ iidigu árĩmi ĩgu eropa sirigu. ĩgu eropa iidigũre õaro werenigui umupeoro gahmea árĩpehrerinuri. Árĩpehrerã tauro opu eropa árĩnigui ĩgu. Eropa ta árĩporo.

⁷ Õaro pee masi coreque mũa. Imica cururi weca dijarigucumi Cristo. ĩgu eropa aricũ ĩarãcoma árĩpehrerã. ĩgure crusague pabia wejẽnirã mũra sã ĩarãcoma. Eropirã ĩgu aricũ ĩarã i yeba majarã árĩpehreri cururi majarã orerãcoma gũirã. Eropa ta árĩporo.

⁸ Õpa arĩmi mari Opu Goãmũ: “Yuhũ árĩpehrerire ĩhacũnugudigu ahraa. Eropigu árĩpehrerire pehrecũ iibu ahraa, arĩmi. Iribojegue säre eropa árĩnigui mũribũ. Dohpague säre eropa ahraa. Puhruque säre arĩgũra,” arĩmi Goãmũ.

Jesucristore gosesirigũre yũ ĩhabũ, arĩ werepũ Ñu

⁹ Yuhũ Ñu mũa acaweregu Jesu yagu ahraa. Eropigu mũa iro dopa ta yũ sã Jesu ya árĩburire yũ iira dipuwaja ñero taribũ. Eropigu mũa iro dopa ta

yare erā ñero iiquerecū ĩgu itamuri mera Jesure cóãbiribũ. Mari yujuro mera ĩgu Opu árĩro majarā árĩmorā āhraa. Yaha yeba majarā erā cóãdigũ árĩgu Patmo waĩcũri nugurogue āhraa. Goãmu yare Jesucristo ĩgu werera sãre gajirãre yũ wereri dipuwaja õgue erā cóãbeodigũ āhraa. ¹⁰ Ohõ yujunũ soorinũ árĩcũ Espĩritu Santo yare quẽrogue ĩhmuami. ĩgu eropa ĩhmucũ yũ purũpũ burigã wereniguiuri busuro dopa carabũ. Corneta turaro busuro dopa eropa ta busuro carabũ ĩgu wereniguiicũ. ¹¹ Őpa arĩgu carami yũ peecã:

—Yũhũ árĩpeherrerire ĩhacũnugudigũ āhraa. Eropigu yũhũ árĩpeherrerire pehrecũ iibu āhraa. Dohpague mũ ĩaburire gojaripũgue goja aĩque. Mũ eropa goja aĩra puhũ siete cururi majarãre Goãmu yarãre oboeque iripũre. Erã siete cururi majarã Asia yeba árĩri macari majarã āhrima. Eropigu Efeso majarãre, Esmĩrna majarãre, Pẽrgamo majarãre, Tiatira majarãre, Sardis majarãre, Filadelfia majarãre, Laodicea majarãre mũ ĩaburire gojabeoque, arĩgu carami yare.

¹² ĩgu eroparĩcũ peegu majinugajabũ yare wereniguiure ĩabu. Eropa majinugajagũ siete sihãgori yucũre erã duhpeora yucũre oro mera erã ĩira yucũre ĩhabũ. ¹³ Iri yucũ watope masũ iro dopa bejagũre ĩhabũ yũhũ. ĩgu yoari suhriro saũagũ āhrami. ĩgu guburigue dijimerejabũ ĩgu suhriro. Eropigu oro mera erã ĩira gasiro mera ĩgu coretihbire tuãdiudigũ āhrami. ¹⁴ Eropiro ĩgu poari yaji poari iro dopa boreabu. ĩgu cuiuri peame porã iro dopa goseabu. ¹⁵ ĩgu guburi bronce waĩcũri come timura come iro dopa goesĩriabu. Eropiro ĩgu wereniguiuri baja utã dipabu iro dopa busuro carabũ. ¹⁶ ĩgu mojoto diaye maja mojtopũ siete necã opãmi. Eropiro ĩgu disirore ñoserimiji pepũri usirĩmiji cuũuami. Eropiro abe umũ majagũ ĩgu cuimijuro dopa ĩgu diapo turaro goesĩriami.

¹⁷ Eropigu ĩgure ĩagũ uca waha ĩgu guburi pohro mehmerejabũ sĩrigũ iro dopa. Yũ eropa mehmerejacũ ĩagũ ĩgu, ĩgu mojoto diayepũ mera yare duhpeo õpa arãmi:

—Ucabitã. Yũ árĩpeherrerire ĩhacũnugudigũ āhraa. Eropigu árĩpeherrerire pehrecũ iibu āhraa. ¹⁸ Ojocarĩniguiũ āhraa yũhũ. Sĩridigũ árĩribũ. Dohpagure ĩaque. Árĩpeherrerinuri eropa ojocarĩniguiicã yũhũ. Sĩridi dipaturi masagũ dipaturi masare sĩribiricũ ĩmasia yũhũ. Eropigu masare peamegue wabiricũ ĩigu āhraa yũhũ. ¹⁹ Eropigu dohpague mũ ĩarare gojaque. Puhũgue eropa waboro sãre ĩagũ gojaque. ²⁰ Oã siete necãre yũ mojoto diayepũ oparãre weregura mũre. Eropigu siete sihãgori yucũre erã duhpeora yucũ oro yucũ sãre weregura. Yũ õpa arĩ wererire iribojegue majarãre ne wererimuribũ. Őpa āhraa iri: Siete necã siete cururi majarã yaharã oparã árĩrã iro dopa āhrima. Eropiro siete sihãgori yucũre erã duhpeora yucũ siete cururi majarã yaharã iro dopa āhrima, arãmi yare Jesucristo.

2

Efeso majarãre Jesu yarãre gojanugadoreñumi Ñũre

¹ Eropa arĩtuhaja õpa arĩnemoami yare gojadoregu:

—Efeso majarã yaharãre, erã opu sãre õpa yũ arĩrire arĩ gojabeoque mũhũ. Yũhũ mojoto diayepũ siete necãre opagu āhraa. Eropigu siete sihãgori yucũ watope curigũ āhraa. Eropa curigũ arĩgu mũare õpa arĩ werea: ² Árĩpeherrerĩ mũa ĩirare masipehoa. Yaha arĩburire

turaro mohmeabu mua. Yure mua umupeo duhubirabu. Ñerire iiräre mua iadiabirabu. Eropirä “Jesu buhedoregü İgu apinirä ähraa,” arımaacäniräre queoro erä buhebiricü İarä, guyarä erä ärıcü masiabu mua. ³ Yahare mua iira dipuwaja mua ñero tariquererä erä guyaräre tarinugabu mua. Eropirä yure ne duhubirabu mua. “Irire gariborea waca pare,” arıbirabu mua. ⁴ Eropa mua öarä ärıquererä ta yujuñere öaro iibeaa mua. I ähraa iri: Yure öaro mua mahımıhtadiro dopa dohpaguere iibeaa mua. ⁵ Yure mua umupeomıhtarare guñaque muraro ta daja. Dohpaguere mua yure umupeobiriqueyarire guñaque. Eropirä mua irire mua ñeri iirare bujawereque. Irire duhuque. Eropa duhurä yahare mua iımıhtadiro dopa ta iique daja. Mua ñeri iirare mua duhubiricü İagu, yujugu mua yagure sıhägodigure aı cóägura. Eropa iigu mua yuju curu majaräre cóägura. Mua ñeri iirare duhubiricü mua yaha curu majarä ärıniräre duhupehrecü İigura. ⁶ Yure umupeobiriqueyarä ärıquererä ta ire öaro iıabu mua: Nicolaita yare buheräre ñeräre İadiabeaa mua. Yu sä eräre İadiabeaa. ⁷ Gamiricurä ähraa mua. Eropirä peeque. Muare yaha curu majaräre Espıritu Santo İgu wererare peeque mua sä. Öpa arımi İgu: “Ärıpehrerä Jesure umupeo duhubiräre Goämu ya pohe majagu dıcare paraıso majagu dıcare badoregura. Irıgu dıca ojocaririre odıgu ähraa,” arımi Espıritu Santo, arı were gojabeoque Efeso majarä yaharäre erä opu säre, arämi yure Jesucristo.

Esmirna majaräre Jesu yaräre gojabeodoreñumi Ñure

⁸ —Esmirna majarä yaharäre erä opu säre öpa yu arırire gojabeoque muhu, arämi yure Jesucristo. Yuhu ärıpehrerire İhacünugudıgu ähraa. Eropıgu ärıpehreri pehrecü iibu ähraa. Sıria wabu. Dipaturi ojocaria daja. Eropıgu öpa arı werea muare: ⁹ Mua ñero tarirare masia. Mojomorocurä mua ärıcü säre masia. Eropa mojomorocurä ärıquererä ta İgu werenıguirire peerä Goämu yare öarire wuaro opaa mua. Gajıräpu muare İhatırırä muare erä ñero quere moarare masia. Erä “Gua judio masa Goämu yarä ähraa,” arıquererä guyarä iima. Erä Satanare umupeorä ährıma. ¹⁰ Dohpaguere mua ñero tarıburire güıbiricäque. Peeque mua. Watı muare Goämure duhudoregü yujuräyeri mua mera majaräre peresu iidoregucumi. Diez nuri gohra ñero tarıräca mua. Erä eropa ñero iicü muare erä wejediaquerecü ta yure yaha säre ne cóäbiricäque. Mua yure eropa cóäbiricü İagu ärıpehrerinuri muare öaro ärıcü İigura. ¹¹ Gamiricurä ähraa mua. Eropirä peeque. Muare yaha curu majaräre Espıritu Santo İgu wererare peeque mua. Öpa arımi İgu: “Ärıpehrerä Jesure umupeo duhubirä peameguere wasome,” arımi Espıritu Santo, arı gojabeoque Esmirna majarä yaharäre erä opu säre, arämi Jesucristo yure.

Pérgamo majaräre Jesu yaräre gojabeodoreñumi Ñure

¹² —Pérgamo majarä yaharä erä opu säre öpa yu arırire gojabeoque muhu, arämi yure Jesucristo. Yuhu ñoserımıjire pepuri usırımıjire opagu ähraa. Muare öpa arı weregura: ¹³ Mua ärırore masia. Eroque mua ya maca majarä opu Satana ährımi. Erä Satanare umupeoquerecü muapu yure umupeoa. Erä mua mera majagu murare Antıpa murare yahare öaro weredıgu murare wejema. İgure erä wejecü İaquererä ta yure ne umupeo duhubirabu mua. ¹⁴ Mua eropa umupeo duhubiriqueyererä merogä yure tarinugabu mua. Yujuräyeri mua mera majarä Balaam ya buherire

gahmema. Iribojegue majagu ĩgu Balaam waĩcuġu ðpa arĩmuriĩnumi Israe masare ĩhaturirã erã opure: "Israe masare tarinugadiagu ðpa ĩique. Goãmarã wéanirãre mua orare barire badoreque erãre. Eropigu nome mera ñero ĩicũ ĩique erãre," arĩ weremuriĩnumi Balaam gajirã opure Balaco waĩcuġure. Iribojegue ĩgu eropa ñero ĩidorediro dopa ta dohpague sãre ñero ĩicũ ĩima yujurãyeri mua mera majarãre. ¹⁵ Eropirã erã iro dopa ta gajirã mua mera majarã Nicolaita buherire gahmema. Iri buheri sãre ĩadiabeaa yuhu. ¹⁶ Eropirã mua iri ñeri ĩirire duhuque mua. Mua eropa duhubiricũ ĩagu yojaro mera mua pohrogue wagu, eropa ñero ĩirã mera gamequeãġuca. Yuhu disirogue cuĩurimiji ñoserimiji mera gamequeãġuca erã mera. ¹⁷ Gamiricurã áhraa mua. Eropirã mua ya curu majarãre yaharãre Espĩritu Santo ĩgu wererare peeque mua. ðpa arĩmi ĩgu: "Árĩpehrerã Jesure umupeo duhubirãre mana waĩcari barire umaro maja barire ogura. Utã boreriyeri sãre ogura erãre. Iri utãyeri mama waĩre ya gojaturayeri árĩroca. Gajirã iri waĩre ne masisome. Iri utãyerire aĩrã dihta iri waĩre masirãcoma," arĩmi Espĩritu Santo, arĩ gojabeoque Pérġamo majarãre erã opu sãre, arãmi yure Jesucristo.

Tiatira majarã sãre Jesu yarãre gojabeodoreĩnumi Ñure

¹⁸ — Tiatira majarã yaharã erã opu sãre ðpa ya arĩrere gojabeoque muhu, arãmi daja yure Jesucristo. Yuhu Goãmu magu ya cuiĩ peame porã iro dopa gosesirigu áhraa. Eropiro ya guburi bronco waĩcari come erã timura iro dopa gosesiria. Muare ðpa arĩ werea: ¹⁹ Mua ĩirare masia yuhu. Goãmure masa sãre mua umupeorare, yure mua cóãbirirare, gajirãre mua itamurare, ñero tariquererã mua yure duhubirirare masia. Negohraguere mua ĩidiro tauro dohpaguepure ðaro ĩinemorã ĩiaa mua. Iri sãre masia yuhu. ²⁰ Mua eropa ðaro ĩirã árĩquererã ta ðpa yure tarinugabu mua: Jezabe waĩcuġo "Goãmu yare werego áhraa," arĩ guyago mua watope ta áhrimo. Muare igo ñero buhecũ peerã igo turibirabu mua. Eropa guya buhego yaharãre ya pohro majarãre nome mera ñero ĩicũ ĩimo. Eropigo goãmarã wéanirãre erã orare barire badoremo igo yaharãre. ²¹ Igo ñerire igo bujawereborore coreniribu. Yu eropa corequerecũ igo ñero ĩirire duhudiabiramo. ²² Eropirã yure peeque mua. Igo dorecucũ ĩigura. Igo mera ñero ĩinirã sãre dorecucũ ĩigura. Eropirã erã burigã ñero tarirãcoma. Eropa ta ĩiguca erãre igo mera erã ñero ĩirare erã bujawerebiricũ, ĩirire erã duhubiricũ. ²³ Eropigu igo porãre wejẽġura. Yu eropa ĩicũ ĩarã árĩpehrerã yaharã ya ðaro masirire masirãcoma. Masa erã pepiri sãre erã uaribejari sãre masia. Yu eropa masicũ masirãcoma erã igo yu eropa dipuwaja moacũ. Árĩpehrerã mua ñerire ĩira dipuwaja, dipuwaja moagura muare. Eropigu mua ðarire ĩira wajapure ðaro ĩigura muare. ²⁴ Mua Tiatira majarã gajirã mua mera majarã igo ya buherire gamebirabu. Muapu Satana ya buherire "Wuaro ĩgu masiri áhraa," erã arĩrãre gamebirabu mua. Eropigu muapure gajino mua ĩiburire dorenemosome yuhu. ²⁵ Dorenemobiriquereġu ĩĩe dihtare dorea muare: Mua pohrogue ya dujariboro core ya buherire mua masirare ne merogã mera cãdijibiricãque. ²⁶⁻²⁷ Árĩpehrerã ñerire tarinuganirãre, ya gamerire eropa ĩinġuirãre oparã árĩmorãre acugura. Yu Pagu ĩgu yare opu acudiro dopa ta muare oparã acugura ya sã. Árĩpehreri yeba majarã tauro árĩrã oparã árĩmorã acugura muare. Eropa oparã ñajarã, mua doca árĩrãre árĩpehreri yeba majarãre turaro dorerãca. Eropa turaro dorerã muare

tarinuganirā mata pehrea wacū iirāca mua erāre. ²⁸ Eropigu muare yahare ne duhubirinirāre boyomuridirure ogara. Eropigu mua mera arīgūca yuhu. ²⁹ Gamiricurā āhraa mua. Eropirā mua ya curu majarāre yaharāre Espiritu Santo ĩgu wererare peeque mua, arī gojabeoque Tiatira majarāre, arāmi yure Jesucristo.

3

Sardis majarāre Jesu yarāre gojabeodoreñumi Ñure Jesucristo

¹—Sardis majarā yaharāre erā oparā sāre ōpa yu arīrire gojabeoque muhu, arāmi daja yure Jesucristo. Yuhu ĩgu Espiritu Santo siete suburi maja turarire opaa. Eropigu siete necāre opaa. Muare ōpa arī werea: Mua iirare masia. Ōpa arī pepirima muare gajirā: “Erā Goāmu yare ōaro iipehorā āhrima,” arī pepirima muare. Erā eropa arī pepiquerecū, Goāmu yare ōaro iibeaa muapu. ² Eropirā mua iirare ōaro guñaque mua. Goāmu yare mua masirare ōaro guñaque daja cādijiro mariro. Goāmu ĩgu ĩacū ōaro iipehobirabu mua. ³ Eropirā yahare mua peemhtarare muraro ta ōaro guñaque mua daja. Eropa guñarā yahare iique mua daja. Mua ñeri iirare duhuque. Yu arīro dopa mua iibiricū guñaña mariro muare dipuwaja moagura. Yajari masu ĩgu guñaña mariro ĩgu yajagu ñajaro dopa ta muare guñaña mariro dipuwaja moagu arigūca. ⁴ Yujurāyeri mua mera majarā Sardis majarā ñero erā iirire ĩhacūbeama. Eropa ōarā arīrā, boreri suhriro sañarā yu mera curirācoma. ⁵ Arīpehrerā yahare duhubirā eropa ta boreri suhri sañarā arīniguirācoma. Eropirā yu mera eropa arīniguimorā erā waīre yu gojaturipūgue erā sā erā waīre gojatunirā arīrācoma. Erā erā waīre yu gojaturare coesome yuhu. Yu Pagu ĩgu ĩhabeogue, anyua sā erā ĩhabeogue, “Yaharā āhrima,” arī weregūca erāre. ⁶ Gamiricurā āhraa mua. Eropirā mua ya cururi majarāre yaharāre Espiritu Santo ĩgu wererare peeque mua, arī gojabeoque Sardis majarāre yaharāre erā opu sāre, arāmi yure Jesucristo.

Filadelfia majarāre Jesu yarāre gojabeodoreñumi Ñure

⁷—Filadelfia majarā yaharā erā opu sāre ōpa yu arīrire arī gojabeoque muhu, arāmi daja yure Jesucristo. Yuhu ñeri marigu āhraa. Diaye maja weregū āhraa. Davi muru iribojegue majagu opu masare ĩgu dorediro dopa ta turari mera doregura yu sā. Iri turari mera iidorecū ne gajirā irire cāhmotamasibeama. Yu iidorebiricū ne gajirā irire iimasibeama. ⁸ Arīpehreri mua iirire masia yuhu. Guñaturabirinirā arīquererā ta yaha buherire ōaro peeabu mua. Yure waīpeo duhubirabu mua erā muare ñero iidiaquerecū ta. Eropigu yahare iimorā apiabu muare. Eropirā yu dorerire mua iicū gajirā cāhmotamasibeama muare. ⁹ Gajirā mua pohro arīrā “Gua judio masa Goāmu yarā āhraa,” arīquererā ta guyarā āhrima. Goāmu yarā arībeama. Satanare umupeorā āhrima. Eropigu erāpure mua core mereja muare erā umupeocū iigura erāre. Yu eropiicū ĩarā yu muare mahirire masirācoma erā. ¹⁰ Muare yahare yu duhudorebiricū peerā ōaro yuhriabu mua yure. Mua eropa iicū ĩagu i yeba majarā arīpehrerā erā ñero tariburisubu arīcū muare ĩhadibugura. Irisubu arīpehrerā erā ñero tariburisubu arīroca. ¹¹ Merogū duhyaa i yebague yu dujariboro. Yahare mua masirare cādijibiricāque. Eropirā yure eropa yuhrinigūicāque mua wajataborore dedeori arīrā. ¹² Eropigu

yahare duhubirāre yu Pagu ya wihi majarā apigura erāre. Īgu ya wihi maja borari iro dopa árīcū apigura erāre. Eropirā Goāmū mera majarā eropa árīniguirācoma. Eropirā Goāmū yu Pagu yarā waīcurā, ĩgu ya maca majarā waīcurā sā árīrācoma. Īgu ya maca mama maca Jerusalén árīroca. Iri maca umarogue Goāmū pohrogue dijariri maca árīroca. Yū waī sāre mama waī opagaca. Iri waī sāre waīcurācoma yaharā. ¹³ Gamiricurā āhraa mua. Eropirā mua ya cururi majarāre, yaharāre Espiritu Santo ĩgu wererare peeque mua, arī gojabeoque Filadelfia majarāre yaharāre erā opu sāre, arāmi yure Jesucristo.

Laodicea majarāre Jesu yarāre gojabeodoreñumi Ñure Jesucristo

¹⁴ —Laodicea majarāre yaharā erā opu sāre ōpa yu arīrīre gojabeoque muhū, arāmi daja yure Jesucristo. Yū arīro dopa ta ĩgu āhraa yuhū. Eropigu guyaro mariro yu ĩarare eropa wereniguigu āhraa. Árīpehrerire mari Pagu ĩgu ĩhacūnugurare iibasagu āhraa yuhū. ¹⁵ Árīpehreri mua ĩirare masia yuhū. Mua “Jesu yarā āhraa gua,” arīquererā yure merogā umupeoa. Yure mua merogā umupeorā mua árīcū yuhū gamebeaa muare. Mua “Jesure umupeobea gua,” arībeaa mua. “Jesure umupeorā āhraa gua,” arīquererā ta yure ōaro umupeobea. Mua yure umupeodiaro dopa ta yure wuaro umupeocū ōaboaya. ¹⁶ Mua eropa yure ōaro umupeobiricū ĩagu muare gamebirigohracāgura. ¹⁷ Eropirā ōpa arī pepiraa mua: “Árīpehrerire opaa. Ne gajino duhyabeesa guare,” arī pepiraa mua. Eropa arīquererā mojomorocurā iro dopa ta āhraa mua yu ĩacū. Duhyataria muare. Eropirā ne moonjarā, suhri marirā, cuiří ĩhajibirā iro dopa āhraa mua yu ĩacū. Muare duhyarire masibea mua. ¹⁸ Mua eropa masibirā árīcū ĩagu ōpa arī weregura muare: Muare duhyarire masique. Eropirā yure serēque. Oro gohrare mua asūro dopa ta ōarire yu oparire yūpūre aīque mua. Muare yure ōaro umupeocū ĩgura. Eropirā diaye ta Goāmū ya mera wuaro oparāca mua. Eropirā yu sirira mera mua ñero ĩirare cōānirā árīque mua. Eropirā suhri sañarā erā guhyasiribiro dopa ta mua ñeri ĩirare cōānirā ōarire ĩimorā árírā guhyasirisome mua. Eropirā mua cuiří ococura puhru ōaro muare deyoro dopa ta Goāmū yare ōaro peeque mua ōaro masiboro dopa. ¹⁹ Árīpehrerā yu mahirāre erā ñero ĩirare werea. Eropigu yu mahirāre dipuwaja moaa gajisubū erāre itamubū. Eropirā yūpūre turaro gameque. Eropirā mua ñerire bujawere duhuque. ²⁰ Peeque yure. Mua wirire bihara wirire yu ejanugaja ñajadiabodiro dopa ta mua mera árīdiagū coregu ĩiaa. Yū eropa árīdiacū peerā yure mua mera árīdoreque. Yaharā árīque. Mua eropa árīdorecū mua mera árīgura. Eropigu mari sihu baro dopa ta mua mera ōaro árīgura. Eropirā yu mera ōaro árīrāca mua. ²¹ Ñerire yu tarinugara puhru yu Pagu opu ĩgu doaro pohro doaa yu sā dorebu. Eropa ta mua sā ñerire mua tarinugara puhru yu opu doaro pohro doarāca doremorā. Muare yu pohro doacū ĩgura. ²² Gamiricurā āhraa mua. Eropirā mua ya cururi majarāre yaharāre Espiritu Santo ĩgu wererare peeque mua, arī gojabeoque Laodicea majarāre yaharā erā opu sāre, arāmi Jesucristo yure.

4

Umargue Goāmure erā mereja umupeorare ĩarū Ñu

suburi pihañari mera ĩgu pihañara tũru āhrabu. ² Eropigu turagu anyure ĩhabu. ĩgu turaro wereniguiiri mera ōpa arĩ wereami:

—I tũrure pihañarare ōagu dihta pāñamasimi. ¿Nihipu āhriri iripũre pābu? arāmi ĩgu anyu.

³ Eropa arĩqueregũ ta iri tũrure pāñabure bocabirami. Eropa ōagure bocabirami. Ūmarogũ i yebagũ ojocarirā watope, sĩrinirā watope ne iri tũrure pāñabu marami. Eropigu iri tũru majare buhebu marami.

⁴ Eropigu iripũre pāñabodigũre erā bocabiricũ ĩagu turaro oreabu yũũ.

⁵ Yũ Eropa orecũ ĩagu yujugu erā Jesu yarā oparā mera majagu ōpa arāmi yũre:

—Orebiricāque. Iri tũrure ñearire yujugu pāñamasimi. ĩgu Juda ya curu majagu turagu āhrimi. ĩgu opu Davi pārami arĩturiagu āhrimi. Watũre tarinũgadigu āhrimi ĩgu. Eropigu ĩgu iri tũrure siete ñearire pāmasigu āhrimi, arāmi ĩgu yũre.

⁶ ĩgu eroparicũ peegu opu ĩgu doaro core Cordero ĩgu niguicũ ĩhabu. Wapicurā gajiropa bejarā, Jesu yarā oparā sã erā watope niguiami ĩgu Cordero. ĩgu Eropa niguiqueregũ ĩgu masa erā wejēdigũ mũru dopa dehyoami. Siete cusaricũgu, siete cuiricũgu āhrami. Iri siete cuiri ĩgu Espĩritu Santo ĩgu siete suburi maja turari āhrabu ĩgu arĩpehrero ĩhamasiburi. Espĩritu Santo arĩpehrero i yebaguere Goāmu ĩgu obeodigu āhrimi. ⁷ Eropigu Corderopũ opu doaro pohrogue ejagu, ero doagure ĩgure ĩgu diayepũ opara tũrure tũawea aĩami. ⁸ ĩgu Eropa tũawea aĩcũ ĩarā wapicurā gajiropa bejarā, veinticuatro Jesu yarā oparā sã Cordero core mereja ĩgure umupeoama. Erā Jesu yarā oparā arĩpehrerā arpa waĩcũri buamutērire opāma. Oropari sãre opāma. Iripari incienso ujuturiripari dihta āhrabu. Iri incienso Goāmu yarā ĩgure erā serēra āhrabu. ⁹⁻¹⁰ Eropa ĩgure umupeorā ōpa arĩ mama bayarire bayāma erā Corderore:

Erā wejēdigũ mũhu āhraa. Eropigu mũ ya di mera masa ñeri iirare coeabu mũhu Goāmu yarā erā arĩboro dopa. Eropigu masare arĩpehreri cururi majarāre yujurāyerire, arĩpehrerā yare wereniguirāre, arĩpehreri yeba majarāre erā ñero iirare wajayebasabu. Eropa iigu erāre oparā arĩmorā, pahia masare Goāmure serēbasarā arĩmorā sã arĩcũ iibabu. Eropigu i yeba majarā weca oparā arĩmorā acubu mũhu guare. Eropa iigu arĩdigũ iri tũrure aĩ pāñamasibu āhraa mũhu, arĩ bayāma erā Corderore.

¹¹ Yũ ĩagu daja bajarāre millones anyua majarāre ĩhabu. Opu doarore, wapicurā gajiropa bejarāre, veinticuatro Jesu yarā oparāre anyuapu erāre gāhrisianũgajāma. Erā anyua majarā turaro mera erā bayacũ ĩhabu.

¹² Őpa arĩ turaro bayapeoama erā:

Cordero, mũhu erā wejēdigũ arĩgu arĩpehrerāre doremasibu, arĩpehrerire opamasibu āhraa. Eropigu masipehogũ, turatariagu āhraa mũhu. Mũ Eropa arĩgu āhraa masa erā ñerire erā iira dipuwaja erā wejēdigũ. Eropirā gua mũre umupeorāca. “Őtariagu āhrimi,” arĩrāca mũre. Mũre ōaro wereniguirāca, arĩ bayāma anyua majarā.

¹³ Eropigu gajirā erā bayacũ peeabu. Arĩpehrerā i yeba majarā, ūmaro majarā sã, ojocarirā, sĩrinirā, wũariya majarā sã, arĩpehrerogue arĩrā ōpa arĩ bayarā carama:

Goãmure ĩgu doarogue doagure, Cordero sãre ðaro wereniguirãca. Muare umupeorãca. “Ôatariarã àhrima. Turatariarã àhrima,” arĩrã áripehrerinuri eropa arĩniguicãrãca muare, arĩ bayapeorã carama.

¹⁴ Eropirã erã wapicurã gajiropa bejarã erã eropa arĩ bayacũ peerã “Eropa ta arĩ bayaporõ,” arãma. Eropirã Jesu yarã oparãpũ mereja Goãmure, Cordero sãre umupeoama.

6

Papera tũrure ĩgu aĩra tũrure pihãnarare pãmi Cordero, arĩ werepũ Ñũ

¹ Pũhrũ papera tũrure ĩgu aĩgãra tũrure Cordero pihãnamũhtarañere pãmi. ĩgu eropa pãcũ ĩhabũ. ĩgu eropa pãra pũhrũ yujugu gajiropa bejarã mera majagu “Īagu arique,” arãmi. Eropa arĩgu bupu busuro dopa ta wereniguiami. ² ĩgu eropa arĩra pũhrũ ĩhabũ yũhũ. Boregu cabayure ĩhabũ. ĩgu weca peyagu buiri berore opãmi. ĩgure opu peyari berore ohami gajigupũ. ĩgu eropa ora pũhrũ ĩgũpũ ĩgure ĩhaturirãre tarinũgagu wahãmi.

³ Pũhrũ yujuñe pihãnarañere pãtuhaja Cordero gajiñe pihãnarañere pãmi daja. ĩgu eropa pãra pũhrũ gajigu gajiropa bejarã mera majagu “Īagu arique,” ĩgu arĩcũ peeabũ daja. ⁴ Eropigu gajigu cabayure diagure ĩhabũ daja. ĩgu weca peyagure turarire ohami gajigupũ. I yeba majarãre erã basi gamewejẽcũ ĩbure apiami ĩgure. Eropirã áripehrero majarã gamewejẽrãcoma i yebague. Eropigu wuarimiji ñoserimijire ohami ĩgure.

⁵ Pũhrũ peñere pãtuhaja Cordero gajiñere pãmi daja. Eropigu gajigu gajiropa bejarã mera majagu ĩgu sã “Īagu arique,” arĩcũ peeabũ daja. ĩgu eropa arĩra pũhrũ cabayu ñĩgure ĩhabũ. ĩgu weca peyagu nucuri queoriñere opãmi. ⁶ ĩgure yũ ĩara pũhrũ gajiropa bejarã watope ða busuro carabũ:

—Trigo cebada sã pehrea waroca. Eropiro iri waja pagari áriroca. Eropirã yujunũ mohmeri waja mera trigore yuju kilo ta asũrãcoma. Yujunũ mohmeri waja mera cebada yerire uñre kilo ta asũrãcoma. Bari moari uñpũ, vino sã baja áriçãniroca, arĩro carabũ.

⁷ Pũhrũ uñreñere pãtuhaja Cordero gajiñere pãmi daja. ĩgu eropa pãra pũhrũ gajigu gajiropa bejarã mera majagu áritugũ ĩgu sã “Īagu arique,” ĩgu arĩcũ peeabũ daja. ⁸ ĩgu eroparĩcũ peegu borewijigu cabayure ĩhabũ. ĩgu weca peyagu sĩririñe waĩcuami. Eropigu ĩgu pũhrũ arigu peame waĩcuami. Eropigu erãre cabayua weca peyarãre turarire ohami corderopũ. Wapicurã masa áriçũ yujugu erã mera majagure wejẽdoreami. Eropa ta áripehrero i yebagure yujurãyeri masare wejẽdoreami. Gamewejẽri mera, oaboari mera, dorecuri mera, waimurã nũguri majarã guarã mera, yujurãyeri masare erã wejẽburire apiami erã perãre.

⁹ Pũhrũ wapicuriñere pãtuhaja gajiñere pãmi daja Cordero. ĩgu eropa pãcũ Goãmure umupeoburi mesa doca Jesu yarãre erã wejẽniñere erã sĩporãrĩre ĩhabũ. Goãmũ yare erã werera dipuwaja, “Jesu yarã àhraa,” arĩ erã werera dipuwaja gajirã erã wejẽniñã àhrama. ¹⁰ Erã gaguiniguirã ðpa Goãmure erã arĩcũ peeabũ:

—Muhu gua Opu ñeri marigu, guyaro mariro mu arïro dopa ta iigu ähraa muhu. ¿Eropigu i yeba majaräre guare wejëniräre dohpáricü dipuwaja moagucuri muhu eräre? arï gaguiniguama erä.

¹¹ Eropigu eräre boreri suhri yoari suhrire ohami. Eräre eropa ogu öpa arämi eräre:

—Soonique dohpa. Gajirä mua acawererä Jesu yarä mua iidiro dopa ta dohpague säre öari buherire buhenirä iima masare. Muare wejëdiro dopa ta erä säre erä wejëpehoboro duhyaa dohpa. Eropirä eräre árípehreräre erä wejëboro core merogä corenique mua, arämi eräre.

¹² Puhru cinco ñearire päthuja Cordero gajiñe ñeariñere päcü ñhabu daja. Iriñere ñgu päcü ta, turaro yeba ñohmeabu. Eropigu umu majagu abe ñigu guhyaro wahámi. Ñiriñe suhriro iro dopa ta bejagu ñgu guhyaro wahámi. Eropigu abe ñami majagu di iro dopa ta diagu guhyaro wahámi.

¹³ Eropirä necä yebague yuhridija waháma. Yucugu ducare miruñe weäburiboro dopa ta necä yuhridija waháma. ¹⁴ Eropiro umusi dederea wahabu. Paperapüre mari türabeo dedeodiro dopa ta dederea wahabu umusi. Eropiro árípehreri utä yucu sä árípehreri nugurori sä gajipugue ejanugaja waha wahabu. ¹⁵ Eropa wacü ñarä i yeba majarä tauro oparä, utä yucu maja wiri poheca maja goberigue duhrirä waháma. Gajirä oparä, surara oparä, doberi oparä, turarä, árípehrerä erä pohro majarä, erä pohro majarä áribirä sä yujuro ta duhrirama. ¹⁶ Eropirä duhrirä utä yucure utä säre öpa arïrama:

—Gua weca yuhridijari wejëcäque. Sihire opüre ñgu doaro doagure güitaria. Cordero guare ñero dipuwaja moagucumi. ¹⁷ Guare árípehreräre turaro dipuwaja moaburinu árituhajaa. Eropirä ñgu dipuwaja moaborore ne bocafiusome gua. Eropa dipuwaja moari arirä gua weca yuhridijari wejëcäque, arïrama utä yucure árípehrerä.

7

Israe masa diaporire Goämu ñgu waí tuhaborore werepu Ñu

¹ Puhru wapicurä anyuare ñhabu. Erä árípehrerogue waháma. Yujugu nortepü wagu erogue arirañere miruñere aribiricü iiami. Gajigu surgue, gajigu abe muririrogue, gajigu abe ñajarogue waha ñgu iro dopa ta miruñere aribiricü iama erä sä. Eropiro i yebague, wuariyague säre ne miruñe aribiricü iama. Ne yujugu yucugure miruñe weä ñohmecü iibirama. ² Eropigu gajigu anyure ñhabu daja. Abe muririrogue arigu iiami ñgu. Goämu ojocariniugu ñgu waí aíturiñere sello waicuriñere aigäriugu iiami ñgu. Eropa aigäriugu gajirä anyua wapicuräre ñgu gaguiniguami. Erä anyuapu i yebare, wuariya säre ñero wacü Goämu ñgu iidorenirä ährama erä. ³ Eräre gaguinigu öpa arämi ihí anyu:

—Corenique. Goämu pohro majaräre erä diaporire ñgu waí aíturiñere tuhunimorä iiaa gua. Gua eropa tuhaboro core i yebare, wuariyare, yucu säre ñero wacü iibiricäque mua dohpa, arämi ñgu gajirä wapicurä anyuare.

⁴ Eropigu Goämu ñgu waí mera erä diaporire erä tuhunimorä “Oä nücu ährima,” arï wereami yure yujugu. Israe masa doce cururi majarä ciento cuarenta y cuatro mil gohra masa erä tuhunimorä áriñorä. ⁵ Oä áriñorä erä tuhunimorä: Doce mil masa Judá päramerä árituriarä erä tuhunimorä áriñorä. Doce mil masa Ruben päramerä árituriarä áriñorä erä tuhunimorä. Gajirä doce mil masa Gad päramerä árituriarä áriñorä erä

tuhumorã. ⁶ Gajirã Aser pãramerã árituriarã doce mil gohra, gajirã doce mil gohra Neftalí pãramerã árituriarã, gajirã doce mil Manase pãramerã árituriarã erã tuhumorã áriñorã. ⁷ Gajirã doce mil masa Simeo pãramerã árituriarã, gajirã doce mil masa Leví pãramerã árituriarã, gajirã doce mil masa Isaca pãramerã árituriarã áriñorã erã tuhumorã. ⁸ Gajirã doce mil masa Zabulon pãramerã árituriarã, gajirã doce mil masa José pãramerã árituriarã, gajirã doce mil masa Benjami pãramerã árituriarã, erã tuhumorã áriñorã. Erã nucũ áripehrerã masa ciento cuarenta y cuatro mil gohra áriñorã erã tuhumorã.

Bajarã boreri suhricurãre werepũ Ñũ

⁹ Pũhrũ masa bajarãre ñhabũ. Áripehreri yeba majarãre, áripehreri cururi majarãre, áripehrerã yare wereniguirãre, áripehreri macari majarãre, yujurãyerire Cristo gamerã dihtare erã niguirãre ñhabũ. Opũ ñgu doaro pohro, Cordero core niguiama erã masa. Bajarã masa áhrama. Eropirã erãre queorã bocatũrã mejeta áhrama. Boreri suhricurã áhrama erã. Eropirã mijipũrire opãma. ¹⁰ Eropirã erã áripehrerã õpa arĩ gaguĩguãmã:

Goãmũ áhrimi marire taugũ. Ñgu, ñgu doaro doagu áhrimi. Cordero sã marire taugũ áhrimi, arĩ gaguĩguãmã erã.

¹¹ Eropirã áripehrerã anyua, Jesu yarã oparã, gajiropa bejarã mera Opũ ñgu doaro tũrore yuju bero niguiama. Eropa niguirã ñgu doaro core mereja, Goãmũre umupeoama. ¹² Õpa arĩ umupeoama erã:

Eropa ta áhraa. Goãmũ gua Opũre mũre õaro wereniguia. Õatariagu áhraa mũhu. Masipehogũ áhraa mũhu. Mũre "Õhaa," arãa. Mũre umupeoa. Turatariagu áhraa mũhu. Mũ turari mera ñgu áhraa mũhu. Mũre eropa arĩrã áripehrerinũri eropa mũre arĩniguirãca. Eropa ta iirã, arĩ umupeoama erã Goãmũre.

¹³ Eropigu yujugu Jesu yarã oparã mera majagu yũre wereami:

—¿Oã boreri suhricurãre masiri mũhu? ¿Erã aridirore masiri mũhu? arĩ serẽpiami yure.

¹⁴ Ñgu eroparĩcũ peegu,

—Masibea, arĩ yahriabu yũpũ.

—¿Noa áhriri erã? arĩ serẽpiabu ñgure.

Yũ eroparĩcũ peegu õpa arãmi yure:

—Oã ñetariago tarinũri áricũ yujuro bojerã áhriima, arãmi ñgu yure. Erã suhrire coewearo dopa ta Cordero ñgu di cóara mera erã ñerire coenirã áhriima. Eropirã õari boreri suhricurã áhriima. ¹⁵ Eropa ñgu coenirã árirã Goãmũ ñgu doaro core ñgure eropa umupeoniguiãmã. Ñmuri ñamiri nucũ ñgure eropa umupeoniguiãmã pahia Goãmũ wihigue erã iiro dopa ta. Eropigu erã mera eropa áriniguiqu erãre itamugucumi Goãmũ gajiropa wari arĩgu. ¹⁶ Eropirã ne dipaturi oaboasome erã. Eropirã ne ñemesibusome. Ne abe umũ majagu asiriñere pabusome erã. Turaro asiri erã ñero taricũ iisome. ¹⁷ Opũ doaro core niguiqu Cordero erãre ñhadibugucumi. Ovejare ñhadibugu iro dopa erãre ñhadibugucumi. Eropigu maurigã dipague ojocaricũ ñiriyarigã dipague erãre mũhta wahgãgucumi oveja ñhadibugu iiro dopa ta. Eropigu eropa mucubiricũ ñgucumi erãre. Eropirã umarogue árirã ne dipaturi oresome erã, arãmi Jesu yarã oparã mera majagu yũre.

8

Seis papera erā pihanarare pātuhaja gajinere pāpehopu Cordero

¹ Seis papera erā pihanarare pātuhaga dūharañere pātuhami Cordero. Īgu eropa pātuhacū yuju hora deco ūmarogue ne ejarimaria wahabu. ² Eropigu siete anyuare Goāmu pohro niguirāre ĩhabu. Eropigu erāre siete cornetarire ohami gajigu. ³ Gajigu anyu oropari incienso dicūburipari opadigu Goāmure umupeori mesa pohrogue eja, niguiami. Ero ĩgu niguicū baja inciensore ĩgure ohama. Árīpehrerā Goāmu yarā ĩgure erā serēra mera moreburi incienso ohama. Eropigu oro mera iira mesague, Goāmu ĩgu doaro pohro árīri mesague iri incienso Goāmure soe mujuburi āhrabu. ⁴ Eropigu anyu ĩgu oparapari maja incienso mesa weca pohsiri peo soeami. Īgu eropa soera pūhru iri incienso maja imica Goāmu yarā ĩgure erā serēra mera muria wahabu Goāmu pohrogue. ⁵ Eropa wara pūhru ĩgu anyu i mesa maja nitire iriparigū aī pohsātuhaja, yebague pohmehdijucāmi. Īgu eropa pohmehdijucū miāmi. Turaro bupu paāmi. Eropiro gajiroa busūmaa, yeba ñohmemaabu.

Cornetarire werepu Ņu

⁶ Pūhru siete anyua yujurāyeri erā cornetarire purimorā iama. ⁷ Yujugu anyu ĩgu yarure purimūhtami. Īgu eropa puricū decoyeri yūsarīyeri peame mera, di mera moreriyeri yebague yurimerejabu. Iriyeri yurimerejacū ta yeba ūjua wahabu. Ipē ūjuaabu: I yeba deco ejaboro pohro gohra ūjua wahabu. Eropiro iripēta yucu sā taa yahsari sā ūjua wahabu. ⁸ Anyu yujugu ĩgu eropa purimūhtara pūhru gajigu anyu ĩgu yaru cornetare puriami daja. Īgu eropa puricū wuadigu ūtāgu iro dopa bejadigu ōaro ūjuniguidigu wuariyaguere mihrua dijabu. Eropiro yeba ūjudiropē ta wuariya diya poya wahabu. ⁹ Eropirā wuariya majarā wai sā deco mera ejarā gohra yujupu majase majarā sīria wahāma. Eropiro iri nucu gasi ta dohori gasi miria wahabu wuariyaguere. ¹⁰ Perā anyua erā purira pūhru gajigu anyu sā ĩgu yaru cornetare puriami daja. Īgu eropa puricū wuadiru necāru, sihādiru dopa ta bejadiru yebaguere yurimereja wahabu. I yeba maja diarire mau diparire yujupu majase majare yurimerejabu necāru. ¹¹ Eropiro iri nucu mauri ta sūriyari dujabu. Eropa wacū bajarā masa iri decore sūiri decore ihrinijarā sīria wahāma. Iriuru necāru sūidiru waicūabu. ¹² Ūrerā anyua erā purira pūhru gajigu anyu sā ĩgu yaru cornetare puriami daja. Īgu eropa puricū abe ūmu majagu, ñami majagu sā deco erabonirā gohra poya wahāma. Necā majarā sā deco erabonirā dipuru ta poya wahāma. Eropiro ūmugue wapicūri horari gohra abe ne boyobirami. Ņami sāre wapicūri horari gohra abe ñami majagu, necā sā ne boyobirama.

¹³ Pūhru ĩhamemujuabu daja. Ūmarogue gaa wawahgāgure ĩhabu. Eropigu ĩgu gaguiniguicū peeabu. Ōpa arāmi ĩgu:

—Ņetariaa. Ņetariaa. Ūrerā anyua purinibeama dohpa. Erā purira pūhru ñetariaro waroca. Eropa wacū i yeba árīrā ñetariaro warācoma, arī dijuami ĩgu.

9

1 Puhru wapicurā anyua erā purira puhru gajigu anyu ĩgu yaru cornetare puriami daja. ĩgu eropa puricū necāru iro dopa bejagu árĭgu anyu umarogue árĭdĭgu yebague yuhridĭjaricū ĩhabu. Eropĭgu ĩgure peame gobe ũhcāri gobe maja sawire ohami gajigu. 2 Eropĭgu ĩgu iri gobere pāgūcū peame imica wiriabu. Wuari peame imica iro dopa ta wuaro imica wiriabu iri gobere. Eropiro iri imica mata abe umu majagure, umaro säre dederea wacū ĩabu. 3 Eropirā iri imica pohecague árĭrā poreroa yebague wudĭjarama. Eropirā coreba erā burĭgā pūriro dopa ta erā burĭgā pūriama. 4 Eropĭgu taare, yucure, gaji taare ñero ĩidorebirami erāre. Masa dihtare ñero ĩidoreami erāre. Goāmu ĩgu waĭ aĭturiñere erā diaporire tuhuya marĭrā dihtare ñero ĩidoreami erāre poreroare. 5 Eropa ñero ĩidorequeregu ta erāre wejēdorebirami. Erāre wejēdorebiriqueregu ta cinco aberi gohra masare burĭgā pūricū ĩidoreami. Coreba toarā erā pūriro dopa ta pūricū ĩirā āhrama poreroa sā.

6 Irinurire erāre erā pūriro ĩicū masa sĭridiarācoma. Erā eropa sĭridiaquerecū ta erāre sĭridoresome Goāmu.

7 Oā poreroapu cabayua iro dopa dehyoama. Surara cabayuare erā come suhri cāhmotari suhri sānirā dopa ta dehyoama erā poreroa. Erā dipu weca oparā erā peyari berori oro berori iro dopa peyāma. Erā diapori masa diapori iro dopa bejāma. 8 Erā poari nome poari iro dopa āhrabu. Eropirā erā gūcūri yeea gūcūri iro dopa āhrabu. 9 Sĭporā cāhmotari gasiro come gasiro iro dopa cāhmotama erā coretihbire. Eropiro erā wuūcū bajarā cabayua omarā erā omaro dopa erā wuuri dūpūri busuabu. Cabayua tūruri gasire tararā erā gamewejēroque warā erā busuro dopa ta busuabu poreroa wuuri dūpūri. 10 Eropirā coreba ĩgu pĭgurucuro dopa ta toadĭru ĩgu oparo dopa ta āhrabu erā poreroa. Eropirā erā pore mera masare cinco aberi gohra pūricū toāma. 11 Eropirā erā opu āhrami. ũhcāri gobe opu āhrami erā opu. ĩgu anyu muru āhrami. Hebreo ya mera Abadón waĭcuami ĩgu. Griego ya mera Apolión waĭcuami. Apolión, mari ya mera arĭrā, “Ñero goroweogu” waĭcugu ĩimi.

12 Poreroa masare erā ñero pūricū toara puhru i ñero erā tarimūhtadiro pehrea wahabu. Iri puhru pesubu ñero tarinirācoma daja masa.

13 Puhru yuju moĭotocu majarā anyua erā purira puhru gajigu anyu ĩgu yaru cornetare puriami daja. ĩgu eropa puricū Goāmu core nigui ri mesague oro mera ĩira mesague werenĭguiri busuro carabu. Iri mesa maja sari wapicuri sarogue werenĭguiri busuro carabu. 14 Eropa werenĭguiro cornetare purĭgure anyure ōpa werenĭguiri mera busuro carabu:

—Wuariyague Eufrete waĭcuriyague peresu árĭnirāre anyuare wiuque. Erā wapicurā anyua āhrama, arĭro carabu.

15 Eroparĭcū peegu anyupu erāre wapicurāre wiuami bajarā masare wejēmorāre. I boĭorire, ĩnure, i horare queoro corerā ĩiama erā wiumorā wapicurā anyua. Erā coreĭro sihajaa. Eropirā wejēnugagārirā ĩiama. Árĭpehrerā deco mera erabonirāre masare wejēmorā āhrama. 16 Eropĭgu erā anyua yarā surara, “Oā nūcu āhrima,” erā arĭcū peeabu. Erā cabayua weca peyarā āhrama. Doscientos millones surara āhrama.

17 Eropĭgu cabayua erā weca peyarā yu ĩanirā ōpa dehyoama. Erā sĭporāre cāhmotari suhri come suhri diari suhri, yahsari suhri, boreri suhri suhricuama. Eropirā cabayuapu erā dipu yeea diarā iro dopa dehyoama. Erā disiroque peame, imica, azufre ũjuri imica sā wiriabu.

¹⁸ Eropiro cabayua disiro wiriri mera masare wejêabu. Árîpehrerã masa deco erabonirãre masa bajarãre wejêama. Eropirã peame mera imica mera, azufre ùjuri imica mera bajarã masare wejêama. ¹⁹ Erã cabayua erã disiro wiriri mera wejêama. Eropirã erã pore mera sã wejêama daja. Erã pore ojogorogue aña dipu dopa bejabu. Eropirã iri pore mera camicacũ iiaa erã masare.

²⁰ Bajarã masa erã wejê duhanirãpu erã mera majarãre wejêcũ ãaquererã erã ñeri iirare ne duhubirama. Watẽare umupeo duhubirama. Erã goãmarã wéanirãre umupeo duhubirama. Erã wéanirãpu oro mera, plata mera, bronce mera, utã mera, yucu mera erã wéanirã àhrama. Erã wéanirã ojocaribirama. Peebirama. Nõhmebirama. Erã eropa árîquerecũ ta erãre masa umupeoama. ²¹ Eropirã erã wejê duhanirã gaji ñeri sãre ne bujawerebirama. Masare erã wejêrãre, erã nome mera erã ñero iirare, erã yajara sãre ne bujawere duhubirama erã.

10

Miri tûrugãre papera tûrugãre aĩgãrimi anyu

¹ Pãhrũ gajigu turagu anyu ãmarogue dijaricũ ñhabu. Imica curu watope àhrami. Eropigu buibugãda ñgu dipuru weca peyabu. Ñgu ñiapo ãmu majagu abe iro dopa gosesiriabu. Ñgu ñigari peame iro dopa goseabu. ² Eropigu miri tûrugãre papera tûrugãre ñgu pãra tûrugãre opãmi ñgu. Ñgu guburu diayepu maja guburu mera wuariyague cãhrapi niguiami. Ñgu guburu copu maja guburupu yebague cãhrapi niguiami. ³ Eropa niguigu yea erã gaguiniguropa dopa ta ñgu turaro gaguiniguami. Ñgu eropa gaguiniguropa pãhrũ siete bupua wereniguirã carirama. ⁴ Erã eropa wereniguicũ peegu gojanugãrabu yãhu. Yu eropa gojanugãcũ ta ãmarogue yare wereniguropa carabu.

—Siete bupua erã arĩrãre gajirãre werebita. Eropigu irire goja aĩbita, arĩro carabu yare.

⁵ Ñgu eropa arĩra pãhrũ wuariyague niguidigu, yeba niguidigu anyu ñgu mojoto diayepu mera sime mujuami ãmarogue. ⁶ Eropa sime mujugu Goãmu eropa ojocarinigugu waĩ mera waĩpeoami. Ñgu Goãmupu árîpehrerire, ãmũsire, ãmũsi majarãre, i yebare, i yeba árĩrãre, pagayarire, pagayari majarãre ñgu àhrimi. Eropigu òpa arãmi anyu:

—Goãmu mera diaye arĩgu iiaa. Iripãta corerãra. ⁷ Seis anyua erã corneta dipurure erã purira pãhrũ gajigu anyu ñgu puritucũ Goãmu iribojegue ñgu “Òpa iigura,” ñgu arĩdiro dopa ta iigucumi. Iribojegue masare irire òaro werebiripu. Pãhrũ ñgu pohro majarãre, ñgu yare weremũhtarãre òaro werepehõpu ñgu. Iri ñgu werepirare dohpaguere ñgucumi, arãmi anyu.

⁸ Ñgu eropa arĩra pãhrũ ãmarogue yare wereniguropa dopa ta dipaturi wereniguropa carami daja. Òpa arĩgu carami yare:

—Wuariyague niguigu yebague niguigu sihi anyu pohrogue waque. Eropa wagu papera tûrugãre ñgu opari tûrugãre aĩque, arĩgu carami yare.

⁹ Ñgu eroparicũ peegu anyu pohrogue wahabu. Ñgure papera tûrugãre yu serẽcũ peegu òpa arĩ yãhriami yare:

—Aĩque. Eropigu i papera tûrugãre baque mũhu. Mu ne bacũ mome iro dopa òaro imisĩroca. Mu parogue mu acura pãhrũ sũia waroca, arãmi yare.

¹⁰ Īḡu eroparīcū peegu iri tūrugāre anyure yu āira pūhru bahabu. Yu ne bacū mome iro dopa imisiābu. Yu ba acura pūhru yu parugue sāiro carabu yure. ¹¹ Yu eropa bara pūhru ōpa arāmi yure:

—Dipaturi bajarā masare, macari majarāre, yebari majarāre, baja disirori wereniguirāre, erā tauro oparā sāre pūhru erā dohpa waborore wereyumūhtaque, arāmi yure.

11

Perā Goāmū yare weremorāre were gojapu Ūnu marire

¹ Pūhru yure queodigūre odoreami Goāmū. Tuadigupē yoadigū āhrabu irigu. Irigure odoregu ōpa arāmi yure:

—Yaha wihire queogu waque. Iri wihi majañe yure umupeori mesa sāre queoque. Eropigu iri wihiguere masare yure umupeorā sāre queoque. ² Disiporo wirinugaropure queobita. Iripūu yure gamebirā erā cūhrapirapūu āhraa. Erā cuarenta y dos aberi gohra Goāmū ya macare iri maca majarā sāre ñero iirācoma. Eropigu queobita iripūure. ³ Eropigu yahare wererāre perāre obeogura. Mīl doscientos sesenta nūri gōhra yahare wererācoma. Co suhri sañanirā árīrācoma erā yu weredorenirā, arī wereami yure.

⁴ —I yeba majarā tauro opu pohro pegu olivo waīcūri yucu niguia. Pegu sihāgori yucu sā iri yucu pohro niguia. Iri yucu oā perā yahare weremorā iro dopa āhraa, arī wereami daja yure. ⁵ Eropirā erāre īhaturirā erāre erā ñero iidiacū erā disirogue pea porā wirimaaro soe wejēpehocāroca erāre īhaturirāre. Eropa ta erāre ñero iirāre wejērācoma erā perā. ⁶ Eropiro erā perā erā deco aridorebircū deco arisome. Eropiro yahare erā wereropē deco arisome. Eropirā maurire diyari poyacū iirācoma erā. Eropirā i yebare ñero wacū iirācoma erā. Árīpehreri dohpa árīrore, dohpa árīrāre, masare ñero wacū iirācoma erā. Erā noho gamero iidiaropē eropa ñero wacū iirācoma i yebare.

⁷ Erā Goāmū yare weretuhajacū ūhcāri gobegue árīḡu ñegu nūgu majagu wirigucumi. Eropigu Goāmū yare wererā erā perā mera gamequeāgucumi. Eropa gamequeāgu turatarinūgagu erāre wejēcāgucumi.

⁸ Īḡu eropa wejēra pūhru erā ya dūpuri mura wuāri maca maja mague oyaroca. Marī Opure Jesucristore erā pabia wejēra maca āhraa iri maca. Iri maca majarā ñerā árīrā, Sodoma majarā mura, Egipto majarā mura iro dopa āhrama. ⁹ Erā dūpuri mura oyaro ūhrenū ōaro oya, gajinū deco erā ya dūpuri mura iri mare oyaroca. Eropirā árīpehreri yeba majarā yujurāyeri, árīpehreri cururi majarā yujurāyeri, árīpehrerā yare wereniguirā yujurāyeri iri nūcu nūri gohra erā ya dūpuri murare iirācoma. Eropirā iri nūcu nūri gohra erāre yaadoresome. ¹⁰ Erā perā Goāmū yare weremūhtanirā i yeba majarāre erā ñero iira dipuwaja moanirā árīrācoma. Eropirā erā eropa sīrinirā árīcū īarā árīpehrero majarā mucubirirācoma. Eropa mucubirirā bosenu īi, erā basi gajinore eropa ocārācoma.

¹¹ Erā eropa iiquerecū ūhrenū pūhru gajinū deco gohra Goāmū erāre masugucumi daja. Īḡu eropa masucū erā dipaturi wahgānūgajarācoma. Erā eropa wahgānūgajacū īarā árīpehrerā burigā gūirācoma erāre. ¹² Pūhru ūmarogue burigā erāre perāre werenigūicū peerācoma masa. Ōpa arīri busuroca erāre:

—Ōgue mūririque mūa, arīri busuroca.

Eräre eropa arī wereniguirire busucū peerā imica cururi watope mēria warācoma. Eräre doonirā mēra erā mēriacū ĩarācoma. ¹³ Erā eropa mēriarisubu yeba turaro ñohmeroca. Eropā ñohmecū ta iri maca maja wiri baja wiri mihrua dija waroca. Eropirā yeba ñohmero mera siete mīl masa sīria warācoma. Gajirā dūhyarāpū ũca wa, Goāmure ũmaro majagure “Turagu āhrimi,” arī umupeorācoma pare ĩgure.

¹⁴ I ārīpehreri eropa wara pūhrū pesubu masa erā ñero tarituhajanirā ārīrācoma. Eropā tarira pūhrugā ta dipaturi masa mata daja ñero tarirācoma.

Seis corneta dipurure erā purira pūhrū gajigū puripū

¹⁵ Pūhrū seis corneta dipurure erā purira pūhrū gajigū anyu ĩgū yarure puriami. ĩgū eropa puricū ũmarogue turaro wereniguiro carabū. Ōpa arīro carabū:

Dohpague mari Pagū, Cristo mera i yeba majarā tauro opū ārīgūcumi.

Eropigū eropa opū ārīniguigūcumi Goāmū, arīro carabū.

¹⁶ Eropirā Goāmū core oparā doarigūe doarā veinticuatro Jesu yarā oparā Goāmū core mereja, ĩgure umupeoama. ¹⁷ Eropā umupeorā ōpa arāma: Gūa opū Goāmū, turatariagu āhraa mūhū. Mūhū negohraguere eropa ārīmuriyoro. Eropigū dohpague sāre eropa ārīnigua. Pūhrugue ārīgūca mūhū. Mū turari mera masa erā opū mū ārīnūgacū, “Ōhaa,” arāa gūa mūre. ¹⁸ Árīpehrerā i yeba majarā mūre gamebirā mū mera guarima. Dohpaguere eräre mū dipuwaja moaburibusu āhraa. Sirinirā sāre mū dipuwaja moaburibusu āhraa. Eropiro mū yarāpure ōarire erā iira wājare mū oburinosubu āhraa. Yujurāyeri erā mū yare weremāhtanirā ārīma. Eropirā erā gajirā mū yarā mera ārīpehrerā mūre ōaro umupeonirā ārīma. Eropigū oparāre, bu ārīrā sāre mū yarā erā ārīcū ĩha ōaro iigūca mūhū eräre. Eropiro i yeba majarāre goroweocorerāre mū cōāburibusuno arīro ĩaa dohpaguere, arī umupeoama Jesu yarā oparā Goāmure.

¹⁹ Erā eropa arī umupeora pūhrū ũmaro maja wihi Goāmū ya wihi ĩgū pāgūra wihi ĩhabū. Eropirā iri wihi ārīri comorore ĩhabū gūa. ĩri comoro pohecague Goāmū “Masare itamugūra,” ĩgū arī werepīrapū sañabū. Gūa eropa ĩacū ta miamaa, bupu paamaa, gajiropa busūmaa, i yeba ñohmemāa wahabū. Deco yusariyeri deco burigā ũmarogue dijaribū.

12

Nomeore, pīru sāre werepū Ñū

¹ Pūhrū i yeba dohpa waborore ũmarogue dehyoabū yūre. Eropā dehyoari gūhyadiaro maja āhrabū. Ōpa ĩamūhtabū: ũmarogue nomeore ĩhabū. Igo suhriro abe ũmū majagū iro dopa gosesiriabū. Eropigo abe ñami majagū weca niguiamo. Opū ĩgū peyarino berore doce necā opari berore peyadigo niguiamo. ² Eropiro igo porācūboro merogā dūhyabū. Eropigo igo niji wahgūgo pūriro mera gaguiniguiamo. ³ Pūhrū dipaturi ĩhabū daja ũmarogue: Wūagū pīrure diagure ĩhabū. Siete dipu dipucūgu āhrami. Árīpehreri ĩgū dipu oparā erā peyarino berorire peyara dipu dihta āhrabū. Eropigū diez cusaricūgu āhrami ĩgū. ⁴ ĩgū pīguru mera necā dipurure wejēsiri medijuami. Árīpehrerā necāre deco gohra wejēsiri medijuami. Eropigū nomeo porācūgo pohro niguiami pīru. Igo

magugā dehyoacū babu iirami. ⁵ Merogā puhrugā ta masa dehyoatuhami majigugā. Árīpehreri yeba majarā opu árību āhrami ĩgugā. ĩgu eropa opu turagu árīcū masa ĩgure tarinugarā yujuro bojesome. ĩgu eropa masa dehyoacū ta Goāmū ĩgu doaro pohrogue ĩgugāre aibeocāmi. ⁶ ĩgu eropa iicū nomeopu masa marirogue pīrure duhrigā wahámo. Goāmū ĩgu amuyudirogue duhrigā wahámo ĩgo. Eroguere mil doscientos sesenta nuri gohra Goāmū igore ĩhadibumi.

⁷ Eopirā umarogue gamewejēnugāma. Migue waīcugu anyu ĩgu yarā anyua sā pīru mera gamequeāma. Erā eropa gamequeacū pīru ĩgu yarā anyua mera Miguere gamequeāmi. ⁸ Eopirā Migue sā pīrure tarinugāma. Eopīgu pīrure ĩgu yarāre anyuare umaroguere árīnemodorebirami. ⁹ Eopīgu wuagu pīrure cóacāmi Goāmū. ĩgu pīru watī ta árīgu iiami. Satana waīcugu āhrimi. Iribojeguere ĩgu pīru dupu dopa deyogu árīñumi. Eopīgu árīpehreri yeba majarāre guyagu āhrimi. Goāmū ĩgure cóagu ĩgu yarā anyua mera yebague cohā dijuami.

¹⁰ Puhru umarogue turaro werenigūicū peeabū:

—Dohpaguere mari Pagu masare taumi pare. Dohpague tamerare mari Pagu mari Opu árīgu āhrimi ĩgu turarire ĩhmubu. Eopīgu ĩgu obeodigu Cristo sā ĩgu opu árīrīre ĩgu turarire ĩhmumi árīpehrerāre. Watīre umarogue árīdigure cohā dijuami i yebague. Eopīgu ĩgu turarire ĩhmumi mari Pagu. ĩgu watīpu umuri nucū, ñamiri nucū Jesu yarāre, “Oā ñerā āhrima,” arī weresāgu iimi mari Pagure. Eopīgu mari acawererāre Jesu yarāre weresāgu árīmi. ¹¹ Cristo Cordero waīcugu ĩgu di cóaro mera mari acawererā ĩgure umupeorā erā ñeri iirare cóāsūnirā árīma. Eropa árīrā watīre tarinugāma. Eopirā ōari buherire wererā, watīre tarinugāma. ĩgu yare werera dipuwaja gajirā erāre wejēdiaquerecū ta, Cristo yare duhubirā árīrā ĩgure tarinugama. ¹² Eopirā mua umaro majarā mucubirique. Watīre ĩgu yebague cohā dijucū ĩarā mucubirique. Mua yeba majarāpu, wuariya majarā sā mojomorocurā warāca mua. Mua pohrogue dijami watī. ĩgure dipuwaja moaboro merogā duhyaa. Eopīgu guataricāmi ĩgu. Mua pohrogue ĩgu ejacū mojomorocuro dujacū iigucumi ĩgu muare, arī gaguinigiuro caricū peeabū.

¹³ Eopīgu pīrupu cohā dijudigu nomeore, majigugā pagore nurusia wahgāmi. ¹⁴ Eopīgu Goāmū gaa wuagu quē dupure ohami igore masa marirogue ĩgo wū duhri wahgāboro dopa. Eroguere ĩgo ejara puhru uhre bojori ōaro gaji bojori deco gohra ōaro ĩhadibuami Goāmū igore. ĩgu eropa ĩhadibucū pīru igore ñero iimasibirami. ¹⁵ Ero ĩgo árīcū ĩagu pīru igore miudiagu wuaro decore etocabeocāmi. ¹⁶ ĩgu eropa iiquerecū yebapu igore itamuabū. Pīru ĩgu disiro wiriri decore yebapu yehrimaa wa uju aibeocābu. ¹⁷⁻¹⁸ Eropa wacū ĩagu pīru guatariami. Eropa guagu yujurāyeri ĩgo pāramerā árīturiarā mera gamewejēgu wahámi. Erāpu Goāmū dorerire iirā āhrama. Jesu yare ōari buherire ne duhubirā āhrama. Erā mera gamewejēgu wahámi. Eopīgu pīru wuariya turo pohro niguiami.

13

1 Wuariya taro niguigu, nuḡu majagu iriya árĩḡure ĩḡu wahḡāpacū ĩhabū. ĩḡu siete dipu, diez gohra cusaricūḡu āhrami. ĩḡu cusari oparā erā peyarino berorĩ peyāmi. Eropiro ĩḡu dipure ĩḡu waĩre ĩḡu gojatura āhrabū. ĩḡu waĩ iri ñeri waĩ árĩro Goāmure ĩhaturiri waĩ āhrabū. 2 Eropiḡu ĩḡu nuḡu majagu yee dorogū guagū iro dopa bejāmi. Eropiḡu bugu iro dopa guburicūḡu āhrami. Eropiḡu yee wuaguro iro dopa disirocūḡu āhrami. Eropiḡu pĩrupu ĩḡu turarire ohami nuḡu majagure. Eropa oḡu ĩḡure ĩḡu opu doarō apigū ĩḡu iro dopa ta masa bajarāre dorecū iiami pĩru nuḡu majagure. 3 ĩḡu nuḡu majagu dipuru yuju dipuru camirocūri dipuru dopa bejabū. Iri camiro ĩḡure wejēbocurira camiro árĩquerero yarira camiro āhrabū. Iri dipuru ojocaricū ĩarā, uca wahāma ĩ yeba majarā árĩpehrerā. Eropa ĩha ucarā, nuḡu majagure “Turagu āhrimi,” arĩ umupeoama. Eropirā ĩḡu yarā wahāma masa. 4 Eropirā nuḡu majagure pĩru ĩḡu turarire ocū ĩarā masapu ĩḡure pĩrure mereja umupeoama. Eropirā nuḡu majagu sāre mereja ĩḡure umupeoama. Eropa umupeorā ōpa arāma:

—Ne gajigu mu iro dopa turagu marimi. Gajigu mre ne tarinūgamasibeami, arĩ umupeoama masa nuḡu majagure.

5 Eropiḡu ĩḡu nuḡu majagu “Turatariagu āhrimi,” erā ĩḡure arĩquerecū ta, ĩḡu Goāmure ñero wereniguiquerecū ta eropa pepicānimi Goāmuru. Eropiḡu cuarenta y dos aberi gohra ĩḡu nuḡu majagu masare dorenigucumi. Iripēta ĩḡu opu árĩcū gahmemi Goāmu. 6 Eropiḡu Goāmure ñero wereniguiami ĩḡu. ĩḡu waĩre, ĩḡu wihire, umarogue ĩḡu árĩro, ĩḡu pohro majarā sāre ñero wereniguiami nuḡu majagu. 7 Eropiḡu Goāmu yarāre gamewejēḡu erāre tarinūgāmi. ĩḡu eropa tarinūgaquerecū ta eropa ĩacāniami Goāmu. Goāmu ĩḡu eropa iidorebiricāre iisome ĩḡu. Eropiḡu árĩpehrerā ĩ yeba majarā tauro opu árĩnirami nuḡu majagu. Árĩpehreri cururi majarā, árĩpehreri yebari majarā tauro, árĩpehreri macari majarā tauro, árĩpehrerā yare wereniguirā tauro opu árĩnirami ĩḡu. 8 Eropirā árĩpehrerā ĩ yeba majarā ĩḡu nuḡu majagu pohro mereja ĩḡure umupeorācoma Goāmu yarā árĩbirāpu. ĩ yebare Goāmu ĩḡu ĩhacūnuḡuboro core ĩḡu yarā árĩmorāre ĩḡu mera árĩniguimorāre erā waĩre gojatutuhañumi. Iripū ĩḡu eropa gojaturapū Cordero erā wejēdigu yapū āhraa. Iripū erā waĩre gojatubirā dihta Goāmu yarā árĩbirā nuḡu majagure umupeorācoma.

9 Gamiricurā āhraa mu. Eropirā peeque mu Jesu yarā árĩrā. 10 Árĩpehrerā muare peresu iinirāre erā sāre peresu iigucumi puhrū. Árĩpehrerā masare ñose wejēnirāre erā sāre ñose wejēgucumi puhrū. Irire masirā mari Goāmu yarā ñero tariquererā ta ĩḡure cóābiricārā. Eropirā yujuro boje ĩḡure ḡuñaturarā.

11 Puhrū gajigu nuḡu majagure ĩhabū daja. Yeba pohecague ĩḡu árĩdigu ĩḡu wiriricū ĩhabū. Pecusaro oveja cusaro iro dopa bejari cusaro cusarocūḡu āhrami. Eropa árĩquereḡu pĩru iro dopa wereniguiami. 12 Eropiḡu nuḡu majagu árĩmuhtadigupu puhrū árĩdigure opu acuami. ĩḡu eropa opu acugupu árĩpehreri yeba majarāre árĩmuhtadire umupeodreami. Árĩmuhtadi nuḡu majagu erā wejēbocuridi camiro yaridigu āhrami. 13 Eropiḡu puhrū árĩdigu deyorō moarire ĩ ĩhmuami masa erā ĩha ucaboro dopa. Eropa iigu masa erā ĩaro peame wuari peame umarogue dijaricū iiami. 14 Eropiḡu árĩmuhtadigu ĩḡu

ihuro gajigu nugu majagupu deyoro moari mera masare guyámi, "Ihĩ mua umupeobu áhrimi," arĩgu. Eropigu ĩgu gajigu nugu majagu árimuhtadigure wéadoreami masare. ĩgu árimuhtadigu ñoserimiji mera erã ñosedigu áriqueregu ta ojocarigu áhrami. ĩgu iro dopa bejagure ta wéadoreami gajigu nugu majagu masare. Erã eropa iicũ ĩagu Goãmu dooqueregu ta eropa ĩacãniami. ¹⁵ Eropigu puhru áridigu nugu majagupu árimuhtadire wéadigure ojocaricũ iiami masare ĩgu doreboro dopa. Eropigu wéadigupu erã ĩgure umupeobirãre wejédoreami. ¹⁶ Eropigu áripehrerãre erã mojotori diayepu sãre ĩgu waĩre gojatudoreami nugu majagu puhru áridigu. Erã mojotorire gojatubirinirãre erã diaporire gojatudoreami ĩgu waĩre. Bu árirãre, oparãre, doberi oparãre, mojomorocurãre, erã pohro majarãre, erã pohro majarã áribirãre, áripehrerãre ĩgu waĩre gojatudoreami. ¹⁷ ĩgu árimuhtadigu nugu majagu ĩgu waĩre, ĩgu numerore gojatubirãre ne asũdorebirami. Eropigu erãre duadobirami.

¹⁸ Irire ôaro masique mua. Pee masirã árirã nugu majagu ĩgu numerore ôaro ĩha masique. Iri numero uma waĩ iro dopa áhraa. Iri numero seiscientos sesenta y seis gohra áhraa.

14

Goãmu ĩgu taunirã mama bayariñere bayañorã

¹ Puhru Sión waĩcudigu utãgu weca niguigure Corderore ĩhabu. ĩgu mera ciento cuarenta y cuatro mil masa áhrama. Erã ĩgu ya waĩre ĩgu pagu ya waĩ sãre erã diaporire erã gojatunirã áhrama. ² Erãre yu ĩacũ ta umarogue busuro carabu. Wuari utãmu busuro dopa ta, bupu ĩgu wuaro busuro dopa ta busuro carabu. Eropigu arpa waĩcurire erã buamatẽro dopa ta busuro carabu. ³ Erã ciento cuarenta y cuatro mil masa bayarã áhrama. Ero opu ĩgu doaro pohro wapicurã gajiropa bejarã, Jesu yarã oparã sã core bayarã áhrama erã. Erã bayariñe mama bayariñe áhrabu. Iri bayarire erã dihta masiama. Cristo ĩgu taunirã dihta iri bayarire masiama. Erã i yeba árinirã mura ĩgu aĩ mujunirã áhrama. ⁴ "Ne ñerire iisome," arĩnirã ñerire iibirinirã áhrama. Ne erã yujusubugã nome mera ñero iibirinirã áhrama. Eropirã Corderore ĩhacũnirã árirã, ĩgu yare eropa ĩniguimurama. Eropigu erãre ñerã watope árinirãre ĩgu taumorãre aĩami Goãmupũ. Eropa ĩgu taunirã árirã, Goãmu yarã árimorã, Cordero yarã sã árimuhtanirã áhrama. ⁵ Eropirã erã mera majarã ne yujugu guayagu marami. Eropirã Goãmu ĩgu pepicũ ñeri iira dipuwaja marirã áhrama erã.

Ererã anyua weremedijuñorã

⁶ Puhru umarogue wuugure anyure ĩhabu. ĩgu i yeba majarãre áripehreri cururi majarãre, áripehrerã yare wereniguirãre, áripehreri yebari majarãre ôari buherire werebu áhrami. Iri buheri ne gohrotobeaa. Eropa árinigucãa. ⁷ Eropigu anyu gaguinigu ôpa arĩ medijuami:

—Goãmure güique. "Turatariagu, ôatariagu áhrimi," arĩ umupeoque ĩgure. Dohpagure masare ĩgu dipuwaja moaburisubu áriro iiaa. ĩgu umusire, yebare, pagayarire, mutayarigã sãre iidigu áhrimi. Eropirã ĩgure mereja umupeoque, arĩ gaguiniguĩ dijuami anyu.

⁸ ĩgu eropa arĩra puhru gajigu anyu umaro wuugu ôpa arĩ medijuami:

—Eräre cóácãmi. Wuari maca Babilonia waĩcuri maca majarãre cóácãmi Goãmu. Erã ĩgu cóãnirãpu áripehrerã gajirãre ñero iicũ iima. Masa erãre ĩhacũrã, ñerire uaribejarã, goãmarã wéanirãre umupeoma. Merericurã vinore erã turaro uaribejaro dopa ta erã ñerire turaro uaribejama Babilonia majarãre ĩhacũrã, arĩ were medijuami gajigũ anyu.

⁹⁻¹⁰ Erã perã anyua eropa arĩra pũhrũ gajigũ anyu erã pũhrũ wũũgu gaguĩguĩ õpa arĩ medijuami ĩgu sã:

—Áripehrerã nõgu majagure umupeorãre, ĩgure wéadigure umupeorãre erã diaporire, erã mojotorire ĩgu waĩre gojatunirãre dipuwaja moagucumi Goãmu. Erã mera guagu erã tamerare turaro dipuwaja moagucumi Goãmu. Eropigu Goãmu erãre burigã dipuwaja moaniguigucumi cãdijiro mariro. Nõgu majagure umupeorã áripehrerã peamegue warãcoma. Erogue burigã pũiroca erãre. Azufre waĩcuri mera erã dihura peame áriroca. Goãmu yarã anyua, Cordero sã erã ĩhuro ñero tarirãcoma erã. ¹¹ Iri peame eropa imicacũniguicãroca. Ne yarisome. Erãre eropa pũriniguicũ iiroca. Áripehrerã nõgu majagure mereja umupeorãre eropa pũriniguicroca. Ũmarĩ sãre, ñamiri sãre eropa pũriniguicãroca sooro mariro erãre. ĩgu nõgu majagure ĩgu wéadigure umupeorã, ĩgu waĩre erã gojatunirã sã, eropa ta ñero tarirãcoma, arĩ medijuami anyu.

¹² Eropigu õpa arĩ werea muare ire: Mũa erã eropa ñero tariborore masirã, Goãmu yarã ĩgu dorerire iirã, Jesure cóãbirã árirã, ĩgu yare duhubiricãque. Ñero tarirã áriquererã ta Goãmu yare duhubiricãque, arãa yãhu muare.

¹³ Pũhrũ ũmarogue yure wereniguicroca caracũ peeabu daja. Őpa arãmi yure:

—Ire gojaque mũhu. Goãmu yarã ĩgure cóãbirã árinirã dohpaguere mua sĩrira pũhrũ sãre õaro mucubirã árirãca mua, arĩ medijugũ carami yure. ĩgu eropa arĩra pũhrũ Espĩritu Santopũ õpa arĩnemoami daja:

—Eropa ta áhrraa. Diaye ta áhrraa. Erã turaro erã mohmerire duhpiicã soorãcoma. Ũmarogue erã wacũ õaro erã iirare guñagucumi Goãmu. Eropigu erãre õaro iigucumi. Eropirã erã mucubirã árirãcoma, arĩnemoami Espĩritu Santo.

Pohe maja oteri dũcare mari beye aĩro dopa ta Goãmu ĩgu yarãre beye aĩgucumi. Ñerãpũre boje beye dobogucumi, arĩ gojañumi Nũ

¹⁴ Pũhrũ imica curu boreri curure ĩhabũ. Iri curu weca masũ dopa bejagu doãmi. ĩgu oro bero opa ĩgu peyarino berore peyãmi. Eropigu matamiji usiri mijire opãmi ĩgu. ¹⁵ Pũhrũ gajigũ anyu Goãmu wihigue árdidigu wirirami. Eropa wiririgu turaro gaguĩniami imica curu weca doagure:

—Mũhu matamiji mera pohe maja dũcare i yeba maja dũcare tabe aĩphecãque. Dohpaguere mũ queodiro ejaa. Dũca boretuhabũ, arãmi anyu.

¹⁶ ĩgu eroparĩcũ peegu ĩgu matamiji mera i yebare tãranũgami ĩgu imica curu weca doagu. Eropa tãranũgagu i yeba maja dũcare aĩro dopa iiami.

¹⁷ Pũhrũ gajigũ anyu sã Goãmu wihigue árdidigu wirirami. ĩgu sã matamiji usirimijire opãmi. ¹⁸ Eropigu gajigũ anyu Goãmure umupeori mesa pohrogue árdidigu wirirami. ĩgũpũ mesa maja peamere ĩhadibugũ áhrami. Eropa wiririgu matamiji usirimiji opagure gaguĩniguĩami:

—Muhū matamiji mera i yeba áriri pohere, igui pohe maja ducare aique. Iguipū ñiituhabu, arí gaguiniguiami.

¹⁹ Īgu eroparicū peegu anyu ĩgu matamiji mera i yebare tãragu, iguitõrre wirita aiami. Īgu eropa iira pũhrũ iritõrre iguitõrre ĩgu ñatĩarogue cõhãmi. Īgu eropa ñatĩaro dopa ta Goãmu ĩgure gamebirãre turaro guagu, dipuwaja moagucumi. ²⁰ Iri maca tũro pohro erã ñatĩaro iri iguitõrre ñatĩama. Ero erã ñatĩacũ igui deco wiriro dopa di wiriabu. Trescientos kilõmetros yoariya, yuju metro õaro gaji metro deco õhcãriya ãhrabu di mera. Irire ñha masiabu. Yujunũ anyu Goãmũre gamebirãre ñerire iinirãre gameneo erã ñeri iira dipuwaja moagucumi. Īgu eropiicũ masa bajarã sirirãcoma. Eropa sirirã di pagari cõarãcoma, arí masiabu yũhũ.

15

Masa erã ñero tariborore anyua apituñorã masare

¹ Pũhrũ umarogue gajiropa árĩrore ñhabũ. Guhyadiaro árĩro i yebague dohpa waborore ñhmuriñe ãhrabu. Őpa ñhabũ: Siete anyua ãhrama. Goãmũ guagu siete suburi masare dipuwaja moatubu iiami. Eropirã erã siete anyuapũ dipuwaja moadore ĩgu apimorã ãhrama.

² Anyuare yũ ñara pũhrũ wũariyare õaro deco suririya dopa árĩriyare ñhabũ. Iriya peame mera árĩriya ãhrabu. Eropigũ iriya pohro niguirãre nũgu majagũre ĩgure wẽadigũ sãre tarinũganirãre ñhabũ. Erã nũgu majagũ numerore ĩgu ya waĩ maja numerore gojatudorebirinirã ãhrama. Ero niguirã arpa waĩcuri buamutẽrre opãma. Iri buamutẽri Goãmũ ĩgu ora ãhrabu. ³ Eropirã Goãmũ pohro majagu Moise ya bayarire bayarã iama. Cordero ya bayariñe sãre bayarã iama. Őpa arí bayãma:

Gua opu muhũ Goãmũ turatariagu ãhraa. Mũ iirare ñarã ñha uca wahaa gua. Mũ iira õataria. Muhũ árĩpehreri yeba majarã tauro opu ãhraa. Őaro guyarõ mariro diaye iiaa muhũ. ⁴ Árĩpehrerã mure gũima. Árĩpehrerã mure “Turagu ãhrimi,” arĩrãcoma. Mũ dihta ñeri marigũ ãhraa. Árĩpehrerã i yeba majarã mũ pohrogue ejarã mereja mure umupeorãcoma. Eropa ta iirãcoma erã árĩpehrerã õaro mũ iirare ñarã, arí bayarã iama erã.

⁵ Pũhrũ umarogue ñhamemujugũ, Goãmũ ya wihire pãgũra wihire ñhabũ. Iri wihigue Goãmũ ĩgu doreri ĩgu gojara mijiri utã mijiri erã dibura mijiri ãhrabu. ⁶ Iri wihire yũ ñacũ ta siete anyua iri wihi pohecague arĩnirã wirirama. Erã Goãmũ ĩgu dipuwaja moadoregu ĩgu apimorã ãhrama. Erã nũcũ erã dipuwaja moaburire opãma erã anyua. Őari suhri, boreri suhricurã ãhrama. Eropiro erã coretilhi weca oro gasiro mera tuãdiunirã ãhrama. ⁷ Iri wihigue arĩnirã erã wiriricũ wapicurã gajiropa bejarã mera majagũ erãre siete anyuare oroparire ohami. Iripari Goãmũ gua ĩgu dipuwaja moadoreburi mera õaro ujuturiabu iripari. Īgu Goãmũ eropa arĩniguigũ ãhrimi. ⁸ Īgu iriparire erãre ocũ ta Goãmũ wihi pohecague ĩgu goesiriri mera ĩgu turari mera imicacu sehya wahabu. Iri wihi eropa imicacu sehya wacũ iri wihire ne yujugũ ñaja masiya marabu. Siete anyua Goãmũ dipuwaja moadoregu ĩgu apidiro dopa ta erã masare dipuwaja moatura pũhrũ dipaturi iri wihigue ñajamasirãcoma daja. Īgu dipuwaja moaboro core ñaja masiya mara. apidiro dopa ta erã masare dipuwaja

moatura p̄hru dipaturi iri wihigue ñajamasirācoma daja. Īgu dipuwaja moaboro core ñaja masiya mara.

16

Goāmũ masare ĩgu dipuwaja moaborore werepũ

¹ P̄hru Goāmũ wihigue turaro wereniguiro carabũ. Siete anyuare weregu iigu carami:

—Goāmũ ĩgure tarinũganirã mera guami. Eropirã ĩgu dipuwaja moadorerare iique. Eropirã dohpaguere siete pari dicũrire yebague pisiri medijurã waque i yeba majarãre, arĩ wereniguigu carami.

² Eroparĩcũ peegu árĩmũhtadigu anyu ĩgu oparipa dicũrire yebague pisiri medijuami. ĩgu eropa pisiri medijucũ nũgu majagu waĩre gojatunirã ĩgure weadĩgure umupeonirã ñero camicuama. Iri camĩ turaro pũriyoro erãre.

³ ĩgu eropa pisirira p̄hru gajigu anyu daja ĩgu oparipa dicũrire pisiri medijuami daja wũariyague. ĩgu eropa pisiricũ iriya diya wahabũ. Sĩridigu di iro dopa āhrabũ iri di. Eropa wacũ iriya pohecague árĩnirã sĩriphrea wahãma.

⁴ Perã eropa pisiri dijura p̄hru gajigu anyu ĩgu oparipa dicũrire pisiri medijuami daja maurigue, iri mauri diparigue sãre. ĩgu eropa pisiricũ mauri diyari dihta wahabũ. ⁵ Eropa wacũ ĩagu gajigu anyu maurire coregu ōpa arĩgu carami:

—Goāmũ, muhu ñeri marigu āhraa. Dohpague sãre eropa árĩniguicãgu āhraa muhu. Iribojegue sãre eropa árĩniguicãmũribũ muhu. Eropigu dipuwaja moagu diyarire iigu diaye iibũ muhu. ⁶ Nũgu majagu yarãpũ mu yarãre wejẽrã di cóãcũ iima. Mu yare wererã sãre wejẽrã di cóãcũ iima erã. Erã eropa wejẽra dipuwaja iriyari diyari wahabũ erã ihriburi. Ōpa ta mu iicũ gahmeama erã, arĩgu carami maurire coregu anyu.

⁷ ĩgu eropa arĩra p̄hru Goãmũre umupeori mesague wereniguiro carabũ daja:

—Eropa ta āhraa. Goãmũ gua opu turatariagu āhraa muhu. Gũyaro mariro, queoro masare beye, dipuwaja moaa muhu, arĩ wereniguiro carabũ.

⁸ Ĥrerã anyua erã pisirira p̄hru gajigu anyu ĩgu oparipa dicũrire pisiri medijuami daja. Abe umũ majagu weca pisiri medijuami. ĩgu eropa pisiricũ abere masare turaro asicũ iiami Goãmũ. ⁹ Eropigu abe umũ majagu masare turaro asiami. Erãre eropa asicũ erã Goãmũ erãre ĩgu dipuwaja moadrecũ masirã, ĩgure ñero wereniguiama masa. Eropa ñero tariquererã ta erã ñero iirare ne bujawerebirama. Eropirã duhubirama. Goãmũre “Turagu āhrimi,” arĩ umupeodiabirama.

¹⁰ Wapicũrã anyua erã pisirira p̄hru gajigu anyu daja ĩgu oparipa dicũrire pisiri medijuami daja. Nũgu majagu ĩgu doaro weca pisiri medijuami. Opu doaro āhrabũ ĩgu doaro. ĩgu eropa pisirira p̄hru ĩgu yarã árĩri yebague naitĩaro wahabũ. Eropirã ĩgu yarã masa ñero pũricũ gũcũrire cũridihuama. ¹¹ Erãre ñero pũricũ ta, erã ñero camicũrã ta Goãmũre umaro majagure ñero wereniguiama. Erã ñero iirapũre bujawerebirama. Eropirã irire duhubirama.

¹² Yuju mojotocu majarã anyua erã pisirira p̄hru gajigu anyu daja ĩgu oparipa dicũrire pisiri medijuami daja. Eufrate waicũriya wũariyague pisiri medijuami. ĩgu eropa pisiricũ iriya bojomerea wahabũ. Abe

muririro majarā oparā erā gamewejērā warā erā iriya taribujariboro dopa eropa iiami.

¹³ Puhru urerā watēare tarumurā iro dopa bejarāre ihabu. Yujugu tarubugu pīru pohecague árídigu ĩgu disirogue wirirami. Gajigu tarubugu watí nugu majagu disirogue wirirami. Gajigu tarubugu watí daja “Goāmu yare weregū āhraa,” arí guyadigu ya disirogue wirirami. ¹⁴ Eropirā erā urerā watēa tarumurā iro dopa bejarā deyorō moarire ii ihmurā āhrama. Eropirā árīpehrero majarā oparāre gamenerecū iama erā basi Goāmu mera gamewejēdorērā. Erā eropa gamewejēburinū Goāmu turatariagu árīpehrerāre ĩgu dipuwaja moaburinū, pehreburinū árīroca.

¹⁵ Ero coregue ōpa arīmi Jesu guare: ĩaque muu. Yajari masu ĩgu yajagu ariro dopa ta yu sā guñaña mariro ariguca. Yu ariborore ōaro coredigu mucubirigu árīgucumi. ĩgu yaha árīburire iinigidigu űeri marigu mucubirīgucumi. Yu mera árīgucumi. Eropa iidigu árīgu yu dujaricū guhyasīrisome ĩgu, arīmi Jesu guare.

¹⁶ Eropirā urerā watēa i yeba majarā tauro oparāre gamewejēcū iituhāma. Erā gamewejēro Hebreo ya disiro mera Armagedón waĩcua.

¹⁷ Seis anyua erā pisirira puhru daja gajigu anyu ĩgu oparipa dicurire imica cururi weca pisiri medijuami daja. ĩgu eropa pisirira puhru Goāmu wihigue ĩgu opu doarogue turaro wereniguiro carabu:

—Iripēta árīroca, arīro carabu.

¹⁸ ĩgu eroparicū ta miamaa, bupu pamaa, gajiropa busamaa, guhyaro yeba űohmeabu. I yeba masa erā árīnugara puhru eropa siari űohmebirabu i yeba. Gajisubu űohmediro tauro guhyaro yeba űohmemaabu. ¹⁹ Eropa űohmecū wuuri macare Babilonia waĩcūri macare uhrema yehremaa wahabu. Eropiro paga macari i yeba árīri macari dija wahabu. Eropigu Babilonia waĩcūri maca majarāre wuuri maca majarāre guñāmi Goāmu erāre dipuwaja moabu. Erā űerire iiri dipuwaja erā mera turaro guāmi. Eropa guagu erāre burigā dipuwaja moāmi. ²⁰ ĩgu eropa iicū árīpehreri nūguri, utā yucu sā pehrea wahabu. Eropiro ne marabu. ²¹ Eropiro decoyeri pagayeri yasariyeri yebague masa weca dijarabu. Árīpehreri decoyeri cuarenta kilo nūcūriyeri āhrabu. Erā weca iri eropa dijaricū Goāmu erāre ĩgu turaro dipuwaja moacū masirā űero wereniguiama masa Goāmure.

17

űerire ĩgore dipuwaja moadoregucumi, arī werepu űu

¹ Puhru siete parire oparā anyua mera majagu yu pohroque eragu ōpa arāmi yure:

—ĩagu arique. Diari bajayari weca doagore űma mera űero iiricūdigore Goāmu ĩgu dipuwaja moaborore ĩagu arique muhu. ² I yeba majarā oparā igo mera űero iiro dopa ta igo yapure gamema. Goāmupure gamebirama. I yeba majarāre igo sihu merecū iiro dopa ta, erā mera igo űero iiro dopa ta igo masare űero iirire űaribejacū iimo igo. Eropa iigo árīpehreri űerire erā iicū iimurimo igo masare, arī wereami anyu yure.

³ ĩgu eropa arīra puhru Espírītu Santo yure deyorō moarire ĩacū iiami. Eropigu anyu masa marirogue aĩ wahgāmi yure. Ero igo nomeore ihabu. Igo nūgu majagu diagu weca peyago āhramo. Nūgu majagupu ĩgu dūpu baja waĩ erā gojatudigu āhrami. Iri waĩ űeri waĩ Goāmure űeri

wereniguri waĩ áhrabu. Eropigu siete dipucugu, diez gohra cusaricugu áhrami nugu majagu. ⁴ Eropigo nomeopu óaro yahsari suhri opará erã sañarino suhrire sañadigo áhramo. Diari suhri sãre sañadigo áhramo. Baja ore, wjacuri utãre, perlayeri sãre tuhura suhrirore sañadigo áhramo igo. Eropigo oropare opãmo igo. Iripare dicuri ñeri igo iira áhrabu. Ñero iigo burigã ñero iidigo ármo igo. Iri ñeri Goãmu igu ñadiabirira áhrabu. ⁵ Igo diapo igo waĩ erã gojatudigo áhramo. Iri waĩre óaro masibea mari. Ópa arĩ gojatura áhrabu igo diapogue: “Wuãri maca Babilonia áhrimo. Igo árĩpehreri ñeri iinugadigo áhrimo. Árĩpehrero majarã erã ñerire, Goãmure erã gamebiririre iinugadigo áhrimo. Eropirã erã igore ihacũrã ñetariaro iirã iima,” arĩ, igo diapore erã gojatudigo áhramo. ⁶ Eropa igore íagu igo bajarã Goãmu yarãre igo wejẽdigo árĩcũ masiabu yahu. Mererã erã mucubiriro dopa ta igo erãre wejẽgo erã di cóacũ íago mucubiridigo áhramo igo. Jesure erã cóãbiriri dipuwaja erãre wejẽdigo áhramo igo.

Igore íagu, íha uca wahu. ⁷ Eropigu igu anyu arãmi yure:

—¿Duhpigu íha uca wahari muhu? arãmi yure. —Mu masibirirare mre ihmugura. Igo nomeore mre weregura. Igo peyagu sãre weregura. Ígu nugu majagu áhrimi. Eropigu siete dipucugu, diez cusaricugu áhrimi. ⁸ Ígu mu íadigu iribojegue árĩdigu árĩmi. Dohpaguere marimi igu. Puhru igu uñcãri gobegue árĩdigu wiriri dehyoagucumi daja. Ígu eropa wiririra puhru dederebu peamegue wagucumi. I yeba majarã ígu dehyoacũ íha uca wa, ígure umupeorãcoma. I yeba árĩboro core Goãmu igu yarã árĩmorãre erã waĩre gojatudigu árĩmi. Ígu gojatubirinirã áhrima nugu majagure umupeorã. Ígupu iribojegue árĩdi árĩmi. Dohpaguere marimi. Puhru dipatiri dehyoagucumi daja. Eropirã masa igu dehyoacũ íarã, íha uca warãcoma.

⁹ “Dohpaguere yu wereburire óaro masidiarã, óaro peerãca mua, arĩnemoami yure daja. Eropirã pee masirã árĩque mua. Nugu majagu dipu, siete dipu siete utã yucu iro dopa áhrra. Iri utã yucu weca peyamo igo ñero iiricugo. ¹⁰ Iri dipu siete opará sã iro dopa áhrra. Bajarã masa tauro opará áhrima. Cinco oparãre cóãtuhamã. Gajigu erã puhru árĩgu opu áhrimi dohpaguere. Gajigupu puhru opu ñajagucumi. Eropa ñajagu merogã opu árĩgucumi igu. ¹¹ Eropigu nugu majagu diagu core árĩdigu, dohpaguere marigu erã siete opará puhru opu árĩgucumi. Siete opará mera majagu áhrimi. Puhru peamegue dederea wagucumi.

¹² “Nugu majagu cusari diez cusari diez opará iro dopa áhrra. Bajarã masa tauro opará áhrima. Erã opará ñajanibeama dohpa. Puhrugue opará ñajarã merogã opará árĩrãcoma. Yoari boje opará árĩdosome erãre. Eropa opará árĩrã nugu majagu mera opará árĩrãcoma. ¹³ Erã diez opará yujuro mera pepirã árĩrãcoma. Eropirã erã nugu majagure erã ya yebari majarã tauro opu acurãcoma. ¹⁴ Eropirã Cordero mera gamewejẽ warãcoma erã. Erã eropa gamewejẽquerecũ ta Cordero igu beyenirã mera ígure ne cóãbirinirã mera erãre tarinugarãcoma. Ígu árĩpehrerã gajirã tauro opu áhrimi. Eropigu erãre tarinugagucumi,” arãmi anyu yure.

¹⁵ Ire yure werenemoami anyu:

—Ñero iiricugo mauri weca doago iimo. Iri mauri ópa iro dopa áhrra: Baja yebari majarã, baja cururi majarã, baja disiri wereniguirã iro dopa áhrra iri mauri. Erã bajarã weca áhrimo igo. ¹⁶ Nugu majagu, diez

oparã mera ñero iiricugore ìhaturirãcoma. Erã diez oparã nuḡu majagu mera igore goroweopeho igo yare emapehocã, suhri marigo cóârãcoma igore. Eropa iirã igo dupure barãcoma. Erã eropa iira puhru igore soepehocãrãcoma. ¹⁷ Erã diez oparã yujuro mera pepirã nuḡu majagure erã ya yeba majarã tauro opure acurãcoma. Erã eropa iicũ apimi Goãmu ìḡu gamediro dopa ta iibure. Eropiḡu nuḡu majaguru opu áriḡucumi. Áriḡehereri Goãmu ìḡu iribojegue ìḡu werediro dopa ta ìḡu iira puhru nuḡu majagure cóãḡucumi. ¹⁸ Iḡo mu ìadigo mera òpa arĩ buhema: Iḡo wuuri maca Babilonia waĩcũri maca iro dopa àhrimo. Áriḡehererã gaji macari majarã tauro àhrima iri maca majarã, arãmi anyu yare.

18

Babilonia waĩcũri maca coh moyoro

¹ Puhru gajigu anyure umarogue dijarigure ìhabũ. ìḡu opu gohra àhrami. Eropiḡu ìḡu gosesiriri áriḡehererogue òaro boyoro wahabũ. ² ìḡu eropa dijara puhru turaro gaguiniguĩ wereami:

—Cóãcãmi. Babilonia waĩcũri macare wuuri macare iri maca majarã sãre cóãcãmi. Dohpaguere watẽa bajarã ñerã dupu deyobirã sã iri maca mũraro áriã iima. Ñerã mirimagu porã majarã sã masa erã ìha doorã iri maca mũraro áriã iima. ³ Iri maca majarã mura áriḡehereri yeba majarãre goroweonirã áriã. Eropirã baja yebari majarã tauro oparã iri maca majarãre pee Goãmure cóãnirã áriã. Erã ñeri uaribejarire iidiarã cóãnirã áriã Goãmure. Iri maca majarã baja gajinore wajapagari duarire gamenirã áriã. Eropirã gaji macari majarã erãre duarã pagari dihta wajatanirã áriã, arĩ wereami anyu.

⁴ Puhru dipaturi umarogue wereniguicũ peeabũ. Òpa arĩro carabũ iri macare cóãboro core ìḡu wereniguirire:

—Mũa yaharã, iri maca majarã mera áriḡibicãque mũa. Iri maca majarã mera mũa áriḡicũ mũa sãre dipuwaja moagucumi. Eropirã iri macague ñero iirire ìhacũbircãque. ⁵ Ero ñero iira baja áriḡicã. Iri maca majarã yoari boje burigã ñerire iituhajama. Eropiḡu yuhũ Goãmu iripẽta erã ñero iicũ gahmea. Eropiḡu erãre dipuwaja moaguca. ⁶ Iri maca turaro dipuwajacuporo. Ero majarã masare erã ñero ìdiro dopa ta erã sãre ñero taricũ iiporo. Masare erã ñero iidiro dopa ta erã tauro erãre ñero dipuwaja moaporo, arĩro carabũ. ⁷ Iri maca majarã “Òarã àhraa gua,” arĩ pepirima. Eropa arĩ pepirã, wajapagarire wuaro opãma erã. Erã wajapagarire wuaro erã oparopẽ ta turaro ñero taricũ iiporo. Eropirã erãre bujawerecũ iiporo. Erã basi òpa arĩ pepirima erã: “Gua i yeba majarã oparã áriã iiaa. Mojomorocurã áribeaa. Eropirã ne ñero tarisome gua,” arĩ pepirima erã. ⁸ Eropa arĩ erã pepirã áriḡicũ yujunũ erãre guñaña mariro dipuwaja moaburinu áriroca, arĩro carabũ. Irinu siriri, dorecũri, co oreri, oaboari áriroca. Eropiḡu iri macare soepehocãḡucumi, arĩro carabũ. Mũa opu Goãmu iri macare dipuwaja moadoreḡu turatariagu àhrimi. Eropiḡu eropa ta ìḡu arĩdiro dopa ta iri macare dipuwaja moadoreḡucumi, arĩro carabũ umarogue.

⁹ Eropirã Goãmu iri macare ìḡu dipuwaja moacũ ìha i yeba majarã oparã burigã bujawere orerãcoma. Erã iri maca majarã mera ñerire iirã òaro mucubirã áriḡmũrinirã áriã. Eropirã iri maca ãjucũ ìarã orerãcoma

erā. ¹⁰ Īḡu iri macare eropa soecū ĩarā oparā gaji yeba majarā yoarogue ĩhabeoniguirācoma gua säre dipuwaja moari arĩrā. Ero ĩhabeoniguirā ōpa arĩrācoma:

—Ade. Mojomorocuri maca āhraa Babilonia. Si maca wuari maca turari maca arĩrabu. Mata yojaro mera si macare dipuwaja moami, arĩrācoma erā.

¹¹ I yeba majarā doberi duarā iri maca ũjucū ĩarā burigā bujawere orerācoma erā sā. Iri maca pehrecū ĩarā, erā ya doberire asūrā maricū ĩarā bujawere orerācoma. Eropirā orerācoma. ¹² Erā aĩḡarirare, orore, platare, wajacuri utäre, perla waĩcuri dipu säre asūrā marirācoma. Eropi gaji erā aĩḡarirare suhri ōarire wajapagirare, yahsari suhrire, oparā erā sañari suhri dopa bejarire, seda waĩcuri suhrire, diari suhrire asūrā marirācoma. Eropi gaji erā aĩḡarirare yucu poresuri yucare asūrā marirācoma. Eropi gajire erā aĩḡarirare marfil waĩcuri mera erā iirare, wajacuri yucu mera erā iirare, bronca mera erā iirare, come mera erā iirare, marmol mera erā iirare asūrā marirācoma. ¹³ Eropi erā aĩḡarirare canela waĩcurire, gaji bari ũsuricū iirire, inciensore, mirra waĩcuri poresurire, gaji poresurire asūrā marirācoma. Eropi gaji erā aĩḡarirare vinore, ũyare, trigo pogare, trigore, wecuare, ovejare, cabayuare, tūruri gasire, pohro majarāre asūrā marirācoma. Eropirā bujawererācoma doberi duari masa. ¹⁴ Eropirā ōpa arĩrācoma erā iri maca majarā mware:

—Ade. Ņetariaro wahari erā. Áripehreri erā mahira mura pehrea wahaa. Eropiro áripehreri erā ōarire erā wajapagari opara pehrea wahaa. Eropirā iri dipaturi bocasome mari, arĩrācoma doberi duari masa.

¹⁵ Erā iri macare doberi duarā wuaro wajatamurininā árĩma. Eropirā erā iri macare yoarogue ĩhu niguirācoma gua säre dipuwaja moari arĩrā ũcarā. Eropa ĩhabeorā iri macare burigā bujawere orerācoma. ¹⁶ Ōpa arĩrācoma iri macare:

—Ade. Ņetariaro wahaa iri maca wuari maca. Si maca majarā ōarire opamuririma. Nomeo ōari suhrire, wajapagari suhrire, yahsari suhrire, diari suhri säre sañago dopa ōarire opamuririma. Eropirā oro wajapagari utā, perla dipu waĩcuri tuhura suhriro sañamuririma. Wuaro opamuririma si maca majarā. ¹⁷ Eropiro mata si maca wuaro dobericuri maca dederea wahaa, arĩrācoma iri macare.

Eropirā áripehrerā dohori gasi mera curirā, iri gasi oparā, erā ũma, gajirā wuariyague mohme watarā sā iri macare yoarogue ĩhu niguirācoma erā sā. ¹⁸ Ero ĩhabeorā iri macare ũjucū ĩarā ōpa arĩ gaguiniguirācoma:

—Paga macari si maca iro dopa árĩri macari ne gaji maca mara, arĩ gaguiniguirācoma erā. ¹⁹ Eropa bujawererā árĩri erā dipu weca nicure űaji peorācoma. Eropirā co orerā ōpa arĩrācoma:

—Ade. Ņetariaro wahaa si maca mwaro. Ōari maca árĩribu. Áripehrerā dohori gasi oparā wuariyague curirā si maca maja doberi mera ōaro watararibu mari. Eropiro mata si maca dederepehrea wahaa, arĩrācoma gasi majarā, arĩ werero carabu yare ũmarogue.

²⁰ —Iri macare ĩḡu cóacū ĩarā mucubirique mua, ũmaro majarāpu, arĩro carabu. —Goāmu yarā, Jesu ĩḡu apinirā, ĩḡu yare weremũtanirā áripehrerā mua mucubirique. Iri maca majarā muare űero taricū iima. Erā eropa iira dipuwaja, dipuwaja moami Goāmu. Eropirā mucubirique mua, arĩro carabu.

²¹ Eropa arĩ wereniguirare peera puhru òpa ìhabu yuhũ. Turagu anyu wuuriye utãyere aĩ wahgũ, wuuriyague mehyuami. Eropa mehyuga òpa arãmi:

—Iye utãyeyuriñajadiro dopa ta wuuri maca Babilonia waĩcũri maca turaro yuhridijaro busuroca. Eropa yuhridijara puhru iri macare dipaturi ãsosome mua. ²² Iri macare dederea wacũ iigucumi. Eropiro ne iri macare bayarire mua peediro dopa arĩsome. Arpa buamũteri, flauta dipurare, corneta sãre ne dipaturi peeya mariroca. Eropirã iri maca maricũ ero mohmenirã dipaturi erore mohmesome. Eropiro trigo yeri utã mera erã oera sã ne peeya mariroca. ²³ Iri maca boyo oyadiro dopa ne arĩsome. Eropirã mojoto dirinirã erã mucubiri wereniguidiro dopa ne dipaturi arĩsome. Iri maca majarã doberi duarã asũrã mera gajirã tauro opamurima erã. Eropirã iri maca majarã yeea erã purisiriri mera arĩpehrero majarãre guyamurima. Eropirã ñerire uaribeja, Goãmũpũre gamebirimũrima masa, arãmi yare turagu anyu.

²⁴ Iri maca majarã Goãmũ yare weremuhtanirãre gajirã igũ yarã sãre arĩpehrero majarãre wejẽmurinirã arĩma. Erã eropa wejẽra dipuwaja, gajĩ ñero iira dipuwaja sãre dipuwaja moãmi Goãmũ iri macare.

19

¹ Babilonia macare igũ cóarare yũ ãara puhru umarogue bajarã gaguiniguirã carama yũ peecũ. Òpa arĩ gaguiniguirã carama: Aleluya. Goãmũre òaro wereniguirã. Goãmũ marire taugu ãhrimi.

Ìgũre òaro umupeorã. Turatariagu ãhrimi igũ. ² Guyaro mariro queoro iigu masare dipuwaja moami igũ. Ñeri dipuwaja moorãre erãre dipuwaja moabeami. Igo nomeo ñerire iiricũgo Babilonia waĩcũri maca ãhrimo. Iri maca majarãre ìhacũrã i yeba majarã ñero iimurima. Eropigu iri maca majarãre dipuwaja moami Goãmũ. Eropigu igũ dorerire iinirãre igũ pohro majarãre erã wejẽra dipuwaja dipuwaja moami igũ, arĩ gaguiniguirã carama.

³ Dipaturi gaguiniguirã carama daja:

—Aleluya. Goãmũre òaro wereniguirã. Iri maca ñero iira maca igũ soera maca eropa imicacũnigũcãroca, arĩ gaguiniguirã carama.

⁴ Eropirã veinticuatro Jesu yarã oparã, wapicũrã gajiropa bejarã mera mereja, Goãmũre mari Pagure igũ doaro doagũre umupeoama. Òpa arĩ umupeoama erã:

—Amén. Aleluya. Eropa ãhrra. Mari Pagure òaro wereniguirã, arãma erã.

⁵ Puhru opu doarogue òpa arĩro carabu:

Mari Opu Goãmũre umupeoque. Mua igũ pohro majarã, ìgũre umupeorã bu arĩrã, oparã sã arĩpehrerã mua ìgũre òaro wereniguique, arĩro carabu.

Cordero igũ mojoto diriburinũ bosenure werepũ Ñũ

⁶ Puhru bajarã masa erã wereniguirã caracũ peebũ. Erã utãmu iro dopa bupu iro dopa busurã carama yũ peecũ. Òpa arĩ gaguiniguirã carama:

Aleluya. Goãmũre òaro wereniguirã. Igũ mari Opu opu ñajatuhami. Turatariagu ãhrimi igũ. ⁷⁻⁸ Cordero igũ mojoto diriburi bosenu ãhrra dohpagure. Igũ mojoto diribo òaro amudigogue ãhrimo. Igo òari suhrirore guhrari mariri suhrirore sañatuhamo. Iri suhriro Goãmũ yarã òarire erã iira iro dopa ãhrra. Eropirã mucubirã

mari. Goãmure “Ôatariagu àhrimi,” arĩ umupeorã mari ìgure, arĩ wereniguirã carama.

⁹ Erã eropa arĩra puhru anyupu arãmi yare:

—Ire goja aique. “Cordero ìgu mojoto diriri bosenure ìgu sihubeonirã mucubirirã àhrama,” arĩ goja aique, arãmi yare anyu.

Eropa arìgu ta òpa arĩnemoami:

—Diaye ta àhraa i yu werera. Goãmũ ya wereniguiuri àhraa, arĩnemoami yure.

¹⁰ Ìgu eroparicũ peegu ìgure mereja umupeobu iirabu. Yu merejacũ gohra òpa arãmi yare:

—Yure mereja umupeobita. Mu árĩro dopa ta Goãmũ pohro majagu ta àhraa yu sã. Mu acawererã Jesu yarã árĩpehrerã ìgu ya buherire werenirã iro dopa yu sã Goãmũ pohro majagu àhraa. Eropigu Goãmũpure mereja ìgũpure umupeoque, arãmi yare anyu.

Goãmũ yare weremuhtanirã iribojegue majarã Espiritu Santo ìgu itamuro mera Jesu ya buherire ta weryuũuma.

Cabayu boregu weca peyagure werepu Ñu

¹¹ Puhru umaro pãrimaacũ ìhabũ. Ero cabayu boregu àhrami. Ìgu weca peyagu òpa waicũami: Ìgu arĩro dopa ta iigu diaye iigu waicũami ìgu. Eropigu masare dipuwajare moagu ìgu ìhaturirã mera gamewejẽgu òaro guyarõ mariro iiami. ¹² Ìgu cuiuri peame porã iro dopa àhrabu. Eropiro ìgu dipuru weca baja oparã peyari berori àhrabu. Eropigu ìgu dupure ìgu waĩre gojatudigu àhrami. Iri waĩre ìgu dihta masiami. Gajirã masibirama.

¹³ Ìgu sañariñe yõariñe di tuyariñe àhrabu. Ìgu òpa waicũami: Goãmũ ya wereniguirire weregu waicũami ìgu. ¹⁴ Eropirã ìgu yarã surara umarogue majarã ìgure nũrsiãma. Borerã cabayua weca peyarã àhrama. Òari suhrire boreri suhrire, guhrari mariri suhrire sañanirã àhrama. ¹⁵ Ìgu erã opu wamũhtadigu ìgu disiro ñoserimiji usirimiji cuũuami. Irimiji i yeba majarãre ìgu tarinũgaburimiji àhrabu. Eropigu ìgu turari mera ìgu òorecũ ne yujugu ìgure tarinũgagu ìgure bocatũsome. Igu dipurure erã ñatĩacũ igui deco wiriro dopa ta i yeba majarã ñerãre di wiriroca ìgu erãre dipuwaja moacã. Goãmũ erã mera guami. Ìgu eropa guagu aricũ cabayua weca peyagu dipuwaja burigã moagacumi. ¹⁶ Ìgu suhriro, ìgu ñigagu sãre iri waĩre gojatudigu àhrami: “Árĩpehrerã gajirã tauro opu waicũami,” arĩ gojatudigu àhrami.

¹⁷ Puhru abegue nigugure anyu nigugure ìhabũ. Árĩpehrerã umarogue wũurãre goro porã majarãre gaguiniguibeoami ìgu. Òpa arĩ turaro gaguiniguibeoami erãre:

—Gamenererã arique. Goãmũ ìgu bosenu wũari bosenu barã arique.

¹⁸ Baja yebari majarã tauro oparã murare, surara oparã murare, surara bajarã murare, cabayua murare, erã weca peyarã murare, árĩpehrerã gajirã masa murare, pohro majarã murare, pohro majarã árĩbirã murare, gajirã oparã murare, bu arĩrã murare barã arique. Erã árĩpehrerã dupũ murare barã arique, arĩ gaguiniguibeoami anyu goro porã majarãre.

¹⁹ Eropigu nũgu majagure, i yeba majarã tauro oparã erã surara bajarã sãre ìhabũ. Erã gamenerenirã àhrama cabayu weca peyagu mera ìgu surara bajarã mera gamewejẽmorã. ²⁰ Erã eropa gamewejẽcũ cabayu weca peyagu nũgu majagure peresu iiami. Gajigu “Goãmũ yare werenigugu àhraa,” arĩ gujadigu sãre peresu iiami. Ìgu gujadigupu

nugu majagu İgu İhuro deyoro moarire iibasadigu āhrami. İgu deyoro moari mera nugu majagu İgu waİre tuyanirāre, İgu masu wėadigure umupeorāre guyadigu āhrami. "I Goāmu ya āhraa," arİgu guyamuridigu āhrami. Erāre perāre İgu peresu iira puhru erāre ojocarirāre ta peamegue cōhāmi. Iri peame wuariya iro dopa wuari peame azufre mera ũjuri peame āhrabu. ²¹Eropigu duhyarāre erā surara ārinirāre űoserimiji mera İgu disiro cuñurimiji mera wejēami cabayua weca peyagupu. Eropa İgu wejēra puhru goro porā majarā erā dupu murare barā yapitaria wahāma.

20

Mil bojori gohra Cristo İgu yarā mera masare doregucumi, arİ gojañumi
Ñu

¹ Puhru gajigu anyu ũmarogue İgu dijariçā İhabu. ũhcāri gobe maja sawire, wuarida comeda sāre opāmi İgu. ² Eropa dijariçu pİrure ñeāmi İgu. İgu pİru iribojegue pİru dupucugu arİgu, watİ Satana waİcugu āhrami. İgure ñeagu dihriami mil bojori gohra peresu iibu. ³ Eropa dirituha ũhcāri gobegue cohā dijuami İgu i yeba majarāre mil bojori gohra İgu guyamasibiriborore. Eropa cōātuhagu iri gobere biha, sawi biacāmi. Eropigu mil bojori puhru dipaturi İgure bajamenurigā wiunigucumi daja.

⁴ Puhru oparā doarire İhabu. Iri doarire doarā sāre İhabu. Erāre masare erā beyedoborore apiami Cristo. Gajirā sāre İhabu. Erāpu Jesu yare Goāmu yare erā werera dipuwaja erāre dipure tabe cōānirā āhrama. Nugu majagure, İgu wėadigu sāre ne umupeobirininirā āhrama. Eropirā erā diaporire erā mojotori sāre İgu waİre gojatudorebirininirā āhrama erā. Eropirā gajirā erāre wejēnirā ārİma. Erāre wejēra puhru masa muria wanirā ārİma. Masa muriarā erā mil bojori gohra Cristo mera oparā ārİracoma. ⁵ Gajirā Cristo yarā sİrinirā mura masa murianibirama dohpa. Erā wejenirā erā masa muriaura puhru mil bojori oparā erā ārİra puhru gajirā sā masa muriarācoma. Eropirā erā wejēnirā mura Cristo puhru masa muriamuhtarā ārİracoma. ⁶ İgu masumuhtanirāpu turaro mucubirirā ārİracoma. űeri marirā ārİracoma erā. Eropirā peamegue wasome erā. Eropirā Goāmu yare Cristo yare erā sā serēbasarā pahia ārİracoma erā. Eropirā erā masa muriamuhtarā mil bojori gohra Cristo mera masa tauro oparā ārİracoma.

Satana dederea wagucumi, arİ gojañumi
Ñu

⁷ Mil bojori puhru Satanare peresu arİgure wiugucumi. ⁸ İgu eropa wirira puhru arİpehrero i yeba majarāre guyagu wagucumi İgu, "İna gamewejērā warā," arİgu. Gog waİcurāre, Magog waİcurā sāre guyagu wagucumi. Eropirā erā İgu guyarire peerā, erā surara majarāre game-neorācoma gamewejēmorā. Erā surara majarā bajarā gohra ārİracoma. Wuariya maja imipa ārİro utāburuyeri nucu dopa erā surara bajarā ārİracoma

⁹ Eropirā i yebaguere wasirirā, Goāmu yarā erā ārİri macare Goāmu İgu mahiri macare cāhmotanugajarācoma. Erā eropa cāhmotanugajara puhru Goāmu erāre umaro maja peame mera soe mehdijucāgucumi.

¹⁰ Eropa wara puhru watİre erāre guyagure peamegue cōāgucumi. Iri peame wuariya iro dopa ārİri peame azufre mera ũjuri peame āhrabu.

Erogue nũgu majagure “Goãmu yare weregu ahraa,” arĩ guyagure cóatuhajami. Ero erã áricũ umuri nucu pũriroca erãre.

Masare Goãmu dipuwaja moatugucumi, arĩ gojañumi Ñu

¹¹ Pũru wũaro opu ĩgu doarore ðaro borero ĩhabũ. Iri doaro weca doagu sãre ĩhabũ. Eropiro ĩgu árirogue mata i yeba umaro sã dederea wahabũ. Ne deyobirabũ pare. ¹² Eropigu opu pohro sĩriniřã mura erã niguicũ ĩhabũ. Erã bu áriřã, oparã mura sã ahrama. Ero erã niguicũ ĩgu gojaturapũire pãgũami. Iripũri masa erã iirare ĩgu gojaturapũri ahrabũ. Eropigu ĩgu opu beyegu ĩripũre ĩatuha erã iirare masiami. Irire masigu sĩriniřãre beyeami ñerã, ðarã. Pũru gajipũ sãre pãgũami. Iripũ Goãmu mera eropa áriřniguiromãre erã waire erã gojaturapũ ahrabũ. ¹³ Wũariyague miri sĩriniřã mura, diague erã cóãniřã mura sã masa mũria wahãma. Eropirã yeba pohecague áriřniřã mura, sĩriniřã erã árirogue áriřniřã mura sã masa mũria wahãma. Erã eropa mũrijacũ ero doagu erã iirare masigu erãre beyeami. ðarãre, ñerãre beyeami. ¹⁴ Pũru sĩriřniřere, sĩriniřã erã áriřro sãre cóãcãmi Goãmu dipaturi mari sĩribiriboro dopa. Peamegue irire cóãcãmi. Iri peame wũariya iro dopa áriřri peame ahrabũ. Goãmure gamebirãpũ peamegue warã dipaturi sĩriřã dopa wahama. ¹⁵ Eropigu ĩgu mera áriřniguiromã erã waire Goãmu ĩgu gojaturapũ áriřpehrerã gojatusũya marirãpũre peamegue cóhãmi ĩgu.

21

Umuro, yeba sãre mamare gohrotogucumi Goãmu, arĩ gojañumi Ñu

¹ Pũru umaro, yeba sãre mamare ĩgu gohrotorare ĩhabũ. Áriřmũhtara mura umaro, yeba, pagayari sã pehrea wahabũ. Marabũ. ² Eropigu yũhu Ñu ðari macare, mama macare Jerusalén waĩcũri macare ĩhabũ. Iri maca umarogue Goãmu pohrogue dijaricũ ĩhabũ. ðaro dehyoabu iri maca. Mojoto diribo igo marapũre mucubiriborore ðari suhri sã igore ðaro amuro dopa ahrabũ iri maca. ðpa iro dopa ta iri macare amuyudi áriřmi Goãmu ĩgu yarãre mucubiricũ iibu. ³ Irire yũ ĩara pũru opu doarogue gaguiniguicũ peeabũ:

—Īaque. Dohpaguere masa watope áriřgu iimi Goãmu. Erã mera áriřgucumi ĩgu. Eropirã ĩgu yarã áriřãcoma erã. Eropigu Goãmu ĩgu basi erã mera majagu áriřgu, erã yagu Goãmu áriřgucumi. ⁴ Eropigu eropa mucubiriniřniguiřũ iigucumi ĩgu erãre. Eropirã dipaturi bujaweresome erã. Eropirã ne dipaturi sĩrisome erã. Ne ñero sĩporãcũri, co oreri, pũriři sã mariroca erãre. I áriřpehreri iribojegue maja pehrea waroca erãre, arĩ gaguiniguũ carami.

⁵ Pũru opu doarogue doagu ðpa arãmi:

—Īaque. Áriřpehrerire mama gohrotocũ iiguca, arãmi.

Īgu eropa arĩra pũru yũre ðpa arãmi daja:

—Yũ arĩřire goja aĩque. Yũ arĩři diaye ta ahraa. Eropiro yũ arĩřiro dopa ta eropa waroca. Eropigu yũ arĩřire goja aĩque, arãmi yũre.

⁶ Pũru ðpa arãmi daja yũre:

—Iripẽta arĩca. Yũ áriřpehrerire ĩhacũnugudigu ahraa. Eropigu áriřpehrerire pehrecũ iibu ahraa daja. Ñemesiburã erã turaro ihridiaro dopa ta yũ pohrogue wadiarã Jesure gamerãcoma. Eropirã Jesure yũhrirãcoma. Īgu ojocarĩřire oro deco iro dopa ahrimi. Īgure

gamerāre waja gamero mariro yu mera eropa árĩnguiburore ogura erāre.
 7 Árĩpehrerā ñero tariquererā yure umupeoduhubirāre ōpa iigura: Erā
 Goāmu árĩgura. Eropirā erāpu yu porā árĩrācoma. 8 Erā eropa árĩquerecū
 masare güi yaharare duhurā, yahare gamebirā, ñetariarire iirā, masare
 wejērā, nome mera ñero iirā, ũma mera ñero iirā nome, yeea, goāmarā
 wéanirāre umupeorā, árĩpehrerā gayarā peamegue warācoma. Ero
 wuuriya iro dopa árĩri peame azufre mera ũjuri peame āhrra. Ero
 warā dipaturi erā sĩriro dopa ta warā iirācoma, arāmi yure.

Mama maca Jerusalénre werepu

9 Pũhru yujugu anyu yu pohrogue erāmi. Īgu siete pari opanirā mera
 majagu āhrami. Īgu dipuwaja moadoregu Īgu apinirā mera majagu sã Īgu
 anyua mera majagu āhrami. Eropa eragu ōpa arāmi yure:

—Īagu arique. Cordero Īgu mojoto diribore ĩhmuğuca mure, arāmi
 anyu yure. 10 Eropigu Espĩritu Santo yure Goāmu ya macare ĩacū iiami.
 Eropigu ũmadigu utāgu wecague yure aĩ muriāmi. Eroque Goāmu ya
 macare Jerusalénre ōari macare ĩhmuami yure. Iri maca Īgu mojoto
 diribo iro dopa āhrabu. Goāmu pohrogue ũmarogue dijariro iibabu iri
 maca. 11 Goāmu Īgu gosesiriri mera gosesiriabu iri maca. Wajacuri utā iro
 dopa gosesiriabu. Jaspe waĩcuri utā gosesiriro dopa gosesiriabu. Eropiro
 vidrio iro dopa ōaro deco suriabu iri maca. 12 Eropiro wuuri sãriro ũmari
 sãriro erā sãri sãra maca āhrabu. Doce gohra disipororicuabu iri sãriro.
 Iri disipororĩ cohreama anyua. Iri maca disipororĩ bihariserigue Israe
 masa cururi doce cururi nucu erā waĩ tuhyabu. 13 Abe murĩriropu iri
 sãriro opabu ũhre disiporo. Surpu ũhre disiporo opabu. Nortepure ũhre
 disiporo opabu. Abe ñajaropu sãre ũhre disiporo opabu. Árĩpehrero doce
 disipororĩ gohra opabu iri sãriro. 14 Iri sãriro doce utā weca peyabu. Iri
 utā nucu Cordero Īgu apinirā doce Īgu apinirā gua yujurāyeri waĩ tuhyabu.

15 Eropigu anyu yure weregu queodigu oro mera erā iidigere opāmi.
 Iri macare, iri maca maja disipororĩ sãre, iri sãriro sãre queobu iiami.
 16 “Iri maca yoaropē ta ehya,” arāmi queotuhagu. “Ūmaro sã iripēta
 ũmaa,” arāmi. Eropigu anyu Īgu queodigu mera iri macare queoami. Iri
 maca dos mil doscientos kilómetros yoari maca āhrabu. Iripēta ehya
 maca āhrabu. Iripēta ũmaro āhrabu. 17 Eropigu iri maca maja sãrirore
 queoami anyu. “Sesenta y cuatro metros ũmaa,” arāmi. Mari masa queoro
 dopa ta queogu iiami Īgu.

18 Iri sãriro jaspe waĩcuri utā mera Īgu iira sãriro āhrabu. Eropiro iri
 macapu oro mera Īgu iira maca āhrabu. Iri oro guhrrari mariri árĩro
 ōaro deco suriabu. 19 Iri sãriro doca árĩri utāre baja gajiropa árĩriyeri
 tuhyabu ōaro deyoboro dopa. Iriyeri wajapagariyeri āhrabu. Iriyeri
 tuyara utā sãriro doca oyari utā doce utā āhrabu. Árĩmuhtari yegue jaspe
 waĩcuri utāyeri tuhyabu. Iriye pũhru maja yeguere safiro waĩcuri utāyeri
 tuhyabu. Peye pũhru maja yeguere ágata waĩcuri tuhyabu. Ūhreye pũhru
 yeguere esmeralda waĩcuri utāyeri tuhyabu. 20 Wapicuriye utāye pũhru
 maja yeguere ónice waĩcuri utāyeri tuhyabu. Yuju mojtocu maja pehreri
 utā pũhru maja yeguere cornalina waĩcuri utāyeri tuhyabu. Seis pũhru
 majaye utāyeguere crisólito waĩcuri utāyeri tuhyabu. Siete pũhru árĩriye
 utāyeguere berilo waĩcuri utāyeri tuhyabu. Ocho pũhru árĩriyeguere
 topacio waĩcuri utāyeri tuhyabu. Nueve pũhru árĩriyeguere crisoprasa
 waĩcuri utāyeri tuhyabu. Diez pũhru árĩriyeguere jacinto waĩcuri utāyeri

tuhyabu. Once puhru árriyeguere amatista waĩcuri utāyeri ujutuyabu. ²¹ Eropiro doce disiporori doce perla mera igu iiraseri āhrabu. Iriseri nucu yujuye perlaye mera igu iira dihta āhrabu. Eropiro iri maca wari maha oro mera igu iira maha āhrabu. Iri oro guhrari mariri oro āhrabu. Eropiro ōaro deco suriri maha āhrabu iri maha.

²² Iri macare Goāmu wihire ĩabirabu. Marabu. Iri maca árĭpehrerogue mari Opure Goāmu turatariagure, Cordero sare umupeoama masa. Eropiro iri maca árĭpehrero Goāmu ya wihi iro dopa āhrabu. ²³ Eropigu iri maca Goāmu igu gosesiriri mera ōaro boyoabu. Cordero sā sihāgodiru iro dopa boyoami. Eropirā abe umu majagu sare ĩami majagu sare ero boyocū gamebirama. ²⁴ Eropirā i yeba majarā Goāmu Cordero sā boyori mera árĭrācoma Goāmu igu taunirā. Eropirā árĭpehreri yeba majarā oparā iri macague ōatariari erā oparire airā erarācoma. ²⁵ Eropiro umure iri maca maja disiporori pāgūra disiporori árĭroca. Eroguere ne ĩami mariroca. Eropirā iri disipororire ne bihasome. Eropiro toyoniguia. ²⁶ Eropirā baja yebari majarā ōarire erā oparire iri macague airā erarācoma. ²⁷ ĩeripure iri macaguere ne aĩsome. Guhyasĩricū ĩirā, ĩerire ĩirā, ne iri macaguere wasome. Guyarā sā wasome. Cordero igu gojarapū erā waĩ gojatusunirā dihta iri macaguere warācoma. Iripū igu taurā erā waĩre igu gojaturapū āhraa. Iripūgue erā waĩ gojatusunirā eropa árĭnigucārācoma igu mera.

22

¹ Puhru ōariyare ojocaricū ĩiriyare ĩhmuami yure anyu. Iriya deco suririya Goāmu, Cordero sā erā doarogue aririya āhrabu. ² Eropiro iri maca deco yuriabu iriya. Iriya pepuri masegure ojocaricū ĩiri yucu niguiabu. Iri yucu aberi nucu ducacua. Yuju bojorire doce suburi ducacua. Eropirā iri yucu maja pūri mera ōaro oocurācoma masa i yeba majarā. ³ Iri macare ne pūri mariroca. Iri maca Goāmu igu opu árĭro árĭroca. Cordero igu opu árĭro sā árĭroca iri maca. Eropirā igu pohro majarā árĭrā igu pohro mereja igure umupeorācoma. ⁴ Erā Goāmure ōaro ĩanigucārācoma. Eropirā erā diaporire erā igu waĩre tuyasūrā árĭrācoma. ⁵ Eroguere ĩami ne mariroca. Eropirā sihāgori dipureure gamesome ero árĭrā. Abe igu boyocū sare gamesome. Mari Opu Goāmu igu boyoro árĭroca. Eropirā iri maca árĭrā gajirā tauro oparā eropa árĭniguirācoma.

Jesucristo i yebague igu dujariboro merogā duhyaa, arĭ gojañumi ũu

⁶ Puhru anyu yure ōpa arāmi:

—Árĭpehrerire mu ĩha gojara diaye āhraa. Eropiro gua mure eropa arĩdiru dopa ta eropa waroca. Mari Opu Goāmu igu yare weremuhtarare masicū iigu āhrimi. ĩgupu dohpaguere yure ĩgu yagu anyure obeomi igu pohro majarāre masicū iibu. Puhru maja dohpa waborore masicū iibu, ĩgu yure igu yagu anyure obeomi, arāmi anyu yure.

⁷ Jesupu ōpa arāmi:

—Peeque mua. Merogā duhyaa yu dujariboro. Ipū maja weremuhtarare tarinugabirinirā mucubirinā árĭrācoma, arāmi Jesu.

⁸ Yuhu ũu i árĭpehrerire yu goja airare peeabu. Eropigu irire ĩhabu. Eropigu yu peera puhru, yu ĩara puhru yure ĩhmudigu anyu pohro merejarabu umupeobu. ⁹ Yu eropa ĩicū ĩagu ōpa arāmi yure:

—Yure mereja umupeobita. Mu iro dopa ta yu sã Goãmũ pohro majagu ta aãraa. Mu acawererã Goãmũ yare weremuhtarã, árĩpehrerã ipũ maja dorerire iirã sã erã árĩro dopa ta yu sã Goãmũ pohro majagu ta aãraa. Eropigu Goãmũpure mereja igure umupeoque, arãmi anyu yure.

¹⁰ Eropigu õpa arĩ werenemoami yure:

—Ipũ mu goja airapũ puhru maja dohpa waborore werea. Eropa waboro merogã duhyaa. Eropa árĩcũ ipũ wererare dibubita muhũ.

¹¹ Irisubu yu wererisubure ñerãpũ eropa iiniguicoma ñerire. Õarãpũ õaro iiniguima. Eropirã erãpũ ñeri marirã árĩrãcoma, arãmi yure anyu.

¹² Õpa arãmi Jesu:

—Peeque mua. Merogã duhyaa yu dujariboro. Muare yaharãre yu wajayeborore aigãribu iiaa. Eropigu õarire mua iira waja muare õaro iigura. ¹³ Yuhũ árĩpehrerire ihacũnugudigu aãraa. Eropigu árĩpehrerire pehrecũ iibu aãraa.

¹⁴ “Árĩpehrerã guhrari mariri suhrire sañanirã árĩro dopa ta erã ñeri iirare coenirã iri macaguere ejarãcoma. Eropirã iri maca maja yucu ojocaricũ iiri yucu ñucare barãcoma. Eropirã mucubirirã árĩrãcoma erã.

¹⁵ Iri macague ejabirãpũ õpa aãrĩma: Ñetariarã, yeea sã, nome mera ñero iirã, uma mera ñero iirã nome, masare wejẽrã, goãmarã wãanirãre umupeorã, guyaricũrã sã aãrĩma iri macague ejabirã, arãmi Jesu.

¹⁶ Eropigu õpa arĩnemoami Jesu yure:

—Yuhũ Jesu yahagu anyure obeobã muare yaharãre ipũ majare werebure. Opũ Davi arĩturiagu pãrami aãraa yuhũ. Yuhũ boyomãririduru iro dopa arĩgu muare õaro árĩcũ iigu aãraa, arĩ werenemoami Jesu.

¹⁷ Espĩritu Santo Jesure “Dujarique,” arĩmi. Jesu yarã sã igũ mojoto diribo dopa árĩrã, “Dujarique,” arĩma. Árĩpehrerã erã “Dujarique,” erã arĩcũ peerã sã, “Dujarique,” arĩporo Jesure. Ñemesiburã decore erã turaro gamero dopa ta Goãmũ pohrogue wadiarã Jesure turaro gameporo. Igũ ojocaricũ iiri deco iro dopa aãrĩmi. Igũ gamerãre waja gamero mariro umarogue erã eropa árĩniguicãborore ogũcumi Goãmũ.

¹⁸ Yuhũ Ñu árĩpehrerã ipũ maja wererire, Goãmũ yare weremuhtarare peenirãre õpa arĩ muare guhyadiaro mera weregurã. I buheri mera gaji buheri mera moresũ werenemorã Goãmũre tarinugarã iima. Erã eropa tarinugacũ iagu árĩpehreri ipũ igũ dipuwaja moaburire igũ werero dopa ta apigũcumi erã sãre. Eropigu eropa erã sãre dipuwaja moagũcumi.

¹⁹ Eropirã ipũ maja wererire i Goãmũ yare weremuhtarare goroweorã Goãmũre tarinugarã árĩrãcoma. Erã eropa tarinugacũ iagu ojocaricũ iiri yucu ñucare erãre badoresome. Eropirã Goãmũ mera árĩniguisome erã. Eropirã igũ ya macague õari macague wasome erã. Iri yucũre, iri maca sãre ipũ mera erã wererage aãraa.

²⁰ Árĩpehreri ipũ majare weregu Jesucristo õpa arĩmi.

—Eropa ta aãraa. Merogã duhyaa yu i yebague dujariboro, arĩmi igũ.

Eropigu yurũ õpa arĩtuã iiaa.

—Eropa ta iique. Gũa Opũ Jesu dujarique, arãa yuhũ.

²¹ Mari Opũ Jesu igũ itamuro mera árĩpehrerã mua Goãmũ yarã õaro arĩque. Eropa ta árĩrã. Iripẽta aãraa.